


Compromisu xi majo xi casahmi nina cojo xuta (El  
Nuevo Testamento en el mazateco de Chiquihuitlán  
de Juárez ... y en español)



New Testament in Mazatec, Chiquihuitlán (MX:maq:Mazatec,  
Chiquihuitlán)

**Compromisu xi majo xi casahmi nina chojo xuta (El  
Nuevo Testamento en el mazateco de Chiquihuitlán de  
Juárez ... y en español)  
New Testament in Mazatec, Chiquihuitlán (MX:maq:Mazatec,  
Chiquihuitlán)**

copyright © 1991 Wycliffe Bible Translators, Inc.

Language: Mazatec, Chiquihuitlán

Translation by: Wycliffe Bible Translators, Inc.

Mazateco, Chiquihuitlán [maq], Mexico

**Copyright Information**

© 1991, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mazatec, Chiquihuitlán

© 1991, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022  
3ee7eab4-2659-54e8-8e90-b0a016392daf

## Contents

San Mateo . . . . .	1
San Marcos . . . . .	47
San Lucas . . . . .	77
San Juan . . . . .	130
Hacutjin Casahmi Apóstol . . . . .	169
Romanos . . . . .	215
1 Corintios . . . . .	234
2 Corintios . . . . .	251
Gálatas . . . . .	263
Efesios . . . . .	269
Filipenses . . . . .	275
Colosenses . . . . .	280
1 Tesalonicenses . . . . .	285
2 Tesalonicenses . . . . .	289
1 Timoteo . . . . .	291
2 Timoteo . . . . .	297
Tito . . . . .	301
Filemón . . . . .	304
Hebreos . . . . .	305
Santiago . . . . .	320
1 Pedru . . . . .	325
2 Pedru . . . . .	331
1 Juan . . . . .	334
2 Juan . . . . .	339
3 Juan . . . . .	340
San Judas . . . . .	341
Apocalipsis . . . . .	343

## Cjuandajyihi xi catsihindu San Mateo Tsèhë Jesucristu

### *Xutachanga rë Jesucristu*

<sup>1</sup> Xujun vihi ne, setaha xujun ñihi rë xutachanga rë Jesucristu, me xi tjë rë David, hacuaha tjë rë Abraham.

<sup>2</sup> Abraham ne, me vèhë xi xutachanga xi má nahmi rë Isaac. Isaac ne, me vèhë xi xutachanga xi má nahmi rë Jacob. Jacob ne, me vèhë xi xutachanga xi má nahmi rë Judá cojo hntsë cha. <sup>3</sup> Judá ne, nahmi má me tsèhë Fares cojo Zara; naa rë me ne, Tamar hmi rë. Fares ne, me vèhë xi xutachanga xi má nahmi rë Esrom. Esrom ne, me vèhë xi xutachanga xi má nahmi rë Aram. <sup>4</sup> Aram ne, me vèhë xi xutachanga xi má nahmi rë Aminadab me xi xutachanga xi má nahmi rë Naasón, me vèhë xi xutachanga xi má nahmi rë Salmón. <sup>5</sup> Salmón ne, nahmi rë Booz me; hane Rahab ne, naa rë me. Booz ne, nahmi má me tsèhë Obed. Naa rë me vë; má Rut. Obed ne, me vèhë xi xutachanga xi má nahmi rë Isaí. <sup>6</sup> Isaí ne, me vèhë xi xutachanga xi má nahmi rë David. David jan ne, me vèhë xi cavitexa nangui rë Israel. Hane David ne, me vèhë xi xutachanga xi má nahmi rë Salomón. Naa rë Salomón ne, titjun chjuun rë Urias camá me.

<sup>7</sup> Salomón ne, me vèhë xi xutachanga xi má nahmi rë Roboam. Roboam ne, me vèhë xi xutachanga xi má nahmi rë Abías. Abías ne, me vèhë xi xutachanga xi má nahmi rë Asa. <sup>8</sup> Asa ne, me vèhë xi xutachanga xi má nahmi rë Josafat. Josafat ne, me vèhë xi xutachanga xi má nahmi rë Joram. Hane Joram ne, me vèhë xi xutachanga xi má nahmi rë Uzías. <sup>9</sup> Uzías ne, me vèhë xi xutachanga xi má nahmi rë Jotam. Jotam ne, me vèhë xi xutachanga xi má nahmi rë Acaz. Acaz ne, me vèhë xi xutachanga xi má nahmi rë Ezequías. <sup>10</sup> Ezequías ne, me vèhë xi xutachanga xi má nahmi rë Manasés. Manasés ne, me vèhë xi xutachanga xi má nahmi rë Amón. Amón ne, me vèhë xi xutachanga xi má nahmi rë Josias. <sup>11</sup> Josias ne, me vèhë xi xutachanga xi má nahmi rë Jeconías cojo hntsë cha. Nixtin hya ne, xutaxín ne, cafaxin me xuta nangui rë Israel, quijicojo me xuta jan nangui Babilonia.

<sup>12</sup> Hane xi cama quiji me Babilonia, Jeconías vë ne, camá me vèhë xutachanga xi má nahmi rë Salatiel. Salatiel ne, me vèhë xi xutachanga xi má nahmi rë Zorobabel. <sup>13</sup> Zorobabel ne, me vèhë xi xutachanga xi má nahmi rë Abiud. Abiud ne, me vèhë xi xutachanga xi má nahmi rë Eliaquim. Eliaquim ne, me vèhë xi xutachanga xi má nahmi rë Azor. <sup>14</sup> Azor ne, me vèhë xi xutachanga xi má nahmi rë Sadoc. Sadoc ne, me vèhë xi xutachanga xi má nahmi rë Aquim. Aquim ne, me vèhë xi xutachanga xi má nahmi rë Eliud. <sup>15</sup> Eliud ne, me vèhë xi xutachanga xi má nahmi rë Eleazar. Eleazar ne, me vèhë xi xutachanga xi má nahmi rë Matán. Matán ne, me vèhë xi xutachanga xi má nahmi rë Jacob. <sup>16</sup> Jacob ne, má me nahmi rë José, xihin rë María naa rë Jesús me xi hacuaha yaha ñihi rë Mesias.

<sup>17</sup> Cuatjin camá xi cavatju teñuju ndiya xi cavatju xi cjin xuta tsetsin me nixtin rë Abraham hisca nixtin rë David. Hacuaha cama teñuju ndiya xi cjin xuta tsetsin me nixtin rë David hisca hya xi xutaxín jan ne, cafaxin me xuta nangui rë Israel, quijicojo me xuta nangui Babilonia. Hane hacuaha camá teñuju ndiya tsèhë nixtin hya hisca nixtin xi catsin Mesias.

### *Hya xi catsin Jesucristu*

<sup>18</sup> Cuitjin camá nixtin xi catsin Jesucristu: María, naa rë Jesús ne, tacun vasen cjuavixan rë na cojo José. Peru chaja sa xi cjuaha xicjin na cojo me ne, casacu rë na quihndi ngatsë rë Hasen rë Nina. <sup>19</sup> José, me xi cuixan cojo na jan ne, tyahi me cojo cjuatacun rë me xcun Nina. Hane xi mijí scandi me cjuasava rë na, catsingatahacacun me xi taha hma ni ne tsismicacun me na. <sup>20</sup> Cuatjin catsingatahacacun me xi sahi me peru hora hya ne, cafehetejen ngu ángel rë Nina ngajñi chini rë me, hane cuitjin cachja ángel:

—José, ngaye quihndi tjë rë David, ximacjintacuín xi chjehentse María cuma chjuun riji na ta, sacuaha quihndi xi yaha na ne, ngatsë rë Hasen rë Nina, camá xi casacu rë na. <sup>21</sup> Tsin rë na ngu quihndi xihin. Quihndi vë ne, tehe ñihi rë Jesús. Cuatjin cjuaha ñihi ta, tsèhë xi cuaxëtje rë xuta rë tsèhë jyë rë me.

<sup>22</sup> Yëjë xcusun vihi ne cuatjin cama, cojo sa xi cuetjucaa jain cjuaxi cachja profeta nixtin hatsëë cuitjin:

<sup>23</sup> Ngayujun ni nutsujun ta ngu chjuun xungun ne, sacu rë na ngu quihndi xihin.

Quihndi jan ne, suañihi me Emanuel.

Emanuel ne, vèhë cjuaxi vijne: Nina ne, jiya me ngajñi naja.

<sup>24</sup>Ngajan xi hya xi cavasca rë José ne, casahmi me tutjin cachja ángel cojo me. Cafahatsja me María ne xi camá chjuun rë me na. <sup>25</sup>Peru hisca xi cavatju catsin quihndi ne, sehe caviyuju cojo xicjin me. Hane casuañihri rë me quihndi jan, Jesús.

## 2

*Ngu jo cha xi vechu cjuatacun rë ne, cavëë cha niñú tsëhë Jesucristu*

<sup>1</sup>Nixtin xi catsin Jesús nangui Belén, distritu Judea, nixtin hya ne, Herodes vitexa me xuta nangui vë. Hacuaha nixtin hya ne, ngu jo cha xi vechutaha cjuatacun rë ne, cavetjun cha ladu vetjucaa tsuhi cafehe cha nandya Jerusalén. <sup>2</sup>Hane cuitjin cachja cha:

—¿Jani sacu niji quihndi xi cuitexa nangui Israel? ta cahyin xi cavetjucaa niñú rë me ngajan ladu vetjucaa tsuhi. Hane nduvintjenguin me xi chjihinrcuin me.

<sup>3</sup>Hya xi cama ne, jemu cama xti rë Herodes xi tu cahndë me cjuaja jan; cojo xuta nangui Jerusalén ne, cama xti rë me. <sup>4</sup>Hya xi cama ne, Herodes ne, cajindayahava me yëjë ni nahmi xi matitjun cojo yëjë cha vícuya cjuachacun rë xuta nangui Israel. Sehe cavinenguise me ¿jani xi tsin xu me xi má Cristu? <sup>5</sup>Hane cuitjin cafayangui me:

—Ngajan nandya Belén, distritu Judea tsin ta cuatjin catsihindu profeta tsëhë nandya jan xi ngajan tsin quihndi:

<sup>6</sup>Ngaye, nandya Belén, ngaye nandya tsëhë xuta tjë rë Judá,

hacuaha venguí chji ri xcun xuta matitjun nangui Judá.

Ta ngajñi rë xuta riji ne cuetjutsejen ngu me xi cuitexa rë xuta naha, xuta nangui Israel.

<sup>7</sup>Hya xi camá ne, Herodes ne, cajindayahama me cha xi vechu cjuatacun rë jan. Cafahataha rë me cha. ¿Mé hora cjuaquixi tsëhë mé nixtin camatsejen niñú jan? <sup>8</sup>Ngaxtun vëhë ne, sehe cavitexa me cha xi cjue cha Belén. Hacuaha cuitjin cachja me cojo cha:

—Tangun ngajan Belén. Chjinengunsundujun yëjë tsëhë quihndi. Hane xi sacu nju cjuaquixi ne, ningatjun ná cjuaja sehe cojo ngahan ne hacuaha cjuë cjuahárcun quihndi.

<sup>9</sup>Xi cavihndë cha xi cuicun vi cjuaja jan, cavetju cha quiji cha. Hane niñú xi cavetjucaa ngajan ladu vetjucaa tsuhi jan ne, hacuaha quiji titjun hisca xi cavechu cahndë hiscan xi jiná quihndi, hane ngajan cavasén. <sup>10</sup>Hane xi cavëë cha niñú xi ngajan cavasen ne, jercu tu ndama camaha ni rë cha. <sup>11</sup>Hane xi cavisehen cha ndihya hiscan siu me ne, cavëë cha quihndi jan. Hacuaha cavëë cha naa rë me, xi hmí rë María. Sehe quiji cavixcuhnchi cha cafaharcun cha quihndi jan. Hane sehe cavuxaha cha hiscan hincha rë cha cuatjo, hane casua cha oro cojo tyjungunsa cojo tyjungunje xi hmí rë mira. <sup>12</sup>Hya xi cavatju vëhë ne, tsëhë xi cachja chini cojo rë cha xi cuyaaín cha taha ladu hiscan tacun Herodes ne, tahaxin cavuya cha nangui rë cha.

*Quiji me hiscan nangui Egipto*

<sup>13</sup>Hya xi quiji cha xi vechu cjuatacun rë jan ne, cafehetsejen ngu ángel rë Nina ngajñi chini rë José, hane cachja cuitjin:

—Tisatjinhngue, tihincueje quihndi cojo naa rë. Tiyun hiscan nangui Egipto. Hane ngajan cuinechun hisca xi tsingátju cjuaja xi cuyun. Cuatjin nihñu ta tsëhë xi Herodes ne, cuanguise me quihndi xi tsiquehen me.

<sup>14</sup>Hane cavisatjenhnga me nixten quijicojo me quihndi jan cojo naa rë, cafe me Egipto. <sup>15</sup>Hane xi cafehe me ngajan Egipto ne, ngajan caviyujutaha me hisca nixtin xi cahme Herodes. Cuatjin cama sehe hatuxa camachihin cjuaja xi catsingatju Nina cojo profeta rë me hatsëë nixtin. Cuitjin chja cjuaja jan: “Cajindáya rë quihndi naha xi nduvaniji tsëhë nangui Egipto.”

<sup>16</sup>Hya xi camachaya rë Herodes xi camá cavindacha cha xi vechu cjuatacun rë jan ne, jercu cama cjan rë me. Hane cavitexa me yo xi tsiquehen rë yëjë ni quihndi xihin xi cjëë cjuë jyan nu, yëjë ni quihndi nandya Belén cojo distritu rë. <sup>17</sup>Vëhë cjuaja xi cachja Nina xi catsihindu profeta Jeremías:

<sup>18</sup>Vinuhya rë cjuava ngajan nandya Ramá.

Jemu tjin cjuandusin.

Na Raquel ne, jihndava na ngatsë rë quihndi rë na.

Hane tsajin cjuetacun xi cuma rë na ta tsëhë xi ha café quihndi.

<sup>19</sup>Hane xi cavatju cahme Herodes ne, cavuya cafehetsejen nga ángel rë Nina ngajñi chini rë José ngajan Egipto ne, <sup>20</sup>cuitjin cachja:

—Tisatjinhngue tihincueje quihndi cojo naa rë. Tihinniji nandya Israel. Tihin ta tsëhë xi ha cahme cha xi meje tsiquehen rë quihndi. Cuatjin cachja.

<sup>21</sup>Hya xi camá ne, cavisatjenhnga José ne, sehe cavetju me quijicojo me quihndi cojo naa rë, hane sehe cavisehen nga me nangui Israel. <sup>22</sup>Peru xi cahndë José xi Archelaus vitexa me distritu Judea ta me vëhë vitexa me ngojo rë nahmi rë me, Herodes, vëhë xi camacjincacun José mijí cjue me ngajan. Hane xi cachja chini cojo rë me ne, sehe cavisehen

me distritu Galilea. <sup>23</sup> Caviyujutaha me ngajan ngu nandya xi hmí rë Nasaret. Cuatjin cama sehe cuetjucaa cjuua xi catsihindu profeta tséhë me xi xuta ne, cuichja me xi Jesús ne, xuta Nasaret me.

### 3

*Cachja Juan Vitenda rë Xuta ngajan ngu xín tséhë nandya*

<sup>1</sup> Nixtin hya ne, cavetjucaa tsejen Juan Vitenda rë Xuta ngajan nguijña tséhë distritu Judea. <sup>2</sup> Cuitjin catsiquihndë me xuta:

—Nindeyun cjuatacun nuju ta, camatiña nixtin xi Nina ne, cuitexa me ngasunhndë.

<sup>3</sup> Cuatjin tséhë cha Juan vihi, cha vihi xi camahindu tséhë cha xcun xujun xi chja cjuua rë profeta Isaías xi chja cuitjin:

Cuitjin jercu hñu tsiquihndë ngu xuta ngajan hiscan jemu xín tséhë nandya:

“Tuhun chjину ndiya xi cuinduva Nina;

hacuaha ninguxun cjuatacun nuju tséhë me.” Cuatjin cachja me.

<sup>4</sup> Tsjian rë Juan jan ne, tsja rë chu camellu camá hacuaha cojo ngu cinturón chuxin tsihñu me cahntsua me. Hane xi jinë me ne, chu nchahva cojo tsjen rë chu tusen. <sup>5</sup> Hane jemu cjín xuta quijitjengui me Juan, xuta nandya Jerusalén, xuta distritu Judea cojo xuta xi siutahandee rë ndajyë Jordán. <sup>6</sup> Xuta jan, xi cavijacun me jyë rë me cojo Nina camá cavitenda Juan me ngajan ndajyë Jordán.

<sup>7</sup> Peru xi cavutsejen Juan xi cjín xuta tifehe tixtenda me; cha tséhë partidu fariseo cojo cha tséhë partidu saduceo ne cachja me cojo cha cuitjin:

—Ngayujun ni ngayun quihndi rë chu tsehen matsejen ne!, ¿yo cavinchangui nuju xi nihñu ngahñu xi cjuetjuntjun tséhë castigu xi hatuxa tsingatju Nina? <sup>8</sup> Sá xi meje jain cjuetjuntjun me cahntsua me, nihñu súv cjuandaja sacuatjin sahmi xuta xi catsindeya jain me cjuatacun rë me. <sup>9</sup> Xicanujuun cahntsua xahasen nuju cjuua vihi: “Ngayaan ne, tsajin mé cuma naja ta, tséhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca cojo ndoyojo xi cuicun vi ne, cuma sahmi me xi cumá tjë rë Abraham. <sup>10</sup> Chutsujun ta ngayun matsejen ne, tangun ngayun cojo yatjë xi ha quitahachjine quicharcu tyjama rë xi cuetsihin xti rë. Yëjë ni yatjë xi suaain tu xi ndaja matsejen ne, xti rë, sehe cueti. <sup>11</sup> Ngahan matsejen ne, cojo nandá ni tivitenda nuju, peru sehe cuinduva me xi hitsë sa jyë ngahñu tjin rë cjuatacun rë xi cuma ná ngahan, me xi hitsë sa jyë hnga cojo cjuatacun rë xi cuma ná ngahan. Hane me vëhë cueya me Hasen rë Nina cahntsua xahasen nuju, hacuaha tangun me sacuaha ngu ndihi xi tsityjahi rë cjuatacun nuju. <sup>12</sup> Me vëhë matsejen ne, sacuaha xi ha yahatsja me quicha xi tsicaha rë xtë rë trigu cojo sa xi cuma tyjahi ndaja trigu xi casechun rë tséhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ndihi xi tsajin nixtin coho. —Cuatjin cachja Juan.

*Caxtenda Jesús*

<sup>13</sup> Nixtin hya ne, hacuaha cavetju Jesús tséhë distritu Galilea hane cafehe me ndajyë Jordán xi xtenda me. <sup>14</sup> Peru mijí sua Juan cahndë ta cachja me:

—Hitsë sa ndaja xi ngayun cuitendun ná. Hacuini xi ngahan cuitenda nuju.

<sup>15</sup> Ngajan xi cafayangui Jesús cuitjin:

—Jéya, cuatjin ndatjin xi cuma quihndë ta mameje rë xi cumachihin yëjë xcusun xi cavitexa Nina.

Hane catsingatihin Juan ne, cavitenda me Jesús. <sup>16</sup> Xi cama caxtenda Jesús ne, xi tu tivetju me tséhë nandá jan ne, ngajan cavëë me xi ngahnga ne, catuxaha. Hane Hasen rë Nina ne, canduvajnetsejen casesun rcu me. Hane sacuajyihí xcusun rë ngu paloma jyihí.

<sup>17</sup> Hacuaha canuhya rë ngu cjuua ngajan ngahnga xi cachja cuitjin:

—Cha vihi xi quihndi naha xi hmú cáacun. Jemu ndama ná ngatsë rë cha.

### 4

*Cafahachuva Satanás Jesús xi choho sahmi me*

<sup>1</sup> Hya xi camá ne, Hasen rë Nina ne, quijiniji xu cojo Jesús ngajan ngu xín tséhë nandya ta ngajan cjuahachuva xitsehen me.

<sup>2</sup> Hya xi cama ne, Jesús ne, yachan nixtin cojo yachan nixten cajinii me niñu. Hya xi cavatju vëhë ne, jercu camavojo rë me. <sup>3</sup> Sehe camatiñataha xu xitsehen xi cjuahachuva rë me. Cachja cojo rë me cuitjin:

—Sá xi ngaye jain xi Quihndi rë Nina ngaye ne, tinoje cojo ndoyojo vihi ne, catama niñu.

—Cuatjin xu cachja xitsehen cojo rë me.

<sup>4</sup> Peru cuitjin cafayangui me tséhë xitsehen jan:

—Xcun xujun rē Nina ne, cuitjin camahindu: “Hacuiin suvá ngatsē rē niñu xi siu xuta cjuahñu ta hacuaha mameje rē me tsēhē yējē ni cjuā xi catsingatju Nina.”

<sup>5</sup> Sehe xitsehen jan quijicojo xu rē me nandya Jerusalén, nandya ximinchacun, quijisun xu me rcu cjin yungun xi matitjun <sup>6</sup> sehe ngajan xi cachja xu xitsehen:

—Sá xi ngaye jain xi Quihndi rē Nina ngaye ne, ningatjin yojo riji tsēhē ndyá ne hisca nangui. Ndaja hye ta tsajin mé cuma ri ta xcun xujun rē Nina ne, cuitjin chja:

Nina ne cuitexa me ángel rē me xi sahmi ri cuidadadu.

Cjuahántsā ri,

cojo sa xi ntsacui ne, sacuinhmuaain rē cojo hisca ngu ndyojo.

<sup>7</sup> Ngajan xi cafayangui xu Jesús tsēhē xitsehen cuitjin:

—Hacuaha cuitjin chja xcun xujun rē Nina: “Mijí rē xi chjuhunchuvun Nina nuju.”

—Cuatjin xu cachja Jesús.

<sup>8</sup> Hane ngu ndiya nga quijicojo xitsehen Jesús, quijicojo rē me ngu ndetjún hnga ne, sehe catsingacun xitsehen jan me jinguyjē ni nandya tsēhē ngasunhndē cojo yējē ni cjuanchina xi tjin rē. <sup>9</sup> Ngajan xi cachja xitsehen cojo rē me cuitjin:

—Suá ri yējē nandya xi cuacún vē cojo cjuanchina rē. Hatuxa suá ri sa xi cuindove cuiticjexcuin nguehe xi chjehercuin ná.

<sup>10</sup> Sehe cafayangui Jesús tsēhē xitsehen cuitjin:

—Tihinxin Satanás, ta tsēhē xi xcun xujun rē Nina ne, cuitjin camahindu: “Meje rē xi chjuhuncun Nina naja, hacuaha ngu ni me vēhē xi meje rē xi nihñuchuhun hacutjin xi meje rē me.”

<sup>11</sup> Xi cuatjin xu cachja Jesús cojo xitsehen jan ne, cavetjuxin tsēhē me. Hane cafehe tjengui ángel me xi cjuahacuenda rē me.

*Jesús ne, vetsihin sahmi me xa ngajan distritu Galilea*

<sup>12</sup> Xi camachaya rē Jesús xi jiya Juan Vitenda rē Xuta ndavaya ne, quiji me distritu Galilea. <sup>13</sup> Hane cavetjuxin me tsēhē nandya Nasaret, quiji caveña me nandya Capernaum. Nandya jan ne, tacun tjehe rē ndajyē. Hane nandya jan ne tsēhē xuta tjē rē Zabolón cojo Neftalí. <sup>14</sup> Cuatjin cama sehe camachihin cjuā xi camahindu xcun xujun xi chja cjuā rē profeta Isaias xi chja cuitjin:

<sup>15</sup> Xuta xi viyuju me nangui rē Zabolón cojo Neftalí, nangui ngajan ngunda ndajyē Jordán, ngajan tjehe rē ndachacun, tsēhē distritu Galilea, nangui rē xutaxin.

<sup>16</sup> Xuta jan xi jñu cjuatacun rē me, cavēē me ngu me xi sacuaha ngu ndihi seti xi sua rē me cjuahasen.

Xuta xi jemu tsavi siu me tsēhē cjuaveya, ndihi jan ne casua rē me hasen rē.

<sup>17</sup> Nixtin hya ne, Jesús ne, cavetsihin catsuyihiya me cachja me cojo xuta cjuā rē Nina. Cuitjin cachja me:

—Nindeyun cjuatacun nuju ta tsēhē xi camatiña nixtin xi Nina ne cuitexa me ngasunhndē.

*Jesús ne, jindaya me cha xi tjun cumá xuta ladu rē me*

<sup>18</sup> Cama ngu nixtin xi tsuyihiya me ngajan tjehe laguna tsēhē Galilea ne, cavēē me jo me xi hntsé, ngu me xi hmí rē Simón cojo ngu me xi hmí rē Andrés. Titsingatjenya me changa ngajñi ndachacun, tsēhē xi hatuxa xá rē me xi faha me chu ti. <sup>19</sup> Hane Jesús ne, cachja me cojo me cuitjin:

—Nduvun cuanguen cojo ná. Hane cuicuyá nuju xi cuangun nuvun xuta xi cuisehen me ladu naha ngojo rē xi nuvun chu ti. —Cuatjin cachja me.

<sup>20</sup> Hane hora vēhē ni caviyuju me changa jan, hane cavetju me quiji me cojo Jesús.

<sup>21</sup> Hitsē sa nguan ne, cavēē Jesús jo cha xi hacuaha hntsé: Jacobo cojo Juan, cha quihndi rē Zebedeo. Hincha cha cahntsua barcu cojo nahmi rē cha, ngajan tifuyataha cha changa rē cha. Hacuaha cajindaya Jesús cha xi cjucojo me cha. <sup>22</sup> Sehe caviyuju cha barcu jan, hane caveña cha nahmi rē cha quiji cha cojo Jesús.

<sup>23</sup> Hane Jesús ne, catsuyihiya me yējē ni ladu tsēhē distritu Galilea. Xi cavisehen me yungun ne, cavicuya me xuta, cachja me cojo xuta cjuandajyihí tsēhē gobiernu xi sahmi Nina. Hacuaha catsirqui me xuta hmu rē; camandaja xuta tsēhē yējē ni chíhin cojo tsēhē yējē ni cjuahmu rē me. <sup>24</sup> Hane cavitsojo cjuā tsēhē cjuarcun xi casahmi Jesús. Cavitsojo cjuā jan hisca yējē nangui xi hmí rē Siria. Hane xuta ne, cafehetjengui me Jesús yaha me xuta hmu rē tsēhē yējē xcusun chíhin hane catsirqui me. Hacuaha catsirqui me xuta xi hincha xitsehen cahntsua xahasen rē me cojo xuta xi má rē me chajan cojo xuta xi cahme yojo rē. <sup>25</sup> Hane quijitjengui xutacjin jan Jesús ne, xuta tsēhē cahndē xi cuicun vi: tsēhē tē nandya xi tsēhē Decápolis, cojo nandya Jerusalén, cojo yahnga sa xuta tsēhē distritu Judea, cojo xuta tsēhē nangui ngunda tsēhē ndajyē Jordán.

## 5

*Xuta xi ndaja tsëhë cojo xuta xi hmu tsëhë*

<sup>1</sup> Hya xi cavutsejen Jesús xi camatangun xutacjín jan ne, quijiniji me ngu ndetjun, hane xi cavéjña Jesús ne, casahmitiña xuta tsëhë Jesús. <sup>2</sup> Sehe cavetsihin cavicuya me xuta jan cuitjin:

<sup>3</sup> —Jemu ndaja tsëhë me xi machaya rë me xi tsichaja sa rë cjuatacun rë me xcun Nina matsejen ta satë rë me gobiernu xi sahmi Nina.

<sup>4</sup> Jemu ndaja tsëhë me xi jihndava me tsëhë cjuachoho matsejen ta Nina sua rë me cjuetacun.

<sup>5</sup> Jemu ndaja tsëhë xuta jeya, xuta xi hacuini xta me matsejen ta, cjuahatsja me nangui xi sua Nina.

<sup>6</sup> Jemu ndaja tsëhë me xi sacuaaha sahmi yahnga xuta xi vojo rë xi fi tjengui rë comida, cuanitjin tjengui me xcusun xi cuma tyjahi cjuatacun rë me xcun Nina matsejen ta, cuechu nixtin xi cuiyujuchihin cjuatacun rë me.

<sup>7</sup> Jemu ndaja tsëhë me xi tjin rë cjuayumatacun cojo xuta, ta hacuaaha cjuahatsja me cjuayumatacun tsëhë Nina.

<sup>8</sup> Jemu ndaja tsëhë me xi tjin ngu cjuatacun tyjahi cahntsua xahasen rë me matsejen ta, scuëë me Nina.

<sup>9</sup> Jemu ndaja tsëhë me xi tsinguejyu rë xuta xi chohovëë xicjin me matsejen ta, me vëhë jan ne, cuichja Nina xi quihndi rë me.

<sup>10</sup> Jemu ndaja tsëhë me hya xi tsujyihya tjengui xuta me cojo cjuahngatacun ngatsë rë xi tjin rë me ngu cjuatacun cojo Nina matsejen, ta satë rë me gobiernu xi sahmi Nina.

<sup>11</sup> Jemu ndaja tsujun ngayun ne sá xi ngatsë naha choho cuichja xuta tsujun o sá xi tsujyihya tjengui nuju xuta cojo cjuahngatacun o sá xi cojo cjuandesu tsicanijijyë me ngayun. <sup>12</sup> Nixtin hya ne, jemu catama sua rë xahasen nuju ngatsë rë cjuañihi vë ta jemu jyë ngu cjuandaja xi tacunya nuju ngajan ngahnga. Cuanitjin ni choho casahmi xutachanga naja cojo profeta rë Nina xi caviyuju hatsëë nixtin.

*Xuta ne, meje rë xi sahmi me sacuaaha naxa*

<sup>13</sup> Ngayun, tjin hacutjin machji rëhë ngayun ngajñi rë xuta sacuaaha sahmi naxa xi sahmi xtya rë ngu xichine. Ta sá xi naxa cjuë xtya rë ne, tsajin sa ngu xcusun xi cuma sahmi xtya rë. Hane sá xi cjuë xtya rë ne, tsajin me machji rëhë ta, scandi ni xuta, ngajan ni sune me.

*Má naja ndihi rë ngasunhndë*

<sup>14</sup> Cuanitjin ne, tjin hacutjin machji rëhë ngayun ngajñi rë xuta sacuaaha machji rëhë ngu ndihi xi sua hasen rë. Ta sá xi ndetjun tacun nandya matsejen ne, hatuxa tsejen; tsajin me xi cuatsa rë. <sup>15</sup> Cuanitjin ne, hacuaaha tsajin ngu xuta xi ha xcun xi ha cavetaha rë me ngu ndihi ne, sehe cjuaha me cueyahma me ngahma rë ngu caxa. Hatuxa cjuaha me cueñatsejen me cahndë rë cojo sa xi xuta xi siu me hiscan xi seti ndihi jan ne, cuechu hasen rë. <sup>16</sup> Hacuaniitjin chuya vëhë, meje rë xi nihñu cjuandaja xi scuëë xuta xcusun xi nihñu hane ngatsë rë xcusun jan ne, sahmi jyë me sahmi hnga me Nahmi nuju xi tacun me ngahnga.

*Cjua xi cachja Jesús tsëhë ley rë xuta tjë rë Israel*

<sup>17</sup> Xi caningatuuntacun matsejen xi nduvá tsinguétsun ngahñu rë ley xi catsihindu xutachanga naja Moisés o cjua xi cachja profeta. Cahndë rë xi tsinguétsun ne, sahmechihin cjua jan. <sup>18</sup> Hatuxa cuichjá cojo nuju cjuaquixi ta hya xi tacun cuaha ngahnga ne tacun cuaha ngasunhndë ne, cumaji chjahanxin rë cjua rë ley jan cojo yëjë ni letra rë ta, cuejña cuaha hiscan cumachihin cjua rë. <sup>19</sup> Vëhë xi tu yo ni xi sahmicuendaain tsëhë hisca ngu rquí cjua rë, hane sá cuinchangui me yahnga xuta xi cuanitjin sahmi me, chuya cuengui chji rë me hya xi sahmi Nina gobiernu. Peru tu yo ni me xi cjuahacuenda me hacuaaha tsingacun me xuta xi cjuahacuenda me ley jan, me vëhë cuma titjun me hya xi sahmi Nina gobiernu. <sup>20</sup> Nguehe cuichjá cojo nuju ngayun ta meje rë xi hitsë sa tyjahi cjuatacun nuju xi cumá rë cjuatacun rë xuta xi vicuya me ley o sá xi xuta partido fariseo, ta sá tsajin ne, satiin nuju gobiernu xi sahmi Nina.

*Cjua xi cavicuya Jesús tsëhë xuta xi hngacacun*

<sup>21</sup> Ha hyun cjua xi cafaha xuta hatsëë nixtin xi chja xi canicuun xingun hacuaaha chja xi yo xi tsiquehen xicjin matsejen ne, cjue me xcun juez xi tsichuva me jyë rë me. <sup>22</sup> Peru cuichjá cojo nuju xi hisca yo xi macjan rë cojo xicjin ne, satë rë xi tsichuva me. Hane yo xi chjataha xicjin ne, cjue xcun juez xi matitjun. Cuanitjin yo me xi cuichja tsëhë xuta: “Ngarca ngayun”, cuechji me tsëhë jyë rë me ngajan xcun ndihi xi tsajin nixtin coho.

<sup>23</sup> Ngatsë rë vihi, sá xi hora xi vejñu chjë nuju ngasuncun ne, sá xi tu ñahñu ni vitsjen nuju xi choho canihñu cojo xingun <sup>24</sup> ngajan catejñavasen chjë nuju, titjun cuangun tjengun



xingun, hane chjayun rë me cjuaninchataha hane xi camandaja yun cojo me, sehe cuyun cueñu chjè nuju jan.

<sup>25</sup> 'Sá ndiaya tivangun cojo xuta xi meje cuinchajyë nuju xcun xutaxa rë ne, meje rë xi cuisiajmuchuhun cojo me, cojo sa xi ngajñi nuju cuma chihin ta sá tsajin ne, cjuccojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane cjue cueya nuju me ndavaya. <sup>26</sup> Ta cuichjá cojo nuju cjuaquixi ta hatuxa tsajin nixtin xi cuetjun tséhë ngajan jinguyëjé rë xi cjëë cuechjun yëjé ni tujún xi quitjun.

*Cjua xi cavicuya Jesús tséhë xuta xi sahmi cjuatsehen cojo rë ngu xi hacuiin tséhë me*

<sup>27</sup> 'Ha hyun cjua xi cafaha xuta hatsëë nixtin xi chja cuitjin: "Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun." <sup>28</sup> Peru cuichjá cojo nuju xi hisca xi ngu xihin xi vutsejen me ngu chjuun xi macacun me cojo na, ngajñi cjuatacun rë me ne, ha casahmi me cjuatsehen cojo ran.

<sup>29</sup> 'Hindë sá xi cjuatacun nuju meje rë xi nihñu ngu jyë tséhë xcusun xi chutsujun cojo tuxcuun ladu quixi, hitsë sa ndaja tsujun sá xi chjuhunxun tuxcuun jan chandunxun cojo sa xi hacuiin tsitsehen nuju, ta hitsë sa vengui chji rëhë xi ma chaja nuju ngu rqui yojo nuju hane hacuiin xi cuangun jingu hiscan xi má hasen rë nima castigu. <sup>30</sup> Cuanitjin ne, sá xi cjuatacun nuju meje rë xi nihñu ngu jyë cojo ntsun quixi ne, hitsë sa venguichji rëhë xi chandunxun ntsun jan ta hitsë sa ndaja tsujun xi machaja ngu rqui yojo nuju tséhë xi cuangun jingu hiscan xi má hasen rë nima castigu.

*Jyë rë xuta xi tsismi xicjin me sehe cuixan cojo jingu sa*

<sup>31</sup> 'Hacuaha cafaha xuta hatsëë nixtin cjua xi chja cuitjin: "Ngu cha xi tsismi chjuun rë ne catejña cha ngu xujun tsja chjuun jan xi ha quihndë mijí rë cha na." <sup>32</sup> Peru nguehe cuichjá cojo nuju ta yo xi tsismi chjuun rë handasa ndastu mé cjuatsehen casahmi chjuun jan cojo ngu xihin xi hacjahi, hacuaha tjin rë me jyë ta sehe ngatsë rë xi catsismi me na ne sahmi chjuun jan cjuatsehen. Hacuaha yo xi cuixan cojo chjuun jan ne, tangun jyë rë cojo ngu xi sahmi cjuatsehen cojo ngu chjuun xi hacuiin chjuun rë.

*Hacutjin meje rë xi sua cjuaquixi naja*

<sup>33</sup> 'Hacuaha hyun cjua xi cafaha xuta hatsëë nixtin xi chja cuitjin: Hya xi cuinújun: "Vëë Nina", hatuxa sahmi nguyë xi nihñuchuhun cjua xi canújun. <sup>34</sup> Peru nguehe cuichjá cojo nuju ta hora xi cuisiajmu cojo xingun ne, hacuiin cuinújun xi vëë Nina, hacuiin cuinújun xi vëë sa jingu sa quihndi ngasunhndë. Cuinujuun xi vëë ngahnga ta ngahnga ne, tacun Nina xi vitexa me. <sup>35</sup> Hacuaha cuinujuun xi vëë ngasunhndë ta ngasunhndë ne, tangun sacuaha ngu yatë hiscan xi tine ntsacu Nina. Cuinujuun xi vëë Jerusalén ta Jerusalén ne, nandya xi tséhë Nina, Me xi Matitjun. <sup>36</sup> Cuinujuun cuitjin: "Sá xi quixiin jain cjua naha ne, catinduva ngu cjuacjintacun xi cuatjun", ta tséhë xi ngayun ne, hisca hitsë cumaji cuitexun sá xi cuma jma tsjarcun o sá xi cuma tyjava. <sup>37</sup> Hya xi cuisiajmu, sá xi "joho" nújun ne, cuanitjin ni cuitejña; o sá xi "jéya" nújun, hacuaha cuanitjin ni ndatjin ta, sá xi vetjutë visiajmu cjua cjín jan ne, cjua cjín jan ne, nduva tséhë cjuatsehen.

*Meje rë xi nihmutacun xuta xi chohovëë naja*

<sup>38</sup> 'Hyun cjua xi cafaha xuta hatsëë xi chja cuitjin: Cha xi cuahaxin tuxcun xicjin ne, hacuaha chjahaxin rë tséhë cha. Cuanitjin cha xi cuahaxin nehñu xicjin ne, hacuaha cuanitjin ni chjahaxin rë nehñu cha. <sup>39</sup> Peru nguehe cuichjá cojo nuju ta, canicuyun cjuatsehen. Sá xi tjin yo xi vanguihu nuju, yo xi vajaya ngu ladu tsa nuju matsejen ne, nicuyun sa ngu ladu catajaya. <sup>40</sup> Cuanitjin ne, sá xi tjin yo xi cjuccojo nuju xcun juez xi fahataha chingá nuju matsejen ne, hacuaha tuhun rë me cojo yëjé ni tsjian hasu nuju. <sup>41</sup> Cuanitjin ne sá xi ngu xuta ne, sahmi nuju me nguyë xi chanuju chaha rë me ngu kilómetro, cahndë rë ngu ni, tanguncujun jo kilómetro. <sup>42</sup> Yëjé ni xuta xi fehya nuju me mé xi machaja rë me matsejen ne, tuhun rë me. Hane sá xi scuxetaha nuju me, tuhun rë me.

<sup>43</sup> 'Hyun cjua xi cafaha xuta hatsëë nixtin xi chja cuitjin: "Nihmutacún xuta xi siutahndee nuju; choho hyun xuta xi má condra nuju." <sup>44</sup> Peru cuichjá cojo nuju ta, hacuaha nihmutacún xuta xi má condra nuju; ndaja nihñu cojo xuta xi choho vëë nuju me. Nújunyumuntuhun rë xuta xi tsujyihya tjengui nuju me cojo cjuahngatacun. <sup>45</sup> Sá xi cuatjin nihñu ne, cumatsejen xi chjayunngun sacuaha sahmi Nahmi nuju xi tacun ngahnga ta, Nina ne, sahmi me xi ngu chihin ni vetjucaa tsuhi xi casahmi me hane vechu hasen rë hiscan siu xuta tsehen hacuaha hiscan siu xuta ndaja. Hacuaha sahmi me xi vaha tsi xcun jnu rë xuta xi tjin xi cun rë me, hane hacuaha xcun jnu rë xuta xi tsajin xi cun rë me xcun Nina. <sup>46</sup> Tsajin yo xi sua chjí nuju tséhë xi hmutacún xuta xi hmucacun nuju me matsejen, tséhë xi hacuaha hisca cha faha tujúnsa (xi jemu vaxë cha tujún) matsejen ne, hmucacun cha xuta xi hmucacun rë cha. <sup>47</sup> Hacuanitjin ne, sá xi suvun cuinújun nina cojo xuta nuju ne, ¿há hitsë sa ndaja yun xi cuma rë yahnga xuta? ¡jéya! Hisca xuta xi macjaain rë me Nina

ne, tjin rë me xcusun ndaja vë. <sup>48</sup>Vëhë xi mameje rë xi tangun cojo ngasunhdë nuju cojo ngu xcusun xi tyjahi chichihin ni, cumatangun xcusun nuju cojo xcusun rë Nina xi tyjahi chichihin cjuatacun rë me.

## 6

*Jesús ne, vicuya me tsëhë cjuandaja xi meje rë sahmi xuta*

<sup>1</sup>Hya xi nihñu ngu cjuandaja ne, nihñu nguñajatacun, hacuiin nihñu tsëhë xi scuëë nuju xuta; ta sá tsajin ne, ndastu me chji sacu tsëhë Nahmi nuju xi tacun ngahnga. <sup>2</sup>Cuanitjin ni sacuaaha cjuava vë, hya xi tuhun ngu caridad matsejen ne, xi canijanuu ngu tyjo xi tuhun cumachaya rë xuta cjuandaja jan. Hacuaha cuatjin sahmi xuta xi jo xcun jo hntsua me hya xi sua me caridad ngajan yungun o ndiya ngatsë rë xi vaxëndaja xuta me. Tichjá cojo nuju ta ha vëhë ni chji sacu rë me. <sup>3</sup>Vëhë xi ngayun ne, hya xi tuhun caridad ne, catuun cumachaya rë ntsun ladu xcun mé xi tuhun cojo ntsun ladu quixi. <sup>4</sup>Cuatjin hya xi tuhun caridad ne, tuhunhmu matsejen ne, hane xi cuatjin nihñu ne, Nahmi nuju xi tacun ngahnga ne xi cavëë me cjuandaja xi canihñu ne, sua me chji nuju.

*Jesús ne, vicuya me hacutjin nihña oración*

<sup>5</sup>Hacuaha hya xi nihñu oración, xi canihñuu sacuaaha xuta xi jo xcun jo hntsua me ta me vëhë ne, jemu meje sahmi me oración cahntsua yungun cojo sa hiscan sahmi cru ndiya të hiscan xi scuëë xuta me. Ngeuhe cuichjá cojo nuju ta ha vëhë ni chji sacu rë me. <sup>6</sup>Vëhë xi ngayun ne, hya xi nihñu oración ne, techjun tingotjo ndya nuju hane tangun cahunchun, ngajan hma nihñu oración cojo Nahmi nuju xi tacun ngahnga ta ngu ni me vëhë xi tacun me cojo nuju. Hane Nahmi nuju jan xi vëë me yëjë xcusun xi hincha hma ne, sua me chji nuju.

<sup>7</sup>Hacuaha hya xi nihñu oración, caveyunnanguun ngu cjuava xi hisca suvun vijniircun sacuaaha xcusun xi sahmi xuta xi hvíin me cjuava rë Nina, ta xi má rë me vë ne, xi hitsë cjin cjuava cuichja me ne, hacuaaha hitsë sa cuahacuenda Nina tsëhë me. <sup>8</sup>Miji rë xi nihñu xcusun vëhë, ta hisca chaja sa xi chjahyun rë Nahmi nuju xi tacun ngahnga ne, ha vëë me mé xcusun xi mameje nuju. <sup>9</sup>Cuanitjin nújun hya xi nihñu oración:

Ngayun Nahmi niji xi nechun ngahnga ne,  
meje rë xi ngayijin ni xuta ngasunhdë chjihinrcuin nuju.

<sup>10</sup>Nduvun nihñu niji gobiernu.

Catamachihin cjuatacun nuju ngeuhe ngasunhdë sacuaaha ngahnga xi ha camachihin.

<sup>11</sup>Nchunchujun ni ne, tuhun niñu xi xini.

<sup>12</sup>Ninchatuhun niji tsëhë yëjë ni jyë niji ta hacuaaha ngayin suvin ni tininchatihin rë xuta xi choho sahmi me cojo niji.

<sup>13</sup>Caningatjuun xi chjaháhuva niji cojo cjuatacun niji ta, tuhun niji ngahñu xi cuma cuetjinxin tsëhë cjuatsehen.

Tsujun suvun gobiernu cojo ngahñu, hacuaaha tsujun ni hasen rë ngahñu cjuava nuju. Tsujun yëjë vë, yëjë nu, yëjë nixtin.

<sup>14</sup>Hya xi cajnetaha oración jan, cachja sa Jesús cuitjin: sá xi ninchatuhun xuta xi choho casahmi me cojo nuju ne, hacuaaha Nahmi nuju xi tacun ngahnga ne, tsinchataha me jyë nuju, <sup>15</sup>peru sá xi ninchatuun xuta xi choho casahmi me cojo nuju ne, hacuaaha Nahmi nuju jan ne, tsinchataain me jyë nuju.

*Jesús vicuya me tsëhë hya xi nechun xun rë Nina*

<sup>16</sup>Ngayun ne, nixtin xi nechun xun rë Nina ne, nihñuu va xcusun nuju sacuaaha sahmi xuta xi jo xcun jo hntsua me ta sahmi va me xcusun rë me, ta me vëhë ne, hisca catsindeya me xcusun rë me sehe cumatsejen xi tacun me xun rë Nina. Cuichjá quixi cojo nuju ta ha vëhë chji xi sacu rë me. <sup>17</sup>Vëhë xi ngayun ne, hya xi nechun xun rë Nina ne, tinchacun, nihñu tyjahi yojo nuju. <sup>18</sup>Cuatjin nihñu cojo sa xi tsajin yo vëë rë xi nechun xun rë Nina, ta suva Nina, Nahmi nuju vëë me. Hane me vëhë ne cuechji me yun.

*Cjuanchina xi tacunya ngahnga*

<sup>19</sup>Cavetjuun cjuanchina nuju ngeuhe ngasunhdë, ta ngeuhe ne, sahmi dañu chu xavi cojo xutsë. Ngeuhe ne cuma scuxahaya cha chëjë, hane sehe tsichëjë cha. <sup>20</sup>Hitsë sa ndaja ne, tetjún cjuanchina ngajan ngahnga ta ngajan ne tsajin dañu xi sahmi chu xavi cojo sa xutsë. Ngajan ne scuxaain cha sehe xi tsichëjë cha. <sup>21</sup>Cuatjin meje rë xi ngajan cuetjun tsujun ta, tsëhë xi hiscan tetjo cjuanchina nuju ne, hacuaaha ngajan quitaha cjuatacun nuju cojo.

*Ndihni rë yojo naja*

<sup>22</sup>Tuxcuun matsejen ne, vëhë xi sacuaaha ndihni rë yojo naja. Vëhë xi hya xi tuxcuun ndacun ne, hatuxa seya cjuahasen cahntsua yojo naja. <sup>23</sup>Peru sá xi tuxcuun hmu matsejen

ne, hacuaha ma jñu cahntsua yojo naja. Sacuaha hasen xi jiya cahntsua yojo naja ne, sá xi hacuiin hasen xi cjuaquixi jain ta, suva jñú ne, jjeru tu jñú camahani cuma sa!

*Tsajin yo xi ma fahacuenda xa tséhé Nina cojo tséhé cjuanchina*

<sup>24</sup> Tsajin yo xi ma fahacuenda xa tséhé jo patrón ta, tséhé xi choho scuëë rë patrón xi tjun hane tsihmu cacun rë patrón xi majo jan. O sá tsajin ne, jemu cuetaha yojo rë cojo patrón xi tjun hane patrón xi majo jan ne, hisca sahmicuendaain rë. Véhé xi xi ngu tangun ni ne, cumaji nihñu hacutjin xi meje rë Nina cojo hacutjin meje rë cjuanchina tsehen xi tséhé ngasunhndé.

*Sahna cuidadu Nina xuta ladu rë me*

<sup>25</sup> Véhé xi cuichjá cojo nuju ta hacuiin cuityjanguntacun sá sacú o sá sacuiin mé xcusun xi xinu xi sua nuju ngahñu. Hacuaha hacuiin cuityjanguntacun sá sacú o sá sacuiin tsjian xi chujun. Hitsé sa vengui chji rë cjuahñu nuju xi cumá rë xi chinu, hacuaha hitsé sa vengui chji rë yojo nuju xi cumá rë tsjian xi chujun. <sup>26</sup> Chutsujun chu nisé xi vitjen chu ngahnga ta hacuiin tsitjé chu, hacuiin fanchi chu, hacuaha tsajin rë chu ndyahnga hiscan cuinchandaja chu xi siné chu, peru Nahmi nuju xi tacun me ngahnga ne, tsicjen me chu. Ngayun ne, hitsé sa vengui chji nuju xi cumá rë chu nisé vë. <sup>27</sup> Hacuaha tsajin hisca xi ngu xuta xi cuma cuesuntaha me cjuahñu rë me hisca ngu hora ta hacuiin cavatsé chji me cjuahñu rë me. Tu mahya ne xi tjercu vityanguicacun me.

<sup>28</sup> Cuanitjin ne, ¿mé má chji rëhé xi cuityjanguntacun tséhé tsjian xi chujun? Chutsujun naxu liriú xi vetju nguifña ta tsihyaain nachjun hacuaha fahyaain tsjian rë. <sup>29</sup> Peru ngahan cuichjá cojo nuju ta tsjian rë xutachanga naja Salomón ne, handasa jercu ndacun camahani, peru hitsé sa ndajyihí tsejen ngu naxu véhé xi cuma rë tsjian jan. <sup>30</sup> Sá xi cuatjin tsicaja Nina xca nguifña xi ngu nixtin ne siutaha nguifña, hane xi tu cuma nchujun nga ne, cueti ne, hitsé guan sa ngayun xi hatuxa tsicaja nuju me. Peru ngayun ne, cjéë cumangutangundjun cojo me. <sup>31</sup> Véhé xi hacuiin cumacjintacún hane cuinengunsuun cuitjin: “¿Mé comida xini? o sá ¿jani sacú niji xi sihin? o sá ¿mé tsjian chijin?” <sup>32</sup> Hacuiin ta, tséhé xi xcusun véhé ne, xuta xi hvín me cjuá rë Nina ne, me véhé xi vityanguicacun me xcusun véhé. Peru ngayun ne, Nina Nahmi naja ne, ha vëé me xi machaja nuju xcusun véhé. <sup>33</sup> Tityjanguntacun hacuaha nechunyun rë gobiernu ni sahmi Nina, hacuaha catama tangun cjuatacun nuju cojo cjuatacun rë me ne, hane yéjé ni xcusun véhé ne, quitahacoo sa sacú nuju. <sup>34</sup> Cuanitjin ne, hacuiin cumacjintacún tséhé mé xi cuma cuatju nchujuni, ta xi cumá rë nchujuni matsejen ne, hya yaha cjuacjintacun rë. Ngu nixtin ngu nixtin ne, chjuhun cuendun cjuacjintacun rë ta jima ngu nixtin cojo tséhé.

## 7

*Miji rë xi nichuvan jingu sa xuta cojo cjuatacun rë me*

<sup>1</sup> Hacuiin nichuvan jingu sa xuta cojo cjuatacun rë me, sehe hacuiin tsichuva Nina ngayun. <sup>2</sup> Canichuvun ta sá tsajin ne, chuva xi quixi yun cojo xuta ne, hacuaha cuanitjin quixi Nina cojo nuju; hacuaha chuva xi nichuvunyun matsejen ne, véhé ni tsichuva Nina yun. <sup>3</sup> ¿Hacutjin má xi matsejen nuju xté xi jiya tuxcun xingun? ta ngayun ne hitsé sa jyé xi jiya tuxcun. <sup>4</sup> ¿Hacutjin má xi cuma cuinúnjun cojo xingun xi meje naxun xté xi jiya tuxcun me jinguyéjé rë xi suvun matsejen ne, machayiin nuju xi hitsé sa jyé xta xi jiya tuxcun vë ni? <sup>5</sup> Ngayun xuta xi jo xcun jo hntsua ne, naxun titjun xté jyé xi jiya tuxcun vë, sehe cumatsejenndaja nuju xté xi jiya tuxcun xingun cojo sa xi cuma naxun.

<sup>6</sup> Sá xi tjín nuju mé xi venguichji rëhé sacuaha tjín rë cjuandaja xi casua Nina yun, tetjuhunndjun hacuiin tu yo ni tuhun rë ta sá tsajin ne, xuta jan ne, tsitjungui me xi ngayun jemu ximinchacun xi cuma nuju. Hacuaha cuichjataha nuju me.

*Chjahyun rë Nina mé xi machaja nuju*

<sup>7</sup> Chjahyun rë Nina, hane sua nuju me. Tinchunsun, hane sacú nuju. Tinúnjun hacuaha chjahyun cahndé, hane Nina sua me cahndé xi cuisuhun cuinúnjun cjuacjintacun nuju. <sup>8</sup> Cuatjin nihñu ta, yéjé ni xuta xi fehya rë me ne, cuahatsja me, hane yo xi vanguise ne, sacú rë me, hane yo xi chja hacuaha fehya cahndé me ne, sacú cahndé cuisehen me.

<sup>9</sup> ¿Há tjín ngu nahmi xi, hya xi quihndí rë me cjuehya ngu niñu ne, cahndé rë xi véhé ne, sua me ngu ndyojo, <sup>10</sup> o sá xi cjuehya quihndí yojo rë chu ti ne, cahndé rë véhé ne, sua me ngu yé? <sup>11</sup> Sá xi ngayun xi xuta jyé yun ma tuhun rë quihndí nuju xcusun xi ndaja. Hitsé guan sa Nina Nahmi naja xi tacun me ngahnga xi jyé hnga me cojo cjuandaja rë me ne, me véhé vëé me mé cuatjo ndaja xi cuma sua me xuta xi cjuehya rë me.

<sup>12</sup> Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rë me: cuatjin nihñu ta cojo ngu xcusun ni xi tinihñu véhé ne, ngayun tinihñuchuhun yéjé ni cjuá rë ley cojo yéjé ni cjuá xi catsihindu profeta.

*Ejemplu tsêhê tingotjo xcu*

<sup>13</sup> Cuisuhun hiscan sahmi Nina gobiernu sá xi cuisuhun tingotjo xcu ta, tsêhê xi sá xi cuisuhun táha tingotjo tẽ o ndiya xi cjín me vatjun me ne; vêhê ni cjuecojo nuju cjuaveya hiscan xi jemu cjín xuta cjue me. <sup>14</sup> Ta tingotjo xcu o ndiya hndê ne, vêhê xi cjue cojo nuju hisca xi sacu nuju cjuahñu. Jemu chuva xuta xi sacu rê me tingotjo xcu jan.

*Tsejen mé xcusun xuta me ngatsê rê mé xi sahmi me*

<sup>15</sup> Cuidadu tsêhê profeta ndacha ta xi tjengui nuju me, jeya tsejen xcusun rê me sacuaaha xcusun rê chu tsánga, peru quixiin vêhê ta suva cjuandacha ta xahasen rê me ne, quitsê rê cjuatsehen sacuaaha cahntsua xahasen rê chu lobo. <sup>16</sup> Tsejen mé xcusun xuta me ngatsê rê xcusun xi sahmi me. Sacuaaha ngu ya ne, tsejen mé xcusun rê ngatsê rê tu xi sua. Sacuiin rê xuta uva tsêhê ya nahyálatu, hacuaaha sacuiin rê xuta tuhaxi xi hmí higo tsêhê nahyándeheya. <sup>17</sup> Quixi jain ta ngu yatjê xi ndaja ne, sua tú xi ndaja, hacuaaha ngu ya xi machjiriin ne, hacuaaha machjiriin tu rê. <sup>18</sup> Vêhê xi ngu yatjê ndaja ne, cumaji sua tú xi machjiriin, hacuaaha ngu ya xi machjiriin ne, cumaji sua tú xi ndaja. <sup>19</sup> Hane yatjê xi machjiriin tú rê ne, xtíjñi rê tsêhê xi ndaja sehe cueti. <sup>20</sup> Cuanitjin xuta ne, tutjin rê yatê vê ne, cuatjin rê me ta, tsejen xcusun rê xahasen rê me ngatsê rê xcusun xi sahmi me.

*Cachja Jesús xi hacuiin yêjê ni xuta cuisehen me gobiernu xi sahmi Nina*

<sup>21</sup> Tjin yo me xi cuichjacojo ná ta nai rê me ngahan, peru cuiiin me gobiernu xi sahmi Nina nahmi naha; ta ngajan cuisehen suva xuta xi sahmichihin me cjuatacun xi vitexa Nahmi naha xi tacun me ngahnga. <sup>22</sup> Vêhê xi handasa xi jemu cjín me cuichja me nixtin hya jan cuitjin ta: “Nai naha, ngatsê rê xi hñu ngayun, vêhê xi caveyinnangui ñihi nuju ne canújin cjua rê Nina, hacuaaha xi canújin ñihi nuju ne, canaxinxin xitsehen, hane cojo ngahñu rê ñihi nuju cama canihñi cjuarcun.” Cuatjin cuichja me nixtin hya. <sup>23</sup> Ngajan xi ngahan ne, cuitjin cjuayangû tsêhê me nixtin hya: “Tángxunxun tsahan ta hveen yo ngayun, ngayun xi nihñu cjuatsehen.”

*Ejemplu tsêhê jo ndihya*

<sup>24</sup> Yahnga xuta xi visiñuju me cjua naha hacuaaha sahmi me sacuatjin chjá cojo rê me matsejen ne, tangun me cojo ngu cha quicun xi hya xi casahmi cha ngu ndihya matsejen ne, hiscan xcun nanguihñu casahmi cha. <sup>25</sup> Hane hya xi cavaha tsi, camajyê ndajyê hacuaaha casesuntê nandá, hacuaaha cavanga tjo hñu ne, jercu hñu catsivaha rê ndihya jan, peru caticjaainjni tsêhê xi xcun nanguihñu secun. <sup>26</sup> Peru yahnga nga xuta xi visiñuju me cjua naha hacuaaha sahmi me sacuatjin chjá cojo rê me matsejen ne, tangun me cojo ngu cha ngarca xi hya xi casahmi cha ngu ndihya matsejen ne, hiscan xcun nangui tsumi casahmi cha. <sup>27</sup> Hane hya xi cavaha tsi, camajyê ndajyê hacuaaha casesuntê nandá, hacuaaha cavanga tjo hñu ne, jercu hñu catsivaha rê ndihya jan, hane tu ngu ñahñu ne caticja ndihya jan, ngu café cavetsunya.

<sup>28</sup> Xi cajnetaha cachja Jesús ne, xutacín ne jercu quijircun rê me tsêhê cjua xi cavicuya Jesús ta, <sup>29</sup> tsêhê xi cjua xi vicuya me ne, jercu tjin rê ngahñu, hacuiin sacuatjin cjua xi vicuya maestru xi vicuya ley.

**8***Casahmi Jesús xi camandaja ngu cha xi yaha chuxin rê cha chíhin vitaha*

<sup>1</sup> Hya ha cavijne me tsêhê ndetjun jan, jemu cjín xuta tjengui rê me. <sup>2</sup> Hya xi camá ne, cafehe ngu cha xi jingujyê ni chuxin rê yaha rê ngu chíhin xi vitaha, caticjaxcun cha cafaharcun cha Jesús hane cachja cha cuitjin cojo rê me:

—Tatá. Sá xi meje nuju ne, cuma chjuhunxun chíhin xi yaha ná vi. —Cuatjin cachja cha.

<sup>3</sup> Hane xi catsixinga Jesús tsja me ne cavetahatsja me cha ne, sehe cachja me cuitjin:

—Meje ná. Catamandaja ngaye. —Cuatjin cachja me.

Hane chíhin jan ne, ngutjen ni caféya. <sup>4</sup> Sehe cavitexa me cha cuitjin:

—Hisca xi ngu ni canuiin cojo. Tihin ningacuin yojo riji xcun nahmi sehe catutsejen me xi camandaja ye. Sehe tihinchjehe cjuatjo riji xi tehe rê Nina ngatsê rê xi camandaja ngaye tsêhê chíhin jan, sacuaaha cavitexa Moisés xutachanga naja. Cuatjin nihñi cojo sa xi cumatsejen xi camandaja jain ngaye.

*Casahmi Jesucristu xi camandaja cha mosu xi cavatsê capitán*

<sup>5</sup> Xi cavatju vihi ne, sehe rê cavisehen me nandya Capernaum, hane ngajan cafehe tjengui rê me ngu capitán cafeheya cha me favor <sup>6</sup> cuitjin cachja cha:

—Tatá. Tjin ná ngu cha mosu xi jiñahmu ndya naha. Cahme yojo rê cha hane jemu jiñahñi cha.

<sup>7</sup> Ngajan cafayangui Jesús:

—Cjué ngahan, tsírquê rê cha.

<sup>8</sup> Ngajan xi cafayangui capitán jan cuitjin:

—Hisca hacuiin sahmi nguyjé xi ngayun cuinduvun ndya naha ta tséhé xi hitsé sa hñu cjuua yun xi cuma ná ngahan. Quihndé ne, ndastu tinújun xi cumandaja mosu naha hane cuma ndaja cha. <sup>9</sup> Hacuaha ngahan ne, tjin ná xuta xi matitjun tsahan, hane hacuaha tjin ná ngu cientu sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi; hacuaha xi chjá cojo ngu nga xi cuinduva ne, nduva, hane mosu naha ne, xi chjá cojo xi sahmi mé xi meje ná ne, sahmi. —Cuatjin cafayangui capitán.

<sup>10</sup> Hane xi cahndé Jesús cjuua véhé ne, jemu quijircun ré me tséhé capitán jan, hane cachja me cojo xuta xi tjengui ré me cuitjin:

—Cuichjá cojo nuju ngu cjuua ta, ngajñi naja ngayejen ni ngayaan xuta tjé ré Israel ne, cjéé scuéé ngu xuta xi cuatjin ndaja manguacacun me cojo ná sacuaha capitán vihi xi hacuiin xuta tjé naja me. <sup>11</sup> Hacuaha cuichjá cojo nuju ta cuinduva xutaxín tséhé táha ladu vetjucaa tsuhi cojo táha ladu vetje tsuhi cuiyuju me sinésuhi me cojo Abraham cojo Isaac cojo Jacob ngajan hiscan sahmi Nina gobiernu, <sup>12</sup> Peru xuta tjé ré Abraham xi quihndi cjuaquixi ne, cuma tsingatju me hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.

<sup>13</sup> Hya xi camá cachja Jesús cuatjin cojo xuta ne, sehe cachja Jesús cojo capitán jan cuitjin:

—Cuma cuangun ta tséhé xi xcusun xi vetjutacun xi má sahme, camachihin.

Hane hora xi cachja me cuatjin ne, camandaja cha.

*Jesucristu casahmi me xi camandaja nahya ré Simón Pedru*

<sup>14</sup> Hya xi cama ne, cavisehen Jesús ndava Pedru ne, hane cavéé me xi jiñahmu nahya ré Pedru cojo chíhin sué. <sup>15</sup> Ngajan xi cavetahatsja Jesús tsja na, hane ngutjen cavetjuxin chíhin jan tséhé na. Hane hora véhé ni ne, cavisatjenhnga na hisca cama cafahacuenda na me.

<sup>16</sup> Hane hora xi tivetje tsuhi ne, xuta ne, quijicojo me cjin xuta xi hincha ré xitsehen hane quiji me hiscan tacun Jesús. Hane Jesús ne, cavaxéxin me xitsehen jan cojo cjuua ni, hacuaha catsirqui me yéjé xuta hmu ré. <sup>17</sup> Cuatjin casahmi me sehe cumachihin cjuua xi cachja profeta Isaías xi cachja me cuitjin: “Cafaha suva me yéjé chíhin hinda xi tjin ré yojo naja, hane suva me cavaha me chíhin naja.”

*Xuta xi meje cjue cojo Jesucristu*

<sup>18</sup> Xi cavéé Jesús xi jemu tsé xuta hiscan tacun me ne, casua me cjuua cojo xicjin me xi cjuexin cojo ré me ngunda laguna. <sup>19</sup> Ngajan cafehe tjengui ré me ngu cha maestru ré ley sehe cachja cha cuitjin:

—Maestro. Tu yani ni xi cuangun ne, cjué cojo nuju. —Cuatjin cachja cha.

<sup>20</sup> Sehe Jesús ne, cafayangui me cuitjin:

—Chu ninda ne, tjin nguio hiscan viyuju chu, hane nisé xi vitjen chu ngahnga ne, tjin ndava chu, peru ngahan xi hatuxa Quihndi ré Xuta ngahan ne, hisca ndya naha tsajin. —Cuatjin cachja me.

<sup>21</sup> Ngu nga xuta xi tjengui ré me cachja cojo ré me cuitjin:

—Tatá. Cuanguen cojo nuju peru hya xi cuatju seyaniji nahmi naha.

<sup>22</sup> Peru cafayangui Jesús cuitjin:

—Hanguen. Tehe véhé catisahmi xuta xi cahme cjuatacun ré me, me véhé catinchaniji me nima.

*Jesucristu casahmi me xi cuasen tjo cojo tsindyu ré nandan*

<sup>23</sup> Hya xi camá ne, cavisehen Jesús cahntsua ngu barcu hane ngajan quiji tjengui ré me xuta ladu ré me. <sup>24</sup> Hora xi cjuí barcu jan ne, canduva ngu tjoññu xi cavanga xcun laguna jan, hane hisca meje tsa ré barcu jan cojo tsindyu ré nandan xi saté ré jan. Peru hora véhé Jesús ne, jiñafé me. <sup>25</sup> Sehe xuta ladu ré me ne, catsingasca ré me, hane cuitjin cachja me:

—¡Tatá, tatá! ¡Naxuntjun naja! ¡Ngeuhe cjuéyan! —Cuatjin cachja me cojo Jesús.

<sup>26</sup> Hane cachja Jesús cuitjin:

—¿Mé má cuatjin jemu rcun ngayun, ngayun xi cjéé cumangutacún cojo ná?

Hya xi cachja me cuatjin ne, cavisatjenhnga me cavatécja me ngahñu ré tjo jan cojo tsindyu ré nandan jan, hane jinguyjé ni jan ne, cavejñajyuu. <sup>27</sup> Hya xi camá ne, xuta jan ne, jercu quijircun ré me hane cachja me cuitjin:

—¿Yo xuta me vihi xi hisca tjo hisca tsindyu ré nandan vihndé tséhé me?

*Cha Gadara xi hincha xitsehen xahasen ré*

<sup>28</sup> Hya xi camá ne, cafehe Jesús cojo cha ladu ré me ngunda véhé, hisca ladu ré xuta nandya Gadara ne, ngajan jo me xi hincha xitsehen xahasen ré quiji tiña me tséhé Jesús. Catsijo me xi cuacun jan ne, siu cahndé me ngojo naxi hisca xi sacuaha tsjun. Hacuaha

jemu cjan rë me hisca tsajin yo xi tsujyihya taha vë jan. <sup>29</sup>Hya xi cavechu me hiscan tacun Jesús, cojo ngahñu rë xitsehen jan, cavetsihin cachja me cuitjin:

—Mé má cuatjin ninguisuhunñu cojo niji ngayun Jesús, Quihndi rë Nina. ¿Há tuhun niji cjuañhi handasa chaja sa nixtin rë?

<sup>30</sup>Nixtin hya ne, ngajan tiñataha ne, tacun ngu cahndë hiscan jemu cjin chu chinga hinchataha chu tijine chu. <sup>31</sup>Hane xitsehen jan ne, ña yuma chja cojo Jesús cachja cuitjin:

—Sá xi hatuxa naxunxun niji tsëhë xahasen rë cha xi cuicun vi, ningatjun niji hiscan siutaha chinga, hacuaha ningatuhun niji xi cuisihin cahntsua xahasen rë chu.

<sup>32</sup>Hane cachja Jesús ta:

—Joho, tangun.

Hya xi camá ne, cavetjuxin xitsehen tsëhë cahntsua xahasen rë cha jan, hane cavisehen cahntsua xahasen rë chu chinga jan. Hya xi camá ne, yëjë ni chu chinga jan ne, cavanga chu quijijne chu taha rcu ndetjún, hane ngajan cavixuya chu ngajñi nandá tsëhë laguna, hane ngajan café chu, chame chu.

<sup>33</sup>Hane ngatsë rë chircun jan ne, cha xi sahmi cuidadu rë chu chinga jan, cavanga cha quiji cha nandya. Hane xi cavisehen cha nandya, casua cha camachaya rë xuta tsëhë xcusun xi camá rë chu chinga jan cojo xcusun xi cavatju jo cha xi hinchá rë xitsehen jan.

<sup>34</sup>Hya xi camá ne, yëjë xuta tsëhë ladu tsëhë nandya Gadara ne, quijitjengui me Jesús hiscan tacun me, hane xi cavechutaha xuta me ne, cafehya me Jesús xi catje me tsëhë ladu rë me jan.

## 9

*Casahmi Jesús xi camandaja ngu xuta xi cahme yojo rë*

<sup>1</sup>Hya xi camá ne, cavisehen nga Jesús barcu, cafe me nangui rë me ta tacun ngunda laguna. <sup>2</sup>Hya xi camá ne, ngutjen ni quijitjengui xuta me hane xuta jan ne, yahahnga me ngu cha xi cahme yojo rë cha, jiña cha xcun nijña rë cha. Hane xi cavëë Jesús xi cuatjin mangu cacun xuta xi cuacun jan cojo rë me ne, sehe cachja xu me cojo cha hmu rë jan cuitjin:

—Tuhun cjuasua xahasen nuju ta jyë nuju, tsan ne, ha camanchataha. —Cuatjin cachja me.

<sup>3</sup>Ngajan xi ngu jo maestru xi vicuya cjuachacun ne, cavetsihin catsingataha cacun me cuitjin: “Nina tsixcuehyu cha.” <sup>4</sup>Hane tsëhë xi vëë Jesús cjuá xi tsingatahacacun maestru jan ne, cuitjin cavinenguise me cha:

—¿Mé má cuatjin chojyihí ningatuhuntacun? <sup>5</sup>Xi má nuju, ¿jarë cjuá xi hitsë sa tsaviin fi xi cuichjá: há xi “Jyë nuju ne, ha camanchataha” o há tsajin ne; há “Tisatjunhgun ne, tujyuhunyun?” <sup>6</sup>Peru nguehe suá cumachaya nuju ta ngahan xi Quihndi rë Xuta Jain ngahan ne, yahá xá xi tsinchátaha jyë rë xuta nguehe ngasunhndë.

Sehe ngajan cachja xu Jesús cojo cha hmu rë jan:

—Quihndë ne, ngayun tsan ne, tisatjunhgun chjuhun nijña nuju vë, sehe tjangun ndya nuju.

<sup>7</sup>Hya xi camá ne, cavisatjenhnga cha quiji cha ndava cha. <sup>8</sup>Xi cavëë xuta xcusun xi camá ne, quijircun rë me, sehe casahmi hnga me Nina ta Nina ne, casua me cahndë Jesús xi cuatjin casahmi me.

*Cavaxijin Jesucristu Mateo*

<sup>9</sup>Xi quiji sa xu Jesús ne, cavechu me hiscan cavëë me ngu xihin xi tacun cahndë hiscan xi faha tujúnsa. Mateo hmí rë me. Ngajan xi cachja Jesús cojo me cuitjin:

—Nduvun, cuanguen cona.

Hane Mateo jan ne, cavetju me quiji me cojo Jesús.

<sup>10</sup>Ha nixtin vëhë ne, tijine Jesús niñu ndava Mateo. Hane jemu cjin sa cha xi faha tujúnsa cojo yahnga cha xi tsitjungui xuta nangui vë ne, hacuaha tijine cha niñu ngajan. <sup>11</sup>Peru xi cavëë cha partidu fariseo xcusun jan, sehe cavinenguise cha cojo cha ladu rë Jesús cuitjin:

—¿Mé má jinë hvi maestru nuju cojo cha xi faha tujúnsa cojo ngujo sa cha xi hacuaha cha sehen cha? —Cuatjin cachja cha.

<sup>12</sup>Peru cavihndë Jesús cjuá xi cachja cha, hane cafayangui me cuitjin:

—Xuta xi hacuain hmu rë me ne, mamijí rë me xi cjuahacuenda rë me doctor ta suvá ni xuta xi hmu rë me ne, me vëhë meje rë xi cjuahacuenda rë me doctor. <sup>13</sup>¿Há vijinii rcun mé vijine cjuá rë Nina vihi?: “Hitsë sa ndama ná xi mayuma nuju xingun xi cuma rë xi nicuhun chu sacuaha cjuatjo xi tuhun ná.” Hacuanitjin ná ngahan ta ngahan ne, hacuain canduvá xi squindáyavaha rë xuta xi tsajin xi cun rë me xcun Nina, ta xa xi canduvá ne, xi squindáyavaha rë xuta tsehen, hane cuichjá cojo me xi tsindeya me cjuatacun rë me. —Cuitjin cachja Jesús.

*Mé tsêhê xi casahmii Jesucristu cojo xuta rê me xun rê Nina.*

<sup>14</sup> Ngajan xi xuta ladu rê Juan ne, cafehe me cavinengise me Jesús cuitjin:

—Ngayijin ni, vinechin xun rê Nina hacuaha cha partidu fariseo hacuaha viyuju cha xun rê Nina. ¿Mé tsêhê xi xuta ladu nuju ne, sahmii me cuatjin ne?

<sup>15</sup> Ngajan xi Jesús ne, cuitjin cachja me cojo cha:

—Cumaji xi xuta rê cha xi tivixan ne, sahmii me xun rê Nina jinguyêjê rê xi cha xi tivixan ne, tacun cha cojo rê me. Peru cuechú nixtin xi cha xi tivixan jan ne, chjaháxin rê cha tsêhê xuta rê cha, hane hya cuma sahmii me xun rê Nina. —Cuatjin cachja Jesús.

<sup>16</sup> Hacuaha cachja sa me ta: —Tsajin yo xi cueyacoo ngu tsjian changa cojo ngu rquí tsjian xi cjêê cjueyu ta sá xi cuatjin sahmii me, xi cjueyu tsjian xatsê jan ne, cuicheya rê tsjian changá jan hane sahmii jyê sa rê hiscan xi ntsun. <sup>17</sup> Cuanitjin ne, tsajin yo xi vincha xan xatsê cahntsua chuxin changá ta, sá xi cuatjin sahmii me ne, tsitsingá rê chuxin jan. Hane cjuê cuixu xan jan, hacuaha cuetsun chuxin jan. Xi meje rê ne, xan xatsê ne, xincha cahntsua chuxin xatsê ta cuatjin ne, catsijo ni ne tsajin mé cuma rê.

*Catsicuya Jesucristu cjuahñu rê quihndi rê Jairo; hacuaha camandaja ngu na xi casatêtsja tsjian rê Jesucristu*

<sup>18</sup> Hora xi tivisiajmi me cuatjin ne, canduva ngu me xi xutaxa rê yungun. Hane quiji caticjaxcun me xcun Jesús cachja me cuitjin:

—Ndicumaha ni cahme na lihndi naha. Peru sa xi cuanguen ne, cuisanu ntsun na ne, cuya nga na cjuahñu.

<sup>19</sup> Hya xi camá ne, cavetju Jesús quiji me cojo nahmi rê na lihndi jan hacuaha quiji xuta ladu rê Jesús. <sup>20</sup> Hane ngajñi cjuí me ne, ngu na xi tjin rê tejó nu xi yaha rê na chíhin xahmajni quiji tiña na táha ngaxtun Jesús ne, quiji cavetahatsja na ntsacu tsjian rê me ta, <sup>21</sup> catsingatahacacun na cuitjin: “Sá xi cuetahantsa ndastu tsjian rê me ne, cumandaja ngahan.” <sup>22</sup> Peru cavuya Jesús taha ngaxtun me ne, sehe cavutsejen me na hane cachja me cojo na cuitjin:

—Tuhun cjuasua xahasen nuju, tsan, camandaja ngayun ta camacjain nuju.

Hane ngutjen ni ne, camandaja na.

<sup>23</sup> Hya xi camá ne, cafehe Jesús ndava xutaxa rê jan. Ngajan cavêê me xi ha siu cha chjinetjyo cojo xutacjin xi jihnda me ngatsê rê cjuandusin. <sup>24</sup> Sehe cachja me cojo xuta cuitjin:

—Tjangunxun. Na lihndi vê ne, hacuini cahme na ta jiñafê ni na. —Cuatjin cachja me.

Ngajan xi xuta jan ne, tu cavejnucêê me Jesús. <sup>25</sup> Peru xi casahmi me xi cavetju xin xuta jan, sehe cavisehen Jesús hiscan jiña nima lihndi jan ne, cafaha me tsja na hane catsisatjenhnga me na. <sup>26</sup> Hya xi camá ne, cavitsojo cjua rê xcusun jan jinguyê nangui vê.

*Casahmi Jesús xi camatsejen rê jo cha rcá*

<sup>27</sup> Xi cavetju Jesús quiji me tsêhê ngajan ne, canduva tjengui rê me jo cha rcá hane cajindaya cha cachja cha cuitjin:

—¡Ngayun Jesús, tjê rê David! Catamayuma nuju ngayin. —Cuitjin cachja cha.

<sup>28</sup> Xi cavisehen Jesús ndihya ne, sehe cavechutaha cha rcá me, hane cavinenguisse Jesús cha cjua vi:

—Xi má nuju, ¿há cuma sahme xcusun xi chjayun?

Cafayangui cha cuitjin:

—Macjain niji, Tatá, cuma nihñu.

<sup>29</sup> Hya xi camá ne, cavetahatsja me tuxcun cha hane cachja me cojo cha cuitjin:

—Cuatjin catama cojo nuju xcusun sacuaha xi macjain nuju.

<sup>30</sup> Hane ha hora vêhê ni ne, catuxaha tuxcun cha hane camatsejen rê cha. Ngajan xi Jesús ne, cavitexa me cha cuitjin:

—Tsajin yo cuinújun cojo tsêhê xcusun vihi.

<sup>31</sup> Peru cavatju xi quiji cha jan ne, cavitsojo cjua tsêhê me jinguyê nandya jan.

*Cavaxêxin Jesús ngu xitsehen xi casahmi lihmi rê ngu cha*

<sup>32</sup> Hora xi ha quiji jo cha jan ne, cafehe xuta xi canduva me cojo ngu cha xi hincha rê xitsehen; hane xitsehen jan ne, casahmi lihmi rê cha. <sup>33</sup> Hane hya xi cavetju xitsehen tsêhê cha lihmi jan, cavetsihin cachja cha. Hane xutacjin xi cavutsejen me ne, jemu quijircun rê me ne cachja me cuitjin:

—Nguehe nangui naja Israel ne, tsajin ngu nixtin xi tsejen cjuarcun sacuaha tijimá quihndê.

<sup>34</sup> Peru cha partidu fariseo ne, cachja cha cuitjin:

—Xitsehen xi matitjun ne, vêhê casua rê cha xa xi vaxêxin cha xitsehen.

*Jemu cjin xuta xi meje rë xi cuisñuju me cja rë Nina*

<sup>35</sup> Jesús ne, catsujiyihiya me jemu cjin nandya cojo ranchun ne, ngajan cavicuya me xuta cahntsua yungun rë me. Casua me camachaya rë me cjuandajiyi xi chja tsëhë gobiernu xi sahmi Nina. Hacuaha catsirqui me xuta tsëhë yëjë ni chíhin cojo yëjë ni xcusun xi cjuahmu. <sup>36</sup> Peru xi cavëë Jesús xutacjin ne, camayuma rë me xuta jan ta tsëhë xi jemu va tjin rë xahasen rë me, jemu camachohocacun me sacuaaha chu tsánga xi tsajin yo xi cjuahacuenda rë chu. <sup>37</sup> Vëhë xi cuitjin cachja me cojo cha ladu rë me:

—Xutacjin vi ne siu me sacuaaha siu niji ngajan nguiña xi jemu ndaja camá peru tsajin cha mosu xi cuanga rë. <sup>38</sup> Vëhë xi meje rë xi chjahyun rë Nai naja xi tsingatju me xuta xi cuanga me.

## 10

*Cavaxijin Jesús tejó xuta ladu rë me*

<sup>1</sup> Cavechú ngu nixtin xi casahmitangun Jesús xuta ladu rë me xi tejó jan ne, sehe casua rë me ngahñu hacuaaha casua rë me xá xi me xi cuacún vë, cuitexa me yëjë xitsehen hane cuaxëxin me xitsehen tsëhë xuta; hacuaaha sahmi me xi xuta xi hmu rë me ne cuma ndaja me tsëhë tu me ni chíhin xi yaha rë me.

<sup>2</sup> Cha xi tejó jan ne, cuitjin hmí rë cha: titjun ne, Simón, me xi hacuaaha yaha ñihi rë Pedru, cojo Andrés hntsé Simón, Jacobo quihndi rë Zebedeo cojo Juan hntsé Jacobo, <sup>3</sup> Felipe cojo Bartolomé, Tomás cojo Mateo, cha xi faha tujúnsa, Jacobo quihndi rë Alfeo cojo Tadeo, <sup>4</sup> Simón xi tsëhë partidu cananayu cojo Judas Iscariote, me xi sahmi entregadu rë Jesús.

*Catsingatju Jesucristu tejó xuta ladu rë me xi cuichja cjuandajiyi rë Nina*

<sup>5</sup> Tejó xuta jan ne, catsingatju Jesús me ne, cavitexa me cuitjin:

—Tanguun ngajan ndiya xi fi xuta xi hvín me cja rë Nina, hacuaaha cuisuun nandya rë distritu Samaria ta; <sup>6</sup> tángun hiscan siu xuta nandya rë Israel, xuta jan ne tangun me cojo ngu chu tsánga rë Nina xi cachaja chu. <sup>7</sup> Tuhun cumachaya rë xuta cjuandajiyi rë Nina xi jima tiña gobiernu xi sahmi me. <sup>8</sup> Nihñu xi cuma ndaja xuta hmu rë, nicuyun cjuahñu rë nima, nihñu xi cuma ndaja xuta xi yaha chuxin rë me chíhin vitaha, hacuaaha naxunxun xitsehen. Ngahñu xi meje nuju xi cuatjin nihñu ne, tu cuatjo ni sacu nuju, vëhë xi hacuaaha tu cuatjo ni tuhun ngahñu jan.

<sup>9</sup> Xicachjuun oro o sá quicha tyava o tu mé ni tujún xi cuinchunndujun cahntsua tsá tujún nuju xi tsëhë gastu nuju. <sup>10</sup> Xicachjuun changa, xicachjuun ngu xuta tsjian, hacuaaha xicachjuun ngu xuta chuxinxte o sá ngu bastón ta, xuta xi sahmi me xá ne, tsëhë xá jan sacu rë me gastu rë me.

<sup>11</sup> Cuanitjin ne, tu mé ni nandya o sá tu mé ni ranchun xi cuisuhun ne, ngajan cuinchunsun ngu xuta xi ndaja xahasen rë me, ngajan ndava me ne, nechunchandun hisca xi cuetjuxun tsëhë nangui jan. <sup>12</sup> Hane hya xi cuisuhun ngu ndihya ne, tinúnju ngu nina cuitjin: “Nina sua nuju me cjuandaja cjuajeya.” <sup>13</sup> Hane sá xi nai rë ndihya jan ndaja vëe me yun ne, catísatë rë ndava me jan cjuajeya; peru sá xi hacuiin ndaja vëe me yun ne, satiin rë me cjuajeya jan. <sup>14</sup> Hane hiscan xi tjin xuta xi cjuahatsjaain nuju me, xi chjuhun ndiya xi cuetjuxun tsëhë nandya vëhë ne, titsunu chojo rë ntsacu. <sup>15</sup> Cuichjá cojo nuju ngu cjuaquixi ta hya xi cuechú nixtin xi tsichuva Nina xuta tsëhë jyë rë me ne, hitsé sa jyë castigu cuatju xuta tsëhë nandya xi cafahatsjaain nuju jan, xi cumá rë xuta tsëhë nandya Sodoma cojo xuta nandya Gomorra.

*Cjuañihi xi cuatjun cuma*

<sup>16</sup> Ngahan titsingátju nuju ngayun xuta jeya xi cuangun ngajñi rë xuta hnga cacun sacuaaha cjeu ngu chu tsánga ngajñi rë chu cjan rë. Vëhë xi meje rë xi ndaja quicuntacun sacuaaha quicuncacun chu yë, peru hacuiin tsavi yun sacuaaha tsajin tsavi chu paloma. <sup>17</sup> Peru nechun cuidadu ta, cjuaha nuju xuta cjuecojo nuju me xcun xutaxa rë ndihyavasen, hacuaaha cuaja nuju me ngajan yungun rë me, <sup>18</sup> hisca cjuecojo nuju me xcun gobernador, hacuaaha cjuecojo nuju me xcun me xi vitexa me jingujyë ni nandya. Cuatjin cuangun ngatsë rë xi ladu naha má ngayun. Ngatsë rë vëhë sacu nuju cahndé xi ninguijun cja xi cavicuyá nuju xcun xuta jan cojo xuta xi hvín me cja rë Nina. <sup>19</sup> Hya xi cuatjin cjuecojo nuju me ne, hacuiin cuityjanguntacun tsëhë hacutjin xi ninguijun ta, tsëhë xi hora vëhë ne, Nina sua me ngayun cja xi nicuyun. <sup>20</sup> Ta tsëhë xi hacuiin cja nuju xi cuinúnju ta tsëhë Hasen rë Nina cuinduva cja xi cuinúnju.

<sup>21</sup> Hacuaaha xuta ladu naha ne, hntsé me, cuinchajyë rë me, xutacha rë me, cuinchajyë rë me, quihndi rë me cuinchajyë rë me cojo sa xi xutaxa rë ne, cjuaha rë me me ne, tsiquehen rë me. <sup>22</sup> Yëjë ni xuta ne, choho scuëë nuju me, tsëhë xi ladu naha ngayun. Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. <sup>23</sup> Hya xi tsujihiyatjengui nuju me ngu nandya ne, tangun ngu nandya tiñataha ta, cuichjá quixé



cojo nuju ta xi chaja sa cuatjun jinguyjé ni nandya tséhé nangui ré Israel ne, cúa ngahan Quihndi ré Xuta.

<sup>24</sup> Ngu cha xi sehe tivutaya matsejen ne, hacuiin hitsé sa matitjun cha xi cumá ré maestro ré cha, cuanitjin ne, ngu cha hndixahan ne, chuva venguichji ré cha xi cumá ré nai ré cha. <sup>25</sup> Catamangucacun cha tséhé xi cuechú nixtin xi tangun cuenguichji ré cha cojo maestro ré cha o tangun cuenguichji ré hndixahan cojo nai ré. Ha chuva véhé ni cuatjun ta sá xi choho cuichja xuta nai ré ndihya ne, ngu xitsehen me, hitsé sa choho cuichja me tséhé xuta ré nai ré ndihya jan.

#### *Xicarcuun xuta*

<sup>26</sup> Xicarcuun xuta condra nuju. Yéjé ni xcusun xi casetsangui ne, cuechú nixtin xi chjaháxin ré xi titsangui ré. Véhé xi yéjé ni xcusun xi hma ne, handasa sahmangui ne, peru cuechú nixtin xi cuetjucaa tsejen. <sup>27</sup> Yéjé ni cjua xi cuichjá cojo nuju hiscan jñu ne, cuinújunsun hiscan hasen. Yéjé ni cjua xi cuichjáhma ne, cuechú nixtin xi cuinuhya ré jinguyjéjé ni nandya. <sup>28</sup> Xicarcuun xuta xi cuma tsiquehen yojo nuju, peru ngaxtun véhé ne, tsajin me dañu ma sahmi me cojo hasen nuju. Hitsé sa ndaja ne, rcun Nina, me xi tjín ré chuva ré xi tsiquehen me yojo nuju hane hacuaha tsingatjenya nuju me hiscan xi má hasen nuju castigu.

<sup>29</sup> Chutsujun ta jo chu nisé langa ne, ngu ni tujún chji ré chu, peru handasa cuatjin ne, hiscan ngu chu cumaji cueya chu sá xi suaain Nina cahndé. <sup>30</sup> Hane ngayun ne, hisca jimangu tsjarcon ne xqui tjín ré Nina. <sup>31</sup> Véhé xi xicarcuun ta, tséhé xi jimangu ngayun ne, hitsé sa jercu vengui chji nuju xi cumá ré chu nisé vé, handasa jemu cjín chu.

<sup>32</sup> Yéjé xuta xi tsinguixi me xcun yahnga xuta xi xuta ladu naha má me ne, hacuaha ngahan tsinguixé xcun Nahmi naha xi tacun ngahnga xi xuta ladu naha má me. <sup>33</sup> Peru yéjé xuta xi tsinguixiin me xcun yahnga xuta xi hacuiin xuta ladu naha má me ne, hacuaha hacuanitjin ni tsinguixé ngahan xcun Nahmi naha xi tacun ngahnga.

#### *Ngatsé ré cjua ré Jesucristu xi sahmi condra xutacjin xicjin me*

<sup>34</sup> Xi má nuju ngayun ne, ¿há cjuajeya canduvácojo xi cumá ré xuta ngasunhndé? Hacuiin cuatjin. Ngahan ne, si canduvá cojo. <sup>35</sup> Canduvá tsinguetsuntaha xicjin xuta. Cha quihndi ne, sahmi condra cha nahmi ré cha, hane na quihndi ne, sahmi condra na naa ré na, hane jahnda ne, sahmi condra na nahya ré na. <sup>36</sup> Cuatjin xuta condra ré me ne, cuma ni xuta ré me.

<sup>37</sup> Sá xi ngu me ne hitsé sa tsihmu cacun me nahmi ré o sá xi naa ré me xi cumá ná ngahan ne, vechiin chuva ré xi tsahan cuma me. Hacuaha sá xi ngu me ne hitsé sa tsihmu cacun me quihndi ré me sá xihin sá chjuun xi cuma ré xi tsihmu cacun me ngahan ne, vechiin chuva ré xi tsahan cumá me. <sup>38</sup> Ha cuanitjin ne, sá xi ngu me ne miji cjuējñahñu xahasen ré me xi cjuecojo me ndiya naha handasa cueya me xcun cru ne, cumaji cuechu me chuva ré xi tsahan cumá me. <sup>39</sup> Xuta xi nguēhe ni ngasunhndé meje cjuendju me cojo cjuahñu ré me ne, titsichajá me cjuahñu xatsé xi sua Nina me. Peru xuta xi titsichajá me cjuahñu ré me nguēhe ngasunhndé ne ngatsé naha ne, hatuxa sacú ré me cjuahñu xatsé xi sua Nina me.

#### *Cjuatjo xi sua Nina*

<sup>40</sup> Xuta xi cjuahatsja me yun, tangun sacuaha xi cjuahatsja ná me ngahan suva, hane xuta xi cjuahatsja ná me ne, tangun sacuaha xi cjuahatsja me Nahmi naha, me xi catsingatju ná. <sup>41</sup> Xuta xi cjuahatsja me ngu me xi chja me cjua ré Nina ne ngatsé xi chja me jan cjua ré Nina ne, tangun chji sacú ré me cojo me jan. Hacuaha xuta xi cjuahatsja me ngu xihin xi tyahi cjuatacon ré me xcun Nina ngatsé ré ndaja xihin jan ne, tangun chji sacú ré me cojo xihin jan. <sup>42</sup> Cuanitjin ne, xuta xi sua me ndastu ngu vasu nandá cjuahatsja tu yo ni xi xuta ladu naha ne handasa jemu yuma jyihí me ne, sacú chji ré me ngatsé ré xi cuatjin sahmi me cojo xuta xi tjengui ná.

## 11

#### *Cha xi catsingatju Juan Vitenda ré Xuta*

<sup>1</sup> Hya xi camá ne, xi cajnetaha cjua xi cavitexa Jesús cha xi tejó má jan, sehe cavetjuxin me quiji me nandya xi siutahndee, ngajan cavicuaya me xuta cachja me cojo tséhé cjuandajyihí ré Nina.

<sup>2</sup> Nixtin hya ne, ha jiya Juan Vitenda ré Xuta ndavaya, hane ngajan camachaya ré me tséhé xcusun xi sahmi Jesús. Véhé xi catsingatju me ngujo cha ladu ré me xi quiji cha <sup>3</sup> cavinenguise cha Jesús cuitjin:

—¿Há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin cavinenguise xuta xi catsingatju Juan jan.

<sup>4</sup> Hya xi camá ne, catsicuya Jesús cjuca cojo cha xi cuacun jan hane cuitjin cachja me:

—Tjangan ne, sehe tinújun cojo Juan yêjê cjuca xi canuhyun cojo yêjê xcusun xi cahyun.  
<sup>5</sup> Tinújun ta xuta rcá ne, camá camatsejen rê me; xuta rengun ne, camá quijindaja me; xuta xi yaha rê chíhin vitaha xi setaha yojo naja ne, camandaja me; nima ne, cavuya nga cjuahñu; xuta yuma ne, casacu camachaya rê me cjuandajiyi rê Nina. <sup>6</sup> Hacuaha jemu ndaja tsêhê tu yo ni xuta xi hacuiin tsismicacun me xi mangu cacun me cojo ná. —Cuatjin cachja Jesús.

<sup>7</sup> Hane hya xi cavetju quiji xuta ladu rê Juan jan ne, sehe cavetsihin cachja Jesús cojo xutacjín jan cuitjin tsêhê Juan:

—Hya xi cavetjun catsangun ngajan ngu xín tsêhê nandya catsangun tjengun Juan matsejen ne, çhá caningatuhuntacún xi cuechuntuhun ngu xihin xi hacuiin ngu ni cjuatacun rê me, sacuatjin rê ngu ndeje xi fi ngeuhe fi ngajan rcu sacuatjin cjui tjo? <sup>8</sup> O há tsajin ne, çhá caningatuhuntacún xi cuechuntuhun ngu xihin xi yaja ngu tsjian xi jemu tu ndajiyi camahani? Hacuiin cuatjin. Ha hyaan matsejen ta xuta xi jercu tu ndacun camahani tsjian vaja me ne, sacuiin naja ngajan xin jan, ta sacu naja ndava ngu xuta nchina. <sup>9</sup> Peru ngayun matsejen ne, catsangun cachutsujun ngu profeta. Hacuaha cjuaquixi xi vêhê cachutsujun. Peru profeta Juan vê matsejen ne, hitsê sa vengui chji rê me xi cumá rê yêjê sa profeta xi yahnga. <sup>10</sup> Hacuaha me vêhê xi cachja Nina tsêhê me xcun xujun rê me cuitjin: Ngahan ne, tsingátju titjun ngu cha xi scuxaha cjuatacun rê xuta tsêhê xi cjuehe ngaye.

<sup>11</sup> Cuichjá cojo nuju matsejen ta ngajñi rê yêjê xuta xi catsin me tsêhê naa rê me matsejen ne, tsjian ngu xi hitsê sa vengui chji rê xi cumá rê Juan. Peru hya xi cuetsihin Nina sahmi me gubernu ngeuhe ngasunhdê matsejen ne, xuta xi chuva cuengui chji rê me nixtin hya matsejen ne, hitsê sa cuengui chji rê me nixtin hya, xi cuma rê xi vengui chji rê Juan quihndê.

<sup>12</sup> Hisca nixtin xi caxtenda Juan hisca nixtin quihndê ne, má cjuasuê xi satê rê gubernu xi sahmi Nina; xuta ne, meje cuisehen me ngajan, handasa cojo cjuachan. <sup>13</sup> Xi chaja sa nduva Juan ne, yêjê ni xujun xi catsihindu profeta cojo xujun rê ley ne, suva casua camachaya rê xuta tsêhê gubernu xi sahmi Nina. <sup>14</sup> Sá xi meje nuhyun cjuaquixi ne: Juan ne, hacui Elías, xi sehe nduva xu. <sup>15</sup> Yo ngayun xi tjin nuju cjuasua xi cuinuhyun cjuca vihi matsejen ne, ndaja tetuhuncun.

<sup>16</sup> 'Ngayun xuta tsêhê nixtin vihi matsejen ne, çmé xi tangun ngayun cojo? Tangun ngayun cojo langa xi siu ngajan ndetsin, xi jindaya xicjin <sup>17</sup> cojo cjuca vihi: "Canijani tsujun ne, mijí xtun; casin va ne, mijí chjihndun." Cuatjin jindaya langa. <sup>18</sup> Cuatjin çhá cojo nuju matsejen ta, Juan xi vitenda nuju ne jinii me niñu hacuaha hviin me xan, hane nújun ta jiya xitsehen xahasen rê me. <sup>19</sup> Hane ngahan xi Quihndi rê Xuta Jain matsejen ne, jinê hacuaha hvê, hane nújun ta ngu cha cahntsuaniniñu ngahan, ngu cha cahntsuaخان ngahan, hacuaha ngu cha amigu rê cha xi faha tujúnsa cojo jingu sa xuta tsehen ngahan. Tsejen xi ndaja ngu cjuatacun xi casacu rê ngatsê rê xi ndaja tivetjucaa tsujun xi tinihñuchuhun.

#### *Chojiyi tsêhê xuta nandya xi vindeyaain cjuatacun rê me*

<sup>20</sup> Hya xi cama ne, cavetsihin Jesús çhjataha me xuta nandya jani hitsê sa jemu casahmi me cjuarcun camá, ta catsindeyaain me cjuatacun rê me. Cuitjin cachja me:

<sup>21</sup> —Jemu chojiyih tsujun xuta nandya Corazín! ¡Hacuaha jemu chojiyih tsujun xuta nandya Betsaida! Jemu chojiyih tsujun ta, tsêhê xi sá xi xutaxin tsêhê Tiro cojo xutaxin tsêhê Sidón cavêê me cjuarcun xi cahyun ne, ha catsindeya me cjuatacun rê me, hacuaha ha cavajá me tsjian xi sacuaaha tsánaxá hacuaha caviyuju me ngajñi ndesu, sacuaaha xcusun naja hya xi choho má naja. <sup>22</sup> Vêhê xi hya xi tsichuva Nina yêjê xuta tsêhê jyê rê me ne, xuta nandya Tiro cojo xuta nandya Sidón ne, hitsê sa chuva castigu cuatju me cumá xi cumá nuju ngayun xuta nandya Corazín cojo ngayun xuta nandya Betsaida. <sup>23</sup> Hane ngayun xuta nandya Capernaum ne, çhá cuangun hisca ngahnga hiscan tacun Nina? ¡Hacuiin! Hatuxa cuangun nduchin, cahndê hiscan fi hasen rê nima ta, tsêhê xi sá xi xuta tsehen tsêhê Sodoma cavêê me cjuarcun xi cahyun ne, ha catsindeya me cjuatacun rê me, hane tacun cuaha nandya jan hisca quihndê. <sup>24</sup> Vêhê xi hya xi tsichuva Nina xuta ne, hitsê sa chuva castigu cuatju xuta Sodoma xi cumá nuju ngayun xuta nandya Capernaum.

#### *Casahmi jyê casahmi hnga Jesucristu Nina*

<sup>25</sup> Nixtin hya ne, cachja Jesús cojo Nina cuitjin:

—Ngayun nahmi naha ne, sahme jyê sahme hnga nuju, ngayun xi Nai rê ngahnga cojo nangui, ngayun, tsêhê xi ngayun caveyúnhmu cjuatacun vêhê xi cuma rê xuta xi jemu vechú cjuatacun rê, hane catuhun camachaya rê xuta xi jñu tsêhê me. <sup>26</sup> Ngayun nahmi naha, cuatjin canihñu ta, tsêhê xi cuatjin xi cachuya nuju. —Cuatjin cachja Jesús cojo Nina.

<sup>27</sup> Cachja me cojo xuta:

—Yëjë ngarca matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin yo xi vëë Nahmi naha matsejen ne ta, suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. <sup>28</sup> Ngayun xi fenda rë xahasen nuju, ngayun xi hai tjin tacun tsëhë jyë nuju ne, nduvun tjengun ná, hane cjuaháxén vëhë xi sahmi hai nuju. <sup>29</sup> Ningatuhun xi chjuhun yugu naha sacuaaha má cojo ndyaja hya xi cjuaha chu xa sahmi chu, hacuaaha chjayunngun tsahan. Ta ngahan ne, tjin ná cjuandaja cjuajeya, hane sacu hñu rë xahasen nuju. <sup>30</sup> Ta yugu xi suá nuju vihi ne, hacuiin hai, tanguaain cojo tsëhë chu ndyaja, hane xa xi suá nuju ne, hacuaaha hacuiin hai.

## 12

*Cavotohosun xuta ladu rë Jesucristu trigu nixtin xi chjahájenda rë*

<sup>1</sup> Nixtin hya ne, cuatjin camá ngu nixtin xi chjahájenda rë. Hora xi tivatju Jesús cojo xuta ladu rë me hiscan tjin tjë trigu ne, cama vojo rë xuta ladu rë me, cavetsihin cavotohosun xuta jan tsë tsë trigu jan ne, catsufëtsja me cajine me. <sup>2</sup> Hane cha tsëhë partidu fariseo xi cavëë cha xi cuatjin casahmi me, cachja cha cojo Jesús cuitjin:

—Chutsujun ni, xuta ladu nuju ne, tisahmi me xa quihndë nixtin xi chjahájenda rë, handasa chja ley naja xi cumaji xi cuatjin nihña.

<sup>3</sup> Hane cafayangui Jesús cuitjin:

—Ngayun, ha cachutayun xcusun xi casahmi xutachanga naja David hatsëë nixtin hya xi jercu camá vojo rë me cojo xuta xi siu cojo me. <sup>4</sup> Cavisehen me ndava Nina, hane cafaha me pan xi viyuju xcun Nina xi tsajin cahndë xi tu yo ni sinë ta suvá ni nahmi xi cuma sinë me. Peru David ne, cajinë me hacuaaha casua me cajinë xuta xi siu cojo me. <sup>5</sup> Cuanitjin ne, ha cachutayun xi chja cjuá rë ley naja xi nahmi xi sahmi xa ndava Nina ne, ngajan tjin xa xi satë rë me nixtin xi chjahájenda rë peru tsajin jyë xi cuma rë me handasa tisahmi me xa nixtin hya. <sup>6</sup> Cuichjá quixë cojo nuju ta nguehe tacun ngu xi hitsë sa meje rë xi chjahanrcun rë xi cumá rë yungun xi matitjun. <sup>7</sup> Cjëë cuijnercun cjuá xi chja: “Hitsë sa ndama ná xi cumayuma nuju xingun tsëhë xi cumá rë xi nicuhun chu sacuaaha cjuatjo xi tuhun ná.” <sup>8</sup> Hacuaha cachja sa Jesús cuitjin: Ngahan xi Quihndi rë Xuta Jain ngahan ne, ngahan xi vitéxa mé xi cuma nixtin xi chjahájenda rë.

*Casahmi Jesucristu xi camandaja cha xi quixihñu ngu tsja*

<sup>9</sup> Hya xi camá ne, xi quiji sa Jesús ne, cavisehen me yungun ngajan. <sup>10</sup> Hane tacun ngu cha cahntsua yungun jan xi quixihñu tsja quixi cha. Hane cha xi vicuya cjuachacun cojo cha fariseo ne, cavinenguise cha Jesús cuitjin:

—¿Mé xi tsingatihí ley xi nihña nixtin xi chjahájenda rë? ¿Há sua cahndë xi nirquen rë xuta hmu rë? —Cuatjin cavnenguise cha me xi sehe cuma cuinchajyë cha me.

<sup>11</sup> Hane cuitjin cafayangui Jesús tsëhë cha:

—¿Há cuma xi ngu ngayun handasa hya xi nixtin xi chjahájenda rë ne, cuanguun naxun chu tsánga nuju sá xi cjuinenguia chu ngu ngojo xi jemu nungun? <sup>12</sup> Sá cuatjin vengui chji rë ngu chu tsánga ne, hitsë sa cjin vengui chji rë ngu xihin. Vëhë xi tsingatihí ley xi nixtin xi chjahájenda rë ne nihña cjuandaja.

<sup>13</sup> Sehe cachja Jesús cojo cha hmu rë cuitjin:

—Nixingun ntsun. —Cuatjin cachja me.

Hane cuatjin casahmi cha. Hane tsja cha xi quixi ne, ha camandaja sacuatjin jyihí tsja cha xingu. <sup>14</sup> Hya xi camá ne, cha partidu fariseo jan ne, cavetju cha quiji cha, cachja cha ngajñi rë cha cojo xicjin cha xi meje rë xi sacuya ra xcusun hacutjin cuma tsiquehen cha Jesús.

*Cjuá xi catsihindu profeta tsëhë Jesús*

<sup>15</sup> Peru Jesús ne, machaya rë me cjuatacun jan, hane cavetju me quiji me tsëhë ngajan. Hacuaha cjin xuta quiji tjengui cojo rë me, hane catsindaja me yëjë ni xuta tsëhë chíhin xi má rë me, <sup>16</sup> sehe cachja me cojo me xi cuichjaain të me yo me jan. <sup>17</sup> Cuatjin casahmi Jesús xi cuetjucaa cjuá xi catsihindu profeta Isaías xi chja cuitjin:

<sup>18</sup> Cha vihi ne, cha mosu naha, cha xi cavitéxa ngahan, cha xi tsihmúcacun, cha xi ndama ná tsëhë.

Suá cha Hasen naha, cuichja cha cojo xutaxín tsëhë hacutjin quixi Nina hya xi tsichuva me xuta.

<sup>19</sup> Cha vihi ne, hacuiin cjin cuisiajmi cha cojo xuta; hacuiin jindaya të cha xi chja cha.

Cuichjaain hñu cha cojo sa xi jemu catjaha cuenda rë cha xuta xi tsujyihya me ndiya të.

<sup>20</sup> Xcotaain cha cjuatacun rë hisca ngu xuta yuma xi tangun me cojo ngu ndeje xi caxtane, hacuaaha sahmi chuvaain cha cjuatacun rë xuta yuma xi tangun me cojo ngu candil xi ha ndiya coho.

Yějě xcusun vihi ne, sahmi cha hisca xi cumatsejen cjuaquixi rě gubernu rě cha.

<sup>21</sup> Hane xuta ngasunhndě ne, cuetahacacun me cha.

*Cachja xuta xi Satanás casuaxa rě Jesús*

<sup>22</sup> Cavechú ngu nixtin xi cafehe tjengui xuta Jesús hane yaha me ngu cha xi jiya xitsehen xahasen rě cha. Rcá cha jan hacuaha lihmi cha. Hya xi camá ne, Jesús ne casahmi me xi camandaja cha jan hisca cama cachja cha hisca cavutsejen ndaja cha. <sup>23</sup> Hane xutacjn ne, jemu quijircun rě me cachja me cuitjin:

—¿Há cumacacun xi cha vihi hacui quihndi tjě rě David xi tsingatju Nina?

<sup>24</sup> Peru cha partidu fariseo xi camachaya rě cha cjua jan ne, cachja cha cuitjin:

—Hacuiin suvá cha vaxëxin cha xitsehen ta Beelzebú, xitsehen xi matitjun ne, vëhë casuaxá rě cha xi vaxëxin cha xitsehen.

<sup>25</sup> Peru Jesús ne, tsëhë xi ha vëë me mé xi tsingataha cacun xuta xi cuacún jan ne, cuitjin cachja me cojo cha:

—Hya xi xuta tsëhë ngu nandya ticjan me ngajñi rě me cojo xicjin me, cjuë ngahñu cjua rě, hane cjuancanii rě me. Hacuaha sá xi xuta tsëhë ngu ndihya ne, scaan me ngajñi rě me ne, ngajan chajá ngahñu cjua rě ndihya jan. <sup>26</sup> Ha cuanitjn rě Satanás ta, sá xi Satanás ne vaxëxin xitsehen xi yahnga ne, cavatëcja ngahñu cjua rě, hane cumaji cuitexa xicjin. <sup>27</sup> Vëhë xi sá xi Beelzebú casua ná xa xi vaxëxin xitsehen ne, hacuaha ha Beelzebú vëhë casua rě ngu ngu xuta ladu nuju xa xi hacuaha vaxëxin me xitsehen. Vëhë xi me vëhë ni cuma cuichja me xi cuaintjin cjua xi nújun xi Beelzebú casua ná xa. <sup>28</sup> Peru sá xi hacuiin Beelzebú casua ná xa ta Nina casua me ne, ngajan matsejen xi gubernu xi sahmi Nina ne, ha tivetsihin.

<sup>29</sup> Hisca ngu cha chëjë cumaji tu cusehen ni cha ndava ngu xuta xi hñu cjua rě sá xi tacun me. Titjun tsihñu cha xuta xi ndava ta cuatjin xi cuma tsichëjë cha tsëhë me.

<sup>30</sup> Xuta xi fin me favor naha ne, condra naha má me. Hane xuta xi visecuain ná me xi nihñi tangun cjuatacun rě xuta cojo Nina ne, tsinguetsun me cjuatacun rě xuta.

<sup>31</sup> Hacuaha cuichjá cojo nuju cjuaquixi ta tu mé ni jyë xi sahmi xuta hacuaha tu mé ni cjua xi choho cuichja me tsëhë xuta ne, sacú rě me cjuaninchataha sa xi cuijatacun me jyë jan. Peru tu yo ni xi choho cuichja tsëhë Hasen rě Nina ne, tsajin cjuaninchataha xi cuma rě. <sup>32</sup> Cuanitjin ne, tu mé ni cjua xi choho cuichja xuta tsëhë Quihndi rě Xuta Jain ne, cuma sacú rě me cjuaninchataha. Peru tu yo ni xi choho cuichja tsëhë Hasen rě Nina ne, tsajin cjuaninchataha nguehe nixtin vi, hacuaha tsajin cjuaninchataha nixtin xi nduva.

*Ngatsë ni rě xcusun xi sahmi me ne, tsejen mé xcusun xuta me*

<sup>33</sup> ¿Jarë xi meje nuju?, ¿há xi ndaja ya hacuaha ndaja tu rě? o há tsajin ne, ¿há xi ndajin ya hane ndajin tu rě? Jima ngu ya ne, cuma tsejen sá xi ndaja o sá xi ndajin ngatsë rě tu xi sua.

<sup>34</sup> Ngayun quihndi rě chu tsehen, maji nújun cjua xi ndaja. Maji ta tsëhë xi cjua xi quitsë rě xahasen nuju ne, vëhë cjua xi vetju nújun. <sup>35</sup> Vëhë xi xuta ndaja ne, tsëhë cjuandaja xi tetjo rě me cahntsua xahasen rě me cojo cahntsua cjuatacun rě me ne, tsëhë ngajan vetju cjuandaja. Cuanitjin ne xuta tsehen ne, tsëhë cjuatsejen xi tetjo rě me ne, ngajan vetju cjuatsejen. <sup>36</sup> Cuichjá cojo nuju ta tu mé ni cjua xi cuinújun, handasa tu visajmu ni ne, tuhuncuenda rě Nina cjua jan nixtin xi tsichuva me yaan. <sup>37</sup> Cuatjin ta cojo cjua xi canújun ne, cjua jan cuma testigu xi cuetjunxun tsëhë castigu, o sá tsajin ne, cjua xi canújun vëhë cuma testigu tsëhë castigu xi cueyun.

*Cafehya xuta tsehen ngu seña xi sua Nina*

<sup>38</sup> Ngajan xi ngujo cha xi vicuya cjuachacun cojo ngujo cha partidu fariseo catsicuya cha tsëhë me, cuitjin cachja cha:

—Maestro, ningacun nijí ngu cjuarcun xi sua seña yo ngayun.

<sup>39</sup> Ngajan cafayangui Jesús cuitjin:

—Ngayun xuta tjě rě Israel xi nechun nixtin vihi matsejen ne, tsehen cjuatacun nuju, hacuaha majotacun xcun Nina. Vëhë xi chjahyun ná ngu seña xi sua Nina. Peru seña vëhë ne, sacuiin nuju ta ngu ni seña xi sacú nuju matsejen ne, vëhë seña xi casua profeta Jonás hatsëë nixtin. <sup>40</sup> Sacuatjin rě profeta Jonás ne, jyan nixtin cojo jyan nixten caseya me cahntsua chu ti jyë, hane ha cuanitjin ni ne cumá rě Quihndi rě Xuta Jain, ta jyan nixtin cojo jyan nixten seya me ngahma nangui. <sup>41</sup> Hya xi cuechú nixtin xi tsichuva Nina jyë nuju, ngayun xi nechun nixtin vihi ne, yějě ni xuta nandya Nínive matsejen ne, cjue cuinchajyë nuju me; ta me vëhë ne catsindeya me cjuatacun rě me hya xi casua profeta Jonás camachaya rě me cjua rě Nina. Peru nguehe ne ha tejña ngahan sacuaha ngu seña xi hitsë sa venguí chji rě xi cuma rě profeta Jonás. <sup>42</sup> Hacuaha nixtin hya ne, na xi cavitexa ngajan nangui Sabá ne, cjue cuinchajyë nuju ta, tsëhë xi jemu cjuañihi cavatju na tsëhë xi jercu cjin hiscan canduva na xi cuihndë na cjuatacun ndacun rě Salomón, me xi cavitexa

xuta naja nixtin hatsëë. Peru nguehe tejña ngahan xi hitsë sa vengui chji rë cjuatacun naha xi cumá rë cjuatacun rë Salomón.

*Xitsehen xi vuya*

<sup>43</sup> Hya xi vetjuxin xitsehen tsëhë xahasen rë ngu xuta hiscan xi camá sacuaaha ndava xitsehen jan ne, fi táha hiscan jemu nangui quixí camahani, vanguise cahndë hiscan xi cuejñajenda. <sup>44</sup> Hane xi sacuiin rë cahndë hiscan cuejñajenda ne, cuitjin tsingatahacacun: “Cúya rë cjuë ndya naha hiscan xi cavétjuxen.” Cuatjin tsingataha cacun xitsehen jan. Hane hya xi vuya fehe xitsehen jan cahntsua xahasen jan ne, vutsejen xitsehen jan cahntsua xahasen jan sacuaaha ngu ndihya tiya, ngu xi caxtecha tyjahi tyjahi, hacuaaha siundaja chichihin ngu tsë ngu xti. <sup>45</sup> Xi vutsejen xitsehen xi cuatjin jyihí jan ne, sehe fi jaha sa rë yatu sa xitsehen xi hitsë sa tsehen xi cumá rë vëhë ne, sehe visehen nga viyujucahndë jan. Peru xi má ngascan ne, hitsë sa chojylhi tsëhë xuta vëhë xi cumá rë titjun. Cuitjin cumá tsëhë xuta xi siu nixtin vihi. —Cuatjin cachja Jesús.

*Naa rë Jesucristu cojo xicjin me*

<sup>46</sup> Hya xi tichja me cojo xutacjin ne, naa rë me cojo xicjin me ne, cafehetjengui me Jesús, hane maji vechútahacjin me xi cuichja me cojo ta tsëhë xi jemu quitsë xuta. <sup>47</sup> Ngajan xi cachja ngu xi cachja cuitjin:

—Nutsujun ni. Ná nuju cojo nixti xingun ne, hinchacun me ngajan candatsen, xi meje nduvatjengui nuju me cuichja me cojo nuju. —Cuatjin casacu camachaya rë me.

<sup>48</sup> Hya xi camá ne, cavuya me catsicuya me cju cuitjin:

—¿Yo xi má nuju xi ná naha cojo xingueen?

<sup>49</sup> Hya xi cuatjin cachja me ne, catsingacun tsja me xuta ladu rë me sehe cachja me cuitjin: —Ngayun xi nechun nguehe ne, ngayun xi sacuaaha ná naha cojo sacuaaha xingueen ngayun ta, <sup>50</sup> tu yo ni me xi sahmi me sacuaaha meje rë Nahmi naha xi tacun me ngahnga ne, me vëhë tangun ni cojo xingueen, cojo ná naha.

## 13

*Ejemplu tsëhë cha xi catsitjë trigu*

<sup>1</sup> Nixtin hya ne, cavetjuxin Jesús tsëhë ndihya ne, quiji me tjehen laguna ngajan cavejña me. <sup>2</sup> Hane ngajan camatangun xutacjin. Vëhë xi cavisehen me ngu barcu ngajan cavejña me. Hane xutacjin jan ne, caviyuju me nangui quixí tjehen nandan jan. <sup>3</sup> Sehe cavicuya Jesús me jemu cjin cju sacuaaha xcusun rë ejemplu. Cuitjin cachja me:

—Cuejña ne xi ngu cha xi tsitjë cha trigu matsejen ne, cavetju cha quiji cha xi tsitjë cha trigu. <sup>4</sup> Hane jinguyëjë rë xi titsitjë cha matsejen ne, ngujo matsejen ne, cavixu ndiya. Hane canduva chu nisë, catsicjë chu cajine chu. <sup>5</sup> Hane ngujo nga matsejen ne, cavixu hiscan xi jemu naxindya, hacuaaha jemu chufa nihndë quisun. Ngajan jemu xati cavetju ta tsëhë xi hacuiin tjin nihndë quisun. <sup>6</sup> Hane xi cavetjuca tsuhi ne, cavaca rë cojo ndavá jan. Hane tsëhë xi tsajin tyjama rë xi nungun matsejen ne, caxintsen. <sup>7</sup> Ngujo nga ne, cavixu ngajñi nahyá. Hane xi camacha tangun matsejen ne, nahyá jan ne, vëhë casahmi hndë rë catsixi rë. <sup>8</sup> Hane xi yahnga matsejen ne, cavixu hiscan nihndë ndaja. Hane camayehe ne, ngujo ne casua tutjë rë ngu cientu sa cuatjin sacuatjin xi camatjë, ngujo nga ne, yachantë sa, hane ngujo nga ne, cantë sa sacuatjin xi camatjë. <sup>9</sup> Yo ngayun xi tjin nuju cjuasua xi cuinuhyun cju naha ne, ndaja tetuhuncun. —Cuatjin cachja me.

*Mé má ejemplu cachja Jesucristu cojo xuta*

<sup>10</sup> Hya xi camá ne, cafehetiña xuta ladu rë me cavinenguisse me Jesús tsëhë ejemplu xi chja me ta, ¿mé tsëhë xi ejemplu ni vicuya me cojo? <sup>11</sup> Hane cafayangui me tsëhë xuta jan cuitjin:

—Nina ne casua me cahndë xi ngayun ne, cuijne rcu cjuatacun tsëhë gobiernu xi sahmi Nina, cjuatahahma xi titjun ne tsajin yo machaya rë. Peru yëjë sa me xi yahnga ne, casuaain me cahndë xi cuijnercu me. <sup>12</sup> Me xi ha tjin rë cjuatacun jan ne, sua sa Nina me, ndaja cuijne rcu me. Hane me xi tsajin cjin rë cjuatacun jan ne, cjuahataha Nina hitsë xi tjin rë me. <sup>13</sup> Vëhë xi suvá ejemplu tichjá cojo rë me ta, handasa vutsejen me, peru sahmicuendaain me; visiñuju me ne, peru sahmi me sacuaaha xi vihndiin me hacuaaha vijni rcu me. <sup>14</sup> Xi cuatjin sahmi me ne, sahmichihin me cju xi catsihindu profeta Isaías xi catsihindu cju vihi:

Handasa cuisñuju ngayun ne, peru ha tuxa cuijnii rcun;

Handasa chutsujun ne, peru cumatsijiin nuju.

<sup>15</sup> Xuta xi cuacun vë ne, tichjá cjuatacun rë me, tyjavañuju me cojo tuxcun me ne, cavechja me, ta sá tu scuëë me cojo tuxcun me,

hane sá cuihndë me cojo tyjavañuju me, hacuaaha cuijne rcu me cojo cjuatacun rë me, sehe cuya me ladu naha xi cuaxëtjê me.

<sup>16</sup> Peru ngayun ne, jemu ndaja tsujun ngayujun ni tsëhë xi hatuxa tichutsujun cojo tuxcun; hacuaaha visiñuju cojo tyjavañuju. <sup>17</sup> Nguehe cuichjá quixë cojo nuju ta jemu ndaja tsujun ta, tsëhë xi hacuaaha jemu cjin profeta hacuaaha jemu cjin xuta xi matitjun xi caviyuju titjun ne, jemu meje scuëë me xcusun xi ngayun tichutsujun, peru casacuiin cavëë me. Hacuaaha jemu meje cuisñuju me cjuaxa xi tivisiñuju ngayun, peru casacuiin cavisñuju me ta, tsëhë xi cjëë cuechu nixtin.

*Cachja Jesús mé vijne ejemplu tsëhë cha xi catsitjê trigu*

<sup>18</sup> Cuatjin hindë ne, nuhyun mé meje cuichja ejemplu tsëhë cha xi catsitjê trigu. <sup>19</sup> Hya xi visiñuju ngu xuta cjuaxa tsëhë gobiernu xi sahmi Nina ne, peru vijniircu me cjuaxa jan, sehe vinduva Satanás ne, fahataha cjuaxa jan tsëhë xahasen rë me. Cjuaxa vi ne, hacui sacuaaha trigu xi cavixu ndiya. <sup>20</sup> Hane tsëhë trigu xi cavixu hiscan jemu naxindya ne, hacui sacuaaha hya xi vihndë xuta cjuaxa rë Nina, hane fahatsja me cojo cjuasua. <sup>21</sup> Peru trigu xi cuacun vë ne, jemu chüva tyjama rë vetju. Hacuanitjin ni vatju ngujo xuta má. Macjain rë me ngujo nixtin peru hya xi vechú ngu nixtin xi satë rë me cjuañihi o cjuandya xi sua xuta me ngatsë rë cjuaxa rë Nina ne, fëcacun me cojo cjuaxa jan. <sup>22</sup> Hane tsëhë trigu xi cavixu ngajñi nahyá ne, hacui sacuaaha hya xi vihndë xuta cjuaxa rë Nina, peru ha xcun xi cjuinduju me cojo nixtin rë me ne, tsingataha cacun me tsëhë cjuatacun xi satë naja nguehe ngasunhndë, hacuaaha meje rë me cjuanchina xi cjuicanii rë, hane vëhë suaain cahndë xi cumajyë cjuaxa rë Nina cahntsua xahasen rë me, hacuaaha sahmi me ngu cjuandaja xi tsingacun xi xuta rë Nina má me. <sup>23</sup> Hane hya xi vixu yahnga trigu hiscan nihndë ndaja ne, hacuaaha hacui sacuaaha hya xi vihndë xuta cjuaxa rë Nina hane vijne rcu me mé vitexa Nina, hane sahmi me cjuandaja. Tjin me xi jercu quisun cjuandaja sahmi, hane tjin nga me ne, chuva cjuandaja sahmi me, hane yahnga me, hitsë sa chuva cjuandaja sahmi me.

*Ejemplu tsëhë xi jiyahma cojo tutjê rë trigu*

<sup>24</sup> Sehe cachja nga me ngu ejemplu cojo me, hane cuitjin cachja me:

—Gobiernu xi sahmi Nina ne, cumá sacuaaha camá hya xi catsitjê ngu xuta tutjê rë trigu ndaja xcun nangui rë. <sup>25</sup> Peru nixten ne, hya xi jiñafë xuta ne, cafehe ngu xi condra rë me catsitjê cha ngu ndiji xi meje tanguncun cojo trigu. Ngajan ngajñi rë trigu jan catsitjê hma cha sehe quiji cha. <sup>26</sup> Hya xi camá ne, hisca xi cavetju xca rë, cavetju tú rë, sehe camachaya rë me tsëhë ndiji jan. <sup>27</sup> Hya xi camachaya rë me ne, cafehe mosu rë me xi tsëhë nangui jan, cavinenguisse mosu me: “Nai, tutjê ndaja xi camá canitjun, ¿há cutjin cavetjun xi casecjan cojo ndiji ne?” <sup>28</sup> Ngajan cafayangui me tsëhë mosu jan: “Ngu me xi condra naha casahmi me.” Hane cafayangui mosu jan cuitjin: “¿Há hanguin chjanijñi ndiji jan?” <sup>29</sup> Peru cafayangui me cuitjin: “¡Jéya! Caveni chjanujñu ndiji jan ta sá tsajin ne, hacuaaha chjanu trigu xi ndaja. <sup>30</sup> Catamacha catsijo, sehe cuichja hya xi tjune rë xi tjun ni cjuanejñi cha ndiji, sahmi cha xtë rë xi cuaca cha. Sehe cjuaya cha trigu, cuinchandaja cha cahndë rë.” Cuatjin fi ejemplu xi cachja Jesús.

*Ejemplu tsëhë tutjê lihndi*

<sup>31</sup> Jesús ne, cachja nga me ngu ejemplu cuitjin:

—Gobiernu xi sahmi Nina ne, hacuaaha cumajyë tangun cojo ngu tutjê ya mostasa ta jemu lihndi camahani ne. Tutjê jan ne, cafaha ngu cha catsitjê cha xcun nangui rë cha; <sup>32</sup> Tutjê rë ya mostasa ne, handasa hitsë sa lihndi má xi cumá rë yëjê ni tutjê xi yahnga ne, hya xi camá cha ni, hitsë sa jyë camá xi cumá rë yëjê ni ya xi yahnga. Cuma ngu ya xi hiscan nisë xi vitjen chu ngahnga ne, cuma sahmi chu ndava chu rcu ya jan.

*Ejemplu tsëhë san rë pan*

<sup>33</sup> Cavuya cachja nga Jesús cuitjin:

—Gobiernu xi sahmi Nina ne, hacuaaha tangun sahmi sacuaaha san rë pan xi visecjan ngu chjuun ngajñi rë jyan chuva rë nahyu rë pan cojo sa xi sahmixa ngajñi rë yëjê ni nahyu cjin jan.

*Me tsëhë xi Jesús ne, sahmixa me cojo ejemplu*

<sup>34</sup> Cuatjin cachja Jesús cojo xutacjin, ta ejemplu ni cachja me cojo xuta ne, cachjaain me chichihin ta, suvá cojo ejemplu. <sup>35</sup> Cuatjin cavicuya me sehe cuetjuaca cjuaxa xi catsihindu profeta ta:

Cjuaxa xi vetju ntsuva ne, suva ejemplu ni;

Cuichjá cjuaxa xi hinchahma hisca ntsacu cavetsihin ngasunhndë.

*Cachja Jesús mé vijne ejemplu tsëhë ndiji jan*

<sup>36</sup> Hya xi cavatju cachja me, sehe catsicjê Jesús cjuva cojo xutacjín jan, cavisehen me cahntsua ndihya hane ngajan cafehe tjengui rê me cha ladu rê me, cavinenguisse cha me çmé vijne ejemplu tsêhê ndiji nguijña jan?

<sup>37</sup> Sehe cafayangui Jesús cuitjin:

—Cha xi catsitjê trigu ne, hacui Quihndi rê Xuta Jain. <sup>38</sup> Hane nguijña ne, hacui ngasunhndê. Tutjê ndaja ne, vêhê xuta xi vihndê me tsêhê Nina, hane ndiji jan ne, hacui xuta xi vihndê tsêhê xitsehen. <sup>39</sup> Cha condra xi catsitjê cha ndiji jan ne, hacui xitsehen xi matitjun cha. Hacuaha nixtin xi cjuanga ne, hya xi cjuê ngasunhndê. Hane cha xi cjuanga ne, hacui ángel. <sup>40</sup> Cuanitjin sacuaha ndiji xi casahmi cha xtê rê xi cueti, cuatjin cumá cojo xuta xi hndiin tsêhê Nina hya xi cjuê ngasunhndê. <sup>41</sup> Hya ne Quihndi rê Xuta Jain ne, tsingatju me ángel rê me xi cuahaxin me yêjê ni xuta xi candiya xicjin me ngajñi rê cjuatsehen cojo xuta xi sahmi me cjuatsehen, cuaxêxin me tsêhê gobiernu xi sahmi Nina. <sup>42</sup> Hya xi camá cavaxêxin me ne, scandiya me xuta hiscan cuaca me ngu ndihi jyê, ngajan jemu squihnda me hacuaha jemu cuanerii nehñu me. <sup>43</sup> Peru xuta xi tyjahi cjuatacun rê me xcun Nina ne, cumá me sacuaha tsuhi xi seti xi sua hasen rê camá ngajan gobiernu xi sahmi Nina nahmi rê me. Yo ngayun xi tjin nuju cjuasua xi cuinuhyun cjuva naha ne, ndaja tetuhunrcun. —Cuatjin cachja me.

*Ejemplu tsêhê tujún xi caseyanijihma*

<sup>44</sup> Xuta xi meje cuisehen gobiernu xi sahmi Nina ne, hacuaha tangun me sacuaha ngu cha xi casacu rê cha ngu cahndê hiscan xi caseyanijihma tujún cjín. Hane hya xi camá ne, cavetsa nga cha tujún jan, sehe quiji cha cojo cjuasua ne, caviteña cha yêjê xi tjin rê cha sehe cavechutaha cha chji rê xáhva jan.

*Ejemplu tsêhê tuseti xi hnga chji rê*

<sup>45</sup> Hacuaha xuta xi meje cuisehen me gobiernu xi sahmi Nina ne, tangun me sacuaha ngu cha viteña xi vanguisse cha ngu tuseti xi hitsê sa ndaja seti. <sup>46</sup> Hane xi sacu rê cha ngu xi jercu tu vengui chji rê ne, quiji cha caviteña cha yêjê xi tjin rê cha sehe cavechutaha cha chji rê tuseti jan.

*Ejemplu tsêhê changa rê chu ti*

<sup>47</sup> Hacuaha gobiernu xi sahmi Nina ne, cumá sacuaha ngu changa jyê xi catsingatjeya xuta ndachacun. Hane hya xi camá ne, ngajan cahntsua changa jan camá tangun yêjê xcusun chu ti. <sup>48</sup> Vêhê xi hora xi catsê rê ne, cajuvé nga xuta changa jan ne cavejña me tjehe rê ndachacun ngajan cavaxijin me chu. Chu xi chine ne, cavinchandaja me, peru cacandi me chu xi yahnga. <sup>49</sup> Cuanitjin ne cumá hya xi cjuê ngasunhndê, ta cuinduva ángel ne, cuatêcja me xuta xi tsehe cjuatacun rê me tsêhê xuta xi tyjahi cjuatacun rê me, <sup>50</sup> sehe scandi me xuta tsehe hiscan cuaca me ngu ndihi jyê. Hane ngajan ne, jemu squihnda me hacuaha jemu cuanerii nehñu me.

*Cjuanchina xatsê cojo cjuanchina changa*

<sup>51</sup> Hya xi camá ne, Jesús ne, cavinenguisse me xicjin me:

—¿Há cavijne rcu cjuva ví?

Ngajan cafayangui me:

—Juun, cavijnircuin.

<sup>52</sup> Sehe ngajan cachja Jesús cuitjin:

—Hya xi ngu maestru xi vicuya me ley ne, sá xi scutaya me xi meje cuisehen me ladu tsêhê gobiernu xi sahmi Nina ne, sahmi me sacuaha nai rê ngu ndihya jyê. Xuta jan ne, vaxê me xcusun xatsê ne, hacuaha vaxê me xcusun changá tsêhê cahndê xi cavinchandaja me.

*Jesús ne, cavuya me nangui rê me*

<sup>53</sup> Hya xi camá cajnetaha cachja Jesús ejemplu vihi ne, sehe cavatju quijixin me. <sup>54</sup> Hane xi quiji me ne, cafehe me nangui rê me, ngajan cavicuya me xuta cahntsua yungun rê. Hya xi camá ne, jercu cavêhêrcun me Jesús, hane cachja me cuitjin:

—¿Jani cavutaya cha vihi ta jemu tjin rê cha cjuatacun? ¿Jani casacu rê cha cahndê xi sahmi cha cjuarcun? <sup>55</sup> Cha vihi ne, quihndi rê cha chjineya jan. Naa ra ne, María hmí na. Hacuaha xicjin cha ne, hacui Jacobo, José, Simón cojo Judas. <sup>56</sup> Hacuaha tichjá cha ne, xuta nandya naja. Ha hyun ta cuatjin peru, ¿jani casacu rê cha cjuva xi tichja cha?

<sup>57</sup> Cuatjin ne mijí cjuaha cuenda me cjuva rê Jesús tsêhê xi tangun nangui rê me. Sehe cachja Jesús cuitjin:

—Ngu profeta ne, macjain rê xuta me, peru hatuxa xuta nangui rê me macjaain rê me tsêhê me. Hacuaha xuta ndava me ne, macjaain rê me tsêhê me.

<sup>58</sup> Cuatjin camá ta tsêhê xi ngatsê rê xi macjaain rê xuta me ne, ndastu cjín cjuarcun casahmi me ngajan.

## 14

*Xi má rë Herodes ne, Jesús ne, hacui Juan Vitenda Xuta*

<sup>1</sup> Nixtin hya ne, camachaya rë me xi matitjun xi hmí rë Herodes cjua xi tichja xuta tsêhë Jesús. <sup>2</sup> Ngajan xi cachja me cojo xuta xi faha cuenda rë me ta:

—Cha vëhë ne, hacui nima Juan Vitenda Xuta. Handasa cahme nima, peru ha cavascaya rë, vëhë xi tjin rë cha ngahñu xi má sahmi cha cjuarcun.

<sup>3</sup> Ta Herodes jan ne, ha catsingatju me cachjaha rë Juan ne, catsihñu me cha xi quiji cha ndavaya. Cuatjin casahmi Herodes ta tsêhë xi cuatjin cachuya rë na Herodía, chjuun rë hntsë Herodes. <sup>4</sup> Tsêhë na vë cachja Juan cojo Herodes cuitjin:

—Chja ley ta ndajintjin camahani xi chjahan chjuun rë xingueen.

<sup>5</sup> Herodes ne, meje tsiquehen me Juan jan, peru camaji ta tsêhë xi xi má rë xuta ne, cha Juan ne, hacui profeta má cha. Hane Herodes ne, tsacjun me xuta. <sup>6</sup> Cuatjin camá xi hya xi cavechu nixtin rë suhi tsêhë Herodes, na quihndi rë na Herodía ne, catë na ngajñi xuta xi siu suhi jan. Hane jemu cachuya rë Herodes xi cuatjin catë na. <sup>7</sup> Sehe ngajan xi Herodes casua na me cjua quixi rë me xi sua me na tu mé ni xi meje cjuehya na. <sup>8</sup> Ngajan xi na vë ne, hya xi ha cavinchangui na naa rë na ne, cachja na cuitjin:

—Meje ná xi cahntsua ngu tyuva ne, tuhun ná rcu Juan Vitenda Xuta.

<sup>9</sup> Hya xi camá ne, jercu choho cama rë Herodes. Peru tsêhë xi hisca Nina caveyanangui me hane tsêhë xi xcun cjin xuta jan casua me cjua ne, catsingatju me cjua xi cuatjin cumá. <sup>10</sup> Hane cavitexa me sindadu cavatësun cha rcu Juan ngajan ndavaya. <sup>11</sup> Hya xi camá ne, cafehe cha cojo rcu jan xcun ngu tyuva hane casua me na. Sehe quijitjengui na naa rë na, casua na naa rë na. <sup>12</sup> Hya xi camá ne, xuta ladu rë Juan jan, cafehya me nima caveyaniji me. Sehe quiji me casua me camachaya rë Jesús.

*Catsicjen Jesucristu hñú mil xihin*

<sup>13</sup> Hane xi camachaya rë Jesús ne, cavetju me ngajan cavisehen me ngu barcu quiji me ngu cahndë xín. Peru xi camachaya rë xuta ne, cavetju me tsêhë nandya ne, quiji ntsacu me tjehen laguna quiji tjengui me Jesús. <sup>14</sup> Xi tu cavetju Jesús tsêhë barcu ngunda ne, cavutsejen me xutacjin jan, hane camayuma rë me xuta jan. Hane catsindaja me xuta hmu rë. <sup>15</sup> Hane hya xi jimá nguixun ne, cafehe xuta ladu rë me cachja cojo me cuitjin:

—Jemu xín camahani cahndë vi, hane ha quiji hora. Ninguijnutuhun cjua cojo xutacjin vë ne, sehe catji me nandya xi siu tiñataha catatsë me comida xi sinë me.

<sup>16</sup> Peru Jesús ne, cuitjin cachja me cojo cha xi tejó jan:

—Sahmii ngujoyë xi cjuexin me ne, ngayun tuhun xi sinë me.

<sup>17</sup> Sehe ngajan xi cachja cha ladu rë me cuitjin:

—Hñu pan ne cojo jo ti tjin naja. —Cuatjin cachja cha.

<sup>18</sup> Sehe cachja Jesús cuitjin:

—Nduvuncujun.

<sup>19</sup> Hya xi camá ne, casahmi Jesús xi catiyuju xutacjin jan xcun ndiji; sehe cafahatsja me hñu rquí pan jan cojo jo ti jan. Hane tivutsejenniji me ngahnga ne, casua me nacuehchi rë Nina, sehe cavotoho langa me pan casua me pan jan cha ladu rë me xi cjue sua cha sinë xuta. <sup>20</sup> Hane xuta ne, yëjë ni me cajinë me hacutjin cachuya rë xahasen rë me. Hane xi cachjaya rë xi cavangui cajinë xuta jan ne, catsë tejó chajne. <sup>21</sup> Me xi cajinë pan jan ne, hñú mil má me xi xihin. Ha xin yachjin cojo langa xi hacuini cojo camaxqui.

*Quiji ntsacu Jesucristu xcun nandá*

<sup>22</sup> Hya xi camá ne, Jesús ne, casahmi rë me ngujoyë xuta ladu rë me xi cuisehen me barcu hane cjue titjun ni me ngunda vëhë, jinguyëjë rë xi tsinguijnetaha me cjua cojo xutacjin jan. <sup>23</sup> Hane hya xi camá quiji xutacjin ne, sehe camijixin Jesús rcu ndetjún xi cuisiajmi me cojo Nina. Hane hora xi camá nguixun ne, tacun suvá me. <sup>24</sup> Peru barcu jan ne, vasentjin laguna cjuí, hane jemu chja cjuí ngatsë rë tsindyü rë nandá xi tsivaha rë barcu ta, tsêhë xi tjo ne, taha hiscan cjuí ne, ngajan nduva.

<sup>25</sup> Hane hya xi tiña sahasen ne, quiji ntsacu Jesús xcun nandan ne quiji tjengui me me tsêhë me. <sup>26</sup> Hya xi cavëë xuta ladu rë me xi nduva ntsacu me xcun nandan ne, jemu camá xti rë me cachja me ta nima xi meje cuincharcun rë me, hane cajindayatë me. <sup>27</sup> Ngajan xi cachja Jesús cojo me ta:

—¡Xi carcuun! ¡Tuhun cjuetacun xahasen nuju ta ngahan vi!

<sup>28</sup> Hya xi camá ne, cafayangui Pedru tsêhë Jesús cuitjin:

—Nai, sá xi quixi xi ngayun ne, tuhun ná cahndë nduvá tjenguë nuju.

<sup>29</sup> Sehe cachja Jesús cuitjin:

—Nduvun.



Hane cavitujne Pedru tséhë barcu jan, quiji ntsacu me quiji tjengui me Jesús. <sup>30</sup> Peru xi camachaya rè me tjoxtin ne, catsacju me camá, sehe cavetsihin cavisehen ngahma me ngajñi nandan. Hya xi camá ne cajindayatë me Jesús cachja me cuitjin:

—¡Nai, naxuntjun ná!

<sup>31</sup> Hya xi camá ne, ngutjen cafhatsja Jesús me, cavaniji me me ne, cachja me cojo me cuitjin:

—Ngayun ne, cjëë cumangutacunndujun cojo ná, ¿mé má macjaain nuju?

<sup>32</sup> Hya xi camá ne, cavisehen catsijo me cahntsua barcu jan, hane hora vëhë ne caseju tjo jan. <sup>33</sup> Ngajan xi xuta xi hinchá barcu jan ne, cavixcuhnchi me cafharcun me Jesús cachja me cuitjin:

—Ngayun ne, quixi jain xi Quihndi rè Nina yun.

*Casahmi Jesús xi camandaja xuta nandya Genesaret*

<sup>34</sup> Xi quiji sa me cojo barcu ne, cafehe me tjehe laguna hiscan nandya xi hmí Genesaret. <sup>35</sup> Hane xi camachaya rè xuta xi Jesús xi cafehe me, catsingatju me cjua rè yëjë ni nandya xi siutahndee, hane xuta ne quijicojo me xuta hmu rè me hiscan tacun Jesús. <sup>36</sup> Sehe cafehya me cojo Jesús xi ndastu satëtaha xuta hmu rè jan ntsacu tsjian rè Jesús. Hane yëjë ni xuta hmu rè xi casatëtaha ntsacu tsjian rè Jesús ne, camandaja me.

## 15

*Cha partidu fariseo ne, fahataha cha Jesús*

<sup>1</sup> Ngu ndiya ne, ngujo cha tséhë partidu fariseo cojo ngujo cha maestru rè ley ne, canduva cha tséhë nandya Jerusalén, quiji cha hiscan tacun Jesús, cachja cha cojo me cuitjin:

<sup>2</sup> —¿Hacutjin cumá xi cha ladu nuju ne, sahmi cha sacuaaha yaha xcusun rè xutachanga naja? Ta cuatjin vanii cha tsja cha hora xi jinë cha niñu.

<sup>3</sup> Ngajan xi Jesús cafayangui me tséhë cha cuitjin:

—Hane ngayun ne, ¿hacutjin cumá xi vejñuxun cjua xi cavitexa Nina ngatsë rè xi nihñu xu xcusun rè xutachanga naja? <sup>4</sup> Cachja Nina ta: “Chjuhunrcun na nuju, chjuhunrcun nahmi nuju”, hacuaaha chja ta: “Yo xi choho chja tséhë xutacha rè ne, xuta ne tsiquehen rè.” <sup>5</sup> Peru ngayun tuhun cahndë xi cuichja xuta cojo xutacha rè ta: “Ha quihndë cumaji cuisécoo nuju ta yëjë ni xcusun xi tjin ná ne, ha cavejñá tsja Nina.” <sup>6</sup> ¿Mé má cuatjin tuhun cahndë xi faharcuini cha nahmi rè cha? Cuitjin ne, ngatsë rè xcusun nuju sacuaaha xi venguichjiin rè cjua rè Nina xi cuma rè xuta. <sup>7</sup> Ngayun ne, xuta jo xcun jo hntsua ngayun. Cachja quixi profeta Isaías xi cuitjin catsihindu me tsujun:

<sup>8</sup> Xuta xi cuacun vi ne, ndaja chja me tsahan

peru xi cojo xahasen rè me ne, hisca tsinguitsjiin me ngahan.

<sup>9</sup> Tu mahya xi faharcun ná me ta,

xi vicuya xicjin me ne, hacuini cjua naha ta tu cjua rè xuta.

<sup>10</sup> Hya xi camá cachja me cuatjin ne, cajindaya Jesús xutacjin cachja me cojo cuitjin:

—Ngayujun ngarca ni ne, nuhyun ndaja cjua vi: <sup>11</sup> Xcusun xi tsitsehen rè xuta ne, hacuini xcusun xi chine xi visehen hntsua me, ta xcusun xi tsitsehen rè xuta ne, xcusun xi vetjun tséhë hntsua me.

<sup>12</sup> Sehe cafehe xuta ladu rè Jesús ne, cavinenguise me cuitjin:

—¿Há hyun xi canicjun rè cha partidu fariseo ne xi cuatjin canújun?

<sup>13</sup> Peru cafayangui Jesús cuitjin:

—Tu mé ni tutjë xi catsitjiin nahmi naha xi tacun ngahnga ne, tjune rè hisca cojo tyjama rè. <sup>14</sup> ¡Caveni! ¡Nihñuu cuendun me! Me vëhë tangun me cojo xuta rcá xi cjuecani xicjin me. Hane sá xi cuatjin ne, cuixuya catsijo me xanga.

<sup>15</sup> Sehe cachja Pedru cuitjin:

—Ningacun nijí mé vijnë ejemplu jan.

<sup>16</sup> Ngajan xi Jesús cachja cojo me ta:

—¿Há hiscan ngayun cajni rrun cjua xi cachjá ni? <sup>17</sup> ¿Há hyun xi xcusun xi jinë xuta ne visehen cahntsua me? Fë ne, vetjutaha ndatsen. <sup>18</sup> Peru xcusun xi vetju chja me ne, nduva tséhë xahasen rè me, hane vëhë tsitsehen rè me, <sup>19</sup> ta tséhë xi tséhë xahasen rè xuta ne, nduva cjuatacun tsehen sacuaaha jyë xi tsiquehen xicjin xuta, sacuaaha jyë xi sahmi chjuunnahñu rè me jingu sa chjuun, sacuaaha yachjin xi viteña yojo rè, sacuaaha cjuachëjë, sacuaaha testigu xi vindacha me, sacuaaha cjuachjataha. <sup>20</sup> Yëjë cjuatsehen xi cuacun vëhë ne, nduva tséhë xahasen rè xuta, hane vëhë tsitsehen rè me; peru sá jinë me niñu cojo tsja me xi cjëë cuane me ne, tsitsiin rè me.

*Jesús ne, visesco me ngu chjuun xutaxín, na xi hacuini na ladu tséhë Israel*

<sup>21</sup> Hane Jesús ne, cavetju me ngajan, quiji me ngu nanguixin táha distritu nandya Tiro cojo nandya Sidón. <sup>22</sup> Hya xi camá ne, cafehetjengui rë me ngu chjuun cananea xi tsëhë ngajan. Cajindaya na cachja na cojo Jesús cuitjin:

—¡Nai! Ngayun, quihndindaicjin rë David, ¡catamayuma nuju ngahan! ta na quihndi naha ne, jiya xitsehen xi jemu suandya rë na cahntsua xahasen rë na.

<sup>23</sup> Peru Jesús ne, ndastu me cjuua catsicuya me. Hane xuta ladu rë me ne, cafehya me Jesús cuitjin:

—Ningatjunixun na, ta jemu si nduvatjengui na yaan fehyataha na yun. —Cuatjin cachja me.

<sup>24</sup> Ngajan xi cafayangui Jesús cuitjin:

—Nina ne, catsingatju me ngahan ngatsë rë xuta rë nangui Israel, ta me vëhë sacuaaha tsángá xi cachaja má me.

<sup>25</sup> Hya xi camá ne, cafehetiña na tsëhë Jesús cavixcuhnchi na xcun Jesús xi cafaharcun na me. Cachja nga na cuitjin:

—Tatá, nihñu favor tiseacun ná.

<sup>26</sup> Ngajan xi cachja Jesús ejemplu vi:

—Sechiye ne catijnetaha catjine nixti ta, hacuiin ndatjin xi chjahantahan niñu tsëhë nixti hane sehe tahan rë naña.

<sup>27</sup> Hane cafayangui na cuitjin:

—Quixi jain xi nújun, peru naña xi siu ngahma maxë ne, sacu xi rë pan xi vixuhndu ngahma maxë rë nai rë chu hane jinë chu.

<sup>28</sup> Sehe cafayangui Jesús cachja me cojo na cuitjin:

—Ngaye chjuun, jemu ndaja mangutacuin cojo ná. Catamandaja quihndi riji sacuaaha xi meje ri.

Hya xi camá ne, hora hya ne, camandaja quihndi rë na.

*Casahmi Jesús xi camandaja xuta tjeheh rë laguna Galilea*

<sup>29</sup> Hya xi camá ne, cavetju Jesús taha vëhë quiji me tahndee rë laguna Galilea sehe ngajan camiji me ngu ndetjún, ngajan cavejña me. <sup>30</sup> Hane jemu quijitjengui rë me xutacjin, yaha me xuta rengun, xuta rcá, xuta lihmi, xuta yoho cojo xuta xi má rë hacjahi chíhin ne caviyujutë me xuta jan xcun Jesús hane Jesús ne, casahmi me xi camandaja me. <sup>31</sup> Xi cavëë xutacjin xi cuatjin camá ta, cama cachja xuta lihmi, camajingu xuta yoho, findaja xuta rengun hacuaaha tsejen rë xuta rcá ne, sehe jercu quijircun rë me, hane casahmi hnga me, casahmi jyë me Nina, Nina jan xi faharcun xuta nangui Israel.

*Cjuarcun xi catsicjen Jesús ñuju mil xihin*

<sup>32</sup> Ngajan cajindaya Jesús xuta ladu rë me, cafehe me cachja Jesús cojo rë me cuitjin:

—Jemu yuma má ná xutacjin vi ta ha quihndë jyë nixtin hinchataha me cojo naja, hane ha quihndë tsajin camahani mé xi sinë me. Tsajin mangucacun xi tsingátju me cjue me xi cjëë sinë me niñu ta, sá tsajin ne, cjuaha rë me hinda ndiya.

<sup>33</sup> Sehe ngajan xi xuta ladu rë me ne cafayangui me tsëhë me cuitjin:

—Peru nguehe nangui xín ne ¿jani cuma sacú niji pan xi sinë xutacjin vi?

<sup>34</sup> Ngajan xi cavinenguise Jesús cojo xuta cuitjin:

—¿Há cjín pan tjin nuju?

Ngajan xi cachja me ta:

—Yatu má pan hacuaaha siu ngujo ti langa.

<sup>35</sup> Ngajan xi Jesús ne cavitexa me xutacjin xi cuiyujutë me nangui. <sup>36</sup> Hya xi camá casahmi xuta ne, sehe cafaha Jesús yatu pan cojo ti jan ne sehe casua me nacuechji rë Nina. Hane cavotoho langa me pan cojo ti jan, casua me xuta ladu rë me xi cavatëcja me ne cafaha xutacjin. <sup>37</sup> Cuatjin camá cajine xuta jan, hane jemu ndaja cama rë xahasen rë me. Hane xi cafaya xuta xi cavangui cajinë xuta jan ne catsë yatu nisinya. <sup>38</sup> Xuta xi cajinë ne, sacuaaha ñuju mil má me xi xihin me, hacjahi má xuta chjuun cojo quihndi. <sup>39</sup> Hya xi cajnetaha vëhë ne, catsingatju Jesús xuta cafe me, hane suvá ni me, cavisehen me ngu barcu quiji me taha nandya Magadán.

## 16

*Cha partidu fariseo cojo cha partidu saduceo ne fehya cha xi tsingacun Jesús ngu seña*

<sup>1</sup> Xi cafehe me ngajan ne, hacuaaha cafehe cha tsëhë partidu fariseo cojo cha partidu saduceo hane ta tsëhë xi meje cjuahachuva cha me, cafehya cha me ngu cjuarcun xi nduva ngahnga, cojo sa xi scuëë cha xi Nina catsingatju rë Jesús. <sup>2</sup> Peru Jesús ne, cafayangui me cojo ejemplu vi cuitjin:

—Nguehe ne, hya xi chutsujun xi má haní ngahnga ne, nújun jain, ta: “Tyjahi nchujun ni, ndajyihí nixtin.” <sup>3</sup> Cuanitjin hya xi sahasen ne, sá xi má haní ngahnga hane híncha yuffi

jma ne, nújun ta: “Va cumá nixtin.” Jo má tacun. ¿Hacutjin cuma xi jemu hyun mé vijne xcusun xi cún ngahnga, peru vijniircun mé vijne xcusun xi tijima nguehe nixtin vihi ni? <sup>4</sup>Xuta tséhë nixtin vihi ne, xuta xi tsehn cjuatacun rë me, xi tjenguin me Nina cojo ngu ni cjuatacun, xuta vë xi fehya me ngu seña. Peru sacuiin rë me seña ta seña xi sacu rë me ne, sacuaaha seña xi ha catsingacun profeta Jonás hatsëë nixtin.

Sehe xi cajnetaha cachja Jesús cjuva vëhë ne, caviyuju me xuta jan ne, quiiji me.

*Ejemplu tséhë san rë pan*

<sup>5</sup>Hya xi cafehe xuta ladu rë me ngunda laguna ne, hacuaaha cachaya rë me cjuaha me pan. <sup>6</sup>Sehe Jesús cachja cojo me:

—Nechun cuidadu tséhë san rë pan tséhë cha partidu fariseo cojo xi tséhë cha partidu saduceo.

<sup>7</sup>Sehe cha ladu rë me ne, cavisiajmi cha cojo xicjin cha cuitjin:

—Tséhë xi cachaya naja pan ne, vëhë xi cuatjin chja me.

<sup>8</sup>Peru xi camachaya rë Jesús xi veyananguí cha xi tsajin rë cha pan ne, cachja me cojo cha cuitjin:

—Ngayun ne, cjëë cumangutacun nduju cojo ná. ¿Mé má cuatjin nújun xi chjá ta tséhë xi tsajin nuju pan? <sup>9</sup>¿Há nuhyuun? ¿Há vitsjiin nuju? Hya xi cajiné hñu mil xuta hñu pan ne, ¿há cjín chajne cachjayun tséhë pan xi cavangui jan? <sup>10</sup>Hacuaha hya xi cajiné ñuju mil xuta yatu pan ne, hya ne ¿há cjín chajne cachjayun? <sup>11</sup>¿Hacutjin cuma xi nuhyuun xi hacuiin tséhë pan xi cachjá cjuva jan? Xi chjá ne, nechun cuidadu tséhë san rë pan tséhë cha partidu fariseo cojo xi tséhë cha partidu saduceo.

<sup>12</sup>Hya xi camá ne, camachaya rë me xi cachjaain me xi meje cuidadu cojo san xi sahmixa pan ta cachjá me tséhë xi meje cuidadu cojo cjuachacun xi sahmixa cha partidu fariseo cojo cha partidu saduceo.

*Catsinguxi Pedru yo Jesucristu*

<sup>13</sup>Ngu ndiya xi ha cavisehen Jesús distritu tséhë nandya Cesarea tséhë Filipino ne, cavinenguise me xuta ladu rë me cuitjin:

—Mé chja xuta tsahan, ¿yo ngahan, Quihndi rë Nina Jain? —Cuatjin cavinenguise me cha.

<sup>14</sup>Sehe ngajan xi cachja cha cojo Jesús cuitjin:

—Yahnga me ne, chja me ta nima Juan Vitenda rë Xuta ngayun, hane yahnga nga me ne, chja me ta Elías, hane yahnga nga me ne, chja me ta nima Jeremías, hane me xi yahnga nga ne, chja me ta ngayun ne, ngu profeta xi hacjahi.

<sup>15</sup>—Hane ngayun ne, ¿mé nújun ni, yo ngahan? —Cuatjin cavinenguise Jesús.

<sup>16</sup>Ngajan xi cafayangui Símon Pedru cuitjin:

—Ngayun ne, Mesías xi catsingatju nuju Nina; ngayun, Quihndi rë Nina, Nina quicun jain.

<sup>17</sup>Sehe cachja Jesús cuitjin:

—Ndatjin tsujun, Símon, quihndi rë Jonás. Tsajin ngu xuta xi casua camachaya nuju cjuva jan, ta Nahmi naha xi tacun me ngahnga ne, me vëhë xi casua me xi camachaya nuju tséhë. <sup>18</sup>Hane ngahan ne, suá cumachaya nuju xi ngayun ne, ngayun xi hmí nuju Pedru. Hane ñihi nuju ne, vijne ndyojo. Hane xcun ndyojo vihi sahme yungun naha; yungun jan ne, hisca cjuaveya ne tsajin ngahñu xi tsicjëya rë. <sup>19</sup>Suá nuju quicha tséhë gobiernu xi sahmi Nina, ngajan xi xcusun xi nihñucjun nguehe ngasunhndë ne, hacuaaha cumahñucjan ngajan ngahnga, hacuaaha xcusun xi chundecjun nguehe ngasunhndë ne, hacuaaha tundecjan ngajan ngahnga.

<sup>20</sup>Sehe Jesús ne, cavitexa me xuta jan xi tsajin camahani yo xi cuichja me cojo tséhë xi Mesías má me.

*Cachja Jesús xi tsiquehen xuta me*

<sup>21</sup>Hya xi camá ne, sehe cavetsihin vicuya Jesús xuta ladu rë me tséhë xi sahmi ngujoyë xi cjuve me nandya Jerusalén, hane ngajan ne, jemu cjín cjuañihi cuátju me cuma xi sahmi xuta changá cojo nahmi xi matitjun tséhë nahmi cojo cha xi vicuya cjuachacun ne. Tsitjungui cha me, tsiquehen cha me; peru xi cumá jyan nixtin ne, tsicuya Nina me cjuahñu. <sup>22</sup>Ngajan xi Pedru ne, quijixin me cojo Jesús. Sehe cavetsihin cachjataha me Jesús cuitjin:

—Tatá, ¡catamamiji rë Nina! ¡Hatuxa cumaji cuatjun cuatjin!

<sup>23</sup>Hane xi cavuya Jesús cavutsejen me Pedru, ngajan cachja cojo me cuitjin:

—Tihinxin ngaye Satanás, ngaye ne, sacuaaha ngu ndyojo xi meje xtenguia ná ngajni cjuatsehen tséhë xi ningatiintacuin ngaye sacuaaha tsingatahacacun Nina ta ningatehetacuin sacuaaha ngu xuta ngasunhndë ni.

<sup>24</sup>Sehe cachja Jesús cojo cha ladu rë me cuitjin:

—Sá xi tjin yo xi meje rë xi cuma cuisehen me ladu naha ne, ha quihndë mijí rë xi sahmi me hacutjin xi meje rë suvá me ta nchunchujun ni meje rë xi catejñahñu xahasen rë me xi cjuenduju me cojo ndiya naha, handasa hisca cueya me xcun cru. <sup>25</sup> Yo xi mijii cuisehen ladu naha tséhë xi tsacjun me xi cueya me ne, cahndë xi vetjo me cjuahñu rë me ne, tsichaja me cjuahñu xatsë xi sacú rë me. Peru yo xi ngatsë rë xi cavisehen ladu naha cueya ne, sacú rë cjuahñu jan. <sup>26</sup> ¿Mé machji rëhé rë yo xi sacú rë yëjë cjuanchina rë ngasuhndë peru sehe cueya ne cumá castigu? Tsajin mé xi cuma tsindeya xicjin me cojo cjuahñu xatsë. <sup>27</sup> Ta ngahan, quihndi rë Xuta Jain, cuinduvá cojo hasen ndajyihí tséhë Nahmi naha hacuaha cojo ángel naha cuinduvá; hane hya ne, cuechji me jimangu me, ¿há ndaja há ndajin casahmi me? <sup>28</sup> Cuichjá quixë cojo nuju ta tjin yahnga ngayun xi sechun nguehe xi cueyuun jinguyëjë rë xi cjëë chun xi cuitexa Quihndi rë Xuta Jain gobiernu xi sahmi Nina.

## 17

### *Cavindeya xcusun rë Jesucristu*

<sup>1</sup> Hya xi camá cavatju jyun nixtin ne, quijixin Jesús quijicojo me Pedru cojo Jacobo cojo Juan, hntsé Jacobo, quijiniji me ngu naxi hnga. <sup>2</sup> Ngajan camá xi cavëë me xi cavindeya xcusun rë Jesús: Xcun me ne, camaseti sacuaha seti tsuhi, hacuaha tsjian rë me ne, jemu tu tyava camahani camá sacuaha hasen rë ndihi. <sup>3</sup> Hacuaha ngajan cavëë me xi cafehetsejen nima profeta Moisés cojo profeta Elías, me xi caviyuju hatsëë nixtin ne, tivisiajmi me cojo Jesús.

<sup>4</sup> Sehe cachja Pedru cojo Jesús cuitjin:

—Nai, tu ma rë xi nguehe nechin ne, sá xi meje nuju ne, sahme jyan puestu; ngu cuma tsujun ne, ngu cuma tséhë Moisés, hane cojo ngu cuma tséhë Elías. —Cuatjin cachja me.

<sup>5</sup> Hane hora xi tichja Pedru ne, canduva ngu yufi xi seti tsejen casahmi tjangnen rë tséhë me, hane canuhya rë ngujo cjuá xi cavetju ngajñi yufi jan xi cachja cuitjin:

—Cha vihi xi Quihndi naha cha xi jemu hmu cacún. Jemu ndama ná ngatsë rë cha. Tinuhyun cjuá xi chja cha.

<sup>6</sup> Hya xi cahndë xuta rë me cjuá jan ne, caticaxcun me. Hane jemu catsacjun camahani me camá. <sup>7</sup> Ngajan xi cafehe Jesús cavetahatsja me me, hane cuitjin cachja me:

—Tisatjunhngun. Xicarcuun. —Cuatjin cachja me.

<sup>8</sup> Hane xi cavutsejenniji me ngajan ne, ndastu yo siu ta suva ni Jesús tacun me.

<sup>9</sup> Xi tu tivijne me tséhë rcu naxi jan cojo xuta ladu rë me xi quijicojo me jan ne, ngajan xi cachja me cojo me ta tsajin yo xi cuichja me cojo xcusun xi cavëë me. Xi cuatju cueya Quihndi rë Xuta Jain, sehe cuya nga me cjuahñu ne, hya cuichja me.

<sup>10</sup> Ngajan xi cavinenguise me cojo Jesús cuitjin:

—¿Mé má cuatjin chja maestru tséhë ley xi titjun Elías cuinduva me, sehe cuinduva Mesias?

<sup>11</sup> Ngajan cafayangui Jesús cuitjin:

—Quixi xi Elías cuinduva me titjun ta me vëhé cuiyujuchihin me yëjë ni xcusun. <sup>12</sup> Peru cuichjá cojo nuju ta ha canduva me, peru xuta ne, hvín me xi hacui me, hane choho casahmi xuta cojo me hacutjin meje rë xahasen rë me. Hane hacuanitjin sahmi me xi cuatju cjuañihí Quihndi rë Xuta Jain.

<sup>13</sup> Ngajan xi camachaya rë xuta rë me ta tichja me tséhë Juan Vitenda xuta hya xi chja me Elías.

### *Jesucristu ne, casahmi me xi camandaja cha xi faha rë chajan*

<sup>14</sup> Hane xi quiji me ne cavechutaha me xutacjín ne, ngajan cafehetjengui rë me ngu xihin, cavixcuhnchitaha cha Jesús cachja cha cuitjin:

<sup>15</sup> —Nai. ¡Catamayuma nuju cha lihndi naha ta, jemu faha rë cha chajan hane jemu choho sahmi cojo cha. Jiya hora ne, finenguia cha ngajñi ndacahi, hane jiya hora nga ne, viticjaya cha ngajñi nandan. <sup>16</sup> Cëjëcojo cha xcun xuta ladu nuju xi tsirqui me cha peru camaji casahmi me.

<sup>17</sup> Sehe ngajan xi Jesús ne, cuitjin cafayangui me:

—Ngayujun ni ne, xuta xi macjaain rë ngayun hacuaha xuta xi cavetjuxin tséhë ndiya ndajyihí ngayun. ¿Há jyë sa xi cuitejña cojo nuju? ¿Há jyë sa nixtin xi scaa ná cojo nuju? Nduvuncujun cha nguehe. —Cuatjin cachja me.

<sup>18</sup> Hya xi camá ne, cachjataha Jesús xitsehen xi hinchja xahasen rë cha, hane cavetjuxin xitsehen jan, hane hora hya ne, camandaja cha.

<sup>19</sup> Hya xi camá ne, xi cafehe xuta ladu rë Jesús cavinenguise me me cuitjin:

—¿Mé má ngayin ne xi camaji canaxinxin xitsehen jan tséhë xahasen rë cha vë?

<sup>20</sup> Ngajan xi cachja Jesús cojo me ta:

—Camaji ta hacuiin ndaja macjain nuju. Ta cuichjá quixë cojo nuju ta sá xi mangutacún cojo ná ndastu hitsë ne, hacuaha cuma cuinújun cojo naxi vihi: “Catjixin, cañin catisecon ngajan tavêhë.” Hane cuihndë tsujun. Hisca sá xi mangutacún cojo ná ndastu hitsë ne, tsajin me xi cumaji nihñu. <sup>21</sup> Peru sacuaha xitsehen xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxexeen.

*Cachja nga Jesús xi tsiquehen xuta me*

<sup>22</sup> Nixtin xi caviyuju Jesús cojo xuta ladu rë me ngajan distritu Galilea ne, cachja Jesús cojo me ngu nixtin cuitjin:

—Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta <sup>23</sup> xi tsiquehen ná me. Peru xi cjuë xi jyan nixtin ne, cuya nga cjuahñu.

Hane xi cahndë me cjuaj ne, jemu cafaha me cjuachoho.

*Jesucristu ne, cavechjitje me tujúnsa tsëhë yungun*

<sup>24</sup> Hya xi cafehe me nandya Capernaum, cafehe xuta xi faha me tujúnsa rë yungun, camatiña me tsëhë Pedru cachja me cojo me cuitjin:

—Maestru nuju ne, ¿há vechjitje me tujúnsa rë yungun?

<sup>25</sup> Ngajan cafayangui Pedru cuitjin:

—Juun, vechjitje me.

Hya xi camá ne, xi cavisehen Pedru ndihya ne, peru chajasa xi cuichja me ne, ngajan xi cachja Jesús cojo me cuitjin:

—Simón, ¿mé nújun? Sacuaha me xi matitjun tsëhë nandya ngasunhndë ne, ¿yo vitexa me xi satë rë xi cuechjitje tujúnsa? ¿Há quihndi rë me? ¿Há xutaxin?

<sup>26</sup> Ngajan xi cachja Pedru cuitjin:

—Xutaxín cuechji me.

Cachja nga Jesús cuitjin:

—Sá xi cuatjin ne, quihndi rë me xi matitjun jan ne, ha cavatjuhnga tsëhë. <sup>27</sup> Quixi vë, peru cojo sa hacuiin ngatsë rë vëhë cumacjan rë me o maxti rë me cojo naja ne, tangun laguna ne, chandunyun tsitin ngajñi nandan ne, hane hya xi faha tsitin ngu ti ne, chu xi tjun faha rë ne, chjuhun chu nuxuhun hntsua chu hane ngajan cahntsua hntsua chu jan ne, sacú tujún xi setaha cuechjun tujúnsa xi satë ná cojo xi satë nuju.

## 18

*Yo xi matitjun*

<sup>1</sup> Hya ne, xuta ladu rë Jesús cafehe tjengui me me, cavinenguise me cuitjin:

—¿Yo xi hitsë sa cumatitjun hya xi sahmi Nina gobiernu?

<sup>2</sup> Hya xi camá ne, cajindaya Jesús ngu lihndi, cavejña me cavasencja. <sup>3</sup> Sehe cachja me cuitjin:

—Hisca ngu ngayun cumaji cuisuhun gobiernu xi sahmi Nina ne, sá xi hacuiin nindeyun cjuatacun nuju hisca cuma yun sacuaha ngu quihndi. <sup>4</sup> Vëhë xi yo xi tsinguijne suvá me yojo rë me xi cuihndë me sacuaha vihndë ngu quihndi ne, me vëhë xi hitsë sa cumatitjun me hya xi sahmi Nina gobiernu. <sup>5</sup> Hane tu yo ni xi cjuahatsja rë ngu quihndi xi cuacun vë ngatsë rë xi ladu naha má ne; vëhë cuma sacuaha xi cafahatsja me ngahan.

*Xuta xi nduvacojo me xcusun xi tsitsehen rë xicjin*

<sup>6</sup> Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tsëhë xuta vëhë xi xtyangui ngu ndyojo natsi nguisin me sehe ningatjeya rë me ngajñi ndachacun. <sup>7</sup> Jemu choho vatju xuta ngasunhndë ngatsë rë xcusun xi tsitsehen rë me xi sahmi me cjuatsehen. Hatuxa cuinduva xcusun xi meje sahmi xi tsismicacun xuta ndiya rë Nina, peru jemu chojyihí tsëhë xuta xi nduvacojo me xcusun vëhë.

<sup>8</sup> Hane sá xi cjuatacun nuju meje rë xi nihñu ngu jyë cojo ntsun o sá xi cojo ntsacu ne, vengui sa chji rë xi chandunxun, ta hitsë sa ndaja tsujun xi cuma yoho yun xi cuma rë xi cuechun jingu cojo catsijo ntsun o catsijo ntsacu xcun ndihi xi tsajin nixtin tsajin nixten xi coho. <sup>9</sup> Hacuaha sá xi cjuatacun nuju meje rë xi nihñu ngu jyë cojo xcusun xi chutsujun cojo tuxcun ne, chjuhunxun tuxcun jan chandunxun, ta tsëhë xi hitsë sa ndaja tsujun xi sacu nuju cjuahñu xatsë handasa cojo ngu ni tuxcun xi cuma xi cojo catsijo tuxcun cuechun xcun ndihi xi sahmi castigu rë nima. <sup>10</sup> Cojo yëjë ni ne, nihñu cuidadu xi nitjunguun ngu quihndi sacuaha quihndi vihi, ta tsëhë xi ángel xi sahmi cuenda me ne, yëjë nixtin yëjë hora ne, siu tangun me cojo Nahmi naha hane sahmi ngujyë xi cjuéhya me cahndë xi cuichja me cojo.

*Ejemplu tsëhë chu tsánga xi cachajá*

<sup>11</sup> Quihndi rë Xuta Jain ne, canduvá me xi cuaxëtje me xuta xi cachajá. <sup>12</sup> ¿Mé xi nújun? Cuejña ne xi ngu xihin tjin rë me ngu cientu chu tsánga. Hane sá xi chajá ngu chu rë me,

¿há hyuun xi cuiyujutaha me chu xi ñujuchan tyjuhun ñuju jan nguifña ne, sehe cjue me cuanguise me ngu chu xi cachajá jan? <sup>13</sup> Hane hya xi sacú rë me chu ne, hitsé sa jyë cjuasua tjín rë xahasen rë me ngatsé rë xi casacu rë me chu xi cachaja xi cuma rë cjuasua tséhë ñujuchan tyjuhun ñuju chu xi tetjo. <sup>14</sup> Cuanitjin xi cuma rë Nahmi nuju xi tacun ngahnga, ta mijí rë me xi chajá hisca ngu quihndi rë me cuatjin.

*Hacutjin meje rë xi cuinújantahan xingueen*

<sup>15</sup> Hane sá xi ngu xingun choho sahmi cojo nuju ne, tangun suvun tinújuntuhun rë, hane sá xi tsindeya cjuatacun rë ne, ndatjin, ta hacuini cuetsuntaha cjuandaja xi tjín nuju cojo me. <sup>16</sup> Peru sá xi vihndiin me tsujun ne, tangun chjuhun ngujo xuta tanguncujun xi tinújuntuhun rë tséhë xi hya xi cuma me testigu nuju tséhë, sehe cumatsejen cjuaquixi. <sup>17</sup> Sá xi hisca cojo me vë vihndiin me tséhë me ne, tangun tinújun tséhë xcun xuta yungun, hane sá xi hacuaha vihndiin me cjuatacun rë xuta yungun jan, cumá me xi cuma nuju sacuaha ngu xutaxín o sacuaha ngu xuta ndacha xi faha rë tujúnsa.

<sup>18</sup> 'Cuichjá quixé cojo nuju ta xcusun xi nihñucjun nguehe ngasunhdë ne, hacuaha mahñucjan ngajan ngahnga, hacuaha xcusun xi nihñu ndaya nguehe, hacuaha mandaya ngajan ngahnga. <sup>19</sup> Hacuaha cuichjá cojo nuju ta sá nguehe ngasunhdë ne matangun cjuatacun rë jo ngayun tséhë ngu xcusun xi chjahyun rë Nina ne, cuetjucaa jain tsujun ta sahmi chihin Nahmi naha xi tacun me ngahnga. <sup>20</sup> Ta tu mé ni cahndé xi cuiyujuntangun ngu jo jyan xuta xi ngajan veyanangui ñihi naha, hacuaha ngajan ngajñi rë me tejña ngahan.

<sup>21</sup> Sehe cafehe Pedru cachja cojo me cuitjin:

—Nai, ¿há cjin ndiya sahmi ngujoyé xi tsinchátaha xingueen sá xi choho sahmi me cojo ná? ¿Há ndatjin xi yatu ndiya?

<sup>22</sup> Ngajan cafayangui Jesús cuitjin:

—Hacuini yatu ndiya ni, ta cuichjá cojo nuju ta mameje rë xi jyanchan të cuatjin xi yatu ndiya ninchatuhun rë me.

*Ejemplu tséhë cha xi mijí tsinchataha xicjin cha*

<sup>23</sup> Ngajan tsejen xi hya xi Nina sahmi me gobiernu ne, cumá sacuaha ngu me xi matitjun xi meje cuaxëchihin me cuenta xi tjín rë me cojo xuta rë me. <sup>24</sup> Hane hora xi tijima ne, cajindaya rë ngu cha xi cafehe cha hane cha jan ne, të mil tujún quitjen cha. <sup>25</sup> Hane ngatsé rë xi tsajin camahani cha rë tujún xi sahmingojo cha, cachja me xi matitjun jan xi xteña cha xi cuma cha ngu mosu, xteña suva cha, hacuaha cojo chjuun rë cha cojo quihndi rë cha cojo yëjë ni xi tjín rë cha, hane sehe cuatjin cuma cuechji cha tséhë xi quitjen cha. <sup>26</sup> Hya xi camá ne, cavixcuhnchi cha xcun me cafaharcun cha me cafehya cha me cuitjin: "Nai, catijnehnchan cjuacjan nuju, tuhun ná hitsé cahndé hane cuechjë tsujun." <sup>27</sup> Ngajan xi me xi matitjun jan ne, camayuma rë me cha, catsijyëcacun me tséhë cha tséhë cjuacjintacun jan, catsinchataha me cha.

<sup>28</sup> 'Peru xi cavetju quiji cha jan, cavechutaha cha jan ngu cha xicjin cha xi quitjen tséhë cha hitsé tujún, hane cafaha cha nguisin xicjin cha jan, cachja cha cuitjin: "Nihñi ngojo yëjë xi quitjin tsahan." <sup>29</sup> Hane xi cavixcuhnchi xicjin cha xcun cha ne, cachja xicjin cha jan cuitjin: "Catijnehnchan cjuacjan nuju, tuhun ná hitsé cahndé ta cuechjë tsujun." <sup>30</sup> Peru mijí sua cha cahndé, hane quiji caveya cha xicjin cha ndavaya, ngajan seya xicjin hisca xi cuma sahmingojo tujún. <sup>31</sup> Hya xi cavëë yahnga mosu xcusun xi camá cavatjun jan, jemu camá xti rë me quiji casuacuenda me tséhë cojo me xi matitjun tséhë me. <sup>32</sup> Ngajan xi cajindayavaha me xi matitjun cha jan, cachja me cuitjin: "Ngaye, jemu choho xcusun riji. Catsinchátaha yëjë ni xi quitjin tsahan, tséhë xi jemu cachjahye. <sup>33</sup> Hane ngaye, ¿hacutjin cumá xi tsajin ri cjuayuma cojo xinguin? ta ngahan ne, cama yuma ná ngaye." <sup>34</sup> Cuatjin camá xi jemu camacjan rë me xi matitjun cojo cha jan, catsingatju me cha cjuañihi ngajan ndavaya jñu hisca nixtin xi cjuë cuechji cha xi quitjen cha.

<sup>35</sup> 'Hane cuatjin sahmi Nahmi naha xi tacun ngahnga cojo nuju, sá xi ninchatuun xingun cojo yëjë xahasen nuju.

## 19

*Cjuachacun tséhë xuta xi tsismi xicjin*

<sup>1</sup> Hya xi cajnetaha cachja Jesús cjuá vi, sehe cavetju me distritu Galilea ne, cavisehen me distritu Judea ngajan tahndee ndajyë Jordán ladu vetjucaa tsuhi. <sup>2</sup> Hacuaha quiji tjengui rë me xutacjin hane casahmi me xi camandaja xuta hmu rë.

<sup>3</sup> Hya xi camá ne, ngajan cafehe cha tséhë partidu fariseo ne, quiji cha hiscan tacun Jesús hane tséhë xi meje cjuahachuva cha me cojo cjuá rë me ne, cachja cha cuitjin:

—¿Há tsingatihí ley xi ngu xihin ne, tsismi chjuun rë ngatsé rë tu mé ni xcusun xi chuyiin rë me tséhë?

<sup>4</sup> Ngajan xi cafayangui me cuitjin:

—Ngayun ne, ¿há cachutayuun ta tsêhê xi hisca ntsacu cavetsihin casahmi Nina ngasunhndê ne, casahmi me xi chjuun xi xihin xuta? <sup>5</sup> Cachja Nina ta ngatsê rê xi cuatjin casahmi me xuta ne: “Vêhê xi ngu xihin ne, cuejña cha nahmi rê cha, hacuaha cuejña cha naa rê cha, hane cumatangun cha cojo chjuun rê cha sacuaha ngu ni xahasen.” <sup>6</sup> Ha quihndê hacuiin jo ta sacuaha ni ngu ni xahasen. Hane tsêhê xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tsêhê xicjin me. —Cuatjin cachja Jesús.

<sup>7</sup> Ngajan cavinenguisse cha cuitjin:

—Sá xi cuatjin ne, ¿mé má casua Moisés cahndê xi ngu xihin cuma cuejña cha ngu xujun tsja chjuun rê cha xi ha quihndê mijí rê cha na? Hane xi cuatjin ne, cuma tsismi cha na.

<sup>8</sup> Sehe ngajan xi Jesús ne, cachja me cojo cha ta:

—Ngatsê rê cjuataja rê xahasen nuju ne, vêhê xi Moisés ne casua me cahndê xi nismu chjuun nuju, peru hacuiin cuatjin cavitexa Nina ntsacu cavetsihin. <sup>9</sup> Cuichjá cojo nuju ta yo xi tsismi chjuun rê handasa ndastu mé cjuatsehen casahmi chjuun jan cojo ngu xihin hacjahi, hane cuixan cojo ngu nga chjuun ne, tjin jyê rê me ta tsêhê xi ngatsê rê cjua rê me sahmi chjuun jan cjuatsehen.

<sup>10</sup> Ngajan xi cachja xuta ladu rê Jesús cuitjin:

—Sá xi cuatjin sacuaha xi nújun, ndajintjin tsajan xi cuixan.

<sup>11</sup> Cachja nga Jesús cuitjin:

—Hacuiin yêjê ni xuta ma vijnercu me cjua vi, suva xuta xi Nina casua cahndê xi vijnercu me ne, me vêhê vihndê me. <sup>12</sup> Tjin xuta xi cumaji cuixan me, sacuaha xihin xi hisca chaja sa catsin me ne, maji matangun me cojo ngu chjuun. Hacuaha tjin yahnga me xi catsixindê xuta me, hacuaha tjin yahnga me xi faain me ngu chjuun ngatsê rê xi sahmi mixa rê gobiernu xi sahmi Nina. Catjahatsja cjua vi tu yo ni xi cuma cjuahatsja rê.

#### *Catsinchacun Jesucristu nixti*

<sup>13</sup> Hacuaha quijicojo xuta nixti rê me hiscan tacun Jesús xi cuisanetsja me nixti jan hacuaha cjuehya me cjuandaja rê Nina ngatsê rê me. Peru hya xi cavêê xuta ladu rê Jesús xi cuatjin tijima ne, cavatêcja me cjuatacun rê xuta jan.

<sup>14</sup> Peru Jesús ne, cachja me cojo xuta ladu rê me cuitjin:

—Tuhun rê nixti cahndê catinduva tjengui ná. Xicanichuun rê cahndê ta, tsêhê xi gobiernu ni sahmi Nina ne, má tsêhê nixti xi cuacun vê.

<sup>15</sup> Hane ngajan cavisanetsja me nixti jan sehe cavetju me tsêhê cahndê jan.

#### *Jemu chja cuisehen xuta nchina ladu rê Nina*

<sup>16</sup> Hya xi camá ne, cafehe ngu cha nixti xi cavinenguisse cha Jesús cuitjin:

—Ngayun Maestro, ¿mé cjuandaja meje rê xi sahme cojo sa xi sacú ná cjuahñu xatsê xcun Nina? —Cuatjin cachja cha.

Ngajan xi cachja Jesús cuitjin:

<sup>17</sup> —¿Mé má noje tsahan xi ndaja ngahan? Ngu ni Nina xi ndaja me. Peru sá xi meje sacú ri cjuahñu xatsê jan, nohye cjua rê ley xi cavitexa Nina.

<sup>18</sup> Ngajan cafayangui cha cuitjin:

—¿Jarê cjua jan?

Hane cachja Jesús ta:

—Xicanicuun xuta, xicanihñuu cjuatsehen cojo rê ngu chjuun o cojo rê ngu xihin xi hacuiin tsujun, xicanihñuu cjuachêjê, xicanujuun cjuandesu tsêhê xuta, <sup>19</sup> chjuhuncun nahmi nuju hacuaha chjuhuncun na nuju. Hacuaha nihñu hmutacun xingun sacuaha hmutacun suva yojo nuju.

<sup>20</sup> Ngajan cachja cha nixti jan ta:

—Yêjê ni cjua vêhê ne, ha cáhndê tsêhê hisca cjualihndi naha. ¿Mé sa meje rê xi sahme? —Cuatjin cachja cha.

<sup>21</sup> Ngajan cafayangui Jesús cuitjin:

—Tjin sa ngu cjua sehe cuma chihin yêjê ni: yêjê ni xcusun xi tjin ri ne, titeñi, hane sehe tichecje tujún rê ngajñi rê xuta yuma. Hane xi cuatjin nihñi ne, jemu jyê cjuanchina sacú ri ngajan ngahnga. Hane xi cjuê cuichecje tujún vêhê ne, sehe ndove tisecec ná.

<sup>22</sup> Peru xi cahndê cha nixti cjua xi cachja Jesús ne, jemu va camá cacun cha hane quiji cha, tsêhê xi jemu nchina camahani cha.

<sup>23</sup> Hya xi camá quiji cha ne, cachja Jesús cojo xuta ladu rê me cuitjin:

—Cuichjá quixê cojo nuju ta jemu chja xi ngu xuta xi tjin rê me cjuanchina cuisehen me hiscan sahmi Nina gobiernu. <sup>24</sup> Hisca cuichjá nga xi hitsê sa chjaain cuatju ngu chu camellu ngojo rê ngu níndu xi cuma rê xi cuisehen ngu xuta nchina hiscan sahmi Nina gobiernu.

<sup>25</sup> Ngajan xi xuta ladu rê me ne jemu quijircun rê me cjua rê me tsêhê xi cachja me tsêhê xuta nchina hane cavinenguise me Jesús cuitjin:

—Sá cuatjin ne, ¿yo xi cuma cuetjutje ni?

<sup>26</sup> Ngajan xi Jesús ne, cavutsejen me hiscan siu xuta jan ne, cachja me cojo me cuitjin:

—Xuta ne, maji sahmi me; peru yêjê ni xi maji sahmi xuta ne, Nina ne, hatuxa ma sahmi me.

<sup>27</sup> Sehe cachja Pedru cojo me cuitjin:

—Chutsujun ni. Ngayin ne, ha canismitacuïn yêjê ni xcusun xi tjin ni, hane tivisecun nuju. Hindê ne, ¿mé sacu ni?

<sup>28</sup> Sehe cachja Jesús cuitjin:

—Cuichjá cojo nuju cjuaquixi ta hya xi cuechu nixtin xi cumá xatsê yêjê ni ne, nixtin xi cuejña Quihndi rê Xuta Jain xcun silla xi sahmi me gobiernu ne, ngayun xi tejó ne, ngayun xi cavisuhun ladu naha hacuaaha cuinechun xcun silla nichuvun cjuatacun rê yêjê tejó tje naja, ngayaan xi tje rê xutachanga naja Israel ngayaan. <sup>29</sup> Hacuaha yêjê xuta xi tsismicacun me ndava me, tsismicacun me xicjin me, tsismicacun me xutacha rê me, tsismicacun me quihndi rê me, tsismicacun me nangui rê xitjê rê me, ngatsê naha; sacú rê me ngu cientu sa quisun tsêhê hane hacuaaha sacú rê me cjuahñu xatsê. <sup>30</sup> Peru xuta xi matitjun quihndê ne, jemu cjín me xi cumachjiriin me hya, hane xuta xi hacuïn matitjun quihndê ne, hya ne cumachji rêhê me xi cumatitjun me.

## 20

### *Ejemplu tsêhê chji rê mosu*

<sup>1</sup> Sua Nina cahndê xi cuisehen xuta gobiernu xi sahmi me ne, sacuaaha casahmi ngu me xi nai rê ngu ranchun. Xati nguítajñu quiji me cavanguise me mosu xi sahmi xá hiscan catsitjê me uva. <sup>2</sup> Hya xi casacu rê me ngujo cha, casahmi me compromisu hane cavejña chji rê cha xi ngu tujún xi hmí rê denario xi ngu nixtin. Hane hora hya casua me cha xá quiji cha nguítajña xitjê. <sup>3</sup> Hya xi camá ne, sacuaaha fane ñaja ne, cavuya nai jan ndetsin hane ngajan cavêê me cha xi hacjahi hane mahya rê cha. <sup>4</sup> Sehe cachja me cojo cha cuitjin: “Hacuaha tangun xitjê naha, sehe sua nuju hacutjin satê nuju.” Hane quiji cha jan. <sup>5</sup> Hane jo ndiya nga ne, sacuaaha nchisen hane sacuaaha fane jyan ne, quiji nai jan ndetsin, tangun casahmi me tangun cachja me. <sup>6</sup> Hane xi cavechu sacuaaha fane hñu nguixun ne, quiji nga me ndetsin, ngajan casacu rê me yahnga cha xi mahya rê, sehe cachja me cojo cha cuitjin: “¿Mé má tu nechun ni nguehe cuahanixtin?” <sup>7</sup> Hane cafayangui cha cuitjin: “Tsêhê xi tsajin yo xi casua ni xi xa.” Sehe cachja me cuitjin: “Hacuaha tangun nihñu xa xitjê naha.” <sup>8</sup> Hane hya xi ha camá nguixun, nai rê xitjê ne, cachja me cojo cha xi fahacuenda rê xitjê jan cuitjin: “Chjindayun rê mosu ne, tuhun rê me chji rê yêjê ni me, titjun ne tuhun chji rê cha xi cafehe ngascan hane cuatjin ne hisca xi cuijnetaha ne, sehe tuhun rê cha xi tjun cafehe.” <sup>9</sup> Hane xi cafehe cha xi casacu rê xa sacuaaha fane hñu nguixun ne, cafahatsja cha chji ra xi ngu denario. <sup>10</sup> Hane xi camacharya rê cha xi tjun casacu rê xá ne, xi má rê cha ne, hitsê sa hnga cumá chji rê cha, peru hacuaaha cafahatsja cha ngu denario ni. <sup>11</sup> Hane xi cafahatsja cha chji rê cha ne, cachjataha cha nai jan cuitjin: <sup>12</sup> “Cha vê ne, ngascan cafehe cha, ngu ni hora casahmi cha xa, hane tangun catuhun chji rê cha cojo ni. Ngayin ne, canihñi xa cuaha nixtin hacuaaha caca ni ndavá.” <sup>13</sup> Peru nai rê xitjê jan ne, cafayangui me tsêhê cha jan cuitjin: “Tai, tsajin me cjuachan, ¿há quixi, há quixiin xi cavisajme xi chji nuju ne, ngu denario?” <sup>14</sup> Chjuhun tujún xi satê nuju hane cuangun; ta ngahan ne, cachuya ná ngahan xi ngu chichihin suá rê cha hacuaaha suá nuju. <sup>15</sup> Ngahan xi tsahan ne, ngahan cuitexa. ¿O há tsajin ne, há machinitacun tsêhê xi casahme cuatjin?” <sup>16</sup> Hacuaha chuva vêhê ni, xuta xi matitjun quihndê ne, cumachjiriin hya, hane xuta xi hacuïn matitjun me quihndê ne, cumachji rêhê me xi cumatitjun me. Jemu cjín má me xi cachjindaya rê xi canduva me, peru tsêhê yêjê me jan ne, chuva má me xi catuxijin rê.

### *Camá jyan ndiya cachja Jesucristu xi cueya me*

<sup>17</sup> Hya xi camá ne, hora xi jiya ndiya Jesús xi cjui me nandya Jerusalén, quijixin me cojo xuta ladu rê me xi tejó ni cachja me cojo me cuitjin:

<sup>18</sup> —Chutsujun ni, tivanguen Jerusalén, hane ngajan ne, ngahan xi Quihndi rê Xuta Jain ne, cuma ngahan entregadu tsja nahmi xi matitjun cojo maestru tsêhê ley; hane cuichja me jyê naha ne, vechu chuva rê xi cueya ngahan. <sup>19</sup> Sehe sahmi entregar me ngahan xutaxin, cuejncuê ná xuta, cuêhênatya ná me, cuaja ná me ne, sehe cuetaha ná me xcun cru. Peru xi má jyan nixtin ne, cúa nga cjuahñu.

### *Meje scaaya xuta ladu rê Jesús tsêhê yo me xi cumatitjun*



<sup>20</sup> Hya xi camá ne, naa rë quihndi rë Zebedeo quijitjengui na Jesús cojo cha quihndi rë na. Cavixcuhnchi na xcun Jesús tsêhê xi fehya na ngu favor. <sup>21</sup> Sehe cavinenguise Jesús na cuitjin:

—¿Mé xi meje rë xahasen nuju?

Hane cuitjin cafayangui na:

—Tuhun cahndê xi cuiyujutaha cha quihndi naha ngu ngu ladu tjeheh nuju, hya xi nihñu gobiernu nuju.

<sup>22</sup> Ngajan cachja Jesús cojo cha cuitjin:

—Ngayun ne, hyuun mé xi chjayun. ¿Há scaa nuju cuatjun cjuañihi xi cuátju ngahan ni?

Sehe cafayangui catsijo cha:

—Juun, scaa nijj.

<sup>23</sup> Ngajan xi cachja nga Jesús cojo cha cuitjin:

—Cjuañihi xi cuátju ngahan cuma ne, hatuxa hacuaha cojo ngayun cuatjun cuma. Peru xi cuinechuntuhun ngu ngu ladu tjeheh naha ne, hacuiin ngahan cuichjá ta Nina cuichja me yo xuta xi sua rë me cahndê xi cuiyujutaha me.

<sup>24</sup> Xi cahndê yahnga xuta xi tã jan cjuaxi cachja Jesús ne, cavetsihin camacjan rë me cojo jo me xicjin me jan. <sup>25</sup> Ngajan xi cajindaya Jesús yêjê ni me, cachja cojo me cuitjin:

—Ngayun ne ha hyun ta yêjê ni xuta xi matitjun ngeuhe ngasunhndê ne, jemu sahmi yehe me yojo rë me sacuaha xi me vêhê xi nai rë xuta, hacuaha jercu meje cuitexa me.

<sup>26</sup> Peru hacuiin cojo ngayun cuatjin nihñu ta xi meje rë ne, ngu ngayun xi meje nihñi yehe yojo nuju ne; ninguijnu yojo nuju tisecon xingun. <sup>27</sup> Hane ngu ngayun xi meje cumatitjun ngayun, nihñu xi cuma yun sacuaha ngu mosu rë xingun. <sup>28</sup> Ta cuanitjin ne, casahme ngahan Quihndi rë Xuta Jain, ta canduvá ne, peru hacuiin canduvá xi xuta cuisecoo ná me ta ngahan cuisécoo rë xuta, hacuaha tsingatehen xi tsiquehen ná xuta, cojo sa xi ngatsê rë vêhê cjin xuta cuaxêtje Nina me. —Cuatjin cachja Jesús.

### *Casahmi Jesucristu xi camatsejen nga rë jo cha rcá ngajan Jericó*

<sup>29</sup> Hya xi cavetju me nandya Jericó ne, jemu xutacjin quijitjengui rë me. <sup>30</sup> Hane ngajan hiscan cavatju me siu jo cha rcá xi viyuju cha tjeheh ndiya, hane xi canuhya rë xi Jesús tivatju me, cajindaya cha cachja cha cuitjin:

—¡Nai, ngayun tjê rë David! Catamayuma nuju ngayin. —Cuatjin cachja cha.

<sup>31</sup> Hane xuta xi siu ne, cavisajmicjan me cojo cha xi seju cha, peru cha vêhê ne, hitsê sa jercu cajindaya cha chja cha ta:

—¡Nai, ngayun tjê rë David! Catamayuma nuju ngayin.

<sup>32</sup> Hya xi camá ne, ngajan casecunhñu Jesús, cajindaya me cha xi nduva cha. Sehe cavinenguise me cha cuitjin:

—¿Mé xi meje nuju xi sahme cojo nuju ni?

<sup>33</sup> Ngajan xi cachja cha rcá jan ta:

—Tatá, xi meje nijj ne, xi cuma tsejen nijj.

<sup>34</sup> Hane Jesús ne, camayuma rë me cha; cavisanetsja me tuxcun cha. Hane ngutjen ni, camatsejen nga rë cha, sehe quiji cha cojo Jesús.

## 21

### *Cafehe Jesús nandya Jerusalén*

<sup>1</sup> Hane hya xi ha jima tiña Jesús xi cjeuhe me Jerusalén, cavechu me nandya Betfajé, ngajan ndetjún xi hmí rë Ndetjún Olivu ne, sehe catsingatju me jo xuta ladu rë me xi cje tixa rë me, <sup>2</sup> hane cuitjin cachja me cojo me:

—Tángun nandya xi tsejen tacun vë. Hane ngutjen xi cjuhun tjeheh rë ne, sacú nuju ngu burru xi tjiñhu chu cojo quihndi rë chu. Hane chundecjun chu, nduvuncujun chu. <sup>3</sup> Hane sá xi tjin yo xi cuichja cojo nuju tsêhê chu, sehe tinújun ta: “Maestru nijj ne, meje rë me chu.” Hane sehe sua me cahndê.

<sup>4</sup> Cuatjin camá cojo sa xi cuetjucaa jain cjuaxi cachja profeta cuitjin:

<sup>5</sup> Tinújun cojo xuta nangui Sion:

“Chutsujun ne, nduva me xi matitjun tsujun hiscan nechun. Hacuiin xta me ne, nduva me quisun me chu burru,

quisun me quihndi rë chu xi vaniji chaha.”

<sup>6</sup> Sehe xuta ladu rë me jan, cavetju quiji me hane casahmi me hacutjin cachja Jesús, <sup>7</sup> canduvacojo me chu burru cojo quihndi rë chu hiscan tacun Jesús. Hane caviyujusun me tsjian rë me ngaxtun chu, sehe camiji Jesús burru jan. <sup>8</sup> Hane xi quiji Jesús ne, quisun me burru jan, hane xutacjin ne, táha cacandi me tsjian rë me ndiya hiscan cjui Jesús. Hane yahnga me ne, quiji cavotohosun me xca xcuen hane hacuaha cacandi me ndiya hacutjin

cjui Jesús. <sup>9</sup> Hane yějê ni me xi cjui tjun cojo yějê me xi tjengui jan ne, cavetsihin jercu cajindaya me cachja me:

—¡Hosana! ¡Nacuechji rê Nina xi cafehe me xi cuitexa naja sacuaaha cavitexa David hatsëê! ¡Jemu catsinchacun Nina me xi nduva vi tsêhê xi Nina catsingatju rê me! ¡Hisca ngahnga ne, cuechu cjua rê cjuandaja rê Nina!

<sup>10</sup> Hya xi camá ne, xi cavisehen me nandya Jerusalén jercu jyê cjuandya camá hane cavinenguisse xuta nandya cuitjin:

—¿Yo me vihi?

<sup>11</sup> Ngajan cafayangui xutacjín jan cuitjin:

—Me vihi, hacui profeta Jesús, xuta Nasaret tsêhê distritu Galilea.

*Cavaxê Jesucristu xuta xi sahmi ndetsin ndatsen yungun*

<sup>12</sup> Hya xi camá ne, quiji me yungun xi matitjun. Hane hya xi cavisehen me ndatsen yungun jan; cavaxê me xuta xi sahmi me ndetsin. Hacuaha catsindefa me maxê xi xinchasun tujún xi tsindeya cha cojo tujún rê xuta ngu nangui cojo puestu rê cha xi viteña nisetyava. <sup>13</sup> Sehe cachja me cojo cha jan cuitjin:

—Chja cjua rê Nina ta: “Ndyá naha ne, tacunxa xi cjue xuta sahmi me oración rê me. Peru ngayun ne, tinihñuxun cojo sacuaaha ngu cahndê xi matangun xuta xi sahmi cjuamaña.”

<sup>14</sup> Hya xi ha cavatju vêhê ne, ngajan yungun xi matitjun ne, cavechutaha me xuta rcá cojo xuta rengun; hane casahmi me xi camandaja me. <sup>15</sup> Ngajan xi cavêê nahmi xi matitjun cojo cha xi vicuya cjuachacun ne cjuaracun xi casahmi Jesús, hacuaaha cahndê me xi jindaya nixti ta: “¡Hosana! ¡Nacuechji rê Nina xi cafehe me xi cuitexa naja sacuaaha cavitexa David hatsëê!”; hane jemu cama xti rê me. <sup>16</sup> Cachja me cojo Jesús cuitjin:

—¿Há nuhyun cjua xi tichja me?

Ngajan xi cafayangui Jesús cuitjin:

—Juun, vihndê. Hane ngayun ne, ¿há cjêê chutahanyun cjua rê Nina xi chja tsêhê? Chja cjua ta:

Hisca cjua rê nixti hisca cjua rê quihndinda ne canihñu xi cuetju xi sahmi hnga nuju.

<sup>17</sup> Hya xi camá cachja me ne, cavetju Jesús tsêhê Jerusalén quiji me nandya Betania cavejña me nguixun.

*Jesús ne, cachja xi quihndê cuaquiin tu rê ngu yaxujun xi cavangui me tú rê hya xi vojo rê me*

<sup>18</sup> Xi camanchujun jan ne, xi cavuya nga Jesús Jerusalén ne, cama vojo rê me. <sup>19</sup> Hya xi camá ne, tjehen ndiya ne, cavêê me ngu yaxujun xi chine tú rê, peru xi cavechu me ngajan ne, ndastu me tú yaja rê, ta suva xca ni yaja rê. Ngajan xi cachja Jesús tsêhê:

—Quihndê tsajin nixtin xi cuaquí tú riji.

Hane ngutjen ne, caxintsen ya jan. <sup>20</sup> Hya xi cavêê xuta ladu rê me xi cuatjin camá ne, cafaharcun me Jesús cachja me cuitjin:

—¿Hacutjin cumá xi jemu xati caxintsen yaxujun jan?

<sup>21</sup> Ngajan cafayangui Jesús tsêhê me cuitjin:

—Cuichjá quixê jain cojo nuju ta sá xi macjain nuju Nina hane hacuiin jo cjuatacun nuju ne, cumá nihñu sacuaaha casahme cojo yaxujun vi. Hacuaha hisca sá xi cuinújun cojo ndetjún vihi ta: “Tihinxin tsêhê ngeuhe. Tihin tisihin ngajñi ndachacun.” Hane cuatjin cumá. <sup>22</sup> Yějê ni xcusun ne, tu mé ni xi chjahyun cojo Nina hane sá xi macjain nuju xi sacú nuju ne, cuetjucaa quixi.

*Cavinenguisse xuta cojo Jesús yo cavitexa rê me*

<sup>23</sup> Hane xi vicuya Jesús ngajan ndatsen yungun xi matitjun ne, camatangun nahmi xi matitjun cojo xuta changá, hane cuitjin cavinenguisse me Jesús:

—¿Yo cavitexa nuju xi nihñu xa ví? ¿Yo casuaxa nuju?

<sup>24</sup> Hane xi cafayangui Jesús ne, cuitjin cachja me:

—Hacuaha cuinenguêsê nuju ngu cjua, hane sá xi chjayunngun tsahan ne, sehe cuichjá cojo nuju yo cavitexa ná xi sahme xcusun vihi. <sup>25</sup> ¿Yo cavitexa rê Juan xi cuitenda me xuta? ¿Há Nina ne, o há tsajin ne, há xuta? —Cuatjin cachja me.

Sehe ngajan xi xuta xi cuacun jan ne, cavisiajmicjín me ngajñi rê me, cachja me cuitjin:

—Sá xi cuinújan xi Nina cavitexa me cha Juan vê ne, cjuinenguisse naja me: “Sá cuatjin ne, ¿mé má camacjaain nuju cha?” <sup>26</sup> Hane sá xi cuinújan xi xuta cavitexa rê cha ne, tsajin yo hvê mé sahmi xuta cojo naja ta, tsêhê xi yějê ni xuta ne, ha macjain rê me xi cha vêhê ne, profeta cha.

<sup>27</sup> Hane xi cafayangui xuta jan tsêhê Jesús ne chja me ta:

—Hyiin.

Ngajan xi hacuaaha Jesús ne, cachja me ta:

—Hacuaha cuichjaan cojo nuju yo cavitexa ná xi sahme xá vihi.

*Ejemplu tsêhê jo cha quihndi*

<sup>28</sup> Peru çmé nújun tsêhê cuentu vi? Ngu xihin ne, jo má cha quihndi rê me. Hya xi camá ne, cafehe cachja me cojo ngu cha cuitjin: “Tsan, tihín nihñi xá ngajan hiscan camatjê xca rê uva.” <sup>29</sup> Peru cha quihndi jan ne, cafayangui cha cuitjin: “¡Jéya! ¡Mijí cjué!” Peru hya xi camá ne, cavindeya çjuatacun rê cha hane quiji cha xcun xá jan. <sup>30</sup> Sehe hacuanitjin cachja nahmi jan cojo quihndi xi má jo, hane cuitjin cafayangui cha jan cachja cha: “Tatá, ngahan ne, çjué.” Peru quijiin cha. <sup>31</sup> Hindê ne, çjarê cha xi casahmi chihin cha xcusun xi meje rê nahmi rê cha?

Ngajan cafayangui me ta:

—Cha xi tjun cachja.

Sehe cachja Jesús cojo me cuitjin:

—Cuichjá quixê cojo nuju ta xuta xi cojo çjuamaña faha tujúnsa cojo çjuun xi viteña na yojo ran hitsê sa tjun cuisehen me gobiernu xi sahmi Nina xi cuma nuju ngayun, <sup>32</sup> ta cafehe Juan cavicuaya me ngayun hacutjin nihñu xcun Nina hane camacjaain nuju çjua rê me. Peru xuta xi faha tujúnsa cojo çjuun xi viteña yojo rê na, me vêhê camacjain rê me. Ngayun ne, handasa cahyun yêjê xcusun vêhê ne, canindeyuun çjuatacun nuju; camacjaain nuju.

*Ejemplu tsêhê cha xi sahmixa xi jemu tsehen cha*

<sup>33</sup> Nuhyun sa ngu ejemplu xi cuitjin fi: Ngu nai rê ngu ranchun matsejen ne, catsitjê me xcun nangui rê me xca rê uva. Hacuaha casahmi me hñchua xondyojo tahndee rê xitjê jan, hane ngajan ni ne, cafahnguiya me ngu ndyojotê hiscan cuaxê nandá rê uva jan. Hacuaha casahmi me ngu cahndê hiscan xi cavesun me ngu nachan ngahnga xi sesun xuta xi sahmi cuidadu xitjê rê me. Sehe casua me ngujo cha sahmixa xi çjuahacuenda cha. Sehe çjuaha tsê tsê me cojo cha. Hane hya xi camá ne, cavetju me quiji me ngu nangui xin. <sup>34</sup> Xi cavechú nixtin rê tútjê jan matsejen ne, sehe catsingatju me mosu rê me xi quiji cachja cha cojo cha xi fahacuenda xitjê jan xi sua cha hitsê tútjê xi satê rê me. <sup>35</sup> Peru cha xi sahmixa jan ne, cafaha cha mosu jan tu cavaja cha ngu mosu, catsiquehen cha ngu nga, hane cavetaha cha ndyojo xcun ngu nga. <sup>36</sup> Sehe catsingatju nga me mosu hacjahi xi hitsê sa çjin má cha tsêhê mosu xi tjun catsingatju me, peru cha xi sahmixa jan ne, ha chuva vêhê ni casahmi cha cojo yêjê ni.

<sup>37</sup> Hya xi camá ne, hisca catsingatju me suva quihndi rê me ta catsingatahacacun me cuitjin: “Tuxa çjuaharcun rê cha, xi quihndi naha.” <sup>38</sup> Peru xi cavêê cha xi hatuxa quihndi rê me xi nduva ne, cavisiajmïcjin cha cojo xicjin cha cuitjin: “Cha vihi ne, quihndi xi çjuahatsja xitjê vi cha. Niquen cha, cojo sa xi tsajan cuma nangui vi.” Cuatjin cavisiajmïcjin cha. <sup>39</sup> Hya xi camá ne, cafaha cha cha quihndi jan quijicojo cha ndatsen cahndê jan, sehe catsiquehen cha cha.

<sup>40</sup> Hindê ne, xi má nuju ne, çmé sahmi nai rê xitjê jan cojo cha xi cuacun fahacuenda jan?

<sup>41</sup> Ngajan cafayangui me tsêhê Jesús cuitjin:

—Çjue tsiquehen me cha xi tsehen çjuatacun rê jan, sehe sua me xitjê jan çjuahacuenda jingu sa cha sahmixa, cha xi sua cha xitjê xi satê rê me hya xi cuechú nixtin rê. —Cuatjin cafayangui me.

<sup>42</sup> Sehe cachja Jesús cojo me cuitjin:

—¿Há cachutayuun xujun rê Nina xi çhja cuitjin?:

Ndyojo xi catsitjungui çhjinevexo ne, vêhê ndyojo xi cavéña tjun tjun yuju rê xihndênaña. Cuatjin casahmi Nina xi cuma. Hane xi chutsejen ngayaan ne, jemu çjhahanrcun xahasen naja.

<sup>43</sup> Vêhê xi cuichjá cojo nuju ta, çjhataha nuju cahndê xi cuisuhun gobiernu xi sahmi Nina, hane sua Nina xuta nanguixin cahndê jan, xuta xi sua me xi satê rê me. <sup>44</sup> Hane ndyojo jan ne, hya xi ngu xuta çjuinenguisun me xcun ndyojo vêhê matsejen ne, cuatêlanga rê me. Hane hya xi ndyojo vêhê cuinenguisun rê ngu xuta matsejen ne, ña cumá tê me.

<sup>45</sup> Hane xi cahndê nahmi xi matitjun cojo cha partidu fariseo ejemplu xi cachja Jesús tsêhê xuta vê ne, camachaya rê me xi condra rê me tichja Jesús. <sup>46</sup> Vêhê xi cavangui me chuva rê hacutjin cuma xi çjuaha me Jesús peru camaji ta tsacjun me xuta, ta xi má rê xuta ne, ngu profeta má Jesús.

## 22

*Ejemplu tsêhê ngu suhi çjuavixan*

<sup>1</sup> Sehe quijinduju sa cachja Jesús ejemplu cojo rê me cuitjin:

<sup>2</sup> —Nina ne sahmi me cojo xuta xi cuisehen me gobiernu xi sahmi me sacuaha casahmi ngu xihin xi matitjun tsêhê ngu nangui hya xi casahmi me suhi xi cuixan quihndi rê me.

<sup>3</sup> Hya xi casune hora rë, catsingatju me mosu hndixahan rë me quiji cha ndava xuta xi ha casua me camachaya rë xi nduva me cjuavixan, peru canduvaain me suhi. <sup>4</sup> Sehe catsingatju me hndixahan xi hacjahi ne, cuitjin cavitexa me: “Tinoje cojo xuta xi nduva cuitjin: Chutsujun ni tai, ha tjin chihin comida, ha cahme chu xi tetjo ná tsëhë suhi vi, hane cachjan yojo. Tjin chihin yëjë ni: nduvun ne, xinëësuhi.” <sup>5</sup> Peru casahmi cuendaain me cjuajan, hane quijixin me cafahacuenda me cjuacjintacun rë me. Ngu me quiji me xcun xitjë rë me, ngu nga me hiscan sahmi me negocio. <sup>6</sup> Hane yahnga nga me ne, cafaha me mosu hndixahan jan, choho casahmi me cojo cha hisca catsiquehen me cha. <sup>7</sup> Hya xi camá ne, me xi matitjun jan ne, cama cjan rë me. Catsingatju me sindadu rë me. Catsiquehen sindadu cha tsiquehen jan hane cavaca me nandya rë cha. <sup>8</sup> Hya xi camá ne, cachja nga me cojo hndixahan rë me cuitjin: “Ha tjin ndaja xcusun rë cjuavixan. Peru xuta xi cuinduva ne, hacuinin ndaja cjuatacun rë me ndajintjin xi nduva me. <sup>9</sup> Vëhë xi tihin hisca cruci ndiyatë ne, hane tu hacutjin cjin má xuta xi sacu ri, noje cojo yëjë ni me xi catinduva me catjinesuhi me.” <sup>10</sup> Ngajan xi quiji hndixahan jan hiscan ndiyatë rë nandya ne, hane yëjë ni xuta xi cavechutaha cha, sá xuta tsehen, o sá xuta ndaja ne, casahmi cha xi camatangun me quiji me suhi. Hane ña catsëxtin xuta ndava suhi.

<sup>11</sup> Hya xi tijima suhi ne, xi cavisehen me xi matitjun jan xi scutsejen me xuta xi cafehe me, cavutsejen me ngu cha xi yuma jyih cojo tsjian rë. <sup>12</sup> Ngajan xi cachja me cojo cha cuitjin: “Tai, ¿hacutjin cama xi cavisuhun nguehe handasa jemu yuma jyih tsjian nuju?” Peru cavejñajyuu cha vë cachjaain cha. <sup>13</sup> Sehe cachja me xi matitjun jan cojo hndixahan rë me cuitjin: “Tetuhunhñu tsja cha cojo ntsacu cha sehe naxun cha ndatsen hiscan jñu. Ngajan hiscan hincha xuta xi tijihnda me, hacuaha titsijaneri me nehñu me.” <sup>14</sup> Cjin má me xi cachjinda rë xi nduva me, peru chuva má me xi tuxijijñi rë.

#### *Cjuacjintacun tsëhë tujúnsa*

<sup>15</sup> Hya xi camá ne, cha partidu fariseo ne, cavisajmichihin cha casacuse rë cha ngu cjuacjintacun xi tsavi fi xi cjuayangui Jesús tsëhë. <sup>16</sup> Hya xi camá ne, catsingatju cha ngujo cha ladu jan, cojo cha ladu rë Herodes ne, cachja cha cojo Jesús cuitjin:

—Maestro, ngayin ne, hyin ta ngayun ne xuta ndaja ngayun. Vicuyun ndiya rë Nina cojo cjuaquixi. Ha tuxa cjuaquixindaja xi nújun, ha ndasa cojo xuta nchina visiajmu o sá cojo xuta yuma. <sup>17</sup> Xi má nuju ne, mé xi ndaja cuinújan. Sacuaha ley rë Moisés ne, ¿há tsingatihi xi cuechjen tujúnsa naja cojo César, me xi matitjun, o há tsingatiin?

<sup>18</sup> Peru Jesús ne, tsëhë xi ha vacun rë me xi jemu choho xcusun rë cha ne, cachja me cojo cha cuitjin:

—¿Mé má cuatjin meje chjuhunchuvun ná? Xuta ndacha ngayun. <sup>19</sup> Ningacun ná ngu tujún jan scutsejen.

Hane canduvacojo cha ngu tujún tyava.

<sup>20</sup> Sehe cavinenguise me cha cuitjin:

—¿Yo xcusun rë hacuaha yo ñihñi rë xi quitaha xcun tujún vë? —Cuatjin cavinenguise Jesús.

<sup>21</sup> Hane cha xi cuacun vë ne, cuitjin cafayangui cha:

—Tsëhë César.

Sehen ngajan xi Jesús ne, cuitjin cachja me cojo cha:

—Cuatjin ne, tuhun rë César xi tsëhë me, hane tuhun rë Nina xi tsëhë me.

<sup>22</sup> Hya xi cahndë cha cjuaxi cachja Jesús ne, quijircun rë cha, sehe cavetju cha quiji cha tsëhë cahndë xi tacun me.

#### *Cjuachjinenguise tsëhë xi cuya nima cjuahñu*

<sup>23</sup> Sehe nixtin hya ne, cafehe tjengui Jesús cha partidu saduceo, cha xi vicuya cjuachacun xi chja xi xuta xi cahme ne, cuyaain nga me cjuahñu. Sehe cavinenguise cha Jesús cuitjin:

<sup>24</sup> —Maestro, Moisés ne cachja me ta: “Sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuaha quihndi rë nima vëhë.” <sup>25</sup> Quihndë ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane tsëhë xi tsajin quihndi rë cha, hntsë nima vë ne, cafaha cha chjuun jan. <sup>26</sup> Hane cuantjin cavatju cha xi majo cojo cha xi majjan hisca chuva ngu chuva ngu cha hisca cojo cha xi má yatu. <sup>27</sup> Hane xi cajnetaha ne, sehe cahme chjuun jan. <sup>28</sup> Quihndë ne, hya xi cuya yëjë nima cjuahñu ne, ¿jarë cha xi cuacun vë xi chjuun rë cha na xi cjuaquixi ta, tsëhë xi yëjë ni xi yatu cha ne, camá chjuun rë cha na? —Cuatjin cachja cha.

<sup>29</sup> Ngajan xi cachja Jesús cojo cha ta:

—Ngayun ne, cuaaintjin xi nújun, tsëhë xi vijñii rcun cjuaxi chja xujun tsëhë Nina, hacuaha hyuun xi Nina ne, jemu hñu cjuatacun rë me. <sup>30</sup> Ta hya ne, cumaji cjuavixan hacuaha tsinguixaain xicjin me hya ta, sacuaha ángel xi siu ngahnga ne, cuatjin cuiyuju

me. <sup>31</sup> Quihndé xi tinújun tséhë nima xi cuya cjuahñu ne, cuinenguësë nuju ne, ¿há cjëë chutayun cjuua xi cachja Nina cojo nuju xcun xujun rë me tséhë nima xutachanga nuju xi cuicun vi? <sup>32</sup> “Ngahan xi Nina rë Abraham ngahan, Nina rë Isaac hacuaha cojo Nina rë Jacob.” Cuaatjin cachja Nina. Peru ndaja hyun ta Nina ne, hacuiin Nina rë nima ta Nina rë xuta xi quicun me.

<sup>33</sup> Hya xi cahndé xutacjín cjuua jan, jercu tu quijircun rë me cjuua xi catsicuya Jesús.

*Cjuachjinenguise tséhë jarë artículo tséhë ley xi hitsë sa matitjun*

<sup>34</sup> Peru cha partidu fariseo xi camachaya rë cha xi catsinguejyu Jesús cjuua rë cha partidu saduceo ne, camatangun cha cojo xicjin cha, <sup>35</sup> hane sehe cavitexa cha ngu maestru rë ley xi cavinenguise cha me cjuua vi cojo sa xi cuma cjuahachuva cha me. Cuitjin cachja maestru jan:

<sup>36</sup> —Maestro, tséhë yëjë ni cjuua xi cavitexa Nina naja xcun xujun ley ne, ¿jarë artículo xi hitsë sa matitjun?

<sup>37</sup> Ngajan xi cafayangui Jesús cuitjin:

—“Meje rë xi nihmutacún Nina naja cojo nguñajatacún, cojo yëjë ni xahasen nuju, cojo yëjë ni ngahñu nuju, cojo yëjë ni cjuatacun nuju.” <sup>38</sup> Cjuua vé xi hitsë sa venguichji rë ne, hitsë sa matitjun xi cumá rë yëjë ni cjuua rë ley. <sup>39</sup> Hane xi má jo ni: “Meje rë xi nihmutacún xingun sacuaatjin hmutacún suvun yojo nuju.” <sup>40</sup> Tséhë jo artículo vi ne vetjun sa yëjë cjuua rë ley xi catsihindu Moisés cojo yëjë cjuua xi catsihindu profeta. —Cuaatjin cachja Jesús cojo cha.

*¿Yo tjë rë má me xi catsingatju Nina?*

<sup>41</sup> Hya xi ha camá tangun cha partidu fariseo ne, sehe cavinenguise Jesús cha cuitjin:

<sup>42</sup> —¿Mé nújun? Mesías o sa Cristu ne, ¿yo tjë rë má me?

Cafayangui me ta:

—Tjë rë David má me.

<sup>43</sup> Sehe cachja Jesús cuitjin:

—Sá xi quixi xi cuaatjin ne, ¿hacutjin cavátju xi suva David ne, hya xi catsihindu me cjuua xi cachja Hasen tséhë Nina cojo rë me, “Nai” cachja me tséhë Mesias? ta cuitjin catsihindu me:

<sup>44</sup> Nina ne, cachja me cojo Nai naha cuitjin:

“Tinechin nguehe ladu quixi naha,

hisca hya xi yëjë ni xi sahmi ri condra ne, cuiyúju ngahan ngahma gobiernu riji.”

<sup>45</sup> Quihndé ne, sá xi suvá David chja me xi Nai rë me má me xi tsingatju Nina ne, ¿hacutjin má ne xi hacuaha tjë rë me má me vëhë?

<sup>46</sup> Ngajan camá xi ndastu mé cafayangui cha, hacuaha hisca hya ne, tsacjun cha cjuinenguise sa cha me.

## 23

*Cachjajyë Jesucristu cojo xutacjín tséhë cha xi vicuya cjuachacun*

<sup>1</sup> Hya xi camá ne, cachja Jesús cojo xutacjín hacuaha cojo xuta ladu rë me cuitjin:

<sup>2</sup> —Cha xi vicuya cjuachacun cojo cha partidu fariseo ne, casatë rë cha xá rë ley xi casatë rë Moisés hatsëë. <sup>3</sup> Vëhë xi meje rë xi nuhyun cjuua rë cha hacuaha nihñuchuhun yëjë ni xi vicuya cha; peru nihñuu sacuaaha sahmi cha ta, ndaja chja cha jan peru hacjahi sahmi cha. <sup>4</sup> Cjuua xi vicuya cha jemu chja sahmi chihin xuta ta tangun sacuaaha ngu chaha xi hai vaniji tyja rë me, peru suva ni cha ne, visecuaain cha me hisca hitsë. <sup>5</sup> Yëjë ni xi sahmi cha ne, sahmi cha ngatsë rë xi scuëë xuta cha, sahmi hnga xuta cha. Vatjutaha cha chuya rë xujun xi chja ley xi setaha xten xuta, cojo tsjahya xi tsingaqui cha ntsacu tsjian rë cha. <sup>6</sup> Hacuaha jemu chuya rë cha hya xi satë rë cha cahndé xi matitjun tséhë ngu ndava suhi o tséhë yungun. <sup>7</sup> Hacuaha hora xi fi tsujyihya cha, jemu chuya rë cha xi cuaatjin fi xuta chja me nina cojo cha ngajan ngajñi ndetsin, maestro chja xuta tséhë cha.

<sup>8</sup> Peru ngayun ne, xi cuichjaain xuta tsujun Maestro ta ngu ni me xi Maestro nuju, hane ngajñi nuju ngayun ne, xingun má yun. <sup>9</sup> Hacuaha xuta ngasunhndé ne, canujuun tséhë me xi Nahmi ta ngu ni me xi tacun me ngahnga ne, hacui Nahmi nuju. <sup>10</sup> Cuanitjin ne, xi cuichjaain xuta tsujun Nai ta ngu ni me xi Nai nuju, me vëhë ne, Cristu. <sup>11</sup> Hane ngu ngayun xi meje cumatitjun ngayun ne, sahmi me sacuaaha ngu mosu rë xicjin. <sup>12</sup> Tséhë xi yëjë xuta xi sahmi yehe suvá me yojo rë me ne, cuechu nixtin xi Nina ne, tsinguijne me cjuatacun rë. Hane xuta xi tsinguijne suvá me cjuatacun rë me, hya ne, Nina ne, sahmi yehe rë me.

<sup>13</sup> Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun!, ta vechjun tingotjo hisca visehen gobiernu xi sahmi Nina cojo sa xi cumajhi cuisehen xuta. Tivisuun suvun, hacuaha tituun cahndé xi cuisehen xuta xi meje cuisehen me.

<sup>14</sup> 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. Jemu cjin tujún naxun yachjin cahan xi hisca ndava na tsajin. Hane hya xi nújunyumun ne jemu nduju hora nihñu, peru hacuini nguñaja tacun nújun ta, vindachun ni. Vêhê xi hitsê sa iyê cuma castigu xi cumá nuju.

<sup>15</sup> 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! ta cuangun jinguyê ni ngasunhdê xi sacu ngu ni me xi cuisehen ladu nuju. Peru hya xi cavicuyun rê me, hitsê sa iyê castigu satê rê me xi cuma nuju.

<sup>16</sup> 'Jemu chojyihí tsujun, ¡xuta rcá yun xi meje ningacun ndiya! Nújun ta: "Sá xi tuhun cjuá nuju hane cuinújun ta: Quixi, vêê yungun xi matitjun ne, sahmii nguyê xi nihñu chihin cjuá nuju, peru sá xi tuhun cjuá nuju cojo oro xi jiya yungun xi matitjun ne, vêê sahmii nguyê xi tuhun xi canújun."

<sup>17</sup> '¡Ngarca ni ngayun! ¡Rcá yun! ¿Jarê xi meje rê xi chjaanrcun? ¿Há oro jan? o sá tsajin ne, ¿há yungun xi matitjun? ta, ngatsê rê yungun ne, vêê xi camanchacun oro xi hinchá cahntsua. <sup>18</sup> Hacuaha nújun ta: "Sá xi tuhun cjuá nuju hane cuinújun xi ngasuncun yungun cuma testigu ne, sahmii nguyê xi nihñu chihin cjuá nuju, peru sá xi nújun ta cuatjo xcun ngasuncun jan cuma testigu ne, sehe sahmii nguyê xi tuhun xi canújun." <sup>19</sup> ¡Rcá yun! ¿Jarê xi meje rê xi chjaanrcun? ¿Há cuatjo jan? o sá tsajin ne, ¿há ngasuncun ta, tsêhê xi xcun vêê ngajan camachacun cuatjo? <sup>20</sup> Vêhê xi yo xi cuisiajmi hane cuichja me xi vêê ngasuncun ne, hacuaha tichja me xi vêê yêjê xi hinchasun xcun; <sup>21</sup> hacuaha yo xi cuisiajmi hane cuichja me xi vêê yungun xi matitjun ne, hacuaha tichja me xi vêê Nina xi tacun me ngajan. <sup>22</sup> Hane yo xi cuisiajmi hane cuichja me xi vêê ngahnga ne, hacuaha tichja me xi vêê cahndê hiscan sahmii Nina gobiernu hane hacuaha xi vêê Nina xi sahmii me.

<sup>23</sup> 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! Ngayun ne, handasa tuhun diezmun nuju hisca cojo nchurca cojo ruda cojo yêjê sa xcusun ndeya ne, peru nihñucuenduun xi nihñuchihin artículo rê ley xi hitsê sa meje rê Nina xi nihñuchuhun sacuaha xi chja cuitjin: nihñu hacutjin xi cjuaquixi cojo xingun, sacuaha xi mayuma nuju xingun, hane sacuaha xi ngu ni má cjuá nuju; hitsê sa ndaja sa canihñu yêjê xcusun vihi, hane canihñucuendun tsêhê xcusun xi canihñu. <sup>24</sup> ¡Ngayun ne xuta rcá yun xi meje ningacun ndiya! Nihñu sacuaha sahmii ngu xuta xi tsicaha me vinu rê me, sehe cuetjuxin ngu chu xihí xi jiya ngajñi rê. Peru cuma tsinguijne jingu me ngu chu camellu.

<sup>25</sup> 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Jo xcun jo ntsuvun yun! Nihñu tyahí táha ngaxtan ngu vasu cojo ngu tyuva, peru cahntsua ne, quítsê camahani rê cjuachêjê cojo cjuatacun xi nimuju yêjê ni xcusun. <sup>26</sup> Fariseo rcá, titjun nihñu tyahí cahntsua vasu cojo tyuva jan ta tsêhê xi cuatjin ne, hacuaha cuma tyahí táha ngaxtan.

<sup>27</sup> 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Jemu ndacha yun! Ngayun ne, tangun cun cojo ngu tsjun xi cahvi rê xujñu, ta ndaja tsejen tsjun jan, peru cahntsua ne, quítsê rê cojo ninda rê nima cojo yêjê ni xi jehndu. <sup>28</sup> Cuanitjin cun ngayun ta xi vutsejen xuta yun, tsejen sacuaha xuta ndaja tyahí yun, peru cahntsua xahasen nuju ne, quítsê rê cojo cjuandacha cojo cjuatsehen.

<sup>29</sup> 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. Ngayun ne, nindujun tsjun ndacun tsêhê yêjê ni nima profeta, hacuaha nihñu ndacun tsjun tsêhê nima xi tsajin xi cun rê me xcun Nina. <sup>30</sup> Hacuaha ngayun nújun ta: "Sá xi ngayin cavinechin nixtin hatsêê xi quicun xutachanga nijí ne, cavisecuini rê me xi tsiquehen me profeta xi cuacun vê ta cumacjain nijí." <sup>31</sup> Quihndê ne, cahyun ta cojo cjuá nuju vê, tuhun testigu condra nuju ta tsêhê xi ngayun ne hatuxa quihndi rê xutachanga nuju ngayun, hane me vêhê ne xi catsiquehen me profeta jan. <sup>32</sup> Quihndê ngayun ne, ¡tangun cuéchun chuva rê cjuatsehen xi casahmi xutachanga nuju!

<sup>33</sup> 'Sacuaha cun yê chacun cuatjin cun ngayun, ¡quihndi rê yê yun! ¿Hacutjin cumá cuetjuntjun tsêhê castigu xi má hasen rê nima? <sup>34</sup> Vêhê xi tsingátju sa nuju profeta cojo xuta xi quicun cjuatacun rê me cojo maestru ne, hane ngujo me ne, ngayun ne nicuhun me hacuaha cuetuhun me xcun cru. Ngujo nga me cujun rê me ngayun ngajan ndatsen yungun hacuaha tuhun rê me cjuañihí xi cuatju me sehe cuanga me ngu nandya ngu nandya. <sup>35</sup> Cojo chuva vêhê ne, chanujujyun cjuaveya rê yêjê ni xuta xi tyahí cjuatacun rê me xi cahme nguehe ngasunhdê. Chanujujyun cjuaveya rê xutachanga naja Abel cojo hisca cjuaveya rê xutachanga naja Zacarías quihndi rê Berequías, me xi canicuhun tiña ngasuncun hiscan ndatsen rê ndava Nina. <sup>36</sup> Cuichjá quixê cojo nuju ta tsêhê cjuaveya rê yêjê ni me vê chanujujyun ngayujun ni xi nechun quihndê.

*Jemu choho camá rê Jesucristu ngatsê rê xuta Jerusalén*

<sup>37</sup>Ngayun xuta Jerusalén, ngayun xi cojo ndoyojo nicuhun profeta xi tsingatju Nina ngajñi nuju! jJemu choho má ná tsujun! ¡Mé hitsè ndiya xi meje scávèvaha nuju sacuahá javèvaha ngu nisè quihndi rè chu xi cuincha chu ngahma tyjunga rè chu! Peru ngayun ne, mijí nuju. <sup>38</sup>Chutsujun ni, Nina ne, catsismicacun me ngayun. <sup>39</sup>Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi tisingatju me ngajñi naja!” —Cuatjin cachja Jesús.

## 24

### *Cachja Jesús xi cuetsun yungun*

<sup>1</sup>Hora xi tivetju Jesús tsèhè ndatsen yungun xi matitjun jan xi cjui xin me ne, ngajan cafehe xuta ladu rè me caveyanangui me hane catsingacun tsja me xi yungun jan ne, jemu ndajyihí. <sup>2</sup>Hya xi camá ne, cuitjin cachja Jesús tsèhè yungun jan:

—Sacuahá yèjè ni ndihya vihi xi chutsujun tsèhè yungun ne, cuichjá cojo nuju ta cuechú nixtin xi hisca ngu ndoyojo ndacun xi cuicun vi ne, tsajin xinchasuncoo xicjin ta cjuè yèjè cuixujne. —Cuitjin cachja Jesús.

### *Hacutjin sacú cumachaya naja xi ha meje cuijnetaha nixtin vihi*

<sup>3</sup>Xi café cachja Jesús cuitjin ne, sehe cafehe me tiña rcu Ndetjún Olivu. Hane xi tacun suvá me, ngajan cafehe xuta ladu rè me, cavinenguisse rè me cuitjin:

—¿Mé nújun? ¿Janihya cuetjucaa xcusun vèhè ni? ¿Hane hacutjin cuma sacú niji cjuaquixi xi ha tivechú nixtin xi nduvun ngayun tivechú hora xi cjuè nixtin rè ngasunhndè vi?

<sup>4</sup>Ngajan xi cachja Jesús cojo rè me cuitjin:

—Nechun cuidadu, cojo sa xi hacuiin cuma ndacha ngayun ta, <sup>5</sup>tsèhè xi jemu cjín xuta cuetjucaa me xi cuichja me xi hacui me xi catsingatju Nina me. “Ngahan Cristu”, cuichja me. Hane cuatjin jemu cjín xuta cumacjain rè me cjuandacha rè me xi cuacun vè. <sup>6</sup>Hacuaha hya xi cumachaya nuju cjuá xi jemu yehe si tijima ngu nación o sá xi tjín cjuacjintacun xi jemu yehe si nduva ne, xicarcuun ta, hatuxa tjín xi titjun xcusun vèhè cuma. Peru hacuiin ha hya cuijnetaha nixtin vihi. <sup>7</sup>Hacuiin hya cuma ta, titjun ne, scaan xuta ngu nación cojo jingu sa nación. Hacuaha scaan xuta ngu nandya cojo ngu nga nandya. Hacuaha jemu cjín cahndè xi cuma cuechu jindya. Jemu cjín cahndè xi cjuani nangui. <sup>8</sup>Peru xi cuatjin cumá yèjè ni xcusun vihi ne, sehe ntsacu tivetsihin cjuañihi xi cuatju xuta.

<sup>9</sup>Sehe cjuaha nuju xuta, cjuecojo nuju me xi cuatjun cjuañihi, xi tsiquehen me ngayun. Hacuaha jemu chohovèè xuta rè yèjè nangui yun ngatsè naha. <sup>10</sup>Hya xi cumá ne, cjín xuta tsismicacun me ladu naha, hane tsindeya me cjuatacun rè me. Sehe cojo cjuá ni cuiteña xicjin me. <sup>11</sup>Hacuaha jemu cjín profeta xi vindacha me xuta cuetjucaa me. Hane cuatjin jemu cjín xuta cumacjain rè me cjuandacha rè me. <sup>12</sup>Hacuaha cjuatsehen ne, jemu cumayehetaha. Vèhè xi hya ne, cumachuva cjuahmutacun xi tjín rè xuta. <sup>13</sup>Peru jarè ngayun xi scaa nuju cojo cjuacjintacun vèhè hisca xi cueyun ne, cuechun xcun Nina. <sup>14</sup>Hane xuta ne, cjué me jingujyè ni ngasunhndè cuichja me cjuandajyihí vihi tsèhè gobiernu xi sahmi Nina, xi cumachaya rè xuta ngasunhndè. Hane hisca xi cuma chihin yèjè xcusun vèhè cuijnetaha nixtin vihi.

<sup>15</sup>Profeta Daniel ne, catsihindu me xcun xujun rè Nina tsèhè ngu xcusun tsehen xi tsinguetsun. Cuechún nixtin xi cuejña vèhè xu cahndè ximinchacun —xuta xi vutaya cjuá vi, catjahacuenda me cjuá—. Hya xi cuatjin tsejen ne, <sup>16</sup>hya ne, xuta xi siu yèjè nandya tsèhè distritu Judea ne, catanga me hane catangahma me hiscan ndetjún. <sup>17</sup>Hacuaha jarè me xi hinchasun me rcu ndava me ne, mé tsèhè me xi siu cahntsua ndihya ne, mijí rè xi cjuējaha me. <sup>18</sup>Hacuaha ha chuva vèhè ni ne, xuta xi siutaha me nguījña ne, mijí rè xi cuya cjuējaha me tsjanga rè me ndava me. <sup>19</sup>Jemu chojyihí tsèhè yèjè yachjin xi hincahama quihndi rè cojo yèjè me xi tjín rè quihndi vaqui xi cojo me cuanga me nixtin hya! <sup>20</sup>Chjahyun rè Nina xi cjuañihi vèhè ne, hacuiin cuinduva nixtin chan hnchan o sá nixtin xi chjahájenda rè ta, <sup>21</sup>tsèhè xi cjuañihi jyè xi cuma ne, ngu cjuandya jyè xi cjèè camahani camá hisca ntsacu cavetsihin ngasunhndè. Hacuaha cuyaaín cuma nga. <sup>22</sup>Jemu jyè cjuañihi jan, sá tsajin xi ha camachuva nixtin rè cjuañihi vèhè ne, hisca ngu xuta ne, cuetjintjiiin me. Peru ngatsè rè cjuahmutacun xi tjín rè Nina cojo xuta xi cavaxijin me xi cuma ladu rè me ne, casahmichuva me nixtin vèhè.

<sup>23</sup>Hya ne, sá xi cuichja yahnga me cojo nuju ta: “Cuajyihí Cristu gueuehe”, o sá “Cuajyihí me ngajan.” Xi camacjain nuju cjuá jan ta, <sup>24</sup>tsèhè xi nixtin hya ne, jemu cjín xuta cuetjucaa me xi cuichja me cuindacha me ta Cristu me o sá profeta me. Hacuaha jemu sahmi me cjuarcun tsèhè xi meje cuindacha me xuta, hisca cojo xuta xi cavaxijin Nina. <sup>25</sup>Quihndè ne cojo chaja sa xi cuechu nixtin vèhè ne, ngahan ne, ha cachjá cojo nuju. <sup>26</sup>Vèhè xi sá xi cuichja yahnga me cojo nuju ta: “Jemu xín tsèhè nandya tacun me”,

hacuiin cuangun cojo me. O sá xi cuichja me ta: “Ndihya cahnhchun tacun me”, camacjain nuju tséhê me ta, <sup>27</sup> sacuaaha sahmi hasen ndihichuhún xi ha tu ñahñu sahmi hasen rê jingujyê ni ngahnga, hiscan ladu vetjucaa tsuhi hiscan ladu vetje tsuhi ne, cuatjin ha tu ñahñu scutsejen ná yêjê ni xuta hya xi cuinduvá nga ngahan xi Quihndi rê Xuta Jain. <sup>28</sup> Cuatjin cuma nixtin hya sacuaaha chja cjuá ta hiscan jiña chu xi cahme ne, hacuaaha ngajan matangun chu lote.

*Hya xi cuya nduva Quihndi rê Xuta Jain*

<sup>29</sup> Ngutjen xi camá cavatju cjuañihi jan ne, cuinduva nixtin xi cjuê ndavá rê tsuhi. Hacuaaha sá ne, ha quihndê suaain ndavá rê. Hane niñú ne, cuixu tséhê ngahnga. Hisca ngahñu xi tjin ngahnga ne, cjuiniyaya. <sup>30</sup> Hya xi camá ne, ngajan cuma tsejen seña tséhê Quihndi rê Xuta Jain. Hane yêjê xuta xi siu ngasunhdê ne, jindayava me. Sehe hya scuêê xuta ngahan, xi Quihndi rê Xuta Jain ngahan, xi cuinduvá ngajñi rê yufi cojo jemu jyê ngahñu, hisca seti hisca vatê jiyi ngahan xi cuinduva. <sup>31</sup> Hya ne, tsingátju ángel naha, hane xi ndaja hñu cuinuhya rê xi fane ngu tyjo, sehe cjuējaha rê yêjê ni xuta naha xi cavaxejen, sahmítangun rê me tséhê jinguyêjê ni ladu ngasunhdê.

<sup>32</sup> Quihndê ne, ningatuhuntacún tséhê ejemplu xi sua yaxujún: Hya xi cuetsihin cumá xcuen tsja rê tséhê xi ha jemu camatiña cuetsihin cuetjusehen ne, ngayun ne, ha hyun ta ha jemu camatiña chan tsin. <sup>33</sup> Hacuaaha chuya vêhê ni ne, hya xi chun xi cuetsihin cumá yêjê xcusun xi cachjá cojo nuju vê ne, vêhê sua cumachaya nuju xi ha camatiña nixtin rê, hisca meje cumá. <sup>34</sup> Cuichjá cjuaquixi cojo nuju ta xuta xi siu nixtin vihi ne siu cuaaha me hya xi cuetjucaa xcusun xi cachjá cojo nuju jan. <sup>35</sup> Ngahnga cojo nguehe ngasunhdê ne, hatuxa cjuê. Peru hisca ngu cjuá naha ne, tsajin xi cuetjincaain.

<sup>36</sup> Sacuaaha nixtin xi cuetjucaa cjuatacun vêhê ne, tsajin jo vê rê. Hisca víin ángel xi siu ngahnga. Hisca hveen ngahan xi Quihndi rê Xuta Jain. Suva tutu ni Nina nahmi naja ne, me vêhê xi vêhê me.

<sup>37</sup> Sacuaaha casahmi xuta hya xi cavêjña xutachanga naja Noé ne, hacuanitjin ni sahmi xuta hya xi cuinduva Quihndi rê Xuta Jain. <sup>38</sup> Tséhê xi hya ne, xi chaja sa casesuntê nandan ngasunhdê ne, jine tjihvi xuta, vixan me, tsinguixan me quihndi rê me. Cuatjin casahmi cuaaha me hisca nixtin xi cavisehen Noé cahntsua barcu. <sup>39</sup> Hacuaaha camachayiin rê me hisca xi casesuntê nandá quijicojo rê yêjê ni me jan. Hacuaaha cuanitjin ni sahmi xuta hya xi cuinduvá ngahan xi Quihndi rê Xuta Jain ngahan. <sup>40</sup> Jo cha ne, cuiyujutaha cha nguijña. Ngu cha ne, chjaháxin rê cha, hane cha xingu jan ne, cuejña cha. <sup>41</sup> Hacuaaha jo nga yachjin ne, cuiyujutaha na coho na. Ngu na ne, chjaháxin rê na, hane na xingu jan ne, cuejña na.

<sup>42</sup> Vêhê xi nechun cuidadu. Hacuaaha ningascun rê cjuatacun nuju ta ngayun ne, hyúun janihya cjuēhe Nai nuju. <sup>43</sup> Hacuaaha meje rê xi cumachaya nuju cjuatacun vihi: sá xi nai rê ngu ndihya ha machaya rê me hora xi cuinduva cha chêjê ndava me ne, suaain me cahndê xi scuxaha cha ndava me ne, sehe tsichêjê cha. <sup>44</sup> Hacuanitjin ni meje rê xi ngayujun ni ngayun ne, tuhun chjiru yojo nuju ta, tséhê xi hora xi ningatuuntacún xi cjuêhê ngahan xi Quihndi rê Xuta Jain ngahan ne, hora vêhê cjuêhê.

*Xuta xi vihndê cojo xi vihndiin tséhê Nina*

<sup>45</sup> ¿Yo ngayun xi nihñu sacuaaha sahmi ngu mosu hndixahan xi jemu quicun cacun xi sahmichihin yêjê ni hacutjin xi meje rê nai rê? Ngu hndixahan xi cjuahaxa xi cjuahacuenda rê yêjê sa hndixahan xi hora tjin sua xi sinê. <sup>46</sup> Jemu ndaja tséhê ngu hndixahan jan xi tisahmi tutjin xi casuaxa rê nai rê. <sup>47</sup> Cuichjá cojo nuju cjuaquixi ta, nai rê hndixahan vêhê ne, suaxa me hndixahan vêhê xi hacuaaha cjuahacuenda yêjê sa xcusun xi tjin rê me. <sup>48</sup> Peru cuejña ne xi hndixahan vêhê ne, jemu choho xcusun rê me, tsingataha cacun cojo cjuatacun rê cuitjin: “Nai naha ne, tujima tafi sa xi cjuēhe me.” Cuatjin tsingataha cacun. <sup>49</sup> Sehe cuetsihin cuaaja rê hndixahan xi yahnga jan, hacuaaha cajtutaha sinê cuihi hisca cuma chihi. <sup>50</sup> Peru cuechú ngu nixtin xi tsajin tacunya hndixahan vêhê, ngu hora xi hisca hvíin ne, hya cjuēhe nai rê. <sup>51</sup> Hane jemu jyê castigu sahmi me, sehe tsingátju me cuatju tangun cjuañihi cojo xuta xi jo xcun jo hntsua me. Ngajan ne, jemu squihnda me, hacuaaha tsijanerii me nehñu me.

## 25

*Ejemplu tséhê tē na nixti xi quiji na cjuavixan*

<sup>1</sup> Hya xi cuechú nixtin xi sahmi Nina gobiernu ne, cumá sacuaaha cavatju tē na nixti xi cafaha na ndihi tséhê aceite, sehe quiji na xi cuejñaya na cha xi cuixan hora xi nduva cha. <sup>2</sup> Hya xi camá ne, hñu na jan ne, rcu taja na, hacuiin ndaja tsingatahacacun na. Peru hñu nga na jan ne, ndaja quicun na. <sup>3</sup> Cavejña xi na rcu taja ne, hora xi cafaha na ndihi ne, cafaain na aceite xi cuya cuincha na tséhê. <sup>4</sup> Peru sacuaaha na quicun jan ne, cafaha na ndihi ne, hacuaaha xin cafaha na aceite. <sup>5</sup> Hane xi ma tafi xi nduva cha xi cuixan jan ne,



cafaha rē na niñña ne, caviyujufē na. <sup>6</sup> Hya xi camá ne, sacuaaha vasen nixten ne, canuhya rē xi jindaya xuta ta: “¡Nduva cha xi cuixan! Tangun t̄jengun cha xi cuanguncujun.” <sup>7</sup> Xi cuatj̄in canuhya rē ne, cavisatjenhnga na nixti jan ne, cavēhēchjine na ndihi jan. <sup>8</sup> Hya xi camá ne, cachja na xi taja rcu cojo na quicun cuitj̄in: “Tuhun nihi hitsē aceite nuju ta meje cjuē xi tsjin ne, coho ndihi nihi.” <sup>9</sup> Peru cafayangui na quicun cuitj̄in: “Cumaji t̄hin nuju ta sá cuatj̄in ne, cuechutaain tsēhē xi cuma meje nuju hacuaaha tsēhē xi cuma meje nihi. Hitsē sa ndaja ne, tangun hiscan xi xteña ne, hiscan ngajan chuhun.” <sup>10</sup> Cuatj̄in camá xi hora xi quiji cavatsē na jan aceite ne, cafehe cha xi cuixan. Hane na xi siuya ne, cojo na cavisehen na ndava suhi. Sehe casechjahñu tingotjo ndihya. <sup>11</sup> Hya xi camá ne, cafehe na nixti xi quiji jan, hane cajindaya na tingotjo ndihya cuitj̄in: “Tatá, chuxuhun tingotjo tsjin.” <sup>12</sup> Peru me vēhē jan ne, cafayangui me cuitj̄in: “Hveen jani nduvun ngayun.”

<sup>13</sup> Vēhē xi nechun cuidadu, hacuaaha ningascun rē cjuatacun nuju ta ngayun ne, hyúun mé hora, hyúun mé nixtin xi cumá.

*Ejemplu tsēhē tujún xi casua nai rē hndixahan*

<sup>14</sup> Cuejña ne xi ngu xuta jan ne, quiji me ngu nangu cj̄in. Hane chaja sa xi cjue me ne, cajindaya me mosu hndixahan rē me casua me xi cuejñatsja cha xi tsēhē me. <sup>15</sup> Hora xi casua me ne, ngu cha, casua me cha hñu mil tujún, hane ngu nga cha ne jo mil, hane ngu nga cha ne ngu mil. Cuatj̄in casua me cha hatucutj̄in tsejen xi chutaha cha. Hya xi camá ne, cavetju me quiji me. <sup>16</sup> Ngajan camá xi cha xi cafahatsja cha hñu mil tujún ne, casahmi cha ngu negocio. Hane ngajan cavesun rē cha hñu cuatj̄in sa. <sup>17</sup> Hacuaaha cha xi cafahatsja cha jo mil tujún ne, cuanitj̄in ne cavesun rē cha jo cuatj̄in sa. <sup>18</sup> Peru cha xi cafahatsja cha ngu mil tujún tsēhē nai rē cha ne, quiji cha cafahangui cha ngu ngojo nangu. Hane ngajan caveyanijihma cha tujún jan.

<sup>19</sup> Hya xi jercu cavatu nixtin xi quiji nai jan, cavuya cafehe me, cajindaya me cha xi sua cuenda cha tsēhē tujún jan. <sup>20</sup> Ngajan xi cha xi cafahatsja cha hñu mil tujún ne, yaha cha hñu mil sa. Hane cachja cha cojo me ta: “Tatá, hñu mil catuhun ná, hindē ne, cavesun ná hñu cuatj̄in sa.” <sup>21</sup> Ngajan xi nai rē hndixahan jan ne, cuitj̄in cachja me cojo: “Ndatj̄in ri. Ngaye ne, ngu hndixahan ndaja ngaye. Ngatsē rē xi jemu ndaja canihñi xa lihndi vēhē ne, hitsē sa quisun xa xi sua ri. Quihndē ne, tehe cjuasua xahasen riji cojo ná.” <sup>22</sup> Sehe cafehe cha xi cafahatsja cha jo mil tujún. Hane cachja cha cuitj̄in: “Tatá, jo mil catuhun ná, hindē nguehe tacun tsujun jo cuatj̄in sa xi cavesun ná.” <sup>23</sup> Ngajan cachja nai jan cuitj̄in: “Ndatj̄in. Ngaye ne, ngu hndixahan ndaja ngaye. Ngatsē rē xi jemu ndaja canihñi xa lihndi vēhē ne, hitsē sa quisun xa xi sua ri. Quihndē ne, tehe cjuasua xahasen riji cojo ná.”

<sup>24</sup> Hacuaaha cafehe cha xi cafahatsja cha ngu mil tujún. Hane cuitj̄in cachja cha: “Tatá, ha machaya ná xi ngayun ne, jemu hñu cjuu nuju. Nangun xitjē handasa hacuiin ngayun xi canitjun. Ngayun ne, hacjahi sahmi xa ne, ngayun chjuhunntsun chji rē. <sup>25</sup> Vēhē xi tsáajun ngahan. Hane cējē caveyaneje hma tujún nuju. Cuajyihí tujún nuju nguehe.” <sup>26</sup> Ngajan xi nai rē cha ne, catsicuya me tsēhē cha cuitj̄in: “Ngaye ne, machjiriin ngaye. Ngaye ne, mosu hndixahan tsehen. Sá xi hye xi fanga handasa hacuiin ngahan xi catsitjē, hye xi hacjahi sahmi xa ne, peru ngahan fahantsa chji rē, <sup>27</sup> hitsē sa ndaja xi xcun bancun cahmi chani tujún xi casuá ri, cojo sa xi hya xi cjuēhē ne, cúa cjuahantsa tujún naha, peru cojo quihndi rē.” <sup>28</sup> Sehe cachja me cojo me xi hinchacun jan cuitj̄in: “Chjuhuntuhun tujún xi yaha cha vē. Sehe tuhun rē cha xi tjin rē tē mil tujún ta, <sup>29</sup> me xi ha tjin rē ne, sua sa Nina me, hisca vesun tsēhē. Hane me xi tsajin cj̄in jan ne, cjuahataha Nina hitsē xi tjin rē me. <sup>30</sup> Hacuaaha chandunxin hndixahan xi machjiriin hiscan jñu ngajan candatsen. Ngajan ne, jemu squihnda me hacuaaha tsjanerii me nehñu me.”

*Ejemplu tsēhē chu tsánga cojo chu tentsun*

<sup>31</sup> Hya xi cúa Quihndi rē Xuta Jain cuinduva me cojo hasen ndajyihí tsēhē Nina hacuaaha cojo ángel rē Nina cuinduva me, cuejña me cahndē hñu hiscan tsichuva me xuta. <sup>32</sup> Hane ngajan xcun me ne, cumatangun xuta rē jinguyējē ni ngasunhndē ne, sehe scuxijin me xuta sacuaaha sahmi ngu cha xi faha cuenda rē chu hora xi vaxijin cha chu tsánga tsēhē ngajñi rē chu tentsun. <sup>33</sup> Vinchaxin cha chu tsánga taha quixi rē cha, hane vinchaxin cha chu tentsun taha xcun. <sup>34</sup> Hya xi cumá ne, me xi matitjun jan, cuichja me cojo xuta taha quixi ta: “Nduvun nechun, ngayun xi catsinchacun Nina Nahmi naha. Ngayun xi satē nuju cuisuhun gobiernu xi Nina cavēhēchjini me tsujun hisca ntsacu cavetsihin ngasunhndē. <sup>35</sup> Cuatj̄in satē nuju ta tsēhē xi hya xi vojo ná, canicjun ná. Hya xi xinda ná, catuhun ná nandá; xutaxín ngahan, peru catuhun cahndē cavitejñajenda ndya nuju. <sup>36</sup> Tsajin ná tsjan, peru catuhun ná tsjan xi mameje; hmu ná hane cafuhun cachusuhunyun ná; teññaya ndavaya hane cafuhun cachutsujun ná.” <sup>37</sup> Sehe xuta tyajhi jan, tsicuya me cjuu cuitj̄in: “Tatá, ¿janihya camachaya nihi xi vojo nuju, hane canicjun nuju? ¿o sá xi xinda nuju, hane catihin nuju nandá? <sup>38</sup> ¿o janihya cachutsijin nuju nujuhunyun sacuaaha xutaxín hane

catihin cahndě nechunjendun ndya niji? ¿Janihya cahyin xi tsajin nuju tsjain hane catihin?  
<sup>39</sup> Hacuaha ¿janihya cahyin xi hmu nuju o nechunyun ndavaya xi canduvintjenguin nuju?”  
<sup>40</sup> Sehe cuichja me xi matitjun jan ta: “Cuichjá quixi cojo nuju ta hya xi canihñu cjuandaja vë xi cavisecon rë tuyoni xuta yuma ladu naha ne, cavisecon ná ngahan.”

<sup>41</sup> Hya xi camá ne, cachja me xi matitjun jan cojo xuta xi siu ladu scun rë me cuitjin: “Tangunxun ngayun xi cuatjun castigu rë Nina ne, tangun cuechún xcun ndihi xi catsindaja Nina xi cuisehen xitsehen xi matitjun cojo ángel rë. Ndihi jan ne, tsajin nixtin tsajin nixten xi coho. <sup>42</sup> Cuatjin satë nuju ta tsëhë xi hya xi vojo ná, ha canicjuun ná; hya xi xinda ná, catuun ná nandá; xutaxín ngahan, peru catuun cahndě cavitejñajenda ndya nuju; <sup>43</sup> Tsajin ná tsjain, peru catuun ná tsjain xi mameje; hmu ná hane cafuun cachusunuun ná; tejñaya ndavaya hane cafuun chutsuun ná.” <sup>44</sup> Sehe cuinenguise me cuitjin: “Tatá, ¿janihya camachaya niji xi vojo nuju, o sá xi xinda nuju? ¿O janihya canutsijin nuju nujuhunyun sacuaha xutaxín, o xi tsajin nuju tsjain? Hacuaha ¿janihya cahyin xi hmu nuju o nechunyun ndavaya? ¿Janihya cahyin vë xi cavisecuin nuju?” <sup>45</sup> Sehe cuichja me xi matitjun jan ta: “Cuichjá quixë cojo nuju ta tsëhë xi mijí nihñu cjuandaja vë xi cuisecon rë tuyoni xuta yuma ladu naha ne, mijí cuisecon ná ngahan.” <sup>46</sup> Sehe xuta jan ne, cuisehen me castigu xi nixtin nixten cumá, peru xuta xi tyjahi cjuatacun rë me ne, satë rë me cjuahñu xatsë xcun Nina.

## 26

### *Camachihin cjua hacutjin xi chjahá rë Jesucristu*

<sup>1</sup> Hya xi camá ne, xi cajnetaha cachja Jesús yějë cjua cuatjin ne, sehe cachja me cojo xuta ladu rë me cuitjin:

<sup>2</sup> —Ha hyun xi chaja sa jo nixtin xi cuechú suhi tsëhë pascua ne hane ngahan xi Quihndi rë Xuta Jain ngahan ne, hatuxa hya cumá ngahan entregadu tsja xuta xi cuetaha ná xcun cru. —Cuatjin cachja me.

<sup>3</sup> Nixtin hya ne, yějë nahmi xi matitjun cojo xuta changá rë xuta tjë rë Israel ne, casahmi me ngu junta ngajan ndihya jyë rë Caifás, me xi vitexa yějë nahmi xi matitjun. <sup>4</sup> Ngajan xi caviyuju me cjuatacun rë me hacutjin xi cuma cuindacha me Jesús cojo sa xi cuma cjuahahma me me xi tsiquehen me me. <sup>5</sup> Peru cachja me ta:

—Ndatjin xi cuinechanyan ne cuatju suhi, sehe chjahanhma cha, sá tu cumacjan rë xutacjín, hane cumá ngu suë jyë.

### *Cavitejnu ngu chjuun aceite rcu Jesucristu*

<sup>6</sup> Hya ne, Jesús ne, nandya Betania quitaha me. Tacun me ndava cha Simú, cha xi camandaja tsëhë chíhin vitaha xi casatë chuxin rë cha. <sup>7</sup> Hane ngajan camá xi cafehetjengui rë me ngu chjuun xi yaha na ngu frasco xi ndyojo camá, híncha ngu aceite ndaja xi jercu hnga chji rë. Hya xi camá ne, cavitejnu na aceite jan rcu Jesús hora xi tijinë me niñu. <sup>8</sup> Peru xi cavutsejen cha ladu rë me xi cuatjin casahmi na jan ne, camacjan rë cha cachja cha cuitjin:

—¿Mé má tu mahya ni catsichaja na aceite vë? <sup>9</sup> Sá xi xteña ne ndaja sacú tujún rë. Hane tujún vëhë ne cuma cuisecoo rë xuta yuma. —Cuatjin cachjataha cha na.

<sup>10</sup> Peru xi camachaya rë Jesús xi cuatjin chja cha ne, catsicuya me cjua cuitjin:

—¿Mé má cuatjin tivichuncjun tsëhë na ta jemu vengui chji rë xcusun xi casahmi na cojo ná? <sup>11</sup> Xuta yuma ne, yějë nu yějë nixtin ne, siu me cojo nuju. Peru ngahan ne, hacuín yějë nu yějë nixtin tejña cojo nuju. <sup>12</sup> Tsëhë xi xi cavitejnu ná na aceite jan ne cojo tjun ni ne cuëhëchjine na yojo naha xi seyaniji ngahan. <sup>13</sup> Cuichjáquixë cojo nuju ta tuyani ni tsëhë jingujyë ni ngasunhndë xi cuichja xuta cjua tsëhë Nina ne, hacuaha cueyanangui me na vihi, cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

### *Judas casahmi cha compromisu xi cuiteña cha Jesús*

<sup>14</sup> Hya xi camá ne, ngu cha tsëhë ngajñi rë me xi tejó xi má ladu rë Jesús, cha xi hmí rë Judas Iscariote ne, quiji cavisiajmi cha cojo nahmi xi matitjun <sup>15</sup> cavinenguise cha me cuitjin:

—¿Há cjin tujún tuhun ná sá xi sahme entregadu nuju Jesús?

Ngajan xi cavexqui me hane casua me cha cantë tujún tyova. <sup>16</sup> Hane ngajan cavejñaya cha ngu hora xi ndaja xi cuma sahmi cha entregadu Jesús cojo xuta xi cuacun jan.

### *Hacutjin cajinë Jesús tsëhë suhi rë Pascua*

<sup>17</sup> Hya xi camá ne, nixtin xi tjun tjun tsëhë suhi xi chinë pan xi tsajin san rë, cafehe xuta ladu rë Jesús xi tejo jan, cachja cha cojo me cuitjin:

—¿Jani meje nuju xi cuihinchjini xi xine nguixun tsëhë suhi?

<sup>18</sup> Sehe cafayangui Jesús cuitjin:

—Tangun nandya Jerusalén. Hane xi cuechú ndava ngu cha xi cuacun jan ne, tinújun cojo rë cha cuitjin: “Chja maestru naja cuitjin: Meje cuechú hora naha, hindë ne, ndya nuju ne sínë niñu tsëhë pascua cojo xuta ladu naha.”

<sup>19</sup> Sehe quiji xuta ladu rë me ne, casahmi cha sacuaaha xi cavitexa Jesús cha, hane cavëhëndaja cha xi sinënguixun me tsëhë pascua.

<sup>20</sup> Hya xi quiji hora jan ne, tijinë me niñu cojo xuta ladu rë me xi tejó jan, <sup>21</sup> hane ngajñi hora xi tijinë me ne, cachja Jesús cuitjin:

—Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

<sup>22</sup> Ngajan xi jemu choho camá rë cha, cavetsihin cha cachja chuva ngu chuva ngu cha cojo rë me cuitjin:

—Nai, ¿há cumácacun xi ngahan sahme?

<sup>23</sup> Hya xi camá ne, cafayangui Jesús cuitjin:

—Ngu cha xi ngu ni tyuva tsingúsehenquinda niñu naha cojo ne, cha vëhë xi sahmi ná entregadu. <sup>24</sup> Ngahan xi Quihndi rë Xuta Jain ngahan ne, hatuxa tjin ná xi cueya sacuatjin ha camá camahindu xcun xujun tsahan, peru jemu chojyihí tsëhë cha xi sahmi ná entregadu. Vengui sa chji rë xi catsiin cha.

<sup>25</sup> Sehe Judas, cha xi sahmi rë me entregadu cachja cha ta:

—Maestro, ¿há cumácacun xi ngahan sahme?

Ngajan xi cafayangui Jesús tsëhë cha cuitjin:

—Juun, quixi.

<sup>26</sup> Hora xi tijinë me comida ne, cafaha me ngu niñutsju hacuaaha casua me nacuechji rë Nina ne, sehe cavotohocja me niñutsju jan, casua rë me xi tejó jan ne, sehe cachja me cuitjin:

—Chjuhun xinu. Vihi ne, yojo naha vi.

<sup>27</sup> Hya xi camá ne, cafaha me ngu vasu ne, sehe casua me nacuechji rë Nina, sehe cachja me cuitjin:

—Juhun vihi sehe siuhun ngajñi ngayujun ni, <sup>28</sup> ta xan rë uva vihi ne, vihi jni naha xi cuetju ngatsë rë xuta sehe cuma chihin compromisu xi cuaxëtje rë xuta tsëhë jyë rë me.

<sup>29</sup> Hacuaha cuichjá cojo nuju ta quihndë cojo nixtin xi cjuiniji sa ne, ha quihndë cuyaana cuëhë xan rë uva. Cuëhë, peru hisca hya xi cuëhë nga cojo nuju ngajan hiscan sahmi Nina gobiernu.

*Casua Jesucristu camachaya rë Pedru xi cuichja me xi hvín me yo Jesucristu*

<sup>30</sup> Xi cajnetaha cajnë me ne, casë me ngu tsëhë Nina. Sehe cavetju me quiji me Naxi Olivu. <sup>31</sup> Hane sehe ngajan cachja Jesús cojo xuta ladu rë me cuitjin:

—Ngayujun ni ngayun ne, nismutacun ná hacuaaha cuma ndaya cjuatacun nuju quihndë nguixun vi ne, hane cueñu ná suva ta cumá sacuaaha camahindu xcun xujun rë Nina xi chja xi: “Nina ne, tsiquehen me cha xi sahmi cuidadu rë chu tsánga, hane chu tsánga vë ne cuitsojo chu.” <sup>32</sup> Cuatjin cumá, peru hya xi cúa nga cjuahñu naha ne cjué tijun tsujun hisca distritu Galilea.

<sup>33</sup> Pedru ne, cafayangui cha cuitjin:

—Ha ndasa ngayëjë cha xi cuicun vi cueñña suva cha ngayun, hatuxa tsajin nixtin xi cojo ngahan sahme cuatjin.

<sup>34</sup> Hya xi camá ne, cuitjin cachja Jesús cojo cha:

—Cuichjáquixë cojo ri ta tajñu ni xi chaja squihnda xahnda ne, ha jyan ndiya cuinoje xi hyiin yo ngahan. —Cuatjin cachja Jesús.

<sup>35</sup> Cachja Pedru cuitjin:

—Ha ndasa hisca cueya cojo nuju ne, peru cuichjaan xi hveen yo ngayun.

Hacuaha cuanitjin ni cachja cha xi yahnga.

*Casahmi Jesucristu oración rë me ngajan Getsemani*

<sup>36</sup> Sehe quiji Jesús cojo cha xi tejó jan ne, cafehe me ngu cahndë xi hmí rë Getsemani. Ngajan cachja Jesús cuitjin:

—Nechun ni nguehe. Cjué nguvan hitsë ni cuisiajme cojo Nina. —Cuatjin cachja me.

<sup>37</sup> Hya xi camá ne, cavaxë me Pedru cojo jo cha quihndi rë Zebedeo xi quiji cojo me cha. Hane xi cjuí me ne, cavetsihin jemu camá va rë me, hacuaaha jemu macjincacun me. <sup>38</sup> Sehe cachja me cojo cha cuitjin:

—Jercu choho camahani má rë xahasen naha, sacuaaha xi vëhë ni tsiquehen ná. Nguehe nechuncun ngayun cojo ná.

<sup>39</sup> Sehe ngajan xi Jesús ne, quiji me hitsë nguvan. Hane ngajan cafañatsacjan me, cafehya rë me Nina cuitjin:

—Ngayun Nahmi naha, sá tjin sa ngu chuva rë ne, catisatiin ná cjuañihí xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan.

<sup>40</sup> Hya xi camá ne, cavuya cafehe me hiscan siu jyan xuta ladu rë me xi quijicojo me jan ne, casacutsja me xi siufë me. Ngajan xi cachja Jesús cojo Pedru cuitjin:

—Cahyun ni, ¿há camaji cavacun ngayun cojo ná hisca ngu hora ni? <sup>41</sup> Nechuncun ngayun, nihñu oración nuju, sátu chjaháchuva nuju cojo cjuatacun nuju. Xahasen nuju ne, ndaja meje rë xi nihñu, peru yojo nuju ne, chovacacun.

<sup>42</sup> Hya xi camá ne, camá jo ndiya xi quiji me nguvan cafehya me Nina cuitjin:

—Nahmi naha, sá xi cumaji cuatju chuva rë xi sátiin ná cjuañihi ne, catama sacuatjin xi meje nuju ngayun.

<sup>43</sup> Hya xi camá ne, cavuya nga cafehe me hiscan siu jyan xuta jan casacutsja me xi siufë me ta jemu hai nijña rë me. <sup>44</sup> Hya xi camá ne, camá jyan ndiya xi quiji me nguvan ne hacuaha cojo vëhé nga ne, cafehya me Nina. <sup>45</sup> Sehe cavuya nga me cafehe me hiscan siu xuta jan ne, cachja Jesús cuitjin:

—¿Há tsjuñufun cahun? Chutsujun ne, ha cavechú hora xi ngahan Quihndi rë Xuta Jain ne, cjuaha ná xuta xi sahmi ná entregadu cojo xuta tsehen. <sup>46</sup> Tisatjunhngun, cuanguen chutsejen ta ha nduva cha xi sahmi ná entregadu.

### *Cafaha xuta Jesucristu*

<sup>47</sup> Jinguyëjë rë xi tichja cuaha Jesús ne, cafehe Judas, cha xi cojo jiyajñi ngajñi rë cha xi tejó xi catsujyihya cojo me. Hacuaha jemu cjin xuta tivisecoo rë cha, xuta xi cavitexa nahmi xi matitjun cojo xuta changá xi quijijaha me Jesús. Hane yaha me quicha, yaha me ya. <sup>48</sup> Chaja sa xi cjuhe cha jan xi sahmi cha entregadu Jesús ne, cachja cha cojo xutacjin jan cuitjin:

—Cha xi cjuë cuitatsuha xi suá rë nina ne, cha vëhé xi hacui cha.

<sup>49</sup> Xi tu cavechu cha hiscan nduva Jesús ne, ngutjen quiji casahmitiña cha tsëhé me hacuaha casua cha me nina cachja cha cuitjin:

—Cuhndanu, maestro —chja cha.

Hane quiji cavitatsuha cha me. <sup>50</sup> Ngajan xi cachja Jesús cojo cha cuitjin:

—Tai, Nihñichihin xa vëhé xi candove.

Hya xi camá ne, quiji xuta jan ne, cafaha me Jesús. <sup>51</sup> Ngajan xi ngu cha xi secun cha cojo Jesús ne, cavaxë cha quichanduju rë cha, hane cavaja rë cha ngu cha mosu rë nahmi xi matitjun, hane cavatësun cha ngu ladu tyjavañuju.

<sup>52</sup> Ngajan xi cachja Jesús cojo cha cuitjin:

—Teyendeje quicha rijí vë. Xuta xi tsicojo me quicha ne, hacuaha cojo quicha cueya me.

<sup>53</sup> ¿Há hyuun ta sá xi cjuehya rë Nahmi naha ne, jemu cjin mil ángel tsingatju me cuisecoo ná? <sup>54</sup> Peru sá xi cuatjin sahme ne, ¿hacutjin cumachihin cjuá rë xujun rë Nina? ta cuitjin meje rë xi cumá.

<sup>55</sup> Hya xi cajnetaha cachja Jesús cojo xuta ladu rë me ne, sehe cachja me cojo xutacjin cuitjin:

—¿Há nduvun chjuhun ná sacuaha ngu xuta xi chëjë me, xi cuatjin nduvun cojo ya cojo quicha vë ní? Xi cavitejñaya cojo nuju nchunchujun ni ndatsen yungun jan ne, cavetuhunntsuun ná cachjuun ná. <sup>56</sup> Peru cuitjin tijima cojo sa xi cuetjucaa jain hacutjin camahindu xcun xujun rë Nina xi catsihindu profeta.

### *Quiji me cojo Jesús ndava nahmi xi matitjun*

<sup>57</sup> Hya xi camá ne, xi cafaha xuta jan Jesús ne, quijicojo me me ndava Caifás, nahmi xi matitjun tsëhé yëjë ni nahmi ta tsëhé xi ngajan ha camá tangun yëjë ni cha xi vicuya cjuachacun cojo yëjë ni xuta changá. <sup>58</sup> Pedru ne, hacuaha tjengui cha cjuí cha tu cjin tu cjin ni hacutjin cjuí xuta jan cojo Jesús hisca xi cavisehen cha ndatsen rë ndava nahmi xi matitjun jan. Hane ngajan cavéjña cha cojo cha nísë rë yungun cojo sa xi cumachaya rë cha mé cumá.

<sup>59</sup> Hane nahmi xi matitjun jan cojo yëjë sa xuta xi matitjun ne, cavanguí me xuta ndacha xi tsinguixi jyë rë Jesús, cojo sa xi cuma tsiquehen me me. <sup>60</sup> Peru tsajin mé jyë rë Jesús xi casacu rë me handasa jemu cjin má xuta ndacha xi cachja me. Hisca xi ha tisacuiiyin rë me hacutjin cuma, sehe cafehe jo cha ndacha xi cachja cha <sup>61</sup> cuitjin:

—Cha vi cuitjin cachja cha ta: “Ngahan ne, cuma tsinguétsun yungun xi matitjun vi xi casahmi xuta tsëhé Nina, hane cahntsua xi jyan nixtin ne, sahme nga ngu.”

<sup>62</sup> Ngajan xi nahmi xi matitjun tsëhé nahmi xi yahnga jan ne casecunvasen me, cavinen- guise me Jesús cuitjin:

—¿Há chjayinnguini hisca ngu cjuá? ¿Mé noje tsëhé jyë xi vincha xuta jan?

<sup>63</sup> Hane Jesús ne, tu jyuun ni casecun me. Sehe cachja nahmi xi matitjun jan cojo Jesús cuitjin:

—Cuitexa ri ngatsë rë xi macjain ri tsëhé ngu ni Nina quicun xi hora xi cjuahataha ri ne cuinoje cjuaquixi. ¿Há ngaye xi Quihndi rë Nina? ¿Há ngaye xi Cristu?

<sup>64</sup> Ngajan cafayangui Jesús tsëhé me ta:

—Sacuatjin nújun vë ne, cuatjin jain. Hacuaha cjeuhe nixtin xi chutsujun ná xi tejña ladu quixi tséhë ngahñu rë Nina. Hacuaha chutsujun ná xi cuinduvajne ngajñi rë yufi tséhë ngahnga.

<sup>65</sup> Hane ngajan xi nahmi xi matitjun tséhë nahmi xi yahnga jan ne xi jemu camacjan rë me ne, hisca tsjain rë me cavicheya me. Hacuaha cuitjin cachja me:

—Tsixcuehyu cha Nina. Tsajin sa cjaa testigu xi mameje. Ngayun ne, ha canuhyun hacutjin tsixcuehyu cha Nina. <sup>66</sup> ¿Mé nújun quihndé?

Ngajan cafayangui me cuitjin:

—¡Meje rë xi cueya cha!

<sup>67</sup> Hya xi camá ne, ngu jo me cavetsihin me cavëhënatya me Jesús hacuaha cavajaya me xcun. Yahnga nga me ne, cojo cahntsua tsja me cavaja me xcun Jesús. <sup>68</sup> Cachja me cuitjin:

—Tinoje, ngaye Cristu, ¿yo xi cavaja ri?

*Cachja Pedru xi hvín me yo Jesucristu*

<sup>69</sup> Jinguyëjé rë xi cuatjin tijima ne, Pedru ne, tacun me ndatsen ndihya. Hya xi camá ne canduva ngu na mosu hndixahan tséhë nahmi jan, cafehe cachja na cojo Pedru cuitjin:

—Ngaye ne, ladu rë Jesús tséhë distritu Galilea má cha.

<sup>70</sup> Peru xcun yëjé me xi siu me ne, cafahahma me cachja me cuitjin:

—Hisca hveen mé xi noje.

<sup>71</sup> Hya xi camá ne, sehe cavetju me quiji me casecun me hiscan tu cuiseen ni tséhë ndatsen ndihya. Hane ngajan xi ngu nga na cachja na cojo xuta xi siu ta:

—Cha vihi ne, ladu rë Jesús nandya Nasarét má cha.

<sup>72</sup> Hya xi camá ne, ngu ndiya nga ne cafahahma me cuitjin:

—Vëë Nina xi hveen xuta jan.

<sup>73</sup> Hya xi cavatju ngu hora ne, sehe camatiña xuta xi hinchacun cojo Pedru jan cachja me cuitjin:

—Ha cjuaquixindaja ta ngaye ne, cojo ngaye nechin cojo cha xi cuajiyihí vë, ta tséhë xi cjuaja riji tsingacun xi xuta distritu vë ngaye.

<sup>74</sup> Ngajan xi cavetsihin nga Pedru cafahahma me cjuaquixi hisca cachja me xi catinduva ngu cjuacjintacun xi cuatju me sá xi tichja me ngu ndesu. Cuitjin cachja me:

—Vëë Nina jain xi hveen yo me xi nújun vë.

Hane hora vëhé ne, cajihnda ngu xahnda. <sup>75</sup> Hane Pedru ne, catsinguitsjen me cjuaja xi cachja Jesús cojo rë me xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Hane xi cavetju me candatsen ne, cajihnda susu me.

## 27

*Casahmi entregadu me Jesucristu xcun Pilatu*

<sup>1</sup> Hya xi camá nchujun ni ne, yëjé ni nahmi xi matitjun cojo yëjé xuta changá ne camatangun nga me xi sacuya rë me xcusun hacutjin cuma tsiquehen me Jesús. <sup>2</sup> Sehe catsihñu me Jesús ne, quijicani me xcun gobernador xi hmí rë Pilatu.

*Cahme Judas*

<sup>3</sup> Hya xi camá ne, Judas ne, cha xi casahmi rë me entregadu, camachaya rë cha xi cueya Jesús. Ngajan xi choho camá rë cha hane catsindeya cha cjuatacun rë cha. Quiji cha catsicuya cha catë tujún tyava jan cojo nahmi xi matitjun cojo xuta changá. <sup>4</sup> Cuitjin cachja cha:

—Jemu tjin jyë naha ta tséhë xi casahme entregadu ngu me xi tsajin xi cun rë.

Peru cafayangui me cuitjin:

—¡Mé tsijin vë! Cjuacjintacun vë hatuxa tsiji sove.

<sup>5</sup> Hya xi camá ne, ngajan yungun xi matitjun ne, cacandi cha tujún tyava jan sehe cavatju cha quiji cha hiscan ngu cahndé xi cavityangui cha yojo rë cha hisca xi camá cahme cha.

<sup>6</sup> Nahmi xi matitjun jan cafaha me tujún tyava jan peru cachja me cuitjin:

—Cumaji cuinchan tujún vi cahntsua caxa tujún rë yungun ta tséhë xi tujún vi ne, cavengui chji rë jni rë cha.

<sup>7</sup> Hya xi camá ne, cachuya rë me xi cuatsë me ngu xáhva xi chja xuta Nangui rë Cha Chjinetiji. Xáhva jan ne cumachji rëhé xi xinchaniji xutaxín xi cueya me nangui vë. <sup>8</sup> Ngatsë rë xi cuatjin casacu xáhva jan ne, hisca nixtin quihndé ne cahndé vëhé ne yaha ñihi xi Cahndé Tséhë Jni. <sup>9</sup> Xi cuatjin camá ne, camachihin cjuaja xi catsihindu profeta Jeremías xi cuitjin chja: “Cafaha me catë tujún tyava, xi cavejña chji rë cha xi cafehya xuta nangui Israel, <sup>10</sup> sehe casua me tujún jan xi cjuaha me nangui rë cha chjinetiji. Cuatjin casahmi me sacuha cavitexa Nina.”

*Xcusun xi cavatju Jesús xcun Pilatu*

<sup>11</sup> Hya xi camá ne, Jesús ne secun me xcun gobernador. Ngajan cavinenguisse me Jesús cuitjin:

—¿Há ngaye xu matitjun ngaye tséhé xuta tjé rē Israel? —Cuatjin cavinenguisse me.

Hane Jesús ne, cuitjin cafayangui me:

—Cuatjin sacuatjin nújun vë. —Cuatjin cafayangui me.

<sup>12</sup> Peru hora xi nahmi xi matitjun cojo xuta changá jan cavincha jyé me Jesús ne, ndastu mé cafayangui Jesús. <sup>13</sup> Ngajan xi cachja Pilatu cojo me cuitjin:

—¿Há nuhyiin cjua xi chja me? Jercu cjín jyé riji cavincha me.

<sup>14</sup> Peru Jesús ne ha quihndé cafayanguiin me hisca ngu cjua. Hane Pilatu ne, jemu quijircun camahani rē me.

*Camá entregadu Jesús xi cjue cueya me*

<sup>15</sup> Tjin ngu xcusun xi nu nu ni, hya xi cumá nixtin rē suhi jan ne, tsismi gobernador ngu presu xi xuta vaxijin me. <sup>16</sup> Nixtin hya ne, jiya ngu presu xi jemu tjin cjua tséhé, Barrabás hmí rē cha. <sup>17</sup> Ngajan xi camá xi hya xi camatangun xutacjín ne, ngajan cavinenguisse Pilatu xuta cuitjin:

—¿Jaré cha xi meje nuju xi tsisme? ¿Há Barrabás ne? ¿Há Jesús xi Mesías xu?

<sup>18</sup> Cuatjin cachja me cojo xuta ta tséhé xi ha vëé me xi ngatsé ni rē cjuaxin sahmi nahmi xi matitjun jan cojo Jesús, vëhé xi casahmi me entregadu xi meje rē me xi cueya.

<sup>19</sup> Hora xi tijimá vë, tacun Pilatu xcun silla hiscan vejña me hora xi vitexa me, ngajan xi chjuun rē me ne, catsingatju na cjua xi cuitjin chja: “Caninguisuunjnúu cjuacjintacun tséhé cha vë xi tyjahi cjuatacun rē cha, ta nguchjin ne ngajñi nijña naha jemu cjín xcusun xi chocun camá ná chini ngatsé rē cha.” Cuatjin fi cjua xi catsingatju na.

<sup>20</sup> Hya xi camá ne, nahmi xi matitjun cojo xuta changá jan jemu cachja me cojo sa xi cama cuinchahaxi me xuta xi cjuehya xuta Pilatu jan xi tsismi me Barrabás ne, tsiquehen me Jesús. <sup>21</sup> Ngajan cachja nga gobernador cuitjin:

—Tséhé jo cha vë ne, ¿jaré cha xi meje nuju xi tsisme?

Ngajan cafayangui xutacjín jan cuitjin:

—Nismu Barrabás.

<sup>22</sup> Sehe cachja nga Pilatu cuitjin:

—Sá cuatjin ne, ¿mé xi sahme cojo Jesús xi Cristu xu?

Ngajan xi cafayangui yëjé xutacjín jan cuitjin:

—¡Tetuhun cha xcun cru!

<sup>23</sup> Ngajan xi cachja Pilatu cojo rē me ta:

—Peru ¿mé xi rcu jyé casahmi cha?

Peru xutacjín ne hitsé sa hñu cajindaya me cachja me cuitjin:

—¡Tetuhun cha xcun cru!

<sup>24</sup> Hya xi camachaya rē Pilatu xi sahmi cuendaain xuta xi chja me ta tu hitsé sa tijima ngu sué jyé ne, cafehya me nandá sehe cavane me tsja me xcun xutacjín jan. Sehe cachja me cuitjin:

—Quitjeen jyé tséhé cjuaveya rē cha vihi ta, tsajin jyé rē cha. Vëhé ne, ha chaha nuju vëhé.

<sup>25</sup> Hya xi camá ne, yëjé xutacjín jan ne, ngu tangun ni cafayangui me cuitjin:

—Tséhé cjuaveya rē cha vëhé ne, chanijijjin cojo quihndi ni. —Cuatjin cachja me.

<sup>26</sup> Hya xi camá ne, catsismi me Barrabás, peru casahmi me xi Jesús ne casehen rē me sehe casua Pilatu me xi cjue cueya me xcun cru.

<sup>27</sup> Hya xi camá ne cha sindadu xi vitexa gobernador ne, quiji cojo cha Jesús taha cahntsua ndava gobernador jan. Hane sehe casahmitangun sa cha yëjé sindadu cjín. <sup>28</sup> Hya xi camá ne, cavaxé cha tsjian rē Jesús, hane sehe catsicaja cha me ngu tsjian hani. <sup>29</sup> Hacuaha catsihya cha ngu corona nahyá sehe cavesun cha rcu Jesús hane cavisengui cha ngu bastón tsja me. Hya xi camá ne, cavixuhnchi cha xcun me, catsixcuehyu cha me, cuitjin cachja cha:

—¡Viva! Me xi matitjun tséhé xuta tjé rē Israel.

<sup>30</sup> Hacuaha cavëhënatya cha me, hacuaha cafaha cha bastón jan xi yaha tsja me hane cavaja cha rcu me. <sup>31</sup> Hya xi camá xi cuatjin catsixcuehyu cha me ne, cafahaxin cha tsjian hani jan, catsicaja nga cha me tsjian rē me. Hya xi camá ne, sehe quijicojo cha me xi cuetaha cha me xcun cru.

*Casetaha Jesucristu xcun cru*

<sup>32</sup> Hya xi cavetjun cjuicojo sindadu Jesús ne, cavechutaha cha ngu me xi hmí rē Simón tséhé nandya Cirene. Sehe sindadu jan ne, casahmi cha nguyjé xi cuaniji me cru jan.

<sup>33</sup> Hane xi cafehe cha cojo Jesús hiscan xi hmí rë Gólgota, cjua xi meje cuichja Naxi Nínda Rcuun. <sup>34</sup> Hya xi camá ne, casua cha me xan rë uva xi tecjan rë nandá rë tyjungunsa xi cuihi Jesús. Peru xi cavutaha me hitsë ne, cahviin me.

<sup>35</sup> Ngajan xi sindadu jan ne, xi cavatju casetaha me xcun cru ne, sehe cafaha cha tsjian rë me hane cavaxë cha suerte tsëhë ne, jarë cha xi satë rë cha jima ngu tsjian. <sup>36</sup> Sehe ngajan ne cavejñataha cha cavutsejensun cha Jesús xcun cru. <sup>37</sup> Hacuaha camahindu ngujo cjua xi casetaha xcun cru ngatihin rcu Jesús sacuaaha xcusun rë me xi setaha xujun jyë rë xuta, hane cuitjin chja cjua jan: “Jesús, me xi Matitjun Tsëhë Xuta Israel.”

<sup>38</sup> Hacuaha cavityanguí cha ngu chëjë ngu ngu ladu tjeheh rë me, jima ngu cojo cru rë. <sup>39</sup> Hya xi camá ne, xuta xi cavatju jan ne, catsixcuehyu me Jesús ne, catsitjiya rcu me, hacuaha cuitjin cachja me:

<sup>40</sup> —Ngaye xi ha canoje xi cuma ninguetin yungun xi matitjun, hane cahntsua xi jyan nixtin ne; cama nga canindeje ngu. Quihndë ne, sá cuatjin cuma nihñi ne, naxetje sove yojo riji. Sá xi Quihndi Jain rë Nina ngaye, titujni tsëhë cru vë.

<sup>41</sup> Ha chuya vëhë ni ne, nahmi xi matitjun ne cojo cha vicuya cjuachacun rë ley cojo xuta changá ne cachja me cuitjin:

<sup>42</sup> —Cavaxëtje xu cha xuta, peru quihndë ne, cumaji cuaxëtje suva cha yojo rë cha. Sá xi hacui jain cha xi Matitjun Tsëhë Xuta Israel ne, catitujne cha tsëhë cru chutsejen, cojo sa xi cumacjain naja tsëhë cha. <sup>43</sup> Macjain xu rë cha tsëhë Nina, quihndë ne cataxëtje Nina cha sá xi Nina meje rë me cha; ta cachja cha ta: “Quihndi rë Nina, ngahan.”

<sup>44</sup> Hacuaha cha chëjë xi cojo caxtyanguí taha cru jan ne, cojo cha choho cachja cha tsëhë Jesús.

*Xcusun xi camá hya xi cahme Jesucristu*

<sup>45</sup> Hane hora vëhë ne, camajñu jinguyjë ni. Cavetsihin xi camanchisen ne, quiji cani rë hisca fane jyan. <sup>46</sup> Hya xi camá ne, jercu hñu camahani cachja Jesús cuitjin:

—Elí, Elí, ¿lama sabactani? -cjua vëhë meje cuichja ta: Ngayun Nina naha, mé má canismutacun ná.

<sup>47</sup> Hane ngujo xuta xi hinchacun jan ne, xi cajni rcu me hne jan hane cachja me cuitjin: —Tijindaya me profeta Elías.

<sup>48</sup> Hya xi camá ne, ngutjen ni, cavanga ngu me, quiji catsicahnchi me ngu tsjian hinda cojo xan rë uva xi ha sán, sehe cavetaha me rcu ngu ya nduju, sehe cavetaha me hntsua Jesús xi cuihingui me. <sup>49</sup> Ngajan xi yahnga xuta ne, cachja me cuitjin:

—Caveni tuhun. Cuinechanyan hitsë ne, ¿há cuinduva jain Elías cuaxëtje me cha?

<sup>50</sup> Hane Jesús ne, hora vëhë ne, jercu cajindaya nga me hane cahme me. <sup>51</sup> Hacuaha hora vëhë ni ne, tsjian nduju xi tyjanguí cahntsua yungun xi matitjun jan ne, hisca rcu hisca ntsacu canduva catiyavasen. Hacuaha cafani nangui. Hacuaha cavacjan ndoyojo. <sup>52</sup> Hacuaha hora vëhë ni ne, catuxaha tsjun rë nima, hane jemu cjín xuta xi tyjahi cjuatacun rë me xcun Nina ne, cavuya cjuahñu rë me. <sup>53</sup> Cavetjun xuta jan tsëhë tsjun. Hane hya xi ha cavuya cjuahñu rë Jesús ne, sehe cavisehen me nandya Jerusalén hane ngajan ne, cjín xuta ne, cavëë rë me.

<sup>54</sup> Hora xi cahme Jesús ne, cha capitán tsëhë cha sindadu cojo yahnga sindadu xi hinchacun me ngajan vutsejensun me Jesús ne, camachaya rë cha xi fani nangui cojo cjín xcusun sa xi cavatju camá. Hane jercu quijircun camaha ni rë cha. Hacuaha cachja cha cuitjin:

—Hacui jain me vihi xi Quihndi Jain rë Nina, me.

<sup>55</sup> Hacuaha ngajan ne, tsëhë cjín ne hinchacun cuaha cjín yachjin xi tivutsejen me. Yachjin jan ne quijitjengui me Jesús xi cuisecoo me Jesús, sahmi cuenda me. <sup>56</sup> Ngajñi yachjin jan ne, hinchajñi na xi cuicun vi: na María na Mágdala, hacuaha na María naa rë Jacobo cojo José, hacuaha cojo naa rë cha quihndi rë Zebedeo.

*Caseya nima Jesucristu cahntsua tsjun*

<sup>57</sup> Hya xi cajne hora ne, ngu cha nchina xi hmí rë José, ngu xuta Arimatea cha xi hacuaha xuta ladu rë Jesús cha. <sup>58</sup> Cha vëhë quiji cha xcun Pilatu, cafehya cha cahndë sá xi cuma cjuahaxin cha nima Jesús. Hane Pilatu ne, casua me cha cahndë. <sup>59</sup> Ngajan xi cafahatsja cha nima jan ne, sehe catsitjinguí rë cha tsjian tyjahi, sacuaaha xcusun rë me. <sup>60</sup> Sehe caveya cha nima cahntsua ngu tsjun xatsë rë suva cha xi ha casahmi cha xi camá catjuhngui rë taha naxi. Sehe catsindefajne cha ngu ndoyojo jyë xi cuechja rë tingotjo rë tsjun jan. Hya xi camá casahmi cha ne, quiji cha cojo xuta ra. <sup>61</sup> Peru na María na Mágdala cojo na María xi hacjahi ne, caviyujutaha na xcun tsjun.

*Cha sindadu siu cuidadu cha tsjun*

<sup>62</sup> Hya xi cumá nchujun ni ne, hya nixtin xi cjuahajenda rë me ne, hya camatangun nahmi xi matitjun cojo cha partidu fariseo sehe cachja cha cojo Pilatu. <sup>63</sup> Cuitjin cachja cha tsëhë Jesús:

—Nai, ngayin ne vitsjen niji xi hya xi chaja sa cueya cha cachja cha ndacha vë cuitjin: “Cahntsua jyan nixtin ne, cuya cjuahñu naha.” <sup>64</sup> Ngatsë rë vëhë ne, meje rë xi nihñu cuendun xi sehñu ndaja tsjun rë cha hisca xi ha cavatju jyan nixtin jan, cojo sa xi cumaji nduva cha ladu rë nima vë ne, cjuahaxin cha nima tsëhë tsjun jan, sehe cuichja cha xi cavuya cjuahñu rë nima. Cuatjin nihñu ta tsëhë xi sá xi cuatjin sahmi cha, hisca hitsë sa choho cuatjuun cumá.

<sup>65</sup> Ngajan xi cachja Pilatu cojo rë me cuitjin:

—Sacu nuju sindadu jan xi sahmi cuidadu rë tsjun, sehe tanguncujun ne, hacuaha ndaja techjunhñu tsjun vë hacutjin cuma xi nihñu.

<sup>66</sup> Sehe quiji me cojo sindadu jan, cavechjahñu me tsjun, cojo sa xi cumatsejen sa xi cuaxë cha nima, hacuaha caviyuju cha sindadu xi sahmi cuidadu rë.

## 28

### *Cavuya Jesucristu cjuahñu*

<sup>1</sup> Xi cavatju nixtin xi chjahájenda rë jan ne, xi tu casahasen ni tsëhë nixtin ngu tsëhë totje ne, na María na Mágdala jan cojo na María xi hacjahi ne, cavetju na quiji vutsejen na xcun tsjun rë nima Jesús. <sup>2</sup> Hya xi camá ne, jercu cafani nangui ta tsëhë xi canduvajne ngu ángel rë Nina tsëhë ngahnga. Hane ángel jan ne, quiji catsivahaxin ndyojo xi cavechja rë tingotjo rë tsjun jan, sehe cavejña xcun. <sup>3</sup> Ángel jan ne, sacuaaha ndihi chuhun ne, cuatjin jyihí ángel. Hacuaha tsjian rë ne, jemu tu tyava camahani jyihí, sacuaaha jyihí hnchan xi hmi rë nieve. <sup>4</sup> Xi camachaya rë me tsëhë ángel jan ne, jemu catsacjun sindadu xi siu cuidadu ngajan, hisca cafatsë hnchan cha hisca sacuaaha cahme yojo ra cojo chiracun. <sup>5</sup> Ngajan xi cachja ángel cojo yachjin xi siutaha jan cuitjin:

—Xicarcuun. Ha hvë xi Jesús vinchunsun me, me xi cavetaha xuta xcun cru. <sup>6</sup> Me vëhë ne, tsajin me nguehe ta cavuya me cjuahñu sacuaaha cachja me. Nduvun chutsujun cahndë hiscan cafaña me. <sup>7</sup> Quihndë ne tangun sanii ne, tuhuncuendun rë xuta ladu rë me cuitjin: “Ha cavuya cjuahñu rë me; hane cjue titjun me tsujun Galilea. Hane ngajan sacu xingueen.” Hindë ne, vëhë cjua xi cuichjá cojo nuju.

<sup>8</sup> Hya xi camá ne, cavetju quiji yachjin jan. Jercu quijircun rë na peru hacuaha jercu ndama rë na. Cuatjin quiji na xi suacuenda na xuta ladu rë Jesús tsëhë cjua xi cachja ángel. <sup>9</sup> Hane hora xi tifi na ndiya ne, Jesús ne cavechutaha me na jan, casua me na nina. Sehe chjuun jan ne, cafehetiña na tsëhë Jesús, caticjaxcun na cafaha na ntsacu Jesús hane cafaharcun na me. <sup>10</sup> Hya xi camá ne, Jesús ne, cachja me cojo na cuitjin:

—Xicarcuun. Tangun tuhuncuendun rë hermano naja, tinújun cojo me xi cjue me distritu Galilea. Hane ngajan sacu xingueen.

### *Cjua xi casua sindadu*

<sup>11</sup> Jinguýejë rë xi quiji yachjin jan ne, ngujo cha sindadu jan cavisehen cha nandya Jerusalén, casuacuenda cha nahmi xi matitjun tsëhë xcusun xi camá. <sup>12</sup> Sehe nahmi jan ne, hya xi ha camátangun me cojo xuta changá hane cavisiajmi cjin me tsëhë mé xi sahmi me. Hane xi cama chihin cjua ne, jemu cjín camahani tujún casua me cha sindadu jan, <sup>13</sup> hacuaha cachja me cojo sindadu cuitjin:

—Vihí cjua xi cuinújun ni. Cuinújun ta xuta ladu rë me ne, nguixun ne, hora xi catsuñufun ne, cafehe me. Hane tahahma ne catsichëjë me nima. <sup>14</sup> Hane sá xi cumachaya rë gobernador tsëhë cjua jan ne, ngayin ne, cuanguin cuinújin cojo rë me cojo sa xi cuijnecacun me tsajin mé sahmi me cojo nuju.

<sup>15</sup> Cuatjin camá xi cafahatsja cha tujún jan, hane cachja cha sacuaaha cavitexa nahmi jan. Cjua vëhë ne, cavitsojo ngajñi rë xuta nangui Israel. Hane cuatjin chja cjua hisca nixtin quihndë.

### *Jesús ne, casuaxa me xuta ladu rë me xi cjue cuichja me cjua rë Nina*

<sup>16</sup> Hya xi camá ne, xuta ladu rë Jesús xi má tengu me ne, quiji me distritu Galilea, hisca naxi xi cachja Jesús. <sup>17</sup> Hya xi camá ne, ngajan cavëë me Jesús ne, cafaharcun me me. Peru ngujo ni me macjaain rë me. <sup>18</sup> Ngajan xi camatiña Jesús tsëhë me, cachja me cojo me cuitjin:

—Ha cafahantsa ngahñu xi cumá sahme tu mé ni xcusun sá xi tsëhë ngahnga o sá xi tsëhë ngasunhndë. <sup>19</sup> Ngatsë rë ngahñu vëhë ne, tsingátju nuju ne, tangun jinguýejë rë nandya ngasunhndë, cuinújun cojo xuta jan cojo sa xi cuisehen me ladu naha. Catiseyanangui ñihi rë Nina Nahmi, cojo ñihi naha, Quihndi rë Nina, cojo ñihi rë Hasen rë Nina hora xi



xtenda me. <sup>20</sup> Hacuaha ticuyun rē me xi cuihndē me ne, sahmichihin me yējē xcusun xi cavitéxa nuju ngahan. Hane xi cuatjin ne, hacuaha cuitejñacuaha cojo nuju yējē ni hora hisca cuijnetaha nixtin rē ngasunhdē.

## Cjuandajyihí xí catsihindu San Marcos Tsèhè Jesucristu

*Juan ne, vitenda rè xuta ngajan ngu xín tsèhè nandya*

<sup>1</sup> Cuitjin cavetsihin cjuá tsèhè Jesucristu, me xí Quihndi rè Nina Jain.

<sup>2</sup> Isaías ne, ngu xutachanga xí cama cafaha cjuá rè Nina hacuaha cachja me cojo xuta hatsèè nixtin. Cuitjin catsihindu me, hacutjin cachja Nina cojo me:

Tsingátju titjun ngu cha xí cjuaha cjuá naha, cojo sa xí scuxaha cha cjuatacun rè xuta, tsèhè xí cjehe ngaye.

<sup>3</sup> Hane hiscan jemu xín tsèhè nandya ne, ngajan cuejña cha. Hane cuitjin cuichja cha:

“Sacuatjin matyjahi ndiya hya xí nduva ngu xuta rcun ne, cuatjin nihñu tyjahi cjuatacun nuju tsèhè xí cuinduva me xí matitjun tsajan.” Cuatjin cuichja cha.

<sup>4</sup> Sacuatjin jain catsihindu Isaías ne, cuatjin jain camá ta cafehe cha xí catsingatju Nina, cha xí hmí rè Juan, ngajan hiscan jemu xín tsèhè nandya. Casua cha camachaya rè xuta ta meje rè xí tsindeya me cjuatacun rè me hacuaha xtenda me, cojo sa xí tsinchataha Nina me tsèhè jyè rè me. <sup>5</sup> Hane jercu cjin xuta quijitjengui me cha, xuta tsèhè distritu Judea cojo nandya Jerusalén. Hane cavitenda cha me xí cavijacun jyè rè cojo Nina ngajan ndajyè Jordán.

<sup>6</sup> Tsjian rè cha Juan jan ne, tsja rè chu camellu camá. Cojo ngu cinturón chuxin quitaha cahntsua cha. Xí camá niñu rè cha ne, chu nchahva. Cojo tsjen rè chu tusen cahvi cha.

<sup>7</sup> Cuitjin cachja cha:

—Canduvá ngahan titjun. Peru sehe cuinduva ngu me xí hitsè sa vechu cjuatacun rè xí cumá ná ngahan, xí hisca chuxinxté rè me cumaji tsinguisseheru sahme tyjahi. <sup>8</sup> Ngahan ne, peru cavitenda ní nuju. Peru me vèhè ne, cueya me Hasen rè Nina cahntsua xahasen nuju.

*Jesús ne, caxtenda me*

<sup>9</sup> Sacuaha nixtin vèhè ne, cavetju Jesús tsèhè nandya Nasaret, distritu Galilea. Quijitjengui me cha Juan xí cuitenda cha me. Hane cavitenda cha me ngajan ndajyè Jordán. <sup>10</sup> Xí camá caxtenda me ne, xí tu tivetju me tsèhè nandan jan ne, cavèè me xí ngahnga ne tituxaha, hacuaha Hasen rè Nina ne, nduvajne sacuaha tsejen ngu paloma, quiji cavisehen cahntsua xahasen rè me. <sup>11</sup> Hacuaha canuhya rè ngu cjuá ngajan ngahnga xí chja cuitjin:

—Ngaye ne, quihndi naha ngaye. Jercu hmucacun ri. Jercu ndama ná ngatsè riji.

*Jesús ne, cafachuva xitsehen me*

<sup>12</sup> Ngajan xí Jesús ne, ngutjen ní quiji me ngajan ngu xín ta tsèhè xí Hasen rè Nina ne, cavaxèxin rè me. <sup>13</sup> Casetaha me ngajan xín yachan nixtin. Hacuatjin cojo Satanás quijitjengui rè me. Hane handasa jercu cavangui Satanás chuva rè xí choho sahmi Jesús ne, peru casahmii me. Hacuaha quiji ángel caviyujutaha xí cjuahacuenda rè me.

*Jesús ne, vetsihin me cojo xa rè me*

<sup>14</sup> Hacuaha camá nga ngu xcusun xí xuta xí matitjun ne, caveya me cha Juan ndavaya. Cavatju vèhè ne, sehe cavuya cafe nga Jesús distritu Galilea, cachja me cojo xuta cjuá rè Nina. <sup>15</sup> Cuitjin cachja me:

—Camatiña nixtin xí Nina ne, cuitexa me ngasunhdè. Vèhè xí meje rè xí nindeyun cjuatacun nuju hacuaha catamacjain nuju cjuá xí tichjá cojo nuju.

*Jesús ne, cajindaya me ñuju cha xí tsuva rè chu ti xí cuma cha ladu rè me*

<sup>16</sup> Nixtin xí catsuyihiya me hya ne, cavatju me tjehen laguna tsèhè Galilea. Hora hya ne, cavèè me cha Simón cojo cha Andrés hntsé cha. Titsingatjenya cha nahya ngajñi laguna jan, tsèhè xí ha tuxa xa vèhè sahmi cha. <sup>17</sup> Hane ngajan xí cachja me cojo cha ta:

—Nduvun cuanguen cojo ná. Hane cuicuyá nuju xí nuvun xuta xí cuisehen me ladu naja ngojo rè xí chu ti nuvun. —Cuatjin cachja me.

<sup>18</sup> Hane hora vèhè ní caviyuju cha nahya jan ne, quiji cha cojo me. <sup>19</sup> Ha xcun xí ha cjui Jesús cojo cha xí cuacun jan hitsè ní nguvan ne, cavèè me cha Jacobo cojo cha Juan hntsé cha, quihndi rè Zebedeo. Hincha cha cahntsua barcu, tifuyataha cha nahya. <sup>20</sup> Hane hacuaha cajindaya me cha. Sehe caviyuju cha nahmi rè cha xí hmí Zebedeo cojo mosu rè me ngajan cahntsua barcu. Sehe quiji cha cojo Jesús.

*Ngu cha xí jiya rè ngu xitsehen*

<sup>21</sup> Hya xí camá ne, cafehe me cojo catsiñuju cha xí cuacun vèhè nandya Capernaum. Hane hya xí cavechu nixtin xí chjahájenda rè ne, quiji me yungun, cavicuya me xuta.

<sup>22</sup> Hane xuta jan ne, quijircun rè me hacutjin vicuya Jesús ta, tsèhè xí tivicuya me sacuaha ngu xí matitjun jain, hacuain sacuatjin maestru xí vicuya ley rè xuta tsèhè nangui Israel.

<sup>23</sup> Hacuaha ha tu ñahñu canduva ngu cha xi jiya xitsehen cahntsua xahasen rë cha ngajan cahntsua yungun jan. <sup>24</sup> Hane cuitjin cajindaya cha:

—Ngayun ne, ¿mé cuenda nuju tsijin? ¿Há nduvun nicjun niji? Ngayun ne, Jesús tsëhë nandya Nasaret ngayun. Hacuaha hvë xi ngayun xi tsajin jyë nuju ngayun xi catsingatju nuju Nina.

<sup>25</sup> Hane Jesús ne, cachja cjan me cojo xitsehen xi jiya xahasen rë cha jan. Cuitjin cachja me:

—Jyuu nechin. Hacuaha tetjixin tsëhë cha vi.

<sup>26</sup> Xi tu cahmexcuen cha xi casahmi xitsehen ne, hisca cajindaya, hane cavetjuxin tsëhë cha. <sup>27</sup> Yëjë ni xuta jan ne, jemu quijrcun rë me, hisca cavisiajmi me cojo xicjin me cuitjin: —¿Mé nga xcusun vihi ni? Ngu cjua xatsë xi vicuya me vihi, ta hisca xitsehen, hacuaha hndë tsëhë me.

<sup>28</sup> Hacuaha marcu macjain canuhya rë tsëhë me jinguyëjë ni ladu tsëhë distritu Galilea.

*Jesús ne, sahmi me xi mandaja nahya rë Simón Pedru*

<sup>29</sup> Hya xi camá ne, cavetju me yungun jan, quiji me ndava cha Simón. Quiji me cojo cha Jacobo cojo cha Juan, hacuaha cojo cha Andrés hntse cha Simón. <sup>30</sup> Hane nahya rë cha Simón ne, jiña na xi hmu rë na cojo chíhinsuë. Hane ngutjen cachja cha cojo Jesús xi hmu rë na. <sup>31</sup> Ngajan xi quiji tiña Jesús hiscan jiña na, cafaha me tsja na, catsatsatjen me na. Hane hora vëhë ni, casejyu suë xi má rë na. Hisca cafaha cuenda na xi sinë me cojo xicjin me.

*Jesús ne, sahmi me xi mandaja xutacjín xi hmu rë*

<sup>32</sup> Hane xi cavetje tsuhi ne, jemu cjín xuta quijicojo me xuta hmu rë hiscan tacun Jesús, hacuaha cojo me xi hinchá xitsehen xahasen rë, <sup>33</sup> camatangun me cojo xuta nandya ngajan tingotjo ndihya. <sup>34</sup> Hane jemu cjín xuta hmu rë camandaja me xi casahmi Jesús, xuta xi má rë me tu mé ni chíhin xi má rë xuta. Hacuaha jemu cjín xitsehen cavaxëxin me tsëhë xahasen rë xuta. Hane casuaa in me cahndë xi cachja xitsehen ta tsëhë xi ha vëë rë me. Hane ngutjen cuichja ta me vëhë xi catsingatju Nina me.

*Jesús ne, sua machaya rë xuta cjua rë Nina ngajan yungun*

<sup>35</sup> Xi camá nchujuni, jñu sa nguitajñu cavisatjenhnga me. Hane cavetju me ndihya quiji me ngu cahndë hiscan xin. Hane ngajan cavisiajmi me cojo Nina. <sup>36</sup> Ngajan xi cha Simón cojo cha xi yahnga jan ne, cavanguise cha Jesús. <sup>37</sup> Hane xi casacu rë cha me ne, sehe cachja cha cojo me ta:

—Jemu cjín xuta cafahetjengui nuju me. —Cuatjin chja cha.

<sup>38</sup> Ngajan xi cachja me cojo cha ta:

—Cuanguen sa nandya xi siu tahndee, cojo sa xi hacuaha cuichjá cojo xuta vëhë cjua rë Nina ta tsëhë xi xa vëhë canduvá. —Cuatjin cachja me.

<sup>39</sup> Hane sehe quiji sa me yungun xi siu yëjë ni nandya tsëhë Galilea. Cachja me cojo xuta cjua rë Nina, hacuaha cavaxëxin me xitsehen xi hinchá xahasen rë ngujo xuta xi siu nandya jan.

*Jesús ne, sahmi xi mandaja ngu cha xi ma rë chíhin xi vitaha rë yojo naja*

<sup>40</sup> Hya xi catsujyihya me nandya xi cuacun vëhë, hya cachja ngu cha xi yaha rë ngu chíhin vitaha xi setaha chuxin naja. Hane cachjajyë cha cojo Jesús, hisca cavixcuhnchi cha xcun me, sehe cachja cha cuitjin:

—Sá xi nihñu favor ne, cuma naxunxun chíhin xi yaha ná.

<sup>41</sup> Jesús ne, camayuma rë me cha. Hane cavetahatsja me cha. Sehe cachja me cojo cha cuitjin:

—Joho. Ha camandaja ngaye. —Cuatjin cachja me.

<sup>42</sup> Hane ngutjen ni cavetjuxin chíhin jan ne, camandaja cha. <sup>43</sup> Hane sehe casua me cha cuidadu. Hane ngutjen ni catsingatju me cha, quiji cha. <sup>44</sup> Cuitjin cachja me:

—Ndaja cuidadu xi canujiin camahani xcusun vi cojo hisca ngu. Peru tihin ningacuin yojo rijí cojo nahmi ngajan yungun. Hane tejñi ngu cjuatjo sacuatjin chja ley tsëhë Moisés ta camandaja ngaye, cojo sa xi xuta ne, cumacjain rë me. —Cuatjin cachja me cojo cha.

<sup>45</sup> Peru xi cavetju cha quiji cha ne, cavetsihin casua cha camachaya rë xuta. Jercu cachjatë cha tsëhë xcusun vëhë. Vëhë xi Jesús ne, ha quihndë cavisin me nandya ta tsëhë xi ha ngutjen jercu tsë xuta. Hane ngajan ni nguifña casetaha me. Peru xuta ne, yëjë ni ladu cavetju me, quijitjengui me Jesús.

## 2

*Jesús ne, sahmi me xi mandaja ngu cha xi cahme yojo rë*

<sup>1</sup> Hane cahntsua xi ngujo nixtin ne, cavuya quiji nga Jesús cojo cha ladu rë me ngajan nandya Capernaum. <sup>2</sup> Hane xi casacu cjua xi tacun ndihya me ne, jercu camatangun xuta,

hisca tingotjo ndihya quitsë me. Hane sehe cachja Jesús cjuarè Nina. <sup>3</sup> Ngajan xi canduava ñujuu cha hiscan tacun Jesús, yahahnga cha ngu cha xi cahme yojo rë. <sup>4</sup> Hane xi maji ficojo cha cha hisca hiscan tacun Jesús, tsëhë xi jemu quitsë xuta ne, cavuxaha cha rcu ndihya quixi rë hiscan tacun me. Sehe ngajan catsinguissehen cha cha hmu rë jan cojo ni nachan xi quisun cha. <sup>5</sup> Hya xi cavëë Jesús hacutjin xi macjain rë cha me ne, sehe cachja me cojo cha hmu rë jan ta:

—Jyë riji tsan ne, ha camanchataha. —Cuatjin cachja me.

<sup>6</sup> Hora vëhë ne, hacuaha tivisiñuju ngujo cha maestru tsëhë ley, hacuaha taha titsingatahacacun cha cuitjin: <sup>7</sup> “¿Mé má cuitjin chja cha xi cuijyihí vi?, ta Nina tsixcuehyu cha. Tsajin yo xi cuma tsinchataha jyë rë ngu xuta ta suva ni Nina má sahmi me.” <sup>8</sup> Jesús ne, ha hisca vëë me cojo cjuatacun rë me xi cuatjin tsingatahacacun cha xi cuacún vë, hane sehe cavinenguise me cuitjin:

—¿Mé má cuatjin ningatuhuntacun cjuatacun vëhë? <sup>9</sup> ¿Jarë xi hitsë sa tsavi xi cuichjá cojo cha hmu rë vi? ¿Há xi: “Jyë riji ne, ha camanchataha?” O há tsajin ne, ¿há xi: “Tisatjinhngue ne, chjaye nijña riji, hane tjihin?” <sup>10</sup> Hindë cojo sa xi cumachaya nuju xi Nina cavitexa me ngahan xi tsinchátaha jyë rë xuta nguehe ngasunhndë ne, nguehe chutsujun hacutjin cuichjá cojo cha hmu rë vi.

Sehe cachja me cojo cha hmu rë cuitjin:

<sup>11</sup> —Tisatjinhngue tsan. Chjaye nijña riji ne, tjihin ndya riji. —Cuatjin cachja me.

<sup>12</sup> Ngajan xi cha hmu rë jan ne, ngutjen ni cavisatjenhnga cha, cafaya cha nijña rë cha, sehe café cha xcun ni ngayëjë xuta. Vëhë xi ngayëjë ni xuta jan ne, jemu quijircun rë me. Hacuaha cachja me ta:

—Jemu cjuarcun jain Nina. Vëhë xi cuatjin camá casahmi me. Cjëë camahani chaan xcusun sacuaha vëhë. —Cuatjin cachja xuta.

*Jesús ne, jindaya me Leví xi má me xuta ladu rë Jesús*

<sup>13</sup> Ngu nixtin nga ne, cavatju Jesús tjeheh laguna. Hane jemu cjin xuta quijitjengui rë me. Hane cavicuya me xuta jan. <sup>14</sup> Hane hya xi cjuí cjuí me ne, cavechu me hisca tacun cha Leví, quihndí rë cha Alfeo. Tacun cha ndihya hiscan faha cha xi machjitje tsëhë xi xteña. Sehe cachja Jesús cojo cha cuitjin:

—Cuanguen cojo ná.

Hya xi camá ne, cavetju cha, quiji cha cojo me.

<sup>15</sup> Cuitjin camá nga ngu nixtin jan, tijinë Jesús niñu ndava cha Leví. Hacuaha jemu cjin sa cha xi faha tujúnsa cojo jingu sa cha tsehen tijinë cha cojo Jesús cojo cha ladu rë me, ta hacuaha jemu cjin xuta xi cuacún vë xi tjengui rë me. <sup>16</sup> Peru cha maestru tsëhë ley cojo cha tsëhë partidu fariseo ne xi tu cavëë cha xi tijinë Jesús cojo cha xi cuacún jan ne, sehe cavinenguise cha cojo cha ladu rë me cuitjin:

—¿Mé má cuatjin tijinë Jesús cojo cha xi choho xcusun rë vë ni?

<sup>17</sup> Xi tu cahndë Jesús cjuarè cha ne, sehe ngajan xi cachja me cojo cha ngu ejemplu cuitjin: —Xuta xi hacuiin hmu rë me ne, mijí rë me doctor. Me xi hmu ni rë me ne, me vëhë xi mameje rë me. Hacuaha ha chuva vëhë ni canduvá ngahan. Canduvá cuanguë xuta xi choho cjuatacun rë, cuichjá cojo rë me cjuarè Nina. Peru hacuiin cojo me xi ha tyjahi cjuatacun rë. —Cuatjin cachja me.

*Vinenguise xuta tsëhë xun rë Nina*

<sup>18</sup> Camá xi cha ladu rë cha Juan cojo cha tsëhë partidu fariseo ne, nixtin hya ne siu cha xun tsëhë Nina. Hane cafehe ngujo cha xi cavinenguise rë Jesús cuitjin:

—¿Mé má cha ladu rë cha Juan cojo cha tsëhë partidu fariseo ne, tijinii cha quihndë ta, siu cha xun rë Nina, hane cha ladu nuju ne, faharcuiin cha cuatjin ni?

<sup>19</sup> Sehe catsicuya Jesús cjuarè cojo ngujo ejemplu cuitjin:

—Jinguyëjë rë xi cha xi cuixan ne, tacun cha cojo xuta rë cha ne, cumaji cuiyuju me xun rë Nina. <sup>20</sup> Peru cuinduva nixtin hya xi cha xi vixan ne, cojo cjuachan cjucojo condra rë cha cha. Hane hya cuiyuju xuta rë me xun rë Nina.

*Ejemplu tsëhë tsjian cojo chuxin xi xincha xan*

<sup>21</sup> Hacuaha cachja me cojo cha cuitjin:

—Tsajin yo xi fuyataha tsjian changá cojo ngu rquí tsjian xatsë ta tsëhë xi cjëë cjueyu. Cuatjin ta, sá xi cuatjin sahmi me ne, xi cjueyu tsjian xatsë jan ne, cuicheya rë tsjian xi changá jan hane sahmi jyë sa rë hiscan xi ntsun. <sup>22</sup> Hacuaha tsajin yo xi vinya xan xatsë cahntsua chuxin changá ta, sá xi cuatjin sahmi me ne xan jan ne, tsitsinga rë chuxin jan. Hane xan jan ne, chajan. Hacuaha cuetsun chuxin jan. Vëhë xi xan xatsë ne meje rë chuxin xi xatsë. Maji secjan jo xcusun.

*Cha ladu rë Jesús ne, fane cha trigu nixtin xi chjahájenda rë*

<sup>23</sup> Cuitjin camá nga ngu nixtin xi chjahájenda rë. Hora xi tivatju Jesús cojo cha ladu rë me hiscan tjin tjë trigu ne, cavetsihin cavotohosun cha tsë tsë trigu jan. <sup>24</sup> Sehe cha tséhë partidu fariseo cavinenguisse cha me cuitjin:

—¿Mé má cuatjin quihndë nixtin xi chjahájenda rë ne, sahmi cha ladu nuju xa xi chja ley xi cumaji nihña?

<sup>25</sup> Sehe Jesús ne, cafayangui me tséhë cha cuitjin:

—¿Há cjëë camahani chutayun xujun hiscan chja tséhë xcusun xi casahmi David hya xi tjin rë me cjuandya xi jemu vojo rë me cojo cha xi siutaha cojo me? <sup>26</sup> Hya xi Abiatar má me nahmi xi matitjun jan ne, hya cavisehen me ndava Nina. Hane David ne, cajiñë me pan xi viyuju xcun Nina. Hacuaha casua me cajiñë cha xi siu cojo me. Cuatjin casahmi me handasa xi chja ley ta suva ni nahmi tjin cahndë xi cuma sinë me pan xi cuacún vë. —Cuatjin cachja Jesús.

<sup>27</sup> Ngajan xi cachja me cojo cha ta:

—Xi má nuju ngayun ne, ¿há titjun cavejña Nina nixtin xi chjahájenda rë, sehe catsindaja me xuta xi cjuaharcun rë nixtin vëhë? ¿Hacuiin cuatjin camá! Nina ne, titjun catsindaja me xuta, hane xi camá ngascan ne, cavajña me nixtin xi cjuahajenda xuta. <sup>28</sup> Cuatjin ne, ngahan xi tséhë Nina canduvá ne, hacuaha satë ná ngahan sacuaha nai rë xi cuichjá mé xi ndatjin xi cuma nixtin xi chjahájenda rë. —Cuatjin cachja Jesús.

### 3

*Jesús ne, sahmi me xi cama ndaja ngu cha xi quixinhñu ngu ladu tsja cha nixtin sabadu*

<sup>1</sup> Ngu nixtin nga xi quiji Jesús ngu yungun ne, ngajan tacun ngu xihin xi quixihñu ngu ladu tsja cha. <sup>2</sup> Hane cha tséhë partidu fariseo ne, cojo sa xi cuma cuinchajyë cha Jesús ne, siu cha cuidadu, ¿há tsindaja Jesús hiscan hmu rë xihin jan nixtin xi chjahájenda rë? <sup>3</sup> Hane ngajan xi cachja Jesús cojo cha xi quixihñu tsja jan cuitjin:

—Xcun ni yëjë xuta vi ne, tisechin.

<sup>4</sup> Sehe cavinenguisse me xuta xi siu me cuitjin:

—¿Mé xi sacu cahndë nixtin xi chjahájenda rë? ¿Há xi ndaja ne, o há xi ndajin, há xi naxentjen xuta o há xi niqen me?

Peru cafayinnguini me hisca hitsë. <sup>5</sup> Vëhë xi Jesús ne, cama cjan rë me. Hacuaha cama vacacun me ta, tséhë xi sahmi yumahasen xuta. Xi tu cavutsejen Jesús yëjë ni xuta ne, sehe cachja me cojo xihin hmu rë jan cuitjin:

—Nixingun ntsun.

Xi tu catsixinga cha tsja cha ne, ha camandaja. <sup>6</sup> Ngajan xi cha tséhë partidu fariseo ne, cavetju cha yungun. Quiji casahmitangun cha cjua cojo cha tséhë partidu Herodes xi tsiquehen cha Jesús.

*Xutacjin xi camandaja me*

<sup>7</sup> Ngajan xi Jesús cojo cha ladu rë me ne, quiji nga me laguna. Hacuaha jemu cjín xuta tséhë distritu Galilea quijitjengui me Jesús. <sup>8</sup> Hane xi camachaya rë xuta xcusun xi casahmi Jesús ne, canduva camaha sa xuta tséhë cahndë xi cuicun vi: nandya Jerusalén cojo yëjë sa nandya tséhë distritu Judea, cojo distritu Idumea, cojo ngunda vëhë tséhë ndajyë Jordán cojo hisca tahndee rë nandya Tiro cojo nandya Sidón. <sup>9</sup> Sehe ngajan xi cachja me cojo cha ladu rë me ta meje rë xi cuejña cha ngu barcu tiña hiscan tacun me, ta jemu cuehncun xuta me. <sup>10</sup> Hane tséhë xi jemu cjín xuta camandaja me xi casahmi Jesús ne, vëhë xi yëjë ni me xi hmu rë catsëxti me ne, cojo sa xi ndastu satë tsja me Jesús. <sup>11</sup> Hane xi cavëë xitsehen xi híncha xahasen rë xuta jan Jesús ne, quiji caticja xuta jan hisca tacun Jesús. Sehe ña jindayatë xuta jan, ta xitsehen casahmi xi cachja me cuitjin:

—Ngayun xi Quihndi rë Nina ngayun. —Cuatjin cajindaya me.

<sup>12</sup> Ngajan xi Jesús ne, cavítexa me xitsehen xi tsajin yo cuichja cojo yo me.

*Jesús ne, vuxijin me tejó me xi cumá apóstol*

<sup>13</sup> Hya xi camá ne, camiji Jesús ngu naxi. Sehe catsingatju me cjua rë cha xi meje rë me. Hane quijitjengui cha me. <sup>14</sup> Hane cavaxijin me tejó cha xi cuisecoo rë me, hane hacuaha tsingatju me cha cjue cuicuya cha xuta cjua rë Nina, <sup>15</sup> hacuaha cuaxëxin cha xitsehen xi híncha xahasen rë xuta. <sup>16</sup> Cha xi tejó tséhë cha ladu rë me cuitjin hmí ra: cha Simón ne, hacui cha xi cachja Jesús xi hmí rë Pedru, <sup>17</sup> cha Jacobo cojo cha Juan hntsé cha ne, xi quihndi rë Zebedeo, cha xi casuañihi me Boanergerne, ngu ñihi xcuehyu xi meje cuichja Jemu Xtí Naja, <sup>18</sup> cha Andrés, cha Felipe, cha Bartolomé, cha Mateo, cha Tomás, cha Jacobo, quihndi rë Alfeo, cha Tadeo, cha Simón xi tséhë partidu cananayu, <sup>19</sup> hane cha Judas tséhë nandya Querrote, cha xi cuitëña rë Jesús cojo condra rë me.

*Jyë xi cumajin cumanchataha*

<sup>20</sup> Hya xi camá ne, cavuya quiji nga Jesús ndihya hiscan véjña me. Hacuanitjin nga camatangun xuta cjin. Hisca xi siné Jesús niñu cojo cha ladu rë me maji. <sup>21</sup> Hya xi camachaya rë xuta rë me cjuá vëhë ne, quiji me xi cuaxëxin rë me, tsëhë xi há sa má rë me, sca rë Jesús.

<sup>22</sup> Hane cha maestru tsëhë ley ne, canduva cha tsëhë Jerusalén. Sehe cavisiajmi cha cojo xicjin cha cuitjin:

—Jiya Satanás xahasen rë me. Hane ngatsë rë xitsehen xi matitjun vë ne, vëhë xi ma vaxëxin Jesús xitsehen. —Cuatjin cachja cha.

<sup>23</sup> Ngajan xi casahmi tangun Jesús cha xi cuacun vëhë ne, sehe cojo ngujo ejemplu cachja me cojo cha cuitjin:

—Jemu yuma hasen rë Satanás sá xi suva ni cuaxëxin xicjin. <sup>24</sup> Ha hyan ta sá xi xutaxa rë tsëhë ngu nandya scaan me ngajñi rë me ne, cjuicani rë me. <sup>25</sup> Hacua ha sá xi xuta xi ngu ndava me ne, scaan me ngajñi rë me ne, ngajan chaja. <sup>26</sup> Ha cuanitjin rë Satanás ta sá xi scaan cojo xicjin ne, ha quihndë cumachjiriin xi matitjun ta, tsëhë xi ha quihndë cuihndiin xicjin tsëhë.

<sup>27</sup> Hacuanitjin ne, hisca ngu cha chëjë cumaji tu cuisehen ni cha ndava ngu xuta xi hñu ngahñu rë me xi tsichëjë cha tsëhë me. Cumaji sa xi hacuiin titjun tsihñu cha me ta cuatjin xi cuma tsichëjë cha tsëhë me.

<sup>28</sup> Cuichjá cojo nuju cjuaquixa ta tu mé ni jyë xi sahmi xuta hacua ha tu mé ni cjuá xi choho cuichja me ne, sacú rë me cjuaninchataha, sá xi cuijacun me jyë rë me cojo Nina. <sup>29</sup> Peru tu yo ni xi choho cuichja tsëhë Hasen rë Nina ne, tsajin ngu nixtin xi sacú rë cjuaninchataha ta jemu jyë jyë rë.

<sup>30</sup> Cuatjin cachja Jesús ta tsëhë xi cachja cha jan xi jiya xitsehen xahasen rë me.

*Naa rë Jesús cojo xicjin me*

<sup>31</sup> Hane cafehe naa rë me cojo hntse me ne, ngajan ni ndatsen hinchacun me ne, catsingatju me cjuá xi meje cuisiajmi me cojo Jesús. <sup>32</sup> Vëhë ta jemu cjin xuta siundee me Jesús ne, sehe cachja xuta cojo rë me cuitjin:

—Nutsujun ni. Ná nuju cojo tsuhun cojo tichjun ne, jindaya nuju me ngajan candatsen.

<sup>33</sup> Sehe cafayangui Jesús cuitjin:

—¿Yo xi má nuju xi ná naha cojo xingueen?

<sup>34</sup> Cavutsejen me xuta xi siundee rë me, sehe cachja me cuitjin:

—Ngayun xi nechun nguehe, ngayun xi sacua ha ná naha cojo xingueen <sup>35</sup> ta, tu yo ni xi sahmi sacuatjin chja Nina ne, vëhë xi sacua ha ná naha sacua ha xingueen.

## 4

*Ejemplu tsëhë cha xi tsitjë*

<sup>1</sup> Ngu ndiya nga ne, cavetsihin cavicuya Jesús xuta tjehe laguna. Hane ngu cuatjin nga jercu tu catsë camahani xuta hiscan tacun me. Vëhë xi cavisehen me ngu barcu cavéjña me. Hane quijicojo rë me hitsë xcun nandá, ngajan cavéjña. Hane yëjë ni xutacjin jan ne, caviyuju me nangui quixi tjehe nandan. <sup>2</sup> Sehe cavicuya Jesús me jemu cjin cjuá. Cuitjin cachja me ngu ejemplu:

<sup>3</sup>—Cuejña ni xi ngu xihin ne, quiji catsitjë cha trigu. <sup>4</sup> Hane hora xi ticandi cha tjë rë ne, ngujo ne, cavixu ndiya. Hane canduva nisë ne, cajinë chu. <sup>5</sup> Ngujo nga ne, cavixu hiscan xi jemu ndyojotë, hacua ha jemu chuva nihndë quisun. Hane jemu xati cavetju ta tsëhë xi hacuiin tjain nihndë quisun. <sup>6</sup> Hane xi jemu suë camá ne, caxiya tsëhë xi jemu chuva tyjama rë. <sup>7</sup> Ngujo nga ne, cavixu ngajñi rë nahyá. Xi tu camayehe nahyá ne, casahmihndë rë xitjë, hane camayiin. <sup>8</sup> Hane ngujo nga ne, cavixu hiscan ndajyihni nangui. Vëhë ne, jemu ndaja camá, hisca yehe hnga camá ya rë. Ngujo ne jemu ndaja camá. Ngujo nga jan ne, hitsë sa ndaja camá. Hane xi yahnga jan ne, jercu vatjutaha ndaja camá. Cuatjin fi ejemplu tsëhë cha xi tsitjë trigu.

<sup>9</sup> Jarë ngayun xi meje nuju cuma nuju ne, ningatuhuntacun nduju mé vijne cjuá vë.

<sup>10</sup> Hya xi café xutacjin jan ne, ngajan xi me xi siundee cuaha jan cojo cha xi tejó jan ne, cavinenguisse me tsëhë cuentu jan. <sup>11</sup> Sehe cafayangui Jesús cuitjin:

—Ngayun ne casua nuju Nina cahndë xi vijne rcun cjuatahahma tsëhë gobiernu xi sahmi me. Peru me xi hacuiin ladu naja ne, cojo suva ejemplu tichjá cojo rë me, <sup>12</sup> cojo sa xi handasa cuihndë me ne, peru cuijnii rcu me ta, sá tu tsindeya me cjuatacun rë me ne, hacua ha cumanchataha me. —Cuatjin cachja Jesús.

*Jesús ne, chja me mé vijne ejemplu tsëhë cha xi tsitjë*

<sup>13</sup> Sehe ngajan xi cachja Jesús cojo cha ladu rë me ta:

—Sá xi ha canuhyuun ejemplu vëhë ne, hacutjin cuinuhyun sa xi yahnga ni. Nguehe cuichjá cojo nuju mé vijne ejemplu xi cachjá cojo nuju vë. <sup>14</sup> Cha xi tsitjë trigu ne, sacua ha

ngu cha xi chja cjuarë Nina cojo xuta. <sup>15</sup> Ngujo me xi vihndë cjuarë vëhë ne, sacuaaha tjë rë trigu xi cavixu ndiya ta cjuarë ndajyihî xi vihndë me ne, ngutjen ni nduva Satanás ne, fahataha cjuarë caseya cahntsua xahasen rë me. <sup>16</sup> Yahnga nga me xi vihndë cjuarë vëhë ne, sacuaaha tjë xi cavixu hiscan jemu ndyojotë ta hya xi vihndë me cjuarë ndajyihî ne, ngutjen ni jemu cojo cjuasua macjain rë me cjuarë. <sup>17</sup> Peru tsëhë xi hacuini nguñaja cacun me macjain rë me ne, vëhë xi seyaain cahntsua xahasen rë me hya xi má cjuandya, sacuaaha cumá rë tjë xi jemu chuva tyjama rë ne ta, cain rë xi jyë nixtin. <sup>18</sup> Hane ngujo nga me xi vihndë cjuarë vëhë ne, sacuaaha tjë xi cavixu ngajñi nahyá. Vihndë me cjuarë. <sup>19</sup> Peru tsëhë xi jemu tjin rë me cjuandya hacuaaha jercu meje rë me xi cuma nchina me, vëhë xi chuva cuenda sahmi me cjuarë ndajyihî xi cavisiñuju me. Fë ne, tsajin mé vetjucaa. <sup>20</sup> Ngujo nga me xi vihndë cjuarë ndajyihî vëhë ne sacuaaha tjë xi camatjë hiscan ndajyihî nangui ta xi tu vihndë me cjuarë vëhë ne, faha nguñajacacun me. Vëhë xi ngujo me ne, ndaja cuiyujuchihin cjuatacun rë me. Ngujo nga me ne, hitsë sa ndaja cuiyujuchihin cjuatacun rë me. Hane me xi yahnga jan ne, jercu tu ndaja camahani cuiyujuchihin cjuatacun rë.

*Ejemplu tsëhë lámpara*

<sup>21</sup> Hacuaaha cachja me cojo rë me cuitjin:

—Hya xi setaha rë candil ne, ¿jani cueña? ¿Há ngahma caxa ne? o ¿há ngahma nachan? Hacuini cuatjin nihñu ta, cueña cahndë rë. <sup>22</sup> Sacuaaha ndaja tsejen ndihi jan ne, hatuxa cuechu nixtin xi cuijne rcu xuta cjuarë naha xi hacuini ndaja vijne rcun me quihndë. <sup>23</sup> Jarë ngayun xi meje nuju cumá nuju ne, ningatuhuntacundujun mé vijne cjuarë vë. <sup>24</sup> Hacuaaha cachja sa me cojo xutacjin cuitjin:

—Ndaja tetuhuncun xi tivisiñuju. Chuva xi tuhun ne, ha chuva vëhë sua nuju Nina. Hisca quisun sa sua nuju me. <sup>25</sup> Me xi ha tjin rë ne, sua sa Nina me, hane me xi tsajin cjin rë ne, cjuahataha Nina xi tjin rë me.

*Ejemplu tsëhë tutjë xi majyë*

<sup>26</sup> Sehe cachja Jesús cojo xutacjin jan ngu ejemplu cuitjin:

—Xuta xi cuisehen me ladu rë Nina ne, ha tuxa cumá cjin me sacuaaha tjë tsëhë trigu xi tsitjë ngu xihin xcun nangui rë me. <sup>27</sup> Fañafë cha nguixun ne, visatjenhnga cha nguítajñu. Hane tjë ne, vetju, hacuaaha mayehe xitjë. Peru xihin jan ne, hvíin hacutjin camá xi camayehe xitjë jan. <sup>28</sup> Nangui ne, ha tuxa má xitjë. Titjen ne, cuetju xca rë. Xi cuijin sa ne, cuetju tú chihndë rë. Hiscan xi cuijnetaha ne, jemu cjin tutjë rë cuetju. <sup>29</sup> Hane hya xi camacha tutjë rë ne, sehe tsingatju xihin jan mosu xi cjue cuatë ta tsëhë xi ha cavechu nixtin xi xti rë.

*Ejemplu tsëhë tutjë rë mostasa*

<sup>30</sup> Sehe cachja Jesús cuitjin:

—Nguehe cuichjá cojo nuju ngu nga ejemplu tsëhë gobiernu xi sahmi Nina. <sup>31</sup> Xuta xi cuisehen ladu rë Nina ne, cumacjin me sacuaaha majyë ngu ya mostasa. Tutjë rë ya vëhë ne, hitsë sa langa xi cumá rë yëjë ni tutjë xi tjin ngasunhndë. <sup>32</sup> Peru hya xi matjë ngu ne, sehe cuetju xca rë hacuaaha hitsë sa jyë má xi cuma rë yëjë ni xca xi chine. Hane tsja rë ne, hacuaaha yehe, hisca nisë ma sahmi chu ndava chu xcun tsja rë hiscan tjahnguen.

*Mé tsëhë xi Jesús ne, sahmixa me cojo ejemplu*

<sup>33</sup> Jemu cjin ejemplu sacuaaha vëhë cachja Jesús hya xi tivicyua me xuta cjuarë Nina, hatucutjin hora xi cama cavetaharcu xuta. Hane cojo xuta ne, cachja me suva ejemplu. <sup>34</sup> Peru hya xi suva siu cha ladu rë me ne, casua cuenda me cha mé vijne yëjë ejemplu jan.

*Jesús ne, tsisejyu me tjo cojo tsindyu rë laguna*

<sup>35</sup> Xi quiji hora tsëhë nixtin vëhë ne, Jesús ne, cachja me cojo cha ladu rë me cuitjin:

—Cuanguen ngunda vëhë. —Cuitjin cachja me.

<sup>36</sup> Ngajan xi caviyuju ni me xutacjin jan ne, sehe cha ladu rë me ne, quiji cha cojo me tu cuanitjin ni. Hacuaaha cojo sa barcu xi yahnga jan ne, quiji tangun cojo rë me. <sup>37</sup> Hora xi cjuu barcu ne, canduva ngu tjo xi jercu tu hñu camahani. Hane tsindyu rë laguna jan ne, vixuya cahntsua barcu, hisca meje tsë rë barcu cojo nandá. <sup>38</sup> Hane Jesús ne, hisca cahunchun barcu jan jñafë me, tjiña me xcun tsjian sanercu me. Hya xi camá ne, catsingasca cha me, sehe cachja cha cojo me cuitjin:

—Maestro. Xati nihñutacun catasca nuju. ¿Há tsajin mé cuenda nuju ta, meje xtyusehen barcu cojo naja?

<sup>39</sup> Hane cavaasca rë me ne, cachja me cojo tjo cojo laguna cuitjin:

—Jyuu nechun.

Xi tu cachja me cuatjin ne, casejyu yëjë ni. <sup>40</sup> Ngajan xi cachja me cojo rë cha cuitjin:

—¿Mé má cuatjin jemu rcun? ¿Hacujihi ni xi hisca cjëë cumacjain ndaja nuju ngahan?

<sup>41</sup> Hya xi camá ne, jercu catsacjun camahani cha ladu rë me jan. Hane sehe ngajni rë cha jan ne, cavisiajmi cha cuitjin:

—¿Yo me xi cuijiyihi vi? ta, hisca tjo hisca laguna hndë tsëhë me.

## 5

*Cha tsëhë nandya Gadara xi jiya ra xitsehen*

<sup>1</sup> Hya xi camá ne, cafehe Jesús cojo cha ladu rë me ngunda vëhë tsëhë laguna, hiscan ladu rë xuta nandya Gadara.

<sup>2</sup> Hane xi cavetju me barcu jan, canduva tiña ngu xihin xi hinchá xitsehen xahasen rë, canduva cha tsëhë ngajni rë tsjun ngajan tahndë. <sup>3</sup> Hacuaha ha ngajan tacun cahndë cha tahndë. Hacuaha tjiñhu cha xi sejuu cha hisca cojo cadena. <sup>4</sup> Jemu cjan rë cha, cjin ndiya camahñu tsja camahñu ntsacu cha cojo cadena, peru tu cavicheya ni cha. Vëhë xi tsajin yo xi cama casahmi cojo cha. <sup>5</sup> Catsujiyihiya cha nixtin nixten ngajan tahndë cojo ngajni nguiña cha. Hane cajindayatëcjin ni cha, hacuaha cavanguihmucjin ni cha yojo rë cha cojo nduhojo. <sup>6</sup> Hane hora xi cavëë cha Jesús ne, cjin sa nduva cha ne, vanga cha quiji cavixuhnchi cha xcun Jesús xi cjuaharcun cha me. <sup>7</sup> Ña cajindayatë cha cachja cha cuitjin:

—¿Mé cuenda nuju tsahan, Jesús, Quihndi rë Nina xi matitjun? Catamaniji rë Nina xi tuhundyun ná.

<sup>8</sup> Cuatjin cachja cha ta tsëhë xi ha tichja Jesús xi cuetjuxin xitsehen jan tsëhë xahasen rë cha. <sup>9</sup> Sehe cavinenguise me ñihi rë cha. Hane cafayangui cha tsëhë me cuitjin:

—Ñihi naha ne, Sindadu Cjin, tsëhë xi jemu cjin ngayin.

<sup>10</sup> Sehe jercu cafehya cha cojo Jesús xi hacuñin cjin camaha tsingatju me xitsehen jan tsëhë cahndë vëhë. <sup>11</sup> Jinguyëjë rë xi cuatjin tijima ne, ngajan tiñataha ne, tacun ngu cahndë hiscan chu chinga hinchataha chu tijinë chu. <sup>12</sup> Hane xitsehen jan ne, ña yuma chja cojo Jesús cachja cuitjin:

—Ningatjun niji hiscan siutaha chinga, xi cuisihin cahntsua xahasen rë chu.

<sup>13</sup> Hane Jesús ne, joho cachja me. Hane hora xi cavetju xitsehen xahasen rë xihin jan ne, quiji cavisehen cahntsua xahasen rë chinga jan. Sehe yëjë ni chinga jan, xi meje jo mil jan ne, cavanga chu quiji cavetje chu ngu ndetjun tsëhë rcu naxi hane ngajan cavixuya chu ngajni laguna. Ngajan camiji rë chu, hane cahme chu.

<sup>14</sup> Hane cha xi ticsicjën rë chinga jan ne, cavanga cha quiji cha. Casua cha camachaya rë xuta xi siutaha nguiña, cavechu hisca nandya cachja cha. Ngajan xi xuta xi cahndë cjuu jan ne, quiji cavutsejen me mé xi camá jan. <sup>15</sup> Cafehe me hisca tacun Jesús, hane cavëë me cha xi jemu cjin xitsehen caxincha xahasen rë, tacun cha, yaja cha tsjan rë cha, hacuaha ha quihndë tsajin mé má rë cjuatacun rë cha. Hane xuta jan ne, jemu catsacjun me camá. <sup>16</sup> Hacuaha xuta xi cavëë hacutjin cavatju cha camá hacuaha hacutjin cavatju chinga camá ne, cachja me cojo xuta xi yahnga. <sup>17</sup> Sehe cavetsihin cachja me cojo Jesús xi catje me tsëhë ladu rë me xi cuicun vi.

<sup>18</sup> Hya xi camá ne, hora xi tivisehen Jesús barcu ne, jercu cafehya cha xi caxincha xitsehen xahasen rë jan xi cjue cha cojo me. <sup>19</sup> Peru Jesús ne casuañin me cahndë xi cjue cha. Hane cuitjin cachja me cojo cha:

—Tjihin ndya riji. Tjihin tjengui xuta riji, hane tinoje cojo rë me xi Nina ne, camayuma rë me ngaye. Hacuaha tinoje tsëhë cjuandaja xi casahmi me cojo ri.

<sup>20</sup> Ha xcun xi cafë cahndë cha cjua xi cachja Jesús ne, sehe cavetju cha quiji cha ladu hiscan xi hmí rë Të Nandya. Hane cavetsihin cha casuacuenda cha cjuandaja xi casahmi Jesús cojo cha. Sehe xuta xi siu cahndë jan ne, jemu quijircun rë me.

*Jesús ne, sahmi me xi mandaja na chjuun xi ma rë xahmajni ndiya ndava Jairo*

<sup>21</sup> Xi tu cavuya nga Jesús cojo barcu ladu vihi tsëhë laguna ne, jercu catsë nga xuta hiscan cafehe me tjehen laguna. <sup>22</sup> Hacuaha cafehe ngu xutaxa rë yungun rë ngu nandya. Cha vëhë ne, Jairo hmí rë cha. Hya xi cavëë cha Jesús ne, quiji cavixuhnchi cha xcun me. <sup>23</sup> Sehe jercu cafehya cha favor cojo me. Cuatjin cachja cha:

—Quihndi naha ne, ha tu hora sa xi cueya na. Cuanguen ne, cuisanu ntsun na ne, cojo sa xi cumandaja na, hane cueñña sa na cjuahñu.

<sup>24</sup> Xi tu cahndë Jesús cjua rë cha ne, sehe quiji me cojo cha. Hacuaha jemu cjin camahani xuta quiji me hacutjin quiji Jesús. Quiji hnchun hnchun me cojo me.

<sup>25</sup> Hane ngajni rë xuta jan ne, jiyajni ngu chjuun xi ha nduva tejó nu xi hmu rë na tsëhë chíhin xahmajni. <sup>26</sup> Hane jemu jyë cjuañihi cavatju na camá ta ha ndasa jemu cjin doctor catsirqui me na, tu mahya catsicjë na tujún rë na ta tsajin mé cavetjucaa. Tu hitsë sa jyë camá chíhin rë na. <sup>27</sup> Xi tu cahndë na cjua tsëhë xcusun xi casahmi Jesús ne, quiji tiña na taha ngaxtun me, cavetahatsja na tsjan rë me. <sup>28</sup> Cuatjin casahmi na ta catsingatahacacun na cuitjin: “Sá xi cuetaha ntsa ndastu tsjan rë me ne, cumandaja ngahan.” <sup>29</sup> Hane ngutjen



ni caxiya jni xi vixu rë na. Hane hacuaha camachaya rë na ta camandaja na tsëhë chíhin xi má rë na. <sup>30</sup> Jesús ne, camachaya rë me xi tjin xa xi casahmi ngahñu rë me. Cavuya me taha ngaxtun me ne, cavutsejen me xuta jan ne, sehe cavinenguise me cuitjin:

—¿Yo xi casatëtsja tsjian naha?

<sup>31</sup> Sehe ngajan xi cha ladu rë me jan ne, cachja cha cojo me cuitjin:

—¿Hacutjin meje nuju xi cuinújin yo xi casahmi? ta ha chutsujun xutacjín xi ña tsatëtaha me ngayun ndya jan.

<sup>32</sup> Sehe cavutsejen nga me xuta tahndee rë me ne, ¿yo xi cuatjin casahmi? <sup>33</sup> Sehe chjuun xi casahmi jan ne ta ha vëe na hacutjin cavatju na camá ne, ña fatsë na xi catsacjun na camá. Sehe quiji cavixcuhnchi na xcun Jesús, hane cachja na yëjë ni hacutjin xi cjuaquixi.

<sup>34</sup> Sehe ngajan xi Jesús ne, cachja me cojo na cuitjin:

—Ha camandaja ngayun ta camacjain nuju. Tjangun cojo cjuasua ta chíhin vë ne, ha quihndë cuyaain suaxti nuju.

<sup>35</sup> Jinguyëjë rë xi Jesús tichja cuaha me ne, canduva ngujo me tsëhë ndava xutaxa rë yungun jan. Hane cuitjin cachja me:

—Ha cahme quihndi nuju. Tahannnyaan sa rë maestru.

<sup>36</sup> Peru Jesús ne, handasa cahndë me cjua xi cachja me xi cafehe jan ne, sehe cachja me cojo xutaxa rë yungun jan ta:

—Xi camacjiintacun. Ningatuhuntacun ni xi cumandaja na. —Cuatjin cachja Jesús.

<sup>37</sup> Sehe casuaain me cahndë xi cjue yëjë xuta jan. Suva ni cha Pedru, cha Jacobo cojo cha Juan hntsë cha Jacobo, cha vëhë quiji cha cojo me. <sup>38</sup> Xi cafehe me ndava xutaxa rë yungun jan ne, ngajan siu xutacjín xi jihnda me jindaya me ngatsë rë cjuandusin. <sup>39</sup> Hane xi cavisehen Jesús ndihya ne, sehe cachja me cojo xuta jan cuitjin:

—¿Mé má cuatjin va má ngayun chjihndun? Na lihndi vë ne, hacuiin cahme na ta jiñafë na. —Cuatjin cachja me.

<sup>40</sup> Sehe ngajan xi xuta xi siu jan ne, tu vejnucjëë me tsëhë cjua xi cachja Jesús. Sehe ngajan xi Jesús ne, catsitëë me xuta xi siu jan candatsen. Hane suva ni nahmi rë nima quihndi cojo naa rë cojo cha xi ticojo me cavisehen me cojo hiscan jiña. <sup>41</sup> Sehe cafaha me tsja nima quihndi jan ne, sehe cachja me cojo cuitjin:

—Talita cumi —cjua xi meje cuichja: Tichjá cojo ri, tsan, tsatjinhngue.

<sup>42</sup> Xi café cachja Jesús cuatjin ne, cavuya cjuahñu rë na lihndi jan hacuaha ngutjen ni cavisatjenhnga na catsujyihya na. Na lihndi jan ne, tejó nu tjin rë na. Hane me xi siu jan ne, jercu quijircun camahani rë me. <sup>43</sup> Hya xi camá ne, jemu cachja camahani Jesús cojo xuta rë na xi tsajin yo cuichja me cojo xcusun jan. Hacuaaha cachja me cojo xuta rë na xi sua me xi sinë na.

## 6

### *Jesús ne, fi nga me Nazaret*

<sup>1</sup> Hya xi cavetju Jesús tsëhë Capernaum ne, cavuya cafe me cojo cha ladu rë me nandya Nasaret, hiscan xi camacha me. <sup>2</sup> Hya xi cavechu nixtin xi chjahájenda rë ne, cavetsihin cavicuya me xuta ngajan yungun. Hane xutacjín xi tivisiñuju cjua rë Jesús jan ne, jemu quijircun rë me. Sehe cachja me ngajñi rë me cuitjin:

—¿Jani cavutaya cha xi cuijyihí vi cjua xi tichja cha? Jemu tjin rë cha cjuatacun. Hacuaaha jemu yehe cjuarcun sahmi cha. <sup>3</sup> Há hyan ngayaan xi cha vihi xi chjineya jan ni, cha xi quihndi rë na María. Hntsë cha ne, hacui cha Jacobo, cha José, cha Judas cojo cha Simón. Hacuaaha nandya naja tacun ndava tichja cha.

Hane jemu xti rë xuta jan, tsëhë xi ha vëë me Jesús. <sup>4</sup> Vëhë xi Jesús ne, cachja me cojo xuta jan cuitjin:

—Xuta ne, ha tuxa faharcun me ngu xihin xi suacuenda cjua rë Nina. Suva ni xuta rë xihin jan cojo xuta xi tangun nangui rë cojo, me vëhë xi faharcuaain me xihin jan.

<sup>5</sup> Ngajan ne, hacuiin cjín cjuarcun casahmi me, tsëhë xi macjaain rë xuta me. Tu cavisanetsja ni me ngujo xuta hmu rë, hane camandaja xuta hmu rë jan. <sup>6</sup> Hane Jesús ne quijircun rë me ta, tsëhë xi xuta jan ne, cuatjin camacaain rë me. Hane sehe quiji catsujyihya Jesús nandya tahndee rë jan, cavicuya me xuta.

### *Jesús ne, tsingatju me cha ladu rë me xi sua cha machaya rë xuta tsëhë gobiernu rë Nina*

<sup>7</sup> Sehe casahmitangun me cha xi tejó jan hane cavetsihin catsingatju me jo jo cha jima ngu ladu. Hacuaaha casua me cha ngahñu xi cuma cuaxëxin cha xitsehen. <sup>8</sup> Hacuaaha cachja me cojo yëjë ni cha xi tsajin mé xi cjuaha cha xi cjue cha. Suva ni ngu ya xi cuisecoo rë cha. Hacuiin niñu ne, hacuiin morra, hacuiin xi tujún. <sup>9</sup> Chuxinxhtë ni catincha ntsacu cha. Hacuaaha cuaain cha chingá. <sup>10</sup> Ngajan xi cachja me cojo yëjë ni cha cuitjin:

—Hya xi cjuhun ngu ndihya ne, xi cuisuhun ne, ha ngajan ni tinechun nguixun nguixun ni hisca xi cuetjun tsêhê nandya hiscan xi casatê nuju. <sup>11</sup> Tuyani ni xi tsingatiin nuju me hacuaha hisca cuisifiñijii me tsujun ne, tetjun tsêhê ngajan ne, tîtsunu chojo rê ntsacu. Vêhê cuma ngu seña tsêhê jyê rê me.

<sup>12</sup> Xi cajnetaha cachja Jesús cuatjin ne, sehe cavetju cha quiji cha hiscan xi casatê rê cha. Cachja cha cojo xuta xi tsindeya me cjuatacun rê me. <sup>13</sup> Hacuaha jemu cjin xitsehen cavaxêxin cha. Hane xuta hmu rê ne, aceite tsêhê tuxine xi hmí olivu catsufê cha xten me hane camandaja me jan.

*Cjuaveya rê Juan Vitenda rê Xuta*

<sup>14</sup> Me xi matitjun xi hmí rê Herodes ne, cahndê me cjua tsêhê Jesús, tsêhê xi xuta ne, jercu cachja me tsêhê Jesús. Hane ngujo me ne, cuitjin cachja me:

—Nima Juan, cha xi cavitenda rê xuta ne, ha ndasa cahme cha, peru cavascaya rê cha. Vêhê xi ma sahmi cha cjuarcun.

<sup>15</sup> Hane ngujo nga me ne, cachja me ta Jesús ne, hacui rê Elías, ngu xutachanga xi casuacuenda cjua rê Nina hatsêê. Hane cachja sa yahnga me ta Jesús ne, hacui rê ngu profeta, sacuaaha me xi casuacuenda xutachanga xi caviyuju titjun. <sup>16</sup> Peru Herodes ne, hya xi cahndê me cjua vêhê ne, sehe cachja me ta:

—Nima Juan má me. Catsingátju catisun rê rcu cha, hane cavuya rê cjuahñu rê cha. —Cuatjin cachja Herodes.

<sup>17</sup> Herodes ne, ha catsingatju me cachjaha rê cha Juan xi cjue cha ndavaya. Cuatjin casahmi me ngatsê rê na Herodía. Na vêhê cafaha Herodes, camá chjuun rê me ha ndasa xi ha chjuun rê cha Felipe hntsêjñu me má na. <sup>18</sup> Hane ngatsê rê vêhê, cuitjin cachja cha Juan cojo rê me:

—Chja ley ta ndajintjin camahani xi chjahan chjuun rê xingueen. Vêhê xi ngayun ne, ndajintjin xi cuatjin canihñu. —Cuatjin cachja cha Juan.

<sup>19</sup> Ngajan xi na Herodia ne, caveyacacun na cavutsejen na cha Juan. Hane meje rê na xi cueya cha. Peru camaji ta tsêhê xi <sup>20</sup> Herodes ne, cafaharcun me cha, tsêhê xi vêê me ta Juan ne, ngu xihin xi tyahi cjuatacun rê cha, hane cavêjña cha tsêhê Nina. Hane vêhê xi casahmi me cha cuidadu. Hacuaha hya xi Herodes cavisiñuju me cjua rê cha Juan ne, jercu cachuya rê me ha ndasa casecjan cjuatacun rê me. <sup>21</sup> Peru casacu rê na Herodía cahndê tsêhê xi meje rê na hya xi cavechu nixtin tsêhê suhi rê Herodes. Hya cachja Herodes cojo ngujo xutaxa rê ndihyavasen cojo me xi matitjun tsêhê sindadu, cojo sa ngujo xuta changá xi matitjun tsêhê distritu Galilea, xi cjue me ta casehenchjine ngu comida tsêhê suhi rê me. <sup>22</sup> Hane hora xi tijinê me ne, cavisehen na quihndi rê na Herodia, catê na. Hane jercu cachuya rê Herodes cojo me xi yahnga jan hacutjin catê na. Sehe ngajan xi Herodes, me xi matitjun jan ne, cachja me cojo na cuitjin:

—Tu mé ni xi meje ri ne, chjahye ná, hane suá ri. <sup>23</sup> Vêê Nina jain ta suá ri hisca vasentjin nandya xi siu ntsa. —Cuatjin cachja me.

<sup>24</sup> Xi tu cavetju na quiji na hiscan tacun naa rê na ne, cavinenguise na cuitjin:

—¿Mé xi ndatjin cjuéhya rê me?

Sehe ngajan xi chja naa rê na ta:

—Chjaye rcu cha Juan, cha xi vitenda rê xuta. —Cuatjin cavinchangui naa rê na na.

<sup>25</sup> Xi tu cavuya cavisehen na hiscan tacun Herodes ne, ngajan xi cachja na cuitjin:

—Meje ná xi ngutjen ni ne, cahntsua ngu tyuva ne tuhun ná rcu cha Juan. —Cuatjin cachja na quihndi jan.

<sup>26</sup> Ngajan xi Herodes ne, jemu choho camá rê me peru tsêhê xi hisca Nina caveyanangui me xi casua me cjua rê me, hacuaha tsêhê xi yêjê ni amigu rê me cahndê me cjua jan, vêhê sahmi xi má sava rê me tsindeya me cjua rê me cojo na. <sup>27</sup> Ngajan xi Herodes ne, ngutjen catsingatju me ngu sindadu hiscan jiya cha Juan. Hacuaha cavitexa me xi cuinduva cojo cha rcu cha Juan. Sehe ngajan xi cha sindadu jan ne, quiji cha ndavaya, cavatêsun cha rcu cha Juan. <sup>28</sup> Sehe caveya cha cahntsua tyuva, quijicojo cha. Xi cafehe cha cojo ne, casua cha na quihndi rê na Herodia. Hane sehe casua na naa rê na. <sup>29</sup> Sehe hya xi cahndê cha ladu rê cha Juan tsêhê mé xi cavatju cha cama ne, sehe quiji cha cafaha cha nima caveyaniji cha.

*Jesús ne, tsicjen me hñu mil xihin*

<sup>30</sup> Hya xi cajnetaha catsuyihiya cha apóstol xi catsingatju Jesús jan ne, cavuya camatan-gun nga cha cojo me. Sehe cachja cha hacutjin casahmi cha hacuaha hacutjin cavicuaya cha. <sup>31</sup> Sehe ngajan xi Jesús ne, cachja me cojo cha cuitjin:

—Nduvun suvun ni ne, cuanguen hiscan xín, chjahanjeyan hitsê.

Cuatjin meje cjue cjuahajeya me ta tsêhê xi jemu cjin xuta xi cjuí nduva me hiscan tacun Jesús. Hisca maxatiin jinê me niñu. <sup>32</sup> Sehe quiji me cojo cha ladu rê me cojo barcu ngajan hiscan xín. <sup>33</sup> Hane xuta jan ne, cavêê me xi cjuí me cojo cha ladu rê me. Hacuaha vêê me xi

hacui Jesús. Sehe xuta tsêhê nandya tahndee jan ne, cavanga me quiji me taha vêhê. Hisca tjun sa me cafehe me, sehe cafehe Jesús cojo cha ladu rê me. <sup>34</sup> Xi tu cavetju Jesús tsêhê barcu jan ne, cavêê me xi jemu cjín xuta siu me. Hane camayuma rê me xuta jan ta tsêhê xi siu me sacuaaha chu tsánga xi tsajin yo xi cjuahacuenda rê chu. Sehe cavetsihin cavicuya me xuta jan, jemu cjín cjuavavicuya me. <sup>35</sup> Hya xi ha quiji hora jan ne, ngajan xi cachja cha ladu rê me cojo me ta:

—Nguehe ne jemu xín camahani. Hacuaha jemu quiji hora. <sup>36</sup> Ninguijnutuhun cjuavavicuya xutacjín vi cojo sa xi catji me nandya xi siu tiñataha, hane catatsê me xi sinê me. —Cuatjin cachja cha.

<sup>37</sup> Hane cuitjin cafayangui Jesús:

—Tuhun ngayun xi sinê me.

Sehe ngajan xi cachja cha ladu rê me cuitjin:

—¿Hacutjin sacú niji xi sinê me xi cuarcu cjín me? Xi cuatjin cjín pan chihin ne, meje miji chji rê jo cientu mosu. —Cuatjin cachja cha.

<sup>38</sup> Sehe cachja Jesús cuitjin:

—Tangun chutsujun ¿há cjín pan tjin ngajñi nuju ngayujun ni?

Xi tu cavêê cha há cjín pan tjin ra ne, sehe cachja cha cojo me cuitjin:

—Hñú pan, cojo jo ti má.

<sup>39</sup> Sehe ngajan xi cachja Jesús cojo cha ta catichja cha cojo xuta, catiyuju me xcun ndiji, ngujo ngujo me ngu ngu cahndê. <sup>40</sup> Hane caviyuju me ngu cientu me ngu cahndê, o vasen cientu ngu cahndê hisca xi cafê yêjê me caviyujuchihin me. <sup>41</sup> Sehe Jesús ne, cafaha me xi hñu pan cojo jo ti jan, cavutsejenniji me ngahnga ne, casua me nacuechji rê Nina, sehe cavotoho langa me pan jan. Hane casua me cha ladu rê me xi sua cha sinê xuta. Hacuaha cojo catsijo ti jan cavatêcja Jesús xi sinê xuta. <sup>42</sup> Jercu caxuva pan cojo ti jan. Hane yêjê ni me cajinê me hacutjin xi cachuya rê xahasen rê me. <sup>43</sup> Xi cavatju cajinê xuta jan ne, sehe cafaya cha pan cojo ti xi cafiin jan ne, hane catsinguitsê cha tejó chajne cojo. <sup>44</sup> Me xi cajinê pan jan ne, hñu mil má me xi xihin. Hacuaha xin má yachjin cojo langa xi cajinê me.

*Jesús ne, fi ntsacu me xcun ndachacun*

<sup>45</sup> Ngajan xi Jesús ne, catsingatju me cha ladu rê me cojo barcu jan xi cjue titjun ni cha ngunda vêhê, hiscan nandya Betsaida, jinguyêjê rê xi tsinguijnetaha me cjuavavicuya xuta. <sup>46</sup> Hya xi camá catsinguijnetaha me cjuavavicuya jan, sehe camiji me ngu ndetjún xi cuisiajmi me cojo Nina. <sup>47</sup> Hane hora xi camá nguixun ne, barcu jan ne, vasencia laguna cjui. Hane Jesús ne, tacun suva cuaha me nangui quixí. <sup>48</sup> Hacuaha cavutsejen me ta jemu chja tivatju cha xi cjui cha cojo barcu, tsêhê xi tjo ne, taha hiscan cjui cha ne, ngajan nduva. Hane xi tiña sahasen ne, camatiña Jesús tsêhê cha, cjui me xcun nandan. Hane cuatjin cjui me sacuaaha xi meje cuatjutaha me cha. <sup>49</sup> Xi tu cavêê cha xi cjui me xcun nandan ne, catsingatahacacun cha ta nima xi meje cuincharcun rê cha. Hane jercu cajindayatê cha, <sup>50</sup> tsêhê xi catsacjun cha xi cavêê cha me. Hane ngutjen ni cachja Jesús cojo cha cuitjin:

—Xi carcuun.

<sup>51</sup> Hane sehe cavisehen Jesús barcu hiscan siu cha. Hora vêhê ne, casejyu tjo. Ngajan xi jemu quijircun camahani rê cha ta, <sup>52</sup> ha ndasa cavêê cha cjuarcun xi casahmi Jesús cojo pan jan ne, peru cajni rcu cha, tsêhê xi vechiin cjuatacun rê cha.

*Jesús ne, sahmi me xi mandaja xuta xi hmu rê tsêhê nandya Genesaret*

<sup>53</sup> Xi quiji sa me cojo barcu ne, cafehe me tjehen laguna, tiña nandya xi hmí Genesaret. Hane ngajan catsihñu me barcu. <sup>54</sup> Hya xi cavetju Jesús tsêhê barcu ne, cavêê xuta ta hacui Jesús. <sup>55</sup> Hane xuta jan ne, marcu macjain quiji me yêjê ni ladu tsêhê nandya jan, xi quiji jaha me xuta hmu rê, caviyuju me xcun Jesús. <sup>56</sup> Hane tuyani ni xi quiji Jesús, há nandya langa ne, há nandya hñu, o há xi ranchun, caviyuju me xuta hmu rê hiscan ndetsin. Sehe cafehya me cojo Jesús xi ndastu satêtaha xuta hmu rê jan tsjian rê Jesús. Hane yêjê ni xuta hmu rê xi casatê tsjian rê Jesús ne, camandaja me.

## 7

*Jesús ne, chjataha me cha fariseo*

<sup>1</sup> Ngujo cha tsêhê partidu fariseo cojo ngujo cha maestru tsêhê ley ne canduva cha tsêhê nandya Jerusalén quiji cha ngajan hiscan tacun Jesús, ngajan camatangun cha. <sup>2</sup> Xi cafehe cha ngajan ne, cavêê cha xi ngujo cha ladu rê Jesús ne tjin sa jyê rê tsja cha ne, tijinê cha niñu ta cavani cha tsja cha. <sup>3</sup> Hane cachuyiin rê cha ta tsêhê xi ngayêjê ni xuta nangui niji ne, sahmi nguýê xi cuane me tsja me sehe sinê me niñu. Yaha me xcusun rê xutachanga niji. <sup>4</sup> Hacuaha hisca sa xi fehe me xi fi me ndetsin ne, sá xi cjêê cuane me tsja me ne, sinii me niñu. Hacuaha jemu cjín sa xcusun rê xutachanga niji xi yaha me ta sacuaaha xi ha tyjahi

trasti ne, cuane nga me. Hacuaha cuanitjin sahmi me cojo nachan. <sup>5</sup> Ngajan xi cha tsêhê partidu fariseo cojo cha maestru tsêhê ley ne, cachja cha cojo Jesús cuitjin:

—¿Mé má cuatjin sahmiichiin cha ladu nuju ley rê xutachanga naja? ta, tsêhê xi vanii cha tsja cha xi jinê cha niñu.

<sup>6</sup> Ngajan xi cafayangui Jesús cuitjin:

—Ngayun ne, jo xcun jo ntsuvun yun. Jemu quixi cjua xi catsihindu Isaías tsujun xcun xujun rê me sacuatjin cachja Nina xi xuta ne, jemu ndacha me. Cuitjin fi cjua jan:

Xuta xi cuicun vi ne, ndaja chja me tsahan, peru xi cojo xahasen rê me ne, hisca tsinguitsjiin me ngahan.

<sup>7</sup> Tu mahya xi faharcun ná me ta

xi vicuya xicjin me ne, hacuiin cjua naha cuicuya me ta, tu cjua rê xuta.

<sup>8</sup> Cuanitjin ngayun ta nismutacun cjua rê Nina, hane hitsê sa tivetuhuncun xcusun rê xutachanga naja.

<sup>9</sup> Cachja sa me cuitjin:

—Xi má nuju ne, jemu ndatjin casacuse nuju hacutjin vejñuxun cjua rê Nina cojo sa xi nihñuchuhun xcusun rê xutachanga naja. <sup>10</sup> Moisés ne, cuitjin catsihindu me hacutjin xi cachja Nina xi nihña ngayaan xuta rê me: “Chjuhuncun ná nuju, chjuhuncun nahmi nuju”, hacuaha: “Yo xi choho chja tsêhê xutacha rê ne, xuta ne tsiquehen rê.” <sup>11</sup> Peru ngayun ne, cjuatacun rê xutachanga naja vicuyun ta, nújun ta ngu cha ne cuma cuichja cha cojo xutacha rê cha cuitjin: “Ha quihndê cumaji cuisecoo nuju ta yêjê ni xcusun xi tjin ná ne, ha cavejñá tsja Nina.” <sup>12</sup> Hane xi cuatjin cuichja cha ne, ha quihndê sahmi nguyjê xu xi cuisecoo cha xutacha rê cha. <sup>13</sup> Xi cuatjin ne, ha camachjiriin nuju cjua rê Nina ta, nihñu sacuaa xcusun rê xutachanga naja, hacuaha vicuyun rê jingu sa. Hacuaha cjin sa xcusun ndacha sacuaa vêhê nihñu. —Cuatjin cachja Jesús cojo maestru jan.

<sup>14</sup> Hacuaha cajindaya Jesús xuta xi cumatangun me. Hya xi camá ne cuitjin cachja me cojo:

—Ngayujun ngarcun ni ne, tinuhyun cjua xi cuichjá vi. <sup>15</sup> Xcusun xi vixuya cahntsua xuta ne, hacuiin vêhê tsitsehen rê me ta, cjuatacun xi nduva rê me ne, vêhê tsitsehen rê me. <sup>16</sup> Jarê ngayun xi meje nuju xi cumá nuju ne, tetuhuncun.

<sup>17</sup> Xi cavatju cachja me vêhê ne, caviyuju xuta ngajan ne, sehe cavisehen me cojo cha ladu rê me cahntsua ndihya. Ngajan xi cha ladu rê me ne, cavinenguise cha me tsêhê cjua vêhê. <sup>18</sup> Ngajan xi cachja me cuitjin:

—¿Há hisca ngayun cajni rcun cjua xi cachjá ni? Nguêhe cuichjá cojo nuju mé vjine cjua vêhê. Cuma xinêê yêjê xcusun comida ta tsajin ngu xcusun xi jinê xuta xi cuma tsitsehen rê me <sup>19</sup> ta xi sinê me ne, hacuiin cahntsua xahasen rê me cju ta cahntsua me. Fi ne vetutaha ndatsen.

<sup>20</sup> Hacuaha cachja sa Jesús cuitjin:

—Cjuatacun xi nduva tsêhê xahasen rê xuta ne, vêhê tsitsehen rê me ta, <sup>21</sup> tsêhê xi xi nduva tsêhê xahasen rê me ne, cjuatacun tsehen, sacuaa yachjin xi viteña yojo rê, sacuaa jyê tsêhê xi sahmi me chjuunnahñu rê me jingu sa chjuun, cojo cjuachêjê, cojo xi tsiquehen xicjin, <sup>22</sup> cojo xi jercu meje rê me cjuanchina, cojo xi sahmi me cjuatsehen, sahmi me cjuandacha, choho sahmi me, tjin rê me cjuaxin, sahmi me cjuachjataha, tjin rê me cjuaxihin, sahmi me cjuangarca. <sup>23</sup> Yêjê cjuatsehen xi cuacun vêhê ne, nduva tsêhê xahasen rê xuta, hane vêhê tsitsehen rê me.

*Ngu chjuun xi xutaxin má na ne, camacjain ran Jesús*

<sup>24</sup> Xi cavetju me tsêhê distrito Galilea, cafe me ladu tsêhê nandya Tiro cojo nandya Sidón. Xi cafehe me ngajan ne, cavisehen me cahntsua ngu ndihya, tsêhê xi mijí rê me xi scuêjê xuta xi cafehe me. Peru camaji cavejñahma me. <sup>25</sup> Xi cafehe Jesús ngajan ne, ngutjen camachaya rê naa rê ngu na xi jiya xitsehen cahntsua xahasen rê na. Hane quiji na cavixcuhnchi na xcun Jesús xi cjuaharcun na me. <sup>26</sup> Na vêhê jan ne, xutaxin na, na ladu tsêhê distrito Sirofenisia, hacuiin na xuta tjê rê Israel. Hane cafehya na cojo Jesús xi cuaxê me xitsehen xi jiya cahntsua xahasen rê na quihndi rê na. <sup>27</sup> Hane xi cafayangui Jesús tsêhê na jan ne, cuitjin cachja me ngu ejemplu cojo rê na.

—Sechiye ni, catijnetaha catjinê nixti ta hacuiin ndatjin xi chjahatahan niñu tsêhê nixti hane sehe tahan rê naña.

<sup>28</sup> Ngajan xi naa rê na hmu rê jan ne, cuitjin cajnercu na xi tichja me tsêhê xuta tjê rê Israel cojo xutaxin. Hane cafayangui na cuitjin:

—Nai. Quixi xi nújun, peru naña xi siu ngahma maxê ne, sacu xi vixuhya hntsua nixti, sehe jinê chu.

<sup>29</sup> Hane sehe cachja Jesús cojo rê na cuitjin:

—Ndatjin xi canoje. Quihndë ta cuatjin ne, cuma cjuihin ta xitsehen xi caseya cahntsua xahasen rë na quihndi riji ne, ha cavetjuxin.

<sup>30</sup> Xi cavuya café na ndava na ne, quihndi rë na ne, ha jyuu jiña na hacuaha xitsehen xi caseya cahntsua xahasen rë na ne, ha cavetjuxin.

*Jesús ne, sahmi me xi mandaja ngu cha xi loho hacuaha lihmi cha*

<sup>31</sup> Sehe cavetju Jesús ladu tséhë nandya Tiro, cavatju me nandya Sidón cojo ladu xi hmí Të Nandya, vëhë cafehe me laguna tséhë Galilea. <sup>32</sup> Hane cafehecojo nga xuta ngu cha xi loho hacuaha lihmi cha. Hane cafehya xuta jan cojo Jesús xi cuetahatsja me cha, sehe cumandaja cha. <sup>33</sup> Ngajan xi Jesús ne cavaxëxin me cha tséhë ngajñi rë xuta ne, sehe caviyujutaha me rcu tsja me ngu ngu ladu ngojo tyjavañuju cha. Hane hacuaha cavëhënatya me rcu tsja me sehe cavetaha me neje cha. <sup>34</sup> Hya xi camá ne, cavutsejenniji me ngahnga hane cafëcacun me. Sehe cachja me cuitjin:

—¡Efata! —cjuu xi meje cuichja: ¡Nuxuhunyun!

<sup>35</sup> Hane xi tu cachja me cuatjin ne, catuxaha tyjavañuju cha xi loho. Hacuaha hora vëhë ni ne, camá ndandaja cachja cha. <sup>36</sup> Sehe ngajan xi cachja Jesús cojo xuta xi tsajin yo cuichja cojo me xcusun vëhë. Peru xuta jan ne, hitsë sa jercu cachjatë me tséhë xcusun xi casahmi Jesús. <sup>37</sup> Jercu quijircun camahani rë xuta. Cuitjin cachja me:

—Tu mé xcusun ni jercu ndaja sahmi Jesús. Xuta xi loho ne, vihndë sahmi me, hacuaha xuta xi lihmi ne, sahmi me xi ma chja.

## 8

*Jesús ne, tsicjen me ñuju mil xihin*

<sup>1</sup> Nixtin hya ne, hacuaha jercu cjin xuta siu me hisca tacun Jesús. Hane tséhë xi tsajin camahani mé xi sinë me ngajan ne, vëhë xi Jesús ne, cajindaya me cha ladu rë me, sehe cachja me cojo cha cuitjin:

<sup>2</sup> —Jemu yuma má ná xutacjin vi ta ha quihndë jyan nixtin hinchataha me cojo naja, hane ha quihndë tsajin camahani mé xi sinë me. <sup>3</sup> Sá xi tsingátju me cjue me xi cjëë sinë me niñu ne, cjuaha rë me hinda ndiya. Ngujo xuta xi cuicun vi ne, jemu cjin canduva me. —Cuatjin cachja me.

<sup>4</sup> Sehe ngajan xi cha ladu rë me ne, cafayangui cha tséhë me cuitjin:

—¿Jani cuma sacú naja xi sinë xuta vi ta nguehe ne, jemu xin camahani tséhë nandya?

<sup>5</sup> Ngajan xi cavinenguise Jesús cojo cha cuitjin:

—¿Há cjin pan tjin nuju?

Ngajan xi chja cha ta:

—Yatu má.

<sup>6</sup> Ngajan xi Jesús ne, cavitexa me xutacjin jan xi cuiyuju me nangui. Xi café xuta caviyuju me nangui ne, sehe cafaha Jesús pan jan sehe casua me nacuechji rë Nina. Hane cavotoho langa me pan jan, casua me cha ladu rë me xi cuiyuju cha sinë xutacjin jan. Hane cuatjin casahmi cha. <sup>7</sup> Hacuaha tjin ra ngujo ti. Hane Jesús ne casua me nacuechji rë Nina tséhë ti jan, hane sehe cachja me cojo cha ladu rë me xi sua cojo ti jan sinë xuta. <sup>8</sup> Xi camá cajinë xuta jan ne, jemu ndaja camá rë xahasen rë me. Hane xi cafaya cha ladu rë Jesús xi cavangui cajinë xuta jan ne, catsë yatu nisinya. <sup>9</sup> Xuta jan ne, sacuaha chuva rë ñuju mil má me. <sup>10</sup> Hane hisca xi cajnetaha cjuandaja vëhë ne, sehe catsingatju Jesús xuta, café xuta ndava me. Hya xi camá ne, cavisehen me barcu cojo cha ladu rë me, hane cavuya me ngunda vihi taha ladu rë hiscan xi hmí rë Dalmanuta.

*Cha fariseo ne, fehya cha seña*

<sup>11</sup> Xi cafehe me ngajan ne, hacuaha cafehe cha tséhë partidu fariseo. Hane cavetsihin cha cavisiajmi cha cojo Jesús ta meje cjuahachuva cha me. Cafehya cha cojo rë me xi tsingacun me ngu cjuarcun xi nduva ngahnga, cojo sa xi scuëë cha xi Nina catsingatju jain rë me. <sup>12</sup> Ngajan xi Jesús ne, cojo cjuachohotacun ne, cachja me cojo cha cuitjin:

—¿Mé má cuatjin chjahyun xi sahme ngu cjuarcun xi nduva ngahnga? Cuichjá quixë cojo nuju ta hisca ngu xcusun vëhë ne, sahmee xi xcun cojo xcun.

<sup>13</sup> Ngajan xi caviyuju me cha xi cuacun jan ne, cavisehen me barcu cojo cha ladu rë me. Hane sehe cavuya quiji me ngunda vëhë tséhë laguna.

*Xcusun rë cha fariseo ne, visehetë cjuatacun rë xuta sacuaha sahmi san rë pan*

<sup>14</sup> Peru cha ladu rë me ne, cachaya rë cha xi cjuaha cha pan, hane cahntsua barcu ne, ngu tutu sa pan jiya ndaja. <sup>15</sup> Sehe ngajan xi chja Jesús cojo cha cuitjin:

—Nechun cuidadu cojo san rë pan tséhë cha tséhë partidu fariseo cojo cha ladu rë Herodes.

<sup>16</sup> Sehe ngajan xi cavisiajmicjin cha ngajñi rë cha cuitjin:

—¿Há tsèhë xi tsajin naja pan ne, há tsèhë vèhë xi cuatjin chja me?

<sup>17</sup> Xi camachaya rè Jesús xi veyanangui cha xi tsajin rè cha pan ne, cachja me cojo cha cuitjin:

—¿Mé má cuatjin nújun xi tsajin pan? ¿Há nuhyuun? ¿Há vijni rcon? ¿Há jemu taja rcon? <sup>18</sup> Tjin nuju túxcun hacuaha tjin tyjavañuju. ¿Mé má matsijin nuju? hacuaha ¿mé má nuhyuun? ¿Há vitsjijn nuju? <sup>19</sup> Hya xi cavótoho langa hñú pan ngajni rè xi hñú mil xuta, ¿há cjin chajne sa quitsë cachjayun tsèhë pan xi cavangui jan? —Cuatjin cavinenguise me.

Ngajan xi cafayangui cha ladu rè me ta:

—Tejó.

<sup>20</sup> —Hane hya xi cavótoho langa yatu pan jan xi cajiné ñuju mil xuta, ¿ha cjin nisinya sa cavangui?

Ngajan xi cha ladu rè me ne, cuitjin cachja nga cha:

—Yatu.

<sup>21</sup> Ngajan xi cavinenguise Jesús cojo cha cuitjin:

—¿Há cjëë camahani cuijne rcon cja xi cachjá tsèhë san rè pan?

*Jesús ne, sahmi xi cumatsejen rè ngu cha rcá ngajan nandya Betsaida*

<sup>22</sup> Hya xi camá ne, cavechu barcu tjehe laguna. Hane xi cavitujne me barcu ne, cafehe me nandya xi hmí Betsaida. Xi cafehe me ngajan ne, cafehe nga xuta cojo ngu cha xi rcá. Hane jercu cachja xuta jan cojo Jesús xi cuetahatsja me cha, hane sehe cumatsejen rè cha. <sup>23</sup> Hya xi camá ne, cafaha me tsja cha hane quijicojo me cha ngajan tjehe nandya. Xi cafehe me cojo cha ngajan ne, cavèhë natya me tuxcun cha hacuaha cavetahatsja me tuxcun cha, sehe cavinenguise me cha cuitjin:

—¿Há tsejen ri hitsë quihndë?

<sup>24</sup> Xi catsiquijin cha xcun cha cavutsejen cha ne, chja cha ta:

—Vutsejen xuta. Peru sacuaaha tsejen ya, cuatjin tsejen me xi cjui me.

<sup>25</sup> Ngajan xi Jesús ne, cavetahatsja nga me tuxcun cha. Sehe casahmi cha ngujoyë cavutsejen ndaja cha, hane camandaja cha, cumatsejen ndaja rè cha. Hane sehe catsingatju me cha cafe cha ndava cha. <sup>26</sup> Hacuaha cachja me cojo cha cuitjin:

—Xi cavisiin ngajni nandya xi cuinoje cojo xuta jan xcusun xi casahme cojo ri.

*Pedru ne, tsinguixi me xi Jesús ne, me vèhë xi Mesías me*

<sup>27</sup> Hya xi camá ne, cavetju nga Jesús tsèhë ngajan cojo cha ladu rè me ne, quiji me ngujo nandya xi siu tahndee rè nandya xi hmí Cesarea Felipe. Hane ndiya jiya me cojo cha ne, cavinenguise me cha cuitjin:

—¿Mé chja xuta, yo ngahan? —Cuatjin cachja me.

<sup>28</sup> Ngajan xi cafayangui cha ladu rè me cuitjin:

—Ngujo me ne, chja me ta ngayun xi cha Juan ngayun, cha xi cavitenda rè xuta. Ngujo nga me ne, chja me ta Elías. Hane ngujo nga me ne, chja me ta ngu profeta xi suacuenda cja rè Nina. —Cuatjin cafayangui cha.

<sup>29</sup> Ngajan xi cachja nga Jesús cojo cha ta:

—Hane ngayun ne, ¿mé nújun? ¿Yo ngahan?

Ngajan xi cha Pedru ne, cuitjin cafayangui cha:

—Ngayun xi tjin cja xi tsingatju nuju. Ngayun xi Cristu.

<sup>30</sup> Ngajan xi Jesús ne, cavitexa me cha ta tsajin yo xi cuichja cha cojo tsèhë.

*Chja Jesucristu xi cueya me*

<sup>31</sup> Hya xi camá ne, cavetsihin cavicuya me cha tsèhë xi ha ndasa xi Cristu, Quihndi rè Xuta Jain má me ne, peru jemu cjin cjañihi cuatju me cumá ta tsingatiin xuta changá me, hacuaha tsiquehen xuta changá jan me, peru xi cjuë jyan nixtin ne, cuya nga me cjuahñu.

<sup>32</sup> Cja vèhë ne cachja quixi camahani me cojo cha. Ngajan xi cha Pedru ne, quijixin cha cojo Jesús. Sehe cavetsihin cachja cha cojo me xi ¿mé má cuatjin chja me? <sup>33</sup> Ngajan xi cavuya Jesús cavutsejen me hiscan siu cha ladu rè me. Sehe cachja me cojo cha Pedru cuitjin:

—Tihinxin ngaye Satanás, tsèhë xi ningatiintacuin ngaye sacuaaha tsingatahacacun Nina ta, ningatehetacuin sacuaaha ngu xuta.

*Hacutjin xi meje rè xi nihña xa cojo cjuahñu naja*

<sup>34</sup> Ngajan xi Jesús ne, cajindaya me xutacjin jan cojo cha ladu rè me xi cuinduva me hiscan tacun Jesús, sehe cachja me cuitjin:

—Sá xi tjin yo xi meje cuisehen ladu naha ne, meje rè xi nichuvun cjuatacun nuju, hane hacuaha tejñuhñu xahasen nuju xi cuanguncujun ndiya naha handasa xi cueyun xcun cru. <sup>35</sup> Yo ngayun xi mijí cuisuhun ladu naha tsèhë xi rcon xi cueyun ne, cahndë xi ndaja ne, nichujun xahasen nuju. Peru yo ngayun xi ngatsë naha o sá xi ngatsë rè cja rè Nina

cueyun ne, hacuiin nichujun xahasen nuju ta Nina ne, cuaxëtje me. <sup>36</sup> Mé ndaja cuma nuju xi sacu nuju yëjë xi tjin ngasunhdë, sá xi cueyun hane cuma nuju castigu, <sup>37</sup> ta sá xi cuaxintiin Nina xahasen nuju hya xi cueyun ne, ha quihndë tsajin rqui rê. <sup>38</sup> Yo ngayun xi ma sava nuju ngatsë naha o sá xi ngatsë rê cjuva naha nguehe xcun xuta tsehen xi manguaaincacun cojo cjuva rê Nina ne, hacuaha cojo ngahan xi canduvá tsëhë Nina ne, cuma sava ná ngahan ngatsë nuju ngayun, hya xi cuinduvá cojo cjuandajiyihi tsëhë nahmi naha ne, hacuaha cojo ángel xi vejña tsëhë Nina cuinduvá cojo.

## 9

<sup>1</sup> Hacuaha cachja sa Jesús cuitjin:

—Cuichjá quixë cojo nuju ta tecjan yahnga xuta nguehe xi hisca xi scuëë me xi cuitexa jain Nina ne, sehe cueya me.

*Cavindeya xcusun rê Jesús*

<sup>2</sup> Xi café jyun nixtin jan ne, quijixin Jesús ngu rcu hnga cojo cha Pedru cojo cha Jacobo cojo cha Juan. Xi cafehe me cojo cha ngajan ne, cavëë cha xi cavindeya xcusun rê me. <sup>3</sup> Tsjian rê me ne, ña seti tsejen, tsëhë xi jercu tu tyava camahani, hisca xi ngu xuta cumaji cuane me xi cuatjin tyava. <sup>4</sup> Hya xi camá ne, ha tu ñahñu camatsejen hasen rê Elías cojo hasen rê nima Moisés, tivisiajmi cojo Jesús. <sup>5</sup> Ngajan xi cachja cha Pedru cojo Jesús ta:

—Maestro, tu ma rê xi nguehe nechin cojo nuju ne, nihñi jyan puestu: ngu tsujun ne, cojo ngu tsëhë Moisés cojo Elías.

<sup>6</sup> Cuatjin cachja cha Pedru ta, sacuiyiniin rê cha mé sa cuichja cha ta tsëhë xi jercu catsacjun camahani cha camá. <sup>7</sup> Hora vëhë ne, canduva ngu yufi casahmi tjahnguen rê. Hane ngajñi rê yufi jan ne, canuhya rê ngujo cjuva xi cachja cuitjin:

—Cha vihi xi quihndi naha cha. Jercu hmucacun cha. Tinuhyun xi chja cha.

<sup>8</sup> Xi tu cahndë cha ladu rê Jesús cjuva vëhë ne, vutsejen nguehe vutsejen ngajan cha, hane suva sa Jesús tacun me xi cavëë cha.

<sup>9</sup> Xi tu tivitujne me tsëhë rcu naxi jan cojo cha ladu rê me xi quijicojo me jan ne, ngajan xi chja xu me cojo cha ta tsajin yo xi cuichja cha cojo xcusun xi cavëë cha. Xi cuatju cueya Quihndi rê Xuta Jain ne, cuya nga me cjuahñu, sehe hya cuichja cha. <sup>10</sup> Vëhë xi cavaha cha cjuva jan cahntsua xahasen rê cha. Ngajñi rê ni cha cojo xicjin cha cavisiajmijcin cha ¿mé vijne cjuva xi cuya nga me cjuahñu?

<sup>11</sup> Ngajan xi cavinenguise cha cojo Jesús cuitjin:

—¿Mé má cuatjin chja maestru tsëhë ley xi titjun Elías cuinduva me, sehe cuinduva me xi cuaxëtje naja?

<sup>12-13</sup> Ngajan xi cafayangui Jesús cuitjin:

—Quixi xi Elías cuinduva me titjun ta, me vëhë cuiyujuchihin me yëjë ni xcusun. Peru ha canduva me, handasa hacuiin cojo ñihi rê me ta cojo ñihi rê cha Juan. Hane choho casahmi xuta cojo me sacuatjin chja xujun rê Nina. Hacuaha chja xujun xi cuacun vëhë ta handasa xi Quihndi rê Xuta Jain ngahan ne, hacuanitjin ne jemu jyë cjuañihi cuátju hacuaha tsitjungui xuta ngahan.

*Jesús ne, sahmi xi mandaja ngu cha nixti xi jiya ra xitsehen*

<sup>14</sup> Xi tu cavuya cafehe Jesús cojo cha xi quijicojo me hiscan siu yahnga cha ladu rê me xi tejó jan ne, cavëë me xi tjercu siu xuta jan cojo ngujo cha maestru tsëhë ley siu me visiajmi me cojo cha. <sup>15</sup> Xi tu cavëë xuta jan xi cafehe Jesús ne, jemu quijircun rê me, vanga sanii me quiji cachja me nina cojo Jesús. <sup>16</sup> Ngajan xi Jesús ne, cavinenguise me cojo cha ladu rê me cuitjin:

—¿Mé xi visiajmu cojo xuta xi cuacun vë?

<sup>17</sup> Hane ngajan ngajñi rê xutacjin xi siu jan ne, cavetjujñi ngu me xi cachja me cuitjin:

—Maestro, canduvá cojo quihndi naha, tsëhë xi jiya xitsehen cahntsua xahasen rê cha. Hane tsëhë vëhë xi sahmi lihmi rê cha. <sup>18</sup> Hora xi faha xitsehen jan cha ne, ngutjen tsiticjahñu rê cha, hacuaha vaxë natyaxu hntsua cha, hisca tsijanerii nehñu cha jiña cha. Hane ngatsë rê vëhë ne, jemu jima ndaya cha. Hacuaha cachjá cojo cha ladu nuju xi cuaxëxin cha xitsehen tsëhë quihndi naha. Peru camaji cavaxëxin cha. —Cuatjin cachja me.

<sup>19</sup> Ngajan xi Jesús ne, cachja me cojo xuta xi siu jan cuitjin:

—¿Mé camá nuju ngayun xi macjaain camahani nuju? ¿Há jyë sa nixtin meje rê xi cuitejña cojo nuju? Nduvun cojo cha nguehe. —Cuatjin cachja me.

<sup>20</sup> Hya xi camá ne, cafehe xuta cojo cha hiscan tacun Jesús. Xi tu cavëë xitsehen jan Jesús ne, marcu macjain catsiticia rê cha nixti jan. Hane xi caticja cha ne, cavuya cavindefa cha cafaña cha. Hacuaha cavetju natyaxu hntsua cha. <sup>21</sup> Ngajan xi Jesús ne, cavinenguise me cojo nahmi rê cha cuitjin:

—¿Há tsëë xi cuitjin má rë cha?

Ngajan xi chja nahmi rë cha ta:

—Hisca cjuaquihndi rë cha, cuatjin má rë cha. <sup>22</sup> Jiya hora xi faha xitsehen jan cha ne, tsingatjeya rë cha xcun ndacahi. Tjin nga ne, tsingatjenya rë cha ngajñi nandan, ta meje tsiquehen rë cha. Vëhë xi sá xi tsejen xi ha hyun mé nihñu cojo cha ne, catamayuma nuju ngahan cojo quihndi naha, hane tiseacun niji.

<sup>23</sup> Ngajan xi cachja Jesús cojo nahmi rë cha ta:

—Há xa vë xi hvë. Sá xi macjain nuju ne, yëjë ni ne, cuma.

<sup>24</sup> Ngajan xi nahmi rë cha ne, ngutjen cachja me cuitjin:

—Tatá. Macjain ná. Peru tiseacun ná cojo sa xi cumacjain sa ná.

<sup>25</sup> Xi vutsejen Jesús xi jercu tijima tangun xuta ne, cacjan me cojo xitsehen jan. Cuitjin cachja me:

—Ngaye xitsehen loho lihmi, tetjixin tsëhë cha vi. Hacuaha ha quihndë cuyiin cuisihin cahntsua xahasen rë cha.

<sup>26</sup> Ngajan xi xitsehen jan ne, hisca cajindaya xi catsicuya catsindefa rë cha. Sehe cavetju quiji. Hane cha vëhë ne, jiña cahme cha. <sup>27</sup> Peru Jesús ne, cafaha me tsja cha catsisatjenhnga me cha, hane casecun cha.

<sup>28</sup> Hya xi camá ne, quiji Jesús cojo cha ladu rë me, hane cavisehen me cahntsua ndihya. Xi cavisehen me jan ne, sehe ngajan xi chja cha cojo rë me cuitjin:

—¿Mé má ngayin xi camaji canaxinxin xitsehen jan tsëhë cahntsua xahasen rë cha vë?

<sup>29</sup> Ngajan xi cachja Jesús cojo cha cuitjin:

—Cuatjin camá nuju ta tsëhë xi xitsehen xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxenxen.

*Jesús ne, cachja me ta cueya me peru cuya me cjuahñu*

<sup>30</sup> Hya xi camá ne, sehe cavetju me quiji me taha distritu Galilea. Hacuaha mijí rë me xi cumachaya rë xuta jani taha tsujyihya me ta, <sup>31</sup> tsëhë xi tivicuya me cha ladu rë me hacutjin cuatju me cumá. Cuitjin cavicuya me:

—Ha ndasa tsëhë Nina canduva Quihndi rë Xuta Jain ne, peru cjuaha xuta me ne, tsiquehen me me. Peru xi cjuë xi jyan nixtin ne, cuya nga me cjuahñu.

<sup>32</sup> Peru cha ladu rë me ne, vijniñ rcu cha tsëhë xi cueya Jesús, hacuaha cuya me cjuahñu. Hacuaha tsacjun cha cuinenguise cha me cjuajan.

*¿Yo xi hitsë sa matitjun?*

<sup>33</sup> Hya xi camá ne, cafehe me nandya Capernaum. Hya xi cafehe me jan ne, cavisehen me cahntsua ndihya hisca cuiyuju me. Sehe ngajan xi cavinenguise me cojo cha ladu rë me mé xi cavisiajmi cha cojo xicjin cha ngajan ndiya. <sup>34</sup> Hane tu jyuu ni caviyuju cha ta xi cavisiajmi cha ndiya jan ne, cuitjin cachja cha:

—¿Jarë ngayaan xi hitsë sa venguichji naja?

<sup>35</sup> Hya xi camá ne, quiji Jesús cavëñña me. Sehe ngajan xi cajindaya me yëjë tejó cha ladu rë me jan ne, sehe ngajan xi cachja me cojo cha cuitjin:

—Sá xi tjin ngu yun xi meje nuju xi cumatitjun ngayun ne, meje rë xi hacuiin jemu jyë nihñu yojo nuju hacuaha cuiseacun xingun.

<sup>36</sup> Hya xi camá ne, cafaha me ngu lihndi, cavejña me cavasencja, hane sehe cavataha me. Hane ngajan xi cachja me cojo cha cuitjin:

<sup>37</sup> —Jarë ngayun xi ndaja nihñu cojo ngu lihndi sacuaha vihi xi ngatsë naha ne, sacuaha xi ngahan ndaja nihñu cojo ná. Hacuaha jarë ngayun xi ndaja nihñu cojo ná ne, hacuiin ngahan ni ta, hacuaha cojo Nahmi naha xi catsingatju ná me, cojo me vëhë ndaja nihñu cojo rë me.

*Me xi hacuiin condra naja ne, ladu naja má me*

<sup>38</sup> Ngajan xi cachja cha Juan cojo Jesús cuitjin:

—Maestro, cahyin ngu cha xi tijima tivaxëxin xitsehen tsëhë xahasen rë xuta, hane xi sahmi cha ne, cojo ñihi nuju veyanangui cha. Peru tsëhë xi hacuiin cha ladu naja cha ne, canújin cojo cha ta ha quihndë sahmi cha cuitjin.

<sup>39</sup> Ngajan xi Jesús ne, cachja me cuitjin:

—Xi cavichecjin tsëhë cha ta xuta xi cuma sahmi me cjuandaja vëhë, sacuaha xi ngahan jain cavitéxa rë me ne, cumaji xi ngutjen choho cuichja me tsahan. <sup>40</sup> Xuta xi hacuiin choho vëë naja me ne, chuya rë me tsajan. <sup>41</sup> Cuichjá quixë cojo nuju ta yo me xi sua ngu vasu nandá siuhun, tsëhë xi vëë me xi xuta ladu naha ngayun, hacuaha vëë me xi ngahan xi catsingatju ná Nina ne, me vëhë ne, sacu rë me ngu cjuandaja xi sua Nina.

*Cjuatsavi xi ticojo rë xi cuixuya ngayaan xcun ngu jyë*



<sup>42</sup> Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsê sa ndaja tsêhê xuta vêhê xi xtyangui ngu ndyojo natsi nguisin me sehe ningatjeya rê me ngajñi ndachacun. <sup>43</sup> Hane sá xi cjuatacun nuju meje rê xi nihñu ngu jyê cojo ntsun ne, vengui sa chji rê xi chandunxun ntsun ta, jemu sa ndaja tsujun xi cuma yoho yun xcun Nina, xi cumá rê xi cuechun xcun xitsehen cojo ntsun ngajñi rê ndihi jyê xi tsajin nixtin hvo. <sup>44</sup> Ngajan cuinechun, hiscan xi cjuiin nuju cjuañihi ta ndihi ne, tsajin nixtin xi hvo. <sup>45</sup> Sá xi cjuatacun nuju meje rê xi nihñu ngu jyê jani xi cuangun ne, vengui sa chji rê xi chandunxun ntsacun ta, jemu sa ndaja cuechun xcun Nina xi yoho yun xi cuma rê xi cuechun xcun xitsehen cojo ntsacun. <sup>46</sup> Ngajan xcun xitsehen vêhê ne, cjuiin nuju cjuañihi ta ndihi ne, tsajin nixtin hvo. <sup>47</sup> Hacuaha sá xi cjuatacun nuju meje rê xi chutsujun xcusun xi ndajintjin xi chutsujun ne, chuhunxun tuxcun jan chandunxun, ta tsêhê xi hitsê sa ndaja tsujun xi sacu nuju cahndê ngajan hiscan sahmi Nina gobiernu handasa cojo ngu ni tuxcun xi cuma rê xi cojo catsijo tuxcun cuechun xcun ndihi xi sahmi castigu rê nima. <sup>48</sup> Ngajan xcun xitsehen ne, ngajan cjuiin nuju cjuañihi ta ndihi ne, tsajin nixtin hvo.

<sup>49</sup> Hya xi tsichuva Nina ngayêjê ni xuta há ndaja há ndajin casahmi me ne, me xi tsajin mé casahmi ne, Nina ne, jemu chuya rê me. Hya xi Nina cjuahatsja me ngu cjuatjo xi tahan rê me ne, sá xi cojo naxa sehen ndaja ne, jemu chuya rê me.

<sup>50</sup> Naxa ne, jemu ndaja. Peru sá xi cjuê xtya rê ne, machjiriin. Cjuandaja rê Nina ne, hacuaha jemu ndaja. Vêhê xi chjuhun cjuandaja rê Nina, teyun cahntsua xahasen nuju, hacuaha ndaja tinechun cojo xingun.

## 10

### *Jesús ne, fi nga me nandya Nasaret*

<sup>1</sup> Hya xi camá ne, cavetju Jesús tsêhê nandya Capernaum quiji me distritu Judea cojo ngunda ndajyê Jordán. Hacuaha jercu cjín nga xuta quijitjengui rê me. Hane sacuaha xcusun xi ha sahmi Jesús ne, cavetsihin cavicuya nga me xuta jan. <sup>2</sup> Hya xi camá ne, ngujo cha tsêhê partidu fariseo ne, quiji cha hiscan tacun Jesús. Vinenguisse cha me tsêhê xi ngu xihin, ¿há ndatjin xi tsismi chjuun rê? Cuatjin cachja cha ta tsêhê xi meje cjuahachuva cha me cojo cjuá rê me. <sup>3</sup> Ngajan xi cafayangui me tsêhê cha cuitjin:

—Moisés ne, xutachanga naja ne, ¿mé cavitexa naja me?

<sup>4</sup> Ngajan xi cafayangui cha tsêhê me cuitjin:

—Moisés ne, casua me cahndê xi ngu xihin ne, cuma cuejña cha ngu xujun tsja chjuun rê cha xi ha quihndê miji rê cha na. Hane xi cuatjin ne, cuma tsismi cha na.

<sup>5</sup> Sehe ngajan xi Jesús ne, cachja me cojo cha cuitjin:

—Ngatsê rê cjuataja rê xahasen nuju ne, vêhê xi Moisés ne, casua me cahndê xi cuatjin nihñu. <sup>6</sup> Peru hya xi casahmi Nina ngasunhndê ne: “Casahmi me xi chjuun xi xihin xuta.”

<sup>7</sup> “Vêhê xi ngu xihin ne, cuejña cha nahmi rê cha, hacuaha cuejña cha naa rê cha, <sup>8</sup> hane cumatangun cha cojo chjuun rê cha sacuaha ngu ni xahasen.” <sup>9</sup> Ha quihndê hacuiin jo ta sacuaha xi ngu ni xahasen. Hane tsêhê xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tsêhê xicjin me. —Cuatjin cachja Jesús.

<sup>10</sup> Ngajan xi hya xi Jesús tacun ndihya me cojo cha ladu rê me ne, cavinenguisse nga cha me ngu ndiya tsêhê cjuavisiajmi vêhê. <sup>11</sup> Ngajan xi cachja me cojo cha cuitjin:

—Yo xi tsismi chjuun rê hane cuixan cojo ngu sa chjuun ne, jemu jyê jyê rê xi cuatjin sahmi. <sup>12</sup> Hacuaha sá xi ngu chjuun tsismi na xihin rê na hane cuixan na cojo ngu sa xihin ne, hacuaha jemu jyê jyê rê na.

### *Jesús ne, tsinchacun me langa*

<sup>13</sup> Jingujêjê rê xi tivisiajmi Jesús cojo cha ladu rê me ne, cavetsihin tjemu canduva xuta cojo quihndi rê me, xi cuisanetsja Jesús nixti jan cojo sa xi sacú rê cjuandaja rê me. Peru cha ladu rê Jesús jan ne, cacjan cha cojo xuta jan ta, xi má rê cha ladu rê me ne, mahyiin rê Jesús. <sup>14</sup> Hya xi cavêê Jesús xi cuatjin sahmi cha ladu rê me ne, camacjan rê me cojo cha. Ngajan xi cachja me cuitjin:

—Tuhun cahndê catinduva tjengui suva ná nixti. Xi canichuun cahndê xi cuma rê ta, xuta xi sahmi me yojo rê me sacuaha ngu quihndi ne, xuta vêhê xi sahmi me sacuatjin vitexa Nina. <sup>15</sup> Cuichjá cojo nuju cjuaquixi ta yo xi meje cuisehen gobiernu rê Nina ne, cuma cuisehen peru sacuaha ngu quihndi. Sá sahmii cuatjin ne, cumaji cuisehen.

<sup>16</sup> Ngajan xi Jesús ne, cavataha me nixti jan. Hane hora xi cavisanetsja me ne, cachja me cjuandaja rê me cojo.

### *Ngu cha nchina ne, chja cha cojo Jesús*

<sup>17</sup> Hya xi camá ne, cavetju me quiji me jingu sa cahndê. Hane ndiya cjui me ne, vanga ngu cha cafehe cha cavixcuhnchi cha xcun me xi faharcun cha me. Sehe chja cha cojo me cuitjin:

—Ngayun maestro. Jemu ndaja ngayun. Nújun, ¿mé xi sahme xi cuma sacú ná cjuahñu xatsé? —Cuatjin cachja cha.

<sup>18</sup> Ngajan xi Jesús ne, cafayangui me tséhë cha cuitjin:

—¿Mé má cuatjin noje xi ndaja ngahan? Tsajin xuta xi ndaja suva ni Nina xi ndaja me. <sup>19</sup> Ha hye cjua xi cavitexa Nina: “Xi caniquiin xuta. Xi canihñi chjuun nahñu riji jingu sa chjuun. Hacuuiñ mé chjehehmi tséhë xuta. Xi canujiin cjuandesu tséhë xuta. Xi cavindachiin rë xuta. Chjehercuin nahmi riji hacuaha chjehercuin ná riji.” Véhë cjua xi cavitexa Nina.

<sup>20</sup> Ngajan xi cachaja cha cojo Jesús ta:

—Maestro, yějë cjua véhë ne, hisca cjuanixti naha ne, ha cahndë.

<sup>21</sup> Xi cahndë Jesús cjua rë cha ne, jemu cachuva rë me tséhë cha. Ngajan xi chja me cojo cha ta:

—Machaja sa ri ngu xcusun. Tjihin ne, titeñi yějë xi tjin ri hane tujún xi sacú ri ne, tehe rë xuta yuma. Hane sehe ndovetjengui ná. Sá xi nihñi cuatjin ne, xi cjujehe xcun Nina ne, ngajan sacú ri cjuanchina xi ndajyihí.

<sup>22</sup> Xi cahndë cha cjua véhë ne, jemu choho camá rë cha. Va va má cacun cha, cavetju cha cafe cha ta, tséhë xi jemu nchina cha.

*Jesús ne, chja me tséhë cjuanchina*

<sup>23</sup> Ngajan xi Jesús ne, vutsejen me yějë ni ladu hiscan siu cha ladu rë me ne, sehe cachja me cojo cha cuitjin:

—Jemu chja tséhë ngu xuta nchina xi cuisehen me ladu rë Nina.

<sup>24</sup> Ngajan xi cha ladu rë me ne, jemu quijircun rë cha xi cuatjin cachja me. Ngajan xi cachja nga Jesús cojo cha cuitjin:

—Compañeru, jercu chja tséhë xuta xi cuisehen me ladu rë Nina. <sup>25</sup> Sacuatjin rë naxin xi cumaji cuatju chu ngojo rë nindu ne, cuatjin rë xuta xi jemu meje rë me cjuanchina ta, cumaji cuisehen me ladu rë Nina.

<sup>26</sup> Xi cahndë cha ladu rë me cjua véhë ne, jemu quijircun camahani rë cha. Ngajan xi cachja cha ngajñi rë cha cojo xicjin cha:

—¿Peru yo ni xi cuma cuetjutje ni?

<sup>27</sup> Xi cavuya me vutsejen me hiscan siu cha ne, ngajan xi cachja me cuitjin:

—Yějë ni xi maji sahmi xuta ne, Nina ne, hatuxa ma sahmi me.

<sup>28</sup> Ngajan xi cavetsihin cachja cha Pedru cojo Jesús cuitjin:

—Chutsujun ni. Ngayin ne, canismitacuin yějë ni xcusun, hane cavisihin ladu nuju.

<sup>29</sup> Ngajan xi cachja Jesús ta:

—Cuichjá quixë cojo nuju ta, tu yo ni xi tsismicacun ndava, tsismicacun hntsé, tsismicacun tichja, tsismicacun naa rë o sá nahmi rë o sá quihndi rë, hacuaha tsismicacun nangui rë xitjé rë ngatsé naha cojo ngatsé rë cjua rë Nina ne, jinguyějë rë xi ngasunhdë vihi tacun me ne, <sup>30</sup> sacú rë me ngu cientu sa quisun tséhë ngu ngu xcusun xi catsismicacun me. Cjín ndava me sacú rë me. Cjín hntsé me sacú rë me. Cjín tichja me sacú rë me. Cjín naa rë me sacú rë me. Cjín quihndi rë me sacú rë me. Hacuaha cjín nangui rë xitjé rë me sacú rë me. Handasa cojo cjuañihí, peru sacú rë me. Hane hya xi cueya me ne, cuechú me cjuahñu xatsé xcun Nina. <sup>31</sup> Tséhë xuta xi matitjun quihndë ne, jemu cjín me xi cumachjiriin hya xi cuinduva Nina ngasunhdë. Hane xuta xi hacuiin matitjun quihndë ne, hya ne, cumachji rë me xi cuma titjun me. —Cuatjin cachja me.

*Jesús ne, camá jyan ndiya xi chja me xi cueya me*

<sup>32</sup> Hyá xi camá ne, hora xi jiya ndiya Jesús cjuí me cojo cha ladu rë me nandya Jerusalén ne, titjun Jesús cjuí me. Hane cha ladu rë me ne, jercu fircun ra, tséhë xi tsacjuuin Jesús xi cjuí me. Hane xuta xi tjengui cjuí cojo me jan ne, hacuaha jemu tsacjun me má. Ngajan xi Jesús ne, cajindaya nga me cha ladu rë me xi tejó ni jan, sehe cavetsihin cachja me cojo cha xcusun xi ha tacun xati xi cuatju me cuma. <sup>33</sup> Cuitjin cachja me:

—Tinuhyun ni, tivanguen nandya Jerusalén. Hane ngajan ne, tjin yo me xi cuiteña ná ngajan cojo nahmi xi matitjun cojo cha maestru tséhë ley. Cuatjin sahmi me ha ndasa xi ngahan xi Quihndi rë Xuta Jain. Hane xuta xi cuacun vé cuichja me xi cueya ngahan, hacuaha sua nga me ngahan cojo xuta rë jingu sa nandya. <sup>34</sup> Sehe tsixcuehyu me ngahan. Cuëhënatya me ngahan, cuaja me ngahan, hisca tsiquehen me ngahan. Peru xi cjué jyan nixtin ne, cúa nga cjuahñu.

*Santiago cojo Juan ne, fehya me Jesús ngu cjuandaja*

<sup>35</sup> Xi cajnetaha cachja Jesús cuatjin ne, sehe quiji cha Jacobo cojo cha Juan, quihndi rë Zebedeo, quiji tjengui tiña cha Jesús. Ngajan xi chja cha cojo rë me cuitjin:

—Maestro. Nihñu favor ne, cjua xi chjahyin nuju ne, ningatuhun ni.

<sup>36</sup> Ngajan xi cachja me cojo cha cuitjin:

—¿Mé xi meje nuju xi sahme ni?

<sup>37</sup> Ngajan xi chja cha cojo rë me cuitjin:

—Tuhun cahndë xi ngu ngu ngayin ne, cuinechintihin ngu ngu ladu tjeheh nuju, hya xi nihñu gobiernu nuju.

<sup>38</sup> Ngajan xi cachja Jesús cojo cha cuitjin:

—Ngayun ne, hyuun mé xi चाह्युन. ¿Há scaa nuju cuatju cjuañihi xi cuátju ngahan ni?

<sup>39</sup> Ngajan xi cachja cha ta:

—Scaa niji.

Ngajan xi cachja nga Jesús cojo cha cuitjin:

—Cjuañihi xi cuatju ngahan cumá ne, hacuaha cojo ngayun cuatjun cumá. <sup>40</sup> Peru xi cuinechuntuhun ngu ngu ladu tjeheh naha ne, hacuiin ngahan cuichjá ta xcusun vëhë ne, sacu rë xuta xi cuichja Nina xi sacu rë me cahndë.

<sup>41</sup> Xi cahndë cha xi të jan cjuá xi cachja Jesús ne, cavetsihin camacjan rë cha cojo cha Jacobo cojo cha Juan. <sup>42</sup> Hya xi camá ne, cajindaya Jesús cha xi të jan ne, cachja me cojo cha cuitjin:

—Ngayun ne, ha hyun ta xuta matitjun nguehe ngasunhndë jemu sahmi yehe me yojo rë me, ta jercu meje cuitexa me. <sup>43</sup> Peru hacuiin cojo ngayun cuatjin nihñu ngajñi nuju ta xi meje rë ne, jarë ngayun xi meje nuju xi cumatitjun ngayun ne, nihñu xa rë xingun sacuaha mosu. <sup>44</sup> Hane jarë ngayun xi meje nuju xi xingun ne, cjuaharcun me yun ne, nihñu xa rë xingun sacuaha mosu xi caxteña. <sup>45</sup> Hisca ngahan ne, Quihndi rë Xuta Jain má ngahan, peru hacuiin canduvá xi xuta cuisecoo ná me ta ngahan cuisecoo rë xuta. Hisca tsingatehen xi tsiquehen ná xuta, cojo sa xi cjín xuta cuaxëtje Nina me. —Cuatjin cachja Jesús.

*Jesús ne, sahmi me xi cuma scutsejen cha rcá xi hmí rë Bartimeo*

<sup>46</sup> Hya xi camá ne, cjuí cjuí me cojo cha ladu rë me ne, cavechu me nandya Jericó. Xi cavatju me tsëhë nandya vëhë cojo xutacjín xi ticojo me ne, cavechutaha me cha quihndi rë Timeu, cha xi hmí rë Bartimeo, ngu cha rcá, hane tifehya cha caridad tjeheh ndiya. <sup>47</sup> Xi cahndë cha rcá jan xi Jesús tsëhë nandya Nasaret hacui me xi nduva me, jercu cachja cha:

—Jesús, quihndindaicjin rë David, catamayuma nuju ngahan.

<sup>48</sup> Hane cavisiajmicjan xuta jan cojo cha ta, catisejyu cha. Peru hitsë sa hñu chja cha cuitjin:

—Quihndindaicjin rë David, catamayuma nuju ngahan.

<sup>49</sup> Ngajan xi casecunhñu Jesús. Sehe ngajan xi chja me cojo cha ladu rë me cuitjin:

—Chjindayun rë cha.

Hya xi camá ne, cha ladu rë me jan ne, cajindaya cha cha rcá jan, sehe cachja cha cojo cha cuitjin:

—Tehe cjuetacun xahasen riji quen. Tisatjinhgue ta, jindaya me ngaye.

<sup>50</sup> Cuatjin camá xi cafaha cha tsjanga rë cha catsingatjenxin cha. Sehe marcu macjain casecun cha. Sehe quijitjengui cha Jesús. <sup>51</sup> Hane xi cavechutaha cha me ne, ngajan xi cachja me cojo cha cuitjin:

—¿Mé xi meje ri xi sahmi cojo ri?

Ngajan xi cachja cha rcá jan ta:

—Maestro, xi meje ná ne, xi cuma tsejen ná.

<sup>52</sup> Ngajan xi cachja Jesús cojo cha cuitjin:

—Ndatjin. Cuma cjuihin ta, camandaja ye, tsëhë xi camacjain ri ngahan.

Hane ha hora vëhë ni ne, camatsejen rë cha. Hane quiji cha cojo rë me hacutjin cjuí me.

## 11

*Tivisehen Jesús nandya Jerusalén*

<sup>1</sup> Hane xi camatiña me Jerusalén xi ha cjuaha me nandya Betfajé cojo Betania, quiji me ndetjun xi hmí rë Ndetjun Olivu, ngu ndetjún xi tiña tacun cojo nandya xi cuacun vëhë ne, catsingatju me jo cha ladu rë me quiji cha tixa. <sup>2</sup> Cuatjin cachja me cojo cha:

—Tangun nandya xi tsejen vë. Hane xi tu cjuhun tjeheh nandya ne, sacú nuju ngu burru xatsë xi hisca ngu cjëë cuijin rë chu, quitahahñu chu ngajan. Hane chundecjun chu, sehe nduvuncujun chu. <sup>3</sup> Sá xi yo xi cuichja cojo nuju ta: “¿Mé má cuatjin chundecjun chu ne?”, cuitjin tinújun: “Me xi matitjun tsijin meje rë me chu. Peru sehe tsicuya nga me chu.” —Cuatjin cachja Jesús cojo cha.

<sup>4</sup> Hya xi camá ne, quiji cha tixa xi cachja Jesús cojo cha. Xi tu cafehe cha ngajan ne, casacu rë cha ngu chu burru xatsë quitahahñu chu ngajan ndiya tiña tingotjo ndihya. Hane cavundecja cha chu.

<sup>5</sup> Hane ngujo cha xi hinchacun jan ne, cachja cha cojo cha ladu rë Jesús cuitjin:

—¿Mé má cuatjin cachundecjun chu burru vë?

<sup>6</sup> Ngajan xi cachja cha ladu rë Jesús hacutjin cachja me cojo cha. Sehe cha xi cuacun jan ne, casua cha cahndë quijicojo cha cha ladu rë Jesús chu burru jan. <sup>7</sup> Hane sehe quijicojo cha chu hiscan tacun Jesús. Hacuaha casua cha tsjian rë cha casesun ngaxtun chu sehe camiji me chu. <sup>8</sup> Hya xi camá ne, jemu cjin xuta xi cacandi me tsjian xcun rë me ndiya hacutjin cjui Jesús. Hane ngujo nga me ne quiji cavotohosun me xca xcuen ngajan nguijña, hane hacuaha cacandi me ndiya hacutjin cjui Jesús cojo sa xi tifaharcun me me.

<sup>9</sup> Hane yëjë me xi cjui titjun cojo yëjë me xi tjengui jan ne, cavetsihin jercu cajindaya me cachja me:

—Nacuechji rë Nina ta cafehe me xi catsingatju Nina. <sup>10</sup> Catsinchacun me me xi cuitexa naja sacuaa cavitexa David xutachanga naja. Jemu catsinchacun Nina me xi nduva tsëhë xi Nina catsingatju rë me. —Cuatjin cajindaya xuta.

<sup>11</sup> Xi tu cavisehen me nandya Jerusalén ne, quiji me yungun xi matitjun. Xi tu cavtsejen nguehe cavtsejen ngajan me ne, mé ta quiji hora ne, cavetju nga me cojo cha ladu rë me xi tejó jan ne, cavuya cafehe nga me nandya Betania.

<sup>12</sup> Xi camá nchujun jan ne, cavuya cavetju nga Jesús tsëhë nandya Betania. Hane ha jemu vojo rë me hora xi cavetju me. <sup>13</sup> Hya xi camá ne, tsëhë cjin ni cavëë me ngu yaxujun xi chine tú rë xi jemu ndaja tsejen yaha xca rë. Hane quiji me hiscan secun, sá sacú sinë me. Peru xi cafehe me ngajan ne, tsajin camahani mé xi casacu rë me, tsëhë xi hacuiin nixtin rë tuhaxi jan. <sup>14</sup> Ngajan xi cachja me cojo ya jan cuitjin:

—Quihndë tsajin nixtin xi cuaqui tú riji xi sinë xuta.

Hane cha ladu rë me ne, cahndë cha cjua rë me.

*Cavaxë Jesús xuta xi sahmi ndatsin ngajan yungun xi matitjun*

<sup>15</sup> Hya xi camá ne, cafehe me nandya Jerusalén. Xi cafehe me ngajan ne, quiji me ndatsen yungun xi matitjun jan. Hane cavetsihin cavaxë me xuta xi sahmi ndetsin ngajan. Catsindefa me maxë rë xuta xi tsindeya tujún. Hacuaha cacandi me siya rë xuta xi viteña nisë tyava. <sup>16</sup> Hane casuaain me cahndë xi tjin mé xi cjuaha xuta xi cuatjuvasen me ndatsen yungun jan.

<sup>17</sup> Sehe cavetsihin cavicuya me xuta jan cuitjin:

—Ngayujun ni ne, ha hyun xi cuitjin cachja Nina xcun xujun rë me: “Ndyá naha ne, ngu ndihya xi vinduva xuta tsëhë yëjë ni nandya cuisiajmi me cojo ná.” Peru ngayun ne, tinihñu ndava Nina vi sacuaa ndava chëjë. —Cuatjin cachja Jesús.

<sup>18</sup> Hya xi camá ne, xi cahndë nahmi xi matitjun cojo maestro tsëhë ley cjua jan ne, cavetsihin cavangui me chuya rë xi cuma tsiquehen me Jesús. Cuatjin meje rë me tsëhë cjuaxin xi tjin rë me, tsëhë xi yëjë xuta ne, jemu quijircun rë hacutjin cavicuya Jesús. <sup>19</sup> Xi quiji hora ne, cavetju nga Jesús tsëhë nandya jan cojo cha ladu rë me.

*Caxi ya xujun xi cama cjan rë Jesús cojo*

<sup>20</sup> Hane xi camá nchujun jan ne, cavuya cafe nga me nandya Jerusalén. Hane xi cavatju nga me hiscan secun ya xujun jan ne, cavëë me xi ya xujun jan ne, café caxi hisca rcu hisca ntsacu. <sup>21</sup> Ngajan xi cha Pedru ne, catsinguitsjen cha cjua xi cachja Jesús cojo ya jan nguijña ne, sehe ngajan xi cachja cha cojo Jesús cuitjin:

—Maestro. Chutsujun ta ya xujun xi canújuncjun cojo jan ne, café caxi.

<sup>22</sup> Ngajan xi cafayangui Jesús tsëhë cha cuitjin:

—Catamacain nuju tsëhë Nina. <sup>23</sup> Cuichjá cojo nuju ngu cjuaquixi ta tu yo ni xi cuichja cojo naxi vëhë cuitjin: “Tihinxin tsëhë nguehe, tihin tisihin ngajñi ndachacun”, sá xi hacuiin majo cacun, sá xi macjain jain rë hacutjin xi cachja ne, cuatjin jain cuma. <sup>24</sup> Vëhë xi chjá cojo nuju ta yëjë ni xi chjahyun cojo Nina ne, ningatuhuntacun sacuaa xi ha casacu nuju ta xi cuatjin ne, sacú jain nuju. <sup>25</sup> Hora xi chjahyun rë Nina ne, sá xi tjin yo xi choho cachja tsujun, o sá xi choho casahmi tsujun ne, ninchatuhun rë, cojo sa xi Nahmi naja xi tacun ngahnga ne, hacuaha tsinchataha nuju me tsëhë jyë nuju ta, <sup>26</sup> sá xi ninchatuun rë me ne, Nahmi naja xi tacun ngahnga ne, hacuaha tsinchataain nuju me. —Cuatjin cachja me.

*Finenguisen xuta ¿yo casuaxa rë Jesús?*

<sup>27</sup> Cjui cjui me ne, cafehe me nandya Jerusalén. Hane xi cafehe me jan ne, quiji me yungun xi matitjun. Hora xi tsujyihya me ndatsen yungun jan ne, nahmi xi matitjun cojo maestro tsëhë ley cojo sa xuta changá xi yahnga jan ne, cafehe tjengui me Jesús. <sup>28</sup> Hane cuitjin cavinenguisse me:

—¿Yo cavitexa ri xi cuatjin nihñi xcusun vë? ¿Yo casuaxa ri?

<sup>29</sup> Ngajan xi Jesús ne, cachja me cojo xuta jan cuitjin:

—Cjuinenguësë nuju ngu cjuua. Hane sá xi nicuyun tsahan ne, sehe cuichjá cojo nuju yo cavitexa ná xi sahme xcusun vëhë. <sup>30</sup> Ngayun mé nújun, ¿Yo xi cavitexa rë cha Juan xi cavitenda cha xuta? ¿Há Nina cavitexa me cha ne, há xuta cavitexa me cha? Tinújun cojo ná.

<sup>31</sup> Ngajan xi vetsihin visiajmi xuta jan ngajñi rë me cojo xicjin me cuitjin:

—Sá xi cuinújan xi Nina cavitexa me ne, cuichja me vihi cojo naja cuitjin: “Sá xi cuatjin ne, ¿mé má camacjaa in nuju xi cachja cha ni?” <sup>32</sup> Peru ¿há cuma cuinújan xi xuta cavitexa me cha?

Cuatjin casacuinyiin rë xuta xi cuacun vë mé cjuua xi tsicuya me tsëhë Jesús ta, tsëhë xi tsacjun me xutacjin, tsëhë xi yëjë ni xuta jan ne, macjain rë me xi cha Juan ne, Nina cavitexa jain me cha xi suacuenda cha cjuua rë Nina. <sup>33</sup> Vëhë xi hya xi cafayangui me tsëhë Jesús ne, cachja me cuitjin:

—Hyiin.

Ngajan xi hacuaha Jesús ne, cachja me ta:

—Sá xi cuatjin ne, ta mijí nicuyun cjuua tsahan ne, hacuaha cuichjaain cojo nuju yo cavitexa ná xi sahme xcusun vihi.

## 12

### *Ejemplu tsëhë cha mosu xi choho cjuatacun rë*

<sup>1</sup> Sehe cavetsihin cavicuya Jesús xuta jan ngujo cjuua, peru cojo suva ejemplu cachja me. Cuitjin cavetsihin me cjuua:

—Cuejñaa xi ngu xihin ne, catsitjë me nahñu rë uva ngu rquí nangui. Hacuaha casahmi me hnhua xondyojo rë tahndee rë xitjë jan. Ha ngajan ne ne, cafhanguiuya me ngu ndyojotë hiscan cuaxë nandá rë tuhaxi jan. Hacuaha casahmi me ngu cahndë hiscan xi cavesun me ngu nachan ngahnga xi sesun xuta xi sahmi cuidado xitjë rë me.

<sup>2</sup> Hya xi camá ne, casuatsja me cojo jingu sa xuta xi sahmi cha cuidado rë, hane cjuaha me tsë tsë cojo rë cha. Sehe cavetju me quiji me ngu nanguicjin. <sup>3</sup> Xi cavechú nixtin tsëhë tutjë jan ne, catsingatju me xi tsëhë jan ngu mosu hiscan xi quitaha xitjë rë me, xi cjuahatsja cha tsëhë xi satë rë me. <sup>4</sup> Hya xi camá ne, xi cavechu cha mosu jan ne, cavaja xuta xi tacun tsja xitjë jan cha mosu jan. Hane catsicuya cha cha cafe cha. <sup>5</sup> Ngajan xi me xi tsëhë jan ne, cavuya catsingatju nga me ngu mosu quiji. Hane xi cavechu mosu vëhë ngajan ne, me xi siutaha jan ne, cavanguihmu me rcu cha, hacuaha choho cachja me cojo cha. <sup>6</sup> Cafë ne, me xi tsëhë jan ne, cavuya catsingatju nga me ngu mosu. Peru mosu jan ne, catsiquehen me xi cuacun jan cha. Cafë vëhë ne, catsingatju camaha sa cha mosu. Hane ngujo mosu jan ne, tu cavaja ni cha. Hane ngujo nga ne, catsiquehen camahani cha.

<sup>7</sup> Quihndë me xi tsëhë cahndë jan ne, ngu ni quihndi tjin rë me ne, vëhë sa tacun. Handasa jemu hmucaacun me cha ne, peru catsingatju me cha, tsëhë xi cuitjin catsingata-haacun me: “Quihndi naha vi ne, cjuaharcun me cha.” <sup>8</sup> Peru xi cafehe cha quihndi rë me ngajan ne, ngajan xi chja xuta xi sahmi cuidado xitjë jan cojo xicjin me ta: “Cha vihi quihndi xi cjuahatsja cha cahndë vihi. Quihndë ne, niquen cha, cojo sa xi cumá tsajan nangui.” <sup>9</sup> Hya xi camá ne, cafaha me cha catsiquehen me cha, sehe catsingatjexin me cha tsëhë cahndë jan. Cuatjin casahmi me xi cuacun vë.

<sup>10</sup> Hindë ne, me xi tsëhë nangui jan ne, ¿mé sahmi me cojo xuta xi siutaha cuidado rë xitjë jan? Hatuxa cjue me ne, tsiquehen me me, hane sua me cahndë jan cojo jingu sa xuta.

<sup>11</sup> Quihndë, ngayun ne, ha chutayuun cjuua tsëhë xujun rë Nina xi chja cuitjin:

Ndyojo xi chja cha chjinevexo xi machjiriin ne,

ndyojo vëhë xi cachja Nina xi cuejña tjun tjun yuju rë xihndënaña.

<sup>12</sup> Cuatjin casahmi Nina xi cumá hacuaha jemu chuya rë xahasen naja xi cuatjin camá.

<sup>13</sup> Hya xi camá ne, xuta changá xi cafehe tjengui rë Jesús jan ne, meje cjuaha me me, tsëhë xi camachaya rë me xi condra rë me xi cachja Jesús. Ha ndasa meje cjuaha xuta changá jan Jesús ne, peru xi tsacjun me tsëhë xutacjin jan ne, ha quihndë tsajin mé casahmi me, hane cafe me.

### *Cjuacjintacun tsëhë tujúnsa*

<sup>14</sup> Hya xi camá ne, xuta changá xi cuacun jan ne, catsingatju me ngujo cha tsëhë partidu fariseo cojo ngujo cha ladu rë Herodes xi cjuahangahma cha Jesús, cojo sa xi xuta changá jan ne, cuma cuinchajyë me me. Xi tu cafehe cha ne, ngajan xi cachja cha cojo rë me ta:

<sup>15</sup> —Maestro. Ngayin ne, hyin ta ngayun ne, quixi cjuua tsujun. Ha tuxa cjuaquixi xi nújun ha ndasa xi cojo xuta nchina visiajmu o sá cojo xuta yuma. Tu yo ni ne tangun ni visiajmu cojo ta tsëhë xi ngayun ne, vicuyun ndiya rë Nina cojo cjuaquixi camahani. Quihndë ne, sacuaha ley rë Moisés ne, ¿há sua cahndë xi cuechjen tujúnsa naja cojo César, me xi matitjun, o há suaain cahndë? —Cuatjin cavinenguise cha.

<sup>15</sup> Peru Jesús ne, tsêhê xi ha vacun rê me xi jemu ndacha cha ne, cuitjin xu cachja me cojo cha:

—¿Mé má cuatjin meje chuhunchuvun ná? Nduvuncujun ngu tujún scutséjen.

<sup>16</sup> Hya xi camá ne, cha xi cuacun jan ne, canduvacojo cha ngu tujún tyava. Ngajan xi cachja me cojo cha cuitjin:

—¿Yo xcusun rê hacuaha yo ñihi rê xi quitahá xcun tujún vë? —Cuatjin cavinenguisse Jesús.

Ngajan xi chja cha cojo rê me cuitjin:

—Tsêhê César. —Chja xu cha.

<sup>17</sup> Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rê César xi tsêhê me; hane tuhun rê Nina xi tsêhê me. —Cuatjin cachja Jesús.

Hya xi camá ne, jemu quijircun rê cha xi cuatjin ndaja cachja Jesús.

*Cjua chjineguise hacutjin cumá xi cuya cjuahñu*

<sup>18</sup> Hacuaha canduva tjengui rê me ngujo cha tsêhê partidu saduceo, cha xi vicuya ngu cjuachacun xi chja xi hya xi cueyan ne, ha quihndê cuyaaïn cjuahñu naja. Hane cuitjin cachja cha ngujo cjua cojo Jesús:

<sup>19</sup> —Maestro. Moisés ne, catsihindu me xcun xujun rê Nina xi sá xi ngu xihin cueya, hane tsajin rê chjuun rê hisca ngu quihndi ne, htntse nima vêhê ne, meje rê xi cjuaha rê chjuun cahan vêhê, cojo sa xi sacú rê na quihndi xi cuma sacuaha quihndi rê nima vêhê.

<sup>20</sup> Quihndê ne, cuejña xi ngu ndihya ne, siu yatu cha cojo htntse cha. Hane cha tjun ne, cafaha cha chjuun. Peru cahme cha, hane chjuun rê cha vêhê ne, casacuiin rê na hisca ngu quihndi cojo cha. <sup>21</sup> Hya xi camá ne, htntse nima vêhê, cha xi majo ne, cafaha cha na cahan vêhê camá chjuun rê cha na, peru hacuaha cahme cha hane casacuiin rê na quihndi. Hacuanitjin ni cafaha cha xi majyan jan na, <sup>22</sup> hisca xi café yêjê xi yatu cha cafaha cha na. Peru yêjê cha xi cuacun vêhê ne, café cha cahme cha chuya ngu chuya ngu cha. Hane na vêhê ne, casacuiin rê na hisca ngu quihndi cojo cha xi cuacun vêhê. Hiscan xi cajnetaha ne, hacuaha cahme na. <sup>23</sup> Quihndê ne, ¿mé núnjun? Hya xi cuya yêjê nima cjuahñu ne, ¿jarê jain cha xi chjuun rê cha na xi cjuaquixi? ta yêjê xi yatu cha ne, cavixan cha cojo rê na. —Cuatjin cavinenguisse cha.

<sup>24</sup> Ngajan xi cachja Jesús cojo cha cuitjin:

—Ngayun ne, cuaaintjin xi núnjun, tsêhê xi vijniï rcun cjua xi chja xujun rê Nina, hacuaha hyuun xi Nina ne, jemu hñu cjuatacun rê me. <sup>25</sup> Hya xi cuya cjuahñu rê nima ne, ha quihndê hacuiin cuixan me hacuaha hacuiin tsinguixan me, ta tangun cumá sacuaha xi siu ángel ngahnga ne, cuatjin cuiyujú me. <sup>26</sup> Hacuaha quihndê xi tinúnjan tsêhê nima xi cuya cjuahñu rê ne, ngayun ne, sacuaha xi cjêê chutayun xujun xi catsihindu Moisés hacutjin cahndê me cjua rê Nina xi cavetju tsêhê cahntsua ngu ya lihndi xi seti. Cuitjin cachja Nina cojo me hya: “Ngahan xi Nina rê Abraham ngahan. Nina rê Isaac, hacuaha cojo Nina rê Jacobo má ngahan.” Cuatjin cachja Nina tsêhê xuta xi ha cahme me. <sup>27</sup> Peru Nina ne, hacuiin nina rê nima ta nina rê xuta xi quicun me. Hane sá xi quicun nima jan, ngajan tsejen xi cjuachacun xi núnjun ne, quixiin.

*Artículo tsêhê ley xi hitsê sa venguichji rê*

<sup>28</sup> Hacuaha cafehe ngu cha maestru tsêhê ley hiscan tacun Jesús. Hane xi cahndê cha cjuavisajmi rê me ne, xi ndaja cama catsicuya Jesús, ngajan xi cavinenguisse cha me cuitjin:

—Maestro, tsêhê yêjê ni cjua xi cavitexa Nina naja xcun xujun ley ne, ¿jarê artículo xi hitsê sa matitjun?

<sup>29</sup> Ngajan xi cafayangui Jesús cuitjin:

—Xi matitjun ne, cuitjin chja: “Ngayujun ni ngayun xuta ladu rê nangui Israel, Nina naja ne, ngu tu tu ni me. <sup>30</sup> Meje rê xi nihña hmutacun Nina, me xi matitjun tsajan, cojo ngayêjê ni cjuatacun naja, cojo ngayêjê ni xahasen naja, hacuaha cojo ngayêjê ni ngahñu naja.” <sup>31</sup> Hane xi má jo ne hacui vihi: “Meje rê xi nihña hmutacun xingueen sacuatjin hmutacun suvaan yojo naja.” Tsêhê yêjê ni artículo xi cavitexa Nina ne, jo ni cjuatacun vêhê xi matitjun. —Cuatjin cachja Jesús.

<sup>32</sup> Ngajan xi cachja cha maestru tsêhê ley cojo rê me cuitjin:

—Ndatjin canúnjun, maestro. Canúnjun cjuaquixi ta Nina naja ne, ngu tu tu ni me. <sup>33</sup> Hacuaha ndatjin canúnjun xi meje rê xi nihña hmutacun Nina cojo ngayêjê ni cjuatacun naja, cojo ngayêjê ni ngahñu naja, hacuaha meje rê xi nihña hmutacun xingueen sacuaha nihña hmutacun yojo naja suvaan. Cjua vêhê ne, tjercu venguichji rê. Hisca vengui sa chji rê xi cuma rê yêjê ni cjuandaja cojo yêjê cjuatjo xi cjue xcun Nina.

<sup>34</sup> Xi tu cahndê Jesús ta ndatjin cafayangui cha maestru jan ne, ngajan xi cachja me cojo cha cuitjin:

—Ha jemu hitsë sa chaja xi cuisuhun ladu rë Nina.  
Ha quihndë tsajin yo xi macacun sa cjuinenguise rë me ngu cju.

*¿Yo tjë rë má me xi hmí rë Mesías?*

<sup>35</sup> Ngajan xi Jesús ne, hora xi tivicyua me xuta ngajan yungun xi matitjun ne, cachja me cojo xuta cuitjin:

—Maestru tséhë ley ne, chja cha ta Cristu, me xi tsingatju Nina xi cumatitjun tsajan ne, tjë rë David má me. <sup>36</sup> Peru suva David ne, catsihindu me cjuja xi cachja Hasen rë Nina cojo rë me cuitjin:

Nina ne, cachja me cojo Nai naha cuitjin:

“Tinechin ladu quixi naha

hiscan hya xi yějë xi sahmi condra ne, cuiyuju ngahan ngahma gobiernu riji.”

<sup>37</sup> Ndatjin, sá xi cuatjin cachja David tséhë me ne, ¿há cuma xi hisca tjë rë David má me ni, hacuaha matitjun nga me tséhë David ni? —Cuatjin cachja Jesús.

Hane xutacjin ne, jemu cojo cjuasua cavisifuju me cjuja rë Jesús.

<sup>38</sup> Hacuaha cuatjin cachja nga me ngu ndiya xi tivicyua me xuta:

—Tjin nuju cuidadu. Hacuini cojo ngayun nihñu sacuatjin sahmi cha maestru tséhë ley. Cha xi cuacun vëhë ne, jemu meje tsuyihiya chacun cha hacuaha meje rë cha xi cuichja xuta nina cojo cha ngajni ndetsin. <sup>39</sup> Hacuaha hora xi fi cha yungun ne, cjue cha cuiyuju cha ngu cahndë ndatjin hiscan viyuju xuta xi matitjun. Ha cuanitjin ni hiscan xi cjue sinë cha ngu ndava suhi ne, fi cha viyuju cha cahndë ndatjin hiscan viyuju xuta xi matitjun.

<sup>40</sup> Hacuaha yachjin cahan ne, jemu cjín tujún vaxë cha na. Hisca ndava na tsajin. Hane hisca xi chjayuma cha ne, jemu nduju hora chja cha, peru hacuini nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatjun cha, xi cuma rë jingu sa xuta.

*Tujún chjé rë na cahan*

<sup>41</sup> Sehe quiji cavéjña me tiña hiscan xi tacun caxa xi xincha tujún chjé rë Nina, vutsejen me hacutjin vincha xuta tujún. Hane jemu cjín xuta nchina quiji cavincha me chjé rë, jercu cjín tujún cavincha me. <sup>42</sup> Hya xi camá ne, cojo ngu na cahan xi jemu yuma camahani quiji cavincha na jo tujún sinë xi jemu chuva chji rë cahntsua caxa jan. <sup>43</sup> Ngajan xi Jesús ne, casahmitangun me cha ladu rë me, sehe cachja me cojo cha cuitjin:

—Cuichja cojo nuju cjuaquixi ta xuma chjuun cahan vihi ne, hitsë sa vengui chji rë tujún xi cavincha na, xi cumá rë tujún xi jemu cjín cavincha cha nchina jan ta, <sup>44</sup> tséhë xi cha xi cuacun vëhë ne, xi vangui rë cha ne, vëhë xi cavincha cha. Hane ha ndaja na vëhë ne, cojo cjuayuma xi tacun na ne, tujún xi cavincha na jan ne, ha vëhë yějë ni xi tjin rë na. —Cuatjin cachja Jesús.

## 13

*Jesús ne, chja me ta yungun xi matitjun ne, cuetsunya*

<sup>1</sup> Hya xi camá ne, hora xi tivetju Jesús tséhë ndatsen yungun xi matitjun jan cojo cha ladu rë me ne, ngajan xi chja nga cha ladu rë me jan cojo rë me cuitjin:

—Maestro, chutsujun ndoyojo xi texo yungun vihi ta tjercu tu ndacun camahani. Hacuaha ndihya tséhë ne, jercu tu cun camahani.

<sup>2</sup> Ngajan xi chja Jesús cojo cha cuitjin:

—Sacuaha ndihya ndacun xi chutsujun ne, cuechu nixtin xi hisca xi ngu ndoyojo vi ne, tsajin hinchasuncoo xicjin ta, cjuë yějë cuixujne.

*Hacutjin cumá hya xi cjuë ngasunhndë*

<sup>3</sup> Cafë cachja me cuitjin ne, sehe cavetju me quiji me cojo cha ladu rë me, cafehe ne tiña rcu Naxi Olivu, quixi rë tingotjo yungun xi matitjun jan. Hane xi quixin me cojo cha Pedru cojo cha Jacobo cojo cha Juan cojo cha Andrés, sehe cavinenguise cha me cuitjin:

<sup>4</sup> —¿Janihya cuetjuca xcusun vëhë xi canújun?

<sup>5</sup> Ngajan xi cachja Jesús cojo cha cuitjin:

—Nechun cuidadu cojo sa xi hacuini cuma ndacha ngayun ta, <sup>6</sup> tséhë xi jemu cjín xuta cjuehe me xi cuichja me cueyanangui me ñihi naha cuichja me xi hacui me xi Cristu me. Hane cuatjin jemu cjín xuta cumacjain rë me cjuandacha rë me xi cuacun vë.

<sup>7</sup> Hacuaha hya xi cumachaya nuju cjuja xi jemu yehe si tijima ne o sá xi tjin cjuacjintacun ta jemu yehe si nduva ne, hacuini cumacjintacun ta ha tuxa cuatjin cuma. Peru hacuini ha hya cjuë nixtin rë ngasunhndë vihi. <sup>8</sup> Xuta nandya scaan cojo xuta xi hacjahi. Ngu nación cojo ngu nga ne, scaan. Hacuaha cjín cahndë xi cjuani nangui. Hacuaha cjín cahndë ne, cuma jindy. Cuatjin cumá xi cuetsihin cjuañihi xi cuatju xuta.

<sup>9</sup> Nechun cuidadu ta, cuechu nixtin xi xuta nandya ne, cjue cani nuju me xcun xutaxa rë yungun ne, hacuaha cuaja nuju me. Hacuaha tjin nuju xi cuangun xcun xutaxa rë

ndihyavasen cojo xcun gobernador ngatsë rë xi macjain nuju ngahan. Hane ngajan ninguxun yëjë cjuu hacutjin cavicuyá nuju. <sup>10</sup> Peru chaja sa xi cjuë ngasunhdë ne, meje rë xi cuichja xuta ladu naha cjuu rë Nina jingujyë ni nandya tsëhë ngasunhdë. <sup>11</sup> Hora xi cjuu chani nuju xcun xutaxa rë ne, hacuini cumacjintacun tsëhë cjuu xi cuinújun jan ta, Hasen rë Nina ne, scuxaha cjuatacun nuju hora vëhë hacutjin cuinújun. Hacuaa vëhë ni cuinújun ta tsëhë xi hacuini cjuatacun nuju xi cuinújun ta cjuatacun rë Nina xi sua nuju Hasen rë Nina. <sup>12</sup> Xuta nandya ne, cuinchajyë me hntsë me, cuinchajyë me xutacha rë me, hacuaa cuinchajyë me quihndi rë me, cojo sa xi xutaxa rë ne, cjuaha me xuta xi cuacun vë ne, tsiquehen me. <sup>13</sup> Hane yëjë xuta ne, choho scuëë nuju me ngatsë naha. Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. —Cuatjin cachja Jesús.

*Cjuacjintacun jyë xi cuma*

<sup>14</sup> Yo xi scutaya cjuu xi sehe nduva vi ne, meje rë xi ndaja catetaharcun. Tjin xcusun xi tsinguetsun rë cahntsua yungun xi matitjun. Hane hya xi cjuëhe ngu xcusun xi cuacun vë hiscan xi ndajintjin xi cjuëhe ne, yëjë ni xuta xi siu ladu tsëhë distritu Judea nixtin hya ne, ngutjen ni catangahma me hiscan ndetjun. <sup>15</sup> Hacuaa jarë me xi hinchasun rcu ndava xi cuitujne me, hacuini cuijne me xi cuisehen me cahntsua ndihya cjuaha me mé tsëhë me xi cjuaha me. <sup>16</sup> Hacuaa yo xi hinchataha me nguiña ne, mijí rë xi cuya cjuu me ndava me xi cjuëjaha ndastu tsjanga rë. <sup>17</sup> Jemu chojyih tsëhë yëjë ni yachjin xi hinchahma quihndi rë cojo yëjë me xi tjin rë quihndi vaqui ne nixtin hya. <sup>18</sup> Chjahyun rë Nina xi cjuanihi vëhë ne, hacuini cuinduva nixtin chan hnchan ta, <sup>19</sup> cjuanihi xi cuma ne, ngu cjuanihi jyë xi cjëë camahani cumá hisca ntsacu cavetsihin ngasunhdë hacuaa cuyaaïn cuatjin cuma. <sup>20</sup> Sá xi jemu cjin nixtin cjuëcani rë cjuanihi vëhë ne, hisca ngu xuta ne, cuetjintjin me. Peru ngatsë rë cjuahmutacun xi tjin rë Nina cojo xuta xi cavaxijin me xi cumá me ladu rë me ne, sahmichuva me nixtin vëhë.

<sup>21</sup> Nixtin vëhë ne, sá xi yo xi cuichja cojo nuju xi ngajan o sá xi nguehe tacun me xi má Cristu, xi camacjain nuju ta quixiin xi chja me. <sup>22</sup> Ngujo xuta vindacha ne, cuichja me ta: “Ngahan xi Cristu xi cumatitjun ngahan tsujun.” Ngujo nga me ne, cuichja me ta: “Ngahan xi chjá cjuu rë Nina.” Peru vindacha ni me, quixiin cjuu xi cuichja me. Hacuaa sahmí me xcusun sacuaa cjuarcun, tsëhë xi hisca cojo xuta xi cavaxijin Nina meje cuindacha me. <sup>23</sup> Nechun cuidadu ta cojo chaja sa xi cuechu nixtin vëhë ne, ngahan ne, ha casua camachaya nuju xi cuatju vë.

*Xi cuya nga Jesús ne, cumatsejen hasen rë ngahña rë me*

<sup>24</sup> Xi cuatjun nixtin tsëhë cjuanihi jan ne, cuinduva nixtin xi cjuë ndavá rë tsuhi. Sá ne, hacuaa ha quihndë suaain ndavá rë. <sup>25</sup> Hane niñu ne, cuixu tsëhë ngahnga. Hisca ngahña xi yaha ngahnga ne, cjuiniyaya. <sup>26</sup> Xcun cjuacjintacun vëhë ne, scuëë xuta xi ngahan, Quihndi rë Xuta Jain, cuinduvá gajñi rë yufí cojo jemu jyë ngahña hisca seti tsejen ngahan xi nduvá. <sup>27</sup> Hya ne, tsingátju ángel naha yëjë ni ladu tsëhë ngasunhdë, cjuëjaha rë yëjë xuta naha xi cavaxejen, sahmí tangun rë hiscan tejña.

<sup>28</sup> Quihndë ne, cuetaharcun ngujo cjuu tsëhë yaxujun xi chine tú rë. Hya xi cuetsihin cumá xcuen tsja rë yaxujun jan tsëhë xi cuetsihin cuetjusehen ne, ngayun ne ha hyun ta ha jemu camatiña chan tsí. <sup>29</sup> Hacuaa xi cjuëhe cjuanihi xi cachjá cojo nuju ne, vëhë sua cumachaya nuju ta ha tiña tacun xi cjuë ngasunhdë, hisca meje cumá. <sup>30</sup> Cuichjá cjuaquixi cojo nuju ta xuta xi siu quihndë ne, siu cuaha me hya xi cuetjucaa xcusun xi cachjá cojo nuju. <sup>31</sup> Cuechu nixtin xi cjuë nanguí, cjuë ngahnga. Peru cjuu naha ne, tsajin nixtin xi cjuë.

<sup>32</sup> Sacuaa nixtin xi cuetjucaa cjuatacun vëhë ne, tsajin yo vëë rë janihya cuetjucaa. Hisca hvíin ángel xi siu ngahnga. Hisca hveen ngahan xi Quihndi rë Nina. Suva ni Nina ngu tutu nahmi naja ne, me vëhë xi vëë me janihya cumá.

<sup>33</sup> Vëhë xi nechun cuidadu, hacuaa ningascun rë hitsë cjuatacun nuju ta, ngayun ne, hyuun janihya xi cjuëhe Nai nuju. Vëhë xi chjá cojo nuju ta ningascun rë hitsë cjuatacun nuju ta ngayun ne, hyuun janihya cýa, ¿há jñu ne?, ¿há ñahña cjuëhë? <sup>34</sup> Ngahan ne, sacuaa ngu xuta xi cuetju cjuu ngu nanguí cjin. Chaja sa xi cuetjun me tsëhë ndava me, cuichja me cojo mosu rë me mé xa sahmí jimangu mosu. Hacuaa cuitexa ngu mosu xi cuahacuenda tingotjo ndava me. Cuatjin sahme. <sup>35</sup> Vëhë xi chjá cojo nuju ta ningascun rë hitsë cjuatacun nuju ta ngayun ne, hyuun janihya cýa, ¿há jñu ne, há nixten ne, há tiña sahasen, o sa sahasen camahani cýa? Sa xi ñahña cjuëhë hane tsajin tjin chjine ngayun. <sup>36</sup> Cuidadu sá xi ngu ñahña nduvá hane ngayun ne, tsajin tjin chine ngayun. <sup>37</sup> Xi chjá cojo nuju ne, ha cuantjin ni chjá cojo yëjë ni xuta: Meje rë xi catisingasca me hitsë cjuatacun rë me. —Cuatjin cachja Jesús.



## 14

*Me xi matitjun ne visiajmicjin me hacutjin cuma xi cjue Jesús ndavaya*

<sup>1</sup> Hya xi camá ne, casahmi chaja sa jo nixtin xi cuechu suhi tsêhê pascua ne, sacuaaha xcusun nihi ne, hya chini pan xi tsajin san rê. Ngajan xi nahmi xi matitjun jan cojo cha maestru tsêhê ley ne, jemu tivangui me chuva rê xi cuindacha me Jesús, cojo sa xi cuma cjuaha me me tsiquehen me me. <sup>2</sup> Peru cachja me cojo xicjin me cuitjin:

—Ndatjin xi cuinechanyan ne, cuatju suhi sehe chjahanhma cha, ta sá xi tsajin ne, tu cumacjan rê xutacjin hane cumá ngu suê jyê.

*Cavitejnu ngu chjuun aceite xi jemu ndaja jne rcu Jesús*

<sup>3</sup> Hya ne, Jesús ne, nandya Betania quitaha me. Tacun me ndava cha Simón, cha xi camandaja tsêhê chíhin cjan rê xi cafaha rê chuxin yojo rê. Hora xi tacun me tijinê me niñu ne, cafehe ngu na xi yaha na ngu frascu ndyojo, hincha aceite tsêhê nardo xi jercu hnga chji rê. Hane xi cavotohosun na rcu frascu hiscan hincha aceite jan ne, sehe quiji cavitejnu na aceite jan rcun Jesús. <sup>4</sup> Ngujo me xi siu jan ne, camacjan rê me xi cuatjin casahmi na. Hane sehe cachja me ngajñi rê me cojo xicjin me cuitjin:

—¿Mé má cuatjin tu catsinguetsun na aceite vê? <sup>5</sup> Sá xi xteña vê, sacú tujún sacuaaha tujún xi sacú rê ngu mosu xi casahmi xa ngu nu, hane tujún vêhê ne, cuma cuisecoo rê xuta yuma. —Cuatjin cachjataha me na.

*Ngajan xi cachja Jesús cuitjin:*

—Xi canujuun tsêhê na. ¿Mé má cuatjin tivichuncjun tsêhê na? ta, jemu venguichji rê xcusun xi casahmi na cojo ná. <sup>7</sup> Xuta yuma ne, yêjê nu yêjê nixtin siu me ngajñi nuju. Peru ha ndaja ngahan ne, hacuiin jyê nixtin tejña cojo nuju. <sup>8</sup> Na vihi ne, casahmi na hacutjin xi chutaha na. Hane cojo chaja sa xi cueya ngahan ne, cavitejnu ná na aceite xi cuêhêchjine ni na yojo naha xi seyaniji ngahan. <sup>9</sup> Cuichjá quixê cojo nuju ta tuyani tsêhê jingujyê ngasunhdê xi cuichja xuta cjuá tsêhê Nina ne, hacuaaha cueyanangui me na vihi cojo sa xi xuta xi yahnga ne, cumachaya rê me xcusun xi casahmi na cojo ná. —Cuatjin cachja Jesús.

*Judas ne, viteña me Jesús*

<sup>10</sup> Hya xi camá ne, cha Judas tsêhê nandya Queriote, cha ladu rê Jesús tsêhê cha xi tejó jan ne, quiji cha xcun nahmi xi matitjun ne, cavêhê chíhin cha cjuá cojo rê me xi sahmi me entregadu cha Jesús cojo rê nahmi jan. <sup>11</sup> Hya xi cahndê nahmi xi matitjun jan cjuá rê Judas ne, jercu ndama camahani rê me. Hacuaaha ngutjen ni cachja me ta, sua me cha tujún. Hane ngajan xi cha Judas jan ne, cavetsihin cavangui cha chuva rê hacutjin xi cuma sahmi entregadu cha Jesús.

*Tisehen chjinê xi sinê me tsêhê pascua*

<sup>12</sup> Hya xi camá ne, nixtin tjun tjun tsêhê suhi xi chini pan xi tsajin san rê, nixtin xi hacuaaha niqihin chu tsángá tsêhê suhi tsêhê pascua ne, hya ne, cha ladu rê Jesús ne, cavinenguise cha cojo rê me cuitjin:

—¿Jani hiscan xi meje nuju xi cuanguin cuihinchjini xi xinêê nguixun tsêhê suhi vi?

<sup>13</sup> Ngajan xi catingatju me jo cha ladu rê me quiji cha tixa. Hane cuitjin cachja me cojo cha:

—Tangun nandya Jerusalén. Hane ngajan cuechuntuhun ngu cha xi nduva ne, quisun rcu cha ngu nisa nandá. Tangun cojo cha hacutjin cjui cha. <sup>14</sup> Hane ndihya xi cuisehen cha ne, tinújun cojo me xi nai rê ndihya jan cjuá vihi: “Cuitjin chja maestru ta, ¿jarê cuarto hiscan xi sinê nguixun me cojo nihi tsêhê pascua?” Cuatjin tinújun cojo me. <sup>15</sup> Hane me vêhê ne, cjue tsingacun nuju me ngu cuarto jyê ngajan ndihya ngahnga hiscan xi ha tjin chjine. Hane ngajan tuhunndujun xi xinêê.

<sup>16</sup> Hane ngajan xi cavetju cha xi cuacun jan quiji cha. Xi cafehe cha nandya Jerusalén ne, cuatjin camá tu tjin cachja Jesús cojo cha. Hane cavêhê ndaja cha xi sinê nguixun me cojo rê cha.

*Pascua xi vijnetaha cajinê Jesús*

<sup>17</sup> Xi quiji hora jan ne, cafehe Jesús cojo yêjê tejó cha ladu rê me. Hane quiji me caviyuju me. <sup>18</sup> Sehe cavetsihin cajinê me. Hora xi tijinê me jan ne, ngajan xi cachja Jesús cuitjin:

—Nguehe cuichjá cojo nuju cjuaquixi ta ngu ngayun xi nechan tichine cojo nuju nguehe ne, niñu ná entregadu. —Cuatjin cachja me.

<sup>19</sup> Ngajan xi jemu choho camá rê cha, cavetsihin cha cachja cha chuva ngu chuva ngu cha, cuitjin cachja cha:

—Hacuiin ngahan.

<sup>20</sup> Ngajan xi cachja Jesús cuitjin:

—Ngajñi nuju xi tejó ngayun, ngajan jiyajñi ngu xi sahmi cuitjin. Ngu me xi ngu ni tyuva tsingusehen quinda niñu naha cojo ne, me vèhè xi sahmi ná me entregadu. <sup>21</sup> Ngahan xi Quihndi rë Xuta Jain ne, hatuxa tjin xi cueyá ta, xujun rë Nina ne, cuatjin chja. Peru xuma cha xi cuiteña ná. Vengui sa chji rë sá xi catsiin camahani cha.

*Jesús ne, vindeya me xcusun rë pascua, cumá cena tséhè Nai naja*

<sup>22</sup> Hora xi ha camatiña xi cuijnetaha sinè me niñu ne, cafaha Jesús ngu niñutsju, hane casua me nacuechji rë Nina, sehe cavotohocja me niñutsju jan. Hane sehe casua me ngu rquí ngu rquí niñu jan cha ladu rë me, hane cuitjin cachja me cojo cha:

—Juhun vihi ta, vihi ne, yojo naha. —Cuatjin cachja me.

<sup>23</sup> Hacuaha cafaha nga me ngu vasu xi hinchá xan rë uva, hane casua nga me nacuechji rë Nina. Hane sehe casua me tsé tsé cahvi cha jima ngu cha ladu rë me. <sup>24</sup> Hacuaha cachja me cojo cha cjua vihi:

—Vihi jni naha xi cuetju ná ngatsè rë xuta. Xcusun vihi ne, ngu compromisu xatsè xi sehe tivèhèchihin Nina cojo xuta cojo sa xi jni naha ne, vèhè cuaxèteje rë xuta. <sup>25</sup> Cuichjá quixè cojo nuju ta ha quihndè cuéen xan rë uva nguehe ngasunhndè. Cuèhè, peru hisca hya xi nduva Nina cuitexa me ngasunhndè, hya cuèhè, peru hacuiin tangun cumá. —Cuatjin cachja Jesús cojo cha ladu rë me.

*Jesús ne, chja me ta Pedru cuichja me xi viin me yo xi Jesús*

<sup>26</sup> Xi cajnetaha cajinè me ne, casè me ngu tséhè Nina. Sehe cavetju me quiji me Naxi Olivu. <sup>27</sup> Hane sehe ngajan xi chja me cojo cha ladu rë me cuitjin:

—Ngayujun ni ngayun cumanguaintacuun cojo ná ta cuma sacuaaha camahindu xcun xujun rë Nina xi chja cuitjin: “Nina ne, tsiquehen me cha xi sahmi cuidadu rë chu tsánga. Hane chu tsánga ne, cuitsojo chu.” <sup>28</sup> Cuatjin cumá, peru hya xi cúa nga cjuahñu naha ne, cjué titjun tsujun hiscan distritu Galilea.

<sup>29</sup> Ngajan xi cachja cha Pedru cojo Jesús cuitjin:

—Ha ndasa ngayèje cha xi cuicun vi cuejña suva cha ngayun ne, peru ngahan ne, cuejña nuju suvun.

<sup>30</sup> Ngajan xi cachja Jesús cojo cha cuitjin:

—Cuichjá quixè cojo ri ta tajñu ni xi chaja sa squindaya xahnda ne, ha jyan ndiya cuinoje xi hyiin yo ngahan. —Cuatjin cachja me.

<sup>31</sup> Peru cha Pedru ne, cavuya cachja nga cha cjua vihi:

—Ha ndasa hisca cueya cojo nuju ne, peru cuichjaain xi hveen yo ngayun. —Cuatjin cachja cha.

Hacuaha cuanitjin ni cachja cha xi yahnga.

*Jemu chja vatju Jesús ngajan Getsemaní*

<sup>32</sup> Hya xi camá ne, cavetju me quiji me ngu cahndè xi hmí rë Getsemaní. Ngajan xi cachja me cojo cha ladu rë me cuitjin:

—Nechun ni nguehe ne, cjuè cuisiajme cojo Nina. —Cuatjin cachja me.

<sup>33</sup> Hya xi camá ne, cavaxè me cha Pedru cojo cha Jacobo cojo cha Juan, quiji me cojo cha. Ha xcun xi ha cjuí cjuí me jan ne, cavetsihin jemu casercun rë me, hacuaaha macjincacun me. <sup>34</sup> Ngajan xi cachja me cojo cha cuitjin:

—Jercu choho má camahani rë xahasen naha. Xi má ná ne, cueya tséhè. Nechun ni nguehe cuacun ngayun cojo ná. —Cuatjin cachja me.

*Oración xi tjun*

<sup>35</sup> Sehe ngajan xi Jesús ne, quiji me hitsè ni nguvan. Hane ngajan cafañatsacjan me, cafehya rë me Nina sá xi tjin tu mé ni xi cumá cojo sa xi cuatjin me cjuacjintacun xi cuatju me jan. <sup>36</sup> Hane cuitjin cafehya rë me Nina:

—Papá. Xi cumá nuju ngayun ne, yèjè ni xcusun ne, hacuiin chja cuma. Vèhè xi tifèhya nuju xi naxuntjun ná tséhè cjuacjintacun xi cuátju cumá. Cuatjin meje ná, peru cjua xi cuinújun ne, cuatjin catama. —Cuatjin cafehya rë me Nina.

<sup>37</sup> Hya xi camá ne, cavuya cafehe nga me hiscan siu cha ladu rë me xi quijicojo me jan. Hane xi vutsejen me ne, siufè cha. Ngajan xi chja me cojo cha Pedru cuitjin:

—Simón, ¿mé má tsjuñife? ¿Há camaji cavacun ngayun cojo ná hisca ngu hora? <sup>38</sup> Nechun quicun, hacuaaha chjahyun rë Nina cjuandaja rë me, cojo sa xi hacuiin chjaha chuya nuju cojo cjuatacun nuju. Xahasen nuju ne, ndaja meje rë xi nihñu, peru yojo nuju ne, chuya caa rë. —Cuatjin cachja me cojo cha.

*Oración xi majo*

<sup>39</sup> Hya xi camá ne, quiji nga me ngu ndiya hitsè ni nguvan. Hane ha cjua vèhè nga ni cavuya cafehya rë me Nina. <sup>40</sup> Hya xi cavuya nga me ne, siufè nga cha ladu rë me xi jyan

jan, tsêhê xi ha quihndê ticaain rê cha xi jemu nijña rê cha. Xi catsingasca Jesús cha ne, sacuiniiin rê cha mê cuichja cha cojo me.

*Oración xi má jyan*

<sup>41</sup> Xi cavuya me xi quiji me má jyan ndiya ne, cachja me cojo cha ladu rê me jan cuitjin:  
—Ha tsjuñufum cuaha. Juun, peru ha camá. Ha cavechu hora xi ngahan, Quihndi rê Xuta Jain, cjuaha ná xuta tsehen ta, ha caxteña ngahan. <sup>42</sup> Tisatjunhngun, cuanguen chutsejen ta, ha nduva cha xi sahmi ná entregadu. —Cuatjin cachja me.

*Cjuicojo cha Jesús ndavaya*

<sup>43</sup> Ha tu tichja cuaha Jesús cojo cha ladu rê me ne, cafehe cha Judas, cha xi cojo jiyajñi ngajñi rê cha xi tejó jan. Hacuaha jercu cjín xuta tivisecoo rê cha hora xi nduva cha. Yaha me quicha. Yaha me ya. Nahmi xi matitjun cojo cha maestru tsêhê ley cojo xuta changá jan ne, me vêhê cavitexa me xutacjín jan xi quiji jaha me Jesús. <sup>44</sup> Chaja sa xi cjeuhe cha Judas cojo xutacjín jan hiscan tacun Jesús ne, ha cachja cha cojo xuta jan cjua vihi:

—Cha xi cjuê cuitátsuha xi suá rê nina ne, cha vêhê xi hacui cha. Chjuhun cha, hacuaha nihñu cha, sehe tangun cojo cha. —Cuatjin cachja cha.

<sup>45</sup> Xi tu cavechu cha hiscan nduva Jesús cojo cha ladu rê me xi yahnga jan ne, ngutjen quiji casahmi tiña cha tsêhê me, hacuaha casua cha me nina cuitjin:

—Cuhndanu, Maestro. —Cuatjin cachja cha.

Cafê cachja cha cuitjin ne, sehe cavitatsuha cha Jesús. <sup>46</sup> Hya xi camá ne, quiji xuta jan ne, cafaha me Jesús.

<sup>47</sup> Ngajan xi ngu cha xi secun jan ne, cavaxê cha quicha nduju rê cha, hane cavaja rê cha ngu cha mosu rê nahmi xi matitjun ne, cavatêsun cha ngu ladu tyjavañuju. <sup>48</sup> Ngajan xi cachja Jesús cuitjin:

—¿Mé má sacuaa vangun chjuhun xuta chêjê ne, cuatjin nduvun chjuhun ná? ta, quichuhun quicha quichuhun ya. <sup>49</sup> Ngahan ne, nchunchujun ni cavitejñaya yungun xi matitjun, cavicyá rê xuta, hane ¿mé má cachjuun ná ngajan? Juun, peru cuatjin tijima cojo sa xi cuetjucaa jain hacutjin camahindu xcun xujun rê Nina.

<sup>50</sup> Hya xi camá ne, cha ladu rê Jesús ne, cavejña suva cha me, hane cafê yêjê cha cavanga cha.

*Cha nixti xi cavanga hya xi cachjahá rê Jesús*

<sup>51</sup> Ngu sa cha jan yaja cha ngu tsjian tu tê ni. Hane xi tu meje cjuaha xuta cha jan ne, tsjian ni rê cha cama cafaha me. <sup>52</sup> Peru cha vêhê ne, cama cavanga cha tu quixti ni.

*Ficojo cha Jesús xcun nahmi xi matitjun*

<sup>53</sup> Hya xi camá ne, quijicojo xuta jan Jesús xcun nahmi xi matitjun. Hane xi cafehe cha cojo Jesús jan ne, sehe camatangun yêjê ni nahmi xi matitjun cojo xuta changá cojo cha maestru tsêhê ley. <sup>54</sup> Ngajan xi cha Pedru ne, quijitjengui cha Jesús tu cjín tu cjín ni. Cafehe cha hiscan ndatsen ndava nahmi xi matitjun jan. Hane ngajan cavêjña cha cojo cha nísê tjejen ndava ndihi, tsihasu rê cha yojo rê cha cojo cha nísê jan.

<sup>55</sup> Hane nahmi xi matitjun jan cojo yêjê sa xuta xi matitjun ne, cavangui me xuta xi tsinguixi jyê rê Jesús, cojo sa xi cuma tsiquehen me me. Peru tsjain mé jyê rê Jesús casacu rê me. <sup>56</sup> Ha ndasa jemu cjín xuta xi cavinchajyê me Jesús ne, peru suva cjuandesu yêjê ni cjua xi cachja me ta, hacjahi chja ngu ne, hacjahi chja ngu. Hacuuiin tangun má cjua rê me. <sup>57</sup> Ngujo me ne, chja me ta cahndê me xi cuitjin cachja Jesús: <sup>58</sup> “Ngahan ne, tsinguétsun yungun xi matitjun xi casahmi xuta vé, hane cahntsaxi jyan nixtin ne, sahme nga ngu. Peru hacuiin cojo tsja xuta xi cuma hya.” Cuahaxutjin cahndê me xi cachja Jesús. <sup>59</sup> Hisca me xi cuacun jan ne, hacuaha hacuiin tangun camá cjua rê me.

<sup>60</sup> Ngajan xi nahmi xi matitjun tsêhê nahmi xi yahnga jan ne, casecunvasen me, hane sehe cavinenguise me Jesús cuitjin:

—¿Há chjayinnguini hisca xi ngu cjua tsêhê jyê riji xi vinya xuta xi cuicun vi? —Cuatjin cachja me.

<sup>61</sup> Hane Jesús ne, tu jyuun ni casecun me. Hisca ngu cjua cafayanguiin me. Hya xi camá ne, cavinenguise nga nahmi xi matitjun jan ngu ndiya cojo Jesús cuitjin:

—¿Há ngaye xi Quihndi rê Nina naja? ¿Há ngaye xi catsingatju me xi cumá titjun tsijin?

<sup>62</sup> Ngajan xi cafayangui Jesús cuitjin:

—Juun, ngahan. Hacuaha cjeuhe nixtin xi chutsujun ná xi tejña ladu quixi tsêhê Nina. Hacuaha chutsujun ná xi cuinduva ngajñi rê yufi, xi cúa nga tsêhê Nina.

<sup>63</sup> Hane ngajan xi nahmi xi matitjun jan ne, jemu camacjan rê me ne, hisca tsjian rê me cavicheya me. Hane cuitjin cachja me:

—¿Mé sa cjua xi mameje? <sup>64</sup> Ngayun ne, ha canuhyun hacutjin xi tsixcuehyu cha Nina. ¿Mé xi nújun quihndê?

Ngajan xi yějě xuta jan ne, cachja me ta meje rě xi cueya Jesús.

<sup>65</sup> Hane cavetsihin ngujo me cavěhě natya me Jesús. Hane hacuaaha cavatsa me xcun Jesús, sehe cavetsihin cavaja me. Sehe ngajan xi cachja me cuitjin:

—Tinoje yo xi cavaja ri.

Hya xi camá ne, cavetsihin xi cha nísě jan ne, jemu cavaja cha me.

*Pedru ne, fahma me Nai naja*

<sup>66</sup> Jinguyějě rě xi cuatjin tijima ne, cha Pedru ne, tacun cha ndatsen ndihya. Hya xi camá ne, hora vėhě canduva ngu na xi sahmi xa ndava nahmi xi matitjun jan. <sup>67</sup> Hane cavěě na xi tacun cha Pedru tsihasu rě cha yojo rě cha hiscan tacun ndava ndihi. Hane casecun na cafahacuenda na cha. Sehe ngajan xi cachja na cojo cha cuitjin:

—Ngayun ne, ladu rě Jesús tsěhě nandya Nasaret ngayun.

<sup>68</sup> Ngajan xi cachja cha Pedru cuitjin:

—Hisca hveen mé xi noje.

Hya xi camá ne, sehe cavetju cha quiji cha casecun cha hiscan tu cuiseen ni tsěhě ndatsen ndihya. <sup>69</sup> Hane ngajan xi na xi sahmi xa tsěhě nahmi jan ne, cafahacuenda nga na cha hiscan quisecun cha. Hacuaaha cavetsihin nga na cachja na cojo xuta xi hinchacun jan cuitjin:

—Cha vėhě ne, ladu rě Jesús má cha.

<sup>70</sup> Xi tu cahndě cha Pedru xi cuatjin cachja na jan ne, ngutjen cafayangui cha xi quixiin xi chja na. Xi cafě ngu hora lihndi ne, hacuaaha cachja xuta xi hinchacun jan cojo cha cuitjin:

—Quixi jain xi ladu rě Jesús má ngaye ta distritu Galilea ne, ngajan nangui riji.

<sup>71</sup> Sehe ngajan xi hisca Nina caveyanangui cha Pedru ne, cachja cha xi hviiin cha me, cuitjin cachja cha:

—Věě Nina jain xi hveen yo me xi nújun vė.

<sup>72</sup> Hane hora vėhě ne, cajihnda xahnda. Hya xi camá ne, catsinguitsjen cha Pedru cja xi cachja Jesús cojo cha xi cachja me cuitjin: “Chaja sa xi squihndajo xahnda ne, ngaye ne, ha jyan ndiya cuinoje xi hyiin yo ngahan.” Hora xi catsinguitsjen cha cja vėhě ne, cajihnda cha.

## 15

*Ficojo cha Jesús xcun Pilatu*

<sup>1</sup> Hya xi casahasen xi camá nchujun jan ne, camatangun nga nahmi xi matitjun cojo xuta changá cojo cha maestru tsěhě ley cojo yahnga sa xutaxa rě xi hinchajñi me. Sehe catsihñu me Jesús ne, sehe quijicani me xcun gobernador xi hmí rě Pilatu. <sup>2</sup> Xi cafehe me cojo Jesús xcun Pilatu ne, sehe cavinenguise Pilatu cojo Jesús cuitjin:

—¿Há ngaye xi matitjun ngaye tsěhě xuta nangui Israel?

Ngajan xi cafayangui Jesús cuitjin:

—Cuatjin sacuaaha canújun vė.

<sup>3</sup> Hane ngajan xi nahmi xi matitjun jan ne, jemu cjín xcusun jyě xi cavincha me tsěhě Jesús. <sup>4</sup> Ngajan xi Pilatu ne, cavuya cavinenguise nga me Jesús cuitjin:

—¿Há chjayinguiin camahani? Jercu cjín jyě riji cavincha me.

<sup>5</sup> Peru Jesús ne, ha quihndě cafayinguiin camahani me. Hane Pilatu ne, jemu quijircun camahani rě me.

*Hacuiin Jesús ta Barrabás mandaya*

<sup>6</sup> Suhl vėhě ne, Pilatu ne, ha tuxa xcusun rě me xi nu nu ni vėhěndaya me ngu presu xi meje rě xuta xi cumandaya. <sup>7</sup> Ndavaya ne, jiya ngu presu xi hmí rě Barrabás cojo ngujo sa presu xi catsiquehen rě xuta tsěhě ngu si. <sup>8</sup> Hya xi camá ne, canduva xutacjín ne, cafehya me cojo Pilatu xi sahmi me vėhě sacuatjin xi ha xcusun rě me. <sup>9</sup> Ngajan xi cachja Pilatu cojo rě xuta jan cuitjin:

—¿Há meje nuju xi cuáxě cha xi matitjun tsujun?

<sup>10</sup> Cuatjin cachja Pilatu ta tsěhě xi ha vėě me xi ngatsě rě cjuaxin sahmi nahmi xi matitjun jan cojo Jesús, vėhě xi quijicani me Jesús ngajan. <sup>11</sup> Peru nahmi xi matitjun jan ne, quiji cavinchangui me xutacjín jan xi meje rě me xi cuichja xuta jan xi catěhěndaya Pilatu Barrabás. <sup>12</sup> Ngajan xi cavinenguise nga Pilatu cojo xutacjín jan cuitjin:

—¿Mé sahme cojo cha xi nújun xi matitjun tsujun ni?

<sup>13</sup> Ngajan xi xuta jan ne, cuitjin jercu cachja me:

—Tetuhun cha xcun cru.

<sup>14</sup> Ngajan xi cachja Pilatu cojo rě me cuitjin:

—Peru ¿mé xi choho casahmi cha?

Peru xuta jan ne, hitsě sa rcu cachja me cuitjin:

—Tetuhun cha xcun cru.

<sup>15</sup> Hya xi camá ne, ta meje rë Pilatu xi cumangucacun xuta ne, cavëhëndaya me Barrabás. Hane xi cavatju catsingatju me Jesús casehen rë ne, sehe cavuya casua nga me cojo cha sindadu xi cjue cuetaha cha me xcun cru.

*Jesús ne, quisun ngu corona tsëhë nahya rcu me*

<sup>16</sup> Hya xi camá ne, quijicojo cha Jesús taha cahntsua hinchua hiscan ndatsen ndava Pilatu. Hane sehe casahmi tangun sa cha yëjë sindadu cjín. <sup>17</sup> Hya xi camá ne, cavaxë cha tsjian rë Jesús, hane sehe catsicaja cha me ngu tsjian hani. Hacuaha catsihya cha ngu corona nahyá xi cavesun cha rcu me. <sup>18</sup> Sehe cavetsihin cavincha cha viva rë me xi tsixcuehyu cha me, sacuaaha xi macjain rë me xi me vëhë matitjun me tsëhë xuta tsëhë nangui Israel.

<sup>19</sup> Hya xi camá ne, sehe cavaja cha ngu rquí ya rcu me. Cavëhë natya cha me. Hacuaha cavixcuhnchi cha xcun me, sacuaaha xi faharcun cha me. <sup>20</sup> Hya xi cajnetaha catsixcuehyu cha me cuatjin ne, sehe cavaxë cha tsjian hani xi catsicaja cha me, hane sehe cavuya catsicaja nga cha me tsjian rë me xi tsëhë jain me. Hya xi camá ne, sehe quijicojo cha me xi cuetaha cha me xcun cru.

*Cavetaha cha Jesús xcun cru*

<sup>21</sup> Ndiya cjuí cha cojo me ne, cavechutaha cha ngu xuta changá xi hmí rë Simón tsëhë nandya Cirene, nahmi rë cha Alejandru cojo cha Rufu. Nduva me xi quiji me nguifña. Hane xi cavechutaha cha me, casahmi cha me nguýjë xi cuesuntyja me cru rë Jesús. Hya xi camá ne, cavesuntyja me, sehe quiji me cojo.

<sup>22</sup> Sehe cavechu yëjë xuta jan hiscan xi hmí rë Gólgota, cjuá xi meje cuichja Naxi Nínda Rcuun. <sup>23</sup> Sehe xuta jan ne, túsua me xan rë uva xi tecjan rë nandá rë tyjungunsa xi cuihi Jesús, peru cahviin me. <sup>24</sup> Hya xi camá ne, cavetaha cha me xcun cru. Hane tsjian rë me ne, cavincha rë cha ngu suerte ne, sehe cumatsejen mé xcusun tsjian rë me xi satë rë xingu xingu cha.

<sup>25</sup> Hya ne, chuya rë fane ñaja tsëhë nguítajñu. <sup>26</sup> Hane camahindu ngu letreru cojo jyë rë me xi chja cuitjin: “Me xi Matitjun tsëhë Xuta nangui Israel.” Sehe quiji casetaharcu cru. <sup>27</sup> Hacuaha cavityanguí cha ngu chëjë ngu ngu ladu rë tjeheh rë me, jimangu cojo cru rë. <sup>28</sup> Cuatjin cavetjucaa cjuá xi camahindu xcun xujun rë Nina xi chja cuitjin: “Cuichja xuta ta me vihi ne, ngu xuta tsehen me.”

<sup>29</sup> Hya xi camá ne, xuta xi cavatju jan ne, xi catsixcuehyu me Jesús ne, catsiniya me rcu me, hacuaaha cuitjin cachja me:

—Canoje xi cuma ninguetzin yungun xi matitjun, hane cahntsua xi jyan nixtin ne, cama nga canindeje sove. <sup>30</sup> Quihndé ne, sá cuatjin cuma nihñi ne, naxetje sove yojo riñi, titujni tsëhë cru vë. —Cuatjin cachja xuta.

<sup>31</sup> Ha chuya vëhë ni, cavisiajmi nahmi xi matitjun cojo cha maestru tsëhë ley ne, ngajñi rë me cojo xicjin me xi tsixcuehyu me Jesús. Cuitjin chja me:

—Cavaxëtje cha xuta, peru quihndé ne, maji vaxëtje cha yojo rë cha. <sup>32</sup> Sá xi hacui jain cha xi catsingatju Nina xi cumatitjun tsajan ne, catitujne cha tsëhë cru chutsejen, cojo sa xi cumacjain naja tsëhë cha. —Cuatjin cachja me tsëhë Jesús.

Hacuaha cha chëjë xi cojo xtyanguí taha cru jan ne, cojo cha choho cachja cha tsëhë me.

<sup>33</sup> Xi camanchisen tsëhë nixtin vëhë ne, jinguyë ni ladu vëhë ne, camajñu. Jyan hora quijicani rë. <sup>34</sup> Xi café jyan hora vëhë ne, jercu cajíndaya Jesús, cachja me hne rë me cuitjin:

—Eloí, ¿lama sabactani? —cjuá xi meje cuichja cuitjin: Ngayun, Nina naha, ¿mé má canismutacun ná?

<sup>35</sup> Hane ngujo xuta xi hinchacun jan ne, xi cavijninrcu me hne rë Jesús ne, xi má rë xuta jan ne, nima Elías, ngu profeta tsëhë nixtin hatsëé, jindaya Jesús me.

<sup>36</sup> Hane sehe cavanga ngu me quiji catsicahnchi me ngu tsjian hinda cojo xan rë uva xi ha san. Sehe cavetaha me rcu ngu ya nduju, sehe cavetaha me hntsua Jesús xi cuihingui me. Hacuaha chja me cojo xicjin me cuitjin:

—Cuinechyan hitse ne, ¿há cuinduva jain Elías tsitujne me Jesús tsëhë cru?

<sup>37</sup> Peru Jesús ne, hora vëhë jercu cajíndaya me, hane cahme me. <sup>38</sup> Hacuaha hora vëhë ni ne, tsjian nduju xi tyanguí cahntsua yungun xi matitjun ne, hisca rcu hiscan ntsacu canduva catiyavasen. <sup>39</sup> Hya xi camá ne, ngu cha capitán tsëhë sindadu xi secun tiña cru hisca tyanguí Jesús jan ne, xi cavëé cha hacutjin xi cahme Jesús ne, ngajan xi chja cha cuitjin:

—Cjuaquixindaja xi me vihi xi Quihndi rë Nina me.

<sup>40</sup> Hacuaha hinchacun sa ngujo yachjin, vutsejen na tsëhë cjin ni. Ngajñi rë na xi cuacun vëhë ne, quisecon na Salomé cojo na María tsëhë nandya Mágdala cojo na María naa rë cha Jacobo lihndi cojo cha José. <sup>41</sup> Na yachjin xi cuacun vë ne, cojo na cavisecoo na catsindaja na xi cajiné Jesús cojo cha ladu rë me, hya xi catsujyihya me ngajan ladu tsëhë distritu

Galilea. Hacuaha jercu cjín sa yachjin hinchacun na jan xi hacuaha cojo na quiji na ngajan nandya Jerusalén cojo Jesús.

*Jesús ne, caseya me tsjun rê me*

<sup>42</sup> Nixtin xi cahme Jesús ne, hacuaha hya vispra tsêhê nixtin xi chjahájenda rê. Hane xi quiji hora jan ne, <sup>43</sup> ngu xutaxa rê xi tjemu chjahanrcun rê, xi hmí rê José tsêhê nandya Arimatea, me xi hacuaha tacunya nixtin xi cjuêhe Nina cuma titjun me tsêhê yêjê Israel, cavejñahñu me cjuatacun rê me sehe quiji me ndava Pilatu. Hane cafehya me cahndê cojo Pilatu xi cjuahaxin me nima Jesús. <sup>44</sup> Hya xi camá ne, Pilatu ne, quijircun rê me xi cuatjin cachja José xi ha cahme nima ta, tsêhê xi cjêê jyê hora xi casetaha Jesús xcun cru. Hane vêhê xi catsingatju me quiji chjaha rê cha capitán. Hane sehe cavinenguise me cha sá xi quixi xi ha cahme jain Jesús. <sup>45</sup> Xi tu camachaya rê me cju tsêhê cha capitán jan xi ha cahme jain Jesús ne, sehe ngajan xi cachja me cojo José ta cuma cjuê tsitjujne me nima. <sup>46</sup> Ngajan xi José ne, vêhê ta cavatsê me ngu tsjiantê xatsê ne, sehe quiji catsitujne me nima Jesús tsêhê cru, sehe cavaxtê rê me tsjian jan. Hane sehe cavaha me nima quijicojo me hiscan tacun rê me ngu tsjun xi cafahanguitaha me cahntsua ngu naxi. Hane ngajan caveya me nima. Sehe catsindefajne me ngu ndyojo jyê xi cavechja rê tingotjo tsjun jan. <sup>47</sup> Hane na María tsêhê nandya Mágdala cojo na María naa rê cha José ne, cavêê na hiscan caseya nima.

## 16

*Vuya nga Jesús cjuahñu*

<sup>1</sup> Xi camá nguixun tsêhê nixtin xi chjahájenda rê jan ne, na Salomé cojo na María tsêhê nandya Mágdala cojo na María naa rê cha Jacobo ne, cavatsê na rqui xi ndaja jne xi cuitjnu na nima. <sup>2</sup> Xi casahasen domingu ne, hora xi tivetjucaa tsuhi ne, cavatju na yachjin jan quiji na hiscan tacun tsjun rê nima. <sup>3</sup> Hane ngajñi cjuí na jan ne, ngajan xi chja na cojo xicjin na cuitjin:

—¿Yo cuisecoo naja xi nindefajne ndyojo xi quitaha tingotjo rê tsjun jan?

<sup>4</sup> Peru xi tu cafehe na jan ne, ndyojo jyê xi quitaha tingotjo rê tsjun jan ne, ha quihndê tsjin quitaha cahndê rê ta ha xin jiña. <sup>5</sup> Xi cavisehen na cahntsua tsjun jan ne, cavêê na ngu cha xi tacun cha taha ladu quixi, yaja cha ngu tsjian tyava nduju. Hya xi camá ne, jemu catsacjun camahani na. <sup>6</sup> Ngajan xi cachja cha cojo rê na cuitjin:

—Xicarcuun. Ngahan ne, ha hvê xi Jesús tsêhê nandya Nasaret vinchunsun me, me xi cavetaha xuta xcun cru. Peru me vêhê ne, tsjin me ngehe ta cavuya cjuahñu rê me. Chutsujun cahndê hiscan xi cafaña xuta me. <sup>7</sup> Quihndê ne, tjangun sanii ne, tinújun cojo cha ladu rê me, cha Pedru ne cojo cha xi yahnga ta, Jesús ne, hisca tjun cuechutaha me yun ngajan distritu Galilea sacuahatjin xi ha cachja me cojo nuju.

<sup>8</sup> Xi tu cavetju na tsêhê tsjun jan ne, ña fatsê na xi jemu catsacjun na camá. Hane vanga sanii na cafe na. Hane hisca xi ngu cachjaain na cojo, tsêhê xi jemu catsacjun na camá.

*Jesús ne, ñahñu ni camatsejen me na María Magdalena*

<sup>9</sup> Jesús ne, xati camaha sa tsêhê nixtin domingu ne, hya cavuya cjuahñu rê me. Hya xi camá ne, tjun sa na María tsêhê nandya Mágdala cavêê na me, na xi cavaxê me yatu xitsehen xahasen rê hatsêê. <sup>10</sup> Hane na vêhê quiji quicun na xuta ladu rê me xi jemu jihnda tsêhê cjuachoho. <sup>11</sup> Hane xi cahndê me cju ta Jesús tacun nga me cjuahñu hane na vêhê ne, cavêê na me, camacjaain rê xuta jan.

*Hya xi cavuya Jesús cjuahñu ne, jo cha ladu rê me cavêê cha me*

<sup>12</sup> Hya xi cavatju vêhê ne, jo cha ladu rê Jesús ne cjuí cha nguñiña. Hane cojo Jesús cjuí me cojo cha, peru ha ngu xcusun jyíhi me. <sup>13</sup> Hane cha xi cuacun jan ne, xi tu cavêê cha xi hacui me ne, cavuya cha ne, quiji cachja cha cojo cha xi yahnga xi cavêê cha me. Peru hacuaha camacjaain rê cha xi yahnga jan.

*Jesús ne, casuaxa me cha apóstol*

<sup>14</sup> Ngu ndiya nga ne, cafehe nga me hiscan siu cha ladu rê me xi tengu jan, tijinê cha niñu. Hane cachjataha me yêjê ni cha ngatsê rê xi jemu taja rcu cha, tsêhê xi camacjaain rê cha tsêhê xuta xi cavêê rê me xi tacun nga me cjuahñu. <sup>15</sup> Cavatju cacjan me cojo cha ne, sehe ngajan cavetsihin cachja me cojo cha cuitjin:

—Tangún jingujyê ni ngasunhdê ne, tinújun cojo yêjê ni xuta cjuá rê Nina. <sup>16</sup> Yo xi cumacjain rê cjuá vêhê hacuaha xtenda ne, cuechu xcun Nina. Yo xi cumacjaain rê ne, cuechu me castigu xi sahmi Nina xi cueyun. <sup>17</sup> Hane xuta xi cumacjain rê me ne, sahmi me xcusun vihi xi cueyanangui me ñihi naha ne: cuma cuaxê me xitsehen xi hinchaxahasen rê xuta; cuma cuichja me ngu ngu xcusun hne; <sup>18</sup> yê ne, sá xi cjuahatsja me chu, o sá xi cuihi me ngu venenu ne, tsjin mé cumá rê me; hane tu cuetahatsja ni me xuta hmu rê ne, cumandaja xuta hmu rê jan.

*Jesús ne, cjuiniji me ngahnga*

<sup>19</sup> Xi cajnetaha cachja Jesús, me xi Nai naja, cojo cha ladu rë me cjuã vëhë ne, quiji me ngahnga, cavëjña me ladu quixi tsëhë Nina. <sup>20</sup> Hane cha ladu rë me ne, cavetju cha quiji cha, cachja cha cjuã rë Nina yëjë ni ladu. Hacuaha Nai naja ne, cavisecco me cha. Hane ngatsë rë xcusun xi cavëë xuta xi casahmi cha jan ne, vëhë xi tsejen xi quixi cjuã xi cachja cha.

## Cjuandajyih Xi Catsihindu San Lucas Tséhë Jesucristu

<sup>1</sup> Jemu cjin xuta xi ha catsihindu me cjuaxi chja tséhë yějë xcusun xi sehe casahmi Nina ngajñi naja ngayaan xuta ngasunhndë. <sup>2</sup> Meje tsihindu me cjuaxi vëhë sacuatjin camahani casua camachaya naja me xi cavëëndaja cojo tuxcun hisca ntsacu cavetsihin sehe cafachaxa me xi tsinguitsojo me cjuaxi jan. <sup>3</sup> Hisca hatsëë ne, ngahan ne, hacuaha ha jemu ndaja cavinenguësë yějë ni hacutjin camá. Vëhë xi xi má ná ne, hacuaha ndatjin xi tsihindu chichihin nuju cjuaxi tséhë yějë hacutjin camá, ngayun tatá Teófilo, <sup>4</sup> cojo sa xi sacúndaja nuju cjuaxiquixi tséhë cjuaxi ha camachaya nuju jan.

### *Cafehe cjuaxi tsin Juan Vitenda rë Xuta*

<sup>5</sup> Nixtin hya xi Herodes cavitexa me yějë ni xuta tjë rë Israel ne, cavéjña xu ngu nahmi xi hmí rë Zacarías, me xi má ladu rë Abías. Hane chjuun rë Zacarías ne, Elisabet hmí rë me, hacuaha tjë rë Aaron xu má me. <sup>6</sup> Hane Zacarías cojo Elisabet ne, tyjahi cjuatacun rë me xcun Nina ta, tséhë xi tsajin xu jyë rë me xi tisahmichihin me yějë ni sacuatjin cavitexa Nina. <sup>7</sup> Hane tsajin rë me quihndi ta, tséhë xi Elisabet ne, hatuxa maji xu sacú rë me quihndi, hacuaha catsijo ni me ne, ha jemu changá xu me.

<sup>8</sup> Hya xi camá ne, cavechú nixtin xi casatë rë Zacarías cojo yějë sa nahmi xi má ladu rë Abías xi sahmi xu me xá xcun Nina xi má me nahmi. <sup>9</sup> Hane sacuaaha xcusun rë nahmi ne, catsintsavë xu me ngu suerte cojo sa xi cuma tsejen ne, jarë xu me xi satë rë xi cuisehen ndava Nina, cuaca tyjungunsa. Hya xi camá ne, casatë xu rë Zacarías. <sup>10</sup> Hane yějë xutacjin jan ne, caviyuju xu me candatsen sahmi me oración rë me, hora xi tivaca xu Zacarías tyjungunsa cahntsua ndava Nina. <sup>11</sup> Hane hora xi tivaca me tyjungunsa jan ne, camatsejen xu ngu ángel secun taha ladu quixi tséhë ngasuncun hiscan xi ti tyjungunsa. <sup>12</sup> Hane xi cavëë Zacarías ángel jan ne, jemu quijircun rë me hacuaha jemu catsacjun xu me camá. <sup>13</sup> Ngajan xi ángel jan ne, cuitjin xu cachja cojo rë me:

—Xicarcuin ngaye Zacarías ta, cjuaxi cachjahye ne, cahndë Nina. Vëhë xi na Elisabet chjuun riji ne, sacú rë na ngu quihndi, hane quihndi vëhë ne, Juan tehe ñihi rë. <sup>14</sup> Hane jemu cjuaxi ri cjuasua hacuaha jemu ndaja cuma ri, hacuaha jemu cjin xuta xi jercu tjín rë me cjuasua xi catsin quihndi vëhë ta, <sup>15</sup> tséhë xi jemu jyë hnga cuma cojo cjuatacun rë ngajan xcun Nina. Hacuaha cuiin camahani xan hacuaha cuiin camahani nandá machihi. Hacuaha hisca hya xi caseya quihndi vë cahntsua naa rë ne, Hasen rë Nina quitsë rë xahasen rë. <sup>16</sup> Hacuaha quihndi vëhë sahmi xi jemu cjin xuta tjë rë Israel cuya nga me ndiya rë Nina rë me. <sup>17</sup> Quihndi vë ne, vëhë cuinduva tijun, sehe cuinduva Nina. Hane sacuatjin jyë hnga profeta Elías cojo cjuatacun rë me hatsëë nixtin ne, hacuanitjin ni jyë hnga cuma quihndi vëhë cojo cjuatacun rë, cojo sa xi quihndi vëhë ne, sahmi xi cuya cuma ndaja cacun nga yějë ni nahmi rë nixti cojo nixti rë me, hacuaha sahmi xi yějë xuta xi vihndiin me tséhë Nina ne, cuma tangun cjuatacun rë me cojo cjuatacun rë xuta xi tyjahi cjuatacun rë me. Hane cuatjin chuva vëhë ne, cuëhëchjine quihndi vëhë xuta xi cuihndë me tséhë Nina. —Cuahaxutjin cachja ángel.

<sup>18</sup> Sehe ngajan xi Zacarías ne, cuitjin xu cavinenguise me ángel:

—¿Hacutjin sacú ná cjuaxiquixi xi cuatjin jain cuma ni? ta ngahan ne, ha jemu changá ngahan, hacuanitjin ni chjuun naha ta jemu changá na. —Cuahaxutjin cachja me.

<sup>19</sup> Sehe ngajan xi ángel jan ne, cuihixutjin cafayangui nga:

—Ngahan xi Gabriel ngahan; ngahan xi tejña ngajan xcun Nina. Hacuaha ngahan xi catsingatju ná Nina xi cuisiajme cojo ri hacuaha suá cumachaya ri cjuandajyih vëhë. <sup>20</sup> Chutsijin ni, quihndë ta camacjaain ri tséhë cjuaxi cachjá cojo ri ne, cumaji cuinoje, tséhë xi cuma lihmi ngaye hisca hya xi cuetjucaa cjuaxi cachjá cojo ri. Cjuaxi vëhë ne, hatuxa cuetjucaa hya xi cuechú nixtin rë. —Cuahaxutjin cafayangui ángel.

<sup>21</sup> Jinguyëjë rë ne, xutacjin jan ne, jercu siuya xu me Zacarías, hisca fircun rë me tséhë xi cuatjin jercu vindëya rë Zacarías xi cavisehen xu me ndava Nina. <sup>22</sup> Hane hya xi cavetju me ne, maji xu chja me cojo xuta. Hane xuta jan ne, cavacun rë me ta Zacarías ne, tjín mé xi cavëë me. Hacuaha tu tisahmitsja ni me ta, tséhë xi lihmi cuaha xu me. <sup>23</sup> Hya xi cavatju nixtin xi satë rë me xi sahmi me xá xi má me nahmi ne, cavuya cafe xu me ndava ne.

<sup>24</sup> Hya xi camá ne, xi cavatju sa nixtin ne, casacu xu rë chjuun rë me quihndi, hane cahntsua hñú sá xi jiya quihndi rë Elisabet jan ne, cuatjin caseyahma xu me ndava me. Hane cuitjin xu cachja súv me: <sup>25</sup> “Cuitjin casahmi Nina cojo ná ngu cjuandaja, quihndë xi camayuma rë me ngahan hane cafachaxin me cjuasava xi má ná ngajñi rë xuta tséhë xi sacuiin ná quihndi.” Cuahaxutjin cachja me.

### *Cafehe cjuaxi tsin Jesucristu*



<sup>26</sup> Xi ma jyun sá xi jiya xu quihndi rë Elisabet ne, catsingatju Nina ángel xi hmí rë Gabriel ngu nandya xi hmí rë Nasaret, tséhê distritu Galilea, <sup>27</sup> ndava ngu chjuun xungun xi hmí xu rë María. Hane María jan ne, tacunvasen cjuavixan rë me cojo ngu xihin xi hmí rë José, ngu me xi tjë rë David, ngu xutachanga xi camatitjun xu tséhê xuta tjë rë Israel. <sup>28</sup> Hane xi cavisehen ángel ndava María jan ne, sehe cachja xu cuitjin:

—Cuhndari, tsan. Nina ne, catsinchacun me ngaye, hacuaha tacun me cojo ri. Ngajñi rë yëjë ni yachjin ne, ngaye xi jercu catsinchacun ri Nina. —Cuatjin xu cachja ángel.

<sup>29</sup> Xi cahndë xu María cjuá xi cachja ángel jan ne, catsacjun me camá, sehe catsingataha cacun xu me mé xcusun nina xi casua ángel me. <sup>30</sup> Sehe ngajan xi ángel ne, cuitjin xu cachja cojo rë me:

—Xicarcuin María ta Nina ne, jemu tjin rë me cjuandaja cojo ri. <sup>31</sup> Quihndë ne, sacú ri ngu quihndi, hane hacuaha cuechú nixtin xi tsin ri quihndi vëhë. Quihndi vëhë ne, tehe ñihi rë Jesús. <sup>32</sup> Hacuaha jemu jyë hnga cuma cojo cjuatacun rë, hacuaha Quihndi rë Nina xi Matitjun cjuahañihi. Hacuaha Nina sahmi me xi cuitexa quihndi vëhë sacuatjin cavitexa xutachanga rë, me xi hmí rë David. <sup>33</sup> Hane vëhë cuitexa rë xuta tjë rë Israel, hane gobiernu rë ne, tsajin nu tsajin nixtin cuijnetaha. —Cuatjin xu cachja ángel.

<sup>34</sup> Sehe ngajan xi María ne, cavinenguise xu me ángel cuitjin:

—¿Hacutjin cuma xcusun vi? ta ngahan ne, cjëë sacú xihin naha. —Cuatjin xu cachja me.

<sup>35</sup> Hane xi cafayangui ángel ne, cuitjin xu cachja:

—Hasen rë Nina xi Matitjun ne, cuinduva cuaxtë ri sacuaha ngu tjahnguen. Vëhë xi quihndi xi tsin ri ne, hatuxa tyjahi cojo cjuatacun rë, hacuaha Quihndi rë Nina Jain. <sup>36</sup> Hacuaha na Elisabet xinguin ne, handasa ha jemu changá na ne, hacuaha casacu rë na ngu quihndi. Ha quihndë jyun sá yaha na quihndi, na xi chja cjuá xi hatuxa maji sacú rë quihndi. <sup>37</sup> Cuatjin camá ta, xi cuma rë Nina ne, tsajin camahani mé xi cumaji cuma. —Cuatjin xu cachja ángel.

<sup>38</sup> Ngajan xi María ne, cuitjin xu cafayangui me:

—Ngahan ne, sacuaha ngu hndixahan rë Nina ngahan. Catisahmi Nina cojo ná sacuatjin cjuá xi canújun. —Cuatjin xu cachja me.

Ngaxtun vëhë ne, sehe cafe ángel.

### *Cavusehenya María Elisabet*

<sup>39</sup> Nixtin hya ne, cavetju xu María, ngu quixi ni quiji me ngu nandya ngajan nangui ndetjún tséhê distritu Judea. <sup>40</sup> Hane xi cafehe me ngajan ne, cavisehen xu me ndava Zacarias, sehe cachja me nina cojo Elisabet. <sup>41</sup> Hane xi cahndë xu Elisabet xi cachja María nina ne, cafiniya xu quihndi xi jiya cahntsua Elisabet. Ngajan xi Elisabet ne, catsë rë xahasen rë me cojo Hasen rë Nina. <sup>42</sup> Hane sehe jercu hñu xu cachja me cjuá vihi cojo María:

—Ngajñi rë yëjë ni yachjin ne, ngaye xi jercu catsinchacun ri Nina, hacuaha catsinchacun me quihndi xi tsin ri. <sup>43</sup> ¡Mé má ngahan xi tu ngaye xi naa rë nai naha ngaye, ndove tichushinye ná! <sup>44</sup> Xi tu cahndë xi canoje nina cojo ná ne, hora vëhë cafiniya quihndi xi jiya cahntsuá xi ndama rë. <sup>45</sup> Jemu ndaja tsiji xi macjain ri xi yëjë ni cjuá xi cachja Nina cojo ri ne, cuetjucaa jain. —Cuatjin xu cachja Elisabet.

<sup>46</sup> Sehe ngajan xi María ne, cuitjin xu cachja me:

Ngahan ne, jercu sahme jyë sahme hnga Nina;

<sup>47</sup> hacuaha jercu ndama ná tséhê Nina, me xi vaxëtje ná.

<sup>48</sup> Casahmicuenda Nina ngahan, ngahan xi sacuaha ngu hndixahan rë me ngahan ta, quihndë cojo nixtin xi cjuí sa ne, cuichja yëjë xuta xi siu cojo xuta xi sehe tsin sa xi jemu ndaja tsahan;

<sup>49</sup> tséhê xi Nina xi jemu jyë hnga me cojo ngahñu rë me ne, jemu vengui chji rë xcusun xi casahmi me cojo ná.

¡Jemu tyjahi me cojo cjuatacun rë me!

<sup>50</sup> Nina ne, hatuxa jemu tjin rë me cjuayumatacun cojo yëjë xuta xi faharcun rë me ha tucutjin cjin xuta tsetsin me jima ngundiya jima ngundiya.

<sup>51</sup> Nina ne, sahmi me hacutjin xi meje sahmi me cojo ngahñu jyë xi tjin rë me:

tsinguitsojo me yëjë xuta xi jemu tjin rë cjuaxta cahntsua xahasen rë;

<sup>52</sup> tsinguijne me xuta xi matitjun tséhê xcun xá rë,

hacuaha sahmi yehe sahmi hnga me xuta yuma.

<sup>53</sup> Xuta xi machaja rë me ne, jemu yehe cjuandaja sua Nina me,

peru xuta nchina ne, suvá tsja tiya me tsicuya Nina me cjué me.

<sup>54</sup> Nina ne, cuisecoo naja me ngayejen ni xuta tjë rë Israel, ngayaan xi tséhê me ngayaan, hacuaha tsinguitsjen me xi cumayuma rë me ngayaan.

<sup>55</sup> Xi cuatjin ne, cuetjucaa jain sacuatjin xi ha cachja me cojo xutachanga naja Abraham, cojo yějě sa tjě rě me.

Cuatjin xu cachja María.

<sup>56</sup> Hya xi camá ne, María jan ne, cavějña xu me jyan sá ndava Elisabet, sehe cavuya cafe me nangui rě me hiscan tjín ndava me.

*Hacutjin camá hya xi catsin Juan Vitenda rě Xuta*

<sup>57</sup> Quihndě ne, cavechú nixtin xi tsin rě Elisabet quihndi, hane catsin rě me ngu quihndi xihin. <sup>58</sup> Xi camachaya rě yějě xuta xi siu tahndee ndava me cojo yějě xicjin Elisabet xi jercu camayuma rě Nina Elisabet ne, jercu ndaja camá rě me xingu xingu me cojo Elisabet.

<sup>59</sup> Hya xi camá xu ne, xi cavetjucaa quihndi jan jyin nixtin ne, cafehe nga me xi siu tahndee ndava me jan cojo xicjin Elisabet xi cuma suhi tsěhě xi xtí chuxin rě quihndi. Hane meje suañihi me quihndi jan Zacarías, tsěhě xi cuatjin hmí rě nahmi rě. <sup>60</sup> Ngajan xi cachja xu naa rě quihndi jan cuitjin:

—Hajín ta quihndi ví ne, Juan cjuahañihi. —Cuatjin xu cachja me.

<sup>61</sup> Hane xuta jan ne, cuitjin xu cachja me:

—Peru ngayun ne, tsajin hisca ngu xingun xi cuatjin hmí rě. —Cuatjin xu cachja xuta jan.

<sup>62</sup> Ngajan xi xuta xi cuacun jan ne, tu casahmi tsjá xu ni me cojo nahmi rě quihndi xi cavinenguise me hacutjin meje rě nahmi rě quihndi xi cjuahañihi quihndi jan. <sup>63</sup> Ngajan xi Zacarías ne, cafehya xu me ngu pizarra, sehe ngajan catsihindu me cju vihi: “Juan cjuahañihi.” Cuatjin xu catsihindu me. Hya xi camá ne, yějě ni me ne, jemu quijircun xu rě me. <sup>64</sup> Hane hora vėhě ni ne, camá xu cachja Zacarías, hane jemu ndaja cavaxėndaja me Nina. <sup>65</sup> Ngajan xi xuta xi siu tahndee ndava me jan ne, jemu catsacun xu me camá, hane jingujyě ni ladu nangui ndetjín tsěhě distritu Judea hiscan xi siu xuta ne, jercu cavisajmi xu me tsěhě cjuacjintacun vėhě. <sup>66</sup> Hane yějě xuta xi camachaya rě cjuacjintacun vėhě ne, jercu cjin catsingataha cacun me, hisca cachja xu me cuitjin:

—¡Cuechú nixtin xi quihndi ví ne, cuma ngu xihin xi jyě hnga cojo cjuatacun rě!

Cuatjin xu cachja xuta xi cuacun jan ta, tsěhě xi quihndi vėhě ne, Nina yahangui jain me.

*Cjua rě Nina xi cachja Zacarías*

<sup>67</sup> Zacarías, nahmi rě quihndi jan ne, ña catsě rě me cojo Hasen rě Nina, hane cachja xu me cuitjin cju xi cafahatsja me tsěhě Nina:

<sup>68</sup> ¡Tjemu ndaja Nina naja ngayaan xuta tjě rě Israel!

tsěhě xi cuinduva me cjuaha naja me xi cuma yaan xuta rě me.

<sup>69</sup> Nina sahmi me xi ngajñi rě tjě rě David, ngu xuta rě Nina ne, cuetjujñi ngu xihin xi cuaxětje naja,

<sup>70</sup> sacuatjin xi ha cachja profeta xi cavejña me tsěhě Nina, hya xi cachja me cojo xutachanga naja cju rě Nina hatsěe nixtin.

<sup>71</sup> Hacuaha cachja Nina xi cuaxětje naja me tsěhě condra naja,

hacuaha cuaxětje naja me tsěhě yějě xuta xi choho vėě naja,

<sup>72</sup> hacuaha cumayuma rě me tsěhě xutachanga naja

hacuaha tsinguitsjen me compromisu ximinchacun xi casahmi me cojo xutachanga naja.

<sup>73</sup> Nina ne, cachja me: “Ngahan suva hvě”, hya xi casahmi me compromisu jan cojo xutachanga naja Abraham.

<sup>74</sup> Hya xi casahmi me compromisu vėhě ne, cachja me xi cuėhėndaya naja me tsěhě condra naja,

cojo sa xi ngayaan ne, hacuiin cojo chircun chjahanrcun me ta

<sup>75</sup> chjahanrcun me cojo ngu cjuatacun tyjahi, xi tsajin jyě naja xcun me

hacutjin nixtin xi nechán xcun cjuahñu naja.

<sup>76</sup> Ngaye tsan ne, hacuaha cuma ngaye ngu profeta tsěhě Nina xi Matitjun ta,

tsěhě xi ngaye cuihintitjin, choxehe ndiya tsěhě Nina,

<sup>77</sup> hacuaha tehe cumachaya rě xuta rě Nina xi cuaxětje Nina me,

cuma cuinújan ne, tsinchataha me tsěhě jyě rě

<sup>78</sup> ngatsě rě ta tsěhě xi Nina ne, jemu tjín rě me cjuayumatacun cojo naja.

Hacuaha ngatsě rě cjuayumatacun vėhě ne, Nina tsingatju me tsěhě ngahnga ngu xi sacuaha tsuhi,

<sup>79</sup> cojo sa xi sua hasen rě ngajñi naja xi nechán cojo ngu cjuacjintacun jyě xi hisca sacuiinyiin naja hacutjin naxentjeen yojo naja,

ngayaan xi tjemu tsavi nechantahan tsěhě cjuaveya,

hacuaha cojo sa xi cjuecojo naja

ndiya tsěhě cjuajeya.

Cuatjin cachja xu Zacarías.

<sup>80</sup> Hya xi camá ne, quihndi jan ne, camajyë, hacuaha cavejñahñu xu cjuatacun rë. Hane xi camá ngu xihin jyë ne, quiji cavéjña xu ngajan ngu xín camahani tsëhé nandya, hisca hya xi cavechú nixtin xi cavetsihin cachja cjua rë Nina cojo xuta tjë rë Israel.

## 2

### *Hacutjin camá hya xi catsin Jesucristu*

<sup>1</sup> Cuitjin xu camá nga ngunixtin hya xi Herodes vitexa me xuta tjë rë Israel. Me xi matitjun camahani xi hmí rë César Augusto ne, cavitexa xu me xi yëjë ni xuta xi siu ngahma gobiernu rë me ne, cjue me cuiyujutahaxujun me xi cuechjitje me. <sup>2</sup> Hacuaha hya xi cuatjin tjuntjun caviyujutaha xujun xuta ne, hya vitexa xuta Cirene ngajan distritu Siria. <sup>3</sup> Ngajan xi yëjë ni xuta ne, quiji xu me caviyujutaha xujun me, jima ngu me hiscan nangui rë xutachanga rë me.

<sup>4</sup> Cuatjin camá xi José ne, cavetju xu me tsëhé nandya Nasaret, distritu Galilea, quiji me distritu Judea, nangui rë xutachanga rë me David, hiscan xi hmí rë Belén, tsëhé xi José ne, tjë rë David xu má me. <sup>5</sup> Quiji casetahaxujun tangun me cojo María, me xi tacunvasen cjuavixan rë me cojo. Hane María ne, jiya xu quihndi rë me hya xi quiji me. <sup>6</sup> Hya xi camá ne, jinguyëjë rë xi siutahá xu me ngajan ne, cavechú nixtin xi tsin xu quihndi rë me, <sup>7</sup> hane catsin rë me ngu quihndi xihin, xi quihndi tjun rë me. Hane xi cavatju catsin quihndi jan ne, sehe cafahe me cavaxtë me ngu tsjian, sehe cafaña xu me quihndi jan cahntsua hiscan jineyá chu ta, tsëhé xi casacuiin xu cahndë cahntsua ndihya xi cuiyuju me, tsëhé xi jemu quitsë camahani xuta.

### *Cachja ángel cojo cha xi sahmi cuidadu rë chu*

<sup>8</sup> Ha taha ladu vëhé ni ne, siutahá ngujo cha nguixun ngajan nguijña, xi sahmi cuidadu xu cha chu tsángá rë cha. <sup>9</sup> Hya xi camá ne, ha tu ñahñu camatsejen xu ngu ángel tsëhé Nina hiscan xi siutahá cha, hane hora vëhé ni ne, hasen ndajyihí rë Nina ne, jercu casahmi hasen xu rë jinguyëjë ni hiscan xi siutahá cha, hane jemu catsacjun camahani cha camá. <sup>10</sup> Ngajan xi cachja xu ángel cojo cha cuitjin:

—Xicarcuun ta, nguehe nduva tisuá cumachaya nuju ngu cjuandajyihí xi hisca yëjë xuta tjë rë Israel jercu ndaja cuma rë me <sup>11</sup> ta nguehe Belén, nangui rë xutachanga nuju David ne, quihndë catsin ngu quihndi xi cuaxëtje nuju, quihndi xi Nina catsingatju rë xi cumatitjun tsujun. <sup>12</sup> Hane cuitjin sacú nuju cjuaquixi tsëhé cjua xi cachjá cojo nuju vë: xi cjuhun jan ne, cuechun hiscan xi chun ngu quihndi tixtë rë tsjian, jiña cahntsua hiscan jineyá chu. —Cuatjin xu cachja ángel.

<sup>13</sup> Hane ha tu ñahñu camatsejen sa jercu cjín camahani ángel xi nduva xu ngahnga, cafehe hiscan xi secun ángel xi cafehe titjún, tivaxëndaja rë Nina cojo cjua vihi:

<sup>14</sup> Jemu jyë hnga Nina cojo Hasen rë me ngajan ngahnga!

¡Hane nguehe nangui ne, cuisehen cjuajeya rë Nina cahntsua xahasen rë xuta xi chuya rë Nina tsëhé!

Cuatjin xu cachja ángel cjín jan.

<sup>15</sup> Hya xi camá ne, hya xi cavuya quiji nga ángel jan ngahnga ne, cha xi sahmi cuidadu chu tsángá rë jan ne, cuitjin cachja cha cojo xicjin cha:

—¡Cjuanguen ni! Cjuanguen hisca nandya, cuanguen chutsejen xcusun xi camá vi, sacuatjin casua Nina camachaya naja. —Cuatjin xu cachja cha cojo xicjin cha.

<sup>16</sup> Hya xi camá ne, ngusun xu ni cafe cha, hane xi cafehe cha nandya ne, casacuse rë cha hiscan tacun María cojo José, cojo quihndi jan, jiña cahntsua hiscan jineyá chu. <sup>17</sup> Hya xi cavëë xu cha quihndi jan ne, sehe cavetsihin casuacuenda cha yëjë cjua xi cachja ángel cojo rë cha tsëhé quihndi vëhé. <sup>18</sup> Hane xi cahndë xuta cjua xi cachja cha xi cuacun jan cojo rë me ne, jemu quijircun xu rë me. <sup>19</sup> Peru María ne, cavetjo cavetjo ni me yëjë ni cjua vëhé cahntsua xahasen rë me, hacuaha jercu cjín xu catsingataha cacun me. <sup>20</sup> Hane xi cavuya quiji nga cha xi sahmi cuidadu chu rë jan ngajan nguijña ne, taha tisahmi jyë tisahmi hnga xu cha Nina hacuaha taha tivaxëndaja cha me tsëhé yëjë cjua xi cahndë cha cojo xcusun xi cavëë cha, sacuatjin cachja ángel cojo rë cha.

### *Quiji caningacun rë Jesucristu cojo Nina ngajan Jerusalén*

<sup>21</sup> Xi cavechú xu jyin nixtin quihndi ne, hacuaha hatuxa hya cavechú nixtin xi xti chuxin rë, hane cuatjin camá cojo quihndi. Hacuaha Jesús cafañahñi xi quihndi, ñihi xi ha cachja ángel hisca chaja sa xi seyahma quihndi cahntsua naa rë.

<sup>22-24</sup> Hya xi camá ne, xi cavechú xu nixtin xi cjue naa rë quihndi yungun xi matitjun cojo quihndi xi cuma tyjahi me xcun Nina tutjin chja ley rë Moisés ne, quiji José cojo María Jerusalén, quiji cani me ngu cjuatjo ta, tsëhé xi chja ley rë Nina ta meje rë xi cjue jo chu tucjin, o sá xi jo chu paloma chihndë. Hacuaha quijicojo xu me quihndi jan Jerusalén xi

tsingacun me quihndi jan cojo Nina. Quitahá xujun xcun ley rê Nina xi yějê ni quihndi tjun xi xihin ne, hatuxa tsêhê Nina cuma.

<sup>25</sup> Cavéjña xu ngu xihin xi hmí rê Simeón ngajan Jerusalén. Xihin vèhê ne, tyjahi xu me cojo cjuatacun rê me ngajan xcun Nina, hacuaha jemu faharcun me Nina. Hacuaha jemu meje xu rê me xi cjeuhe xuta xi yaha cjuetacun jan xi cuma rê xuta tjê rê Israel. Hacuaha Hasen rê Nina ne, jiya cahntsua xahasen rê Simeón. <sup>26</sup> Hane Hasen rê Nina jan ne, casua xu camachaya rê me xi jinguyějê rê xi cjêë scuëë me xuta xi tsingatju Nina jan ne, hatuxa cueyaain xu me. <sup>27</sup> Hane quiji me yungun xi matitjun, tsêhê xi cuatjin cachja Hasen rê Nina cojo rê me. Hacuaha xutacha rê quihndi xi hmí rê Jesús jan ne, quijicojo xu me quihndi jan yungun vèhê, xi sahmichihin me sacuaa xcusun xi vitexa ley rê Moisés hacutjin cuatju quihndi cuma. <sup>28</sup> Hya xi camá ne, cafaha xu Simeón quihndi jan cavataha me, sehe hacuaha cavaxëndaja me Nina cojo cju vihi:

<sup>29</sup> Ngayun Nina naha, ngayun ne, ha cuma tuhun cahndê xi ngahan hndixahan nuju ne, cueya cojo cjuandaja cojo cjuajeya sacuatjin xi ha canújun.

<sup>30</sup> Cuma cueya ta, tsêhê xi quihndê ne, cahvê suva xuta xi caningatjun xi cuaxêtje niji,

<sup>31</sup> me xi caningatjun xcun cojo xcun yějê ni xuta,

<sup>32</sup> me xi cuinduva sacuaa ngu ndihí xi sua me cjuahasen xi cuma rê xutaxín,

hacuaha cuinduva me xi sahmi yehe sahmi lnga niji me, ngayin xuta nuju, xuta tjê rê Israel.

Cuatjin xu cachja Simeón.

<sup>33</sup> Hane xutacha rê quihndi jan ne, jemu quijircun xu rê me tsêhê xi cuatjin cachja Simeón tsêhê quihndi jan. <sup>34</sup> Hane Simeón ne, catsinchacun me me xi cuacun jan, sehe cachja xu me cojo María naa rê quihndi jan cuitjin:

—Quihndi vihi ne, hacuaha sahmi xi jemu cjín xuta tjê rê Israel chajá me, hacuaha sahmi xi jemu cjín xuta tjê rê Israel cuetjutje me. Hacuaha quihndi vihi ne, sua cumachaya rê xuta mé xi meje rê Nina, hacuaha jemu choho cuichja xuta tsêhê quihndi. <sup>35</sup> Cuatjin cuma cojo sa xi ngajan sesunhgatsejen yějê hacutjin xi tsingataha cacun jemu cjín xuta cojo cjuatacun rê me. Hacuaha ngayun ne, jercu cuma rê xahasen nuju, sacuaa xi quicha casehen rê xahasen nuju. —Cuatjin xu cachja Simeón.

<sup>36</sup> Hacuaha tacun xu ngu chjuun xi hmí rê Ana ngajan yungun, quihndi rê Fanuel, tjê rê xutachanga xi hmí rê Aser. Chjuun jan ne, profeta xu má me. Hacuaha jercu changá xu me. Xi cavixan me ne, cavéjña me cojo xihin rê me yatu nu. <sup>37</sup> Ngaxtun vèhê ne, cavéjña cahan me. Hane xi casacu xicjin xu me cojo xutacha rê Jesús ne, ñujuchan ñuju nu xu tjin rê me. Hacuaha jemu quiji camaha xu ni me yungun xi matitjun. Jemu cjín ndiya ne, cajinii xu me niñu xi faharcun me Nina. Hacuaha jercu sahmi xu me oración rê me. Nixtin nixten faharcun me Nina. <sup>38</sup> Hacuaha ha hora xi siu xu ni xutacha rê Jesús ngajan yungun jan ne, cafehe Ana. Hane xi cavêë me quihndi Jesús jan ne, casua xu me nacuechji rê Nina. Ngaxtun vèhê ne, sehe cavetsihin cachja xu me tsêhê Jesús cojo yějê xuta xi jemu meje rê xi cuechú nixtin xi cuaxêtje Nina nandya Jerusalén.

#### *Cavuya me cojo Jesucristu nandya Nasaret*

<sup>39</sup> Xutacha rê Jesús ne, hya xi ha café casahmichihin xu me yějê xcusun xi vitexa ley rê Nina ne, cavuya cafe me nangui rê me, hiscan xi hmí Nasaret, distrito Galilea. <sup>40</sup> Quihndi jan ne, camajyê hacuaha casacuhñu rê, hacuaha jercu cavechútáha cjuatacun rê, hacuaha jercu cavisehen xu cjuandaja rê Nina cahntsua xahasen rê.

#### *Casetaha suvá Jesucristu ngajan yungun xi matitjun*

<sup>41</sup> Chuva nu chuva nu ne, xutacha rê Jesús ne, fi xu me suhi tsêhê Pascua ngajan Jerusalén. <sup>42</sup> Hane hya xi Jesús cavechú me tejó nu ne, sacuaa xcusun rê xuta cojo suhi vèhê ne, quiji xu Jesús cojo xutacha rê me ngajan Jerusalén. <sup>43</sup> Xi cavatju suhi jan ne, xutacha rê Jesús ne, cavetju xu me tsêhê Jerusalén xi cuya cjue me nangui rê me. Peru Jesús ne, hisca camachayin rê xutacha rê me ne, casetaha suvá xu me Jerusalén. <sup>44</sup> Xi má rê xutacha rê me ne, jiyajñi me ngajñi rê xutacjín tife me. Hane xi café ngu nixtin tife xutacha rê me ndiya ne, cavetsihin cavanguise xu me Jesús jan ngajñi rê xuta rê me cojo ngajñi rê yějê xuta xi vinga rê me. <sup>45</sup> Hane xi casacuiin rê me Jesús jan ngajñi rê xutacjín jan ne, cavuya quiji xu me hisca Jerusalén, xi tivanguise me me.

<sup>46</sup> Hya xi camá ne, xi majyan nixtin jan ne, sehe casacu xu rê me Jesús ngajan yungun xi matitjun, tacun me ngajñi rê maestru xi vicuya cjuachacun, tivisiñuju me cjuá rê maestru hacuaha tivinenguise xu rê me jingu sa cjuachacun. <sup>47</sup> Hane yějê ni xuta xi tivisiñuju cjuá rê Jesús jan ne, jercu firacun xu rê me, tsêhê xi cuarcu quicun cacun me hacuaha tsêhê xi jercu ndaja titsicuya me cjuá tsêhê maestru jan. <sup>48</sup> Hane hya xi cavêë xu xutacha rê Jesús xi ngajan tacun me ne, tu quiji tsêhê me, sehe cachja naa rê me cuitjin:

—¿Mé má cuatjin canihñi cojo niji, tsan? Chutsijin ta cuajyihí ngahan cojo nahmi riji ne, cojo cjin cjuacjintacun niji ne, catujyihinyin cavinchinsin ri. —Cuatjin xu cachja me.

<sup>49</sup> Ngajan xi Jesús ne, cuitjin xu cachja me cojo xutacha rë me:

—¿Mé má cuatjin tu nguehe tu ngajan cavinchunsun ná ni? ¿Há hyúun ta hatuxa meje rë xi cuitejña ndava nahmi naha? —Cuatjin xu cachja Jesús.

<sup>50</sup> Peru xutacha rë Jesús ne, cajñi xu rcu me cjuá xi cachja Jesús cojo rë me.

<sup>51</sup> Hya xi camá ne, cavuya café xu Jesús cojo xutacha rë me nangui rë me ngajan Nasaret. Hacuaha cahndë me tséhë xutacha rë me hacutjin xi quiji sa nixtin rë me. Hane naa rë Jesús ne, cavetjo cavetjo xu ni me yëjë ni cjuá vëhë cahntsua xahasen rë me. <sup>52</sup> Sacuaha Jesús ne, jima jyë xu me cojo yojo rë me, hacuaha jima jyë jima hnga me cojo cjuatacun rë me. Hacuaha tichuya sa xu rë Nina tséhë me, hacuaha tichuya sa rë xuta tséhë me.

### 3

#### *Cachja Juan Vitenda rë Xuta cjuandajyihí rë Nina*

<sup>1</sup> Cuitjin xu camá hya xi café tyjuhun nu jiya me xi matitjun camaha ni xi hmí rë Tiberio César xcun xá rë me xi vitexa me jingu ni ladu. Poncio Pilatu ne, me vëhë vitexa xu me distritu Judea, hane Herodes ne, me vëhë xu vitexa me distritu Galilea, hane hntsëjñu me xi hmí rë Felipe ne, me vëhë xu vitexa me distritu Iturea cojo distritu Traconite, hacuaha Lisanas ne, me vëhë xu vitexa me distritu Abilinia. <sup>2</sup> Hane sacuaha nahmi xi matitjun xu ne, Anás cojo Caifás má me. Hane sacuaha nixtin vëhë ne, Juan quihndi rë Zacarías ne, hya xi quitahá me ngajan ngu xín tséhë nandya ne, cafaahatsja me cjuá xi catsingatju xu Nina. <sup>3</sup> Hane quiji catsujyihiya me yëjë ni ladu tiña tséhë ndajyë Jordán, tichja me xi meje rë xi tsindeya xu xuta cjuatacun rë me hacuaha xtenda me, cojo sa xi tsinchataha Nina xuta tséhë jyë rë me. <sup>4</sup> Xi cuatjin xu casahmi Juan ne, casahmichihin me sacuatjin camahindu hatsëë nixtin xcun xujun xi chja cjuá rë profeta Isaías xi chja cuitjin:

Cuitjin jercu hñu cuichja ngu xuta ngajan hiscan jemu xín tséhë nandya:

“Tuhunchjino ndiya tséhë Nai naja;

ninguixun ndiya tséhë me.

<sup>5</sup> Yëjë ni hiscan nangui cahntsua ne, tséya rë,

yëjë ni ndetjún cojo yëjë ni naxi ne, cuijnenangui,

yëjë ni ndiya lahñi ne, cuma quixi,

yëjë ni ndiya xi hacuñin chihin ne, cuma chihin.

<sup>6</sup> Hane yëjë ni xuta ne, scuëë me hacutjin vaxëtje Nina xuta rë me.”

Cuatjin xu catsihindu Isaías cjuá xi jercu hñu cuichja xuta jan.

<sup>7</sup> Ngajan xi hya xi quiji xutacjin xi xtenda me ne, cuitjin xu cachja Juan cojo xuta:

—¡Ngayujun ni ngayun quihndi rë chu tsehen matsejen ne!, ¿yo cavinchangui nuju xi nihñu ngahñu xi cuetjuntjun tséhë castigu xi hatuxa tsingatju Nina? <sup>8</sup> Sá xi meje jain cuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuatacun rë me. Xicanujuun cahntsua xahasen nuju cjuá vihi: “Ngayaan ne, tsajin mé cuma naja ta, tséhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca ndyojo xi cuicun vi ne, cuma sahmi me tjë rë Abraham. <sup>9</sup> Chutsujun ta ngayun matsejen ne, tangun ngayun cojo yatjë xi ha quitaháchjine quicharcu tyjama rë xi cuetsihin xtí. Yëjë ni yatjë xi suaain tu xi ndaja matsejen ne, xtí rë, sehe cjué cueti. —Cuatjin xu cachja Juan.

<sup>10</sup> Ngajan xi xutacjin jan ne, cuitjin xu cavinenguise rë me Juan:

—¿Hacutjin ndatjin nihñi xi cuma nihñi cjuandaja xi nújun vë ni? —Cuatjin xu cavinenguise me.

<sup>11</sup> Hane xi cafayangui Juan ne, cuitjin xu cachja me:

—Jarë ngayun xi tjin nuju jo tsjian nuju ne, tuhun rë ngu yo xi tsajin rë. Jarë ngayun xi tjin xi chinu ne, ha chuva vëhë ni tuhun hitsë catjinë me xi tsajin xi sinë. —Cuatjin xu cachja me.

<sup>12</sup> Hacuaha canduva sa xu ngujo cha xi faha tujún sa xi meje rë cha xi xtenda cha, hane cuitjin xu cavinenguise cha:

—Tatá, ¿mé xi ndatjin nihñi ngayin? —Cuatjin xu cavinenguise cha.

<sup>13</sup> Sehe ngajan xi Juan ne, cuitjin xu cachja me cojo cha:

—Hacuñin cjin sa tujún chjahyun rë xuta. Chjahyun rë me hacutjin xi casatëxa ni nuju. —Cuatjin xu cachja me.

<sup>14</sup> Hacuaha cavinenguise nga ngujo sindadu me cuitjin:

—Hane ngayin ne, ¿mé xi ndatjin nihñi? —Cuatjin xu cavinenguise cha.

Sehe cachja xu me cojo cha cuitjin:

—Xicanaxuun rë xuta tujún cojo cjuachan, o sá xi cojo ngu cjuandacha. Catamangutacún ni cojo tujún xi ha ma chji nuju. —Cuatjin xu cachja me.

<sup>15</sup> Xuta ne, jercu siuya camahani me mé xi cuma, hacuaha vinenguisse xu me cahntsua xahasen rë me cuitjin: “Hyaan sa xi Juan rë vi Xihin xi Tsingatju Nina xi cuaxëtte naja me.” Cuatjin xu cavinenguisse me. <sup>16</sup> Sehe ngajan xi Juan ne, cuitjin xu cachja me cojo yëjë xuta jan:

—Ngahan matsejen ne, cojo nandá ni tivitënda nuju, peru sehe cuinduva me xi cueyá me Hasen rë Nina cahntsua xahasen nuju, hacuaha cuaha me sacuaah ngu ndihi xi tsityjahi rë cjuatacun nuju. Me vëhë ne, hitsë sa jyë nga me cojo cjuatacun rë xi cumá ná ngahan, hisca cumaji tsinguissehercu sahme tyjahi chuxinxte rë me. <sup>17</sup> Me xi tsingatju Nina jan matsejen ne, sacuaaha xi ha yahatsja me quicha xi tsinguitjen rë xtë rë trigu cojo sa xi cuma tyjahi ndaja trigu xi casechun rë tsëhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ngu ndihi xi tsajin nixtin hvo. —Cuatjin xu cachja Juan.

<sup>18</sup> Hacuaha hacuini suvá xu ni cjua vëhë cachja Juan cojo xuta hya xi cachja me cjuandajyihí rë Nina ta cachja sa xu me jemu cjin cjua. <sup>19</sup> Herodes, me xi cavitexa ngajan distritu Galilea ne, hacuaha cachjataha xu Juan me ngatsë rë xi cafaha Herodes na Herodía, chjuun rë hntsëjñu me, xi cumá chjuun rë me na. Hacuaha cachjataha sa xu Juan me tsëhë jingu sa xcusun tsehen xi casahmi me. <sup>20</sup> Peru xcun yëjë cjuatsehen vëhë ne, cavetahacoo sa Herodes xcusun vihi: caveya xu me Juan ndavaya.

#### *Caxtenda Jesucristu*

<sup>21</sup> Hane hya xi chaja sa xu cjue Juan ndavaya ne, ngu nixtin xi caxtenda yëjë ni xuta ne, hacuaha cojo xu Jesús caxtenda me. Hane xi cavatju caxtenda me ne, hora xi tsisahmi xu me oración rë me ne, ngahnga ne, catuxaha, <sup>22</sup> hane Hasen rë Nina ne, canduvajnetsejen casesun rcu me. Sacuajyihí ngu paloma jyihí. Hacuaha hora vëhë ni ne, canuhya xu rë ngu cjua ngajan ngahnga xi cachja xu cuitjin: “Ngaye xi quihndi naha ngaye xi jemu hmú cáacun ri. Jemu ndama ná ngatsë riji.” Cuatjin xu cachja.

#### *Xutachanga rë Jesucristu*

<sup>23</sup> Quihndë ne, Jesús ne, tjin xu rë me sacuaaha cantë nu hya xi cavetsihin me cojo xá rë me. Hacuaha xi má xu rë xuta ne, quihndi rë José má me. Hane José ne, quihndi rë Elí. <sup>24</sup> Elí ne, quihndi rë Matat. Matat ne, quihndi rë Leví. Leví ne, quihndi rë Melqui. Melqui ne, quihndi rë Jana. Jana ne, quihndi rë José. <sup>25</sup> José ne, quihndi rë Matatías. Matatías ne, quihndi rë Amós. Amós ne, quihndi rë Nahum. Nahum ne, quihndi rë Esli. Esli ne, quihndi rë Nagai. <sup>26</sup> Nagai ne, quihndi rë Maat. Maat ne, quihndi rë Matatías. Matatías ne, quihndi rë Semei. Semei ne, quihndi rë José. José ne, quihndi rë Judá. <sup>27</sup> Judá ne, quihndi rë Joana. Joana ne, quihndi rë Resa. Resa ne, quihndi rë Zorobabel. Zorobabel ne, quihndi rë Salatiel. Salatiel ne, quihndi rë Neri. <sup>28</sup> Neri ne, quihndi rë Melqui. Melqui ne, quihndi rë Adi. Adi ne, quihndi rë Cosam. Cosam ne, quihndi rë Elmodam. Elmodam ne, quihndi rë Er. <sup>29</sup> Er ne, quihndi rë Jesús. Jesús ne, quihndi rë Eliezer. Eliezer ne, quihndi rë Jorim. Jorim ne, quihndi rë Matat. <sup>30</sup> Matat ne, quihndi rë Leví. Leví ne, quihndi rë Simeón. Simeón ne, quihndi rë Judá. Judá ne, quihndi rë José. José ne, quihndi rë Jonán. Jonán ne, quihndi rë Eliaquim. <sup>31</sup> Eliaquim ne, quihndi rë Melea. Melea ne, quihndi rë Mainán. Mainán ne, quihndi rë Matata. Matata ne, quihndi rë Natán. <sup>32</sup> Natán ne, quihndi rë David. David ne, quihndi rë Isaí. Isaí ne, quihndi rë Obed. Obed ne, quihndi rë Booz. Booz ne, quihndi rë Salmón. Salmón ne, quihndi rë Naasón. <sup>33</sup> Naasón ne, quihndi rë Aminadab. Aminadab ne, quihndi rë Aram. Aram ne, quihndi rë Esrom. Esrom ne, quihndi rë Fares. Fares ne, quihndi rë Judá. <sup>34</sup> Judá ne, quihndi rë Jacob. Jacob ne, quihndi rë Isaac. Isaac ne, quihndi rë Abraham. Abraham ne, quihndi rë Taré. Taré ne, quihndi rë Nacor. <sup>35</sup> Nacor ne, quihndi rë Serug. Serug ne, quihndi rë Ragau. Ragau ne, quihndi rë Peleg. Peleg ne, quihndi rë Heber. Heber ne, quihndi rë Sala. <sup>36</sup> Sala ne, quihndi rë Cainán. Cainán ne, quihndi rë Arfaxad. Arfaxad ne, quihndi rë Sem. Sem ne, quihndi rë Noé. Noé ne, quihndi rë Lamec. <sup>37</sup> Lamec ne, quihndi rë Matusalén. Matusalén ne, quihndi rë Enoc. Enoc ne, quihndi rë Jared. Jared ne, quihndi rë Mahalaleel. Mahalaleel ne, quihndi rë Cainán. <sup>38</sup> Cainán ne, quihndi rë Enós. Enós ne, quihndi rë Set. Set ne, quihndi rë Adán. Adán ne, me vëhë xi Nina casahmi rë me.

## 4

#### *Cafahachuya xitsehen Jesucristu*

<sup>1</sup> Hya xi camá ne, hya xi catsë rë Jesús cojo Hasen rë Nina hya xi caxtenda me ne, cavuya xu me tsëhë ndajyë Jordán xi cjue me ndava me, peru Hasen rë Nina ne, quiji nguehe quiji ngajan xu cojo rë me ngajan ngu xin tsëhë nandya <sup>2</sup> cahntsua yachan nixtin. Hacuaha

yasen ni tifachuva xitsehen xi matitjun me. Hacuaha Jesús ne, tsajin camaha xu ni mé xi cajiné me cahntsua nixtin xi cuacun vèhë. Hane xi cavatju nixtin xi cuacun vè ne, jercu camavojo xu rè me. <sup>3</sup> Sehe ngajan xi xitsehen jan ne, cuitjin xu cachja cojo Jesús:

—Sá xi Quihndi jain rè Nina ngaye ne, tinoje cojo ndoyojo vihi ne, catama niñu. —Cuatjin xu cachja xitsehen.

<sup>4</sup> Hane Jesús ne, cuitjin xu cafayangui me tsèhë xitsehen jan:

—Xcun xujun rè Nina ne, cuitjin camahindu: “Hacuini suvá ngatsë rè niñu xi siu xuta cjuahñu.” —Cuatjin xu cafayangui Jesús.

<sup>5</sup> Hane xi quijicojo xitsehen me ngu ndetjún hnga ne, sehe nguhñusasa xu catsingacun ni xitsehen jan me jinguyjè ni nandya tsèhë ngasunhndë. <sup>6</sup> Sehe cachja xu xitsehen cuitjin cojo rè me:

—Suá ri yèjè nandya xi cuacun vè cojo yèjè cjuanchina rè xi ngaye nihñi gobiernu. Cuma suá ri ta, tsèhë xi hatuxa ngahan cafahantsa, hane ha tu yo ni xi meje suá rè ne, suá rè. <sup>7</sup> Quihndë ne, sá xi cuindove cuiticjexcuin nguehe xi chjehercuin ná ne, cumá tsiji yèjè ni nandya vè. —Cuatjin xu cachja xitsehen.

<sup>8</sup> Sehe ngajan xi cafayangui xu Jesús cuitjin:

—Xcun xujun rè Nina ne, cuitjin camahindu: “Meje rè xi chjuhuncrun Nina naja, hacuaha suvá ni me vèhë meje rè xi nihñu hacutjin xi meje rè me.” —Cuatjin xu cachja Jesús cjuavèhë.

<sup>9</sup> Hya xi camá ne, xitsehen jan ne, quijicojo xu rè Jesús ngajan Jerusalén, hane quijicani rè me hisca rcu cjin yungun xi matitjun. Sehe cachja xu cojo rè me cuitjin:

—Sá xi Quihndi jain rè Nina ngaye ne, ningatjin yojo riji ndyá hisca nangui. <sup>10</sup> Ha hye ta tsajin mé cuma ri ta xcun xujun rè Nina ne, cuitjin chja:

Nina cuitexa me ángel rè me xi sahmi ri cuidadu.

<sup>11</sup> Cuahatsjá ri,

cojo sa xi hisca ntsacui ne, sacuinhmaain rè cojo ngu ndoyojo.

Cuatjin xu cachja xitsehen cjuavèhë.

<sup>12</sup> Hane Jesús ne, cuitjin xu cafayangui me tsèhë xitsehen:

—Xujun rè Nina ne, cuitjin chja: “Mijí rè xi chjuhunchuvun Nina naja.”

<sup>13</sup> Hya xi camá ne, xi cajnetaha cafahachuva xitsehen jan Jesús ne, cavetjuxin xu tsèhë me hisca janihya cuya nga.

#### *Cavetsihin cavicuya Jesucristu xuta Galilea*

<sup>14</sup> Ngajan xi Jesús ne, cojo ngahñu rè Hasen rè Nina ne, quijinduju sa xu me xi cjue me ndava me ngajan distritu Galilea. Hane xi cafehe xu me jan ne, jercu cachja xuta tsèhë me ngajan Galilea cojo jinguyjè ni nandya xi siu tahndee rè. <sup>15</sup> Hane quiji me yungun rè jimangu nandya tsèhë Galilea, cavicuya me xuta. Hane yèjè ni xuta jan ne, casahmi jyè casahmi hnga xu me Jesús.

#### *Tacun Jesucristu nandya Nasaret*

<sup>16</sup> Cavechú ngu nixtin xi quiji xu Jesús ngajan nandya Nasaret hiscan xi camacha me. Hane sacuaha xcusun xi tjin rè me ne, nixtin xi chjahájenda rè ne, quiji xu me yungun. Sehe quiji casacunvasen me xi cuichjasun xu me xujun rè Nina. <sup>17</sup> Hya xi camá ne, casengui tsja me xujun xi hinchja cjuavèhë Nina xi catsihindu profeta Isaías. Hane xi titsixinga xu me xujun jan ne, táha tivanguise me cahndë xi quitahá cjuavèhë meje rè me. Hane xi casacu rè me cahndë vèhë ne, sehe cavetsihin cachjasun xu me cjuavèhë vihi xcun xuta:

<sup>18</sup> Hasen rè Nina ne, jija cahntsua zahasen naha,

vèhë xi casuaxa ná Nina xi suá cumachaya rè xuta yuma cjuandajyihí rè me:

catsingatju ná me xi suá cumachaya rè xuta xi hinchja ndavaya ta hatuxa cuma ndaya me, suá cumachaya rè xuta xi rcá me ta hatuxa cuya cuma tsejen nga rè me; cuèhëndaya xuta xi jemu choho sahmi jingu sa xuta cojo rè me.

<sup>19</sup> Hacuaha suá cumachaya rè xuta xi cavechú nu xi jercu sahmi Nina cjuandaja cojo xuta rè me.

Cuatjin chja cjuavèhë xujun xi cachjasun Jesús.

<sup>20</sup> Hane xi cavuya catsijeyu nga Jesús xujun jan ne, sehe cavuya casua nga me me xi sahmi xá cahntsua yungun jan. Sehe cavéjña Jesús xi cuicuya rè me xuta. Hane yèjè ni xuta xi siu cahntsua yungun jan ne, jercu cavèhërcun me Jesús. <sup>21</sup> Sehe ngajan xi Jesús ne, cavetsihin cachja me cuitjin cojo xuta:

—Quihndë, jinguyjè rè xi cavinuhyun cjuavèhë xi camahindu xcun xujun rè Nina xi cavutaya jan ne, ngajan cavetjucaa cjuavèhë. —Cuatjin xu cachja Jesús.

<sup>22</sup> Yèjè ni xuta ne, jemu ndaja xu cachja me tsèhë Jesús, hacuaha hisca quijircun rè me tsèhë xi jemu ndaja camahani cjuavèhë xi cachja Jesús. Sehe cachja xuta jan cuitjin:

—¡jercu cha vihi xi quihndi rè cha José jan! —Cuatjin xu cachja me.

<sup>23</sup> Hane Jesús ne, cuitjin xu cachja me cojo xuta jan:

—Ngahan matsejen ne, ha hvê ta ngayun ne, cuinújun cojo ná cjua vihi: “Doctor, nircun svun rê yojo nuju.” Hacuaha cuinújun nga cuitjin: “Xcusun xi camachaya niji xi canihñu ngajan Capernaum matsejen ne, hacuaha nihñu xcusun vèhê nguehe xi nangui nuju.”  
<sup>24</sup> Cuichjá cojo nuju cjuaquixi ta hisca xi ngu profeta matsejen ne, hatuxa macjaain rê xuta nangui rê me tsêhê me. <sup>25</sup> Hacuaha ha cjuaquixi ta jemu cjín chjuun cahan xi caviyuju na nguehe Israel hya xi cavéjña profeta Elías hatsêê nixtin. Hacuaha nixtin vèhê matsejen ne, cavaain camahani tsi sacuaha jyan nu vasen, hane jercu jyê camahani jindyá cavéjña jingujyê ni ladu. <sup>26</sup> Peru catsingatjiin Nina profeta Elías xi cjue cuisecoo me hisca ngu na cahan xi cuacun vè matsejen ta ngu ni na cahan xi hisca hacuain na tjê rê Israel na catsingatju Nina profeta xi cuisecoo me na ngajan nandya Sarepta, ladu tsêhê nandya Sidón. <sup>27</sup> Hacuaha nguehe Israel matsejen ne, jemu cjín xuta xi yaha rê ngu chíhin vitaha xi setaha yojo naja caviyuju me hya xi cavéjña profeta Eliseo hatsêê nixtin. Peru hisca xi ngu me xi cuacun vè camandajin me matsejen ta ngu ni Naamán xi hisca hacuain xuta tjê rê Israel ta xuta Siria me matsejen ne, me vèhê ni xi camandaja me. —Cuatjin xu cachja Jesús.

<sup>28</sup> Hane yêjê ni xuta xi siu xu cahntsua yungun jan ne, hya xi cahndê me cjua xi cachja Jesús jan ne, jemu camacjan rê me. <sup>29</sup> Hya xi camá ne, xi caxinchacun xuta jan ne, cavaxéxin xu me Jesús, quijicojo me me hisca ngajan ngu xín tsêhê nandya, ngu rcu ndetjún hnga hiscan xi cavéjña nandya rê me, xi meje tsingatjen me Jesús. <sup>30</sup> Peru Jesús ne, cavatju xu me ngajñi rê xuta jan quijixin me.

*Cha xi jiya xitsehen xahasen rê*

<sup>31</sup> Hya xi camá ne, quiji xu Jesús Capernaum, ngu nandya tsêhê distritu Galilea. Hane nixtin xi chjahájenda rê ne, quiji xu me yungun cavicuya me xuta. <sup>32</sup> Hane yêjê xuta xi siu jan ne, jercu quijircun xu rê me tsêhê cjua xi vicuya Jesús ta, tsêhê xi cjua xi vicuya me ne, sacuaha cjua xi chja ngu xi matitjun jain.

<sup>33</sup> Hacuaha cahntsua yungun jan ne, tacun xu ngu cha xi jiya xitsehen cahntsua xahasen rê cha. Hane xitsehen jan casahmi xi jercu cajindaya cha cachja cha cuitjin:

<sup>34</sup> —¡Ja! ¿Mé má cuatjin ninguisuhunñu cojo niji ngayun Jesús, xuta Nasaret? ¿Há canduvun xi nicjun niji? Ngahan ne, ha hvê yo ngayun. Ngayun xi hatuxa vinechun tsêhê Nina ngayun. —Cuatjin xu casahmi xitsehen xi cachja cha.

<sup>35</sup> Hya xi camá ne, cuitjin xu cachja Jesús xi cavatêcja me cjua rê xitsehen xi jiya cahntsua xahasen rê cha:

—¡Jyuu nechin, hacuaha tetjixin tsêhê cha vè! —Cuatjin xu cachja Jesús.

Hya xi camá ne, catsitcija xu xitsehen jan cha ngajñi rê xuta, sehe cavetju quiji tsêhê xahasen rê cha, peru tsajin camahani mé cavanguihmu rê cha. <sup>36</sup> Hya xi camá ne, yêjê xuta jan ne, jercu quijircun rê me, hisca cachja xu me ngajñi rê me cojo xicjin me cuitjin:

—¿Mé nga xcusun cjua vihi xi cojo yêjê ni ngahñu vitéxa rê hisca xitsehen, hacuaha vetjuxin ni? —Cuatjin xu cachja xuta ngajñi rê me cojo xicjin me.

<sup>37</sup> Hya xi camá ne, jingujyê ni ladu tahndee rê cahndê jan ne, cavitsojo xu cjua xi cachja xuta tsêhê Jesús.

*Camandaja nahya rê Simón Pedru xi casahmi Jesucristu*

<sup>38</sup> Xi cavetju Jesús tsêhê yungun ne, quiji xu me ndava ngu me xi hmí rê Simón. Hane nahya rê Simón ne, jemu hmu xu rê me xi yaha rê me chíhinsuê. Hane yêjê xuta rê me ne, cafehya me cojo Jesús xi cuisecoo Jesús nahya rê Simón. <sup>39</sup> Hane xi quiji cavtsejnya xu Jesús xcun nahya rê Simón ne, cavatêcja me chíhinsuê xi má rê xuta changá vèhê, hane cavetjuxin xu chíhin jan tsêhê me. Hane hora vèhê ni ne, cavisatjenhnga nahya rê Simón cavetsihin cafachacuenda me cjuandaja xi sahmi me cojo yêjê ni me xi cafehe jan.

*Jemu cjín xutahmu rê camandaja me xi casahmi Jesús*

<sup>40</sup> Hane hora xi tivetje tsuhi xu ne, yêjê ni xuta xi tjin rê me xutahmu rê tsêhê tu mé ni xcusun chíhin ne, quijicojo me xutahmu rê jan nixtin hya hiscan tacun Jesús. Hane xi cavisanetsja xu Jesús jima ngu xutahmu rê jan ne, camandaja me. <sup>41</sup> Hacuaha jemu cjín xu xuta xi siu jan cavetjuxin xitsehen xi hincha rê me. Hane xi cavetju xitsehen jan quiji ne, jercu cachja camahani cuitjin:

—¡Ngayun xi Quihndi jain rê Nina ngayun! —Cuatjin xu cachja xitsehen jan.

Peru cavatêcja xu Jesús cjua xi tichja xitsehen jan, casuaain me cahndê xi cuichja xitsehen ta, tsêhê xi ha vèê xu xitsehen xi me vèhê xi catsingatju Nina me.

*Catsujiyihya Jesucristu cojo cjuandajiyi rê Nina*

<sup>42</sup> Hane xi casahasen jan ne, cavetju xu Jesús quiji me ngajan ngu xín tsêhê nandya. Hane xutacjin jan ne, cuatjin quiji cavanguise xu me Jesús, hane xi cavechú me hiscan tacun Jesús



ne, meje tsinguijnehai me Jesús cojo sa xi hacuiin cuetjuxin me tséhë xuta jan. <sup>43</sup>Peru Jesús ne, cuitjin xu cachja me cojo xuta jan:

—Hacuaha sahmi ná nguýjé xi cjué jingu sa cahndé, suá cumachaya ré xuta cjuandajiyi tséhë gobiernu xi sahmi Nina ta ngatsé ré vèhé xi catsingatju ná Nina. —Cuatjin xu cachja Jesús.

<sup>44</sup>Hane cuatjin xu catsujiyihiya casua me camachaya ré xuta cjuandajiyi vèhé yéjé ni yungun tséhë ladu vèhé.

## 5

### *Cjuarcun xi casahmi Jesucristu tséhë chu ti*

<sup>1</sup>Cuitjin xu camá nga ngu nixtin jan. Jercu cjín camahani xuta quijitjengui me Jesús xi cuihndé me cjua ré Nina. Na cavehncun xu me Jesús xi secun me tjeheh laguna Genesaret, xi hacuaha hmí ré laguna Galilea. <sup>2</sup>Hya xi camá ne, cavèé Jesús jo barcu ngajan tjeheh ré laguna jan, hane cha xi tséhë barcu jan ne, ha cavitujne xu cha tséhë barcu, hane hincha vane cha nahya ré cha. <sup>3</sup>Hane Jesús ne, quiji cavisehen xu me ngu barcu xi cavèé me jan. Barcu jan ne, tséhë Simón. Sehe cachja me cojo Simón xi cjucojo me hitsé barcu ngajñi nandá. Hya xi camá ne, quiji cavéjña me sehe cavicuya xu me xutacjin jan tséhë ngajan ni cahntsua barcu. <sup>4</sup>Hane xi cajnetaha cavicuya me xuta jan ne, sehe ngajan xi cachja xu me cojo Simón cuitjin:

—Tángunvuhun sa cojo barcu vi hiscan nungun nandá, sehe ngajan ningatjunyun nahya xi chjuhun ti. —Cuatjin xu cachja me.

<sup>5</sup>Sehe ngajan xi cafayangui xu Simón tséhë Jesús cuitjin:

—Tatá, cuaha nixten tinihñí xá vèhé ne, ndastu mé sacu niji. Peru sá xi cuatjin nújun ne, cuichjá cojo compañeru naha ne, ningatjinyin nahya. —Cuatjin cafayangui xu Simón.

<sup>6</sup>Hane xi casahmi me cuatjin ne, jercu tu cjín camaha xu ni ti cafaha me, ña meje xtiya nahya ré me. <sup>7</sup>Hya xi camá ne, casahmitsja xu me cojo xicjin me xi hincha barcu xingu jan xi cjue cuisecoo xicjin me. Sehe quiji me xi cuacun jan. Hya xi camá ne, catsinguitsé me catsijo barcu cojo ti xi cafaha me jan. Hane xi jercu catsé barcu ne, ña meje xtyusehen. <sup>8</sup>Hane xi cavèé Simón Pedru xcusun xi camá jan ne, sehe quiji caticjaxcun me xcun Jesús, sehe cachja xu me cuitjin:

—Tatá. Tángunxun hitsé tsahan ta, ngahan ne, ngu xuta tsehen ngahan. —Cuatjin xu cachja Simón Pedru.

<sup>9</sup>Cuatjin cachja me ta, tséhë xi jercu quijircun camahani ré me cojo compañeru ré me ngatsé ré ti xi jemu cjín camahani chu cafaha me. <sup>10</sup>Hacuanitjin xu ni quijircun ré yahnga compañeru ré Simón, me xi hmí ré Jacobo cojo Juan, me xi quihndi ré Zebedeo. Sehe ngajan xi Jesús ne, cuitjin xu cachja me cojo Simón:

—Xicarcuun ta quihndé cojo nixtin xi cjuiniji sa vi ne, ngayun cuangun nuvun xuta xi cuisehen me ladu naha ngojo ré xi nuvun chu ti. —Cuatjin xu cachja me.

<sup>11</sup>Hya xi camá ne, Simón cojo compañeru ré me ne, cavaxëxin xu me barcu jan tséhë xcun nandá, caviyuju me nangui quixí. Sehe caviyuju me yéjé ni tséhë me ne, sehe quiji me cojo Jesús.

### *Casahmi Jesucristu xi camandaja cha xi yaha ré chíhin xi setaha yojo naja*

<sup>12</sup>Cuitjin camá nga xu hya xi casetaha Jesús ngu nandya jan. Cafehe xu ngu cha xi jinguýjé ni yojo ré yaha ré ngu xcusun chíhin vitaha. Hane xi cavèé xu cha Jesús ne, quiji cha caticjaxcun cha xcun Jesús cafehya cha cjuandaja xi sahmi me cojo ré cha, cuitjin xu cachja cha:

—Tatá. Sá xi meje nuju ne, cuma chjuhunxun chíhin xi yaha ná. —Cuatjin xu cachja cha.

<sup>13</sup>Hane xi catsixinga xu Jesús tsja me cavetahatsja me cha ne, cachja me cuitjin:

—Meje ná. Catamandaja ngayun. —Cuatjin xu cachja me.

Hane chíhin jan ne, ngutjen xu ni cavetjuxin. <sup>14</sup>Sehe cavitexa me cha cuitjin:

—Tsajin camahani yo xi cuinújun cojo xcusun vihi. Nihñu sacuatjin cavitexa Moisés xutachanga naja hatséé nixtin. Tángun ningacun yojo nuju cojo nahmi, sehe tángun chjuhun ngu cjuatjo xi tuhun ré Nina tséhë xi camandaja ngayun. Cuatjin nihñu cojo sa xi cumatsejen xi camandaja jain ngayun. —Cuatjin xu cachja me.

<sup>15</sup>Peru handasa cuatjin xu cachja Jesús cojo cha ne, hitsé sa jercu cavitsojo cjua tséhë xcusun xi casahmi me. Hya xi camá ne, jercu tu cjín camahani xuta quijitjengui xu me Jesús xi cuihndé me cjua ré Jesús hacuaha camandaja me tséhë chíhin xi ma ré me. <sup>16</sup>Peru Jesús ne, yasen xu ni cavaxëxin me yojo ré me fi me ngajan ngu xín camahani, sahmi me oración ré me cojo Nina.

### *Casahmi Jesucristu xi camandaja cha xi cahme yojo ré*

<sup>17</sup> Cuitjin camá nga xu ngu nixtin hya xi tivicya Jesús xuta. Hacuaha siu xu ngujo cha fariseo cojo ngujo cha xi vicuya cjuachacun xi canduva cha yějē ni nandya tséhē distritu Galilea cojo distritu Judea, cojo nandya Jerusalén. Hacuaha jercu yaha Jesús ngahñu rē Nina xi sahmi me xi cumandaja xuta hmu rē. <sup>18</sup> Hya xi camá xu ne, hora véhē cafehe ngu cha xi cahme yojo rē, quichahanga rē cha cojo nijña rē cha. Hane cha xi yahahnga rē cha ne, casahmi cha cjuandya xi cuisehen cha cahntsua ndihya xi cuejña cha cha hmu rē jan hiscan tacun Jesús. <sup>19</sup> Peru xi casacuiin xu rē cha chuva rē hacutjin cuisehen cha ngatsē rē xuta xi jercu quitsē camahani me jan ne, camiji xu cha rcu ndihya, hane cafahaxin cha tyjavanitja, sehe catsitujne cha cha hmu rē jan taha rcu ndihya cojo ni nijña rē cha, xi camá cavejña cha cha ngajñi rē xuta hiscan tacun Jesús. <sup>20</sup> Hane xi cavēē Jesús xi cuatjin mangucacun cha xi cuacun jan cojo rē me ne, sehe cachja xu me cuitjin cojo cha hmu rē jan:

—Jyē nuju tsan ne, ha camanchataha. —Cuatjin xu cachja me.

<sup>21</sup> Hya xi camá xu ne, cha xi vicuya cjuachacun cojo cha fariseo xi cuacun jan ne, cavetsihin catsingataha cacun cha cachja xu cha cuitjin cojo xicjin cha:

—¿Yo cha xi cuijiyhi vi xi tsixcuehyu cha Nina? ¡Hatuxa tsajin yo xi cuma tsinchataha jyē rē xuta ta suvá ni Nina xi cuma tsinchataha me! —Cuatjin xu cachja cha cojo xicjin cha.

<sup>22</sup> Peru tséhē xi Jesús ne, ha vējē me mé xi titsingataha cacun cha xi cuacun jan ne, cachja xu me cojo cha cuitjin:

—¿Mé xi tiningatuhuntacún cojo cjuatacun nuju? <sup>23</sup> ¿Jarē cjuaxi hitsē sa tsaviin xi cuichjá? ¿Há xi: “Jyē nuju ne, ha camanchataha?”, o ¿há xi: “Tisatjunhngun ne, tujyuhun-yun?” <sup>24</sup> Peru nguehe suá cumachaya nuju xi ngahan xi Quihndi rē Xuta Jain ngahan ne, yahá xá xi tsinchátaha jyē rē xuta nguehe ngasunhdē.

Sehe ngajan xi cachja xu Jesús cojo cha hmu rē jan:

—Quihndē ne, ngayun tsan ne, tisatjunhngun, chjuhun nijña nuju vē ne, sehe tjangun ndya nuju. —Cuatjin xu cachja Jesús.

<sup>25</sup> Hya xi camá ne, ngutjen ni cavisatjenhnga xu cha ngajñi rē yějē ni xuta, sehe cafaha cha nijña rē cha, cafe cha, taha sahmi jyē sahmi hnga cha Nina. <sup>26</sup> Hane yějē ni xuta jan ne, jercu quijircun xu rē me, hacuaha cojo me casahmi jyē casahmi hnga xu me Nina, hisca catsacjun me camá. Hacuaha cachja xu me cuitjin:

—Quihndē cahyan xcusun xi tsajin nixtin xi hyan. —Cuatjin xu cachja me.

*Cavaxijin Jesucristu Leví xi hacuaha hmí rē me Mateo*

<sup>27</sup> Hya xi camá xu ne, xi cavetju Jesús jan ne, cavechú me ngu cahndē hiscan xi tacun ngu me xi faha tujñsa, me xi hmí rē Leví. Sehe cachja xu me cojo me cuitjin:

—Nduvun, cuanguen cona. —Cuatjin xu cachja me.

<sup>28</sup> Hya xi camá ne, Leví jan ne, caviyuju yějē mé xcusun xi sahmixa me cojo jan ne, sehe cavetju xu me quiji me cojo Jesús.

<sup>29</sup> Hane xi cavatju véhē ne, sehe casahmi xu me ngu suhi ngajan ndava me ngatsē rē Jesús. Hacuaha jercu cjín camaha xu ni cha xi faha tujñsa cojo jingu sa xuta tijnē me niñu cojo Jesús cojo Leví. <sup>30</sup> Hane cha fariseo cojo cha xi vicuya cjuachacun cavetsihin cachjataha xu cha xuta ladu rē Jesús cuitjin:

—¿Mé má cuatjin chinu hyun tangun cojo cha xi faha tujñsa cojo ngujo sa cha xi hacuaha cha tsehen cha? —Cuatjin xu cachjataha cha.

<sup>31</sup> Hane xi cafayangui Jesús tséhē cha ne, cuitjin xu cachja me:

—Xuta xi hacuiin hmu rē me ne, mijí rē xi cjuahacuenda rē me doctor ta suvá ni xuta xi hmu rē me ne, me véhē xi meje rē xi cjuahacuenda rē me doctor. <sup>32</sup> Hacuanitjin ná ngahan ta ngahan ne, hacuiin canduvá nguehe xi squindáyavaha rē xuta xi tsajin jyē rē me ta xi canduvá ne, xi squindáyavaha rē xuta tsehen. Cuichjá cojo rē me xi tsindeya me cjuatacun rē me. —Cuatjin xu cachja me.

*Mé tséhē xi casahmii Jesucristu cojo xuta rē me xun rē me*

<sup>33</sup> Ngajan xi cha fariseo cojo cha xi vicuya cjuachacun ne, cachja xu cha cuitjin cojo Jesús: —Yějē xuta ladu rē Juan ne, yasen ni sahmi me xun rē me hacuaha sahmi me oración rē me cojo Nina. Hacuanitjin ni yějē xuta ladu rē cha fariseo. Peru xuta ladu nuju ne, jinē jihvi me. —Cuatjin xu cachja cha.

<sup>34</sup> Ngajan xi Jesús ne, cuitjin xu cachja me cojo cha:

—Cumaji xi xuta rē cha xi tivixan ne, sahmi me xun rē me jinguyējē rē xi cha xi tivixan ne, tacun cha cojo rē me. <sup>35</sup> Peru cuechú nixtin xi cha xi tivixan chjaháxin rē cha tséhē xuta rē cha ne, hya sahmi me xun rē me. —Cuatjin xu cachja Jesús.

<sup>36</sup> Hacuaha cachja nga xu me ngu ejemplu vihi cojo cha xi cuacun jan:

—Tsajin yo xi cuicheya ngu rquí tsjian xatsē sehe cueyaco cojo ngu tsjian changá ta sá xi cuatjin sahmi me ne, tsjian xatsē jan ne, tsinguetsun me. Hacuaha cumatanguaain ngu

rqú tsjian xatsë cojo tsjian changá jan. <sup>37</sup> Hacuaha tsajin yo xi cuincha xan xatsë cahntsua chuxin changá ta sá xi cuatjin sahmi ne, xan xatsë jan ne, tsitsinga rë chuxin jan. Hane cjuë cuixu xan, hacuaha chuxin jan ne, cuetsun. <sup>38</sup> Xi meje rë ne, xan xatsë ne, xinha cahntsua chuxin xatsë. <sup>39</sup> Hacuaha ngu xuta xi ha cahvi me xan changá ne, ha quihndë mijí cuihi me xan xatsë, tsëhë xi chja me ta xan changá ne, vëhë xi ndaja hyun. —Cuatjin xu cachja Jesús.

## 6

### *Cavotoho xuta ladu rë Jesucristu trigu nixtin xi chjahájenda rë*

<sup>1</sup> Hacuaha cuitjin camá nga xu ngu nixtin xi chjahájenda rë. Hya xi tivatju xu Jesús cojo xuta ladu rë me hiscan tjin tjë trigu ne, cavotohosun xuta ladu rë me tsë tsë trigu jan, sehe catsufëtsja me, sehe cajinë me. <sup>2</sup> Sehe ngajan xi ngujo cha fariseo xi cojo cjuí jan ne, cachjataha xu cha me cuitjin:

—¿Mé má cuatjin tisahmi xuta ladu nuju xá, handasa chja ley naja xi tsajin cahndë xi nihña xá nixtin xi chjahájenda rë? —Cuatjin xu cachja cha.

<sup>3</sup> Ngajan xi Jesús ne, cuitjin xu cafayangui me tsëhë cha:

—Ngayun ne, ha cachutayun xcusun xi casahmi xutachanga naja David hatsëë nixtin. Hya xi jercu camavojo rë me cojo xuta xi siu cojo me ne, <sup>4</sup> cavisehen me ndava Nina, hane cafaha me pan xi viyuju xcun Nina xi tsajin cahndë xi tu yo ni sinë ta suvá ni nahmi xi cuma sinë me. Peru me vëhë ne, cajinë me hacuaha casua me cajinë xuta xi siu cojo rë me.

<sup>5</sup> Hacuaha cachja sa Jesús cuitjin:

—Ngahan xi Quihndí rë Xuta Jain ngahan ne, ngahan xi vitëxa mé xi cuma nixtin xi chjahájenda rë. —Cuatjin xu cachja Jesús.

### *Casahmi Jesucristu xi camandaja cha xi quixihñu ngu tsja*

<sup>6</sup> Cuitjin camá nga xu ngu nixtin xi chjahájenda rë. Quiji Jesús yungun ne, cavicuya me. Hane tacun xu ngu cha cahntsua yungun jan xi quixihñu tsja quixi cha. <sup>7</sup> Hane cha xi vicuya cjuachacun cojo cha fariseo xu ne, siu tifahachuva xu ni cha Jesús, ¿há sahmi me xi cumandaja xuta nixtin xi chjahájenda rë?, cojo sa xi cuma cuinchajyë cha me tsëhë xi sahmi me xá nixtin xi chjahájenda rë. <sup>8</sup> Peru Jesús ne, ha vëë me mé xi tsingataha cacun cha xi cuacun jan. Sehe cachja xu me cojo cha xi quixihñu tsja jan cuitjin:

—Tisatjunhngun, hane tisechun ngeuhe cavasencja. —Cuatjin xu cachja Jesús.

Hane sehe cavisatjenhnga xu cha cavisekun cha. <sup>9</sup> Sehe ngajan xi cachja xu Jesús cojo cha xi cuacun jan cuitjin:

—Sahme nuju ngu cjuachjinenguise vihi: Nixtin xi chjahájenda rë ne, ¿mé xi sua cahndë ley xi nihña?, ¿há xi cjuandaja ne?, o ¿há xi cjuatsehen? ¿há xi naxentjeen cjuahñu rë xingueen ne?, o ¿há xi nicjeen? —Cuatjin xu cachja Jesús.

<sup>10</sup> Xi cavutsejen Jesús xuta jingujyë ni tahndee rë me ne, sehe cachja xu me cojo cha xi hmu tsja jan cuitjin:

—Nixingun ntsun. —Cuatjin xu cachja me.

Hane cuatjin casahmi cha. Hane tsja cha ne, ha camandaja xu sacuatjin xi jyihí titjún. <sup>11</sup> Hya xi camá ne, cha xi cuacun jan ne, jemu camacjan camaha xu ni rë cha, hisca cachja cha ngajñi rë cha cojo xicjin cha mé xi ndatjin sahmi xu cha cojo Jesús.

### *Cavaxijin Jesucristu tejó me xi cuma apóstol*

<sup>12</sup> Hacuaha cuitjin camá nga xu ngu nixtin nixtin xi cuacun vë. Cavetju Jesús quiji xu me ngu ndetjún xi sahmi me oración, hane ngajan cavéjña me cuaha nixten sahmi me oración rë me cojo Nina. <sup>13</sup> Hane xi casahsen ne, cajindayavahe xu me xuta ladu rë me, hane ngajñi rë xuta xi cuacun vë ne, cavaxijinñi xu me tejó xihin. Hane me xi tejó vëhë ne, me vëhë xu xi cachja Jesús tsëhë me apóstol. <sup>14</sup> Me xi cuicun vi xi tejó me xi cavaxijin Jesús: Simón, me xi hacuaha casuañihi me me Pedru, cojo Andrés hntsë Simón, Jacobo cojo Juan, Felipe cojo Bartolomé, <sup>15</sup> Mateo cojo Tomás, Jacobo quihndí rë Alfeo cojo Simón, me xi tsëhë partidu zelota, <sup>16</sup> Judas xuta rë Jacobo cojo Judas Iscariote, me xi sahmi entregadu rë Jesús.

### *Cafahacuenda Jesucristu jemu cjín xuta*

<sup>17</sup> Hane xi cavuya canduvajne xu Jesús tsëhë naxi jan cojo xuta ladu rë me jan ne, xi cafehe xu me ngu ngasun ne, ngajan caxinchacunhñu xu me cojo xuta jan. Hacuaha jercu cjín sa xuta ladu rë me xi siuya jan, siuya tangun cojo jemu cjín camaha xu ni xuta tsëhë nandya Jerusalén cojo tsëhë yëjë sa nación Israel, hisca cojo xu xuta xi nduva tsëhë nandya Tiro cojo Sidón, xi siu ladu tsëhë tjehe ndachacun. <sup>18</sup> Yahnga xu xuta xi cuacun vë ne, canduva me xi meje cuisñuju me cjuá rë Jesús, hacuaha yahnga nga me ne, canduva me xi meje rë me xi cumandaja me tsëhë chíhin xi yaha rë me. Hacuaha me xi jemu tivatju cjuañihi xi hinha xitsehen cahntsua xahasen rë me ne, hacuaha camandaja xu me. <sup>19</sup> Yëjë

ni xutacjín jan ne, cavanguise me chuva rê xi satêtsja me Jesús ta, tsêhê xi Jesús ne, jemu tjin rê me ngahñu rê Nina, hane ngahñu vêhê tsahmi xi mandaja xu yêjê xuta hmu rê.

*Xuta xi ndaja tsêhê cojo xuta xi chojyihî tsêhê*

<sup>20</sup>Ngajan xi ngaxtun vêhê xu ne, cavutsejen Jesús xuta ladu rê me, sehe cachja xu me cojo cuitjin:

—Jemu ndaja tsujun ngayun xi yumu matsejen ta, tsêhê xi ngayun matsejen ne, satê nuju gobiernu xi sahmi Nina.

<sup>21</sup>Jemu ndaja tsujun ngayun xi vojo nuju quihndê matsejen ta, tsêhê xi cuechú nixtin xi jemu chuya rê xahasen nuju.

Jemu ndaja tsujun ngayun xi tichjihndun quihndê matsejen ta, tsêhê xi cuechú nixtin xi cuêjnu.

<sup>22</sup>Hacuaha jemu ndaja tsujun ngayun hya xi choho scuêê nuju xuta, o hya xi cuaxêxin nuju me tsêhê ngajñi rê me, o hya xi choho cuichja me cojo nuju, o hya xi tsitjungu nuju me, ngatsê rê xi tjin tangun cjuatacun nuju cojo ná ngahan xi Quihndi rê Xuta Jain ngahan.

<sup>23</sup>Hisca chjihngun xi ndama nuju xi cuatjin tivatjun tijima nixtin hya matsejen ta, tsêhê xi jemu jyê ngu cjuandaja xi tacunya nuju ngajan ngahnga. Jemu ndaja tsujun matsejen ta, tsêhê xi cuanitjin ni choho casahmi xutachanga naja cojo profeta hatsêê nixtin, hane jemu cachuya rê Nina tsêhê profeta xi cuacun vê.

<sup>24</sup>Peru jemu chojyihî tsujun ngayun xi nchina ngayun matsejen ta, tsêhê xi ha casacu nuju cjuetacun xi cuma nuju.

<sup>25</sup>Jemu chojyihî tsujun ngayun xi ha jemu chuya rê xahasen nuju quihndê matsejen ta, tsêhê xi cuechú nixtin xi cuma vojo nuju.

Jemu chojyihî tsujun ngayun xi tivêjnu quihndê matsejen ta, tsêhê xi cuechú nixtin xi jercu chjihndun xi cuma va rê xahasen nuju.

<sup>26</sup>Hacuaha jemu chojyihî tsujun ngayun hya xi ndaja cuichja yêjê xuta tsujun matsejen ta, tsêhê xi cuanitjin ni ndaja casahmi xutachanga naja cojo profeta ndacha hatsêê nixtin, hane profeta ndacha xi cuacun vê ne, cachuyiin rê Nina tsêhê me.

*Meje rê xi nihmu tacun condra naja*

<sup>27</sup>Peru ngayun xi tinuhyun xi chjá matsejen ne, cuichjá cojo nuju cuitjin: Nihmutacún xuta xi má condra nuju, ndaja nihñu cojo xuta xi choho vêê nuju me, <sup>28</sup>chjahyun rê Nina cjuandaja xi cuma rê xuta xi fehya rê me Nina cjuahngatacun xi cuatjun cuma. Ngajñi rê oración nuju matsejen ne, chjahyun rê Nina cjuandaja xi cuma rê xuta xi vangui nuju me si. <sup>29</sup>Yo xi vajaya ngu ladu tsa nuju matsejen ne, nicuyun sa ngu ladu catajaya. Yo xi fahatahá chingá nuju matsejen ne, xicanichuun rê hisca chingá ngahma nuju. <sup>30</sup>Yêjê ni xuta xi fehya nuju me mé xi fehya nuju me matsejen ne, tuhun rê me. Yo xi fahatahá mé xi fahatahá tshun matsejen ne, xicanujuun xi tsicuya nga me. <sup>31</sup>Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rê me.

<sup>32</sup>Tsajin yo sua nacuechji nuju tsêhê xi hmutacún xuta xi hmucacun nuju me matsejen ta, tsêhê xi hacuaha hisca xuta tsehen matsejen ne, hmucacun me xuta xi hmucacun rê me. <sup>33</sup>Hacuaha tsajin yo sua nacuechji nuju tsêhê xi ndaja nihñu cojo xuta xi ndaja sahmi me cojo nuju matsejen ta, tsêhê xi hacuaha hisca xuta tsehen matsejen ne, hacuanitjin ni sahmi me. <sup>34</sup>Hacuaha tsajin yo sua nacuechji nuju tsêhê xi tuhun vuxetaha xuta xi vetuhun tacún xi ngascan matsejen ne, sua me nuxetuhun matsejen ta, tsêhê xi hacuaha hisca xuta tsehen matsejen ne, sua me vuxetaha xicjin me, cojo sa xi cuya cjuahatsja nga me chuva vêhê ni. <sup>35</sup>Cúya cuichjá nga cojo nuju, nihmutacún xuta xi má condra nuju. Ndaja nihñu, hacuaha tuhun tuxetaha rê, peru xicavetuun tacún xi cuya chjuhunntsun nga. Sá xi cuatjin nihñu matsejen ne, jemu jyê cjuandaja xi sua nuju Nina ngascan, hane cjuandaja xi nihñu ngayun matsejen ne, tangun cojo cjuandaja xi sahmi Nina matsejen ta, tsêhê xi me vêhê matsejen ne, hatuxa jemu ndaja me cojo xuta tsehen xi hisca nacuechji rê Nina suaain me. <sup>36</sup>Meje rê xi tjin nuju cjuayumatacun sacuatjin tjin rê Nina Nahmi naja cjuayumatacun.

*Mijí rê xi nichuvan jingu sa xuta cojo cjuatacun rê me*

<sup>37</sup>Hacuiin nichuvan jingu sa xuta cojo cjuatacun rê me, sehe hacuiin tsichuva Nina ngayun. Hacuiin ninguxun jyê rê jingu sa xuta, sehe hacuiin tsinguixi Nina jyê nuju. Ninchatuhun rê jingu sa xuta matsejen ne, sehe hacuaha tsinchataha nuju Nina. <sup>38</sup>Tuhun rê jingu sa xuta matsejen ne, sehe hacuaha sua nuju Nina. Sua nuju me chuva xi cjuaquixi, hisca tsuquihine me, hisca tsiniyaya me chuva rê, hacuaha hisca xotje rê chuva xi sua nuju me. Cuatjin nihñu matsejen ta, tsêhê xi chuva xi nichuvan matsejen ne, hacuaha chuva vêhê tsichuva Nina xi sua nuju me. —Cuatjin xu cachja Jesús cojo xuta ladu rê me.

<sup>39</sup>Hya xi camá ne, cachja sa xu me ngu ejemplu cuitjin:

—Ngu cha rcá matsejen ne, cumaji cjuecani cha ngu nga cha rcá matsejen ta, sá xi cuatjin matsejen ne, catsijo ni cha cuixuya cha xanga. <sup>40</sup> Ngu cha xi sehe tivutaya matsejen ne, hacuiin hitsë sa vengui chjí rë cha xi cuma rë maestru rë cha matsejen ta hya xi ha ndaja cavutaya cha yëjë ni matsejen ne, sehe ngajan xi cuechútáha cjuatacun rë cha sacuaaha cjuatacun rë maestru rë cha.

<sup>41</sup> '¿Hacutjin má xi matsejen nuju xtë xi jiya tuxcun xingun, hane machayiin nuju tséhë yasin xi jiya túxcun suvun ni? <sup>42</sup> ¿Hacutjin má xi cuma cuinújun cojo xingun xi meje naxun xtë xi jiya tuxcun me jinguyëjë rë xi suvun matsejen ne, matsijin nuju yasin xi jiya túxcun vë ni? Ngayun xuta ndacha, naxun titjun yasin xi jiya túxcun vë, sehe cumatsejenndaja nuju xtë xi jiya tuxcun xingun cojo sa xi cuma naxun.

*Tsejen mé xcusun xuta me ngatsë ni rë cjua xi chja me*

<sup>43</sup> Ha hyan matsejen ta tsajin hisca xi ngu yatjë xi ya ndaja xi sua tú xi ndajin, hacuaaha tsajin hisca xi ngu ya xi ya machjiriin xi sua tú xi ndaja matsejen ta, <sup>44</sup> jima ngu ya ne, cuma tsejen sá xi ndaja o sá xi ndajin ngatsë rë tú xi sua. Hatuxa sacuiin naja tú xi hmí higo rcu ngu yanahyálatu, hacuaaha sacuiin naja uva rcu ngu yanahyátindu. <sup>45</sup> Cuanitjin ni rë xuta matsejen ta sacuaaha xuta ndaja matsejen ne, tséhë cjuandaja xi tetjo rë me cahntsua xahasen rë me cojo cahntsua cjuatacun rë me matsejen ne, tséhë ngajan vetju cjuandaja. Peru xuta tsehen matsejen ne, tséhë cjuatsehen xi tetjo rë me matsejen ne, tséhë ngajan vetju cjuatsehen. Cuatjin matsejen ta, tséhë xi yëjë ni xuta ne, cjua xi quitsë rë xahasen rë me cojo cjuatacun rë me matsejen ne, vëhë cjua xi vetju hntsua me.

*Ejemplu tséhë jo ndihya*

<sup>46</sup> Yasen ni nújun xi nai nuju ngahan, peru ¿mé má nihñuu sacuatjin xi chjá cojo nuju ni? <sup>47</sup> Yahnga ngayun xi nduvuntjengun ná hacuaaha visiñuju cjua naha hacuaaha nihñu sacuatjin chjá cojo nuju matsejen ne, ngeuhe cuichjá cojo nuju yo xi tangun ngayun cojo: <sup>48</sup> tangun ngayun cojo ngu cha xi hya xi casahmi cha ngu ndihya matsejen ne, ndaja nungun cafahngui cha, sehe ngajan cavejña cha xihndëñaña rë hisca xcun ndyojohñu. Hane hya xi camajyë ndajyë hacuaaha casesuntë nandá matsejen ne, jercu hñu catsivaha rë ndihya jan, peru hisca catsiniyaain rë, tséhë xi jemu ndatjin casecun. <sup>49</sup> Peru yahnga nga ngayun xi visiñuju cjua naha peru nihñuu sacuatjin xi chjá matsejen ne, tangun ngayun cojo ngu cha xi casahmi ngu ndihya suvá xcun nangui ni, xi tsajin xihndëñaña rë. Hane hya xi camá ne, xi camajyë ndajyë matsejen ne, catsivaha rë ndihya jan, hane ngutjen ni caticja. Hane cavetsun camahani ndihya vëhë. Cuatjin xu cajnetaha cavicuya Jesús.

## 7

*Casahmi Jesucristu xi camandaja hndixahan rë capitán xi vitexa me ngu cientu sindadu*

<sup>1</sup> Xi cajnetaha xu cachja Jesús yëjë ni cjua xi meje cuichja me cojo xuta ne, sehe cavuya quiji nga me nandya Capernaum. <sup>2</sup> Hane nandya jan ne, ngajan xu tacun ngu capitán xi tjin rë me ngu hndixahan xi cavatsë me xi jiñahmú, ha ña meje cueya camaha xu ni. Capitán jan ne, jemu hmucacun xu me hndixahan jan. <sup>3</sup> Hane xi camachaya xu rë capitán jan xi tacun Jesús ne, catsingatju xu me ngujo xuta changá rë xuta tjë rë Israel xi quiji cachja me cojo Jesús xi cjue sahmi me xi cumandaja hndixahan rë capitán jan. <sup>4</sup> Hane xi cafehe xuta changá jan hiscan tacun Jesús ne, nguñaja camahani cacun me cafehya me xi cjue xu Jesús. Cachja me cuitjin:

—Nihñu favor ne, tisecun rë capitán hitsë ta, tséhë xi jemu ndaja me. <sup>5</sup> Handasa hisca hacuiin tjë rë xutachanga naja me ne, peru jemu hmucacun me ngayaan xuta tjë rë Israel, hacuaaha casahmi me yungun niji cojo ngahñu rë suva me. —Cuatjin xu cachja xuta changá jan.

<sup>6</sup> Hya xi camá ne, quiji xu Jesús cojo rë me. Hane xi ha jima tiñataha me ne, sehe catsingatju xu capitán ngujo xuta ndaja rë me xi quijitjengui me Jesús. Hane xi cavechútáha xu me Jesús ngajan ndiya ne, cuitjin cachja me sacuatjin cachja capitán cojo rë me xi cuichja me cojo Jesús:

—Tatá. Xicatuhunndyuun yojo nuju. Ngahan ne, vechiin chuva rë xi ngayun cuinduvun ndya naha ta, tséhë xi ngayun xi jemu jyë hnga ngayun cojo cjuatacun nuju. <sup>7</sup> Vëhë xi hacuaaha tsingátaha cáacun xi jemu chúva ngahan cojo cjuatacun naha xi cjuë cuichjá cojo nuju. Quihndë ne, ndastu nihñu favor ne, tinújun xi cumandaja hndixahan naha. <sup>8</sup> Ngahan ne, hvë xi cuma nihñu xcusun vëhë ta, ngahan ne, hacuaaha tjin xuta xi matitjun tsahan, hane hacuaaha tjin ná sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi. Hacuaaha hya xi chjá cojo ngu nga xi cuinduva ne, nduva. Hane hndixahan naha ne, xi chjá cojo xi sahmi mé xi meje ná ne, sahmi. —Cuatjin xu cachja xuta ndaja rë capitán jan cjua rë capitán cojo Jesús.

<sup>9</sup> Hane xi cahndé xu Jesús cjuá vèhè ne, jemu quijircun rè me tsèhè capitán jan. Hane xi cavuya me cavutsejen me xutacjín xi tjengui rè me jan ne, cachja xu me cuitjin:

—Cuichjá cojo nuju ta, ngajñi naja ngayejen ni ngayaan xuta tjè rè Israel ne, ejiè scuèè ngu xuta xi cuatjin ndaja mangucacun me cojo ná. —Cuatjin xu cachja Jesús.

<sup>10</sup> Hane xi cavuya xu me xi quiji tixa jan ne, cavèè me xi ha camandaja cha hndixahan jan.

*Casahmi Jesucristu xi cavuya ngu nima cjuahñu*

<sup>11</sup> Xi cavatju vèhè ne, quiji nga xu Jesús ngu nandya xi hmí rè Naín. Cavisecoo xuta ladu rè me me quiji me, cojo jingu sa xutacjín xi cojo me quiji me. <sup>12</sup> Hane xi tijima tiña xu me tsèhè tingotjo hnhua tsèhè nandya jan ne, cjuí seyaniji xu ngu nima, ngu nima xi quihndi ngu tsèhè naa rè. Hacuaha naa rè nima jan ne, cahan xu me. Jercu cjín camahani xuta nandya visecoo me chjuun jan cjuí me. <sup>13</sup> Hane xi cavèè xu Nai naja chjuun jan ne, camayuma rè me me. Sehe cachja me cojo chjuun jan cuitjin:

—Ha quihndé xicachjihnduun. —Cuatjin xu cachja me.

<sup>14</sup> Hane xi quiji tiña xu Jesús hiscan xi cjuí me cojo nima jan ne, sehe quiji cavetahatsja xu me nachan xi quisun nima jan. Hane xuta xi yahahnga rè nima jan ne, caxinchacunhñu me. Sehe ngajan xi Jesús ne, cachja xu me cuitjin:

—Quihndé ne, ngayun tsan ne, tsatjunhngun. —Cuatjin xu cachja me.

<sup>15</sup> Hane nima jan ne, cavisatjenhnga xu cha cavéjña cha. Sehe cavetsihin cachja cha. Sehe cachja Jesús cojo naa rè cha jan xi cjuahatsja nga me quihndi rè me. <sup>16</sup> Hya xi camá xu ne, yèjè ni xuta jan ne, jemu catsacjun me camá. Hacuaha cahmi jyè cahmi hnga me Nina, cuitjin xu cachja me:

—Cavetjuiñi ngajñi naja ngu profeta xi jercu vengui chji rè me, hacuaha cahmi Nina cjuandaja rè me cojo naja ngayaan xuta rè me. —Cuatjin xu cahmi jyè cahmi hnga me Nina.

<sup>17</sup> Hya xi camá ne, cavitsojo xu cjuá vèhè tsèhè Jesús jinguyè ni ladu vèhè cojo jinguyè ni nación Israel.

*Cavinenguisse Juan Jesucristu, ¿há me vèhè xi catsingatju Nina me?*

<sup>18</sup> Cuitjin xu camá nixtin xi cuacun vè. Xuta ladu rè Juan ne, casua me camachaya rè me yèjè xcusun xi cahmi Jesús. Sehe ngajan xi Juan ne, cajindaya xu me jo xuta ladu rè me jan ne, <sup>19</sup> sehe catsingatju me me xi cjué cjuinenguisse xu me Nai naja sá xi me vèhè xi chja xujun rè Nina xi tsingatju Nina me, o sá xi meje rè xi cuiyujuya rè xi cuinduva nga ngu.

<sup>20</sup> Hane xi cafehe xuta xi catsingatju Juan jan hiscan quitahá Jesús ne, cachja xu me cuitjin: —Juan Vitenda rè Xuta ne, catsingatju niji me xi nduvin vinenguisin nuju ¿há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin xu cavinenguisse xuta xi catsingatju Juan jan.

<sup>21</sup> Hane ha hora vèhè ni ne, Jesús ne, cahmi me xi jemu cjín xu xuta camandaja me tsèhè tu mé ni xcusun chíhin xi má rè me. Hacuaha jemu cjín sa xuta xi cavaxèxin Jesús xitsehen xi hinchahantsua xahasen rè. Hacuaha jemu cjín sa xu xuta rcá xi cahmi Jesús xi camá camatsejen rè me. <sup>22</sup> Hya xi camá ne, xi catsicuya me cjuá cojo xuta ladu rè Juan ne, cuitjin xu cachja me:

—Tjangun ne, sehe tinújun cojo Juan yèjè xcusun xi cahyun cojo yèjè cjuá xi canuhyun. Tinújun ta xuta rcá ne, camá camatsejen rè me; xuta rengun ne, camá quijindaja me; xuta xi yaha rè chíhin vitaha xi setaha yojo naja ne, camandaja me; xuta xi loho me ne, camá cahndé me; nima ne, cavuya nga cjuahñu; xuta yuma ne, casacu camachaya rè me cjuandajyihí rè Nina. <sup>23</sup> Hacuaha jemu ndaja tsèhè tu yo ni xuta xi hacuini tsismicacun me xi mangu cacun me cojo ná. —Cuatjin xu cachja Jesús.

<sup>24</sup> Hane hya xi cavuya cafe xu xuta ladu rè Juan jan ne, sehe cachja Jesús cojo xutacjín jan cuitjin tsèhè Juan:

—Hya xi cavetjun catsangun ngajan ngu xín tsèhè nandya catsanguntjengun Juan matsejen ne, ¿há caningatuhuntacún xi cuechuntuhun ngu xihin xi hacuini ngu ni cjuatacun rè me?, sacuatjin rè ngu ndeje xi fi guehe fi ngajan rcu sacuatjin cjuí tjo. <sup>25</sup> O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihí camahani? Hacuii cuatjin. Ha hyan matsejen ta xuta xi jercu tu ndacun camahani tsjian vaja me hacuaha hatuxa jemu cjuasua siu me matsejen ne, sacuii naja me ngajan ngu xín camaha ni tsèhè nandya matsejen ta hiscan xi sacuii naja me ne, ndava ngu xuta nhina. <sup>26</sup> Peru ngayun matsejen ne, catsangun cachutsujun ngu profeta. Hacuaha cjuaquixi xi vèhè cachutsujun. Peru profeta Juan vè matsejen ne, hitsè sa vengui chji rè me xi cuma rè yèjè sa profeta xi yahnga. <sup>27</sup> Hacuaha me vèhè xi cachja Nina tsèhè me xcun xujun rè me cuitjin:

Ngahan ne, tsingatju titjun ngu cha

xi scuxaha cjuatacun rë xuta tsëhë xi cjuehé ngaye.

Cuatjin cachja Nina cojo Quihndi rë me. <sup>28</sup> Cuichjá cojo nuju matsejen ta ngajñi rë yëjë xuta xi catsin me tsëhë naa rë me matsejen ne, tsajin ngu xi hitsë sa vengui chji rë xi cuma rë Juan. Peru hya xi cuetsihin Nina sahmi me gobiernu nguehe ngasunhndë matsejen ne, xuta xi chuva cuengui chji rë me quihndë matsejen ne, hitsë sa cuengui chji rë me nixtin hya, xi cuma rë xi ha vengui chji rë Juan quihndë.

<sup>29</sup> Hane hya xi yëjë ni xuta hisca cojo cha xi faha tujúnsa cahndë me cjua xi cachja Juan matsejen ne, catsingatihin me xi cuitenda Juan me. Hane chuva vëhë matsejen ne, catsingacun me xi macjain rë me xi Nina matsejen ne, yëjë xcusun xi sahmi me matsejen ne, hatuxa cjuaquixindaja jain. <sup>30</sup> Peru jemu cjín cha fariseo cojo cha vicuya cjuachacun matsejen ne, catsingatiin cha xi cuitenda Juan cha. Hane chuva vëhë matsejen ne, catsitjngui cha xcusun xi meje sahmi Nina xi cuma tsëhë cha.

<sup>31</sup> 'Ngayun xuta tjë rë Israel tsëhë nixtin vihi matsejen ne, ¿mé xi tangun ngayun cojo? <sup>32</sup> Tangun ngayun cojo langa xi siu ngajan ndetsin, xi jindaya xicjin cojo cjua vihi: "Canijani tsujun ne, mijí xtun; casin va ne, mijí chjihndun." Cuatjin jindaya langa. <sup>33</sup> Cuatjin chjá cojo nuju matsejen ta, Juan xi vitenda nuju ngayun matsejen ne, jinii me niñu hacuaha hviin me xan, hane ngayun nújun ta jiya xitsehen xahasen rë me. <sup>34</sup> Hane ngahan xi Quihndi rë Xuta Jain matsejen ne, jinë hacuaha hvë, hane nújun xi ngahan matsejen ne, ngu cha cahntsuaniniñu ngahan, ngu cha cahntsuxan ngahan, hacuaha ngu cha amigu rë cha xi faha tujúnsa cojo jingu sa xuta tsehen ngahan. <sup>35</sup> Peru xuta xi fitjengui me cjuatacun rë Nina matsejen ne, xuta xi cuacun vëhë xi tsingacun naja me xi cjuatacun vëhë matsejen ne, ndaja jain. —Cuatjin xu catsinguijnetaha Jesús cjua rë me cojo xuta.

#### *Catsinchataha Jesucristu ngu chjuun tsehen*

<sup>36</sup> Ngu nixtin nga jan ne, cuitjin xu camá. Ngu cha fariseo ne, cachja xu cha cojo Jesús xi cjue sinë me cojo cha niñu ndava cha. Hane xi cavisehen me ndava cha fariseo jan ne, sehe quiji cafaha xu me cahndë rë me xcun maxë xi sinë me niñu. <sup>37</sup> Ngajan xi ngu chjuun tsehen tsëhë nandya vëhë ne, camachaya xu rë na xi Jesús ne, tacun me ndava ngu cha fariseo tijinë me niñu cojo cha ne, yaha xu na ngu frascu xi ndyojo camá, hincha ngu xcusun aceite ndaja xi jercu hnga chji rë. <sup>38</sup> Quiji xu na secun na táha ntsacu me, jihnda na. Hane cojo ndatuxcun na ne, cavetsihin catsicahnchi xu na ntsacu me. Hane cojo tsjarcu na ne, cavujnu na, sehe cavitatsuha na. Hya xi camá xu ne, sehe cavitejnu na aceite. <sup>39</sup> Peru xi cavëë xu cha fariseo xi quijicojo rë me jan xi cuatjin casahmi na ne, catsingataha cacun cha cuitjin: "Cha xi cuijyihí vihi ne, sá xi profeta jain cha ne, ha vëë cha mé xcusun chjuun na xi cuatjin satëtsja rë cha ta, tsëhë xi na vëhë ne, ngu chjuun tsehen na." Cuatjin catsingataha cacun xu cha. <sup>40</sup> Sehe ngajan xi Jesús ne, catsicuya xu me cjua tsëhë cjuatacun xi catsingataha cacun cha fariseo jan, cuitjin xu cachja me:

—Simón, tjín ná ngujo cjua xi cuichjá cojo nuju. —Cuatjin xu cachja me.

Ngajan xi cha Simón jan ne, cuitjin xu cafayangui cha tsëhë me:

—Maestro, tinújun. —Cuatjin xu cachja cha.

<sup>41</sup> Hya xi camá xu ne, cachja Jesús cuitjin cojo cha ngu ejemplu:

—Cuejña ne xi jo cha jan ne, quitjen cha tujún tsëhë ngu cha nchina. Ngu cha ne, quitjen cha tujún tsëhë hñu cientu nixtin xi sahmi ngu mosu xá. Hane ngu nga cha ne, quitjen cha tujún tsëhë yachan të nixtin. <sup>42</sup> Hane xi tsajin rë cha xi cuacun vë tujún xi sahmingojo cha ne, cha nchina jan ne, catsinchataha cha catsijo cha. ¿Jarë cha xi cuicun vi xi hitsë sa tsihmu cacun cha cha nchina jan, xi má nuju? —Cuatjin xu cachja me.

<sup>43</sup> Sehe ngajan xi cafayangui xu cha Simón cuitjin:

—Xi má ná ne, cha xi hitsë sa cjín quitjen. —Cuatjin xu cachja cha Simón.

Sehe ngajan xi cachja xu Jesús cojo cha cuitjin:

—Jemu ndaja canichuvun cjua xi canújun. —Cuatjin xu cachja Jesús.

<sup>44</sup> Hane xi cavuya xu me cavutsejen me chjuun jan ne, sehe cachja nga me cojo cha Simón cuitjin:

—Chutsujun hacutjin casahmi chjuun vihi cojo ná. Ngayun ne, hora xi cavisehen ndya nuju ne, catuun nandá xi cjuengui ntsacú. Peru chjuun vihi ne, cojo ndatuxcun na catsicahnchi na ntsacú, hane cojo tsjarcu na ne, cavujnu na. <sup>45</sup> Hacuaha ngayun ne, cavitatsun ná. Peru na vihi ne, hisca hora xi cavisehen ne, cjëë cuejñaxin na xi vitatsuha na ntsacú. <sup>46</sup> Ngayun ne, cavitejnu aceite rcú. Peru chjuun vihi ne, cavitejnu na aceite ntsacú, aceite xi jemu ndaja jne camahani. <sup>47</sup> Vëhë xi cuichjá cojo nuju ta tsejen xi ha camanchataha na tsëhë jyë cjín xi tjín rë na ta, tsëhë xi jemu tjín rë na cjuahmutacun. Peru yo xi manchataha tsëhë hitsë jyë xi tjín rë ne, hacuaha chúva cjuahmutacun tjín rë. —Cuatjin xu cachja Jesús.

<sup>48</sup> Ngajan xi cachja xu Jesús cojo chjuun jan cuitjin:

—Jyě nuju ne, ha camanchataha. —Cuatjin xu cachja me.

<sup>49</sup>Hane xuta xi tijině xu cojo rě me jan ne, cavetsihin cavinenguise me ngajñi rě me cojo xicjin me cuitjin:

—¿Yo rě cha xi cuijyihí vi xi hisca jyě rě xuta tsinchataha cha? —Cuatjin xu cachja me.

<sup>50</sup>Peru Jesús ne, cachja nga xu me cojo rě chjuun jan cuitjin:

—Ngayun ne, ha cavetjuntjun ta, tsěhě xi camangutacún cojo ná. Cuma cuangun cojo cjuasua. —Cuatjin xu cachja me.

## 8

### *Yachjin xi cafahacuenda rě Jesucristu*

<sup>1</sup>Cuitjin camá nga xu ngu nixtin. Jesús ne, titsujyihya xu me jemu cjin nandya cojo ranchun tisua me tijimachaya rě xuta cjuandajyihí xi chja tsěhě gubernu xi sahmi Nina. Hacuaha cojo tejó xuta ladu rě me jan cavisecoo xu rě me. <sup>2</sup>Hacuaha cojo sa ngujo yachjin xi cavetju xitsehen xi hinchaxahasen rě me hacuaha camandaja me tsěhě chíhin xi má rě me ne, cojo xu me quiji me. María, na xi hacuaha hmi rě na Mágdala, ngu chjuun xi cavetju yatu xitsehen xahasen rě, <sup>3</sup>cojo Juana, chjuun rě Chuza, ngu cha xi sahmixa ndava Herodes, me xi cavitexa ngajan distritu Galilea, cojo Susana cojo jemu cjin sa yachjin xi hacjahi. Yějě ni yachjin xi cuacun vě ne, cojo xcusun xi tjin rě suvá me ne, cafahacuenda xu me Jesús cojo yějě ni xuta xi ticojo me.

### *Ejemplu tsěhě cha xi catsitjě trigu*

<sup>4</sup>Cuitjin camá xu ngu ndiya nga. Hya xi jemu cjin xuta camatangun me xi canduva nguehe canduva ngajan me jingu sa nandya xi nduva tjengui xu me Jesús ne, cachja Jesús cojo xuta jan ngu ejemplu vihi:

<sup>5</sup>—Cuejñaa ne xi ngu cha xi tsitjě trigu matsejen ne, cavetju cha quiji cha xi tsitjě cha trigu. Hane jinguyějě rě xi titsitjě cha matsejen ne, ngujo matsejen ne, cavixu ndiya, hane canune rě. Hane xi canduva chu nisě matsejen ne, catsicjě chu cajině chu. <sup>6</sup>Hane ngujo nga matsejen ne, cavixu hiscan xi jemu naxindya. Hane xi cavetsihin tijima yehe ne, caxintsen matsejen ta, tsěhě xi tsajin mé xcuen rě. <sup>7</sup>Hane ngujo nga matsejen ne, cavixu ngajñi nahyá. Hane xi camachatangun matsejen ne, nahyá jan matsejen ne, věhě casahmi hndě rě catsixi rě. <sup>8</sup>Hane xi yahnga nga matsejen ne, cavixu hiscan nihndě ndaja. Hane xi camayehe matsejen ne, casua tutjě rě, ngu cientu sa cuatjin sacuatjin xi camatjě.

Xi café cachja me cjua věhě ne, sehe jercu hñu xu cachja me cuitjin:

—Yo ngayun xi tjin nuju cjuasua xi cuinuhyun cjua naha ne, ndaja tinuhyun. —Cuatjin xu cachja me.

### *Mé má ejemplu cachja Jesucristu cojo xuta*

<sup>9</sup>Ngajan xi xuta ladu rě me jan ne, cavinenguise xu me mé meje cuichja ejemplu xi cachja Jesús jan. <sup>10</sup>Hane Jesús ne, cachja xu me cuitjin:

—Nina ne, casua me cahndě xi ngayun ne, cuijne rcun cjuatacun tsěhě gubernu xi sahmi Nina, cjuatacun xi titjún ne, tsajin yo machaya rě. Peru yějě sa me xi yahnga ne, tichjá cojo rě me cojo suvá ejemplu, cojo sa xi handasa cuihndě me cjua naha ne, peru cuijnii rcu me.

### *Cachja Jesús mé vijne ejemplu tsěhě cha xi catsitjě trigu*

<sup>11</sup>Quihndě ne, nguehe cuichjá cojo nuju mé meje cuichja ejemplu věhě. Trigu xi tsitjě ngu cha jan ne, věhě xi sacuaaha cjua rě Nina. <sup>12</sup>Hane hya xi vixu ngujo trigu ndiya ne, hacui sacuaaha hya xi visiñuju xuta cjua rě Nina. Sehe vinduva Satanás ne, fahatahá cjua rě Nina tsěhě xahasen rě me, cojo sa xi cuetjintjin me ngatsě rě xi cumacjain rě me. <sup>13</sup>Hane hya xi vixu ngujo trigu hiscan xi jemu naxindya ne, hacui sacuaaha hya xi vihndě xuta cjua rě Nina, hane fahatsja me cojo cjuasua. Peru trigu xi cuacun vě ne, jemu chúva tyjama rě vetju. Hacuanitjin ni vatju ngujo xuta má. Macjain rě me ngujo nixtin ni, peru hya xi vechú ngunixtin xi chjaháchuva rě me ne, fi ngaxtun me. <sup>14</sup>Hane hya xi vixu ngujo trigu ngajñi nahyá ne, hacui sacuaaha hya xi vihndě xuta cjua rě Nina, peru ha xcun xi ha cjuinduju me cojo nixtin rě me ne, tsingataha cacun me tsěhě cjuacjintacun tsěhě cahntsua ndava me, tsingataha cacun me tsěhě cjuanchina, hacuaha tsingataha cacun me tsěhě cjuasua xi tjin ngasunhndě, hane věhě suaain cahndě xi cumajyě cjua rě Nina cahntsua xahasen rě me, hacuaha sahmi me ngu cjuandaja xi tsingacun xi xuta rě Nina me. <sup>15</sup>Hane hya xi vixu yahnga trigu hiscan nihndě ndaja ne, hacuaha hacui sacuaaha hya xi vihndě xuta cjua rě Nina cojo ngu xahasen ndaja, ngu xahasen tyjahi, hacuaha tsismicacuaain me. Hane cuatjin cojo jeya ne, caa rě me sahmi me cjuandaja.

### *Ejemplu tsěhě ngu ndihi*

<sup>16</sup>Hacuaha tsajin hisca xi ngu xuta xi ha xcun xi ha cavetaha rě me ngu ndihi ne, sehe faha me veyahma me ngahma rě ngu tyucu o sá xi faha me vejña me ngahma nachan ta,



hatuxa faha me vejña me cahndé rë, cojo sa xi yějê xuta xi visehen me hiscan setí ndihi jan ne, scuëë me hasen rë. <sup>17</sup> Hacuaniñjin ni chuva vëhë, yějê cjua rë Nina xi tivicyuá nuju suvun ni ngayun xuta ladu naha ne, handasa hinchahma yějê cjua vëhë quihndé ne, peru cuechú nixtin xi cuetjuuca tsejen, hacuaha cuicuyun rë yějê xuta.

<sup>18</sup> Vëhë xi meje rë xi nihñu ngahñu xi ndaja cuisñuju cjua rë Nina ta, tsëhë xi tu yo ni xi tjin rë cjua vëhë ne, Nina ne, sua sa rë me. Hane tu yo ni xi tsajin rë cjua vëhë ne, hitsë cjua vëhë xi má rë xi tjin rë ne, chjahátahá rë. —Cuatjín xu cavicyua Jesús xuta ladu rë me.

*Naa rë Jesucristu cojo xicjin me*

<sup>19</sup> Ngajan xi naa rë Jesús cojo xicjin me ne, cafehetjengui xu me Jesús. Hane maji vechútahacjin rë me ta, tsëhë xi jercu quitsë camaha xu ni xuta. <sup>20</sup> Hane tjin xu yo casua camachaya rë Jesús cuitjín:

—Naa nuju cojo nixti xingun ne, hinchacun me ngajan candatsen, xi nduvatjengui nuju me. —Cuatjín xu casacu camachaya rë me.

<sup>21</sup> Peru Jesús ne, cuitjín xu cafayangui me:

—Xuta xi vihndé me cjua rë Nina hacuaha sahmi me sacuatjín chja cjua vëhë ne, hacuaha tangun ni hmú cáacun me sacuatjín hmú cáacun naa naha cojo xingueen. —Cuatjín xu cafayangui me.

*Cavatëcja Jesucristu ngahñu rë tjo cojo cjuasca rë nandá*

<sup>22</sup> Cuitjín camá nga xu ngu nixtin jan. Cavisehen Jesús cahntsua ngu barcu cojo xuta ladu rë me, sehe cachja xu me cojo xuta jan cuitjín:

—Cuanguen ngunda vëhë. —Cuatjín xu cachja me.

Sehe quiji me. <sup>23</sup> Hane ngajñi cjui xu barcu cojo rë me ne, Jesús ne, cafañafë xu me. Hya xi camá ne, canduva ngu tjo hñu xi jercu tu cjuachan camahani vanga xcun laguna jan. Hane barcu jan ne, jercu tivisehen xu nandá cahntsua, hane me xi cuacun jan ne, jemu tsavi camahani xi cuma rë me. <sup>24</sup> Hane xi quiji tiña xu me hiscan jiñafë Jesús ne, sehe catsingasca me me, cuitjín xu cachja me:

—¡Tatá, tatá! ¡Nguehe tifë ngayaan! —Cuatjín xu cachja xuta ladu rë Jesús jan.

Hane xi cavasca xu rë Jesús ne, cavatëcja me ngahñu rë tjo jan cojo cjuasca rë nandá jan. Sehe casejyu tjo casejyu nandá, jemu ndaja cavéñajyuu jinguyë ní. <sup>25</sup> Sehe ngajan xi Jesús ne, cuitjín xu cachja me cojo xuta ladu rë me jan:

—¿Há manguaaintacún cojo ná ní? —Cuatjín xu cachja me.

Hane xi catsacjun xuta jan camá ne, jemu quijircun rë me. Sehe cachja xu me ngajñi rë me cojo xicjin me cuitjín:

—¡Mé xcusun xuta me vi xi hisca tjo hisca nandá vitexa me, hacuaha vihndé tsëhë me ní! —Cuatjín xu cachja xuta ladu rë me jan.

*Cha Gadarena xi hinha xitsehen xahasen rë*

<sup>26</sup> Hya xi camá xu ne, cafehe me nandya Gadara, ngu nandya xi tacun ngunda vëhë tsëhë laguna Galilea. <sup>27</sup> Hane xi cafehe xu Jesús nangui quixí cojo xuta ladu rë me ne, cavechútáha me ngu cha tsëhë nandya vëhë xi hinha xitsehen xahasen rë cha. Cha vëhë ne, ha jemu tsëë xu xi vajin cha tsjian, hacuaha hacuñi cahntsua ndihya véjña cha ta ngajan tahndé véjña cha. <sup>28</sup> Xí cavëë xu cha Jesús ne, jercu cajindaya cha quiji caticjaxcun cha xcun me, hacuaha jercu hñu cachja cha cuitjín:

—¿Mé má cuatjín ninguisuhunñju cojo ná ngayun Jesús, Quihndi rë Nina xi hatuxa jyë hnga cojo Hasen rë? Nihñu favor ne, xicatuun ná cjuañihi. —Cuatjín xu cachja cha.

<sup>29</sup> Cuatjín cachja cha ta, tsëhë xi Jesús ne, ha cavitexa me xitsehen xi cuetjuxin tsëhë cha. Ha jemu tsëë xu nduva nixtin xi visehen xitsehen xahasen rë cha. Hane xuta ne, tsihñu tsja tsihñu ntsacu me cha cojo cadena cojo sa xi ha quihndé cuetjiin cha cjue cha. Peru xi vicheya cha cadena ne, xitsehen ne, ficojo cjuachan rë cha ngajan ngu xín camahani tsëhë nandya. Jemu cjín ndiya xu xi cavatju cha camá cuatjín. <sup>30</sup> Ngajan xi Jesús ne, cuitjín xu cavinenguise me cha:

—¿Hacutjín hmí nuju? —Cuatjín xu cachja me.

Hane cha vëhë ne, cuitjín cafayangui cha:

—Sindadu Cjín. —Cuatjín xu cachja cha.

Cuatjín cachja cha ta, tsëhë xi jemu cjín xitsehen cavisehen xahasen rë cha. <sup>31</sup> Hane ngajan xi xitsehen xi cuacun jan ne, jemu cafehya xu favor cojo Jesús xi hacuñi cuitexa me xi cjue ngajan nduchin. <sup>32</sup> Hane tiña ngajan ne, jemu cjín xu chinga hinchataha chu tijiné chu ngajan ngu ndetjún. Hane xitsehen jan ne, cafehya cojo Jesús xi sua me cahndé xi cuisehen xitsehen jan xahasen rë chinga. Hane casua xu me cahndé. <sup>33</sup> Hane xi cavetju xu xitsehen jan tsëhë xahasen rë cha vëhë ne, quiji cavisehen xahasen rë chinga. Hya xi camá

xu ne, chinga jan ne, cavanga chu quijijne chu tsêhê rcu ndetjún, hane ngajan cavixuya xu chu ngajñi nandá tsêhê laguna, hane ngajan camiji rê chu nandá ne, ngajan café xu chu.

<sup>34</sup> Ngajan xi xi cavêë xu cha xi sahmi cuidadu rê chu chinga jan xcusun xi camá ne, cavanga cha quiji casua cha camachaya rê nandya cojo ranchun xcusun vêhê. <sup>35</sup> Hya xi camá ne, xuta jan ne, cavetju xu me quiji cavutsejen me xcusun xi camá jan. Hane xi cavechútáha me Jesús ne, hacuaaha cavêë me cha xi cavetju xitsehen xahasen rê jan, yaja xu cha ngu tsjan, hacuaaha ha cavéñña chihin cjuatacun rê cha, tacun cha tiña ntsacu Jesús. Hane xuta jan ne, jemu catsacjun me camá. <sup>36</sup> Hane xuta xi cavêë xu xcusun xi camá jan ne, casuacuenda me cojo xuta xi yahnga jan hacutjin camá xi camandaja cha xi caxincha xitsehen xahasen rê jan. <sup>37</sup> Hya xi camá ne, yêjë xuta tsêhê ladu tsêhê nandya Gadara ne, cafehya xu me cojo Jesús xi cuetjuxin Jesús tsêhê xuta xi cuacun jan ta, tsêhê xi jemu catsacjun camaha ni yêjë me camá. Hane ngajan xi Jesús cojo xuta ladu rê me ne, cavisehen xu me barcu sehe cavuya nga me ngunda vihi. <sup>38</sup> Hane chaja sa xi cjue Jesús ne, cha xi cavetju xitsehen xahasen rê jan ne, cafehya cha cojo rê me xi cjue cha cojo rê me. Peru Jesús ne, catsinguijnetaha xu me cjua cojo rê cha, cachja me cuitjin:

<sup>39</sup> —Tuyun tjangun ndya nuju ne, hacuaaha tinújun cojo xuta tsêhê cjuandaja xi cuacun casahmi Nina cojo nuju. —Cuatjin xu cachja Jesús.

Ngajan xi xi cavuya cafehe xu cha nandya ne, sehe cavetsihin catsujyihya casuacuenda cha xuta jingujyê ni ngajñi nandya yêjë ni cjuandaja xi cuacun casahmi Jesús cojo cha.

*Catsicuya Jesucristu cjuahñu rê quihndi rê Jairo hacuaaha camandaja na xi casatêtsja tsjian rê Jesucristu*

<sup>40</sup> Hya xi cavuya Jesús ngunda vihi ne, yêjë ni xutacjín jan ne, jemu ndaja cafahatsja xu me Jesús ta, tsêhê xi hatuxa siuya me me. <sup>41</sup> Hane hora vêhê ne, canduva xu ngu me xi hmi rê Jairo, me xi má xutaxa rê yungun. Hane quiji caticjaxcun xu me xcun Jesús. Hane cafehya me favor cojo Jesús xi cjue Jesús ndava me ta, <sup>42</sup> tsêhê xi me vêhê ne, tjín xu rê me ngu na lihndi xi quihndi ngu tsêhê me. Hane na lihndi vê ne, sacuaaha tejó na nu. Hane meje cueya xu na.

Ngajan xi Jesús ne, quiji xu me. Hane ngajñi cju me ne, jemu tivehncun xu xuta me. <sup>43</sup> Hane ngu na jan ne, tjín rê tejó nu xi yaha rê na chíhin xahmajni. Hane café tujún rê na cavechji na xcun doctor. Peru tsajin xu yo camá cafahaxin chíhin xi má rê na. <sup>44</sup> Hane xi quiji tiña na táha ngaxtun Jesús ne, quiji na casatêtsja na ntsacu tsjian rê me. Hya xi camá xu ne, ha tu ñahñu cavasen xi vanga rê na jni. <sup>45</sup> Ngajan xi Jesús ne, cachja xu me cuitjin:

—¿Yo xi casatêtsja ná? —Cuatjin xu cachja me.

Hane xi cachja yêjë xuta xi hacuiin me casatêtsja me ne, sehe cachja xu Pedru cuitjin:

—Tatá, xutacjín ne, tivehncun nuju me, hacuaaha hisca titsivaha nuju me. —Cuatjin xu cachja Pedru.

<sup>46</sup> Peru Jesús ne, cachja nga xu me cuitjin:

—Peru tjín yo xi casatêtsja ná ta ngahan ne, camachaya ná xi cavetju ná hitsê ngahñu. —Cuatjin xu cachja Jesús.

<sup>47</sup> Hane xi vutsejen na xi cumaji seyahma na ngajñi rê xuta ne, ña fatsê xu na quiji caticjaxcun na xcun Jesús. Sehe catsinguixi na xcun yêjë ni xuta mé má cuatjin quiji na casatêtsja na Jesús, cojo tsêhê xi ngutjen ni camandaja na. <sup>48</sup> Sehe ngajan xi Jesús ne, cuitjin cachja xu me cojo rê na:

—Ngayun tsan ne, camandaja ngayun ta, tsêhê xi camangutacún cojo ná. Cuma cuangun cojo cjuasua. —Cuatjin xu cachja Jesús.

<sup>49</sup> Tu tichja cuaha xu Jesús cojo na xi camandaja jan ne, cafehe nga ngu me xi canduva me tsêhê ndava xutaxa rê yungun jan, hane cuitjin xu cachja me cojo xutaxa rê jan:

—Quihndi nuju ne, ha cahme na. Ha quihndê xicatuhandnyuun rê maestru. —Cuatjin xu cachja me.

<sup>50</sup> Hane hya xi cahndê Jesús cju vêhê ne, sehe cachja xu me cojo xutaxa rê jan cuitjin:

—Xicarcuun. Catamangutacún ni cojo ná ne, quihndi nuju ne, cumandaja na. —Cuatjin xu cachja me.

<sup>51</sup> Hya xi camá xu ne, xi cafehe Jesús ndava xutaxa rê yungun jan ne, casuaain me cahndê xi cojo jingu sa xuta cuisehen me. Suvá ni Jesús cojo Pedru cojo Juan cojo Jacobo cojo naa cojo nahmi rê nima lihndi jan cuisehen me cahntsua ndihya. <sup>52</sup> Hane yêjë ni xuta ne, hisca chja hisca jihnda xu me tsêhê nima jan. Ngajan xi Jesús ne, cuitjin xu cachja me cojo xuta jan:

—Ha quihndê xicachjihnduun. Na lihndi vê ne, hacuiin cahme na ta jiñafê na. —Cuatjin xu cachja me.

<sup>53</sup> Peru xuta jan ne, tu cavejnucëë xu me Jesús ta, tsëhë xi vëëndaja me xi cahme jain nima. <sup>54</sup> Hane xi cavisehen Jesús hiscan jiña nima lihndi jan ne, sehe quiji me cafaha me tsja, sehe ndaja hñu cachja xu me cuitjin:

— ¡Tisatjinhngue, tsan! —Cuatjin xu cachja me.

<sup>55</sup> Hya xi camá xu ne, cavuya hasen rë nima, sehe ngutjen ni cavisatjenhnga na. Hane sehe cavitexa xu Jesús xi sua xuta rë na lihndi jan niñu sinë na. <sup>56</sup> Hya xi camá xu ne, xutacha rë na lihndi jan ne, jemu quijircun rë me. Ngajan xi Jesús ne, cachja xu me cojo xutacha rë na lihndi jan xi tsajin camahani yo cuichja me cojo xcusun xi camá.

## 9

### *Catsingatju Jesucristu tejó xuta ladu rë me xi cuichja cjuandajyihî rë Nina*

<sup>1</sup> Cavechú ngu nixtin xi casahmitangun xu Jesús xuta ladu rë me xi tejó jan ne, sehe casua rë me ngahñu hacuaha casua rë me xá xi me xi cuacun vëhë cuitexa xu me yëjë xitsehen hacuaha sahmi me xi xuta hmu rë ne, cuma ndaja xu me. <sup>2</sup> Hya xi camá xu ne, sehe catsingatju Jesús me xi sua me cumachaya rë xuta tsëhë gobiernu xi sahmi Nina hacuaha sahmi xuta xi cuacun vë xi xuta hmu rë ne, cuma ndaja xu me. <sup>3</sup> Hane cuitjin xu cachja Jesús cojo rë me:

—Xi cuetjun cuangun ne, tsajin camahani mé xi chuhun, hacuiin bastón ne, hacuiin changa, hacuiin niñu, hacuiin tujún, hacuaha hacuiin jo tsjian ngahma chuhun jima ngu ngayun. <sup>4</sup> Hacuaha xi cjuhun ngu ndihya ne, ha ngajan ni tinechun nguixun nguixun ni, hisca xi cuetjunxun tsëhë nandya vëhë. <sup>5</sup> Hya xi xuta tsëhë ngu nandya cjuahatsjaain nuju me ne, xi cuetjun tsëhë nandya vëhë ne, titsunu chojo rë ntsacun cojo sa xi cuma tsejen xi xuta jan cún rë me. —Cuatjin xu cachja Jesús.

<sup>6</sup> Sehe ngajan xi cavetju xu xuta ladu rë Jesús jan, quiji catsujyihya me yëjë ni nandya tsëhë distritu Galilea, casua me camachaya rë xuta tsëhë cjuandajyihî xi chja tsëhë gobiernu xi sahmi Nina hacuaha casahmi me xi xuta hmu rë ne, camandaja xu me jinguyë ni ladu vëhë.

### *Hvîin xuta yo xi Jesucristu*

<sup>7</sup> Hane Herodes, me xi cavitexa ngajan distritu Galilea ne, camachaya xu rë me yëjë xá xi tisahmi Jesús cojo xuta ladu rë me. Hane ngu cachajá xu cjuatacun rë me ta, tsëhë xi ngujo xuta ne, chja me ta Jesús ne, hacui nima Juan Vitenda rë Xuta, hacuaha handasa cahme xu nima Juan vë ne, peru cavuya cjuahñu. <sup>8</sup> Ngujo nga me ne, chja me ta profeta Elias xi cavuya, hane yahnga nga me ne, chja xu me ta ngu nima profeta xi hacjahi, xi cavéjña hatsëë nixtin ne, handasa cahme ne, peru cavuya cjuahñu. <sup>9</sup> Peru Herodes ne, catsingataha cacun xu me cuitjin: “Nima Juan ne, ha cavitéxa xi catisun rcu. Peru quihndë ¿yo rë cha xi cuajyihî vë xi jemu cjin cjuu nuhya rë tsëhë cha?” Cuatjin xu catsingataha cacun me. Jemu casahmi xu me nguyë xi scuëë me Jesús.

### *Catsicjen Jesucristu hñú mil xihî*

<sup>10</sup> Hane xi cavuya xu apóstol tsëhë hiscan xi quiji me jan ne, sehe casuacuenda xu me Jesús xcusun xi casahmi me. Ngajan xi Jesús ne, quijicojo xu me suvá ni apóstol jan ngu cahndë xín, tiña tsëhë ngu nandya xi hmí Betsaida. <sup>11</sup> Peru xi camachaya rë xutacjin jan ne, quijitjengui xu me Jesús. Hane Jesús ne, jemu ndaja cafahatsja me xuta jan, hane sehe cachja me cojo xuta jan tsëhë gobiernu xi sahmi Nina. Hane xuta xi meje rë xi cuma ndaja me ne, casahmi xu Jesús xi camandaja me.

<sup>12</sup> Hane xi quiji hora jan ne, xuta ladu rë Jesús xi tejó jan ne, quijivaha me xcun Jesús sehe cachja xu me cojo cuitjin:

—Tinújun cojo xutacjin vë ne, catji me nandya xi siu tiñataha o sá xi ranchun xi siu tiñataha, cojo sa xi cuanguise me cahndë xi cuiyuju me hacuaha cuanguise me xi sinë me ta, tsëhë xi jemu xín tsëhë nandya hiscan xi nechantahan vi. —Cuatjin xu cachja apóstol.

<sup>13</sup> Ngajan xi Jesús ne, cuitjin xu cachja me cojo apóstol jan:

—Ngayun tuhun xi sinë me. —Cuatjin xu cachja me.

Ngajan xi apóstol ne, cafayangui xu me cuitjin:

—Hñú tutu pan cojo jo ti tjin naja. ¿Há cuanguin chíhin niñu xi sinë yëjë xuta xi cuicun vi ni? —Cuatjin xu cachja me.

<sup>14</sup> Cuatjin cachja me ta, tsëhë xi ngajñî rë yëjë xuta xi siutahá jan ne, sacuaha hñú mil má xuta xi xihî. Sehe ngajan xi cachja xu Jesús cojo xuta ladu rë me jan cuitjin:

—Tinújun cojo rë xuta vë ne, catiyuju me sacuaha yachantë me ngu ngu cahndë. —Cuatjin xu cachja me.

<sup>15</sup> Ngajan xi xuta ladu rë Jesús jan ne, cuatjin casahmi me, hane caviyuju xu yëjë xuta. <sup>16</sup> Hya xi camá ne, cafaha xu Jesús hñú pan cojo jo ti jan ne, hane xi cavutsejenniji me ngahnga ne, casua me nacuechji rë Nina, sehe cavotoho langa me pan hacuaha cavatëlanga

me ti jan, sehe casua xu me cojo xuta ladu rë me xi cjue sua rë me xutacjín jan. <sup>17</sup> Hane xuta ne, yějë ni me cajinë me hacutjin xi cachuya rë xahasen rë me. Hane xi cachjaya rë xi cavangui cajinë xuta jan ne, catsë xu tejó chajne.

*Catsinguixi Pedru yo Jesucristu*

<sup>18</sup> Cuitjin camá nga ngundiya. Hya xi tisahmi xu Jesús oración rë me ne, xuta ladu rë me ne, hacuaha cojo me siu me cojo rë me. Sehe ngajan xi cavinenguise xu Jesús me cuitjin:

—¿Mé chja xutacjín jan ne, yo ngahan? —Cuatjin xu cachja me.

<sup>19</sup> Sehe ngajan xi cachja xu me cojo Jesús cuitjin:

—Yahnga me ne, chja me ta Juan Vitenda rë Xuta ngayun. Hane yahnga nga me ne, chja me ta profeta Elías ngayun. Hane me xi yahnga nga ne, chja me ta ngayun ne, ngu profeta xi hacjahi, xi cavéjña hatsëë nixtin, xi handasa cahme ne, peru cavuya cjuahñu. —Cuatjin xu cachja xuta ladu rë Jesús.

<sup>20</sup> Sehe Jesús ne, cuitjin xu cavinenguise nga me:

—Hane ngayun ne, ¿mé nújun ni, yo ngahan? —Cuatjin xu cavinenguise Jesús.

Ngajan xi Pedru ne, cuitjin xu cafayangui me:

—Ngayun xi catsingatju nuju Nina xi cumatitjun ngayun tsijin. —Cuatjin xu cafayangui Pedru.

*Cachja Jesucristu xi tsiquehen xuta me*

<sup>21</sup> Peru Jesús ne, cavitexa xu me xuta jan xi tsajin camahani yo xi cuichja cojo me cjuatacun jan. <sup>22</sup> Cuitjin xu cachja me:

—Ngahan xi Quihndi rë Xuta Jain ngahan ne, hachu meje rë xi jemu cjín cjuañihi cuátju cuma; xuta changá cojo nahmi xi matitjun tséhë nahmi cojo cha xi vicuya cjuachacun ne, tsitjungui me ngahan, tsiquehen me ngahan. Peru xi ma jyan nixtin ne, tsicuya Nina ngahan cjuahñu. —Cuatjin xu cachja Jesús cojo xuta ladu rë me.

<sup>23</sup> Hane sehe cavuya cachja nga me cojo yějë ni xuta jan cuitjin:

—Sá xi tjin yo xi meje rë xi cuma xuta ladu naha matsejen ne, ha quihndë miji rë xi sahmi hacutjin xi meje rë suvá matsejen ta nchunchujun ni matsejen ne, catejñahñu xahasen rë xi cjucojo ndiya naha, handasa hisca cueya xcun cru. <sup>24</sup> Cuatjin matsejen ta, tséhë xi yo xi meje cjuendujo cojo ngasunhdë rë cojo cjuatacun rë suvá matsejen ne, cuechintaain cjuahñu xatsë. Peru yo xi cuatju cjuañihi o hisca cueya ngatsë naha matsejen ne, vëhé xi cuechútáha cjuahñu xatsë. <sup>25</sup> ¿Mé machjiréhë rë yo xi sacú rë yějë cjuanchina rë ngasunhdë sá xi cueya hacuaha cuma castigu? <sup>26</sup> Machjiriin matsejen ta, tséhë xi yo xi ma sava rë ngatsë naha cojo ngatsë rë cjuah naha matsejen ne, ngahan xi Quihndi rë Xuta Jain ngahan matsejen ne, hacuaha cuma sava ná tséhë hya xi cuinduva cojo hasen ndajyihí naha hacuaha tséhë Nahmi naha hacuaha tséhë ángel xi vejña tséhë me. <sup>27</sup> Nguehe cuichjá cojo nuju cjuaquixi matsejen ta tjin yahnga ngayun xi sechun nguehe xi cueyuun jinguyějë rë xi cjëë chun gobiernu xi sahmi Nina. —Cuatjin xu cachja Jesús.

*Ñahñu camatsejen nima Moisés cojo xutachanga xi hmí rë Elías visiajmi cojo Jesucristu*

<sup>28</sup> Cuitjin camá nga xu ngundiya hya xi cavatju sacuaha jyin nixtin xi cavicuya Jesús cjuah vëhé. Quijicojo me Pedru cojo Juan cojo Jacobo quijiniji xu me ngu ndetjún xi sahmi me oración rë me. <sup>29</sup> Hora xi tisahmi xu Jesús oración rë me ne, xcun me ne, cavindeya xcusun rë. Hane tsjian rë me ne, jercu tu tyava camahani camá, ña setí jyihí. <sup>30</sup> Hacuaha camatsejen xu jo xihin hinchacun visiajmi cojo rë me. Xihin jan ne, hacui xu nima profeta Moisés cojo profeta Elías. <sup>31</sup> Me xi cuacun vëhé ne, camatsejen me cojo ngu hasen ndajyihí, tivisiajmi xu me tséhë cjuaveya xi hatuxa tjin rë xi cuechútáha Jesús ngajan Jerusalén. <sup>32</sup> Peru Pedru cojo jo sa me xi yahnga jan ne, ha siufë me, tséhë xi jercu niñá rë me. Peru xi cavascandaja xu rë me ne, cavëë me hacutjin jercu setí camahani tsejen hiscan secun Jesús, hacuaha cavëë xu me jo me jan hinchacuntangun me cojo Jesús. <sup>33</sup> Hya xi camá ne, hora xi tivetjuxin me xi cuacun vë tséhë Jesús ne, sehe cachja xu Pedru cojo Jesús cuitjin:

—Tatá. Tu ma rë xi nguehe nechin ne, nihñi jyan puestu; ngu cuma tsujun ne, ngu cuma tséhë Moisés, hane cojo ngu cuma tséhë Elías. —Cuatjin xu cachja Pedru, peru hisca hvíin me mé xi chja me.

<sup>34</sup> Hane hora xi tichja xu Pedru cuatjin ne, canduva ngu yufí casahmi tjahnguen rë tséhë me. Hane jemu catsacjun me camá xi caxinchavasen me tséhë yufí jan. <sup>35</sup> Hya xi camá ne, canuhya xu rë ngujo cjuah xi cavetju ngajñi yufí jan xi cachja cuitjin:

—Cha vihi xi Quihndi naha cha, cha xi ngahan cavejñá cáacun xi tsingátju. Tinuhyun cjuah xi chja cha. —Cuatjin xu cachja cjuah jan.

<sup>36</sup> Hane xi cavatju cachja cjuah jan ne, Jesús ne, camasuvá sa me secun me. Hya xi camá xu ne, jyan xuta ladu rë Jesús jan ne, tu caviyujuyuu ni me. Hane nixtin hya ne, cachjaain camaha xu ni me cojo hisca ngu tséhë xcusun xi cavëë me.

*Casahmi Jesucristu xi camandaja cha lihndi xi jiya xitsehen xahasen rë*

<sup>37</sup> Cuitjin camá nga xu camá nchujun hya xi canduvajne Jesús tséhë ndetjún cojo jyan xuta ladu rë me jan. Tjercu cjin camahani xuta canduvatjengui xu rë me ndiya. <sup>38</sup> Hane ngajñi rë xutacjin jan ne, cavetjujñi ngu xihin xi jercu cajindaya xu cachja cojo Jesús cuitjin:

—Maestro, nihñu favor ne, nduvun chutsujun cha lihndi naha ta ngu tutu má cha vi xi tacun ná cha. <sup>39</sup> Hane cuitjin sahmi ngu xitsehen cojo rë cha: faha rë cha, hane tu ñahñu jindaya, sehe vitsuneya rë cha, ña vetju natyaxu hntsua cha, hane hisca hya xi ndiya cjuë cha ne, sehe vetjuxin tséhë cha. <sup>40</sup> Xuta ladu nuju, caféhya rë me favor xi cuaxëxin me, peru camaji cavaxëxin me. —Cuatjin xu cachja xihin jan cojo Jesús.

<sup>41</sup> Sehe ngajan xi Jesús ne, cuitjin xu cafayangui me:

—Ngayujun ni ne, xuta xi macjaain rë ngayun hacuaha xuta xi cavetjuxin tséhë ndiya ndajyihí ngayun. ¿Jani hisca hya xi tjin ná xi cuitejña cojo nuju? ¿Jani hisca hya xi tjin ná xi scaa ná cojo nuju? Nduvuncujun quihndi nuju nguehe. —Cuatjin xu cafayangui me.

<sup>42</sup> Hane hora xi tijima tiña xu cha lihndi jan tséhë Jesús ne, xitsehen ne, catsiticia rë cha, hacuaha vitsuneya rë cha. Hya xi camá ne, cavatëcja Jesús tséhë xitsehen, hane casahmi me xi camandaja xu cha lihndi jan. Sehe casua me cha cojo nahmi rë cha. <sup>43</sup> Hane yëjë ni xuta jan ne, jemu quijircun camaha xu ni rë me xi cuatjin jyë hnga Nina cojo Hasen rë me.

*Cachja nga Jesucristu xi tsiquehen xuta me*

Hane jinguyëjë rë xi cuatjin tificun rë xutacjin jan tséhë yëjë ni xcusun xi sahmi Jesús ne, cachja xu me cojo xuta ladu rë me cuitjin:

<sup>44</sup> —Ndaja tetuhuncun cjuá xi tichjá cojo nuju vi: Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta. —Cuatjin xu cachja me.

<sup>45</sup> Peru xuta ladu rë Jesús jan ne, cavijnii rcu me mé vjine cjuá jan ta, tséhë xi casetsa xu rë cjuatacun rë me, cojo sa xi cuijnii rcu me. Hacuaha tsacjun xu me xi cjuinenguise me Jesús mé vjine cjuá vëhë.

*Yo xi matitjun*

<sup>46</sup> Ngu nixtin jan ne, cavetsihin sacuaha xi meje scaanya xu xuta ladu rë Jesús ngajñi rë me yo xi hitsë sa matitjun. <sup>47</sup> Peru Jesús ne, xi ha vëë me hacutjin tsingataha cacun xuta ladu rë me jan ne, sehe cafaha me ngu lihndi cavisecon me ndaya rë me, <sup>48</sup> sehe cachja xu me cojo xuta ladu rë me jan cuitjin:

—Tu yo ni xi cjuahatsja rë lihndi vihi tséhë xi ladu naha má ne, hacuaha hora vëhë cjuahatsja ná ngahan. Hacuaha xi cuatjin cjuahatsja ná ngahan ne, hacuaha cjuahatsja rë Nina xi catsingatju ná. Hane tu yo ni xi má nuju xi ma tjengui tséhë ngajñi nuju ngayujun ni ne, vëhë xi matitjun xi má rë Nina. —Cuatjin xu cachja Jesús.

*Xuta xi hacuiin condra nuju má me ne, hatuxa favor nuju fi me*

<sup>49</sup> Ngajan xi Juan ne, cachja xu me cojo Jesús cuitjin:

—Tatá, cahyin ngu me xi tivaxëxin xitsehen sacuaha xi suvun catuhun rë me xá. Hane canujin cojo rë me xi ha quihndë sahmi me cuatjin ta, tséhë xi me vëhë ne, tsujyihintjenguiin me ngayun sacuatjin niji ngayin. —Cuatjin xu cachja me.

<sup>50</sup> Hane Jesús ne, cuitjin xu cafayangui me:

—Xicanujuun cojo rë me cuatjin ta, tséhë xi xuta xi hacuiin condra naja má me ne, hatuxa favor naja fi me. —Cuatjin xu cachja Jesús.

*Catsingatiin xuta distritu Samaria Jesucristu*

<sup>51</sup> Hya xi camá ne, xi tijima tiña xu nixtin xi cjueniji Jesús ngajan ngahnga ne, cavejñahñu me cjuatacun rë me xi cjue me ngajan Jerusalén. <sup>52</sup> Vëhë xi catsingatju titjun xu me jo xuta ladu rë me. Xi quiji me ne, cafehe me ngu nandya tséhë xuta Samaria, xi cuanguise me cahndë xi cuejña Jesús cojo xuta ladu rë me. <sup>53</sup> Peru xuta jan ne, cafahatsjaain xu me Jesús ta, tséhë xi Jesús ne, hatuxa tjin cacun me xi cjue me hisca Jerusalén. <sup>54</sup> Peru hya xi camachaya xu rë Jacobo cojo Juan, xuta ladu rë Jesús, cjuá vëhë ne, cachja xu me cojo Jesús cuitjin:

—Tatá. ¿Há nihña sacuatjin casahmi profeta Elías hatsëë nixtin? ¿Há cuitexan xi cuinduva ndihi tséhë ngahnga, tsicjë rë xuta xi cuicun vi? —Cuatjin xu cachja me.

<sup>55</sup> Ngajan xi Jesús ne, cavuya vutsejen me xuta ladu rë me jan ne, sehe cavatëcja xu me cjuatacun xi tsingataha cacun me xi cuacun jan, cuitjin cachja me:

—Ngayun ne, hyúun mé xcusun Hasen xi tséhë nuju. <sup>56</sup> Ngahan xi Quihndi rë Xuta Jain ngahan ne, hacuiin canduvá xi tsicjë xuta ta xi canduvá ne, xi cuaxëtjë me. —Cuatjin xu cachja Jesús.

Sehe quiji xu me ngu nga nandya.

*Xuta xi camameje cjue cojo Jesucristu*

<sup>57</sup> Hane ndiya cjuí Jesús cojo xuta ladu rë me ne, cachja xu jan me jan cojo rë me cuitjin:

—Tatá. Tu yani ni xi cuangun ne, cjuě cojo nuju. —Cuatjin xu cachja me.

<sup>58</sup> Sehe ngajan xi Jesús ne, cuitjin xu cachja me cojo xuta jan:

—Chu ninda ne, tjin nguijo hiscan viyuju chu, hane nisë xi vitjen chu ngahnga ne, tjin ndava chu, peru ngahan xi Quihndi rë Xuta Jain ngahan ne, hisca ndya naha tsajin.

—Cuatjin xu cachja me.

<sup>59</sup> Cachja sa xu me cuitjin cojo ngu nga xuta jan:

—Nduvun, cuanguen cojo ná. —Cuatjin xu cachja me.

Peru xuta jan ne, cuitjin xu cachja me:

—Tatá. Tuhun ná cahndë, titjun cjuě xi seyaniji nahmi naha. —Cuatjin xu cachja ngu nga xuta jan.

<sup>60</sup> Ngajan xi Jesús ne, cuitjin xu cachja me:

—Xuta xi sacuaaha xi cahme cjuatacun rë me xi sahmicuendaain me Nina ne, me vëhë catinchaniji me nima rë me. Peru ngayun ne, tãngun tuhun cumachaya rë xuta tsëhë gobiernu xi sahmi Nina. —Cuatjin xu cachja me.

<sup>61</sup> Ngu nga xuta ne, cachja xu me cojo Jesús cuitjin:

—Tatá. Ngahan ne, hacuaaha cjuě cojo nuju. Peru tuhun ná cahndë, cjuě tsinguijnetaha cjuua cojo xuta naha. —Cuatjin xu cachja xuta jan.

<sup>62</sup> Peru Jesús ne, cuitjin xu cachja me cojo xuta jan:

—Ngu xuta xi ha cavejña cacun me xi cjuetjengui me ndiya rë Nina sehe cumangu cumajo cacun me ¿há cjuë, há cjuuin me ne?, tangun me cojo ngu cha xi ha cafaha cha ndetsihin latu xi cuetsihin cuacjan cha nangui peru tivutsejen sa cha taha ngaxtun cha. Sacuatjin machjiriin cha vihi xi cuacjan cha nangui ne, hacuanitjin ni machjiriin me vëhë xi cuisecoo me Nina hiscan xi sahmi Nina gobiernu. —Cuatjin xu cachja Jesús.

## 10

*Catsingatju Jesucristu jyanchan tejó xuta ladu rë me xi cuichja cjuandajyihí rë Nina*

<sup>1</sup> Xi cavatju xu vëhë ne, sehe casuaxa Nai naja jyanchan tejó sa xuta ladu rë me, sehe catsingatju titjun me chuva jo chuva jo xuta jan yëjë ni nandya cojo yëjë ni cahndë xi catsingataha cacun Jesús xi sehe cjuë me. <sup>2</sup> Hane cuitjin xu cachja me cojo:

—Jemu tjin camahani xuta xi meje cuisifjuju me cjuua rë Nina, peru me xi sua cumachaya rë xuta ne, jemu chuva má me. Vëhë xi meje rë xi chjahyun rë Nina favor xi tsingatju me me xi cjuë sua cumachaya rë xuta cjuua rë Nina. <sup>3</sup> Tãngun ni. Ngahan titsingátju nuju ngayun xuta jeya ngajñi rë xuta hnga cacun, sacuaaha cjuë ngu chu hnditsãnga ngajñi rë chu cjan rë. <sup>4</sup> Xicachjuun tujún, xicachjuun changa, hacuaaha xicachjuun chuxinxhtë. Xicavisajmmu cojo xuta hora xi sacu xingun cojo rë me ndiya. <sup>5</sup> Hane tu jarë ni ndihya xi cuisuhun ne, titjun tinújun ngu nina cuitjin: “Nina sua nuju me cjuandaja cjuajeya.” Cuatjin tinújun. <sup>6</sup> Hane sá xi ndihya vëhë tjin quihndi tsëhë cjuajeya ne, hacuaaha sacú rë me cjuajeya. Peru sá xi hacuini quihndi tsëhë cjuajeya xi siu jan ne, sacuini rë me. <sup>7</sup> Hane xi cuisuhun ngu ndihya ne, ha ngajan ni tinechun, xinu siuhun cojo rë me mé xi sua me. Cuatjin nihñu ta, tsëhë xi ngu xuta xi sahmi me xá ne, vechú chuva rë xi sacú chji rë me. Vëhë xi miji rë xi cuangun nguehe cuangun ngajan cuinechun. <sup>8</sup> Hane tu jarë ni nandya xi cuisuhun hiscan xi cjuahatsja nuju xuta ne, xinu xcusun xi sua me xinu, <sup>9</sup> hacuaaha nihñu xi xutahmu rë tsëhë nandya jan ne, cumandaja me, hacuaaha cuitjin tinújun cojo yëjë xuta: “Ha camatiña nixtin xi cuma nuju xi sahmi Nina gobiernu.” Cuatjin tinújun. <sup>10</sup> Hane tu jarë ni nandya xi cuisuhun hiscan xi cjuahatsjaain nuju xuta ne, xi chjuhun ndiya xi cjuetjunxun tsëhë nandya vëhë ne, cuitjin tinújun cojo xuta: <sup>11</sup> “Hisca chojo rë ngajñi nandya nuju xi cavaqui rë ntsacuni ne, cuitsuni cojo sa xi cuma tsejen xi ngayun cún nuju. Peru meje rë xi cuijne rcun xi ha camatiña nixtin xi sahmi Nina gobiernu.” Cuatjin tinújun. <sup>12</sup> Cuichjá cojo nuju ta hya xi cuechú nixtin xi tsichuva Nina xuta tsëhë jyë rë me ne, hitsë sa jyë castigu cuatju xuta tsëhë nandya xi fahatsjaain nuju, xi cuma rë xuta tsëhë nandya Sodoma xi jercu tu casahmi camahani me cjuatsehen.

*Cjuachoho xi cuma rë ciudad xi camacjaain rë cjuua rë Jesús*

<sup>13</sup> ¡Jemu chojyihí tsëhë xuta nandya Corazín! ¡Hacuaha jemu chojyihí tsëhë xuta nandya Betsaida! Jemu chojyihí tsëhë me ta, tsëhë xi miji tsindeya me cjuatacun rë me, handasa cavëë me cjuarcun xi casahme ngajñi rë me. Xuta nandya Tiro cojo xuta nandya Sidón ne, hisca hacuini xuta ladu rë Nina má me sacuatjin rë xuta Corazín cojo Betsaida. Peru sá xi xuta Tiro cojo Sidón cavëë me cjuarcun xi cuacun vë ne, ha catsindeya me cjuatacun rë me, hacuaaha ha cavajá me tsjian xi sacuaaha tsánaxá hacuaaha caviyuju me ngajñi ndesu, sacuaaha xcusun naja, cojo sa xi cuma tsejen xi jemu choho má jain rë me tsëhë jyë rë me. <sup>14</sup> Vëhë xi hya xi tsichuva Nina yëjë xuta tsëhë jyë rë me ne, xuta nandya Tiro cojo xuta nandya Sidón ne, hitsë sa chúva castigu cuatju me cuma xi cuma rë xuta Corazín cojo xuta

Betsaida. <sup>15</sup> Hane xuta nandya Capernaum ne, ¿há cjue me hisca ngahnga hiscan tacun Nina? ¡Hacuiin! Hatuxa cjue me nduchin, cahndé hiscan ma hasen rē nima castigu.

<sup>16</sup> Xuta xi cuihndé me tsujun ne, hacuaha tivihndé me tsahan. Hane xuta xi tsitjungui nuju me ne, hacuaha titsitjungui me ngahan. Hane xuta xi tsitjungui ná me ne, hacuaha titsitjungui me Nina xi catsingatju ná. Cuatjin xu cachja Jesús cojo xuta ladu rē me, sehe cavetju xuta ladu rē me jan quiji me.

*Cavuya xuta ladu rē Jesucristu xi jyanchan tejó*

<sup>17</sup> Hya xi camá ne, xi cavuya xu xuta ladu rē Jesús xi jyanchan tejó jan ne, jercu sua rē xahasen rē me. Hane cuitjin xu cachja me cojo Jesús:

—¡Tatá! ¡Xi veyinnanguin ñihi nuju hora xi tinihñi xá xi cavitexun nihi ne, hisca xitsehen vihndé tsijin! —Cuatjin xu cachja xuta xi cuacun jan.

<sup>18</sup> Sehe ngajan xi Jesús ne, cuitjin xu cachja me cojo xuta jan:

—Jinguyéjē rē xi tivutsején ngahnga hiscan tacun Nina ne, cjanengui Satanás sacuaha camá ni ngu ndihichuhún. Hane cuatjin cahvé xi tichjahátáha rē gobiernu xi sahmi Satanás. <sup>19</sup> Chutsujun ni, ngahan casuá nuju chuva rē xi tsajin mé cuatjun cuma, handasa nunú chu yé o sá nunú chu naya o sá xi suvá camahani Satanás choho meje sahmi cojo nuju. <sup>20</sup> Hacuiin ndaja cuma nuju tséhē xi vihndé xitsehen tsujun ta xi meje rē ne, ndaja catama nuju tséhē xi ha quitaháxujun ñihi nuju ngajan ngahnga. —Cuatjin xu cachja Jesús cojo xuta ladu rē me jan.

*Casahmi jyē casahmi hnga Jesucristu Nina*

<sup>21</sup> Hane ha hora véhē ni ne, Hasen rē Nina casahmi xi jemu sua camahani camá rē xahasen rē Jesús, sehe cachja xu me cuitjin cojo Nina:

—Ngayun nahmi naha ne, sahmejyē sahme hnga nuju cojo Hasen nuju, ngayun xi Nai rē ngahnga cojo nangui ngayun, tséhē xi ngayun caveyúnhmu cjuatacun véhē xi cuma rē xuta xi jemu vechú cjuatacun rē, hane catuhun camachaya rē xuta xi hvíin camahani. Ngayun nahmi naha, cuatjin canihñu ta, tséhē xi cuatjin xi cachuya nuju. —Cuatjin xu cachja Jesús cojo Nina.

<sup>22</sup> Hane xi cojo yéjē ni xuta ne, cuitjin xu cachja me:

—Yéjē ngarca ni matsejen ne, Nina Nahmi naha casua ná me. Tsajin hisca ngu xi vée yo xi Quihndi rē Nina matsejen ta suvá ni Nina Nahmi naha xi vée me. Hacuaha tsajin hisca xi ngu xi vée yo xi Nahmi naha matsejen ta suva ni ngahan xi Quihndi rē me ngahan xi hvé, cojo tu yo ni xi ngahan meje suá cumachaya rē. —Cuatjin xu cachja me cojo yéjē xuta.

<sup>23</sup> Cavuya vutsejen nga me hiscan siu xuta ladu rē me ne, sehe cachja xu me cojo suvá ni me xi cuacun véhē cuitjin:

—Jemu ndaja tsujun ngayujun ni xi tichutsujun xcusun xi tijima nixtin vihi. <sup>24</sup> Nguehe cuichjá cojo nuju ta jemu ndaja tsujun ta, tséhē xi hacuaha jemu cjín profeta hacuaha jemu cjín xuta xi matitjun xi caviyuju titjún ne, jemu meje scué me xcusun xi ngayun tichutsujun, peru casacuiin cavé me. Hacuaha jemu meje cuisñuju me cjua xi tivisiñuju ngayun, peru casacuiin cavisñuju me ta, tséhē xi cjéé cuma xcusun véhē nixtin hya. —Cuatjin xu cachja Jesús cojo xuta ladu rē me.

*Ejemplu tséhē cha Samaria xi casahmi cjuandaja*

<sup>25</sup> Ngundiya nga hya xi tacun xu Jesús cojo xuta ne, casecun ngu cha xi vicuya cjuachacun cavinenguise xu cha cuitjin xi cjuahachuva cha me:

—Maestro. ¿Mé ndatjin xi sahme cojo sa xi cuécutáha cjuahñu xatsé xcun Nina? —Cuatjin xu cavinenguise cha me.

<sup>26</sup> Ngajan xi Jesús ne, cuitjin xu cachja me cojo cha:

—¿Hacutjin camahindu xcun ley rē Moisés? ¿Mé xi chutayun jan? —Cuatjin xu cachja me.

<sup>27</sup> Hane xi cafayangui cha ne, cuitjin xu cachja cha:

—“Meje rē xi nihmutacún Nina naja cojo nguñajatacún, cojo yéjē xahasen nuju, cojo yéjē ngahñu nuju, cojo yéjē cjuatacun nuju, hacuaha cuatjin nihmutacún xingun sacuatjin hmutacún suvun yojo nuju.” —Cuatjin xu cachjasun cha cjua rē ley.

<sup>28</sup> Hane cuitjin xu cachja Jesús cojo cha:

—Cjuaquixi cjua xi canújun. Cuatjin nihñu, sehe cuechuntuhun cjuahñu xatsé. —Cuatjin xu cachja Jesús.

<sup>29</sup> Ngajan xi cha xi vicuya cjuachacun jan ne, xi meje tsingacun cha xi jemu quixi cha cojo cjuatacun rē cha ne, cuitjin xu cavinenguise cha cojo Jesús:

—¿Yo xi xingueen ni? —Cuatjin xu cachja cha.

<sup>30</sup> Hane ngajan xi Jesús ne, cojo ngu ejemplu cafayangui xu me tséhē cha cuitjin:

—Cuejña ne xi ngu xuta jan ne, cavetju me tséhē nandya Jerusalén ne, cjui me nandya Jericó. Hane ndiya cjui me ne, cavechútáha ngujo cha chéjē me. Hane cafahatahá cha yéjē

tsèhè me xi yaha me, sehe cavaja cha me. Ña catsiquehenñaja cha me, hane sehe cavanga cha. <sup>31</sup> Hya xi camá ne, hora vèhè canduva ngu nahmi cavatju me ndiya vèhè, hane xi cavèè me xuma xuta xi casacuhmu rè jan ne, tjejen ndiya ladu xingu cavatju me quiji me. <sup>32</sup> Ha chuva vèhè ni ne, cafehe ngu sangrista cahndé vèhè. Hane xi cavèè cha xi jiña me xi casacuhmu rè jan ne, cavetahaxin cha hitsè ndiya rè cha sehe cavatju cha quiji cha. <sup>33</sup> Peru ngu cha tsèhè distritu Samaria xi quiji cha ndiya vèhè ne, cafehe cha hiscan jiña xutahmu rè jan. Hane xi cavèè cha me ne, jemu camayuma rè cha me. <sup>34</sup> Hane xi quijivaha cha xcun me ne, catsirqui cha me, cavitejnu cha aceite cojo xan hiscan casacuhmu rè me sehe catsitjinguia cha me tsjian. Hya xi camá ne, sehe catsiquijin cha me naxin rè cha, sehe quijicojo cha me ngu ndihya hiscan xi hatuxa ndihya viyuju xuta, hane ngajan casahmi cha me cuidadu. <sup>35</sup> Hane xi camá nchujun jan ne, cavaxé cha jo denario, tujún xi faha ngu mosu xi sahmixa jo nixtin, sehe casua cha me xi nai rè ndihya jan, sehe cachja cha cojo rè me cuitjin: “Nihñu cjuandaja ne, chjuhuncuendun xuma xutahmu rè vi. Hane xi quisun sa nicujun tsèhè xcun tujún xi suá nuju vi ne, xi cúa ne, sehe cuechjè tsujun.” Cuatjin cachja cha Samaria.

<sup>36</sup> Ngajan xi Jesús ne, xi cuatjin cajnetaha ejemplu xi cachja me ne, sehe cachja xu me cojo cha xi vicuya cjuachacun jan cuitjin:

—¿Jarè tsèhè catsijyan xuta xi cuacun vè xi má nuju xi cjuaquixi xi camá xicjin me xi cavanguihmu chèjè jan? —Cuatjin xu cachja Jesús.

<sup>37</sup> Ngajan xi cha xi vicuya cjuachacun jan ne, cuitjin xu cafayangui cha tsèhè Jesús: —Cha xi ngatsè rè cjuayuma ne, casahmi cjuandaja cojo me xi casacuhmu rè jan. —Cuatjin xu cachja cha.

Hane Jesús ne, cuitjin cachja nga xu me cojo cha:

—Quihndé xi cuangun ne, hacuaha cuatjin nihñu. —Cuatjin xu cachja Jesús.

#### *Quiji Jesucristu ndava na Marta*

<sup>38</sup> Hane xi cjuí sa xu Jesús cojo xuta ladu rè me ne, xi cavisehen me ngu nandya jan ne, ngu na xi hmí rè Marta ne, cafahatsja na Jesús ndava na. <sup>39</sup> Na Marta jan ne, tjin ngu tíchja na xi hmí rè María. Hane na María jan ne, quiji xu na cavéjña na táha ntsacu Jesús, tivisiñuju na cjuá xi tivicuya me. <sup>40</sup> Peru na Marta ne, jemu cjín xcunya xá xi tisahmi na. Hane xi cavatju na hiscan tacun Jesús ne, cuitjin xu cachja na:

—Tatá. ¿Há marcuaain nuju xi na tichja ne, cavejñasuva ná na cojo xá xi tacunvasen tisahme? Tinújun cojo rè na, catisecoo na ngahan. —Cuatjin xu cachja na.

<sup>41</sup> Ngajan xi Jesús ne, cuitjin xu cafayangui me tsèhè na:

—Marta, jercu marcun nuju tsèhè jemu cjín xcusun. <sup>42</sup> Peru ngu xcusun ni xi sahmi nguyjè. Na María ne, cavaxijin na xcusun xi ndaja vè, hane hacuñin chjahátahá rè tsèhè na. —Cuatjin xu cachja me.

## 11

### *Cavicuya Jesucristu hacutjin meje rè xi nihña oración*

<sup>1</sup> Cuitjin camá xu ngundiya hya xi tisahmi Jesús oración rè me ngu cahndé jan. Hane xi cajnetaha casahmi me oración rè me ne, ngu xuta ladu rè me jan ne, cuitjin xu cachja me cojo Jesús:

—Tatá. Ticuyun niji hacutjin nihñi oración niji, sacuatjin cavicuya Juan xuta ladu rè me. —Cuatjin xu cachja me.

<sup>2</sup> Ngajan xi Jesús ne, cuitjin xu cafayangui me:

—Hya xi nihñu oración ne, cuitjin tinújun:

Ngayun Nahmi niji, meje niji xi ngayijin ni xuta ngasunhndé chjihinrcuin nuju.

Meje niji xi cuinduvun nihñu niji gobiernu.

<sup>3</sup> Nchunchujun ni tuhun niñu xi xiní.

<sup>4</sup> Ninchatuhun niji tsèhè jyé xi jemu quitjin ta

ngayin suvin ne, hacuaha tininchatihin rè

yèjè ni xuta xi quitjen me jyé tsjian.

Xicatuun cahndé xi chjaháchuva niji cojo cjuatacun niji.

Cuatjin tinújun. —Cuatjin xu cachja Jesús cojo xuta ladu rè me.

<sup>5</sup> Hya xi camá ne, cachja nga xu Jesús ngu ejemplu cojo xuta ladu rè me. Cuitjin xu cachja me:

—Cuejña ne xi ngayun tjin nuju ngu xuta xi vinga nuju, hane vasen nixten cuangun ndava me, cuinújun cojo rè me cuitjin: “Amigu, nihñu favor tuhun jyan niñu scuxétaha ta,

<sup>6</sup> tsèhè xi ngu amigu naha cafehe ndya naha xi cjuí me ngu nangui, hane tsajin ná mé xi suá siné me.” Cuatjin cuinújun cojo rè me. <sup>7</sup> ¿Há cjuayangui me tsujun cuitjin tsèhè hisca cahntsua ndihya?: “Xicatuunndyuan ná ta tingotjo ndihya ne, ha tichjá, hacuaha quihndi



naha ne, nguehe siufë cojo ná. Cumaji cuisátjenhnga suá nuju.” ¿Há cuatjin cjuayangui me tsujun? Hacuuiñ cuatjin. <sup>8</sup> Cuichjá cojo nuju ta handasa amigu nuju me, peru hacuiñ ngatsë rë vëhë xi cuisatjenhnga me sua nuju me ta ngatsë rë xi ngajan cjuí ngajan nduva cuintúnj ne, cuisatjenhnga me sua nuju me ha tucutjin xi chjahyun. <sup>9</sup> Hacuaha cuichjá cojo nuju cuitjin: Chjahyun rë Nina, hane sua nuju me. Tinchunsun, hane sacú nuju. Tinúnj, hane Nina ne, sua me cahndë cuisuhun. <sup>10</sup> Cuatjin nihñu ta, yëjë ni ngata xi fehya me ne, fahatsja me, hane yo xi vanguise ne, sacú rë, hane yo xi chja ne, sacú cahndë visehen.

<sup>11</sup> Tsajin ngu nahmi xi, hya xi quihndi rë me cjuéhya ngu niñu ne, cahndë rë xi sua me ngu niñu ne, sua me ngu ndyojo, o sá xi hya xi quihndi cjuéhya ngu chu ti ne, cahndë rë xi sua me ngu chu ti ne, sua me ngu chu yë, <sup>12</sup> o sá xi hya xi quihndi cjuéhya ngu chu ti ne, cahndë rë xi sua me ngu chu naya. <sup>13</sup> Ngayun xi tsehen cjuatacun nuju ne, ma tuhun rë quihndi nuju xcusun xi ndaja. Hitsë guan Nahmi naja xi tacun me ngahnga ta hitsë sa jercu meje sua me Hasen rë me cojo xuta xi cjuéhya rë me. —Cuatjin xu cachja Jesús.

#### *Cachja xuta xi Satanás casuaxa rë Jesucristu*

<sup>14</sup> Cavechú xu ngu nixtin xi cavaxëxin Jesús ngu xitsehen xi casahmi lihmi rë ngu cha jan. Hane hya xi cavetju xitsehen jan ne, cha lihmi jan ne, cavetsihin cachja cha. Hane xutacjin jan ne, jemu quijircun rë me. <sup>15</sup> Hya xi camá ne, ngujo xuta jan ne, cuitjin xu cachja me:

—Beelzebú, xitsehen xi matitjun ne, vëhë casua rë cha xá xi vaxëxin cha xitsehen. —Cuatjin xu cachja xuta jan.

<sup>16</sup> Hane ngujo nga xuta ne, xi meje cjuahachuva me Jesús ne, cafehya me me xi sahmi me ngu cjuarcun xi cuinduva ngajan ngahnga. <sup>17</sup> Peru Jesús ne, tsëhë xi ha vëë me mé xi tsingataha cacun xuta xi cuacun jan ne, cuitjin xu cachja me:

—Hya xi xuta tsëhë ngu nandya ticjan me ngajñi rë me cojo xicjin me ne, nandya vëhë ne, ha tivëjña xahva, hisca ndihya ne, tivixusun xcun xicjin. <sup>18</sup> Hacuanitjin ni sá xi Satanás scaan cojo xitsehen xi yahnga xi hacuaha Satanás má nai rë ne, tsichajá ngahñu rë xi vëhë matitjun. Cuatjin chjá ta, tsëhë xi nújun xi Beelzebú casua ná xá xi vaxëxin xitsehen. <sup>19</sup> Peru sá xi Beelzebú casua ná xá xi vaxëxin xitsehen ne, hacuaha ha Beelzebú vëhë casua rë ngu ngu xuta ladu nuju xá xi hacuaha vaxëxin me xitsehen. Vëhë xi ha me vëhë ni cuichja me xi cuaintjin xi nújun xi Beelzebú casua ná xá. <sup>20</sup> Peru sá xi Nina casua ná me xá xi vaxëxin xitsehen ne, ngajan matsejen xi gobiernu xi sahmi Nina ne, ha tivetsihin.

<sup>21</sup> Satanás ne, tangun cojo ngu cha xi jemu hñu ngahñu rë. Hya xi ha ndaja tjin chjine cha cojo quicha rë cha xi sahmi cuidadu cha ndava cha ne, yëjë xcusun xi tjin rë cha ne, hacuaha ha ndaja cuidadu tjin. <sup>22</sup> Peru ngahan ne, tangun ngahan cojo ngu me xi hitsë sa jemu hñu camahani ngahñu rë. Hya xi me xi hitsë sa hñu ngahñu rë scaan me cojo cha xi hñu ngahñu rë jan hacuaha tsinguijne me cha ne, cjuahatahá me quicha xi vetaha cacun cha xi cuaxëtje rë cha, hane sehe cuatëcja me yëjë xcusun xi tjin rë cha jan ngajñi rë me cojo xicjin me.

<sup>23</sup> Xuta xi fiin me favor naha ne, condra naha má me. Hane xuta xi visecuain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta. —Cuatjin xu cachja Jesús.

#### *Xitsehen xi vuya*

<sup>24</sup> Hya xi camá ne, Jesús ne, quijinduju sa xu cachja me cuitjin:

—Hya xi vetjuxin xitsehen tsëhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nanguí quixí camahani, vanguise cahndë hiscan xi cuejñajenda. Hane xi sacuiñ rë cahndë hiscan cuejñajenda ne, cuitjin tsingataha cacun: “Cúya rë cjué ndya naha hiscan xi cavëtjuxen.” Cuatjin tsingataha cacun xitsehen jan. <sup>25</sup> Hane xi vuya fehe xitsehen jan cahntsua xahasen rë xuta jan ne, vutsejen xitsehen jan cahntsua xahasen jan sacuaha ngu ndihya xi caxtecha tyjahi tyjahi, hacuaha siundaja chichihin ngu tsë ngu xtí. <sup>26</sup> Xi vutsejen xitsehen jan xi cuatjin jyihí jan ne, sehe fi jaha sa rë yatu sa xitsehen xi hitsë sa tsehen xi cuma rë vëhë ne, sehe visehen nga viyujucahndë jan. Peru xi ma ngascan ne, hitsë sa chojyihí tsëhë xuta vëhë xi cuma rë titjún. —Cuatjin xu cachja Jesús.

#### *Xuta xi ndaja jain tsëhë me*

<sup>27</sup> Peru jinguyëjë rë xi tichja xu Jesús cjuá vëhë ne, ngu na xi jiyajñi ngajñi rë xutacjin jan ne, cajindaya na cachja xu na cuitjin:

—Jemu ndaja tsëhë chjuun xi catsin rë ngayun, hacuaha jemu ndaja tsëhë ndanisin xi cavacuntuhun. —Cuatjin xu cachja na.

<sup>28</sup> Peru Jesús ne, cuitjin xu cafayangui me tsëhë na:

—Quixí, peru hitsë sa ndaja tsëhë xuta xi visiñuju me cjuá rë Nina hacuaha vihndë me tsëhë. —Cuatjin xu cafayangui Jesús.

*Cafehya xuta tsehen ngu seña xi sahmi Nina*

<sup>29</sup> Vêhê ta jima tangun camaha sa xutacjín jan ne, cavetsihin cachja xu Jesús cuitjin:

—Ngayujun ni ngayun xuta tjê rê Israel tsêhê nixtin vihi matsejen ne, hatuxa tsehen cjuatacun nuju. Tichjahyun ngu seña xi sahmi Nina, peru sacuiin nuju matsejen ta ngu ni seña xi sacú nuju matsejen ne, sacuaha seña xi catsingacun profeta Jonás hatsêê nixtin. <sup>30</sup> Sacuatjin rê profeta Jonás xi me vêhê camá me ngu seña xi cuma rê xuta nandya Nínive hatsêê nixtin matsejen ne, ha cuanitjin ni ná ngahan xi Quihndi rê Xuta Jain ngahan matsejen ta ngahan cuma ngahan seña xi cuma nuju ngayujun ni xi nechun nixtin vihi. <sup>31</sup> Hya xi cuechú nixtin xi tsichuva Nina xuta tsêhê jyê rê me matsejen ne, na xi cavitexa ngajan nangui Sabá hatsêê nixtin matsejen ne, cjue cuinchajyê nuju na ngayujun ni ngayun xuta tjê rê Israel xi nechun nixtin vihi. Cuatjin sahmi me matsejen ta, tsêhê xi me xi cuacun vêhê matsejen ne, catsindeya me cjuatacun rê me hya xi casua profeta Jonás camachaya rê me cjuá rê Nina. Peru ha tejña ngahan nguehe sacuaha ngu seña xi hitsê sa vengui chji rê xi cuma rê profeta Jonás. —Cuatjin xu cachja Jesús.

*Ndihi rê yojo naja*

<sup>33</sup> Hane xi quijinduju sa cachja me ne, cuitjin xu cachja me:

—Tsajin hisca xi ngu xuta xi ha xcun xi ha cavatju cavetaha rê me ngu ndihi matsejen ne, faha me veyahma me o sá xi faha me veyá me ngahma ngu caxa matsejen ta faha me vejña me cahndê rê, cojo sa xi yêjê xuta xi visehen me hiscan setí ndihi jan matsejen ne, scuêê me hasen rê. <sup>34</sup> Tuxcuun matsejen ne, vêhê xi sacuaha ndihi rê yojo naja. Vêhê xi hya xi tuxcuun ndacun matsejen ne, hatuxa ma hasen cahntsua yojo naja. Peru sá xi tuxcuun chocun matsejen ne, hacuaha ma jñu cahntsua yojo naja. <sup>35</sup> Ndandaja ningatuhuntacún matsejen ne, sacuaha hasen xi jiya cahntsua yojo nuju matsejen ne, ¿há hasen xi cjuaquixi jain?, o há tsajin ne, ¿há jñú? <sup>36</sup> Quihndê matsejen ne, sá xi jingujyê ni yojo nuju jiya hasen, hisca xi hitsê jñú tsajin rê matsejen ne, jingujyê ni yojo nuju matsejen ne, jiya hasen sacuaha hya xi sahmi hasen tsajan hasen rê ngu ndihi. —Cuatjin xu cachja Jesús.

*Cacjan Jesucristu cojo cha fariseo cojo cha xi vicuya cjuachacun*

<sup>37</sup> Hane xi cajnetaha xu cachja Jesús ne, ngu cha fariseo ne, cachja cha cojo Jesús xi cjue sinê me cojo cha niñu. Xi cavisehen Jesús ndihya ne, quiji xu me cafaha me cahndê rê me xcun maxê. <sup>38</sup> Peru xi cavêê xu cha fariseo xcusun rê Jesús ne, jemu quijircun rê cha tsêhê xi hacuiin titjun cavane xu me tsja me sehe sinê me niñu sacuaha vitexa xcusun rê xutachanga rê me. <sup>39</sup> Ngajan xi Nai naja ne, cachja xu me cojo cha cuitjin:

—Ngayujun ni ngayun xuta fariseo ne, xcusun nuju xi nihñu tyjahi táha ngaxtun ni ngu vasu o sá xi ngu tyuva, peru cahntsua xahasen nuju ne, quitsê camahani rê cjuatsehen cojo cjuatacun xi nimuju yêjê ni xcusun. <sup>40</sup> Sca nuju ngayun. Catijne rcun ta ha me xi casahmi ni táha ngaxtun ne, hacuaha ha me vêhê ni casahmi me táha cahntsua. <sup>41</sup> Peru xi hincha cahntsua ne, vêhê tuhun sacuaha caridad. Sá xi cuatjin nihñu ne, yêjê ni xcusun ne, tyjahi xi cuma nuju.

<sup>42</sup> Peru jemu chojyihí tsujun ngayun xuta fariseo, tsêhê xi ngayun ne, handasa nihñu cuidadu xi tuhun diezmu nuju hisca cojo nchurca cojo ruda cojo yêjê sa xcusun ndeya ne, peru nihñucunduun xi nihñu hacutjin xi cjuaquixi cojo xingun, hacuaha nihñucunduun xi nihmutacún Nina. Ngayun ne, meje rê xi ha canihñucunduun Nina, peru hacuaha hacuiin nichayun diezmu nuju vê.

<sup>43</sup> Hacuaha jemu chojyihí tsujun ngayun xuta fariseo, tsêhê xi ngayun ne, jemu ndama nuju xi cuatjin satê nuju cahndê xi matitjun tsêhê cahntsua yungun. Hacuaha jemu ndama nuju xi cuatjin fi chja xuta nina cojo nuju ngajan ngajñi ndetsin.

<sup>44</sup> Hacuaha jemu chojyihí tsujun ta, handasa matsijin ne, peru jemu chocun xahasen nuju. Vêhê xi tangun ngayun cojo tsjun xi hisca matsijin, hane xuta ne, hisca machayiin rê me cjui nduva me sune me xcun. —Cuatjin xu cachja Jesús.

<sup>45</sup> Ngajan xi ngu cha xi vicuya cjuachacun ne, cachja xu cha cuitjin cojo Jesús:

—Maestro, hya xi nújun cjuá vêhê ne, hacuaha cojo ngayin choho nújun tsijin. —Cuatjin xu cachja cha.

<sup>46</sup> Hane Jesús ne, cuitjin xu cachja me:

—Hacuaha cojo ngayun cha xi vicuya cjuachacun, jemu chojyihî tsujun, tsêhê xi vicuyun rê xuta jemu cjin xcusun xi jemu chja camahani cuma sahmichihî me, hane suvun ne, visecuún rê me hisca hitsê.

<sup>47</sup> Jemu chojyihî tsujun ngayun ta, tsêhê xi ngayun ne, nindujun tsjun ndacun tsêhê yêjê ni nima profeta xi xutachanga nuju catsiquehen me hatsêê nixtin. <sup>48</sup> Ngayun suvun ningacun xi chuya nuju xcusun xi casahmi xutachanga nuju ta, tsêhê xi ngu ladu ne, me vêhê catsiquehen me profeta xi cuacun vê, hane ngu ladu nga ne, ngayun nindujun tsjun rê.

<sup>49</sup> Vêhê xi Nina, me xi jemu vechútaha cjuatacun rê me ne, cachja me cuitjin: “Tsingátju profeta cojo apóstol ngajñi rê xuta xi siu nixtin vihi, hane yahnga me xi cuacun vê ne, tsiquehen xuta me, hane yahnga me ne, sua xuta cjuañihî xi cuatju me xi cuacun vê.” Cuatjin cachja Nina. <sup>50</sup> Hane cojo chuva vêhê ne, xuta xi siu nixtin vihi ne, me vêhê cháha rê me tsêhê cjuaveya rê yêjê profeta xi cahme hisca ntsacu cavetsihî ngasunhndê, <sup>51</sup> vetsihî cojo hisca cjuaveya rê xutachanga naja Abel vijnetaha cojo hisca cjuaveya rê xutachanga naja Zacarías, me xi catsiquehen rê xuta tiña ngasunscun hiscan ndatsen rê ndava Nina. Cuichjá nga cojo nuju ta yêjê cjuaveya xi cuacun vê ne, cháha rê xuta xi siu nixtin vihi.

<sup>52</sup> Jemu chojyihî tsujun, ngayun cha vicuya cjuachacun ta, tsêhê xi cavejñuxun cjuatacun rê Nina. Canitjungun cjuatacun rê me, hacuaha hisca catuun cahndê xi sacú rê xuta xi meje rê me cjuatacun rê Nina jan. —Cuatjin xu cachja Jesús.

<sup>53</sup> Hane hya xi tivetju xu Jesús tsêhê cahndê hiscan cajnê me niñu jan ne, cha xi vicuya cjuachacun cojo cha fariseo jan ne, jemu cjan rê cha, jemu cjin cjuca cafahataha xu cha me, <sup>54</sup> hacuaha jemu cavangui xu cha chuva rê hacutjin xi sacú rê cha ngu cjuca rê me xi cuaintjin cuichja me.

## 12

### *Cjuandacha xi sahmi cha fariseo*

<sup>1</sup> Jinguyêjê rê xi tichja sa xu Jesús cojo cha xi cuacun jan ne, jercu jîma tangun camahani xuta, ña vehnchun xicjin me. Sehe ngajan xi Jesús ne, cavetsihî cachja xu me tjutjun cojo xuta ladu rê me cuitjin:

—Xicaninguisuhunñuu cojo cha fariseo xi cuacun vê ta, tsêhê xi cjuandacha xi sahmi cha ne, tangun cojo san rê pan xi hatuxa vitsojo ngajñi rê yêjê ni nahyu. <sup>2</sup> Yêjê ni xcusun xi casetsanguî ne, cuechú nixtin xi chjaháxin rê xi titsanguî rê. Vêhê xi yêjê ni xcusun xi hma ne, handasa sehmangui ne, peru cuechú nixtin xi cuetjucaa tsejen. <sup>3</sup> Yêjê ni cjuca xi má hiscan jñu ne, cuechú nixtin xi cuinuhya rê hiscan hasen. Vêhê xi yêjê ni cjuca xi má táha hma ne, cuechú nixtin xi cuinuhya rê táha tsejen.

### *Yo xi meje rê xi rcún*

<sup>4</sup> Nguehe cuichjá cojo nuju, ngayujun ni. Xircaruun xuta xi tsiquehen nuju me, hane ngaxtun vêhê ne, ha quihndê tsajin mé sa xi cuma sahmi me cojo nuju. <sup>5</sup> Peru nguehe cuichjá cojo nuju yo xi meje rê xi rcún. Meje rê xi Nina xi rcún me. Me xi ngaxtun xi ha catsiquehen nuju ne, tjin rê me cahndê xi tsingatjenya nuju me hiscan xi má hasen rê nima castigu. Cuichjá nga cojo nuju ta hatuxa me vêhê xi meje rê xi rcún me.

<sup>6</sup> Chutsujun ta hñú chu nisê langa ne, jemu xtengui chji rê chu. Peru Nina ne, tsichayaain me hisca xi ngu chu. <sup>7</sup> Hacuaha ngayun ne, hisca tsjarcun xqui tjin rê Nina. Vêhê xi xircaruun ta, tsêhê xi jima ngu ngayun ne, hitsê sa jercu vengui chji nuju xi cuma rê xi jemu cjin chu nisê vê.

### *Xuta xi tsinguixi me xi xuta ladu rê Jesucristu má me*

<sup>8</sup> Nguehe cuichjá cojo nuju ta yêjê xuta xi tsinguixi me xcun xuta xi yahnga xi xuta ladu naha má me ne, hacuaha ngahan xi Quihndi rê Xuta jain ngahan ne, tsinguixê xcun yêjê ni ángel rê Nina xi xuta ladu naha má xuta xi cuacun vê. <sup>9</sup> Peru yêjê xuta xi tsinguixi me xcun xuta xi yahnga xi hacuain xuta ladu naha má me ne, hacuaha hacuanitjin ni tsinguixê ngahan xcun ángel rê Nina.

<sup>10</sup> Hacuaha yêjê xuta xi choho chja me tsahan, ngahan xi Quihndi rê Xuta Jain ngahan ne, tsinchataha Nina me, sá xi cjuéhya me cjuaninchataha. Peru yêjê xuta xi choho chja me tsêhê Hasen rê Nina ne, tsajin cjuaninchataha xi cuma rê me.

<sup>11</sup> Hya xi xuta nandya cjuaha nuju me cjucojo nuju me xcun xutaxa rê yungun o sá xi xcun xutaxa rê ndihyavasen ne, hacuain cumacjintacún tsêhê chuva rê hacutjin xi chjayunngun o tsêhê xi cuinújun ta, <sup>12</sup> tsêhê xi ha hora vêhê ni ne, Hasen rê Nina cuichja cojo nuju mé cjuca xi meje rê xi cuinújun. —Cuatjin xu cachja Jesús.

### *Miji rê xi jercu nimeje cjuanchina*

<sup>13</sup> Hya xi camá ne, ngu xuta tsêhê ngajñi rê xutacjin jan ne, cachja xu me cojo Jesús cuitjin:

—Maestro, tinújun cojo cha vëhë xingueen, catisua cha ngahan xcusun xi satë ná xi cavejña nahmi niji hya xi cahme me. —Cuatjin xu cachja me.

<sup>14</sup> Sehe ngajan xi Jesús ne, cuitjin xu cachja me:

—Peru ngahan ne, hacuiin xá naha xi ngahan cuatëcja xcusun xi satë nuju xingu xingu ngayun. —Cuatjin xu cachja Jesús cojo xuta jan.

<sup>15</sup> Sehe cachja nga xu me cojo xutacjín jan cuitjin:

—Nechun cuidadu, hacuiin jercu nimuju cjuanchina matsejen ta, tsëhë xi hacuiin ngatsë rë cjuanchina xi tjin naja matsejen ne, vëhë xi ndacun cjuahña naja. —Cuatjin xu cachja me.

<sup>16</sup> Ngaxtun vëhë ne, sehe cachja xu Jesús ngu ejemplu cojo xuta cuitjin:

—Cuejña ne xi ngu cha nchina jan matsejen ne, jercu ndaja camá xitjë xcun nangui rë cha. <sup>17</sup> Hya xi camá ne, cuitjin catsingataha cacun cha: “¿Mé xi ndatjin sahme quihndë? Ha quihndë tsajin ná cahndë hiscan xinchandaja tutjë naha. <sup>18</sup> Ndatjin rë xi cuitjin sahme. Tsinguétsun ndihya hiscan hinchandaja tutjë naha, hane tsindaja xi hitsë sa yehe. Hane ngajan cuinchandaja yëjë tutjë naha cojo ngu tsë ngu xtí sa xi tjin ná. <sup>19</sup> Hane sehe cuichjá cojo xahasen naha cuitjin: Jercu cjín camahani xcusun hinchandaja ná quihndë, hacuaha jemu cjín nu cjuecani rë. Cuitejñajenda quihndë. Sinë cuëhë tsahan. Suá cjuasua xahasen naha.” Cuatjin catsingataha cacun cha nchina jan. <sup>20</sup> Ngajan xi Nina matsejen ne, cuitjin cachja me cojo cha: “Sca ri ngaye. Nguixun quihndë ne, cueye. Hane yëjë xcusun xi cavetje ne, tsajin mé sacú ri tsëhë.” Cuatjin cachja Nina. <sup>21</sup> Cuatjin rë xuta xi jercu vetjo cjuanchina xi cuma rë súvá me, peru xcun Nina matsejen ne, tsajin mé xi tjin rë me. —Cuatjin xu cachja Jesús ejemplu vëhë.

#### *Sahmi cuidadu Nina xuta ladu rë me*

<sup>22</sup> Ngajan xi Jesús ne, cuitjin cachja xu me cojo xuta ladu rë me:

—Vëhë xi cuichjá cojo nuju ta: Hacuiin cumacjintacún tsëhë xcusun xi xinu xi sua nuju ngahña. Hacuaha hacuiin cumacjintacún tsëhë tsjian xi chujun. <sup>23</sup> Hacuiin cumacjintacún ta, tsëhë xi hitsë sa vengui chji rë cjuahña nuju xi cuma rë xi chinu. Hacuaha hitsë sa vengui chji rë yojo nuju xi cuma rë tsjian xi chujun. <sup>24</sup> Chutsujun chu chenda ta hacuiin tsitjë chu, hacuiin fanga chu, hacuaha tsajin rë chu ndyahnga hiscan cuinchandaja chu xi sinë chu. Peru Nina tsicjen me chu. Ngayun ne, hitsë sa jercu vengui chji nuju xi cuma rë chu nisë. <sup>25</sup> Hacuaha tsajin hisca xi ngu xuta xi cuma cuesuntaha me cjuahña rë me hisca ngu hora ngatsë rë xi ma cjín cacun me. <sup>26</sup> Sá xi hitsë lihndi xcusun vëhë maji nihña ne, ¿mé má jercu macjintacún tsëhë xcusun xi yahnga jan ní?

<sup>27</sup> Chutsujun naxu liri ta tsihyaain nachjun hacuaha fahyaain tsjian. Peru ngahan cuichjá cojo nuju ta tsjian rë xutachanga naja Salomón ne, handasa jercu ndacun camahani, peru hitsë sa ndajiyihí ngu naxu vëhë. <sup>28</sup> Sá xi cuatjin tsicaja Nina xca nguijña xi ngu nixtin ne siutahá nguijña, hane xitu ngu nixtin ne cueti ne, hitsë sa ngayun ta hatuxa tsicaja nuju me, ngayun xi cjëë cumangutacúnndujun cojo me. <sup>29</sup> Hacuiin jercu nijendun rë xahasen nuju xi vinchunsun xi xinu xi siuhun ta, <sup>30</sup> tsëhë xi xcusun vëhë ne, yëjë xutaxín tsëhë jingujyë ni ngasunhndë ne, me vëhë xi vangui me xcusun vëhë. Peru ngayun ne, Nina Nahmi naja ne, ha vëë me xi hatuxa sahmi nguýyë xi sacú nuju xcusun vëhë. <sup>31</sup> Catamarcun nuju tsëhë gobiernu xi sahmi Nina, hane xcusun vëhë ne, quitahácoo sa sacú nuju.

#### *Cjuanchina xi tacun ngahnga*

<sup>32</sup> Xicamacjintacún ngayun xuta ladu naha xi jemu chúva má ngayun ta, tsëhë xi Nina Nahmi naja ne, ha cavejña cacun me xi cojo cjuandaja rë me ne, sua nuju me xá xi nihña gobiernu hiscan xi sahmi me gobiernu. <sup>33</sup> Titeñu xcusun xi tjin nuju, hane tujún xi sacú nuju ne, tuhun rë xuta xi tsajin rë me, sacuaha tuhun ngu caridad. Nihña nguýyë xi sacú nuju cjuanchina xi jercu cjuecani rë. Cuma cuinújan ne, ngu cjuanchina xi tsajin nixtin cjuë xi cuetjún ngajan ngahnga hiscan xi cha chëjë ne, maji ma tiña cha, hisca chu quixún ne, tsinguetiin chu. <sup>34</sup> Cuatjin meje rë xi nihña ta, tsëhë xi hiscan tetjo cjuanchina nuju ne, hacuaha ngajan quitahá cjuatacun nuju.

#### *Meje rë xi tjinchjine गयाan tsëhë xi cjeuhe Nai naja*

<sup>35</sup> Tuhunchjinu yojo nuju, hacuaha catisetí ni ndihi nuju, tsëhë xi cjeuhe Nai nuju. <sup>36</sup> Nihña sacuatjin sahmi hndixahan xi viyujuya me nai rë me, hya xi nai rë me quiji ngu ndava suhi. Siuchjine ni me cojo sa xi hora xi cjeuhe nai rë me ne, xi tu cuichja ne, ngutjen cje scuxaha me tingotjo xi cuisehen nai rë me. <sup>37</sup> Jemu ndaja tsëhë yëjë hndixahan xi, hora xi cjeuhe nai rë ne, sacútsja rë xi siu quicun. Nguëhe cuichjá cojo nuju cjuaquixi ta, xi scuëë nai rë hndixahan jan xi cuatjin quicun hndixahan ne, cuëhëchjine me yojo rë me, sehe cjuecojo me hndixahan xcun maxë, sehe cuiyuju me xi sinë me. <sup>38</sup> Jemu ndaja tsëhë hndixahan xi sacútsja rë nai rë xi siu quicun, handasa nixten cjeuhe me o sá hisca tiña

sahasen cjuehe me. <sup>39</sup> Hacuaha meje rë xi cumachaya nuju cjuatacun vihi: sá xi nai rë ngu ndihya ha machaya rë me hora xi cuinduva cha chëjê ndava me ne, suaain me cahndê xi scuxaha cha ndava me, sehe tsichëjê cha. <sup>40</sup> Hacuanitjin ni meje rë xi ngayujun ni ngayun ne, tuhunchjinu yojo nuju ta, tsêhê xi hora xi ningatuuntacún xi cjuêhê ngahan xi Quihndi rë Xuta Jain ngahan ne, hora vêhê rë cjuêhê. —Cuatjin xu cachja Jesús.

*Xuta xi vihndê cojo xi vihndiin tsêhê Nina*

<sup>41</sup> Hya xi camá ne, Pedru ne, cuitjin xu cachja me cojo Nai naja:

—Tatá. Ejemplu xi canújun vë ne, ¿há suvin ni ngayin xuta ladu nuju meje rë xi cuetihinrcuin?, o há tsajin ne, ¿há cojo yêjê sa xuta xi yahnga cuetaharcu me? —Cuatjin xu cachja Pedru.

<sup>42</sup> Ngajan xi Nai naja ne, cuitjin xu cafayangui me:

—Ngayujun ni ne, meje rë xi nihñu sacuaha sahmi ngu hndixahan xi jemu quicun cacun xi sahmichihin yêjê ni hacutjin xi meje rë nai rë, ngu hndixahan xi cjuahaxa xi cjuahacuenda rë yêjê sa hndixahan xi hora tjin sua xi sinê. <sup>43</sup> Jemu ndaja tsêhê ngu hndixahan xi, hora xi cjeuehe nai rë ne, sacútsja me hndixahan jan xi tisahmi tutjin xi casuaxa rë nai rë. <sup>44</sup> Cuichjá cojo nuju cjuaquixi ta, nai rë hndixahan vêhê ne, suaxa me hndixahan vêhê xi hacuaha cjuahacuenda yêjê sa xcusun xi tjin rë me. <sup>45</sup> Peru cuejña ne xi hndixahan vêhê ne, tsingataha cacun cojo cjuatacun rë cuitjin: “Nai naha ne, tijima tafi sa xi cjeuehe me.” Cuatjin tsingataha cacun. Sehe cuetsihin cuaja rë hndixahan xi yahnga jan, hacuaha cuetsihin cuatjutaha sinê cuihi hisca cuma chihi. <sup>46</sup> Peru cuechú ngu nixtin xi tsajin tacunya hndixahan vêhê, ngu hora xi hisca hvíin ne, hya cjeuehe nai rë, hane jemu jyê castigu sahmi me. Sehe tsingatju me cuatjutangun cjuañihí cojo hndixahan xi yahnga xi casahmichiin tutjin xi casatêxa rë.

<sup>47</sup> Hndixahan xi ha ndaja vëê hacutjin xi meje rë nai rë hane cavihinchjinii, hacuaha casahmii tutjin meje rë nai rë ne, jemu sehen camahani rë. <sup>48</sup> Peru hndixahan xi hvíin hacutjin xi meje rë nai rë hane casahmi xcusun xi vechú chuva rë xi cuma castigu ne, chúva sehen rë. Hane yêjê ni hndixahan xi jemu cjin xcusun xá casua nai rë xi sahmi ne, hacuaha cuatjin jercu cjin cjuahaja rë hya xi sahmi entregadu cuenta rë.

*Sahmi Jesucristu xi sahmi condra xuta xicjin me*

<sup>49</sup> Ngahan ne, canduvá ne xi cuétaha rë sacuaha ngu ndihi ngasunhndê, ngu ndihi xi tsingacun mé cún cjuatacun rë xuta. Hacuaha jemu meje ná xi ha hisca ha casetaha rë. <sup>50</sup> Ngahan ne, tjin ná xi cuátju ngu cjuañihí sacuatjin rë ngu xuta xi tjin rë me xi satê rë me nandá hya xi xtenda me. Hacuaha jercu choho má ná hisca xi cuma chihin cjuacjintacun vêhê. <sup>51</sup> Xi má nuju ngayun ne, ¿há cjuajeya canduvácojo xi cuma rë xuta ngasunhndê? Hacuín cuatjin. Ngahan ne, canduvá ne xi sahme xi sahmi condra xuta xicjin me. Cuatjin sahmi condra xicjin me ta, tsêhê xi ngujo me ne, cumangu cacun me cojo ná, hane ngujo nga me ne, cumanguaain cacun me cojo ná. <sup>52</sup> Xi cuetsihin nixtin vihi ne, hisca cojo xi cjuinji sa ne, cuejña ne xi ngu ndihya ne, siu hñu xuta cojo xicjin me. Hane jyan me ne, sahmi condra me me xi jo jan. Hane me xi jo jan ne, sahmi condra me me xi jyan jan. <sup>53</sup> Nahmi ne, sahmi condra me cha quihndi rë me, hane cha quihndi rë me jan ne, sahmi condra cha nahmi rë cha. Naa ne, sahmi condra me na quihndi rë me, hane na quihndi rë me ne, sahmi condra na naa rë na. Nahya ne, sahmi condra me jahnda rë me, hane jahnda rë me ne, sahmi condra na nahya rë na. —Cuatjin xu cachja Jesús cojo xuta ladu rë me.

*Camamiji cuijne rcu xuta xcusun xi casahmi Jesucristu*

<sup>54</sup> Hya xi camá ne, cachja nga xu Jesús cojo xutacjin jan cuitjin:

—Nguehe nangui naja matsejen ne, hya xi chutsujun xi tivisecún ngu yufí ngajan táha ladu vetje tsuhi matsejen ne, ngutjen nújun ta cuaha ngu tsi hñu, hane cuatjin jain má. <sup>55</sup> Hane hya xi vanga ngu tjo xi cjuí táha ladu ngatihin matsejen ne, ngayun matsejen ne, nújun ta cuma suê, hane cuatjin jain má. <sup>56</sup> Jemu hyun mé vijne xcusun xi cún nangui cojo xcusun xi cún ngahnga. ¿Mé má nújun xi hyúun mé vijne xcusun xi tijima nixtin vihi ni? ¡Jemu ndacha ngayun!

*Meje xati rë xi cuichancjan si xi tacun ngajñi naja cojo Nina*

<sup>57</sup> Hane ngayun matsejen ne, ¿mé má nichuvuun suvun cojo cjuatacun nuju xcusun xi cjuaquixi ni? <sup>58</sup> Ndiya tivangun cojo xuta xi meje cuinchajyê nuju ngajan xcun xutaxa rë matsejen ne, nihñu ngahñu xi cuisuhun cjuandaja cojo me, cojo sa xi xticja si xi tacun ngajñi nuju cojo rë me matsejen ta, sá tsajin ne, cjuecojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane mayu jan matsejen ne, cjeue cueyá nuju me ndavaya. <sup>59</sup> Hane cuichjá cojo nuju cjuaquixi matsejen ta hatuxa cuetjuun tsêhê ngajan jinguyêjê rë xi cjêê cuechjun yêjê ni tujún xi quitjun. —Cuatjin xu cachja Jesús.

## 13

*Sahmi nguŷjě xi nindeyan cjuatacun naja*

<sup>1</sup> Ha hora vėhė ni ne, cafehe nu nguŷo xuta hiscan tacun Jesúš. Hane cachja xu me cojo Jesúš tsėhė nguŷo xuta tsėhė distritu Galilea xi cavitexa Pilatu xi cueya hya xi titsiquehen xuta xi cuacun vė chu rė me xi sua me cjuatjo cojo Nina.

<sup>2</sup> Ngajan xi Jesúš ne, cuitjin xu cachja me cojo xuta xi cachja cojo rė me jan:

—Hane tsėhė xi cuatjin cahme nguŷo xuta Galilea xi cuacun vė ne, ¿há vėhė xi má nuju xi hitsė sa tehen me xi cuma rė yějė sa me xi yahnga? <sup>3</sup> Jėja, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. <sup>4</sup> O há tsajin ne, xuta xi tyjuhunjyan xi cahme hya xi caticjane rė torre tsėhė Siloé jan ne, ¿há má nuju xi hitsė sa tehen me xi cuma rė yějė sa xuta xi caviyuju ngajan Jerusalén? <sup>5</sup> Jėja, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. —Cuatjin xu cachja Jesúš.

*Ejemplu tsėhė ya xi cavaquiin tú rė*

<sup>6</sup> Sehe ngajan xi Jesúš ne, cachja sa xu me ngu ejemplu cojo xuta jan, cojo sa xi sua me cumachaya rė xuta xi jemu chúva camá nixtin xi cuma tsindeya xuta cjuatacun rė me. Cuitjin cachja me:

—Cuejñaa ne xi ngu ya túhaxi jan ne, secun xcun nangui rė ngu cha jan. Hane xi canduva cha xi tsėhė jan, vanguise cha tú rė ne, casacuiin rė cha. <sup>7</sup> Sehe ngajan xi cachja cha cojo cha mosu rė cha cuitjin: “Ha tjin rė jyan nu xi vinduva vanguésė tú rė ya vi ne, sacuiin ná. Tiche. ¿Mé má tu cuenda cuiseacun tsinguetsun rė nangui?” Cuatjin cachja cha xi tsėhė jan. <sup>8</sup> Ngajan xi cha mosu jan ne, cuitjin cafayangui cha: “Tatá. Tuhun rė cahndė catiseacun ndastu ngu nu sa, hane cuacján nangui rė, hacuaha cuíncha rė abono. <sup>9</sup> Xi cuatjin ne, ¿há suaain tú rė nduva nga ngu nu? Hane sá xi hacuaha ni suaain tú rė ne, sehe cuichan.” Cuatjin cafayangui mosu jan. Cuatjin xu fi ejemplu xi cachja Jesúš.

*Casahmi Jesucristu xi camandaja ngu chjuun nixtin xi chjahájenda rė*

<sup>10</sup> Ngu nixtin xi chjahájenda rė, hya xi tivicuya xu Jesúš cahntsua ngu yungun jan ne, <sup>11</sup> ngajan tacun ngu chjuun xi ha cjuí tyjuhunjyan nu xi camaticua na hane ha quihndė maji xu ma quixi nında ngaxtun na. <sup>12</sup> Xi cavėė Jesúš na ne, cajindaya xu me na, sehe cachja me cojo na cuitjin:

—Ngayun tsan ne, ha camandaya ngayun tsėhė xi cuatjin jyihí ngayun vė. —Cuatjin xu cachja Jesúš.

<sup>13</sup> Hane ha hora vėhė ni cavisanetsja xu me na, hane ngutjen ni camaquixi nında ngaxtun na. Hya xi camá ne, casahmi jyė casahmi hnga xu na Nina. <sup>14</sup> Peru presidente rė yungun jan ne, jemu camacjan xu rė me tsėhė xi casahmi Jesúš xi camandaja ngu chjuun nixtin xi chjahájenda rė. Vėhė xi cachja xu me cojo xutacjín jan cuitjin:

—Tjin naja jyun nixtin xi nihña xá. Vėhė xi meje rė xi ngajñi rė jyun nixtin vėhė matsejen ne, hya nduvun xi cumandaja ngayun, hacuiin xi tu nixtin xi chjahájenda rė matsejen ne, hya cuinduvun. —Cuatjin xu cachja presidente rė yungun jan.

<sup>15</sup> Peru Nai naja ne, cuitjin xu cachja me:

—¡Jercu choho ningatuhuntacún! Jima ngu ngayun matsejen ne, hatuxa vuhunndayun ndyaja vuhunndayun burru nuju tsėhė cahndė rė chu xi cuangun nicuhun chu nandá, handasa nixtin xi chjahájenda rė. <sup>16</sup> Hane na vihi xi xuta ladu rė Nina na hacuaha tjinñu rė Satanás na cahntsua tyjuhunjyan nu matsejen ne, ¿há ndaintjin xi sehenndaya na nixtin xi chjahájenda rė ni? —Cuatjin xu cachja Nai naja.

<sup>17</sup> Hane xi cafė xu cachja Jesúš cjuá vėhė ne, yějė ni xuta xi má condra rė me ne, jemu camasava xu rė me. Peru yějė sa xuta xi yahnga ne, jercu ndaja camá xu rė me tsėhė yějė ni xcusun ndaja xi casahmi Jesúš.

*Ejemplu tsėhė tutjė lihndi*

<sup>18</sup> Hacuaha cachja sa xu Jesúš ejemplu vihi:

—Gubiernu xi sahmi Nina ne, ¿mé xi tangun cojo? <sup>19</sup> Tangun cojo ngu tutjė xi jemu lihndi camahani. Hya xi ngu xuta tsitjė me tutjė vėhė xcun nangui rė me ne, cuetju, cuma ngu ya, hisca nisė xi vitjen chu ngahnga ne, sahmi chu ndava chu rcu. —Cuatjin xu cachja Jesúš.

*Ejemplu tsėhė san rė pan*

<sup>20</sup> Cavuya cachja nga xu Jesúš cuitjin:

—Gubiernu xi sahmi Nina ne, ¿mé xi tangun cojo? <sup>21</sup> Tangun cojo san rė pan xi visecjan ngu chjuun ngajñi rė nahy rė pan cojo sa xi sahmixa ngajñi rė yějė ni nahyucjín jan. —Cuatjin xu cachja Jesúš.

*Ejemplu tsėhė tingotjo xcu*

<sup>22</sup> Ndiya cjuí xu Jesús ngajan Jerusalén ne, cavatju xu me nandya cojo ranchun xi siu ndiya cjuí me jan, hane cachja me cojo xuta cjuá rë Nina. <sup>23</sup> Hya xi camá ne, cavinenguise xu ngu me xi cavinenguise rë Jesús cuitjin:

—Tatá. ¿Há jemu chúva xuta xi tivetjutje me? —Cuatjin xu cavinenguise xuta jan.

Sehe ngajan xi Jesús ne, cachja xu me cojo xuta xi siu jan cuitjin:

<sup>24</sup>—Nihñu ngahñu xi cuma cuisuhun hiscan sahmi Nina gobiernu táha tingotjo xi xcu ta, tséhë xi nguehe cuichjá cojo nuju ta cuechú nixtin xi jemu cjin xuta xi cuma meje cuisehen me jan, peru cumaji. <sup>25</sup> Ta hya xi ngahan xi nai rë cahndë vëhé ngahan, cuinduva cuéchja tingotjo ne, ngayun ne, cuinechun candatsen, sehe cjunntsun tingotjo jan hacuaha cuitjin cuinújun: “Tatá. Chuxuhun tingotjo tsijin.” Cuatjin cuinújun. Hane xi cjuayangué tsujun ne, cuitjin cuichjá: “Hveen jani canduvun ngayun.” Cuatjin cuichjá cojo nuju. <sup>26</sup> Hane ngayun ne, cuitjin cuinújun nga: “Cachini cahyin tangun cojo nuju, hacuaha nangui niji canuyjuhunyun cavicyun cjuá rë Nina.” Cuatjin cuinújun. <sup>27</sup> Hane cuitjin cuichjá nga cojo nuju: “Hveen jani nandya nuju. Tángxun tsahan, ngayujun ni ngayun xuta sahmi cjuatsehen.” Cuatjin cuichjá. <sup>28</sup> Ngajan ni ne, jemu chjihndun hacuaha nijanurii nehñu, hya xi chutsujun Abraham cojo Isaac cojo Jacob, cojo yëjë profeta xi siu me ngajan hiscan xi sahmi Nina gobiernu, peru ngayun ne, caviyujú nuju candatsen. <sup>29</sup> Hane cuinduva xuta tséhë táha ladu vetjucaa tsuhi cojo táha ladu vetje tsuhi cojo yëjë sa ladu, cuinduva me sinë tangun me hiscan xi sahmi Nina gobiernu. <sup>30</sup> Nguehe cuichjá cojo nuju ta yahnga xuta xi tjengui me quihndë ne, me vëhé cuma titjun me, hane yahnga me xi titjun quihndë ne, me vëhé cuma tjengui me hya xi cuejña Nina gobiernu rë me jan. —Cuatjin xu cachja Jesús.

*Jemu choho camá rë Jesucristu ngatsë rë xuta Jerusalén*

<sup>31</sup> Ha hora vëhé ni ne, cafehe xu ngujo cha fariseo, hane cuitjin xu cachja cha cojo Jesús: —Ndatjin xi tetjunxun tséhë nguehe ta, tséhë xi Herodes ne, meje tsiquehen nuju me. —Cuatjin xu cachja cha xi cuacun jan.

<sup>32</sup> Hane ngajan xi Jesús ne, cuitjin cafayangui xu me:

—Tángun ne tinújun cojo rë chu ninda vë cuitjin: “Chutsujun ni, quihndë cojo nchujun ni ne, cuáxëxen xitsehen hacuaha sahme xi cuma ndaja xuta hmu rë, hane nguini ne, tsingujnetaha xá xi tisahme.” Cuatjin tinújun. <sup>33</sup> Peru hacuaha sahmi ná nguýjë xi cjué sa quihndë nchujun ni cojo nguini hisca xi cjuéhë hiscan xi tifé ta, tséhë xi profeta ngahan, hane ngu profeta ne, cumaji xi cueya jingusa nandya xi hacuini nandya Jerusalén.

<sup>34</sup> ¡Ngayun xuta Jerusalén, ngayun xi cojo ndyojo nicuhun profeta xi tsingatju Nina ngajñi nuju! ¡Jemu choho má ná! ¡Mé hitsë ndiya xi meje scávëvaha nuju sacuaha javëvaha ngu nisë quihndi rë chu xi cuincha chu ngahma tyjunga rë chu, peru ngayun ne, mijá nuju! <sup>35</sup> Chutsujun ni, Nina ne, catsismicacun me ngayun. Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi titsingatju me ngajñi naja!” —Cuatjin xu cachja Jesús.

## 14

*Casahmi Jesucristu xi camandaja cha xi yaha rë chíhinsquee*

<sup>1</sup> Cuitjin camá xu ngu nixtin xi chjahájenda rë hya xi quiji cajinë Jesús niñu ndava ngu cha xi matitjun ngajñi rë cha fariseo. Xi cafehe Jesús jan ne, cha xi siu jan ne, siu tifachuva xu ni cha Jesús. <sup>2</sup> Hacuaha hiscan tacun Jesús ne, ngajan xu tacun ngu cha xi yaha rë chíhinsquee. <sup>3</sup> Ngajan xi Jesús ne, cavinenguise xu rë me cha xi vicuya cjuachacun cojo cha fariseo cuitjin:

—¿Há tjin cahndë nixtin xi chjahájenda rë xi nihña xi cumandaja xuta, o há tsajin cahndë? —Cuatjin xu cavinenguise Jesús.

<sup>4</sup> Hane cha xi cuacun jan ne, ni caviyujuyuu xu ni cha. Hya xi camá ne, cafaha xu Jesús cha hmu rë jan, hane cahmi me xi camandaja cha, sehe catsingatju me cha cafe cha. <sup>5</sup> Sehe cavinenguise xu me cha xi siu jan cuitjin:

—¿Há tjin ngu ngayun xi nixtin xi chjahájenda rë ne, cuanguun marcu macjain naxun quihndi nuju o sá ndyaja nuju sá xi cjuinenguíya ngu ndava nandá xi jemu nungun? —Cuatjin xu cavinenguise me.

<sup>6</sup> Hane cha xi cuacun jan ne, camaji cafayangui xu cha hisca xi ngu cjuá xi meje rë Jesús.

*Meje rë xi ninguijne yojo naja*

<sup>7</sup> Hya xi camá ne, tséhë xi vutsejen xu Jesús xi xuta xi cachjindaya rë tséhë suhi jan ne, tivaxijin me cahndë xi matitjun ngajan xcun maxë ne, vëhé xi cachja xu me cojo xuta jan cuitjin:

<sup>8</sup>—Hya xi chjindaya nuju cuangun xinu ngu comida ne, xicachjuun cahndë xi matitjun ngajan xcun maxë ta sá tu hacuaha cachjindaya rë ngu me xi hitsë sa meje rë xi chjahárcun rë xi cuma nuju ngayun. <sup>9</sup> Hane cuinduva me xi cajindaya nuju catsijotjun ni ne, cuichja

me cojo nuju cuitjin: “Tuhun rë me vihi cahndë nuju vë.” Cuatjin cuichja me cojo nuju. Ngajan xi ngayun ne, cojo jyë cjuasava ne, cuangun chjuhun cahndë xi ma tjengui. <sup>10</sup> Xi meje rë ne, hya xi cuatjin chjindaya nuju ne, tángun chjuhun cahndë xi ma tjengui, cojo sa xi hya xi cuinduva me xi cajindaya nuju ne, cuichja me cojo nuju cuitjin: “Ngayun ne, nduvun chjuhun ngu cahndë xi hitsë sa matitjun.” Cuatjin cuichja me. Ngajan xi ngayun ne, jercu sahmi jyë sahmi hnga nuju me ngajñi rë yëjë xuta xi siu jan. <sup>11</sup> Cuatjin cuma ta, tsëhë xi yëjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi yehe rë me.

<sup>12</sup> Hacuaha cachja nga xu Jesús cuitjin cojo me xi cajindaya rë me:

—Hya xi nihñu ngu suhi ne, xicachjindayuun rë amigu nuju, xicachjindayuun rë xingun, hacuaha xicachjindayuun rë xuta nchina xi siu tahndee ndya nuju, sá tu hacuaha squindaya nuju me xi cuangun ndava suhi rë me, hane cojo vëhë ni ne, ha camangojo cjuandaja nuju. <sup>13</sup> Cahndë rë vëhë ne, hya xi nihñu ngu suhi ne, chjindayun rë xuta yuma, chjindayun rë xuta xi yoho me, chjindayun rë xuta rengun, hacuaha chjindayun rë xuta rcá. <sup>14</sup> Sá xi cuatjin nihñu ne, jemu ndaja tsujun ta, tsëhë xi xuta xi cuacun vë ne, tsajin rë me mé cojo sahmingojo me cjuandaja nuju. Peru Nina sahmingojo me tsujun hya xi tsicuya me cjuahñu xuta xi tsajin jyë rë.—Cuatjin xu cachja Jesús.

*Ejemplu tsëhë ngu suhi jyë*

<sup>15</sup> Hane xi cahndë xu ngu cha xi cojo tijinë jan cjuá xi cachja Jesús ne, cuitjin xu cachja cha cojo rë me:

—Jemu ndaja tsëhë xuta xi sinë me niñu hiscan xi sahmi Nina gobiernu! —Cuatjin xu cachja cha.

<sup>16</sup> Ngajan xi Jesús ne, casuacuenda xu me cha ngu ejemplu vihi:

—Cuejña ne xi ngu cha jan ne, casahmi cha ngu suhi jyë, hacuaha jemu cjín xuta cajindaya rë cha me. <sup>17</sup> Xi casune hora xi sinë cha cojo xuta ne, sehe catsingatju cha hndixahan rë cha ndava xuta xi ha cachja cha cojo xi cuichja hndixahan jan cojo rë xuta cjuá vihi: “¿Há cuangun xu ta, ha tjin chjine yëjë ni?” Cuatjin cachja hndixahan jan. <sup>18</sup> Hya xi camá ne, cavetsihin jima ngu me cachja me mé tsëhë xi cumaji cjue me. Hane me xi tjutjun ne, cuitjin cachja me cojo hndixahan jan: “Ngu rquí nangui cavátsë ne, sahmi ná nguuyë xi cjuë scutséjen. Vëhë xi cumaji cjuë ndava suhi.” Cuatjin cachja me. <sup>19</sup> Hane ngu nga me ne, cuitjin cachja me: “Cavátsë hñú ninchin ndyaja, hane cjuë cjuaháchuva chu. Vëhë xi cumaji cjuë ndava suhi.” Cuatjin cachja me. <sup>20</sup> Hane ngu nga me ne, cuitjin cachja me: “Cumaji cjuë ta, tsëhë xi ngahan ne, ha cavíxan.” Cuatjin cachja me. <sup>21</sup> Hya xi camá ne, hndixahan jan ne, quiji cachja cojo nai rë cjuá xi cachja xuta xi cuacun jan. Hane xi camacjan rë nai rë ndihya jan ne, cuitjin cachja cha cojo hndixahan rë cha: “Tetji ne, tihin sanii ngajan ndiyatë cojo ndiyahndë tsëhë ngajñi nandya ne, chjindaye rë xuta yuma cojo xuta yoho cojo xuta rcá cojo xuta rengun ne, ndovecueje me.” Cuatjin cachja cha. <sup>22</sup> Hane xi cavuya hndixahan jan ne, cuitjin cachja: “Tatá. Camá tutjin xi cavitexun ná, peru tjin sa cahndë.” Cuatjin cachja hndixahan jan. <sup>23</sup> Ngajan xi cachja nga nai rë hndixahan jan cojo rë cuitjin: “Tihin nga hisca ndiya nguujña, hane nihñi rë xuta nguuyë ndovecueje me, cojo sa xi catitsë rë ndya naha. <sup>24</sup> Nguehe cuichjá cojo ri ta hisca xi ngu me xi cajindaya rë tjun tjun ne, satiin rë me sinë me tsëhë suhi xi tisahme.” Cuatjin cachja nai rë hndixahan jan. —Vëhë cajnetaha xu ejemplu xi casuacuenda Jesús.

*Meje rë xi nihña cuenta há scaa naja cuiseen ladu rë Jesucristu*

<sup>25</sup> Ngajan xi hya xi quiji sa xu Jesús ndiya rë me xi cjui me Jerusalén ne, jemu cjín camahani xuta cjui me cojo rë me. Hane xi cavuya me cavutsejen me xutacjín jan ne, cuitjin xu cachja me:

<sup>26</sup> —Sá xi tjin ngu ngayun xi meje cuinduvuntjengun ná matsejen ne, meje rë xi hitsë sa nihmutacún ná ngahan xi cuma rë xi nihmutacún nahmi nuju, naa nuju, chjuun nuju, quihndi nuju, xingun, hisca cojo yojo nuju suvun. Sá tsajin ne, cumaji cuma ngayun ngu xuta ladu naha. <sup>27</sup> Jarë ngayun xi nduvuntjengun ná matsejen ne, sá xi cuejñuhñuun xahasen nuju xi cuanguncujun ndiya naha handasa hisca cueyun xcun cru matsejen ne, cumaji cuma ngayun ngu xuta ladu naha. <sup>28</sup> Ha hyan matsejen ta hya xi ngu xuta meje sahmi me ngu ndihya jyë ne, titjun sahmi me cuenta rë me, há chutaha tujún rë me hisca xi tsinguijnetaha me sahmi me ndihya. <sup>29</sup> Cuatjin sahmi me cuenta rë me matsejen ta sá tsajin ne, sá xi ngutjen sahmi me xihndënaña rë hane cumaji tsinguijnetaha me sahmi me ndihya matsejen ne, yëjë ni xuta xi scuëë me matsejen ne, jemu cuejñucëë me me. <sup>30</sup> Cuitjin cuichja me: “Cha xi cavetsihin casahmi ngu ndihya jyë vi ne, camaji catsinguijnetaha cha casahmi cha.” Cuatjin cuichja xuta. <sup>31</sup> Hacuaha ha hyan matsejen ta hya xi ngu me xi matitjun cjue sahmi me ngu si jyë cojo jingu sa me xi matitjun xi condra rë me matsejen ne, titjun



tsingataha cacun ndaja me, ¿há scaa rë me cojo tã mil xuta rë me xi sahmi me si cojo condra rë me xi ticojo can mlá xuta rë? <sup>32</sup> Sá xi vutsejen me ta scaain rë me matsejen ne, jinguyëjê rë xi cjin sa nduva condra rë me matsejen ne, tsingatju me ngujo xuta xi tsinguijnehnchan cjuá. <sup>33</sup> Vêhê xi ngayujun ni matsejen ne, meje rë xi cuatjin titjun ndaja ningatuhuntacún ¿há scaa nuju, há scaain nuju? matsejen ta, tsêhê xi yêjê ni ngayun xi nismutacuun yêjê ni xcusun xi tjin nuju matsejen ne, cumaji cuma ngayun xuta ladu naha. Cuatjin xu cachja Jesús.

*Yo xi hacuiin ndaja tjengui rë Jesús ne, tangun cojo naxa xi fê xtya rë*

<sup>34</sup> Hacuaha cachja sa xu Jesús cojo xutacjin jan cuitjin:

—Ngayejen ni matsejen ne, ha hyan matsejen ta naxa matsejen ne, ndaja. Peru sá xi cjuë xtya rë matsejen ne, ¿hacutjin cuma xincha nga tutju rë ni? <sup>35</sup> Ha quihndê tsajin mé cumachjirêhê. Cumaji nicojonxan sacuahá nihndê, hacuahá cumaji nicojonxan sacuahá abono. Chjahá rë cuixu candatsen. Yo ngayun xi tjin nuju cjuasua xi cuinuhyun cjuá naha matsejen ne, ndaja tinuhyun. —Cuatjin xu cachja Jesús.

## 15

*Ejemplu tsêhê chu tsánga xi cachajá*

<sup>1</sup> Ngundiya jan ne, jemu cjin xu cha faha tujúnsa cojo xuta tsehen xi yahnga jan quiji casahmi tiña me tsêhê Jesús, xi meje cuisñuju me cjuá xi cuichja Jesús. <sup>2</sup> Hane cha fariseo cojo cha xi vicuya cjuachacun ne, cachjahma xu cha cojo xicjin cha cuitjin:

—Cha xi cuijyihí vi ne, tsingatihin cha visiajmi cha cojo xuta tsehen hacuahá jinêtangun cha cojo me. —Cuatjin xu cachjahma cha.

<sup>3</sup> Sehe ngajan xi Jesús ne, cachja xu me ngu ejemplu cojo cha xi cuacun vë cuitjin:

<sup>4</sup> —Cuejña ne xi ngu ngayun tjin nuju ngu cientu chu tsánga. Hane sá xi chajá ngu chu tsujun ne, hatuxa cuiyujuntuhun chu xi ñujuchan tyjuhunñuju jan nguñña ne, sehe cuangun cuinchunsun ngu chu xi cachajá jan hisca xi sacú nuju chu. <sup>5</sup> Hane xi sacú nuju chu ne, chjuhun chu cuesuntuhun chu xi jercu ndama nuju. <sup>6</sup> Hane xi cjuhun ndya nuju ne, nihñutangun yêjê xuta xi vinga nuju cojo me xi siu tahndee ndya nuju, hane cuitjin cuinújun cojo rë me: “Cuinechan cojo ná cjuasua ta casacu ná chu tsánga naha xi cachajá.” Cuatjin cuinújun. <sup>7</sup> Nguehe cuichjá cojo nuju ta hacuahá hitsê sa jyê cjuasua cuejña ngajan ngahnga ngatsê rë ngu xuta tsehen xi tsindeya me cjuatacun rë me xi cuma rë ngatsê rë ñujuchan tyjuhunñuju xuta ndaja xi tsajin mé má tsindeya me cjuatacun rë me. Cuatjin xu cachja Jesús.

*Ejemplu tsêhê tujún quicha xi cachajá*

<sup>8</sup> Hya xi camá ne, cuitjin cachja nga xu Jesús ngu ejemplu:

—Cuejña ne xi ngu chjuun jan ne, tjin rë me tã tujún quicha xi jercu hnga chji rë. Hane sá xi tsichajá me ngu ne, hatuxa cуетaha rë me ndihí, sehe cuitecha me ndihya sehe cuanguise chichihin me hisca xi sacú rë me. <sup>9</sup> Hane xi sacú rë me ne, sahmitangun me yêjê xuta xi vinga rë me cojo me xi siu tahndee ndava me ne, hane cuitjin cuichja me cojo rë me: “Cuinechan cojo ná cjuasua ta casacu ná tujún naha xi catsichajá.” Cuatjin cuichja me. <sup>10</sup> Nguehe cuichjá cojo nuju ta hacuahá jemu jyê cjuasua cuiyuju ángel tsêhê Nina ngatsê rë ngu xuta tsehen xi tsindeya me cjuatacun rë me. Cuatjin xu cachja Jesús.

*Ejemplu tsêhê cha xi catsismi cacun ndava nahmi rë*

<sup>11</sup> Hya xi camá ne, cuitjin cachja nga xu Jesús ngu ejemplu:

—Cuejña ne xi ngu me jan ne, tjin rë me jo quihndi. <sup>12</sup> Hane cavechú ngunixtin xi cha quihndi ngaskan tsêhê me vihi ne, cachja cha cojo rë me cuitjin: “Papá, tsêhê yêjê ni xcusun xi satê ná hya xi cueyun ne, meje ná xi tuhun ná quihndê.” Cuatjin cachja cha. Sehe ngajan xi nahmi rë cha jan ne, cavatêcja me hacutjin xi satê rë xingu xingu quihndi rë me. <sup>13</sup> Hane hacuiin tsêe ni jan ne, cha quihndi ngaskan jan ne, xi casahmi tangun cha yêjê xcusun xi casatê rë cha jan ne, sehe cavetju cha quiji cha ngu nangui cjin. Hane xi cafehe cha jan ne, sehe cavetsihin cha tujyê catsicojo cha tujún rë cha, casahmi cha yêjê ni hacutjin xi ndama rë xahasen rë cha. <sup>14</sup> Hane xi café catsicojo cha tujún jan ne, hya canduva ngu jindya jyê jinguyjê ni ladu vêhê. Hya cavetsihin camachaja rë cha. <sup>15</sup> Hya xi camá ne, cavetsihin casahmi cha xá sacuahá mosu rë ngu me tsêhê nandya jan. Hane me vêhê catsingatju me cha xi cjue sahmi cuidadu cha chu chinga rë me ngajan ranchun. <sup>16</sup> Hane tsêhê xi jemu vojo camahani rë cha ne, hisca meje sinê cha xi tjinê chu chinga jan, peru tsajin yo casua rë cha. <sup>17</sup> Hane hya xi catsingataha cacun ndaja cha ne, cuitjin catsingataha cacun cha: “Yêjê mosu rë nahmi naha ne, tsajin mé machaja rë xi sinê, hane ngahan ne, tivéya jindya nguehe xi vojo ná. <sup>18</sup> Jemu sa rë ndaja ne, cúa cjuë nga ndava nahmi naha, hane cuitjin cuichjá cojo rë me: Cahndeen tsêhê Nina hacuahá cahndeen tsujun. <sup>19</sup> Ha quihndê vechiin chuva rë

xi cuitejña cojo nuju sacuaha quihndi nuju. Nihñucueundun sacuaha xi mosu nuju ngahan quihndé xi cavúya.” Cuatjin catsingataha cacun cha. <sup>20</sup> Hya xi camá ne, sehe cavuya cafe cha nangui rē cha xi cjue cha ndava nahmi rē cha.

<sup>19</sup> Peru cjin sa cjui cha tsēhē ndava nahmi rē cha ne, cavēē nahmi rē cha xi nduva cha, hane jemu camayuma rē me cha. Sehe vanga me quijitjengui me cha, catsuvacia me cha hisca cavitatsuha me cha. <sup>21</sup> Sehe ngajan xi cavetsihin cachja cha cojo nahmi rē cha cuitjin: “Papá, cahndeē tsēhē Nina hacuaha cahndeē tsujun. Ha quihndé vechiin chuya rē xi cuitejña cojo nuju sacuaha quihndi nuju.” Cuatjin cavetsihin cachja cha. <sup>22</sup> Peru nahmi rē cha ne, cachja me cuitjin cojo ngujo hndixahan rē me: “Tángunsanii, tángun chjuhun ngu tsjian xi tsjian ndaja jan ne, sehe nduvun nicujún cha quihndi naha vi. Hacuaha nduvuncujun ngu xtungun sehe teyun rcutsja cha, hacuaha nduvuncujun chuxinxte xi cuinchun ntsacu cha. <sup>23</sup> Xi camá vēhē ne, sehe tángun chjuhun ngu ndyaja xi ndaja hñu cacun chu cueya chu xinēē chu. Nihña ngu suhi, tahan cjuasua xahasen naja ta, <sup>24</sup> tsēhē xi cha quihndi naha vi ne, sacuaha xi cahme cha hane sehe cavuya cha cjuahñu, sacuaha xi cachajá cha hane sehe casacu nga cha.” Cuatjin cachja nahmi rē cha. Hya xi camá ne, sehe cavetsihin casahmi me suhi.

<sup>25</sup> Peru cha quihndi tjun rē me vihi ne, tsajin cha ta nguifña quiji cha. Hane xi camatiña cha tsēhē ndava cha xi cavuya cha xi quiji cha nguifña ne, cahndé cha xi fane tyjó ndava cha hacuaha titē xuta. <sup>26</sup> Hya xi camá ne, sehe cajindaya cha ngu cha hndixahan rē nahmi rē cha, sehe cavinenguisse cha mé jima jan. <sup>27</sup> Hane cha hndixahan jan ne, cuitjin cafayangui cha: “Cha tshun cavuya cha. Hane hacuaha cavitexa nahmi nuju xi cahme ngu ndyaja xi ndaja hñu cacun xi cuma suhi, tsēhē xi cavuya cafahatsja nga me xingun cojo ngu cjuahñu ndajiyi.” Cuatjin cafayangui hndixahan jan. <sup>28</sup> Peru cha quihndi tjun jan ne, jemu camacjan rē cha, hisca ndihya mijí cuisehen cha. Hane xi cavetju nahmi rē cha ne, jercu cjin cachja me cojo cha xi cuisehen cha ndihya. <sup>29</sup> Ngajan xi cha vēhē ne, cuitjin cafayangui cha tsēhē nahmi rē cha: “Chutsujun ni, ngahan ne, ha jemu tsēē nduva nixtin xi tivisécoo nuju, hacuaha tsajin ngu cjua xi cahndeē tsujun xi canújun. Peru ngahan ne, hisca ngu tentsun catuun chu xi cueya chu xi sahme ngu suhi cojo amigu naha. <sup>30</sup> Peru quihndé xi cafehe cha quihndi nuju vē xi tu ngajan quiji catsicjé cha cjuanchina nuju cojo yachjin tsehan jan ne, canicuhun ngu ndyaja hñu cacun xi xinu cojo cha.” Cuatjin cafayangui cha. <sup>31</sup> Hya xi camá ne, cuitjin cachja nga nahmi rē cha: “Ngaye tsan xi nchunchujun ni nechin cojo ná ne, yējē ni xi tsahan ne, hacuaha tsiji. <sup>32</sup> Ndatjin xi nihña ngu suhi cuitjin, cuinechan cjuasua ta, cha tsajan vi ne, sacuaha xi cahme cha peru cavuya cha cjuahñu, sacuaha xi cachajá cha peru casacu nga cha.” Cuatjin cachja nahmi rē cha. Vēhē xu ejemplu xi cachja Jesús cojo cha fariseo cojo cha xi vicuya cjuachacun.

## 16

### *Ejemplu tsēhē cha xi matitjun tsēhē xa xi cuaaintjin casahmi*

<sup>1</sup> Hacuaha cachja nga xu Jesús cojo xuta ladu rē me ngu ejemplu cuitjin:

—Cuejña ne xi cavéjña ngu xuta nchina xi hacuaha tjin rē me ngu cha xi matitjun tsēhē yējē ni xa rē me. Hane cha xi matitjun tsēhē xa jan ne, cavinchajyē ngu xi cavinchajyē rē cha cojo me xi tsēhē xa tsēhē xi jemu catsicojo cha tujún rē me xi matsijin mé casahmi cha cojo. <sup>2</sup> Hane xi cajindaya me xi tsēhē xa jan cha ne, sehe cachja me cojo cha cuitjin: “Ngaye ne, cafahántsa ngu jyē riji. Quihndé ne, nihñi ná entregadu cuenta tsēhē xa xi tacun nte ta, ngaye ne, ha quihndé cumaji cuihinnduju cojo xa xi nechintehe.” Cuatjin cachja me. <sup>3</sup> Sehe ngajan xi cha xi matitjun tsēhē xa jan ne, cuitjin catsingataha cacun cha: “¿Mé xi ndatjin sahme quihndé xi tivaxéxin ná nai naha tsēhē xa xi tejñataha? Ngahan ne, maji sahme xa xi hai. Hacuaha sava ná cjuē cjuéhya caridad. <sup>4</sup> Haan, ha hvē mé xi sahme cojo sa xi cjuahatsja ná xuta ndava me hya xi cuéjtuxen tsēhē xa xi tejñataha.” Cuatjin catsingataha cacun cha. <sup>5</sup> Hya xi camá ne, cajindaya cha chuya ngu chuya ngu xuta xi quitjen tsēhē nai rē cha. Hane cuitjin cachja cha cojo ngu me: “Ngayun ne, ¿hacutjin quitjun tsēhē nai naha?” Cuatjin cachja cha. <sup>6</sup> Sehe ngajan xi me xi quitjen jan ne, cuitjin cafayangui me: “Ngu cientu tonel tsēhē aceite.” Cuatjin cafayangui me. Hane cha xi matitjun tsēhē xa jan ne, cuitjin cachja cha cojo rē me: “Juhun xujun tsēhē cuenta nuju vi ne, tinechun sanii, nihñu sa ngu, hane tetuhun yachantē ni.” Cuatjin cachja cha. <sup>7</sup> Hya xi camá ne, cachja nga cha cojo ngu nga me cuitjin: “Ngayun ne, ¿há cjin quitjun tsēhē nai naha?” Cuatjin cachja cha. Hane cuitjin cafayangui me xi quitjen jan: “Ngu cientu xutsu trigo.” Cuatjin cafayangui me. Hane cha xi matitjun tsēhē xa jan ne, cuitjin cachja cha: “Juhun xujun tsēhē cuenta nuju vi ne, nihñu sa ngu, hane tetuhun ñujuchan ni.” Cuatjin cachja cha. <sup>8</sup> Ngajan xi xuta nchina xi nai rē xa jan ne, cavaxēndaja me cha tsehan xi matitjun tsēhē xa ngatsé rē

xi jemu quicun cacun cha xi cuatjin casahmi cha. Hitsë sa quicun cacun xuta tsehen cojo ngasunhndë rë me, xi cuma rë xuta xi fitjengui me ndiya rë Nina.

<sup>9</sup>Nguehe cuichjá cojo nuju ngayun xuta ladu naha ta hacuaha meje rë xi chjuhun tujún nuju, handasa hatuxa tsehen ta tséhë xi tséhë ngasunhndë, hane nicujunxun, cojo sa xi cuinga rë xuta ngayun. Cuatjin nihñu cojo sa xi hya xi cuechú nixtin xi cueyun hacuaha ha quihndë cumachjiriin nuju tujún ne, cjuahatsja nuju Nina ngajan hiscan xi cuinechan cojo rë me yëjê nu yëjê nixtin.

<sup>10</sup>Yo xi tjin rë cjuaquixi xi ndaja sahmi ngu xa xi chúva ne, hacuaha hatuxa tjin rë cjuaquixi xi ndaja sahmi ngu xa xi jyë. Hacuaha yo xi vindacha hya xi sahmi ngu xa xi chúva ne, hacuaha hatuxa vindacha hya xi sahmi ngu xa xi jyë. <sup>11</sup>Véhë xi ngayun ne, sá xi vindachun hya xi nicujunxun tujún tsehen xi tséhë ngasunhndë ne, hatuxa cuejñaai Nina ntsun cjuanchina xi cjuaquixi, xi tséhë me. <sup>12</sup>Hacuaha sa xi vindachun hya xi nicujunxun cjuanchina tséhë jingu sa ne, Nina ne, hatuxa suaain nuju me cjuanchina xi cuma tsujun suvun.

<sup>13</sup>Tsajin ngu hndixahan xi ma fahacuenda xa tséhë jo nai rë xa ta, tséhë xi choho scuëë rë ngu nai rë hane tsihmu cacun nai rë xi majo jan. O sá tsajin ne, jemu cuetaha yojo rë cojo ngu nai rë, hane nai rë xi majo jan ne, hisca sahmicuendaain rë. Véhë xi xi ngu ñahñu ni ne, maji nihñu hacutjin xi meje rë Nina cojo hacutjin meje rë cjuanchina tsehen xi tséhë ngasunhndë. Cuatjin xu cachja Jesús cojo xuta ladu rë me.

<sup>14</sup>Cha fariseo, xi hacuaha jemu chuya rë cha tséhë tujún ne, cahndë xu cha yëjê cjuaxi cachja Jesús cojo xuta ladu rë me jan. Hane cavejnucëë cha Jesús. <sup>15</sup>Ngajan xi Jesús ne, cachja xu me cojo cha cuitjin:

—Ngayun xi nújun cojo xuta xi jemu ndaja xuta ngayun, peru Nina ne, vëë me cjuatacun xi jiya cahntsua xahasen nuju. Hane cjuatacun xi sahmi yehe sahmi hnga xuta ne, Nina ne, chuyiin camahani rë me tséhë.

*Cumaji chjaháxin rë hisca ngu cjuax tséhë ley rë Nina*

<sup>16</sup>Hya xi chaja sa tsuyjihiya Juan Vitenda Xuta ne, yëjê xuta ne, casacu camachaya rë me cjuax rë Nina ngatsë rë ley xi cavejña Nina tsja Moisés, cojo ngatsë rë profeta xi hacuaha cachja me cjuax rë Nina. Hisca nixtin rë Juan ne, hisca quihndë ne, tisuá ngahan tijimachaya rë xuta cjuandajyihí xi chja xi Nina ne, sahmi me gobiernu. Hane yëjê ni xuta ne, meje cuisehen me hiscan sahmi Nina gobiernu, handasa cojo cjuachan.

<sup>17</sup>Ngahnga cojo nangui ne, hitsë sa chjaain cjuë xi cuma rë xi chjaháxin rë ngu cjuax tséhë ley rë Nina.

*Jyë rë xuta xi tsismi chjuun rë sehe cuixan cojo jingu sa chjuun*

<sup>18</sup>Ngu xuta xi tsismi me chjuun rë me sehe cuixan me cojo jingu sa chjuun ne, tangun me cojo ngu xi sahmi cjuatsehen cojo ngu chjuun xi hacuain chjuun rë. Hacuaha yo xi cuixan cojo ngu chjuun xi xihin rë na ne, catsismi cha na ne, tangun cojo ngu xi sahmi cjuatsehen cojo ngu chjuun xi hacuain chjuun rë.

*Ejemplu tséhë cha nchina cojo cha yuma xi hmí rë Lázaro*

<sup>19</sup>Cuejña ne xi cavéjña ngu cha xi jemu nchina, xi jercu ndaja camahani tsjian vajá. Nchunchujun ni ne, jemu ndajyihí suhí sahmi cha. <sup>20</sup>Hacuaha cavéjña ngu xuma cha yuma xi hmí rë Lázaro, xi jingujyë ni yojo rë cha camatsë. Hane jiña cha ngajan tingotjo ndava cha nchina jan. <sup>21</sup>Hane hacuaha cojo cha yuma jan jemu meje sinë cha hitsë xi vangui jinë cha nchina jan. Hatuxa jemu choho vatju cha má, hisca vinduva naña chimajnu chu tsë xi yaja rë cha. <sup>22</sup>Hya xi camá ne, xi cahme xuma cha yuma jan ne, quijicojo ángel hasen rë cha ngajan cahndë ndajyihí, cavéjña tangun cojo hasen rë nima Abraham. Hane cha nchina jan ne, hacuaha cahme cha, hane caseyanijí cha.

<sup>23</sup>Hane hya xi jiya hasen rë cha nchina jan cahndë hiscan xi fi hasen rë nima ne, jercu tivatju cjuañihí. Hane xi cavuya cavutsejennijí hasen rë cha ne, cavëë rë hasen rë nima Abraham tséhë cjin ni, hacuaha cavëë rë hasen rë nima Lázaro, tacun tangun cojo hasen rë nima Abraham. <sup>24</sup>Hya xi camá ne, cajindaya hasen rë cha nchina jan tséhë hasen rë nima Abraham, cuitjin cachja: “Tatá Abraham, catamayuma nuju ngahan ne, tinújun cojo cha Lázaro vë ne, catitsicahnchi cha rcutsja cha cojo nandá, sehe ningatjun cha catinduva catitsinguijnehnchan cha hitsë neje ta, tséhë xi jercu má camahani ná cojo ndihí vi.” Cuatjin cachja hasen rë cha nchina jan. <sup>25</sup>Peru hasen rë nima Abraham ne, cuitjin cafayangui: “Ninguitsjin tsan ta xcun cjuahñu riji ne, jemu ndaja cavatjí camá, hane xuma cha Lázaro vi ne, jemu choho cavatju cha camá. Peru quihndë ne, tisacu rë cha cjuetacun nguehe, hane ngaye ne, tivatjí cjuañihí. <sup>26</sup>Hacuaha tjin sa ngu cjuaxi cuichjá cojo ri: Nina ne, cavejña me ngu xanga jyë xi jiyavasen tséhë hiscan xi nechintihin ngayin cojo tséhë hiscan xi nechintehe ngaye, cojo sa xi yo ngayin xi meje cuatjin xi cuinduvin ndyá

ne, cumaji, hacuaha yo ngayun xi meje cuatjun cuinduvun ngeuhe ne, hacuaha cumaji.” Cuatjin cafayangui hasen rë nima Abraham. <sup>27</sup> Sehe ngajan xi hasen rë cha nchina jan ne, cuitjin cachja: “Tatá, nihñu favor ne, ningatjun cha Lázaro ngajan ndava nahmi naha, <sup>28</sup> cojo sa xi sua cha cumachaya rë catsihñu xingueen xi siu jan, cojo sa xi hacuiin cojo cha cuechú cha cahndé vihi hiscan xi tacun cjuañihi xi tivatjin tijima.” Cuatjin cachja hasen rë cha nchina. <sup>29</sup> Hane hasen rë nima Abraham ne, cuitjin cachja: “Peru cha xi cuacun vë ne, cuma cuisñuju cha cjuá xi ha catsihindu Moisés cojo cjuá xi ha catsihindu profeta hatsëë nixtin. Vëhë catetaharcu cha.” Cuatjin cachja hasen rë nima Abraham. <sup>30</sup> Ngajan xi hasen rë cha nchina jan ne, cuitjin cafayangui: “Tatá Abraham, cumaji xi cojo cjuá vëhë ni. Peru sá xi yo cuetju tsëhë ngajñi rë nima xi cjué cuichja cojo cha ne, ngajan xi tsindeya cha cjuatacun rë cha.” Cuatjin cafayangui hasen rë cha nchina jan. <sup>31</sup> Peru hasen rë nima Abraham ne, cuitjin cachja: “Sá xi mijí cuihndé cha tsëhë cjuá xi catsihindu Moisés cojo cjuá xi catsihindu profeta ne, hacuanitjin ni cumacjain rë cha, handasa ngu nima cuya cjuahñu, cjué cuichja cojo rë cha.” Cuatjin cachja hasen rë nima Abraham. Cuatjin xu fi cjuá xi cachja Jesús cojo cha fariseo cojo xuta ladu rë me.

## 17

*Miji rë xi nihña xi tsismicacun ngu xuta ndiya rë Nina*

<sup>1</sup> Ngu nixtin jan ne, hacuaha cachja xu Jesús cojo xuta ladu rë me cuitjin:

—Hatuxa cuinduva xcusun xi meje sahmi xi nismetacuun ndiya rë Nina, peru jemu chojyihí tsëhë xuta xi nduvacojo xcusun vëhë. <sup>2</sup> Hitsë sa ndaja tsëhë xuta vëhë xi xtyangui ngu ndoyojo natsi nguisin me sehe ningatjenya rë me ngajñi ndachacun, xi cuma rë xi sahmi me xi ngu xuta ladu naha tsismicacun me ndiya rë Nina.

<sup>3</sup> Nечун cuidadu tsëhë xcusun xi nihñu. Sá xi ngu xingun choho sahmi cojo nuju ne, tinújuntuhun rë. Hane sá xi tsindeya cjuatacun rë ne, ninchatuhun rë. <sup>4</sup> Hane sá xi hisca yatu ndiya choho sahmi cojo nuju ngu nixtin, hane hacuaha jima ngu ndiya vëhë cjué cuichja cojo nuju xi tsindeya cjuatacun rë ne, ninchatuhun rë. —Cuatjin xu cachja Jesús.

*Cuma cuinuhyan tsëhë Nai naja sá xi mangutacuun ndastu hitsë cojo rë me*

<sup>5</sup> Ngajan xi apóstol ne, cuitjin xu cachja me cojo Nai naja:

—Nihñu xi hitsë sa ndaja cumangu tacuín cojo nuju. —Cuatjin xu cachja me.

<sup>6</sup> Sehe ngajan xi Nai naja ne, cuitjin xu cafayangui me:

—Sá xi mangutacún cojo ná ndastu hitsë ne, hacuaha cuma cuinújun cojo ya vihi catjixin tsëhë cahndé hiscan secun, hane catji catisecun ngajan ngajñi ndachacun, hane hacuaha cuihndé tsujun.

*Hacutjin meje rë xi sahmi hndixahan cojo nai rë*

<sup>7</sup> Cuejña ne xi ngu ngayun ne, tjin nuju ngu hndixahan xi vacjan nangui tsujun o sá xi sahmi cuidadu rë chu nuju. Hane xi cjuéhe hndixahan vëhë xi quiji nguñña ne, çhá cuinújun cojo cuitjin: “Ndove sanii ne, xini niñu?” <sup>8</sup> Jéya, hacuiin ta cuitjin cuinújun cojo: “Tehe chjini xi sínë, hacuaha tehe chjini yojo riji xi cuindove chani xi sínë xi cuëhë, hane xi cuijnetaha sínë ne, sehe xini sihi ngaye.” Cuatjin cuinújun. <sup>9</sup> Hacuaha tuun nacuechji rë hndixahan vëhë tsëhë xi casahmi yëjë ni hacutjin xi cavitexun rë. <sup>10</sup> Hacuanitjin nuju ngayun ta hya xi ha café canihñu yëjë ni hacutjin cavitexa nuju Nina ne, cuitjin meje rë xi ningatuhuntacún: “Ngahan ne, ngu hndixahan tujyë ni ngahan ta xi casahme ne, hacutjin xi casatëxa ná ne, vëhë ni xi casahme. Cuatjin meje rë xi ningatuhuntacún.” Vëhë xu cjuá xi cachja Jesús cojo xuta ladu rë me.

*Casahmi Jesucristu xi camandaja të cha hmu rë*

<sup>11</sup> Hane hya xi tivatju xu Jesús vasencja tsëhë distritu Samaria cojo distritu Galilea xi cjuí me ngajan Jerusalén ne, cuitjin camá. <sup>12</sup> Hora xi ha cuisehen me ngu nandya jan ne, nduvatjengui xu të cha me, cha xi yaha rë ngu xcusun chíhin vitaha xi setaha yojo naja. Hane cajinchacunhñu xu cha hitsë jan, <sup>13</sup> hane tsëhë cjin ni cajindaya xu cha cachja cha cuitjin:

—¡Tatá Jesús! ¡Catamayuma nuju ngayin! ¡Nihñu xi cumandaja ngayin! —Cuatjin xu cajindaya cha cachja cha.

<sup>14</sup> Hane xi cavëë Jesús cha ne, cuitjin xu cachja me:

—Tángun hiscan xi siu nahmi, ningacun rë me yojo nuju xi tsajin mé cún ngayun. —Cuatjin xu cachja me.

Hane ndiya cjuí cha ne, camandaja xu cha. <sup>15</sup> Hya xi camá ne, xi cavëë xu ngu cha xi camandaja cha ne, cavuya quijitjengui xu cha Jesús, jindaya cha chja cha xi tisahmi jyë tisahmi hnga xu cha Nina. <sup>16</sup> Hane xi cafehe xu cha hiscan secun Jesús ne, quiji caticjacun

cha xcun me, xi tisua cha nacuechji rë me. Cha xi cuajiyi jan ne, cha Samaria cha. <sup>17</sup> Sehe ngajan xi Jesús ne, cuitjin xu cavinenguise me xuta ladu rë me:

—¿Hacuiin yëjë të cha xi cuicun vi xi camandaja cha ni? ¿Cha xi ñaja sa ne, jarë cha ne? <sup>18</sup> ¿Há suvá ni cha xi cuijyihí vi xi ngu xutaxín cha xi cavuya cha xi sahmi jyë sahmi hnga cha Nina ni?

<sup>19</sup> Sehe cachja xu me cojo cha xi camandaja jan cuitjin: —Tisatjunhngun, hane tjangun. Ngatsë rë xi camangutacún cojo ná ne, vëhë xi camandaja ngayun. —Cuatjin xu cachja Jesús.

*Hacutjin cuma hya xi cuinduva Nina sahmi me gobiernu*

<sup>20</sup> Cuitjin xu camá nga ngundiya. Cha fariseo ne, cavinenguise cha Jesús janihya cuinduva Nina sahmi me gobiernu. Sehe ngajan xi Jesús ne, cuitjin xu cafayangui me tséhë cha:

—Nina ne, hya xi cuinduva me sahmi me gobiernu ne, hacuiin titjun sua me cumachaya naja sehe cuinduva me. <sup>21</sup> Tsajin yo cuichja: “Cuajiyi Nina nguehe”, o sá: “Cuajiyi Nina ngajan”; ta Nina ne, ha tisahmi me gobiernu ngajñi nuju. —Cuatjin xu cachja me cojo cha fariseo.

<sup>22</sup> Hya xi camá ne, cuitjin xu cachja me cojo xuta ladu rë me:

—Cuechú nixtin xi jemu cuma meje chutsujun ná ndastu ngu hora, ngahan xi Quihndi rë Xuta jain ngahan, peru cumaji. <sup>23</sup> Yahnga me cuichja me cojo nuju: “Cuajiyi me nguehe”, o sá: “Cuajiyi me ngajan”; peru hacuiin cuangun cojo me, hacuiin cuanguntjengun me ta <sup>24</sup> sacua ha sahmi hasen ndihichuhún xi ha tu ñahñu sahmi hasen rë jinguyjë ni ngahnga, hisca nguehe hisca ngajan ne, cuatjin ha tu ñahñu scutsejen ná xuta tséhë yëjë ni ladu hya xi cuechú nixtin xi cuinduva nga ngahan xi Quihndi rë Xuta Jain ngahan. <sup>25</sup> Peru chaja sa xi cuechú nixtin vëhë ne, hatuxa meje rë xi jemu cjin cjuañihí cuátju cuma, hacua ha xuta xi siu nixtin vihi ne, tsitjungui ná me. <sup>26</sup> Sacuatjin casahmi xuta nixtin hya xi cavéjña xutachanga naja Noé ne, hacuanitjin ni sahmi xuta hya xi ngahan cuinduva. <sup>27</sup> Nixtin rë Noé vé ne, jinë jihvi xuta, vixan me, tsinguixan me quihndi rë me. Cuatjin sahmi cuaha me hisca nixtin xi cavisehen Noé cahntsua barcu, hacua ha casesuntë nandá, hane ngajan café yëjë xuta cahme me. <sup>28</sup> Hacuanitjin ni xcusun vëhë casahmi xuta nixtin hya xi cavéjña ngu xutachanga xi hmí rë Lot: jinë hvi me, vatsë me, viteña me, vincha me tjë, hacua ha sahmi me ndihya. <sup>29</sup> Peru nixtin xi cavetju Lot tséhë nandya Sodoma ne, cavixu ndihí tséhë ngahnga, hacua ha cavixu ndyojo xi yaha rë ndihí, sacua ha xi cavaha ngu tsihñu, hane ngajan café yëjë xuta cahme me. <sup>30</sup> Hacua ha cuanitjin ni sahmi xuta hya xi cuinduva ngahan xi Quihndi rë Xuta Jain ngahan.

<sup>31</sup> Nixtin hya ne, xuta xi hinchasan me rcu ndava me ne, mé tséhë me xi siu cahntsua ndihya ne, miji rë xi cuitujne me cjue jaha me. Hacua ha chuva vëhë ni ne, xuta xi siutahá me nguijña ne, miji rë xi cuya cjue me ndava me. <sup>32</sup> Ninguitsjun sacua ha xcusun xi cavatju nima chjuun rë Lot. <sup>33</sup> Yo xi meje cjuendujo cojo ngasunhdë rë cojo ngahñu rë suvá ne, cuechintaain cjuahñu xatsë; peru yo xi cuatju cjuañihí o hisca cueya ngatsë naha ne, vëhë xi cuechúta ha cjuahñu xatsë.

<sup>34</sup> Nguehe cuichjá cojo nuju ta nguixun nixtin hya ne, jo xuta cuiyujufë tangun me ngu nachan. Ngu me ne, chjaháxin rë me, hane me xingu jan ne, cuejña me. <sup>35</sup> Hacua ha jo nga yachjin ne, cuiyujutahá na coho na. Ngu na ne, chjaháxin rë na, hane na xingu jan ne, cuejña na. <sup>36</sup> Hacua ha jo nga cha ne, cuiyujutahá cha nguijña. Ngu cha ne, chjaháxin rë cha, hane cha xingu jan ne, cuejña cha. —Cuatjin xu cachja Jesús.

<sup>37</sup> Hane xuta ladu rë me ne, cuitjin xu cavinenguise rë me:

—¿Hane jani cuma xcusun vëhë ni, tatá? —Cuatjin xu cavinenguise me.

Sehe ngajan xi Jesús ne, cachja xu me ngu ejemplu cuitjin:

—Hiscan jiña chu xi cahme ne, hacua ha ngajan matangun chu lote. —Cuatjin xu cachja Jesús.

## 18

*Ejemplu tséhë chjuun cahan cojo juez tsehen*

<sup>1</sup> Hacua ha cachja sa xu Jesús ngu ejemplu cojo xuta ladu rë me xi sua me cumachaya rë xi meje rë xi yasen ni ne, sahmi me oración rë me, miji rë xi sahmi chúva cacun me. <sup>2</sup> Cuitjin xu cachja me:

—Cuejña ne xi ngu nandya jan ne, tjin ngu juez xi tsacjuiin rë Nina hacua ha faharcuaain rë xuta. <sup>3</sup> Hacua ha nandya jan ne, tacun ngu chjuun cahan. Hane nchunchujun ni quiji na xcun juez jan ne, cachja na cuitjin: “Meje ná xi nihñucundun jyë xi vincha xuta tsahan.” Cuatjin cachja na. <sup>4</sup> Peru juez jan ne, jemu jyë nixtin xi miji sahmicuenda me tséhë na. Peru xi camá ngascan ne, cuitjin catsingataha cacun me: “Handasa tsacjuun Nina

hacuaha faharcuun xuta ne, <sup>5</sup> peru ngatsé rë xi jemu tisuaxti na cahan vi ngahan ne, vëhë xi cjuahácuenta cjuacjintacun rë na, sá tsajin ne, jemu tsijenda na ngahan xi ngajan cjui ngajan nduva na.” Cuatjin xu catsingataha cacun me.

<sup>6</sup> Sehe ngajan xi Nai naja ne, cachja sa xu me cuitjin:

—Chutsujun hacutjin chja juez tsehen vë. <sup>7</sup> Nina ne, ¿hacuiin hatuxa cjuahacuenda me cjuacjintacun rë xuta xi cavaxijin me, xi nguixun nguitajñu fehya rë me xi cjuahacuenda me tsëhé? ¿Há jemu cuindeya cjuahacuenda me? <sup>8</sup> Nguehe cuichjá cojo nuju ta Nina ne, ngutjen ni cjuahacuenda me. Peru hya xi cuinduva nga ngahan xi Quihndi rë Xuta Jain ngahan ne, ¿há tjin xuta xi mangucacun cojo ná nguehe ngasunhndé? —Cuatjin xu cachja Nai naja.

*Ejemplu tsëhé oración rë cha fariseo cojo oración rë cha faha tujúnsa*

<sup>9</sup> Hacuaha siu sa xu ngujo xuta xi tsingataha cacun suvá me xi tsajin jyé rë me xcun Nina hacuaha sahmi xta me cojo xuta xi yahnga. Hane xuta xi cuacun vë ne, cuitjin xu cachja Jesús ngu ejemplu cojo rë me:

<sup>10</sup> —Cuejña ne xi jo cha jan ne, quiji cha yungun xi matitjun xi sahmi cha oración rë cha. Ngu cha ne, cha fariseo cha, hane cha xingu ne, cha faha tujúnsa cha. <sup>11</sup> Cha fariseo jan ne, caviseacun cha casahmi cha oración rë cha cahntsua xahasen ni rë cha, cachja cha cuitjin: “Ngayun Nina, suá nacuechji nuju ta ngahan ne, hacuiin tangun ngahan cojo jingu sa cha xi ndacha cha, tsehen cha, tsindesu cha cojo jingu sa chjuun, hacuaha hisca tanguaain ngahan cojo cha faha tujúnsa vi. <sup>12</sup> Sahme xun naha jo ndiya xi ngu totje, hacuaha vátécja të cahndé tsëhé yéjé ni xi sacu ná, hane suá nuju ngu cahndé.” Cuatjin casahmi cha fariseo oración rë cha. <sup>13</sup> Peru cha faha tujúnsa ne, hitsé ni cjin secun cha, hacuaha hisca cavuyaain cavutsejen cha ngahnga ta tu cavisanetsja ni cha rcu cha, cachja cha cuitjin: “Ngayun Nina, catamayuma nuju ngahan xi jemu tjin jyé naha.” Cuatjin cachja cha. <sup>14</sup> Cuichjá cojo nuju ta cha faha tujúnsa jan ne, xi tu cavuya cafe cha ndava cha ne, ha café jyé rë cha xcun Nina, peru cha fariseo jan ne, hacuiin cuatjin café jyé rë cha. Cuatjin camá ta, tsëhé xi yéjé xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi jyé rë me. —Cuatjin xu cachja Jesús.

*Catsinchacun Jesucristu nixti*

<sup>15</sup> Hacuaha cjuicojo xu xuta nixti rë me hiscan tacun Jesús xi cuisanetsja me nixti jan. Peru hya xi cavëë xu xuta ladu rë Jesús xi cuatjin cjui xuta cojo nixti rë me ne, cavatécja xu me cjuatacun rë xuta jan. <sup>16</sup> Peru Jesús ne, cajindaya xu me nixti jan xi cjuetjengui rë me, sehe ngajan xi cachja xu me cojo xuta ladu rë me cuitjin:

—Tuhun rë nixti cahndé catinduva tjengui ná. Xicanichuun rë cahndé ta, tsëhé xi nixti xi cuacun ne, hatuxa visehen ngajan hiscan xi sahmi Nina gobiernu. <sup>17</sup> Cuichjá cojo nuju cjuaquixi ta suvá ni xuta xi tsingatihin me xi sahmi Nina me gobiernu sacuatjin tsingatihin nixti ne, me vëhë ni xi cuisehen me hiscan xi sahmi Nina gobiernu. —Cuatjin xu cachja Jesús.

*Jemu chja cuisehen xuta nchina ladu rë Nina*

<sup>18</sup> Ngu xuta xi matitjun ne, cavinenguise xu me Jesús cuitjin:

—Ngayun Maestro, jemu ndaja ngayun. ¿Mé xi meje rë xi sahme cojo sa xi sacú ná cjuahñu xatsé? —Cuatjin xu cachja me.

<sup>19</sup> Sehe ngajan xi Jesús ne, cuitjin xu cafayangui me:

—¿Mé má cuatjin nújun xi ndaja ngahan? Tsajin yo xi ndaja. Ngu ni Nina xi ndaja me. <sup>20</sup> Ngayun ne, ha hyun hacutjin chja ley rë Nina xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun, xicanicuun xuta, xicanihñuu cjuachëjé, xicanujuun cjuandesu tsëhé xuta, chjuhuncun nahmi nuju hacuaha chjuhuncun na nuju.” —Cuatjin xu cachja Jesús cjuá rë ley rë Nina.

<sup>21</sup> Hane ngajan xi xuta xi matitjun jan ne, cuitjin xu cachja me cojo Jesús:

—Yéjé cjuá vëhë ne, ha cáhndé tsëhé hisca cjualihndi naha. —Cuatjin xu cachja me.

<sup>22</sup> Hane xi cahndé xu Jesús cjuá rë me ne, sehe cachja xu me cuitjin:

—Tjin sa ngu cjuá xi machaja nuju: yéjé ni xcusun xi tjin nuju ne, titeñu, hane sehe tichuncjun tujún rë ngajñi rë xuta yuma. Hane xi cuatjin nihñu ne, jemu jyé cjuanchina sacú nuju ngajan ngahnga. Hane xi cjué cuichuncjun tujún vëhë ne, sehe nduvun tiseacun ná. —Cuatjin xu cachja Jesús.

<sup>23</sup> Peru xi cahndé xu xuta xi matitjun jan cjuá xi cachja Jesús ne, jemu va camá cacun me, tsëhé xi jercu nchina camahani me. <sup>24</sup> Hane xi vutsejen xu Jesús xi jemu va camá cacun xuta xi matitjun jan ne, sehe cachja xu me cuitjin:

—Jemu chja xi ngu xuta xi tjin rë me cjuanchina cuisehen me hiscan sahmi Nina gobiernu. <sup>25</sup> Ha hitsë sa chjaain cuatju ngu chu camellu ngojo rë ngu nindu xi cuma rë xi cuisehen ngu xuta nchina hiscan sahmi Nina gobiernu. —Cuatjin xu cachja Jesús.

<sup>26</sup> Ngajan xi xuta xi cahndë me cjua jan ne, cuitjin xu cachja me:

—Sá cuatjin ne, ¿yo xi cuma cuetjutje ni? —Cuatjin xu cachja me.

<sup>27</sup> Hane Jesús ne, cuitjin xu cafayangui me:

—Yëjë ni xi maji sahmi xuta ne, Nina ne, hatuxa ma sahmi me. —Cuatjin xu cafayangui Jesús.

<sup>28</sup> Ngajan xi Pedru ne, cuitjin xu cachja me cojo Jesús:

—Chutsujun ni. Ngayin ne, ha canismitacuín yëjë ni xcusun xi tjin ni, hane tivisequin nuju. —Cuatjin xu cachja Pedru.

<sup>29</sup> Hane Jesús ne, cuitjin xu cachja me:

—Cuichjá cojo nuju cjuaquixi ta yëjë xuta xi tsismicacun me ndava me, tsismicacun me chjuun rë me, tsismicacun me xicjin me, tsismicacun me xutacha rë me, tsismicacun me quihndi rë me, xi cjuetjengui me ndiya rë Nina ne, <sup>30</sup> hatuxa cjín sa cahndë sacú rë me xi cuma sacuaaha ndava me, hacuaaha hatuxa cjín sa xuta sacú rë me xi cuma sacuaaha xuta rë me, quihndë xi siu me ngasunhndë vihi, hane hya xi cueya me ne, sacú rë me ngu cjuahñu xatsë. —Cuatjin xu cachja Jesús.

*Camá jyan ndiya cachja Jesucristu xi cueya me*

<sup>31</sup> Hya xi camá xu ne, quijicojoxin Jesús tejó xuta ladu rë me, sehe cachja xu me cojo cuitjin:

—Quihndë ne, tivanguen Jerusalén. Hane xi cjuen jan ne, cuetjucaa yëjë sacuatjin catsihindu profeta tsahan, ngahan xi Quihndi rë Xuta Jain ngahan. <sup>32</sup> Ngahan ne, cuma ngahan entregadu tsja xutaxín, cuejnuccë ná xuta, choho cuichja me tsahan, cuëhënatya ná me. <sup>33</sup> Hane xi cjuë cuaja ná me ne, sehe tsiquehen ná me. Peru xi ma jyan nixtin ne, cúa nga cjuahñu. —Cuatjin xu cachja Jesús.

<sup>34</sup> Peru xuta ladu rë me jan ne, hisca ngu xu cjua vëhë cajni rcu me ta tjihma cjuatacun vëhë xi cuma rë me. Vëhë xi hvíin xu me mé vijne cjua xi cachja Jesús jan.

*Casahmi Jesucristu xi camatsejen nga rë ngu cha rcá ngajan Jericó*

<sup>35</sup> Hya xi camá ne, xi camatiña xu Jesús tsëhë nandya Jericó cojo xuta ladu rë me ne, ngajan tacun xu ngu cha rcá tjeheh ndiya, fehya cha caridad. <sup>36</sup> Hane xi cahndë cha xi jercu cjín xuta fane ntsacu me ne, sehe cavinenguise xu cha mé jima jan. <sup>37</sup> Hane tjin xu yo cachja cojo cha xi Jesús tsëhë nandya Nasaret tivatju me cojo xuta ladu rë me. <sup>38</sup> Hane cha rcá jan ne, cuitjin xu cajindaya cha cachja cha:

—¡Ngayun Jesús, tjë rë David! Catamayuma nuju ngahan. —Cuatjin xu cachja cha.

<sup>39</sup> Hane xuta xi cjuí tijun jan ne, cavisiajmi cjan xu me cojo cha xi sejyu cha. Peru cha vëhë ne, hitsë sa jercu cajindaya xu cha cachja cha, cuitjin cachja cha:

—¡Ngayun tjë rë David! Catamayuma nuju ngahan. —Cuatjin xu cachja cha.

<sup>40</sup> Ngajan xi Jesús ne, xi casecunhñu xu me ne, sehe cavitexa me xi cuinduva cojo xuta cha rcá jan hiscan xi secun me. Hane xi camatiña cha tsëhë Jesús ne, sehe cavinenguise xu me cha cuitjin:

<sup>41</sup> —¿Mé xi meje nuju xi sahme cojo nuju ni? —Cuatjin xu cavinenguise me.

Sehe ngajan xi cha rcá jan ne, cuitjin xu cachja cha:

—Tatá. Meje ná xi cuma tsejen nga ná. —Cuatjin xu cachja cha.

<sup>42</sup> Hane Jesús ne, cuitjin xu cachja me cojo cha:

—Catamatsejen nga nuju. Ngayun ne, camandaja túxcun ta, tsëhë xi camangutacún cojo ná. —Cuatjin xu cachja Jesús.

<sup>43</sup> Hane ha hora vëhë ni ne, camatsejen nga xu rë cha. Sehe quiji xu cha cojo Jesús táha sahmi jyë sahmi hnga cha Nina. Hane xi cavëë yëjë xuta xcusun xi camá jan ne, jemu cavaxëndaja xu me Nina.

## 19

*Jesucristu cojo cha Zaqueo*

<sup>1</sup> Hya xi camá ne, cavisehen xu Jesús nandya Jericó xi cuatju me vasencja nandya. <sup>2</sup> Hane ngajan tacun xu ngu cha xi hmí rë Zaqueo, ngu cha xi matitjun tsëhë cha faha tujúnsa, hacuaaha jemu nchina cha. <sup>3</sup> Hane cha vëhë ne, jemu meje scuëë xu cha yo xi Jesús, peru camaji ta, tsëhë xi jercu cjín camahani xuta quitsë me, hacuaaha cha vëhë ne, jemu patú xu cha. <sup>4</sup> Hane xi cavangatitjun cha ne, quiji camiji xu cha ngu ya jyë, cojo sa xi cuma scuëë cha Jesús ta, tsëhë xi hatuxa ngajan cuatju me. <sup>5</sup> Hane xi cafehe xu Jesús jan ne, sehe cavuya cavutsejenniji me rcu ya hiscan quisun cha ne, sehe cachja xu me cojo cha cuitjin:

—Zaqueo, nduvunjnu sanii ta, tsêhê xi sahmi ná nguujê xi ndya nuju cuitejña quihndê.  
—Cuatjin xu cachja me.

<sup>6</sup>Ngajan xi cha Zaqueo ne, marcu macjain xu cavitujne cha, cafahatsja cha Jesús cojo yêjê ni cjuasua, quijicojo cha me ndava cha. <sup>7</sup>Hane xi cavêê yêjê xuta xi cuatjin casahmi Jesús ne, sehe cachjahma xu me cojo xicjin me cuitjin:

—Quiji cavêjña me cojo ngu cha tsehen. —Cuatjin xu cachjahma me.

<sup>8</sup>Hya xi camá ne, xi ha tacun Jesús ndava cha Zaqueo ne, cavisatjenhnga xu cha, sehe cachja xu cha cojo Nai naja cuitjin:

—Chutsujun ni, tatá. Vasentjin tsêhê yêjê ni xcusun xi tjin ná ne, suá rê xuta yuma. Hane sá xi tjin yo xi cavaxê rê tujún cojo cjuandacha ne, ñuju cuatjin sacuatjin xi cafahá ne, tsicúya tsêhê me. —Cuatjin xu cachja cha.

<sup>9</sup>Ngajan xi Jesús ne, cuitjin xu cachja me:

—Quihndê ta cuatjin ne, ngayujun ni tsêhê ndihya vihi ne, cavetjuntjun ta, me xi cuijyihî vi ne, hacuaha cojo me má me xuta ladu rê Nina. <sup>10</sup>Hane ngahan xi Quihndi rê Xuta Jain ngahan ne, canduvá xi cuanguêsê hacuaha cuaxêjtê xuta ladu rê Nina xi cachajá me tsêhê ndiya rê Nina. —Cuatjin xu cachja Jesús.

*Ejemplu tsêhê tujún xi casua nai rê hndixahan*

<sup>11</sup>Xi tu cajnetaha cavisîñuju xuta cjuá vêhê ne, Jesús ne, cachja sa xu me ngu ejemplu cojo xuta jan ta, tsêhê xi tiña siutahá me cojo nandya Jerusalén, hane má xu rê xuta ta ha hisca tacun xati xi cuinduva Nina sahmi me gobiernu.

<sup>12</sup>Hane cuitjin xu cachja me:

—Cuejña ne xi ngu xuta chacun jan ne, quiji me ngu nangui cjin, xi cjuahaxa me xi cumatitjun me tsêhê estadu rê me, sehe cuya nga me. <sup>13</sup>Hane chaja sa xi cjue me ne, cajindaya me tê hndixahan rê me, sehe casua rê me jima ngu hndixahan jan tujún. Sehe cachja me cojo cuitjin: “Nihñu xa cojo tujún vihi jinguyêjê rê xi cjué sehe cúya.” Cuatjin cachja me. <sup>14</sup>Peru xuta tsêhê estadu rê me ne, jemu choho vêê rê me. Vêhê xi hya xi ha quiji xuta chacun ja ne, catsingatju xuta estadu rê me jan ngujo cha xi cuichja cha cuitjin cojo xuta xi suaxa rê xuta chacun jan: “Mamijî niji xi me xi cuajyihî me cumatitjun me tsijin.” Cuatjin cuichja cha. <sup>15</sup>Hya xi camá ne, xi cavuya xuta chacun jan xi cafê cafahatsja me xa ne, cavitexa me xi chjindaya rê cha hndixahan rê me xi casua rê me tujún jan, cojo sa xi sua cha cumachaya rê me há cjin cavesun rê cha jima ngu cha xi casahmi cha xa cojo tujún xi casua me cha. <sup>16</sup>Hane cha hndixahan xi canduva titjun ne, cuitjin cachja cha: “Tatá. Sacuatjin tujún xi catuhun ná ne, cavesun ná tê cuatjin sa.” Cuatjin cachja cha. <sup>17</sup>Sehe ngajan xi nai rê hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsê rê xi jemu ndaja canihñi xa xi chûva vê ne, suá ri tê nandya xi cumatitjun ngaye tsêhê.” Cuatjin cachja me. <sup>18</sup>Hane xi canduva cha xi majo ne, cuitjin cachja cha: “Tatá. Sacuatjin tujún xi catuhun ná ne, cavesun ná hñû cuatjin sa.” Cuatjin cachja cha. <sup>19</sup>Hane nai rê hndixahan jan ne, cuitjin cachja me: “Ngaye ne, cumatitjun ngaye tsêhê hñû nandya.” Cuatjin cachja me. <sup>20</sup>Hya xi camá ne, xi canduva nga ngu cha ne, cuitjin cachja cha: “Tatá. Cuajyihî tujún xi catuhun ná nguehe. Tujún vi ne, cavinchándaja cahntsua ngu pañutu ta, <sup>21</sup>tsêhê xi tsácjun nuju. Ta ngayun ne, jemu hñu cjuá nuju. Tangun ngayun cojo ngu xuta xi fanga me handasa hacuîin me vêhê catsitjê me ta, tsêhê xi ngayun ne, hacjahi sahmi xa ne, ngayun chjuhunnstun chji rê.” Cuatjin cachja cha hndixahan vêhê. <sup>22</sup>Ngajan xi xuta chacun jan ne, cuitjin cachja me cojo hndixahan vêhê: “Ngaye, hndixahan tsehen ne, cojo cjuá rijî sove ni tsichúva ri. Ngaye xi noje xi hye xi jemu hñu cjuá naha, hacuaha tangun ngahan cojo ngu xuta xi fanga me handasa hacuîin me catsitjê me, tsêhê xi ngahan ne, hacjahi sahmi xa ne, ngahan fahántsja chji rê. <sup>23</sup>Sá xi hye xi cuatjin ne, ¿mé má hacuîin xcun bancun cahmi chani tujún xi casuá ri, cojo sa xi hya xi cjuêhê ne, cúya cjuahántsja tujún naha, peru cojo quihndi rê ni?” Cuatjin cachja xuta chacun jan cojo hndixahan rê me. <sup>24</sup>Sehe cachja sa me cojo ngujo hndixahan rê me xi hinchacun jan cuitjin: “Chjuhuntuhun tujún xi yaha cha vê ne, sehe tuhun rê cha xi cavesun rê tê cuatjin sa sacuatjin tujún xi casuá rê.” Cuatjin cachja xuta chacun jan. <sup>25</sup>Hane hndixahan jan ne, cuitjin cafayangui: “Tatá. ¡Peru cha vêhê ne, ha tjin rê cha tê cuatjin sa!” Cuatjin cachja cha. <sup>26</sup>Ngajan xi xuta chacun jan ne, cuitjin cachja me: “Nguehe cuichja cojo nuju ta yêjê xuta xi cavesun rê me xcun xi ha tjin rê me ne, suá sa rê me. Hane xuta xi tsajin mé cavesun rê me ne, hisca xi tjin rê me ne, cjuahátahá. <sup>27</sup>Hane sacuaha condra naha xi mijî rê xi ngahan cumatitjun ngahan tsêhê ne, tángun chjuhun, nduvuncujun nguehe, sehe nicuhun nguehe xcún.” Cuatjin cachja xu xuta chacun xcun ejemplu xi cachja Jesús.

*Cafehe Jesucristu nandya Jerusalén*

<sup>28</sup>Hya xi camá xu ne, xi cavatju cachja Jesús cjuá vêhê ne, sehe cavetju me quiji sa xu me xi cjehe me Jerusalén. <sup>29</sup>Hane hya xi camatiña me tsêhê nandya Betfajê cojo nandya



Betania, nandya xi siu tiña tséhë ndetjún xi hmí rë Ndetjún Olivu ne, sehe catsingatju xu me jo xuta ladu rë me xi cjue tixa rë me,<sup>30</sup> hane cuitjin xu cachja me:

—Tángun nandya xi tsejen tacun vë. Hane xi cjuhun jan ne, ngajan cuechuntuhun ngu chu burru xatsë, xi hisca ngu cjëë cuijin rë chu, tjihñu chu. Hane chundecjun chu, nduvuncujun chu.<sup>31</sup> Hane sá xi yo cjuinenguise nuju mé má cuatjin chundecjun chu ne, sehe tinújun cuitjin: “Nai niji meje rë me chu.” Cuatjin tinújun. —Cuatjin xu cachja Jesús.

<sup>32</sup> Hane me xi casatëxa rë jan ne, quiji xu me, hane cavetjucaa jain sacuatjin cachja Jesús cojo rë me. <sup>33</sup> Hane jinguyëjë rë xi tivundecja me burru jan ne, nai rë chu ne, cuitjin xu cachja me:

—¿Mé má cuatjin chundecjun burru vë? —Cuatjin xu cachja me.

<sup>34</sup> Hane xuta ladu rë Jesús jan ne, cuitjin xu cafayangui me:

—Nai niji meje rë me chu. —Cuatjin xu cachja me.

<sup>35</sup> Sehe quijicojo xu me chu hiscan tacun Jesús. Hane caviyujusun me tsjian rë me ngaxtun chu, sehe catsiquijin xu me Jesús burru jan. <sup>36</sup> Hane xi cjuí Jesús quisun me burru jan ne, táha ticandi xu xuta tsjian rë me hiscan cjuí Jesús. <sup>37</sup> Ngajan xi xi jima tiña xu Jesús cojo yëjë xutacjin jan nandya Jerusalén, hiscan xi cafaha rë xi ha cuitsingaxten ndiya tséhë Ndetjún Olivu ne, yëjë ni xutacjin xi xuta ladu rë Jesús jan ne, jercu ndama xu rë me, hisca cavetsihin cajindaya me cachja me xi cavaxëndaja me Nina tséhë yëjë ni cjuarcun xi cavëë me. <sup>38</sup> Cuitjin xu cachja me:

—Jemu catsinchacun Nina me xi nduva vi xi cuma titjun tsajan, tséhë xi Nina catsingatju rë me. Ngahnga ne, hatuxa jemu tjin cjuandaja cjuajeya, hacuaha Nina ne, hatuxa jyë hnga me cojo Hasen rë me. —Cuatjin xu cavaxëndaja xuta Nina.

<sup>39</sup> Hane ngujo cha fariseo xi hinchajñi ngajñi rë xutacjin jan ne, cachja xu cha cojo Jesús cuitjin:

—Maestro, tichuncjun cjuá xi tichja xuta ladu nuju vë. —Cuatjin xu cachja cha.

<sup>40</sup> Hane xi cafayangui Jesús ne, cuitjin xu cachja me:

—Nguehe cuichjá cojo nuju ta sá xi xuta xi cuicun vi sejyo me ne, ndyojo vi cuetsihin squindaya cuichja nga. —Cuatjin xu cafayangui me.

<sup>41</sup> Hane xi camatiña sa xu Jesús tséhë Jerusalén ne, xi cavëë me nandya jan ne, cajihnda xu me ngatsë rë. <sup>42</sup> Sehe cachja xu me sacuaha xi tichja me cojo xuta Jerusalén, cuitjin xu cachja me:

—¡Sá mé ni xi hacuaha cojo ngayun hyun cjuatacun xi yaha cjuandaja cjuajeya! Peru quihndë matsejen ne, cjuatacun vëhë matsejen ne, jiyahma xi cuma nuju. Vëhë xi hyúun. <sup>43</sup> Peru cuechú nixtin xi yëjë ni condra nuju matsejen ne, sahmi me nguýjë xi cuma cuisehen me nandya nuju, xinchandee nuju me yëjë ni ladu xi cuinchahñu nuju me. <sup>44</sup> Tsixujne me yëjë ni ndihya tséhë nandya nuju, tsicanguin me hisca ngu ndyojo xi tinecoo, hacuaha tsiquehen nuju me ngayujun ni xi nechun nandya nuju. Cuatjin cuatjun cuma matsejen ta, tséhë xi ngayun matsejen ne, cajni rcun hya xi cafehe Nina xi cuaxëtje nuju me. Cuatjin xu cachja Jesús.

### *Cavaxë Jesucristu xuta tsehen tséhë ndatsen yungun*

<sup>45</sup> Hane xi cafehe me nandya Jerusalén ne, sehe quiji xu me yungun xi matitjun. Hane xi cavisehen me ndatsen yungun jan ne, cavetsihin cavaxë me xuta xi sahmi ndetsin jan. <sup>46</sup> Cuitjin xu cachja me:

—Cuitjin camahindu xcun xujun rë Nina sacuatjin xi cachja me: “Ndyá naha ne, vejña xa xi cjue xuta sahmi me oración rë me.” Cuatjin chja Nina. Peru ngayun ne, tinihñuxun cojo sacuaha ngu cahndë hiscan xi matangun xuta chëjë. —Cuatjin xu cachja Jesús.

<sup>47</sup> Hya xi camá ne, nchunchujun xu ni quiji Jesús cavicyua me xuta ngajan ndatsen yungun xi matitjun. Hane yëjë ni nahmi xi matitjun cojo yëjë cha xi vicuya cjuachacun cojo yëjë sa xuta xi matitjun ne, jemu cavangui xu me chuva rë xi tsiquehen me Jesús, <sup>48</sup> peru casacuinyin xu rë me mé sahmi me ta, tséhë xi yëjë ni xuta ne, tivisiñuju xu me cjuá rë Jesús nguñaja cacun me.

## 20

### *Cavinenguise xuta cojo Jesucristu yo cavitexa rë me*

<sup>1</sup> Cuitjin camá xu ngu nixtin hya xi tivicyua Jesús xuta hacuaha tisua me jimachaya rë cjuandajiyi rë Nina ngajan ndatsen yungun xi matitjun. Hacuaha camatangun xu nahmi xi matitjun cojo cha xi vicuya cjuachacun cojo xuta changá, <sup>2</sup> hane cuitjin xu cavinenguise me Jesús:

—Tinújun cojo niji ne, ¿yo cavitexa nuju xi cuatjin nihñu? ¿Yo casuaxa nuju? —Cuatjin xu cavinenguise me.

<sup>3</sup> Hane xi cafayangui Jesús ne, cuitjin xu cachja me:

—Hacuaha cjuinenguësë nuju ngu cjuua, hane chjayunngun tsahan: <sup>4</sup>¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin xu cachja me.

<sup>5</sup> Sehe ngajan xi xuta xi cuacun jan ne, cavisiajmicjín me ngajñi rë me, cachja xu me cuitjin:

—Sá xi cuinújan xi Nina cavitexa me cha Juan vë ne, cjuinenguise naja me: “¿Mé má camacjaain naja cha?” <sup>6</sup> Hane sá xi cuinújan xi xuta cavitexa rë cha ne, yëjë ni xuta ne, tsiquehen naja me cojo ndyojo ta, tsëhë xi yëjë ni xuta ne, ha macjain rë me xi cha vëhë ne, profeta cha. —Cuatjin xu cavisiajmicjín me.

<sup>7</sup> Ngajan xi xuta xi cuacun jan ne, cachja me xi hvíin me. <sup>8</sup> Sehe ngajan xi Jesús ne, cuitjin xu cachja me:

—Sá cuatjin ne, ngahan ne, hacuaha cuichjaan cojo nuju yo cavitexa ná xi cuitjin sahme. —Cuatjin xu cachja Jesús.

*Ejemplu tsëhë cha sahmixa xi jemu tsehen cha*

<sup>9</sup> Hya xi camá ne, cavetsihin cachja xu Jesús cojo yëjë ni xuta jan ejemplu vihi:

—Cuejña ne xi ngu me jan matsejen ne, catsitjé me xcun nangui rë me xca rë uva. Sehe casua me ngujo cha sahmixa xi cjuahacuenda cha sehe cjuaha tsë tsë me cojo cha. Hya xi camá ne, sehe cavetju me quiji me ngu nangui jemu tsëë camahani. <sup>10</sup> Hane xi cavechú nixtin rë tutjé jan matsejen ne, sehe catsingatju me ngu mosu hndixahan rë me xi quiji cachja cha cojo cha xi fahacuenda xitjé jan xi sua cha hitsë tutjé xi satë rë me xi casacu rë cha xcun nangui rë me jan. Peru cha xi fahacuenda xitjé jan matsejen ne, tu cavaja cha cha hndixahan jan, sehe catsingatju cha cafe, ndastu mé casua rë cha. <sup>11</sup> Hya xi camá ne, cavuya catsingatju nga me ngu hndixahan rë me. Hndixahan vëhë matsejen ne, jemu cavaja rë cha, jemu choho cachja cha cojo, sehe catsingatju cha cafe, ndastu mé casua rë cha. <sup>12</sup> Hya xi camá ne, cavuya catsingatju nga me ngu hndixahan xi majjan. Hndixahan vëhë matsejen ne, jemu cavanguihmu rë cha, sehe cavaxëxin cha tsëhë ngajan.

<sup>13</sup> Ngajan xi nai rë xitjé jan matsejen ne, cuitjin catsingataha cacun me: “¿Mé xi ndatjin sahme quihndé? Ndatjin rë xi tsingátju quihndi naha xi jemu hmú cácn. Cjuaharcun rë cha, xi quihndi naha.” Cuatjin catsingataha cacun me. <sup>14</sup> Peru xi cavëë cha xi fahacuenda xitjé jan cha vëhë matsejen ne, sehe cavisiajmicjín cha cojo xicjin cha cuitjin: “Cha vihi ne, quihndi rë me xi cuahatsja cha xitjé vi. Niqen cha, cojo sa xi tsajan cuma nangui vi.” Cuatjin cavisiajmicjín cha. <sup>15</sup> Hane xi cavaxëxin cha cha tsëhë nangui jan matsejen ne, sehe catsiquehen cha.

‘Xi má nuju matsejen ne, ¿mé sahmi nai rë xitjé jan cojo cha xi cuacun fahacuenda jan?’ <sup>16</sup> Cjue tsiquehen me cha, sehe sua me xitjé jan cjuahacuenda jingu sa cha sahmixa. —Cuatjin xu cachja Jesús.

Hane xi cahndé yëjë xuta cjuua vëhë ne, cachja xu me cuitjin:

—¡Catamamiji cacun Nina xi cuatjin cuma! —Cuatjin xu cachja me.

<sup>17</sup> Ngajan xi xi cavuya vutsejen Jesús xuta jan ne, cuitjin xu cachja me:

—¿Mé vijne xi cuitjin camahindu xcun xujun rë Nina?:

Ndyojo xi catsitjungui chjinevexo ne,

vëhë ndyojo xi cavëjña tjun tjun yuju rë xihndënaña.

Cuatjin camahindu. <sup>18</sup> Hya xi ngu xuta cjuinenguisun me xcun ndyojo vëhë matsejen ne, cuatëlanga rë me. Hane hya xi ndyojo vëhë cjuinenguisun rë ngu xuta matsejen ne, ña cuma të me. —Cuatjin xu cachja Jesús.

<sup>19</sup> Vëhë xi cha xi vicuya cjuachacun cojo nahmi xi matitjun ne, jemu cavangui xu me chuva rë hacutjin cuma xi cjuaha me Jesús hora vëhë ni, tsëhë xi vëë me xi ejemplu xi cachja Jesús ne, condra rë me chja. Peru tsëhë xi tsacjun xu me xuta ne, vëhë xi cafaain xu me Jesús ngutjen.

*Cjuacjintacun tsëhë tujúnsa*

<sup>20</sup> Tu siu xu ni me cuidadu tsëhë cjuua rë Jesús, hisca catsingatju xu me ngujo cha xi tsejen sacuaha xuta ndaja, xi cuangui cha chuva rë xi cuaxë rë cha Jesús ngu cjuua xi cuaintjin, cojo sa xi cuma chjahá rë me cjuechani rë me xcun xutaxa rë ndihyavasen. <sup>21</sup> Hane cha xi cuacun jan ne, cuitjin xu cachja cha cojo Jesús.

—Maestro, ngayin ne, hyin ta ngayun ne, vicuyun rë xuta cojo cjuaquixi. Hacuaha tangun ni nújun cojo yëjë xuta ta, tsëhë xi ngayun ne, hatuxa vicuyun ndiya rë Nina cojo cjuaquixi. <sup>22</sup> Quihndé ne, sacuaha ley rë Moisés ne, ¿há sua cahndé xi cuechjen tujúnsa naja cojo César, me xi matitjun, o há suain cahndé? —Cuatjin xu cachja cha.

<sup>23</sup> Peru Jesús ne, tsëhë xi ha vacun rë me xi jemu ndacha cha ne, cuitjin xu cachja me cojo cha:

<sup>24</sup> —Ningacun ná ngu tujún. Quihndé ne, ¿yo xcusun rë hacuaha yo ñihi rë xi quitahá xcun tujún vë? —Cuatjin xu cavinenguise Jesús.

Hane cha xi cuacun vë ne, cuitjin xu cafayangui cha:

—Tsëhë César. —Chja xu cha.

<sup>25</sup> Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rë César xi tsëhë me, hane tuhun rë Nina xi tsëhë me. —Cuatjin xu cachja me.

<sup>26</sup> Hane camaji cavaxë xu rë cha Jesús ngu cjuua xi cuaintjin xi cuihndë xuta. Hane xi quijircun xu rë cha tsëhë cjuua xi cafayangui Jesús ne, tu caviyujuyuu xu ni cha.

*Cjuachjinenguise tsëhë xi cuya nima cjuahñu*

<sup>27</sup> Hya xi camá ne, cafehe xu ngujo cha saduceo hiscan tacun Jesús. Cha xi cuacun vi ne, vicuya cha cjuachacun xi chja xi xuta xi cahme ne, cuyaaïn nga me cjuahñu. Ngajan xi cha xi cuacun cafehe jan ne, cachja xu cha cojo Jesús cuitjin:

<sup>28</sup> —Maestro, Moisés ne, catsihindu me xcun xujun rë Nina xi sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuaaha quihndi rë nima vëhë.

<sup>29</sup> Quihndë ne, cuejña xi ngu ndihya ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane chjuun rë cha vëhë ne, casacuiin rë na hisca ngu quihndi cojo cha. <sup>30</sup> Hya xi camá ne, hntsë nima vëhë, cha xi majo ne, cafaha cha na cahan vëhë camá chjuun rë cha na, peru hacuaaha cahme cha hane casacuiin rë na quihndi.

<sup>31</sup> Hacuanitjin ni cafaha cha xi majyan jan na hisca xi café yëjë xi yatu cha cafaha cha na. Peru yëjë cha xi cuacun vë ne, café cha cahme cha chuva ngu chuva ngu cha. Hane na vëhë ne, casacuiin rë na hisca ngu quihndi cojo cha xi cuacun vë. <sup>32</sup> Hiscan xi cajnetaha ne, na vëhë ne, hacuaaha cahme na. <sup>33</sup> Quihndë ne, hya xi cuya yëjë nima cjuahñu ne, çjarë cha xi cuacun vë xi chjuun rë cha na xi cjuaquixi ta, tsëhë xi yëjë ni xi yatu cha ne, camá chjuun rë cha na? —Cuatjin xu cachja cha saduceo cojo Jesús.

<sup>34</sup> Sehe ngajan xi Jesús ne, cuitjin xu cachja me cojo cha:

—Xuta xi siu me ngasunhndë quihndë ne, tsinguixan me hacuaaha vixan me. <sup>35</sup> Peru xuta xi vechú chuva rë xi cuya me cjuahñu xi ha cuatju cueya me hacuaaha sacú rë me cjuahñu xatsë ne, cuixaaïn me hacuaaha tsinguixaaïn me hya ta, <sup>36</sup> tsëhë xi ha quihndë cueyaain nga me, tsëhë xi tangun cuma me cojo ángel. Hacuaaha cuma me quihndi rë Nina, tsëhë xi cuya me cjuahñu. <sup>37</sup> Hacuaaha hya xi chutayan cjuua xi cachja Moisés ngajan hiscan xi catí yanahyá xcuen ne, hya sacu machaya naja tsëhë xi nima ne, cuya cjuahñu ta, tsëhë xi cachja Moisés xi Nina naja ne, Nina rë Abraham, Nina rë Isaac, cojo Nina rë Jacob má me. <sup>38</sup> Peru Nina ne, hacuiin nina rë nima ta nina rë xuta xi quicun me ta, tsëhë xi xi cuma rë Nina ne, yëjë ni xuta ne, quicun me, handasa cahme yahnga me. —Cuatjin xu cachja Jesús.

<sup>39</sup> Ngajan xi ngujo cha vicuya cjuachacun ne, cuitjin xu cachja cha:

—Maestro, ndatjin cjuua xi canújun.

<sup>40</sup> Cuatjin xu cachja cha ta, tsëhë xi tsacjun xu cha cjuinenguise sa cha me.

*¿Yo tjë rë má me xi catsingatju Nina?*

<sup>41</sup> Sehe ngajan xi Jesús ne, cachja nga xu me cuitjin:

—¿Hacutjin má xi cuatjin chja xuta xi me xi tsingatju Nina ne, tjë rë David má me? <sup>42</sup> Ta suvá David ne, cachja me cuitjin xcun xujun tsëhë Salmo:

Nina ne, cachja me cojo Nai naha cuitjin:

“Tinechin nguehe ladu quixi naha,

<sup>43</sup> hisca hya xi yëjë ni xi sahmi ri condra ne, cuiyujú ngahan ngahma gobiernu riji.”

Cuatjin cachja David cjuua xi cachja Nina. <sup>44</sup> Quihndë ne, sá xi suvá David chja me xi Nai rë me má me xi tsingatju Nina ne, ¿hacutjin má ne xi hacuaaha tjë rë me ni? —Cuatjin xu cachja Jesús.

*Cachjayë Jesucristu cojo xuta ladu rë me tsëhë cha vicuya cjuachacun*

<sup>45</sup> Jinguyëjë rë xi tivisiñuju yëjë xuta jan ne, Jesús ne, cachja xu me cuitjin cojo xuta ladu rë me:

<sup>46</sup> —Xicaninguisuhunñuu cojo cha xi vicuya cjuachacun, xi jemu ndama rë cha xi cuatjin vajá cha tsjan nduju, hora xi fi tsujyihya cha, jemu chuya rë cha xi cuatjin fi chja xuta nina cojo cha ngajan ngajñi ndetsin, hacuaaha jemu chuya rë cha xi cuatjin satë rë cha cahndë xi matitjun tsëhë cahntsua yungun, o hiscan ngu ndava suhi. <sup>47</sup> Cha xi cuacun vë ne, hacuaaha jemu cjin tujún vaxë cha yachjin cahan. Hisca xi chjayuma cha ne, hacuaaha jemu nduju hora, peru hacuiin nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatju cha xi cuma rë jingusa xuta. —Cuatjin xu cachja Jesús.

## 21

*Tujún xi cavincha chjuun cahan cahntsua alcancía*

<sup>1</sup> Ngu nixtin jan ne, jinguyëjë rë xi tivutsejen xu Jesús xi tivincha xuta nchina tujún cahntsua alcancia tsëhë cjuandaja rë me cojo Nina ne; <sup>2</sup> hacuaha cavëë xu me xi canduava ngu chjuun cahan xi jemu yuma, hane hacuaha cavincha na jo tujún langa cahntsua alcancia jan. <sup>3</sup> Sehe ngajan xi cachja xu Jesús cojo xuta ladu rë me cuitjin:

—Cuichjá cojo nuju cjuaquixi ta na cahan vë xi jemu yuma na ne, hitsë sa vengui chji rë tujún xi cavincha na xi cuma rë tujún xi jemu cjin cavincha yëjë xuta nchina xi cuacun vë ta, <sup>4</sup> tsëhë xi me xi cuacun vë ne, tsëhë cjuanchina xi tjin rë me ne, ngajan cavaxë me tujún xi cavincha me. Peru na vëhë ne, handasa jemu tjin rë na cjuachaja ne, hitsë lihndi tujún xi tjin rë na ne, cavincha na yëjë cahntsua alcancia. —Cuatjin xu cachja Jesús.

*Cachja Jesucristu xi cuetsun yungun*

<sup>5</sup> Ngu ndiya, hya xi ngujo xuta jan cachja xu me xi yungun xi matitjun ne, jemu ndacun ndoyojo camá cojo, hacuaha jercu camaxcuen cojo tu mé ni xcusun cjuatjo xi casua xuta ne, cachja xu Jesús cuitjin:

<sup>6</sup> —Sacuaha xcusun xi chutsujun vi ne, cuechú nixtin xi hisca ngu ndoyojo ndacun xi cuicun vi ne, tsajin hinchasuncoo xicjin ta cjuë yëjë cuixujne. —Cuatjin xu cachja Jesús.

*Hacutjin sacú cumachaya naja xi ha meje cuijnetaha nixtin vihi*

<sup>7</sup> Ngajan xi xuta jan ne, cavinenguisse xu me cojo Jesús cuitjin:

—Maestro, hane çjanihya cuetjucaa xcusun vëhë ni? ¿Hacutjin cuma sacú niji cjuaquixi xi xcusun vëhë ne, ha tivechú nixtin xi cuetjucaa ni? —Cuatjin xu cavinenguisse me.

<sup>8</sup> Ngajan xi Jesús ne, cuitjin xu cachja me:

—Nechun cuidadu, cojo sa xi hacuain cuma ndacha ngayun ta, tsëhë xi jemu cjin xuta cuetjucaa me xi cuichja me xi hacui me xi catsingatju Nina me, hacuaha cuichja me xi ha camatiña nixtin. Peru xicatsanguntjengun me. <sup>9</sup> Hacuaha hya xi cuma chaya nuju cjuaxi jemu yehe si tijima ngu nación ne, o sá xi tjin cjuatacun xi jemu yehe si nduva ne, xicarcun ta, hatuxa tjin xi titjun xcusun vëhë cuma. Peru hacuain ngutjen hya cuijnetaha nixtin vihi.

<sup>10</sup> Hacuaha quijinduju sa xu cachja me cuitjin:

—Scaan xuta tsëhë ngu nación cojo jingu sa nación, hacuaha scaan xuta tsëhë ngu nandya cojo ngu nga nandya. <sup>11</sup> Hacuaha jemu cjin cahndë xi cjuani nangui, jemu cjin cahndë xi cuatju chíhin vitaha, jemu cjin cahndë xi cuma jindya, hacuaha jemu yehe chiracun cuma tsejen ngajan ngahnga xi sua cumachaya nuju mé xi cuma.

<sup>12</sup> Peru chaja sa xi cuma yëjë xcusun vëhë ne, xuta ne, tsujyihiyatjengui nuju me cojo cjuahngatacun. Cjuaha nuju me cjucojo nuju me xcun xutaxa rë yungun, hisca cuincha nuju me ndavaya. Cjucojo nuju me xcun xutaxa rë ndihyavasen, hisca xcun gobernador, ngatsë rë xi ladu naha má ngayun. <sup>13</sup> Xi cuatjin cuatjun cuma ne, vëhë sua nuju cahndë xi ninguxun yëjë cjuahacutjin cavicuyá nuju. <sup>14</sup> Tejñungutacún xi hacuain titjun jemu cjin ningatuhuntacún hacutjin chjayungun tsëhë xutaxa rë ta, <sup>15</sup> tsëhë xi ngahan suá nuju cjuatacun xi cuinúnun ngu cjuaxi condra nuju ne, cumaji tsitjungui me hacuaha cumaji cuichja me xi quixiin. <sup>16</sup> Hacuaha hisca xutacha nuju, o sá xi xingun, o sá xi xuta nuju, o sá xi amigu nuju ne, cuinchajyë nuju me. Hacuaha tjin yahnga ngayun ne, hisca tsiquehen nuju me. <sup>17</sup> Yëjë ni xuta ne, choho scuëë nuju me, tsëhë xi ladu naha ngayun. <sup>18</sup> Peru xicamacjiintacún ta tsajin camahani mé xi nichujun. <sup>19</sup> Caticaa nuju ta, tsëhë xi cuatjin xi cuetjuntjun.

<sup>20</sup> Peru hya xi chun xi jemu cjin xuta nduvacjin cuetsihin xinchandee me nandya Jerusalén xi sahmi me ngu si jyë cojo nuju ne, vëhë sua machaya nuju xi camatiña nixtin xi nandya Jerusalén ne, cjuë tsinguetsun xuta nduvacjin vë. <sup>21</sup> Nixtin hya ne, ngayujun ni xi nechun yëjë nandya tsëhë distritu Judea ne, tiyun tángun hiscan ndetjún. Hacuaha ngayujun ni xi nechun nguehe nandya Jerusalén ne, tetjunxun. Hacuaha ngayujun ni xi nechun ranchun rë Jerusalén ne, xicatsanguun nandya xi naxuntjun yojo nuju. <sup>22</sup> Cuatjin meje rë xi nihñu ta, tsëhë xi nixtin hya ne, sahmi Nina castigo nandya vihi, cojo sa xi xi cuatjin ne, cuetjucaa yëjë hacutjin camahindu xcun xujun rë Nina. <sup>23</sup> Jemu chojyih tsëhë yëjë yachjin xi hinchahma quihndi rë me cojo yëjë me xi tjin rë quihndi vaqui nixtin hya ta, tsëhë xi cuatju ngu cjuandya jyë nación vihi, hacuaha cuatju xuta nguehe ngu castigo. <sup>24</sup> Hacuaha jemu cjin xuta nguehe cueya me cojo quicha, hacuaha jemu cjin xuta nguehe tsihñu xuta tsëhë jingu sa nación me sehe tsingatju me me yëjë ni nación. Hane xi cuatju vëhë ne, suvá xutaxin cjue nduva me sunesun me xcun nangui tsëhë nandya Jerusalén, hisca xi cjuë nixtin xi xuta xi cuacun vë cuitexa me nandya Jerusalén vi.

*Xcusun xi cuma hya xi cuinduva nga Jesucristu*

<sup>25</sup> Nixtin hya ne, hacuaha cuma tsejen cjuarcun xi cuma xcun tsuhi cojo sá cojo niñú. Hane nguehe ngasunhndë ne, jercu cjin tsingataha cacun xuta tsëhë yëjë ni nación, ña cuya sca me tsëhë xi jercu cjuane ndachacun, hacuaha jercu tsiquijin rë tsindyu rë. <sup>26</sup> Yëjë xuta

ne, ña cuma ndaya cacun me xi tsacjun me, xi tsingataha cacun me tsêhê chircun xi cuma nguehe ngasunhdê ta, tsêhê xi hisca ngahñu xi yaja ngahnga ne, cjuiniyaya. <sup>27</sup> Sehe hya scuêê xuta ngahan, xi Quihndi rê Xuta Jain ngahan, xi cuinduva ngajñi rê yufi cojo jemu jyê ngahñu, hisca setí hisca vatê jyíhi ngahan xi cuinduva. <sup>28</sup> Hya xi xcusun xi cuacun vê cuetsihin cuma ne, tisechun chutsujun ngahnga ta camatiña nixtin xi cuetjuntjun.

<sup>29</sup> Xi quijinduju sa cjuavisiajmi rê Jesús ne, cachja xu me ngu ejemplu vihi:

—Quihndê ne, ningatuhuntacún tsêhê yaxujún o sá yahnga sa ya xi vixu xca rê. <sup>30</sup> Xi tu chun xi cuetjusehen ya xi cuacun vê ne, ha hyun ta ha camatiña chan tsi. <sup>31</sup> Hacuaha chuya vêhê ni ne, hya xi chun xi cuetsihin cuma yêjê xcusun xi cachjá cojo nuju vê ne, vêhê sua cumachaya nuju xi ha camatiña nixtin xi nduva Nina sahmi me gobiernu.

<sup>32</sup> Cuichjá cojo nuju cjuaquixi ta ngayujun ni xi nechun nixtin vihi ne, hacuiin ngayujun caveyun chaja sa xi cuatju yêjê xcusun xi cachjá cojo nuju jan. <sup>33</sup> Ngahnga cojo nguehe ngasunhdê ne, hatuxa cjuê. Peru hisca ngu cjuá naha ne, tsajin xi cuetjincaain.

<sup>34</sup> Nechun cuidadu tsêhê xcusun xi nihñu. Xicatuun cahndê xi cjuatacun nuju ne, tsê rê cojo cjuatacun tsêhê cjuachihí, cojo cjuacjintacun tsêhê xcusun xi mameje nuju xcun ngasunhdê nuju, sá tu tsajin tjin chjine ngayun hya xi cuechú nixtin vêhê, <sup>35</sup> sacuatjin tsajin tjin chjine ngu chu hya xi finenguisun rê chu chen. Vêhê xi nechun cuidadu ta, tsêhê xi hatuxa cuechú nixtin vêhê, hya xi sahmi Nina gobiernu yêjê ni xuta jingujyê ni ngasunhdê. <sup>36</sup> Nechun cuidadu. Yasen ni chjahyun rê Nina xi cuechú chuya rê xi cuetjuntjun tsêhê yêjê ni cjuacjintacun xi ha tu hora sa xi cuinduva. Hacuaha chjahyun rê Nina xi cuma cuetjunndujun hora xi cuisechun xcún xi cjuaháchuya nuju cojo cjuatacun nuju, ngahan xi Quihndi rê Xuta Jain ngahan. —Cuatjin xu cachja Jesús.

<sup>37</sup> Nguinixtin ne, ndatsen yungun xi matitjun xu véjña Jesús vicuya me xuta. Hane nguixun ne, vetju xu me fi véjña me ndetjún xi hmí rê Ndetjún Olivu. <sup>38</sup> Hane yêjê ni xuta ne, tajñu tajñu xu ni fi me yungun jan xi cuisñuju me cjuá xi vicuya Jesús.

## 22

### *Camachihin cjuá hacutjin xi chjahá rê Jesucristu*

<sup>1</sup> Hya xi camá xu ne, camatiña suhi tsêhê pan xi hacuiin cojo san rê pan má, suhi xi hmí rê Pascua. <sup>2</sup> Hane nahmi xi matitjun cojo cha vicuya cjuachacun ne, jemu tivangui xu me chuya rê hacutjin xi tsiquehen me Jesús. Peru táhahma xu tisahmi me xcusun vêhê ta, tsêhê xi tsacjun xu me xuta.

<sup>3</sup> Hya xi camá xu ne, Satanás ne, cavisehen xu cahntsua xahasen rê Judas, cha xi hacuaha hmí rê Iscariote, ngu cha ngajñi rê me xi tejó xi má ladu rê Jesús. <sup>4</sup> Ngajan xi Judas jan ne, quiji cavisiajmíjín xu cha cojo ngujo nahmi xi matitjun cojo ngujo cha mayu yungun hacutjin cuma xi cjuaha xuta xi cuacun vê Jesús. <sup>5</sup> Hane nahmi xi matitjun cojo mayu jan ne, jemu ndaja camá xu rê me, hisca caviyuju cacun me xi sua me cha tujún. <sup>6</sup> Hane Judas ne, cojo cjuatacun vêhê ne, camangu cacun cha, sehe ngajan xi cavangui xu cha ngu hora xi tsajin cjin xuta, xi sahmi cha entregadu Jesús cojo xuta xi cuacun jan.

### *Hacutjin cajiné Jesucristu tsêhê suhi rê Pascua*

<sup>7</sup> Cavechú xu nixtin tsêhê suhi rê pan xi hacuiin cojo san rê pan má, nixtin hya xi meje rê xi cueya chu tsánga. <sup>8</sup> Sehe ngajan xi Jesús ne, catsingatju xu me Pedru cojo Juan ngu tixa, hane cuitjin xu cachja me:

—Tángun tuhunchjínu xi xinênguixuun tsêhê suhi. —Cuatjin xu cachja me.

<sup>9</sup> Sehe ngajan xi me xi cuacun jan ne, cavinenguise xu me Jesús cuitjin:

—¿Hane jani meje nuju xi cuihinchjini ní? —Cuatjin xu cavinenguise me.

<sup>10</sup> Hane Jesús ne, cuitjin xu cachja me:

—Chutsujun ni, xi cjuhun tjehen nandya jan ne, ngajan cuechuntuhun ngu cha xi yaniji ngu nisa nandá, hane tánguntjengun cha hisca xi cjuhun ndihya hiscan cjuí cha, <sup>11</sup> sehe tinújun cojo nai rê ndihya jan cuitjin: “Cuitjin cjuá xi catsingatju maestru tsujun: ¿Jarê cuarto xi tuhun, sehe ngajan sínê niñu tsêhê suhi cojo xuta ladu naha?” Cuatjin tinújun cojo rê me. <sup>12</sup> Hane me vêhê ne, tsingacun nuju me ngu cuarto jyê xi tacun ngahnga hiscan xi ha tjin chjine ndihya. Hane ngajan tuhunchjínu xi xinê. —Cuatjin xu cachja Jesús.

<sup>13</sup> Hane xi quiji me xi jo jan ne, cavetjucaa jain yêjê cjuá xi cachja Jesús cojo rê me. Hane ngajan cavêhendaja xu me xi sínê nguixun Jesús cojo rê me tsêhê suhi.

<sup>14</sup> Hane xi cavechú hora ne, cafaha xu Jesús cahndê rê me xcun maxê cojo xingu xingu apóstol. <sup>15</sup> Hane sehe cachja xu me cojo apóstol jan cuitjin:

—Jemu meje sínê cojo nuju comida tsêhê suhi vihi chaja sa xi cjeue cjuaveya naha ta, <sup>16</sup> tsêhê xi nguehe cuichjá cojo nuju ta ha quihndê tsajin nixtin xi cúa sínê nga comida tsêhê suhi vihi. Sínê nga, peru hisca hya xi cuinduva Nina sahmi me gobiernu ta, tsêhê xi cjuatacun xi vicuya naja suhi vihi ne, hya cuetjucaa jain. —Cuatjin xu cachja Jesús.

<sup>17</sup> Hane xi cafahatsja xu me ngu vasu ne, sehe casua me nacuechji rē Nina, sehe cachja xu me cuitjin:

—Juhun vihi ne, sehe siuhun tsē tsē cojo xingun ta, <sup>18</sup> hacuaha cuichjá nga cojo nuju ta quihndē cojo nixtin xi cjuiniji sa ne, ha quihndē cuyaana cuēhē xan rē uva. Cuēhē, peru hisca hya xi cuinduva Nina sahmi me gobiernu. —Cuatjin xu cachja Jesús.

<sup>19</sup> Hane xi cafaha me ngu niñutsju hacuaha casua me nacuechji rē Nina ne, sehe cavotocja xu me niñutsju jan. Hane xi casua rē me apóstol jan ne, sehe cachja xu me cuitjin:

—Vihi ne, yojo naha vi, xi tisuá xi cueya ngatsē nuju. Cuitjin nihñu xcusun vihi yasen ni, cojo sa xi ninguitsjun ná. —Cuatjin xu cachja Jesús.

<sup>20</sup> Hane xi cajnetaha cajinē nguixun me ne, hacuanitjin xu ni casahmi me cojo vasu. Hora xi casua rē me apóstol ne, cuitjin xu cachja me:

—Xan vihi ne, vihi jni naha xi cuetju ngatsē nuju. Cuatjin xi cuma chihin compromisu xatsē xi tsahmi Nina cojo xuta.

<sup>21</sup> Peru chutsujun ni, cha xi sahmi ná entregadu ne, nguehe tacun cha ngajñi naja.

<sup>22</sup> Hane ngahan xi Quihndi rē Xuta Jain ngahan ne, hatuxa tjin ná xi cueya sacuatjin cavichaya Nina tsahan. Peru jemu chojyihí tsēhē cha xi sahmi ná entregadu. —Cuatjin xu cachja Jesús.

<sup>23</sup> Ngajan xi yējē xu apóstol jan ne, cavetsihin cavinenguise xicjin me jarē me xi sahmi xcusun vēhē.

#### *Yo xi hitsē sa matitjun*

<sup>24</sup> Hya xi camá xu ne, cavetsihin sacuaaha xi meje scaanya me ngajñi rē me yo xi chja xuta xi hitsē sa matitjun. <sup>25</sup> Ngajan xi Jesús ne, cuitjin xu cachja me:

—Yējē ni xuta xi matitjun nguehe ngasunhndē ne, jercu sahmi yehe me yojo rē me sacuaaha xi me vēhē má me nai rē xuta. Hacuaaha jercu meje rē me xi yējē xuta ne, cuichja me xi jemu ndaja me xi matitjun vē. <sup>26</sup> Peru ngayun ne, mijí rē xi cuatjin nihñu ta xi meje rē ne, ngu xi matitjun tsēhē ngajñi nuju ne, catitsinguijne yojo rē sacuaaha ngu xi chúva nu rē. Hane ngu xi vitexa tsēhē ngajñi nuju ne, hacuaaha catitsinguijne yojo rē sacuaaha ngu hndixahan. <sup>27</sup> ¿Yo xi hitsē sa matitjun ni? ¿Há ngu xi tjinē ne, o há tsajin ne, há ngu hndixahan xi cjuí caní comida? Xi tjinē ne, hatuxa vēhē xi hitsē sa matitjun. Peru ngahan ne, tejña ngajñi nuju sacuaaha ngu hndixahan nuju.

<sup>28</sup> Ngayun ne, ngayun xi cacaa nuju cojo yējē cjuañihí xi cavatjuun camá. <sup>29</sup> Vēhē xi sacuaaha casuaxa ná Nahmi naha xi ngahan sahme gobiernu ne, cuatjin suáxa nuju xi nihñu gobiernu. <sup>30</sup> cojo sa xi ngayun ne, hacuaaha xinu siuhun cojo ná ngajan hiscan sahme gobiernu. Hacuaaha suáxa nuju xi nichuvun cjuatacun rē yējē tejó tjē naja, ngayaan xi tjē rē xutachanga naja Israel ngayaan. —Cuatjin xu cachja Jesús.

#### *Casua Jesucristu camachaya rē Pedru xi cuichja me xi hvín me yo Jesucristu*

<sup>31</sup> Hacuaaha cachja sa xu Jesús cuitjin cojo Pedru xi hacuaaha hmí rē me Simón:

—Chutsujun ni Simón. Satanás ne, casacu rē cahndē xi tsichuva cjuatacun nuju ngayujun ni. <sup>32</sup> Peru ngayun Simón ne, caféhya rē Nina ngatsē nuju, cojo sa xi hacuín cumandaya tacún sacuatjin xi mangutacún cojo ná. Hane hya xi ngayun cuyun nga ndiya naha ne, tuhun ngahñu xingun. —Cuatjin xu cachja Jesús.

<sup>33</sup> Ngajan xi Pedru ne, cachja xu me cojo Jesús cuitjin:

—Tatá. Ngahan ne, tsingatehen cjué ndavaya cojo nuju hisca tsingatehen cueya cojo nuju. —Cuatjin xu cachja Pedru.

<sup>34</sup> Ngajan xi Jesús ne, cuitjin xu cafayangui me tsēhē Pedru:

—Nguehe cuichjá cojo nuju, Pedru. Chaja sa xi squihnda ngu xahnda ne, ha jyan ndiya canújun xi hyúun yo ngahan. —Cuatjin xu cachja Jesús.

#### *Camatiña hora xi chjahá rē Jesucristu*

<sup>35</sup> Hacuaaha cachja me cojo xuta ladu rē me cuitjin:

—Hya xi catsingátju nuju xi cachjá cojo nuju xi chuun tujún, chuun changa hacuaaha chuun chuxinxte ne, ¿há quixi xi tsajin mé camachaja nuju? —Cuatjin xu cachja Jesús.

Hane xuta ladu rē me jan ne, cuitjin xu cachja me:

—Juun, tsajin mé. —Cuatjin xu cachja me.

<sup>36</sup> Hane Jesús ne, cachja nga xu me cuitjin:

—Peru quihndē ne, jarē ngayun xi tjin nuju tujún, tjin nuju changa ne, chuhun, tángun cojo. Hane yo xi tsajin rē ngu quichandujú ne, catiteña tsjanga rē ne, sehe catatsē ngu quichandujú. <sup>37</sup> Cuatjin meje rē ta, tsēhē xi nguehe cuichjá cojo nuju ta hacutjin xi camahindu tsahan xcun xujun rē Nina ne, hatuxa tjin rē xi cuetjucaa, cjuá xi chja cuitjin:

“Cuichja xuta tsëhë me xi ngu xuta tsehen me.” Cuatjin camahindu. Hatuxa cuetjucaa sacuatjin camahindu. —Cuatjin xu cachja Jesús.

<sup>38</sup> Sehe ngajan xi xuta ladu rë Jesús jan ne, cuitjin xu cachja me:

—Chutsujun ni, tatá. Nguehe ne, ha siu jo quichandujú. —Cuatjin xu cachja me.

Sehe ngajan xi Jesús ne, cuitjin xu cafayangui me:

—Cojo vëhë ne, ha cuma. —Cuatjin xu cachja me.

*Casahmi Jesucristu oración rë me ngajan Ndetjún Olivu*

<sup>39</sup> Hya xi camá ne, xi cavetju xu me tsëhë nandya Jerusalén ne, sacuatjin xi ha xcusun rë me ne, quiji xu me Ndetjún Olivu. Hacuaha cojo yëjë xuta ladu rë me quiji xu me cojo rë me. <sup>40</sup> Hane xi cafehe me jan ne, cachja xu me cojo xuta jan cuitjin:

—Chjahyun rë Nina xi hacuiin chjaháchuva nuju cojo cjuatacun nuju. —Cuatjin xu cachja me.

<sup>41</sup> Hane xi quijixin me hitsë tsëhë xuta ladu rë me jan ne, sehe ngajan cavixcuhnchi xu me xi sahmi me oración rë me, <sup>42</sup> cuitjin xu cachja me:

—Ngayun Nahmi naha, sá mé ni xi meje nuju ne, chjuhunxun cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan. —Cuatjin xu cachja me.

<sup>43</sup> Hya xi camá ne, cavëë xu me ngu ángel xi canduva tsëhë ngahnga, casua rë me ngahñu.

<sup>44</sup> Hane xi jemu jima ndaya cacun xu me ne, hitsë sa jercu cafehya rë me Nina. Hacuaha ndasueya xi cavetju rë me ne, sacuaaha jni xu cún xi cavixu nangui.

<sup>45</sup> Hane xi cavisatjenhnga xu Jesús xi cajnetaha casahmi me oración rë me ne, xi cavuya quiji me hiscan siu xuta ladu rë me jan ne, casacutsja xu me xi siufë, ngatsë rë cjuachoho rë. <sup>46</sup> Sehe ngajan xi Jesús ne, cuitjin xu cachja me cojo xuta jan:

—¿Mé má cuatjin tsjuñufun ni? Tisatjunhngun ne, nihñu oración nuju, sátu chjaháchuva nuju cojo cjuatacun nuju. —Cuatjin xu cachja Jesús.

*Cafaha xuta Jesucristu*

<sup>47</sup> Jinguyëjë rë xi tichja cuaha xu Jesús ne, ha tu ñahñu jercu cjín xuta cafehe me. Hane cha xi hmí rë Judas, ngu cha ngajñi rë me xi tejó xi má ladu rë Jesús jan ne, titjun xu cha xcun xuta cjín jan cjui cha. Hane xi cafehe cha jan ne, sehe quijitiña xu cha xi cuitatsuha cha Jesús xi sua cha me nina. <sup>48</sup> Ngajan xi Jesús ne, cuitjin xu cachja me cojo cha:

—Judas, ¿há cuatjin cuitatsuhun ná xi nihñu ná entregadu, ngahan xi Quihndi rë Xuta Jain ngahan? —Cuatjin xu cachja me.

<sup>49</sup> Hane xi cajne rcu xuta xi siu cojo Jesús xcusun xi cuma jan ne, sehe cachja xu me cuitjin:

—Tatá. ¿Há cuíjin rë me quicha? —Cuatjin xu cachja me.

<sup>50</sup> Hya xi camá xu ne, ngutjen cavaja ngu me jan cha hndixahan rë nahmi xi matitjun tsëhë yëjë ni nahmi, hane cavatësun xu me tyjavañuju quixi cha. <sup>51</sup> Hane ngajan xi Jesús ne, cuitjin xu cachja me:

—Camá ni. —Cuatjin xu cachja me.

Hane xi cavetahatsja xu me hiscan cati rë cha ne, camandaja xu cha casahmi Jesús.

<sup>52</sup> Hane nahmi xi matitjun cojo cha mayu yungun xi matitjun cojo xutachanga, xi cafehe me xi cjuaha me Jesús ne, cachja xu Jesús cojo rë me cuitjin:

—¿Há nduvun chjuhun ná sacuaaha ngu xuta xi chëjë me, xi cuatjin nduvun cojo ya cojo quicha vë ni? <sup>53</sup> Xi cavitejñaya cojo nuju nchunchujun ni ndatsen yungun jan ne, cavetuhunntsuun ná. Peru quihndë cavechú hora xi casua Nina cahndë xi nihñu cojo ná tu mé ni xi meje nuju, cavechú hora xi Satanás cuitexa. —Cuatjin xu cachja Jesús.

*Cachja Pedru xi hvín me yo Jesucristu*

<sup>54</sup> Hya xi camá xu ne, xi cafaha xuta jan Jesús ne, quijicojo me me ndava nahmi xi matitjun tsëhë yëjë ni nahmi. Pedru ne, hacuaaha tjenguí xu me cjui me tu cjín tu cjín ni hacutjin cjui xuta jan cojo Jesús. <sup>55</sup> Hane xi cafehe xu me jan ne, casahmi me ngu ndava ndihi ngajan ndatsen ndihya, sehe ngajan quiji me caviyuju tangun me. Hacuaha cojo xu Pedru quiji me cavéjña tangun me cojo xuta jan. <sup>56</sup> Hane xi cavëë xu na hndixahan rë nahmi jan Pedru, tacun me xcun ndihi jan ne, xi cavutsejenndaja na me ne, sehe cachja xu na cuitjin:

—Me xi cuijyihí vi ne, cojo me tacun me cojo me xi cuajyihí vë hya. —Cuatjin xu cachja na.

<sup>57</sup> Hane Pedru ne, cavitijaya me cachja xu me cuitjin:

—Hveen yo vë. —Cuatjin xu cachja me.

<sup>58</sup> Xi cavatju nga ngu hora lihndi ne, xi cavëë nga ngu cha Pedru ne, cachja xu cha cuitjin: —Ngayun ne, hacuaaha ladu rë me xi cuacun vë má ngayun. —Cuatjin xu cachja cha.

Ngajan xi Pedru ne, cuitjin xu cachja me:

—¡Éya, hacuini! —Cuatjin xu cachja me.

<sup>59</sup> Xi cavatju sacuaaha ngu hora nga xu ne, cachja nga ngu cha xi tacun jan cuitjin:

—Ha cjuaquixindaja ta cha xi cuijyihí vi ne, cojo cha tacun cha cojo cha xi cuajyihí vë, tsëhë xi hacuaaha cha Galilea cha. —Cuatjin xu cachja cha.

<sup>60</sup> Ngajan xi Pedru ne, cuitjin xu cafayangui me:

—Hveen mé xi nújun vë. —Cuatjin xu cachja me.

Hane ha tu tichja cuaha xu Pedru ne, ha tu ñahñu cajindaya ngu xahnda jan. <sup>61</sup> Ngajan xi Nai naja ne, cavuya vutsejen xu me Pedru. Hane Pedru ne, catsinguitsjen xu me cjuaxi cachja Nai naja cojo rë me, xi cachja me cuitjin: “Chaja sa xi squihnda ngu xahnda ne, hacuaaha camá jyan ndiya nújun xi hyúun yo ngahan.” Cjua vëhë xi catsinguitsjen xu Pedru.

<sup>62</sup> Hane xi cavetju xu me candatsen ne, cajihnda susu me.

#### *Catsixcuehyu xuta Jesucristu*

<sup>63</sup> Hane cha xi siutahá sahmi cuidadu rë Jesús jan ne, titsixcuehyu xu cha me hacuaaha tivaja cha me. <sup>64</sup> Hane xi cavetsa xu cha tuxcun me ne, sehe cavaja sa cha me, sehe cachja xu cha cuitjin:

—¡Tinoje! ¿Yo xi tivaja ri? —Cuatjin xu cachja cha.

<sup>65</sup> Hacuaaha jemu cjin sa xu cjuaxi cachja cha xi choho chja cha tsëhë me.

#### *Casahmicuenda xuta xi matitjun jyë rë Jesucristu*

<sup>66</sup> Hane xi camá nchujun jan ne, camatangun xu xuta changá tsëhë nandya jan cojo nahmi xi matitjun cojo cha xi vicuya cjuachacun. Sehe quiji chani xu rë Jesús xcun xuta xi cuacun jan xi chjahácuenda rë jyë rë me. <sup>67</sup> Hane xi cafehe Jesús jan ne, sehe cavinenguise xu xuta jan cuitjin:

—Sá xi ngaye xi catsingatju Nina ngaye ne, tinoje cojo niji. —Cuatjin xu cavinenguise xuta jan.

Sehe ngajan xi Jesús ne, cuitjin xu cafayangui me:

—Sá xi cuichjá cojo nuju ne, hatuxa cumacjaaín nuju xi cuichjá. <sup>68</sup> Hacuaaha sá xi cjuinenguësë nuju ngu cjuaxi ne, hatuxa chjayunnguun tsahan. <sup>69</sup> Peru cuetsihin cojo quihndë ni ne, ngahan xi Quihndi rë Xuta Jain ngahan ne, cuitejña ladu quixi tsëhë Nina, me xi jemu hñu ngahñu rë. —Cuatjin xu cafayangui Jesús.

<sup>70</sup> Ngajan xi yëjë ni xuta jan ne, cavinenguise xu me Jesús cuitjin:

—¿Há ngaye xi Quihndi rë Nina ngaye ni? —Cuatjin xu cavinenguise me.

Hane Jesús jan ne, cuitjin xu cafayangui me:

—Sacuatjin nújun vë ne, cuatjin jain. —Cuatjin xu cafayangui Jesús.

<sup>71</sup> Ngajan xi xuta xi cuacun jan ne, cuitjin xu cachja me cojo xicjin me:

—¿Mé sa nihña xuta xi tsinguixi me jyë rë cha? Ha canuhyaan suvaan xi hntsua cha cavetju xi cachja cha. —Cuatjin xu cachja xuta.

## 23

#### *Cavisehen Jesucristu xcun Pilatu*

<sup>1</sup> Hya xi camá ne, cavisatjenhnga yëjë xu xuta xi matitjun jan ne, sehe quiicojo me Jesús xcun Pilatu. <sup>2</sup> Hane cavetsihin xu cavinchajyë me cuitjin:

—Casacuntsin cha xi cuijyihí vi tiviseccjan cha cjuatacun rë xuta. Hacuaaha mijí rë cha xi cuechjin tujúnsa niji cojo César, me xi matitjun. Hacuaaha chja sa cha ta hacui cha xi catsingatju Nina cha, hacuaaha matitjun xu cha. —Cuatjin xu cachja me xi cavinchajyë me Jesús.

<sup>3</sup> Sehe ngajan xi Pilatu ne, cavinenguise xu me Jesús cuitjin:

—¿Há ngaye xu matitjun ngaye tsëhë xuta tjë rë Israel? —Cuatjin xu cavinenguise Pilatu.

Hane Jesús ne, cuitjin xu cafayangui me:

—Cuatjin sacuatjin nújun vë. —Cuatjin xu cafayangui me.

<sup>4</sup> Ngajan xi Pilatu ne, cuitjin xu cachja me cojo nahmi xi matitjun cojo yëjë xutacjin jan:

—Sacuiin ná hisca ngu jyë rë cha xi cuijyihí vi. —Cuatjin xu cachja Pilatu.

<sup>5</sup> Peru quijinduju sa xu cachja xuta xi matitjun jan cuitjin:

—Jemu tiviseccjan cha cjuatacun rë xuta ngatsë rë cjuaxi tivicuya cha jingujyë ni distritu Judea vi. Cavetsihin cha hisca ngajan distritu Galilea, hisca nguehe cafehe cha. —Cuatjin xu cachja me.

#### *Cavisehen Jesucristu xcun Herodes*

<sup>6</sup> Hane xi cahndë Pilatu cjuaxi vëhë ne, sehe cavinenguise xu me xuta jan cuitjin:

—¿Há cha Galilea cha xi cuijyihí vi ni? —Cuatjin xu cavinenguise me.



<sup>7</sup> Hane xi casacu xu rë Pilatu cjuaquixi xi hiscan xi vitexa Herodes canduva Jesús ne, sehe catsingatju xu Pilatu me xcun Herodes, tsêhê xi Herodes ne, hacuaha quitahá xu me ngajan Jerusalén nixtin hya. <sup>8</sup> Hane hya xi cavêê Herodes Jesús ne, jemu ndaja camá xu rë me, tsêhê xi ha titjun sa ne, jemu meje scuêê me Jesús, tsêhê xi ha machaya rë me cju tsêhê Jesús, hacuaha meje scuêê xu me xi sahmi Jesús ngu cjuarcon. <sup>9</sup> Hane jercu cjin cjuachjinenguisse casahmi xu me Jesús, peru Jesús ne, tsajin camahani mé xi cafayangui xu me. <sup>10</sup> Hane nahmi xi matitjun cojo cha xi vicuya cjuachacun ne, jemu tivincha xu me jyê rë Jesús. <sup>11</sup> Ngajan xi Herodes cojo sindadu rë me ne, jemu casahmixta xu me cojo Jesús, hacuaha catsixcuehyu me me. Hane xi catsicaja xu me Jesús ngu tsjian xi jemu ndajiyihi camahani ne, sehe cavuya catsingatju nga xu me Jesús xcun Pilatu. <sup>12</sup> Hane nixtin hya ne, Herodes cojo Pilatu ne, jemu cavinga xu rë me xicjin me, handasa titjún xu ne, maji vëê xicjin me.

*Camá entregadu Jesucristu xi cjue cueya me*

<sup>13</sup> Hya xi camá ne, xi casahmitangun xu Pilatu nahmi xi matitjun cojo xutaxa rë cojo xuta nandya ne, <sup>14</sup> sehe cachja xu me cojo cuitjin:

—Ngayujun ni matsejen ne, canduvuncujun cha xi cuijyihí vi nguehe matsejen, tsêhê xi xi má nuju matsejen ne, tiviseccjan cha cjuatacun rë xuta. Peru quihndê matsejen ne, chutsujun ta, xcún ni matsejen ne, cafahátaha rë cha, peru casacuiin ná hisca xi ngu jyê rë cha sacuatjin jyê xi cavinchun. <sup>15</sup> Hacuanitjin ni Herodes matsejen ta, casacuiin rë me jyê rë cha, vêhê xi catsicuya nga me cha. Chutsujun ta tsajin camahani mé casahmi cha xi vechú chuya rë xi niqen cha. <sup>16</sup> Vêhê xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

<sup>17</sup> Hatuxa xcusun xu rë Pilatu xi tsismi me ngu presu xi xuta vaxijin me nu nu ni nixtin rë suhi. <sup>18</sup> Peru yêjê ni xuta xi matitjun jan ne, ngu tangun ni camá xu me cajindaya me cachja me cuitjin:

—¡Nicuhun cha vi ne, Barrabás nismu cha! —Cuatjin xu cajindaya me.

<sup>19</sup> Cha Barrabás ne, quiji cha ndavaya ngatsê rë xi casahmi xu cha ngu si cojo xutaxa rë, hacuaha catsiquehen xu cha. <sup>20</sup> Peru ngu ndiya nga cachja xu Pilatu cojo xuta xi matitjun jan, tsêhê xi Pilatu ne, meje tsismi me Jesús. <sup>21</sup> Peru xuta xi matitjun jan ne, cavuya cajindaya nga me cachja xu me cuitjin:

—¡Tetuhun cha, tetuhun cha xcun cru! —Cuatjin xu cajindaya me.

<sup>22</sup> Hane xi ma jyan ndiya ne, cavinenguisse xu Pilatu xuta xi matitjun jan cuitjin:

—Peru ¿mé xi jemu choho casahmi cha ni? Tsajin camahani mé jyê rë cha casacu ná xi vechú chuya rë xi niqen cha. Vêhê xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

<sup>23</sup> Peru yêjê ni xuta xi matitjun jan ne, quijinduju sa xu cajindaya me cafehya me xi setaha Jesús xcun cru. Vêhê xi cajne cacun xu Pilatu, <sup>24</sup> hacuaha cavejña cacun xu me xi sahmi me hacutjin xi fehya xuta jan. <sup>25</sup> Hya xi camá ne, catsismi xu me cha xi cafehya xuta xi matitjun jan, ngu cha xi quiji ndavaya tsêhê xi casahmi xu si cojo xutaxa rë hacuaha catsiquehen xu cha. Peru Jesús ne, casua xu Pilatu me xi cjue cueya me, sacuatjin meje rë xuta xi matitjun jan.

*Casetaha Jesucristu xcun cru*

<sup>26</sup> Hane xi cjuicojo sindadu Jesús ne, ngajan ndiya jan cavechútaha xu cha ngu me xi hmí rë Simón tsêhê nandya Cirene, xi nduva xu me quiji me nguijná. Hane cafaha xu sindadu jan me, catsicaniji xu cha me cru xi cjue me cojo hacutjin cjuí Jesús.

<sup>27</sup> Hane jercu cjin camaha xu ni xuta quiji me cojo Jesús hacuaha jercu cjin xu yachjin xi hisca chja hisca jihnda na xi jemu choho má rë na ngatsê rë Jesús quiji xu na cojo me. <sup>28</sup> Hane xi cavuya Jesús cavtsejen me na ne, sehe cachja xu me cuitjin:

—Ngayun na quihndi nandya Jerusalén, xicachjihnduun ngatsê naha. Chjihndun ngatsê nuju suvun cojo ngatsê rë quihndi nuju ta, <sup>29</sup> cuechú nixtin xi cuichja xuta cuitjin: “Jemu ndaja tsêhê yachjin xi hatuxa maji sacú rë na quihndi; jemu ndaja tsêhê yachjin xi hisca ngu quihndi casacuiin rë na; hacuaha jemu ndaja tsêhê yachjin xi casacuiin quihndi catsicha na.” Cuatjin cuichja xuta. <sup>30</sup> Nixtin hya ne, hacuaha cuichja xuta cojo ndetjún cuitjin: “Tjinengunsun niji.” Hane naxi ne, cuitjin cuichja me cojo: “Tatsun niji.” Cuatjin cuichja me ta, <sup>31</sup> sá xi cuitjin choho tisahmi xuta vi cojo ná quihndê, ngahan xi tangun ngahan sacuaha ngu ya xcuen ne, hatuxa hitsê sa choho sahmi me cojo nuju nchujun ni nguini, ngayun xi tangun ngayun sacuaha ngu ya quixí. —Cuatjin xu cachja Jesús.

<sup>32</sup> Hacuaha cojo sa xu jo cha tsehen quijicojo sindadu jan cha, xi tsiquehen tangun cha cha cojo Jesús. <sup>33</sup> Hane xi cafehe cha cojo Jesús hiscan xi hmí rë Nínda Rcuun ne, ngajan cavetaha xu cha Jesús xcun cru hacuaha caviyujutaha sa cha catsijo cha tsehen jan xcun

cru rë cha. Ngu cru xi quitahá ngu cha ne, casecun xu táha xcun tsëhë Jesús, hane ngu nga ne, táha quixi. <sup>34</sup> Ngajan xi Jesús ne, cachja xu me cuitjin:

—Ngayun Nahmi naha. Ninchatuhun rë xuta vi ta, hvín me mé xi tisahmi me. —Cuatjin xu cachja Jesús.

Hane xi cuatëcja sindadu tsjian rë Jesús jan ne, cavaxë xu cha ngu suerte. <sup>35</sup> Hane xutacjin jan ne, caxinchacun xu me cavutsejen me xcusun xi tijima jan. Hacuaha xutaxa rë jan ne, cavejnucëë me Jesús, cuitjin xu cachja me:

—Cavaxëtje cha jingu sa xuta. Quihndë ne, cataxëtje suvá cha yojo rë cha, sá xi hacui jain cha xi cavaxijin Nina hacuaha catsingatju me. —Cuatjin xu cachja xutaxa rë.

<sup>36</sup> Hacuaha sindadu jan ne, catsixcuehyu xu cha Jesús. Quijitiña cha hiscan tyjangui me xcun cru, hane meje sua xu cha xan yufa cuihi me, <sup>37</sup> sehe cachja xu cha cuitjin cojo rë me:

—Sá xi ngaye jain matitjun ngaye tsëhë xuta tjë rë Israel ne, naxetje sove yojo riji. —Cuatjin xu cachja cha.

<sup>38</sup> Hacuaha camahindu xu ngujo cjuar cu cru rë Jesús xi chja cuitjin: “Matitjun cha vihi tsëhë xuta tjë rë Israel.” Cuatjin xu camahindu. Jyan hne camahindu cjuar xi cuacun vë: hne griego cojo latin cojo hebreo.

<sup>39</sup> Hane ngu cha tsehen xi cojo casetaha xcun cru jan ne, cuitjin xu choho cachja cha tsëhë Jesús:

—¿Hacuiin ngaye xi catsingatju ri Nina ni? ¡Naxetje sove yojo riji ne, hacuaha naxetje niji! —Cuatjin xu cachja cha.

<sup>40</sup> Hane xi cavatëcja xu cha xingu jan cjuar rë cha xi choho chja tsëhë Jesús ne, cuitjin xu cachja cha:

—¿Há rcuiin Nina, quihndë xi tivatjun castigu sacuatjin tivatju me vëhë tijima?

<sup>41</sup> Ngayaan ne, cojo cjuar quixi xi tivatjun tijima ta, ngatsë rë xcusun xi canihña ne, vëhë xi vechú chuva rë xi cuitjin tivatjun castigu. Peru me vihi ne, tsajin mé xi jemu choho casahmi me. —Cuatjin xu cachja cha.

<sup>42</sup> Sehe cachja xu cha cojo Jesús cuitjin:

—Jesús, ninguitsjun ná hya xi cuinduvun nihñu gobiernu. —Cuatjin xu cachja cha.

<sup>43</sup> Hane Jesús ne, cuitjin xu cafayangui me:

—Cuichjá cojo nuju cjuar quixi ta ha cojo quihndë ni ne, cuinechun cojo ná ngajan cahndë ndajiyi hiscan xi hmí rë Paraíso. —Cuatjin xu cafayangui Jesús.

#### *Xcusun xi camá hya xi cahme Jesucristu*

<sup>44</sup> Hane hora vëhë ne, camañu xu jinguyë ni. Cavetsihin xi camanchisen ne, quiji cani rë hisca fane jyan, <sup>45</sup> tsëhë xi tsuhi ne, ha quihndë casuaan xu ndavá rë. Hacuaha ngajan cahntsua yungun xi matitjun, tsjian xi vitechja rë tingotjo rë Ndava Nina ne, catiyavasen xu. <sup>46</sup> Hya xi camá ne, jercu hñu camaha xu ni cachja Jesús cuitjin:

—Ngayun Nahmi naha. Ntsun cuejñá hasen naha. —Cuatjin xu cachja me.

Hane xi cavatju cachja me cuatjin ne, cahme xu me.

<sup>47</sup> Hane ngu capitán xi secun tiña xu jan ne, xi cavëë cha xcusun xi camá jan ne, casahmi jyë casahmi hnga cha Nina, cachja xu cha cuitjin:

—Quixi jain xi cha xi cuijiyihi vi ne, tsajin jyë rë cha. —Cuatjin xu cachja cha.

<sup>48</sup> Hane yëjë ni xutacjin xi camatangun me xi scutsejen xu me xcusun jan ne, xi cavatju cavëë me yëjë xcusun xi camá jan ne, cavuya me cafe xu me, ña yaha xu me rcu me ngatsë rë cjuachoho rë me. <sup>49</sup> Peru yëjë ni xuta xi cavinga xu rë Jesús cojo yëjë yachjin xi cavetju me tsëhë distritu Galilea cojo Jesús ne, tsëhë cjin ni hinchacun cuaha xu me tivutsejen me xcusun xi tivatju Jesús.

#### *Caseya nima Jesucristu cahntsua tsjun*

<sup>50</sup> Hane tacun ngu xu me xi hmí rë José, ngu xuta nandya Arimatea, ngu nandya rë xuta tjë rë Israel. Me vëhë ngu xihin ndaja me hacuaha tsajin xu mé jyë rë me tjín. <sup>51</sup> Hacuaha cachuyiin xu rë me sacuatjin caviyuju xutaxa rë xi yahnga jan cjuatacun rë me cojo xcusun xi casahmi me. Hacuaha José jan ne, jemu meje xu rë me xi cuinduva Nina sahmi me gobiernu. <sup>52</sup> Ngajan xi me vëhë ne, quiji xu me xcun Pilatu, hane cafehya xu me nima Jesús. <sup>53</sup> Hane xi casacu cahndë ne, quiji catsitujne me, sehe cavaxë xu me ngu tsjian. Hya xi camá ne, quiji caveya xu me cahntsua ngu tsjun xi catjuhngui rë taha naxi, hacuaha hisca ngu xu nima cjëë seyaniji. <sup>54</sup> Nixtin hya ne, vispra xu. Ha hisca meje cuechú xu hora xi cusehen nixtin xi chjahájenda rë.

<sup>55</sup> Hane yachjin xi cojo xu me cavetjutangun me cojo Jesús ngajan Galilea ne, tjengui xu me quiji me cojo nima. Hane cavëë me tsjun hacuaha cavëë xu me hacutjin caseya nima.

<sup>56</sup> Hane xi cavuya me ne, cavëhëchjine xu me rqui cojo aceite xi ndaja jne tsëhë nima.

Hane xi camá nchujun jan, xi cavechú xu nixtin xi chjahájenda rë ne, caviyujuyuu xu me, sacuatjin vitexa ley rë Moisés.

## 24

*Cavuya Jesucristu cjuahñu*

<sup>1</sup> Peru tu casahasen ni tsêhê nixtin ngu tsêhê totje ne, yachjin jan ne, cavuya quiji nga xu me xcun tsjun jan hacuaha cavaha xu me rqui xi ha cavêhêchjine me jan. <sup>2</sup> Hane xi cafehe me jan ne, cavêë xu me xi ndoyo xi cavechja rê tingotjo rê tsjun jan ne, ha canivahaxin rê. <sup>3</sup> Hane xi cavisehen me cahntsua tsjun jan ne, cavêë xu me xi tsajin nima Nai naja Jesús. <sup>4</sup> Hane jinguyêjê rê xi sacuiyini rê me mé sahmi me ne, ha tu ñahñu camatsejen xu jo ángel jan, xi jercu tu seti camaha xu ni tsjian rê. <sup>5</sup> Hane xi jemu catsacjun me camá ne, catsiquindi xu me xcun me. Sehe ngajan xi ángel jan ne, cuitjin xu cachja cojo rê me:

—¿Mé má ngajñi rê nima vinchunsun me xi quicun? <sup>6</sup> Me vêhê ne, tsajin me nguehe ta cavuya me cjuahñu. Ninguitsjun hacutjin cachja me cojo nuju hya xi tacun cuaha me ngajan Galilea, <sup>7</sup> hya xi cachja me xi me xi Quihndi rê Xuta Jain ne, hatuxa tjin xi cuma me entregadu tsja xuta tsehen, sehe cueya me xcun cru, hane xi cuma jyan nixtin ne, cuya nga me cjuahñu. —Cuatjin xu cachja ángel jan.

<sup>8</sup> Sehe ngajan xi yachjin jan ne, catsinguitsjen xu me cjua rê Jesús. <sup>9</sup> Hane xi cavuya me xi quiji me xcun tsjun jan ne, quiji casua xu me camachaya rê xuta ladu rê Jesús xi tengu jan cojo yêjê sa me xi yahnga tsêhê yêjê ni hacutjin cavatju me camá. <sup>10</sup> Quihndê ne, yachjin xi casua camachaya rê apóstol jan ne, hacui xu na María na Mágdala cojo na Juana cojo na María naa rê Jacobo cojo sa yachjin xi yahnga. <sup>11</sup> Peru apóstol jan ne, xi má xu rê me ne, suvá cjuangarca xi chja yachjin jan, vêhê xi camacjaain xu rê me.

<sup>12</sup> Peru Pedru ne, vangasanii xu me quiji me hiscan tacun tsjun jan. Hane xi cafehe me jan ne, catsiquindi xu me yojo rê me, sehe cavutsejenya xu me cahntsua tsjun jan ne, hane cavêë xu me suvá tsjian jan siu. Sehe cavuya cafe xu me. Jercu quijircun xu rê me tsêhê xcusun xi camá jan.

*Ndiya Emaús*

<sup>13</sup> Hya xi camá ne, ha nixtin hya xu ni ne, jo cha ladu rê Jesús jan ne, cavetju xu cha quiji cha ngu nandya xi hmí rê Emaús, xi tacun sacuaaha chuya rê tengu kilómetro tsêhê Jerusalén. <sup>14</sup> Hane ndiyya cjuí cha jan ne, cavisiajmi xu cha ngajñi rê cha tsêhê yêjê xcusun xi camá. <sup>15</sup> Hane jinguyêjê rê xi tivisiajmi cha jan ne, cavechútáha xu Jesús cha, hane quijitangun xu me cojo cha. <sup>16</sup> Peru handasa vutsejen cha me ne, casuaain xu Nina cahndê xi scuêë cha xi hacui me. <sup>17</sup> Sehe ngajan xi Jesús ne, cavinenguisse xu me cha cuitjin:

—¿Mé cjua xi tivisiajmu xi táha tivangun? —Cuatjin xu cavinenguisse me.

Hane cha xi cuacun jan ne, caxinchacunhñu xu cha, hacuaha jemu va tjin cacun cha. <sup>18</sup> Hane ngu cha xi cuacun jan xi hmí rê Cleofas ne, cachja xu cha cojo Jesús cuitjin:

—¿Há ngu tu tu ngayun xi nechuntuhun nguehe Jerusalén xi cuatjin hyúun mé xi sehe cavatju camá ni? —Cuatjin xu cachja cha cojo Jesús.

<sup>19</sup> Sehe ngajan xi Jesús ne, cuitjin xu cachja me cojo cha:

—¿Mé xcusun jan? —Cuatjin xu cachja me.

Hane cha xi cuacun jan ne, cuitjin xu cachja cha:

—Xcusun xi cavatju ngu me xi hmí rê Jesús camá, ngu me xi canduva tsêhê nandya Nasaret. Me vêhê ne, xi camá rê Nina cojo xi camá rê yêjê ni xuta ne, ngu profeta me, xi jemu tjin rê me ngahñu xi casahmi me yêjê ni xcusun xi casahmi me, hacuaha xi cavicuya me yêjê ni cjua xi cavicuya me. <sup>20</sup> Hacuaha nahmi xi matitjun cojo xutaxa rê yungun naja ne, casahmi me entregadu me vêhê cojo xutaxa rê Roma xi cueya me. Hane cuaha jain tjin cavetaha me xcun cru. <sup>21</sup> Ngayin ne, ha cavetihin tacuin xi me vêhê xi cuaxêtje naja me ngayejen ni ngayaan xuta tjê rê Israel. Cojo yêjê sa ne, quihndê ne, ha camá jyan nixtin cavatju xcusun xi cuacun vê. <sup>22</sup> Hacuaha ngujo yachjin tsêhê ladu niji ne, catsisca na cjuatacun niji, tsêhê xi xati sa nguitajñu ne, quiji xu na xcun tsjun, <sup>23</sup> hane xi casacuiin rê na nima ne, cafehe cachja na cojo niji xi cavêë na sacuaaha ángel ngajan, hane cachja cojo rê na xi me vêhê ne, tacun me cjuahñu. <sup>24</sup> Hya xi camá ne, ngujo cha xi siu cojo niji ne, quiji cha xcun tsjun jan, cavêë cha xi quixi jain cjua xi cachja na, peru me vêhê ne, cahviin cha me. —Cuatjin xu cachja cha cojo Jesús.

<sup>25</sup> Sehe ngajan xi Jesús ne, cuitjin xu cachja me cojo cha:

—Ngayun yuma hasen, ngayun xi jemu tafi sehe macajin nuju yêjê cjua xi cachja profeta. <sup>26</sup> ¿Hacuuiin hatuxa casahmi nguyêjê xi me xi catsingatju Nina ne, cuatjin cavatju me cjuañihi, sehe camajyê camahnga me cojo hasen ndajyihî rê me? —Cuatjin xu cachja Jesús.

<sup>27</sup> Hane sehe ngajan xi Jesús ne, casuacuenta xu me cha mé vijne yêjê ni cjua xi camahindu tsêhê me xcun yêjê ni xujun rê Nina, cavetsihin me cojo cjua xi catsihindu Moisés, hane cajnetaha me cojo hisca cjua xi catsihindu yêjê sa profeta.

<sup>28</sup> Hya xi camá ne, xi camatiña xu cha cojo Jesús nandya hiscan cjuí cha jan ne, Jesús ne, casahmi xu me sacua ha xi cjuendu ju sa me. <sup>29</sup> Peru cha xi cuacun jan ne, jercu cjin xu cachja cha cojo rē me cuitjin:

—Tinechun cojo niji ta quihndē ne, ha quiji hora hacua ha hisca meje cjuē nixtin. —Cuatjin xu cachja cha.

Ngajan xi Jesús ne, quiji xu me cojo cha, hane cavisehen me ndava cha xi cuejña me cojo cha. <sup>30</sup> Hane xi ha cafaha me cahndē rē me xcun maxē xi sinē me niñu cojo cha ne, sehe cafaha xu me ngu niñu, hane casua me nacuechji rē Nina, sehe cavatēlanga me, casua xu me cha. <sup>31</sup> Hane hora vèhē xu casua Nina cahndē xi camá cavēē cha xi hacui Jesús. Hya xi camá ne, ha tu ñahñu cafēya xu me. <sup>32</sup> Hane sehe cachja xu cha ngajñi rē cha cojo xicjin cha cuitjin:

—Jercu ndaja camahani camá rē xahasen naja, hora xi tichja me cojo naja ngajan ndiya jan mé vijne cjua xi hinchu xcun xujun rē Nina! —Cuatjin xu cachja cha cojo xicjin cha.

<sup>33</sup> Hane hora vèhē ni ne, cavisatjenhnga xu cha tsèhē maxē jan, sehe cavuya quiji cha Jerusalén. Hane xi cafehe cha jan ne, casacutsja xu cha me xi tengu jan, tjintangun me cojo me xi yahnga sa. <sup>34</sup> Hane sehe cachja xu me cojo cha cuitjin:

—Quixi jain xi cavuya Nai naja cjuahñu, hacua ha cha Simón ne, cavēē cha me. —Cuatjin xu cachja me.

<sup>35</sup> Ngajan xi cha xi cuacun jan ne, casuacuenda xu cha hacutjin cavatju cha camá ngajan ndiya, hacua ha hacutjin camá cavēē cha xi hacui Jesús hya xi cavatēlanga me niñu.

#### *Cafehe Jesucristu hiscan tjin tangu xuta ladu rē me*

<sup>36</sup> Hane tu tichja cuaha xu cha xi cuacun jan cojo me vèhē cjua jan ne, ha tu ñahñu cavēē xu yèjē me Jesús, secun me ngajñi rē me. Hane Jesús ne, cachja xu me nina cojo rē me cuitjin:

—Nina sua nuju me cjuandaja cjuajeya. —Cuatjin xu cachja me.

<sup>37</sup> Hane yèjē xuta ladu rē Jesús jan ne, jemu catsacjun camaha xu ni me camá tsèhē xi xi má rē me ne, tivutsejen me ngu hasen. <sup>38</sup> Ngajan xi Jesús ne, cachja xu me cuitjin:

—¿Mé má cuatjin jemu fircun nuju? Hacua ha ¿mé má cuatjin mangu majo tacún?

<sup>39</sup> Chutsujun ntsa cojo ntsacú ta ngahan vi. Nduvun tetuhun ntsun ná, hacua ha chutsujun ná ta ngu hasen ne, tsajin yojo rē hacua ha tsajin nínda rē sacuatjin chutsujun ná ngahan cojo yojo cojo nínda naha. —Cuatjin xu cachja Jesús.

<sup>40</sup> Hane xi cavatju cachja me cjua vèhē ne, sehe catsingacun xu me tsja me cojo ntsacu me. <sup>41</sup> Hane xuta ladu rē Jesús jan ne, hisca maji xu macjain rē me ngatsē rē xi jercu tu ndaja má camahani rē me hacua ha hisca fircun rē me. Ngajan xi Jesús ne, cavinenguise xu me xuta jan cuitjin:

—¿Há tjin nuju hitsē xi xinēē nguehe? —Cuatjin xu cavinenguise me.

<sup>42</sup> Hane ngu me jan ne, casua xu me ngu rquí ti camatsju. <sup>43</sup> Hane xi cafaha me ne, cajiñē xu me xcun yèjē ni xuta. <sup>44</sup> Sehe cachja xu me cuitjin:

—Yèjē xcusun xi cavátju camá ne, tsèhē vèhē cjua xi cachjá cojo nuju hya xi tejña cuaha ngajñi nuju. Cachjá cojo nuju ta hatuxa meje rē xi cuetjucaa yèjē hacutjin camahindu tsahan xcun xujun xi catsihindu Moisés cojo xcun xujun xi catsihindu profeta, cojo xcun xujun tsèhē Salmo. —Cuatjin xu cachja Jesús.

<sup>45</sup> Sehe ngajan xi Jesús ne, cavuxaha xu me cjuatacun rē xuta jan, cojo sa xi cuijnercu me cjua xi camahindu xcun xujun rē Nina. <sup>46</sup> Hacua ha cachja xu me cuitjin:

—Cuitjin camahindu xi me xi catsingatju Nina ne, hatuxa cuatju me cjuañihi, hane xi cjuē jyan nixtin xi cueya me ne, cuya nga me cjuahñu, <sup>47</sup> hacua ha sacú cumachaya rē yèjē ni xuta tsèhē ngasunhndē xi sá xi mangucacun me cojo me vèhē hacua ha tsindeya me cjuatacun rē me ne, tsinchataha Nina me tsèhē jyē rē me. Jerusalén vi ne, nguehe cuetsihin cuitsojo cjua vèhē. <sup>48</sup> Ngayun cuinújun cojo xuta cjua vihi ta ngayun xi cahyun hacutjin camá. <sup>49</sup> Chutsujun ni, ngahan tsingátju nuju Hasen xi ha cachja Nahmi naha xi sua nuju me. Peru ha tinechun ni nguehe nandya vihi hisca xi chjuhunntsun Hasen vèhē, xi cuinduva hisca ngahnga. —Cuatjin xu cachja Jesús.

#### *Quiji Jesucristu ngahnga*

<sup>50</sup> Hya xi camá ne, cavaxēxin xu Jesús xuta ladu rē me tsèhē nandya Jerusalén, quijicojo me me hisca nandya Betania. Hane xi cafehe me jan ne, catsiquijin xu Jesús tsja me hane catsinchacun me xuta jan. <sup>51</sup> Hane ngajñi rē xi titsinchacun me xuta jan ne, cavetjuxin xu me quiji me ngahnga. <sup>52</sup> Hane xuta ladu rē Jesús jan ne, xi cavatju cafarhacun me Jesús ne, sehe cavuya nga xu me Jerusalén cojo jemu jyē cjuasua. <sup>53</sup> Hacua ha nchunchujun ni quiji xu me yungun xi matitjun, vaxēndaja me Nina.

## Cjuandajyihî xi catsihindu San Juan Tsêhê Jesucristu

<sup>1</sup> Ntsacu cavetsihîn ngasunhndê ne, ha tacun ngu me xi hmî rê Cjua. Me vêhê ne, tacun me cojo Nina, hacuaha Nina me. <sup>2</sup> Me vêhê ne, hisca ntsacu cavetsihîn ne, ha cuatjîn tacun me cojo Nina. <sup>3</sup> Yêjê ni xi tjin ne, cojo me vêhê catsindaja Nina. Tsajin mé xi camandaja xi cuajin me vêhê camandaja. <sup>4</sup> Me vêhê xi hatuxa tjin rê me cjuahñu, hane cjuahñu vêhê ne, vêhê sua cjuahasen xi cuma rê xuta. <sup>5</sup> Hane cjuahasen vêhê ne, vitsojo ngajñi rê cjuatsehen sacuatjîn sahmi hasen ngu ndihî ngajñi jñú, peru cjuatsehen ne, cacaain rê catsicjê rê cjuahasen jan.

<sup>6</sup> Cavêjña ngu me xi hmî rê Juan, xi Nina catsingatju rê. <sup>7</sup> Me vêhê ne, cavetjuiñi me xi cuichja me cojo xuta hane tsinguixi me tsêhê cjuahasen jan, cojo sa xi ngatsê rê cjua xi cuichja me ne, cumacjain rê yêjê ni xuta. <sup>8</sup> Hacuini me vêhê xi cjuahasen jan me ta me vêhê ne, cavetjuiñi me cojo sa xi cuichja me tsêhê cjuahasen jan. <sup>9</sup> Cjuahasen xi cjuaquixi jan ne, xi visehen ngajñi rê cjuatacun rê yêjê xuta ne, sehe canduva nguehe ngasunhndê.

<sup>10</sup> Me xi hmî rê Cjua jan ne, cavêjña me ngasunhndê. Hacuaha handasa cojo me xi catsindaja Nina ngasunhndê ne, peru xuta ne, hvín me yo. <sup>11</sup> Canduva me ngasunhndê rê suvá me, peru xuta nangui rê suvá me ne, cafahatsjaain rê me. <sup>12</sup> Peru ngu jo xuta nangui rê me xi cafahatsja rê me hacuaha camangu cacun cojo rê me ne, me xi Cjua jan ne, casua me chuva rê xi cuma xuta xi cuacun jan quihndi rê Nina. <sup>13</sup> Xuta xi cuacun jan ne, hacuiin camá me quihndi rê Nina chuva rê xi meje rê ngu xihîn ngu quihndi ta suvá Nina casahmi me xi camá xuta xi cuacun jan quihndi rê me.

<sup>14</sup> Me xi Cjua jan ne, camá me ngu xuta, hacuaha cavêjñacahndê me ngajñi niji. Hatuxa quitsê rê xahasen rê me cjuandaja, quitsê rê xahasen rê me cjuaquixi. Ngayin ne, cahyin hacutjîn xi jemu jyê hnga me cojo hasen rê me. Jyê hnga me sacuatjîn casahmi rê me Nahmi rê me. <sup>15</sup> Juan Vitenda rê Xuta ne, cachja me cojo xuta tsêhê me xi Cjua jan, cuitjîn cachja me:

—Me vihi xi cachjá tsêhê, xi me xi sehe cuinduva ne, handasa ngahan canduvá titjun ne, peru me vêhê xi hitsê sa venguichji rê me xi cuma ná ngahan, tsêhê xi ha tacun me hya xi catsin ngahan.

<sup>16</sup> Tsêhê xi hatuxa jemu quitsê rê xahasen rê me cjuandaja ne, vêhê xi ngayejen ni ne, hacuaha jemu cachjahanntsán cjuandaja. <sup>17</sup> Ley rê Nina ne, nima Moisés casua naja me, peru cjuandaja cojo cjuaquixi ne, Jesucristu casua naja me. <sup>18</sup> Tsajin camahani yo xi cavêê rê Nina. Suvá ni Quihndi ngu rê Nina xi hacuaha nina me hacuaha tacun tangun me cojo Nina Nahmi naja ne, me vêhê casua me camachaya naja yo xi Nina.

### *Cjua xi cachja Juan Vitenda rê Xuta*

<sup>19</sup> Cuitjîn cachja Juan hya xi catsingatju xutaxa rê tsêhê nandya Jerusalén ngu jo nahmi cojo sacristán xi cjue cjuinenguise rê me Juan cuitjîn:

—Ngayun ne, ¿yo ngayun? —Cuatjîn cjuinenguise me. <sup>20</sup> Hane hora xi cuatjîn cavinenguise me ne, Juan ne, catsinguixi me, hacuiin cavetsanguî me, cuitjîn catsinguixi me:

—Hacuini ngahan Xihîn xi Tsingatju Nina. —Cuatjîn cachja me.

<sup>21</sup> Ngajan xi cavinenguise nga nahmi xi cuacun jan cuitjîn:

—¿Mé ni ní? ¿Há xutachanga naja Elias ngayun? —Cuatjîn cavinenguise me.

Ngajan xi Juan ne, cuitjîn cafayangui me:

—Hacuini ngahan. —Cuatjîn cafayangui me.

Ngajan xi cavinenguise nga nahmi xi cuacun jan cuitjîn:

—¿Há ngayun profeta xi jemu nechanyan rê? —Cuatjîn cavinenguise me.

Hane Juan ne, cuitjîn cafayangui nga me:

—Jéya. —Cuatjîn cafayangui nga me.

<sup>22</sup> Ngajan xi nahmi xi cuacun jan ne, cavinenguise nga me cuitjîn:

—¿Yo ngayun ní? Tinújun cojo niji ne, cojo sa xi cuma nicuyin ngu cjua tsêhê me xi catsingatju niji. ¿Mé nújun tsujun suvun? —Cuatjîn cachja me.

<sup>23</sup> Ngajan xi Juan ne, cuitjîn cafayangui me:

—Ngahan ne, xuta xi jercu hñu chjá nguehe hiscan jemu xín tsêhê nandya, xi catitsinguixi xuta ndiya tsêhê Nai naja, sacuatjîn cachja profeta Isaías hatsêê nixtin. —Cuatjîn cafayangui me.

<sup>24</sup> Quihndê ne, xuta xi cuacun catsingatju cha partidu fariseo xi cuichja me cojo Juan ne, <sup>25</sup> cuitjîn cavinenguise me:

—¿Mé má cuatjin vitendun xuta sa xi hacuiin ngayun xi Tsingatju Nina ngayun, hacuiin ngayun xi profeta Elías ngayun, hacuiin ngayun xi profeta xi jemu nechanyan rë ngayun ni? —Cuatjin cavinenguise me.

<sup>26</sup> Ngajan xi Juan ne, cuitjin cafayangui me:

—Ngahan ne, cojo nandá tiviténda nuju, peru ngajñi nuju secun ngu me xi hyúun yo. <sup>27</sup> Ngahan ne, canduvá titjun, sehe canduva me vëhë, peru hisca tsajin mé cumachjirëhë ngahan xi cuma rë me. —Cuatjin cafayangui Juan.

<sup>28</sup> Xcusun vëhë ne, camá ngajan ngu cahndé hiscan xi hmí Betania, ngunda vëhë tsëhë ndajyë Jordán, hiscan tivitenda Juan xuta.

*Jesucristu sacuaha chu tsánga xi sua Nina*

<sup>29</sup> Xi camá nchujun jan ne, cavëë Juan xi nduva Jesús hiscan secun me. Hane cuitjin cachja Juan cojo xuta:

—¡Chutsujun ni! Cuajyihí me xi sacuaha chu tsánga xi sua Nina xi tsicjé jyë rë xuta. <sup>30</sup> Me vëhë xi cachjá cojo nuju xi me xi sehe cuinduva. Handasa ngahan canduvá titjun ne, peru me vëhë xi hitsë sa venguichji rë me xi cuma ná ngahan, tsëhë xi ha tacun me hya xi catsin ngahan. <sup>31</sup> Ngahan suva ne, hveen yo me. Peru cojo sa xi ngayaan xuta tjë rë Israel cumachaya naja yo me ne, vëhë xi cuitjin tiviténda xuta. —Cuatjin cachja Juan.

<sup>32</sup> Hacuaha cachja Juan cuitjin tsëhë Jesús:

—Ngahan ne, cahvë Hasen rë Nina xi canduvajne tsëhë ngahnga sacuaha ngu paloma, quiji casesun rcu me. <sup>33</sup> Ngahan suva ne, hveen yo me, peru me xi cavitexa ná xi cuiténda xuta cojo nandá ne, cuitjin cachja me cojo ná: “Me xi che xi cuinduvajne Hasen naha cjue sesun rcu ne, me vëhë xi cuitenda me xuta cojo Hasen naha.” Cuatjin cachja Nina cojo ná. <sup>34</sup> Ngahan ne cahvë hacuaha cachjá cojo xuta xi me vëhë xi Quihndi rë Nina me. —Cuatjin cachja Juan.

*Me xi tjun tjun camá xuta ladu rë Jesucristu*

<sup>35</sup> Xi camá nchujun nga jan ne, secun Juan cojo jo xuta ladu rë me. <sup>36</sup> Hane xi cavëë Juan Jesús xi tivatju me jan ne, cachja me cuitjin:

—¡Chutsujun ni! Cuajyihí me xi sacuaha chu tsánga xi sua Nina. —Cuatjin cachja me.

<sup>37</sup> Xi cahndé jo xuta ladu rë Juan cjua jan ne, quijitjengui me Jesús. <sup>38</sup> Xi cavuya Jesús cavutsejen me xi cjuitjengui xuta jan me ne, sehe cavinenguise Jesús me cuitjin:

—¿Mé meje nuju ngayun? —Cuatjin cavinenguise me.

Ngajan xi xuta jan ne, cuitjin cafayangui me:

—Maestro, ¿jani nechun? —Cuatjin cavinenguise me.

<sup>39</sup> Ngajan xi Jesús ne, cuitjin cachja me cojo jo xuta jan:

—Nduvun chutsujun. —Cuatjin cachja me.

Hane xi quiji vutsejen xuta jan ne, sehe cavëë me hiscan véñña Jesús. Sacuaha chuya rë fane ñuju hora vëhë. Hane caviyuju me ngajan cojo Jesús nixtin hya.

<sup>40</sup> Ngu xuta ladu rë Juan xi cahndé sacuatjin cachja me hacuaha quijitjengui rë Jesús ne, hacui Andrés, me xi hntsë Simón Pedru. <sup>41</sup> Me vëhë titjun quiji jaha me hntsë me Simón, hane xi casacu rë me ne, cuitjin cachja me cojo:

—¡Cahyin Mesías! —Cuatjin cachja me. (Mesías ne, hacui cjua xi meje cuichja: Me xi Tsingatju Nina.)

<sup>42</sup> Hya xi camá ne, Andrés ne, quijicojo me Simón xicjin me ngajan hiscan tacun Jesús. Hane xi cafehe me jan ne, cavutsejenya Jesús xcun Simón ne, sehe cachja me cuitjin cojo rë me:

—Ngayun ne, Simón hmí nuju, peru chjuhunñuhu Cefas. —Cuatjin cachja Jesús. (Ñihi xi Cefas ne, tangun vijne cojo ñihi xi Pedru ta catsijo ni ne, ndyojo, meje cuichja.)

*Cavaxijin Jesucristu Felipe cojo Natanael*

<sup>43</sup> Hane xi camá nchujun jan ne, cavejña cacun Jesús xi cjue me ngu nandya tsëhë distrito Galilea. Chaja sa xi cjue me ne, cavechútaha me Felipe, hane cachja me cojo cuitjin:

—Nduvun, cuanguen cojo ná. —Cuatjin cachja me.

<sup>44</sup> Felipe ne, Betsaida nangui rë me, hiscan nangui rë Andrés cojo Pedru. <sup>45</sup> Hya xi camá ne, Felipe ne, quiji jaha me Natanael, hane xi casacu rë me ne, cachja me cuitjin:

—Cahyin ngu xuta Nasaret xi hmí rë Jesús, quihndi rë José. Me vëhë xi catsihindu Moisés cojo jingu sa profeta tsëhë, ngajan xcun xujun rë Nina. —Cuatjin cachja Felipe cojo Natanael.

<sup>46</sup> Ngajan xi Natanael ne, cavinenguise me cojo Felipe cuitjin:

—¡Ja! ¿Há cuma cuetjuiñi ngajan Nasaret ngu xuta xi jemu venguichji rë ni? —Cuatjin cavinenguise Natanael.

Ngajan xi cafayangui Felipe cuitjin:

—Ndove chutsijin ni. —Cuatjin cafayangui me.

<sup>47</sup> Hane xi cavëë Jesús xi camatiña Natanael ne, sehe cachja me cuitjin tsëhë:

—Chutsujun ni, cuajiyi ngu me xi xuta tjë rë Israel xi cjuaquixi jain, ngu me xi tsajin cjuandacha cahntsua xahasen rë. —Cuatjin cachja Jesús tsëhë Natanael.

<sup>48</sup> Ngajan xi Natanael ne, cuitjin cavinenguise me Jesús:

—¿Hacutjin má xi cuatjin hyun yo ngahan ni? —Cuatjin cavinenguise Natanael.

Ngajan xi Jesús ne, cuitjin cafayangui me:

—Chaja sa xi cuichja Felipe cojo nuju ne, ngahan ne, ha cahvë nuju hya xi sechun ngahma yaxujun jan. —Cuatjin cafayangui Jesús.

<sup>49</sup> Hane Natanael ne, cuitjin cachja me:

—Maestro, Ngayun xi Quihndi rë Nina ngayun, ngayun xi matitjun ngayun tsajan ngayaan xuta tjë rë Israel. —Cuatjin cachja Natanael.

<sup>50</sup> Ngajan xi Jesús ne, cachja me cuitjin:

—Ngayun ne, camangu tacün cojo ná, tsëhë xi cachjá xi cahvë nuju hya xi nechun ngahma ya higo jan. Peru sehe chutsujun sa xcusun xi cuetjucaa xi hitsë sa venguichji rë.

<sup>51</sup> Hacuaha cachja sa Jesús cju vihi:

—Cuichjá cojo nuju cjuaquixi ta ngayujun ni ne, cuechú nixtin xi chutsujun xi ngahnga ne, sacuaaha xi tixaha, hacuaaha ángel rë Nina ne, sacuaaha xi cjuinne cjuiniji hiscan tejña ngahan xi Quihndi rë Xuta Jain ngahan. —Cuatjin cachja Jesús.

## 2

### *Cjuavixan xi camá ngajan Caná*

<sup>1</sup> Hane xi cavatju jyan nixtin ne, camá ngu cjuavixan ngajan Caná, distritu Galilea. Naa rë Jesús ne, ngajan quitahá me ndava suhi. <sup>2</sup> Hacuaha Jesús cojo xuta ladu rë me ne, hacuaaha camá me invitar xi cjue me ndava suhi, hane quiji me. <sup>3</sup> Hya xi camá ne, café xan xi tsëhë suhi jan. Sehe ngajan xi naa rë Jesús ne, cuitjin cachja me cojo Jesús:

—Ha quihndë tsajin rë me xan ngeuhe. —Cuatjin cachja me.

<sup>4</sup> Ngajan xi Jesús ne, cuitjin cafayangui me:

—Hacuiin cuenda naha xi ngahan nújun cojo ná. Cjëë cuechú hora xi sahme mé xi sahme. —Cuatjin cafayangui Jesús.

<sup>5</sup> Ngajan xi naa rë Jesús ne, cuitjin cachja me cojo cha xi vincha xan jan:

—Tu mé ni xi cuichja cha cojo nuju ne, cuatjin nihñu. —Cuatjin cachja naa rë Jesús.

<sup>6</sup> Quihndë ne, siu ngajan jyun tiji xi ndoyojo camá, xi xincha nandá xi vitejnu xuta tjë rë Israel hitsë tu mé ni xcusun xi sahmixa me cojo, sacuatjin xi ha xcusun rë yungun rë me. Jima ngu tiji jan ne, xincha sacuaaha yachantë o sa jyanchantë litru nandá. <sup>7</sup> Ngajan xi cachja Jesús cojo cha xi vincha xan cuitjin:

—Ninguitsun rë tiji xi cuacun vë cojo nandá. —Cuatjin cachja me.

Ngajan xi cha xi cuacun jan ne, catsinguitsë camahani rë cha tiji jan cojo nandá.

<sup>8</sup> Hya xi camá ne, sehe cachja nga Jesús cuitjin cojo cha:

—Quihndë ne, chjuhun hitsë xi cavinchun tiji vë ne, tángun chanu rë xutacha. —Cuatjin cachja me.

Hane cuatjin casahmi cha xi cuacun jan. <sup>9</sup> Hya xi camá ne, cavutaha xutacha jan nandá xi camá xan jan. Me vëhë ne, hisca hvíin me jani canduva xan jan, peru cha xi vincha xan xi cafaha quijicojo jan ne, vëë cha. Ngajan xi xutacha jan ne, cajindaya me cha xutavixan jan ne, <sup>10</sup> sehe cachja me cojo cha cuitjin:

—Xcusun naja ne, titjun xan xi ndajiyi taan hvi xuta, hane ha xcun xi ha cjín cahvi me ne, sehe taan rë me xan xi ha vjihi. Peru ngaye ne, hisca ndicumaha ni titehe xan xi ndajiyi. —Cuatjin cachja xutacha jan.

<sup>11</sup> Cjuarcun xi tjun tjun casahmi Jesús vë ne, casahmi me ngajan Caná, distritu Galilea. Cuatjin catsingacun me xi jemu jyë hnga me cojo hasen rë me. Hane xuta ladu rë me ne, camangu cacun me cojo rë me.

<sup>12</sup> Xi cavatju vëhë ne, cavetju me quijijne me nandya Capernaum. Quiji me cojo naa rë me cojo xicjin me cojo xuta ladu rë me. Hane ngajan caviyujutaha me ngujo nixtin.

### *Cavaxë Jesucristu xuta xi sahmi ndetsin ndatsen yungun*

<sup>13</sup> Cavechú nixtin xi camatiña suhi xi hmí rë Pascua, ngu suhi xi sahmi xuta tjë rë Israel. Ngajan xi Jesús ne, quijinjini me ngajan nandya Jerusalén. <sup>14</sup> Hane xi cafehe me jan ne, quiji me yungun xi matitjun. Ngajan cavëë me xuta xi tiviteña chu ndyaja cojo chu tsánga cojo chu nisëtyava, hacuaaha cavëë me xuta xi siu titsindeya tujún tsëhë xuta cojo tujún rë yungun. <sup>15</sup> Hane xi cavëë Jesús xi cuatjin tisahmi xuta jan ne, cafaha me ngu nahñu xi jiña ne, casahmi me ngu cuarta, sehe catsicanga me yëjë ni chu xteña, sa ndyaja sa

tsánga. Hacuaha cacandi me tujún rë xuta xi tsindeya tujún, hacuaha catsindefa me maxë xi xinchasun tujún jan. <sup>16</sup> Hane xuta xi tiviteña chu nisëtyava jan ne, cuitjin cachja Jesús cojo rë me:

—Tángunxun cojo chu xi cuicun vi. Xicanihñuu ndava Nahmi naha sacuaaha ngu ndetsin. —Cuatjin cachja Jesús.

<sup>17</sup> Ngajan xi xuta ladu rë Jesús jan ne, catsinguitsjen me xi camahindu xcun xujun rë Nina cuitjin: “Ngayun Nina naha, xi jemu hmú cáacun camahani ndya nuju ne, ña sca má rë xahasen naha.” Cuatjin camáhindu.

<sup>18</sup> Ngajan xi xutaxa rë yungun jan ne, cuitjin cachja me:

—Quihndë ne, jjarë ngu cjuarcun xi nihñu cojo sa xi cumachaya nihi xi tjin jain nuju chuva rë xi cuatjin nihñu! —Cuatjin cachja me.

<sup>19</sup> Ngajan xi Jesús ne, cuitjin cafayangui me:

—Ninguetsun yungun vihi ne, cahntsua xi jyan nixtin ne, ngahan sahme ndaja nga. —Cuatjin cafayangui Jesús.

<sup>20</sup> Hane xutaxa rë yungun xi matitjun ne, cuitjin cachja nga me:

—Yachan jyun nu quiji cani rë xi camandaja yungun naja vi. Hane sehe ngayun nujún ne, jahntsua xi jyan nixtin ne, cuyun nindujun nga ni! —Cuatjin cachja xutaxa rë yungun jan.

<sup>21</sup> Peru Jesús ne, hya xi cachja me tsëhë yungun jan ne, tsëhë yojo rë suvá me xi cachja me.

<sup>22</sup> Vëhë xi hya xi cavuya Jesús cjuahñu ne, xuta ladu rë me ne, catsinguitsjen me xi cuatjin cachja Jesús, hane camacjain rë me cjua xi chja xujun rë Nina hacuaha camacjain rë me cjua xi cachja Jesús jan.

### *Vëë Jesucristu xahasen rë yëjë ni xuta*

<sup>23</sup> Jinguyëjë rë xi cuatjin quithá Jesús ngajan Jerusalén nixtin rë suhi tsëhë Pascua ne, jemu cjín xuta camangu cacun me cojo rë me, xi cavëë me cjuarcun xi Jesús tisahmi me.

<sup>24</sup> Peru suvá Jesús ne, camanguaain cacun me cojo xuta xi cuacun jan ta, tsëhë xi ha vëë me xahasen rë yëjë me xi cuacun vë. <sup>25</sup> Hacuaha cuatjin camanguaain cacun me cojo xuta jan ta, tsëhë xi hacuain sahmi nguyjë xi tjin yo xi cuichja cojo rë me tsëhë xuta ta, tsëhë xi ha vëë me mé cjua xi hinchahntsua xahasen rë xuta.

## 3

### *Cjuavisiajmi rë Jesucristu cojo Nicodemo*

<sup>1</sup> Cavëjña ngu xuta fariseo xi hmí rë Nicodemo. Me vëhë ne, ngu xuta matitjun me tsëhë ngajñi rë xuta tjë rë Israel. <sup>2</sup> Ngundiya jan ne, nguixun quiji cavisiajmi me cojo Jesús, hane cuitjin cachja me:

—Maestro, ngayin ne, hyin ta ngayun ne, ngu maestru xi Nina catsingatju rë. Cuatjin hyin ta, tsëhë xi tsajin yo xi cuma sahmi cjuarcun xi nihñu ngayun sa xi hacuain Nina visecoo rë. —Cuatjin cachja Nicodemo cojo Jesús.

<sup>3</sup> Ngajan xi Jesús ne, cuitjin cafayangui me:

—Cuichjá cojo nuju cjuaquixi ta sa xi ngu xuta tsiin me ngu ndiya nga ne, cumaji cuisehen me hiscan sahmi Nina gobiernu. —Cuatjin cafayangui Jesús.

<sup>4</sup> Hane Nicodemo ne, cavinenguise me Jesús cuitjin:

—¿Peru hacutjin cuma xi ngu xihin xi ha changá ne, cuya tsin nga ni? ¿Há cuma cuisehen nga cahntsua naa rë sehe tsin nga ngu ndiya? —Cuatjin cavinenguise Nicodemo.

<sup>5</sup> Ngajan xi Jesús ne, cuitjin cafayangui me:

—Cuichjá cojo nuju cjuaquixi ta hatuxa sahmi nguyjë xi cuisehen xuta ngu cjuahñu xatsë ngatsë rë nandá cojo ngatsë rë Hasen rë Nina ta, ha chuva rë vëhë ni xi cuma cuisehen me hiscan sahmi Nina gobiernu. <sup>6</sup> Hya xi ngu xuta tsin me ngatsë rë xutacha rë me ne, sacu rë me cjuahñu xi tsëhë ngasunhndë. Peru hya xi tsin me ngatsë rë Hasen rë Nina ne, sacu rë me cjuahñu xatsë xi tsëhë Nina. <sup>7</sup> Hacuain cjuercun nuju xi cuatjin cachjá cojo nuju xi mameje rë xi tsin nga ngayun ngu ndiya. <sup>8</sup> Tjo ne, hatuxa vanga hiscan meje rë, peru suva machaya naja xi vanga ta nuhya rë xi fane vanga, ta matsijin hiscan nduva o hiscan vechú. Hane xuta xi tsin me ngatsë rë Hasen rë Nina ne, tjin rë me sacuaaha tjo jan, ta tsin me ngu ndiya nga, peru matsijin hacutjin. —Cuatjin cafayangui Jesús.

<sup>9</sup> Ngajan xi Nicodemo ne, cuitjin cavinenguise me cojo Jesús:

—Peru ¿hacutjin cuma sacuatjin nújun vë ni?

<sup>10</sup> Hane Jesús ne, cuitjin cafayangui me:

—¿Hacutjin nga ne xi ngayun ne, maestru má ngayun tsëhë xuta tjë rë Israel, hane sehe hyúun mé vijne cjua xi cachjá cojo nuju vë ni? <sup>11</sup> Cuichjá cojo nuju cjuaquixi ta ngayin ne, nújin cjua xi hyin hacuaha nújin tsëhë xcusun xi cachutsijin, peru cjua xi nújin cojo nuju ne, mijí chjuhunntsun. <sup>12</sup> Sa xi camacjaain nuju hya xi cachjá cojo nuju cjua tsëhë xcusun



tsêhê ngasunhndê ne, ¿hacutjin cumacjain nuju sa xi cuichjá cojo nuju cjua tsêhê xcusun tsêhê ngahnga ni?

<sup>13</sup> Tsajin hisca ngu xuta xi quiji cavutsejen me hacutjin jyihî ngahnga sehe cavuya me xi sua cuenda nuju me. Suvá ni me xi ha tsêhê ngajan canduva me ne, me vêhê xi cuma sua cuenda nuju me, suvá ni me xi Quihndi rê Xuta Jain. <sup>14</sup> Chuva rê xi casahmi Moisés hatsêê nixtin xi cavunihnga me ngu quicha xcusun rê chu yê taha rê ngu ya ngajan ngu xín camahani jan ne, ha chuva vêhê ni ne, me xi Quihndi rê Xuta Jain ne, meje rê xi tjunihnga rê me taha rê ngu ya. <sup>15</sup> Cuatjin meje rê, cojo sa xi yêjê ni xuta xi cumangu cacun me cojo rê me vêhê ne, sacú rê me cjuahñu xatsê. —Cuatjin cafayangui Jesús tsêhê Nicodemo.

*Cjuahmutacun rê Nina cojo xuta*

<sup>16</sup> —Tsêhê xi jemu catsihmu cacun Nina xuta ne, hisca casua me Quihndi ngu rê me, cojo sa xi yêjê ni xuta xi cumangu cacun me cojo me vêhê ne, hacuiin cjue hasen rê me xcun cjuahñi ta sacú rê me cjuahñu xatsê xcun Nina. <sup>17</sup> Nina ne, catsingatju me Quihndi rê me ngeue ngasunhndê, peru hacuiin xi cjuahachuva rê xuta ngasunhndê ta xi cuaxêtje rê xuta.

<sup>18</sup> Xuta xi mangucacun cojo Quihndi rê Nina ne, hacuiin chjaháchuva rê me. Peru me xi hacuiin mangucacun cojo Quihndi rê Nina ne, ha cachjaháchuva rê me ta, tsêhê xi hacuiin mangucacun me cojo me xi Quihndi ngu rê Nina. <sup>19</sup> Hane cuitjin fahachuva Nina xuta ngasunhndê: Nina ne, ha catsingatju me Quihndi rê me ngasunhndê sacua ha ngu ndihî xi sua hasen rê. Peru xuta ne, hitsê sa cachuya rê me tsêhê jñu xi cuma rê hasen ta, tsêhê xi xcusun xi casahmi me ne, suvá cjuatsehen. <sup>20</sup> Yêjê ni xuta xi sahmi xcusun tsehen ne, hatuxa chuyiin rê me tsêhê hasen, hisca sahmitiñaai me hiscan xi hasen, sa tu sesunhnga xcusun xi sahmi me. <sup>21</sup> Peru xuta xi ndiya rê cjuaquixi xcusun xi sahmi me ne, sahmitiña me hiscan xi hasen, cojo sa xi sesunhnga xi xcusun xi sahmi me ne, vêhê xcusun xi meje rê Nina.

*Chja Juan Vitenda rê Xuta tsêhê Jesús*

<sup>22</sup> Hya xi camá ne, quiji Jesús cojo xuta ladu rê me ngajan nguijná tsêhê distritu Judea. Hane ngajan caviyujutahá cojo me xuta xi cuacun vê. Hane cavitenda me xuta. <sup>23</sup> Hacuaha ha nixtin hya ni ne, Juan Vitenda rê Xuta ne, tivitenda me xuta ngajan hiscan xi hmí rê Enón, tiña tsêhê Salim. Ngajan quitahá me ta, tsêhê xi ngajan ne, jemu yehe nandá tjin. Hane hacuaha quiji xuta caxtenda me. <sup>24</sup> Nixtin hya ne, cjêê cjue Juan jan ndavaya.

<sup>25</sup> Quihndê ne, ngujo xuta ladu rê Juan ne, cavetsihin ticjanjo cjua rê me cojo ngu xutaxa rê yungun tsêhê xcusun changá rê me xi ma tyjahi me xcun Nina. <sup>26</sup> Hya xi camá ne, quiji cachja me cojo Juan cuitjin:

—Maestro, ¿Há vitsjen nuju me xi casetaha cojo nuju ngunda vêhê tsêhê ndajyê Jordán, me xi canújun cojo nijî tsêhê jan? ¿Chutsujun ta hacuaha cojo me vêhê tivitenda me, hane yêjê ni xuta cjuitjengui rê me! —Cuatjin cachja xuta xi cuacun jan.

<sup>27</sup> Ngajan xi Juan ne, cuitjin cafayangui me:

—Tsajin mé xi sacú cjuahatsja ngu xuta sa xi Nina suaain rê me. <sup>28</sup> Ngayun suvun ne, ha canuhyun xi cachjá xi hacuiin ngahan Xihin xi Tsingatju Nina ta ngahan ne, cha xi catsingatju titjun Nina, sehe catsingatju Nina me vêhê. <sup>29</sup> Chutsujun ta na xutavixan ne, tsêhê cha xutavixan na. Peru ngu cha amigu ndaja rê cha xutavixan xi secun tivisiñuju cjua rê cha xutavixan jan ne, jercu ndama rê cha tsêhê cjua rê cha vêhê. Vêhê xi ngahan xi sacua ha cha amigu rê cha xutavixan vê ne, jercu tu ndaja camahani má ná. <sup>30</sup> Me vêhê ne, meje rê xi quihndê nga nhujun cuma jyê cuma hnga sa me cojo xa rê me, peru ngahan ne, hacuiin cuatjin ta xi meje rê ne, cuijnetaha xa naha. —Cuatjin cafayangui Juan.

*Me xi nduva tsêhê ngahnga*

<sup>31</sup> Me xi nduva tsêhê ngahnga ne, me vêhê xi hitsê sa jemu vengui chji rê me xi cuma rê yêjê xuta. Ngayaan xi tsêhê ngasunhndê ngayaan ne, ha xuta ngasunhndê ni ngayaan, hacuaha suvá cjuatacun rê ngasunhndê xi visiajme. Me xi nduva tsêhê ngahnga ne, me vêhê xi hitsê sa jemu vengui chji rê me xi cuma rê yêjê xuta. <sup>32</sup> Me vêhê ne, sua me machaya naja tsêhê xcusun xi cavêê me cojo tsêhê cjua xi cahndê me, peru xuta ne, fahatsjaain me cjua xi chja me vêhê. <sup>33</sup> Peru ngujo xuta ne, fahatsja me cjua rê me vêhê, hane cuatjin maquixi xi Nina ne, quixi jain me cojo cjua rê me. <sup>34</sup> Me xi Nina catsingatju rê ne, cjua rê Nina chja me ta, tsêhê xi Nina ne, hacuiin chuva hitsê sua me Hasen rê me. <sup>35</sup> Nina Nahmi naja ne, jemu hmu cacun me Quihndi Ngu rê me, hacuaha yêjê ni xcusun ne, cavejña me tsja Quihndi rê me jan. <sup>36</sup> Xuta xi mangucacun me cojo Quihndi rê Nina jan ne, tjin rê me cjuahñu xatsê. Peru xuta xi vihndiin me tsêhê Quihndi rê me jan ne, sacuiin rê me cjuahñu xatsê ta castigu rê Nina cuatju me cuma.

## 4

*Cjuavisiajmi rē Jesús cojo na samaritana*

<sup>1</sup> Quihndē ne, cha fariseo ne, camachaya rē cha xi Jesús ne, hitsē sa cjín jima xuta ladu rē me xi cuma rē xuta ladu rē Juan, hacuaha hitsē sa cjín xuta tivitenda me xi cuma rē xuta xi tivitenda Juan. <sup>2</sup> Peru súv Jesús ne, cavitendaain me ta xuta ladu rē me ne, me vèhē xi cavitenda me xuta. <sup>3</sup> Hane xi camachaya rē Jesús xi cuatjin camachaya rē cha fariseo xi cuacun vè ne, cavetjuxin me tsèhē distritu Judea. Hane cavuya quiji nga me ngu nandya tsèhē distritu Galilea.

<sup>4</sup> Hane ndiya xi cjui me jan ne, tjin xi cuatju me ngujo nandya tsèhē distritu Samaria.

<sup>5</sup> Hya xi camá ne, cafehe me ngu nandya tsèhē distritu Samaria xi hmí rē Sicar, ngu nandya xi tacun tiña tsèhē nangui xi casua Jacob quihndi rē me José jemu hatsèē camahani.

<sup>6</sup> Hane cahndē vèhē ne, tacun ngu ndava nandá xi casahmi Jacob. Hane tsèhē xi jemu cafenda rē Jesús tsèhē ndiya xi nduva me ne, quiji me cavéjña me hiscan ndava nandá jan. Sacuaha chuva rē nchisen xi cafehe me jan.

<sup>7</sup> Hora vèhē ne, canduva ngu na samaritana, canduva jaha na nandá. Hane cuitjin cachja Jesús cojo rē na:

—Tuhun hitsē nandá cuèhē. —Cuatjin cachja me.

<sup>8</sup> Hora vèhē ne, tsajin xuta ladu rē Jesús ta nandya quiji me xi cuatsē me xi sinē me cojo Jesús. <sup>9</sup> Ngajan xi na samaritana jan ne, cuitjin cachja na cojo Jesús:

—Ngayun xi xuta tjē rē Israel ngayun ne, ¿hacutjin má xi tichjahyun ná nandá, ngahan xi na samaritana ngahan ni? —(Cuatjin cachja na ta, tsèhē xi xuta tjē rē Israel ne, hatuxa tsinguisihinjñi me cojo xuta samaritana.) <sup>10</sup> Ngajan xi Jesús ne, cuitjin cafayangui me tsèhē na:

—Sa xi ngayun hyun cjuatjo xi Nina sua me hacuaha hyun yo ngahan xi tifehya nuju nandá ne, ngahan cachjahyun ná nandá, hane ngahan casuá nuju nandá xi sua cjuahñu. —Cuatjin cafayangui Jesús.

<sup>11</sup> Hane na vèhē ne, cuitjin cachja na:

—Tatá, peru ndava nandá vi ne, jemu nungun, hane tsajin quichuhun mé xi naxun cojo nandá. ¿Jani naxun nandá xi sua cjuahñu vè ni? <sup>12</sup> Xutachanga naja Jacob casua niiji me ndava nandá vi. Hacuaha cojo me cojo quihndi rē me cojo chu rē me cahvi me nandá tsèhē ndava nandá vihi. ¡Ja! Peru ¿há hitsē sa matitjun ngayun xi cuma rē me vèhē ni? —Cuatjin cachja na.

<sup>13</sup> Hane xi cafayangui Jesús ne, cuitjin cachja me cojo rē na:

—Yèjē ni xuta xi hvi me nandá vihi ne, cuma xinda nga rē me. <sup>14</sup> Peru xuta xi cuihi me nandá xi suá ngahan ne, hatuxa ha quihndē tsajin nu tsajin nixtin xi cuya cumaxinda nga rē me ta nandá xi suá ngahan ne, cuma sacuaha ngu nandá xi ña vangatē xi sua rē me cjuahñu xatsē. —Cuatjin cachja me.

<sup>15</sup> Ngajan xi na vèhē ne, cuitjin cachja na cojo Jesús:

—Tatá, tuhun ná hitsē nandá xi nújun vè, cojo sa xi cumaxindaain ná hacuaha ha quihndē cuinduvaan jaha nandá. —Cuatjin cachja na.

<sup>16</sup> Hane Jesús ne, cuitjin cachja me cojo rē na:

—Tángun chjuhun xihin nuju, sehe nduvuncujun me nguehe. —Cuatjin cachja me.

<sup>17</sup> Ngajan xi na vèhē ne, cuitjin cafayangui na:

—Tsajin xihin naha. —Cuatjin cafayangui na.

Hane cuitjin cachja Jesús cojo rē na:

—Ndaja nújun xi tsajin xihin nuju ta <sup>18</sup> hñú cha xi cavinechuncujun, hane cha xi nechuncujun quihndē ne, hacuain xihin nuju cha. Canújun cjuaquixi. —Cuatjin cachja Jesús cojo rē na.

<sup>19</sup> Ngajan xi na vèhē ne, cuitjin cafayangui na:

—Tatá. Xi má ná ne, ngayun ne, ngu profeta ngayun. <sup>20</sup> Xutachanga niiji ne, nguehe ndetjún vihi canduva cafaharcun me Nina. Hane ngayujun ni xuta nangui rē Israel ne, nújun ta Jerusalén ne, ngajan tacun cahndē xi meje rē xi cjue chjahárcun rē Nina. —Cuatjin cafayangui na.

<sup>21</sup> Ngajan xi cachja Jesús cojo rē na cjuah vihi:

—Ngayun chjuun, catamacjain nuju cjuah xi cuichjá vi: cuechú nixtin xi hacuain ndetjún vihi hacuain Jerusalén chjuhuncun Nina Nahmi naja. <sup>22</sup> Ngayun xuta samaritano ne, chjuhuncun Nina, peru hyuun me xi ndandaja. Ngayin ne, ha hyinndijin Nina ta, tsèhē xi me xi cuaxètje rē xuta ne, cuetjújñi me ngajñi niiji ngayin xuta nangui Israel. <sup>23</sup> Cuechú nixtin o ha hisca cavechú nixtin xi xuta xi cjuaquixi xi faharcun me Nina Nahmi naja ne, Hasen rē Nina cuisecoo rē me xi cjuaharcun me Nina cojo cjuaquixi. Ha cjuaquixi ta xuta xi cuatjin sahmi me ne, me vèhē xi meje rē Nina Nahmi naja xi cjuaharcun rē me. <sup>24</sup> Nina

ne, Hasen me. Hane xuta xi faharcun rë me ne, hatuxa meje rë xi Hasen rë Nina cuisecoo rë me xi cjuaharcun me Nina cojo cjuaquixi. —Cuatjin cachja Jesús.

<sup>25</sup> Hane chjuun jan ne, cuitjin cachja na cojo Jesús:

—Ngahan ne, ha hvë xi cuinduva Me xi Tsingatju Nina, me xi hmí rë Cristu. Hane hya xi cuinduva me vëhë ne, suacuenda naja me yëjë ni cjuatacun. —Cuatjin cachja na.

<sup>26</sup> Ngajan xi Jesús ne, cuitjin cachja me cojo rë na:

—Ngahan xi tichjá cojo nuju vi ne, ha ngahan xi nújun vë. —Cuatjin cachja me.

<sup>27</sup> Hane hora vëhë cavuya xuta ladu rë Jesús xi quiji jaha me comida. Hane jemu quijircun rë me xi cavëë me xi visiajmi Jesús cojo rë ngu chjuun. Peru hisca ngu me xi cuacun vë cavinenguisiin me cuitjin: “¿Mé xi meje nuju?” o “¿mé xi visiajmu cojo rë na?” Cuatjin camá. <sup>28</sup> Chjuun jan ne, cavejña na nisa rë na, sehe cavuya quiji na nandya, hane cuitjin cachja na cojo xuta:

<sup>29</sup> —Nduvun cuanguen chutsejen ngu me xi cachja cojo ná yëjë xcusun xi casahme. ¿Hacuiin hacui me vëhë xi Tsingatju Nina? —Cuatjin cachja na.

<sup>30</sup> Hya xi camá ne, cavejtu xuta quiji me cojo rë na hiscan quitahá Jesús. <sup>31</sup> Jingu yëjë rë ne, xuta ladu rë Jesús jan ne, cuitjin cachja me:

—Maestro, xinu niñu. —Cuatjin cachja me.

<sup>32</sup> Peru Jesús ne, cuitjin cafayangui me:

—Ngahan ne, ha tjin xi sínë xi ngayun ne, hyúun mé jan. —Cuatjin cafayangui me.

<sup>33</sup> Ngajan xi xuta ladu rë Jesús jan ne, cuitjin cavinenguisse xicjin me xingu xingu me:

—¿Há cuma cacun sa xi tjin yo xi cafehe cani xi cajinë me? —Cuatjin cavinenguisse xicjin me.

<sup>34</sup> Hane Jesús ne, cuitjin cachja me cojo xuta ladu rë me jan:

—Jemu chuya rë xahasen naja xi chinë niñu. Peru ngahan ne, hitsë sa chuya rë xahasen naha xi sahme sacuatjin meje rë me xi catsingatju ná, hacuaha hitsë sa chuya rë xahasen naha xi tsingujñetaha xa xi casua ná me. <sup>35</sup> Chja ngu cjuata: “Chaja sa ñuju sá, sehe tjunihnga rë xitjë.” Peru ngahan cuichjá cojo nuju ta chutsujun xuta ta, tsëhë xi tangun me cojo xitjë xi ha camacha, ha cuma tjunihnga rë. <sup>36</sup> Me xi tivunihnga xitjë ne, ha tifaha me chji rë me, cuma cuinújan ne, tisahmi tangun me xuta xi sacú rë xuta xi cuacun vë cjuahñu xatsë. Cuatjin tijima cojo sa xi tangun cuiyujusua me xi vincha tjë cojo me xi vunihnga xitjë. <sup>37</sup> Quixi cjuata xi chja xi: “Hacjahi cha xi vincha tjë ne, hacjahi cha xi vunihnga xitjë.” <sup>38</sup> Ngahan catsingátju nuju chunihngun xitjë hiscan xi hacuiin ngayun canihñu xa. Jingusa me casahmi me xa, hane ngayun cavisuhunñu ngajña rë xa rë me. —Cuatjin cachja Jesús cojo xuta ladu rë me.

<sup>39</sup> Jemu cjin xuta samaritano tsëhë nandya jan camangu cacun me cojo Jesús, ngatsë rë cjuata xi cachja chjuun jan cuitjin: “Cachja me cojo ná yëjë xcusun xi casahme.” <sup>40</sup> Ngajan xi hya xi cafehe xuta samaritano ngajan hiscan quitahá Jesús ne, cachja xuta jan cojo rë me xi cjue cuejña me cojo rë me. Hane Jesús ne, quiji cavéjña me jo nixtin cojo xuta xi cuacun jan. <sup>41</sup> Hane jemu cjin sa xuta xi camangu cacun me ngatsë rë cjuata rë súvá Jesús. <sup>42</sup> Hane chjuun jan ne, cuitjin cachja xuta jan cojo rë na:

—Ha quihndë hacuiin ngatsë rë cjuata riji xi mangutacuin ta, tsëhë xi suvin canuhyin cjuata rë me, hane ngayin ne, hyin ta cjuaquixindaja xi me vihi xi cuaxëtje me xuta. —Cuatjin cachja xuta jan.

#### *Camandaja quihndi rë ngu xutaxa rë casahmi Jesús*

<sup>43</sup> Xi cavatju jo nixtin jan ne, cavejtu Jesús cojo xuta ladu rë me, quiji me ngu nandya tsëhë distritu Galilea. <sup>44</sup> Ta súvá Jesús cachja me xi quixi xi xuta ne, faharcuaain me profeta xi tsëhë nangui rë me. <sup>45</sup> Vëhë xi hya xi tivatju Jesús ngujo nandya tsëhë distritu Galilea ne, ndaja cafahatsja xuta me ta, tsëhë xi hacuaha cojo xuta jan quiji me suhi ngajan Jerusalén, hane ngajan cavëë me yëjë xcusun xi casahmi Jesús nixtin rë suhi jan.

<sup>46</sup> Hya xi camá ne, cavuya cafehe me Caná, ngu nandya tsëhë distritu Galilea, hiscan xi casahmi me xi nandá ne, cavuya camá xan rë uva. Hane ngajan nandya Capernaum ne, cavéjña ngu xutaxa rë xi hmu rë cha quihndi rë me. <sup>47</sup> Hane xi camachaya rë me xi cafehe Jesús ngajan Caná ne, cavejtu me quijitjengui me Jesús. Hane xi cafehe me jan ne, cafehya me favor cojo Jesús xi cjue Jesús cojo rë me nangui rë me xi sahmi Jesús xi cumandaja quihndi rë me ta ha tu hora sa xi cueya. <sup>48</sup> Ngajan xi Jesús ne, cachja me cuitjin cojo xutaxa rë jan:

—¡Ngayujun ni ngayun ne, sa xi chuun cjuarcun ne, cumanguaain camahani tacún cojo ná! —Cuatjin cachja Jesús.

<sup>49</sup> Ngajan xi xutaxa rë jan ne, cuitjin cafayangui me:

—Tatá, cuanguen sanií, chaja sa xi cueya quihndi naha. —Cuatjin cafayangui me.

<sup>50</sup> Hane Jesús ne, cuitjin cachja me:

—Cuma cuangun ta, quihndi nuju ne, jimandaja cha. —Cuatjin cachja Jesús.

Hya xi camá ne, xutaxa rë jan ne, camacjain rë me cja xi cachja Jesús, hane cavetju me quiji me. <sup>51</sup>Hane ndiya cjuí me ne, cavechútáha me ngujo cha mosu hndixahan rë me, hane cachja cha cojo rë me xi cha quihndi rë me ne, tijimandaja cha. <sup>52</sup>Ngajan xi xutaxa rë jan ne, cavinenguisse me cojo cha hndixahan rë me jan mé hora cavetsihin camandaja cha hmu rë jan. Hane cha hndixahan rë me jan ne, cuitjin cachja cha:

—Ngujña fane ngu cavetjuxin chíhinsüé xi sahmi cojo cha. —Cuatjin cachja cha.

<sup>53</sup>Hane nahmi rë quihndi jan ne, ha vëé me ta hora vëhé xi cachja Jesús cojo rë me xi quihndi rë me ne, tijimandaja cha. Cuatjin camá xi xutaxa rë jan cojo yëjë xuta rë me ne, camangu cacun me cojo Jesús.

<sup>54</sup>Cuatjin camá xi, hya xi cavetju Jesús tsëhé ladu rë distritu Judea hane cafehe me Caná, distritu Galilea ne, casahmi me cjuarcun xi majo xi casahmi me ngajan.

## 5

### *Ndava nandá xi hmí rë Betesda*

<sup>1</sup>Xi cavatju nixtin xi cuacun vë ne, quiji Jesús ngajan Jerusalén xi cjue me suhi xi cuma ngajan yungun xi matitjun.

<sup>2</sup>Quihndé ne, ngajan Jerusalén ne, tiña tingotjo Chu Tsánga ne, ngajan tacun ngu ndava nandá xi tjin rë hñú cahndé ngahma ndihya. Hane ndava nandá vëhé ne, xi hne hebreo ne, Betesda hmí rë. <sup>3</sup>Cahndé jan ne, jemu cjin xuta siuhmu me. Siu xuta rcá, siu xuta rengun, siu xuta xi quixihñu yojo rë xi tacunya rë me xi cuiniya nandan <sup>4</sup>ta jiya hora jiya hora ne, finiya nandan ta ngu ángel ne, vijne tsiniya nandan jan. Sehe cha xi tjun cuisehen ne, marqui rë tsëhé chíhin xi má rë. <sup>5</sup>Hane ngajñi rë xuta hmu rë xi cuacun jan ne, jiña ngu cha xi ha tjin rë can tyjuhunjyan nu xi hmu rë cha. <sup>6</sup>Hane xi cavëé Jesús xi cuatjin jiña cha hacuaha ha vëé me xi ha jemu tsëé hmu rë cha ne, cavinenguisse me cha cuitjin:

—¿Há meje nuju xi cuma ndaja ngayun? —Cuatjin cavinenguisse Jesús.

<sup>7</sup>Hane cha hmu rë jan ne, cuitjin cafayangui cha:

—Tatá, tsajin yo xi tsingusehen ná ndava nandá hora xi finiya nandá. Jinguyëjë rë xi tifé tiña ne, hacjahi me xi ha cavisehen. —Cuatjin cafayangui cha.

<sup>8</sup>Ngajan xi Jesús ne, cuitjin cachja me cojo cha:

—Tisatjunhngun, chjuhun nijña nuju, sehe tujyuhunyun. —Cuatjin cachja Jesús.

<sup>9</sup>Cha vëhé ne, ha tu ñahñu camandaja cha, cafaha cha nijña rë cha, cavetsihin catsujyihya cha.

Nixtin vëhé ne, nixtin xi chjahájenda rë. <sup>10</sup>Ngajan xi xutaxa rë yungun ne, cachja me cojo cha xi camandaja jan cuitjin:

—Quihndé ne, nixtin xi chjahájenda rë. Ndajintjin xi cuatjin quichehe nijña riji. —Cuatjin cachja me.

<sup>11</sup>Hane cha xi camandaja jan ne, cuitjin cafayangui cha:

—Me xi casahmi xi camandaja ngahan ne, me vëhé cachja me cojo ná xi cjuahá nijña naha sehe tsujyëhéya. —Cuatjin cachja cha.

<sup>12</sup>Ngajan xi xutaxa rë jan ne, cavinenguisse nga me cuitjin:

—¿Hane yo xi cachja cojo ri xi chjehe nijña riji ne, sehe tujyihye? —Cuatjin cavinenguisse me.

<sup>13</sup>Peru cha xi camandaja jan ne, hvín cha yo ta, tsëhé xi Jesús ne, cavetjuxin me tsëhé cahndé vëhé, tsëhé xi jemu xutacjin quitsé me.

<sup>14</sup>Hane xi cavatju vëhé ne, cavechútáha Jesús cha ngajan yungun xi matitjun, hane cachja me cojo cha cuitjin:

—Chutsujun ni, camandaja ngayun. Quihndé ne, xicavinechunyuun sa ndiya rë cjuatsehen, sa tu choho sa cuatjun cuma. —Cuatjin cachja Jesús cojo cha.

<sup>15</sup>Sehe cavetju cha quiji cachja cha cojo xutaxa rë ta me xi casahmi xi camandaja cha ne, Jesús. <sup>16</sup>Vëhé xi xutaxa rë jan ne, tsujyihyatjengui me Jesús cojo cjuahngatacun ta, tsëhé xi casahmi Jesús xcusun vëhé nixtin xi chjahájenda rë. <sup>17</sup>Ngajan xi Jesús ne, cuitjin cachja me cojo xutaxa rë jan:

—Nahmi naha ne, hisca quihndé tisahmi me xa, hacuaha ngahan ne, tisahme xa. —Cuatjin cachja Jesús.

<sup>18</sup>Ngatsé rë cjuá vëhé ne, xutaxa rë jan ne, hitsé sa cavangui me chuva rë xi tsiquehen me Jesús. Cuatjin casahmi xutaxa rë ta, tsëhé xi hacuain suvá ni cafaharcuaain Jesús nixtin xi chjahájenda rë ta hacuaha cachja me xi Nahmi rë me ne, Nina. Hane xi cuatjin cachja Jesús ne, tsingacun me xi tangun me cojo Nina.

### *Xa xi tjin rë Quihndi rë Nina*

<sup>19</sup>Ngajan xi Jesús ne, cuitjin cachja me cojo xutaxa rë xi cuacun jan:

—Cuichjá cojo nuju cjuaquixi ta ngahan xi Quihndi rë Nina ngahan ne, tsajin mé xi cuma sahme xi cojo cjuatacun naha suva ta xi vutsején xi sahmi Nahmi naha ne, vëhë xi sahme. Xcusun xi sahmi me vëhë ne, hacuaha xcusun vëhë sahme ngahan Quihndi rë me. <sup>20</sup> Nahmi naha ne, hmu cacun ná me, ngahan Quihndi rë me, hacuaha tsingacun ná me yëjë xcusun xi sahmi me. Hane xcusun xi sehe tsingacun ná me ne, hisca yehe sa xi cuma rë xcusun xi casahme xi camandaja cha hmu rë jan. Cuatjin cuma cojo sa xi ngayun ne, cjuercun nuju. <sup>21</sup> Sacuatjin faha Nahmi naha nima sehe sua nga rë me cjuahñu ne, hacuanitjin ni ngahan Quihndi rë me ta suá rë cjuahñu yo xi meje suá rë. <sup>22</sup> Nahmi naha ne, tsajin yo tsichuva me cojo cjuatacun rë ta ntsa ngahan cavejña me yëjë xa vëhë, <sup>23</sup> cojo sa xi yëjë ni xuta ne, cjuaharcun me ngahan sacuatjin faharcun me Nahmi naha. Yo xi cjuaharcuaain ná ngahan ne, faharcuaain rë Nahmi naha, me xi catsingatju ná.

<sup>24</sup> Cuichjá cojo nuju cjuaquixi ta xuta xi vihndë me cjuaxi chjá hacuaha mangucacun me cojo rë Nina, me xi catsingatju ná ne, tjin rë me cjuahñu xatsë. Hacuaha cumachuvaain me cojo cjuatacun rë me ta sacuaha xi ha cahme me hacuaha ha casacu rë me cjuahñu xatsë. <sup>25</sup> Cuichjá cojo nuju cjuaquixi ta cuechú nixtin o ha hisca cavechú nixtin xi xuta xi hndiin tsëhë Nina sacuaha nima ne, cuihndë me xta naha, ngahan xi Quihndi rë Nina ngahan. Hane me xi cuihndë tsahan ne, sacú rë me cjuahñu xatsë. <sup>26</sup> Cjuahñu xi tjin rë Nina ne, tsajin yo casua rë me, ta nduva tsëhë cjuandaja rë suva me. Hane hacuanitjin ná ngahan, ta casua ná cahndë xi hacuaha tjin ná cjuahñu tsëhë cjuandaja rë suvá. <sup>27</sup> Hacuaha casua ná me xa xi tsichúva xuta cojo jyë rë me ta, tsëhë xi ngahan ne, Quihndi rë Xuta Jain ngahan. <sup>28</sup> Hacuain cjuercun nuju tsëhë cjuaxi naha. Cuechú nixtin xi yëjë ni nima xi hincha cahntsua tsjun rë ne, cuihndë xta naha, <sup>29</sup> sehe cuetju tsëhë tsjun rë. Hane nima xi ndaja xcusun casahmi xcun cjuahñu rë ne, sacú rë cjuahñu xatsë. Hane nima xi choho xcusun casahmi ne, cuatju castigu. <sup>30</sup> Ngahan ne, hatuxa tsajin mé xi sahme xi cojo cjuatacun naha suva ta, sacuatjin cjuaxi vihndë xi chja Nahmi naha ne, cuatjin tsichúva xuta cojo cjuatacun rë me. Hane hatuxa quixi ngahan cojo cjuatacun naha ta, tsëhë xi sahme hacutjin xi meje ná suva ta sacuatjin xi meje rë Nahmi naha, me xi catsingatju ná ne, cuatjin xi sahme. —Cuatjin cachja Jesús.

#### *Hacutjin cumachaya naja yo xi Jesucristu*

<sup>31</sup> Cjuinduju sa tichja Jesús cojo xutaxa rë yungun cuitjin:  
—Sa xi ngahan cuichjá favor naha suva ne, cuinújun ta quixiin cjuaxi chjá. <sup>32</sup> Peru tjin sa ngu xi tichja favor naha, hane hvë ta cjuaxi chja me vëhë tsahan ne, cjuaquixi. <sup>33</sup> Ngayun ne, caningatjun xuta quiji cavinenguise rë me Juan ngu cjuaxi, hane Juan ne, catsicuya me cjuaxi cjuaquixi. <sup>34</sup> Peru ngahan ne, me xi tichja me favor naha hacuain xuta me, peru cjuaxi tichjá vi ne, tichjá cojo sa xi ngayun ne, cuetjuntjun. <sup>35</sup> Juan vë ne, sacuaha ngu ndihi xi seti xi sua hasen rë camá me. Hane ngayun ne, cachuya nuju tsëhë xi cavinechun sua ngujo nixtin ngajñi rë cjuahasen rë Juan. <sup>36</sup> Peru ngahan ne, tjin xcusun xi hitsë sa ndaja tsingacun yo ngahan xi cuma rë cjuaxi cachja Juan tsahan. Xa xi casua Nahmi naha ngahan xi sahmechehen ne, cuma cuinújun ne, xa xi ha tsahme ne, suvá xa vëhë tsingacun xi Nahmi naha catsingatju ná me. <sup>37</sup> Hacuaha Nahmi naha, me xi catsingatju ná ne, chja me favor naha. Ngayun ne, hisca xta rë me cjëë cuinuhyun, hacuaha cjëë chun hacutjin jyihni me. <sup>38</sup> Hisca cjuaxi rë me ne, tsajin tetjo ngajñi rë cjuatacun nuju ta, tsëhë xi ngahan xi catsingatju ná me vëhë ne, manguaain tacún cojo ná. <sup>39</sup> Ngayun ne, jemu chutayun xujun rë Nina ta, tsëhë xi ningatuhun tacún ta xi cuatjin chutayun ne, sacú nuju cjuahñu xatsë. Hane xujun vëhë ne, vëhë xi chja favor naha. <sup>40</sup> Hane ngayun ne, mijí cuisuhun ladu naha xi sacú nuju cjuahñu xatsë.

<sup>41</sup> Ngahan ne, hacuain sahmi nguyjë xi xuta sahmi jyë sahmi hnga ná me. <sup>42</sup> Hacuaha ngahan ne, ha hvë xcusun nuju ta tsajin cjuahmutacun rë Nina jiya cahntsua xahasen nuju. <sup>43</sup> Ngahan ne, canduvé ta, tsëhë xi Nahmi naha casuaxa ná me, peru ngayun ne, mijí chjuhunntsun ná. Hane sa xi jingu sa xuta cuinduva me cojo cjuatacun rë suvá me ne, ha hvë ta me vëhë ne, hatuxa chjuhunntsun me. <sup>44</sup> Tsajin nixtin xi cumangu tacún cojo ná ngahan jinguyjëjë rë xi tivinchun chuva rë xi ngajñi nuju cojo xingun ni ne, sahmi yehe sahmi hnga nuju me hane vinchunsuun xi Nina xi ngu tu tu ni ne, me vëhë sahmi yehe sahmi hnga nuju me. <sup>45</sup> Xicaningatun tacún xi ngahan cuincha jyë nuju xcun Nahmi naha ta xutachanga naja Moisés, me xi jemu vetuhun tacun ne, me vëhë xi cuincha jyë nuju me. <sup>46</sup> Sa xi camacjain nuju cjuaxi catsihindu Moisés ne, hacuaha camacjain nuju cjuaxi naha ta Moisés vë catsihindu me tsahan. <sup>47</sup> Peru sa xi macjaain nuju cjuaxi catsihindu Moisés ne, ¿hacutjin cumacjain nuju cjuaxi chjá ngahan ni?

## 6

<sup>1</sup> Xi cavatju yějě xcusun vèhè ne, cavetju Jesús quiji me ngunda vèhè tsèhè laguna Galilea, xi hacuaha hmí rē laguna Tiberias. <sup>2</sup> Hane jemu xutacjín camahani xi quijitjengui me Jesús ta, tsèhè xi cavèè me cjuarcun xi casahmi Jesús cojo xuta hmu rē. <sup>3</sup> Hane Jesús ne, quijiniiji me ngu ndetjún, hane ngajan cavéjña me cojo xuta ladu rē me. <sup>4</sup> Hane Pascua, suhi xi sahmi xuta tjě rē Israel ne, hacuaha ha camatiña. <sup>5</sup> Hane xi vutsejen Jesús xi jemu xuta cjin nduvatjengui rē me ne, sehe cachja me cojo Felipe cuitjin:

—¿Jani cuanguen chaan niñu xi sinè xuta xi cuacun vè? —Cuatjin cachja Jesús.

<sup>6</sup> Cuatjin cachja me xi cjuahachuva me Felipe ta, tsèhè xi Jesús ne, ha vèè me mé xi sahmi me. <sup>7</sup> Ngajan xi Felipe ne, cuitjin cafayangui me:

—Sa xi chaan niñu cojo tujún xi chji rē xuta jo cientu nixtin ne, hisca chutaain xi sacú tsè tsè sinè jima ngu xuta vè. —Cuatjin cafayangui Felipe.

<sup>8</sup> Ngajan xi ngu xuta ladu rē Jesús, Andrés hntse Simón Pedru ne, cuitjin cachja me cojo Jesús:

<sup>9</sup>—Nguehe secun ngu cha lihndi xi yaha hñú niñu cojo jo chu ti. Peru ¿mé chutaha vè xi sinè xuta xi cuarcumu cjin me? —Cuatjin cachja Andrés.

<sup>10</sup> Ngajan xi Jesús ne, cuitjin cachja me:

—Tinújun cojo xuta vè ne, catiyuju me. —Cuatjin cachja me.

Quihndè ne, ngajan cahndè vèhè ne, jemu jyè cahndè tjin ndiji. Hya xi camá ne, ngajan caviyuju sacuaha hñú mil xihin. <sup>11</sup> Ngajan xi Jesús ne, cafaha me niñu jan, hane, xi café casua me nacuechji rē Nina ne, sehe cavatècja me niñu jan ngajñi rē xuta xi siu jan. Hacuanitjin ni casahmi me cojo chu ti jan. Casua me ha tucutjin xi meje sinè xuta jan. <sup>12</sup> Hane hya xi ha catsè rē xuta xi cajinè me ne, sehe cachja Jesús cojo xuta ladu rē me jan cuitjin:

—Quihndè ne, chjayun yějě xi cavángui vè ne, cojo sa xi hacuiin chajá hisca hitsè. —Cuatjin cachja Jesús.

<sup>13</sup> Hane xi cafaya xuta ladu rē Jesús yějě ni xi cavángui tsèhè hñú niñu xi cajinè yějě xutacjín jan ne, catsinguisè me tejó chajne. <sup>14</sup> Hane xi cavèè xuta cjuarcun xi casahmi Jesús jan ne, cuitjin cachja me:

—Cjuaquixi xi me vihi profeta xi cuinduva ngasunhndè. —Cuatjin cachja xuta jan.

<sup>15</sup> Peru Jesús ne, ha vèè me xi ha tu hora sa xi cjuaha xuta me cojo ngu jyè camahani xi suaxa rē me xi cuma titjun me. Vèhè xi Jesús ne, cavetjuxin nga me, quiji suvá ni me hisca rcu ndetjún.

#### *Quiji ntsacu Jesucristu xcun nandá*

<sup>16</sup> Quihndè ne, xi quiji hora jan ne, quijijne xuta ladu rē Jesús tjejen laguna. <sup>17</sup> Hane xi cavisehen me ngu barcu ne, cavuya canduva nga me ngunda vihi tsèhè laguna xi cjue me nandya Capernaum. Hya xi camá ne, camajñu, peru Jesús ne, cjèè cjuetjengui me xuta ladu rē me jan. <sup>18</sup> Hane hora vèhè ne, xi jercu tu hñu camahani tivanga tjo ne, sacuaha xi sexu nandá tsèhè laguna jan. <sup>19</sup> Ha xcun xi ha quiji me xi cuacun jan cojo barcu sacuaha hñú o sa jyun kilómetro xcun nandá jan ne, cavèè me xi nduva ntsacu Jesús xcun nandá, tisahmitiña me tsèhè barcu. Hane xuta ladu rē me jan ne, catsacjun me camá. <sup>20</sup> Peru Jesús ne, cachja me cuitjin cojo xuta ladu rē me jan:

—Ngahan vi. Xicarcuun. —Cuatjin cachja me.

<sup>21</sup> Ngajan xi xuta ladu rē Jesús jan ne, cojo yějě ni cjuasua ne, cafahatsja me Jesús cahntsua barcu. Hane ha tu ñahñu cafehe barcu cojo rē me nangui quixí, cahndè hiscan caji me.

#### *Cavanguise xuta Jesús*

<sup>22</sup> Hane xi camá nchujun jan ne, xutacjín xi caviyuju ngunda vèhè tsèhè laguna jan ne, catsinguitsjen me xi ngu jña ne, ngu tu tu barcu tacun jan. Hacuaaha vèè me xi Jesús ne, quijini me cojo xuta ladu rē me barcu vèhè ta suvá ni xuta ladu rē Jesús quiji me. <sup>23</sup> Peru ngujo barcu xi canduva tsèhè nandya Tiberias ne, cafehe tiña hiscan xi cajinè xutacjín jan niñu hora xi café casua Nai naja nacuechji rē Nina. <sup>24</sup> Hane xi cavèè xutacjín jan xi hacuiin Jesús hacuiin xuta ladu rē me siu cuaha me jan ne, sehe cavisehen me barcu xi sehe cafehe jan, quiji me nandya Capernaum xi cuanguise me Jesús.

#### *Jesucristu ne, sacuaha niñu xi sua cjuahñu me*

<sup>25</sup> Hane xi casacu rē xuta xi cuacun jan Jesús ngunda vihi tsèhè laguna jan ne, cavinenguise me cuitjin:

—Maestro, ¿janhiya canduvun nguèhe ni? —Cuatjin cavinenguise xuta xi cuacun jan.

<sup>26</sup> Ngajan xi Jesús ne, cuitjin cafayangui me:

—Cuichjá cojo nuju cjuaquixi ta ngayujun ni ngayun ne, nduvuntjengun ná, peru hacuiin ngatsè rē xi cahyun cjuarcun xi casahme ta ngatsè rē xi cachinu niñu jan hisca xi

catsë nuju. <sup>27</sup> Nihñu ngatsë rë xichine, peru hacuiin xichine xi vetsun ta xichine xi hacuiin vetsun hacuaha hisca sua cjuahñu xatsë. Vêhë xichine xi suá nuju ngahan xi Quihndi rë Xuta Jain ngahan, ngahan xi sahme cjuarcun cojo sa xi cumatsejen xi cjuaquixi jain xi Nina Nahmi naha catsingatju ná me. —Cuatjin cafayangui Jesús.

<sup>28</sup> Ngajan xi xuta xi cuacun jan ne, cuitjin cavinenguisse me cojo Jesús:

—¿Hacutjin ndatjin nihñi, cojo sa xi nihñi hacutjin xi chuya rë Nina? —Cuatjin cavinenguisse xuta jan.

<sup>29</sup> Hane Jesús ne, cuitjin cafayangui me:

—Cuitjin meje rë Nina xi nihñu: catamangu tacún cojo ná, ngahan xi catsingatju ná me. —Cuatjin cafayangui Jesús.

<sup>30</sup> Ngajan xi xuta jan ne, cuitjin cavinenguisse me Jesús:

—¿Mé cjuarcun nihñu xi sacú chutsijín, cojo sa xi cumangu tacún cojo nuju? ¿Mé xi nihñu? <sup>31</sup> Yêjê ni xutachanga naja ne, cajiné me niñu xi camá cojo scuan maná ngajan ngu xín camahani tsêhë nandya, sacuatjin camahindu xcun xujun rë Nina xi chja cuitjin: “Nina ne, tsêhë ngahnga catsingatju me niñu xi cajiné xuta.” Cuatjin camahindu. —Vêhë cjuaxi cavinenguisse xuta xi cuacun jan Jesús.

<sup>32</sup> Ngajan xi Jesús ne, cuitjin cachja me cojo xuta jan:

—Cuichjá cojo nuju cjuaquixi ta hacuiin Moisés xi casua me niñu xi nduva tsêhë ngahnga ta Nahmi naha xi sua nuju me niñu jain xi nduva tsêhë ngahnga. <sup>33</sup> Niñu xi sua Nina ne, vêhë niñu xi nduvajne tsêhë ngahnga hacuaha sua rë xuta cjuahñu. —Cuatjin cachja Jesús.

<sup>34</sup> Hane xuta xi cuacun jan ne, cuitjin cafehya me cojo Jesús:

—Tatá, tuhun niji niñu vêhë nchunchujun ni. —Cuatjin cafehya xuta jan.

<sup>35</sup> Ngajan xi Jesús ne, cuitjin cachja me:

—Ngahan xi sacuaha niñu jan xi sua cjuahñu ngahan. Xuta xi cuisehen me ladu naha xi mangucacun me cojo ná ne, ña tsë rë xahasen rë me cjuandaja, sacuaha xi ha quihndë cumavajin rë me cumaxindaain rë me ngundiya nga. <sup>36</sup> Ngahan ne, ha cachjá cojo nuju ta ha tichutsujun xcusun xi sahme peru manguaain tacún cojo ná. <sup>37</sup> Yêjê ni xuta xi Nahmi naha casua ná me ne, cuinduvajngui ná me. Hane me xi cuinduvajngui ná ne, hatuxa tsitjungueen me ta, <sup>38</sup> tsêhë xi ngahan ne, xi canduvajne tsêhë ngahnga ne, hacuiin xi sahme sacuatjin xi meje ná ta sacuatjin xi meje rë me xi catsingatju ná. <sup>39</sup> Hane me xi catsingatju ná vë ne, meje rë me xi hisca ngu xuta tsêhë yêjê ni me xi casua ná me ne, tsichajan me ta tsicúya me cjuahñu nixtin xi chjaháchuva rë sa nima sa xuta cojo cjuatacun rë. <sup>40</sup> Hacuaha Nahmi naha ne, meje rë me xi yêjê ni xuta xi vijnercu me yo ngahan xi Quihndi rë Nina ngahan hacuaha cumangu cacun me cojo ná ne, sacú rë me cjuahñu xatsë. Hane ngahan tsicúya me cjuahñu nixtin xi tsichuva Nina sa nima sa xuta. —Cuatjin cachja Jesús.

<sup>41</sup> Vêhë xi xutaxa rë yungun xi cuacun jan ne, cavetsihin cavisiajmihma me tsêhë Jesús ta, tsêhë xi cachja Jesús ta: “Ngahan sacuaha niñu xi nduvajne tsêhë ngahnga ngahan.”

<sup>42</sup> Cuitjin cavisiajmihma me:

—¿Hacuiin cha Jesús vihi, xi quihndi rë José? ¿Hacuiin ha hyan nahmi rë cha hacuaha ha hyan naa rë cha? ¿Hacutjin má xi quihndë ne, chja cha xi tsêhë ngahnga canduvajne cha ni? —Cuatjin cavisiajmihma me.

<sup>43</sup> Ngajan xi Jesús ne, cuitjin cachja me cojo xutaxa rë jan:

—Camá ni cuinújunhmú cojo xingun xingu xingu ngayun. <sup>44</sup> Xuta xi cuma cuisehen me ladu naha ne, suvá ni xuta xi cuisecoo Nahmi naha, me xi catsingatju ná. Me vêhë xi cuma cuisehen me, hane ngahan tsicúya me cjuahñu nixtin xi tsichuva Nina sa nima sa xuta. <sup>45</sup> Cuitjin camahindu xcun xujun rë Nina xi catsihindu profeta: “Suvá Nina scuxaha me cjuatacun rë yêjê ni xuta.” Cuatjin camahindu. Hane xuta xi vetaharcu cjuaxi rë Nina hacuaha Nina vuxaha me cjuatacun rë ne, visehen me ladu naha.

<sup>46</sup> Hacuiin xi ha tjin yo xi cavutsejen rë Nahmi naha ta suva ni ngahan xi tsêhë Nina canduva ne, ngahan xi cahvë Nahmi naha. <sup>47</sup> Cuichjá cojo nuju cjuaquixi ta yo xi mangucacun cojo ná ne, tjin rë cjuahñu xatsë. <sup>48</sup> Ngahan xi sacuaha niñu xi sua cjuahñu ngahan. <sup>49</sup> Yêjê ni xutachanga nuju ne, cajiné me niñu xi camá cojo scuan maná ngajan ngu xín camahani tsêhë nandya, peru cavechú nixtin xi cahme me. <sup>50</sup> Peru niñu xi nduvajne tsêhë ngahnga xi chjá ngahan tsêhë ne, sa xi yo sinë niñu vêhë ne, cueyaain. <sup>51</sup> Ngahan xi quicun ngahan ne, ngahan xi sacuaha niñu xi canduvajne tsêhë ngahnga jan ngahan. Sa xi ngu xuta sinë me niñu vêhë ne, handasa cueya me ne, peru hasen rë me ne, cjue xcun Nina. Niñu xi suá ngahan vë ne, hacui yojo naha xi suá cojo sa xi xuta ngasunhdë ne, sacú rë me cjuahñu xatsë. —Cuatjin cachja Jesús cojo xutaxa rë.

<sup>52</sup> Hya xi camá ne, xutaxa rë jan ne, cavetsihin cavisiajmijcan me tsêhë Jesús ngajñi rë me cojo xicjin me, cuitjin cachja me:

—¿Hacutjin cuma sua cha xi cuajyihí vë yojo rë cha xi xinëë ni? —Cuatjin cachja xutaxa rë jan.

<sup>53</sup> Hane Jesús ne, cuitjin cachja me cojo xuta xi cuacun jan:

—Cuichjá cojo nuju cjuaquixi ta sa xi ngayun xinuu yojo naha ngahan xi Quihndi rë Xuta Jain ngahan hacuaha siuun jni naha ne, tsajin nuju cjuahñu xi cjuaquixi. <sup>54</sup> Xuta xi jinë me yojo naha hacuaha hvi me jni naha ne, tjin rë me cjuahñu xatsë, hacuaha ngahan tsiçúya me cjuahñu nixtin xi tsichuva Nina sa nima sa xuta. <sup>55</sup> Cuatjin cuma ta, tsëhë xi yojo naha ne, vëhë comida xi cjuaquixi, hane jni naha ne, vëhë nandá xi cjuaquixi. <sup>56</sup> Me xi jinë yojo naha hacuaha hvi me jni naha ne, visehen me yojo naja, hacuaha ngahan ne, visehen yojo rë. <sup>57</sup> Nahmi naha, me xi hatuxa tjin rë cjuahñu ne, catsingatju ná me, hane ngatsë rë me vëhë xi tejña cjuahñu ngahan. Ha chuva vëhë ni ne, xuta xi jinë ná me, cuejña me cjuahñu ngatsë naha. <sup>58</sup> Cuatjin sahmi niñu xi canduvajne tsëhë ngahnga. Hacuini tangun cojo niñu xi cajinë xutachanga nuju ta cavechú nixtin xi cahme me. Ha ndaja xuta xi sinë me niñu xi chjá ngahan ne, handasa cueya me ne, peru hasen rë me ne, cjue xcun Nina. <sup>59</sup> —Cuatjin cachja Jesús hya xi caviciya me xuta ngu yungun ngajan nandya Capernaum.

*Cjua xi sua machaya naja tsëhë cjuahñu xatsë*

<sup>60</sup> Hya xi camá ne, jemu cjin xuta ladu rë Jesús xi cuitjin cachja me hya xi cahndë me cjua jan:

—¡Jemu choho visiajmi me! ¡Scaain naja cojo cjua vëhë! —Cuatjin cachja me.

<sup>61</sup> Peru Jesús ne, ha vëë me cojo cjuatacun rë me xi cuatjin visiajmihma xuta ladu rë me xi cuacun jan. Vëhë xi cachja me cuitjin:

—Sa xi meje cuetjuxun tsëhë ndiya naha ngatsë rë cjua xi cachjá cojo nuju vë ne, <sup>62</sup> ¿mé ningatuhun tacún sa xi chutsuxun xi çúya cjuéneje nga ngahnga hiscan xi cavitejña titjun, ngahan xi Quihndi rë Xuta Jain ngahan? <sup>63</sup> Hasen rë Nina ne, vëhë xi sua cjuahñu. Peru ngu xuta ngasunhdë ne, hatuxa cumaji sahmi me cuatjin. Yëjë ni cjua xi ngahan cachjá cojo nuju ne, vëhë sua machaya nuju tsëhë Hasen rë Nina cojo tsëhë cjuahñu xi sua. <sup>64</sup> Peru tjin yahnga ngayun xi manguaain tacún cojo ná. —Cuatjin cachja Jesús ta, tsëhë xi hisca ntsacu cavetsihin ne, ha vëë me yo xuta xi cumanguaain cacun cojo rë me hacuaha ha vëë me yo xi sahmi rë me entregadu.

<sup>65</sup> Hacuaha cachja sa me cuitjin:

—Vëhë xi cuatjin cachjá cojo nuju xi xuta xi cuma cuisehen me ladu naha ne, suvá ni xuta xi cuichja Nahmi naha xi cuisehen. —Cuatjin cachja Jesús.

<sup>66</sup> Ngatsë rë vëhë xi jemu cjin xuta ladu rë Jesús ne, quiji ngaxtun me, hacuaha ha quihndë catsujyiin me cojo Jesús. <sup>67</sup> Ngajan xi Jesús ne, cavinenguisse me xuta ladu rë me xi tejó jan cuitjin:

—¿Hacuini cojo ngayun meje cuangunxun? —Cuatjin cavinenguisse me.

<sup>68</sup> Hane Simón Pedru ne, cuitjin cafayangui me:

—Ngayun nai naha, ¿yo cuanguintjenguin?, ta ngayun ne, tjin nuju cjua xi sua machaya niji tsëhë cjuahñu xatsë. <sup>69</sup> Hacuaha ngayin ne, mangutacuín cojo nuju hacuaha hyin xi tsëhë jain Nina ngayun. —Cuatjin cafayangui Simón Pedru.

<sup>70</sup> Ngajan xi Jesús ne, cuitjin cachja me:

—Handasa ngahan suva cavaxejen nuju ngayujun ni xi tejó ngayun, peru ngajñi nuju ne, jiyajñi ngu xi ha jiya xitsehen xahasen rë. —Cuatjin cachja Jesús.

<sup>71</sup> Jesús ne, tichja me tsëhë ngu cha tsëhë ngajñi rë xi tejó xuta ladu rë me, ngu cha xi hmí rë Judas, quihndi rë Simón Iscariote. Cuatjin cachja me ta, tsëhë xi cha vëhë sahmi cha me entregadu cojo condra rë me.

## 7

*Jesucristu cojo xicjin me*

<sup>1</sup> Xi cavatju vëhë ne, catsujyihya Jesús ngujo nandya tsëhë distritu Galilea. Miji tsujyihya me nandya xi siu ladu tsëhë distritu Judea ta, tsëhë xi xutaxa rë yungun ne, tivanguise me Jesús xi tsiquehen me. <sup>2</sup> Quihndë ne, ha camatiña suhi tsëhë Ndihya Tsjian, suhi xi sahmi xuta tjë rë Israel. <sup>3</sup> Ngajan xi me xi xicjin Jesús jan ne, cuitjin cachja me cojo Jesús:

—Tihin ngajan distritu Judea, cojo sa xi hacuaha cojo xuta ladu rijji xi siu jan ne, scuëë me xcusun xi nihñi ta <sup>4</sup> tsëhë xi ngu cha xi meje rë xi cumachaya rë xuta xcusun xi sahmi cha ne, hacuini táha hma sahmi cha. Ngaye ta cuatjin jemu nihñi cjuandaja ne, ningacuin rë yëjë xuta cjuandaja vëhë. —Cuatjin cachja xicjin Jesús cojo rë me ta, <sup>5</sup> tsëhë xi me xi cuacun vë ne, camanguaain cacun me cojo Jesús.

<sup>6</sup> Ngajan xi Jesús ne, cuitjin cafayangui me:



—Cjêë cuechú nixtin xi sahme mé xi sahme. Peru ngayun ne, tu mé ni nixtin ne, ndatjin xi cuma nuju. <sup>7</sup> Ngayun ne, cumaji choho scuêë nuju xuta, peru ngahan ne, choho vêë ná me ta, tsêhê xi ngahan ne, chjá cjuaquixi xi xcusun xi sahmi me ne, hatuxa tsehen. <sup>8</sup> Tángun ni ngayun ta ngahan ne, cjueen suhi vêhê. Cjueen ta cjêë cuetjucaa nixtin xi sahme mé xi sahme. —Cuatjin cafayangui Jesús.

<sup>9</sup> Xi cavatju cachja me cojo xicjin me cju vêhê ne, cavéjña ni me nangui rê me.

### *Quiji Jesucristu suhi tsêhê Nâihya Tsjian*

<sup>10</sup> Hane xi cavatju quiji xicjin Jesús suhi jan ne, hacuaha cojo Jesús quiji me. Peru hacuiin táha tsejen ta sacuaaha xi táha hma quiji me. <sup>11</sup> Hya xi camá ne, xutaxa rê yungun jan ne, cavanguise me Jesús hiscan jima suhi jan. Cuitjin cavinenguise me:

—¿Jani tacun cha vêhê? —Cuatjin cavinenguise me.

<sup>12</sup> Hane xutacjín jan ne, jercu visiajmihma me ngajñi rê me tsêhê Jesús. Ngujo me ne, cuitjin cachja me:

—Ngu xuta ndaja me. —Cuatjin cachja me.

Peru ngujo nga xuta ne, cuitjin cachja me:

—¡Jéya, vindacha cha xutacjín! —Cuatjin cachja me.

<sup>13</sup> Peru tsajin hisca ngu xuta xi cachjatê me tsêhê Jesús ta, tsêhê xi tsacjun me xutaxa rê yungun.

<sup>14</sup> Quihndê ne, hya xi camavasen tijima suhi jan ne, quiji Jesús yungun xi matitjun, sehe cavetsihin cavicuya me xuta cju rê Nina. <sup>15</sup> Hane xutaxa rê yungun jan ne, quijircun rê me xi cuitjin jemu ndaja chja Jesús. Cuitjin cachja me ngajñi rê me cojo xicjin me:

—¿Hacutjin má xi cuarcu vechú cjuatacun rê cha vê xi hisca hacuiin cavutaya cha? —Cuatjin cachja me.

<sup>16</sup> Ngajan xi Jesús ne, cuitjin cachja me cojo xutaxa rê xi cuacun jan:

—Cju xi vicuyá rê xuta ne, hacuiin cju naha suva ta cju rê me xi catsingatju ná.

<sup>17</sup> Sa xi ngu xuta meje sahmi me sacuatjin xi meje rê me xi catsingatju ná ne, ngajan sacú cumachaya rê me tsêhê cju xi vicuyá, ¿há xi tsêhê Nina ne? o ¿há xi nduva tsêhê cjuatacun naha suva? <sup>18</sup> Xuta xi chja me cju xi nduva tsêhê cjuatacun rê suvá me ne, meje sahmi jyê sahmi hnga suvá me yojo rê me. Peru xuta xi meje sahmi jyê sahmi hnga me me xi catsingatju rê me ne, me vêhê ne, quixi me cojo cju rê me hacuaha tsajin cjuatsehen cahntsua xahasen rê me.

<sup>19</sup> Moisés ne, casua nuju me ley rê Nina, peru hisca ngu ngayun nihñuchun sacuatjin chja ley vêhê. ¡Tsêhê vêhê rê xi meje nicuhun ná! —Cuatjin cachja Jesús.

<sup>20</sup> Ngajan xi xutacjín jan ne, cuitjin cafayangui me:

—¿Yo xitsehen xi cachja cojo nuju? ta guehe ne, tsajin yo xi meje tsiquehen nuju. —Cuatjin cafayangui xutacjín jan.

<sup>21</sup> Hane xi cafayangui Jesús ne, cuitjin cachja me:

—Ngayujun ni ngayun ne, quijircun nuju ngatsê rê ngu xcusun xi casahme nixtin xi chjahájenda rê. <sup>22</sup> Peru suvá Moisés hacuaha cavejña me xcusun xi xti chuxin rê quihndi xihin. (Xi cjuaquixi ne, hacuiin Moisés ta xutachanga nuju xi cavejña me xcusun vêhê.) Hane vêhê xi ngayun ne, vichun chuxin rê quihndi xihin handasa nixtin xi chjahájenda rê. <sup>23</sup> Sa xi vichun chuxin rê quihndi xihin nixtin xi chjahájenda rê cojo sa xi nihñuchuhun sacuatjin cju xi chja ley rê Moisés ne, ¿mé má cuatjin ma cjan nuju cojo ná xi casahme xi camandaja camahani ngu xuta nixtin xi chjahájenda rê ni? <sup>24</sup> Ha quihndê hacuiin tuyjê nichuvun ná ta nichuvun ná cojo ngu cjuatacun xi cjuaquixi. —Cuatjin cachja Jesús.

### *¿Jani hiscan canduva Jesucristu?*

<sup>25</sup> Ngajan xi ngujo xuta nandya Jerusalén ne, cuitjin cachja me ngajñi rê me:

—¿Hacuiin me vihi xi vinchise rê xi cueya ní? <sup>26</sup> Peru chutsujun ta cuajyíhi me secun me tichja tichja me cojo xuta, hane ndastu ngu cju chja xutaxa rê cojo rê me. ¡Hyaan sa xi vêëndaja xutaxa rê xi me vihi xi catsingatju jain Nina me! <sup>27</sup> Me vihi ne, ha hyan jani canduva me, peru hya xi cuinduva me xi Nina tsingatju rê ne, tsajin yo vêë jani cuetju me cuinduva me. —Cuatjin cachja xuta xi cuacun jan.

<sup>28</sup> Ngajan xi Jesús ne, xi quijinduju sa cavicuya me xuta ngajan yungun xi matitjun ne, jercu hñu cachja me cuitjin:

—¿Há quixi xi hyun ná hacuaha hyun jani canduva? Peru ngahan ne, hacuiin cjuatacun naha suva xi canduva. Me xi catsingatju ná ne, hatuxa quixi me cojo cju rê me, peru ngayun ne, hyúun me. <sup>29</sup> Ngahan ne, hvê me ta, tsêhê xi hiscan tacun me ne, ngajan canduvá. Hacuaha me vêhê catsingatju ná me. —Cuatjin cachja Jesús.

<sup>30</sup> Tsêhê xi cuatjin cachja Jesús cju vêhê ne, vêhê xi meje cjuaha xuta xi cuacun jan me. Peru tsajin yo xi cavetahatsja rê me ta, tsêhê xi cjêë cuetjucaa nixtin xi cuatjin cuma.

<sup>31</sup> Hane jemu cjín xuta ngajñi rë xutacjín jan ne, camangu cacun me cojo Jesús. Cuitjin cachja me:

—Hya xi cuinduva me xi Nina tsingatju rë ne, ¿há hitsë sa cjín cjuarcun sahmi me xi cuma rë cjuarcun xi casahmi me vihi? —Cuatjin cachja xuta xi cuacun jan.

*Catsingatju xutaxa rë yungun cha xi cjuaha rë Jesucristu*

<sup>32</sup> Hane ngujo cha fariseo ne, cahndë cha xi visiajmihma xutacjín jan ngajñi rë me cojo xicjin me cja vëhë. Ngajan xi yëjë ni nahmi xi matitjun cojo cha fariseo jan ne, catsingatju me mayu cojo nisë rë cha xi chjahá rë Jesús. <sup>33</sup> Hane Jesús ne, cuitjin cachja me:

—Ngujo nixtin sa xi cuitejña cojo nuju, sehe cúa cjuë nga hiscan tacun me xi catsingatju ná. <sup>34</sup> Ngayun ne, cuinchunsun ná, peru sacuiin nuju ngahan ta, tsëhë xi hiscan xi cuitejña ne, cumaji cuangun. —Cuatjin cachja Jesús.

<sup>35</sup> Ngajan xi xutaxa rë jan ne, cavinenguisse xicjin me cuitjin:

—¿Jani cjue cha xi cuijyih vi xi sacuiin naja cha? ¿Há cjue cha ngu nangui cjín, cjue tjengui cha xuta naja xi cavitsojo ngajñi rë xutaxín hane ngajan cuicuya cha xutaxín jan ni? <sup>36</sup> ¿Mé vijne cja xi chja cha xi cuinchaseen cha ne, sacuiin naja cha, tsëhë xi hiscan cuejña cha ne, cumaji cuanguen? —Cuatjin cavinenguisse xicjin xutaxa rë jan.

*Nandá xi sua cjuahñu*

<sup>37</sup> Quihndë ne, nixtin xi cajnetaha suhi jan ne, vëhë nixtin jyë tsëhë suhi jan. Hane casecun Jesús cachjahñu me cojo xuta cuitjin:

—Sa xi tjin yo xi xinda rë ne, catinduva tjengui ná catihí. <sup>38</sup> Xuta xi mangucacun me cojo ná ne, cuatju me sacuatjin chja xujun rë Nina xi chja cuitjin: “Cuetju tsëhë xahasen rë me sacuaaha nandá xi ña vangatë xi sua rë me cjuahñu xatsë.” —Cuatjin cachjahñu Jesús.

<sup>39</sup> Xi cuatjin cachja Jesús ne, cachja me tsëhë Hasen rë Nina xi sehe sacú rë xuta xi mangucacun me cojo Jesús. Cuatjin cachja Jesús ta, tsëhë xi Nina ne, cjëë sua me Hasen rë me, tsëhë xi Jesús ne, cjëë cuma jyë cuma hnga me cojo Hasen rë me.

*Hacuiin ngu ni cjuatacun catsingataha cacun xutacjín*

<sup>40</sup> Hane xi cahndë xutacjín jan cja vëhë ne, ngujo me ne, cuitjin cachja me:

—Me vëhë ne, cjuaquixi xi me vëhë profeta xi jemu nechanyan rë. —Cuatjin cachja ngujo me.

<sup>41</sup> Hane ngujo nga me ne, cuitjin cachja me:

—Me vëhë xi Tsingatju Nina. —Cuatjin cachja me.

Peru ngujo nga me ne, cachja me cuitjin:

—¡Peru Me xi Tsingatju Nina ne, hacuiin ngajñi rë xuta Galilea cuetjujñi me! <sup>42</sup> ¡Ha hyan xi xujun rë Nina ne, chja ta Me xi Tsingatju Nina ne, cuinduva me tsëhë tjë rë xutachanga naja David, ngajan Belén hiscan nangui rë David! —Cuatjin cachja me xi cuacun jan.

<sup>43</sup> Cuatjin camá xi ngatsë rë Jesús ne, hacuiin ngu ni cjuatacun catsingataha cacun xutacjín jan. <sup>44</sup> Vëhë xi ngujo xuta jan ne, meje cjuaha me Jesús cjucojo me ndavaya. Peru tsajin yo xi cavetahatsja rë me.

*Camanguaain cacun xutaxa rë cojo Jesucristu*

<sup>45</sup> Hya xi camá ne, mayu cojo nisë rë cha ne, cavuya quiji nga cha xcun nahmi xi matitjun cojo xcun cha fariseo xi cuacun jan, hane xutaxa rë xi cuacun jan ne, cuitjin cachja me cojo mayu jan:

—¿Mé má canduvuun cojo cha? —Cuatjin cachja me.

<sup>46</sup> Ngajan xi cha mayu cojo nisë rë cha jan ne, cuitjin cafayangui cha:

—¡Cjëë camahani cuinuhyin xi chja ngu xuta sacuatjin chja me vëhë! —Cuatjin cafayangui cha.

<sup>47</sup> Hane cha fariseo jan ne, cuitjin cachja cha cojo cha xi cuacun jan:

—¡Tu ma rë sa xi cojo ngayun camandacha ngayun! <sup>48</sup> ¡Ngayun ne, hyun ta hisca ngu xutaxa rë, hisca xi ngu xuta fariseo ne, cjëë cumangu cacun me cojo cha xi cuajyihí vë!

<sup>49</sup> Peru xutacjín xi cuacun hisca hvíin hacutjin chja ley rë Moisés ne, ¡mijí rë Nina me! —Cuatjin cachja cha fariseo jan.

<sup>50</sup> Ngajan xi ngu cha fariseo xi hmí rë Nicodemo, cha xi quiji tjengui rë Jesús hatsëë ne, cuitjin cachja cha cojo cha xi cuacun vëhë:

<sup>51</sup> —Chja ley naja ta cumaji nihña castigu ngu xuta xi cjëë cuinuhyan mé cuichja me hacuaaha sacú naja cjuaquixi mé casahmi me. —Cuatjin cachja cha Nicodemo.

<sup>52</sup> Ngajan xi cha fariseo xi cuacun jan ne, cuitjin cafayangui cha:

—¿Hacuaha cojo ngayun má ngayun xuta rë distritu rë Galilea ni? Chutayun xujun rë Nina ne, sehe ngajan sacú cumachaya nuju ta ngajan Galilea ne, cuetjinjñi hisca ngu profeta. —Cuatjin cafayangui cha fariseo xi cuacun jan.

*Chjuun xi cachjahá rë xcun cjuatsehen xi tisahmi*

<sup>53</sup> Hya xi camá ne, jima ngu xuta jan cafe me ndava me.

## 8

<sup>1</sup> Peru Jesús ne, cavetju me quiji me ndetjún Olivu. <sup>2</sup> Hane xi casahasen camá nchujun jan ne, cavuya quiji nga Jesús ndatsen yungun xi matitjun. Hane yêjë xuta jan ne, casahmitiña me tsêhê Jesús. Hane xi quiji cavéjña Jesús ne, sehe cavetsihin cavicuya me xuta jan. <sup>3</sup> Ngajan xi ngujo cha vicuya cjuachacun cojo ngujo cha fariseo ne, cafehecojo cha ngu chjuun xi cachjahá rê na xcun cjuatsehen xi tisahmi na cojo ngu xihin xi hacuïn xihin rê na. Hane cha xi cuacun jan ne, quiji cavisecun cha na ngajñi rê xuta hiscan tacun Jesús, <sup>4</sup> sehe cachja cha cojo Jesús cuitjin:

—Maestro, chjuun vihi ne, cachjahá rê na xcun cjuatsehen xi tisahmi na cojo ngu xihin xi hacuïn xihin rê na. <sup>5</sup> Quihndê ne, xcun ley xi cavejña naja Moisés ne, cavitexa me xi tu yo ni xuta xi sahmi xcusun vêhê ne, cueya me cojo ndyojo. Ngayun ne, ¿mé xi cuinújun? <sup>6</sup> —Cuatjin cavinenguisse cha xi cuacun vêhê, xi tifahachuva cha Jesús, cojo sa xi sacú rê cha chuva rê xi cuinchajyê cha me.

Ngajan xi Jesús ne, catsiquindi me yojo rê me, sehe cavetsihin catsihindu me nangui cojo rcutsja me. <sup>7</sup> Hane tsêhê xi cjuinduja sa tivinenguisse cha xi cuacun jan Jesús ne, catsinguixi me yojo rê me, sehe cachja me cojo cha cuitjin:

—Tu jarê ni ngayun xi tsajin jyê nuju ne, ngayun tjun tjun tetuhun rê na ndyojo. —Cuatjin cachja Jesús.

<sup>8</sup> Hane sehe catsiquindi nga me yojo rê me, hane catsihindu sa me nangui. <sup>9</sup> Hane xi cahndê cha xi cuacun jan xi cuatjin cachja Jesús ne, ta vêê me xi hacuïn tyahi cjuatacun rê me, chuva ngu chuva ngu cha cavetju cha cafe cha. Cavetsihin cavetju tjun tjun cha xi hitsê sa changá. Hane camá suvá sa Jesús, cojo chjuun xi secun ngajñi rê xutacjín jan. <sup>10</sup> Hane xi catsinguixi me yojo rê me ne, cavinenguisse me chjuun jan cuitjin:

—Ngayun chjuun, ¿jarê me ne? ¿Há tsajin yo xi casahmi nuju castigu? —Cuatjin cavinenguisse Jesús.

<sup>11</sup> Ngajan xi chjuun jan ne, cuitjin cafayangui na:

—Tsajin yo, tatá. —Cuatjin cafayangui na.

Ngajan xi Jesús ne, cuitjin cachja me:

—Ngahan ne, hacuaha sahme nuju castigu. Cuma cuangun, peru ha quihndê xi canihñuu sa cjuatsehen. —Cuatjin cachja Jesús.

*Jesu cristu ne, sacuaha hasen xi cuma rê xuta*

<sup>12</sup> Hya xi camá ne, cachja nga Jesús cojo xutacjín jan cuitjin:

—Ngahan ne, sacuaha hasen xi cuma rê xuta ngasunhndê ngahan. Xuta xi cuisehen me ladu naha ne, hatuxa cuiyijin me ngajñi jñú ta ngajñi hasen xi sua cjuahñu xatsê cuiyuju me. —Cuatjin cachja Jesús.

<sup>13</sup> Ngajan xi cha fariseo xi cuacun jan ne, cuitjin cachja cha cojo Jesús:

—Ngayun ne, tinújun favor nuju suvun. Vêhê xi cja xi nújun ne, tsajin rê cjuaquixi. —Cuatjin cachja cha.

<sup>14</sup> Hane xi cafayangui Jesús ne, cuitjin cachja me:

—Handasa chjá favor naha suva ne, cja xi chjá ne, cjuaquixi ta, tsêhê xi ngahan ne, hvê jani canduva hacuaha hvê jani cúa cjuê nga. Peru ngayun ne, hyúun jani canduva hacuaha hyúun jani cúa cjuê nga. <sup>15</sup> Ngayun ne, xi nichuvun xuta cojo cjuatacun rê me ne, chuva xi tsingatahacacun xuta ngasunhndê ne, cuatjin ningatuhuntacún. Ngahan ne, titsichuvaan hisca ngu xuta cojo cjuatacun rê me. <sup>16</sup> Peru sa xi tsichúva ngu xuta ne, hatuxa cjuaquixi cja xi cuichjá ta, tsêhê xi hacuïn suva sahme ta ngahan cojo me xi catsingatju ná nihñi tangun. <sup>17</sup> Xcun ley xi vitexa nuju ne, hacuaha camahindu xi hya xi jo xuta sua me cjuaquixi rê me xcun xutaxa rê hane ngu tangun ni cja chja me ne, cjuaquixi cja xi chja me. <sup>18</sup> Ngahan xi chjá favor naha suva, hane Nahmi naha xi catsingatju ná me ne, hacuaha cojo me chja me favor naha. —Cuatjin cafayangui Jesús.

<sup>19</sup> Ngajan xi cha fariseo jan ne, cuitjin cavinenguisse cha Jesús:

—¿Jani tacun nahmi nuju ni? —Cuatjin cavinenguisse cha.

Hane Jesús ne, cuitjin cafayangui me:

—Hacuïn ngahan hyun ná ne, hacuïn Nahmi naha hyun me. Sa xi ngahan hyun ná ne, hacuaha hyun Nahmi naha. —Cuatjin cafayangui Jesús.

<sup>20</sup> Cja vêhê ne, cachja Jesús hya xi tivicuya me xuta ngajan yungun xi matitjun, ngu ndihya hiscan xi siu alcancia. Peru hisca ngu xuta cafaain rê me, tsêhê xi cjêê cuetjucaa nixtin xi cuatjin cuma.

*“Cumaji cuangun hiscan xi cjuê”, chja Jesu cristu*

<sup>21</sup> Hya xi camá ne, quijinduja sa cachja Jesús cojo xuta cuitjin:

—Ngahan ne, cuétju cjué, hane ngayun ne, cuinchunsun ná. Peru ngatsë rë cjuatsehen xi cún ngayun ne, cuechuun xcun Nina hya xi cueyun. Hiscan xi cjué ne, ngayun ne, cumaji cuangun. —Cuatjin cachja Jesús.

<sup>22</sup> Ngajan xi xutaxa rë xi cuacun jan ne, cuitjin cachja me ngajñi rë me cojo xicjin me:

—Tu ma rë sa xi cjue tsiqehen suvá me yojo rë me xi cuatjin chja me xi hiscan cjue me ne, cumaji cuanguen. —Cuatjin cachja xutaxa rë xi cuacun jan.

<sup>23</sup> Ngajan xi Jesús ne, cuitjin cachja me cojo me xi cuacun vë:

—Ngayun ne, tsëhë nguehe nangui ngayun. Ngahan ne, tsëhë ngahnga ngahan. Ngayun ne, tsëhë ngasunhdë vihi ngayun. Ngahan ne, hacuiin tsëhë ngasunhdë vihi ngahan. <sup>24</sup> Vëhë xi cuatjin cachjá cojo nuju xi ngatsë rë cjuatsehen xi cún ngayun ne, cuechuun xcun Nina hya xi cueyun. Sa xi macjaain nuju xi Ngahan Vi, hmí ná ne, ngatsë rë cjuatsehen xi cún ngayun ne, cuechuun xcun Nina hya xi cueyun. —Cuatjin cachja Jesús.

<sup>25</sup> Ngajan xi xuta xi cuacun jan ne, cavinenguise me Jesús cuitjin:

—¿Yo ngayun ni? —Cuatjin cavinenguise me.

Hane Jesús ne, cuitjin cachja me:

—¡Sacuatjin cachjá cojo nuju hisca ntsacu cavetsihin! <sup>26</sup> Jemu tjin ná cjua xi cuichjá tsujun, hacuaha jemu tjin xi cjuaháchuva tsujun. Peru me xi catsingatju ná ne, quixi jain me cojo cjua rë me, hane ngahan ne, cjua xi cáhndë xi cachja me ne, cjua vëhë xi chjá nguehe ngasunhdë. —Cuatjin cachja Jesús.

<sup>27</sup> Peru xutaxa rë xi cuacun jan ne, cajñii rcu me xi Jesús ne, tsëhë Nina Nahmi naja xi tichja me. <sup>28</sup> Vëhë xi Jesús ne, cuitjin cachja me:

—Hya xi ngayun chjunihngun ná ngahan xi Quihndi rë Xuta Jain ngahan ne, hya cuijne rcun xi Ngahan Vi hmí ná. Hane ngahan ne, hatuxa tsajin mé xi sahme xi cojo cjuatacun naha suva ta sacuaha cjua xi cachja Nahmi naha cojo ná ne, cjua vëhë xi chjá. <sup>29</sup> Hacuaha me xi catsingatju ná ne, tacun me cojo ná, cavejñaai ná me xi suva ta, tsëhë xi ngahan ne, hatuxa sahme tutjin xi chuya rë me. —Cuatjin cachja Jesús.

<sup>30</sup> Hane xi cachja Jesús cjua vëhë ne, jemu cjin xuta camangu cacun me cojo rë me.

*Cuëhëndaya naja cjuaquixi*

<sup>31</sup> Ngajan xi Jesús ne, cachja me cuitjin cojo xutaxa rë yungun xi camacjain rë tsëhë cjua rë me:

—Sa xi ngayun cuangun nduju xi quitahá rcun cjua naha ne, quixi xi ha camá ngayun xuta ladu naha. <sup>32</sup> Hacuaha cuijne rcun xi hmí rë cjuaquixi, hane cjuaquixi jan ne, cuëhëndaya nuju. —Cuatjin cachja Jesús.

<sup>33</sup> Ngajan xi xutaxa rë xi cuacun jan ne, cuitjin cafayangui me:

—Peru ngayaan ne, tjë rë xutachanga naja Abraham má ngayaan, hane cjëë camahani cuma ngayaan mosu hndixahan rë xuta. ¿Mé má nújun xi cumandaya ngayin? —Cuatjin cafayangui me.

<sup>34</sup> Hane Jesús ne, cuitjin cafayangui me:

—Cuichjá cojo nuju cjuaquixi ta yëjë ni xuta xi hincha me ndiya rë cjuatsehen ne, hatuxa tjinñhu me cojo cjuatsehen sacuatjin tjinñhu ngu mosu hndixahan cojo nai rë. <sup>35</sup> Ngu mosu hndixahan ne, hacuiin hatuxa cuiyujucahndë ngajñi xuta xi ndava, peru ngu quihndi xi cjuaquixi ne, hatuxa tsëhë xuta xi ndava. <sup>36</sup> Vëhë xi sa xi Quihndi rë Nina cuëhëndaya nuju ne, cumandaya jain ngayun cojo cjuaquixi. <sup>37</sup> Ngahan ne, hacuaha hvë xi tjë rë Abraham má ngayun. Peru ngayun ne, tivinchun chuya rë xi nicuhun ná, tsëhë xi tuun cahndë xi cuisehen cjua naha cahntsua xahasen nuju. <sup>38</sup> Ngahan ne, xcusun xi cahvë hiscan tacun Nahmi naha ne, tsëhë vëhë xi tichjá. Peru ngayun ne, sacuatjin canuhyun xi cachja nahmi nuju ne, cuatjin tinihñu. —Cuatjin cafayangui Jesús.

<sup>39</sup> Ngajan xi xutaxa rë xi cuacun jan ne, cuitjin cachja me:

—Nahmi nijñi ne, hacui xutachanga naja Abraham. —Cuatjin cachja me.

Ngajan xi Jesús ne, cuitjin cachja me:

—Sa xi quixi xi quihndi rë Abraham má ngayun ne, sacuatjin casahmi Abraham ne, hacuaha cuatjin nihñu. <sup>40</sup> Ngahan ne, cachjá cojo nuju cjuaquixi xi cáhndë xi cachja Nina, peru quihndë ne, tivinchun chuya rë xi nicuhun ná. Xutachanga naja Abraham ne, casahmi me cuatjin. <sup>41</sup> Ngayun ne, sacuatjin casahmi nahmi nuju ne, hacuanitjin ni tinihñu. —Cuatjin cachja Jesús.

Ngajan xi xutaxa rë xi cuacun jan ne, cachja me cuitjin:

—Ngayin ne, hacuiin quihndi xca ngayin. Nina ne, ngu ni me vëhë xi Nahmi nijñi. —Cuatjin cachja xutaxa rë xi cuacun jan.

<sup>42</sup> Hane Jesús ne, cuitjin cachja me:

—Sa xi quixi xi Nahmi nuju Nina ne, hacuaha canihñu hmu tacún ná ta, tsëhë xi ngahan ne, Nina catsingatju ná me, hane quihndë ne, nguehe tejña. Ngahan ne, hacuiin cjuatacun

naha suva xi canduvá ta me vèhè catsingatju ná me. <sup>43</sup> ¿Mé má vijñii rcun cjaua xi chjá? Cuatjin vijñii rcun ta, tsèhè xi caain nuju visiñuju cjaua naha. <sup>44</sup> Ngayun ne, quihndi rè nahmi nuju Satanás ngayun, hane xcusun xi meje rè nahmi nuju ne, xcusun vèhè xi meje nihñu. Xitsehen xi matitjun vè ne, hisca ntsacu cavetsihin ne, hatuxa tsiquehen vè xuta. Hatuxa tsajin jiya vè ngajñi rè cjauaquixi ta, tsèhè xi tsajin cjauaquixi ngajñi rè cjuatacun rè. Hya xi chja xitsehen vè cjuandacha ne, chja sacuatjin xcusun rè suvá ta, tsèhè xi hatuxa ndacha, hacuaha nahmi rè yèjè ni cjuandacha. <sup>45</sup> Peru ngahan ne, tsèhè xi chjá cjauaquixi ne, vèhè xi macjaain nuju ngahan. <sup>46</sup> ¿Jarè ngayun xi cuma ninguxun xi ngahan ne, tjin jyè naha? Sa xi chjá xi cjauaquixi ne, ¿mé má macjaain nuju ngahan? <sup>47</sup> Me xi tsèhè jain Nina ne, vetaharcu me cjaua rè Nina. Ngayun ne, tsèhè xi hacuain tsèhè Nina ngayun ne, vèhè xi mijí cuetuhunrcun cjaua rè me. —Cuatjin cachja Jesús.

*Ngahan Vi hmí rè Jesucristu hisca chaja sa xi tsin Abraham*

<sup>48</sup> Hane xutaxa rè xi cuacun jan ne, cuitjin cachja me cojo Jesús:

—¡Hatuxa cjauaquixi xi nújin hya xi nújin xi ngayun ne, ngu xuta samaritano ngayun hacuaha jiya xitsehen xahasen nuju! —Cuatjin cachja xutaxa rè jan.

<sup>49</sup> Ngajan xi Jesús ne, cuitjin cafayangui me:

—Tsajin xitsehen xahasen naha. Ngahan ne, fahárcun Nahmi naha, hane ngayun ne, choho nújun tsahan. <sup>50</sup> Hacuaha mijí sahme jyè sahme hnga suva yojo naha. Tjin ngu me xi meje sahmi jyè sahmi hnga ná, hane me vèhè ne, tsichuva naja me cojo cjuatacun naja. <sup>51</sup> Cuichjá cojo nuju cjauaquixi ta xuta xi cuihndè me tsèhè cjaua naha ne, hatuxa tsajin nu tsajin nixtin xi cueya me. —Cuatjin cafayangui Jesús.

<sup>52</sup> Hane xutaxa rè xi cuacun jan ne, cuitjin cachja me cojo Jesús:

—Quihndè matsejenndaja xi jiya jain xitsehen xahasen nuju. Xutachanga naja Abraham ne, cahme me, hacuaha yèjè profeta ne, cahme me, hane sehe ngayun nújun xi xuta xi cuihndè me tsèhè cjaua nuju ne, hatuxa tsajin nu tsajin nixtin xi cueya me. <sup>53</sup> ¡Ja!, peru ¿há hitsè sa matitjun ngayun xi cuma rè xutachanga naja Abraham, me xi cahme ní? ¡Hacuaha cahme yèjè profeta! ¡Ngayun tinihñu yojo nuju sacuaha xi jemu matitjun ngayun! —Cuatjin cachja xutaxa rè jan.

<sup>54</sup> Hane Jesús ne, cuitjin cafayangui me:

—Sa xi sahme jyè sahme hnga suva yojo naha ne, cjaua xi cuichjá tsahan ne, cuenguin camahani chji rè. Peru Nahmi naha, me xi nújun xi Nina nuju ne, me vèhè xi sahmi jyè sahmi hnga ná me. <sup>55</sup> Ngayun ne, hyúun me, peru ngahan ne, hvè me. Sa xi ngahan cuichjá xi hveen me ne, tangun ndacha ngahan cojo nuju ngayun. Peru ngahan ne, hvè me, hacuaha víhndè tsèhè cjaua rè me. <sup>56</sup> Xutachanga naja Abraham ne, jemu ndaja camá rè me xi satè rè me xi scuèè me nixtin xi cuinduva ngahan. Hane cavèè jain me, hacuaha jemu sua camá rè me. —Cuatjin cafayangui Jesús.

<sup>57</sup> Ngajan xi xutaxa rè xi cuacun jan ne, cuitjin catsixcuehyu me Jesús:

—Hisca cjèè yachantè nu tjin nuju. ¿Há cahyun xutachanga naja Abraham ní? —Cuatjin cachja me.

<sup>58</sup> Hane Jesús ne, cuitjin cachja me:

—Cuichjá cojo nuju cjauaquixi ta hisca chaja sa xi tsin xutachanga naja Abraham ne, ngahan ne, Ngahan Vi hmí ná. —Cuatjin cachja Jesús.

<sup>59</sup> Vèhè xi xutaxa rè yungun xi cuacun jan ne, cafaha me ndyojo xi cuetaha me Jesús xi meje tsiquehen me. Peru Jesús ne, cavetjuhmá me tsèhè yungun xi matitjun jan.

## 9

*Camandaja ngu cha rcá casahmi Jesús*

<sup>1</sup> Hya xi camá ne, xi cavatju Jesús ngu cahndè jan ne, cavèè me ngu cha rcá xi ha cuatjin rcá cha hisca hya xi catsin cha. <sup>2</sup> Hane xuta ladu rè me jan ne, cuitjin cavinenguise me:

—Maestro, ¿yo casahmi cjuatsehen xi cuatjin rcá cha xi catsin cha? ¿Há suvá cha vihi ne?, o há tsajin ne, ¿há xutacha rè cha? —Cuatjin cavinenguise me.

<sup>3</sup> Ngajan xi Jesús ne, cuitjin cafayangui me:

—Hacuain cha vihi ne, hacuain xutacha rè cha casahmi ne cjuatsehen ta cuatjin camá cojo sa xi ngatsè rè cjuandaja xi sahmi Nina cojo cha vihi ne, cumatsejen xa xi sahmi Nina. <sup>4</sup> Meje rè xi nihña xa rè me xi catsingatju ná jinguyèjè rè xi hasen sa ta cuechú hora xi cumajñu, hane tsajin yo xi cuma sahmi xa. <sup>5</sup> Jinguyèjè rè xi tejña ngeuhe ngasunhndè ne, sacuaha hasen xi cuma rè xuta ngasunhndè ngahan. —Cuatjin cafayangui Jesús.

<sup>6</sup> Xi cavatju cachja Jesús cjaua vèhè ne, sehe cacandi me natya rè me nangui, hane casahmi me hitsè ndasi, sehe catsufè me tuxcun cha rcá jan. <sup>7</sup> Sehe cachja me cojo cha cuitjin:

—Tángun tinchacun ngajan nda Siloé. —Cuatjin cachja Jesús. (Siloé ne, meje cuichja Caningatjun rè.)

Hya xi camá ne, quiji cha cavinchacjan cha. Xi tu cavuya cafe cha ndava cha ne, ha tsejen rē cha. <sup>8</sup> Ngajan xi xuta xi siu tahndee ndava cha chojo me xi cavēē rē cha xi casahmi cha caridad ne, cavinenguise xicjin me cuitjin:

—¿Hacuiin cha vēhē xi vēña sahmi caridad jan ni? —Cuatjin cavinenguise me xi cuacun jan.

<sup>9</sup> Ngujo me jan ne, cuitjin cachja me:

—Juun, hacui cha vē. —Cuatjin cachja me.

Hane ngujo nga me ne, cuitjin cachja me:

—Cuatjin tsejen, peru hacuiin cha. —Cuatjin cachja me.

Hane suvá cha ne, cuitjin cachja cha:

—Ngahan vi. —Cuatjin cachja cha.

<sup>10</sup> Ngajan xi xuta xi cuacun jan ne, cavinenguise me cha cuitjin:

—¿Hacutjin camá xi camandaja tūxcun ngayun? —Cuatjin cachja me.

<sup>11</sup> Ngajan xi cha vēhē ne, cuitjin cafayangui cha:

—Me xi hmí rē Jesús ne, casahmi me hitsē ndasi, sehe catsufē me tūxcun, sehe cachja me chojo ná xi cjuē cuinchacjan nda Siloé. Hane xi cējē cavinchacjan jan ne, camatsejen ná. —Cuatjin cafayangui cha.

<sup>12</sup> Cavinenguise nga me cha cuitjin:

—¿Jani tacun me ni? —Cuatjin cavinenguise me.

Hane cha vēhē ne, cuitjin cachja cha:

—Hveen. —Cuatjin cachja cha.

*Fahatáha cha fariseo cha xi camandaja tuxcun*

<sup>13</sup> Ngajan xi xuta xi cuacun jan ne, quijicojo me cha xi sehe camatsejen rē jan hiscan xi siu cha fariseo. <sup>14</sup> Quihndē ne, nixtin xi casahmi Jesús ndasi hane casahmi me xi camandaja tuxcun cha rcá jan ne, nixtin xi chjahájenda rē. <sup>15</sup> Ngajan xi cha fariseo xi cuacun jan ne, hacuaha cavinenguise cha cha xi camandaja tuxcun jan hacutjin camá xi camatsejen rē cha. Hane cuitjin cafayangui cha:

—Ndasi catsufē me tūxcun, sehe cējē cavinchacjan, hane cama camatsejen ná. —Cuatjin cafayangui cha.

<sup>16</sup> Hane ngujo cha fariseo xi cuacun jan ne, cuitjin cachja cha:

—Me vēhē ne, tsejen xi hacuiin Nina catsingatju rē me, tsēhē xi faharcuaain me nixtin xi chjahájenda rē. —Cuatjin cachja cha.

Peru ngujo nga cha ne, cuitjin cachja cha:

—Cumaji sahmi me cjuarcun xi cuacun vēhē sa xi ngu cha tsehen me. —Cuatjin cachja cha.

Hacuiin ngu tangun ni camá cjua rē cha. <sup>17</sup> Hane ngajan xi cavuya cachja nga cha chojo cha xi camandaja tuxcun jan cuitjin:

—Quihndē ta casahmi me xi camandaja tuxcuin ne, ¿mé noje tsēhē me? —Cuatjin cachja cha.

Hane cha xi camandaja tuxcun jan ne, cuitjin cafayangui cha:

—Ngu profeta me. —Cuatjin cafayangui cha.

<sup>18</sup> Peru xutaxa rē yungun jan ne, macjaain rē me xi titjun ne, rcá cha hane quihndē ne, tsejen rē cha. Hisca xi cajindaya me xutacha rē cha xi camandaja tuxcun jan ne, <sup>19</sup> sehe cafahatáha rē me cuitjin:

—¿Há cha vihi xi quihndi nuju, cha xi nújun xi ha cuatjin rcá hisca hya xi catsin? ¿Hacutjin camá xi quihndē ne, tsejen rē cha? —Cuatjin cafahatáha me.

<sup>20</sup> Ngajan xi xutacha rē cha ne, cuitjin cafayangui me:

—Hyin xi cha vihi xi quihndi nihi cha, hacuaha ha cuatjin rcá cha hisca hya xi catsin cha.

<sup>21</sup> Peru hyín hacutjin camá xi quihndē ne, tsejen rē cha. Hacuaha hyín yo xi casahmi xi camandaja tuxcun cha. Chjinengunsun rē cha ta ha jiya nu rē cha. Suvá cha sua nuju cha camaquixi rē cha. —Cuatjin cafayangui me.

<sup>22</sup> Cuatjin cachja xutacha rē cha ta, tsēhē xi tsacjun me xutaxa rē jan ta, xutaxa rē xi cuacun jan ne, ha casahmi tangun me cjua xi yo xi cuichja xi Nina catsingatju me Jesús ne, tsichohotje rē me yungun. <sup>23</sup> Vēhē xi xutacha rē cha ne, cachja me: “Ha jiya nu rē cha ne, chjinengunsun rē cha.”

<sup>24</sup> Vēhē xi cajindaya nga xutaxa rē majo ndiya cha xi camandaja tuxcun jan, hane sehe cachja me chojo cha cuitjin:

—“Vēē Nina”, noje xi cuatjin camá. Ngayin ne, hyin xi me xi casahmi xi camandaja tuxcuin ne, ngu cha tsehen me. —Cuatjin cachja xutaxa rē jan.

<sup>25</sup> Ngajan xi cha vēhē ne, cuitjin cafayangui cha:

—Ngahan ne, hveen sa xi ngu cha tsehen me. Ngu xcusun ni xi hvë ne, titjun ne, rcá ngahan, peru quihndë ne, tsejen ná. —Cuatjin cafayangui cha.

<sup>26</sup> Hane xutaxa rë jan ne, cavinenguise me cha cuitjin:

—¿Mé casahmi me cojo ri? ¿Hacutjin casahmi me xi camandaja tuxcuin? —Cuatjin cavinenguise me.

<sup>27</sup> Hane cha vëhë ne, cuitjin cafayangui cha:

—Ha cachjá cojo nuju ne, mijí cuetuhunrcun. ¿Mé má meje cuisinuju nga ngundiya? ¿Há cojo ngayun meje cuisuhun ladu rë me? —Cuatjin cafayangui cha.

<sup>28</sup> Hane xutaxa rë jan ne, cacjan me cojo cha, cuitjin cachja me:

—¡Ngaye xi ladu rë cha vëhë má ngaye! ¡Ngayin ne, ladu rë Moisés má ngayin! <sup>29</sup> Ngayin ne, hyin xi Moisés ne, cachja me cjuu xi casua Nina me, peru cha vëhë ne, hisca hyiin jani cavetju cha canduva cha. —Cuatjin cachja me.

<sup>30</sup> Ngajan xi cha vëhë ne, cuitjin cafayangui cha:

—¡Jemu sihya xi ngayun ne, hyúun jani cavetju me canduva me, handasa casahmi me xi camandaja túxcun ngahan! <sup>31</sup> Ha hyan ta Nina ne, fahacuendaain me cjuu xi chja xuta tsehen. Peru sa xi ngu xuta faharcun me Nina hacuaha sahmi me hacutjin xi meje rë Nina ne, me vëhë ne, fahacuenda Nina cjuu xi chja me. <sup>32</sup> Cjëë camahani cuinuhya rë xi ngu xuta sahmi me xi mandaja tuxcun ngu xuta xi rcá me hisca hya xi catsin me. <sup>33</sup> Sa xi hacuün Nina catsingatju rë me vëhë ne, tsajin camahani mé xi cuma sahmi me. —Cuatjin cafayangui cha.

<sup>34</sup> Ngajan xi xutaxa rë jan ne, cuitjin cachja me:

—¡Ngaye ne, ngajñi rë cjuatsehen camahani catsin ngaye! ¡Machjiriin camahani ngaye xi cuicoye nijí! —Cuatjin cachja me.

Sehe cavaxë me cha candatsen.

#### *Xuta xi jñu tsëhë me*

<sup>35</sup> Hya xi camá ne, camachaya rë Jesús xi cavaxë xutaxa rë yungun cha xi camandaja tuxcun jan candatsen. Hane xi casacu xicjin Jesús cojo cha ne, cachja me cojo cha cuitjin:

—¿Há mangutacún ngayun cojo me xi Quihndi rë Xuta Jain? —Cuatjin cachja me.

<sup>36</sup> Hane cha vëhë ne, cuitjin cafayangui cha:

—Tatá, tinújun cojo ná yo me vë ne, cojo sa xi cumangu cáacun cojo rë me. —Cuatjin cafayangui cha.

<sup>37</sup> Ngajan xi Jesús ne, cuitjin cachja me cojo cha:

—Ngayun ne, ha cahyun me ta, ngahan xi tichjá cojo nuju vi ne, ha ngahan xi Quihndi rë Xuta Jain ngahan. —Cuatjin cachja me.

<sup>38</sup> Hane cha vëhë ne, cuitjin cachja cha:

—Mangucáacun, Tatá. —Cuatjin cachja cha, sehe cafarharcun cha me.

<sup>39</sup> Ngajan xi Jesús ne, cuitjin cachja me:

—Canduvá ngahan ngasunhdë vi ne, xi tsichúva xuta cojo cjuatacun rë me, sehe ngajan xi xuta xi cjëë ndaja cuijne rcu me cjuu rë Nina ne, cuijnercundaja me, hane xuta xi cuenda chja me xi jemu ndaja vijne rcu me cjuu rë Nina ne, cumajñu tsëhë me. —Cuatjin cachja Jesús.

<sup>40</sup> Hane ngujo cha fariseo xi hinchacun tiña hiscan secun Jesús ne, cahndë cha cjuu vëhë, hane cuitjin cachja cha:

—¿Peru hacuün cojo ngayin jñu tsijin? —Cuatjin cachja cha.

<sup>41</sup> Ngajan xi Jesús ne, cuitjin cachja me:

—Sa xi jñu tsujun ne, tsajin jyë nuju. Peru quihndë xi nújun xi hacuün jñu tsujun ne, ngajan matsejen xi tjin jyë nuju. —Cuatjin cachja Jesús.

## 10

### *Ejemplu tsëhë paxtu rë chu tsánga*

<sup>1</sup> Ngajan xi Jesús ne, cachja sa me cuitjin:

—Cuichjá cojo nuju cjuaquixi ta xuta xi visiin me táha tingotjo hnhua rë chu tsánga ta tu táha xín mijisun me hnhua ne, me vëhë ne, chëjë me hacuaha fahatahá cjuachan me.

<sup>2</sup> Peru me xi visehen táha tingotjo hnhua ne, me vëhë xi paxtu rë chu tsánga. <sup>3</sup> Cha xi quitahá cuidadu rë tingotjo hnhua ne, vuxaha cha tingotjo tsëhë me vëhë. Chu tsánga ne, vihndë chu xta rë me, hane jindaya me chu xi tsëhë me, jimangu chu cojo ñihi rë chu, sehe vaxë me chu. <sup>4</sup> Hane hya xi ha cavaxë me yëjë chu xi tsëhë me ne, sehe cjui titjun me, hane chu tsánga ne, fitjengui chu me, tsëhë xi vëë chu xta rë me. <sup>5</sup> Peru jingu sa xuta ne, hatuxa cjuiin tjenguiin chu me ta tu cuanga chu tsëhë me, tsëhë xi hvíin chu xta rë jingu sa xuta jan.

<sup>6</sup> Cuatjin cachja Jesús ejemplu vëhë cojo xuta xi cuacun vë, peru cajni rcu me mé vijne cja xi cachja Jesús.

*Sacuaha paxtu rë chu xi ndaja sahmi cuidadu rë chu má Jesucristu*

<sup>7</sup> Jesús ne, cachja sa me cojo xutaxa rë xi cuacun jan cuitjin:

—Cuichjá cojo nuju cjaquixi ta ngahan ne, sacuaaha tingotjo xi vatju chu tsánga ngahan.

<sup>8</sup> Yëjë ni cha xi cavetjujñi ngajñi rë xuta xi meje cumatitjun cha hya xi chaja sa cjuëhë ngahan ne, sacuaaha cha chëjë cha, cha fahatahá cjuachan cha. Peru xuta ladu rë Nina ne, casahmicuendaain me cha, sacuatjin rë chu tsánga xi fitjenguiin chu jingu sa xuta. <sup>9</sup> Ngahan ne, sacuaaha tingotjo ngahan. Sa xi ngu xuta cuisehen me táha tingotjo jan ne, cuetjutje me. Hacuaha tsajin mé cumacjin cacun me cuetju cuisehen me jan, hane tsajin mé cuma chaja rë me. <sup>10</sup> Cha chëjë ne, xi vinduva cha ne, súvá ni xi tsichëjë cha, tsiquehen cha, hacuaaha tsinguetsun cha. Peru ngahan ne, canduvá cojo sa xi sacú rë xuta cjuahñu xatsë, hacuaaha jercu sacú camahani rë me cjuahñu vëhë.

<sup>11</sup> Ngahan ne, sacuaaha paxtu rë chu xi jemu ndaja fahácuenda chu tsánga. Paxtu ndaja jan ne, hisca sua me jojo rë me xi cueya me ngatsë rë chu tsánga. <sup>12</sup> Ngu mosu xi hacuiin paxtu rë chu má cha, hacuiin tsëhë cha chu tsánga ne, xi scuëë cha xi nduva tiña chu lobo ne, viyujutahá ni cha chu tsánga jan, hane vanga cha. Hane chu lobo jan ne, faha chu ngujo chu tsánga, sehe tsicangacojo chu chu xi yahnga jan tu ngeue tu ngajan. <sup>13</sup> Cuatjin sahmi cha ta, tsëhë xi mosu ni má cha, hane marcuain rë cha tsëhë chu tsánga. <sup>14-15</sup> Ngahan ne, sacuaaha paxtu ndaja jan ngahan. Sacuatjin vëë ná Nahmi naha hane ngahan ne, hvë Nahmi naha ne, ha chuva vëhë ni ne, ngahan ne, hvë chu tsahan hane chu tsahan ne, vëë chu ngahan. Hacuaha suá jojo naha xi cueya ngatsë rë chu. <sup>16</sup> Tjin sa ná chu tsánga xi hacuiin tsëhë hnchua vihi chu. Chu xi cuacun vë ne, hacuaaha meje rë xi sahme chu cuidadu. Xi cuihndë chu xta naha ne, cuinduvatjengui chu ngahan, hane cuma tangun chu cojo chu xi ha tisahme cuidadu, hacuaaha ngu ni ngahan xi paxtu rë chu.

<sup>17</sup> Ngahan ne, hmu cacun ná Nahmi naha, tsëhë xi suá jojo naha xi cueya, hane sehe sahme xi cúa nga cjuahñu. <sup>18</sup> Tsajin yo xi cjuahatahá cjuahñu naha ta ngahan ne, cojo cjuatacun naha suva suá jojo naha xi cueya. Tjin ná chuva rë xi suá jojo naha, hacuaaha tjin ná chuva rë xi sahme xi cúa nga cjuahñu. Cuatjin cavitexa ná Nahmi naha xi sahme. —Cuatjin cachja Jesús.

<sup>19</sup> Hya xi camá ne, ngu ndiya nga hacuiin ngu tangun ni camá nga cja rë xutaxa rë jan ngatsë rë cja vëhë. <sup>20</sup> Hane jemu cjin me xi cuacun jan ne, cuitjin cachja me:

—jjiya xitsehen xahasen rë cha, vëhë xi sca rë cha! ¡Venguiin chji rë xi cuatjin visifñu cja rë cha! —Cuatjin cachja me.

<sup>21</sup> Peru yahnga nga me ne, cuitjin cachja me:

—Cja vëhë ne, hacuiin cja rë ngu xuta xi jjiya xitsehen xahasen rë me. ¿Ngu xitsehen ne, cumaji sahmi xi cumandaja tuxcun ngu xuta xi rcá me? —Cuatjin cachja yahnga me jan.

*Tsitjungi xutaxa rë yungun Jesucristu*

<sup>22</sup> Quihndë ne, hya xi cavechú nixtin rë chan hnchan ne, camá suhi rë yungun xi matitjun ngajan Jerusalén. <sup>23</sup> Hane Jesús ne, tsujyihya me ndatsen yungun xi matitjun, ngajan Ngahma Ndiha tsëhë Salomón. <sup>24</sup> Hane xutaxa rë yungun jan ne, quiji caxinchacundee me Jesús, sehe cachja me cojo me cuitjin:

—¿Jani hisca hya tuhun niji cjaquixi? Sa xi ngayun jain xi tsingatju Nina ngayun ne, tinñunquixun cojo niji. —Cuatjin cachja xutaxa rë jan.

<sup>25</sup> Ngajan xi Jesús ne, cuitjin cafayangui me:

—Ha cachjá cojo nuju, peru macjaain nuju. Xcusun xi tisahme sacuatjin vititexa ná Nahmi naha ne, xcusun vëhë ni tsingacun yo ngahan. Peru ngayun ne, macjaain nuju, <sup>26</sup> tsëhë xi hacuiin xuta ladu naha má ngayun. <sup>27</sup> Xuta xi ladu naha má me, tangun me sacuaaha chu tsánga. Me xi cuacun vë ne, vëë me xta naha, hacuaaha ngahan ne, hvë me, hane fitjengui ná me. <sup>28</sup> Ngahan ne, suá rë me cjuahñu xatsë, hane hatuxa tsajin nu tsajin nixtin xi cjue hasen rë me xcun cjuañihi, hacuaaha tsajin yo cuaxëxin rë me xi siu ntsa me. <sup>29</sup> Xuta xi cuacun casua ná Nahmi naha ne, hitsë sa venguichji rë me xi cuma rë yëjë sa xcusun. Hacuaha tsajin yo cuma cuaxëxin rë me xi siu tsja Nahmi naja me. <sup>30</sup> Ngahan cojo Nahmi naja ne, ngu ni xahasen niji, ngu ni cjuatacun niji, ngu ni hasen niji. —Cuatjin cafayangui Jesús.

<sup>31</sup> Ngajan xi xutaxa rë xi cuacun jan ne, cafaha nga me ndoyojo xi cuetaha me Jesús xi tsiquehen me me. <sup>32</sup> Hane Jesús ne, cuitjin cachja me:

—Ngahan ne, jemu cjin xcusun ndaja casahme ngajñi nuju sacuatjin cavitexa ná Nahmi naja. Hane çjarë xcusun vëhë tsëhë xi cuetuhun ná ndoyojo ni? —Cuatjin cachja Jesús.

<sup>33</sup> Ngajan xi xutaxa rë jan ne, cuitjin cafayangui me:



—Hacuiin tsêhê ngu xcusun ndaja xi canihñi xi cuetihin ri ndyojo ta ngatsê rê xi nixcuehyi Nina, ngatsê rê xi handasa ngu xuta ni ngaye ne, peru noje xi tangun ngaye cojo Nina. —Cuatjin cafayangui me.

<sup>34</sup> Ngajan xi Jesús ne, cuitjin cachja me:

—Ley rê Moisés xi vitexa nuju ne, ha ndaja hyun xi camahindu cjuua vihi xi cachja Nina: “Ngayujun ni ne, nina ngayun.” Cuatjin camahindu. <sup>35</sup> Ngayejen ni ne, ha hyan ta cjuua xi chja xcun xujun rê Nina ne, hatuxa cjuaquixi jain. Hane Nina ne, cachja me nina tsêhê xuta xi cuacun cafahatsja cjuua rê me. <sup>36</sup> Quihndê ta Nina cavaxijin ná me hacuaha catsingatju ná me ngeuehe ngasunhdê ne, ¿hacutjin má xi nújun xi ngahan ne, choho chjá, tsêhê xi cachjá xi Quihndi rê Nina ngahan ni? <sup>37</sup> Sa xi ngahan tisahmee xcusun xi cavitexa Nahmi naha xi sahme ne, xicamacjaain nuju ngahan. <sup>38</sup> Peru sa xi tisahme ne, handasa cumacjaain nuju ngahan ne, ndastu tsêhê xcusun xi sahme ne, catamacjain nuju, cojo sa xi cuijne rcun ngundiya ni xi Nahmi naja ne, jiya me xahasen naha, hane ngahan ne, tejñaya xahasen rê me. —Cuatjin cachja Jesús.

<sup>39</sup> Ngajan xi casahmi nga xutaxa rê jan cjuandya xi cjuaha me Jesús, peru Jesús ne, cavetjutje me tsêhê xuta jan quiji me.

<sup>40</sup> Hya xi camá ne, cavetju Jesús quiji nga me ngunda vêhê tsêhê Ndajyê Jordán, ngajan hiscan xi casetaha Juan cavitenda me xuta ntsacu cavetsihin. Hane ngajan casetaha me.

<sup>41</sup> Hane jemu cjín xuta quijitjengui me Jesús. Hane cuitjin cachja xingu xingu me cojo xicjin me:

—Juan ne, handasa casahmii me cjuarcun, peru yêjê ni cjuua xi cachja me tsêhê me vihi ne, cjuaquixi jain.

<sup>42</sup> Hane jemu cjín xuta camangu cacun me cojo Jesús ngajan cahndê vêhê.

## 11

### *Cjuaveya rê Lázaro*

<sup>1</sup> Tacun ngu cha hmu rê xi hmí rê Lázaro, ngu cha Betania, nangui rê na María cojo na Marta tichja na. <sup>2</sup> Na María vêhê ne, na vêhê xi cavitejnu na ntsacu Nai naja ngu xcusun aceite xi jemu ndaja jne camahani hacuaha jercu hnga chji rê, sehe catsixiya na cojo tsjarcu na. Na vêhê xi hmu rê cha Lázaro hntse na. <sup>3</sup> Ngajan xi catsijo na vêhê ne, catsingatju na cjuua vihi tsêhê Jesús:

—Tatá, chutsujun ni, cha xi jemu vinga nuju jan ne, jemu hmu rê cha. —Vêhê cjuua xi catsingatju na.

<sup>4</sup> Hane xi cahndê Jesús cjuua vêhê ne, cuitjin cachja me:

—Chíhin vêhê ne, cuetjincaain cjuaveya rê cha Lázaro cojo ta xi cuetjucaa ne, cuma jyê cuma hnga Nina cojo Hasen rê me, cojo sa xi Quihndi rê Nina ne, hacuaha cuma jyê cuma hnga me cojo Hasen rê me ngatsê rê chíhin vêhê. —Cuatjin cachja Jesús.

<sup>5</sup> Quihndê ne, Jesús ne, jemu vinga rê me na Marta cojo tichja na cojo cha Lázaro. <sup>6</sup> Peru xi camachaya rê Jesús xi hmu rê cha ne, casetaha me jo nixtin sa hiscan xi ha quitahá me jan. <sup>7</sup> Xi cavatju vêhê ne, sehe cachja me cojo xuta ladu rê me jan cuitjin:

—Cuyan cuanguen nga ngu cahndê tsêhê distritu Judea. —Cuatjin cachja me.

<sup>8</sup> Ngajan xi xuta ladu rê me jan ne, cuitjin cachja me:

—Maestro, xutaxa rê yungun jan ne, ¿sehe tiña nixtin xi casahmi me cjuandya xi tsiquehen nuju me cojo ndyojo! ¡Xi meje rê ne, cuanguun ngajan! —Cuatjin cachja me.

<sup>9</sup> Hane Jesús ne, cuitjin cafayangui me:

—¿Hacuiin tejó hora tjin rê xi ngu nixtin ni? Quihndê xi cjêê cuechú hora xi cuichja Nina xi cueya ngahan ne, tsajin mé cuma ná, sacuatjin xtenguin naja xi nguixtin tsêhê xi tsejen naja hasen rê tsuhi. <sup>10</sup> Peru xi cuechú hora xi cuichja Nina xi cueya ngahan ne, cueya, sacuatjin xtengui naja xi nixten tsêhê xi tsajin hasen xi cuma naja.

<sup>11</sup> Cuatjin cafayangui Jesús cjuua vêhê, hane sehe cachja sa me cuitjin:

—Cha amigu naja, cha Lázaro ne, cafañafê cha. Peru cjuê ngahan tsingásca rê cha. —Cuatjin cachja Jesús.

<sup>12</sup> Ngajan xi xuta ladu rê me jan ne, cuitjin cachja me:

—Tatá, sa xi cafañafê jain cha ne, vêhê tsejen xi cumandaja cha. —Cuatjin cachja xuta ladu rê me jan.

<sup>13</sup> Quihndê ne, cjuua xi cachja Jesús vê ne, tsêhê cjuaveya rê cha Lázaro. Peru xi má rê xuta ladu rê me jan ne, tichja me tsêhê nijñá ni rê cha. <sup>14</sup> Ngajan xi Jesús ne, cachja quixi me cuitjin:

—Cha Lázaro ne, cahme cha. <sup>15</sup> Hane ngahan ne, jemu ndama ná xi hacuiin ngajan tejña hora vêhê ta, xi chutsujun hacutjin cuma ne, cumangu tacún cojo ná. Peru cuanguen tjenguen nima. —Cuatjin cachja Jesús.

<sup>16</sup> Ngajan xi Tomás, me xi chja me tsêhê cha Lihma ne, cuitjin cachja me cojo xuta ladu rê Jesús xi yahnga jan:

—Hacuaha cuanguen ngayaan, cojo sa xi cueyan tangun cojo rê me. —Cuatjin cachja Tomás.

Sehe cavetju yêjê me quiji me cojo Jesús.

*Sua Jesús cjuahñu hacuaha tsicuya me nima cjuahñu*

<sup>17</sup> Hya xi camá ne, xi cafehe me ngajan Betania ne, camachaya rê Jesús xi ha tjin rê ñuju nixtin xi jiyaniji nima Lázaro. <sup>18</sup> Betania jan ne, sacuaha chuya rê jyan kilómetro tacun tsêhê Jerusalén. <sup>19</sup> Hane jemu cjin xuta quiji tjengui me na Marta cojo na María xi sua me na cjuetacun tsêhê cjuaveya rê hntse na. <sup>20</sup> Hane xi camachaya rê na Marta xi nduva Jesús ne, cavetju na quiji cafahatsja na me. Peru na María ne, cavêjña ni na ndava na. <sup>21</sup> Hya xi camá ne, xi casacu xicjin na Marta cojo Jesús ne, cuitjin cachja na cojo rê me:

—Tatá, sa ngayun nechun nguehe ne, cahmii nima xingueen. <sup>22</sup> Peru hvê ta hisca quihndê ne, tu mé ni xi chjahyun rê Nina ne, sua nuju me. —Cuatjin cachja na.

<sup>23</sup> Ngajan xi Jesús ne, cuitjin cachja me cojo rê na:

—Nima xingun ne, cuya cjuahñu. —Cuatjin cachja Jesús.

<sup>24</sup> Hane na Marta ne, cuitjin cachja na:

—Hvê ta cuya nima xingueen cjuahñu hya xi hacuaha yêjê nima cuya cjuahñu, nixtin xi tischuva Nina sa nima sa xuta. —Cuatjin cachja na.

<sup>25</sup> Ngajan xi Jesús ne, cuitjin cachja me cojo rê na:

—Ngahan xi suá cjuahñu hacuaha tsicuya nima cjuahñu. Xuta xi mangucacun me cojo ná ne, ha ndasa cueya me ne, peru cuya me cjuahñu. <sup>26</sup> Hane yêjê xuta xi tjin rê me cjuahñu xatsê hacuaha mangucacun me cojo ná ne, hatuxa tsajin nu tsajin nixtin xi cjue hasen rê me xcun cjuahihi. ¿Há macjain nuju cjuá vêhê? —Cuatjin cachja Jesús.

<sup>27</sup> Ngajan xi na vêhê ne, cuitjin cafayangui na:

—Juun, macjain ná, Tatá. Macjain ná xi ngayun xi catsingatju nuju Nina, ngayun xi Quihndi rê Nina ngayun. Hacuaha ngayun xi jemu cavinechinyin nuju xi cuinduvun ngasunhndê. —Cuatjin cafayangui na Marta.

*Jihnda Jesucristu xcun tsjun rê nima Lázaro*

<sup>28</sup> Xi café cachja na Marta cuatjin ne, sehe cavuya na quiji jaha na na María tíchja na. Hane xi cafehe na jan ne, sehe cajindayahma na na María, cuitjin cachja na:

—Cafehe maestru, hane jindaya me ngaye. —Cuatjin cachja na.

<sup>29</sup> Xi tu cahndê na María cjuá vêhê ne, marcu macjain cavisatjen na quiji tjengui na Jesús.

<sup>30</sup> Quihndê ne, cjêê sa cuisehen Jesús nandya ta secun cuaaha me cahndê hiscan cavechútaha na Marta me. <sup>31</sup> Hane xuta xi siu cojo na María ndava na xi tisua me na cjuetacun ne, xi cavêê me xi marcu macjain cavisatjen na quiji na ne, quiji tjengui me na. Xi má rê me ne, xcun tsjun cjuí na, cojo sa xi ngajan squihnda na.

<sup>32</sup> Hane xi cafehe na María hiscan secun Jesús ne, xi cavêê na me ne, quiji caticjaxcun na xcun me, sehe cachja na cuitjin:

—Tatá, sa xi ngayun nechun nguehe ne, cahmii nima xingueen. —Cuatjin cachja na.

<sup>33</sup> Hane xi cavêê Jesús xi cuatjin jihnda na hacuaha jihnda yêjê xuta xi ticojo na jan ne, camandya cacun me, jemu choho camahani camá rê xahasen rê me. <sup>34</sup> Hane cuitjin cavinenguise me:

—¿Jani tacun tsjun xi caveyun nima? —Cuatjin cavinenguise me.

Hane xuta jan ne, cuitjin cafayangui me:

—Tatá, nduvun chutsujun. —Cuatjin cafayangui me.

<sup>35</sup> Hane cajihnda Jesús. <sup>36</sup> Ngajan xi xuta jan ne, cuitjin cachja me ngajñi rê me:

—Chutsujun ni hacutjin catsihmu cacun me nima. —Cuatjin cachja me.

<sup>37</sup> Peru ngujo me ne, cuitjin cachja me:

—Me vihi xi casahmi me xi camandaja tuxcun cha rcá jan ne, ¿há camaji casahmi me xi cahmii nima vêhê? —Cuatjin cachja ngujo xuta jan.

*Cavuya nima Lázaro cjuahñu*

<sup>38</sup> Ngajan xi Jesús ne, ngu ndiya nga jemu camandya cacun me. Sehe quiji me xcun tsjun. Tsjun jan ne, ngu ngujo, hane tingotjo rê ne, titsa ngu ndyojo. <sup>39</sup> Ngajan xi Jesús ne, cuitjin cachja me:

—Chjuhunxun ndyojo vê. —Cuatjin cachja me.

Ngajan xi na Marta, tíchja nima ne, cuitjin cachja na:

—Tatá, ha choho jne vê ta, ha tjin rê ñuju nixtin. —Cuatjin cachja na.

<sup>40</sup> Hane Jesús ne, cuitjin cachja me cojo rê na:

—Ha cachjá cojo nuju ta sa xi cumacjain nuju cjua naha ne, ngayun ne, chutsujun hacutjin jyê hnga Nina cojo Hasen rê me. —Cuatjin cachja Jesús.

<sup>41</sup> Hya xi camá ne, cachjaháxin rê ndyojo jan. Hane hora vèhê cavutsejenniji Jesús ngahnga, sehe cachja me cuitjin:

—Ngayun Nahmi naha, suá nacuechji nuju ta canihñucueundun cjua xi cachjá cojo nuju. <sup>42</sup> Hacuaha ha hvê ta ngayun ne, hatuxa nihñucueundun cjua naha. Vèhê xi hacuiin nguyê xi cuichjá cojo nuju cjua vihi, peru ngatsê rê xuta xi hinchacundee vi ne, vèhê xi cuitjin tichjá, cojo sa xi cumacjain rê me xi ngayun caningatjun ná. —Cuatjin cachja Jesús.

<sup>43</sup> Hane xi cajnetaha cachja me cuatjin ne, sehe ña cajindaya me cachja me cuitjin:

—¡Lázaro, tetjun! —Cuatjin cachja me.

<sup>44</sup> Hya xi camá ne, cavetju Lázaro tsèhê tsjun jan, tjinguiya tsjian ntsacu me, tjinguiya tsjian tsja me, hacuaha tjihñu xcun me cojo ngu pañutu. Hane Jesús ne, cuitjin cachja me cojo xuta jan:

—Chundecjun tsjian vè sehe cumandaya me. —Cuatjin cachja Jesús.

### *Meje cjuaha xutaxa rê yungun Jesucristu*

<sup>45</sup> Quihndê ne, jemu cjin xuta quiji cavusehenya rê na María hacuaha cavêê me hacutjin casahmi Jesús. Hane xuta xi cuacun jan ne, camangu cacun me cojo Jesús. <sup>46</sup> Peru ngujo xuta ne, quiji cachja me cojo cha fariseo hacutjin casahmi Jesús. <sup>47</sup> Ngajan xi yêjê nahmi xi matitjun cojo cha fariseo xi cuacun jan ne, casahmi me ngu junta. Hane xcun junta jan ne, cuitjin cachja me:

—¿Mé ndatjin nihña? ta cha xi cuajyihî vè ne, jemu tisahmi cha cjuarcun. <sup>48</sup> Sa xi tsajin mé xi nihña ne, yêjê xuta ne, cumangu cacun me cojo cha. Hane vèhê xi xutaxa rê Roma ne, cuma cjan rê me, hane cjuahatahá me yungun xi matitjun naja hacuaha cjuahatahá me gobiernu xi tinihña. —Cuatjin cachja me xi cuacun jan.

<sup>49</sup> Peru ngu me xi cuacun jan xi hmî rê Caifás, me xi hacuaha má nahmi xi matitjun tsèhê yêjê nahmi nu vèhê ne, cachja me cuitjin:

—Ngayun ne, hyún camahani. <sup>50</sup> Vijnii rcun xi ndaja tsujun xi ngu xihin ni cueya ngatsê rê yêjê ni xuta, hane hacuiin yêjê xuta cueya me. —Cuatjin cachja Caifás.

<sup>51</sup> Peru me vèhê ne, hacuiin cachja me cojo cjuatacun rê suvá me ta, ngatsê rê xi má me nahmi xi matitjun nu vèhê ne, cachja me cjua xi casua Nina me xi Jesús cueya me ngatsê rê xuta. <sup>52</sup> Peru hacuiin ngatsê rê suvá ni xuta tjê rê Israel ta hacuaha cueya me cojo sa xi sahmî tangun me yêjê quihndi rê Nina xi tinguitsojo, sehe cuma yêjê me sacuaha ngu ni xcusun xuta.

<sup>53</sup> Ngajan xi hisca nixtin xi cachja Caifás cuatjin ne, nahmi xi matitjun cojo cha fariseo xi cuacun jan ne, caviyuju me cjuatacun rê me xi tsiquehen me Jesús. <sup>54</sup> Vèhê xi Jesús ne, catsuyihyaaintê me nandya xi siu ladu rê distritu Judea ta cavetjuxin me tsèhê ngajan, quiji me ngu nandya xi hmî rê Efraín, tiña hiscan xi faha rê xi ha jemu xin camahani tsèhê nandya. Hane ngajan casetaha me cojo xuta ladu rê me.

<sup>55</sup> Quihndê ne, ha camatiña suhi tsèhê Pascua. Hane jemu cjin xuta quiji me Jerusalén chaja sa nixtin rê suhi jan xi cuma tyjahi me sacuatjin xi ha xcusun rê xutachanga. <sup>56</sup> Jemu siu me cuidadu há cjehe Jesús suhi jan. Hane jinguyêjê rê xi hinchacun me yungun xi matitjun jan ne, vinenguise xicjin me xingu xingu me cuitjin:

—¿Mé xi má nuju? ¿Há cuinduvaain me suhi? —Cuatjin cavinenguise xicjin me. <sup>57</sup> Quihndê ne, nahmi xi matitjun cojo cha fariseo xi cuacun jan ne, ha cavitexa me xi yo xi vèê hiscan tacun Jesús ne, sua cumachaya rê me, cojo sa xi chjahá rê Jesús.

## 12

### *Xtejnu aceite ntsacu Jesucristu*

<sup>1</sup> Jyun nixtin chaja sa xi cuechú suhi tsèhê Pascua ne, cavuya quiji Jesús ngajan Betania, hiscan xi tacun cha Lázaro, cha xi catsicuya Jesús cjuahñu hya xi cahme cha. <sup>2</sup> Hane ngajan casehenndaja ngu comida xi sinê me. Na Marta tivincha na comida, peru cha Lázaro ne, cojo cha tijinê cha cojo Jesús cojo me xi yahnga sa. <sup>3</sup> Hane na María ne, cafaha na ngu frascu xi hincha jo cuarto aceite nardo xi jemu ndaja jne hacuaha jemu hnga chji rê, quiji cavitejnu na ntsacu Jesús, sehe catsixiya na cojo tsjarcu na. Hane cahntsua ndihya jan ne, ña catsê rê cojo xta rê aceite jan. <sup>4</sup> Ngajan xi Judas Iscariote, ngu cha ladu rê Jesús, cha xi sahmî rê me entregadu ne, cuitjin cachja cha:

<sup>5</sup> —¿Mé má cuatjin casahmi na? Aceite vè ne, cuma xteña hane sacú chji rê jyan cientu nixtin xa xi sahmî ngu xuta, hane tujún vèhê ne, tahan rê xuta yuma. —Cuatjin cachja cha.

<sup>6</sup> Peru Judas ne, hacuiin tsèhê xi marcun rê cha tsèhê xuta yuma xi cuatjin cachja cha ta tsèhê xi chêjê cha, hacuaha cha vèhê tjin tsja cha tsá xi hincha yêjê tujún, hane jiya hora ne, tsichêjê cha tsê tsê. <sup>7</sup> Ngajan xi Jesús ne, cuitjin cachja me:

—Xicanújiin cojo rë na. Catetjo na xi tjin rë na hisca hya xi seyaniji ngahan. <sup>8</sup> Xuta yuma ne, yëjë nu yëjë nixtin ne, siu me cojo nuju, peru ngahan ne, hacuiin yëjë nu yëjë nixtin tejña cojo nuju. —Cuatjin cachja Jesús.

*Meje tsiquehen xutaxa rë yungun cha Lázaro*

<sup>9</sup> Hya xi camá ne, jemu xutacjín tséhë nandya xi siu distritu Judea ne, camachaya rë me xi Jesús ne, Betania quitahá me. Ngajan xi quiji xuta ngajan, hacuiin tséhë xi meje scuëë ni me Jesús ta hacuaha tséhë xi meje scuëë me cha Lázaro, cha xi catsicuya Jesús cjuahñu. <sup>10</sup> Hane nahmi xi matitjun jan ne, caviyuju cacun me xi hacuaha cojo cha Lázaro tsiquehen me cha, <sup>11</sup> tséhë xi ngatsë rë cha vëhé ne, jemu cjín xuta titsitjungui me nahmi jan, hane tijimangu cacun me cojo Jesús.

*Cafehe Jesucristu nandya Jerusalén*

<sup>12</sup> Xi camá nchujun jan ne, xutacjín xi cafehe suhi jan ne, camachaya rë me xi Jesús ne, hacuaha nduva me Jerusalén. <sup>13</sup> Hane cafaha me xca jne, sehe cavetju me quijitjengui me Jesús hiscan nduva me. Hane hisca jindaya me cachja me cuitjin:

—jJemu ndaja Nina! jJemu catsinchacun Nina me xi nduva vi tséhë xi Nina catsingatju rë me, me xi cumatitjun tsajan ngayaan xuta tjë rë Israel! —Cuatjin cajindaya me cachja me.

<sup>14</sup> Hane xi casacu rë Jesús ngu burru chihndë ne, sehe camiji me chu, sacuatjin camahindu tséhë me xcun xujun rë Nina hiscan xi chja cuitjin:

<sup>15</sup> jXicarcuun ngayun xuta Jerusalén; chutsujun ni, me xi matitjun tsujun ne, nduva me quisun me ngu burru chihndë!

<sup>16</sup> Hya xi cuatjin camá ne, xuta ladu rë Jesús ne, cajni rë me. Peru hya xi Jesús cama jyë cama hnga me cojo Hasen rë me ne, hya xi cavuya cjuahñu rë me hya catsinguitsjen xuta xi cuacun jan xi cuatjin camahindu tséhë Jesús hane cuatjin jain cavatju me camá.

<sup>17</sup> Xuta xi siu cojo Jesús hya xi cajindaya me cha Lázaro xi cuetju cha tséhë tsjun hacuaha catsicuya me cha cjuahñu ne, casua me camachaya rë jingu sa xuta hacutjin camá. <sup>18</sup> Vëhé xi xutacjín jan ne, cavetju me quijitjengui me Jesús, tséhë xi camachaya rë me xi casahmi Jesús cjuarcun vëhé. <sup>19</sup> Vëhé xi cha fariseo ne, cachja cha ngajñi rë cha cojo xicjin cha cuitjin:

—Cahyun ni ne, tsajin mé xi cuma nihña. Chutsujun ta yëjë ni xuta ne, tjengui rë cha. —Cuatjin cachja cha.

*Meje scutsejen ngujo xutaxín Jesucristu*

<sup>20</sup> Quihndë ne, ngajñi rë xuta xi quiji me suhi xi cjuaharcun me Nina ne, hinchajñi ngujo xutaxín. <sup>21</sup> Hane me xi cuacun vëhé ne, quijitjengui me Felipe, xuta Betsaida, ngu nandya tséhë distritu Galilea, hane cuitjin cachja me:

—Tatá, ngayin ne, meje cuisiajmi cojo Jesús. —Cuatjin cachja me.

<sup>22</sup> Ngajan xi Felipe ne, quiji cachja me cojo Andrés, sehe catsijo ni me quiji casua me camachaya rë Jesús. <sup>23</sup> Ngajan xi Jesús ne, cuitjin cachja me cojo rë me:

—Cavechú hora xi ngahan xi Quihndi rë Xuta Jain ngahan ne, cuma jyë cuma hnga ngahan cojo hasen naha. <sup>24</sup> Cuichjá cojo nuju cjuaquixi ta ngu tú rë trigu xi cjuinengui nangui ne, sa xi cueyaain ne, ha ngu tu tu ni má yëjë nu yëjë nixtin. Peru sa xi cueya ne, jemu cjín tjë sua. <sup>25</sup> Xuta xi vangui me súvá ni xi ndaja cjuahñu rë me nguehe ngasunhndë ne, titsichajá me cjuandaja xi sua Nina me cjuahñu xatsë. Peru xuta xi marcuaain rë me tséhë súvá ni xi ndaja cjuahñu rë me nguehe ngasunhndë ne, hatuxa sacú rë me cjuandaja xi sua Nina me cjuahñu xatsë. <sup>26</sup> Xuta xi meje cuisehen me ladu naha ne, catinduva tjengui ná me. Hane hiscan xi cuitejña ngahan ne, hacuaha ngajan cuejña me xi má ladu naha. Xuta xi má me ladu naha ne, sahmi jyë sahmi hnga Nina Nahmi naja me. —Cuatjin cachja Jesús.

*Chja Jesucristu tséhë cjuaveya rë me*

<sup>27</sup> Cachja sa Jesús cuitjin:

—Quihndë ne, jemu macjín cáacun. Peru ¿mé cuichjá ni? ¿Há cuichjá cuitjin: “Ngayun Nahmi naha, naxuntjun ná tséhë xcusun xi cuátju cuma quihndë?” Peru cuichjaan cuatjin ta, tséhë xi hatuxa canduvá xi cuatjin cuátju cuma. <sup>28</sup> Ngayun Nahmi naha, tuhun cumachaya rë xuta hacutjin jyë hnga ngayun cojo Hasen nuju. —Cuatjin cachja Jesús.

Ngajan xi canuhya rë ngu xta xi canduva ngajan ngahnga xi cachja cuitjin:

—Ha casuá camachaya rë me, hacuaha cúa suá nga cumachaya rë me. —Cuatjin cachja xta jan.

<sup>29</sup> Hane ngujo xuta xi hinchacun jan xi cahndë me xta jan ne, cachja me ta chuhun xi catsingá. Hane ngujo nga me ne, cachja me xi ngu ángel cachja cojo Jesús. <sup>30</sup> Ngajan xi Jesús ne, cuitjin cachja me cojo xuta jan:

—Hacuiin xi cuihndë ngahan xi cachja xta vëhë ta xi cuinuhyun ngayun. <sup>31</sup> Cavechú nixtin xi cuma chuva xuta cojo cjuatacun rë me. Cavechú nixtin xi cjuahatahá Nina gobiernu xi tisahmi Satanás. <sup>32</sup> Hane ngahan ne, hya xi tjunihnga ná tsëhë nangui ne, sahme xi xuta ne, cuisehen me ladu naha. —Cuatjin cachja Jesús.

<sup>33</sup> Xi cuatjin cachja Jesús ne, casua me camachaya rë xuta mé chuva rë cueya me. <sup>34</sup> Ngajan xi xuta jan ne, cuitjin cafayangui me tsëhë Jesús:

—Ngayin ne, hyin xi chja ley ta me xi Nina tsingatju rë ne, tsajin nixtin xi cueya me. ¿Hacutjin má xi nújun ngayun xi me xi Quihndi rë Xuta Jain ne, tjunihnga rë me? ¿Yo me xi Quihndi rë Xuta Jain vë ni? —Cuatjin cafayangui xuta jan.

<sup>35</sup> Ngajan xi Jesús ne, cuitjin cachja me cojo xuta jan: —Ha tu chúva sa nixtin xi ngahan xi sacuaa hasen ngahan ne, tejña ngajñi nuju. Tángun xcun sa cojo ndiya xi ha tivangun jinguyëjë rë xi tacun sa hasen ngajñi nuju, sa tu cuechútáha nuju jñú. Xuta xi cjui me ngajñi jñú ne, hvín me jani cjui me. <sup>36</sup> Vëhë xi jinguyëjë rë xi tejña ngajñi nuju ne, catamangu tacún cojo ná, cojo sa xi tsë rë xahasen nuju cojo cjuahasen naha. —Cuatjin cachja Jesús.

### *Jemu cjin xuta xi camanguaain cacun me cojo Jesucristu*

Hane xi cavatju cachja Jesús cjuá vëhë ne, cavetju me quijihma me tsëhë xuta jan.

<sup>37</sup> Handasa cavëë xuta xi jemu cjin cjuarcun casahmi Jesús ne, peru camanguaain cacun me cojo rë me. <sup>38</sup> Cuatjin camá xi cavetjucaa cjuá rë profeta Isaías xi camahindu xcun xujun rë Nina hiscan xi chja cuitjin:

Ngayun Nina niji, tsajin yo camacjain rë cjuá xi canújin;

Tsajin yo cajne rcu hacutjin xi hñu ngahñu rë Nina.

Cuatjin cachja profeta Isaías. <sup>39</sup> Vëhë xi xuta jan ne, camaji camangu cacun me cojo Jesús ta, tsëhë xi hacuaa cachja nga profeta Isaías cuitjin:

<sup>40</sup> Sacuaa ngu xuta xi tsihñu me xcun ngu nga xuta cojo sa xi cumatsijin rë me ne,

cuatjin casahmi jñu Nina tsëhë cjuatacun rë xuta, cojo sa xi cuijnii rcu me

hacuaa cuyaain me ladu rë Nina xi sahmi Nina xi cumandaja me.

<sup>41</sup> Cuatjin cachja Isaías cjuá vëhë ta, tsëhë xi cavëë me hacutjin jyë hnga Jesús cojo hasen rë me hane cuatjin cachja me tsëhë Jesús.

<sup>42</sup> Handasa cuatjin casahmi Nina ne, jemu cjin xutaxa rë camangu cacun me cojo Jesús. Peru tsëhë xi tsacjun me cha fariseo ne, catsinguiin me ngajñi rë xuta, sa tu cumachohotje rë me yungun. <sup>43</sup> Xutaxa rë xi cuacun vë ne, hitsë sa meje rë me xi sahmi yehe sahmi hnga xuta me, xi cuma rë xi sahmi yehe sahmi hnga Nina me.

### *Cjuá rë Jesucristu tsichuva rë xuta cojo cjuatacun rë me*

<sup>44</sup> Ngu ndiya nga jan ne, jemu hñu cachja Jesús cuitjin:

—Xuta xi manguacacun me cojo ná ne, hacuiin suva ni manguacacun me cojo ná ta hacuaa manguacacun me cojo Nina Nahmi naja, me xi catsingatju ná. <sup>45</sup> Hane xuta xi vijne rcu me yo ngahan ne, hacuaa vijne rcu me yo me xi catsingatju ná. <sup>46</sup> Ngahan xi sacuaa hasen xi cuma rë xuta ngahan ne, canduvá nguehe ngasunhndë, cojo sa xi yëjë xuta xi manguacacun me cojo ná ne, cjuë xi jñu tsëhë cjuatacun rë me. <sup>47</sup> Hane sa xi ngu xuta vetaha rcu me cjuá xi chjá peru faharcuaain me ne, ngahan ne, tsichuvaan me cojo cjuatacun rë me ta, tsëhë xi ngahan ne, hacuiin canduvá xi tsichúva xuta cojo cjuatacun rë me ta canduvá xi cuáxëtje me. <sup>48</sup> Xuta xi tsitjungui ná me hacuaa fahatsjaain me cjuá naha ne, ha tjin yo xi tsichuva rë me. Cjuá xi cachjá ne, cjuá vëhë xi tsichuva rë me nixtin xi tsichuva Nina sa nima sa xuta. <sup>49</sup> Ngahan ne, cjuá xi cachjá ne, hacuiin cachjá cojo cjuatacun naha suva ta Nina Nahmi naja, me xi catsingatju ná ne, suvá me cavitexa ná me hacutjin meje rë xi cuichjá. <sup>50</sup> Hane hvë ta cjuá xi vitexa me vëhë ne, sua naja cjuahñu xatsë. Vëhë xi cjuá xi chjá ne, suvá cjuá xi cavitexa Nina Nahmi naja.

## 13

### *Vane Jesucristu ntsacu xuta ladu rë me*

<sup>1</sup> Quihndë ne, cavechú nixtin xi chaja sa ngu nixtin xi cuma suhi tsëhë Pascua. Hane Jesús ne, ha vëë me xi cavechú hora xi cuetju me tsëhë ngasunhndë vihi, cjue tjengui me Nina Nahmi naja. Hatuxa catsihmu cacun me xuta ladu rë me xi siu ngasunhndë vihi, hacuaa hacuanitjin ni catsihmu cacun me hisca xi cahme me.

<sup>2</sup> Jesús cojo xuta ladu rë me ne, tijinë nguixun me. Hane cha Judas, quihndi rë Simón Iscariote ne, ha casahmi Satanás xi cuejña cacun cha xi sahmi entregadu cha Jesús. <sup>3</sup> Peru Jesús ne, ha vëë me xi ha cavejña Nina yëjë xcusun tsja me. Hacuaa ha vëë me xi hiscan tacun Nina canduva me, hane hacuaa ngajan ni cuya cjue nga me. <sup>4</sup> Hya xi camá ne, cavejña Jesús xi tijinë me jan ne, cavisatjenhnga me, sehe cavaxë me chingá rë me cavejñaxin me, hane cafaha me ngu toalla cavityanguitaha me. <sup>5</sup> Sehe cafaha me nandá

cojo nisu, hane cavetsihin cavane me ntsacu xuta ladu rë me hacuaha catsixiya me cojo toalla xi tyjanguitaha rë me jan.

<sup>6</sup> Hane xi caféhe me xcun Simón Pedru ne, cachja Pedru cuitjin:

—Tatá, ¿há xi ngayun cuanu ntsacú? —Cuatjin cachja Pedru.

<sup>7</sup> Ngajan xi Jesús ne, cuitjin cafayangui me:

—Xcusun xi tisahme vi ne, vijni rcun quihndë, peru ngascan ne, hya cuijne rcun. —Cuatjin cafayangui Jesús.

<sup>8</sup> Hane Pedru ne, cuitjin cachja me:

—¡Hatuxa tsajin nu tsajin nixtin xi ngayun cuanu ntsacú! —Cuatjin cachja me.

Ngajan xi Jesús ne, cuitjin cafayangui me:

—Sa xi cuánee ntsacun ne, hacuiin xuta ladu naha ngayun. —Cuatjin cafayangui Jesús.

<sup>9</sup> Ngajan xi Simón Pedru ne, cuitjin cachja me cojo Jesús:

—Tatá, sa cuatjin ne, ¡hacuiin suvá ni ntsacú ta hacuaha cojo ntsa cojo rcú tanu! —Cuatjin cachja me.

<sup>10</sup> Ngajan xi Jesús ne, cuitjin cafayangui me tséhë Pedru:

—Xuta xi ha cavinduya me ne, suvá ni ntsacu me meje rë xi cjuengui ta, tséhë xi ha tyjahi me. Ngayujun ni ne, ha tyjahi ngayun. Peru ngu ngayun ne, hacuiin cuatjin. —Cuatjin cafayangui Jesús.

<sup>11</sup> Tséhë xi ha vëë Jesús yo xi sahmi rë me entregadu, vëhë xi cachja me xi: “Hacuiin ngayujun xi tyjahi ngayun.”

<sup>12</sup> Hane xi cavatju cavane Jesús ntsacu xuta ladu rë me ne, sehe cavuya cavajá me chingá rë me, sehe quiji cafaha nga me cahndë rë me xcun maxë. Hane sehe cachja me cojo xuta ladu rë me cuitjin:

—¿Há vijne rcun xcusun xi casahme cojo nuju vë? <sup>13</sup> Ngayun ne, maestru nijj hacuaha nai nijj nújun tsahan. Hane ndatjin xi cuatjin nújun ta, tséhë xi cuatjin jain. <sup>14</sup> Quihndë ne, quihndë ta ngahan xi nai nuju hacuaha maestru nuju ngahan cavane ntsacun ne, hacuaha meje rë xi cuatjin cuanu ntsacu xingun xingu ngayun. <sup>15</sup> Ngahan ne, cavejñá nuju ngu ejemplu vë, cojo sa xi sacuaha xcusun xi casahme cojo nuju vë ne, hacuaha cuatjin nihñu. <sup>16</sup> Cuichjá cojo nuju cjuaquixi ta ngu mosu hndixahan ne, hacuiin hitsë sa venguichji rë xi cuma rë nai rë, hacuaha ngu xi ningatjun rë ne, hacuiin hitsë sa matitjun xi cuma rë me xi catsingatju rë. <sup>17</sup> Quihndë ta ha vijne rcun cjuá vëhë ne, jemu ndaja tsujun sa xi nihñu cuatjin.

<sup>18</sup> ‘Peru ngahan ne, hacuiin tichjá tsujun ngayujun ni ta ngahan ne, ha hvë yo xi cavaxejen. Peru meje rë xi cuetjucaa cjuá xi camahindu xcun xujun rë Nina xi chja cuitjin: “Cha xi cajiñë tangun cojo ná ne, camá cha condra naha.” Cuatjin camahindu. <sup>19</sup> Tichjá cojo nuju cjuá vëhë quihndë chaja sa xi cuetjucaa, cojo sa xi hya xi cuetjucaa ne, ngayun ne, cumacjain nuju xi Ngahan Vi hmí ná. <sup>20</sup> Cuichjá cojo nuju cjuaquixi ta xuta xi cjuahatsja me tu yo ni xi tsingátju ne, tangun sacuaha xi cjuahatsja ná me ngahan suva. Hane xuta xi cjuahatsja ná me ne, tangun sacuaha xi cjuahatsja me Nahmi naha xi catsingatju ná me. —Cuatjin cachja Jesús cojo xuta ladu rë me.

*Chja Jesucristu xi Judas sahmi rë me entregadu xcun xutaxa rë yungun*

<sup>21</sup> Xi cavatju cachja Jesús cuatjin ne, jemu camandya cacun me, hane cuitjin cachja me: —Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

<sup>22</sup> Hane xuta ladu rë Jesús xi cuacun jan ne, cavutsejenya me xcun xiejin me xingu xingu me. Hvíin camahani me yo tséhë xi cuatjin cachja Jesús. <sup>23</sup> Hane ngu cha ladu rë Jesús xi jemu vinga rë me ne, tjeheh rë Jesús ne, ngajan tijinë cha niñu. <sup>24</sup> Vëhë xi Simón Pedru ne, casahmi rcu me cojo cha vëhë, sehe cachja me cuitjin:

—Xjinenyungun rë me yo tséhë xi chja me. —Cuatjin cachja Pedru.

<sup>25</sup> Hane xi catsicuya cha vëhë xcun cha tiña xcun Jesús ne, sehe cavinenguise cha me cuitjin:

—Tatá, ¿yo xi nújun vë? —Cuatjin cavinenguise cha.

<sup>26</sup> Ngajan xi Jesús ne, cuitjin cafayangui me:

—Cha xi suá rë ngu rquí niñu vi hora xi cjuë tsingúisehen quinda ne, cha vëhë xi hacui cha. —Cuatjin cafayangui me.

Hane hora xi camá catsingúisehen quinda me niñu jan ne, sehe casua me cha Judas, quihndi rë Simón Iscariote. <sup>27</sup> Hane xi cavatju cafaha Judas ngu rquí niñu jan ne, hora vëhë cavisehen Satanás xahasen rë cha. Ngajan xi Jesús ne, cuitjin cachja me cojo cha:

—Xcusun xi nihñu ne, nihñu ni ngu ndiya xa. —Cuatjin cachja Jesús cojo cha.

<sup>28</sup> Peru hisca ngu me xi tijinë niñu jan hvíin me mé má cuatjin cachja Jesús cojo cha.

<sup>29</sup> Yahnga me ne, catsingataha cacun me xi tséhë xi Judas yaha cha tsá tujún ne, vëhë xi

cachja Jesús cojo cha xi cjue cuatsë cha xi mameje tsëhë suhi o sa xi sua cha tsë tsë xuta yuma.

<sup>30</sup> Hane xi cavatju cafaha cha ngu rquí niñu jan ne, ngutjen ni cavetju cha quiji cha. Hora vëhë ne, ha camajñu.

*Cjua xatsë xi cavitexa Jesucristu*

<sup>31</sup> Ngajan xi, xi cavetju Judas quiji cha ne, sehe cachja Jesús cuitjin:

—Ngahan xi Quihndi rë Xuta Jain Ngahan ne, quihndë cuetsihin cuma jyë cuma hnga ngahan cojo hasen naha, hacuaha ngahan tsingácun hacutjin jemu jyë hnga Nina cojo hasen rë me. <sup>32</sup> Hane sa xi ngahan tsingácun hacutjin jemu jyë hnga Nina cojo Hasen rë me ne, Nina ne, hacuaha tsingacun me hacutjin jemu jyë hnga ngahan cojo hasen naha. Hane ngutjen ni sahmi me cuatjin. <sup>33</sup> Jemu chüva sa nixtin xi cuitejña cojo nuju, tsan. Ngayun ne, cuinchunsun ná, peru quihndë cuichjá cojo nuju sacuatjin cachjá cojo xutaxa rë yungun xi hiscan xi cjuë ne, cumaji cuangun. <sup>34</sup> Nguehe cuitëxa nuju ngu cjua xatsë cuitjin: “Meje rë xi nihñu hmu tacún xingun xingu ngayun. Sacuatjin casahme hmu cáacun nuju ngahan, cuatjin meje rë xi nihñu hmu tacún xingun.” <sup>35</sup> Hane xi cuatjin tjin cjuahmutacun ngajñi nuju cojo xingun ne, ngajan cumachaya rë yëjë xuta ta ngayun ne, xuta ladu naha má ngayun. —Cuatjin cachja Jesús.

*Chja Jesucristu xi cuichja Pedru xi hvín me yo Jesucristu*

<sup>36</sup> Ngajan xi Simón Pedru ne, cuitjin cavinenguisse me:

—Tatá, ¿jani cuangun ni? —Cuatjin cavinenguisse me.

Ngajan xi Jesús ne, cuitjin cafayangui me:

—Hiscan xi cjuë ne, quihndë ne, cumaji cuanguntjengun ná. Peru xi cuma ngascan ne, cuanguntjengun ná. —Cuatjin cafayangui Jesús.

<sup>37</sup> Hane Pedru ne, cuitjin cachja me cojo Jesús:

—Tatá, tsajin mé má cumaji cjuë tjënguë nuju quihndë. Hisca yojo naha suá ngatsë nuju. —Cuatjin cachja Pedru.

<sup>38</sup> Ngajan xi Jesús ne, cuitjin cafayangui me:

—¿Há xi tuhun yojo nuju ngatsë naha? Cuichjá cojo nuju cjuaquixi ta chaja sa xi squihnda xahnda ne, ngayun ne, ha jyan ndiya cuinújun xi hyúun yo ngahan. —Cuatjin cafayangui Jesús.

## 14

*Sacuaha ndiya xi cjui xcun Nina má Jesucristu*

<sup>1</sup> Quijinduju sa cachja Jesús cojo xuta ladu rë me cuitjin:

—Xicamandyaain tacún. Catamangu tacún sa cojo Nina, hacuaha catamangu tacún sa cojo ná. <sup>2</sup> Ngajan ngahnga hiscan tacun Nahmi naha ne, jemu cjin cahndë tjin xi cuiyuju yëjë xuta ladu rë me. Sa xi hacuain cuatjin ne, ngahan ne, ha cachjá cojo nuju. Peru xicamacjiin tacún ta cjuë cuëhëndaja cahndë xi cuma nuju. <sup>3</sup> Hane hya xi ha cëjë cavëhëndaja cahndë xi cuma nuju ne, sehe cüya nga, hane cjuëcojo nuju, cojo sa xi hiscan xi cuitejña ne, hacuaha ngajan cuinechun. <sup>4</sup> Hacuaha hiscan xi cjuë ne, ngayun ne, ha hyun ndiya. —Cuatjin cachja Jesús.

<sup>5</sup> Hane Tomás ne, cuitjin cachja me cojo Jesús:

—Tatá, hyín jani cuangun. ¿Hacutjin má xi nújun xi ha hyin ndiya ni? —Cuatjin cachja me.

<sup>6</sup> Hane Jesús ne, cuitjin cafayangui me tsëhë Tomás:

—Ngahan ne, sacuaha ndiya xi cjui xcun Nina ngahan. Ngahan ne, hatuxa tjin ná cjuaquixi rë Nina, hatuxa tjin ná cjuahñu. Suvá ni xuta xi visehen me ladu naha ne, me vëhë ni xi cuma cuechú me xcun Nina Nahmi naja. <sup>7</sup> Ngatsë rë xi ha hyun ná ne, vëhë xi hatuxa chun Nahmi naha. Quihndë ne, hyun me, hacuaha ha cachutsujun me. —Cuatjin cafayangui Jesús.

<sup>8</sup> Ngajan xi Felipe ne, cuitjin cachja me cojo Jesús:

—Tatá, ngacun nihi Nina Nahmi naja, hane cojo vëhë cumangu tacún. —Cuatjin cachja Felipe.

<sup>9</sup> Ngajan xi Jesús ne, cuitjin cachja me:

—Ngahan ne, ha jemu jyë nixtin tejña cojo nuju, hane ¿há hyúun ná ni, Felipe? Xuta xi ha cavëë ná me ne, ha cavëë me Nina Nahmi naja. ¿Hacutjin má xi nújun xi tsingácun nuju Nina Nahmi naja ni? <sup>10</sup> ¿Há macjaain nuju xi ngahan ne, tejñaya xahasen rë Nina Nahmi naja, hane me vëhë ne, jiya me xahasen naha? Cjua xi chjá cojo nuju ne, hacuain chjá cojo cjuatacun naha suva. Nina Nahmi naja xi jiya me xahasen naha ne, me vëhë sahmi me xa rë me. <sup>11</sup> Catamacjain nuju xi ngahan ne, tejñaya xahasen rë Nina Nahmi naja hacuaha me vëhë ne, jiya me xahasen naha. O sa xi macjaain nuju cjuua naha ne, catamacjain nuju

ngahan ndastu ngatsë rë cjuarcun xi casahme. <sup>12</sup> Cuichjá cojo nuju cjuaquixi ta xuta xi mangucacun me cojo ná ne, cjuarcun xi sahme ngahan ne, hacuaha cojo me sahmi me. Ha hisca yehe sa cjuarcun sahmi me ta, ngahan ne, cjué tjënguë Nina Nahmi naja. <sup>13</sup> Hane tu mé ni xi chjahyun rë Nina ngatsë rë xi ladu naha ngayun ne, vëhë sahme, cojo sa xi cuma jyë cuma hnga Nina Nahmi naja cojo Hasen rë me ngatsë rë xcusun xi sahme, ngahan xi Quihndi rë me ngahan. <sup>14</sup> Sa xi chjahyun ná ngu cjuandaja ngatsë rë xi ladu naha ngayun ne, ngahan ne, sahme. —Cuatjin cachja Jesús cojo xuta ladu rë me.

*Chja Jesucristu xi cuinduva Hasen rë Nina*

<sup>15</sup> Quijinduju sa cachja Jesús cuitjin:

—Sa xi ngayun nihñu hmu tacún ná ne, hacuaha cuinuhyun sacuatjin vitëxa nuju, <sup>16</sup> hane ngahan cuichjá cojo Nina Nahmi naja, hane tsingatju me ngu nga xi cuisecoo nuju, xi cuejña cahndë cojo nuju yëjë nu yëjë nixtin. <sup>17</sup> Hane vëhë ne, vëhë Hasen xi hatuxa tjin rë cjuaquixi rë Nina. Xuta xi marcuaain rë me tsëhë Nina ne, cumaji xi cuisehen Hasen vëhë xahasen rë me ta, tsëhë xi tsijin rë me Hasen vëhë hacuaha hvíin me Hasen vëhë. Peru ngayun ne, hyun Hasen vëhë ta, tsëhë xi tacun cahndë cojo nuju hacuaha cuisehen xahasen nuju.

<sup>18</sup> Ngahan ne, hacuain cuiyuju nuju suvun ta cúa nga cuitejñacahndë cojo nuju. <sup>19</sup> Ha tu hitsë sa ne, ha quihndë scuiin ná xuta. Peru ngayun ne, chun ná. Hane tsëhë xi ngahan ne, hatuxa tjin ná cjuahñu ne, vëhë xi ngayun ne, hatuxa sacú nuju cjuahñu xatsë. <sup>20</sup> Nixtin hya ne, cuijne rcun xi ngahan ne, tejñaya xahasen rë Nahmi naha, hane ngayun ne, nechunyun xahasen naha, hane ngahan ne, tejñaya xahasen nuju.

<sup>21</sup> Xuta xi tivihndë sacuatjin vitëxa ne, me vëhë xi hmu cacun ná me. Hane xuta xi cuatjin hmu cacun ná me ne, hacuaha sahmi hmu cacun Nahmi naha me. Ngahan ne, hacuaha sahme hmú cáacun me, hacuaha suá cumachaya rë me yo ngahan. —Cuatjin cachja Jesús.

<sup>22</sup> Judas, me xi hacuain cha Judas Iscariote jan ne, cavinenguise me cuitjin:

—Tatá, ¿hacutjin má xi tuhun cumachaya niji yo ngayun, hane hacuain cojo yëjë sa xuta ni? —Cuatjin cavinenguise me.

<sup>23</sup> Ngagan xi Jesús ne, cuitjin cafayangui me:

—Xuta xi hmu cacun ná me ne, hacuaha cuihndë me tsëhë cjuá naha. Hane sahmi hmu cacun Nahmi naha me, hacuaha cuinduvun cuinechinyincahndin xahasen rë me. <sup>24</sup> Xuta xi hacuain hmu cacun ná me ne, vihndiin me tsëhë cjuá naha. Cjuá xi tinuhyun vi ne, hacuain cjuá naha suva ta cjuá rë Nina Nahmi naja, me xi catsingatju ná.

<sup>25</sup> Jemu cjín cjuá tichjá cojo nuju jinguyëjë rë xi tejña sa cojo nuju. <sup>26</sup> Peru Hasen rë Nina xi tsingatju Nina Nahmi naja xi cuejña cahndë naha ne, vëhë cuisecoo nuju, tsinguixi cojo nuju yëjë sa cjuá xi machaja, hacuaha tsinguitsjen nuju tsëhë yëjë cjuá xi ha cachjá cojo nuju.

<sup>27</sup> Cjuandaja cjuajeya cuejñá nuju. Cjuandaja cjuajeya naha suá nuju. Peru hacuain sacuatjin sua xuta ngasunhndë suá nuju. Xicamandyaain tacún, xicamacjin tacún. <sup>28</sup> Ha canuhyun xi cachjá cojo nuju ta cjué peru cúa nga cuinduva tjënguë nuju. Sa xi ndaja jain hmu tacún ná ne, hacuaha ndama nuju xi cjué tjënguë Nina Nahmi naja ta, Nina Nahmi naja ne, hitsë sa venguichji rë me xi cuma ná ngahan. <sup>29</sup> Ha cachjá cojo nuju quihndë, chaja sa xi cuetjucaa cjuá vëhë, cojo sa xi hya xi cuetjucaa ne, ngayun ne, cumacjain nuju. <sup>30</sup> Ha quihndë cuichjaan sa cojo nuju cjín cjuá ta, ha nduva Satanás, xi matitjun tsëhë ngasunhndë. Peru ngahan ne, tsajin mé xi cuma sahmi cojo ná. <sup>31</sup> Ngahan ne, sahme sacuatjin cavitexa Nina Nahmi naja, cojo sa xi yëjë xuta ne, cumachaya rë me xi hmú cáacun Nina Nahmi naja.

’Nduvun ne, cuanguenxeen tsëhë nguehe. —Cuatjin cachja Jesús.

## 15

*Chja Jesucristu xi sacuaha nahñu naa rë xca rë uva má me*

<sup>1</sup> Hacuaha cachja sa Jesús cuitjin:

—Ngahan ne, sacuaha nahñu naa cjuaquixi rë xca rë uva ngahan, hane Nahmi naha ne, sacuaha me xi tsicha xcatjé vëhë me. <sup>2</sup> Jima ngu nahñu tsja rë xi vaquín tú rë ne, vatë me. Hane jima ngu nahñu tsja rë xi vaquí tú rë ne, vatëjñi me tsja langa rë, cojo sa xi cjín sa tú rë cuaquí. <sup>3</sup> Hacuanitjin ni nuju ngayun xi sacuaha nahñu tsja rë jan ngayun ta, cjuá xi cachjá cojo nuju ne, ha catsityjahi rë cjuatacun nuju. <sup>4</sup> Nihñutangun sa cjuatacun nuju cojo ná, hane ngahan ne, sahmetangun cjuatacun naha cojo nuju. Ha hyan ta nahñu tsja rë ne, cumaji sua tú rë sa xi tsajin quitahácoo cojo nahñu naa rë. Hacuanitjin ni nuju ngayun ta cumaji ninguitsujun cjuandaja rë Nina sa xi tsajin tjin tangun cjuatacun nuju cojo ná.

<sup>5</sup> Ngahan ne, sacuaha nahñu naa rë xca rë uva ngahan, hane ngayun ne, sacuaha nahñu tsja rë. Xuta xi tjin tangun cjuatacun rë me cojo ná hacuaha tjin tangun cjuatacun naha



cojo rë me ne, me vëhë ne, jercu tsinguitsojo me cjuandaja rë Nina. Vëhë xi sa xi tsajin tjin tangun cjuatacun nuju cojo ná ne, cumaji camahani ninguitsujun cjuandaja rë Nina. <sup>6</sup>Xuta xi tsajin tjin tangun cjuatacun rë me cojo ná ne, cuatju me cuma sacuatjin vatju nahñu tsja rë xca rë uva xi tijñi jan má: chandi rë, sehe xi; sehe chjaya rë cjue cueti. <sup>7</sup>Sa xi nihñu tangun sa cjuatacun nuju cojo ná hacuaha cuiyujucahndë sa cjua naha ngajñi rë cjuatacun nuju ne, chjahyun tu mé ni xi meje nuju, hane sacú nuju. <sup>8</sup>Nahmi naha ne, ma jyë ma hnga me cojo Hasen rë me hya xi ningacun xi xuta ladu naha jain má ngayun xi ninguitsujun cjuandaja rë me. <sup>9</sup>Sacuatjin hmu cacun ná Nahmi naja ne, hacuaha cuanitjin hmú cáacun nuju. Xicanichayuun cjuahmutacun naha. <sup>10</sup>Sa xi vinuhyun tséhë cjuu xi vitéxa nuju ne, ngayun ne, hatuxa nichayuun cjuahmutacun naha, sacuatjin ná ngahan xi cavihndë tséhë cjuu xi cavitéxa ná Nahmi naha hacuaha tsichayaan cjuahmutacun rë me.

<sup>11</sup>'Cuatjin chjá cojo nuju, cojo sa xi cjuasua xi tjin ná ne, cuejña cahntsua xahasen nuju, sehe jercu tu ndaja camahani cuma nuju. <sup>12</sup>Vihí cjuu xi vitéxa nuju: nihñu hmu tacún xingun xingu ngayun, sacuatjin sahme hmú cáacun nuju ngahan. <sup>13</sup>Tsajin yo xi hitsë sa jyë cjuahmutacun tjin rë xi cuma rë ngu xuta xi sua me yojo rë me ngatsë rë amigu rë me. <sup>14</sup>Hane ngayun ne, amigu naha má ngayun, sa xi nihñu sacuatjin xi vitéxa nuju. <sup>15</sup>Ha quihndë cuichjaan xi hndixahan naha ngayun ta, tséhë xi ngu mosu hndixahan ne, hvíin mé xi sahmi nai rë. Ngayun ne, amigu naha chjá tsujun ta, tséhë xi jyë cjuu xi cáhndë xi cachja Nahmi naha ne, casuá camachaya nuju. <sup>16</sup>Hacuiin ngayun canaxujun ná ta ngahan cavaxejen nuju. Hacuaha casuáxa nuju xi cuangun ninguitsujun cjuandaja rë Nina. Hane cjuandaja vëhë ne, tsajin nu tsajin nixtin xi cjue. Xi cuatjin nihñu ne, tu mé ni xi chjahyun rë Nina Nahmi naja ngatsë rë xi xuta ladu naha má ngayun ne, sa nuju me. <sup>17</sup>Vihí cjuu xi vitéxa nuju: nihñu hmu tacún xingun xingu ngayun. —Cuatjin cachja Jesús.

*Choho vëë xuta Jesucristu cojo xuta ladu rë me*

<sup>18</sup>Quijinduju sa cachja Jesús cuitjin:

—Sa xi choho vëë nuju xuta xi marcuaain rë tséhë Nina ne, suá cumachaya nuju ta chaja sa xi choho scuëë nuju me ne, ngahan ne, ha choho vëë ná me. <sup>19</sup>Sa xi hacuaha xuta xi marcuaain rë tséhë Nina má ngayun ne, xuta xi cuacun vë ne, sahmi hmu cacun nuju me ta, ngayun ne, ladu rë me ngayun. Peru tséhë xi ngayun ne, hacuiin xuta xi marcuaain rë tséhë Nina má ngayun ta ngahan cavaxejen nuju xi cuetjunxun tséhë xuta xi cuacun vë, vëhë xi choho vëë nuju me. <sup>20</sup>Ninguitsjun cjuu xi cachjá cojo nuju hya xi cachjá cojo nuju cuitjin: “Ngu mosu hndixahan ne, hacuiin hitsë sa venguichji rë xi cuma rë nai rë.” Sa xi catsujuyihya tjengui ná xuta cojo cjuahngatacun ne, hacuaha tsujuyihyatjengui nuju me cojo cjuahngatacun. Sa xi cahndë me tséhë cjuu naha ne, hacuaha cuihndë me tséhë cjuu nuju ngayun. <sup>21</sup>Jëjë xcusun vëhë sahmi xuta xi cuacun vë cojo nuju ngatsë naha ta, tséhë xi hvíin me Nina, me xi catsingatju ná. <sup>22</sup>Tsajin mé jyë quitjen xuta xi cuacun vë sa xi canduvaan cachjá cojo rë me. Peru quihndë ne, sacuiinyiin rë me mé xi cuichja me xi cuaxëtje me yojo rë me. <sup>23</sup>Xuta xi choho vëë ná ngahan ne, hacuaha cojo Nahmi naha choho vëë me. <sup>24</sup>Tsajin mé jyë quitjen xuta xi cuacun vë sa xi casahmee ngajñi rë me cjuarcun xi tsajin sa ngu xuta xi ha casahmi me. Peru quihndë ne, ha cavëë me cjuarcun xi casahme, hane choho vëë ná me cojo Nahmi naha. <sup>25</sup>Peru cuatjin camá cojo sa xi cuetjucaa cjuu xi camahindu xcun xujun rë Nina xi chja xuta xi cuacun vë xi jemu vihndë me tséhë, cjuu xi chja cuitjin: “Choho cavëë ná me, handasa vechiixin chuya rë.” Cuatjin chja cjuu jan.

<sup>26</sup>'Cuinduva Hasen rë Nina, xi hatuxa tjin rë cjuaquixi rë Nina, hane cuisecoo nuju. Ngahan tsingátju nuju Hasen vëhë xi cuetju hiscan tacun Nina Nahmi naja, hane xi cjuehe ne, cuichja tsahan. <sup>27</sup>Hacuaha ngayun ne, cuiñujun tsahan cojo xuta, tséhë xi ngayun ne, ha nechun cojo ná hisca ntsacu cavetsihin.

## 16

<sup>1</sup>'Cuatjin tichjá cojo nuju, cojo sa xi hacuiin cuetjunxun tséhë ndiya naha. <sup>2</sup>Cuechú nixtin xi cumachohotje nuju yungun. Cuechú nixtin xi xuta xi tsiquehe nuju me ne, tsingataha cacun me xi jemu ndaja faharcun me Nina xi cuatjin sahmi me. <sup>3</sup>Cuatjin sahmi me ta, tséhë xi hvíin me Nina Nahmi naja, hacuaha vijñi rcu me yo ngahan. <sup>4</sup>Cachjá cojo nuju cjuu vëhë, cojo sa xi hya xi cuechú hora xi cuetjucaa ne, ninguitsjun xi cuatjin cachjá cojo nuju. —Cuatjin cachja Jesús.

*Hacutjin sahmi Hasen rë Nina*

Quijinduju sa cachja Jesús cuitjin:

—Cachjaan cojo nuju cjuu vëhë ntsacu cavetsihin ta, tséhë xi ngahan ne, tejña cuaha cojo nuju. <sup>5</sup>Peru quihndë ne, cjüëtjenguë me xi catsingatju ná, hane hisca ngu ngayun ne, chjinenungusun ná jani cjue. <sup>6</sup>Hane tséhë xi cuatjin cachjá cojo nuju cjuu vëhë ne, ña catsë rë xahasen nuju cjuachoho. <sup>7</sup>Peru ngahan ne, cuichjá cojo nuju cjuaquixi ta tsujun ndaja

xi cjué ta, sa xi cjuéen ne, Hasen xi cuisecoo nuju jan ne, hatuxa cuinduvaain. Peru sa xi cjué ne, tsingátju nuju Hasen rè Nina vè. <sup>8</sup> Hane hya xi Hasen vèhè cuinduva ne, vèhè tsinguixi xi hacuiin cuatjin xi tsingataha cacun xuta tsèhè cjuatsehen, hacuiin cuatjin xi tsingataha cacun me tsèhè cjuandaja, hacuiin cuatjin xi tsingataha cacun me tsèhè chuva rè xi cjuahachuva Nina xuta cojo cjuatacun rè me. <sup>9</sup> Hacuiin cuatjin xi tsingataha cacun xuta tsèhè cjuatsehen ta, tsèhè xi manguaain cacun me cojo ná. <sup>10</sup> Hacuiin cuatjin xi tsingataha cacun xuta tsèhè cjuandaja ta, tsèhè xi ngahan ne, cjuèttjenguè Nina Nahmi naja hane ngayun ne, ha quihndè chuun ná. <sup>11</sup> Hacuiin cuatjin xi tsingataha cacun xuta tsèhè xi cjuahachuva Nina xuta cojo cjuatacun rè me ta, tsèhè xi Satanás, xi matitjun tsèhè ngasunhdè vihi ne, ha catsichuva Nina cojo cjuatacun rè.

<sup>12</sup> Jemu tjin sa ná cjuá xi cuichjá cojo nuju, peru ngayun ne, scaain nuju cuinuhyun quihndè. <sup>13</sup> Peru hya xi cuinduva Hasen xi hatuxa tjin rè cjuaquixi rè Nina ne, vèhè cuinchandiyandaja nuju ndiá rè cjuaquixi. Hacuiin cojo cjuatacun rè suvá xi cuichja ta sacuatjin cjuá xi chja Nina cojo ne, cjuá vèhè cuichja. Hacuaha vèhè cuichja cojo nuju hacutjin cuma nixtin nduva. <sup>14</sup> Hasen vèhè ne, vèhè sahmi jyè sahmi hnga ná cojo cjuatacun naha ta, tsèhè xi vèhè cjuaha xi tsahan sehe sua cumachaya nuju tsahan. <sup>15</sup> Yèjè ni xi tsèhè Nina Nahmi naja ne, hacuaha tsahan. Vèhè xi cachjá xi Hasen jan ne, cjuaha xi tsahan sehe sua cumachaya nuju tsahan. —Cuatjin cachja Jesús.

*Cuya cjuasua cjuachoho rè xuta ladu rè Jesús*

<sup>16</sup> Hacuaha cachja sa Jesús cuitjin:

—Ha tu hitsè sa ne, ha quihndè chuun ná, hane ha tu hitsè nga sa ne, chun ná. —Cuatjin cachja Jesús.

<sup>17</sup> Ngajan xi ngujo xuta ladu rè Jesús jan ne, cuitjin cachja me cojo xicjin me:

—¿Mé vijne cjuá xi cuatjin chja me cojo naja? Chja me xi: “Ha tu hitsè sa ne, chuun ná, hane ha tu hitsè nga sa ne, chun ná”, hacuaha chja sa me xi: “Tsèhè xi cjué ttjenguè Nina Nahmi naja”. <sup>18</sup> ¿Mé vijne cjuá xi “ha tu hitsè sa”? Vijni rcuun mé xi chja me. —Cuatjin cachja me cojo xicjin me.

<sup>19</sup> Jesús ne, ha vèè me xi meje cjuinenguise xuta xi cuacun jan me tsèhè cjuá vèhè, vèhè xi Jesús ne, cachja me cojo rè xuta jan cuitjin:

—¿Há tichjinengunsun xingun tsèhè xi cachjá xi ha tu hitsè sa ne, chuun ná hane ha tu hitsè nga sa ne, chun ná? <sup>20</sup> Cuichjá cojo nuju cjuaquixi ta ngayun ne, chjihndun hacuaha chjihndunsun, peru xuta xi marcuaain rè me tsèhè Nina ne, jercu ndaja cuma rè me. Ngayun ne, jemu choho cuma nuju, peru cjuachoho nuju ne, cuya sua. <sup>21</sup> Hya xi ngu chjuun tsin rè me quihndi ne, jemu tjin rè me cjuachoho ta, tsèhè xi cavechú hora xi cuatju me cjuañihi. Peru hya xi cavatju catsin quihndi ne, ha quihndè vitsjiin rè me tsèhè cjuañihi jan, ngatsè rè cjuasua rè me xi catsin ngu quihndi. <sup>22</sup> Cuatjin nuju ngayun ta quihndè ne, tjin nuju cjuachoho. Peru ngahan ne, cúa scuèè nga nuju, hane ngayun ne, jemu ndaja cuma rè xahasen nuju, hane cjuasua nuju jan ne, tsajin yo cuma cjuahatahá. <sup>23</sup> Hane nixtin hya ne, chjinengunsun ná hisca ngu cjuá.

¿Cuichjá cojo nuju cjuaquixi ta tu mé ni xi chjahyun rè Nina Nahmi naja ne, sua nuju me tsèhè xi ladu naha má ngayun. <sup>24</sup> Hisca quihndè ne, cjèè chjahyun ná ngu cjuandaja tsèhè xi ladu naha má ngayun. Chjahyun ne, sehe sacú nuju, cojo sa xi xahasen nuju ne, tsè rè cjuasua. —Cuatjin cachja Jesús.

*Cacaá rè Jesucristu catsinguijne me cjuatsehen rè ngasunhdè*

<sup>25</sup> Quijinduju sa cachja Jesús cuitjin:

—Ngahan ne, cojo ejemplu cachjá cojo nuju. Peru cuechú nixtin xi ha quihndè hacuiin cojo ejemplu cuichjá cojo nuju ta cuichjáquixè cojo nuju tsèhè Nina Nahmi naja. <sup>26</sup> Nixtin hya ne, hatuxa chjahyun cjuandaja tsèhè xi ladu naha má ngayun. Hane chjaan cojo nuju xi cuichjá ngatsè nuju cojo Nina Nahmi naja ta, <sup>27</sup> suvá Nina Nahmi naja ne, jemu meje rè me ngayun, tsèhè xi ngayun ne, hacuaha jemu meje nuju ngahan hacuaha macjain nuju xi ngahan ne, Nina catsingatju ná me. <sup>28</sup> Ngahan ne, hiscan tacun Nina cavètju canduvá ngeuehe ngasunhdè. Quihndè ne, cuétju tsèhè ngasunhdè, cúa cjuèttjenguè Nina Nahmi naja. —Cuatjin cachja Jesús.

<sup>29</sup> Ngajan xi xuta ladu rè Jesús ne, cuitjin cachja me:

—Chutsujun ni. Quihndè ne, hacuiin cojo ejemplu tinúnjun ta tinúnjunquixun. <sup>30</sup> Quihndè ne, hyin ta ngayun ne, hyun yèjè ni cjuatacun, hacuaha hacuiin sahmi nguyjè xi cjuinenguise nuju xuta ngu cjuá cojo sa xi cumachaya nuju mé xi tsingataha cacun xuta jan. Ngatsè rè vèhè xi macjain niji xi Nina catsingatju nuju me. —Cuatjin cachja xuta ladu rè Jesús.

<sup>31</sup> Ngajan xi Jesús ne, cuitjin cafayangui me:

—¿Há macjain jain nuju quihndè? <sup>32</sup> Chutsujun ni. Cuechú hora o ha hisca cavechú xi cuitsojo ngayun, jima ngu ngayun cojo ndya nuju, hane cuejñu ná suva. Peru ngahan ne,

hacuiin suva tejña ta Nina Nahmi naja tacun me cojo ná. <sup>33</sup> Cuatjin chjá cojo nuju cojo sa xi sacú nuju cjuandaja cjuajeya ngatsé rë xi tjin tangun cjuatacun nuju cojo ná. Nguehe ngasunhndé ne, vatjun cjuañihi. Peru tuhun cjuasua xahasen nuju ta, ngahan ne, hacuaha cacaa ná catsingujne cjuatsehen rë ngasunhndé. —Cuatjin cachja Jesús cojo xuta ladu rë me jan.

## 17

*Fehya Jesucristu cjuandaja xi cuma rë xuta ladu rë me*

<sup>1</sup> Xi cavatju cachja Jesús cuatjin ne, sehe cavutsejenniji me ngahnga, hane cachja me cuitjin:

—Ngayun Nahmi naha, ha cavechú hora. Nihñu jyë nihñu hnga ná cojo Hasen naha ngahan xi Quihndi nuju ngahan, cojo sa xi ngahan ne, hacuaha sahme jyë sahme hnga nuju cojo Hasen nuju. <sup>2</sup> Ngayun catuhunxun ná xi matitjun ngahan tséhë yějë xuta, cojo sa xi yějë me xi catuhun ná ne, suá rë me cjuahñu xatsé. <sup>3</sup> Hane cuitjin xi sacú rë me cjuahñu xatsé, xi vëë me ngayun, ngayun xi ngu ni ngayun xi Nina xi cjuaquixi ngayun, hacuaha xi vëë ná me, ngahan xi Jesucristu ngahan, ngahan xi ngayun caningatjun ná. <sup>4</sup> Ngahan ne, casahme jyë casahme hnga nuju nguehe ngasunhndé ta, catsingujnetaha xa xi catuhun ná xi sahme. <sup>5</sup> Quihndé ne, nihñu jyë nihñu hnga ná cojo Hasen naha ndyá hiscan nechun, ngayun Nahmi naha. Tuhun ná Hasen ndajyihí xi ha tjin ná hya xi nechan tangun cojo nuju hisca hya xi chaja sa cuejña ngasunhndé.

<sup>6</sup> Ngahan ne, casuá camachaya rë xuta xi catuhun ná nguehe ngasunhndé yo ngayun. Me xi cuacun vë ne, tsujun me, peru catuhun ná me. Hane cahndé me tséhë cjuatacun. <sup>7</sup> Ha vëë me quihndé xi yějë ni xcusun xi catuhun ná ne, ngayun caningatjun. <sup>8</sup> Cuatjin vëë me ta, tséhë xi yějë ni cjuatacun ná ne, hacuaha casuá rë me. Hane me xi cuacun vë ne, cafahatsja me cjuatacun vëë, hacuaha vëëndaja me xi hiscan nechun cavétju canduvá nguehe, hacuaha macjain rë me xi ngayun caningatjun ná.

<sup>9</sup> Ngahan ne, tichjá cojo nuju ngatsé rë me xi cuacun vë. Tichjaan ngatsé rë xuta xi marcuaain rë tsujun ta tichjá ngatsé rë me xi catuhun ná, tséhë xi tsujun me. <sup>10</sup> Yějë ni xi tsahan ne, hacuaha tsujun, hane xi tsujun ne, hacuaha tsahan. Hane ngahan ne, cama jyë cama hnga ngahan cojo Hasen naha ngatsé rë xi tjin tangun cjuatacun rë me xi cuacun vë cojo ná. <sup>11</sup> Ha quihndé cuitejña sa nguehe ngasunhndé. Me xi cuacun vë ne, siu me ngasunhndé, peru ngahan ne, cuinduvatjènguë nuju. Ngayun Nahmi naha, ngayun xi hatuxa tyjahi cjuatacun nuju ne, nihñu me cuidadu cojo ngahñu nuju, ngahñu xi catuhun ná, cojo sa xi tjin tangun cjuatacun rë me cojo xicjin me, sacuatjin naja गयाan. <sup>12</sup> Hya xi tejña cojo rë me ne, casahme cuidadu me cojo ngahñu nuju xi catuhun ná. Casahme cuidadu me, hane hisca ngu me cachajin me. Suvá ni cha xi hatuxa chajá ne, cha vëë xi cachajá cha, cojo sa xi cuetjucaa cjuatacun xi camahindu xcun xujun nuju. <sup>13</sup> Peru quihndé ne, cuinduvatjènguë nuju. Hane tichjá cjuatacun vihi nguehe ngasunhndé, cojo sa xi xuta ladu naha ne, tsé rë xahasen rë me cojo cjuasua xi quitsé rë xahasen naha suva. <sup>14</sup> Ngahan ne, casuá camachaya rë me cjuatacun. Hane xuta ngasunhndé xi marcuaain rë tsujun ne, choho vëë rë me, tséhë xi hacuiin tséhë ngasunhndé má me, sacuatjin ná ngahan xi hacuiin tséhë ngasunhndé má ngahan. <sup>15</sup> Cjuehyaan nuju xi naxunxun me tséhë ngasunhndé ta tiféhya nuju xi nihñu me cuidadu tséhë Satanás. <sup>16</sup> Xuta ladu naha jan me, hacuiin tséhë ngasunhndé má me, sacuatjin ná ngahan xi hacuiin tséhë ngasunhndé má ngahan. <sup>17</sup> Nihñu tsujun jain me cojo cjuatacun xi hatuxa cjuaquixi. Cjuatacun nuju ne, vëë xi hmí rë cjuaquixi. <sup>18</sup> Sacuatjin caningatjun ná ngahan ngajñi rë xuta xi marcuaain rë tsujun ne, hacuaha cuatjin catsingátju xuta ladu naha ngajñi rë xuta xi cuacun vë. <sup>19</sup> Hane ngatsé rë xuta ladu naha ne, suá nuju yojo naha, cojo sa xi me xi cuacun vë ne, hacuaha tsujun jain cuma me cojo cjuaquixi.

<sup>20</sup> Quihndé ne, hacuiin ngatsé rë suvá ni xuta ladu naha vi xi tichjá cojo nuju ta hacuaha cojo ngatsé rë me xi sehe cumangu cacun cojo ná xi cuihndé me cjuatacun xi chja xuta ladu naha tsahan. <sup>21</sup> Ngahan ne, xi meje ná ne, xi yějë ni me xi cuacun vë ne, cuma tangun cjuatacun rë me cojo xicjin me. Sacuatjin nuju ngayun, Nahmi naha, xi nechunyun xahasen naha hane ngahan ne, tejñaya xahasen nuju ne, meje ná xi me xi cuacun vë ne, hacuaha hincha me xahasen naja, cojo sa xi xuta ngasunhndé ne, cumacjain rë me xi ngayun caningatjun ná. <sup>22</sup> Ngahan ne, casahme yehe casahme hnga me cojo cjuatacun rë me sacuatjin canihñu jyë canihñu hnga ná ngahan cojo cjuatacun naha, cojo sa xi cuma tangun cjuatacun rë me cojo xicjin me, sacuatjin tjin tangun cjuatacun naja गयाan cojo xingueen. <sup>23</sup> Meje ná xi ngahan ne, cuitejñaya xahasen rë me, sacuatjin nechunyun xahasen naha. Meje ná xi cuma tangun camahani cjuatacun rë me cojo xicjin me, cojo sa xi xuta ngasunhndé ne, cuijne rcu

me xi ngayun caningatjun ná, hacuaha xi nihñu hmu tacún me sacuatjin nihñu hmu tacún ná ngahan.

<sup>24</sup>Ngayun, Nahmi naha, xuta xi catuhun me xi cuma me ladu naha ne, meje ná xi hiscan xi cuitejña ne, hacuaha ngajan cuiyuju me cojo ná, cojo sa xi scutsejen me hacutjin jyë hnga ngahan cojo hasen ndajiyihi naha xi ngayun catuhun ná, tsëhë xi canihñu hmu tacún ná hisca chaja sa xi cuejña ngasunhndë. <sup>25</sup>Ngayun Nahmi naha, ngayun xi quixi ngayun cojo cjuatacun nuju, xuta ngasunhndë ne, hvín nuju me, peru ngahan ne, hvë nuju, hane xuta ladu naha vi ne, vëë me xi ngayun caningatjun ná. <sup>26</sup>Ngahan casuá camachaya rë me yo ngayun, hane suá sa cumachaya rë me, cojo sa xi cjuahmutacun xi tjin nuju cojo ná ne, cuejña cahntsua xahasen rë me hacuaha ngahan ne, cuitejña cahntsua xahasen rë me. —Cuatjin cafehya Jesús cjuandaja cojo Nina.

## 18

### *Hacutjin camá xi cachjahá rë Jesucristu*

<sup>1</sup>Hya xi camá ne, xi cavatju cachja Jesús cjuavëhë ne, sehe cavetju me quiji me cojo xuta ladu rë me ngunda vëhë tsëhë caniña Cedrón. Hane ngajan cavisehen Jesús cojo xuta ladu rë me ngu ngajñi yatjë xi tjin jan. <sup>2</sup>Quihndë ne, cha Judas, cha xi sahmi rë entregadu Jesús ne, hacuaha vëë cha cahndë vëhë ta, jemu quiji Jesús cahndë vëhë camatangun me cojo xuta ladu rë me. <sup>3</sup>Ngajan xi cha Judas ne, quijicojo cha gujo sindadu cojo cha mayu cojo cha nisë rë cha, cha xi catsingatju nahmi xi matitjun cojo cha fariseo. Quiji cha xi cuacun jan ngajan cojo ndihi cojo quicha. <sup>4</sup>Hane Jesús ne, tsëhë xi ha vëë me yëjë xcusun xi cuatju me cuma ne, quijivaha me xcun cha xi cuacun jan, sehe cavinenguise me cha cuitjin:

—¿Yo xi meje nuju? —Cuatjin cavinenguise me.

<sup>5</sup>Ngajan xi cha xi cuacun jan ne, cuitjin cafayangui cha:

—Xuta Nasaret xi hmí rë Jesús. —Cuatjin cafayangui cha.

Hane Jesús ne, cuitjin cachja me:

—Ngahan xi nújun vë. —Cuatjin cachja me.

Quihndë ne, Judas, cha xi sahmi rë me entregadu ne, cojo cha secun cha cojo cha xi cuacun vë. <sup>6</sup>Hane hya xi cachja Jesús xi: “Ngahan xi nújun vë” ne, quijingaxtun yëjë cha xi cuacun jan, hane caticja cha. <sup>7</sup>Ngajan xi Jesús ne, cavinenguise nga me cha cuitjin:

—¿Yo xi meje nuju? —Cuatjin cavinenguise me.

Hane cha xi cuacun jan ne, cuitjin cachja nga cha:

—Xuta Nasaret xi hmí rë Jesús. —Cuatjin cachja cha.

<sup>8</sup>Hane Jesús ne, cuitjin cafayangui me:

—Ha cachjá cojo nuju ta ngahan xi nújun vë. Sa xi ngahan meje nuju ngahan ne, tuhun cahndë catje me xi cuicun vi. —Cuatjin cafayangui me.

<sup>9</sup>Cuatjin cachja Jesús cjuavëhë cojo sa xi cuetjucaa cjuaxi ha cachja me cuitjin: “Xuta xi catuhun ná me ne, hisca ngu me catsichajan me.” <sup>10</sup>Ngajan xi Simón Pedru ne, cavaxë me quichandujú xi yaha me, hane cavatësun me tyjavañuju quixi mosu hndixahan rë nahmi xi matitjun jan, cha xi hmí rë Malco. <sup>11</sup>Ngajan xi Jesús ne, cuitjin cachja me cojo Pedru:

—Teyunndujun quicha nuju vë. Hatuxa tsingatehen xi cuatju cjuañihi sacuatjin xi meje rë Nina Nahmi naja. —Cuatjin cachja Jesús.

### *Nahmi xi matitjun ne, sahmi cuenda me jyë rë Jesús*

<sup>12</sup>Hya xi camá ne, cha sindadu cojo capitán rë cha, cojo mayu cojo cha nisë rë cha, cha xi catsingatju xutaxa rë yungun jan ne, cafaha cha Jesús, catsihñu cha me, <sup>13</sup>sehe quiji cani cha me titjun xcun Anás. Anás vë ne, nahmichahya rë Caifás má me. Hane nu vëhë ne, nahmi xi matitjun tsëhë yëjë ni nahmi má Caifás. <sup>14</sup>Quihndë ne, Caifás vë ne, me vëhë xi cavinchangui me xutaxa rë xi ndaja tsëhë xutaxa rë xi ngu xihin ni cueya ngatsë rë yëjë ni xuta.

### *Chja Pedru xi hacuün ladu rë Jesucristu má me*

<sup>15</sup>Quihndë ne, Simón Pedru cojo ngu sa cha ladu rë Jesús jan ne, tjengui me quiji me cojo Jesús. Hane cha ladu rë Jesús xingu jan ne, tsëhë xi vëë nahmi xi matitjun jan cha ne, cojo cha cavisehen cha cojo Jesús cahntsua hnhua ndatsen ndava nahmi xi matitjun jan.

<sup>16</sup>Peru Pedru ne, casecun ni me ngajan candatsen tingotjo hnhua jan. Ngajan xi cha ladu rë Jesús xi vëë nahmi jan ne, cavetju nga cha quiji cachja cha cojo na xi quitahá cuidadu rë tingotjo hnhua jan. Hane sehe catsinguissehen cha Pedru cahntsua hnhua. <sup>17</sup>Hane na xi sahmi cuidadu tingotjo hnhua jan ne, cuitjin cavinenguise rë na Pedru:

—¿Hacuün cojo ngayun má ngayun ladu rë me xi cuajiyihi vë? —Cuatjin cavinenguise na.

Hane Pedru ne, cuitjin cafayangui me:

—Jéya, hacuün. —Cuatjin cafayangui me.

<sup>18</sup> Hane mosu rë nahmi jan cojo cha sindadu jan ne, cavejña cha ngu ndava ndihi, tsêhë xi jemu hnchan. Sehe hinchacun cha tijima hasu rë cha jan. Hacuaha cojo Pedru secun me jan, jima hasu rë me.

*Fahatáha nahmi xi matitjun jan Jesucristu*

<sup>19</sup> Hane xi cafehe cha xi cuacun jan cojo Jesús jan ne, sehe cavetsihin cafahatáha nahmi xi matitjun jan me tsêhë xuta ladu rë me cojo tsêhë cjuachacun rë me. <sup>20</sup> Hane Jesús ne, cuitjin cafayangui me:

—Ngahan ne, xcun cojo xcun cachjá cojo yêjê ni xuta, hacuaha cavicuyá rë me ngajan yungun langa o sa xi ngajan yungun xi matitjun, hiscan xi matangun ngayejen ni xuta tjê rë Israel. Tsajin mé xi cachjá xi táhahma. <sup>21</sup> Hane ¿mé má ngahan chjuhuntuhan ná ni? Chjuhuntuhan rë me xi cahndê cjuu naha. Chjinengunsun rë me mé xi cachjá cojo rë me. Me xi cuacun vë ne, vëe me cjuu xi cachjá. —Cuatjin cafayangui Jesús.

<sup>22</sup> Hane xi cuatjin cachja Jesús cjuu vëhê ne, ngu cha mayu xi secun tiña jan ne, cavajaya cha ngu xcun Jesús, sehe cachja cha cuitjin cojo rë me:

—¿Há cuatjin chjayengui tsêhë nahmi xi matitjun? —Cuatjin cachja cha.

<sup>23</sup> Ngajan xi Jesús ne, cuitjin cafayangui me tsêhë cha:

—Sa xi choho cachjá ne, tinújun cojo yêjê xuta mé xi choho cachjá. Peru sa xi ndaja cachjá ne, ¿mé má cuatjin vujun ná ni? —Cuatjin cafayangui me.

<sup>24</sup> Ngajan xi Anás ne, hacuanitjin ni tjihñu cuaha Jesús ne, catsingatju me Jesús xcun nahmi xi matitjun tsêhë yêjê ni nahmi.

*Chja nga Pedru xi hacuün ladu rë Jesucristu má me*

<sup>25</sup> Jinguyêjê rë xi tichjahátáha rë Jesús jan ne, Pedru ne, secun me xcun ndihi tijima hasu rë me. Hane cachjahátáha rë me cuitjin:

—¿Hacuün cojo ngayun má ngayun ladu rë me vëhê? —Cuatjin cachjahátáha rë me.

Hane Pedru ne, cavetsangui me, cuitjin cachja me:

—Jéya, hacuün. —Cuatjin cachja me.

<sup>26</sup> Ngajan xi ngu mosu rë nahmi xi matitjun jan, cha xi xicjin rë cha xi cavatêsun Pedru tyjavañuju jan ne, cuitjin cachja cha cojo Pedru:

—¿Há cahveen nuju cojo rë me ngajñi yatjê jan ni? —Cuatjin cachja cha.

<sup>27</sup> Cavetsangui nga Pedru ngu ndiya. Hane ha hora vëhê ni ne, cajihnda xahnda.

*Fahatáha Pilatu Jesucristu*

<sup>28</sup> Ngajan xi xuta matitjun tsêhë xuta tjê rë Israel jan ne, cavaxê me Jesús tsêhë ndava Caifás, hane quijicojo me ndihya jyê hiscan tacun Pilatu, xutaxa rë xi matitjun. Nguitajñu xati hora vëhê. Hane xuta xi quijicojo rë Jesús jan ne, cavisiin me cahntsua ndihya jyê jan, ngatsê rë xcusur rë me xi ma chocun yojo rë me xcun Nina hya xi visehen me ndava xutaxin. Hane sa xi cuatjin cuma chocun yojo rë me ne, cumaji sinê nguixun me comida suhi tsêhê Pascua. <sup>29</sup> Vëhê xi cavetju Pilatu quijitjengui rë me candatsen. Hane cuitjin cavinenguise me:

—¿Mé jyê vinchun tsêhê cha xi cuijyihni vi? —Cuatjin cavinenguise Pilatu.

<sup>30</sup> Hane xuta xi cuacun jan ne, cuitjin cafayangui me:

—Sa xi hacuün choho tísahmi cha ne, canduvinchani nuju cha. —Cuatjin cafayangui me.

<sup>31</sup> Hane Pilatu ne, cuitjin cachja me:

—Chjuhun cha ne, chjuhunchuvun suvun cha cojo jyê rë cha sacuatjin chja ley nuju. —Cuatjin cachja Pilatu.

Ngajan xi xutaxa rë yungun xi cuacun jan ne, cuitjin cachja me:

—Ley nuju ngayun ne, chja ta ngayin ne, cumaji niquihin xuta. —Cuatjin cachja xuta xi cuacun jan.

<sup>32</sup> Cuatjin camá cojo sa xi cuetjucaa cjuu xi cachja Jesús hya xi cachja me mé chuva rë cueya me.

<sup>33</sup> Ngajan xi Pilatu ne, cavuya cavisehen nga me ndihya. Hane cajindaya me Jesús, sehe cavinenguise me cuitjin:

—¿Há ngaye xu matitjun ngaye tsêhë xuta tjê rë Israel? —Cuatjin cavinenguise me.

<sup>34</sup> Hane Jesús ne, cuitjin cafayangui me:

—¿Há cojo cjuatacun nuju suvun chjinengunsun ná cjuu vëhê?, o há tsajin ne, ¿há tjin yo cachja cojo nuju tsahan? —Cuatjin cafayangui me.

<sup>35</sup> Ngajan xi Pilatu ne, cuitjin cafayangui me:

—¡Peru ngahan ne, hacuün xuta Israel ngahan! Suvá xuta nangui riji cojo nahmi xi matitjun casahmi ri me entregadu cojo ná. ¿Mé canihñi? —Cuatjin cafayangui Pilatu.

<sup>36</sup> Ngajan xi Jesús ne, cuitjin cafayangui me:

—Xa naha xi sahme gobiernu ne, hacuiin ngasunhndë vihi cafahántsá. Sa xi ngasunhndë vihi cafahántsá xa xi sahme gobiernu ne, xuta ladu naha ne, scaan me cojo sa xi cumaji cuma ngahan entregadu tsja xutaxa rë yungun. Peru xa naha xi sahme gobiernu ne, hacuiin nguehe cafahántsá. —Cuatjin cafayangui Jesús.

<sup>37</sup> Hane Pilatu ne, cuitjin cachja me cojo Jesús:

—¿Ngajan xi ngaye xi matitjun ngaye ni? —Cuatjin cachja me.

Hane Jesús ne, cuitjin cafayangui me:

—Cuatjin sacuatjin nújun vë. Ngahan ne, canduvá nguehe ngasunhndë hacuaha catsin ngahan cojo sa xi cuichjá cojo xuta cjuá xi cjuaquixi. Yëjë xuta xi marcun rë me tsëhé cjuaquixi ne, hatuxa vetaharcu me cjuá naha. —Cuatjin cafayangui Jesús.

<sup>38</sup> Hane Pilatu ne, cuitjin cachja me:

—¿Mé xi hmí rë cjuaquixi ni? —Cuatjin cachja Pilatu.

*Chja xutaxa rë yungun xi meje rë xi cueya Jesucristu.*

Hane xi café cachja Pilatu cjuá vëhé ne, sehe cavetju nga me quiji cachja me cojo xutaxa rë yungun, cuitjin cachja me:

—Sacuiin ná hisca ngu jyë rë cha xi cuajyihí vë. <sup>39</sup> Peru ngayun ne, tjin nuju ngu xcusun xi tsisme ngu presu nixtin rë suhi rë Pascua. ¿Há meje nuju xi tsisme me xi matitjun tsujun? —Cuatjin cachja me.

<sup>40</sup> Hane xuta xi cuacun jan ne, cajindaya me cachja me cuitjin:

—¡Hacuiin cha vëhé ta Barrabás nismu cha! —Cuatjin cajindaya me cachja me.

Quihndë ne, Barrabás jan ne, ngu cha fahataha cjuachan cha.

## 19

<sup>1</sup> Ngajan xi Pilatu ne, catsingatju me Jesús casehen rë me. <sup>2</sup> Hane cha sindadu xi cuacun jan ne, xi camá catsihya cha ngu corona nahyá ne, sehe cavesun cha rcu Jesús, hacuaha catsicaja cha me ngu tsjian moradu. <sup>3</sup> Hya xi camá ne, quijivaha cha jima ngu cha xcun me, sehe cavetsihin cavincha cha viva rë me xi tsixcuehyu cha me sacuaaha xi me vëhé matitjun me tsëhé xuta tjë rë Israel. Hacuaaha cavajaya cha xcun me.

<sup>4</sup> Hya xi camá ne, Pilatu ne, cavetju nga me candatsen, hane cuitjin cachja me cojo xuta xi cuacun jan:

—Chutsujun ni, cuáxë cha nguehe, cojo sa xi cumachaya nuju ta sacuiin ná hisca ngu jyë rë cha. —Cuatjin cachja Pilatu.

<sup>5</sup> Ngajan xi Jesús ne, cavetju me candatsen, quisun rcu me corona nahyá hacuaha yaja me tsjian moradu jan. Sehe cachja Pilatu cojo xuta cuitjin:

—Chutsujun ni, cuajyihí cha nguehe. —Cuatjin cachja me.

<sup>6</sup> Hane hya xi cavëhé nahmi xi cuacun matitjun jan cojo cha mayu cojo nisë rë cha Jesús ne, cajindaya cha cachja cha cuitjin:

—¡Tetuhun cha xcun cru! ¡Tetuhun cha xcun cru! —Cuatjin cajindaya cha cachja cha.

Ngajan xi Pilatu ne, cuitjin cachja me:

—¡Chjuhun suvun cha, tetuhun cha xcun cru ta, ngahan ne, sacuiin ná hisca ngu jyë rë cha! —Cuatjin cachja Pilatu.

<sup>7</sup> Ngajan xi xutaxa rë xi cuacun jan ne, cuitjin cachja me:

—Ngayin ne, tjin ngu ley xi vitexa niji, hane sacuatjin chja ley vëhé ne, vechú chuva rë xi cueya cha ta, tsëhé xi cachja suvá cha xi Quihndi rë Nina cha. —Cuatjin cachja xutaxa rë jan.

<sup>8</sup> Hane xi cahndë Pilatu cjuá vëhé ne, hitsë sa catsacjun me camá. <sup>9</sup> Sehe cavuya cavisehen nga me cahntsua ndihya, hane sehe cafhatahá me Jesús cuitjin:

—Ngayun ne, ¿jani canduvun? —Cuatjin cafhatahá me Jesús.

Peru Jesús ne, cafayanguiin me tsëhé Pilatu. <sup>10</sup> Ngajan xi Pilatu ne, cuitjin cavinenguise me cojo Jesús:

—¿Há chayunnguun tsahan? ¿Há hyúun ta ngahan ne, cuma tsisme nuju hacuaha cuma cuitéxa xi setaha ngayun xcun cru? —Cuatjin cavinenguise Pilatu.

<sup>11</sup> Hane Jesús ne, cuitjin cafayangui me:

—Ngayun ne, cuma nihñu cojo ná cuatjin, peru suvá ni ngatsë rë xi Nina casua nuju me cahndë. Vëhé xi me xi casahmi ná entregadu cojo nuju ne, hitsë sa jyë jyë rë me xi cuma nuju ngayun. —Cuatjin cafayangui Jesús.

<sup>12</sup> Xi cahndë Pilatu cjuá vëhé ne, cavangui me chuva rë xi tsismi me Jesús. Peru xutacjin jan ne, cajindaya me cachja me cuitjin:

—Sa xi nismu cha xi cuajyihí vë ne, hacuiin amigu rë César, me xi matitjun camahani, má ngayun. Ngu xuta xi chja suvá me xi matitjun me ne, hatuxa condra rë César má me. —Cuatjin cajindaya me cachja me.

<sup>13</sup> Hane xi cahndé Pilatu cjuá vèhè ne, sehe cavaxè nga me Jesús candatsen, sehe quiji me cavéjña me hiscan sahmi cuenda me jyè rë xuta, cahndé hiscan hmí rë Texondaja rë, hane xi hne hebreo ne, Gabata hmí rë. <sup>14</sup> Hora vèhè ne, sacuaaha nchisen tsèhè nixtin vispra rë suhi tsèhè Pascua. Ngajan xi Pilatu ne, cuitjin cachja me cojo xuta:

—¡Chutsujun ni, cuajyihí me xi matitjun tsujun nguehe! —Cuatjin cachja me.

<sup>15</sup> Hane xuta jan ne, cuitjin cajindaya me cachja me:

—¡Naxunxun cha, naxunxun cha tsèhè nguehe! ¡Tetuhun cha xcun cru! —Cuatjin cajindaya me cachja me.

Ngajan xi Pilatu ne, cuitjin cavinenguise me:

—¿Há cuétaha me xi matitjun tsujun xcun cru ni? —Cuatjin cavinenguise me.

Ngajan xi nahmi xi cuacun matitjun jan ne, cuitjin cafayangui me:

—¡Ngu ni César, me vèhè xi matitjun me tsijin! —Cuatjin cafayangui me.

<sup>16</sup> Ngajan xi Pilatu ne, cajne cacun me. Hane casahmi me entregadu Jesús xi cjue setaha me xcun cru xi cueya me. Sehe cafahatsja xuta xi cuacun jan me.

### *Setaha Jesucristu xcun cru*

<sup>17</sup> Hya xi camá ne, quisuntyja súv Jesús cru, cavetju me quiji me cojo xuta cahndé hiscan xi hmí rë Nínda Rcuun, hane xi hne hebreo ne, Gólgota hmí rë. <sup>18</sup> Hane ngajan casetaha me xcun cru. Hacuaha cojo sa jo cha caviyujutaha cha xcun cru rë cha, ngu ngu cha ngu ngu ladu tjehe rë me. Hane Jesús ne, cavasen caseya me. <sup>19</sup> Hacuaha catsihindu Pilatu ngujo cjuá xi casetaha rcu cru rë Jesús, cuitjin camahindu: “Jesús, Xuta Nasaret, Xi Matitjun Tsèhè Xuta Israel.” <sup>20</sup> Cjuá vèhè ne, jemu cjín xuta cavutaya me, tsèhè xi cahndé hiscan casetaha Jesús xcun cru ne, tiña tacun nandya. Camahindu cjuá vèhè cojo hne hebreo cojo latin cojo griego. <sup>21</sup> Ngajan xi nahmi xi matitjun tsèhè xuta tjé rë Israel jan ne, cuitjin cachja me cojo Pilatu:

—Ndajintjin xi cuatjin canihindun “Xi Matitjun Tsèhè Xuta Israel” ta, xi ndatjin ne, “Cachja Cha: Ngahan Matitjun Ngahan Tsèhè Xuta Israel.” —Cuatjin cachja me.

<sup>22</sup> Hane Pilatu ne, cuitjin cafayangui me:

—Ha catsihindu cjuá xi meje tsihindu. —Cuatjin cafayangui me.

<sup>23</sup> Ngajan xi sindadu jan ne, xi cavatju cavetaha cha Jesús xcun cru ne, sehe cafaha cha tsjian xcun rë me cojo yèjè sa xi tsé xi xtí xi sahmixa cojo me, cavatècja cha ngajñi catsiñuju cha. Hacuaha cafaha cha tsjian ngahma rë me. Quihndé ne, tsjian vèhè ne, hacuiin casehencoo ta tsjian tu të ni. <sup>24</sup> Ngajan xi cha sindadu jan ne, cachja cha cojo xicjin cha cuitjin:

—Tsjian vèhè ne, hacuiin cuichan ta naxeen suerte tsèhè ne, jarè ngayaan xi saté naja. —Cuatjin cachja cha.

Cuatjin camá cojo sa xi cuetjucaa cjuá xi camahindu xcun xujun rë Nina xi chja cuitjin: Cavatècja cha tsjian naha ngajñi rë cha, hacuaha cavaxè cha suerte ngatsé rë tsjian naha. Cuatjin casahmi cha sindadu jan.

<sup>25</sup> Quihndé ne, tiña cru rë Jesús jan ne, secun naa rë me, cojo tíchja naa rë me, cojo na María chjuun rë Cleofas, cojo na María na Mágdala. <sup>26</sup> Hane xi cavèé Jesús naa rë me cojo cha ladu rë me xi jemu vinga rë me jan xi secun tangun cha cojo naa rë me ne, sehe cachja me cuitjin cojo naa rë me:

—Ngayun chjuun, cuajyihí quihndi nuju ndyá.

<sup>27</sup> Hane cha ladu rë me jan ne, cuitjin cachja me cojo rë cha: —Cuajyihí naa nuju ndyá. —Cuatjin cachja Jesús.

Ha nixtin hya ni ne, quijicojo cha ladu rë Jesús jan naa rë me ndava cha, ngajan cavéjñacahndé me.

### *Cjuaveya rë Jesucristu*

<sup>28</sup> Hane xi camá ngascan ne, Jesús ne, ha vèé me xi camachihin yèjè xa xi cachja Nina xi sahmi me. Hane cojo sa xi cuetjucaa cjuá xi camahindu xcun xujun rë Nina ne, cuitjin cachja me:

—Jemu xinda ná. —Cuatjin cachja me.

<sup>29</sup> Quihndé ne, tacun jan ngu hiscan jemu hinchá xan yufa. Ngajan xi sindadu jan ne, catsicahnchi cha ngu tsjian hinda cojo xan jan ne, sehe catsitjinguiya cha rcu ngu ya nduju, sehe catsiquijin cha cavetaha cha hntsua Jesús. <sup>30</sup> Hane xi camá cahvi Jesús xan jan ne, sehe cachja me cuitjin:

—Camachihin quihndé. —Cuatjin cachja Jesús.

Hane xi catsiquindi me rcu me ne, hora vèhè cahme me.

*Cavitengui cha sindadu quicha ngu ladu ntsacu ndanisin rë Jesucristu*

<sup>31</sup> Hya xi camá ne, xutaxa rë yungun ne, cafehya me favor cojo Pilatu xi cuitexa me ne, xtotoho ntsacu me xi caviyujutaha xcun cru rë jan, sehe chjaháxin rë nima. Cuatjin cafehya me ta, tséhë xi nixtin hya ne, vispra tséhë suhi, hane mijí rë me xi cuiyujutaha nima xcun cru rë hisca cuma nchujun, tséhë xi, xi cuma nchujun jan ne, nixtin chjahájenda rë hacuaha jemu nixtin jyë. <sup>32</sup> Ngajan xi sindadu jan ne, quiji cavotoho cha ntsacu catsijo ni cha xi hacuaha cojo caviyujutaha xcun cru rë cojo Jesús. <sup>33</sup> Peru xi cafehe cha xcun cru rë Jesús ne, xi cavëë cha xi ha cahme me ne, cavotaain cha ntsacu me. <sup>34</sup> Peru ngu cha sindadu jan ne, quiji cavitengui cha quicha ngu ladu ntsacu ndanisín rë Jesús, hane ngutjen ni cavetju jni cojo nandá. <sup>35</sup> Cha xi cavëë ne, chja cha tséhë xcusun vëhë, cojo sa xi ngayujun ni ngayun ne, cumacjain nuju. Cjua xi chja cha ne, cjuaquixi, hacuaha cha vëhë ne, vëë cha ta cjuaquixi cjua xi chja cha. <sup>36</sup> Cuatjin camá xcusun vëhë, cojo sa xi cuetjucaa cjua xi chja xujun rë Nina xi chja cuitjin: “Hisca ngu nínda rë me xtotaain.” <sup>37</sup> Hacuaha chja nga ngu cahndë xujun rë Nina cuitjin: “Scuëë xuta me xi caxtengui rë quicha.” Cuatjin chja xujun rë Nina.

### *Seyaniji Jesucristu*

<sup>38</sup> Xi cavatju xcusun vëhë ne, José, ngu xuta Arimatea ne, cafehya me cahndë cojo Pilatu xi cjuahaxin me nima Jesús. José jan ne, hacuaha xuta ladu rë Jesús má me, handasa catsingacuiin me xi xcun cojo xcun, tséhë xi tsacjun me xutaxa rë yungun. Hane Pilatu ne, casua me cahndë. Hya xi camá ne, quiji cafahaxin José nima. <sup>39</sup> Nicodemo, me xi quiji cavisajmí cojo Jesús ngu nguixun jan ne, hacuaha cojo me quiji me cojo José. Yaha me sacuaha cantë kilu aceíte xi jemu ndaja jne xi cuëhëchjine me yojo rë nima jan. <sup>40</sup> Ngajan xi, xi cafaha me nima jan ne, sehe cavitejnu rë me aceíte hacuaha catsitjingui rë me tsjian, sacuatjin xcusun rë xuta tjë rë Israel hya xi vinchaniji me nima rë me. <sup>41</sup> Quihndë ne, tiña hiscan cavetaha xuta Jesús xcun cru xi catsiquehen me ne, tjin ngu ngajñi yatjë. Hane ngajñi yatjë jan ne, tacun ngu tsjun xatsë, xi hisca ngu nima cjëë seya. <sup>42</sup> Ngajan ni caveya me nima Jesús, tséhë xi ngajan xi tiña, hacuaha ha vispra tséhë suhi nixtin hya.

## 20

### *Tsjun tiya*

<sup>1</sup> Quihndë ne, nixtin xi tjun tjun tséhë totje jan ne, na María na Mágdala jan ne, nguitajñu jñu sa ne, cavetju na quiji na xcun tsjun rë nima Jesús. Hane xi cafehe na jan ne, cavëë na xi ndyojo xi quitahá tingotjo rë tsjun jan ne, cachjaháxin rë. <sup>2</sup> Ngajan xi vangasanii na quiji na hiscan tacun Simón Pedru cojo cha ladu rë Jesús xingu jan, cha xi jemu vinga rë Jesús. Hane xi cafehe na jan ne, cuitjin cachja na:

—Cavaxë me nima Nai naja tséhë tsjun rë, hane hyaan jani quiji chani rë. —Cuatjin cachja na.

<sup>3</sup> Ngajan xi Pedru cojo cha xingu jan ne, cavetjusanii me, quiji me xcun tsjun jan. <sup>4</sup> Vanga me catsijo me quiji me, peru cha xingu jan ne, hitsë sa hñu cavanga cha xi cuma rë Pedru, hane tjun cha vëhë cafehe cha xcun tsjun. <sup>5</sup> Hane xi cafehe cha jan ne, catsiquindi cha yojo rë cha, hane cavëë cha tsjian xi cavitjingui rë nima Jesús, siu jan. Peru caviisiin cha. <sup>6</sup> Hane xi cafehe Simón Pedru xi camá ngaskan ne, cavisehen me cahntsua tsjun jan. Hane cavëë me tsjian jan siu, <sup>7</sup> hane pañutu xi camahñu rcu nima jan ne, hacuiin tacun tangun cojo tsjian jan ta tjeju ne, xín tacun. <sup>8</sup> Ngajan xi cha ladu rë Jesús xi cafehe titjun xcun tsjun jan ne, hacuaha cavisehen cha. Hane cavëë cha hacuaha camacjain rë cha. <sup>9</sup> Nixtin hya ne, cjëë sa cuijne rcu cha xi chja xujun rë Nina xi nima Jesús ne, meje rë xi cuya me cjuahñu. <sup>10</sup> Hya xi camá ne, xuta ladu rë Jesús jan ne, cavuya cafe me.

### *Cavëë na María na Mágdala Jesucristu*

<sup>11</sup> Hane na María ne, hacuaha cavuya quiji nga na xcun tsjun jan, hane ngajan casecun na tingotjo cajiñda na. Hane táha tijihnda na ne, catsiquindi na yojo rë na, cavutsejenya na cahntsua tsjun jan. <sup>12</sup> Hane cavëë na jo ángel xi tyava tsjian rë, siu hiscan cafaña nima; ngu ne, táha hiscan cafaña rcu nima hane xingu ne, táha hiscan caviyuju ntsacu. <sup>13</sup> Ngajan xi ángel jan ne, cuitjin cavinenguisse rë na:

—Ngaye chjuun, ¿mé má chjihnde? —Cuatjin cavinenguisse ángel jan na.

Hane na vëhë ne, cuitjin cachja na:

—Cavaxë me maestru naha ne, hveen jani quiji chani rë. —Cuatjin cachja na.

<sup>14</sup> Hane xi cavatju cachja na cjua vëhë ne, sehe cavuya na táha ngaxun na, hane cavëë na Jesús secun me jan. Peru hvíin na xi hacui Jesús. <sup>15</sup> Ngajan xi Jesús ne, cuitjin cachja me:

—Ngaye chjuun, ¿mé má cuatjin chjihnde? ¿Yo xi vinchise? —Cuatjin cachja me.

Hane xi má rë na vëhë ne, cha xi sahmi cuidadu yatjë jan xi cachja. Vëhë xi cachja na cuitjin:

—Tatá, sa xi ngayun canaxun nima ne, tinújun jani catsangun chanu, sehe cjuë jaha. —Cuatjin cachja na.



<sup>16</sup> Ngajan xi Jesús ne, cuitjin cachja me cojo rë na:

—¡María! —Cuatjin cachja me.

Hane xi cavuya na ne, sehe cachja na hne hebreo cuitjin:

—¡Rabuni! —Cuatjin cachja na cjuá xi meje cuichja Maestro.

<sup>17</sup> Ngajan xi Jesús ne, cuitjin cachja me cojo rë na:

—Ha quihndé xicachunhñuu sa ná ta cjéé cjuéneje cjuétjengué Nina Nahmi naja. Peru tánguntjengun xuta ladu naha xi yahnga, hane cuitjin tinújun cojo rë me: “Cjuéneje, cjuétjengué Nahmi naha, me xi hacuaha Nahmi nuju, me xi Nina naha hacuaha Nina nuju ngayujun ni.” Cuatjin tinújun. —Cuatjin cachja Jesús.

<sup>18</sup> Ngajan xi na María na Mágdala jan ne, quiji cachja na cojo xuta ladu rë Jesús cuitjin:

—¡Cahvé maestru naja! —Cuatjin cachja na.

Hacuaha cachja na cjuá xi cachja Jesús cojo rë na.

*Cavëë xuta ladu rë Jesucristu me*

<sup>19</sup> Hane xi camajñu ndaja tséhë nixtin tjun tjun tséhë totje jan ne, tjin tangun xuta ladu rë Jesús jan. Hane tichjáñu tingotjo ndihya siu me, tséhë xi tsacjun me xutaxa rë yungun jan. Hya xi camá ne, cafehetsejen Jesús casecun me ngajñi rë xuta ladu rë me, hane cuitjin cachja me:

—Cjuandaja cjuajeya catejña cojo nuju. —Cuatjin cachja me.

<sup>20</sup> Hane xi cavatju cachja me cjuá vëhé ne, sehe catsingacun me tsja me hacuaha catsingacun me ngu ladu ntsacu ndanisin rë me. Ngajan xi xuta ladu rë me jan ne, jemu ndaja camá rë me hora xi cavëë me maestru naja. <sup>21</sup> Hane cachja nga Jesús cojo rë me xi cuacun jan cuitjin:

—Cjuandaja cjuajeya catejña cojo nuju. Sacuatjin catsingatju ná Nina Nahmi naja ne, hacuaha cuatjin tsingátju nuju ngayun. —Cuatjin cachja Jesús.

<sup>22</sup> Hane xi cavatju cachja me cjuá vëhé ne, sehe cachimatjo me xuta jan, sehe cachja me cuitjin:

—Chjuhunntsun Hasen rë Nina cahntsua xahasen nuju. <sup>23</sup> Xuta xi ninchatuhun jyé rë me ne, ha camanchataha. Hane xuta xi ninchatuun jyé rë ne, ha camanchataain. —Cuatjin cachja Jesús.

*Cavëë Tomás Jesucristu*

<sup>24</sup> Tomás, me xi chja me tséhë Cha Lihma, ngu xuta ladu rë Jesús ngajñi rë me xi tejó jan ne, cuajin me tacun me hya xi cafehe Jesús hiscan xi tjin tangun xuta ladu rë me xi yahnga jan. <sup>25</sup> Ngajan xi xuta ladu rë Jesús xi yahnga jan ne, cuitjin cachja me cojo Tomás:

—Cahyin Nai naja. —Cuatjin cachja me.

Peru Tomás ne, cuitjin cachja me:

—Sa xi scueen hiscan cavanguihmu rë xin tsja me hacuaha tsinguseen rcuntsa hiscan cavisehen xin jan hacuaha cuetahanntsaan ngu ladu ntsacu ndanisin rë me ne, cumacjain camahani ná. —Cuatjin cachja Tomás.

<sup>26</sup> Xi cavatju jyin nixtin jan ne, tjin tangun nga xuta ladu rë Jesús cahntsua ndihya, hacuaha cojo Tomás tacun me cojo me xi cuacun vë. Hane cafehe nga Jesús casecun me ngajñi rë me xi cuacun vë, ha ndasa tichjá tingotjo ndihya. Hane sehe cachja Jesús cuitjin:

—Cjuandaja cjuajeya catejña cojo nuju.

<sup>27</sup> Sehe cachja me cojo Tomás cuitjin: —Jaré rcuntsun. Chutsujun ntsa ne. Hacuaha jaré ntsun. Ninguisuhun ngu ladu ntsacu ndanisin naha. Tejñuxun xi cuatjin macjain nuju. Catamacjain nuju. —Cuatjin cachja Jesús.

<sup>28</sup> Ngajan xi Tomás ne, cuitjin cafayangui me tséhë Jesús:

—¡Ngayun Nai naha! ¡Ngayun Nina naha! —Cuatjin cafayangui me.

<sup>29</sup> Hane Jesús ne, cuitjin cachja me:

—¿Há macjain nuju ngatsë rë xi tichutsujun ná? Ndatjin, peru jemu ndaja tséhë me xi macjain rë, ha ndasa vutsijin ná me. —Cuatjin cachja Jesús.

*Cuitjin titsihindu Juan cojo sa xi cumacjain rë xuta*

<sup>30</sup> Quihndé ne, jemu cjín sa cjuarcun casahmi Jesús xcun xuta ladu rë me xi camahindiin xcun xujun vihi. <sup>31</sup> Peru cjuarcun vihi ne, camahindu cojo sa xi ngayujun ni ngayun ne, cumacjain nuju xi Jesús ne, hacui me xi Catsingatju Nina, hacuaha hacui Quihndi rë Nina me. Hacuaha camahindu cojo sa xi, xi cuatjin cumacjain nuju ne, sacú nuju cjuahñu xatsë ngatsë rë xi ladu rë me má ngayun.

## 21

*Cavëë yatu xuta ladu rë Jesucristu me*

<sup>1</sup> Xi camá ngascan ne, cavetjucaatsejen nga Jesús ngajñi rë xuta ladu rë me ngajan tjehen laguna Tiberias, xi hacuaha hmí rë laguna Galilea. Hane cuitjin camá. <sup>2</sup> Siu tangun me xi cuicun vi: Simón Pedru, cojo Tomás, me xi chja me tsêhê Cha Lihma, cojo Natanael, xuta Caná, ngu nandya tsêhê distritu Galilea, cojo quihndi rë Zebedeo, cojo jo sa xuta ladu rë Jesús jan. <sup>3</sup> Hane Simón Pedru ne, cuitjin cachja me cojo xicjin me:

—Ngahan ne, cjuê cúaxê chu ti. —Cuatjin cachja me.

Hane me xi yahnga jan ne, cuitjin cachja me:

—Hacuaha cuanguin ngayin cojo nuju. —Cuatjin cachja me.

Sehe cavetju me quiji me cojo xicjin me, cafaha me barcu, quiji me xcun nandá. Peru nguixun hya ne, casacuiin camahani rë me chu ti. <sup>4</sup> Hane hora xi tisahasen jan ne, cavêê me Jesús secun me tjehen laguna jan, peru hvín me xi hacui Jesús. <sup>5</sup> Ngajan xi Jesús ne, cuitjin cajindaya me cavinenguise rë me me xi cuacun jan:

—¿Há sacuiin nuju chu ti, tsan? —Cuatjin cavinenguise Jesús.

Hane me xi cuacun jan ne, cuitjin cajindaya me cafayangui me:

—¡Sacuiin niñi chu! —Cuatjin cafayangui me.

<sup>6</sup> Ngajan xi Jesús ne, cuitjin cajindaya me cachja nga me cojo rë me:

—¡Ningatjunyun nahya vë táha ladu quixi tsêhê barcu ne, sehe sacú nuju chu! —Cuatjin cachja me.

Hane xi catsingatjenya xuta ladu rë me jan nahya táha ladu quixi ne, caain rë me cavaxê me nahya jan, ngatsê rë ti xi jemu cjin chu hinchu chu. <sup>7</sup> Ngajan xi cha ladu rë Jesús xi jemu vinga rë Jesús jan ne, cuitjin cachja cha cojo Pedru:

—¡Nai naja vë! —Cuatjin cachja cha.

Ngajan xi Simón Pedru ne, xi cahndê me cjua xi hacui Nai naja ne, cavajásanii me tsjian rë me, tsêhê xi quixti me xi sahmi me xa jan. Hane sehe catsingatjenya me yojo rë me ngajñi nandá xi cjuetjengui me Jesús tjeheh laguna jan. <sup>8</sup> Peru xuta ladu rë Jesús xi yahnga jan ne, quijitjengui me Jesús cojo barcu jan, táha javê me nahya, ña quitsê rë cojo chu ti. Hacuuiin cjin hinchu me tsêhê tjeheh nandá ta sacuaha ngu cientu metru ni cjin. <sup>9</sup> Hane xi cafehe me tjeheh nandá jan ne, sehe cavetju me barcu, hane ngajan cavêê me ngu ndava ndihi tacun, quisun ngu ti xcun ndixuhi, hacuaha cavêê me niñu. <sup>10</sup> Ngajan xi Jesús ne, cuitjin cachja me cojo me xi cuacun vë:

—Tuhun ngujo chu ti xi sehe canaxun vë. —Cuatjin cachja Jesús.

<sup>11</sup> Sehe quiji Simón Pedru cajavê me nahya jan cavaxê me nangui quixí, quitsê rë cojo suvá ti yehe, sacuaha ngu cientu cojo yachan tejyan má chu. Hane handasa cuatjin cjin chu ti hinchu chu nahya jan ne, catiyaain. <sup>12</sup> Ngajan xi Jesús ne, cuitjin cachja me cojo xuta ladu rë me jan:

—Nduvun xinu tajñu. —Cuatjin cachja me.

Peru hisca ngu xuta ladu rë me cavetjiin cacun me cavinenguise me cuitjin: “Yo ngayun”, tsêhê xi ha vëê me xi hacui Nai naja. <sup>13</sup> Ngajan xi Jesús ne, cafaha me niñu jan, casua me xuta ladu rë me. Hacuaha cuantjin ni casua me chu ti jan.

<sup>14</sup> Vihi majyan ndiya xi cavetjucaatsejen Jesús ngajñi rë xuta ladu rë me, quihndê xi cavuya nga me cjuahñu.

#### *Visiajmi Jesucristu cojo Simón Pedru*

<sup>15</sup> Hane xi cajnetaha cajinê tajñu me ne, sehe cavinenguise Jesús Simón Pedru cuitjin:

—Ngayun Simón, quihndi rë Jonás, ¿há hitsê sa hmu tacún ná ngayun xi cuma rë me xi cuicun vi? —Cuatjin cavinenguise me.

Hane Pedru ne, cuitjin cafayangui me tsêhê Jesús:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

<sup>16</sup> Cavinenguise nga Jesús Pedru majo ndiya cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguise Jesús.

Hane Pedru ne, cuitjin cafayangui me:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

<sup>17</sup> Cavinenguise nga Jesús xi majyan ndiya Simón Pedru cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguise Jesús.

Ngajan xi Pedru ne, choho camá rë me xi cuatjin cavinenguise Jesús me xi majyan ndiya sa xi hmu cacun me Jesús, hane cuitjin cachja me:

—Tatá, ngayun ne, yějě ni ne, hyun. Ngayun ne, hyun ta hmú cáacun nuju. —Cuatjin cachja Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rě chu hnditsánga rě me. <sup>18</sup> Hacuaha cuichjá cojo nuju cjuaquixi ta hya xi chúva sa nixtin nuju ne, cachujun suvun tsjian nuju sehe catsangun hiscan xi meje cuangun. Peru hya xi cuma changá ngayun ne, nicujun tyja nuju, hane hacjahi xuta tsihñu me cahntsua nuju, sehe cjuecojo nuju me hiscan xi mijí cuangun. —Cuatjin cachja Jesús cojo Pedru.

<sup>19</sup> Xi cuatjin cachja Jesús ne, casua me camachaya rě Pedru mé chuva rě cueya Pedru, hacuaha casua me camachaya rě me xi sahmi jyě sahmi hnga me Nina xi cuatjin cueya me. Xi cavatju cachja Jesús cjua vėhě ne, sehe cachja me cuitjin cojo Pedru:

—Nduvun cuanguen cojo ná. —Cuatjin cachja Jesús.

*Xuta ladu rě Jesús xi jemu vinga rě me jan*

<sup>20</sup> Xi cavuya cavutsejen Pedru táha ngaxtun me ne, cavěě me xi tjengui cha xi jemu vinga rě Jesús jan nduva cha, cha xi quijivaha tiña xcun Jesús hya xi tijině me comida jan hacuaha cavinenguise cha me cjua vihi: “Tatá, ¿yo xi sahmi nuju entregadu ni?” <sup>21</sup> Hane xi cavěě Pedru cha vėhě ne, cavinenguise me cuitjin cojo Jesús:

—Tatá, hane me vėhě ne, ¿mé cuatju me cuma ni? —Cuatjin cavinenguise Pedru.

<sup>22</sup> Ngajan xi Jesús ne, cuitjin cachja me cojo Pedru:

—Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni? Ngayun ne, nduvun cuanguen cojo ná. —Cuatjin cachja Jesús.

<sup>23</sup> Hane cavitsojo ngajñi rě xuta ladu rě Jesús cjua xi cha xi jemu vinga rě Jesús jan ne, cueyaain cha. Peru Jesús ne, hacuiin cachja me cojo Pedru xi cueyaain cha vėhě ta xi cachja me ne, cjua vihi: “Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni?” Vėhě cjua xi cachja me.

<sup>24</sup> Cha xi cuajyihí jemu vinga rě Jesús jan ne, cha vėhě xi cachja cha cjua vėhě hacuaha cha vėhě catsihindu cha. Hacuaha ngayin xi tinihindin ngujo cjua vihi ne, hyin ta cjuaquixi cjua xi cachja cha.

<sup>25</sup> Hacuaha jemu cjín sa xcusun xi casahmi Jesús. Peru sa xi cumahindu yějě ni xcusun vėhě chuva ngu chuva ngu ne, xi má ná ne, chutaain cahndě setjo yějě ni libru xi cumahindu, handasa jingujyě ni ngasunhndě.

## Hacutjin Casahmi Apóstol

<sup>1</sup> Ngayun Teófilo, xcun xujun naha xi catsihindu nuju tjun tjun ne, cachjá cojo nuju yějē ni hacutjin cavetsihin casahmi xu Jesús cojo hacutjin cavetsihin cavicuya me. Cavétsehen hisca ntsacu cuetsihin ne, <sup>2</sup> catsingújnetaha hisca hya xi quiji me ngahnga. Hya xi chaja sa cjue me ngahnga ne, cachja xu me cojo apóstol xi ha cavaxijin me xi camá ladu rē me jan, hacutjin sahmi. Hacuaha cojo ngahñu rē Hasen rē Nina xi cachja xu me. <sup>3</sup> Hya xi ha cavatju nixtin xi cahme me ne, cavuya cafehetjengui nga me apóstol jan, casua me camachaya xu rē ta quixi jain xi tacun quicun nga me. Hane ngajñi rē xi yachan nixtin ne, cavēē apóstol jan Jesús, hacuaha cachja sa Jesús cojo me ngujo cja tséhē hacutjin cuma hya xi cuinduva Nina sahmi me gobiernu.

<sup>4</sup> Hane xi tacun Jesús cojo apóstol jan ngajan Jerusalén ne, caviteza xu me me cuitjin: —Hacuin cuetjunixun tséhē nandya vi ta nechunyun rē cjuandaja xi sua nuju Nahmi naha, sacuatjin xi ha cachjá cojo nuju. <sup>5</sup> Cuatjin nihñu ta, xuta ne, handasa cojo nandá cavitenda Juan me, peru ngayun ne, xtenda ngayun cojo Hasen rē Nina cahntsua xi ngujo sa nixtin. —Cuatjin caviteza me.

### *Quiji Jesús ngahnga*

<sup>6</sup> Hya xi camá ne, ngu nixtin xi siu tangun xu apóstol cojo Jesús ne, cavinenguisse me Jesús cuitjin:

—Tatá, ¿há cavechú nixtin xi tuhun cahndē xi xutaxa rē nangui naja ne, cuya cuitexa nga me nguehe nangui naja cojo jingu sa nangui, sacuatjin xi caviteza me hatsēē ni? —Cuatjin cavinenguisse me.

<sup>7</sup> Ngajan xi cafayangui xu Jesús cuitjin:

—Satiin nuju ngayun xi cumachaya nuju jarē nixtin xi Nina cavejña cacun me cojo cjuatacun rē suvá me xi cuma yějē ni xcusun véhē. <sup>8</sup> Peru hya xi cuinduva Hasen rē Nina cuisehen cahntsua xahasen nuju ne, hya sacú sa nuju ngahñu, sehe cuinúnun cja naha cojo xuta nguehe nandya Jerusalén, cojo yějē ni nandya distritu Judea cojo Samaria, hisca cojo yějē sa nangui xi siu ngasunhdē. —Cuatjin xu cafayangui me.

<sup>9</sup> Xi cafē cachja xu Jesús cja véhē ne, tivutsejen ni apóstol ne, cavetsihin quiji me ngahnga. Sehe cavisehen me ngajñi rē yufí, ha quihndē camatsijin sa me. <sup>10</sup> Ha tu tivutsejen cuaha xu apóstol ngahnga hacutjin cjuí Jesús ne, xi tu camachaya rē me ne, hinchacun jo xihin xi tyava tsjian rē hiscan siu me. <sup>11</sup> Hane cuitjin cavinenguisse xu xihin jan me:

—Ngayun, cha Galilea. ¿Mé má cuatjin chutsujun ngahnga? Jesús, me xi quiji ngahnga vē ne, cuatjin tutjin xi cahyun xi quiji me ne, tjin ngu nixtin ne, ha cuanitjin ni cuya nga me. —Cuatjin cachja xu xihin jan.

### *Catuxijin rē me xi cuisehen ngojo rē nima Judas*

<sup>12</sup> Hya xi camá xu ne, apóstol jan ne, cavetjuxin me tséhē ndetjún xi hmí ndetjún Ya Olivu, hane cavuya quiji nga me Jerusalén, xi tacun sacuaha ngu mil metru tséhē ndetjún véhē.

<sup>13</sup> Hya xi cafehe me ngajan ne, quiji me ndihya hiscan xi viyuju me, hane quijiniji me pisu ngahnga. Me xi cuicun xu vi xi viyuju me ngajan: Pedru, Jacobo, Juan, Andrés, Felipe, Tomás, Bartolomé, Mateo, Jacobo xi quihndi rē Alfeo, Simón xi tséhē partidu zelota, cojo Judas xi xuta rē Jacobo. <sup>14</sup> Yějē ni me xi cuacun jan, cojo yějē ni me xi xicjin Jesús, cojo María naa rē me, cojo yachjin xi yahnga ne, nchunchujun ni camatangun me xi sahmi me oración rē me.

<sup>15</sup> Ngu ndiya hya xi camatangun xu sacuaha chuva rē ngu cientu cojo can xuta xi cuacun ladu rē Jesús ne, casecunvasen Pedru ne, sehe cachja me cojo xuta jan cja vihi:

<sup>16</sup> —Ngayujun ngarcun ni ngayun xuta ladu rē Jesús. Cavetjucaa jain cja xi catsihindu xutachanga naja David xcun xujun rē Nina hatsēē. Hatuxa cuatjin camameje rē xi cuma ta, tséhē xi chaja sa xi cuma matsejen ne, Hasen rē Nina ne, ha casua camachaya rē xutachanga naja jan hacutjin sahmi nima Judas, nima xi cavisecoo rē xuta xi cafaha rē Jesús, catsihñu rē me. <sup>17</sup> Nima Judas jan matsejen ne, hacuaha camá ladu rē Jesús sacuaha ngayaan matsejen ta, tséhē xi cavaxijin Jesús nima xi cuisecoo rē me xcun xa rē Nina xi sahmi me. —Cuahaxutjin cachja Pedru.

<sup>18</sup> 'Nima Judas jan ne, cavatsē xu ngu rquí nangui cojo tujún xi cafaha tséhē xcusun tsehen xi casahmi xi casahmi rē entregadu Jesús. Hane ha xcun nangui xi cavatsē xu nima jan ne, caticja xcun, hane catsingá xu cahntsua nima, hisca cavetju yějē ni ntsehen rē. <sup>19</sup> Sacuatjin camá xu xi cahme nima ne, yějē cja véhē ne, cavechútaha rē yějē xuta ngajan

Jerusalén. Vêhê xi xuta ngajan ne, casuañihi xu rê me cahndê jan Acéldama, ñihi xi meje cuichja xi hne rê me ne, Cahndê Tsêhê Jni.

<sup>20</sup> Hacuaha quijinduju sa cachja Pedru cuitjin:

—Hacuaha xcun xujun tsêhê Salmo matsejen ne, cuitjin camahindu:

Cateña cuatjin ndava cha,

hacuaha hisca ngu cuiyijin jan.

Hacuaha camahindu sa cuitjin:

Xa rê cha ne, catjaha jingu sa xuta.

Cuatjin camahindu matsejen.

<sup>21</sup> Vêhê xi meje rê xi cuinchise rê ngu cha xi cuma tangun cojo niji matsejen, ngu cha xi ha cuatjin cavisecoo niji yêjê ni nixtin xi canujihinyin cojo Nai naja Jesús, <sup>22</sup> hisca nixtin xi cavitenda Juan me cojo hisca nixtin xi quiji me ngahnga. Cha vêhê matsejen ne, cuma tangun cha cojo niji, xi tsinguixi cha hacutjin camá xi cavuya Jesús cjuahñu. —Cuatjin cachja Pedru.

<sup>23</sup> Hya xi cajnetaha cachja Pedru cuatjin ne, catuxijin xu rê jo xihin: José cojo Matías. José jan ne, hacuaha hacui me xi hmí rê Barsabás cojo Justo. <sup>24</sup> Sehe cafehya rê me Nina cuitjin:

—Ngayun Nai niji, ngayun xi hyun cjuatacun rê ngayêjê ni xuta ne, tsêhê jo cha xi cuicun vihi ne, naxujun jarê cha xi chuya nuju ngayun <sup>25</sup> xi cuisehen cha xa sacuaaha apóstol cahndê rê nima Judas ta, tsêhê xi nima vêhê ne, cavéjña tiya cahndê rê xi quiji hiscan xi casatê rê. —Cuatjin cafehya rê me Nina.

<sup>26</sup> Xi cajnetaha cachja apóstol cuatjin ne, sehe cavaxê xu me ngu suerte, hane Matías casatê rê me. Ngajan xi Matías ne, camatangun me cojo tengu apóstol jan.

## 2

### *Hya xi canduva Hasen rê Nina*

<sup>1</sup> Hya xi camá ne, xi cavechú nixtin tsêhê suhi xi hmí Pentecostés ne, ngu cahndê ni camatangun xu yêjê ni xuta ladu rê Jesús. <sup>2</sup> Xi siu tangun me jan ne, ha tu ñahñu cahndê xu me xi jercu cafane ngajan ngahnga, sacuaaha nuhya rê xi fane vanga tjo xi jemu hñu camahani. Sehe yêjê ni xuta jan ne, cahndê xu me xi canduva cafane hisca cahntsua ndihya hiscan siu me. <sup>3</sup> Hacuaha cavêe xu me ndihi xi langa sacuaaha neje xuta, hane cavitsojo quiji casatê xu rê jima ngu jima ngu me. <sup>4</sup> Hya xi camá ne, catsê xu rê Hasen rê Nina xahasen rê jima ngu me jan, hacuaha cavetsihin cachja xu me jima ngu me cjuandaja rê Nina ne, cachja xu me jingu sa hne xi maji rê me, tucutjin xi Hasen jan casahmi xi camá cachja me.

<sup>5</sup> Ngajan Jerusalén ne, siu xuta tjê rê Israel xi faharcun jain me Nina, canduva me tsêhê yêjê ni nangui xi tjin ngasunhdê. <sup>6</sup> Hane hya xi canuhya rê xi cuatjin jercu fane ne, jercu xutacjin camatangun xu me xi quiji cavutsejen me mé xi camá. Hane xutacjin jan ne, jemu quijircun xu rê me, tsêhê xi hora xi tichja xuta ladu rê Jesús ne, xuta jan ne, hne ni rê suva me cahndê me jima ngu me xi cuacun jan. <sup>7</sup> Ngajan xi cachja xu me cojo xicjin me cuitjin:

—¿Mé nga vihi ni? ¡Yêjê ni me xi tichja vi ne, xuta distritu Galilea me! <sup>8</sup> ¿Hacutjin má xi jima ngu ngayaan ne, tinuhyan hne naja suvaan ta, <sup>9</sup> tsêhê xi jemu cjin nangui canduvan? Ngujo ngayaan ne, xuta Partia ngayaan. Ngujo nga ngayaan ne, xuta Media ngayaan. Cojo sa xuta Elam, xuta Mesopotamia, xuta Judea, xuta Capadocia, xuta Ponto, xuta Asia, <sup>10</sup> xuta Frigia, xuta Panfilia, xuta Egipto, xuta ladu Libia, tiñataha nandya xi hmí Cirene, xuta Roma, <sup>11</sup> xuta Creta, xuta Arabia. Ngayaan xuta ngu nangui xi macjain naja Nina rê xuta tjê rê Israel ne, jemu cjin ngayaan xi nechanyanjñe nguehe ngajñi rê xuta tjê rê Israel. Hacuaha ngayejen ngarca ni tinuhyan xi tichja me hne naja. Tichja me tsêhê cjuandaja xi jercu casahmi Nina. —Cuatjin xu cachja xuta xi cuacun jan.

<sup>12</sup> Hane tsêhê xi cuatjin camacjincacun me xi jemu quijircun camahani rê me ne, cavinenguise xicjin xu me cuitjin:

—¿Mé rê meje cuichja xcusun vi? —Cuatjin cavinenguise me.

<sup>13</sup> Peru yahnga me ne, catsixcuehyu me xuta ladu rê Jesús, hane cachja xu me ta chihi xuta jan.

### *Cjua xi cachja Pedru*

<sup>14</sup> Hya xi camá ne, caxinchacun yêjê tengu apóstol jan ne, sehe cachja xu Pedru cojo xutacjin jan cuitjin:

—Ngayujun ngarcun ni ngayun xuta tjê rê Israel xi nechun nguehe Jerusalén matsejen ne, tinuhyan ngujo cjua xi cuichjá cojo nuju vi, cojo sa xi cumachaya nuju. <sup>15</sup> Ngayujun ni matsejen ne, nújun ta me xi cuicun vi ne, chihi me. Peru quixiin xi nújun ta ndicumaha ni ne, sehe fane ñaja tsêhê nguítajñu. <sup>16</sup> Peru xcusun xi sehe cavatju camá nguehe matsejen ne, cavetjucaa cjua xi cachja xutachanga naja profeta Joel hatsêe nixtin, hya xi catsihindu me cjua xi casua Nina. Cuitjin catsihindu me:

17 Cjua xi cuicun vi xi chja Nina cojo naja:

Hya xi cuma tiña nixtin xi cjuë ngasunhdë ne,  
hya tsingátju Hasen naha xi cuisehen xahasen rë xuta jingujyë ni ngasunhdë;  
hane quihndi nuju, sa chjuun sa xihin ne, suacuenda me cjua naha,  
hacuaha cha nixti nuju cojo xuta changá nuju ne,  
cuichja chini cojo rë me tsëhë cjuatacun naha.

18 Hacuaha nixtin hya ne, tsingátju Hasen naha xi cuisehen xahasen rë me xi sahmi  
cjuatacun naha, sa chjuun, sa xihin,  
hane me vëhë ne, suacuenda me cjua naha.

19 Hya sahme xcusun cjuarcun vihi ngajan ngahnga, cojo nguehe nangui xi chutsujun:  
cuáxëcaa jni, cojo ndihí, cojo nihndi cjín.

20 Tsuhí ne, cuma jma;

sá ne, cuma hani sacuaha jni.

Cuatjin cuma hya xi chaja sa xi cuechú nixtin xi ngahan xi Nina ngahan ne, tsichúva yëjë  
ni xuta cojo cjuatacun rë me;

ngu nixtin jyë ngu nixtin ndajyihí nixtin vëhë.

21 Hane nixtin hya ne, yëjë ni xuta xi cjuehya ná me cjuandaja naha ngahan xi Nina ngahan  
ne,  
cuetjutje me.

Cuatjin catsihindu profeta Joel cjua xi cachja Nina.

22 Cjuinduju sa tichja Pedru cjua vihi:

—Quihndë matsejen ne, tinuhyun cjua xi cuichjá cojo nuju, ngayujun ngarcun ni xuta  
tjë rë Israel. Jesús, me Nasaret matsejen ne, camachaya naja xi Nina catsingatju rë me  
matsejen ta, tsëhë xi jemu cjín xcusun cjuarcun casahmi me ngajñi naja sacuatjin xi ha  
ndaja hyun. Camá casahmi me cjuarcun jan matsejen ta, ngatsë rë xi Nina casua rë me  
cahndë xi cuatjin casahmi me. 23 Nina matsejen ne, ha vëë me yëjë ni xcusun. Vëhë xi  
cojo tjun sa ne, ha catsingataha cacun me ta Jesús vë ne, cuma me entregadu cojo xuta  
tsehen. Cuatjin cavejña Nina cjuatacun rë me hisca chaja sa xi cuetjucaa xcusun vëhë.  
Sacuaha xi ngayun canicuhun Jesús ta, ngatsë nuju xi cavetaha xuta tsehen me xcun cru.

24 Peru cavëhëndaya Nina me tsëhë cjuaveya, catsicuya me me cjuahñu ta, tsëhë xi hatuxa  
camaji xi cavëjña me ngahma gobiernu rë cjuaveya. 25 Xutachanga naja David matsejen  
ne, catsihindu me tsëhë Jesús cuitjin:

Cahvë Nina xi cjui titjun me tsahan yëjë ni nixtin;

ticojo ná me, cojo sa xi tsajin mé cuma ná.

26 Vëhë xi xahasen naha ne, jemu sua rë, hacuaha ntsuva ne, suvá cjuandaja chjá.

Hacuaha vëhë xi ngahan ne, vetahá cáacun Nina.

27 Cuatjin sahme ta, tsëhë xi ngayun Nina ne, hacuini nismutacun hasen naha xi cuejña  
ngajan Hades hiscan siu nima,

hacuaha hatuxa tuun cahndë xi cjuehndu yojo naha, ngahan xi hatuxa tjënguë nuju cojo  
yëjë xahasen naha.

28 Ngayun ne, catuhun camachaya ná ndiya xi cuéchu hiscan sacú ná cjuahñu ndajyihí.

Hacuaha ninguitsun rë xahasen naha cjuasua xi cuécutaha nuju hiscan nechun.

Cuatjin catsihindu David.

29 Hacuaha cachja sa Pedru cuitjin:

—Ngayujun ngarcun ni matsejen ne, nguehe cuichjáquixë cojo nuju matsejen ta, xu-  
tachanga naja David ne, cahme me, hacuaha caseyaniji me hatsëë nixtin. Hane tsjun rë  
me ne, tacun cuaha hisca quihndë hiscan xi cavëjña. 30 Peru xi chaja sa xi cueya David  
jan matsejen ne, ngu profeta me, hacuaha ha vëë me xi ha cachja Nina cojo rë me cuitjin:  
Ngahan suva hvë xi ngu xuta tjë riji ne, cuitexa rë xuta, sacuatjin tivitexë ngaye. Cuatjin  
cachja Nina cojo David. 31 Vëhë xi camachaya rë David xcusun xi sahmi Nina ngascan.  
Ha vëë me xi cuya nga cjuahñu me xi tsingátju Nina, hane vëhë xi cachja me ta hacuaha  
hacuini cuejña me vëhë ngajan Hades ngajñi rë nima, hacuaha hacuini cjuehndu yojo  
rë me. 32 Hane ngayijin ni matsejen ne, cahyin suvin xi Jesús, me xi catsingatju Nina vë  
ne, catsicuya Nina me cjuahñu. 33 Hane quihndë matsejen ne, ha catsiqiujin Nina me  
xi cavechú me ngahnga hiscan véjña suvá Nina. Hacuaha cafahatsja me Hasen rë Nina  
sacuatjin xi cachja Nina Nahmi rë me xi sua rë me. Vëhë xi Jesús matsejen ne, tisahmi me  
xcusun xi tijima nguehe ngajñi niji. 34 Xi tsejen ne, cachjaain David tsëhë suvá me ta, tsëhë  
xi hacuini quiji me ngahnga sacuatjin quiji Jesús matsejen ta, catsihindu sa me cuitjin:  
Nina ne, cachja me cojo Nai naha cuitjin:

“Tinechin nguehe, ladu quixi naha,

35 hisca hya xi yëjë ni xi sahmi ri condra ne, cuiyujú ngahan ngahma gobiernu riji.”

Cuatjin catsihindu David hatsëë nixtin.

<sup>36</sup> Vêhê xi ngayujun ni xuta nangui Israel matsejen ne, ndaja catijne rcun cjuaxi chjá cojo nuju vi: Jesús vë, me xi ngayun catuhun xi cahme xchen ne, Nina casahmi me xi me vëhê ne, camá me Nai naja hacuaha catsingatju Nina me xi cuaxëtje naja me. —Cuahaxutjin cachja Pedru cojo xutacjin jan.

<sup>37</sup> Xi cahndê xutacjin jan cjuaxi vëhê ne, jemu choho camá rê me. Ngajan xi cavinenguisse me Pedru cojo apóstol xi yahnga jan cuitjin:

—Xi má nuju ngayun ne, ¿mé xi ndatjin nihñi? —Cuatjin cavinenguisse xuta jan.

<sup>38</sup> Ngajan xi cachja xu Pedru cojo rê me cuitjin:

—Nindeyun cjuatacun nuju. Hacuaha jima ngu ngayun ne, catixtenda ngayun, ngatsê rê xi camangu tacun cojo Jesucristu, sehe ngajan xi tsinchataha nuju Nina tsêhê jyê nuju. Xi cuatjin ne, hacuaha sahmi me cjuandaja xi sua nuju me Hasen rê me. <sup>39</sup> Cjuandaja vëhê ne, ha cachja Nina xi sua nuju me ngayun cojo quihndi nuju, hisca cojo yêjê xuta tjê nuju. Nina naja ne, sua me cjuandaja vëhê xi cuma rê yêjê ni xuta xi cuaxijin me. —Cuahaxutjin cachja Pedru.

<sup>40</sup> Hacuaha jemu cjin sa cjuaxi cachja me cuitjin, hacutjin meje rê xi sahmi xuta jan:

—Naxunxun yojo nuju tsêhê xuta tsehen xi siu quihndê. —Cuatjin cachja xu me.

<sup>41</sup> Ngajan xi xuta xi cachuya rê me cjuaxi cachja Pedru ne, caxtenda me. Hane cuatjin xi nixtin vëhê xu ne, sacuaha jyan mil xuta xi cavisehen me ladu rê Jesús. <sup>42</sup> Casua me yojo rê me cojo cjuaxi tivicya apóstol jan, hacuaha nguñaja cacun xu me xi ma tangun me cojo yêjê sa xuta ladu rê Jesús. Nchunchujun ni ne, camatangun me cojo xicjin me xi sahmi me oración, cojo xi sinê tangun me niñu.

### *Cjuandaja xi caviyuju xuta ladu rê Jesucristu cojo xicjin me*

<sup>43</sup> Jemu cjin xcusun xu cjuarcun casahmi apóstol ngatsê rê ngahñu xi casua Nina me, hane vëhê xi yêjê ni xuta xi hacuiin ladu rê Jesús ne, jemu tsacjun me. <sup>44</sup> Peru yêjê ni xuta ladu rê Jesús ne, camatangun xu cjuatacun rê me, hacuaha yêjê ni xcusun xi tsêhê jima ngu xu me ne, hacuaha camá tsêhê yêjê ni me xi yahnga jan. <sup>45</sup> Caviteña xu me xcusun xi tjin rê me ne, sehe cavatêcja xu me tuján ngajñi rê yêjê ni me xi casahmi chaja rê. <sup>46</sup> Nchunchujun xu ni ne, camatangun me nguñaja cacun me ngajan yungun xi matitjun xi cjuaharcun me Nina. Hacuaha xi cajinë xu me niñu ndava me cojo xicjin me ne, jemu cojo cjuasua, cojo cjuandaja cojo cjuajeya. <sup>47</sup> Hacuaha jemu cavaxëndaja me Nina. Hane yêjê xuta xi yahnga jan ne, xi cavêê xu me xcusun rê xuta ladu rê Jesús jan ne, cachja xu me ta xuta ndaja me xi cuacun vë. Hacuaha nchunchujun ni ne, tivaxëtje Nai naja ngujo ngujo sa xuta. Vêhê xi nchunchujun ni ne, jima cjin sa xuta yungun jan.

## 3

### *Casahmi Pedru cojo Juan xi camandaja ngu cha xi maji fi*

<sup>1</sup> Ngu nixtin jan ne, Pedru cojo Juan ne, quijiniñi tangun xu me yungun xi matitjun chuya rê fane jyan, hora xi fi chjayuma xuta. <sup>2</sup> Hane ngu cha xi maji fi, tsêhê xi tsehen ntsacu cha hisca hya xi catsin cha ne, hacuaha hora vëhê cjuicojo xuta rê cha cha yungun. Nchunchujun ni quiji chani rê cha ngajan tingotjo hñchua xondyojo rê yungun xi hmí Tingotjo Ndajiyhi, xi sahmi cha caridad tsêhê xuta xi visehen ndatsen yungun jan. <sup>3</sup> Hane xi cavêê cha hmu rê jan xi camatiña Pedru cojo Juan hiscan tacun cha xi cuisehen me ndatsen yungun jan ne, cafehya xu cha me cjuandaja rê me. <sup>4</sup> Ngajan xi cavutsejenndaja me cha. Hane Pedru ne, cuitjin cachja me cojo cha:

—Chutsijin niji hitsê —Chja xu me.

<sup>5</sup> Hane cavutsejen cha me ta, xi má rê cha ne, tjin mé xi sua me cha. <sup>6</sup> Ngajan xi cavuya cachja nga Pedru cojo rê cha cuitjin:

—Tsajin camahani ná tujún. Peru xi tjin ná, tsan ne, suá ri. Jesucristu, me Nasaret ne, casua ná me ngahñu, hane vëhê xi chjá cojo ri ta, tisechin, hane tujiyhiye. —Cuatjin cachja xu me cojo cha.

<sup>7</sup> Sehe cafaha me tsja quixi cha hmu rê jan hane catsisatjenhnga xu me cha. Hane ngutjen ni casacuhñu rê ntsacu cha cojo ndyojo naxa rê cha. <sup>8</sup> Xi tu cafaha Pedru tsja cha ne, cacaahnga cha, hacuaha casecun cha. Sehe cavetsihin catsujiyhiya cha. Hacuaha cavisehen cha yungun xi matitjun cojo me xi cuacun jan, cjuí cha, hisca chijihnga cha, taha tivaxëndaja cha Nina. <sup>9</sup> Yêjê ni xuta xi siu ndatsen yungun jan ne, cavêê me xi cjuí cha, hacuaha cahndê me xi tivaxëndaja cha Nina. <sup>10</sup> Hane jemu quijircun rê xuta jan tsêhê xcusun xi cavatju cha camá ta, tsêhê xi ha vëê me xi ha hacui cha vëhê xi véjña cha sahmi cha caridad ngajan tingotjo yungun xi hmí Tingotjo Ndajiyhi.

### *Cjuaxi cachja Pedru cojo xuta ngajan yungun xi matitjun*

<sup>11</sup> Cha xi camandaja xu jan ne, mijí cjuexin cha tsêhê Pedru cojo Juan. Hane tsêhê xi jemu quijircun rê xuta ne, cavanga me quiji me hiscan siu me xi cuacun jan, camatangun

me ngajan ngu ngahma ndihya tséhë yungun, cahndé xi hmí Tséhë Salomón. <sup>12</sup> Xi cavëë xu Pedru xi cuatjin camatangun xuta ne, cuitjin cachja me:

—Ngayujun ngarcun ni xuta tjë rë Israel matsejen ne, ¿mé má cuatjin fircun nuju tséhë cha xi cuijyihí vi? ¿Mé má cuatjin jercu chutsujun niji sacuaaha xi ngatsé rë cjuatacun niji suvin o ngatsé rë xi jemu ndaja chjihinrcuin Nina ne, vëhé xi camá canihñi xi camandaja cha? ¡jéya! Hacuini cuatjin. <sup>13</sup> Nina rë Abraham cojo Isaac cojo Jacob, Nina rë xutachanga naja matsejen ne, casahmi jyé casahmi hnga me Jesús, me xi casahmi xa rë Nina. Hane ngatsé rë me cama cjuarcun vi. Peru ngayun matsejen ne, catuhun Jesús cojo xutaxa rë. Hane ngajan xcun gobernador Pilatu matsejen ne, hora xi meje tsismi me Jesús ne, catuun cahndé. <sup>14</sup> Jesús jan ne, hatuxa tjengui me Nina cojo yëjë xahasen rë me, hatuxa cjuaquixi xi sahmi me. Peru ngayun matsejen ne, canitjungun me. Hane cahndé rë xi chjahyun rë Pilatu xi tsismi me Jesús matsejen ne, cachjahyun rë me xi tsismi me ngu cha tsiquehen. <sup>15</sup> Hane Jesús, me xi sua cjuahñu naja ne, ngayun catuhun me xi cahme me. Peru Nina matsejen ne, catsicuya me Jesús jan cjuahñu. Hane ngayin ne, hisca cahyin me quihndé xi tacun nga me cjuahñu. <sup>16</sup> Cha xi cuijyihí tichutsujun vi ne, ha hyun yo cha. Casacu rë ntsacu cha ngahñu ta, tséhë xi ngayin matsejen ne, mangutacuín cojo Jesús. Hacuaha ngatsé rë xi cuatjin mangutacuín cojo Jesús ne, vëhé casahmi xi camandaja cha sacuahatjin xi cahyun ngayujun ni.

<sup>17</sup> Quihndé ne, ha hvë ta ngayujun ni cojo yëjë xutaxa rë yungun naja matsejen ne, hya xi catuhun Jesús xi cahme me ne, hyúun yo xi canihñu cojo. <sup>18</sup> Peru Nina matsejen ne, cuatjin casahmi me xi cavetjucaa cjuaxi xi cachja yëjë ni profeta cojo xutachanga naja hatsëë nixtin hya xi cachja profeta jan, tséhë cjuahñi xi cuatju ngu me xi tsingatju naja Nina nchujun ni nguini. <sup>19</sup> Vëhé xi meje rë xi nindeyun cjuatacun nuju, tisuhun ndiya rë Nina, cojo sa xi Nina matsejen ne, cjuahaxin me yëjë ni jyé nuju. <sup>20</sup> Xi cuatjin nihñu ne, Nina ne, sua me cahndé xi cjuahajenda hitsé xahasen naja. Hacuaha xi cuatjin ne, tsingatju nga naja me Jesús ta, tséhë xi ha me vëhé xi cachja Nina hisca hatsëë xi cjuaha me xa xi cuaxëtje naja me. <sup>21</sup> Peru Jesús jan ne, meje rë xi cuejña sa me ngajan ngahnga hisca xi Nina ne, cuya sahmi ndaja nga me yëjë ni xcusun, sacuatjin xi ha cachja profeta rë me, hya xi cachja me cojo xutachanga naja cjuaxi rë Nina hatsëë nixtin. <sup>22</sup> Xutachanga naja Moisés matsejen ne, cuitjin cachja me ngu cjuaxi catsingatju Nina tséhë me hatsëë: “Nina ne, sahmi me xi cuetjujñi ngajñi nuju ngu xi cuma profeta sacuaaha ngahan. Tetuhunrcun yëjë cjuaxi cuichja me cojo nuju ta, <sup>23</sup> sa xi yo xi cuetaharcuaain cjuaxi rë profeta jan ne, hatuxa cueya, ha quihndé cuejñaai ngajñi naja ngayaan xuta rë Nina.” Cuahaxutjin cachja Pedru cjuaxi rë Moisés.

<sup>24</sup> Sehe cachja sa Pedru cojo xuta cuitjin:

—Hacuahanitjin yëjë profeta, xi cavetsihin cojo xutachanga naja Samuel cojo xi canduvaniji sa ne, jemu cachja me tséhë xcusun xi camá nixtin xi nechan vi. <sup>25</sup> Cjuandaja xi cachja Nina xi sua me xutachanga naja nchujun ni nguini ne, vëhé cjuandaja xi tisua naja me quihndé. Hacuaha compromisu xi casahmi me cojo xutachanga naja matsejen ne, tisahmichihin me cojo naja quihndé. Nina ne, casahmi me compromisu jan nixtin xi cachja me cojo xutachanga naja Abraham cuitjin: “Ngatsé rë ngu xuta tjë riji ne, ngahan ne, tsinchácun yëjë ni xuta ngasunhndé.” Cuatjin cachja Nina cojo Abraham. <sup>26</sup> Sehe ngajan xi Nina matsejen ne, hya xi cavaxijin me Jesús xi cjuaha xa rë me ne, tjun tjun ngayaan xuta tjë rë Israel catsingatju naja Nina me. Cuatjin xi tsinchácun naja me xi cuetjunxeen jima ngu ngayaan tséhë ndiya tsehen xi tivanguen. —Cuahaxutjin cachja Pedru cojo xuta.

## 4

### *Casua Pedru cojo Juan cjuaquixi rë me*

<sup>1</sup> Hya xi camá ne, Pedru cojo Juan ne, tichja cuaha sa me cojo xutacjin jan, hora xi cafehe xu ngujo nahmi. Hacuaha cha mayu rë yungun xi matitjun cojo ngujo sa cha saduceo ne, cafehe xu cha cojo nahmi xi cuacun jan. <sup>2</sup> Hane jemu xti má rë yëjë me ta, tséhë xi tivicuya apóstol jan xuta, tichja me xi ngatsé rë xi catsicuya Nina Jesús cjuahñu ne, vëhé xi machaya naja xi cuechú nixtin ne, tsicuya nga Nina yëjë ni nima cjuahñu. <sup>3</sup> Hya xi camá ne, cachjaha rë Pedru cojo Juan. Peru tséhë xi ha quiji xu hora ne, tu caxincha ni me ndavaya. <sup>4</sup> Peru jemu cjin xuta xi cahndé cjuaxi rë apóstol jan ne, camacjain xu rë me. Vëhé xi yëjë xuta xihin xi macjain rë ne, sacuaaha hñú ml xu camá me, cojo me xi hatsëë camacjain rë cojo me xi sehe camacjain rë.

<sup>5</sup> Xi camá nchujun jan ne, ngujo xutaxa rë yungun cojo ngujo xuta changá cojo ngujo cha xi vicuya cjuachacun ne, camatangun xu me ngajan Jerusalén. <sup>6</sup> Camatangun me cojo Anás, me xi matitjun tséhë yëjë ni nahmi, cojo Caifás, cojo Juan, cojo Alejandru, cojo yëjë sa me xi xuta rë me xi matitjun tséhë nahmi jan. <sup>7</sup> Hya xi camá xu ne, catsingatju me quiji



chjahá rë Pedru cojo Juan, caviyuju me me cavasencja jan ne, sehe cavinenguisse me me cuitjin:

—¿Hacutjin canihñu xi camá camandaja cha hmu rë jan? ¿Yo casua nuju chuva rë xi cuatjin canihñu? —Cuatjin cavinenguisse me.

<sup>8</sup>Ngajan xi Pedru ne, cojo ngahñu rë Hasen rë Nina xi quitsë rë xahasen rë me ne, cuitjin cafayangui xu me:

—Ngayun xi má ngayun xutaxa rë tsajan, ngayun xi má ngayun xuta changá naja matsejen ne, <sup>9</sup> quihndé xi meje cumachaya nuju hacutjin canihñi ngu cjuandaja xi camandaja ngu cha hmu rë. <sup>10</sup> Nguehe cuinújin cojo nuju cojo sa xi cumachaya rë yëjë ni xuta tjë rë Israel ta cha hmu rë vi ne, nguehe secun cha xcun ngayujun ni matsejen ta, tséhë xi camandaja cha ngatsë rë ngahñu rë Jesucristu, me xi tséhë nandya Nasaret. Ngayun ne, catuhun me xi cahme me xcun cru, peru Nina matsejen ne, catsicuya rë me cjuahñu. <sup>11</sup> Me vëhë xi canitjungun ta, tséhë xi xi má nuju matsejen ne, machjirin camahani Jesucristu. Canitjungun me sacuaaha tsitjungi chjinevexo ngu ndyojo xi chuyin rë me tséhë. Peru quihndé matsejen ne, camatitjun me tsajan ngayejen ni, sacuaaha ndyojo ngahñu rë ndihya. <sup>12</sup> Tsajin sa yo xi cuaxëtje naja. Tsajin sa ngu xuta nguehe ngasunhndé xi catsingatju Nina xi cuma cuaxëtje naja. —Cuahaxutjin cachja Pedru.

<sup>13</sup> Hya xi camá xu ne, cavëë xuta xi cuacun jan xi Pedru cojo Juan ne, tsacjuiin camahani me xi sua me cjuaquixi rë me, hacuaaha cavacun rë xuta jan xi Pedru cojo Juan ne, xuta yuma me, xi hisca cavutayaain me cjuachacun. Ngajan xi xuta jan ne, jemu quijircun rë me. Hacuaha ha vëë me xi Pedru cojo Juan ne, hacui me xi catsujyihya cojo Jesús. <sup>14</sup> Hane tséhë xi cha xi camandaja jan ne, ngajan secun tangun xu cha cojo Pedru cojo Juan ne, vëhë xi sacuiynin rë xuta xi cuacun jan hacutjin cuma xi cuichja me condra tséhë Pedru cojo Juan. <sup>15</sup> Hya xi camá ne, cavaxë me Pedru cojo Juan cojo cha xi camandaja jan candatsen. Sehe cavisajmicjin sa me cojo xicjin me. <sup>16</sup> Cuitjin cachja me:

—¿Mé xi ndatjin nihña cojo cha xi cuacun vë? Yëjë ni xuta nandya ne, ha camachaya rë me tséhë cjuarcun jyë xi casahmi cha. Hane cumaji cuinújan xi quixin. <sup>17</sup> Peru cojo sa xi hacuiin cuitsojo sa cjuacjintacun vihi ngajñi rë xuta nandya ne, cuinchanrcun rë cha. Cuinújan cojo rë cha ta ha quihndé cuichjaain sa cha tséhë nima vëhë cojo xuta. —Cuahaxutjin cavisajmicjin xuta xi cuacun jan cojo xicjin me.

<sup>18</sup> Hya xi camá ne, cajindaya nga xuta xi cuacun jan Pedru cojo Juan, sehe cachja xu me cojo me xi ha quihndé cuyaaain cuichja me tséhë Jesús cojo xuta. <sup>19</sup> Peru Pedru cojo Juan ne, cuitjin cafayangui me:

—Xi má nuju suvun ne, ¿jarë xi hitsë sa chuya rë Nina? ¿Há xi cuinuhyin tsujun ne?, o há tsajin ne, ¿há xi cuinuhyin tséhë me? <sup>20</sup> Peru ngayin matsejen ne, hatuxa cumajin nisejyin xi cuinújin cjuandaja xi canuhyin cojo xcusun xi cahyin. —Cuatjin xu cafayangui me.

<sup>21</sup> Hya xi camá ne, xuta xi cuacun jan ne, cavincharcun sa xu me Pedru cojo Juan, sehe cavëhëndaya xu me. Casacuiynin rë me hacutjin sahmi me castigo me ta, tséhë xi yëjë ni xuta tichja me xi jemu jyë hnga Nina cojo Hasen rë me, ngatsë rë cjuarcun xi cuatjin camá jan. <sup>22</sup> Cha xi camandaja ngatsë rë cjuarcun jan ne, ha vatju yachan nu xu tjin rë cha.

#### *Cafehya sa xuta ladu rë Jesús ngahñu cojo Nina*

<sup>23</sup> Hya xi camá ne, xi tu camandaja Pedru cojo Juan ne, quijitjengui sa xu me xuta xi yahnga xi hacuaaha ladu rë Jesús, sehe casuacuenda me yëjë cjuaxi cachja xuta xi cuacun jan cojo rë me. <sup>24</sup> Hya xi cahndë me xi yahnga jan cjuaxi cachja Pedru cojo Juan ne, ngu tangun ni cachja me xi cafehya rë me Nina cuitjin:

—Ngayun Nai niji. Ngayun xi canihñu ngahnga, canihñu nangui, canihñu ndachacun, hacuaaha canihñu yëjë ni xcusun xi siu jan ne, <sup>25</sup> cojo Hasen nuju ne, cachuxuhun cjuatacun rë xutachanga niji David, me xi casahmi xa nuju. Hane me vëhë ne, cuitjin cachja me cjuaxi catuhun rë me:

¿Má rcu hngacacun xuta?

¿Mé má cuatjin tsingatahacacun me ngu cjuatacun tsehen xi tsajin mé machjirëhë?

<sup>26</sup> Me xi matitjun tséhë jingu sa nangui, cojo xutaxa rë jingu sa nandya ne, matangun me xi sahmi me condra Nina hacuaaha sahmi me condra me xi tsingatju Nina xi cuaxëtje naja.

Cuatjin cachja xutachanga niji David.

<sup>27</sup> Hacuaha cavetjucaa jain cjuaxi vëhë ta, tséhë xi ha nguehe nandya vihi ne, cuatjin camatangun Herodes cojo Poncio Pilatu cojo xutaxin cojo xuta tjë rë Israel. Camatangun me xi cuacun vëhë xi sahmi condra me Jesús, me xi hatuxa sahmi xa nuju cojo yëjë xahasen rë, me xi ngayun caningatjun ngasunhndé. <sup>28</sup> Cuatjin casahmi me yëjë hacutjin xi ha cavejñu cjuatacun nuju hatsëë xi cuma ta, tséhë xi cuatjin meje nuju ngayun. <sup>29</sup> Quihndé ne, ngayun xi Nai niji ngayun ne, chjuhuncuendun cjuaxi cachja xuta xi cuacun vë hacutjin xi

choho sahmi me cojo niji. Hane ngayin xi má ngayin mosu hndixahan nuju ne, tuhun niji hitsé ngahñu xi rcuini camahani xi cuinújin cjua nuju cojo xuta. <sup>30</sup> Hacuaha cojo ngahñu nuju ne, nihñu xi cuma ndaja xuta hmu rë, hacuaha nihñu hitsé cjuarcun xi cueyinnanguin ñihi rë Jesús, me xi hatuxa sahmi xa nuju cojo yëjë xahasen rë. —Cuatjin xu cafehya rë me Nina.

<sup>31</sup> Hane xi cajnetaha casahmi xuta ladu rë Jesús jan oración ne, cafani nangui ngajan hiscan tjin tangun xu me. Hane cojo Hasen rë Nina ne, catsë rë xahasen rë yëjë ni me, sehe cavetsihin cachja me nguñaja cacun me cjua rë Nina cojo xuta.

*Casahmi tangun me yëjë xcusun xi tjin rë me*

<sup>32</sup> Quihndë ne, ngayëjë ni me xi cuatjin camangu cacun me cojo Jesús ne, ngu cjuatacun ni rë me, ngu xahasen xu ni rë me. Hacuaha hisca ngu me cachjaain me xi yëjë ni xi tjin rë me ne, tsëhë suvá me ta xi tsëhë me ne, hacuaha tsëhë xu yëjë xicjin me. <sup>33</sup> Hane cojo ngahñu jyë xi casua Nina apóstol xi cuacun jan ne, cuatjin quijinduju me casua me camachaya rë xuta hacutjin catsucuya Nina Nai naja Jesús cjuahñu. Hane jercu casua Nina cjuandaja rë me cojo yëjë xuta ladu rë me. <sup>34</sup> Hacuaha ngajñi rë me xi cuacun jan ne, tsajin xu hisca ngu me xi tjin rë cjuachaja ta, tsëhë xi yëjë me xi nai rë ngu rquí nangui o sa xi ngu ndihya ne, viteña me, sehe fi cani me chji rë jan <sup>35</sup> tsja apóstol. Sehe ngajan xi apóstol xi cuacun jan ne, vatëcja xu me ngajñi rë yëjë xuta, ha tucutjin cjuachaja xi tjin rë xuta jan. <sup>36</sup> Hacuaha cuatjin casahmi ngu cha xi hmí rë José, ngu cha xi casuañihi apóstol ngu ñihi xi ma jo xi hmí Bernabé, ñihi xi meje cuichja cuitjin: Ngu Cha Xi Sua Cjuetacun. Cha vëhë ne, tjë rë Leví má cha, peru catsin xu cha ngajan ngu nangui hiscan xi hmí rë Chipre. <sup>37</sup> Hane cha vëhë ne, caviteña cha ngu rquí nangui xi tjin rë cha, sehe quiji cani cha chji rë, cakahatsja apóstol.

## 5

*Cha Ananías cojo na Safira*

<sup>1</sup> Peru ngu nga cha xi hmí rë Ananías cojo na Safira chjuun rë cha ne, hacuaha caviteña xu cha ngu rquí nangui. <sup>2</sup> Peru cakahaxin suvá cha hitsé tujún jan, sehe quiji cani cha hitsé tujún xi cavangui jan tsja apóstol, sacuaaha xi ha vëhë yëjë ni chji rë nangui jan. Hane na chjuun rë cha jan ne, hacuaha vëë xu na xi cuatjin casahmi cha. <sup>3</sup> Ngajan xi cachjataha xu Pedru cha cuitjin:

—¿Mé má cuatjin caningatihin xi catsë Satanás xahasen riji, ngaye Ananías? ¡Xitsehen vëhë casahmi xi cachjehexin sove hitsé tujún tsëhë chji rë nangui xi caviteñi! ¡Xitsehen vëhë casahmi xi meje cuindache rë Hasen rë Nina! <sup>4</sup> Xi chaja sa cuiteñi nangui jan ne, ha hye ta tsiji. Hacuaha ngu ndiya xi ha caviteñi ne, hacuaha hye ta tujún rë ne, tsiji. ¿Mé má cuatjin caningatehetacuin xi nihñi ngu cjuatacun tsehen vi ni? Hacuini ngayin ni xuta xi meje cuindache niji ta hisca cojo Nina meje cuindache rë me. —Cuatjin cachja Pedru.

<sup>5</sup> Xi tu cahndë cha Ananías cjua jan ne, caticja cha, hane cahme xu cha. Hane yëjë xuta xi camachaya rë cjuacjintacun jan ne, jemu catsacjun camaha xu ni me camá. <sup>6</sup> Ngajan xi ngujo cha ne, cavaxté cha nima ngu tsjian ne, sehe cafaha cha quiji caveyaniji cha.

<sup>7</sup> Hya xi camá ne, xi cavatju sacuaaha chura rë jyan hora xi cahme nima jan ne, cafehe xu chjuun rë nima ngajan hiscan siu apóstol jan. Peru cjëë cumachaya rë na hacutjin xi cavatju nima xihin rë na camá. <sup>8</sup> Ngajan xi cavinenguise xu Pedru na cuitjin:

—Tinoje cojo ná. ¿Há caviteñu nangui sacuatjin chji vihi?

—Juun. Chji vëhë caviteñi. —Cuahaxutjin cachja na.

<sup>9</sup> Sehe ngajan xi cavinenguise nga xu Pedru na cuitjin:

—¿Mé má cuatjin sacuaaha catsingataha cacun nima xihin riji ne, cuatjin caningatehetacuin xi meje cuindachun Hasen rë Nina? Chutsijin ta cuacun cha xi quiji caveyaniji rë nima xihin riji nduva cha jan. Quihndë ne, hacuaha cojo ngaye cuatjin cuatji cuma. —Cuatjin cachja Pedru.

<sup>10</sup> Ha hora vëhë ni ne, caticja xu na hiscan secun Pedru, hane cahme na. Xi tu cavisehen nga cha xi cuacun jan ne, ha cahme xu na xi tu cavëë cha. Sehe ngajan xi cafaha cha nima jan, quiji caveyaniji cha tjeheñ rë hiscan caseyaniji nima xihin rë. <sup>11</sup> Hya xi camá ne, yëjë xuta rë yungun cojo yëjë sa xuta xi camachaya xu rë cjuacjintacun jan ne, jemu catsacjun camahani me camá.

*Casahmi apóstol cjuarcun*

<sup>12</sup> Hacuaha apóstol xi cuacun jan ne, jemu cjín cjuarcun xi casahmi xu me ngajñi rë xuta nandya. Hane ngajan ndatsen yungun xi matitjun, hiscan ngahma Ndihya Tsëhë Salomón ne, ngajan xu ma tangun yëjë xuta ladu rë Jesús. <sup>13</sup> Peru xuta xi hacuini ladu rë Jesús me ne, hisca vetjiin cacun me xi cuma tiña me ngajan, handasa yëjë xuta jemu ndaja chja me tsëhë xuta ladu rë Jesús jan. <sup>14</sup> Peru hacuaha jemu cjín sa xuta sa chjuun sa xihin me ne, jimangu cacun xu me cojo Jesús, hacuaha jima tangun me cojo xuta ladu rë Jesús. <sup>15</sup> Hacuaha jemu

cjín xuta ne, vaxë me xuta hmu rë, viyuju me me xcun niñña ngajan ndiyatë, cojo sa xi hora xi cuatju xu Pedru ne, ndastu tjahnguen rë me satë rë xuta hmu rë xi cuacun jan, hane cumandaja me. <sup>16</sup> Hacuaha jemu cjín camaha xu ni xuta nandya tahndee rë Jerusalén ne, ficojo me xuta hmu rë hacuaha cojo me xi híncha xitsehen xahasen rë, ngajan Jerusalén. Hane camandaja ngayëjë xu ni me.

*Cavatju apóstol cjuañihi*

<sup>17</sup> Hya xi camá ne, nahmi xi matitjun tséhë yëjë ni nahmi, cojo yëjë sa xuta saduceo xi tjin tangun cojo rë me ne, jercu camaxín camaha xu ni rë me. <sup>18</sup> Véhë xi cachjaha rë apóstol, caxincha me ndavaya. <sup>19</sup> Peru hya xi camanguixun ne, ngu ángel tséhë Nina quiji cavuxaha xu tingotjo ndavaya, sehe cavaxë rë apóstol xi cuacun jan. Hya xi cavetju me ne, cachja ángel jan cojo rë me cuitjin:

<sup>20</sup> —Tángun yungun xi matitjun ne, tuhuncuendun rë xuta yëjë ni cjuá tséhë ndiya xatsë xi tisua nuju Nina. —Cuatjin cachja ángel jan.

<sup>21</sup> Ngajan xi apóstol jan ne, casahmi me sacuatjin cachja ángel. Véhë xi, xi casahasen xi camá nchujun ne, quiji xu me yungun xi matitjun. Hane xi cafehe me ndatsen yungun jan ne, cavetsihin casuacuenda me xuta cjuá tséhë ndiya xatsë jan.

Hacuaha sacuaaha hora véhë ne, nahmi xi matitjun cojo xuta xi tjin tangun cojo rë me ne, casahmi tangun xu me yëjë xuta changá tséhë xuta tjë rë Israel xi cuma ngu junta jyë. Sehe catsingatju me ngujo cha nísë xi cjue coaxë xu cha apóstol tséhë ndavaya, cjucecojo cha me hiscan tijima junta. <sup>22</sup> Peru xi cafehe cha ngajan ndavaya jan ne, casacuiin xu rë cha me. Ngajan xi cavuya quiji casuacuenda cha xuta changá jan cuitjin:

<sup>23</sup> —Xi cãfhin tingotjo ndavaya jan ne, nda ndaja ticháhñu, hacuaha cha xi sahmi cuidadu jan ne, hínchacun cha tingotjo jan. Peru xi catuxaha tingotjo ne, tsajin yo casacu niji xi híncha cahntua. —Cuatjin casuacuenda cha.

<sup>24</sup> Ngajan xi cha mayu yungun cojo yëjë nahmi xi matitjun ne, hya xi cahndë xu me cjuá véhë ne, jemu cavinenguise xicjin me tséhë xcusun xi camá jan. <sup>25</sup> Hane ha hora véhë ni ne, cafehe xu ngu cha xi cachja cojo rë me cuitjin:

—Nijyun tacún. Ngu xa xi nduva ngahan ne, cha xi cuacun cavinchun ndavaya jan ne, hínchatahá cha ndatsen yungun, tichja cha cojo xuta. —Cuatjin cachja cha xi cafehe jan.

<sup>26</sup> Sehe ngajan xi cha mayu yungun jan ne, quiji cha cojo cha nísë, quijjaha xu cha apóstol xi cuacun jan. Hane xi cafaha cha me ne, quijicojo cha me hiscan tijima junta, peru hacuiin cojo cjuachan ta, tséhë xi jemu tsacjun xu cha xuta nandya, sá tu cuetaha me cha ndoyo.

<sup>27</sup> Hya xi cafehecojo cha me jan ne, sehe caviyuju cha me xcun nahmi cojo xuta changá xi cuacun jan. Ngajan xi nahmi xi matitjun ne, cachja xu me cojo rë me cuitjin:

<sup>28</sup> —Ha canújin cojo nuju ta ha quihndë cuyuun cuinújun tséhë nima véhë cojo xuta. Peru quihndë ne, caninguitsjun sa cjuachacun nuju jingujyë nandya Jerusalén, hacuaha meje ningatjunsun jyë tséhë cjuaveya rë nima véhë ngaxtín ngayin.

<sup>29</sup> Ngajan xi Pedru cojo apóstol xi yahnga xu jan ne, cuitjin cafayangui me:

—Meje rë xi cuinuhyan tséhë Nina cahndë rë xi cuinuhyan tséhë xuta. <sup>30</sup> Ngayun matsejen ne, catuhun Jesús xi catyangui me xcun ngu cru, hane ngajan cahme me. Peru Nina rë xutachanga naja matsejen ne, catsicuya me Jesús cjuahñu. <sup>31</sup> Hane Jesús vë matsejen ne, casahmi jyë casahmi hnga Nina me, hacuaha cavejña me Jesús ladu quixi tséhë me, xi cumatitjun Jesús tsajan hacuaha coaxëtje naja me. Cuatjin casahmi Nina, cojo sa xi ngayaan xuta tjë rë Israel matsejen ne, nindeyan cjuatacun naja hacuaha tsinchataha naja me tséhë jyë naja. <sup>32</sup> Ngayin matsejen ne, cahyin xcusun véhë, véhë xi titihin jimachaya rë xuta. Hacuaha Hasen rë Nina matsejen ne, cuatjin tisua jimachaya rë xuta tséhë xcusun xi camá jan. Hane Nina ne, casua me Hasen rë me cojo xuta xi vihndë tséhë me. —Cuatjin cafayangui apóstol jan.

<sup>33</sup> Ngajan xi yëjë me xi cuacun tisahmi xu junta jan ne, hya xi cahndë me cjuá xi cachja apóstol jan ne, jercu camacjan camahani rë me. Hisca meje tsiquehen xu me apóstol jan.

<sup>34</sup> Peru ngajñi rë xuta xi sahmi junta jan ne, jiyajñi ngu me xi vicuya cjuachacun xi hmí rë Gamaliel, ngu xuta fariseo. Hane yëjë ni xuta ne, jemu faharcun xu me me. Gamaliel jan ne, casecunvasen me, sehe cavitexa me xi cuetjuxin apóstol ngu hora lihndi candatsen.

<sup>35</sup> Sehe cachja xu me cojo xuta xi tisahmi junta jan cuitjin:

—Ngayujun ngarcun ni xuta tjë rë Israel matsejen ne, nechun cuidadu sa xi mé meje nihñu cojo cha xi cuacun vë. <sup>36</sup> Ninguitsjun ta hatsëë nixtín matsejen ne, cavetjufñi nima cha Teudas ngajñi rë xuta. Jercu cachja nima xi jemu cha venguichji rë cha, hane sacuaaha ñuju cientu xihin cavisehen ladu rë nima. Hya xi camá ne, catsiquehen xuta nima, hane yëjë ni xuta ladu rë nima jan ne, cavitsojo me, hane ngajan cafë cjuandya xi casahmi me.

<sup>37</sup> Hane xi camá ngasca ne, sacuaaha nixtín xi camá census matsejen ne, hacuaha cavetjufñi nima Judas, cha Galilea. Cavindacha nima xuta, hane jemu cavisehen me ladu rë nima.

Peru nima vèhë matsejen ne, hacuanitjin ni cahme. Hane yèjë ni xuta ladu rë nima jan ne, caffè me cavitsojo me. <sup>38</sup> Vèhë xi nguehe cuichjá cojo nuju ta mijí rë xi nihñu cjuahngatacun cojo cha xi cuacun vë. Mijí rë xi chasen cha ta, sa xi suvá cjuatacun ni rë xuta xi tjiima matsejen ne, cjuëya suvá vë. <sup>39</sup> Peru sa xi cjuatacun rë Nina xi tjiima ne, cumaji cuichancjan cjuatacun rë cha. Ndaja cuidada, sá tu cuechú nixtin xi cumachaya naja ne, Nina tichicjaan cojo rë me. —Cuatjin cachja Gamaliel.

Hya xi cajnetaha cachja Gamaliel cuatjin ne, yèjë ni xuta xi tisahmi junta jan ne, cajne cacun me. <sup>40</sup> Ngajan xi cajindaya nga me apóstol jan, sehe cavitexa me casehen rë. Hya xi camá ne, cachja xu me cojo rë apóstol xi ha quihndë cuyaain cuichja me tsèhë Jesús cojo xuta, sehe cavèhëndaya xuta jan me. <sup>41</sup> Ngajan xi apóstol jan ne, cavetjuxin xu me tsèhë hiscan jima junta jan. Hane jemu ndama camahani rë me xi cavechú chuya rë xi choho cavatju me camá ngatsë rë Jesús. <sup>42</sup> Peru nchunchujun ni ne, ngajan ndatsen yungun cojo ndava xuta ne, casejyiin xu xi casua me camachaya rë xuta cjuandajyihí xi chja xi Jesús ne, hacui me xi catsingatju Nina.

## 6

### *Catuxijin rë yatu cha xi cuisecoo rë apóstol*

<sup>1</sup> Hya xi camá ne, xi quiji sa nixtin ne, camacjín sa xuta ladu rë Jesús. Hane ngajñi rë me xi cuacun vèhë ne, me xi visiajmi hne griego ne, cavetsihin cavinchajyë xu me me xi visiajmi hne rë xuta tjë rë Israel. Jyë xi cavincha xu me ne, yachjin cahán tsèhë ngajñi rë me ne, ndajin xu má cuenda me nchunchujun ni hora xi ticja xcusun xi satë rë me xingu xingu me xi tjin rë cjuachaja. <sup>2</sup> Ngajan xi apóstol xi tejó jan ne, cajindayavaha me yèjë sa xuta ladu rë Jesús, sehe cachja xu ngu apóstol jan cuitjin:

—Ndajintjin xi tu fë tu vetsihin vejñixin cja rë Nina ngatsë rë xi chjihincuendin cjuacjintacun xi ma cuenda nchunchujun ni. <sup>3</sup> Vèhë xi ngayujun ni ne, naxujun ngajñi nuju yatu xihin xi tsajin mé cún mé má hacuaha quitsë rë xahasen rë cojo Hasen rë Nina hacuaha vechútaha cjuatacun rë. Sehe tahan rë xa xi cjuahacuenda cjuacjintacun vèhë. <sup>4</sup> Xi cuatjin ne, ngayin ne, tihín yojo niji cojo xa xi nihñi oración hacuaha tihín cumachaya rë xuta cja rë Nina. —Cuatjin cachja apóstol jan.

<sup>5</sup> Hane jemu cachuya xu rë yèjë xuta xi cuacun jan cja xi cachja apóstol jan. Sehe ngajan xi cavaxijin xu me yatu xihin xi cuicun vi: Esteban, ngu xihin xi jemu mangucacun cojo Jesús hacuaha quitsë rë xahasen rë cojo Hasen rë Nina; Felipe; Prócoro; Nicanor; Timón; Parmenas; cojo Nicolás, ngu xutaxín xi hacuain xuta tjë rë Israel, peru camacjain rë me Nina rë xuta tjë rë Israel. Nicolás jan ne, canduva me ngu nandya xi hmí rë Antioquía. <sup>6</sup> Hya xi camá xu ne, quijicojo xuta jan xihin xi cavaxijin me jan xcun apóstol. Sehe apóstol jan ne, casahmi me oración, sehe cavisanetsja xu me xihin xi cuacun jan xi suaxa rë me.

<sup>7</sup> Xi quiji sa nixtin ne, xuta Jerusalén ne, jemu jima chaya sa xu rë me cja rë Nina, hacuaha jercu jima cjín sa xuta ladu rë Jesús ngajan Jerusalén. Hisca nahmi ne, jemu cjín me xi jimangu cacun xu me cojo cjuandajyihí xi chja tsèhë Jesús.

### *Caxinchajyë rë Esteban*

<sup>8</sup> Nixtin hya ne, Esteban, ngu xihin xi hacuaha cojo cavaxijin xuta jan ne, quitsë rë xahasen rë me cjuandaja rë Nina, hacuaha quitsë rë me ngahñu rë Nina. Vèhë xi jemu tisahmi xu me cjuarcun ngajñi rë xuta. <sup>9</sup> Peru ngujo cha tsèhë yungun xi hmí rë Yungun Rë Hndixahan Xi Ha Ndaya Tjin ne, cojo xu cha ma tangun cha cojo cha nandya Cirene, cha nandya Alejandria, cha estadu Cilicia, cojo cha estadu Asia, xi cuisajmi cha. Cavechú ngu nixtin xi camatangun xu cha xi cuacun vë cojo Esteban ne, cavetsihin cafahataha cha me. <sup>10</sup> Peru ngatsë rë xi Hasen rë Nina jemu casua rë me cjuatacun xi cuisajmi me cojo cha ne, cacaain xu rë cha casahmi condra cha cja rë me. <sup>11</sup> Hya xi camá ne, cavanguisehna xu cha ngujo cha xi cuichja cjuandesu cuitjin:

—Canuhyin xi choho cachja cha xi cuajyihí vë tsèhë Moisés hacuaha choho cachja cha tsèhë Nina. —Cuatjin cuichja cha.

<sup>12</sup> Hane xi cachja cha cjuandesu vèhë ne, casahmi cha xi yèjë xuta cojo xuta changá cojo cha xi vicuya cjuachacun ne, jemu camaxti xu rë me. Ngajan xi cachjahá rë Esteban, quiji chani rë me xcun yèjë xuta xi matitjun. Sehe casahmi me xi matitjun jan ngu junta. <sup>13</sup> Ngajan xi cha xi cuacun jan ne, cuitjin cachja xu cha cjuandesu hora xi cavinchajyë cha Esteban:

—Cha xi cuijyihí vi ne, sejiyiin cha xi choho chja cha tsèhë yungun rë Nina xi matitjun vi. Sejiyiin cha xi choho chja cha tsèhë ley rë yungun naja. <sup>14</sup> Hacuaha canuhyin xi cachja cha xi Jesús, cha Nasaret vë ne, tsinguetsun cha yungun naja vi hacuaha tsindeya cha xcusun xi cavejña xutachanga naja Moisés hatsëë hacutjin nihña. —Cuatjin cavinchajyë cha me.

<sup>15</sup> Ngajan xi yějě xuta xi siu xu xcun junta jan ne, cavutsejenndaja me Esteban. Hane cavěě me xi xcun Esteban ne, tangun jyihi xu cojo xcun ngu ángel.

## 7

### *Casua Esteban cjuaquixi rě me*

<sup>1</sup> Hya xi camá ne, nahmi xi matitjun xu jan ne, cavinenguise me Esteban cuitjin:  
—¿Há quixi cjuaxi chja cha xi cuacun vė? —Cuatjin xu cachja me.  
<sup>2</sup> Hane Esteban ne, cuitjin xu cavetsihin casua me cjuaquixi rě me:  
—Ngayujun ni quihndi nandya, ngayujun ni xuta changá matsejen ne, tisiñuju cjuaxi cuichjá cojo nuju vi. Nina naja, xi jemu jyě hnga camahani me cojo hasen rě me matsejen ne, cajnetsejen me cachja me cojo xutachanga naja Abraham, hya xi tacun cuaha Abraham táha ladu tsěhě nangui Mesopotamia, hya xi chaja sa cjue setaha cahndě me ngajan Harán.  
<sup>3</sup> Hane cachja Nina cojo rě me cuitjin: “Nisimitacuin nangui riji. Nisimitacuin xuta riji. Hane tihin ngajan ngu nangui cjin, tuyani ni hiscan xi ngahan tsingácun ri.” Cuatjin cachja Nina.  
<sup>4</sup> Ngajan xi Abraham matsejen ne, cavetju me tsěhě nangui rě me, nangui xi hmí Mesopotamia, hiscan xi caviyuju xuta nangui rě me, xuta Caldea. Cavetju me quiji casetahacahndě me ngajan nandya Harán. Hane xi cavatju cahme nahmi rě me ne, Nina casahmi me xi cavetju nga Abraham tsěhě Harán, canduva casetahacahndě me nguehe nangui hiscan xi nechan quihndě.  
<sup>5</sup> Peru xi ngutjen ni ne, casuaain Nina me hisca hitsě nangui vihi xi cuma tsěhě me ta xi cachja me ne, hisca xi cuma ngascan ne, sehe sua me nangui vihi xi cuma tsěhě Abraham, cojo yějě sa xuta tjě rě me xi cuinduva ngascan. Hya xi cachja Nina cojo rě me cuatjin ne, cjěě sacú rě chjuun rě Abraham quihndi.  
<sup>6</sup> Hacuaha cachja sa Nina cojo Abraham cuitjin: “Cuechú nixtin xi xuta tjě riji ne, cjue cuiyujutaha me ngu nangui cjin. Hane xuta xi nangui rě jan ne, sahmi me mosu hndixahan rě me xuta xi cuacun tjě riji vė, hacuaha jemu choho sahmi me cojo rě me. Ñuju cientu nu xi cuatjin sahmi me xcusun vėhě.  
<sup>7</sup> Peru cuechú nixtin xi ngahan ne, sahme castigu xuta xi nangui rě jan. Hane xi cuatju xcusun vėhě ne, sehe cuetju xuta tjě riji ne, cuya cuinduva nga me nguehe cahndě vihi, hane nguehe cjuaharcun cjuahajeya ná me.” Cuatjin cachja Nina cojo Abraham.  
<sup>8</sup> Hane cojo sa xi cuma tsejen xi camangu cacun Abraham cojo compromisú xi casahmi Nina cojo rě me matsejen ne, cavejña Nina ngu xcusun xi xtú chuxin naja ngayaan xi xihin ngayaan. Ngajan xi hya xi cavechú jyin nixtin xi catsin Isaac, quihndi rě Abraham ne, cavatě me chuxin rě quihndi jan sacuatjin xi cachja Nina. Hane hacuanitjin ni casahmi Isaac cojo quihndi rě me Jacob. Hacuaha Jacob ne, cuatjin casahmi me cojo yějě tejó quihndi rě me xi xutachanga naja.

<sup>9</sup> Hane xi camá ngascan matsejen ne, cavechú ngu nixtin xi xutachanga naja xi quihndi rě Jacob jan ne, jemu casahmi xín cacun me cojo hntśě me xi hmí rě José. Vėhě xi caviteña me José. Hane quijicojo xuta xi cavatsě rě José jan me hisca nangui Egipto. Peru Nina ne, cavisecoo me José jan,  
<sup>10</sup> hacuaha cavaxětje Nina me tsěhě yějě cjuacjintacun xi cavatju me camá. Jemu casua Nina me cjuatacun, hacuaha jemu casua me me cjuandaja. Vėhě xi me xi matitjun tsěhě yějě ni nacióñ Egipto ne, jemu cachuya rě me tsěhě José jan. Vėhě xi me xi matitjun jan ne, casua me José xa xi cuitexa me jingujyě ni nacióñ jan hacuaha cjuahacuenda me yějě cjuacjintacun xi tjin ndava me xi matitjun jan.

<sup>11</sup> Hya xi camá ne, jercu camajindya camahani jingujyě ni ladu tsěhě Egipto cojo Canaán. Jercu jyě camahani ngu cjuañihi xi cavatju xuma xutachanga naja camá. Casacuiin rě me xi sině me.  
<sup>12</sup> Peru hya xi camachaya rě xutachanga naja Jacob xi jemu tjin xichině ngajan Egipto matsejen ne, ngajan catsingatju me quihndi rě me ngu ndiya titjun xi cjue cuatsě me xichině.  
<sup>13</sup> Hane hya xi ma jo ndiya quiji quihndi rě Jacob ngajan Egipto ne, cachja quixi José cojo hntśě me cuitjin: “Ngahan xi tshun ná.” Cuatjin cachja me. Hacuaha nixtin hya ne, me xi matitjun tsěhě Egipto matsejen ne, camachaya rě me yo tjě rě má José.  
<sup>14</sup> Sehe ngajan xi José ne, catsingatju me hntśě me jan xi cjue jaha me Jacob, nahmi rě me, cojo yějě sa xuta rě me. Xi yějě xuta xi cuacun vėhě ne, jyanchan tyjuhun xuta má me.  
<sup>15</sup> Ngajan xi Jacob cojo xuta rě me matsejen ne, quiji caviyujutaha cahndě me ngajan Egipto. Hane xi camachangá me ne, ngajan cahme me. Hacuaha yějě sa xutachanga naja xi cuacun jan ne, hacuaha ngajan cahme me.  
<sup>16</sup> Xi camá ngascan ne, quiji chani rě yojo rě nima Jacob ngajan nandya Siquem. Ngajan caseyaniji nima tsjun xi cavatsě Abraham hatsěě, hya xi caviteña xuta rě ngu cha xi hmí rě Hamor, ngajan Siquem.

<sup>17</sup> Hya xi camá ne, xi camatiña nixtin xi cuetjucaa sacuaaha cjuaxi ha cachja Nina cojo Abraham matsejen ne, yějě xutachanga naja xi siutaha cahndě ngajan nangui Egipto ne, ha jercu cjin camahani camá me.  
<sup>18</sup> Sehe cavisehen nga ngu me xi xatsě xi camatitjun me ngajan nangui Egipto jan. Hane me vėhě ne, hvíin me hacutjin casahmi nima José hatsěě.  
<sup>19</sup> Hacuaha me vėhě ne, jemu cavindacha me xutachanga naja. Jemu choho casahmi me

cojo rë me ta casahmi me nguÿë xi xutachanga jan ne, cuaxë me quihndinda rë me, cuiyuju me candatsen cojo sa xi cueya. Hane cuatjin xi ha quihndë hacuini cuma cjin sa me. <sup>20</sup> Ngajni rë cjuacjintacun vëhë matsejen ne, hya catsin Moisés, ngu quihndi xi jemu ndajjihi camahani. Hane quihndi jan ne, ndava nahmi rë camacha sacuaa chuya rë jyan sá. <sup>21</sup> Peru hya xi cavaxë me quihndi jan xi cueya ne, na quihndi rë me xi matitjun jan ne, cafaha na quihndi jan, hane catsicha na sacuaa quihndi rë súva jan. <sup>22</sup> Hane xi quiji sa nixtin ne, cavetsihin cavutaya Moisés yëjë ni cjuahasen xi tjin rë xuta Egipto, sehe ngajan xi camá me ngu xihin xi jercu vengui chji rë xi chja me cojo xi sahmi me.

<sup>23</sup> 'Hya xi cavechú Moisés yachan nu matsejen ne, catsingataha cacun me xi cjue scusehenya me xuta tjë rë Israel, xuta xi tangun xutachanga rë me cojo. <sup>24</sup> Hya xi camá ne, cavëë Moisés xi ngu cha Egipto ne, tisahmi cha cjuahngatacun cojo ngu cha tjë rë Israel. Ngajan xi Moisés ne, cavisecoo me cha xi choho tivatju tijima jan. Catsiquehen me cha Egipto jan, hane cuatjin casahmingojo me. <sup>25</sup> Xi má rë Moisés matsejen ne, cuijnercu yëjë xuta tjë rë Israel xi Nina tsingatju me Moisés xi cuaxëtje me xuta jan. Peru cajni rcu me. <sup>26</sup> Xi camá nchujun jan ne, cavechútaha me jo cha tjë rë Israel xi ticjan cha cojo xicjin cha. Hane meje cuatëcja me si xi tisahmi cha. Vëhë xi cachja me cojo cha cuitjin: "¿Mé má cuatjin nihñu cjuahngatacun cojo xingun? ta ngayun ne, tangun xutachanga nuju." Cuatjin xu cachja Moisés. <sup>27</sup> Peru cha xi tisahmi cjuahngatacun cojo cha xingu jan ne, catsivaha cha Moisés, sehe cachja cha cojo me cuitjin: "¿Yo casuaxa nuju xi nduvun vitexun niji hacuaha nduvun nichuvun jyë niji? <sup>28</sup> ¿Há meje nicuhun ná ngahan sacuatjin canicuhun cha Egipto nguña?" Cuatjin cachja cha. <sup>29</sup> Hane xi cuatjin cachja cha cojo Moisés ne, catsacjun me camá. Vëhë xi quiji cavanga me hiscan ngu nangui cjin xi hmí rë Madián, ngajan casetahacahndë me. Hane xi quiji nixtin matsejen ne, camá me nahmi rë jo quihndi xihin.

<sup>30</sup> 'Hane hya xi cafë nga yachan nu xi casetaha Moisés ngajan ne, cavechú ngu nixtin xi cavëë me sacuaa ngu ángel ngajni rë ndihi tsëhë ngu ya lihndi xi seti ngajan ngu xín camahani tsëhë nandya, tiña Naxi Sinaí. <sup>31</sup> Hane jemu quijircun rë Moisés xi cavëë me xcusun jan. Hane xi quijitiña sa me xi scutsejenndaja me matsejen ne, cahndë me cjuar rë Nina xi cachja cuitjin: <sup>32</sup> "Ngahan xi Nina rë xutachanga riji ngahan, Nina rë Abraham cojo Isaac cojo Jacob." Cuatjin cachja cjuar rë Nina jan. Ngajan xi Moisés ne, cavetsihin ña cafatsë me xi catsacjun me camá; ha hisca quihndë cavetjiin cacun me xi scutsejen sa me. <sup>33</sup> Sehe cachja nga Nina cojo rë me cuitjin: "Naxe chuxinxte riji ta cahndë hiscan sechin ne, catsinchácun. <sup>34</sup> Hacuaha nguehe cuichjá cojo ri ta ngahan ne, ha cahvë hacutjin choho tisahmi xuta Egipto cojo xuta ladu naha, hacuaha ha cahndë hacutjin tife cacun xuta ladu naha xi choho tivatju me tijima. Vëhë xi ngahan ne, canduvajne xi cuaxëtjë me. Quihndë ne, ndove ta tsingátju ri ngajan Egipto." Cuatjin cachja Nina cojo Moisés.

<sup>35</sup> 'Moisés vë ne, hacui me xi catsitjungui xuta hya xi cachja xuta cuitjin: "¿Yo casuaxa nuju xi nduvun vitexun niji, hacuaha nduvun nichuvun jyë niji?" chja me. Hacuaha hacui me xi Nina catsingatju rë xi cuma titjun hacuaha cuëhëndaya rë xuta. Hane sacuaa ángel xi camatsejen ngajni ndihi rë ya lihndi jan ne, cavisecoo rë Moisés xi cuatjin casahmi me. <sup>36</sup> Hacuaha hacui me xi cavaxë rë xutachanga naja tsëhë nangui Egipto. Jemu casahmi me cjuarcun ngajan Egipto, cojo ngajan ndachacun Hani, cojo ngajan ngu xín camahani tsëhë nandya. Cahntsua yachan nu xi cuatjin casahmi me. <sup>37</sup> Moisés vë ne, hacui me xi cachja cojo xutachanga naja cuitjin: "Nina ne, cuya tsingatju nga nuju me ngu profeta xi cuetjuñi ngajni nuju. Tsingatju nuju Nina profeta vëhë sacuatjin catsingatju ná me ngahan." Cuatjin cachja Moisés. <sup>38</sup> Hacuaha ha hacui ni me xi casetaha cojo xutachanga naja, hya xi caviyujutaha me ngajan ngu xín camahani tsëhë nandya. Hacui me xi cachja ángel cojo rë ngajan Naxi Sinaí. Hacuaha hacui me xi cafahatsja cjuar rë Nina xi sacú rë xutachanga naja hacuaha hisca cojo xi sacú naja ngayaan quihndë.

<sup>39</sup> 'Peru xutachanga naja xi cuacun jan ne, mijí cuihndë me tsëhë Moisés. Catsitjungui me Moisés, hisca cavuya catsinguitsjen nga me nangui Egipto cahntsua xahasen rë me. <sup>40</sup> Ngajan xi cachja me cjuar vihi cojo xutachanga naja Aarón, hntsé Moisés: "Nindujun sa nina xi scuxaha ndiya tsajan ta, cha Moisés vë, cha xi cavaxë naja tsëhë nación Egipto ne, hyaan mé camá rë cha xi vuyaain cha." Cuatjin cachja xuta jan. <sup>41</sup> Ngajan xi nixtin hya ne, catsindaja xuta jan ngu nina rë me xi xcusun rë ngu hndindyaja. Hya xi camá ne, catsiquehen me ngujo chu, sehe quiji caviyuju me chu xcun nina jan. Hacuaha casahmi me suhi tsëhë nina xi catsindaja súva me jan. <sup>42</sup> Vëhë xi Nina naja ne, catsismi cacun me xutachanga jan, cojo sa xi cjuaharcun xuta jan niñú xi siutaha ngahnga, sacuatjin catsihindu profeta xcun xujun rë Nina cjuar xi cachja Nina hya xi cachja me cuitjin: Ngayujun ngarcun ni xuta tjë rë Israel matsejen ne, hya xi canicuhun chu sacuaa cjuatjo xi tuhun ná ngahan cahntsua yachan nu xi cavinechuntuhun ngajan ngu xín camahani tsëhë nandya matsejen ne,

hacuiin ngahan xi cuatjin cachjuhnrcun ná ta ngayun ne, ha canindujun suvun nina xi chjuhnrcun.

<sup>43</sup> Ndava nina nuju xi hmí Moloc

cojo niñú rē nina nuju xi hmí Refán, jo vēhē xi cachuhunhgung catsanguncujun xi má nina nuju.

Vēhē xi ngahan sahme xi cjucojo cjuachan nuju xuta cjin sa tsēhē hiscan xi hmí Babilonia. Cuatjin catsihindu profeta cjuá xi cachja Nina.

<sup>44</sup> Hya xi caviyujutaha xutachanga naja hatsēē ngajan ngu xín camahani tsēhē nandya matsejen ne, cavejña rē me ngu ndihya tsjian hiscan camá acuerdu cojo Nina. Hane vēhē xi vēē me xi cavejña Nina cojo rē me. Ndava Nina jan matsejen ne, camandaja tutjin xi cachja Nina cojo Moisés, camandaja sacuatjin xcusun xi catsingacun Nina Moisés. <sup>45</sup> Hane hya xi cafahatsja xutachanga naja ndava Nina jan ne, hacuaha cuatjin quijicojo me ha tuyani ni xi quiji caviyujutaha nga me. Hane xi camá ngascan ne, cavechú nixtin xi cafehecojo Josué xutachanga naja guehe nangui naja vi, nangui xi Nina cavisecoo rē xutachanga naja xi cavaxēxin me xuta xi nangui rē. Hacuaha nixtin hya xi camá cuatjin ne, hacuaha cafehecojo me ndava Nina jan. Cuatjin camá sa hisca hya xi cavechú nixtin rē xutachanga naja David. <sup>46</sup> Hane David jan matsejen ne, jemu cachuya rē Nina tsēhē me. Ngajan xi cafehya David cahndē cojo Nina xi tsindaja me ngu ndihya hiscan cuejña Nina. <sup>47</sup> Hane hisca xi camá ngascan ne, xutachanga naja Salomón catsindaja me ndava Nina. <sup>48</sup> Peru Nina xi matitjun matsejen ne, hacuiin vejñacahndē me ngu ndihya xi tsindaja xuta ta ¿há vitsjin nuju hacutjin cachja ngu profeta xi cachja me cjuá rē Nina cuitjin?:

<sup>49</sup> Ngahnga ne, sacuaaha ngu silla ndajyihi hiscan xi vitejña,

hane nangui ne, sacuaaha ngu yatē hiscan xi visane ntsacu, chja Nina.

Tsajin yo cuma tsindaja ngu ndihya hiscan xi cuitejñacahndē,

Tsajin ngu cahndē xi cuacun vē xi cuma cjuahájenda.

<sup>50</sup> Ngahan catsindaja yējē ni xcusun xi tjin ngasunhndē.

Cuatjin cachja profeta jan cjuá rē Nina.

<sup>51</sup> Ngayujun ni ne, jercu taja camahani rcun. Xahasen nuju cojo cjuatacun nuju ne, tangun cojo xutaxín xi hatuxa macjaain rē Nina. Hatuxa nihñu condra Hasen rē Nina. Tangun camahani ngayun cojo xutachanga naja. <sup>52</sup> Hacuaha xutachanga naja ne, jercu catsujyihya tjengui profeta cojo cjuahngatacun. Hisca catsiquehen me profeta xi casua camachaya rē me xi sehe cuinduva ngu me xi hatuxa tyjahi jain cojo cjuatacun rē. Hane quihndē xi cafehe jain me ne, ngayun canihñu me entregadu, ngayun catuhun me xi catsiquehen xuta me. <sup>53</sup> Ngayun xi casua ángel xutachanga nuju ley rē Nina ne, hisca nuhyuun tsēhē ley vēhē. —Cuatjin casua Esteban cjuaquixi rē me xcun yējē xuta xi matitjun ngajan xcun junta.

#### *Cojo ndoyojo catsiquehen xuta Esteban*

<sup>54</sup> Ngajan xi yējē xuta xi matitjun xi cuacun tisahmi junta jan ne, hya xi cahndē me cjuá xi cachja Esteban jan ne, hisca catsijanerii me nehñu me xi jercu tu camacjan camahani rē me. <sup>55</sup> Peru Esteban ne, quitsē rē xahasen rē me cojo Hasen rē Nina. Hane xi cavutsejenniji me ngahnga ne, cavēē me hasen ndajyihi rē Nina xi jercu seti camahani. Hacuaha cavēē me Jesús, secun me cojo Nina. <sup>56</sup> Ngajan xi cachja Esteban cuitjin:

—Chutsujun ni. Ngahan ne, xi tivutsején ngahnga vē ne, tsejen xi tixaha sacuaaha tingotjo rē, hacuaha tsejen xi me xi Quihndi rē Xuta Jain ne, secun me cojo Nina. —Cuatjin cachja Esteban.

<sup>57</sup> Peru me xi cuacun jan ne, cavetsihin cajindayatē me hacuaha cavahahñu me tyjavañuju me, tsēhē xi mijí sa cuihndē me xi tichja Esteban. Sehe ngutjen ni ne, ngu tangun ni cavanga me quiji cavehnchun me Esteban xi cafaha me me. <sup>58</sup> Sehe cavaxēxin me me ngajan tjehe nandya, sehe cavitexa me ngujo cha xi cavetsihin cavetaha cha ndoyojo Esteban. Cha xi cuacun casahmi ni me, cavaxē cha tsjian xcun rē cha, caviyuju cha hiscan xi secun ngu cha xi hmí rē Saulo, xi casahmi cha cuidadu. <sup>59</sup> Jinguyējē rē xi tsatē rē Esteban ndoyojo xi tivetaha cha xi cuacun jan ne, cafehya me cjuandaja cojo Jesús cuitjin:

—Jesús, ngayun Nai naha, chjuhunntsun hasen naha. —Cuatjin cachja me.

<sup>60</sup> Hya xi camá ne, cavixuhñchi me, hane sehe jercu cajindaya me, cachja me cjuá vihi: —iNgayun Nai naha, ninchatuhun rē xuta xi cuacun vi tsēhē cjuatsehen xi tisahmi me cojo ná! —Cuatjin cajindaya me cachja me.

Xi cafē cachja me cjuá vēhē ne, cahme me.

<sup>1</sup> Hane Saulo ne, hacuaha cachuya rë me xi cuatjin catsiquehen cha xi cuacun jan Esteban.

Ha nixtin hya ni ne, cavetsihin catsujyihya tjengui xuta xi matitjun jan yëjë xuta ladu rë Jesús cojo cjuahngatacun ngajan Jerusalén. Hya xi camá ne, yëjë xuta ladu rë Jesús jan ne, café cavitsojo me táha ladu tsëhë distritu Judea cojo distritu Samaria. Suvá sa apóstol xi tsajin cavitsojo xu me. <sup>2</sup> Hane ngujo cha xi faharcun jain rë Nina ne, cavinchaniji cha nima Esteban, hacuaha jemu cajihnda xu cha tsëhë nima. <sup>3</sup> Peru Saulo ne, cavetsihin catsujyihya tjengui me xuta ladu rë Jesús cojo cjuahngatacun. Quiji cavisehen xu me ndava xuta xi cuacun jan, cajuvëjne me cavaxë me sa chjuun sa xihin, quijicani me ndavaya. Vëhë xi cuatjin cavitsojo xuta jan.

*Sacu machaya rë xuta Samaria cjuandajyihí xi chja tsëhë Jesucristu*

<sup>4</sup> Quihndë ne, xuta xi cavitsojo tsëhë Jerusalén jan ne, catsujyihya casua xu me camachaya rë xuta cjuandajyihí xi chja tsëhë Jesucristu. <sup>5</sup> Hane Felipe ne, quiji xu me ngu nandya táha distritu Samaria, hane ngajan casua me camachaya rë xuta ta ha cafehe me xi catsingatju Nina xi cuaxëtje naja. <sup>6</sup> Hane xi cavisíñuju xuta cjua xi cachja Felipe cojo xi cavitsejen me cjuarcun xi casahmi me ne, jemu ndaja cavetaharcu me cjua xi cachja Felipe jan. <sup>7</sup> Jemu cjín xuta xi hinchá xitsehen xahasen rë me ne, camandaja xu me. Hisca cajindaya xitsehen jan hora xi cavetjuxin. Hacuaha jemu cjín xuta xi cahme yojo rë me cojo cjín sa xuta xi rengun me ne, camandaja xu me. <sup>8</sup> Vëhë xi xuta nandya vëhë ne, jercu ndaja camá xu rë me.

<sup>9</sup> Peru ngu cha xi hmí rë Simón ne, ha quitahá cha ngajan, tisahmi xu cha cjuasurqui. Hane yëjë xuta distritu Samaria ne, jemu quijircun rë me xi casahmi cha. Hacuaha cachja xu suvá cha xi jemu jyë hnga cha cojo cjuatacun rë cha. <sup>10</sup> Yëjë xuta Samaria jan, sa quihndi sa changá me ne, jemu ndaja cavetaharcu xu me tsëhë cha Simón jan. Hisca cachja xu me tsëhë cha cuitjin:

—Cha vihi ne, hacui cha xi tjín rë ngahñu rë Nina, ngahñu xi hmí rë ngahñu jyë. —Cuatjin cachja xuta jan.

<sup>11</sup> Vëhë xi jemu ndaja cavetaharcu xu xuta tsëhë cha ta, tsëhë xi ha jemu jyë nixtin xi casahmi cha xi quijircun rë xuta tsëhë cjuasurqui xi casahmi cha.

<sup>12</sup> Peru hya xi camacjain rë xuta tsëhë Felipe, hya xi casua me camachaya rë xuta tsëhë cjuandajyihí xi chja xi cuinduva Nina sahmi me gobiernu hacuaha cojo cjuandajyihí xi chja tsëhë Jesucristu ne, caxtenda xu me, sa chjuun sa xihin me. <sup>13</sup> Hacuaha hisca cha Simón jan ne, camacjain xu rë cha tsëhë Felipe. Hane xi cavatju caxtenda cha ne, sehe catsihñu cha yojo rë cha cojo Felipe. Hane xi cavitsejen cha yëjë cjuarcun yehe xi jima ne, jemu quijircun rë cha.

<sup>14</sup> Hya xi camachaya rë apóstol xi siu ngajan Jerusalén xi xuta Samaria ne, camacjain xu rë me cjua rë Nina ne, catsingatju me Pedru cojo Juan quijitjengui rë xuta jan. <sup>15</sup> Hya xi cafehe jo apóstol jan ngajan ne, casahmi xu me oración tsëhë xuta jan cojo sa xi sacú rë me Hasen rë Nina. <sup>16</sup> Cuatjin casahmi me ta, tsëhë xi hisca xi ngu xuta jan ne, cjëë cuinduva xu Hasen rë Nina cuisehen xahasen rë me. Suvá ni ñihi rë Nai naja Jesús caseyanangu hora xi caxtenda me. <sup>17</sup> Ngajan xi Pedru cojo Juan ne, cavisanetsja me xuta Samaria jan, sehe cavisehen xu Hasen rë Nina cahntsua xahasen rë me.

<sup>18</sup> Xi cavëë cha Simón xi casacu rë xuta jan Hasen rë Nina ngatsë rë xi cavisanetsja apóstol jan me ne, meje sua xu cha me tujún, <sup>19</sup> hacuaha cuitjin cachja xu cha cojo rë me:

—Tuhun ná cjuatacun vëhë, cojo sa xi tu yo ni xi cuisanentsa ne, sacú rë Hasen rë Nina. —Cuatjin cachja cha.

<sup>20</sup> Ngajan xi Pedru ne, cuitjin cafayangui xu me:

—¡Tujún rijí ne, catjë tangun cojo ri! ta, tsëhë xi caningatehetacuín xi cjuandaja rë Nina ne, cuma chaha rë cojo tujún. <sup>21</sup> Ngaye ne, satiín camahani ri xa vëhë ta, tsëhë xi hacuín tyjahi xahasen rijí xcun Nina. <sup>22</sup> Nindeye cjuatacun rijí. Tejñixin cjuatsehen rijí vë. Hacuaha chjahye rë Nina cjuandaja rë me, há tsinchataain me ngaye tsëhë cjuatacun xi jya ngajñi rë cjuatacun rijí. <sup>23</sup> Ngahan ne, vacun ná xi ngaye ne, cuma ngaye ngu xuta xi ngundiyaxa ni tsihñu me yojo rë me cojo cjuatsehen. —Cuatjin cafayangui Pedru.

<sup>24</sup> Ngajan xi cha Simón ne, cuitjin cafehya xu cha:

—Ñihñu favor ne, chjahyun rë Nina ngatsë naha cojo sa xi hisca xi ngu cjua xi canújun vë ne, cuatjuun cuma. —Cuatjin cafehya cha.

<sup>25</sup> Hya xi camá ne, Pedru cojo Juan ne, xi cavatju cachja xu me cojo xuta Samaria jan cjua xi chja tsëhë Nai naja ne, cavuya quiji nga me ngajan Jerusalén. Peru yëjë ni nandya xi vatju me hacutjin cjuí me jingunduyu ni ndiya ngajan distritu Samaria ne, ha cuatjin cachja sa me cjuandajyihí jan cojo xuta.

*Felipe cojo ngu xutaxa rë nación Etiópia*



<sup>26</sup> Camá nga ngu nixtin xi ngu ángel tsêhê Nina ne, cachja cojo Felipe ngajan Jerusalén cuitjin:

—Tihinjni ndiya Gaza. —Cuatjin cachja ángel.

Ndiya vêhê ne, vatju ngajan ngu xín camahani tsêhê nandya. <sup>27</sup> Ngajan xi cavetju xu Felipe, quiji me. Hane ndiya cjuí me ne, cavechútaha xu me ngu xutaxa rê nación Etiópia, ngu xihin xindê xi fahacuenda yêjê cjuanchina rê na xi matitjun tsêhê yêjê xuta Etiópia jan. Xihin jan ne, quiji me ngajan Jerusalén xi cjuaharcun me Nina. <sup>28</sup> Hane xi cavuya tife me nangui rê me ne, jiya me carreta rê me cjue me, táha tivutaya me xujun rê Nina xi catsihindu profeta Isaías. <sup>29</sup> Ngajan xi cachja xu Hasen rê Nina cojo Felipe cuitjin:

—Tihinvehe hiscan cjuí carreta xi cuajiyi vê, nihñitanguin cojo. —Cuatjin cachja Hasen rê Nina.

<sup>30</sup> Ngajan xi cuatjin casahmi Felipe. Xi tu camatiña me hiscan cjuí carreta jan ne, cahndê xu me xi cjua rê xujun xi catsihindu profeta Isaías ne, vêhê tivutaya me xi jiya carreta jan. Sehe cavinenguisse Felipe me cuitjin:

—¿Há vijnercun cjua xi tichutayun vê? —Cuatjin cavinenguisse Felipe.

<sup>31</sup> Ngajan xi cuitjin cafayangui xu me:

—Ngahan ne, vijniircú ta, tsêhê xi tsajin yo cuicuya ná. —Cuatjin cafayangui me.

Sehe ngajan xi cachja xu me cojo Felipe xi cuisehen cuejñatangun xu me cojo rê me.

<sup>32</sup> Tivutaya me xujun rê Nina xi tivutaya xihin jan:

Sacuaha ficojo xuta ngu chu sánga xi tsiquehen me chu ne, cuatjin cjuecojo xuta me;

hacuaha sacuaha jindayaain ngu hnditsánga hora xi secun chu xcun me xi cuejnu rê chu ne,

cuatjin tsajin camahani mé xi cuichja me hora xi secun me xcun me xi cjuahataha rê me.

<sup>33</sup> Sahnichuva xuta me, hacuaha tsichoho xuta cjuandaja xi cuma rê me;

Tsajin cuichja xuta tsêhê quihndi rê me ta, casacuiin rê me

tsêhê xi cjuahñu xi casacu rê me ngeuhe ngasunhndê ne, quijicani rê me.

Vêhê cjua rê Nina xi tivutaya xihin jan.

<sup>34</sup> Hya xi camá ne, sehe cavinenguisse me cojo Felipe cuitjin:

—Xi má nuju ne, ¿yo tsêhê xi cuatjin chja profeta vê? ¿Há tsêhê súvá me ne?, o há tsajin ne, ¿há tsêhê jingu sa xuta? —Cuatjin cavinenguisse me.

<sup>35</sup> Ngajan xi Felipe ne, cavetsihin me cojo cjua rê Nina xi tivutaya xihin jan, hane casua xu me camachaya rê xihin jan yêjê ni cjuandajiyi xi chja tsêhê Jesús. <sup>36</sup> Xi cjuí me ndiya ne, cavechú xu me hiscan jiya ngu nandá. Ngajan xi chja xihin jan cojo Felipe cuitjin:

—Chutsujun ni. Ngeuhe jiya ngu nandá. ¿Há cumaji xtenda ngahan? —Cuatjin cachja xihin jan.

<sup>37</sup> Ngajan xi cachja xu Felipe cojo rê me cuitjin:

—Sa xi nguñaja xahasen nuju xi macjain nuju ne, cuma. —Cuatjin cachja Felipe.

Hane xihin xi cuajiyi jan ne, cuitjin cafayangui me:

—Macjain ná xi Jesucristu ne, hacui jain me xi Quihndi rê Nina me. —Cuatjin cafayangui me.

<sup>38</sup> Hya xi camá ne, cachja xu xihin jan cojo cha xi ficojo carreta xi secunhñu cha cojo, hane sehe cavitujne me cojo Felipe, sehe quiji catsijo me xcun nandá, hane caxtenda xu xihin jan. <sup>39</sup> Xi cavetju me tsêhê nandá ne, Hasen rê Nina ne, ngutjen quijicojo xu rê Felipe. Hane xihin jan ne, ha quihndê cavuyaain cavêê rê Felipe ta, cavuya cafaha me ndiya rê me cafe me cojo cjuasua. <sup>40</sup> Hya xi camá ne, cavechú Felipe nandya Azoto. Hane xi cavetju me ngajan ne, jima ngu nandya xi cavatju me ne, ha cuatjin casua me camachaya rê xuta cjuandajiyi xi chja tsêhê Jesucristu hisca xi cafehe me nandya Cesarea.

## 9

*Hacutjin camá xi cavisehen Saulo ladu rê Jesús*

<sup>1</sup> Jingu yêjê rê xi cuatjin tijima ne, Saulo ne, hacuaha ni cjuinduju sa me vincharcun me xuta ladu rê Nai naja ta tsiquehen me. Quiji me xcun nahmi xi matitjun ne, <sup>2</sup> cafehya me ngu carta cojo sa xi cumacjain rê tsêhê me xutaxa rê yungun ngajan nandya Damasco. Hane cojo xujun jan sa xi sacú rê me xuta Damasco xi tjengui ndiya rê Jesús, sa chjuun sa xihin ne, tsihñu me cjuecojo me ngajan Jerusalén. <sup>3</sup> Hya xi camá ne, cavetju me quiji me. Hane xi tijima tiña me Damasco ne, ha tu ñahñu canduva ngu ndihi tsêhê ngahnga casahmi hasen rê hiscan cjuí me. <sup>4</sup> Hane xi caticja me ne, cahndê me ngu cjua xi cachja cojo rê me cuitjin:

—Saulo, Saulo, ¿mé má cuatjin nujihiye tjengui ná cojo cjuahngatacun? —Cuatjin cachja.

<sup>5</sup> Ngajan xi Saulo ne, cuitjin cafayangui me:

—¿Yo ngayun, Tatá? —Cuatjin cafayangui me.

Ngajan xi cjuá jan ne, cuitjin cafayangui tséhë me:

—Ngahan xi Jesús ngahan, xi tinujyihye tjengui ná cojo cjuahngatacun. <sup>6</sup> Tisatjinhngue ne, tsihin nandya Damasco, hane ngajan sacú ri cjuá mé xi meje rë xi nihñi. —Cuatjin cachja cjuá jan.

<sup>7</sup> Ngajan xi xuta xi cjuicojo Saulo jan ne, caxinchacun lihmi ni me ngajan. Cahndë me cjuá jan, peru tsajin yo xi cavëë me. <sup>8</sup> Hya xi camá ne, cavisatjinhnga Saulo, hane xi cavuxaha me tuxcun me ne, matsijin camahani rë me. Sehe ngajan xi cavaha xuta jan tsja me ne, quijicojo me me hisca nandya Damasco. <sup>9</sup> Jyan nixtin cavéjña me jan xi matsijin rë me, hacuaha tsajin mé cajinë me, tsajin mé cahvi me.

<sup>10</sup> Hane ngajan Damasco ne, ngajan tacun ngu xuta ladu rë Jesús xi hmí rë Ananías. Ha tu ñahñu cavëë me Nai naja ne, cachja cojo rë me cuitjin:

—¿Há nechin, Ananías? —Cuatjin cachja Nai naja.

Ngajan xi Ananías ne, cuitjin cafayangui me:

—Juun, tejña, Nai naha. —Cuatjin cafayangui me.

<sup>11</sup> Ngajan xi Nai naja ne, cuitjin cachja me cojo Ananías:

—Tihin ndiya xi hmí rë Taha Quixi. Hane ndava cha Judas ne, ngajan chjinenguisse ngu cha Tarso xi hmí rë Saulo. Cha vëhë ne, tisahmi cha oración rë cha, <sup>12</sup> hane sacuaha xi ngajñi nijñá rë cha ne, cavëë cha ngu xihin xi hmí rë Ananías xi cavisehen hiscan tacun cha, hane cavisansetsja rë cha xi cuma tsejen nga rë cha. —Cuatjin cachja Nai naja.

<sup>13</sup> Ngajan xi Ananías ne, cuitjin cafayangui me:

—Ngayun Nai naha, jemu cjín xuta chja me hacutjin xi jemu choho casahmi cha xi cuajiyhi vë cojo xuta ladu nuju ngajan Jerusalén. <sup>14</sup> Quihndë ne, hacuaha hisca nahmi xi matitjun catsingatju rë cha nguehe xi cjuaha cha xuta xi fehya nuju me cjuandaja nuju. —Cuatjin cafayangui me.

<sup>15</sup> Peru Nai naja ne, cuitjin cachja nga me cojo rë me:

—Tihin ta, cha xi cuajiyhi vë ne, ngahan cavaxejen cha xi cjue sua cha cumachaya rë xutaxín, cojo xuta xi vitexa, cojo xuta tjë rë Israel, cuichja cha yo ngahan. <sup>16</sup> Ngahan tsingáacun rë cha há cjín cjuacjintacun xi meje rë xi cuatju cha cuma ngatsë naha. —Cuatjin cachja Nai naja.

<sup>17</sup> Hya xi camá ne, cavetju Ananías quiji me ndava Judas. Hane xi cavisehen me ndava Judas ne, cavisansetsja me Saulo, cuitjin cachja me:

—Ngayun Saulo, Nai naja Jesús, me xi cahyun ndiya nduvun jan ne, catsingatju ná me, cojo sa xi ngayun ne, cuma tsejen nga nuju hacuaha tsë nuju cojo Hasen rë Nina. —Cuatjin cachja me.

<sup>18</sup> Hane ha hora vëhë ni ne, cavixu tséhë tuxcun Saulo ngu xcusun sacuaha tujún rë ti, hane camatsejen nga rë me. Hya xi camá ne, caxtenda me. <sup>19</sup> Hane xi cajinë me niñu ne, casacuhñu rë me.

#### *Sua Saulo machaya rë xuta tséhë Jesús*

Hya xi camá ne, cavéjña Saulo ngujo nixtin ngajan Damasco cojo xuta ladu rë Jesús. <sup>20</sup> Quiji me yëjë ni yungun, casua me camachaya rë xuta xi Jesús ne, hacui me xi Quihndi rë Nina, xi Mesías. <sup>21</sup> Hane yëjë xuta xi cavisañuju cjuá jan ne, jemu quijircun rë me, cuitjin cachja me cojo xicjin me:

—¡Peru me vihi xi jemu casahmi cjuahngatacun cojo xuta xi veyanangui ñihi vëhë ngajan Jerusalén! ¡Hacuaha ha xa vëhë canduva me nguehe, xi cjuaha me xuta xi cuacun vë, cjucojo me xcun nahmi xi matitjun! —Cuatjin cachja xuta jan.

<sup>22</sup> Peru Saulo ne, hitsë sa casacuhñu rë me xi tichja me cojo xuta, hisca quijircun rë xuta tjë rë Israel casahmi me ta, tséhë xi tsejen xi cjuaquixi xi chja me xi Jesús ne, me vëhë jain xi catsingatju Nina.

#### *Vetjutje Saulo tséhë xuta tjë rë Israel*

<sup>23</sup> Hane xi ha jemu cavatju nixtin jan ne, casahmichihin xuta tjë rë Israel cjuá xi tsiquehen me Saulo. <sup>24</sup> Peru cjuá vëhë ne, casacu camachaya rë Saulo. Xuta xi cuacun jan ne, nixtin nixten jemu casahmi me cuidadu tingotjo hñhua rë nandya jan cojo sa xi cuma tsiquehen me Saulo. <sup>25</sup> Peru xuta ladu rë Saulo ne, nguixun quiji catsitujne me Saulo taha ngaxtun hñhua cojo nahñu jiya me cahntsua ngu nisinya. Cuatjin camá, sehe cavetjutje me.

#### *Hacutjin cavatju Saulo ngajan Jerusalén*

<sup>26</sup> Hya xi camá ne, xi cafehe Saulo ngajan Jerusalén ne, meje cjue sahmitangun me cojo xuta ladu rë Jesús. Peru yëjë ni xuta xi cuacun jan ne, jemu tsacun me Saulo. Macjaain rë me xi hacuaha xuta ladu rë Jesús camá me. <sup>27</sup> Ngajan xi Bernabé ne, quijicojo me

Saulo xcun apóstol, hane ngajan casuacuenda me hacutjin xi ngajan ndiya ne, cavèë Saulo Nai naja, hacuaha cachja Nai naja cojo rë me. Hacuaha casuacuenda Bernabé apóstol jan hacutjin tsacjuuin Saulo xi cachja me tséhë Jesús. <sup>28</sup> Cuatjin camá xi cjui nduva me catsuyjihiya tangun me ngajan Jerusalén cojo xuta ladu rë Jesús. Hatuxa tsacjuuin me chja me tséhë Jesús. <sup>29</sup> Hacuaha jercu cavisajmi me cojo xuta xi visiajmi hne griego. Peru xuta xi cuacun jan ne, casahmi me nguyë xi tsiquehen me Saulo. <sup>30</sup> Peru hya xi camachaya rë xuta ladu rë Jesús cjuva vèhé ne, quijicojo me Saulo nandya Cesarea, hane ngajan catsingatju me me quiji me nandya Tarso.

<sup>31</sup> Cuatjin camá xi yëjë xuta ladu rë Jesús ngajan estadu Judea, cojo Galilea cojo Samaria ne, café rë me cjuacjintacun hacuaha camajyë sa cjuandaja rë Nina ngajñi rë me. Hane xi cuatjin quijinduju me cafaharcun me Nai naja hacuaha xi cuatjin cavisecoo rë me Hasen rë Nina ne, camacjin sa xuta ladu rë Jesús.

#### *Camandaja Eneas*

<sup>32</sup> Pedru ne, catsuyjihiya me jingu ni ladu. Hya xi camá ne, quiji cavusehenya me xuta ladu rë Nina xi siu ngajan Lida. <sup>33</sup> Hane ngajan cavechútaha me ngu xihin xi hmí rë Eneas, xi ha tjin rë jyin nu xi jiña xi cahme yojo rë. <sup>34</sup> Ngajan xi Pedru ne, cuitjin cachja me cojo xihin jan:

—Ngayun Eneas, Jesucristu tisahmi me xi cumandaja ngayun. Tisatjunhngun, chjayun nijña nuju vë. —Cuatjin cachja Pedru.

Hane ngutjen ni cavisatjenhnga xihin jan. <sup>35</sup> Hane yëjë ni xuta xi siu ngajan Lida cojo xuta xi siu ngajan Sarón cavèë me Eneas hane hacuaha cavisehen me ladu rë Nai naja.

#### *Cavya Dorcas cjuahñu*

<sup>36</sup> Ngajan nandya Jope ne, cavéjña ngu chjuun ladu rë Jesús xi hmí rë Tabita. Hane xi hne griego ne, Dorcas hmí rë me. Chjuun vèhé ne, jemu sahmi me cjuandaja, hacuaha jemu visecoo me xuta xi tjin rë cjuachaja. <sup>37</sup> Hya xi camá ne, nixtin xi quitahá Pedru ngajan nandya Lida ne, chjuun vèhé ne, camahmu rë me, hane cahme me. Hane xuta jan ne, catsinduya me nima. Hane xi café catsinduya me ne, sehe quiji catsijaña me cahntsua ndihya ngahnga. <sup>38</sup> Vèhé ta nandya Lida ne, tiña tacun tséhë nandya Jope. Hane hya xi camachaya rë xuta ladu rë Jesús ngajan Jope xi Pedru ne, quitahá me ngajan Lida ne, catsingatju me jo xihin quijijaha rë Pedru, cuitjin cachja me:

—Nihñu cjuandaja ne, cuanguen cojo niji ngajan Jope marcu macjain.

<sup>39</sup> Ngajan xi Pedru ne, cavetju me quiji me cojo xihin jan. Xi tu cafehe me ngajan ndava nima ne, quijicojo me me ndihya ngahnga hiscan jiña nima. Hane jemu cjin yachjin cahan ne, quiji caxinchacun me xcun Pedru, hisca chja hisca jihnda me titsingacun me tsjian xi casahmi nima Dorcas hya xi tacun nima cjuahñu. <sup>40</sup> Ngajan xi Pedru ne, cachja me cojo yëjë xuta xi cuetju xuta candatsen. Hane xi café xuta cavetju me candatsen ne, sehe cavixuhnchi Pedru, casahmi me oración rë me. Hane xi cavya cavutsejen me nima ne, sehe cachja me cuitjin:

—Tabita, tisatjunhngun. —Cuatjin cachja me. Hane chjuun jan ne, cavuxaha tuxcun. Hane xi cavèë rë Pedru ne, cavisatjenhnga cavéjña. <sup>41</sup> Hane xi casua Pedru ngu tsja me chjuun jan ne, catsatjenhnga me. Xi tu cajindaya me xuta ladu rë Jesús cojo chjuun cahan jan ne, sehe catsingacun me chjuun jan xi tacun quicun nga. <sup>42</sup> Hane cjuva vèhé ne, casacu camachaya rë xuta jinguyë ni Jope. Hane jemu cjin me xi camangu cacun me cojo Nai naja. <sup>43</sup> Ngajan xi Pedru ne, jemu cjin nixtin casetaha me ngajan Jope, cavéjña me ndava cha Simón, ngu cha vechjanchuxin.

## 10

### *Jindaya Cornelio Pedru*

<sup>1</sup> Ngajan nandya Cesarea ne, cavéjña ngu xihin xi hmí rë Cornelio. Capitán má me tséhë sindadu tséhë nangui Italia. <sup>2</sup> Me vèhé ne, jemu ndaja faharcun me Nina cojo yëjë xuta xi siu ndava me, hacuaha jemu sua me cjuandaja cojo xuta tjë rë Israel, hacuaha yëjë ni hora fehya rë me Nina cjuandaja rë me. <sup>3</sup> Ngu nixtin jan sacuaha chuva rë fane jyan tséhë nguinxin ne, cavèëndaja me xi cafehe ngu ángel rë Nina cachja cojo rë me cuitjin:

—Cornelio. —Cuatjin cachja.

<sup>4</sup> Hane xi cavutsejenndaja sa me ángel jan ne, jemu catsacjun me camá, sehe cachja me cuitjin:

—¿Mé jan, Tatá? —Cuatjin cachja me.

Ngajan xi ángel jan ne, cuitjin cafayangui:

—Ngatsë rë oración riji cojo ngatsë rë cjuandaja xi jemu tehe ne, Nina ne, hacuaha tsinguitsjen me ngaye. <sup>5</sup> Quihndë ne, ningatji ngujo xihin ngajan Jope, chjindaye rë cha Simón, cha xi hacuaha hmí rë Pedru. <sup>6</sup> Cha Simón vèhé ne, ngajan tacun cha ndava ngu cha

vechjanchuxin, xi hacuaha hmí rë Simón, cha xi tacun ndava tiña ndachacun. —Cuatjin cafayangui ángel jan.

<sup>7</sup> Hane xi cavatju cafe ángel xi cachja cojo rë me jan ne, sehe cajindaya me jo mosu hndixahan rë me cojo ngu sindadu xi sahmixa ndava me hacuaha faharcun rë Nina. <sup>8</sup> Hane xi café casuacuenda me yëjë ni cjuacjintacun rë me ne, sehe catsingatju me cjue ngajan Jope.

<sup>9</sup> Hane xi camá nchujun xi ha jima tiña cha xi cuacun jan nandya Jope ne, sacuaha chuva rë nchisen ne, sehe camiji Pedru ngajan xcun ndihya xi sahmi me oración. <sup>10</sup> Hya xi camá ne, camavojo rë me, meje sinë me hitsë tu mé ni xi sinë me. Hane jinguyëjë rë xi tisehenjine xi sinë me ne, sacuaha xi canduva cachja ngu chini cojo rë me. <sup>11</sup> Tivutsejen me xi ngahnga ne, catuxaha, hane nduvajne sacuaha ngu tsjian jyë, quichahahñu rë catsiñuju yuju rë xi nduvajne nangui. <sup>12</sup> Cahntsua tsjian jan ne, ngajan híncha yëjë xcusun chu xi tsuyihiya nangui cojo chu xi vitjen ngahnga xi tsavi xi sinë xuta nangui Israel. <sup>13</sup> Hya xi camá ne, Pedru ne, cahndë me ngu cjua xi cachja cojo rë me cuitjin:

—Pedru, tísatjinhngue. Niquihin ngu chu ne, sehe xini chu. —Cuatjin cachja cjua jan.

<sup>14</sup> Hane Pedru ne, cuitjin cachja me:

—Cumaji, Tatá, ta ngahan ne, cjëë camahani sinë ngu xcusun xi tsavi vë. —Cuatjin cachja me.

<sup>15</sup> Peru xi ma jo ndiya ne, cuitjin cachja nga cjua jan cojo rë me:

—Xi ha Nina cachja me xi hacuiin tsavi ne, xi canujiin ngaye xi tsavi. —Cuatjin cachja cjua jan.

<sup>16</sup> Jyan ndiya camá xcusun vëhë. Hya xi camá ne, ngutjen ni cavuya quiji nga tsjian jan ngahnga. <sup>17</sup> Hane jinguyëjë rë xi tisingataha cacun Pedru mé vijnë xcusun xi cavëë me jan ne, tivinenguise cha xi catsingatju Cornelio jan jani xi ndava Simón. Hane xi cafehe cha jan ne, caxinchacun ni cha tingotjo, <sup>18</sup> sehe cafinenguise cha há ngajan tacun Simón xi hacuaha hmí rë Pedru. <sup>19</sup> Hane jinguyëjë rë xi tisingataha cacun Pedru tséhë xcusun xi cavëë me jan ne, cuitjin cachja Hasen rë Nina cojo rë me:

—Chutsijin ni. Hinchacun jo jyan cha xi tivanguise ri. <sup>20</sup> Tihinjni ne, tihin cojo cha. Xicamacjiin tacuin ta cha xi cuacun vë ne, ngahan catsingátju cha. —Cuatjin cachja Hasen rë Nina. <sup>21</sup> Hane xi quijijne Pedru hiscan hinchacun cha xi cuacun jan ne, cuitjin cachja me:

—Ngahan xi vinchunsun ná. ¿Mé xa canduvun? —Cuatjin cachja Pedru.

<sup>22</sup> Ngajan xi cha xi cuacun jan ne, cuitjin cachja cha:

—Ngu capitán xi hmí Cornelio catsingatju nijí me xi canduvin nguehe. Me vëhë ne, ngu xihin ndaja me, hacuaha jemu faharcun me Nina. Yëjë ni xuta tjë rë Israel ne, ndaja chja me tséhë Cornelio. Ngu ángel rë Nina cachja cojo rë me xi squindaya me ngayun xi cuangun ndava me cojo sa xi cuisñuju me cjua xi cuinújun cojo rë me. —Cuatjin cachja cha xi cuacun jan.

<sup>23</sup> Hya xi camá ne, cachja me cojo cha xi cuisehen cha cahntsua ndihya, hacuaha casua me cahndë xi cuiyuju cha ngajan. Hane xi camá nchujun jan ne, cavetju me quiji me cojo cha, hacuaha cojo sa ngujo xuta ladu rë Jesús xi siu ngajan Jope quiji me cojo rë me.

<sup>24</sup> Hane xi camá nchujun nga jan ne, cafehe me nandya Cesarea. Cornelio ne, ha casahmitangun me xuta rë me cojo amigu ndaja rë me, siuya me Pedru. <sup>25</sup> Hane xi ha cuisehen Pedru jan ne, cavechútaha Cornelio me. Cornelio ne, quiji cafañatsacjan me xcun Pedru xi cafaharcun me. <sup>26</sup> Peru Pedru ne, catsisatjehnga me Cornelio, hacuaha cachja me cojo cuitjin:

—Tísatjunhngun ta ngahan ne, hacuaha ngu xuta ni ngahan. —Cuatjin cachja me.

<sup>27</sup> Hane taha visiajmi me cojo Cornelio ne, cavisehen me ndihya, ngajan cavëë me xi jemu cjin xuta tjin tangun me jan. <sup>28</sup> Sehe ngajan xi cachja Pedru cojo rë xuta jan cuitjin:

—Ngayun ne, ha ndaja hyun xi ngu xuta tjë rë Israel ne, sacuiin cahndë xi tsiñu me yojo rë me cojo xutaxín, hacuaha sacuiin cahndë xi cuisehen me ndava. Peru ngahan ne, casua Nina camachaya ná xi mijí rë xi cuichjá xi tsavi cojo ngu xcusun xuta. <sup>29</sup> Vëhë xi xi tu quiji chjahá ná ne, ngutjen canduvá ni, hisca ngu cjua cachjaan. Quihndë ne, meje ná cumachaya ná mé nihñu ná xi cachjindayun ná. —Cuatjin cachja Pedru.

<sup>30</sup> Ngajan xi Cornelio ne, cuitjin cachja me:

—Cuyatje fane jyan, sacuaha hora vihi ne, tisahme oración naha nguehe ndya naha. Hane ha tu ñahñu cahvë ngu xihin, secun xcun, yaja ngu tsjian xi jemu tu seti camahani, <sup>31</sup> hane cuitjin cachja cojo ná: “Cornelio, Nina ne, cahndë me oración rijí, hacuaha ngatsë rë cjuandaja xi jemu tehe ne, Nina ne, hacuaha tsinguitsjen me ngaye. <sup>32</sup> Quihndë ne, ningatji cjua ngajan Jope, hane chjindaye rë cha Simón, cha xi hacuaha hmí rë Pedru. Cha vëhë ne, tacun cha ndava cha Simón, ngu cha vechjanchuxin, xi tacun cha tiña ndachacun.” Cuatjin cachja xihin jan cojo ná. <sup>33</sup> Vëhë xi marcu macjain catsingátju cjua nuju, hane jemu ndatjin

canihñu xi canduvun. Vêhê xi quihndê ne, ha tjin tangun ngayin ngayijin ni ngeuhe xcun Nina xi cuisniñi yêjê cjua xi casua nuju Nina xi cuinúnjun cojo niñi. —Cuatjin cachja Cornelio.

*Cjuandajiyi xi cachja Pedru ndava Cornelio*

<sup>34</sup>Ngajan xi Pedru ne, cuitjin cachja me:

—Ngahan vutsején ne, Nina ne, hatuxa quixi jain me cojo cjuatacun rê me xi tsichuva me yêjê ni xuta cojo cjuatacun rê ta <sup>35</sup>yêjê ni naciôn ne, tu jarê ni xuta xi faharcun me Nina hacuaha sahmi me cjuandaja ne, jemu chuya rê Nina tsêhê me. <sup>36</sup>Nina ne, catsingatju me cjuandajiyi rê me tsijin, ngayin xuta tjê rê Israel; casua me camachaya niñi xi ngatsê rê Jesucristu ne, sacú niñi cjuandaja cjuajeya. Me vêhê xi Nai rê yêjê ni xuta. <sup>37</sup>Ngayun ne, ha machaya nuju tsêhê xcusun xi camá jingujyê ni naciôn Judea. Cavetsihin hisca distritu Galilea, hya xi cavatju cachja nima Juan xi meje rê xi xtenda xuta. <sup>38</sup>Hacuaha ha hyun xi Jesús, xuta Nasaret ne, Nina ne, catsinguitsê rê me cojo Hasen rê me hacuaha cojo ngahñu rê me. Jesús vê ne, catsujiyi haya casahmi me cjuandaja hacuaha casahmi me xi camandaja yêjê xuta xi jemu tisuxati Satanás. Cuatjin casahmi me ta, tsêhê xi Nina ne, hacuaha tacun cojo rê me. <sup>39</sup>Ngayin tihín machaya rê xuta tsêhê yêjê xcusun xi cahyin xi casahmi me ngajan Jerusalén, cojo jingujyê ni naciôn Judea. Xi cavetaha xuta tjê rê Israel jan me xcun ngu cru ne, catsiquehen xuta jan me. <sup>40</sup>Me vêhê ne, Nina catsicuya rê me cjuahñu xi ma jyan nixtin, hacuaha casua Nina cahndê xi cavuya camatsejen nga me. <sup>41</sup>Peru hacuiin ngajñi rê yêjê xuta camatsejen me ta suvá ni ngajñi rê me xi Nina cavaxijin rê cojo tjun sa, cuma cuinújan ne, ngajñi niñi ngayin, xi cachini cahyin tangun cojo rê me hya xi cavatju cavuya me cjuahñu. <sup>42</sup>Hacuaha me vêhê cavitexa niñi me xi tihín cumachaya rê xuta xi me vêhê xi casuaxa Nina me xi tsichuva me xuta cojo cjuatacun rê, sa siu quicun me o sa cahme me. <sup>43</sup>Yêjê ni profeta ne, cachja me ta yêjê ni xuta xi cumangu casun cojo Jesús ne, sacú rê me cjuaninchataha tsêhê jyê rê me, xi cuatjin mangucacun me. —Cuatjin cachja Pedru.

*Casacu rê xutaxín Hasen rê Nina*

<sup>44</sup>Hora xi tichja cuaha Pedru cjua vêhê ne, canduva Hasen rê Nina cavisehen xahasen rê yêjê xuta xi tivisiñuju cjua xi tichja Pedru jan. <sup>45</sup>Hane xuta ladu rê Jesús xi tjê rê Israel xi cojo me canduva me cojo Pedru ne, jemu quijircun rê me xi cojo xutaxín casua Nina Hasen rê me xi cuma rê me. <sup>46</sup>Cuatjin quijircun rê me ta, tsêhê xi cahndê me xi xutaxín jan ne, tichja me ngujo hne xi hisca hvíin xutaxín vê xi tisahmi jyê tisahmi hnga me Nina. <sup>47</sup>Ngajan xi Pedru ne, cuitjin cachja me:

—Cumaji nichoon ngayaan nandá xi xtenda xuta, ta me xi cuicun vi ne, hacuaha casacu rê Hasen rê Nina sacuatjin casacu naja ngayaan. —Cuatjin cachja Pedru.

<sup>48</sup>Sehe cavitexa me xi caxtenda xuta xi cuacun vê xi cavisehen me ladu rê Jesucristu. Ngajan xi xuta jan ne, cafehya sa rê me Pedru xi cuejña sa me ngujo nixtin cojo rê me.

## 11

*Sua Pedru machaya rê xuta rê yungun Jerusalén hacutjin camá ndava Cornelio*

<sup>1</sup>Quihndê ne, apóstol cojo xuta ladu rê Jesús xi siu jingujyê ni Judea ne, camachaya rê me cjua xi cojo xutaxín cafahatsja me cjua rê Nina. <sup>2</sup>Hane hya xi cavuya quiji Pedru ngajan Jerusalén ne, xuta ladu rê Jesús xi tjê rê Israel ne, cacjan me cojo, <sup>3</sup>cuitjin cachja me:

—¿Mé má cuatjin catsangu ndava xuta xi hacuiin tjê rê Israel hacuaha hisca cachinu niñu cojo rê me? —Cuatjin cachja me.

<sup>4</sup>Ngajan xi Pedru ne, cavetsihin casuacuenda chichihin me cuitjin:

<sup>5</sup>—Ngahan ne, tisahme oración naha hya xi tejñataha Jope. Hane sacuaha xi cachja ni chini cojo ná xi cahvê ngu xcusun sacuaha ngu tsjian jyê, quichahahñu rê catsiñuju yuju rê xi nduvajne nangui, camatiña tsahan. <sup>6</sup>Hane xi cavutsejénndaja cahntsua ne, cahvê chu xi tsujiyi haya nangui, chu xi cjaain rê cojo chu xi cjan rê, cojo chu xi vitjen ngahnga hincha chu cahntsua. <sup>7</sup>Hacuaha cahndê ngu cjua xi cachja cojo ná cuitjin: “Pedru, tsatjinhgue. Niquihin ngu chu ne, sehe xini chu.” Cuatjin cachja cjua jan. <sup>8</sup>Ngajan xi ngahan ne, cuitjin cachjá: “Cumaji, Tatá, ta ngahan ne, cjêê camahani cuíncha ntsuva ngu xcusun xi tsavi vé.” <sup>9</sup>Ngajan xi cjua xi nduva ngahnga jan ne, cachja nga cojo ná ma jo ndiya cuitjin: “Xi ha Nina cachja me xi hacuiin tsavi ne, xi canujiin ngaye xi tsavi.” Cuatjin cachja cjua jan cojo ná. <sup>10</sup>Jyan ndiya camá xcusun vêhê. Hya xi camá ne, sehe cavuya cachjuvé nga rê tsjian jan, quiji yêjê hisca ngahnga. <sup>11</sup>Hya xi camá ne, ha tu ñahñu cafehe jyan xihin ndihya hiscan xi tejña. Hisca nandya Cesarea casatêxa rê xihin jan xi canduvatjengui ná. <sup>12</sup>Hane Hasen rê Nina cachja cojo ná xi cumacjiin cáacun xi cjué cojo xihin xi cuacun jan. Hya xi camá ne, cêjê cojo rê, hacuaha cavisecoo ná jyun xuta ladu naja xi cuicun vi xi catsanguin. Hane xi cafihin jan ne, cavisihin ndava Cornelio. <sup>13</sup>Hane me vêhê ne, casuacuenda niñi me hacutjin xi cavêjê me ngu ángel cahntsua ndava me, cuitjin cachja cojo rê me: “Ningatji

cjua ngajan Jope, chjindaye rë cha Simón, cha xi hacuaha hmí rë Pedru. <sup>14</sup> Hane cha vëhë cuichja cha cojo ri ngujo cjua hacutjin cuma xi cuetjtije ngaye cojo yëjë ni xuta xi siu ndya riji.” Cuatjin cachja ángel jan. <sup>15</sup> Hane xi cavetsehen cachjá cjua rë Nina cojo rë me ne, cavisehen Hasen rë Nina cahntsua xahasen rë me sacuatjin cavisehen cahntsua xahasen naja ntsacu cavetsihin, ngayaan xuta tjë rë Israel. <sup>16</sup> Ngajan xi ngahan ne, catsinguítsjen cjua rë Nai naja xi cachja me cuitjin: “Juan ne, cojo nandá cavitenda me, peru ngayun ne, cojo Hasen rë Nina xtenda ngayun.” Cuatjin cachja me. <sup>17</sup> Vëhë xi hya xi súvã Nina casua rë me cjuandaja xicjin xi casua naja me ngayaan hya xi camangu tacuun cojo Nai naja Jesucristu ne, hatuxa camaji cavátëcja xcusun xi Nina casahmi me. —Cuatjin casuacuenda Pedru.

<sup>18</sup> Xi cahndë me xi cuacun jan xi cuatjin cachja Pedru ne, cajnehnchan cjuatacun rë me, sehe cavetsihin casahmi jyë casahmi hnga me Nina, cuitjin cachja me:

—Xi matsejen ne, cojo xutaxín casua Nina cahndë xi tsindeya me cjuatacun rë me cuisehen me ndiya rë Nina cojo sa xi sacú rë me cjuahñu xatsë.

### *Xuta rë yungun Antioquía*

<sup>19</sup> Quihndë ne, xuta ladu rë Jesús xi cavitsojo me gatsë rë cjuañihi xi camá hya xi cahme Esteban ne, cavechú me hiscan nangui xi hmí rë Fenicia. Ngujo nga me cavechú me nandya Chipre, ngu cahndë xi vetjucaa tsëhë ndachacun. Hane me xi yahnga ne, cavechú me nandya Antioquía xi cavanga me. Hane casuaain me camachaya rë xutaxín cjuandajiyihi xi chja tsëhë Jesucristu ta súvã ni xuta tjë rë Israel casua me camachaya rë. <sup>20</sup> Peru tjin yahnga xuta ladu rë Jesús xi canduva me tsëhë Chipre cojo Cirene. Xi cafehe me nandya Antioquía ne, cachja me cojo xuta xi chja hne Griego, casua me camachaya rë xuta cjuandajiyihi xi chja tsëhë Nai naja Jesús. <sup>21</sup> Hane Nina ne, jemu casua rë me ngahñu. Hacuaha jemu cjín xuta camacjain rë me, hane cavisehen me ladu rë Nai naja.

<sup>22</sup> Hane xuta ladu rë Jesús xi siu ngajan Jerusalén ne, hya xi camachaya rë me xcusun vëhë ne, catsingatju me Bernabé xi cjuetjengui me xuta ngajan Antioquía. <sup>23</sup> Hane xi cafehe me jan ne, xi cavëë me hacutjin tisahmi Nina cjuandaja cojo xuta xi cuacun vë ne, jemu ndaja camá rë me. Sehe ngajan xi cachja me cojo yëjë xuta jan xi catjinduju me cojo yëjë xahasen rë me ndiya rë Nai naja. <sup>24</sup> Cuatjin casahmi me ta, tsëhë xi me vëhë ne, ngu xihni ndaja me, ña quitsë rë me Hasen rë Nina, hacuaha jercu mangucacun me cojo Nina. Nixtin hya ne, jemu camacjín sa xuta ladu rë Nai naja.

<sup>25</sup> Hya xi camá ne, cavetju Bernabé quiji me ngajan Tarso, cavanguise me Saulo. <sup>26</sup> Hane xi casacu rë me Saulo ne, cavuya quijicojo me me ngajan Antioquía. Caviyuju catsijo me ngajan ngu nu jingu, casahmitangun me cojo xuta rë yungun jan. Jemu cjín xuta cavicuya rë me cjua rë Nina. Hacuaha ngajan Antioquía xi tjuntjun cachja xuta tsëhë yëjë xuta ladu rë Jesús xi xuta rë Cristu xi meje cuichja cjua vë cristiano.

<sup>27</sup> Nixtin hya ne, cafehe ngujo profeta ngajan Antioquía xi canduva me tsëhë Jerusalén. <sup>28</sup> Ngajan xi cavetjújñi ngu me ngajñi rë profeta xi cuacun vë, ngu me xi hmí rë Agabo, hane cachja me cjua xi Hasen rë Nina casua rë me xi ha tu hitsë sa ne, cuinduva ngu jindya jyë jingujyë ni ngasunhndë. Jindya vë ne, cavetjucaa jain hya xi Claudio matitjun camahani me. <sup>29</sup> Ngajan xi xuta ladu rë Jesús ngajan Antioquía ne, caviyuju me cjuatacun rë me jima ngu me xi cuisecoo me ha tucutjin xi chutaha me hane tsingatju me tsëhë xuta ladu rë Jesús xi siu ngajan Judea. <sup>30</sup> Hya xi camá ne, cuatjin casahmi me. Catsingatju me cjuandaja vëhë, cavaha Bernabé cojo Saulo xi sua me tsja xuta changá xi siu ngajan Judea.

## 12

### *Cjuañihi xi cavatju xuta rë yungun*

<sup>1</sup> Hane ngajñi rë nixtin xi cuacun vë ne, Herodes, me xi matitjun ne, cavitexa me cachjahá rë ngujo xuta rë yungun xi sahmi me cojo cjuahngatacun. <sup>2</sup> Hacuaha cavitexa me xi cueya Jacobo, hntsë Juan, cojo quicha. <sup>3</sup> Xi vtsejen me xi cachuya rë xuta tjë rë Israel xcusun vëhë ne, hacuaha cavitexa me cachjahá rë Pedru, nixtin rë suhi rë pan xi tsajin san rë. <sup>4</sup> Sehe caveya me ndavaya, hacuaha cavitexa me tyuhunngu sindadu xi cjue sahmi rë me cuidadu nixtin nixten chufa ñuju chufa ñuju sindadu jima ngu ndiya. Xi catsingataha cacun me ne, xi cuatju suhi tsëhë Pascua ne, sehe cuaxë me xcun yëjë ni xuta. <sup>5</sup> Cuatjin camá xi Pedru ne, casetjo me ndavaya. Peru xuta rë yungun ne, cafehya me cojo nguñaja xahasen rë me cjuandaja rë Nina xi cuma rë Pedru.

### *Cavaxëte Nina Pedru tsëhë ndavaya*

<sup>6</sup> Ngu nguixun chaja sa xi cuitexa Herodes xi cuetju Pedru xi cumacuenda jyë rë me ne, Pedru ne, jiñafë me, tjinñu me cojo jo cadena ngajñi rë jo sindadu. Hacuaha siu sa jo sindadu tingotjo ndavaya xi sahmi cuidadu. <sup>7</sup> Hya xi camá ne, cafehe ngu ángel tsëhë Nina,

hane jercu camahasen cahntsua ndavaya. Hane xi quiji cavéhetsja ángel jan ndanisin rë Pedru ne, catsisatjenhnga rë me, sehe cachja tojo rë me cuitjin:

—Tisatjinhngue sanii. —Cuatjin cachja.

Hane hora vëhë ne, cavixuhndu cadena xi tjinñu tsja me. <sup>8</sup> Sehe ngajan xi ángel ne, cachja nga cojo rë me cuitjin:

—Cheje tsjian riji, hacuaha tinche chuxinxhtë riji. —Cuatjin cachja.

Hane Pedru ne, cuatjin casahmi me. Cachja nga ángel cuitjin:

—Cheje tsjanga riji, hane ndove hacutjin cjué. —Cuatjin cachja ángel jan.

<sup>9</sup> Hane xi cavetju me ne, quiji me hacutjin quiji ángel. Peru hvíin me xi xcusun xi tisahmi ángel jan ne, cjuaquixi ta xi má rë me ne, chíni tichja cojo rë me. <sup>10</sup> Hane xi cavatjutaha me ngu cavatjutaha me jo sindadu ne, sehe cafehe me tingotjo quicha xi cuétjuun xi cuanguen ngajñi nandya. Tingotjo vëhë ne, catuxaha suvá. Xi cavetju me ne, sehe quiji me. Hane xi cafehe me hiscan xi faha rë ngu nga ndiya ne, ha tu ñahñu quiixixin ángel tsëhë me.

<sup>11</sup> Sehe ngajan xi cajnercu Pedru xi cjuaquixi xcusun xi camá, hane cachja me cuitjin ngajñi rë suvá me:

—Quihndë ne, hvë jain xi Nina ne, catsingatju me ángel rë me, hane cavaxëtje ná me tsëhë Herodes, hacuaha cavaxëtje ná me tsëhë yëjë xcusun xi meje sahmi xuta tjë rë Israel cojo ná. —Cuatjin cachja me ngajñi rë suvá me.

<sup>12</sup> Hane xi tu catsingataha cacun me cuatjin ne, sehe quiji me ndava María naa rë Juan, me xi hacuaha hmí rë Marcos. Ngajan ne, jercu tjin tangun xuta xi tisahmi me oración. <sup>13</sup> Hane xi cafehe me jan ne, catsijane me tingotjo. Hane sehe canduvavaha ngu na hndixahan xi hmí rë Rode xi cjuinenguise na yo xi titsijane. <sup>14</sup> Hane xi camachaya rë na xi xta rë Pedru xi tichja ne, tsëhë xi jercu ndaja camá rë na ne, hisca cavuxaain na tingotjo ta marcu macjain cavuya na quiji cachja na cojo me xi yahnga jan xi Pedru ne, secun me tingotjo taha candatsen. <sup>15</sup> Peru me xi cuacun jan ne, cuitjin cachja me cojo rë na:

—Sca ri ngaye. —Cuatjin cachja me.

Peru na vëhë ne, cachja sa na xi hatuxa cjuaquixi xi hacui me. Hane me xi cuacun vë ne, cachja me cuitjin:

—¿Hacuiin ángel xi sahmi rë me cuidadu? —Cuatjin cachja me.

<sup>16</sup> Hane Pedru ne, quijinduju sa me titsijane me tingotjo jan. Hane xi cavuxaha me tingotjo jan ne, cavëë me xi hacui jain Pedru, hane jemu quiircun rë me. <sup>17</sup> Ngajan xi Pedru ne, casahmitsja me cojo rë me xi cuiyujuyuu me, sehe cavetsihin casua cuenda me hacutjin camá xi Nai naja ne, cavaxë rë me ndavaya. Sehe ngajan xi cachja me cuitjin:

—Tuhun cumachaya rë Jacobo cojo sa xuta ladu rë Jesús xi yahnga tsëhë xcusun xi camá vi. —Cuatjin cachja me.

Hya xi camá ne, sehe cavetju me quiji me jingu sa cahndë.

<sup>18</sup> Hane xi casahasen jan ne, ngu cjuandya jyë casahmi sindadu jan, tsëhë xi hvíin cha mé hacutjin camá rë Pedru. <sup>19</sup> Hane Herodes ne, cavitexa me quiji cavinchise rë Pedru, peru casacuiin me. Hane vëhë xi cafahataha rë me sindadu xi casahmi cuidadu jan, sehe cavitexa me cachjaha rë sehe cueya cha. Hya xi camá ne, cavetju Herodes cavuya quiji me ngajan Cesarea, cavejña me.

### *Cjuaveya rë Herodes*

<sup>20</sup> Quihndë ne, Herodes me xi matitjun ne, jemu cjan rë me cojo xuta nandya Tiro cojo nandya Sidón. Ngajan xi xuta xi cuacun vë ne, camatangun me, sehe quiijtjengui me Herodes. Xi tjun tjun ne, camá casahmi me xi cavinga rë Blasto me. Blasto ne, me vëhë xi fahacuenda me ndava Herodes. Hya xi camá ne, xuta xi cuacun jan ne, cafehya rë me Herodes xi cuijnetaha si ngajñi rë me cojo me vëhë. Cuatjin cafehya me xi cuacun vë ta, tsëhë xi nangui rë Herodes ne, ngajan vinduva xichinë tsëhë nandya Tiro cojo Sidón. <sup>21</sup> Cavechú nixtin xi cavejña Herodes xi cuichja me cojo xuta xi cuacun jan ne, sehe cavaja me tsjian tsëhë xi matitjun me, sehe quiji me cavéjña me cahndë rë me xi cuichja me cojo xuta. <sup>22</sup> Hane xi cajnetaha cachja Herodes ne, ngajan xi xuta ne, cuitjin cajindaya me cachja me:

—¡Cjua vëhë ne, cjua rë ngu nina, hacuiin cjua rë ngu xuta! —Cuatjin cajindaya me cachja me. <sup>23</sup> Ha hora vëhë ni ne, ngu ángel tsëhë Nina ne, casahmi xi cafaha rë Herodes ngu chíhin, tsëhë xi hacuiin casahmi jyë casahmi hnga me Nina. Hya xi camá ne, cajinë rë me chundu, hane cahme me.

<sup>24</sup> Peru cjua rë Nina ne, quijinduju sa cavitsojo.

<sup>25</sup> Ngajan xi Bernabé cojo Saulo ne, casahmichihin me cjuandaja rë xuta yuma sehe cavuya me tsëhë Jerusalén. Hacuaha canduvacojo me Juan, xi hacuaha hmí rë me Marcos.

## 13

*Casuaxa Nina Bernabé cojo Saulo*

<sup>1</sup> Quihndé ne, ngajñi rë xuta rë yungun xi tacun ngajan Antioquía ne, hinchajñi me xi má profeta hacuaha hinchajñi me xi vicuya cjuachacun. Cuitjin hmí rë xuta xi cuacun vé: Bernabé, Simeón, me xi cachja xuta tséhë Nchava Jma, Lucio, ngu xuta Cirene, Manaén, me xi camacha tangun cojo Herodes, me xi matitjun, hacuaha cojo Saulo. <sup>2</sup> Hane jinguyéjê rë xi tisahmi me xi cuacun vé xa rë Nina hacuaha tisahmi me xun rë me ne, Hasen rë Nina ne, cuitjin cachja cojo rë me:

—Tuhunxun rë Bernabé cojo Saulo, cojo sa xi sahmi me xa xi ha casuáxa rë me.

<sup>3</sup> Ngajan xi casahmi me xi cuacun jan xun rë me, hacuaha casahmi me oración rë me ne, sehe cavisantsja me Bernabé cojo Saulo hane chuya vèhë cafaha me xa rë Nina. Hya xi camá ne, sehe catsinguijnetaha me cjuca cojo xicjin me.

*Quiji apóstol ngajan Chipre*

<sup>4</sup> Ngajan xi Bernabé cojo Saulo ne, quiji me sacuatjin cachja Hasen rë Nina cojo rë me. Cavetju me quiji me nandya Seleucia. Hane xi cafehe me ngajan ne, cavisehen me ngu barcu, sehe quiji me Chipre, ngu rqui nangui xi vetjucaa xcun ndachacun. <sup>5</sup> Hane xi cafehe me Salamina, ngu nandya tséhë Chipre ne, casua me camachaya rë xuta cjuca rë Nina ngajan yungun rë xuta tjê rë Israel. Hacuaha cavisecoo Juan Marcos me xi quiji me jan.

<sup>6</sup> Hane xi quiji me jinguyê ni ladu vèhë ne, cavechú me hisca nandya Pafos. Hane ngajan cavechútaha me ngu cha surqui xi hmí rë Barjesús. Cha vèhë ne, ngu profeta ndacha cha, hacuaha tjê rë Israel cha. <sup>7</sup> Hane tangun tsujyihya cha cojo me xi matitjun xi hmí rë Sergio Paulo, ngu me xi jemu vechú cjuatacun rë. Me vèhë ne, cajindaya me Bernabé cojo Saulo tséhë xi meje cuihndé me cjuca rë Nina. <sup>8</sup> Peru cha surqui jan ne, xi hacuaha hmí rë Elimas xi hne griego ne, casahmi condra cha me xi cuacun vé, tséhë xi mijí rë cha xi me xi matitjun jan ne, cumangucacun me cojo Jesucristu. <sup>9</sup> Peru Saulo, me xi hacuaha hmí rë Pablo ne, catsé rë me cojo Hasen rë Nina. Cavutsejenndaja me cha surqui jan ne, sehe cachja me cojo cha cuitjin:

<sup>10</sup> —¡Ngaye xindesu, ngaye cha ndacha, ngaye quihndi rë xitsehen, ngaye condra rë yêjê ni cjuandaja ne! ¿Hatuxa cuihinnduju sa ninguetsin ndiya ndajyihí rë Nina? <sup>11</sup> Quihndé chutsijin ta Nina ne, sahmi ri me castigu. Cuma rcá ngaye, cumatsijin ri ndavá rë tshu ngujo nixtin. —Cuatjin cachja me.

Hane ngutjen ni camá rë cha sacuaha xi canduva ngu yufí xi cavetsa rë tuxcun cha, hane cama rcá cha. Hane cjuí nguehe cjuí ngajan cha vanguisetsja cha yo xi cuaha tsja cha. <sup>12</sup> Ngajan xi me xi matitjun jan ne, xi cavéé me xcusun xi camá ne, camacajin rë me cjuachacun xi chja tséhë Nina ta, tséhë xi jemu quijircun rë me tséhë cjuachacun vèhë.

*Quiji apóstol ngajan Antioquía, distritu Pisidia*

<sup>13</sup> Hya xi camá ne, xi cavetju Pablo cojo me xi siutaha cojo me ngajan Pafos ne, sehe cavisehen me ngu barcu, quiji me nandya Perge, ngajan distritu Panflia. Hane ngajan cavetjuxin Juan Marcos tséhë me, hane cavuya nga me Jerusalén. <sup>14</sup> Hane Pablo cojo Bernabé ne, cavetju me tséhë Perge, hane cafehe me Antioquía, ngajan distritu Pisidia. Hane xi cavechú nixtin xi chjahájenda rë ne, quiji me cavisehen me yungun ne, quiji me caviyuju me. <sup>15</sup> Hane xi cavatju cachataya rë ngujo cjuca xi catsihindu Moisés cojo ngujo cjuca xi catsihindu profeta ne, xutaxa rë yungun jan ne, catsingatju me cjuca tséhë Pablo cojo Bernabé, hane cuitjin cachja me:

—Ngayun ne, sa xi tjín mé cjuandajyihí xi meje cuinújun cojo xuta ne, cuma cuinújun. —Cuatjin cachja me.

<sup>16</sup> Hane xi casecun Pablo ne, casahmitsja me cojo xuta sehe cachja me cuitjin:

—Ngayujun ngarcun ni xuta tjê rë Israel cojo sa ngayujun ni xi hacuaha chjuhuncun Nina ne, tisiñuju cjuca xi cuichjá cojo nuju. <sup>17</sup> Nina naja ngayaan tjê rë Israel ne, cavaxijin me xutachanga naja, hane tséhë me vèhë casahmi cjin sa Nina xuta. Sehe tséhë me casahmi me ngu nación xi hñu vetju cjuca rë hya xi caviyujutaha me ngajan nación Egipto. Hane cojo ngahñu xi tjín rë Nina ne, cavaxé me xuta xi cuacun vé tséhë ngajan. <sup>18</sup> Hane Nina ne, cacaa rë me cojo xuta xi cuacun vé, hya xi catsujyihya me ngajan ngu xín tséhë nandya sacuaha yachan nu. <sup>19</sup> Hane xi cavatju catsinguetsun Nina yatu nación ngajan nangui Canaán ne, sehe casua me xutachanga naja jan xi cuma tséhë me <sup>20</sup> sacuaha ñuju cientu vasen nu. Hane xi cavatju vèhë ne, sehe cavaxijin me xuta xi camá me juez, hisca nixtin xi cavéjña profeta Samuel. <sup>21</sup> Hya xi cavatju vèhë ne, cafehya xutachanga naja jan ngu me xi cumatitjun tséhë me. Cuatjin camá xi Nina ne, casuaxa me xutachanga naja Saúl, quihndi rë Cis, ngu xihin tjê rë Benjamín, xi cumatitjun me cahntsua yachan nu. <sup>22</sup> Hane xi cafaxin Nina me vèhë xi matitjun me ne, cavejña me xutachanga naja David xi cuma titjun me. Cuitjin cachja



Nina tséhë David: “Ngahan vutsején ne, cha David, quihndi rë cha Isaí ne, cha vëhé ngu cha xi jemu chuya ná tséhë, ngu cha xi sahmi yëjé hacutjin xi meje ná.” Cuatjin cachja Nina.<sup>23</sup> Ngu xuta tjé rë xutachanga naja David, me vëhé ne, xi hacui Jesús, me xi catsingatju Nina xi cuaxëtje naja ngayaan xuta tjé rë Israel, sacuatjin xi ha cachja me.<sup>24</sup> Hane xi chaja sa xi cjeuhe Jesús ne, nima Juan ne, cachja me cojo yëjé xuta tjé rë Israel xi meje rë xi tsindeya me cjuatacun rë me, hacuaha xtenda me.<sup>25</sup> Quihndé ne, hya xi ha camatiña nixtin xi cueya nima Juan ne, cuitjin cachja me: “Hacuiin ngahan xi tsingatju Nina, xi nechunyun rë ta ngaxtun ne, nduva ngu me xi hitsé sa vechu cjuatacun rë xi hisca cumajin tsinguissehercu sahme tyjahi chuxinxté rë.” Cuatjin cachja nima Juan.

<sup>26</sup>Ngayejen ngarcu ni ngayaan xuta tjé rë xutachanga naja Abraham cojo sa ngayujun ni xi hacuaha chjuhuncun Nina ne, ngayaan catsingatju naja Nina cjuandajyihí vihi xi chja hacutjin cuetjuntjeen.<sup>27</sup> Yëjé xuta xi siu ngajan Jerusalén cojo xutaxa rë jan ne, hvíin me xi Jesús ne, hacui me xi catsingatju Nina, hacuaha cajnií rcu me cjuar rë yëjé ni profeta xi chutaya rë yëjé ni nixtin xi nixtin chjahájenda rë. Vëhé xi hya xi catsicanijiyé xuta xi cuacun vë Jesús ne, casahmi me xi cavetjucaa cjuar xi cachja profeta vë.<sup>28</sup> Hane handasa casacuiin rë me jyé xi vechú chuva rë xi cueya Jesús ne, peru cafehya rë me Pilatu xi cuitexa me xi cueya Jesús.<sup>29</sup> Hane xi cajnetaha casahmi me yëjé xcusun sacuatjin camahindu tséhë Jesús ne, sehe catsitujne me tséhë cru, sehe caseyaniji cahntsua ngu tsjun.<sup>30</sup> Peru Nina catsicuya rë me cjuahñu.<sup>31</sup> Hya xi camá ne, jemu cjin nixtin xi camatsejen me ngajñi rë xuta xi cavetju tangun me cojo ngajan Galilea hane hacuaha quiji tangun me cojo ngajan Jerusalén. Quihndé ne, xuta xi cuacun vë ne, tisua me jimachaya rë xuta tséhë Jesús.

<sup>32</sup>Hane ngayin ne, hacuaha titihín jimachaya nuju ta cjuandajyihí xi ha cachja Nina cojo xutachanga naja ne,<sup>33</sup> cjuar vëhé Nina casahmi me xi cavetjucaa ngajñi naja ngayaan tjé rë xutachanga naja hya xi catsicuya me Jesús cjuahñu. Hacuaha cuitjin camahindu xcun Salmo xi ma jo: “Ngaye xi quihndi naha ngaye; quihndé ngahan suá ri cjuahñu.” Cuatjin cachja Nina xcun Salmo vëhé.<sup>34</sup> Hacuaha Nina ne, ha cachja me xi tsicuya me Jesús cjuahñu, hacuaha yojo rë Jesús ne, hacuiin cjuhendu, cuitjin cachja me xcun xujun rë me: “Hatuxa suá ri ximinchacun naha, sacuatjin xi ha cachja xi suá rë David.” Cuatjin cachja Nina.<sup>35</sup> Hacuaha catsihindu sa David xcun ngu nga Salmo cuitjin: “Tuun cahndé xi cjuhendu yojo rë me, xi hatuxa tjengui nuju cojo yëjé xahasen rë me.” Cuatjin camahindu.<sup>36</sup> Peru David ne, xcun xi ha cavatju casahmi me sacuatjin meje rë Nina ne, cahme me, caseyaniji tangun me cojo nima xutachanga rë me, hacuaha cafehndu yojo rë me.<sup>37</sup> Peru Jesús, me xi Nina catsicuya rë cjuahñu ne, cafehndiin yojo rë me.<sup>38</sup> Vëhé xi ngayujun ngarcun ni ne, meje rë xi cuijncun xi ngatsé rë me vëhé ne, tisacu jimachaya nuju xi tjín cjuaninchataha tséhë jyé nuju,<sup>39</sup> hacuaha ngatsé ni rë me vëhé ne, yëjé ni xuta xi mangucacun cojo rë me ne, tsicjé Nina yëjé jyé rë me ta xcun ley rë Moisés ne, sacuiin rë cjuaninchataha.<sup>40</sup> Vëhé xi meje rë xi cuinechun cuidadu, sá tu cuatjun cuma sacuatjin xi catsihindu profeta xcun xujun rë Nina hatséé nixtin, cuitjin catsihindu me:

<sup>41</sup>Chutsujun ni, ngayun xi macjaain nuju ne,  
catjircun nuju, sehe tjangun ta  
jinguyëjé rë xi nechun ne, sahme ngu chircun

xi hisca cumacjaain nuju sa xi yo cuichja cojo nuju.

Cuatjin catsihindu profeta. Hacuaha cojo cjuar vëhé ne, catsinguijnetaha Pablo cachja me.

<sup>42</sup>Hane hora xi tivetju Pablo cojo Bernabé tséhë yungun jan ne, cachja xuta cojo me xi cuetjucaa totje nga ne, meje rë me xi cuya cuichja nga Pablo tséhë cjuacjintacun vëhé.<sup>43</sup> Hane hya xi cavetju xuta tséhë yungun ne, jemu cjin xuta tjé rë Israel hacuaha jemu cjin xutaxín xi hacuaha faharcun me Nina ne, quiji me cojo Pablo cojo Bernabé. Hane Pablo cojo Bernabé ne, cachja me cojo xuta xi cuacun jan xi catjinduju sa me cojo ndiya rë cjuandaja rë Nina.

<sup>44</sup>Hane xi cavetjucaa nga totje nixtin xi chjahájenda rë ne, ha ña meje yëjé ni xuta nandya camatangun me xi cuisñuju me cjuar rë Nina.<sup>45</sup> Peru hya xi cavéé yahnga xuta tjé rë Israel xutacjin jan ne, catsé rë xahasen rë me cojo cjuachini, hacuaha cachja me condra tséhë cjuar xi cachja Pablo, hisca choho cachja me tséhë me.<sup>46</sup> Ngajan xi Pablo cojo Bernabé ne, cachja me cojo xuta tjé rë Israel jan cuitjin:

—Hatuxa ngayun titjun camameje rë xi canújin cojo nuju cjuar rë Nina. Peru quihndé ta nitjungun hacuaha xi má nuju ne, machjiriin ngayun xi cojo ngayun saté nuju cjuahñu xatsé ne, cuanguin tihín cumachaya rë xutaxín cjuandajyihí vëhé.<sup>47</sup> Cuatjin nihñi ta, tséhë xi cuitjin cavitexa niji Nina:

Ngahan tsingátju ri sacuaha ngu ndihi xi tehe cjuahasen xi cuma rë xutaxín,  
cojo sa xi ngatsé rë cjuandajyihí xi cuinoje ne, cuetjutje xuta jinguyé ni, hisca hiscan  
vijnetaha ngasunhndé.

Cuatjin cavitexa niji Nina. —Cuatjin catsacuiin Pablo cojo Bernabé, cachja me.

<sup>48</sup> Hane xi cahndé xutaxín jan cjua vèhé ne, jemu ndaja camá rè me, hacuaha casahmi jyé casahmi hnga me cjua rè Nina. Hane yéjé ni xuta xi cavaxijin Nina xi sacú rè cjuhñu xatsé ne, camacjain rè me cjuandajyihí vèhé.

<sup>49</sup> Hya xi camá ne, jercu cavitsojo cjuandajyihí xi chja tséhé Nai naja jinguyé ni ladu vèhé. <sup>50</sup> Peru xuta tjé rè Israel jan ne, cavisajmi me cojo ngujo yachjin nchina tséhé yungun jan, cojo ngujo xuta xi matitjun tséhé nandya jan, sehe cavetsihin casua me ngu cjuañihí xi cuma rè Pablo cojo Bernabé, sehe cavaxéxin me tséhé nangui rè me. <sup>51</sup> Peru Pablo cojo Bernabé ne, cavitsune me chojo rè ntsacu me, xi sua me machaya rè xuta xi cuacun jan xi vutsejen me me sacua ha xutaxín xi hvíin cjua rè Nina. Sehe cavetju me quiji me nandya Iconio. <sup>52</sup> Hane xuta ladu rè Jesús ne, quitsé rè me cjuasua hacuaha quitsé rè me tséhé Hasen rè Nina.

## 14

### *Quiji apóstol ngajan Iconio*

<sup>1</sup> Hya xi camá ne, Pablo cojo Bernabé ne, quiji tangun me yungun rè xuta tjé rè Israel ngajan nandya Iconio. Hane xi cachja me cojo xuta ne, jercu cjin camahani xuta tjé rè Israel cojo xutaxín camacjain rè me cjua jan. <sup>2</sup> Peru xuta tjé rè Israel xi ha mijí cumacjain rè ne, cachja me cojo xutaxín, catsinguetsun me cjuatacun rè me xi cuacun vé condra tséhé apóstol xi cuacun jan. <sup>3</sup> Peru jemu jyé nixtin caviyujutaha me hacuaha hacuain catsacjun me xi cachja me tséhé Nai naja. Hane Nai naja ne, casua me cahndé xi casahmi apóstol cjuarcun, cojo sa xi cumatsejen xi quixi cjua xi chja me tséhé cjuandaja rè Nai naja. <sup>4</sup> Peru xuta nandya jan ne, hacuain tangun camá cjuatacun rè me ta ngujo me ne, cachuya rè me tséhé xuta tjé rè Israel, peru yahnga nga me ne, cachuya rè me tséhé apóstol jan. <sup>5</sup> Hya xi camá ne, xutaxín cojo xuta tjé rè Israel cojo xutaxa rè jan ne, caviyujucacun me xi choho sahmi me cojo apóstol xi cuacun jan hacuaha tsiquehen me cojo ndyojo. <sup>6</sup> Peru apóstol jan ne, camachaya rè me cjua jan, hane cavanga me quiji me ngajan nandya Listra cojo nandya Derbe, ngajan distritu Licaonia, cojo ngujo sa cahndé tahndee jan. <sup>7</sup> Hane yéjé cahndé hacutjin catsujyihya me ne, cachja me cojo xuta cjuandajyihí xi chja tséhé Jesucristu.

### *Meje tsiquehen xuta Pablo ngajan Listra*

<sup>8</sup> Cavéjña ngu cha ngajan nandya Listra, ngu cha xi tsajin rè ngahñu ntsacu, tséhé xi tsehen hisca hya xi catsin cha. Maji camahani fi cha. <sup>9</sup> Tacun cha tivisiñuju cha cjua xi tichja Pablo. Ngajan xi xi cavutsejenndaja Pablo cha ne, cavacun rè me xi mangucacun cha xi hatuxa cumandaja cha, <sup>10</sup> sehe ngajan xi cachja me cojo cha cuitjin:

—Tisechunquixun. —Cuatjin cachja me.

Hya xi camá ne, hisca cacahnga cha xi casecun cha, sehe cavetsihin quiji ntsacu cha.

<sup>11</sup> Ngajan xi xutacjín jan ne, xi cavéé me xcusun xi casahmi Pablo ne, cavetsihin cajindaya me cachja me hne rè me, xi hmi rè hne Licaonia, cuitjin cachja me:

—¡Me xi cuicun vi ne, nina me vi, xi canduva me tséhé ngahnga, canduvatjengui naja me, tu xi tsejen me sacua ha xuta! —Cuatjin cachja me.

<sup>12</sup> Bernabé ne, xi má rè xuta jan ne, nina Zeus me, hane Pablo ne, nina Hermes me, tséhé xi me vèhé xi hitsé sa jercu cachja me. <sup>13</sup> Ngajan xi nahmi tséhé nina Zeus jan, me xi tacun yungun rè tjehe nandya ni ne, canduvacojo me chu ndyaja hacuaha canduvacojo me naxu ngajan hiscan tingotjo tséhé nandya. Hane nahmi cojo xutacjín jan ne, meje tsiquehen me ndyaja jan hacuaha sua me naxu jan xi cjuaharcun me Pablo cojo Bernabé. <sup>14</sup> Hya xi apóstol Bernabé cojo Pablo camachaya rè me hacutjin tisahmi xuta jan ne, cajavé me tsjian rè me cavicheya me, ta cuatjin xcusun rè xuta tjé rè Israel hya xi cjan rè me. Sehe cavanga me quiji me ngajñi rè xutacjín jan, cajindaya me cachja me cuitjin:

<sup>15</sup> —Ngayujun ni ne, ¿mé má cuitjin tinihñu? Ngayin ne, hacuaha xuta ni ngayin sacuatjin nuju ngayun. Canújin cojo nuju ngu cjuandajyihí xi quichihin, cojo sa xi cuejñuxun xcusun xi machjiriin vi, hacuaha cojo sa xi cuisuhun ndiya rè ngu Nina xi quicun, me xi casahmi ngahnga cojo nangui cojo ndachacun, cojo yéjé ni xi tjin jan. <sup>16</sup> Nina ne, casua me cahndé xi, nixtin xi cavatju ne, xuta tséhé yéjé ni nación ne, casahmi me hacutjin xi ha xcusun rè suvá me. <sup>17</sup> Peru tséhé xi casahmi me cjuandaja ne, casua me camachaya nuju xi me vèhé xi Nina me; catsingatju me tsi tséhé ngahnga xi cuma nuju, hacuaha casua nuju me nixtin rè tutjé nuju, casua me xi chinu, hacuaha catsinguitsé me xahasen nuju cjuasua. —Cuatjin cajindaya me cachja me.

<sup>18</sup> Handasa cachja me cuatjin ne, peru ha tu hitsé sa ne, camaji cavatécja me xi tsiquehen xutacjín jan chu xi sua me cjuatjo cojo apóstol jan sacua ha nina rè me.

<sup>19</sup> Hya xi camá ne, canduva ngujo xuta tjé rè Israel tséhé nandya Antioquia cojo nandya Iconio. Hane catsinguetsun me cjuatacun rè xutacjín jan, sehe cavetaha me ndyojo Pablo hane cajavéjne me cavaxé me ngajan xín tséhé nandya, tséhé xi xi má rè me ne, ha cahme

Pablo. <sup>20</sup> Peru xi tu catséxtin xuta ladu rë Jesús jan hiscan jiña Pablo ne, cavisatjenhnga me quiiji me cavisehen nga me nandya. Hane xi camá nchujun jan ne, cavetju me quiiji me cojo Bernabé ngajan nandya Derbe.

*Cavuya Pablo cojo Bernabé ngajan Antioquia, distritu Siria*

<sup>21</sup> Hane xi cafehe me jan ne, casua me camachaya rë xuta cjuandajyihi xi chja tséhë Jesucristu. Hane jemu cjín xuta xi cavisehen me ladu rë Jesús. Hya xi camá ne, cavuya nga me Litra cojo Iconio cojo Antioquia, distritu Pisidia. <sup>22</sup> Caviyujhñu me cjuatacun rë xuta ladu rë Jesús, hacuaha cachja me cojo rë me xi catjinduju me xi mangucacun me cojo Jesús. Hacuaha cachja sa me cojo rë me cuitjin:

—Meje rë xi jemu cjín cjuañihi cuatjuun cuma sehe cuisseen hiscan sahmi Nina gobiernu. —Cuatjin cachja me.

<sup>23</sup> Hacuaha casuaxa rë me ngujo xuta changá jima ngu yungun jan, xi cjuahacuenda me xuta rë yungun. Hane xi cavatju casahmi me oración hacuaha casahmi me xun rë me ne, sehe caviyuju me xuta rë yějë yungun jan tsja Nai naja, me xi camangucacun xuta jan cojo. <sup>24</sup> Hya xi camá ne, cavuya cavatju nga me distritu Pisidia, sehe cafehe me nandya Perge, distritu Panfilia. <sup>25</sup> Hane xi café cachja me cojo xuta jan cjuandajyihi ne, sehe cavetju me quiiji me nandya Atalia. Hane xi cavetju me ngajan ne, sehe cavisehen me barcu cavuya quiiji me Antioquia, <sup>26</sup> nandya hiscan xi caviyuju xuta me ngahma cjuandaja rë Nina xi sahmi me xa xi sehe cajnetaha casahmi me jan. <sup>27</sup> Hane xi cafehe Pablo cojo Bernabé jan ne, sehe casahmitangun me yějë xuta rë yungun, casuacuenda me yějë hacutjin xi casahmi Nina, nixtin xi quiiji casahmi me xa rë Nina. Hacuaha casuacuenda me xi Nina ne, cavuxaha me ndiya xi cumangucacun xutaxín cojo Jesús. <sup>28</sup> Hane hacuini hitsë nixtin caviyujutaha me jan cojo xuta ladu rë Jesús.

## 15

*Junta xi camá ngajan Jerusalén*

<sup>1</sup> Hya xi camá ne, ngujo me xi xuta tjë rë Israel ne, cavetju tséhë Judea hane cafehe me Antioquia, cachja me cojo yahnga xuta ladu rë Jesús cuitjin:

—Sa xi xtiin rë chuxin nuju sacuaha xcusun xi cavejña Moisés ne, cumaji cuetjuntjun. —Cuatjin cachja me.

<sup>2</sup> Ngajan xi Pablo cojo Bernabé ne, hacuini hitsë casecjan cjua rë me cojo xuta xi cachja cuatjin jan. Véhë xi xuta rë yungun jan ne, casuaxa me Pablo cojo Bernabé cojo ngujo sa me xi cjue me xcun apóstol cojo xcun xuta changá rë Jerusalén, xi ha vëë me cjua rë Nina xi cuinenguise me tséhë cjuacjintacun xi casuandya rë me ngajan.

<sup>3</sup> Ngajan xi xuta xi cuacun cavitexa xuta rë yungun jan ne, cavatju me distritu Fenicia cojo distritu Samaria. Hane cuatjin tisuacuenda me hacutjin xi xutaxín ne, hacuaha cavisehen me ndiya rë Jesús. Hane yějë xuta ladu rë Jesús xi cavisinuju cjua jan ne, jemu ndaja camá rë me.

<sup>4</sup> Hane xi cafehe me Jerusalén ne, jemu ndaja cafahatsja xuta rë yungun jan me. Hacuaha jemu ndaja cafahatsja apóstol cojo xuta changá jan me. Hya xi camá ne, sehe casuacuenda me yějë hacutjin xi casahmi Nina, nixtin xi quiiji casahmi me xa rë Nina. <sup>5</sup> Peru ngujo xuta fariseo xi hacuaha camá me ladu rë Jesús ne, cavetjujñi me cachja me cuitjin:

—Xutaxín xi visehen ladu rë Jesús ne, meje rë xi xti chuxin rë me hacuaha cuinújan cojo rë me xi sahmi me yějë sacuatjin chja ley rë Moisés. —Cuatjin cachja me.

<sup>6</sup> Hya xi camá ne, camatangun apóstol cojo xuta changá xi cjuahacuenda me cjuacjintacun véhë. <sup>7</sup> Hane ha xcun xi ha jemu cavisiajmicjín me ngajñi rë me ne, sehe ngajan xi cavetjujñi Pedru, cachja me cuitjin:

—Ngayujun ngarcun ni matsejen ne, ngayun ne, ha hyun ta hisca nixtin titjun ne, ngahan cavaxijin ná Nina ngajñi nuju cojo sa xi ngatsë naha ne, cumachaya rë xutaxín cjuandajyihi xi chja tséhë Jesucristu hane cumacjain rë me. <sup>8</sup> Hane Nina, me xi vëë yějë cjuatacun rë xuta matsejen ne, catsingacun me xi chchuya rë me tséhë xutaxín, hya xi casua me Hasen rë me xi cuma rë xuta xi cuacun vë, sacuatjin casua naja me ngayaan. <sup>9</sup> Tangun ni casahmi Nina cojo rë me sacuatjin casahmi Nina cojo naja ngayaan, xi catsityajhi me cjuatacun rë xuta xi cuacun vë ta, tséhë xi camangucacun me cojo Nina. <sup>10</sup> Quihndë ta cuatjin ne, ¿mé má cuatjin meje chjuhunchuvun rë Nina cojo chura rë ley rë Moisés, xi cuatjin tivitexun rë xuta ladu rë Jesús xi cuacun jan xi sahmichihin me ngu xcusun xi hisca xutachanga naja cacaaín rë me casahmichihin me hacuaha hisca ngayaan matsejen ne, cacaaín naja canihñachehen?

<sup>11</sup> Peru hacuini cuatjin ta ngayaan ne, macjain naja xi cuetjuntjeen ngatsë rë cjuandaja rë Nai naja Jesús sacuatjin rë me xi cuacun véhë. —Cuatjin cachja Pedru.

<sup>12</sup> Ngajan xi xutacjín jan ne, ngu caviyujuyuu me cavisinuju me cjua xi cachja Bernabé cojo Pablo hora xi casuacuenda me hacutjin casahmi Nina cjuaracun ngajñi rë xa xi casahmi

me ngajan nangui rë xutaxín. <sup>13</sup> Hane hora xi cajnetaha cachja Bernabé cojo Pablo cjava vëhë ne, sehe cachja Jacobo cuitjin:

—Ngayujun ngarcun ni matsejen ne, tinuhyun cjava xi cuichjá cojo nuju. <sup>14</sup> Sehe cajnetaha casuacuenda Simón hacutjin camá xi tjunjun catsingacun Nina xi hacuaha meje rë me xutaxín, hya xi cavaxijin me ngujo xutaxín jan xi cuma xuta ladu rë me. <sup>15</sup> Cjava rë Nina xi catsihindu profeta hatsëë nixtin matsejen ne, tjin tangun cjuatacun rë cojo cjava xi café cachja Simón. Cuitjin camahindu:

<sup>16</sup> Xi cuatju xcusun vëhë ne, cýa nga,  
hane sahme xatsë ndava David xi cavetsun;  
cýa sahmendaja nga xi cavixujne,  
tsindaja nga ngundiya,

<sup>17</sup> cojo sa xi xuta xi yahnga ne, sahmi me ngahñu xi cuisehen me ladu naha,  
cuma cuinújan ne, yëjë xutaxín xi ngahan cavaxejen xi cuma tsahan me.

<sup>18</sup> Cuatjin chja Nina, me xi ha casua cjava vëhë hatsëë nixtin.  
Cuatjin camahindu.

<sup>19</sup> Vëhë xi xi má ná ngahan matsejen ne, mijí rë xi tahan xti rë xutaxín xi visehen ladu rë Nina. <sup>20</sup> Xi meje rë xi nihña ne, xi nihinduun rë me xi sinii me xichinë xi caviyuju xcun nina ndoyo, sahmi me cjuatsehen xi sahmi xuta cojo ngu xi hacuini chjuun rë hacuini xihin rë me, sinii me yojo rë chu xi caxinchahndu rë xi cahme, hacuaha sinii me jni. <sup>21</sup> Cuatjin meje rë ta, tsëhë xi hisca jemu nu tsëë jan hisca quihndë ne, jima ngu nandya ngajñi xuta tjë rë Israel ne, tjin me xi sua machaya rë xuta cjava tsëhë ley rë Moisés. Ley vëhë ne, chutaya rë yëjë ni yungun jima ngu nixtin xi nixtin chjahájenda rë. —Cuatjin cachja Jacobo.

#### *Xujun xi catsingatju apóstol tsëhë xutaxín*

<sup>22</sup> Ngajan xi apóstol cojo xuta changá cojo yëjë sa xuta rë yungun ne, caviyujucacun me xi tuxijin rë ngujo xihin ngajñi rë me xi tsingatju me ngajan Antioquia, cjué tangun cojo Pablo cojo Bernabé. Me xi cuicun vi xi catuxijin rë: Judas, me xi hacuaha hmí rë Bárabas, cojo Silas, jo xihin xi jemu chjaharcun rë ngajñi rë xuta ladu rë Jesús. <sup>23</sup> Sehe ngajan xi catsihindu me ngu xujun catsingatju me cojo me xi jo xi cuacun vë. Cuitjin chja xujun jan:

“Ngayin xuta ladu rë Jesús, apóstol cojo xuta changá ne, ningatjin ngu nina niji tsujun ngayujun ni ngayin xuta ladu rë Jesús xi hacuini xuta tjë rë Israel ngayin, xi nechun nandya Antioquia cojo distritu Siria cojo distritu Cilicia. <sup>24</sup> Ngayin ne, camachaya niji xi cavetju ngujo xihin ngajñi niji xi cafehe ndya casuaxti nuju cojo cjava rë hacuaha cavisejcan cjuatacun nuju. Me xi cuacun vë ne, ngayin ne, cavitexiin rë me xi quiji me. <sup>25</sup> Vëhë xi ngu tangun ni camá cjava niji hane cavejñi tacuín xi tuxijin rë xihin xi ningatjin xi nduvatjengui nuju, cuinduvatangun cojo Bernabé cojo Pablo, me xi jemu vinga niji. <sup>26</sup> Me xi cuacun vë ne, casua me yojo rë me xi caviyujutaha tsavi me xi sahmi me xa rë Nai naja Jesucristu. <sup>27</sup> Cuatjin xi Judas cojo Silas ne, ningatjin nuju me. Hane me vëhë ne, cuichja me cojo nuju cjava hntsua me, cjava xi ningatjin nuju vi. <sup>28</sup> Ngayin ne, ngu tangun ni camá cjava niji cojo Hasen rë Nina xi cuitexin nuju xi nihñu súvá ni xcusun xi hitsë sa sahmi ngu yëjë vi: <sup>29</sup> xicachinuu xichinë xi caviyuju xcun nina ndoyo, xicachinuu jni, xicachinuu yojo rë chu xi caxinchahndu rë xi cahme, xicanihñuu cjuatsehen xi sahmi xuta cojo ngu xi hacuini chjuun rë hacuini xihin rë. Sa xi nihñuu yëjë xcusun vëhë ne, ndatjin nihñu. Vëhë ni cjava xi nújin cojo nuju.” Cuatjin chja xujun jan.

<sup>30</sup> Hya xi camá ne, cavetju me xi cuacun jan quiji me Antioquia. Hane xi cafehe me jan ne, casahmitangun me yëjë ni xuta rë yungun, sehe casua me xujun xi yaha me. <sup>31</sup> Hane xi cavutaya xuta ladu rë Jesús xujun jan ne, jemu ndaja camá rë me tsëhë cjava jan. <sup>32</sup> Hane Judas cojo Silas jan ne, tsëhë xi tjin rë me chuva xi cuichja me cjava xi cafahatsja me tsëhë Nina ne, jercu cachja me cojo xuta jan, hacuaha jemu casua rë me cjuatacun. <sup>33</sup> Hane xi ha caviyujutaha me ngujo nixtin jan ne, xuta rë yungun jan ne, catsingatju me café nga cojo yëjë ni cjuandaja cjuajeya ngajan hiscan xi cavetju me. <sup>34</sup> Hane Silas, xi má rë me ne, hitsë sa ndaja xi ngaja caviyujutaha me. <sup>35</sup> Peru Pablo cojo Bernabé ne, caviyujutaha sa me ngajan Antioquia, cavicyua me cjuachacun rë cjava rë Nina, hacuaha casua me camachaya rë xuta cjuandajiyi xi chja tsëhë Nai naja. Hacuaha jemu cjin sa xuta xi cuatjin casahmi me.

#### *Catsismi xicjin Pablo cojo Bernabé*

<sup>36</sup> Hya xi camá ne, xi cavatju ngujo nixtin ne, Pablo ne, cuitjin cachja me cojo Bernabé: —Cuyan cuanguen tjenguen nga xuta ladu rë Jesús yëjë ni nandya hiscan xi ha cataan camachaya rë me cjuandajiyi xi chja tsëhë Nai naja, cuanguen chutsejen ne, hacutjin tivatju me tijima.

<sup>37</sup> Hane Bernabé ne, meje cjuecojo me Juan, me xi hacuaha hmí rë Marcos. <sup>38</sup> Peru Pablo ne, mijí cjuecojo me, tsëhë xi Marcos ne, catsismicacun me xicjin me hane cavetjuxin me

tsèhë Pablo cojo Bernabé ngajan Panfilia, quijiinndujain me cojo xa. <sup>39</sup>Hane cojo cjuatacun vèhë ne, cavetjucaa ngu si ngajñi rë Pablo cojo Bernabé. Cuatjin camá xi cavetjuxin me tsèhë xicjin me. Hya xi camá ne, Bernabé ne, quijicojo me Marcos jan ne, cavisehen me ngu barcu, hane quiji me Chipre. <sup>40</sup>Peru Pablo ne, cavaxijin me Silas xi cjuecojo me. Hane xuta ladu rë Jesús ne, caviyuju me me xi cuacun jan ngahma cjuandaja rë Nai naja. Hya xi camá ne, cavetju Pablo cojo Silas, <sup>41</sup>quiji me yèjè ni nandya tsèhë distritu Siria cojo Cilicia, casua rë me ngahñu xuta rë yungun jan.

## 16

### *Cavetsihin catsuyjihiya Timoteo cojo Pablo*

<sup>1</sup>Hane xi cavatju vèhë ne, cafehe me nandya Derbe cojo Listra. Ngajan ne, tacun ngu xuta ladu rë Jesús xi hmí rë Timoteo, quihndí rë ngu chjuun xuta tjè rë Israel xi hacuaaha cavisehen me ndiya rë Jesucristu. Nahmi rë Timoteo jan ne, xutaxín me. <sup>2</sup>Xuta ladu rë Jesús ngajan nandya Listra cojo Iconio ne, jemu ndaja chja me tsèhë Timoteo vè. <sup>3</sup>Pablo ne, meje rë me xi cjue Timoteo cojo rë me. Vèhë xi quijicojo me Timoteo hiscan xi ti chuxin rë xuta tjè rë Israel. Cuatjin casahmi me ngatsè rë xi nandya xi cuacun vèhë ne, siu xuta jan, hane yèjè xuta xi cuacun jan ne, vèë me xi nahmi rë Timoteo ne, ngu xutaxín me. <sup>4</sup>Ngajan xi cavetju Pablo cojo Silas cojo Timoteo, quiji me. Hane jima ngu nandya xi tivatju me ne, casua me camachaya rë xuta tsèhë cjuaxi caviyuju apóstol cojo xuta changá ngajan Jerusalén, cojo sa xi xuta ne, cuihndé me tsèhë cjuaxi vèhë. <sup>5</sup>Cuatjin camá xi xuta tsèhë yèjè yungun jan ne, casacuhñu rë me xi mangucacun me cojo Jesús. Hane nchunchujun ni ne, cuatjin jima cjin sa me.

### *Cachja nijñá cojo Pablo*

<sup>6</sup>Hya xi camá ne, cavatju me distritu Frigia cojo distritu Galacia ta, tsèhë xi Hasen rë Nina ne, casuaain cahndé xi cuichja me cojo xuta cjuaxi rë Nina ngajan distritu Asia. <sup>7</sup>Hane xi cafehe me tiña distritu Misia ne, meje cjue me distritu Bitinia, peru Hasen rë Jesús ne, casuaain cahndé. <sup>8</sup>Cuatjin camá xi cavatjutaha me Misia, hane quiji me nandya Troas. <sup>9</sup>Hane ngu nguixun xi siutaha me ngajan ne, cachja ngu nijñá cojo rë Pablo. Cavèë me ngu xihin tsèhë distritu Macedonia xi secun tichja cojo rë me cuitjin: “Nduvun nguehe Macedonia ne, cuissecun niji.” Cuatjin cachja nijñá jan. <sup>10</sup>Cuatjin camá xi xi tu cachja nijñá cojo Pablo cuatjin ne, ngutjen ni cavinchin chuva rë hacutjin cuma xi cuanguin Macedonia ta, tsèhë xi xi má niji ne, Nina cajindaya niji me xi cuanguin cuinújin cojo xuta jan cjuandajyihí xi chja tsèhë Jesús.

### *Cavisehen na Lidia ladu tsèhë Jesucristu*

<sup>11</sup>Hya xi camá ne, xi cavetjin nandya Troas ne, cachjihin ngu barcu sehe catsanguin ngu quixi rë nandya Samotracia. Hane xi camá nchujun jan ne, catsanguin nandya Neápolis. <sup>12</sup>Hane tsèhë ngajan ne, catsanguin nandya Filipos, ngu nandya xi hitsè sa matitjun tsèhë ngu cahndé tsèhë distritu Macedonia. Jemu cjin xuta Roma siu me jan. Hane cavinechintihin nandya vèhë ngujo nixtin. <sup>13</sup>Hane xi cavechú nixtin xi nixtin chjahájenda rë ne, cavetjin tingotjo hnhua tsèhë nandya jan hiscan jiya ndajyè. Xi má niji ne, ngajan tjin ngu cahndé xi má oración. Hane cavinechin ngajan, canújin cjuaxi rë Nina cojo yachjin xi camatangun me jan. <sup>14</sup>Hane ngu chjuun xi cahndé cjuaxi cachja Pablo ne, Lidia hmí rë na, ngu na tsèhë nandya Tiatura, viteña na tsjian moradu. Na vèhë ne, hacuaaha faharcun na Nina, hane Nai naja ne, cavuxaha me cjuatacun rë na xi ndaja cavetaharcu na cjuaxi xi cachja Pablo. <sup>15</sup>Hane hya xi caxtenda na cojo yèjè xuta rë na ne, cachja na cojo niji cuitjin: —Quihndé ta ha hyun xi ngahan ne, camangucáun cojo Nai naja ne, nduvun ndya naha, hane ngajan cuinechun. —Cuatjin jemu cjin cachja na cojo niji, vèhë xi catsangui.

### *Quiji Pablo cojo Silas ndavaya ngajan Filipos*

<sup>16</sup>Cavechú ngu nixtin hya xi tivanguin cahndé hiscan xi má oración ne, cavechútaha niji ngu na hndixahan rë xuta, xi jiya xitsehen xahasen rë. Hane nai rë na hndixahan jan ne, jemu cjin tujún sacu rë me, tsèhë xi chja na cojo xuta mé xi cuatju me cuma. <sup>17</sup>Na vèhë ne, catsuyjihiya tjengui na ngayin cojo Pablo, jindaya na chja na cuitjin:

—Xuta xi cuicun vi ne, mosu rë Nina xi matitjun má me, hacuaaha sua me machaya nju cjuaxi hacutjin cuetjuntjun. —Cuatjin cajindaya na cachja na.

<sup>18</sup>Jemu cjin nixtin xi cuatjin casahmi na. Hya xi camá ne, tsèhë xi jemu camaxti rë Pablo ne, cavuya me cavutsejen me na, sehe cachja me cojo xitsehen jan cuitjin:

—Tsèhë xi Jesucristu casuaxa ná me ne, ¡tetjixin tsèhë na! ¡vèhë xi chjá cojo ri! —Cuatjin cachja Pablo.

Hane hora vèhë ni ne, cavetjuxin xitsehen jan.

<sup>19</sup> Hya xi camá ne, xi vutsejen nai rë na hndixahan jan xi ha quihndë tsajin cjuetacun xi sacú sa rë me tujún ne, cafaha me Pablo cojo Silas, cajavëjne me quijicani me ngajan hiscan ma tangun xutaxa rë ngajan hiscan má ndetsin. <sup>20</sup> Hane xi cafehe me ngajan xcun xutaxa rë ne, cuitjin cavinchajyë me:

—Cha xi cuicun tjë rë Israel vi ne, jemu tiviseccjan cha cjuatacun rë xuta nangui naja. <sup>21</sup> Meje rë cha xi nihña xcusun rë xutachanga rë cha, peru ngayaan xuta Roma ne, ndajintjin xi cuanguentjengueen xcusun xi cuacun vë.

<sup>22</sup> Hane hacuaha cojo xutacín jan, cavetsihin cavinchajyë me Pablo cojo Silas. Ngajan xi xutaxa rë ne, cavaxëhndu me tsjian rë me xi cuacun jan, sehe cavitexa me xi sehen rë. <sup>23</sup> Hane ha xcun xi ha jercu cavaja rë me ne, sehe cavincha me ndavaya. Hacuaha cachja me cojo cha xi sahmi cuidadu ndavaya xi ndaja cuidadu cuma me xi cuacun jan. <sup>24</sup> Hane hya xi cafahatsja mayu cjua vëhë ne, quiji cavinchahñu cha me cahntsua ndavayajñu, hacuaha cavinchanguihñu cha ntsacu me ngojo xi casehenchjine tsëhë jo ya xi sahmi rë me castigu hacuaha hitsë sa cjuaquixi jiya me.

<sup>25</sup> Hane sacuaha chuya rë vasen nixten ne, Pablo cojo Silas ne, tisahmi me oración hacuaha tisë me tsëhë Nina. Hane presu xi yahnga jan ne, tu tivisiñuju ni me. <sup>26</sup> Hane ha tu ñahñu jercu cafani nangui, hisca xihndëñaña rë ndavaya jan vitsuneya rë. Hacuaha yëjë ni tingotjo ndavaya jan ne, ngutjen ni catuxaha, hane cadena xi tjinñu xingu xingu presu ne, cavixuhndu. <sup>27</sup> Hya xi camá ne, cavasca rë cha xi sahmi cuidadu ndavaya jan. Hane xi cavëë cha xi tixaha yëjë tingotjo tsëhë ndavaya jan ne, cavaxë cha quicha rë cha hane ha tu hitsë sa ne, catsiquehen cha vojo rë cha ta, tsëhë xi xi má rë cha ne, yëjë presu ne, cavanga.

<sup>28</sup> Peru Pablo ne, jercu cajindaya me cachja me cuitjin:

—Xicanihñuu cuatjin ta ngayijin ni nechinyin nguehe. —Cuatjin cachja Pablo.

<sup>29</sup> Ngajan xi cha xi sahmi cuidadu jan ne, cafehya cha ngu ndihi, sehe vangasanii cha quiji cha cahntsua ndavaya, ña fatsë cha xi tsacjun cha, quiji cafañatsacjan cha xcun Pablo cojo Silas xi faharcun cha me. <sup>30</sup> Hane xi cavaxë cha me tsëhë ndavayajñu jan ne, sehe cafinguisse cha cuitjin:

—Tatá, ¿mé xi meje rë xi sahme, cojo sa xi cuétjutjé? —Cuatjin cafinguisse cha.

<sup>31</sup> Hane me xi cuacun jan ne, cuitjin cachja me:

—Catamangu tacún cojo Nai niji Jesús, sehe cuetjuntjun ngayun cojo yëjë xuta xi siu ndya nuju. —Cuatjin cachja me.

<sup>32</sup> Sehe ngajan xi cha vëhë ne, cajindaya cha yëjë xuta xi siu ndava cha, hane Pablo cojo Silas ne, casua me camachaya rë cha cjua rë Nina cojo yëjë xuta xi cajindaya rë cha jan.

<sup>33</sup> Ha hora vëhë ni tsëhë nixten vëhë ne, cafaha cha me ne, cavane cha hiscan casacuhmu rë me. Hya xi camá ne, ngutjen ni caxtenda cha cojo yëjë xuta rë cha jan. <sup>34</sup> Sehe quijiniji cha cojo Pablo cojo Silas ndava cha, hane casua cha niñu cajinë me. Hacuaha jercu ndaja camá rë cha cojo yëjë xuta xi siu ndava cha, tsëhë xi camangucacun cha cojo Nina.

<sup>35</sup> Hya xi camá ne, xi casahasen jan ne, catsingatju xutaxa rë jan nísë, quiji cachja cojo cha xi sahmi cuidadu ndavaya jan cuitjin:

—Naxun xu cha xi caxincha ndavaya nguchjin jan. —Cuatjin cachja cha.

<sup>36</sup> Ngajan xi cha xi sahmi cuidadu ndavaya jan ne, quiji cachja cha cojo Pablo cjua vihi:

—Catsingatju xutaxa rë cjua xi cuaxë xu nuju. Vëhë xi cuma cuetjun ne, cuangun cojo cjuandaja cjuajeya. —Cuatjin cachja cha.

<sup>37</sup> Peru Pablo ne, cuitjin cachja me cojo cha xi cuacun jan:

—Xutaxa rë ne, cavitexa me casehen niji xcun yëjë ni xuta, handasa cjëë cjuahacuenda me jyë niji, ngayin xi xuta Roma ngayin. Sehe cavinchaniji me ndavaya. ¿Há taha hma meje cuaxë niji me quihndë? ¡Cumaji xi cuatjin! Catinduva suvá me cataxë niji me. —Cuatjin cachja Pablo.

<sup>38</sup> Hane cha nísë jan ne, catsicuya cha cjua cojo xutaxa rë cuatjin. Hane xi camachaya rë xutaxa rë xi xuta Roma má me xi cuacun jan ne, catsacjun me camá. <sup>39</sup> Ngajan xi xutaxa rë ne, quiji cachja me cojo Pablo cojo Silas xi tsijyëcacun me xi cuatjin camá. Sehe cavaxë me me, sehe cafehya rë me xi sahmi me cjuandaja ne, cuetjuxin me tsëhë ndavaya jan. <sup>40</sup> Hane xi cavetju Pablo cojo Silas tsëhë ndavaya ne, cavuya quijitjengui me na Lidia. Hane xi cavëë me yëjë xuta ladu rë Jesús jan ne, sehe cachja me cojo xuta jan xi catjinduju me cojo ndiya rë Jesús, sehe cavetju Pablo cojo Silas quiji me.

## 17

### *Cafehe Pablo ngajan nandya Tesalónica*

<sup>1</sup> Hya xi camá ne, Pablo cojo Silas jan ne, cavatju me nandya Anfípolis cojo nandya Apolonia, sehe cafehe me nandya Tesalónica, hiscan xi tacun ngu yungun rë xuta tjë rë Israel. <sup>2</sup> Hane sacuatjin xi ha xcusun rë Pablo ne, ngajan quijitjengui me xuta tjë rë Israel

jan nixtin xi chjahájenda rë. Hane jyan nixtin, tséhë jyan totje ne, Pablo ne, cavicuaya me xuta cjuarë Nina. <sup>3</sup> Casua me camachaya rë xuta xi chja cjuarë Nina xi Me xi Tsingatju Nina ne, hatuxa tjin xi cueya me sehe cuya nga me cjuahñu. Hacuaha cachja Pablo cuitjin: —Jesús, me xi tisuá jimachaya nuju tséhë ne, me vëhë xi catsingatju Nina. —Cuatjin cachja me.

<sup>4</sup> Ngajan xi ngujo xuta xi cuacun jan ne, camacjain rë me, hane cavisehen me ladu rë Pablo cojo Silas. Hane ngajñi rë me xi cuacun camacjain rë vë ne, hacuaha jemu cjin xutaxín xi faharcun rë Nina hinchajñi me cojo hacuiin hitsë yachjin xi matitjun jan hinchajñi me. <sup>5</sup> Ngajan xi ngujo xuta tjë rë Israel xi camacjaain rë jan ne, camachini me. Hane hora xi camá casahmitangun me ne, jemu cjin xuta tsehen xi tujyë tsujyihya jan ne, cavetsihin casahmi me ngu suë jyë ngajñi nandya xi cjue jaha me Pablo cojo Silas. Quiji me ndava Jasón xi vanguise me me xi cuacun vë xi cuaxë me xcun xutacjin jan. <sup>6</sup> Hane xi casacuiin rë me Pablo cojo Silas ngajan ne, cajavëjne me Jasón cojo ngujo sa xuta ladu rë Jesús, quijicojo me xcun xutaxa rë, jindaya me cachja me, cavincha me jyë cuitjin:

—Cha xi cuacun jemu casuaxti jinguyjë ni ngasunhdë ne, hacuaha cojo nguehe cafehe cha. <sup>7</sup> Hane cha Jasón vi ne, cakahatsja cha cha xi cuacun jan ngajan ndava cha. Hane yëjë cha xi cuacun vë ne, tisahmi cha condra ley rë emperador Romano xi hmí rë César, me xi matitjun camahani, ha chja cha xi tjin sa ngu me xi matitjun xi hmí rë Jesús. —Cuatjin cavinchajyë xutacjin jan me xi cuacun jan xcun xutaxa rë.

<sup>8</sup> Ngajan xi xutacjin cojo xutaxa rë jan ne, xi cahndë me cjuarë jan ne, jemu camacjincacun me. <sup>9</sup> Hane ha xcun xi cavechji Jasón cojo xuta xi yahnga jan tujún cojo xutaxa rë ne, sehe catsismi xutaxa rë jan me.

#### *Cafehe Pablo cojo Silas ngajan nandya Berea*

<sup>10</sup> Ngajan xi xuta ladu rë Jesús ne, xi tu camá nguixun jan ne, catsingatju me Pablo cojo Silas ngajan nandya Berea. Hane xi cafehe me ngajan ne, quiji me yungun rë xuta tjë rë Israel. <sup>11</sup> Hane xuta jan ne, hitsë sa tixaha cjuatacun rë me xi cuma rë xuta xi siu ngajan Tesalónica. Hane me xi cuacun jan ne, cakahatsja me cjuarë Nina cojo nguñaja xahasen rë me. Hacuaha nchunchujun ni ne, cavutaya me xujun rë Nina, cojo sa xi sacú rë me cjuaquixi tséhë cjuarë cachja Pablo. <sup>12</sup> Cuatjin camá xi jemu cjin xuta jan camacjain rë me. Ngajñi rë xuta jan ne, hacuaha hacuiin hitsë xutaxín nchina sa chjuun sa xihin me hinchajñi me jan. <sup>13</sup> Peru hya xi camachaya rë xuta tjë rë Israel ngajan Tesalónica xi cojo nandya Berea tisia Pablo jimachaya rë xuta cjuarë Nina ne, hacuaha quiji xuta xi cuacun jan casua me cjuacjintacun xutacjin xi siu jan. <sup>14</sup> Ngajan xi xuta ladu rë Jesús xi siu jan ne, catsingatju me Pablo hisca ndachacun. Peru Silas cojo Timoteo ne, caxinchataha ni me ngajan. <sup>15</sup> Hane xuta xi quijicani rë Pablo jan ne, quijicojo me me hisca nandya Atenas. Xi tu cafehe me ngajan ne, cachja Pablo cojo xuta xi quijicani rë me jan ne, catji catchja me cojo Silas cojo Timoteo ne, marcu macjain catjitjengui me Pablo. Hya xi camá ne, sehe cafe xuta xi cuacun jan.

#### *Cafehe Pablo ngajan nandya Atenas*

<sup>16</sup> Jinguyjë rë xi tacunya Pablo Silas cojo Timoteo ngajan Atenas ne, jemu camaxti rë xahasen rë me, tséhë xi tivutsejen me nandya jan xi ña quitsë rë cojo nina ndoyojo. <sup>17</sup> Vëhë xi Pablo ne, cachja me cojo xuta tjë rë Israel cojo xutaxín xi faharcun rë Nina ngajan yungun. Hane ngajan ndetsin ne, nchunchujun ni cachja sa me cojo xuta xi fehe jan. <sup>18</sup> Hacuaha cojo maestru xi tjengui cjuatacun xi hmí epicúreo cojo ngujo sa maestru xi tjengui cjuatacun xi hmí estóico cavisajimi me cojo Pablo. Hane ngujo me ne, cachja me cuitjin:

—Cha machjiriin xi cuajyihí vë ne, itsajin camahani mé vengui chji rë cjuarë chja cha! —Cuatjin cachja maestru xi cuacun jan.

Ngujo nga me ne, cuitjin cachja me:

—Cha xi cuajyihí vë ne, tisia cha jimachaya naja tséhë nina rë jingu sa xuta.

Cuatjin cachja ngujo nga me ta, tséhë xi Pablo ne, tisia me jimachaya rë xuta cjuandajyihí xi chja tséhë Jesús cojo tséhë hacutjin cavuya me cjuahñu. <sup>19</sup> Ngajan xi xuta jan ne, quijicojo me Pablo ngajan Areópago, cahndë hiscan matangun me xi sahmi me junta, sehe cachja me cojo me cuitjin:

—Tinújun cojo niji mé cjuachacun xatsë xi quichuhun ta <sup>20</sup> jemu ha ngu xcusun cjuarë canuhyin xi canújun. Vëhë xi meje cumachaya niji mé vijne cjuarë vëhë.

Cuatjin cachja xuta Atenas jan ta, <sup>21</sup> tséhë xi yëjë xuta xi cuacun vë cojo xuta ngu nangui xi siu cahndë jan ne, hatuxa chuya rë me xi cuisifñuju me ngu cjuarë xatsë hacuaha jemu nduju cuichja me cojo xicjin me.

<sup>22</sup> Hya xi camá ne, sehe casecunvasen Pablo cahndë vëhë, sehe cachja me cuitjin:

—Ngayujun ngarcun ni xuta Atenas matsejen ne, vutsején jinguyjë ni ne, ngayun ne, hacuaha jemu chjuhuncun nina nuju. <sup>23</sup> Ta jinguyjë rë xi catsujyéhëya ngajñi nandya

nuju hacuaha tivutsején yějê cahndê hiscan chjuhunrcun nina nuju ne, cavécutaha ngu yungun lihndi hiscan xi camahindu ngujo cjuaxi chja cuitjin: “Tsêhê ngu nina xi hyaan me.” Cuatjin camahindu. Vêhê xi nina xi chjuhunrcun xi hisca hyuun ne, me vêhê xi nduva tisuá jimachaya nuju tsêhê me. <sup>24</sup>Nina xi casahmi ngasunhndê cojo yějê xi tjin xcun, me xi nai rê ngahnga cojo nangui ne, hacuiin véjñacahndê me yungun xi sahmi xuta. <sup>25</sup>Hacuaha me vêhê ne, tsajin né xi ma chaja rê me xi ngayaan xuta cuma tahan rê me ta, me vêhê xi sua naja me cjuahñu, sua me xta naja, hacuaha sua naja me yějê ni xi mameje naja.

<sup>26</sup>Hane tjê rê xi ngu ni xuta ne, casahmi Nina yějê xcusun xuta, xi cuiyuju me jingujyê ni ngasunhndê. Hacuaha Nina cachja me janihya xi cumatitjun jimangu xcusun xuta hacuaha jani hiscan xi cuiyuju me. <sup>27</sup>Cuatjin casahmi Nina cojo sa xi ngayaan xuta ne, cuinchaseen me, hane xi cuatjin cuinchaseen me ne, hyaan sa xi sacú naja me, handasa hacuiin cjin tacun Nina xi cuma naja xingu xingu ngayaan. <sup>28</sup>Sacuatjin chja ngu cjuaxi chja cuitjin: “Nina ne, sua naja me cjuahñu, sahmi me xi ma finiya ngayaan, hacuaha sua naja me xi nechan cojo cjuahñu naja.” Cuatjin chja cjuaxi. Hacuaha yahnga xuta tsêhê ngajñi nuju xi tsihindu me cuma xi jemu ndaja fi ne, cuitjin catsihindu me: “Ngayaan ne, tjê rê Nina ngayaan.” Cuatjin catsihindu me. <sup>29</sup>Quihndê ta quihndi rê nina ngayaan ne, mijí rê xi cuma tacun xi Nina ne, tangun me cojo nina oro o sa xi nina quicha tyava, o sa xi nina ndoyojo, xi xuta casahmi me cojo cjuatacun rê suvá me. <sup>30</sup>Nina ne, catsingatjuhnga me nixtin xi xuta ne, hvliin me. Peru quihndê ne, Nina ne, tivitexa me xi yějê ni xuta tsêhê jingujyê ni ladu ne, tsindeya me cjuatacun rê me ta, <sup>31</sup>tsêhê xi Nina ne, ha cavejña me ngu nixtin xi tsichuva me xuta tsêhê ngasunhndê cojo cjuaquixi tu cutjin jyê rê ne, cuatjin sahmi me cojo. Hacuaha ha cavaxijin me ngu xuta xi sahmi xa vêhê. Hacuaha ha hyan xi cjuaquixi xi cuatjin cuma, tsêhê xi Nina catsicuya me cjuahñu xuta vêhê. —Cuatjin cachja Pablo.

<sup>32</sup>Hane hya xi cahndê xuta jan cjuaxi ngu nima ne, cavuya cjuahñu ne, ngujo me ne, catsixcuehyu me cjuaxi jan, peru ngujo nga me ne, cuitjin cachja me:

—Cuisiñiji xi cuiñujun nga ngundiya cjuaxi vêhê. —Cuatjin cachja ngujo me jan.

<sup>33</sup>Ngajan xi Pablo ne, cavetju me tsêhê ngajñi rê xuta jan. <sup>34</sup>Hane ngujo xuta ne, cavisehen me ladu rê Pablo sehe camacjain rê me cjuaxi jan. Hane ngajñi rê me xi cuacun vê ne, jiyajñi me xi hmí rê Dionisio, ngu xutaxa rê tsêhê nandya, hacuaha cojo sa ngu chjuun xi hmí rê Dámaris jiyajñi me jan, cojo ngujo sa me.

## 18

### *Cafehe Pablo ngajan nandya Corinto*

<sup>1</sup>Hya xi camá ne, hya xi cavatju xcusun vêhê ne, cavetju Pablo tsêhê nandya Atenas, hane quiji me nandya Corinto. <sup>2</sup>Hane xi cafehe Pablo ngajan ne, cavechúta me ngu xihin tjê rê Israel xi hmí rê Aquila. Aquila jan ne, tsêhê distritu Ponto má me, peru hacuaha sehe cafehe me Corinto cojo chjuun rê me xi hmí rê Priscila, xi quiji caviyujuchahndê me ngajan nación Italia. Cavetjuxin me tsêhê Italia ta, tsêhê xi me xi matitjun jan, me xi hmí rê Claudio ne, cavitexa me xi yějê ni xuta tjê rê Israel ne, hatuxa cuetjuxin me tsêhê nandya Roma. Hane Pablo ne, quijitjengui me Aquila. <sup>3</sup>Hane tsêhê xi ha ngu xcusun ni xa xi sahmi catsijo ni me ne, cavejñatangun me cojo me xi cuacun vê, hacuaha tangun casahmi me xa. Xa xi sahmi me ne, xi tsindaja me ndihya tsjian. <sup>4</sup>Ngajan xi Pablo ne, cachja me cjuaxi rê Nina ngajan yungun rê xuta tjê rê Israel jima ngu nixtin xi chjahájenda rê ta, tsêhê xi meje rê me xi sa xuta tjê rê Israel o sa xi xutaxin ne, cumacjain rê me cjuaxi vêhê.

<sup>5</sup>Hane xi cafehe Silas cojo Timoteo xi cavetju me tsêhê distritu Macedonia ne, Pablo ne, cavetsihin xi nchunchujun ni tichja me cojo xuta cjuaxi rê Nina, tichja me cojo xuta tjê rê Israel xi Jesús ne, me vêhê xi catsingatju Nina. <sup>6</sup>Peru hya xi casahmi xuta xi cuacun jan condra Pablo hacuaha choho cachja me tsêhê me ne, cavitsune Pablo chojo rê tsjian rê me sacuaha xi tivaxê me xuta xi mijí cuihndê cjuaxi rê Nina, sehe cachja me cojo xuta jan cuitjin:

—Ngayun suvun cún nuju tsêhê xcusun xi cuátju cuma. Hacuiin ngahan cún ná. Quihndê cojo nixtin xi cjuaxi sa ne, cjuê cuichjá cojo xutaxin cjuaxi rê Nina. —Cuatjin cachja me.

<sup>7</sup>Hane xi cavetjuxin me tsêhê xuta xi cuacun vê ne, quiji me ndava ngu me xi hmí rê Ticio Justo, ngu xutaxin xi hacuaha faharcun me Nina. Ndava me vêhê ne, ngu ndaya ni rê yungun rê xuta tjê rê Israel jan tacun. <sup>8</sup>Hane Crispo, me xi xutaxa rê yungun jan ne, camangucacun me cojo Nai naja Jesucristu, hacuaha cojo yějê sa me xi siu ndava me camangucacun me. Hacuaha jemu cjin xuta Corinto ne, xi cahndê me cjuaxi ndajyihí rê Nina jan ne, camacjain rê me sehe caxtenda me. <sup>9</sup>Hane ngu nguixun jan ne, ngajñi niñjá rê Pablo ne, cachja Nai naja cojo rê me cuitjin:



—Xicarcuuin. Tinoje sa. Xicanisejyiin cjuua xi noje. <sup>10</sup> Cuatjin nihñi ta, tsëhë xi ngahan ne, tejña cojo ri, hane tsajin yo xi cuma choho sahmi cojo ri ta ngahan ne, jemu tjin ná xuta ladu naha nguehe nandya vihi. —Cuatjin cachja Nai naja.

<sup>11</sup> Hane cavéjña Pablo ngajan ngu nu vasen, xi vicuya rë me xuta cjuua rë Nina.

<sup>12</sup> Peru hya xi Galión matitjun me tsëhë distritu Acaya ne, camatangun xuta tjë rë Israel jan ne, cafaha me Pablo, quijicani me xcun xutaxa rë, <sup>13</sup> cuitjin cachja me:

—Cha xi cuijyihi vi ne, tsujiyihiya cha tichja cha cojo xuta xi hacjahi xcusun meje rë xi nihña xi chjahanrcun Nina. Peru xcusun vëhë ne, condra tsëhë ley naja. —Cuatjin cachja xuta jan.

<sup>14</sup> Hane ha tu hora sa xi cuichja Pablo ne, cachja Galión cojo xuta xi cuacun jan cuitjin:

—Ngayun xuta tjë rë Israel, sa xi ngu cjuatsehen o sa xi ngu jyë jyë xi casahmi cha ne, tjin ná chuva rë xi scaa ná cojo nuju. <sup>15</sup> Peru xi tsëhë ngu cjuachacun cojo tsëhë ñihi rë ngu xuta cojo tsëhë ley nuju suvun ne, ndya chutsujun suvun hacutjin cuma chihin ta, tsëhë xi ngahan ne, hatuxa sahmeuendaan cjuacjintacun xi cuacun vé. —Cuatjin cachja Galión.

<sup>16</sup> Ngajan xi Galión ne, catsicanga cojo me xuta tjë rë Israel jan tsëhë ndihyavasen. <sup>17</sup> Ngajan xi yëjë xuta jan ne, cafaha me Sóstenes, me xi matitjun tsëhë yungun rë xuta tjë rë Israel, cavaja rë me ngajan ndatsen ndihyavasen. Peru Galión ne, casahmicuendaan camahani me yëjë ni cjuacjintacun vëhë.

#### *Cavuya nga Pablo nandya Antioquia*

<sup>18</sup> Peru hya xi ha jemu cavatju nixtin xi quitaha Pablo ngajan Corinto ne, catsinguijnetaha me cjuua cojo xuta ladu rë Jesús, sehe cafaha me ngu barcu xi cjue me ngajan distritu Siria. Priscila cojo Aquila ne, hacuaha cojo me quiji me cojo Pablo. Hane xi cafehe me nandya Cencrea ne, ngajan casejnu rë rcu Pablo ta, tsëhë xi casahmichihin me ngu cjuua cojo Nina. <sup>19</sup> Hane xi cavatju vëhë ne, sehe quiji me nandya Efeso. Hane Pablo ne, ngajan caviyujutaha me Priscila cojo Aquila. Hya xi camá ne, Pablo ne, quiji me yungun, cachja me cojo xuta tjë rë Israel jan cjuua rë Nina. <sup>20</sup> Hane xi cafehya xuta me xi setaha sa me ngujo nixtin ngajan ne, catsingatiin me. <sup>21</sup> Hya xi camá ne, catsinguijnetaha me cjuua cojo xuta jan, cuitjin cachja me:

—Sa xi Nina meje rë me ne, cúa nga, nduvatjenguë nuju. —Cuatjin cachja me.

Ngajan xi cafaha me ngu barcu xi cavetju me tsëhë Efeso.

#### *Quiji nga Pablo cavusehenhya me xuta rë yungun*

<sup>22</sup> Hane xi cafehe me Cesarea ne, ngajan cavetju me quiji me Jerusalén xi sua me ngu nina xuta rë yungun ngajan. Hya xi camá ne, sehe cavuya cafehe me nandya Antioquia.

<sup>23</sup> Hane xi ha casetaha me ngujo nixtin jan ne, sehe cavetju nga me quiji me yëjë ni nandya tsëhë distritu Galacia cojo distritu Frigia, casua rë me ngahñu yëjë ni xuta ladu rë Jesús.

#### *Quiji Apolos nandya Efeso cojo nandya Corinto*

<sup>24</sup> Ngajan nandya Efeso ne, cafehe ngu xuta tjë rë Israel xi hmí rë Apolos. Nangui rë me ne, Alejandría. Jemu ndaja tsichihin me cjuua xi chja me, hacuaha jemu vëë me tsëhë cjuua rë xujun rë Nina. <sup>25</sup> Me vëhë ne, tjin yo xi casuacuenda rë me tsëhë ndiya rë Nai naja. Cojo nguñaja xahasen rë me ne, chichihin ni casua me camachaya rë xuta cjuandajyihi xi chja tsëhë Jesús. Peru hvíin me mé vijne xi xtenda xuta sacuatjin tixtenda xuta ladu rë Jesús ta xi vëë me ne, suvá ni mé vijne xi xtenda xuta sacuatjin cavitenda Juan Vitenda rë Xuta. <sup>26</sup> Apolos vé ne, hacuiin cojo chircun rë me cuetsihin cuichja me cojo xuta cjuua rë Nina ngajan yungun rë xuta tjë rë Israel. Hane xi cahndë Priscila cojo Aquila sacuatjin cachja Apolos ne, cavaxëxin me ne, sehe casuacuenda ndaja sa me tsëhë ndiya rë Nina. <sup>27</sup> Hya xi camá ne, catsingatahacacun Apolos xi cjue me ngajan distritu Acaya. Hane xuta ladu rë Jesús jan ne, cachuya rë me hacuaha catsihindu me ngu xujun tsëhë xuta ladu rë Jesús ngajan, cachja me cojo xuta jan xi ndaja cjuahatsja me Apolos. Hane xi cafehe me jan ne, jemu cavisecoo me xuta xi cojo cjuandaja rë Nina ne, ha camangucacun me cojo Jesús. <sup>28</sup> Hane xcun ni yëjë xuta ne, jercu catsitjungui me cjuua rë xuta tjë rë Israel. Jemu cjin cahndë tsëhë xujun rë Nina xi cachja me cojo xuta, xi tsingacun me xuta xi Jesús ne, me vëhë xi catsingatju Nina me.

## 19

#### *Cafehe Pablo nandya Efeso*

<sup>1</sup> Cuitjin camá jinguyëjë rë xi quitahá cuaha Apolos ngajan Corinto. Xi cavatju catsujiyihi Pablo taha ladu ngatihin ne, cafehe me nandya Efeso, hane ngajan cavechútaha me ngujo xuta ladu rë Jesús. <sup>2</sup> Hane cuitjin cachja me cojo xuta jan:

—¿Há cavisehen Hasen rë Nina cahntsua xahasen nuju hya xi camangutacún cojo Jesús?  
—Cuatjin cachja me.

Hane xuta jan ne, cuitjin cafayangui me:

—Hisca camachayiin niji cjuaxi tjin xi hmí rë Hasen rë Nina. —Cuatjin cafayangui me.

<sup>3</sup>Ngajan xi Pablo ne, cuitjin cachja nga me:

—¿Hacutjin caxtenda ngayun ni? —Cuatjin cachja me.

Hane xuta jan ne, cuitjin cafayangui me:

—Caxtenda ngayin sacuatjin cavitenda nima Juan. —Cuatjin cafayangui me.

<sup>4</sup>Ngajan xi Pablo ne, cuitjin cachja nga me:

—Juan vë ne, cavitenda me xuta hya xi xuta jan ne, catsindeya me cjuatacun rë me, hacuaa cachja me cojo xuta jan xi catamanguacacun me cojo me xi sehe cjuhe, me xi hacui Jesús. —Cuatjin cachja nga Pablo.

<sup>5</sup>Xi cahndë xuta jan cjuaxi vëhë ne, caxtenda me xi cumatangun cjuatacun rë me cojo Nai naja Jesús. <sup>6</sup>Hane xi cavisanetsja Pablo xuta jan ne, canduva Hasen rë Nina, cavisehen cahntsua xahasen rë xuta, hane cachja me hne xi hisca hvín me, hacuaa cachja me cjuaxi casua Nina me. <sup>7</sup>Hane má sacuaa tejó xihin me xi yëjë me.

<sup>8</sup>Hya xi camá ne, quiji Pablo yungun rë xuta tjë rë Israel, cachja me cojo xuta. Hane cahntsua jyan sá ne, cuatjin fi me yungun, hane hacuiin cojo chiracun rë me chja me cojo xuta tsëhë gubiernu xi sahmi Nina. <sup>9</sup>Peru ngujo xuta jan ne, casahmitaja rcu me, hane camacjaain rë me, hane choho cachja me tsëhë ndiya rë Jesús xcun yëjë ni xuta. Vëhë xi Pablo ne, cavetjuxin me tsëhë xuta jan, hacuaa quijicojo me xuta ladu rë Jesús. Cavetsihin me nchunchujun ni cachja me cojo xuta ngajan scuela rë ngu me xi hmí rë Tirano. <sup>10</sup>Cuatjin casahmi me cahntsua jo nu, vëhë xi yëjë xuta xi siu ngajan Asia ne, camachaya rë me tsëhë cjuaxi rë Nai naja, sa xuta tjë rë Israel ne, o sa xutaxín.

#### *Yatu quihndi rë Sceva*

<sup>11</sup>Jemu jyë cjuarcun casahmi Nina ngajñi rë xa xi casahmi Pablo. <sup>12</sup>Hisca tsjian xi sahmixa cojo Pablo ne, quijicojo xuta casua rë me xuta hmu rë, hane chíhin rë me ne, cavetjuxin, hisca xitsehen xi hinchaxahasen rë yahnga me ne, hacuaa cavetjuxin.

<sup>13</sup>Peru ngujo cha tjë rë Israel xi tsujyihya vaxëxin cha xitsehen xi hinchaxahasen rë xuta ne, hacuaa camameje cueyanangui cha ñihi rë Nai naja Jesús hora xi tivaxëxin cha xitsehen, hane cuitjin cachja cha:

—Tsëhë xi Jesús casuaxa ná me, me xi chja Pablo tsëhë ne, tivitéxa nuju xi cuetjuncun. —Cuatjin cachja cha.

<sup>14</sup>Cha xi cuatjin sahmi vë ne, hacui yatu cha quihndi rë ngu nahmi xi hmí rë Sceva, ngu nahmi xi matitjun tsëhë xuta tjë rë Israel.

<sup>15</sup>Hane ngu ndiya xi cuatjin cachja cha ne, cuitjin cafayangui xitsehen jan:

—Jesús ne, hvë me vëhë. Hacuaa hvë Pablo. Peru ngayun ne, ¿yo ngayun? —Cuatjin cafayangui xitsehen jan.

<sup>16</sup>Hya xi camá ne, me xi hinchaxitsehen xahasen rë jan ne, cacaataha me cha, hane cacaa rë me catsinguijne me yëjë yatu cha, tsëhë xi jemu hñu ngahñu rë me. Cuatjin camá xi jemu casacuhmu rë cha xi cuacun jan, hane cavanga cha tu quixti ni tsëhë ndihya hiscan siu cha jan. <sup>17</sup>Xcusun xi camá vë ne, camachaya rë yëjë xuta nandya Efeso, sa xuta tjë rë Israel ne, o sa xutaxín. Hane ngayëjë ni me ne, jemu catsacjun me camá, hane camá jyë camá hnga Nai naja Jesús.

<sup>18</sup>Hane jemu cjin xuta xi ha cavisehen me ladu rë Jesús ne, fitjengui me Pablo vijacun me tsëhë cjuasurqui xi sahmi me. <sup>19</sup>Hya xi camá ne, jemu cjin xuta xi sahmi cjuasurqui ne, quijicojo me xujun rë me jan, cavaca me ngajan xcun yëjë ni xuta. Hane xi casahmi me cuenta chji rë yëjë xujun rë me jan ne, jemu jyë camahani tujún cavetju chji rë. <sup>20</sup>Cuatjin camá xi cjuaxi rë Nai naja ne, jercu cavitsojo sa hacuaa casacuhñu sa rë.

#### *Suë jyë xi camá ngajan Efeso*

<sup>21</sup>Hane xi cavatju camá yëjë xcusun vëhë ne, cavejñacacun Pablo xi cjue me Jerusalén, cuatju me yëjë nandya tsëhë distritu Macedonia cojo yëjë nandya tsëhë distritu Acaya. Hacuaa cachja me cuitjin:

—Xi cuatju cjué Jerusalén ne, hacuaa tjin ná xi cjué hisca nandya Roma. —Cuatjin cachja me.

<sup>22</sup>Ngajan xi catsingatju me jo xuta xi visesco rë me jan, Timoteo cojo Erasto, ngajan distritu Macedonia. Peru me vëhë ne, casetaha sa me ngajan distritu Asia.

<sup>23</sup>Ngu nixtin xi quitahá me jan ne, cavechú ngu cjuandya jyë tsëhë ndiya rë Jesús. <sup>24</sup>Ngu xihin xi hmí rë Demetrio ne, sahmi me yungun langa cojo súv quicha tyava, xcusun rë yungun rë nina Diana. Hane xuta xi sahmi xa rë Demetrio ne, jemu casacu rë me tujún

tsèhè xa vèhè. <sup>25</sup> Ngajan xi Demetrio ne, casahmi tangun me yèjè xuta xi sahmi xa rè me cojo jingu sa xuta xi sahmi me xa vèhè ni ne, sehe cachja me cuitjin:

—Ngayujun ni ne, ha hyun ta tsèhè xa vihi ne, sacu naja yèjè tujún xi tjin naja. <sup>26</sup> Ngayun ne, chutsujun hacuaha machaya nuju cjuá xi hacuini suvá ni nguehe ta cojo jingujyè ni distritu Asia ne, tsuyihiya cha Pablo vè, sahmi cha xi vijneacacun xuta cjin hacuaha tsismicacun me nina naja ta, tsèhè xi chja cha xi nina xi nindajan cojo ntsan ne, hacuini nina jain ne. <sup>27</sup> Jemu tsavi ta hacuini suvá ni xa naja chajá ta cojo yungun rè nina naja Diana ne, cuechú hora xi cuenguini chji rè, hacuaha hisca suvá nina naja ne, chajá me xi jyè hnga me cojo cjuatacun rè me ta me vèhè ne, yèjè ni xuta tsèhè jingujyè ni distritu Asia cojo xuta tsèhè jingujyè ni ngasunhdè ne, jemu faharcun rè me. —Cuatjin cachja me.

<sup>28</sup> Xi cahndè xuta cjuá jan ne, jemu camacjan camahani rè me, sehe cajindaya me cachja me cuitjin:

—Jemu jyè hnga nina Diana naja. —Cuatjin cajindaya me cachja me.

<sup>29</sup> Jingujyè ni ngajni nandya ne, jemu jyè suè cavejña. Ngajan xi xuta jan ne, vanga me cjuí cuma tangun me ngajan ndatsen ndihyavasen, taha tijuvèhya me Gayo cojo Aristarco, jo me tsèhè distritu Macedonia, me xi visecoo rè Pablo. <sup>30</sup> Ngajan xi Pablo ne, meje cuisehenjni me ngajni rè xuta cjin jan, peru xuta ladu rè Jesús ne, casuaain me cahndè. <sup>31</sup> Hacuaa ngujo xutaxa rè xi vinga rè Pablo ne, catsingatju me cjuá tsèhè Pablo xi cjuini me ngajan ndatsen ndihyavasen. <sup>32</sup> Ngujo xutacjin jan ne, jindaya me chja me cuitjin, ngujo nga me ne, jindaya me chja me cuatjin ta, tsèhè xi yèjè ni xuta ne, jemu camasuè rè cjuatacun rè me. Jercu cjin me xi hisca hvín me mé má cuatjin quiji camatangun me jan. <sup>33</sup> Peru ngujo xutacjin jan ne, casuacuenda me Alejandru mé tsèhè xi cuatjin tijima, hya xi catsivaha xuta tjè rè Israel me xi secun me xcun. Ngajan xi Alejandru ne, casahmi tsja me cojo xutacjin jan xi sejyu me cojo sa xi cuma cuichja Alejandru ngatsè rè xuta tjè rè Israel. <sup>34</sup> Peru xi cavèè xutacjin jan xi Alejandru ne, xuta tjè rè Israel má me ne, ngu tangun ni cajindaya me, vatju sa jo hora cachja me cuitjin:

—Jemu jyè hnga nina Diana naja! —Cuatjin cajindaya me cachja me.

<sup>35</sup> Hya xi camá ne, xi camá catsinguejyu secretariu xutacjin jan ne, sehe cachja me cuitjin:

—Ngayujun ngarcun ni ngayun xuta nandya matsejen ne, ha hyun ta tsajin hisca ngu xuta xi hvín me xi nguehe Efeso tacun yungun rè nina Diana hacuaha nguehe tacun suvá nina xi cjanengui nguehe xi canduva ngahnga. <sup>36</sup> Tsèhè xi tsajin yo xi cuma cuichja xi hacuini cuatjin ne, vèhè xi meje rè xi catisejyu ni ngayun, tsajin mé xi nihnu sa xi cjèè ningatuhuntacundujun. <sup>37</sup> Cha xi cuicun canduvuncujun nguehe ne, tsajin mé xi choho casahmi cha cojo yungun naja, hacuaha tsajin mé xi choho chja cha tsèhè nina naja. <sup>38</sup> Peru sa xi Demetrio cojo xuta xi sahmi xa rè me tjin yo xi sahmi si me cojo ne, tacun ndihyavasen, hacuaha tjin xutaxa rè. Ngajan catinchajyè xicjin me, jima ngu me. <sup>39</sup> Hane sa xi tjin sa mé xi meje nuju ne, nixtin xi satè rè junta xi sehe cuma ne, hya cuma chihin. <sup>40</sup> Sacuaha xcusun xi tijima vi ne, cuma tsingatahacacun me xi matitjun xi ngayaan ne, tinihña ngu si jyè condra tsèhè gubiernu. Ta sa xi cjuinenguisè naja me mé má cuatjin canihña ne, sacuini naja chuva rè hacutjin cuinújan mé má cuitjin tinihña ngu suè jyè vi.

<sup>41</sup> Cuatjin cachja secretariu, sehe catsinguijnetaha me cjuá cojo xutacjin ne, sehe cafe xingu xingu me.

## 20

### *Quiji Pablo distritu Macedonia cojo distritu Acaya*

<sup>1</sup> Hya xi camá ne, xi cavatju suè jyè jan ne, cajindaya Pablo xuta ladu rè Jesús, casua rè me cjuetacun. Sehe catsinguijnetaha me cjuá, sehe cavetju quiji me distritu Macedonia. <sup>2</sup> Hane jima ngu nandya xi cavatju me xi cafehe me Macedonia ne, hacuaha jercu cachja me cojo xuta ladu rè Jesús hacuaha casua rè me cjuetacun. Hane xi cavatju me yèjè nandya vèhè ne, cafehe me distritu Acaya. <sup>3</sup> Hane ngajan casetaha me jyan sá. Hane hya xi ha cjuaha me barcu xi cjue me distritu Siria ne, casacu camachaya rè me xi xuta tjè rè Israel ne, caviyuju me xi tsiquehen rè me. Vèhè xi catsingatahacacun me xi hitsè sa ndatjin cuya cjue ntsacu me xi táha ladu tsèhè Macedonia. <sup>4</sup> Hane cojo me xi cuicun vihi quiji me cojo rè me: Sópater, ngu xuta Berea xi quihndi rè Pirro; cojo Aristarco cojo Segundo, jo xuta Tesalónica; cojo Gayo, ngu xuta Derbe; cojo Timoteo; cojo Tíquico cojo Trófimo, jo xuta tsèhè distritu Asia. <sup>5</sup> Me xi cuacun vé ne, camatitjun me quiji me, hane ngajan caviyujuya niji me nandya Troas. <sup>6</sup> Peru ngayin ne, xi cavatju suhi tsèhè pan xi tsajin san rè ne, sehe cachjihin barcu xi cavetjin tsèhè Filipos, hane xi café hñú nixtin ne, sehe cavechintihin me ngajan Troas. Hane ngajan cavinechintihin yatu nixtin.

### *Quitahá Pablo ngajan nandya Troas*

<sup>7</sup>Ngajan xi nixtin ngu tséhê totje ne, camatangun ngayin xi xinitanguin niñu ngayijin ni. Hane Pablo ne, cachja me cojo xuta. Hane tséhê xi cuetju me cjue me xi cuma nchujun jan ne, quijinduju cachja me hisca cavechú vasen nixten. <sup>8</sup>Jemu cjin ndihi seti ngajan ndihya ngahnga hiscan camatangun ngayin. <sup>9</sup>Hane ngu cha xi hmí rë Eúitico ne, tacun cha xcun ventana. Hane xi quijinduju sa cachja Pablo ne, jemu camanijñá rë cha. Hane tséhê xi cacaaín rë cha nijñá ne, cafañafë tjain camahani cha, hane cjanengui cha hisca xi má jyan pisu ndihya jan. Hane xi quiji catjunihnga rë cha ne, ha cahme cha. <sup>10</sup>Hane xi quijijne Pablo hiscan jiña nima ne, catsiquindi me yojo rë me sehe catsuvacja me nima. Hacuaha cachja me cuitjin:

—Xicamacjiin tacún ta, quicun cha vi. —Cuatjin cachja Pablo.

<sup>11</sup>Ngajan xi Pablo ne, cavuya quijiniji me, sehe cajiné me niñu. Sehe cavisajmi camaha sa me hisca xi casahasen, sehe cavetju me quiji me. <sup>12</sup>Hacuaha quicun cha xi cjanengui jan, cafecojo xuta cha. Hane jercu casacu rë me cjuetacun xi quicun cha.

#### *Quiji Pablo nandya Mileto*

<sup>13</sup>Ngayin ne, camatitjun ngayin catsanguin cavisihin barcu, hane sehe catsanguin nandya Aso, cojo sa xi chjihinntsin Pablo cahntsua barcu ngajan ta, tséhê xi ha cuatjin camachihin cjua ta, tséhê xi me vëhê ne, meje cjue ntsacu me. <sup>14</sup>Hane xi casacu xinguin cojo rë me ngajan Aso ne, cavisehen me barcu, sehe catsanguin tangun Mitilene. <sup>15</sup>Hane xi cavetjin ngajan ne, xi camá nchujun ne, cavatjin quixi rë Quío. Hane xi camá nchujun nga ne, cafilhin Samos. Hane camá nchujun nga ne, cafilhin nandya Mileto, <sup>16</sup>tséhê xi Pablo ne, cavejñacacun me xi cuátjincjin tséhê nandya Efeso, cojo sa xi hacuiin cuma tafi me ngajan distritu Asia, tséhê xi me vëhê ne, jemu meje xati rë me cojo sa xi xati cuechú me ngajan Jerusalén, hane ngajan tsingatju me suhi Pentecostés.

#### *Catsinguijnetaha Pablo cjua cojo xuta changá rë yungun Efeso*

<sup>17</sup>Hane jinguyëjê rë xi quitahá Pablo ngajan Mileto ne, catsingatju me quiji chjahá rë xuta changá rë yungun ngajan Efeso. <sup>18</sup>Hane xi cafehe xuta changá jan xcun Pablo ne, cuitjin cachja Pablo cojo rë me:

—Ngayin ne, ha hyunndujun hacutjin cavitejñataha cojo nuju yëjê ni nixtin hisca hya xi sehe tu cafëhê nguehe distritu Asia. <sup>19</sup>Ha hyun hacutjin casahme xa rë Nai naja: catsinguijne yojo naha, hisca cajihnda, hacuaha jemu cjin cjuañihi cavátju camá ta, tséhê xi xuta tjê rë Israel ne, jemu choho meje sahmi me cojo ná. <sup>20</sup>Ngayun ne, ha hyun hacutjin xi cachjá yëjê cojo nuju yëjê cjua xi ndaja xi cuma nuju. Hacuaha ha hyun hacutjin casuá camachaya nuju cjuachacun hya xi camatangun ngayun ngayujun ni, hacuaha cëjê ndya nuju jima ngu ngayun, cachjá cojo nuju. <sup>21</sup>Cachjá cojo xuta tjê rë Israel hacuaha cachjá cojo xutaxin xi meje rë xi tsindeya me cjuatacun rë me hacuaha cuisehen me ladu rë Nina hacuaha meje rë xi cumangucacun me cojo Nai naja Jesús. <sup>22</sup>Quihndê ne, ngahan ne, tifê Jerusalén sacuatjin cavitexa ná Hasen rë Nina. Hveen mé xi cuátju cuma jan. <sup>23</sup>Peru Hasen rë Nina ne, yëjê ni nandya xi vátju ne, chja cojo ná xi hatuxa cjuë ndavaya hacuaha jemu cuátju cjuañihi. <sup>24</sup>Xi má ná ne, tangun ni xi tejña cjuahñu o sa xi cueya. Xi meje ná ne, xi tsinguijnetaha xa xi casua ná Nai naja Jesús, xa xi suá cumachaya rë xuta cjuandajyihí xi chja tséhê cjuandaja rë Nina.

<sup>25</sup>Quihndê ne, ha hvê ta ha quihndê cuyuun chun ná, ngayujun ni xi casuá camachaya nuju tséhê gobiernu xi sahmi Nina. <sup>26</sup>Vëhê xi nguehe cuichjá cojo nuju ta, sa xi tjin ngu ngayun xi cuehuun xcun Nina ne, hacuiin ngahan quitjen jyê ta, <sup>27</sup>tséhê xi ngahan ne, casuácuenda chichihin nuju yëjê hacutjin xi cavejña Nina cjuatacun rë me. <sup>28</sup>Nechun cuidadu, hacuaha nihñucuidadun yëjê xuta ladu rë Jesús, xi suvá Hasen rë Nina casuaxa nuju xi cuma titjun ngayun tséhê sacuaha obispos, cojo sa xi ngayun nihñu cuidadu xuta rë yungun rë Nina. Me xi cuacun vé ne, casacu rë Nina me cojo jni rë Quihndê rë suvá me hya xi cahme me. <sup>29</sup>Hya xi ha cavatju cavétjuxen tsujun ne, ngahan hvê ta cuinduva xuta, xi meje tsinguetsun me cjuatacun rë yëjê xuta ladu rë Jesús, sacuatjin tsiquehen chu lobo cjan rë chu tsánga. <sup>30</sup>Hacuaha ngajñi nuju suvun ne, cuetjuñi xuta xi cuichja me cjuandacha, cojo sa xi cuaxëxin me xuta ladu rë Jesús xi cuma ladu rë me. <sup>31</sup>Nechun cuidadu. Hacuaha ninguitsjun ta, cahntsua jyan nu ne, nguixun nguitajñu cavicuyá nuju jima ngu ngayun. Jiya hora ne, hisca cajihnda.

<sup>32</sup>Quihndê ne, nguehe cuiyujú nuju tsja Nai naja, cojo sa xi sahmi nuju me cuidadu cojo cjuandaja rë me. Me vëhê xi ma sahmi me xi cuma yehe sa cjuatacun nuju, hacuaha sua tangun nuju me cjuahñu xatsé cojo yëjê sa xuta xi cavaxijin me. <sup>33</sup>Ngahan ne, hacuiin catsihmucacun tujún o sa tsjian rë jingu sa xuta. <sup>34</sup>Ngayun ne, hyun ta ngahan ne, casahmexa cojo ntsa vi xi casacu cjuachaja naha cojo me xi cavisecoo ná. <sup>35</sup>Ngajñi rë yëjê ni xcusun xi casahme ne, ngahan ne, catsingácun nuju xi, xi cuatjin hñu nihña xa ne, meje rë xi cuisecoon rë xuta xi jemu tjin rë cjuachaja. Hacuaha meje rë xi ninguitsjen cjua rë Nai naja

Jesús, hya xi cachja me cuitjin: “Hitsë sa sua má naja xi tahan, xi cuma rè xi chjahanntsán.”  
Cuatjin cachja Nai naja.

<sup>36</sup> Hane xi caffè cachja Pablo cuatjin ne, sehe cavixcuhnchi me, casahmi me oración cojo yějê xuta jan. <sup>37</sup> Yějê ni me jemu cajihnda me, quiji me catsuvacja me Pablo, hisca cavitatsuha me. <sup>38</sup> Cjua xi hitsë sa casua rè me cjuachoho ne, cjua xi cachja Pablo xi ha quihndë cuyaain scuëë xuta jan me. Sehe quiji me cojo Pablo hiscan cavisehen Pablo barcu.

## 21

### *Quiji Pablo ngajan Jerusalén*

<sup>1</sup> Hya xi camá ne, xi cavejñi xuta jan ne, sehe ngu quixi ni quiji barcu cojo niji ne, caphin Cos. Hane xi camá nchujun jan ne, caphin Rodas. Hane xi cavetjin ngajan ne, caphin Pátara. <sup>2</sup> Hane xi casacu niji ngu barcu xi cjue distritu Fenicia ne, cavisihin sehe catsanguin. <sup>3</sup> Hane xi cachusijin Chipre ne, cavatjin taha ladu quixi tséhê jan, catsanguin nduju xi caphin quixi rè distritu Siria, sehe caphin nandya Tiro ta, tséhê xi ngajan cuitujne chaha xi hincha cahntsua barcu. <sup>4</sup> Hane xi casacu xinguin cojo xuta ladu rè Jesús jan ne, cavinechintihin ngajan yatu nixtin. Hane ngujo profeta xi siu ngajan Tiro ne, tjin mé cachja Hasen rè Nina cojo rè me, sehe cachja profeta jan cojo Pablo xi cjuin me Jerusalén. <sup>5</sup> Xi cavechú nixtin xi cuetjin jan ne, sehe cavetjin catsanguin. Hane yějê xuta jan, cojo chjuun rè me cojo quihndi rè me ne, quiji cani niji me hisca tjeheh ndachacun, hiscan fê nandya. Sehe ngajan cavixcuhnchin, sehe canihñi oración. <sup>6</sup> Hane xi caningujñitihin cjua cojo rè me ne, sehe cavisihin barcu, hane me véhê ne, cavuya cafe me ndava me xingu xingu me.

<sup>7</sup> Hane ngayin ne, catsanguin cojo barcu xi cavétjin tséhê Tiro, hane caphin Tolemaida. Hane xi catsanguin catihin rè xuta ladu rè Jesús nina ne, ngajan cavinechin cojo rè me ngu nixtin. <sup>8</sup> Hane xi camá nchujun jan ne, cavetjin catsanguin, hane caphin Cesarea. Sehe catsanguin ndava Felipe, me xi sua machaya rè xuta cjuandajyihî xi chja tséhê Jesús. Me véhê ne, ngu me tséhê me xi ma yatu xi cavaxiji me xi visecoo rè apóstol. Hane ngajan cavinechin cojo rè me. <sup>9</sup> Me véhê ne, tjin rè me ñuju na nixti quihndi rè me, xi má na profeta. <sup>10</sup> Hane jinguyějê rè xi nechintihin ngajan ngujo nixtin ne, cafehe ngu profeta xi canduva tséhê Judea, ngu me xi hmí rè Agabo. <sup>11</sup> Hane xi cafehetjengui niji me ne, quiji me cafaha me cinturón rè Pablo, sehe catsihñu me tsja me cojo ntsacu me cinturón jan, sehe cachja me cuitjin:

—Cuitjin chja Hasen rè Nina: “Xihin xi tséhê cinturón vi ne, cuitjin tsihñu xuta tjê rè Israel me ngajan Jerusalén, hacuaha sahmi me entregadu xihin véhê tsja xutaxín.” —Cuatjin cachja profeta jan cjua rè Nina.

<sup>12</sup> Xi canuhýin cjua véhê ne, ngayin cojo xuta xi siu jan ne, canújin cojo Pablo xi cjuin me Jerusalén. <sup>13</sup> Ngajan xi Pablo ne, cuitjin cafayangui me:

—¿Mé má cuatjin chjihndun? ¿Mé má cuatjin nihñuchuvun cjuatacun naha? Ngahan ne, ha tjin chjine ngahan, hacuain suvá ni xi cjué ndavaya ta hacuaha hisca cueya ngajan Jerusalén ngatsë rè xi ladu rè Nai naja Jesús ngahan. —Cuatjin cafayangui Pablo tsijin.

<sup>14</sup> Hane xi catsingatiin me cjua xi canújin ne, ha quihndë canujin sa cjua véhê ta cuitjin canújin:

—Catama sacuatjin Nai naja meje rè me. —Cuatjin canújin.

<sup>15</sup> Xi cavatju nixtin xi cuacun vë ne, sehe cavihinchjini tsijin, sehe catsanguin Jerusalén. <sup>16</sup> Hacuaha cojo ngujo xuta ladu rè Jesús ngajan Cesarea quiji me cojo niji. Me xi cuacun vë quijicojo niji me hiscan xi cuinechin, ndava ngu xuta Chipre xi siutaha me Jerusalén, xi hmí rè Mnasón. Me véhê ne, ha jemu hatsëë camahani xi xuta ladu rè Jesús má me.

### *Quiji Pablo xi cuisiajmi me cojo Jacobo*

<sup>17</sup> Xi caphin ngajan Jerusalén ne, xuta ladu rè Jesús jan ne, caphahatsja niji me cojo yějê ni cjuasua. <sup>18</sup> Hane xi camá nchujun jan ne, Pablo ne, quiji me cojo niji xi cuisiajmi me cojo Jacobo. Hacuaha ha tjin tangun yějê xuta changá rè yungun jan. <sup>19</sup> Hane xi cavatju cachja Pablo nina cojo rè me ne, sehe casuacuenda chichihin me yějê ni xcusun xi casahmi Nina ngajñi rè xa rè Nina xi casahmi Pablo ngajñi rè xutaxín. <sup>20</sup> Hane xi cavatju cahndë xuta jan cjua xi cachja Pablo ne, casahmi jyë casahmi hnga me Nina, sehe cachja me cojo Pablo cuitjin:

—Ngayun ne, ha hyun xi ngajñi rè xuta tjê rè Israel ne, chuva mil xuta tjin me xi cavisehen me ndiya rè Jesús. Hacuaha yějê ni me ne, jemu ndaja faharcun me ley rè Moisés. <sup>21</sup> Hacuaha xuta xi cuacun vë ne, casacu camachaya rè me xi ngayun ne, nújun cojo yějê xuta tjê rè Israel xi siu ngajan nangui rè xutaxín xi meje rè xi tsismicacun me ley rè Moisés, hacuaha mijí rè xi cuatë me chuxin rè quihndinda xi xihin, ha quihndë mijí rè xi cjuetjengui sa me xcusun changá naja. <sup>22</sup> ¿Mé xi cuma ni? Hatuxa jyihî ni ne, sacú

cumachaya rë me xi cafuhun. <sup>23</sup> Vëhë xi quihndë ne, nihñu tutjin xi cuinújin cojo nuju. Nguehe ngajñi niji ne, siu ñuju xihin xi casahmichihin me ngu cjuua cojo Nina. <sup>24</sup> Chjuhun cha vihi ne, tangun cojo cha yungun xi matitjun, cojo sa xi ngajan cuma tyjahi cha tangun cojo ngayun tsëhë xcusun xi tsavi xi cojo Nina sacuatjin xi ha xcusun naja. Hacuaha techjun tsëhë cha, cojo sa xi cuma sejnu rë rcu cha. Hane xi cuatjin nihñu ne, yëjë ni xuta ne, cumachaya rë me xi yëjë cjuua xi camachaya rë me tsujun ne, quixiin ta ngayun ne, hacuaha ha tuxa nihñuchuhun sacuatjin chja ley rë Moisés. <sup>25</sup> Hane sacuaaha xutaxin xi cojo cavisehen ladu rë Jesús ne, ha caningatjin ngu xujun tsëhë me, hane xujun vëhë ne, chja xi meje rë xi sinii me xichinë xi caviyuju xcun ninandoyojo, sinii me jni, sinii me yojo rë chu xi caxinchahndu rë xi cahme, sahmii me cjuatsehen xi sahmii xuta cojo ngu xi hacuiin chjuun rë hacuiin xihin rë. —Cuatjin cachja xuta changá jan cojo Pablo.

<sup>26</sup> Hane xi camá nchujun jan ne, sehe quijicojo Pablo cha xi cuacun jan, sehe catsityjahi tangun me yojo rë me cojo cha, sacuatjin xi ha xcusun rë xuta tjë rë Israel. Sehe ngajan xi Pablo cojo cha xi cuacun jan ne, cavisehen me yungun xi matitjun, xi cuichja me há cjin sa nixtin xi cuijnetaha xi cuma tyjahi camahani me, hane hacuaha cjue cjuatjo xcun Nina ngatsë rë jima ngu me.

*Cafaha sindadu Pablo ngajan yungun xi matitjun*

<sup>27</sup> Hya xi camá ne, xi ha meje cuechú xi cuma yatu nixtin jan ne, xuta tjë rë Israel xi canduva tsëhë distritu Asia jan ne, cavëë me Pablo ngajan cahntsua yungun xi matitjun tsëhë xi nchunchujun ni quiji me yungun tsëhë nixtin jan. Catsisüë me cjuatacun rë xutacjin jan, sehe quiji cafaha me Pablo, <sup>28</sup> hisca cajindaya me cachja me cuitjin:

—¡Ngayujun ni ngayun xuta tjë rë Israel, nduvun tiseccun niji! ¡cha vihi xi tsujyihya chja cha condra naja ngayaan xuta rë Nina, cojo condra rë ley xi vitexa naja, cojo condra tsëhë cahndë vihi! Cuatjin tsujyihya chja cha cojo yëjë xuta jinguyjë ni. Hacuaha catsinguetsun cha cahndë rë Nina vi, tsëhë xi canduvacojo cha xutaxin nguehe cahntsua yungun xi matitjun vi.

Cuatjin cajindaya me cachja me ta, <sup>29</sup> tsëhë xi titjun ne, ha cavëë me Pablo cojo ngu xutaxin xi hmí rë Tróximo ngajan ngajñi nandya, hane xi má rë me ne, quijicojo Pablo me cahntsua yungun.

<sup>30</sup> Hane yëjë xuta nandya ne, camasuë rë cjuatacun rë me. Hane vanga me quiji camatangun me yungun xi matitjun hiscan secun Pablo, sehe cafaha me cajavëjne me, cavaxë me tsëhë yungun jan. Sehe ngutjen ni casechja yëjë tingotjo jan. <sup>31</sup> Hane jinguyjë rë xi tisahmi xutacjin jan cjuandya xi tsiquehen me Pablo ne, quiji cjuua rë capitán tsëhë sindadu xi yëjë xuta Jerusalén ne, tjemu jyë suë tisahmi me. <sup>32</sup> Ngajan xi capitán jan ne, ngutjen ni quijijne me cojo sindadu rë me hiscan xi hinchataha xutacjin jan. Hane xi cavëë xutacjin jan sindadu cojo capitán rë cha ne, sehe casejyu me xi tivaja rë me Pablo. <sup>33</sup> Hane xi quiji tiña capitán jan ne, sehe cafaha me Pablo. Sehe cavitexa me xi cumahñu Pablo cojo jo cadena. Hya xi camá ne, sehe cavinenguise capitán jan cojo xuta jan yo xuta Pablo jan, hacuaha mé casahmi me. <sup>34</sup> Hane ngujo xuta jan ne, hisca jindaya me chja me cuitjin, ngujo nga me ne, hisca jindaya me chja me cuatjin. Peru tsëhë xi casacuiin rë capitán jan cjuaquixi ngatsë rë suë jyë xi tijima jan ne, cavitexa me xi cjuecojo sindadu Pablo ngajan hiscan hinchá sindadu. <sup>35</sup> Hane xi cafehe sindadu cojo Pablo hiscan ndë rë ne, hisca cavahahnga cha Pablo ngatsë rë cjuahngatacun xi sahmii xutacjin jan ta, <sup>36</sup> tsëhë xi tjengui me cjuí me jindaya me chja me cuitjin:

—¡Nicuhun cha! —Cuatjin chja me.

*Sua Pablo cjuaquixi rë me xcun xutacjin*

<sup>37</sup> Hya xi ha tsinguissehen sindadu jan Pablo cahntsua ndihya ne, cachja Pablo cuitjin cojo capitán:

—¿Há tuun cahndë cuichjá cojo nuju ngujo cjuua? —Cuatjin cachja Pablo.

Ngajan xi capitán jan ne, cuitjin cachja me:

—¡Han, peru ma noje griego! <sup>38</sup> Hane ngajan xi hacuiin ngaye cha Egipto xi sehe tiña nixtin cavunihnga ngu si jyë hacuaha quijicojo rë ñuju mil cha tsiquehen ngajan ngu xín tsëhë nandya jan ni. —Cuatjin cachja capitán jan.

<sup>39</sup> Ngajan xi Pablo ne, cuitjin cachja me:

—Ngahan ne, ngu cha tjë rë xuta Israel ngahan. Nangui naha ne, ngu nandya xi hacuaha jemu vengui chji rë xi hmí rë Tarso, tsëhë distritu Cilicia. Nihñu favor ne, tuhun cahndë cuichjá cojo xuta xi cuicun vi. —Cuatjin cachja Pablo.

<sup>40</sup> Hane xi casua capitán jan cahndë xi cuichja Pablo ne, hora xi secun Pablo hiscan ndë jan ne, casahmitsja me cojo xuta xi sejyu me hitsë. Hane hora xi café xuta caviyujuyuu me ne, ngajan xi Pablo ne, cachja me cojo xuta jan hne hebreo, cuitjin cachja me:

## 22

<sup>1</sup>—Ngayujun ngarcun ni xi hacuaha xingueen nuju ne, nihñu favor ne, tisiñuju hacutjin suá cjuaquixi naha quihndé xcun ngayujun ni. —Cuatjin cavetsihin cachja me.

<sup>2</sup>Hane xi cahndé xutacjín jan xi hne hebreo cachja Pablo cojo rë me ne, hitsé sa jercu caviyujujuu me. Sehe cachja sa Pablo cuitjin:

<sup>3</sup>—Ngahan ne, ngu cha tjé rë Israel ngahan. Hacuaha catsin ngahan ngajan nandya Tarso tséhé distritu Cilicia. Peru xi camacha ne, nguehe Jerusalén. Hane maestru Gamaliel cavicuya ná me sacuatjin camahani chja ley rë xutachanga naja. Hatuxa jemu ndaja fahárcun Nina, sacuatjin tiniññu ngayujun ni quihndé. <sup>4</sup>Ngahan ne, cojo cjuahngatacun ne, catsujyéhëya tjénguë xuta xi tjengui ndiya xatsé vihi. Hisca cavitéxa xi cueya me. Cafahá me cëjécojo me ndavaya, sa chjuun sa xihin me. <sup>5</sup>Hisca nahmi xi matitjun cojo yëjé xuta changá rë yungun ne, cuma sua me cjuaquixi rë me tséhé cjuá vihi ta, tséhé xi hacuaha me xi cuacun vëhé xasua ná me xujun xi suá rë xuta naja ngajan Damasco. Vëhé xi cëjé ngajan xi cjuahá xuta xi tjengui ndiya xatsé vihi, hane tsiññu me cuinduva cojo me nguehe Jerusalén, cojo sa xi cuma me castigu.

### *Cachja Pablo hacutjin camá xi cavisehen me ladu rë Jesús*

<sup>6</sup>Hya xi camá ne, hora xi ha tijima tiña ngayin xi tivanguin Damasco, sacuaaha chuya rë nchisen ne, ha tu ñaññu canduva ngu ndihi jyé tséhé ngahnga casahmi hasen rë hiscan tifé.

<sup>7</sup>Ña catícja, hane cahndé ngu cjuá xi cachja cojo ná cuitjin: “Saulo, Saulo, ¿mé má cuatjin nuyjihie tjengui ná cojo cjuahngatacun?” Cuatjin cachja cjuá jan. <sup>8</sup>Ngajan xi ngahan ne, cuitjin cafayangüé: “¿Yo ngayun, Tatá?” Cuatjin cafayangüé. Sehe cachja nga cjuá jan cojo ná cuitjin: “Ngahan xi Jesús tséhé nandya Nasaret ngahan, xi tinuyjihie tjengui ná cojo cjuahngatacun.” Cuatjin cachja nga cjuá jan cojo ná. <sup>9</sup>Yëjé xuta xi cavisecoo ná xi tivanguin ne, cavéé me ndihi jyé jan, peru cahndé me cjuá xi cachja cojo ná jan. <sup>10</sup>Sehe ngajan xi ngahan ne, cachjá cuitjin: “¿Mé xi meje rë xi sahme, Tatá?” Cuatjin cachjá. Hane Nai naja ne, cuitjin cachja me cojo ná: “Tisatjinhngue ne, tisihin Damasco. Hane ngajan cumachaya ri yëjé xcusun xi meje rë Nina xi nihñi.” Cuatjin cachja Nai naja cojo ná. <sup>11</sup>Peru tséhé hasen jyé xi cavisehen túxcun jan ne, camatsijin ná. Ngajan xi xuta xi tivisecoo ná xi tivanguin ne, cavaha me ntsa, sehe camá caféhé Damasco.

<sup>12</sup>Hya xi camá ne, ngu xihin xi hmí rë Ananías, xi jemu faharcun rë Nina hacuaha sahmi yëjé sacuatjin chja ley xi vitexa naja ne, ndaja chja yëjé xuta tjé rë Israel xi siu jan tséhé. <sup>13</sup>Hane cafehetjengui ná me hiscan tejña, hane cachja me cojo ná cuitjin: “Ngayun Saulo, catamatsejen nga nuju ngundiya.” Cuatjin cachja me. Hane ha hora vëhé ni ne, camatsejen nga ná hane cahvé me. <sup>14</sup>Hya xi camá ne, sehe cachja me cojo ná cuitjin: “Nina rë xutachanga naja ne, cojo tjun sa ne, casuaxa nuju me xi cumachaya nuju mé xi meje rë me, hacuaha chun me xi hatuxa tyjahi cojo cjuatacun rë, hacuaha cuinuhyun cjuá xi chja me cojo nuju. <sup>15</sup>Cuatjin camá ta, tséhé xi Nina meje rë me xi ngayun tuhun cumachaya rë yëjé xuta tséhé me, cojo tséhé xcusun xi cahyun cojo tséhé cjuá xi canuhyun. <sup>16</sup>Quihndé ne, ¿mé nechunyun rë ni? Tángun ni catixtenda ngayun, chjindayun rë Jesús cahntsua xahasen nuju, cojo sa xi cjué jyé nuju.” Cuatjin cachja Ananías cojo ná.

### *Cachja Pablo hacutjin camá xi quiji cachja me cjuá rë Nina cojo xutaxín*

<sup>17</sup>Hane xi cavatju vëhé ne, cavúya nga Jerusalén. Hane ngu ndiya hya xi tejñaya yungun xi matitjun tisahme oración naha ne, sacuaaha xi camá ná xi cachja ngu chini cojo ná. <sup>18</sup>Cahvé Nina, hane cachja me cojo ná cuitjin: “Xati nihñi tacuin ne, tetjixin tséhé Jerusalén ta, tséhé xi xuta nguehe ne, cumacjaain rë me cjuá xi noje tsahan.” Cuatjin cachja Nina. <sup>19</sup>Hane ngahan ne, cuitjin cachjá: “Ngayun Nina naha, xuta nguehe ne, vëé me xi ngahan ne, catsujyéhëya yungun jingujyë ni, cafahá xuta xi tjengui me ndiya nuju, cavajá rë me, hacuaha cavinchá me ndavaya. <sup>20</sup>Hane hora xi titsiquehen xuta Esteban, me xi cachja cjuá nuju ne, hacuaha cojo ngahan sécun jan, tichuya ná, hacuaha hisca ngahan tisahme cuidadu tsjian rë cha xi titsiquehen rë Esteban jan.” Cuatjin cachjá. <sup>21</sup>Sehe ngajan xi Nina ne, cuitjin cachja me cojo ná: “Tihin ta, ngahan tsingátju ri hisca nangui cjin, cuihin cuinoje cojo xutaxín cjuá naha.” Chja Nina cojo ná. —Cuatjin cachja Pablo.

### *Cavitexa capitán xi sehen rë Pablo*

<sup>22</sup>Hisca ngajan ni cacaa rë xutacjín cavisifuju me cjuá xi cachja Pablo, sehe cavetsihin me cajindayataha me cachja me cuitjin:

—¡Nicuhun cha xi cuajyihí vé ta ha quihndé vechiin chuya rë xi cuejña sa cha cjuahñu! —Cuatjin cajindaya me cachja me.

<sup>23</sup>Jinguyëjé rë xi cuatjin jercu tijindayataha xuta, titsiniya me tsjian rë me, hacuaha titsicjin me nihndé scuan ne, <sup>24</sup>capitán jan ne, cavitexa me xi cjue chani rë Pablo cahntsua hiscan hincha sindadu. Hacuaha cavitexa me xi chjahátaha rë Pablo táha sehen rë me, cojo

sa xi sacú cjuaquixi mé má cuatjin jindayataha xuta Pablo. <sup>25</sup> Hane hya xi ha camahñu me xi sehen rë me ne, sehe cachja me cuitjin cojo sindadu xi secun jan:

—¿Há chja ley xi cuma sehen rë ngu xuta Roma jinguyëjë rë xi cjëë cuma cuenda jyë rë me? —Cuatjin cachja me.

<sup>26</sup> Hane xi cahndë sindadu cjuua vëhë ne, quiiji cachja me cojo capitán cuitjin:

—¿Há hyun mé xi nihñu ni? Cha vëhë ne, cha Roma cha. —Cuatjin cachja sindadu jan.

<sup>27</sup> Ngajan xi capitán jan ne, quiijitjengui me Pablo, sehe cachja me cuitjin:

—Tinoje cojo ná ne, ¿há xuta Roma jain ngaye? —Cuatjin cachja me.

Ngajan xi Pablo ne, cuitjin cafayangui me:

—Juun. —Cuatjin cafayangui me.

<sup>28</sup> Ngajan xi capitán jan ne, cuitjin cachja me:

—Ngahan ne, jemu jyë tujún cavechjë xi camá ngahan xuta Roma. —Cuatjin cachja me.

Ngajan xi Pablo ne, cuitjin cachja me:

—Peru ngahan ne, xuta Roma ngahan hisca xi catsin ngahan. —Cuatjin cachja me.

<sup>29</sup> Hya xi camá ne, sindadu xi cjuahataha rë Pablo jan ne, ngutjen quiijixin cha tsëhë Pablo. Hacuaha capitán jan ne, jemu catsacjun me camá xi cuatjin catsihñu me Pablo tsëhë xi camachaya rë me xi Pablo ne, xuta Roma me.

*Cavisehen Pablo xi cuma cuenda jyë rë me xcun me xi matitjun tsëhë xuta tjë rë Israel*

<sup>30</sup> Hane xi camá nchujun jan ne, tsëhë xi meje cumachaya rë capitán jan cjuaquixi mé má cuatjin cavinchajyë xuta tjë rë Israel Pablo ne, cavitexa me quiji casehenndaya Pablo, hacuaha cavitexa me xi cumatangun yëjë nahmi xi matitjun cojo yëjë sa xuta xi matitjun. Hane xi cafehecojo sindadu Pablo jan ne, sehe quijicani capitán me xcun yëjë xuta xi matitjun jan.

## 23

<sup>1</sup> Ngajan xi Pablo ne, xi cavutsejenya me xcun yëjë xuta xi matitjun jan ne, sehe cachja me cuitjin:

—Ngayujun ni ne, nguehe cuichjá cojo nuju ta ngahan ne, hisca ntsacu cavetsihin hisca quihndé ne, hatuxa tyjahi cjuatacun naha xcun Nina. —Cuatjin cachja me.

<sup>2</sup> Hane Ananías, nahmi xi matitjun jan ne, cavitexa me xi xuta xi hinchacun hiscan secun Pablo xi cuajaya me hntsua Pablo. <sup>3</sup> Ngajan xi Pablo ne, cachja me cuitjin:

—¡Nina cuaja nuju me, ngayun xuta ndacha! ¡Nechun ndyá xi chjuhunchuvun ná cojo ley rë Moisés, sehe vitexun xi cuajaya xuta ntsuva, handasa chja ley xi ndajintjin xi cuatjin nihñu! —Cuatjin cachja me.

<sup>4</sup> Hane xuta xi hinchacun hiscan secun Pablo jan ne, cuitjin cachja me:

—Haján, ¿há cuatjin choho noje cojo nahmi xi matitjun xi Nina casuaxa rë? —Cuatjin cachja me.

<sup>5</sup> Sehe ngajan xi Pablo ne, cuitjin cafayangui me:

—Haan, peru ngahan ne, hveen xi me vëhë xi nahmi xi matitjun me ta, ngahan ne, ha hvë xi xcun xujun rë Nina ne, cuitjin camahindu: “Mijí rë xi choho cuinújun cojo me xi matitjun tsujun.” —Cuatjin cachja Pablo cjuua xi camahindu xcun xujun rë Nina.

<sup>6</sup> Hane ha vëë Pablo xi ngujo xuta xi matitjun jan ne, xuta saduceo me, hane ngujo nga me ne, xuta fariseo me. Vëhë xi cachjahñu me xcun junta cuitjin:

—Ngayujun ni ne, nguehe cuichjá cojo nuju ta ngahan ne, xuta fariseo ngahan, hacuaha quihndi rë xuta fariseo. Ngatsë rë xi vetahácacun xi nima ne, cuya cjuahñu ne, vëhë xi tichjahachuva ná. —Cuatjin cachjahñu Pablo.

<sup>7</sup> Hane xi cachja Pablo cuatjin ne, cavetsihin cacjan xuta fariseo cojo xuta saduceo, hane hacuñin tangun camá me cojo cjuatacun rë me. <sup>8</sup> Xuta fariseo ne, chja me ta nima ne, cuya cjuahñu, hacuaha chja sa me xi tjin ángel hacuaha tjin hasen naja. Peru xuta saduceo ne, chja me ta quixin. <sup>9</sup> Hya xi camá ne, cavisatjenhnga ngu suë jyë. Ngajan xi cavetjújñi ngujo cha xi vicuya cjuachacun xi hacuaha fariseo cha ne, cachja cha cuitjin:

—Sacuñin ni hisca ngu jyë rë cha xi cuijyihí vi. ¿Há ngayaan hyan sa xi ngu ángel o sa xi ngu hasen cachja cojo rë cha? —Cuatjin cachja cha.

<sup>10</sup> Hane hya xi suë xi tacun jan camajyë sa ne, jemu catsacjun capitán jan tsëhë xi tsiquehen xuta Pablo. Hane vëhë xi cavitexa me sindadu xi cjuejne, cuaxéxin cha Pablo tsëhë ngajñi rë xuta jan, cjuecojo cha me cahntsua hiscan hincha sindadu.

<sup>11</sup> Hane xi camá nguixun nchujun jan ne, quiijitjengui Nai naja Pablo, cuitjin cachja me cojo rë me:

—Tejñi hñu xahasen rijí ta, tsëhë xi sacuatjin canoje ngatsë naha nguehe Jerusalén ne, hacuaha cuatjin tjin ri xi cuinoje ngajan Roma. —Cuatjin cachja Nai naja.

*Casahmichihin xuta cjuua xi tsiquehen me Pablo*



<sup>12</sup> Hane xi camá nchujun nga jan ne, ngujo xuta tjé rë Israel jan ne, casahmitangun me cjuja xi hacuini siné hacuini cuihi me jinguyéjé rë xi cjéë tsiquehen me Pablo. <sup>13</sup> Quisun sa xi yachan xuta xi cuatjin caviyujucacun me. <sup>14</sup> Hya xi camá ne, quiji me xcun yéjé nahmi xi matitjun cojo xuta changá jan, hane cachja me cojo me cuitjin:

—Ngayin ne, canihñitanguín cjuja xi xinii siín jinguyéjé rë xi cjéë niquihin cha Pablo. <sup>15</sup> Quihndé ne, ngayun cojo sa me xi yahnga xi matitjun ne, tuhun cumachaya rë capitán ne, cataxé me cha Pablo, catinduvacojo me cha xcun junta xi cuma, sacuaaha xi meje sa nuju cjuaxuixi tséhé jyé rë cha. Hane ngayin ne, ha tjin chjine ngayin xi niquihin cha chaja sa xi cjuehe cha xcun junta. —Cuatjin cachja xuta jan.

<sup>16</sup> Peru cha quihndi rë na tichja Pablo ne, xi camachaya rë cha tséhé cjuandacha jan ne, quiji cha hiscan hinchá sindadu hane casuacuenda cha Pablo tséhé cjuja xi camachaya rë cha. <sup>17</sup> Sehe ngajan xi Pablo ne, cajindaya me ngu cha xi matitjun tséhé sindadu, sehe cachja me cojo cha cuitjin:

—Tángun cojo cha vihi xingueen xcun capitán tséhé xi tjin cjuja xi cuichja cha cojo rë me. —Cuatjin cachja Pablo.

<sup>18</sup> Ngajan xi sindadu jan ne, quijicojo cha cha xicjin Pablo jan xcun capitán, sehe cachja cha cuitjin:

—Cha Pablo xi jiya ndavaya jan ne, cajindaya cha ngahan, sehe cachja cha cojo ná xi cuinduva cojo cha vihi ngehe ta, tséhé xi tjin xu cjuja xi cuichja cha cojo nuju. —Cuatjin cachja cha sindadu jan.

<sup>19</sup> Ngajan xi capitán jan ne, cafaha me tsja cha xicjin Pablo ne, sehe quijixin me cojo cha ngu ladu sehe ngajan cavinenguisse me cha cuitjin:

—¿Mé cjuja xi cuinoje cojo ná? —Cuatjin cavinenguisse me.

<sup>20</sup> Hane cha xicjin Pablo jan ne, cuitjin cachja cha:

—Ngujo xuta tjé rë Israel ne, casahmitangun me cjuja xi cuichja me cojo nuju xi cuanguncujun tsini naha xcun me xi matitjun tséhé me, sacuaaha xi tjin sa cjuja xi meje cjuinenguisse rë me. <sup>21</sup> Peru xicamacjaain nuju cjuja rë me ta, vatju sa yachan xuta xi hinchaya rë me ngajan ndiya, xi casahmichihin me cjuja xi sinii cuiin me jinguyéjé rë xi cjéë tsiquehen me tsini naha. Ndicumaha ni ne, siuya me xi cuinújun xi ndatjin. —Cuatjin cachja cha xicjin Pablo.

<sup>22</sup> Ngajan xi capitán jan ne, cuitjin cachja me cojo rë cha:

—Tjihin ne, tsajin yo xi cuinoje cojo xi catehe camachaya ná cjuja vihi. —Cuatjin cachja me.

### *Quiji chani rë Pablo xcun Félix, me xi matitjun*

<sup>23</sup> Hya xi camá ne, capitán jan ne, cajindaya me jo sindadu rë me, sehe cachja me cojo cha cuitjin:

—Tuhunchjinu jo cientu sindadu cojo jyanchan tē cha xi miji naxin cojo jo cientu sa cha xi vaha lanza ne, cojo sa xi fane ñaja tséhé nguixun ne, cuetju cha, cjue cha hisca nandya Cesarea. <sup>24</sup> Hacuaha tuhunchjinu ngujo naxin xi cuijin Pablo, xi cuangun chanu me xcun Félix, me xi matitjun. —Cuatjin cachja capitán.

<sup>25</sup> Sehe catsihindu me ngu xujun xi chja cuitjin:

<sup>26</sup> “Ngahan, Claudio Lisias ne, tsingátju ngu nina naha tsujun, ngayun Félix, ngayun xi matitjun ngayun sahan. <sup>27</sup> Cha xi cuijyihí vi ne, cafaha xuta Israel cha. Hitsé sa ne, catsiquehen me cha. Hane xi camachaya ná xi cha Roma cha ne, cējé cojo sindadu naha, cavaxétjé cha. <sup>28</sup> Hane tséhé xi meje cumachaya ná mé má cuatjin vinchajyé xuta cha ne, cējécojo cha xcun xutaxa rë yungun cojo xcun xuta changá rë xuta Israel. <sup>29</sup> Hane ngahan ne, camachaya ná ta vinchajyé me cha, tséhé xi faharcuaain cha ley rë suvá me. Peru jyé xi vincha me tséhé cha ne, vechiin chufa rë xi cueya cha o sa cjue cha ndavaya. <sup>30</sup> Hane xi camachaya ná xi casahmichihin xuta cjuja xi tsiquehen me cha ne, ngutjen ni catsingátju cha xcun ngayun, hacuaaha cavitéxa rë xuta xi vinchajyé rë cha cuinduva me ndyá cuichja me cojo nuju mé má cuatjin vinchajyé me cha.” Cuatjin chja xujun jan.

<sup>31</sup> Hya xi camá ne, cafaha sindadu jan Pablo, quijicojo cha me nguixun hya nandya Antipatris, sacuatjin cjuja xi cachja capitán cojo cha. <sup>32</sup> Hane xi camá nchujun jan ne, cavuya sindadu xi fi ntsacu jan ngajan Jerusalén, hane cha xi hinchasun naxin jan ne, quiji sa cha cojo Pablo. <sup>33</sup> Hane xi cafehe cha cojo rë me Cesarea ne, casahmi entregadu cha xujun xi yaha cha, hacuaaha casahmi entregadu cha Pablo tsja me xi matitjun. <sup>34</sup> Hya xi camá ne, xi café cavutaya me xujun jan ne, sehe cavinenguisse me jani distritu rë Pablo. Hane xi camachaya rë me xi Pablo ne, distritu Cilicia distritu rë me ne, <sup>35</sup> cuitjin cachja me:

—Hya xi cjuehe xuta xi vincha me jyé riji ne, hya cuihndé cjuja riji. —Cuatjin cachja me.

Sehe cavitexa me xi setjo Pablo ngajan ngu cahndé tséhé ndihya jyé xi casahmi Herodes, hiscan xi má ndava me xi matitjun.

## 24

*Cavinchajyë xuta tjë rë Israel Pablo*

<sup>1</sup> Hane xi cavatju hñu nixtin jan ne, cafehe nahmi xi matitjun xi hmí rë Ananías ngajan Cesarea, cojo ngujo xuta changá cojo ngu me xi cuichjatje ngatsë rë xuta xi cuacun vë, ngu me xi hmí rë Tértulo. Me xi cuacun vë ne, quiji cavinchajyë me Pablo xcun me xi matitjun.

<sup>2</sup> Hane xi cachjindaya rë Pablo ne, cavetsihin cavinchajyë Tértulo me, cuitjin cachja me:

—Ngatsë nuju ngayun ne, jemu tjin cjuandaja cjuajeya ngajñi niji. Hacuaha tsëhë xi jemu ndaja chjuhuncuendun yëjë ni nandya niji ne, vëhë xi cjui xcun nandya. <sup>3</sup> Jemu tihin camahani nacuechji nuju, ngayun Félix, tsëhë yëjë cjuandaja xi tihñu vë. <sup>4</sup> Cojo sa xi ha quihndë suaan sa nuju cjuandya ne, nihñu favor ne, nihñujun tacún cojo niji ne, tisiñuju hitsë ngujo cjuaxi cuinújin. <sup>5</sup> Cha xi cuijyihí vi ne, jemu cjuaxti camahani cha. Jingujyë ni ngasunhndë ne, titsujyihíya tivunihnga cha si ngajñi niji ngayijin ni xuta tjë rë Israel. Hacuaha cha vihi ngu cha xi matitjun ngajñi rë xuta ladu rë cha Nasaret. <sup>6</sup> Hisca cahntsua yungun xi matitjun meje sahmi cha ngu xcusun xi ndajin tjin xi nihña, vëhë xi cachjihin cha. Ngayin ne, meje chjihinchuvín cha sacuatjin vitexa ley niji, <sup>7</sup> peru cafehe capitán Lisias ne, cafahatahá me cha, hacuaha cavitexa niji me xi ngayin xi vinchin jyë rë cha ne, cuinduvín hisca nguehe xcun ngayun. <sup>8</sup> Hora xi chjuhuntuñun rë cha ne, ngayun suvun ni sacú nuju cjuaquixi tsëhë yëjë ni jyë xi vinchin tsëhë cha. —Cuatjin cavinchajyë Tértulo.

<sup>9</sup> Yëjë xuta tjë rë Israel xi cojo siu jan ne, hacuaha cachja me xi cuatjin jain.

*Casua Pablo cjuaquixi rë me xcun Félix*

<sup>10</sup> Hane hora xi casahmitsja me xi matitjun cojo Pablo xi cuichja me ne, Pablo ne, cuitjin cachja me:

—Ngayun ne, ha hvë xi jemu tsëë chjuhunchuvun xuta nación naha tsëhë jyë rë me. Vëhë xi ngahan ne, cojo yëjë ni cjuasua ne, suá cjuaquixi naha cojo nuju. <sup>11</sup> Sa xi chjinengunsun suvun ne, cuma sacú nuju cjuaquixi ta ngahan ne, sehe tjin rë tejó nixtin xi cëjë Jerusalén xi cjuahárcun Nina. <sup>12</sup> Peru casacuintsjaain ná me xi tivisajmecnen o sa tisuá suë rë cjuatacun rë xuta, sa cahntsua yungun xi matitjun, sa cahntsua tu jarë ni yungun langa, o sa jingujyë ni ngajñi nandya. <sup>13</sup> Hacuaha hisca cumaji tsinguixi me xi cjuaquixi jain tsëhë jyë xi vincha me tsahan quihndë. <sup>14</sup> Peru ngu nga ne, nguehe cuichjá cojo nuju cjuaquixi ta ngahan ne, hatuxa fahárcun jain Nina rë xutachanga naha, sacuatjin fahárcun xuta xi hincha ndyá xi chja me xi cuicun vihi xi ngu ndiya ndacha. Hacuaha macjain ná yëjë ni cjuaxi tsëhë ley rë Moisés cojo yëjë cjuaxi catsihindu profeta. <sup>15</sup> Hacuaha vétahacárcun Nina sacuatjin vétahacacun me xi cuicun vi xi nima ne, cuya cjuahñu, sa tyjahi o sa xi hacuini tyjahi cjuatacun rë. <sup>16</sup> Vëhë xi ngahan ne, yëjë ni hora ne, sahme ngujoyë xi tyjahi cjuatacun naha xi cuma rë Nina cojo xi cuma rë xuta.

<sup>17</sup> Hane xi ha jemu cavatju nixtin ne, cavúya canduvatjènguë xuta naha, yahá tujún xi cuisécoo rë me hacuaha suá cjuatjo xi cjue xcun Nina. <sup>18</sup> Hane xi cuatjin canduva ne, me xi cuicun vi ne, cavëë ná me ngajan yungun xi matitjun, tyjahi ngahan sacuatjin xi ha xcusun niji. Hacuaha hacuini jemu cjin xuta siu me cojo ná hacuaha tsajin ngu suë jyë xi tijima. <sup>19</sup> Peru siu ngujo xuta tjë rë Israel xi canduva me tsëhë distritu Asia. Me xi cuacun vë xi sa tjin mé jyë meje cuincha me tsahan ne, catinduva catincha me jyë naha nguehe xcun ngayun. <sup>20</sup> O sa tsajin ne, suvá me xi cuicun vi catichja me mé cjuatsehen naha casacu rë me, hya xi cavisécun xcun xutaxa rë yungun niji. <sup>21</sup> Ngu tu tu ni cjuaxi cajindáya cachjá hya xi sécun ngajñi rë me ne, cuitjin cachjá: “Ngatsë rë xi macjain ná xi nima ne, cuya cjuahñu ne, vëhë xi tichjahachuva ná quihndë xcun ngayun.” Cuatjin cachjá. —Cjua vëhë xi cachja Pablo xcun Félix, me xi matitjun.

<sup>22</sup> Hya xi camá ne, tsëhë xi ha vëë ndaja Félix cjuaxi tsëhë Ndiya Xatsë ne, xi cueñnavasen me cjuacjintacun vëhë ne, cuitjin cachja me:

—Hya xi cjuhehe Capitán Lisias ne, sehe sahmechehen cjuacjintacun nuju vi. —Cuatjin cachja me. <sup>23</sup> Hane sehe cavitexa me sindadu rë me xi cuetjo cha Pablo, peru sahmi cha cjuandaja ne, hacuini cuitijaya rë cha xuta rë Pablo xi cjue cjuahacuenda rë me.

*Cavisajmi Pablo cojo Félix cojo Drusila*

<sup>24</sup> Hane xi cavatju ngujo nixtin ne, cavuya cafehe Félix, xi quiji me ngu nangui. Cafehe me cojo Drusila, chjuun rë me, ngu chjuun xuta tjë rë Israel. Hya xi camá ne, catsingatju me quiji chjahá rë Pablo, sehe cavisñuju me cjuaxi cachja Pablo tsëhë hacutjin xi cumangutacun cojo Jesucristu. <sup>25</sup> Jingujyë rë xi tichja Pablo tsëhë ngu cjuatacun tyjahi, tsëhë ngu xahasen tyjahi, cojo tsëhë nixtin xi tsichuva Nina xuta tsëhë jyë rë me ne, Félix ne, catsacjun me camá, sehe cachja me cojo Pablo cuitjin:

—Quihndë ne, cuma cjuihin. Hane hya xi cumahya ná ne, sehe squindáya nga ri. —Cuatjin cachja me.

<sup>26</sup> Peru hacuaha tsingatahacacun me sa xi sua Pablo me tujún. Vêhê xi jemu cjín ndiia cajindaya me Pablo, cavisiajmi me cojo.

<sup>27</sup> Xi cavatju jo nu ne, cavetju Félix tsêhê xcun xa rê me, hane cavisehen nga ngu cahndê rê me, ngu me xi hmî rê Porcio Festo. Peru tsêhê xi Félix ne, meje sahmi me cjuandaja cojo xuta tjê rê Israel ne, caseya cuaha Pablo ndavaya.

## 25

### *Cafehya Pablo xi cuma me consina tsja César*

<sup>1</sup> Hya xi camá ne, cafehe Festo xi cjuahaxa me ngajan Cesarea. Hane xi cafê jyan nixtin ne, cavetju me quiji me Jerusalén. <sup>2</sup> Hane xi cafehe Festo ngajan Jerusalén ne, nahmi xi matitjun cojo me xi matitjun tsêhê ngajîi rê xuta tjê rê Israel ne, casua me camachaya rê Festo tsêhê jyê xi vincha me tsêhê Pablo. <sup>3</sup> Hane cafehya me favor xi tsingatju Festo cjue chjahá rê Pablo xi cjue me ngajan Jerusalén. Cuaatjin meje rê me xi cuma ta, tsêhê xi ha cavisiajmichihin me xi tsiquehen me Pablo ngajan ndiia. <sup>4</sup> Ngajan xi Festo ne, cachja me ta Pablo ne, tacunîihi me ngajan Cesarea, hacuaha súvá Festo ne, ha cjue xati me ngajan. <sup>5</sup> Hacuaha cachja sa me cuitjin:

—Catji xutaxa rê yungun nuju cojo ná, hane sa xi tjin mé jyê rê cha ne, ngajan catincha me jyê rê cha cojo ná. —Cuaatjin cachja me.

<sup>6</sup> Hya xi camá ne, cavejña sa Festo ngajan Jerusalén sacuaha jyin o sa tê nixtin, sehe cafe me Cesarea. Hane camá nchujun tsêhê nixtin xi cafehe me jan ne, quiji me cavéjña me xcun xa rê me, sehe cavitexa me cjue chjahá rê Pablo. <sup>7</sup> Hane xi cafehe Pablo ne, quiji caxinchacunndee xuta tjê rê Israel xi canduva tsêhê Jerusalén jan tjeheh rê me, hane jemu cjín xcusun jyê rê Pablo xi cavincha me, peru hisca camaji catsinguixi me xi cjuaquixi jain. <sup>8</sup> Hane Pablo ne, xi casua me cjuaquixi rê me ne, cuitjin cachja me:

—Tsajin camahani mé jyê xi casahme, hacuuiin condra rê ley niji ngayin xuta tjê rê Israel ne, hacuuiin condra rê yungun xi matitjun tsijin ne, hacuuiin condra rê César, me xi matitjun tsajan. —Cuaatjin cachja Pablo.

<sup>9</sup> Hane xi meje sahmi Festo cjuandaja cojo xuta tjê rê Israel ne, cuitjin cafnenguise me Pablo:

—¿Há meje cuihin Jerusalén, cojo sa xi ngajan tsichúva ri cojo jyê riji vi? —Cuaatjin cafnenguise me.

<sup>10</sup> Ngajan xi Pablo ne, cuitjin cafayangui me:

—Ha ndihyavasen rê César, me xi matitjun camahani, sécun, hane ha nguehe xi meje rê xi chjahachuva ná cojo jyê naha. Xuta tjê rê Israel ne, tsajin camahani mé xi choho sahme cojo rê me. Ngayun ne, ha ndaja hyun. <sup>11</sup> Sa xi tsejen ta casahme ngu xcusun xi vechú chuva rê xi cueya ne, tsingatehen xi cueya. Peru sa xi tsajin cjuaquixi tsêhê hisca ngu jyê xi vincha me tsahan ne, tsajin yo xi cuma sahmi ná entregadu tsja xuta xi cuacun vê. Ngahan ne, féhya nuju xi nihñu ná consina tsja César, me xi matitjun camahani. —Cuaatjin cafayangui me.

<sup>12</sup> Ngajan xi Festo ne, xi cavisiajmicjín me cojo yêjê me xi visecoo rê me ne, sehe cachja me cuitjin cojo Pablo:

—Cachjahye xi sahme ri consina tsja César ne, tsja César tsingátju ri. —Cuaatjin cachja Festo.

### *Cavisehen Pablo xcun Agripa*

<sup>13</sup> Hane xi cavatju ngujo nixtin jan ne, ngu me xi matitjun tsêhê jingu sa distritu, me xi hmî Agripa ne, cafehe me Cesarea cojo Berenice na xicjin me, xi sua me ngu nina Festo. <sup>14</sup> Hane tsêhê xi caviyuju me ngujo nixtin jan ne, cachja Festo cojo rê me tsêhê cjuacjintacun xi tacun tsja me tsêhê Pablo. Cuitjin cachja me:

—Nguehe ne, tacunîihi ngu cha xi cavejñavasen Félix cjuacjintacun rê. <sup>15</sup> Hya xi cêjê Jerusalén ne, nahmi xi matitjun cojo xuta changá tsêhê xuta tjê rê Israel ne, casua me camachaya ná tsêhê cha vêhê, hacuaha cafehya me xi cuichjá xi cuma cha castigu. <sup>16</sup> Peru ngahan ne, cachjá cojo rê me ta ngayin xuta Roma ne, tsajin niji xcusun xi nihñi castigu ngu xuta xi hincha jyê rê me jinguyêjê rê me cuisehen me xcun cojo xcun cojo me xi vincha jyê rê me, hacuaha sacú rê me cahndê xi sua me cjuaquixi rê me tsêhê jyê xi hincha tsêhê me. <sup>17</sup> Hane hya xi cafehe yêjê xuta xi cuacun vê nguehe ne, catsichajan hora ta xi tu camá nchujun jan ne, cêjê ndihyavasen ne, catsingatju quiji chjahá rê cha. <sup>18</sup> Hane xi caxinchacun xuta xi cuacun jan cachja me ne, hisca ngu jyê jyê sacuatjin tsingátaha cáacun ne, cavinchaain me tsêhê cha ta, <sup>19</sup> súvá ní cjuá tsêhê xcusun rê yungun rê me xi casahmichiin xu cha, cojo cjuá tsêhê ngu nima xi hmî rê Jesús, xi chja cha ta tacun quicun. <sup>20</sup> Peru ngahan ne, casacuiniin ná hacutjin sacú ná cjuaquixi tsêhê cjuacjintacun vêhê ne, cafnenguêsê rê cha sa xi meje cjue cha Jerusalén hane ngajan chjahachuva rê cha tsêhê

cjuacjintacun xi yaha rë cha. <sup>21</sup> Peru tsëhë xi cafehya cha xi seyañihi sa cha hisca xi suvá me xi matitjun camahani tsichuva me cjuacjintacun rë cha ne, cavitéxa xi quiji caseyañihi sa cha hisca hya xi cuma tsingátju cha tsja me. —Cuatjin cachja Festo.

<sup>22</sup> Ngajan xi Agripa ne, cuitjin cachja me cojo Festo:

—Ngahan ne, hacuaha catsingátahacácun xi cuisniñujú cjuarë cha xi cuajyihí vë. —Cuatjin cachja me.

Hane Festo ne, cuitjin cafayangui me:

—Sa cuatjin ne, nchujun ni cuisniñuju cjuarë cha. —Cuatjin cafayangui me.

<sup>23</sup> Hane xi camá nchujun jan ne, ngu cjuandya jyë tjin xi cafehe Agripa cojo Berenice. Hane quiji cavisehtangun me ndihyavasen cojo yëjë capitán cojo yëjë xuta xi matitjun tsëhë nandya jan. Sehe cavitexa Festo quiji chjahá rë Pablo. <sup>24</sup> Hane xi cafehe Pablo ne, sehe cachja Festo cuitjin:

—Ngayun Agripa, cojo ngayujun ni xi tjin tangun ngayaan nguehe ne, nguehe tacun cha vihi xi yëjë xuta tjë rë Israel ne, cavinchajyë me cha cojo ná ngajan Jerusalén, hacuaha cavinchajyë me cha hisca nguehe. Jindaya me chja me ta ha quihndë mijí rë xi cuejña sa cha cjuahñu. <sup>25</sup> Peru ngahan ne, casacuiin ná hisca ngu xcusun xi casahmi cha xi vechú chuva rë xi cueya cha. Hane xi cafehya suvá cha xi cuma cha consina tsja me xi matitjun camahani ne, covejña cáacun xi tsingátju cha. <sup>26</sup> Peru tsajin ngu cjuarë xi cuma tsihindu rë nai naha, ¿há vihi ne, há vëhë casahmi cha? Vëhë xi cavitéxa xi cuisehen cha xcun ngayun, Agripa, cojo sa xi cjuë chjahantahan rë cha ne, sacú ná cjuarë xi tsihindu. <sup>27</sup> Xi má ná ne, tsajin ná cjuatacun sa xi tsingátju ngu presu hacuaha cuichjaan mé jyë xi caxincha tsëhë. —Cuatjin cachja Festo.

## 26

### *Casua Pablo cjuaquixi rë me xcun Agripa*

<sup>1</sup> Hya xi camá ne, cuitjin cachja Agripa cojo Pablo:

—Quihndë ne, tjin cahndë xi cuinoje ngatsë riji. —Cuatjin cachja me.

Ngajan xi Pablo ne, catsiquijin me tsja me, sehe casua me cjuaquixi rë me cuitjin:

<sup>2</sup> —Agripa, ngayun xi matitjun ngayun ne, jemu ndaja tsahan xi xcun ngayun suá cjuaquixi naha quihndë tsëhë yëjë jyë xi vincha xuta tjë rë Israel tsahan. <sup>3</sup> Jemu ndaja tsahan ta, tsëhë xi ngayun ne, ha hyun yëjë xcusun naja cojo cjuacjintacun naja ngayaan xuta tjë rë Israel. Vëhë xi nihñu cjuandaja ne, nihñu jyë tacún xi cuisniñuju ngujo cjuarë naha.

### *Xcusun changá rë Pablo*

<sup>4</sup> Quihndë ne, yëjë xuta tjë rë Israel ne, vëë me hacutjin xcusun naha hisca cjuarë lihndi naha, hya xi caviteljña nangui naha cojo hya xi caviteljña Jerusalén. <sup>5</sup> Hacuaha, sa xi meje cuichja me cojo nuju ne, cuma cuichja me ta ha vëë me xi ngahan ne, hatuxa xuta fariseo ngahan, xuta xi chinchihin tjengui me ndiya rë Nina naja. <sup>6</sup> Quihndë ne, nguehe sécun tichjaháchuva ná cojo cjuatacun naha ngatsë rë xi vétahacácun cjuarë xi cachja Nina cojo xutachanga naja. <sup>7</sup> Ngayen ni xi tjë rë tejó xutachanga naja ne, vetahantacun xi cuechuntahan cjuarë vëhë. Vëhë xi cojo yëjë ni xahasen naja ne, chjahanrcun Nina nixtin nixten. Hane tsëhë xi vetahacácun cjuarë vëhë ne, vëhë xi vinchajyë ná xuta tjë rë Israel. <sup>8</sup> Ngayujun ni ne, ¿mé má macjaain nuju xi Nina ne, tsiucya me nima cjuahñu?

### *Pablo ne, catsujyihya tjengui me cojo cjuahngatacun xuta ladu rë Nina*

<sup>9</sup> Titjun ne, ngahan ne, catsingátahacácun xi jemu cjín xcusun meje rë xi sahme condra tsëhë Jesús, xuta Nasaret. <sup>10</sup> Hane cuatjin casahme ngajan Jerusalén. Ngahan ne, jemu cjín xuta ladu rë Nina cavinchá me ndavaya ta, tsëhë xi nahmi xi matitjun casuuxa ná me xi cuatjin casahme. Hane hya xi cavitexa xutaxa rë xi cueya xuta ladu rë Nina xi cuacun jan ne, cojo ngahan cachjá xi ndatjin. <sup>11</sup> Jemu cjín ndiya cëjë yëjë yungun naja, cavitéxa xi cuma xuta castigu, hacuaha jemu casahme ngahñu xi choho cuichja me tsëhë Jesús. Tjemu camacjan ná cojo rë me, hacuaha catsujyëhéya tjënguë me cojo cjuahngatacun hisca cojo jingu sa nandya rë xutaxin.

### *Cachja nga Pablo hacutjin camá xi cavisehen me ladu rë Jesús*

<sup>12</sup> Ngayun Agripa, ngu nixtin jan ne, tifé Damasco xi sahme cjuahngatacun jan, yahá xa xi ha casua ná nahmi xi matitjun. <sup>13</sup> Hane ndiya jan ne, sacuaaha chuva rë nchisen ne, cahvé ngu ndihi xi canduva ngahnga, xi hitsë sa hñu ndavá rë xi cuma rë ndavá rë tsihi, xi cavaja rë hasen rë jingundee ni hiscan tifé cojo me xi tifé cojo. <sup>14</sup> Hane xi ha caticjin ngayijin ni ne, ngahan ne, cahndë ngu cjuarë xi cachja cojo ná hne hebreo, cuitjin cachja: “Saulo, Saulo, ¿mé má cuatjin nujyihye tjengui ná cojo cjuahngatacun? Sacuahatjin tjin rë chu ndyaja tjin ri, ta chu vë ne, tsun chu nahñu quicha nahya ne, vanguihmu suva chu yojo ru hya xi vëhë hñu chu yojo ru xi vihndiin chu. Hane cuanitjin ni tjin ri, ye.” Cuatjin cachja cjuarë jan.

<sup>15</sup> Ngajan xi ngahan ne, cuitjin cavinenguësë: “¿Yo ngayun, Tatá?” Cuaatjin cavinenguësë. Hane Nai naja ne, cuitjin cafayangui me: “Ngahan ne, Jesús ngahan, xi nujiyiye tjengui ná cojo cjuahngatacun. <sup>16</sup> Tisatjinhngue, tisechin ta, tséhë xi canduvá tjënguë ri cojo sa xi suáxa ri xi cuiscuee ná hacuaha cuinoje cojo xuta xi cuitjin cahye ná, hacuaha cuinoje cojo xuta hacutjin camá hya xi ha canduvá tjënguë nga ri ngujo ndiya. <sup>17</sup> Ngahan cuáxëtjê ri tséhë xuta tjê rê Israel. Hacuaha cuáxëtjê ri tséhë xutaxín. Tsingátju ri ngajñi rê xuta xi cuacun vë, <sup>18</sup> cojo sa xi choxehe cjuatacun rê me, sehe cuetjuxin me tséhë cjuatsehen, hane cuisehen me ndiya rê cjuandaja, cuetjuxin me tséhë ladu rê Satanás hane cuisehen me ladu rê Nina. Choxehe cjuatacun rê me, sehe sacú rê me cjuaninchataha tséhë jyê rê me, hacuaha cuisehen me ladu rê xuta xi ha camá tséhë Nina me ngatsë rê xi camangucacun me cojo ná.” Cuaatjin cafayangui Nai naja.

*Cachja Pablo tséhë xa xi sahmi me*

<sup>19</sup> Ngayun Agripa, ngahan ne, hatuxa cahndë tséhë cjuá xi cachja Jesús hya xi candu- vatjengui ná me xi canduva me tséhë ngahnga. <sup>20</sup> Tjun tjun ne, cachjá cojo xuta ngajan Damasco, sehe cachjá cojo xuta ngajan Jerusalén cojo jinguyjê ni nación Israel, hisca cojo xutaxín. Cachjá cojo rê me xi tsindeya me cjuatacun rê me hacuaha cuisehen me ladu rê Nina. Hacuaha cachjá cojo rê me xi catisahmi me cjuandaja xi tsingacun xi catsindeya jain me cjuatacun rê me. <sup>21</sup> Ngatsë rê vëhë xi cafaha ná xuta tjê rê Israel ngajan yungun xi matitjun hisca casahmi me cjuandaja xi tsiquehen ná me. <sup>22</sup> Peru Nina ne, visecoo ná me, vëhë xi tiféxcun hisca quihndë, tichjá cojo xuta sa quihndi sa changá me. Tichjá súvá cjuá xi cachja profeta cojo cjuá xi cachja Moisés tséhë yêjê xcusun xi sehe cuetjucaa. <sup>23</sup> Cachja me xi cuacun vë xi Cristu ne, Me xi Tsingatju Nina ne, tjin rê me xi cueya me, hacuaha tjin rê me xi tjun tjun me cuya me cjuahñu, sehe sua me cumachaya rê xuta tjê rê Israel cojo xutaxín tséhë xi cuaxëtje Nina xuta xi cuacun vë. —Cuaatjin cachja Pablo.

*Pablo ne, meje rê me xi cjuijnecacun Agripa ne, cumacjain rê me xi cavuya cjuahñu rê Jesús*

<sup>24</sup> Hane xi cuaatjin cachja Pablo xi vaxëtje me yojo rê me ne, cavisehenjñi Festo cojo cjuá rê me, cachjahñu me cuitjin:

—¡Sca ri, Pablo! ¡Tséhë xi jercu chutaye ne, vëhë sahmi sca rê cjuatacun rijji! —Cuaatjin cachja Festo.

<sup>25</sup> Ngajan xi Pablo ne, cuitjin cafayangui me:

—Hacuiin sca ná, ngayun Festo. Ngahan ne, tichjá cjuá xi cjuaquixi. <sup>26</sup> Agripa, me xi matitjun vë ne, hacuaha ndaja vëe me cjuá vihi. Vëhë xi tsacjuun xi chjá cojo rê me. Xi má ná ne, tsajin ngu cjuá xi cuicun vi xi hvín me ta, tséhë xi xcusun vihi ne, hacuiin ngu cahnhcun camá. <sup>27</sup> Ngayun Agripa, ¿há macjain nuju cjuá xi catsihindu profeta? Ha hvë ta macjain nuju. —Cuaatjin cafayangui Pablo.

<sup>28</sup> Ngajan xi Agripa ne, cuitjin cachja me cojo Pablo:

—Cojo hitsë cjuá xi canoje vë ne, meje ri xi cuísehen ladu rê Cristu. —Cuaatjin cachja me.

<sup>29</sup> Hane Pablo ne, cuitjin cafayangui me:

—Nina meje rê me xi há hitsë o há cjin cjuá xi cuichjá ne, hacuiin suvun ni ta cojo yêjê me xi tivisiñuju cjuá xi tichjá quihndë ne, cuma me sacuaha ngahan, peru hacuiin cojo cadena vihi. —Cuaatjin cafayangui me.

<sup>30</sup> Hya xi camá ne, cavisatjenhnga Agripa, me xi matitjun, cojo Festo, hacuaha cojo sa Berenice cojo yêjê me xi caviyujutangun me cojo, cavisatjenhnga me. <sup>31</sup> Sehe quijixin me, cachja me cojo xingu xingu me cuitjin:

—Cha xi cuajyihí vë ne, tsajin mé sahmi cha xi vechú chuva rê xi cueya cha o sa xi cjué cha ndavaya. —Cuaatjin cachja me.

<sup>32</sup> Sehe ngajan xi Agripa ne, cachja me cojo Festo cuitjin:

—Cha xi cuajyihí vë ne, sá tsajin xi cafehya cha xi cuma cha consina xcun me xi matitjun camahani ne, cuma nismi rê cha. —Cuaatjin cachja me.

## 27

*Cavetju Pablo xi cjué me Roma*

<sup>1</sup> Hane hya xi cavechú nixtin xi cavejñacacun me xi matitjun jan xi cuanguin ngajan Italia ne, Pablo cojo yahnga sa presu jan ne, camá me entregadu tsja ngu capitán xi hmí rê Julio, capitán tséhë sindadu rê me xi matitjun camahani. <sup>2</sup> Hane xi cavisihín ngu barcu xi cavetju tséhë nandya Andramitio xi cjué jingunduju ni ndaya tséhë distritu Asia ne, sehe quiji barcu cojo niji. Hacuaha quiji cha Aristarco cojo niji, ngu cha Tesalónica tséhë distritu Macedonia. <sup>3</sup> Hane xi camá nhujun jan ne, cafehe barcu cojo niji nandya Sidón. Hane Julio ne, casahmi me cjuandaja cojo Pablo, casua me cahndë xi cjué Pablo ndava amigu rê me xi cjuahacuenda amigu jan xcusun xi ma chaja rê Pablo. <sup>4</sup> Hane xi quiji barcu cojo niji tséhë ngajan ne, cavatjin jingunduju ni taha ngaxtun Chipre, ngu rquí nangu xi vetjucaa xcun

ndachacun, tsêhê xi tjo ne, casuaain cahndê xi ngu quixi ni cjue barcu cojo ni. <sup>5</sup> Hane xi cavatjin xcun ndachacun quixi rê distritu Cílicia cojo distritu Panfilia ne, caphin nandya Mira, ngajan distritu Licía. <sup>6</sup> Hane ngajan casacu rê capitán ngu barcu tsêhê Alejandría xi cjue Italia. Sehe catsinguissehen ni me barcu vêhê.

<sup>7</sup> Hane xi catsanguin tafi tafi ngujo nixtin sa ne, cojo jemu jyê cjuandya ne, caphin quixi rê nandya Gnidó. Hane tsêhê xi casuaain tjo cahndê xi ngu quixi ni quiji barcu cojo ni ne, cavatjin taha ngaxtun Creta, quixi rê Salmón. <sup>8</sup> Handasa jemu chja cavatjin camá, peru quiji barcu cojo ni tafi tafi hisca xi caphin ngu cahndê xi hmí rê Cahndê Ndajiyi, tiña nandya Lasea.

<sup>9</sup> Jemu tivatju nixtin, hacuaha jemu tsavi xi cjue barcu xcun nandá, tsêhê xi camatiña chan hnchan. Vêhê xi Pablo ne, cachja me cojo xuta jan cuitjin:

<sup>10</sup> —Ngayujun ni ne, nguehe cuichjá cojo nuju ta vutsején ne, xi tivanguen vi ne, jemu tsavi, jemu jyê nichajan tsêhê chaha cojo tsêhê barcu, hacuaha hisca tjin yahnga ngayaan xi chajá yaan. —Cuatjin cachja me.

<sup>11</sup> Peru capitán jan ne, hitsé sa casahmicuenda me cjua xi cachja cha xi cjuicojo barcu jan xi cuma rê cjua xi cachja Pablo. <sup>12</sup> Hane tsêhê xi cahndê xi tacun barcu jan ne, machjiriin xi ngajan cuejña barcu nixtin rê chan hnchan, vêhê xi hitsé sa cjin xuta xi cachja me xi cuetjuxin ni barcu cojo rê me tsêhê ngajan tuxa ma sa xi cuma cuechú me hisca Fenice, ngu nandya ngajan Creta, xi ndatjin cahndê tacun, hane ngajan cuma cuiyuju me yêjê nixtin rê chan hnchan.

*Tjo hñu xi cavanga ngajan xcun ndachacun*

<sup>13</sup> Hya xi camá ne, cavetsihin cavanga ngu tjo jeya jeya ni xi canduva táha ladu xi ndatjin. Sehe ngajan xi xi má rê me ne, cuma sahmi me sacuatjin xi ha catsingatahacacun me. Vêhê xi cavetju me quiji me, ndaya ndaya rê Creta. <sup>14</sup> Peru sehe tu hitsé cjui barcu jan ne, canduva ngu tjo hñu ladu xi choho tjin, <sup>15</sup> catsivaha rê barcu. Hane tsêhê xi maji fi barcu taha hiscan nduva tjo ne, catihin cahndê quiji barcu hacutjin xi cjui tjo. <sup>16</sup> Hane xi cavatjin taha ngaxtun ngu rquí lihndi nangui quixi xi hmí rê Clauda hiscan xi yin cjuachan vanga tjo ne, cojo chja ne, peru camá cachjihin barcu lihndi xi tjengui jan, <sup>17</sup> sehe cachjivinniji caveyín cahntsua barcu jyê. Sehe ngajan xi cha xi cjuicojo barcu jan ne, camá catsihñuhñu cha barcu jyê. Hane tsêhê xi tsacjun me xi cjuicojo tjo jan barcu ngu cahndê chojyíhi hiscan xi jemu tsavi xi cjue barcu ne, catsitujne me tsjan xi faha rê tjo, casua me cahndê quiji barcu hacutjin cjui tjo. <sup>18</sup> Peru tsêhê xi quijinduju sa cavanga tjo hñu jan ne, xi camá nchujun jan ne, cavetsihin cacandiya me chaha xi hincha barcu jan ngajñi ndachacun. <sup>19</sup> Hane xi camá nguini, cojo tsja ni me, cafaha me yêjê ni xcusun xi tsêhê barcu jan, cavetsihin cacandiya me ngajñi ndachacun. <sup>20</sup> Hane xi ha jemu cjin nixtin xi cahyiin tsuhi cahyiin niñu hacuaha tjo jan ne, cjuinduju sa tivanga jercu tu hñu camahani ne, ngajan café cjuetacun xi cuetjintjin.

<sup>21</sup> Hane tsêhê xi ha jemu cjin nixtin xi cjêé siné xuta jan niñu ne, cavetjujñi Pablo ngajñi rê me, cachja me cuitjin:

—Ngayujun ni ne, nguehe cuichjá cojo nuju ta hitsé sa ndatjin sa xi cavetuhun rcun cjua xi cachjá cojo nuju hane cavetjuun ni tsêhê Creta. Tsajin mé cjuañihi xi cuitjin cuatjun cuma hacuaha tsajin mé xi cuitjin nichajan. <sup>22</sup> Quihndê ne, tuhun cjuetacun xahasen nuju ta hisca xi ngu ngayun ne, chajin ngayun. Xi chajá ne, barcu. <sup>23</sup> Hvê xi cuatjin cuma ta, nguchjin ne, cafehe ngu ángel rê Nina xi Nai naha hacuaha xi fahárcun. <sup>24</sup> Hane cachja cojo ná cuitjin: “Xi carcuin Pablo. Hatuxa tjin ri xi cuechi xcun César, me xi matitjun camahani. Hacuaha Nina ne, sahmi me cjuandaja cojo ri xi cuetjutje yêjê xuta xi cjui cojo ri.” Cuatjin cachja ángel cojo ná. <sup>25</sup> Vêhê xi tuhun cjuetacun xahasen nuju ngayujun ni ta, tsêhê xi ngahan ne, mangucácn cojo Nina, hane hatuxa cuatjin cuma sacuatjin cachja ángel cojo ná. <sup>26</sup> Peru tjin rê xi scandi naja tjo jan xcun ngu rquí nangui quixi. —Cuatjin cachja Pablo.

<sup>27</sup> Xi cavatju teñuju nguixun xi cuatjin cjuí nguehe cjuí ngajan tjo cojo barcu xi nechinyin xcun ndachacun xi hmí rê Adriático ne, sacuaaha chava rê vasen nixten ne, catsingatahacacun cha xi cjuicojo barcu jan xi ha jima tiña barcu tsêhê nangui quixí. <sup>28</sup> Hane catsichuva cha hacutjin nungun nandá hiscan quisun barcu, hane casacuse rê cha xi can tjuhun ngu metru nungun nandá jan. Hane xi quiji sa barcu hitsé ni nguvan ne, catsichuva nga cha nandá, hane can yatu metru nungun nandá jan. <sup>29</sup> Hane tsêhê xi tsacjun cha xi satécoo barcu jan cojo ngu naxi ne, cacandiya cha ñuju quicha hai xi machjirêhê xi cuiyujuhñu barcu ngajñi nandá xi tsuvahñu rê, hacuaha jercu cafehya rê cha Nina xi sahasen sanií. <sup>30</sup> Hya xi camá ne, yahnga cha xi cjuicojo barcu jan ne, meje cuetjuxin cha tsêhê barcu xi cuetjutje cha. Vêhê xi catsitujne cha barcu lihndi jan xcun ndachacun, sacuaaha xi meje scandiya sa cha quicha ngajñi nandá taha xcun barcu. <sup>31</sup> Sehe ngajan xi Pablo ne, cachja me cojo capitán cojo sindadu xi yahnga jan cuitjin:

—Sa xi cuiyijin cha xi cuacun vē cahntsua barcu jyē ne, ngayun ne, cumaji cuetjuntjun. —Cuatjin cachja me.

<sup>32</sup> Ngajan xi sindadu jan ne, cavatē cha nahñu xi yaha rē barcu lihndi jan, sehe catsismi cha.

<sup>33</sup> Hya xi ha tiña sahasen ne, cachja Pablo cojo yējē xuta jan xi sinē me niñu, cuitjin cachja me:

—Ha quihndē teñuju nixtin xi nechunyun rē mé xi cuatjuun cuma hacuaha hisca hitsē niñu cjēē xinu. <sup>34</sup> Vēhē xi tichjá cojo nuju ta, xinu niñu. Xi cuatjin ne, scaa nuju cuetjuntjun ta hisca ngu ngayun ne, chajin hisca ngu tsjarcun. —Cuatjin cachja Pablo.

<sup>35</sup> Hane xi cafē cachja me cuatjin ne, cafaha me niñu ne, sehe casua me nacuechji rē Nina xcun yējē ni xuta jan. Hane xi cavatēcja me niñu jan ne, sehe cavetsihin cajinē me. <sup>36</sup> Hya xi camá ne, yējē ni xuta jan ne, casacu rē me cjuetacun, hane hacuaha cojo me cajinē me niñu.

<sup>37</sup> Ngayijin ni xi nechinyin barcu jan ne, jo cientu cojo jyanchan tyjuhun ngu má ngayin.

<sup>38</sup> Hane hya xi ha ndaja camá rē xahasen rē me xi cajinē me niñu jan ne, cacandiya me trigu jan ngajñi ndachacun xi cuma nguinja sa barcu.

#### *Cavetsun barcu casahmi tjo*

<sup>39</sup> Hane xi casahasen ne, cavēē me ngu cahndē hiscan xi hvín me jani jan. Peru hacuaha cavēē me ngu cahncun xi jemu jyē tsumi jiña tjeheh rē. Hane caviyujucacun me xi sahmí me cjuandya xi barcu ne, ngajan cuechú. <sup>40</sup> Hya xi camá ne, cavatē me nahñu xi yaha rē quicha hai jan, sehe caxincha ni ngajan ngajñi nandá. Hacuaha cavēhēndaya me ya xi veyaquixi rē barcu hacutjin cjue. Hane xi catsiquijin me tsjian xi faha rē tjo jan ne, sehe cavetsihin quiji barcu jan quixi rē tsumi jan. <sup>41</sup> Peru xi cafehe barcu ngu cahndē hiscan tacun ngu naxi ngahma nandá ne, ngajan casatē. Hane taha xcun barcu jan ne, ngajan casetahahñu, ha quihndē camaji quiji. Peru taha ngaxtun barcu jan ne, jercu tivetsun tsēhē tsindyu rē nandá xi vaja rē.

<sup>42</sup> Hane sindadu jan ne, catsingatahacacun cha xi tsiquehen cha presu, sá tu cuatē presu jan nandá ne, cuanga. <sup>43</sup> Peru capitán jan ne, tsēhē xi meje cuaxētje me Pablo ne, casuaain me cahndē xi sahmí sindadu jan hacutjin xi meje rē cha. Hya xi camá ne, cavitexa me yējē ni xuta xi ma vatē nandá ne, tjun tjun me caticandiya me yojo rē me ngajñi nandá, catji me quixi rē tsumi jan. <sup>44</sup> Hane me xi yahnga xi maji vatē nandá jan ne, catjaha me ngu rqui yatē o sa ngu ya tsēhē barcu jan. Cuatjin camá xi ngayijin ni ne, cafhin nangui quixí, hacuaha cavetjintjin.

## 28

#### *Cafehe Pablo ngajan Malta*

<sup>1</sup> Hane xi ha cavatju cavetjintjin ne, sehe casacu camachaya niñi xi ngu rqui nangui xi vetjucaa xcun ndachacun jan ne, Malta hmí rē. <sup>2</sup> Hane xuta xi nangui rē jan ne, hacuiin hitsē cjuandaja casahmi me cojo niñi. Cavejña me ngu ndava ndihi jyē ne, sehe cajindaya niñi me ngayijin ni, tsēhē xi hacuaha cavetsihin cavaha tsi hane jemu hnchan. <sup>3</sup> Hane xi cafaha Pablo ngu tyjá chaquin quiji caviyujusun me xcun ndihi jan ne, tsēhē suē rē ndihi jan ne, vanga ngu yē cavetju chu ngajñi rē chaquin xi caviyujusun me jan, hane cafaha chu tsja me, hane catsismii chu ngutjen. <sup>4</sup> Hane xi cavēē xuta xi nangui rē jan xi tyjanguitaha cuaha yē jan tsja Pablo ne, sehe cachja me cojo xicjin me cuitjin:

—Ngu cha tsiquehen jain rē cha ví, vēhē xi handasa cavetjutje cha tsēhē ndachacun ne, peru nina ne, suaain me cahndē xi cuejña sa cha cjuahñu. —Cuatjin cachja xuta jan.

<sup>5</sup> Hane xi cavitsune Pablo tsja me ne, jñā me xi hmu rē me tsēhē chíhin suē cojo chíhin jni. Tsajin mé camá rē me xi cafaha chu me. <sup>6</sup> Xuta jan ne, xi má rē me ne, cuijin squee Pablo o sa xi tu ñahñu ne, cueya me. Peru xi ha jemu jyē hora vutsejen xuta jan xi tsajin mé má rē Pablo ne, catsindeya me cjuā rē me, hane sehe cavetsihin cachja me xi Pablo ne, ngu nina me.

<sup>7</sup> Hane tiña tsēhē cahndē jan ne, siutahá nangui rē me xi matitjun tsēhē nangui xi vetjucaa xcun ndachacun jan, me xi hmí rē Publio. Me vēhē cafahatsja niñi me, hacuaha casahmi me cjuandaja xi casua niñi me cahndē ndava me xi cavinechin jan jyan nixtin. <sup>8</sup> Hya xi camá ne, nahmi rē Publio jan ne, jiña me xi hmu rē me tsēhē chíhin suē cojo chíhin jni. Hane Pablo ne, quiji vutsejen me me, hane cafehya rē me Nina ngatsē rē xuta hmu rē jan. Hane xi cavisanetsja Pablo me ne, camandaja me. <sup>9</sup> Xi cavatju vēhē ne, hacuaha canduva tjengui yējē sa xuta hmu rē tsēhē nangui vēhē Pablo ne, camandaja me. <sup>10</sup> Xuta jan ne, jemu casahmi me cjuandaja cojo niñi, hane xi cavetjin catsanguin nga cojo barcu ne, casua me hacutjin xcusun xi machaja niñi.

#### *Cafehe Pablo ngajan Roma*

<sup>11</sup> Xi cavatju jyan sá ne, cavetjin catsanguin cojo ngu barcu xi cavéjña jan yějé nixtin tséhé chan hnchan. Barcu jan ne, nandya Alejandría canduva, hacuaha Nina Lihma hmí rē. <sup>12</sup> Hane xi catsanguin sa hitsē ne, cafhin nandya Siracusa, hane ngajan cuinechin jyan nixtin. <sup>13</sup> Hane xi cavetjin ngajan ne, quiji nduju sa barcu cojo niji ne, cafhin nandya Regio. Hane xi cafē ngu nixtin xi nechintihin jan ne, cavetsihin cavanga ngu tjo xi ndatjin cjuí, sehe quiji nga barcu cojo niji, hane xi camá nchujun ne, cafhin nandya Puteoli. <sup>14</sup> Hane xi cafhin jan ne, cavechintihin ngujo xuta ladu rē Jesús, hane cachja me xi cuinechintihin ngu totje cojo rē me jan. Hane ha cuatjin chuva véhé ne, cavetjin Cesarea hane cafhin hisca Roma. <sup>15</sup> Hane xuta ladu rē Jesús xi siu ngajan Roma ne, xi camachaya rē me xi ha jima tiña ngayin ne, canduvatjengui niji me ndiya. Ngujo me ne, cafehe me hisca hiscan hmí rē Ndetsin Apio. Hane ngujo nga me ne, cafehe me hiscan hmí rē Jyan Cantina. Hane xi cavéë Pablo xuta jan ne, casua me nacuechji rē Nina, hacuaha casacu rē me cjuetacun. <sup>16</sup> Hane xi cafhin Roma ne, xutaxa rē jan ne, casua me cahndé xi cjuiin Pablo ndavaya hane cjué me ndava ngu xuta cuejña me, peru cojo ngu sindadu xi sahmi cuidadu xi hacuain cuanga me.

*Catsinguijnetaha Pablo cjuá cojo xuta changá rē yungun*

<sup>17</sup> Hya xi camá ne, xi cafē jyan nixtin quitahá Pablo jan ne, casahmi tangun me xuta xi matitjun tséhé ngajni rē xuta tjé rē Israel. Hane xi camatangun xuta jan ne, sehe cachja Pablo cojo rē me cuitjin:

—Ngayujun ni ngayun xuta tjé rē Israel matsejen ne, ngeuhe cuichjá cojo nuju ta handasa tsajin mé casahme condra yějé xuta naja o condra rē xcusun rē xutachanga naja ne, peru cafaha ná me, casahmi ná me entregadu tsja xutaxa rē Roma ngajan Jerusalén. <sup>18</sup> Hane xi cafahataha ná xutaxa rē jan ne, meje tsismi ná me, tséhé xi tsajin jyé naha xi vechú chuva rē xi cueya. <sup>19</sup> Peru xi cachja xutaxa rē yungun naja xi ndajintjin xi cuma ndaya ngahan ne, casahmi ná nguyjé xi caféhya xi cuma ngahan consina tsja César, me xi matitjun camahani. Cuatjin casahme, handasa tsajin mé jyé meje cuíncha tséhé xuta naja. <sup>20</sup> Ngatsé rē cjuacjintacun véhé ne, véhé xi cachjá xi cuinduvun tjengun ná, cojo sa xi cuichjá cojo ngu ngujo cjuá ta, tséhé xi ngatsé rē me xi vetahantacun ngayejen ni ngayaan xuta tjé rē Israel ne, véhé xi cuitjin tjinhñu ngahan vi. —Cuatjin cachja Pablo.

<sup>21</sup> Ngajan xi xuta xi cuacun jan ne, cuitjin cafayangui me:

—Peru ngayin ne, hisca ngu xujun xi chja condra nuju xi nduva tséhé Jerusalén ne, cjéé chjihinntsin. Hacuaha tsajin hisca ngu xuta naja xi nduva me tséhé ngajan xi choho chja me tsujun cojo niji. <sup>22</sup> Quihndé ne, meje cuisñiji hacutjin fi cjuatacun nuju ta, tséhé xi sacuaha cjuatacun vihi ne, hyin ta jingujyé ni ne, choho chja xuta tséhé. —Cuatjin cafayangui xuta xi cuacun jan.

<sup>23</sup> Hya xi camá ne, cavejña xuta xi cuacun jan ngu nixtin xi cuya nga me. Hane xi cavuya me ne, hitsé sa jercu cjin me xi cafehe me hiscan tacun Pablo. Ngajan xi Pablo ne, cuaha nixtin cachja me cojo xuta jan tséhé gobiernu xi sahmi Nina. Hacuaha casahmi Pablo ngahñu xi camacjain rē yějé xuta jan xi Jesús ne, me véhé xi catsingatju Nina me, sacuatjin chja xujun rē Nina xi catsihindu Moisés cojo xi catsihindu profeta hatséé nixtin. <sup>24</sup> Ngujo me ne, camacjain rē me cjuá xi cachja Pablo, peru ngujo nga me ne, camacjain rē me. <sup>25</sup> Hane tséhé xi hacuain tangun camá cjuatacun rē me ne, cavetju me café me. Peru chaja sa xi cjué me ne, Pablo ne, cachja me cuitjin:

—Jemu quixi cjuá rē Hasen rē Nina xi cachja profeta Isaías cojo xutachanga naja, cjuá xi cachja cuitjin:

<sup>26</sup> Tihin tjengui xuta naha hane tinoje cojo rē me xi hatuxa cuihndé me, peru cuijni rcu me hisca hitsé. Hatuxa scuëé me, peru hvín me mé jan.

<sup>27</sup> Cuatjin cuma ta, tséhé xi cjuatacun rē me ne, tichjá, tyjavañuju me cojo tuxcun me ne, cavechja me, sá tu scuëé me cojo tuxcun me

hane cuihndé me cojo tyjavañuju me

hacuaha cuijne rcu me cojo cjuatacun rē me,

sehe cuya me ladu naha xi cuaxëtjé me.

Cuatjin cachja cjuá jan. <sup>28</sup> Sa xi mijí cuisñuju ngayun sacuatjin camamiji cuisñuju xutachanga naja xi cuacun jan ne, ngeuhe suá cumachaya nuju ta Nina ne, cjuá xi cuaxëtje me xuta ne, quihndé catsingatju me cjuá véhé tséhé xutaxin. Me xi cuacun vé ne, cuisñuju me. —Cuatjin cachja Pablo.

<sup>29</sup> Hya xi camá ne, xuta tjé rē Israel xi cahndé me cjuá rē Pablo ne, quiji cavetju me, tichja cjin me cojo xicjin. <sup>30</sup> Ngajan xi Pablo ne, jo nu jingu cavéjña me ndihya xi cafehya me cojo renta jan. Hane ngajan cafahatsja me xuta xi quiji tjengui rē me, <sup>31</sup> casua me camachaya



rë xuta tsëhë gobiernu xi sahmi Nina, hacuaha cavicuya rë me xuta cjua xi chja tsëhë Nai naja Jesucristu. Hisca ngu quijiin cavatëcja tsëhë me xi cuatjin casahmi me.

## Xujun xi catsingatju San Pablo xi cafahtsja xuta Roma

<sup>1</sup> Ngahan, Pablo ne, visécoo rë Jesucristu sacuaha ngu mosu hndixahan rë me, hacuaha Nina cavaxijin ná me xi cuma ngahan apóstol, casuaxa ná me xi suá cumachaya rë xuta cjuandajyihí rë me. <sup>2</sup> Hane ha jemu hatséé casahmi Nina xi profeta rë me ne, tsihndu me cjuandajyihí vë xcun xujun rë Nina. <sup>3-4</sup> Cjuandajyihí vë ne, hacui cjuaxi xi sua machaya naja tséhë Quihndi rë Nina, Nai naja Jesucristu. Hya xi catsin Jesucristu, sacuaha ngu xuta tjë rë David, catsin me. Peru Hasen rë Nina ne, jemu ndaja casua camachaya naja xi hatuxa Quihndi rë Nina me ta catsingacun naja hya xi cavuya me cjuahñu hya xi cavatju cahme me. <sup>5</sup> Hane ngatsë rë Jesucristu ne, casacu niji cjuandaja rë Nina xi camá ngayin apóstol, cojo sa xi cuisecuin rë xuta yëjë ni nangui, sehe cumangucacun me cojo Nina hacuaha cuihndë me tséhë Nina. Hane xi cuatjin ne, cuma jyë cuma hnga Jesucristu. <sup>6</sup> Hacuaha cojo ngayujun ni xi xuta nanguixin ngayun ne, cavaxijin nuju Nina xi camá tséhë Jesucristu ngayun.

<sup>7</sup> Ngahan ne, titsihndu nuju ngayujun ni xi nechun ngajan nandya Roma, ngayujun ni xi hmucacun nuju Nina, ngayujun ni xi cavaxijin nuju me xi camá ngayun xuta rë me. Nina Nahmi naja cojo Nai naja Jesucristu ne, catisua nuju me cjuandaja cjuajeya.

### *Pablo ne, meje cjue me nandya Roma*

<sup>8</sup> Quihndë ne, hora xi sahme oración naha cojo Jesucristu ne, suá nacuechji rë Nina naha ngatsë nuju ngayujun ni ta jingu ni ladu ne, jimachaya rë xuta hacutjin xi mangutacún cojo Jesucristu. <sup>9</sup> Ngahan ne, nguñaja xahasen naha sahme xa rë Nina xi suá cumachaya rë xuta cjuandajyihí xi chja tséhë Quihndi rë Nina. Hane vëë Nina jain xi hatuxa veyanangë nuju, <sup>10</sup> yëjë ni hora xi sahme oración naha. Féhya rë Nina xi sua me cahndë xi cuechú hora cuechú nixtin xi cuma cjuëtjèngë nuju, sa xi cuatjin meje rë me. <sup>11</sup> Hatuxa meje cjuëtjèngë nuju, cojo sa xi suá nuju ngu cjuandaja rë Nina. Sehe ngayun ne, hitsë sa ndaja cumangutacun cojo Jesucristu. <sup>12</sup> Cuma cuiñtjan ne, meje cjuëtjèngë nuju, cojo sa xi tahan cjuasua xahasen naja xingu xingu ngayaan, ngatsë rë xi ndaja mangutacun xingu xingu ngayaan cojo Jesucristu.

<sup>13</sup> Ngayujun ni ne, meje ná xi cumachaya nuju ta jemu cjin ndiya cavejñá cjuatacun naha xi cjuëtjèngë nuju, peru hisca quihndë ne, camaji. Meje ná xi ngujo xuta nangui nuju ne, cuisehen me ndiya rë Jesucristu ngatsë rë xi ngahan suá cumachaya rë me cjuaxi yahá, sacuatjin xi ha camá jingu sa nangui. <sup>14</sup> Xi má na ne, hatuxa sahmi ná ngu jyë xi cuichjá cjuaxi jan cojo yëjë ni xuta; sa xuta rcun, sa xuta yuma; o sa xuta vechu cjuatacun rë, sa xuta yuma hasen. <sup>15</sup> Vëhë xi hacuaha jemu meje cjuëtjèngë nuju ngajan Roma, suá cumachaya rë xuta nangui nuju cjuandajyihí xi chja tséhë Jesucristu.

### *Cjuandajyihí xi sua Pablo cachaya rë xuta*

<sup>16</sup> Ngahan ne, ma savaain ná tséhë cjuandajyihí xi chja tséhë Jesucristu ta, tséhë xi cjuaxi vëhë ne, sua machaya rë xuta ta vaxëtje Nina yëjë ni xuta xi mangucacun cojo Jesucristu. Tjun tjun xuta Israel cuaxëtje me, peru hacuaha cuaxëtje me xutaxin. <sup>17</sup> Cjuandajyihí vëhë ne, sua machaya naja ta Nina ne, tsicjë me jyë xi quitjen, peru suvá ni hya xi mangutacun cojo Jesucristu. Hacuaha cuatjin chja ngu cjuaxi camahindu xcun xujun rë Nina: “Xuta xi tsajin jyë rë me ngatsë rë xi mangucacun me cojo Nina ne, sacú rë me cjuahñu xatsë.” Cuatjin camahindu.

### *Jyë xi tjin rë xuta ngasunhndë*

<sup>18</sup> Nina xi tacun me ngahnga ne, sua me machaya naja hacutjin jemu cjan rë me ngatsë rë xi faharcuain xuta me, cojo ngatsë rë yëjë ni cjuatsehen xi sahmi xuta. Hacuaha cojo cjuatsehen xi sahmi xuta jan ne, vetsa me cjuaxi cjuaquixi. <sup>19</sup> Cjuatacun xi cuma cumachaya naja tséhë Nina ne, hatuxa vëë xuta xi cuacun tsehen jan ta, tséhë xi Nina ne, ha casua me camachaya rë xuta cjuatacun vëhë. <sup>20</sup> Nina ne, matsijin me; peru hisca nixtin xi catsindaja me ngasunhndë cojo hisca nixtin quihndë ne, matsejen ta hacui jain me xi Nina me hacuaha tjin rë me ngahñu xi tsajin nuju tsajin nixtin cjuë. Cuatjin ma vijne rcu tu yo ni xuta hya xi vutsejen me yëjë ni xcusun xi catsindaja Nina. Vëhë xi xuta xi cuacun tsehen jan ne, sacuiyjin rë me mé xi cuichja me hya xi sua me cjuaquixi rë me xcun Nina. <sup>21</sup> Handasa vëë xuta xi tacun jain Nina ne, peru casahmijyjin casahmihngaain me Nina, hacuaha hisca casuaain me nacuechji rë Nina. Vëhë xi camachjiriin cjuatacun rë me. Hacuaha cjuatacun yuma hasen rë me ne, camajñu tséhë. <sup>22</sup> Chja suvá me xi jemu vechu cjuatacun rë me, peru ngajñi rë xi chja me cuatjin ne, hitsë sa ngarca cavuya me cojo cjuatacun rë me. <sup>23</sup> Hacuaha

catsitjungui me Nina xi hatuxa jyê hnga me cojo cjuarê me, Nina xi hatuxa hmii me. Sehe cavetsihin cafaharcun xuta xi cuacun jan tu mé ni nina ndyojo xi catsindaja súvá me. Cafaharcun me xcusun rê xuta xi hatuxa hme me, cojo xcusun rê chu nisê, cojo xcusun rê chu yê, cojo jingu sa xcusun rê chu xi yahnga.

<sup>24</sup> Vêhê xi Nina ne, catsismicacun me xuta xi cuacun tsehen jan, cojo sa xi sahmi xuta cjuatsehen xi fehya rê xahasen tsehen xi tjin rê me. Hane casahmi xuta jan cjuatsehen cojo yojo rê me ngajni rê me cojo xicjin me. <sup>25</sup> Catsitjungui me Nina xi cjuaquixi. Cafaharcun me nina ndyojo xi nina ndacha ni. Hacuaha cahndê rê xi cjuaharcun me Nina, cafaharcun me hacuaha casahmi cuidadu rê xcusun xi Nina casahmi me. Peru mameje jain xi chjaharcun rê Nina yêjê ni nu yêjê ni nixtin. Cuatjin jain.

<sup>26</sup> Vêhê xi Nina ne, catsismicacun me xuta xi cuacun tsehen jan, cojo sa xi cuma tsehen sa xahasen rê me. Hisca yachjin ne, catsitjungui ne xcusun xi ndatjin xi sacú xihin rê ne, hane casahmi na xcusun xi cuaintjin. <sup>27</sup> Hacuaintjin ni casahmi cha xi xihin; catsitjungui cha xcusun xi ndatjin xi sacú chjuun rê cha, hane jercu cavetju suê cha xi cuatjin meje sahmi cha cjuatsehen ngajni rê cha cojo xicjin cha. Xihin cojo xihin cha casahmi cha cjuasava jan, hacuaha casacu rê cha jima ngu cha castigu xi cavangui xcusun tsehen xi casahmi cha jan.

<sup>28</sup> Xi má rê xuta xi cuacun tsehen jan ne, machjiriin xi tsinguitsjen me nina. Vêhê xi Nina ne, catsismicacun me xuta jan, cojo sa xi hatuxa cumachjiriin cjuatacun rê me, hacuaha sahmi me xcusun xi ndajintjin xi nihña. <sup>29</sup> Quitsê rê xahasen rê me cojo yêjê ni cjuatsehen xi fehya xahasen rê me sacuaha xcusun vi: jemu choho tsingatahacacun me; ña quitsê rê xahasen rê me cojo cjuaxin; meje tsiquehen xicjin me; jemu meje scaanya me tu mé ni xcusun; jemu ndacha me; jemu tsehen me; jemu ndesu me; <sup>30</sup> choho chja me tsêhê xicjin me; choho vêê me Nina; jemu hnga cacun me; jemu xta me; vaxëndaja súvá me yojo rê me; tsindajaya me cjuatsehen; vihndiin me tsêhê xutacha rê me; <sup>31</sup> machjiriin cjuatacun rê me; sahmiichiin me ngu cjuarê xi chja me; tsajin rê me cjuahmutacun; tsajin rê me cjuayumatacun. <sup>32</sup> Nina ne, cavetexa me xi yêjê ni xuta xi cuatjin sahmi xcusun tsehen vê ne, hatuxa vechú chuya rê xi cueya me. Hane xuta xi cuacun tsehen jan ne, handasa ha vêê me xi cuatjin cavetexa Nina, peru sahmicuendaain me ta finduju me cojo cjuatsehen jan, hisca ndama rê me tsêhê xuta xi yahnga xi cuatjin sahmi.

## 2

*Nina ne, tsichuva me xuta cojo cjuatacun rê me hacutjin xi cjuaquixi*

<sup>1</sup> Tu yo ni ngayun xi nichuvun jingu sa xuta cojo cjuatacun rê me ne, sacuiyiin nuju mé xi cuinújun hya xi tuhun cjuaquixi nuju xcun Nina ta, tsêhê xi hora xi nichuvun xuta ne, cjuachoyihi xi sahmi ni me ne, ha xcusun vêhê ni nihñu. <sup>2</sup> Ha hyan ta xuta xi cuatjin sahmi xcusun tsehen vêhê ne, hya xi tsichuva Nina me cojo cjuatacun rê me ne, tsichuva me hacutjin xi cjuaquixi. <sup>3</sup> Peru ngayun xi nichuvun xuta xi cuatjin sahmi xcusun tsehen vêhê ne, ¿há má nuju xi cuatjuhnga ngayun xi tsichuvaain nuju Nina xi cojo ngayun nihñu xcusun tsehen vêhê? <sup>4</sup> O há tsajin ne, ¿há cuendaain nuju tsêhê cjuandaja xi sua nuju Nina? ¿Há cuendaain nuju xi Nina ne, jemu jyê cacun me cojo nuju? ¿Há hyuun xi cuatjin sahmi Nina cjuandaja cojo nuju, cojo sa xi nindeyun cjuatacun nuju? <sup>5</sup> Peru ngayun ne, jemu taja rcun, hatuxa mijí nindeyun cjuatacun nuju. Xi cuatjin nihñu ne, tinihñu xi jima cjan sa rê Nina cojo nuju, hisca xi cuechú nixtin xi Nina ne, jemu cuma cjan rê me hacuaha sua me cumachaya nuju hacutjin tsichuva nuju me cojo cjuaquixi. <sup>6</sup> Nina ne cuechji me xingu xingu xuta tu cutjin xcusun xi casahmi xuta jan. <sup>7</sup> Xuta xi scaa rê me sahmi me cjuandaja ngatsê rê xi meje rê me xi cuma yehe cuma hnga me, hacuaha meje rê me xi chuya rê Nina tsêhê me. Meje rê me xi cuechiin nixtin xi cueya me ne, me vêhê xi sua Nina me cjuahñu xatsê. <sup>8</sup> Peru xuta xi meje rê me xi súvá ni me xi ndaja tsêhê me, hacuaha vihndiin me tsêhê cjuaquixi ta savá cjuatsehen yêjê ni xi sahmi me ne, me vêhê xi jemu cuma cjan camahani rê Nina cojo rê me. <sup>9</sup> Yêjê ni xuta xi sahmi cjuatsehen ne, sacú rê me cjuañihi, hisca sacuiin rê me chuya rê hacutjin cuaxêtje me yojo rê me. Tjun tjun xuta Israel cuatju me cuma cuatjin, peru hacuaha cojo xutaxín cuatjin cuatju me cuma. <sup>10</sup> Peru yêjê ni xuta xi sahmi cjuandaja ne, me vêhê xi jemu cuma yehe cuma hnga me, hacuaha jemu chuya rê Nina tsêhê me, hacuaha jemu sacú rê me cjuajeya. Me vêhê xi má xuta tjê rê Israel ne, tjun tjun cuatju me cuma cuatjin, peru hacuaha cojo xutaxín cuatju me cuma.

<sup>11</sup> Ta Nina ne, hatuxa quixi jain me cojo cjuatacun rê me xi tsichuva me yêjê ni xuta cojo cjuatacun rê. <sup>12</sup> Yêjê xuta xi tsajin rê me ley rê Moisés hacuaha sahmi me cjuatsehen ne, hacuiin ley vêhê vitexa mé castigu xi cuma me; peru hatuxa cuetjintjin me. Hane yêjê xuta xi tjin rê me ley jan hacuaha sahmi me cjuatsehen ne, tsichuva Nina me tu cutjin xi vitexa ley vêhê. <sup>13</sup> Xuta xi tu visiñuju ni sacuatjin chja ley ne, hacuiin me vêhê xi tsajin jyê quitjen me xcun Nina ta xuta xi sahmi sacuatjin chja ley jan ne, me vêhê xi cuichja Nina

ta tsajin jyé quitjen me. <sup>14</sup> Xutaxín xi tsajin rè me ley rè Moisés jan ne, hya xi sahmi me sacuatjin chja ley vèhè cojo cjuatacun rè suvá ni me ne, ngajan ma tsejen xi sacuaaha xi me vèhè má me ley rè suvá ni me. <sup>15</sup> Xcusun xi sahmi me tsingacun naja xi cjua xi vitexa ley ne, ha hinchá cahntsua cjuatacun rè me. Ha vèhè suvá me cojo cjuatacun rè me mé xi ndaja, mé xi ndajin. Vèhè xi vinchajyé cjuatacun rè me me, o sa tsajin ne, chjatje cjuatacun rè me ngatsè rè me. <sup>16</sup> Ngajan xi hatuxa cuechji Nina xuta nixtin hya xi Nina tsingatju nga me Jesucristu xi tsichuva me cjua xi hinchahma rè xuta. Hacuaha cuatjin chjá hya xi suá machaya rè xuta cjuandajyihí xi chja tsèhè Jesucristu.

*Xuta tjè rè Israel xi faharcun me ley ne, vèhè sua machaya rè me xi xuta jyé me*

<sup>17</sup> Quihndè ne, ngayun xi nújun xi xuta tjè rè Israel ngayun ne, jemu vetuhuntacun ley rè Moisés. Jemu naxunndujun yojo nuju ngatsè rè xi Nina xi cjuaquixi ne, me vèhè xi Nina nuju me. <sup>18</sup> Ha hyun hacutjin xi meje rè Nina xi nihñu; hacuaaha ngatsè rè xi cachutayun ley ne, chuya nuju tsèhè cjuandaja. <sup>19</sup> Xi má nuju ne, jemu ndaja ninguixun cjuatacun rè xutaxín xi hvíin me Nina; jemu ndaja chuxuhun cjuatacun rè xutaxín xi tsajin hinchá me ndiya rè Nina. <sup>20</sup> Xi má nuju ngayun ne, sacuaaha maestru rè xutaxín xi hvíin camahani me má ngayun. Cuatjin ningatuhuntacun ta, tsèhè xi tjin nuju ley rè Moisés jan xi yaha cjuatacun xi cjuaquixi. <sup>21</sup> Ngayun xi vicuyun rè jingu sa ne, ¿há vicuyun suvun rè yojo nuju ni? Ngayun xi chuyiin nuju tsèhè nina ndyojo ne, ¿há nichujun cjuanchina rè yungun rè ni? <sup>22</sup> Ngayun xi nújun xi ndajintjin xi nindesun cojo rè ngu chjuun, o cojo ngu xihin xi hacuiin tsajan ne, ¿há cuatjin nihñu suvun ni? Ngayun xi chuyiin nuju tsèhè nina ndyojo ne, ¿há nichujun cjuanchina rè yungun rè ni? <sup>23</sup> Ngayun xi jemu naxunndujun yojo nuju xi tjin nuju ley rè Moisés ne, ¿há choho chja xuta tsèhè Nina ngatsè rè xi nihñuchuun cjua xi vitexa ley vè ni? <sup>24</sup> Hacuaha cuatjin camahindu xcun xujun rè Nina: “Xutaxín ne, choho chja me tsèhè Nina, ngatsè rè xcusun nuju ngayun xuta tjè rè Israel.” Cuatjin chja xujun.

<sup>25</sup> Sa xi nihñuchuhun jain sacuatjin vitexa ley ne, cumachji rehè nuju xi cati chuxin nuju ngatsè rè xi ngu xuta rè Nina ngayun; peru sa xi nihñuchuun sacuatjin vitexa ley ne, ngayun ne, tangun ngayun sacuaaha xi cjèè xtí chuxin nuju. <sup>26</sup> Vèhè xi xutaxín xi vatiin me chuxin rè me ne, sa xi sahmi me cjuandaja sacuatjin vitexa ley ne, tangun chya rè Nina tsèhè me sacuaaha xi ngu xuta xi cati chuxin rè me. <sup>27</sup> Hane xutaxín xi sahmi me sacuatjin vitexa ley ne, handasa hatuxa vatiin me chuxin rè me, peru cuatjutaha nuju me, ngayun xi nihñuchuun sacuatjin chja ley handasa tjin nuju ley jan hacuaaha cati chuxin nuju. <sup>28</sup> ¿Yo xi má ngu xuta tjè rè Israel xi cjuaquixi? Hacuuiin ngu xuta xi suvá ni xi sahmi me sacuaaha xcusun rè xuta jan, hacuiin ngu xuta xi suvá ni xi cati rè chuxin rè ta, <sup>29</sup> ngu xuta xi yaha cjuatacun rè xuta tjè rè Israel, ngu xuta xi cjuè me cojo ngasunhndè rè me sacuaaha xi cati chuxin rè me, me vèhè xi ngu xuta tjè rè Israel xi cjuaquixi. Hane tsajin rè ley ngahñu xi cuma sahmi cuatjin cahntsua xahasen naja ta suvá Hasen rè Nina xi cuma sahmi cuatjin. Xi cuatjin nihña ne, hacuiin xuta xi cuaxëndaja me tsajan ta Nina ne, me vèhè xi chuya rè me tsajan.

### 3

<sup>1</sup> Sa quixi cuatjin ne, cuma cuinenguisen ta, ¿mé vengui chjí rè xi xuta tjè rè Israel má ngayaan? ¿Mé vengui chjí rè xi cuatjin cati chuxin naja? <sup>2</sup> Peru jemu vengui camahani chjí rè. Titjun ne, vengui chjí rè ta, tsèhè xi Nina ne, casuatsja naja me cjua rè me. <sup>3</sup> Peru sa xi ngujo xuta tjè rè Israel catsismicacun me Nina ne, ¿mé xi cuma? ¿Há vèhè ni sahmi xi tsismicacun Nina ngayaan xuta rè me? <sup>4</sup> ¡Jéya! Meje rè xi cuinújan xi Nina ne, hatuxa sahmichihin me yèjè ni cjua xi chja me. Sahmi me handasa yèjè ni xuta ne, jemu ndacha me. Xcun xujun rè Nina ne, cuitjin camahindu:

Ngayun, Nina naha ne, tsèhè yèjè ni cjua xi nújun ne,  
tsajin camahani mé jyé quitjin, hacuaaha hatuxa scaa rè cjua nuju cjue xcun tsèhè cjua rè  
xuta xi tsichuva nuju me cojo cjuatacun nuju.

Cuatjin camahindu.

<sup>5</sup> Sa xi ngatsè rè cjuatsehen xi nihña ne, vèhè tsingacun jain xi Nina ne, tsajin camahani jyé quitjen me ne, ¿mé cumá cuinújan? ¿Há cuinújan xi Nina ne, hacuaaha jyé quitjen me ta sahmi naja me castígu? (Tichjá cojo nuju sacuaaha cjuatacun rè ngu xutajyé.) <sup>6</sup> ¡Jéya! quixiin vè ta, sa xi jyé quitjen Nina ne, sehe cumaji tsichuva me xuta ngasunhndè cojo cjuatacun rè me.

<sup>7</sup> Cuejña xi cuichja sa ngu xuta cuitjin: Sa xi hitsé sa cuaxëndaja Nina cojo cjuaquixi rè me hya xi sahmi jain me sacuatjin chja me hacuaaha hitsé sa ndaja tsejen xi jyé hnga Nina cojo Hasen rè me ngatsè rè cjuandacha naha ne, ¿mé má sehe cuatjin tsichuva ná me sacuaaha ngu xuta tsehen? <sup>8</sup> O sa tsajin ne, cuejña xi cuichja sa ngu xuta cuitjin: Cuanguen nihña cjuatsehen, cojo sa xi cuma cuetjucaa sa cjuandaja. Hisca tjin yahnga xuta xi choho chja

me tsijin ta chja me xi cjuatacun vëhë vicuyin, peru quixiin vë. Xuta xi cuacun vë ne, hatuxa satë rë me castigu xi vitexa jyë rë me.

<sup>9</sup> Sa cuatjin ne, ¿há hitsë sa vengui chjí naja ngayaan xuta tjë rë Israel xi cuma rë xutaxín? ¡yéya! Ha sehe cachjá ta ngayejen ni, sa xuta tjë rë Israel o sa xutaxín ne, ha nechan ngayejen ni ngajñi rë cjuatsehen. <sup>10</sup> Cuatjin camahindu xcun xujun rë Nina hiscan xi chja cuitjin:

Tsajin xuta xi tsajin jyë quitjen, hisca ngu me tsajin me;

<sup>11</sup> Tsajin yo xi vijne rcu, tsajin yo xi vanguise ndiya rë Nina.

<sup>12</sup> Yëjë ni xuta ne, cavetjuxin me tsëhë ndiya rë Nina, yëjë ni me ne, camachjiriin me.

Tsajin yo xi ndaja sahmi me. Ndastu ngu ni me tsajin me.

<sup>13</sup> Cahntsua hntsua me ne, chojyihí sacuaaha ngu tsjun xi catuxaha; neje me ne, suvá cjuandacha visiajmi,

chuxin hntsua me ne, xan rë chu yë hinchá ngahma rë;

<sup>14</sup> hntsua me ne, suvá cjuahngatacun quitsë rë.

<sup>15</sup> Cojo ntsacu me ne, ngu hñu sasa cjue tsiquehen xicjin me;

<sup>16</sup> Ndiya xi hinchá me ne, suvá xi tsinguetsun ni me cjuatacun rë xuta, hacuaaha sua me xuta cjuachoho.

<sup>17</sup> Hvíin camahani me ndiya tsëhë cjuajeya.

<sup>18</sup> Tsajin ngu hora xi tsingatahacacun me xi tsacjun me Nina.

Cuatjin chja xujun rë Nina.

<sup>19</sup> Ha hyan ta yëjë ni cjua xi chja ley rë Nina ne, chja cojo xuta xi siu ngahma rë ley vëhë. Cuatjin xi tsajin yo cuma cuichja xi tsajin mé jyë quitjen. Hacuaaha cuatjin xi yëjë ni xuta ngasunhndë vi ne, tsichuva Nina me cojo cjuatacun rë me. <sup>20</sup> Nina ne, cuichjaain me tsëhë ngu xuta xi tsajin jyë rë me ngatsë rë xi casahmichihin me sacuatjin chja ley ta, ley ne, sua machaya naja xi ngayejen ne ne, xuta tsehen ngayaan.

*Nina ne, tsicjë me jyë naja sa xi mangutacun cojo rë me*

<sup>21</sup> Peru Nina ne, casua me camachaya naja hacutjin tsicjë me jyë naja. Hane hacuiin ngatsë rë ley xi cuatjin sahmi me. Cjuatacun rë Nina vë ne, hisca hatsëë camahindu xcun xujun rë me. <sup>22</sup> Cjuatacun vëhë ne, cuitjin fi: Nina ne, tsicjë me jyë rë xuta xi mangucacun cojo Jesucristu. Cuatjin sahmi Nina cojo yëjë ni xuta xi cuatjin mangucacun me cojo Jesucristu ta Nina ne, tangun ni vutsejen me xutaxín cojo xuta tjë rë Israel. <sup>23</sup> Yëjë ni xuta ne, sahmi me cjuatsehen, hacuaaha chaja camaha sa xi cuechutaha me sacuatjin jyë hnga Nina cojo Hasen rë me. <sup>24</sup> Peru cojo cjuandaja rë Nina ne, tu cjuatjo ni tsicjë me jyë rë xuta, ngatsë rë xi Jesucristu ne, cavechjijte me jyë xi quitjen xuta. <sup>25</sup> Nina ne, catsingatju me Jesucristu xi cueya me xi cuechjijte me jyë rë yëjë ni xuta xi cumangucacun cojo rë me. Cuatjin casahmi Nina, cojo sa xi sua me cumachaya naja xi me vëhë ne, jemu tyjahi me cojo cjuatacun rë me hya xi jemu catsijyëcacun me cojo xuta xi caviyuju tijun hacuaaha catsingatjuhnga me jyë rë xuta xi cuacun vë. <sup>26</sup> Hacuanitjin ni sua me machaya naja xi jemu tyjahi me cojo cjuatacun rë me quihndë xi tiscicjë me jyë xi quitjen xuta xi mangucacun cojo Jesús.

<sup>27</sup> Xi cuatjin ne, ¿há cuma naxenndajan yojo naja? ¡yéya, cumaji! Nina ne, hacuiin tsicjë me jyë naja ngatsë rë xcusun xi nihña ta suvá ngatsë rë xi mangutacun cojo Jesucristu. Vëhë xi choho nuhya rë sa xi naxenndajan yojo naja. <sup>28</sup> Vëhë xi tsejen xi meje rë xi ningatahantacun cuitjin: Nina tsicjë me jyë rë ngu xuta ngatsë rë xi mangucacun xuta jan cojo Jesucristu, hacuiin ngatsë rë ngu ley xi vihndë me.

<sup>29</sup> Nina ne, ¿há cuma xi suvá ni xuta tjë rë Israel xi Nina rë me má me? ¿O há cojo xutaxín má me Nina tsëhë? Juun, cojo me. <sup>30</sup> Ngu ni Nina xi tacun me. Hane me vëhë tsicjë me jyë rë xuta tjë rë Israel ngatsë rë xi mangucacun xuta jan cojo Jesucristu, hacuaaha tsicjë me jyë rë xutaxín xi vatíin me chuxin rë me ngatsë rë xi mangucacun xutaxín cojo Jesucristu. <sup>31</sup> Quihndë xi tinújan xi jemu vengui chjí rë xi mangutacun cojo Jesucristu ne, ¿há tinguetsun ngahñu rë ley xi cavitexa Nina? ¡yéya! Ha hyan ta ley rë Nina ne, hatuxa vengui chjí rë.

## 4

*Hacutjin camá xi cafë jyë rë Abraham*

<sup>1</sup> Sa cuatjin ne, ¿mé cuinújan tsëhë xutachanga naja Abraham? ¿Mé xi casacu rë me xi caviyuju me ngeue ngasunhndë? <sup>2</sup> Sa xi cachja Nina ta tsajin jyë rë Abraham ngatsë rë cjuandaja xi casahmi Abraham ne, tjin rë Abraham chjuva rë xi cuaxëndaja suvá me yojo rë me. Peru cumaji sahmi me cuatjin xcun Nina ta, <sup>3</sup> xujun rë Nina ne, chja cuitjin: “Abraham ne, camangucacun me cojo cjua xi cachja Nina cojo rë me, hane ngatsë rë vëhë xi catsicjë Nina jyë rë me.” Cuatjin chja xujun rë Nina. <sup>4</sup> Ngu xuta xi casahmi me ngu xa naja ne, chjí rë me ne, hacuiin catahan rë me sacuaaha ngu cjuandaja xi nihña cojo rë me ta catahan rë me tsëhë xi quitjen tsëhë xa xi casahmi me tsajan. <sup>5</sup> Peru sacuaaha ngu xuta xi hacuiin vihi

hacuiin vèhè sahmi me xi meje rè me xi chuya rè Nina tsèhè me ta tu mangucacun ni me cojo Nina, Nina tsicjè jyè rè xuta tsehen jan. Ngatsè rè xi cuatjin mangucacun xuta jan ne, hatuxa tsicjè Nina jyè rè me. <sup>6</sup> Xutachanga naja David ne, hacuaha cachja me hatsèè nixtin tsèhè cjuasua xi tjin rè ngu xuta xi Nina tsicjè jyè rè me, hane tsimii sahmi rè há ndaja há ndajin casahmi xuta jan. <sup>7</sup> Cuitjin cachja David:

Jemu ndaja tsèhè ngu xuta xi catsinchataha Nina jyè rè me, hacuaha xi cafahacuendaain Nina cjuatsehen xi casahmi me.

<sup>8</sup> Jemu ndaja tsèhè ngu xuta xi hatuxa tsicjè Nai naja jyè rè me. Cuatjin cachja David.

<sup>9</sup> Cjuandaja vèhè ne, ¿há súvã cuma tsèhè xuta xi cati chuxin rè? ¡jéya! ta, hacuaha cojo xuta xi vatiiin me chuxin rè cuma ta, tsèhè xi ha cachjá ta Nina catsicjè me jyè rè Abraham ngatsè rè xi camangucacun Abraham cojo Nina. <sup>10</sup> ¿Janihya catsicjè Nina jyè rè Abraham? ¿Há cachja me cjuajan hya xi cavatju cati chuxin rè me ne?, o há tsajin ne, ¿há hya xi cjèè xtí chuxin rè me? Hacuuiin hya xi ha cati chuxin rè me ta cachja me hya xi chaja sa xtí. <sup>11</sup> Hisca xi camã ngascan ne, sehe cati chuxin rè Abraham sacuaha ngu sellu xi casetaha rè me xi tsejen xi Nina ne, catsicjè me jyè rè Abraham ngatsè rè xi ha camangucacun me cojo Nina. Cuatjin xi Abraham ne, camatitjun me sacuaha nahmi tsèhè yèjè xuta xi cjuè jyè rè me ngatsè rè xi cumangucacun me cojo Nina handasa hacuiin xtí chuxin rè me. <sup>12</sup> Hacuaha Abraham ne, camatitjun me sacuaha nahmi tsèhè yèjè ni xuta xi xtí chuxin rè me hane hacuaha cumangucacun me cojo Nina, ta xuta jan ne, vetjungui cjuatacun rè xutachanga naja Abraham hya xi chaja sa xtí chuxin rè me.

<sup>13</sup> Nina ne, cachja me cojo Abraham ta yèjè ngasunhdè ne, cuma tsèhè me cojo xuta xi nduva tjè rè me. Peru hacuiin ngatsè rè xi casahmi Abraham sacuatjin vitexa ley xi cuatjin cachja Nina cojo rè me ta cachja me cuatjin ngatsè rè xi camangucacun me cojo Nina. Vèhè xi Nina ne, catsicjè me jyè rè Abraham. <sup>14</sup> Cuatjin chjá ta, sa xi súvã xuta xi sahmi sacuatjin chja ley cuma satè rè me cjuandaja xi cachja Nina jan ne, venguin chjí rè xi mangutacun cojo Nina, hacuaha machjirin cjuã xi cachja Nina jan. <sup>15</sup> Cachjá xi hacuiin ngatsè rè ley xi cuatjin cachja Nina cojo Abraham ta, tsèhè xi hiscan xi sahmixa ley rè Nina ne, ngajan xi cuma xuta castigu. Peru hiscan xi tsajin ley ne, hacuaha tsajin yo xi vinchajyè rè xuta ta casahmichiin me cjuã xi vitexa ley.

<sup>16</sup> Vèhè xi cavejña ngu cacun Nina xi sahmichihin me cjuã rè me cojo xuta xi cumangucacun cojo rè me, cojo sa xi tsejen ta súvã ngatsè rè cjuandaja rè Nina xi cuatjin sahmichihin me cjuã rè me cojo xuta. Ngajan xi tjin cjuaquixi xi sahmichihin jain Nina cjuã rè me cojo yèjè xuta xi nduva tjè rè Abraham, hacuiin tu súvã cojo xuta xi tjin rè me ley ta hacuaha cojo xuta xi mangucacun me cojo Nina, sacuatjin casahmi Abraham. Cuatjin xi Abraham ne, camatitjun me tsajan sacuaha nahmi naja ngayejen ni ngayaan ngajan xcun Nina. <sup>17</sup> Nina ne, me vèhè xi camangucacun Abraham cojo me, me vèhè xi sua cjuahñu rè nima, me vèhè xi handasa chaja sa tsindaja me ngu xcusun ne, chja me tsèhè xcusun vèhè sacuaha xi ha catsindaja me. Camahindu xcun xujun rè Nina hiscan xi cachja me cojo Abraham cuitjin: “Cavejña ri ne, xi cuma titjun ngaye sacuaha nahmi tsèhè jemu cjín xuta.” Cuatjin camahindu.

<sup>18</sup> Peru Abraham ne, handasa matsijin hacutjin cuma sahmichihin Nina cjuã xi cachja me cojo rè me ne, camangucacun me cojo cjuã jan, cavetaha cacun me Nina. Cuatjin xi camatitjun me tsèhè jemu cjín xuta, sacuatjin xi ha cachja Nina cojo rè me hya xi cachja me ta: “Cuitjin cjín cuma xuta xi tjè riji.” Cuatjin cachja Nina. <sup>19</sup> Hane hacuiin quiji ngaxtun Abraham xi mangucacun me cojo Nina handasa xi ha ngu cientu nu tjin rè me, hacuaha ha vèè me xi jemu changã camahani camã me cojo chjuun rè me xi sacú rè me quihndi. <sup>20</sup> Peru hacuiin quiji ngaxtun me xi mangucacun me cojo cjuã xi cachja Nina cojo rè me ta hitsè sa ndaja camangucacun me. Hacuaha casahmi jyè casahmi hnga me Nina <sup>21</sup> ta, xi tsingatahacacun me ne, hatuxa tjin rè Nina chuya rè xi sahmi chihin me yèjè ni cjuã xi cachja me xi sahmi me. <sup>22</sup> Vèhè xi Nina ne, catsicjè me jyè rè Abraham.

<sup>23</sup> Quihndè ne, hacuiin súvã tsèhè Abraham xi cuatjin camahindu xi catsicjè Nina jyè rè me ta <sup>24</sup> hacuaha cojo tsajan ngayaan, xi sehe tsicjè Nina jyè naja, ngayaan xi mangutacun cojo Nina, me xi catsicuya Nai naja Jesucristu cjuahñu. <sup>25</sup> Cahme me ngatsè rè cjuatsehen xi nihña, hacuaha cavuya me cjuahñu cojo sa xi cuma cjuè jyè naja.

## 5

### *Cavetjuntjen tsèhè jyè naja*

<sup>1</sup> Quihndè ne, tsèhè xi catsicjè Nina jyè naja ngatsè rè xi camangutacun cojo rè me ne, vèhè xi ngayaan ne, ha hindè tsajin sa cjuachan cojo Nina ngatsè rè xi cavaxetje naja Nai naja Jesucristu. <sup>2</sup> Hacuaha ngatsè rè xi camangutacun cojo rè me ne, vèhè xi casacu naja

cjuandaja rë me. Hacuaha jemu sua rë xahasen naja cojo ngu cjuetacun xi cuechú nixtin xi cuechuntahan hitsë sacuatjin jyë hnga Nina cojo Hasen rë me. <sup>3</sup> Hane hacuini suvá ngatsë rë cjuetacun vëhë ni ta hacuaha ma sua rë xahasen naja ngatsë rë cjuañihi xi vatjun ta, tsëhë xi ha hyan ta cjuañihi ne, vëhë vicuya naja hacutjin scaa naja tu mé ni cjuacjintacun. <sup>4</sup> Hane xi scaa naja ne, vëhë sahmi xi chuya rë Nina tsajan, hane xi chuya rë Nina tsajan ne, vëhë sahmi xi cuetahan tacun Nina. <sup>5</sup> Hane xi cuatjin cuetahan tacun Nina ne, tsajin nixtin cuetju sava ngayaan ta, tsëhë xi Hasen rë Nina xi casua naja me ne, jemu caveya cjuahmutacun rë Nina cahntsua xahasen naja.

<sup>6</sup> Hya xi tsajin mé camá canihña suvaan xi naxentjen yojo naja ne, hya cahme Jesucristu xi cuaxëtje me ngayaan xuta tsehen. Cahme me nixtin xi cachja Nina xi cueya me. <sup>7</sup> Tsajin cjuaquixi xi ngu xuta sua me yojo rë me xi cueya me ngatsë rë ngu me xi tsajin jyë rë. Hisca ngu xuta ndaja jain ne, hyan sa xi sacu yo xi cuetjucacun xi sua yojo rë xi cueya ngatsë rë me. <sup>8</sup> Peru Nina ne, casua me camachaya naja cjuahmutacun xi tjin rë me cojo naja hya xi Jesucristu casua me yojo rë me xi cahme me ngatsë naja, handasa xuta tsehen ngayaan. <sup>9</sup> Hane quihndë xi cafë jyë naja ngatsë rë cjuaveya rë Jesucristu ne, ngajan xi hacuaha tjin cjuaquixi xi ngatsë rë me ne, cuetjuntjen tsëhë castigu. <sup>10</sup> Hya xi condra rë Nina má ngayaan ne, hya camá xutandaja rë me ngayaan ngatsë rë cjuaveya rë Quihndi rë me. Hane quihndë xi camá xutandaja rë me ngayaan ne, tjin cjuaquixi xi ngayaan ne, cuetjuntjen ngatsë rë xi tacun quicun nga me quihndë. <sup>11</sup> Hacuaha jemu sua ma rë xahasen naja ngatsë rë cjuahmutacun rë Nina, cojo ngatsë rë Nai naja Jesucristu, me xi quihndë casahmi xi camá xutandaja rë Nina ngayaan.

#### *Hacutjin casahmi Adán cojo hacutjin casahmi Jesucristu*

<sup>12</sup> Ntsacu cavetsihin ne, cavisehen xi hmí cjuatsehen cahntsua cjuatacun rë xuta nguehe ngasunhdë vihi ngatsë rë ngu xuta xi hmí rë Adán. Hane ngatsë rë cjuatsehen ne, cavisehen xi hmí cjuaveya nguehe ngasunhdë. Cuatjin xi yëjë ni xuta ngasunhdë ne, hatuxa hme me ta, tsëhë xi yëjë ni me ne, sahmi me cjuatsehen. <sup>13</sup> Chaja sa xi sua Nina Moisés ley rë me ne, ha hinchajñi cjuatsehen ngajñi rë cjuatacun rë xuta ngasunhdë. Peru sahmicuendaain me cjuatsehen xi má hiscan xi tsajin ngu ley. <sup>14</sup> Peru yëjë ni xuta xi caviyuju me ngasunhdë hisca nixtin rë Adán hisca nixtin rë Moisés ne, cahme me. Hisca xuta xi hacuini tangun cjuatsehen xi casahmi me cojo cjuatsehen xi casahmi Adán ne, hacuaha cojo me cahme me. Hane Adán ne, tjin ngu xcusun hacutjin matangun me cojo Cristu, me xi sehe cuinduva me ta, ngatsë rë Adán ne, cavisehen ngu xcusun nguehe ngasunhdë, hacuaha ngatsë rë Jesucristu, me xi camangasca canduva ne, cavisehen ngu nga xcusun ngasunhdë.

<sup>15</sup> Peru cjuandaja xi sua Nina ne, hacuini tangun cojo cjuatsehen xi casahmi Adán. Ngatsë rë cjuatsehen xi casahmi ngu ni xuta vëhë ne, jemu cjin xuta cahme me. Peru cjuandaja rë Nina cojo cjuandaja xi tisua naja ngu ni xuta xi hmí Jesucristu ne, hitsë sa vengui chji rë hacuaha jemu ndaja cama rë tsëhë jemu cjin xuta. <sup>16</sup> Cuichjá nga ngu ndiya ta hacuini tangun cavetju tsëhë cjuandaja vëhë cojo tsëhë cjuatsehen xi casahmi ngu ni Adán. Hya xi Adán casahmi me cjuatsehen vëhë ne, sehe cachja Nina xi sacuaha castigu ne, cuechú nixtin xi cueya Adán. Peru quihndë ne handasa xi jemu cjin cjuatsehen sahmi xuta ne, Nina ne, hacuaha sahmi me cjuandaja xi tsicjë me jyë rë xuta. <sup>17</sup> Ngatsë rë cjuatsehen xi casahmi ngu ni xuta ne, hatuxa cuma rë xuta cjuaveya. Cuanitjin hitsë sa ndaja ta, ngatsë rë ngu ni Jesucristu ne, xuta xi jemu tisacu rë me cjuandaja rë Nina xi tsicjë Nina jyë rë me tu cjuatjo ni ne, hatuxa sacú rë me cjuahñu xatsë.

<sup>18</sup> Vëhë xi sacuatjin xi cavetjucaa castigu xi cuma rë yëjë ni xuta ngatsë rë ngu cjuatsehen jan ne, hacuanitjin ni cuetjucaa xi cjuë jyë rë yëjë ni xuta, hacuaha sacú rë me cjuahñu xatsë, ngatsë rë ngu ni cjuandaja jan. <sup>19</sup> Hacuaha sacuatjin xi jemu cjin xuta camatsehen cjuatacun rë me ngatsë rë xi ngu ni xuta cahndiin me tsëhë Nina ne, hacuanitjin ni jemu cjin xuta cuma me xuta xi tsajin jyë rë ngatsë rë xi ngu ni me xi cahndë me tsëhë Nina.

<sup>20</sup> Cavejña Nina ley hane ngajan xi cama cjin sa cjuatsehen xi sahmi xuta. Peru hiscan xi camacjin sa cjuatsehen ne, ngajan xi cjin sa camatsejen cjuandaja rë Nina. <sup>21</sup> Sacuatjin xi hatuxa casahmi xuta cjuatsehen hane cahme me ne, hacuanitjin ni hatuxa sacú rë xuta cjuandaja rë Nina, hane cjuë jyë rë me, sehe sacú rë me cjuahñu xatsë, ngatsë rë Nai naja Jesucristu.

## 6

### *Sacuaha xi caveyan xi cuma rë cjuatsehen hane quicun ngayaan xi cuma rë Nina*

<sup>1</sup> Xi cuatjin ne, ¿há quixi sa xi cuinújan xi ndatjin xi nihña sa cjuatsehen cojo sa xi vetjutsejen sa cjuandaja rë Nina? <sup>2</sup> Jéya, ndajintjin! Ngayaan ne, sacuaha xi caveyan xi cuma rë cjuatsehen. Hane xi ha cavetjuxen tsëhë cjuatsehen ne, ha quihndë cumaji

camahani cuinechan sa ngañi rë cjuatsehen. <sup>3</sup> ¿Há hyuun ta ngayejen ni ne, hya xi caxtenda ngayaan xi cumatangun ngayaan cojo Jesucristu ne, hacuiin tu xi cuma tangun ni ngayaan cojo rë me ta hacuaha cojo xi cuma tangun ngayaan cojo cjuaveya rë me? <sup>4</sup> Ngajan xi sacuaha xi caxinchaniji tangun ngayaan cojo Jesucristu hya xi caxtenda ngayaan, cojo sa xi cuma tsejen xi camatangun ngayaan cojo cjuaveya rë me. Cuatjin caxinchaniji ngayaan cojo sa xi sacuatjin xi cavuya Jesucristu cjuahñu ngatsë rë Nahmi naja xi jemu jyë hnga me cojo Hasen rë me ne, hacuanitjin ni ngayaan ta sacú naja cjuahñu xatsë xi tivanguen cojo ngasunhdë naja.

<sup>5</sup> Sa xi camatangun ngayaan cojo ngu cjuaveya sacuaha cjuaveya rë Jesucristu ne, hacuaha cama tangun ngayaan cojo ngu cjuahñu sacuaha cjuahñu xatsë rë me. <sup>6</sup> Hacuaha hyan ta ngayaan ne, sacuaha xi casetaha tangun ngayaan cojo Jesucristu xcun cru, cojo sa xi cjuë cuetsun yojo tsehen naja, hane cuatjin xi ha quihndë hacuiin cuanguen nduju sa ndiya rë cjuatsehen. <sup>7</sup> Ta yo xi ha cahme ne, ha camandaya tsëhë cjuatsehen. <sup>8</sup> Sa xi cuatjin caveyan cojo Jesucristu ne, vetahantacun xi hacuaha cuatjin cuinechan cjuahñu cojo rë me. <sup>9</sup> Hacuaha hyan ta Jesucristu ne, quihndë xi ha cavuya me cjuahñu ne, ha quihndë cuyaaïn cueya nga me ngu ndiya. Cjuaveya ne, ha quihndë vitexaaïn rë me. <sup>10</sup> Xi cahme me ne, ngu ndiya ni cahme me xi cuma rë cjuatsehen; peru quihndë xi tacun nga me cjuahñu ne, tacun me xi cuma rë Nina. <sup>11</sup> Cuatjin nuju ngayun ne, nihñucueundun ni xi caveyan camahani xi cuma rë cjuatsehen, nihñucueundun xi nechun cjuahñu xi cuma rë Nina xi tjin tangun cjuatacun nuju cojo Jesucristu.

<sup>12</sup> Vëhë xi ngayun ne, xicatuun sa cahndë xi cjuatsehen cuitexa nuju; xicanihñuu sa yëjë ni hacutjin meje rë yojo jyë nuju. <sup>13</sup> Xicatuun sa yojo nuju cojo cjuatsehen ta tuhun yojo nuju cojo Nina, sacuaha nima xi cavuya cjuahñu ngayun. Yojo nuju ne, miji rë xi sahmi xa rë cjuatsehen ta meje rë xi sahmi xa rë cjuandaja. <sup>14</sup> Sacuaha cjuatsehen ne, ha quihndë vitexaaïn nuju ta, tsëhë xi hacuiin ley tivitexa nuju ta cjuandaja rë Nina ne, vëhë tivitexa nuju.

#### *Yo meje rë xi tahan yojo naja cojo*

<sup>15</sup> Sa cuatjin ne, ¿mé xi ndatjin nihña? ¿Há nihña sa cjuatsehen tsëhë xi hacuiin ley tivitexa naja ta cjuandaja rë Nina tivitexa naja? ¡yéya, hacuiin cuatjin! <sup>16</sup> Ngayun ne, ha ndaja hyun ta sa xi tuhun yojo nuju cojo cjuatsehen xi cuinuhyun tsëhë yëjë ni hacutjin vitexa nuju cjuatsehen ne, hatuxa tjihñu ngayun cojo cjuatsehen jan, hacuaha sacú nuju cjuaveya. Peru sa xi tuhun yojo nuju cojo Nina xi cuinuhyun tsëhë me ne, hatuxa tjihñu ngayun cojo Nina, hacuaha nujuuhyunun ndiya rë cjuandaja. <sup>17</sup> Titjun ne, hatuxa tjihñu ngayun cojo cjuatsehen. Peru nacuechji rë Nina ta quihndë ne, ha canuhyun cojo ngu ñaja xahasen nuju tsëhë cjuachacun xi casahmi Nina xi camachaya nuju. <sup>18</sup> Hane xi ha camandaya ngayun tsëhë cjuatsehen ne, catuhun yojo nuju cojo ndiya rë cjuandaja. <sup>19</sup> Tichjá cojo nuju cojo cjuaxa xi chjaain cuijne rcun, ngatsë rë xi hvë xi jemu chja cuijne rcun cjuatacun xi tichjá cojo nuju. Titjun ne, catuhun yojo nuju cojo cjuatsehen, cojo sa xi suvá cjuatsehen yëjë ni xi nihñu. Peru quihndë ne, cuatjin meje rë xi tuhun yojo nuju cojo ndiya rë cjuandaja cojo sa xi cuma cjuë jyë nuju xcun Nina.

<sup>20</sup> Hya xi tjihñu ngayun cojo cjuatsehen ne, ndaya tjin ngayun xi cuma rë ndiya rë cjuandaja. <sup>21</sup> Peru ¿mé ndajyihni casacu nuju hya? Tsajin, ta quihndë ne, tu ma sava nuju xi ninguitsjun xcusun xi canihñu ta, tsëhë xi hya xi cuatjin nihña ne, suvá cjuaveya sacú naja. <sup>22</sup> Peru quihndë ne, camandaya ngayun tsëhë cjuatsehen hacuaha catuhun yojo nuju cojo Nina. Vëhë xi tisacu nuju ngu cjuatacun tyjahi xi tsajin cun rë, tisacu nuju ngu xahasen tyjahi, hacuaha hya xi cuijnetaha ne, sacú nuju ngu cjuahñu xatsë. <sup>23</sup> Sacuaha chji xi sacú naja tsëhë cjuatsehen ne, hacui cjuaveya. Peru cjuandaja xi Nina sua naja me, tu cjuatjo ni sacú naja hya xi tjin tangun cjuatacun naja cojo Nai naja Jesucristu. Hane sacú naja cjuahñu xatsë.

## 7

#### *Xcusun xi vicuya naja ley rë cjuavixan*

<sup>1</sup> Ngayujun ni matsejen ne, ha hyun xi hmí rë ley. Vëhë xi ha hyun xi ley ne, vitexa naja jinguyëjë rë xi nechun cjuahñu. <sup>2</sup> Sacuaha ngu chjuun xi cavixan na cojo xihin rë na ne, chja ley rë Moisés ta sacuaha xi tjihñu na cojo cha jinguyëjë rë xi tacun cha cjuahñu. Peru sa xi xihin rë na cueya cha ne, na vëhë ne, ha ndaya tjin na tsëhë cjuavixan xi camá na cojo xihin rë na jan. <sup>3</sup> Vëhë xi sa xi tacun cuaha xihin rë na, hane na vëhë ne, cjuaha na jingu sa xihin ne, jemu jyë jyë rë na. Peru sa xi cueya xihin rë na jan ne, ndaya tjin na tsëhë cjuavixan xi camá na, hacuaha tsajin mé jyë rë na sa xi cuixan nga na ngu ndiya cojo jingu sa xihin.



<sup>4</sup> Cuanitjin nuju ngayun, sacuaaha xi caveyun xi cuma rë ley ngatsë rë Jesucristu cojo sa xi cuma ndaya ngayun tsëhë ley, hane cuma tsëhë jingu sa me ngayun. Me vëhë ne, hacui Jesucristu, me xi cavuya cjuahñu. Cuatjin cavuya me cjuahñu cojo sa xi cuma nihña cjuandaja xi meje rë Nina. <sup>5</sup> Titjun hya xi cavinechan cojo yojo jyë naja ne, ley ne, catsingasca rë cjuatsehen ngajñi rë cjuatacun naja cojo sa xi nihña cjuatsehen. Hane ngatsë rë cjuatsehen xi canihña ne, vëhë xi cuechuntahan cjuaveya. <sup>6</sup> Peru quihndë ne, sacuaaha xi caveyan xi cuma rë xcusun xi catsihñu naja, sehe ndaya tjin ngayaan tsëhë ley. Cuatjin xi ha quihndë hacuiin tjihñu ngayaan cojo ley changá vëhë ta, tjihñu ngayaan cojo cjuaxatsë tsëhë Hasen rë Nina.

*Cjuatsehen xi hinha ngajñi yojo naja*

<sup>7</sup> Tsëhë xi quixi cuatjin ne, ¿há cuinújan xi jemu tsehen ley rë Moisés jan? ¡jéya, hacuiin cuatjin! Peru hveen mé xi hmí rë cjuatsehen hisca xi camachaya ná cjuaxatsë rë ley jan. Hya ne hveen xi ndajin tjin xi tsimeje xcusun xi tjin rë jingu sa xuta, hveen hisca xi camachaya ná cjuaxatsë rë ley xi chja cuitjin: “Xicanimiji xcusun xi tjin rë jingu sa xuta.” <sup>8</sup> Ngajan xi ngatsë rë xi camachaya ná cjuaxatsë rë ley jan ne, cjuatsehen ne, catsingasca rë cjuatacun naha, hane casahmi xi ngahan ne, jemu catsimeje xcusun xi tjin rë jingu sa xuta. Suva hya xi cjëe cumachaya ná cjuaxatsë rë ley ne, hya xi tsajin mé casahmi cjuatsehen cojo ná. <sup>9</sup> Titjun xi hveen xi hmí ley ne, sacuaaha xi jemu ndajiyihi tejña. Peru hya xi camachaya ná tsëhë cjuaxatsë rë ley jan ne, cavascaya rë cjuatsehen ngajñi rë cjuatacun naha, <sup>10</sup> hane sacuaaha xi cavéya ngahan. Hane cjuaxatsë rë ley vëhë ne, cahndë rë xi cavisecoo ná xi sacú ná ngu cjuahñu xatsë ne, sacuaaha xi catsiquehen ná. <sup>11</sup> Cuatjin camá ta, tsëhë xi ngatsë rë xi camachaya ná cjuaxatsë rë ley jan ne, cjuatsehen ne, cavindacha ná. Hane cojo cjuaxatsë rë ley jan ne, casacu ná cjuaquixi xi xín cavitejña tsëhë Nina.

<sup>12</sup> Ngajan xi yëjë ni cjuaxatsë rë ley jan ne, hatuxa cjuaxatsë rë Nina, hatuxa cjuaquixi, hatuxa cjuandaja. <sup>13</sup> Xi cuatjin ne, ley xi ndaja jan ne, ¿há cuma xi vëhë catsiquehen ná? ¿há cuma xi vëhë cavaxëxin ná tsëhë Nina? ¡jéya, hacuiin cuatjin cama! Cjuatsehen ne, cojo sa xi cumatsejen xi tsehen jain ne, casahmi xa cojo ngu xcusun ndaja cojo sa xi tsiquehen ná. Cuma cuinújan ne, hya xi machaya naja cjuaxatsë rë ley jan ne, ngajan ma tsejen xi jemu tsehen camahani cjuatsehen.

<sup>14</sup> Ha hyan ta ley rë Moisés jan ne, tsëhë Nina vë. Peru ngahan xi tsëhë ngasunhndë ngahan ne, sacuaaha xi caxteña ngahan xi cuihndë tsëhë cjuatsehen. <sup>15</sup> Hisca vijniircú xcusun xi sahme. Sahmee xcusun xi meje sahme ta sahme xcusun xi chuyiin camahani ná. <sup>16</sup> Quihndë xi sahme xcusun xi mijí sahme ne, ha ngajan ma tsejen ta ha hvë ta ley ne, jemu ndaja. <sup>17</sup> Peru xi cuatjin ne, hacuiin ngahan xi sahme cuatjin ta cjuatsehen xi hinha ngajñi yojo naha ne, vëhë xi sahmi cuatjin. <sup>18</sup> Ha hvë ta sacuaaha ngajñi yojo jyë naha vi ne, tsajin camahani hinha rë cjuandaja. Jemu meje sahme cjuandaja, peru maji. <sup>19</sup> Sahmee cjuandaja xi meje sahme ta tu cjuatsehen xi mijí sahme ne, vëhë sahme. <sup>20</sup> Peru quihndë xi sahme xcusun xi mijí sahme ne, ha ngajan ma tsejen ta hacuiin ngahan xi sahme cuatjin ta, cjuatsehen xi hinha ngajñi yojo naha ne, vëhë xi sahmi cuatjin.

<sup>21</sup> Ngajan xi ngahan ne, hatuxa cuitjin vátju má: hya xi meje sahme ngu cjuandaja ne, hya vutsején ta tjin mé xi sahmi xi ma sahme cjuatsehen. <sup>22</sup> Ngahan cojo cjuatacun naha ne, jemu chuya ná ley rë Nina. <sup>23</sup> Peru vutsején ta ngajñi yojo jyë naha ne, jiya sa ngu ley xi hacjahi. Hane ley xi hacjahi jan ne, sacuaaha xi ticjan cojo ley xi jiya ngajñi cjuatacun naha. Hacuaaha ley xi hacjahi jan ne, hacui ley rë cjuatsehen xi hinha ngajñi yojo naha. Hane vutsején ta ley jan ne, sacuaaha xi titsihñu ná. <sup>24</sup> ¡Jemu choho camahani má ná ngahan! ¿yo xi cuaxëtje ná tsëhë yojo jyë naha vi ni? ta, ngatsë rë yojo naha vi ne, sacú ná cjuaveya. <sup>25</sup> Suá nacuechji rë Nina ngatsë rë Nai naja Jesucristu ta me vëhë cuaxëtje ná me. Ngajan xi ngahan ne, ngu ladu ne, tjihñu cjuatacun naha cojo ley rë Nina, peru ngu ladu nga ne, tjihñu yojo naha cojo ley rë cjuatsehen.

## 8

*Hacutjin meje rë xi tjenguen ndiya rë Nina*

<sup>1</sup> Quihndë ne, tsajin camahani castigu xi cuma naja ngayaan xi tjin tangun cjuatacun naja cojo Jesucristu ta, <sup>2</sup> tsëhë xi quihndë xi tjenguen ndiya rë Nina xi sua naja cjuahñu xatsë ngatsë rë xa xi casahmi Jesucristu ne, vëhë xi ha tjin ndaya ngayaan tsëhë ndiya rë cjuatsehen xi sua naja cjuaveya. <sup>3</sup> Xcusun xi camaji casahmi ley rë Moisés ngatsë rë xi caain rë xutajyë sahmi chihin me sacuatjin chja ley ne, Nina ne, camá casahmi me. Nina catsingatju me Quihndi rë me xi cuma me ngu xuta sacuatjin ngayaan xutajyë. Catsingatju Nina Quihndi rë me jan xi tsicjé me cjuatsehen. Vëhë xi quihndi jan xi hmí rë Jesucristu ne, cahme me sacuaaha castigu ngatsë rë yëjë ni cjuatsehen xi sahmi xuta jyë. <sup>4</sup> Cuatjin

casahmi Nina cojo sa xi cuma nihña sacuatjin vitexa ley ta ngayaan ne, hacuiin tjenguen ndiya hacutjin xi meje rë yojo jyë naja ta tjenguen ndiya hacutjin xi meje rë Hasen rë Nina.

<sup>5</sup> Xuta xi tjengui me ndiya hacutjin xi meje rë yojo jyë rë me ne, sahmi tangun me cjuatacun rë me cojo xcusun xi meje rë yojo jyë rë me. Peru xuta xi tjengui me ndiya rë Hasen rë Nina ne, sahmi tangun me cjuatacun rë me cojo Hasen rë Nina. <sup>6</sup> Xuta xi tsiniya cacun me hacutjin xi meje rë yojo jyë rë me ne, hatuxa sacú rë me ngu cjuaveya ta tsajin jiya Hasen rë Nina cahntsua xahasen rë me, cuechiin me xcun Nina. Peru xuta xi tsiniya cacun me hacutjin meje rë Hasen rë Nina ne, hatuxa sacú rë me ngu cjuahñu xatsë cojo ngu cjuajeya ta ha jiya Hasen jan xahasen rë me hacuaha cuechú me xcun Nina. <sup>7</sup> Ngajan xi xuta xi tsiniya cacun me hacutjin xi meje rë yojo jyë rë me ne, hatuxa choho vëe me Nina ta, tsëhë xi mijí cuihndë me tsëhë cjuaxi vitexa Nina. Hisca maji vihndë me tsëhë cjuaxi vitexa Nina. <sup>8</sup> Xuta xi tjengui me ndiya hacutjin xi meje rë yojo jyë rë me ne, maji sahmi me sacuatjin chuya rë Nina.

<sup>9</sup> Peru ngayun ne, hacuiin tjengun ndiya hacutjin xi meje rë yojo jyë nuju ta tjengun ndiya rë Hasen rë Nina, sa xi jiya Hasen rë Nina cahntsua cjuatacun nuju. Peru sa xi ngu xuta tsajin rë me Hasen rë Jesucristu ne, xuta vëhë ne, hacuiin tsëhë Jesucristu me. <sup>10</sup> Peru sa xi jiya Hasen xi sua Jesucristu ngajñi rë cjuatacun nuju ne, yojo nuju ne, sacua ha xi cahme ngatsë rë cjuatsehen, peru hasen nuju ne, sacú rë ngu cjuahñu xatsë ngatsë rë xi Nina ne, tsicjë me jyë nuju. <sup>11</sup> Ha hyan ta Nina ne, catsicuya me Jesús cjuahñu. Hane sa xi jiya Hasen rë Nina ngajñi rë cjuatacun nuju ne, vëhë sahmi xi sua sa Nina cjuahñu rë yojo jyë nuju xi hatuxa hme.

<sup>12</sup> Vëhë xi ngayaan ne, tjin xcusun xi hatuxa meje rë xi nihña, peru mijí rë xi nihña sacuatjin vitexa yojo jyë naja ta <sup>13</sup> ngu xuta xi tisahmi me sacuatjin vitexa yojo jyë rë me ne, hatuxa cueya me. Peru ngu xuta xi cojo ngahñu xi sua Hasen rë Nina me ne, titsitjengui me xcusun xi meje rë yojo rë me ne, hatuxa sacú rë me ngu cjuahñu xatsë.

<sup>14</sup> Yëjë ni xuta xi vihndë me tsëhë Hasen rë Nina ne, me vëhë xi cjuaquixi xi quihndi rë Nina me. <sup>15</sup> Hasen xi casacu nuju ne, hacuiin ngu hasen xi tsihñu nuju cojo sa xi rcun nga cuma ngu ndiya ta, hasen vëhë ne, hacui ngu xi sahmi xi cjuaquixi xi cuma ngayun quihndi rë Nina. Hya xi nujan "¡Papá!" Nina Nahmi naja ne, <sup>16</sup> hya tichja Hasen rë Nina cojo hasen naja xi ngayaan ne, ha quihndi rë Nina ngayaan. <sup>17</sup> Hane tsëhë xi quihndi rë Nina ngayaan ne, vëhë xi hatuxa cuechú nixtin xi satë naja cjuandaja rë me. Hacua ha cojo ngayaan satë naja tsëhë cjuandaja xi satë rë Jesucristu ta, tsëhë xi quihndë ne, tivatjun cjuañihi sacuatjin cavatju Jesucristu. Vëhë xi hya xi cuma ngascan ne, hacuaha cojo ngayaan cuma yehe cuma hnga ngayaan cojo cjuatacun naja sacuatjin cama jyë cama hnga Jesucristu cojo Hasen rë me.

<sup>18</sup> Xi má ná ngahan ne, tsimii sahmi rë xi tivatjun ngayaan cjuañihi quihndë ta, tsëhë xi cjuandaja rë Nina xi sacú naja xi cuma ngascan ne, jercu tu ndaja camahani. <sup>19</sup> Yëjë ni xcusun xi casahmi Nina nguehe ngasunhndë ne, jemu siuya xi meje xati scuëë hacutjin cún hacutjin má cuma ngayaan quihndi rë Nina. <sup>20</sup> Ta ngasunhndë ne, tu mahya xi siu yëjë ni xi siu. Peru hacuiin hatuxa xcusun xi cacún vë camameje rë xi cuatjin camá ta Nina ne, cuatjin meje rë me xi cuma. Peru tjin ngu cjuetacun. <sup>21</sup> Cuechú nixtin xi yëjë ni xi casahmi Nina nguehe ngasunhndë ne, hisca cojo vëhë cuma ndaya ne, ha quihndë hacuiin hatuxa cjuehndu sa ta cuma ndaya sacuatjin cuma ndaya yëjë ni quihndi rë Nina. Hacua ha sacú rë cjuandaja sacuatjin sacú rë quihndi rë Nina cjuandaja. <sup>22</sup> Ha hyan ta hisca quihndë nixtin vihi ne, yëjë ni xi casahmi Nina ngasunhndë vi ne, sacua ha xi tivitsine sacua ha xi vitsine ngu chjuun xi meje tsin rë na quihndi. <sup>23</sup> Hane hacuiin súvã ni ngasunhndë xi cuatjin tivitsine ta hacua ha cojo ngayaan ne, tivitsine. Ha tjin naja Hasen rë Nina sacua ha hitsë tsëhë yëjë ni xi sacú naja xi cuma ngascan. Peru vitsine ta, tsëhë xi jemu meje naja xi Nina sahmi naja me quihndi rë me xi cjuaquixi hya xi cuaxëtje me yojo jyë naja. <sup>24</sup> Ngayaan ne, cavetjuntjen cojo sa xi cuetahan tacun Nina. Peru sa xi ha tjin naja ngu xcusun ne, ha quihndë hacuiin cuetahan tacun xi sehe sacú naja xcusun xi ha tjin naja jan. <sup>25</sup> Peru hya xi vetahan tacun xi sacú naja ngu xcusun xi cjëë sacú naja ne, jemu jyë tacun xi nechayan rë.

<sup>26</sup> Hacua ha ha chuva vëhë ni ne, Hasen rë Nina ne, visecoo naja, ngayaan xi caain naja nihña cjuandaja. Hisca hyaan jarë cjuandaja rë Nina xi ndatjin xi chjahyan. Peru súvã Hasen rë Nina ne, chjatje ngatsë naja cojo cjuatacun xi hisca cumaji cuinújan cojo cjuaxi naja. Vëhë xi sacua ha xi tu fëtacun ni. <sup>27</sup> Hane Nina, me xi vëë yëjë ni xi híncha cjuatacun naja ne, hacua ha vëë me cjuatacun rë Hasen rë me jan ta, tsëhë xi Hasen rë me jan ne, hatuxa chjatje ngatsë rë xuta ladu rë Nina sacuatjin meje rë Nina xi cuma.

*Nina sahmi me xi cuetjunndajan ngayaan*

<sup>28</sup> Ha hyan ta yëjë ni xcusun xi má nguehe ngasunhndë vi ne, sahmi Nina xi ndaja tsëhë xuta xi hmuacacun me Nina, xuta xi cavaxijin Nina sacuatjin xi meje rë me. <sup>29</sup> Hisca ntsacu

cavetsihin ne, ha tjín chjínè rë Nina cjuatacun rë yo xi meje rë me xi cuma xuta ladu rë me, hacuaha hisca hya cavejña ngu cacun me xi cuma xuta xi cuacun jan sacuaha Jesucristu Quihndi rë me. Cuatjín meje rë Nina cojo sa xi cuma titjún Jesucristu ngajñi rë jemu cjin xuta xi cuma sacuaha xicjin me. <sup>30</sup> Hacuaha xuta xi cuacun cavejña ngu cacun Nina jan ne, me vèhè xi cavaxijin Nina me; hacuaha xuta xi cuacun catsicjè Nina jyè rë jan ne, me vèhè xi casahmi yehe casahmi hnga Nina me cojo cjuatacun rë me.

<sup>31</sup> Quihndè ne, nguehe cuichjá sa ngu cjua cojo nuju. Tsèhè xi Nina tacun me ngatsè naja ne, tsajín camahani yo xi cuma sahmi naja condra. <sup>32</sup> Nina ne, catsichuvaain naja me Quihndi rë súv me ta casua me Quihndi rë me xi cahme ngatsè naja ngayejen ni. Hane vèhè xi hacuaha hatuxa sua naja me yèjè sa xcusun xi ndaja. <sup>33</sup> Tsajín yo xi cuinchajyè naja, ngayaan xi Nina cavaxijin naja me ta, Nina ne, me vèhè xi tsicjè me jyè naja. <sup>34</sup> Vèhè xi tsajín camahani yo xi ma cjan rë xi ngayaan cún naja. Tsajín ta, Jesucristu ne, me vèhè xi ha cahme me hacuaha ha cavuya me cjuahñu, hane me vèhè xi jemu casahmi jyè casahmi hnga Nina me cojo Hasen rë me ngajan hiscan tacun me cojo rë Nina. Hacuaha me vèhè xi tichjatje me ngatsè naja. <sup>35</sup> Ngajan xi tsajín camahani mé xcusun xi cuaxèxin naja tsèhè cjuahmutacun rë Jesucristu, handasa cuatjún cjuahñi, handasa sacuiyin hacutjín naxentjen yojo naja, handasa yo tsuyihiya tjengui naja cojo cjuahngatacun, handasa cuma jindya nangui naja, handasa cumachaja naja tsjian naja, handasa cuinechantahan tsavi xi mé xi cuma naja, handasa tsiquehen naja xuta. Hatuxa tsajín mé xcusun xi cuacun vè xi cuma cuaxèxin naja tsèhè cjuahmutacun rë Jesucristu. <sup>36</sup> Hacuaha camahindu ngujo cjua xcun xujun rë Nina xi chja cuitjín:

Yèjè ni hora ne, titsiquehen niji xuta ngu jo ngayin ngatsè rë xi ladu nuju ngayin; xi má rë xuta ne, ngayin ne, sacuaha chu tsánga xi cjue cueya chu ngayin.

Cuatjín camahindu. Sacuatjín camahindu tsèhè xuma xuta xi cuacun jan ne, hacuaha cuatjín tivatjún tijima. <sup>37</sup> Peru caa naja yèjè ni cjuacjintacun vèhè, hisca vetjun ndaja sa ta, tsèhè xi Jesucristu ne, visecoo naja me, tsèhè xi hmucacun naja me. <sup>38</sup> Hane ngahan ne, camangucácn ta tsajín mé xcusun xi cuma cuaxèxin naja tsèhè cjuahmutacun rë Nina: sa cjuaveya sa cjuahñu, sa ángel sa xuta xi ma titjún, sa cjuacjintacun xi tivatjún tijima, sa cjuacjintacun xi sehe nduva, sa xutacjín xi choho vèè naja sa chircun, <sup>39</sup> sa ngajan ngahnga nduva, sa nguehe nangui nduva, o sa tu mé ni xcusun xi yahnga xi casahmi Nina ne, cumaji cuaxèxin naja tsèhè cjuahmutacun xi tjín rë Nina cojo naja ngatsè rë xi tjín tangun cjuatacun naja cojo Nai naja Jesucristu.

## 9

### *Nina cavaxijin me xuta Israel*

<sup>1</sup> Quihndè ne, sacuaha ngahan xi tsèhè Jesucristu ngahan ne, nguehe cuichjá cjuaquixi, hacuiin vindácha nuju. Hane tsèhè xi jiya Hasen rë Nina ngajñi rë cjuatacun naha ne, vèhè xi hvè cojo cjuatacun naha ta cjua xi chjá ne, cjuaquixi hya xi chjá xi <sup>2</sup> jercu tu choho camahani má ná, jemu jyè cjuava xi jiya cahntsua zahasen naha. <sup>3</sup> Hisca má cácn ne, cjuèhya rë Nina xi cuaxèxin ná me tsèhè Jesucristu sa xi cojo cjuatacun vèhè ne, yèjè ni xuta xi tangun xutachanga naha cojo ne, cuma sacú rë me cjuandaja rë Nina. <sup>4</sup> Xuta xi cuacun vè ne, xuta Israel me. Me vèhè xi camá me quihndi rë Nina, camachaya rë me hacutjín jemu jyè hnga Nina cojo Hasen rë me, camachihin ngu jo compromisu rë Nina cojo rë me, casacu rë me ley rë Nina, camachaya rë me hacutjín meje rë xi chjaharcun rë Nina, casacu rë me cjua rë Nina hacutjín sua Nina me cjuandaja. <sup>5</sup> Me vèhè xi canduva me tjè rë xutachanga niji, hacuaha tjè rë me vèhè ne, canduva Jesucristu sacuaha ngu xuta. Hane Jesucristu jan ne, me vèhè xi Nina me tsèhè jingujyè ni ngasunhdè, hacuaha chjaharcun rë me yèjè nu yèjè nixtin. Cuatjín jain.

<sup>6</sup> Hacuín chjá xi cavetjincaain cjua xi cachja Nina cojo xuta Israel. Ha hyun ta xuta xi canduva tjè rë xutachanga xi hmí rë Israel ne, hacuiin yèjè me xi xuta ladu rë Israel xi cjuaquixi me. <sup>7</sup> Hacuaha xuta xi canduva tjè rë Abraham ne, hacuiin yèjè me xi ladu rë Abraham me xi cjuaquixi, ta cuitjín cachja Nina cojo Abraham: “Súv tjè rë quihndi riji Isaac ne, vèhè ni xuta xi cuma tjè riji xi cjuaquixi.” Cuatjín cachja Nina. <sup>8</sup> Cuma cunúnjan ne, hacuiin yèjè ni xuta xi canduva tjè rë Abraham xi jni xi yojo rë me xi cuma quihndi rë Nina ta, súv xuta xi tsin me sacuatjín cachja Nina cojo Abraham ne, me vèhè xi cuichja Nina xi tjè rë Abraham xi cjuaquixi. <sup>9</sup> Cuitjín cachja Nina cojo Abraham hatsèè: “Nixtin xi cuejñá xi cúa nga ne, hya tsin rë na Sara ngu quihndi xihin.” Cuatjín cachja Nina.

<sup>10</sup> Hacuaha hacuiin vèhè ni má yèjè cjua vè ta sacuaha catsijo quihndi rë Rebeca ne, ngu ni nahmi rë, me xi xutachanga niji xi hmí Isaac. <sup>11-12</sup> Hane hisca hya xi cjèè tsin quihndi xi cuacun jan, hacuaha cjèè sahmi xi ndaja xi ndajin ne, hya cachja Nina cojo Rebeca cuitjín: “Quihndi riji xi ngascan ne, cuma titjún tsèhè quihndi tjun.” Cuatjín cachja Nina. Cuatjín

camá cojo sa xi cuma tsejen xi Nina ne, tjin rë me chuva rë xi cuaxijin suvá me tu yo ni xi meje rë me, hacuaha tsimii sahmi rë tu mé ni xcusun xi casahmi xuta jan. <sup>13</sup> Hacuaha camahindu xcun xujun rë Nina cuitjin: “Cha Jacob ne, catsíhmucacun cha, peru cha Esau ne, choho cahvë cha.” Cuatjin camahindu.

<sup>14</sup> Xi cuatjin ne, ¿há cuinújan xi Nina ne, cuaaintjin xi sahmi me? ¡yéya, hacuiin! ta <sup>15</sup> Nina ne cuitjin cachja me cojo Moisés: “Ngahan ne, sahme cjuandaja cojo yo xi meje sahme cjuandaja cojo, hacuaha cumayuma ná yo xi meje cuma yuma ná.” <sup>16</sup> Vëhë xi xuta xi sacu rë cjuandaja rë Nina ne, hacuiin xuta xi jemu meje rë, hacuiin xuta xi jemu sahmi vihi sahmi vëhë ta suvá Nina vaxijin me yo xi sua me cjuandaja rë me. <sup>17</sup> Xcun xujun rë Nina ne, chja Nina cojo me xi ma titjun tsëhë xuta Egipto cuitjin: “Ngahan ne, casahme xi camatitjun ngaye cojo sa xi cuatjin tsingáacun rë xuta ngahñu naha, hacuaha cojo sa xi xuta tsëhë yëjë ni ladu ne, cumachaya rë me yo ngahan.” Cuatjin cachja Nina. <sup>18</sup> Ngajan xi Nina ne, sahmi me cjuandaja cojo yo xi meje sahmi me cjuandaja cojo, hacuaha sahmi me xi mijí cuijne rcu yo xi meje rë me xi cuijnii rcu.

<sup>19</sup> Peru ngu ngayun ne, cuinújun cojo ná cuitjin: “Sa cuatjin ne, ¿mé má chaha rë xuta sahmi Nina? ta, tsëhë xi tsajin yo xi catsingatiin rë xcusun xi meje rë Nina xi cuma.” Cuatjin cuinújun. <sup>20</sup> Peru ngayun xi ngu xutajyë ni ngayun ne, ¿yo ngayun xi cuatjin meje cuinújun cojo Nina? Sacuaha ngu xcusun xi casahmi xuta ne, ¿há cuichja cojo xuta xi casahmi jan cuitjin: “¿Mé má cuitjin jyihi canihñu ná?” Cuatjin cuichja. <sup>21</sup> Sacuaha ngu cha chjinetiji ne, hatuxa tjin rë cha xa xi cjuaha cha ngu xtin ndasi ne, tsindaja cha jo tiji. Ngu tiji jan ne, jemu ndajiyihi ngu xa xi satë rë, hane tiji xingu jan ne, ngu xa xi chojyihí satë rë.

<sup>22</sup> Nina ne, tsëhë xi meje sua me cumachaya rë xuta hacutjin xi jemu cuma cjan rë me hacuaha jemu hñu ngahñu rë me ne, vëhë xi cojo yëjë cjuajeya xi tjin rë me ne, cacaa rë me cojo xuta xi hatuxa cuma cjan rë me cojo, xuta xi cavaxijin me xi hatuxa tsicjë me. <sup>23</sup> Cuatjin casahmi jyë cacun Nina, cojo sa xi sua me cumachaya rë xuta hacutjin xi jemu tjin rë me cjuandaja cojo xuta xi hatuxa sua me cjuandaja rë me, xuta xi caviyuju chjine Nina cojo tjun sa, cojo sa xi sacú rë xuta jan cjuandaja rë me. <sup>24</sup> Hane xuta xi cuacun vëhë ne, hacui ngayaan xi cavaxijin naja Nina. Hacuiin suvá ngajñi rë xuta Israel cavaxijin me ta hacuaha cojo ngajñi rë xutaxín cavaxijin me. <sup>25</sup> Sacuaha cjuarë Nina xi catsihindu profeta Oseas ne, cuitjin chja:

Xuta xi hacuiin xuta ladu naha me ne, cuechú nixtin xi sahme xuta ladu naha me; hacuaha cojo na xi hacuiin tsíhmucacun ne, cuechú nixtin xi jemu tsíhmucacun na. Cuatjin chja cjuarë Nina.

<sup>26</sup> Hacuaha cachja nga Oseas cuitjin:

Ngu cahndé jan ne, cuitjin cachja Nina cojo xuta: “Ngayujun ni ne, hacuiin xuta ladu naha ngayun.” Cuatjin cachja Nina.

Hane handasa cuatjin cachja Nina, peru cuechú nixtin xi ngajan ne, cuma xuta xi cuacun jan quihndi rë Nina quicun.

Cuatjin cachja profeta Oseas.

<sup>27</sup> Hacuaha cachja profeta Isaías tsëhë xuta tjë rë Israel cuitjin: “Handasa sacuatjin cjin tsumi tsëhë ndachacun cuatjin cjin cuma xuta tjë rë Israel ne, peru jemu chuva me xi cuetjutje me ta, <sup>28</sup> Nina ne, hatuxa sahmi me castigu nguehe ngasunhndé, hane xi cuechú nixtin vëhë ne, ngutjen ni sahmi me yëjë ni hacutjin xi cavejña me xi sahmi me.” Cuatjin cachja profeta Isaías. <sup>29</sup> Hacuaha hatsëë ne, cachja nga Isaías cuitjin:

Nina, me xi hatuxa matitjun tsëhë yëjë ni xi tjin, sa ngahnga sa ngasunhndé ne, sa xi casuaain naja me xuta xi cuma tjë naja ne, tangun ni café ngayaan sacuatjin café camahani xuta nandya Sodoma cojo xuta nandya Gomorra.

Cuatjin cachja Isaías.

*Catsitjungui xuta tjë rë Israel ndiya rë Nina*

<sup>30</sup> Xi cuatjin ne, cuma cuinújan xi Nina ne, catsicjë me jyë rë xutaxín ngatsë rë xi camangucacun xutaxín jan cojo Jesucristu, handasa hatsëë ne, hisca cuendaain rë xutaxín jan hacutjin sahmi Nina cojo jyë rë me. <sup>31</sup> Peru xuta tjë rë Israel ne, handasa jemu casahmi me ngahñu xi meje rë me xi tsicjë Nina jyë rë me ne, peru catsicjiin Nina jyë rë me. <sup>32</sup> ¿Mé má cuatjin catsicjiin Nina jyë rë me? Catsicjiin Nina jyë rë me ta, tsëhë xi xuta tjë rë Israel xi cuacun jan ne, meje rë me xi tsicjë Nina jyë rë me ngatsë rë xcusun xi casahmi me xcun ngasunhndé rë me. Peru tsëhë xi mijí cumangucacun me cojo Jesucristu ne, vëhë xi sacuaha xi caxtenguia rë me “ndyojo xi xtenguia rë xuta”. <sup>33</sup> Cjuarë vëhë ne, sacuaha cjuarë cachja Nina xcun xujun rë me xi chja cuitjin:

“Ngahan vejñávasen ngu xihin ngajan ndetjún Sión, hane xihin jan ne, sacuaha ngu ndyojo xi xtenguia rë xuta;

peru xuta xi cumangucacun cojo xihin jan ne, tsajin nu tsajin nixtin xi cuetju sava me.”

## 10

<sup>1</sup> Ngayujun ni matsejen ne, cuichjá cojo nuju ta xahasen naha ne, jemu meje rë xi xuta tjë rë Israel ne, cuetjutje me tsëhë jyë rë me. Hacuaha cuatjin fëhya rë Nina. <sup>2</sup> Cuma cuichjá cojo nuju ta xuta tjë rë Israel ne, hacuaha jercu tsiniya cacun me xi meje rë me Nina. Peru hacuiin ndaja vijnercu me hacutjin chuya rë Nina. <sup>3</sup> Hvíin me hacutjin tsicjë Nina jyë rë xuta. Peru jemu meje tsicjë súvá me jyë rë me. Vëhë xi casuaain me yojo rë me cojo ndiya rë Nina, cojo sa xi Nina tsicjë me jyë rë me. <sup>4</sup> Jesucristu ne, me vëhë xi casahmichihin me yëjë ni cjua xi vitexa ley rë Moisés, cojo sa xi yëjë ni xuta xi cumangucacun me cojo Jesucristu ne, cjuë jyë rë me.

<sup>5</sup> Moisés jan ne, hatsëë catsihindu me cjua vihi tsëhë xuta xi meje rë me xi cjuë jyë rë me ngatsë rë xi sahmi me hacutjin vitexa ley rë Moisés. Cuitjin catsihindu me: “Xuta xi sahmi me sacuatjin vitexa ley ne, sacú rë me cjuahñu xatsë ngatsë rë xi cuatjin sahmi me.” Cuatjin catsihindu Moisés. <sup>6</sup> Peru hacuaha cuitjin cachja nga Moisés tsëhë xuta xi cjuë jyë rë me ngatsë rë xi mangucacun me cojo Nina: “Mijí rë xi ningatehetacuín cuitjin: ¿Yo xi cjueniji hisca ngahnga?” —sacuaha xi cuinduvajne cojo Jesucristu—; <sup>7</sup> o ¿Yo xi cjuenje cahntsua nduchin? —sacuaha xi cuinduvaniji cojo Jesucristu xi jiya me ngajñi rë nima. <sup>8</sup> ¿Hacutjin chja Moisés xcun cjua rë Nina ni? Cuitjin chja: “Cjua rë Nina ne, ha jemu tiña tacun xi cuma nuju; ha híncha ntsuvun xi cuinújun, hacuaha ha híncha cahntsua xahasen nuju.” Cuatjin cachja Moisés. Cjua rë Nina jan ne, hacui cjua tsëhë hacutjin meje rë xi cumangutacun cojo Jesucristu, vëhë cjua xi titihín jimachaya rë xuta. <sup>9</sup> Sa xi ninguíxun cojo ntsuvun xi Jesucristu ne, Nina me, Nai nuju me, hacuaha sa xi cojo xahasen nuju macjain nuju xi catsicuya Nina Jesucristu cjuahñu ne, cuéjtunjun tsëhë jyë nuju. <sup>10</sup> Cuatjin cuma ta, tsëhë xi macjain naja cojo xahasen naja, sehe tsicjë Nina jyë naja, hacuaha ninguixen cojo ntsuvan hacutjin macjain naja, sehe cuaxëtje naja Nina.

<sup>11</sup> Cuatjin ta, cjua rë Nina ne, cuitjin chja: “Yëjë xuta xi mangucacun cojo Nina ne, hatuxa cuetjin savaain me.” Cuatjin chja xujun rë Nina. <sup>12</sup> Nina ne, tangun ni vutsejen me xuta tjë rë Israel cojo xutaxín ta me xi Nai naja ne, hacui ni me xi Nai rë yëjë ni xuta. Me vëhë xi jemu sua me cjuandaja rë me xi cuma rë yëjë xuta xi fehya rë me. <sup>13</sup> Hisca xujun rë Nina ne, cuitjin chja: “Yëjë xuta xi fehya me Nai naja cjuandaja ne, cuetjutje me.” Cuatjin chja xujun rë Nina. <sup>14</sup> Tjin rë yo xi cuichja cojo ná cuitjin: “Peru ¿hacutjin cuma cjuéhya xuta cjuandaja rë ngu xi hisca cjëë cumangucacun me cojo ni? Hane ¿hacutjin cumangucacun me cojo ngu xi hisca cjëë cumachaya rë me yo ni? Hane ¿hacutjin cumachaya rë me yo jan, sa xi tsajin yo sua cumachaya rë me ni? <sup>15</sup> Hane ¿hacutjin cuma cjue sua me cumachaya rë xuta yo jan, sa xi cjëë tsingatju Nina me ni?” Cuatjin cuichja. Xujun rë Nina ne, cuitjin chja: “Jemu ndatjin camahani hya xi fehe ngu me xi nduvacojo ngu cjuandajiyi.”

<sup>16</sup> Peru chjá ngahan ta hacuiin yëjë xuta cavihndë me tsëhë cjuandajiyi jan. Hacuaha cuatjin chja profeta Isaías xcun xujun rë Nina: “Ngayun, Nai niiji, jemu chúva me xi camangucacun cojo cjua niiji.” Cuatjin chja Isaías. <sup>17</sup> Ngajan xi cumangutacun hya xi ha camachaya naja ngu cjua, hane cumachaya naja hya xi yo cuinduva sua cumachaya naja ngu cjua xi chja hacutjin casahmi Cristu.

<sup>18</sup> Peru ¿há cjëë cumachaya rë xuta? chjá han. ¡Jéya, hatuxa camachaya rë me! Chja nga xujun rë Nina cuitjin: Jingujyë ni ngasunhndë ne, quiji cjua rë me, hisca hiscan vijnetaha ngasunhndë cavechu cjua rë me.

Cuatjin chja. <sup>19</sup> Cúya cuichjá nga ngu ndiya: Xuta tjë rë Israel ne, ¿há hvíin me ni? ¡Jéya! hatuxa vëë me ta, tsëhë xi catsihindu Moisés cjua xi cachja Nina cuitjin:

Ngahan ne, sahme xi jemu nihñu cjuaxín ngatsë rë xi sahme cjuandaja cojo xutaxín;

tsicján nuju ngatsë rë xi sahme cjuandaja cojo xuta xi hvíin me yo ngahan.

Cuatjin catsihindu Moisés cjua rë Nina. <sup>20</sup> Hacuaha catsacjuiin Isaías hya xi catsihindu me cuitjin:

Xuta xi hacuiin cavanguise ná me ne, me vëhë casacu rë me ngahan;

hacuaha xuta xi cuendaain rë me tsahan ne, me vëhë xi casuá camachaya rë me yo ngahan.

Cuatjin cachja Isaías. <sup>21</sup> Peru catsihindu Isaías cjua xi cachja Nina tsëhë xuta Israel cuitjin:

“Yëjë nixtin tsahan, xuta xi catsitjungui ná me.” Cuatjin catsihindu Isaías cjua rë Nina.

## 11

*Nina ne, cavaxijin me ngu jo xuta Israel*

<sup>1</sup> Quihndë ne, tsëhë xi cuatjin catsitjungui xuta Israel ndiya rë Nina ne, cuinengësë nuju ngu cjua: ¿há catsitjungui Nina xuta rë me ni? ¡Jéya, hacuiin cuatjin! Ta ngahan ne,

hacuaha ngu xuta Israel ngahan, tjë rë Abraham ngahan, hacuaha tjë rë Benjamín ngahan. <sup>2</sup>Hisca ntsacu cavetsihin ne, ha vëë Nina yo xi meje rë me xi cuma xuta ladu rë me, hacuaha tsitjunguiin me xuta xi cuacun vë quihndë. ¿Há vitsijiin nuju hacutjin chja xcun xujun rë Nina hiscan xi catsihindu profeta Elías cjuá xi cachjajyë me cojo Nina tsëhë xuta Israel? Cuitjin cachja Elías: <sup>3</sup>“Ngayun, Nai naha, ha catsiquehen xuta profeta nuju hacuaha ha catsinguetun me cahndë hiscan xi cjue cjuatjo xi cuma nuju. Ha tu suva sa tejña, peru hacuaha hisca cojo ngahan tivanguise ná me xi tsiquehen ná me.” Cuatjin cachja Elías. <sup>4</sup>Peru ¿hacutjin catsicuya Nina cjuá cojo Elías? Cachja Nina: “Ngahan ne, ha cavaxëxen yatu mil xuta, hane xuta xi cuacun jan ne, cjëë cjue cuixcuhnchi me xcun nina ndyojo xi hmí Baal.” Cuatjin cachja Nina: <sup>5</sup>“Hacuanitjin ni quihndë ta handasa jemu camachuva me peru tjin sa me xi hinchá ndiya rë Nina ta, tsëhë xi cavaxijin Nina xuta jan ngatsë rë cjuandaja rë Nina cojo rë me. <sup>6</sup>Peru camá ngatsë rë cjuandaja ni rë Nina cojo rë xuta xi cuacun vë, hacuiin ngatsë rë xcusun xi casahmi xuta jan. Ta sa xi cavaxijin Nina me ngatsë rë xcusun xi casahmi me ne, cjuandaja rë Nina ne, sacuaaha xi venguin chji rë.

<sup>7</sup>Ngajan xi cuma cuinújan xi hacuiin yëjë xuta Israel xi casacu rë me xi vanguise me ta ngujo ni xuta Israel xi cavaxijin Nina ne, me vëhë ni casacu rë me. Hane me xi yahnga jan ne, Nina casahmi me xi mijí cuinjercu me. <sup>8</sup>Camá sacuatjin camahindu xcun xujun rë Nina hiscan xi chja cuitjin: “Nina ne, casua me xuta xi cuacun vë ngu cjuatacun sacuaaha cjuatacun rë ngu cha chihi. Vetaain rcu me hacuaha vijni rcu me. Hisca quihndë ne, cuatjin cún me.” Cuatjin camahindu. <sup>9</sup>Hacuaha hatsëë cachja David cuitjin cojo Nina: Meje ná xi yëjë ni cjuandaja xi tuhun rë xuta ne, catuya sacuaaha ngu chen, sacuaaha ngu changa,

sacuaaha ngu xcusun xi xtenguiya rë me, sacuaaha ngu castigu xi vangui suvá me.

<sup>10</sup>Meje ná xi catama rcá me, cojo sa xi cumatsijin rë me;

hacuaha catindi ngaxtun me, cojo sa xi tsajin nu tsajin nixtin xi cuma quixi ngaxtun me. Cuatjin cachja David.

#### *Tivetjutje xutaxín*

<sup>11</sup>Quihndë ne, cuinengësë nuju ngu cjuá vi: Hya xi cavetjuxin xuta tjë rë Israel tsëhë ndiya rë Nina ne, ¿há ngu ndiya xa ni cachaja camahani me? ¡jéya, hacuiin cuatjin! ta ngatsë rë cjuatsehen rë xuta tjë rë Israel xi cuacun jan ne, casua Nina cahndë xi cuetjutje xutaxín, cojo sa xi xuta tjë rë Israel ne, sahmi me cjuachini. <sup>12</sup>Ngajan xi ngatsë rë cjuatsehen rë xuta tjë rë Israel jan ne, jemu casacu rë xuta ngasunhndë cjuandaja rë Nina. Ngatsë rë xi cachaja xuta tjë rë Israel ndiya rë Nina ne, jemu casacu rë xutaxín cjuandaja rë Nina. Peru sa xi cuatjin camá ne, hya xi sacú nga rë xuta tjë rë Israel ndiya rë Nina ne, jercu sacú sa rë xuta ngasunhndë cjuandaja rë Nina.

<sup>13</sup>Quihndë ne, ngayun xi xutaxín ngayun ne, ngeuhe cuichjá sa cojo nuju ngu jo cjuá matejjen. Ngahan ne, casuaxa ná Nina xi cjuë suá cumachaya rë xutaxín cjuá rë Nina. Vëhë xi jemu sahme nguñajacacun xa naha, <sup>14</sup>cojo sa xi cuma chini xuta xi tjë rë xutachanga naha cojo nuju. Hane xi cuatjin ne, cuisécoo rë xi cuetjutje ngu jo me. <sup>15</sup>Ngatsë rë xi catsitjungui Nina xuta tjë rë Israel ne, vëhë cavuxaha ndiya xi cuma xticia si xi tacun ngajñi rë Nina cojo xutaxín. Ngajan xi hya xi cjuahatsja nga Nina xuta tjë rë Israel jan ne, jercu ndajyihí camahani ngu cjuandaja xi cuetjucaa ta, sacuaaha xi ngu nima cuya cjuahñu.

<sup>16</sup>Sa xi chjahan ngu rquí nahyu hane cuinújan ta nahyu vëhë ne, cuma tsëhë Nina, hacuaha cojo yëjë ni nahyu xi vaqui jan ne, hacuaha tsëhë Nina. Hacuaha sa xi cuinújan xi tyjama rë ngu ya ne, cuma tsëhë Nina, hacuaha hisca cojo tsja rë ya jan ne, hacuaha tsëhë Nina.

<sup>17</sup>Hacuaha sa xi xtisun ngujo tsja rë ngu ya olivu ndaja hane cuinduva tsja rë ngu ya olivu nguñña setahacoo cojo ya olivu ndaja jan ne, sehe xi cuatjin cuma ne, tsja rë ya olivu nguñña jan ne, hacuaha sacú rë cjuahñu rë tyjama rë ya olivu ndaja jan. Ngayun xi xutaxín ngayun ne, sacuaaha tsja rë ya olivu nguñña má ngayun, xi casacu nuju cjuandaja rë Nina cahndë rë xuta tjë rë Israel xi sacuaaha tsja rë ya olivu ndaja má me. <sup>18</sup>Peru mijí rë xi nihñu yehe yojo nuju hane choho cuinújun tsëhë xuta Israel ta, sa xi meje nihñu cuatjin ne, ninguitsjun ta hacuiin tsja rë ya xi tsvangui rë tyjama rë ta tyjama ne, vëhë tsvangui rë tsja rë ya.

<sup>19</sup>Cuma cuinújun cojo ná cuitjin: “Peru catsitjungui Nina ngu jo xuta tjë rë Israel cojo sa xi ngahan ne, cuma tsëhë Nina ngahan.” <sup>20</sup>Cuatjin cuma cuinújun hane cjuaquixi cjuá vëhë. Ngatsë rë xi camanguaaaincacun me cojo Jesucristu ne, vëhë xi catsitjungui Nina me. Hane ngayun ne, ngatsë ni rë xi camangutacun cojo Jesucristu ne, vëhë xi casacu nuju cahndë vë. Peru mijí rë xi nihñu jyë yojo nuju ta xi meje rë ne, rcun cuma hitsë. <sup>21</sup>Cuatjin meje rë ta, tsëhë xi Nina ne, sa xi catsinchataain me xuta tjë rë Israel xi hatuxa xuta ladu rë me ne, hacuaha tsinchataain nuju me. <sup>22</sup>Cahyun ni ne, Nina ne, jemu ndaja me peru hacuaha

jemu cjan rë me. Ngu ladu ne, jemu cjan rë me cojo xuta xi cavetjuxin me tsêhë ndiya rë Nina. Hane ngu ladu nga ne, jemu ndaja Nina cojo nuju, sa xi cuangunxcun cojo cjuandaja rë me. Peru sa tsajin ne, cojo ngayun tsitjungui nuju me. <sup>23</sup> Hane xuta tjë rë Israel xi cuacun jan ne, sa xi cuiyujuxin me xi manguaaincacun me cojo Nina ne, sacú nga rë me cahndë rë me ta Nina ne, hatuxa cuma sua nga me cahndë vëhë. <sup>24</sup> Ngayun xi xutaxin ngayun, hacuiin xuta ladu rë Nina ngayun titjun ne, peru Nina casahmi me ngayun xuta ladu rë me. Hane xi cuatjin sahmi me ne, hitsë sa chjaain sahmi me xi xuta tjë rë Israel ne, cuma nga me xuta ladu rë Nina ta, tsêhë xi xuta tjë rë Israel ne, hatuxa xuta ladu rë Nina me titjun.

### *Cuetjutje xuta tjë rë Israel*

<sup>25</sup> Ngayujun ni ne, meje ná xi cumachaya nuju ngu cjuaxi xi sehe casua Nina, cjuatahahma xi cjëë cumachaya naja. Meje ná xi cumachaya nuju cojo sa xi hacuiin nihñu yehe yojo nuju. Cjua xi cuichjá cojo nuju ne, cuitjin fi: jemu cjin xuta tjë rë Israel ne, vijinii rcu me cjua rë Nina. Cuatjin cuijnii rcu me hisca hya xi yëjë xutaxin xi cavaxijin Nina ne, cuisehen me ndiya rë Nina. <sup>26</sup> Sehe yëjë xuta tjë rë Israel ne, cuetjutje me tsêhë jyë rë me sacuatjin camahindu xcun xujun rë Nina:

Ngajñi rë xuta tjë rë Israel ne, cuetjuiñi ngu me xi cuaxëtje rë xuta, hane cuaxëxín me xcusun rë xuta xi tjë rë Jacob xi faharcuaain rë Nina.

<sup>27</sup> Hatuxa sahmechehen compromisu naha cojo xuta, hya xi cjuaháxen cjuatsehen rë me. Cuatjin cachja Nina.

<sup>28</sup> Ngu ladu ne, tsêhë xi catsitjungui xuta tjë rë Israel cjuandajyihí xi chja tsêhë Jesucristu ne, vëhë xi choho vëë Nina me, cojo sa xi ngayun xi xutaxin ngayun ne, satë nuju cjuandajyihí vëhë. Peru ngu ladu nga ne, tsêhë xi ha cavaxijin Nina me ne, vëhë xi Nina ne, hmucacun me xuta Israel jan, ngatsë rë xutachanga rë me. <sup>29</sup> Cuatjin ta tsêhë xi hya xi vaxijin Nina ngu xuta cojo hya xi sua rë me cjuandaja ne, hatuxa sehe tsindeyaain Nina cjuatacun rë me. <sup>30</sup> Ngayun xi má yun xutaxin, titjun ne, canuhyun tsêhë Nina. Peru quihndë ne, camayuma rë Nina ngayun ngatsë rë xi xuta tjë rë Israel ne, hacuaha vihndiin me tsêhë Nina. <sup>31</sup> Hacuanitjin rë xuta tjë rë Israel jan ta quihndë ne, hacuaha vihndiin me tsêhë Nina, cojo sa xi sacú rë me cjuayumatacun rë Nina ngatsë rë xi ngayun ne, casacu nuju cjuayumatacun rë Nina. <sup>32</sup> Nina ne, catsismicacun me yëjë ni xuta, cojo sa xi cuihndiin xuta tsêhë me, hane cojo sa xi hacuaha cumayuma rë me ngayëjë ni xuta.

<sup>33</sup> Nina ne, jercu jyihí cjuanchina xi tjin rë me, jercu jyihí cjuatacun xi vechutaha me, jercu vëë me. Maji vijnercun hacutjin tsingatahacacun me. Maji vijnercun hacutjin sahmi Nina. <sup>34</sup> Sacuatjin chja xujun rë Nina ne: "Tsajin yo vëë cjuatacun rë Nina. Tsajin yo camá catsinguixi rë Nina cojo cjua rë me. <sup>35</sup> Tsajin yo xi cojo tjun sa ne, casua rë Nina ngu cjuatjo, cojo sa xi Nina ne, hatuxa sahmi ngojo me cjuatjo rë xuta jan." Cuatjin chja xujun rë Nina. <sup>36</sup> Yëjë ni xcusun xi tjin ne, Nina catsingatahacacun me sehe catsindaja me ta, tsêhë xi meje rë me xcusun xi cuacun vë. Meje rë xi nihña jyë nihña hnga Nina yëjë ni nu yëjë ni nixtin. Cuatjin jain.

## 12

### *Hacutjin meje rë xi cuiyuju xuta ladu rë Jesucristu*

<sup>1</sup> Ngayujun ni ne, ngatsë rë yëjë ni xi sehe cachjá cojo nuju ne, vëhë xi meje ná xi ngundiyaxa ni tuhun yojo nuju cojo Nina sacuaaha ngu cjuatjo, peru ngu cjuatjo xi quicun, ngu cjuatjo xi hatuxa tsêhë Nina, ngu cjuatjo xi chuya rë me. Cuatjin nihñu ta, tsêhë xi Nina ne, jemu tjin rë me cjuayumatacun, hacuaha hatuxa ndatjin xi cuatjin chjahanrcun Nina. <sup>2</sup> Mijí rë xi cuangun tjengun ndiya rë xuta ngasunhndë vi ta cahndë rë vëhë ne, yëjë ni hora ne, tuhun cahndë xi Nina ne, tsindeya me ngayun xi sua nuju me ngu cjuatacun xatsë. Xi cuatjin ne, sacú nuju cjuaquixi mé xi meje rë Nina xi nihñu, mé xi ndaja, mé xi chuya rë Nina, mé xi cjuaquixi.

<sup>3</sup> Nina ne, casuaxa ná me xi cuichjá cojo xuta. Hane vëhë xi chjá cojo nuju ngayujun ni ta, mijí rë xi jemu nihñu yehe yojo nuju ta meje rë xi ningatuhuntacun hacutjin xi cjuaquixi, tu cutjin cjuandaja xi casua nuju Nina xi camá camangutacun jima ngu ngayun cojo Jesucristu. <sup>4</sup> Ha hyun ta yojo rë ngu xuta ne, tjin tsja, tjin ntsacu, tjin nguixin, tjin jingu sa xcusun tsêhë, peru hacuiin tangun xa xi sahmi yëjë xcusun xi cuacun vë. <sup>5</sup> Hacuanitjin naja ngayaan, handasa cjin má ngayaan ne, peru sacuaaha ngu ni yojo má ngayaan hya xi tjin tangun cjuatacun naja cojo Jesucristu. Ngu ngu ngayaan ne, sacuaaha ntsan má ngayaan ne, ngu ngu ngayaan ne, sacuaaha ntsacu má ngayaan, ngu ngu ngayaan ne, sacuaaha nguixin má ngayaan, peru ngu ni yojo má ngayaan.

<sup>6</sup> Vëhë xi xa xi casacu naja jima ngu ngayaan ne, hacuiin tangun ta tu tjin cjuandaja xi casua naja Nina ne, hacuanitjin ni xa xi satë naja. Sa xi casua nuju Nina xa xi cuiñujun cjuatacun rë me cojo xuta ne, tinújun, peru sacuatjin cojo ngahñu xi tjin nuju xi

mangutacún cojo Jesucristu ne, cuatjin tinújun. <sup>7</sup> Sa xi casua nuju Nina xa xi cuisecun rë jingusa xingueen ne, tisecun rë me. O sa xi casua nuju Nina xa xi cuicyun cjuar rë me ne, ticuyun. <sup>8</sup> Sa xi casua nuju Nina xa xi tuhun rë jingu sa xingueen ngu ndiya ndajyihí ne, cuatjin nihñu. Sa xi casua nuju Nina xa xi cuisecun rë jingu sa xingueen cojo tujún xi ma chaja rë me ne, tisecun rë me cojo ngu xahasen tyjahi, cojo ngu cjuatacun tyjahi. Sa xi casua nuju Nina xa xi chjuhunntsun ngu xa xi satë nuju ne, nihñu xa jan nguñajatacun. Sa xi casua nuju Nina xa xi chjuhuncuendun xuma xingueen xi mé má rë me o mé cjuacjintacun xi tivatju me tijima ne, sehe chjuhuncuendun me cojo cjuasua.

<sup>9</sup> Mijí rë xi jo xcun jo ntsuvun xi nihmutacún xingu xingu xingueen. Catamachohotacun cojo ndiya rë cjuatsehen, hane tuhun yojo nuju cojo ndiya rë cjuandaja. <sup>10</sup> Nihmutacun xingun sacuatjin nihñu hmu tacún tsuhun jain. Hacuaha chjuhunrcun xingun sacuaaha xi me vëhë xi hitsë sa ma titjun me tsujun. <sup>11</sup> Chjuhuncuendun nguñajatacun cuidadu nuju, hacuiin nihñu tsëhë. Meje rë xi sacuaaha xi quisechun ngayun xi tisecun nihñu xa rë Nai naja.

<sup>12</sup> Tuhun cjuasua xahasen nuju ngatsë rë xi Nina vetuhun tacun me. Caticaa nuju yëjë ni cjuañihí xi vatjun má. Hacuaha yëjë ni hora ne, nihñu oración nuju cojo Nina.

<sup>13</sup> Tisecun rë xuta ladu rë Nina hya xi tjin rë me cjuachaja. Hacuaha cojo cjuandaja chjuhunntsun xuta ngu nangui hya xi fehe me ndya nuju.

<sup>14</sup> Chjahyun cjuandaja rë Nina xi cuma rë xuta xi tsuyihiyatjengui nuju me cojo cjuahngatacun. Hacuiin chjahyun ngu cjuaxti xi cuma rë me ta ngu cjuandaja chjahyun.

<sup>15</sup> Tuhun cjuasua xahasen nuju cojo xuta xi sua rë me, hane xuta xi jihnda me ne, hacuaaha chjihndun cojo rë me. Xi cuatjin nihñu ne, tsejen xi hmutacún jain me.

<sup>16</sup> Nihñu tangun cjuatacun nuju cojo xingun xingu xingun ngayun. Hacuiin nihñu yehe yojo nuju ta xi meje rë ne, nihñu tangun cojo, handasa xuta xi yuma cjuatacun rë. Hacuaha hacuiin nihñu sacuaaha xi jercu vechutaha cjuatacun nuju.

<sup>17</sup> Mijí rë xi nicuyun ngu cjuachan xi casahmi xuta cojo nuju ta xi meje rë ne, nihñu ngu yëjë xi nihñu cjuandaja xcun yëjë ni xuta. <sup>18</sup> Sa xi cuma ne, nihñu ngu yëjë hisca hiscan vechu cjuatacun nuju, cojo sa xi cuma cuinechun ngu cjuandaja ngu cjuajeya cojo yëjë ni xuta. <sup>19</sup> Cuichjá cojo nuju sacuaaha xi quihndí naha ngayun: xicanihñundujun svun ngu cjuahngatacun xi sahmi xuta cojo nuju ta tuhun cahndë xi Nina ne, cuma cjan rë me cojo xuta xi casahmi jan. Ta Nina ne, cachja me xcun xujun rë me cuitjin: “Ngahan satë ná xi sahme ngojo cojo xuta tsehen; hatuxa ngahan sahme ngojo.” Cuatjin chja Nai naja. <sup>20</sup> Nihñu sacuatjin chja xujun rë Nina xi chja cuitjin: “Xuta xi choho vëë ri me ne, sa xi vojo rë me ne, tehe xi sinë me; hacuaaha sa xi xinda rë me ne, tehe xi cuihi me; sa xi cuatjin nihñi cjuandaja vëhë ne, nihñi xi cuma sava rë me.” Cuatjin chja xcun xujun rë Nina. <sup>21</sup> Xicatuun cahndë xi cjuatsehen ne, tsinguetsun rë cjuatacun nuju. Cahndë rë vëhë ne, cojo cjuandaja xi nihñu ne, ningquetsun cjuatsehen.

## 13

### *Hacutjin cuinuhyan tsëhë xutaxa rë*

<sup>1</sup> Meje rë xi ngayejen ni ne, cuinuhyan tsëhë xutaxa rë ta, tsëhë xi tsajin xutaxa rë xi viyuju me sa xi suaain Nina cahndë cuiyuju me. Hane xutaxa rë xi siu ne, cuatjin siu me ta, tsëhë xi casuaxa Nina me. <sup>2</sup> Vëhë xi xuta xi sahmi condra me xutaxa rë ne, sahmi me condra cjuar xi Nina cavitexa me. Hacuaha xuta xi cuatjin sahmi condra ne, sacú rë me ngu castigu. <sup>3</sup> Xuta xi sahmi cjuandaja ne, hacuiin tsacjun me xutaxa rë ta xuta xi sahmi cjuatsehen ne, me vëhë xi tsacjun me. ¿Há meje nuju xi tsajin mé rcun xutaxa rë? Nihñu cjuandaja, sehe xutaxa rë ne, cuaxëndaja me ngayun. <sup>4</sup> Cuatjin sahmi xutaxa rë ta, tsëhë xi casuaxa Nina me xi cuisecun nuju me. Peru sa xi nihñu cjuatsehen ne, meje rë xi rcun xutaxa rë ta, tsëhë xi hacuiin tu mahya xi yaha me xa xi sahmi me castigu ta, tsëhë xi casuaxa Nina me xi sahmi me castigu xuta xi hatuxa sahmi cjuatsehen. <sup>5</sup> Vëhë xi meje rë xi cuinuhyan tsëhë xutaxa rë, hacuiin suvá ni ngatsë rë castigu xi cuatjin cuma ta hacuaaha cojo ngatsë rë xi cojo cjuatacun naja ne, ha hyan ta ndatjin xi cuatjin nuhan tsëhë me.

<sup>6</sup> Hacuaha vëhë xi vechjun tujúnsa nuju ta, tsëhë xi hatuxa Nina caviyuju rë me xi fahacuenda me cjuacjintacun vë. <sup>7</sup> Tuhun rë jima ngu xutaxa rë xi satë rë me. Me xi faha tujúnsa ne, techjun cojo rë me; me xi faha tujún tsëhë xi xteña ne, hacuaaha techjun cojo rë me. Cuatjin tinuhyan tsëhë me xi satë rë xi cuinuhyan tsëhë, hacuanitjin chjuhunrcun me xi satë rë xi chjahanrcun.

### *Cjuahmutacun ne, vëhë sahmicihin sacuatjin vitexa ley rë Nina*

<sup>8</sup> Mijí rë xi yëjë ni nixtin quitjun tsëhë xuta, ta ngu ni xcusun xi hatuxa quitjen ne, xi nihña hmu tacun xingueen. Cuatjin ta, yo xi sahmi hmu cacun rë xuta ne, ha cojo vëhë ni ne, sahmicihin sacuatjin chja ley rë Moisés. <sup>9</sup> Ley vëhë ne, cuitjin chja: “Xicanindesuun cojo



rê ngu chjuun o cojo rê ngu xihin xi hacuiin tsujun, xicanicuun xuta, xicanihñuu cjuachêjë, xicanimuju ngu xcusun xi hacuiin tsujun.” Cjua vêhê cojo yêjë sa cjua xi chja ley jan ne, cuitjin vijne: “Meje rê xi nihñu hmu tacún xuta sacuatjin nihñu hmu tacún suvun yojo nuju.”<sup>10</sup> Cuatjin chja ley ta, ngu xuta xi tjin rê me cjuahmutacun ne, hacuiin choho sahmi me cojo xuta. Vêhê xi hya xi nihña hmu tacun xuta ne, ha nihñachehen sacuatjin chja ley xi cavitexa Nina.

<sup>11</sup> Cuatjin meje rê xi nihñu ta, tsêhê xi ha hyun ta ha cavechú nixtin xi ningascun rê cjuatacun nuju ta, tsêhê xi nixtin xi cuetjutjen tsêhê jyê naja ne, hacuiin cjin sa tacun, sacuatjin hya xi sehe tu camangutacun cojo cjua xi chja tsêhê Jesucristu. <sup>12</sup> Sacuaha xi nixten ne, ha tivatju, hane meje sahasen. Vêhê xi meje rê xi cuejñaxen xcusun xi má nixten, hane cuetseen nihña xcusun xi má nguinxtin. <sup>13</sup> Meje rê xi cuetseen nihña cjuandaja, sacuatjin meje rê xi nihña hya xi tujyehenyang nguinxtin. Mijí rê xi nihña cjuachihí, mijí rê xi va má ngayaan nechan sacuaha xi cheen hya xi tinihña ngu suhi, mijí rê xi nihña cjuachini, mijí rê xi nihña cjuatsehen cojo jingu sa yachjin, o sa xi hisca cojo jingu sa xihin, mijí rê xi chicjanyan tu mé ni xcusun, mijí rê xi nihña cjuaxintacun. <sup>14</sup> Peru nihñu tangun cjuatacun nuju cojo Nai naja Jesucristu, hane ha quihndê mijí rê xi ningatuhuntacun xi nihñu yêjë ni hacutjin fehya yojo jyê nuju.

## 14

### *Mijí rê xi cuinújantahan xingueen*

<sup>1</sup> Sacuaha ngu xuta ladu rê Jesucristu xi cjêê ndaja cuijnercu me yêjë ni cjuachacun xi macjain naja ne, tuhun cahndê xi cuisehen me ladu nuju, peru hacuiin xi chicjun cojo me ngajñi rê cjuavisiajmi nuju cojo rê me. <sup>2</sup> Cuichjá cojo nuju ngu cjua. Yahnga xuta xi ndaja vijne rcu me cjuachacun naja ne, jinê me tu mé ni xcusun comida. Peru yahnga me xi cjêê ndaja cuijne rcu me ne, ndeya ni jinê me. <sup>3</sup> Peru xuta xi jinê me yêjë ni xcusun ne, mijí rê xi sahmi xta me cojo xuta xi jinii yêjë ni xcusun. Hacuaha xuta xi jinii me yêjë ni xcusun ne, mijí rê xi cuichjataha me xuta xi jinii yêjë ni xcusun ta, tsêhê xi ha cafahatsja Nina xuta jan. <sup>4</sup> Cuma cuinújin: ¿mé cuenda nuju ngayun xi nújuntuhun rê mosu rê jingu sa xuta ni? Nai rê mosu jan ne, me vêhê cuichja me há ndaja há ndajin xa casahmi mosu rê me. Hane xuta ladu rê Nai naja jan ne, hatuxa cuetju ndaja me ta, tsêhê xi Nai naja ne, ma sahmi me xi cuetju ndaja xuta ladu rê me.

<sup>5</sup> Cuichjá nga cojo nuju ngu cjua. Yahnga xuta ne, tjin ni nixtin xi jemu faharcun me. Hane yahnga me ne, tangun yêjë ni nixtin xi cuma rê me. Meje rê xi jima ngu xuta ne, catamangucacun me cojo cjuatacun rê suvá me hacutjin meje sahmi me. <sup>6</sup> Me xi faharcun nixtin jan ne, hacuaha faharcun me Nai naja xi faharcun me nixtin hya. Hane me xi jinê yêjë ni xcusun comida ne, faharcun me Nai naja xi cuatjin jinê me ta, tsêhê xi sua me nacuechji rê Nina. Hane me xi jinii yêjë xcusun comida ne, hacuaha faharcun me Nai naja xi cuatjin jinii me ta hacuaha sua me nacuechji rê Nina.

<sup>7</sup> Hisca ngu ngayaan ne, hacuiin nechan cjuahñu ngatsê rê cjuatacun naja suvaan, hacuaha hacuiin cueyan ngatsê rê cjuatacun naja suvaan ta, <sup>8</sup> sa xi nechan cjuahñu ne, nechan ngatsê rê Nai naja, o sa xi cueyan ne, cueyan ngatsê rê Nai naja. Vêhê xi hatuxa tsêhê Nai naja ngayaan ne, sa xi cuinechan cjuahñu o sa xi cueyan. <sup>9</sup> Jesucristu ne, cahme me sehe cavuya nga me cjuahñu cojo sa xi cuma me Nai rê nima cojo Nai rê xuta xi siu quicun me.

<sup>10</sup> Vêhê xi tsajin mé tsêhê xi cuatjin nújantahan rê xingueen, tsajin mé tsêhê xi cuatjin nihña xta cojo xingueen ta, tsêhê xi ngayejen ni ne, hatuxa tjin xi cuechun xcun Nina ne, xi tsichuva me ngayaan cojo cjuatacun naja. <sup>11</sup> Cuitjin camahindu xcun xujun rê Nina cjua xi cachja me:

Tu tjin xi cjuaquixi xi tejña ngahan ne,

hacuanitjin ni tjin cjuaquixi cuechú nixtin xi yêjë ni xuta ne, cuinduva cuixcuhnchi me xcun,

hacuaha yêjë ni xuta ne, cuichja me ta ngahan xi Nina ngahan.

Cuatjin cachja Nina.

<sup>12</sup> Ngajan xi jima ngu jima ngu ngayaan ne, taancuendan rê Nina xcusun xi canihña.

### *Mijí rê xi tahan cahndê xi cjuinenguia xingueen ngajñi rê cjuatsehen*

<sup>13</sup> Vêhê xi ha quihndê mijí rê xi nichuvan xingueen cojo cjuatacun rê. Xi meje rê ne, xi cuejñangutacun xi tsajin nixtin xi nihña ngu xcusun xi sahmi xi cjuinenguia xingueen ngajñi rê cjuatsehen. <sup>14</sup> Ngahan ne, tjin tangun cjuatacun naha cojo Nai naja Jesús. Hane ha hvê, hacuaha camangucacun ta tsajin hisca ngu xcusun comida xi hatuxa tsavi xi xinê. Peru sa xi ngu xuta tsingatahacacun me xi tsavi vihi o tsavi vêhê xi xinê ne, xi cuma rê suvá me vêhê xi tsavi. <sup>15</sup> Sa xi cuetsun cjuatacun rê xingun ngatsê rê ngu xcusun xi scuêê

me xi xinu ne, ha quihndé tsajin nechunyun ndiya rê cjuahmutacun. Mijí rê xi ninguetsun cjuatacun rê xingun ngatsê rê ngu xcusun xi chinu ta, Jesucristu ne, cahme me ngatsê rê me vèhê. <sup>16</sup>Vèhê xi xicatuun cahndé xi choho cuichja xuta tsèhê xcusun xi ndaja xi nihñu ta, <sup>17</sup>tsèhê xi hya xi nechan ngahma gobiernu rê Nina ne, cuendaain rê tsèhê tu mé ni xcusun xi chinê o sa xi hyun. Xi sahmi ngujyê ne, xi tjín naja ngu xahasen tyjahi, ngu cjuajeya, ngu cjuasua xi sua naja Hasen rê Nina. <sup>18</sup>Xuta xi cuatjin sahmi me xa rê Jesucristu chuva vèhê ne, hatuxa chuya rê Nina tsèhê me, hacuaha ndaja cuichja xuta tsèhê me.

<sup>19</sup>Vèhê xi cuanguen tjenguen ndiya rê cjuajeya, hacuaha cuisecoon xingueen cojo sa xi cuma jyê sa cjuandaja rê Nina cahntsua xahasen naja xingu xingu ngayaan. <sup>20</sup>Cjuandaja xi casahmi Nina cojo xingueen ne, mijí rê xi ninguetsun ngayaan ngatsê rê xcusun xi chinê. Xi cjuaquixi ne, yèjê ni xcusun comida ne, ndatjin xi xinê. Peru ndajintjin xi xinêê ngu xcusun sa xi vèhê sahmi xi cuixuya ngu xingueen ngajñi rê cjuatsehen. <sup>21</sup>Xi ndatjin ne, hacuiin xinê yojo, hacuiin siuhun xan, hacuiin nihña tu mé ni xcusun xi sahmi xi cuixuya ngu xingueen ngajñi rê cjuatsehen. <sup>22</sup>Cjua xi ha macjain nuju ne, catamacjain sa nuju, peru tetjún cjuaja jan cahntsua cjuatacun nuju suvun cojo sa xi suvá ni Nina vèê me. Jemu ndaja tsèhê xuta xi cjuatacun rê me ne, vinchaainjyê rê me tsèhê cjuaja xi macjain rê me. <sup>23</sup>Peru sacuaha ngu xuta xi mangu majo cacun me tsèhê ngu xcusun xi cajinê me ne, quitjen me jyê xi cuatjin cajinê me ta, tsèhê xi hacuiin ngatsê rê xi mangucacun me cojo Jesucristu ne, vèhê xi cajinê me ta mangu majo cacun me xi cajinê me. Hya xi hacuiin ngatsê rê xi mangutacun cojo Jesucristu xi nihña ngu xcusun xi nihña ne, hatuxa quitjen jyê.

## 15

### *Meje rê xi nihña xcusun xi chuya rê xingueen*

<sup>1</sup>Sacuaha ngayaan xi ndaja vijne rcun cjuatacun xi macjain naja ne, meje rê xi nijyentacun, meje rê xi cuisecoon rê xingueen xi cjêê ndaja cuijne rcu me yèjê ni cjuachacun vèhê. Mijí rê xi nihña sa xcusun xi chuya naja suvaan ni. <sup>2</sup>Jima ngu ngayaan ne, meje rê xi nihña xcusun xi chuya rê xingueen, cojo sa xi hacuaha cojo me ndaja tsèhê me, cojo sa xi cuma jyê sa cjuandaja rê Nina cahntsua xahasen rê me. <sup>3</sup>Hisca Jesucristu ne, hacuiin casahmi me tu cutjin xi cachuya rê suvá me, sacuatjin cjuaja xi camahindu xcun xujun rê Nina hiscan xi cachja ngu xuta cojo Nina cuitjin: “Cjua xi cachja xuta xi choho cachja tsujun ne, ngahan choho cachja me tsahan.” Cuatjin camahindu. <sup>4</sup>Yèjê ni cjuaja xi camahindu xcun xujun rê Nina hatsèê nixtin ne, cuatjin camahindu cojo sa xi sacú naja cjuatacun. Hacuaha camahindu cojo sa xi scaa naja hacuaha sacú naja cjuetacun, sehe hitsê sa ndaja cuetahan tacun Nina. <sup>5</sup>Nina xi sahmi xi caa naja, Nina xi sua naja cjuetacun ne, catisua nuju me ngu cjuatacun xi cumatangun cjuatacun nuju cojo xingun xi tjengun ndiya rê Jesucristu. <sup>6</sup>Catisua nuju Nina cjuatacun vèhê, cojo sa xi ngayujun ni ne, ngu tangun cuma cjuatacun nuju xi nihñu jyê nihñu hnga Nina Nahmi rê Nai naja Jesucristu.

<sup>7</sup>Vèhê xi meje rê xi hatuxa chjuhunntsun xingun xingu xingu ngayun sacuatjin caphatsja naja Jesucristu, cojo sa xi cuma jyê cuma hnga Nina cojo Hasen rê me. <sup>8</sup>Hjá cojo nuju ta Jesucristu ne, canduva me xi cuisecoo me ngayun xuta tjê rê Israel. Hane cuatjin sahmicihin Jesucristu cjuaja xi cachja Nina cojo xutachanga niji. Canduva me xi tsingacun niji me xi Nina ne, hatuxa quixi me cojo cjuaja xi chja me. <sup>9</sup>Hacuaha canduva me cojo sa xi xutaxín ne, sahmi jyê sahmi hnga me Nina ngatsê rê cjuandaja rê Nina. Camahindu xcun xujun rê Nina cuitjin:

Ngahan ne, sahme jyê sahme hnga nuju ngajñi rê xutaxín, hacuaha hisca sê tsujun.  
Cuatjin camahindu.

<sup>10</sup>Hacuaha chja nga ngu cahndé cuitjin:

Ngayun xi xutaxín ngayun ne, hacuaha tuhun cjuasua xahasen nuju cojo xuta rê Nina.  
Cuatjin chja.

<sup>11</sup>Hacuaha chja nga cuitjin:

Ngayun xi xutaxín ngayun, nihñu jyê nihñu hnga Nina.  
Ngayen ni xuta ngasunhndé ne, meje rê xi nihña jyê nihña hnga Nina.  
Cuatjin chja.

<sup>12</sup>Hacuaha catsihindu Isaías xcun xujun rê Nina cuitjin:

Cuetjucun ngu xuta, tjê rê Isai,  
hane cuma titjun me tsèhê yèjê ni xutaxín.  
Hane xutaxín jan ne, cuetahacun me xuta jan.  
Cuatjin catsihindu Isaías.

<sup>13</sup>Nina, me xi sahmi xi ma vetahantacun Nina ne, catisua nuju me cjuasua cojo cjuajeya, ngayujun xi tjín ngu tacún cojo rê Jesucristu, cojo sa xi Hasen rê Nina ne, sua nuju ngahñu xi ndaja cuetuhun tacún Nina.

*Sua Pablo machaya rë xuta hacutjin sahmi me xa*

<sup>14</sup> Ngayujun ni matsejen ne, ha hvë cojo cjuatacun naha ta ngayun ne, quitsë rë zahasen nuju cojo cjuandaja, ha jemu vechú cjuatacun nuju, hacuaha ma ninguixun cjuatacun rë xingun xingu xingu ngayun. <sup>15</sup> Ngahan ne, cavetjucácun catsihindu nuju ngu jo cjuá vëhë ta, tsëhë xi mijí ná xi chaya nuju cjuá jan. Cuatjin catsihindu nuju ngatsë rë cjuandaja xi casua ná Nina, <sup>16</sup> xi sahme xa rë Jesucristu ngajni rë xutaxín. Tisahme xa sacuaha ngu nahmi, xi tisuá jimachaya rë xutaxín cjuandajiyi xi catsingatju Nina. Cuatjin sahme cojo sa xi cuma suá rë Nina ngu cjuatjo xi chuya rë me. Cjuatjo vëhë ne, hacui xutaxín, xi ha Hasen rë Nina cavaxëxin rë me xi cuma tyjahi cjuatacun rë me xcun Nina.

<sup>17</sup> Vëhë xi ngahan, xi tjin tangun cjuatacun naha cojo Jesucristu ne, ma vaxëndaja hitsë yojo naha tsëhë xa rë Nina xi tisahme. <sup>18</sup> Vetjiincácun xi cuichjá cojo nuju tu mé ni cjuá ta, suvá ni cjuá tsëhë hacutjin cjuatacun xi casua ná Jesucristu xi cachjá cojo xi casahme, cojo sa xi xutaxín ne, cavihndë me tsëhë Nina. <sup>19</sup> Cuatjin camá ta, tsëhë xi cojo Hasen rë Nina ne, jemu camá cjuarcun. Cuatjin xi ngahan ne, ha chichihin casuá camachaya rë xuta cjuandajiyi xi chja tsëhë Jesucristu, cavëtsehen hisca Jerusalén ne, cavéchu hisca hiscan ladu xi hmí Iliria. <sup>20</sup> Hatuxa casahme ngahñu xi casuá camachaya rë xuta cjuandajiyi jan hiscan xi cjëë camahani cumachaya rë xuta yo xi Jesucristu, cojo sa xi hacuiin hiscan xi tacunvasen xa xi jingu sa casahmi ne, ngajan cjué sahmejyë. <sup>21</sup> Casahme sacuatjin camahindu xcun xujun rë Nina hiscan xi chja cuitjin:

Xuta xi cjëë cumachaya rë me tsëhë me ne, cumachaya rë me;  
hacuaha xuta xi cjëë cuihndë me ne, cuijnercu me.  
Cuatjin camahindu.

*Vejnã Pablo xi cjue me Roma*

<sup>22</sup> Ngatsë rë vëhë xi casacuiin camahani ná cahndë xi cjué tjëngë nuju. <sup>23</sup> Peru quihndë xi cajnetaha xa xi sahme ladu vihi, hacuaha jemu hatsëë xi meje cjué tjëngë nuju ne, <sup>24</sup> meje scusehenya nuju xi cuátju nangui nuju hya xi cjué ngajan nación xi hmí España. Hane nixtin xi cuitejñataha hitsë cojo nuju ne, meje ná xi cuisecon ná hitsë xi cjué hisca España. <sup>25</sup> Peru ndicumahã ni ne, cjué nandya Jerusalén, xi cuisécoo rë xuta ladu rë Nina jan ta, <sup>26</sup> tsëhë xi xuta ladu rë Nina ngajan estadu Macedonia cojo xuta ladu rë Nina nguehe estadu Acaya ne, ndaja catsingatahacacun me xi tsingatju me ngu cjuandaja xi cuma rë xuta yuma xi siu ngajni rë xuta ladu rë Nina ngajan Jerusalén. <sup>27</sup> Ndatjin xi cuatjin catsingatahacacun xuta xi cuacun vë ta, tsëhë xi sacuaha xi quitjen me tsëhë xuta nangui Israel. Tsëhë xi xutaxín ne, casatë rë me cjuandajiyi xi casua Nina camachaya rë xuta tjë rë Israel, vëhë xi hacuaha satë rë me xi cuisécoo me xuta nangui Israel tsë tsë tujún xi tjin rë me. <sup>28</sup> Ngajan xi hya xi ha casahmechehen cjuacjintacun vëhë hacuaha ha casahme entregadu tujún jan ne, <sup>29</sup> sehe cuétju cjué España. Hane xi cuátju nangui nuju ne, cjué scusehenya nuju. Hacuaha hvë ta jemu sua naja Jesucristu cjuandaja rë me hya xi cjué tjëngë nuju.

<sup>30</sup> Ngayujun ni matsejen ne, ngatsë rë xi tjin tangun cjuatacun nuju cojo Nai naja Jesucristu hacuaha ngatsë rë cjuahmutacun xi sua nuju Hasen rë Nina ne, vëhë xi féhya nuju xi nihñu tangun cjuatacun nuju cojo ná, hane chjahyun rë Nina cjuandaja rë me xi cuma ná. <sup>31</sup> Cuatjin nihñu ngatsë naha, cojo sa xi cuaxëtje ná Nina tsëhë xuta xi vihndiin me tsëhë Nina ngajan Judea. Hacuaha chjahyun rë Nina cjuandaja xi cuma ná cojo sa xi hya xi cjuécane tujún ngajan Jerusalén ne, chuya rë xuta ladu rë Nina xi cuatjin sahme. <sup>32</sup> Cuatjin chjahyun rë Nina cojo sa xi, sa meje rë me ne, cuma cjué tjëngë nuju cojo cjuasua hacuaha cuitejñajenda hitsë cojo nuju xi cuécutaha nuju. <sup>33</sup> Nina, me xi sua naja cjuandaja cjuajeya ne, catsícoo nuju me ngayujun ni. Cuatjin jain.

## 16

*Tsingatju Pablo nina rë me*

<sup>1</sup> Nguehe cuichjá cojo nuju ta na Febe xingueen ne, jemu xuta ndaja na. Casatë rë na xa xi visécoo na xuta ladu rë Jesucristu xi ma tangun me nguehe nandya Cencrea. <sup>2</sup> Vëhë xi chjá cojo nuju ta, chjuhunntsun na sacuatjin xi meje rë xi nihñã ngayaan xi ladu rë Nina ngayaan. Chjuhunntsun na ta, tsëhë xi na vëhë ne, hacuaha tjin tangun cjuatacun rë na cojo Nai naja. Hacuaha tisecon rë na tu mé ni xcusun xi cuma meje rë na ta, tsëhë xi na vëhë ne, jemu cjín xingueen xi cavisecoo na. Hacuaha hisca ngahan ne, jemu cavisecoo na ngahan.

<sup>3</sup> Tuhun nina naha na Priscila cojo cha Aquila xihin rë na. Xuta xi cuacun vë ne, jemu sahmi me xa rë Jesucristu sacuatjin sahme ngahan, <sup>4</sup> hacuaha hisca caviyujutaha tsavi me yojo rë me xi cavaxëtje ná me. Vëhë xi jemu suá nacuechji rë Nina. Hacuaha hacuiin ngahan suva ni ta cojo yëjë xutaxín xi matangun me tsëhë xi camá me ladu rë Jesucristu ne, hacuaha sua me nacuechji rë Nina. <sup>5</sup> Hacuaha tuhun nina naha yëjë xuta ladu rë

Jesucristu xi matangun me ndava na Priscila cojo cha Aquila. Hacuaha ngu cha xi jemu vinga ná ne, cha Epeneto ne, tuhun rë cha nina naha. Cha vëhë xi tjun tjun camangucacun cha cojo Jesucristu ngajan estadu Asia. <sup>6</sup> Hacuaha tuhun nina naha na María, na xi jemu cavisecoo nuju jan. <sup>7</sup> Hacuaha tuhun nina naha Andrónico cojo Junias xingueen, me xi cavitejñaya tangun cojo ndavaya jan. Me vëhë ne, jemu jyë hnga me cojo cjuatacun rë me ngajñi rë yëjë ni apóstol, hacuaha hitsë sa tjun me cavisehen me ladu rë Jesucristu xi cuma ná ngahan. <sup>8</sup> Tuhun nina naha cha Amplias, cha xi jemu vinga ná, tsëhë xi tjin tangun cjuatacun niiji cojo Nai naja. <sup>9</sup> Tuhun nina naha cha Urbano, cha xi jemu sahmi xa rë Jesucristu sacuatjñin tiniña ngayaan. Hacuaha tuhun nina naha cha Estaquis, cha xi jemu vinga ná jan. <sup>10</sup> Tuhun nina naha cha Apeles, cha xi suvá tsejen xi jemu ndaja tjin tangun cjuatacun rë cojo Jesucristu. Hacuaha tuhun nina naha yëjë ni xuta rë cha Aristóbulo.

<sup>11</sup> Tuhun nina naha cha Herodián xingueen. Tuhun nina naha yëjë xuta rë Narciso, me xi hacuaha tjin tangun cjuatacun rë cojo Nai naja. <sup>12</sup> Tuhun nina naha na Trifena cojo na Trifosa, na xi jemu sahmi xa rë Nai naja. Tuhun nina naha na Pérsida, na xi jemu vinga naja jan. Na vëhë ne, hacuaha jemu casahmi na xa rë Nai naja. <sup>13</sup> Tuhun nina naha cha Rufo, cha xi cavaxijñin Nina xi tjin tangun cjuatacun rë cojo Nai naja. Hacuaha tuhun ngu nina naha cojo naa rë cha ta, me vëhë ne, sacuaha naa naha me. <sup>14</sup> Tuhun nina naha cha Asíncrito, cha Flegonte, cha Hermas, cha Patrobas, cha Hermes, hacuaha cojo sa yëjë xingueen xi siu me cojo cha xi cuacun vë. <sup>15</sup> Tuhun nina naha cha Filólogo, na Julia, cha Nereo cojo na tichja cha, cha Olimpas, hacuaha cojo sa yëjë xuta ladu rë Nina xi siu me cojo me xi cuacun vë.

<sup>16</sup> Tuhun rë xingun nina, cojo cjuandaja cojo cjuahmutacun cuitatsuhun xingun, sacuatjñin xcusun naja. Yëjë xuta ladu rë Jesucristu ne, hacuaha tsingatju me nina nuju.

*Ngu nga conseju xi sua Pablo*

<sup>17</sup> Ngayujun ni ne, cuichjá cojo nuju ta meje rë xi chuhuncuendun yo xuta xi sahmi xi chicjñun cojo xingun, yo xuta xi sahmi xi cjuinenguia ngu xingueen ngajñi rë cjuatsehen ta, tsëhë xi xcusun xi sahmi me ne, sahmi condra rë cjuachacun xi ha cachatayun. Naxunxun yojo nuju tsëhë xuta xi cuacun vë ta, <sup>18</sup> tsëhë xi vihndiñin me tsëhë Nai naja Jesucristu ta xi meje ni rë xahasen rë suvá me ne, vëhë ni xi vihndë me tsëhë. Hane cojo cjuahaxi xi visiajmi me ne, vindacha me xuta xi hvíñin ndiya rë cjuatsehen. <sup>19</sup> Yëjë ni xuta ne, ha machaya rë me cjuatsehë hacutjñin xi ngayujun ni ne, jemu ndaja nuhyun tsëhë Nai naja. Vëhë xi jemu ndama ná. Jemu meje ná xi cuechutaha sa cjuatacun nuju, peru xi nihñu cjuandaja. Hane cjuatsehen ne, meje ná xi sacuaha xi hyuun ndiya rë. <sup>20</sup> Hane cuechú nixtin xi Nina, me xi sua naja cjuandaja cjuajeya ne, ngutjen cuatëcja me cjuatsehen xi sahmi Satanás ngajñi nuju. Cjuandaja rë Nai naja Jesús ne, catisehen cahntsua xahasen nuju.

*Jingusa me tsingatju me nina rë me*

<sup>21</sup> Cha Timoteo, cha xi sahmi tangun cojo ná xa rë Jesucristu ne, tsingatju cha nina nuju. Cojo cha Lucio, cha Jasón, cojo cha Sosípater xingueen ne, hacuaha tsingatju cha nina nuju.

<sup>22</sup> Ngahan, Tercio, xi titsihindu cjuat rë Pablo xcun xujun vihi ne, hacuaha tsingatju nina nuju ngayujun ni xi tjin tangun cjuatacun nuju cojo Nai naja.

<sup>23</sup> Cha Gayo, cha xi casua ndava xi tejña ngahan ne, hacuaha sua cha ndava cha xi ma tangun yëjë ni xuta ladu rë Jesucristu ne, tsingatju cha nina nuju. Cha Erasto, cha xi má tesorero tsëhë nandya vihi ne, tsingatju cha nina nuju. Cha Cuarto xingueen ne, hacuaha tsingatju cha nina nuju.

*Pablo ne, vaxëndaja me Nina*

<sup>24</sup> Cjuandaja rë Nai naja Jesucristu ne, catama tsujun ngayujun ni. Cuatjñin jain. <sup>25</sup> Tahan nacuechji rë Nina ta, Nina ne, ma sahmi me xi viyuju cahndë cjuatacun nuju cojo cjuandajyihni xi chja tsëhë Jesucristu, cjuandajyihni xi ngahan cojo jingu sa apóstol ne, tihñin machaya rë xuta. Cjuandajyihni vëhë ne, hacui ngu cjuat xi jiyahma hisca hya xi cjëë cumandaja ngasunhndë. <sup>26</sup> Peru hisca quihndë casua Nina camachaya naja cjuandajyihni jan, quihndë xi casahmi me xi profeta ne, camá catsihindu cjuat rë me. Hane Nina xi tsajin nu tsajin nixtin cjuë me ne, ngatsë rë xi cuatjñin caviteja me ne, vëhë xi camachaya rë xuta tsëhë yëjë ni nación yëjë ni ladu cjuandajyihni vëhë, cojo sa xi yëjë ni xuta ne, cumangucacun me hacuaha cuihndë me tsëhë Nina.

<sup>27</sup> Ngu ni Nina xi vëë yëjë ni cjuatacun ne, nihña jyë nihña hnga me yëjë nu yëjë nixtin ngatsë rë Jesucristu. Cuatjñin jain.

## Carta xi tjuntjun catsihindu San Pablo xi cafahatsja xuta nandya Corinto

<sup>1</sup> Ngahan Pablo ne, casuaxa ná Jesucristu xi má ngahan apóstol tsèhé me, tsèhé xi cuatjin xi meje rē Nina. Hane ngahan cojo cha Sóstenes xingueen ne, <sup>2</sup> ningatjin ngu xujun vi tsujun, ngayujun ni xuta Corinto xi hacuaha xuta ladu rē Nina ngayun, ngayun xi cavaxijin Nina ngayun, tsèhé xi tjin tyahi cjuatacun nuju cojo Jesucristu. Hacuaha ningatjin xujun vihi tsèhé yějē xuta xi faharcun me Nai naja Jesucristu jinguyjē ni cahndé. Jesucristu jan ne, Nai rē xuta xi cuacun vèhé me, hacuaha Nai naja ngayaan me. <sup>3</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya.

### *Ximinchacun xi casua Jesucristu*

<sup>4</sup> Yasen ni suá nacuechji rē Nina ngatsē nuju ngayujun ni cojo ngatsē rē cjuandaja rē Nina xi casua nuju me quihndé xi tjin tangun cjuatacun nuju cojo Jesucristu. <sup>5</sup> Suá nacuechji rē Nina ta, quihndé xi tjin tangun cjuatacun nuju cojo Jesucristu ne, casua nuju Nina yějē ni. Casua nuju me chuva rē hacutjin ndaja cuinújun hacuaha ndaja cuijnercun cjuarē me. <sup>6</sup> Cjuandajyihí xi chja tsèhé Jesucristu ne, jemu ndaja cavisehen cahntsua xahasen nuju. <sup>7</sup> Vèhé xi ngayun ne, tsajin ngu cjuandaja rē Nina xi machaja nuju, jinguyjē rē xi cuinechunyun rē nixtin xi cumatsejen nga Nai naja Jesucristu. <sup>8</sup> Cuisecoo nuju Nina xi cuejñu hñu cjuatacun nuju jinguyjē rē xi nechun cjuahñu, cojo sa xi ngayun ne, tsajin mé jyé tjin nuju nixtin hya xi cuya nga Nai naja Jesucristu. <sup>9</sup> Nina ne, hatuxa sahmichihin me yějē cjuarē xi chja me, hacuaha me vèhé xi cavaxijin nuju me xi nihñu tangun cjuatacun nuju cojo Quihndi rē me, Nai naja Jesucristu.

### *Hacuiin ngu tangun ni siu cjuatacun rē xuta rē yungun*

<sup>10</sup> Ngatsē rē xi casuaxa ná Nai naja Jesucristu ne, cuichjá cojo nuju ta meje ná xi ngu tangun ni cjuarē cuinújun ngayujun ni, hacuiin xi cuisecjun cjuarē nuju. Nihñu tangun cjuatacun nuju cojo xingun. <sup>11</sup> Cuatjin chjá cojo nuju ta, tsèhé xi xuta rē Cloé ne, casua me camachaya ná xi tjin si ngajñi nuju cojo xingun. <sup>12</sup> Cuma cuinújan ne, ngujo ngayun ne, nújun cuitjin: “Ladu rē Pablo ngayin”; hane ngujo nga ngayun ne: “Ladu rē Apolos ngayin”; hane ngujo nga ngayun ne: “Ladu rē Pedru ngayin”; hane ngujo nga ngayun ne: “Ladu rē Cristu ngayin.” Cuatjin nújun. <sup>13</sup> Peru ¿há tjin jo jyan Cristu? ¿Há Pablo casetaha me xcun cru ngatsē nuju? ¿Há tsajin ne, há caxtenda ngayun xi ladu rē Pablo cuma ngayun? ¡Hacuiin cuatjin! <sup>14</sup> Hisca suá nacuechji rē Nina ta hisca ngu ngayun ne, cavitendaan nuju, suvá ni cha Crispo cojo cha Gayo xi caviténda cha. <sup>15</sup> Xi cuatjin camá ne, tsajin yo xi cuichja xi caxtenda ngayun xi cuma ngayun xuta ladu naha. <sup>16</sup> Haan, hacuaha caviténda sa xuta rē Estéfanas. Peru hveen há tjin sa xi caviténda. <sup>17</sup> Cuatjin casahme ta, tsèhé xi hacuiin catsingatju ná Jesucristu xi cuiténda xuta ta catsingatju ná me xi suá cumachaya rē xuta cjuandajyihí xi chja tsèhé me. Hacuaha hacuiin catsingatju ná me xi cuichjá sacuaha chja ngu xuta xi jemu ndaja nuhya rē, hane cuahacuenda xuta cjuarē naha cahndé rē xi cuahacuenda me ngahñu rē cjuaveya rē Jesucristu ngajan xcun cru.

### *Tjin rē Jesucristu ngahñu rē Nina hacuaha tjin rē me cjuatacun rē Nina*

<sup>18</sup> Cuatjin mijí rē xi chjahátahá rē ngahñu rē cjuarē cjuaveya rē Jesucristu xcun cru ta, tsèhé xi cjuarē vèhé ne, handasa ngu cjuaveya cjuangarca xi má rē xuta xi tivetjintjin me, peru xi cuma naja ngayaan xi tivetjuntjeen ne, cjuarē vèhé ne, tjin rē ngahñu rē Nina. <sup>19</sup> Cuitjin camahindu xcun xujun rē Nina cjuarē xi cachja Nina: Tsinguétsun cjuatacun rē xuta xi jemu vechú cjuatacun rē, hacuaha cjuatacun rē xuta xi jemu ndaja vijnercu me ne, tsinguejñu rē. Cuatjin camahindu.

<sup>20</sup> ¿Jaré cha xi jemu vechú cjuatacun rē? ¿Jaré cha xi vicuya cjuachacun? Hacuaha ¿jaré cha xi jemu ndaja ma visiajmi nixtin vihi? ¡Nina ne, catsicuya me suvá cjuangarca cjuatacun xi jemu vèhé xuta ngasunhdé vi! <sup>21</sup> Nina ta vechutaha jain cjuatacun rē me ne, cavejña ngu cacun me xi xuta ngasunhdé ne, cumaji sacúse rē me cojo suva ni cjuatacun rē me yo xi Nina. Cahndé rē vèhé ne, Nina ne, camameje cuaxéjte me xuta xi mangu cacun cojo rē me ngatsē rē cjuandajyihí xi nújin, handasa xi má rē xuta ne, ngu cjuangarca cjuandajyihí vèhé.

<sup>22</sup> Xuta tjé rē Israel ne, meje rē me xi sahmi Nina cjuarcun, hane xutaxín ne, vanguise me xi jemu cuechú cjuatacun rē me. <sup>23</sup> Peru ngayin ne, tihin machaya rē xuta cjuarē tsèhé me xi catsingatju Nina, me xi cahme xi casetaha xcun cru. Ngu ladu ne, cjuarē vèhé sahmi xi xuta tjé rē Israel ne, sahmi condra me Nina. Hane ngu ladu nga ne, cjuarē vèhé ne, ngu cjuangarca

xi má rë xutaxín. <sup>24</sup> Peru xi cuma rë xuta xi Nina cavaxijin rë me, sa xuta tjë rë Israel o sa xutaxín ne, me xi Nina catsingatju rë jan ne, tjin rë me ngahñu rë Nina hacuaha tjin rë me cjuatacun rë Nina. <sup>25</sup> Hya xi machaya rë yahnga xuta yëjë xcusun xi choho cavatju Jesucristu camá ne, tsingataha cacun me xi Nina ne, jemu ngarca me hacuaha jemu ndaya cacun me. Peru hacuiin cuatjin ta, xcusun xi cuacun vë ne, tsingacun naja xi Nina ne, hitsë sa jercu vechú cjuatacun rë me xi cuma rë xuta xi jercu vechú cjuatacun rë, hacuaha hitsë sa jercu tjin rë me ngahñu xi cuma rë xuta xi jercu tjin rë ngahñu.

<sup>26</sup> Ngayujun ni ngayun ne, ha hyun ta Nina cavaxijin nuju me handasa hacuiin cjin ngayun xi vechú cjuatacun nuju, hacuiin cjin ngayun xi jercu tjin nuju ngahñu, hacuaha hacuiin cjin ngayun xi nchina ngayun. <sup>27</sup> Peru Nina ne, cavaxijin me xuta ngasunhndë xi ngarca, cojo sa xi tsisava me xuta xi jercu vechú cjuatacun rë. Hane cavaxijin me xuta ngasunhndë xi ndaya cacun, cojo sa xi tsisava me xuta xi jercu hñu ngahñu rë. <sup>28</sup> Hacuaha Nina ne, cavaxijin me xuta ngasunhndë xi yuma, xuta xi maxta tséhë, xuta xi venguiin chji rë, cojo sa xi tsingutsun Nina cjuatacun rë xuta xi jemu vengui chji rë xi má rë xuta ngasunhndë. <sup>29</sup> Xi cuatjin ne, yëjë xuta ne, cumaji cuaxëndaja me yojo rë me xcun Nina. <sup>30</sup> Hane ha suvá Nina casahmi tangun me cjuatacun nuju cojo Jesucristu. Hacuaha Nina vuxaha me cjuatacun naja, xi mangutacun cojo Jesucristu. Hacuaha ngatsë rë Jesucristu ne, fë jyë naja xcun Nina, tséhë Nina má gayaan, hacuaha vetjuntjeen. <sup>31</sup> Cuitjin jain má cojo sa xi nihña sacuatjin quitaha xcun xujun rë Nina hiscan xi chja cuitjin: “Sa xi yo xi meje cuaxëndaja yojo rë ne, cataxëndaja yojo rë, peru xi tséhë Nai naja.”

## 2

### *Chuva rë xi cachja Pablo cjuarë Nina*

<sup>1</sup> Peru ngayujun ni ne, hya xi cëjë nangui nuju ne, cachjaan cojo nuju cjuarë Nina sacuaha xi jemu ma chjá o sa sacuaha xi jemu vechú cjuatacun naha. <sup>2</sup> Cuitjin casahme ta, tséhë xi cavejñá cjuatacun naha xi ngu ni Jesucristu xi cahme me xcun cru tsingátaha cacún tséhë me, jinguyëjë rë xi cuitejñataha cojo nuju. <sup>3</sup> Hacuaha hya xi cavitejñataha cojo nuju ne, jemu ndaya cacún, hisca fatsë ngahan xi tsáccun. <sup>4</sup> Hacuaha hya xi cachjá cojo nuju cjuarë Nina ne, hacuiin jemu cjuarë yehe casahmexa cojo xi meje sahme xi cuijne tacún ta cajne tacún ngatsë rë ngahñu xi tjin rë Hasen rë Nina. <sup>5</sup> Cuitjin camá cojo sa xi cumangu tacún cojo Nina, peru hacuiin ngatsë rë cjuatacun rë xuta ta ngatsë rë ngahñu xi tjin rë Nina.

### *Cjuatacun rë Nina xi jercu vechú*

<sup>6</sup> Peru cojo xuta xi vechútaha cjuatacun rë me xi mangucacun me cojo Jesucristu ne, nújin cjuatacun xi jemu vengui chji rë. Peru cjuatacun vëhë ne, hacuiin cjuatacun tséhë xuta ngasunhndë vihi hacuaha hacuiin cjuatacun tséhë xuta xi vitexa nguehe ngasunhndë vihi, me xi titsingutsun Nina cjuatacun rë. <sup>7</sup> Cjuatacun vëhë ne, vëhë cjuatacun rë Nina xi jiyahma titjun. Peru Nina ne, hisca chaja sa xi cuejña ngasunhndë ne, ha tjin chjine rë me cjuatacun vëhë xi ndaja tsajan. <sup>8</sup> Hisca xi ngu xuta xi vitexa quihndë nixtin vihi ne, vijniircu me cjuatacun vëhë. Sa xi cajnercu me ne, hacuaha catsiquin me Nai naja, me xi jemu jyë hnga camahani me cojo Hasen rë me. <sup>9</sup> Peru tivetjucaa sacuatjin camahindu xcun xujun rë Nina hiscan xi chja cuitjin:

Xcusun xi cjëë camahani scuëë xuta, hisca cjëë camahani cuihndë me cjuarë tséhë, hacuaha hisca cjëë camahani tsingatahacacun me tséhë ne,

vëhë xcusun xi cavëhëchjine Nina xi cuma rë xuta xi hmu cacun rë me.

Cuatjin camahindu. <sup>10</sup> Xcusun vëhë ne, ngayin casua Hasen rë Nina camachaya ni. Hasen rë Nina jan ne, vëë yëjë ngarca ni, hisca cjuatacun rë Nina xi hitsë sa hma jiya.

<sup>11</sup> Ngajñi rë yëjë xuta ne, tsajin yo xi ma vëë cjuatacun rë ngu xuta ta suvá ni hasen rë me xi jiya ngajñi yojo rë me ne, vëhë xi vëë. Ha chuva vëhë ni ne, tsajin yo xi vëë cjuatacun rë Nina ta suvá ni Hasen rë Nina ne, vëhë xi vëë. <sup>12</sup> Ngayaan ne, hacuiin cachjahanntsan ngu hasen tséhë ngasunhndë ta cachjahanntsan Hasen xi catsingatju Nina, cojo sa xi cumachaya naja yëjë ni cjuandaja xi Nina casua naja me.

<sup>13</sup> Nújan tséhë cjuandaja vëhë, peru hacuiin cojo cjuarë yehe xi nduva tséhë cjuatacun rë xuta ngasunhndë ta cojo cjuarë nduva tséhë Hasen rë Nina. Hane cuatjin xi tahan cjuatacun rë Nina machaya rë xuta xi tjin rë me Hasen rë Nina.

<sup>14</sup> Xuta xi tsajin rë me Hasen rë Nina ne, maji fahatsja me cjuandaja xi sua Hasen rë Nina ta xi má rë me xi cuacun vë ne, suvá cjuangarca cjuandaja xi cuacun vë, hacuaha maji vijnercu me cjuandaja xi cuacun vë, tséhë xi suvá Hasen rë Nina sahmi xi vijnercuun. <sup>15</sup> Xuta xi tjin rë me Hasen rë Nina ne, ma tsichuva me yëjë ngarca ni, peru me xi cuacun vëhë ne, tsajin yo xi ma tsichuva rë me. <sup>16</sup> Cuitjin camahindu xcun xujun rë Nina: “¿Yo xi vëë cjuatacun rë Nina? ¿Yo xi cuicaya rë?” Cuitjin camahindu. Peru gayaan ne, tjin naja cjuatacun rë Jesucristu.

## 3

*Xuta sahmixa rë Nina*

<sup>1</sup>Ngayujun ni ne, camaji cachjá cojo nuju sacuaaha chjá cojo xuta xi ha tjin rë me Hasen rë Nina ta, tjin ná xi cachjá cojo nuju sacuaaha chjá cojo xuta ngasunhdë, sacuaaha xuta xi sehe cavisehen ladu rë Jesucristu. <sup>2</sup>Sacuaaha xi casuá nuju lechi xi siuhun. Hacuuiñ niñu casuá xi xinu ta, tsêhë xi nixtin hya ne, tangun ngayun cojo quihndi chihndë xi cjêë cuma sinë niñu. Hacuaniñtjin ni cjêë cuma chjuhunntsun yêjê cjuá rë Nina hisca quihndë, <sup>3</sup>tsêhë xi xuta ngasunhdë sa má ngayun. Cuatjin chjá cojo nuju ta jinguyêjê rë xi tjin sa cjuachini hacuaaha tjin sa si ngajñi nuju ne, xuta ngasunhdë cuaha sa má ngayun, hacuaaha tivanguntjengun sa ndiya rë xuta ngasunhdë. <sup>4</sup>Hya xi ngu ngayun nújun: “Ngahan ne, ladu rë Pablo ngahan”, hane ngu nga ngayun ne, nújun: “Ngahan ne, ladu rë Apolos ngahan” ne, ngajan matsejen xi xuta ngasunhdë cuaha má ngayun.

<sup>5</sup>Xi matsejen ne, ¿mé má Apolos ne, mé má Pablo ni? Ngayin ne, xuta sahmixa rë Nina ni ngayin, xi canújin cojo nuju cjuá rë Nina xi camacjain nuju. Jima ngu ngayin ne, canihñi xa xi casua nijí Nai naja. <sup>6</sup>Sacuaaha xi ngahan catsitjê, hane Apolos cavitejnu me nandá, peru Nina casahmi me xi camayehe xitjê. <sup>7</sup>Ngajan xi, xi matsejen ne, cha xi tsitjê cojo cha xi vitejnu nandá ne, hacuiñ jemu vengui chji rë cha ta me xi vengui jain chji rë ne, Nina, me xi sahmi xi ma yehe xitjê. <sup>8</sup>Cha xi tsitjê cojo cha xi vitejnu nandá ne, tangun ni vengui chji rë cha. Jimangu cha ne, cjuahatsja cha chji rë cha, sacuatjin xa xi casahmi jimangu cha. <sup>9</sup>Ngayin ne, tangun tiniñhi xa rë Nina, hane ngayun ne, sacuaaha nangui rë Nina xi tijimaxa cojo má ngayun.

Hacuaha ngayun ne, sacuaaha ngu ndihya xi Nina tsindaja me má ngayun. <sup>10</sup>Ngahan ne, tsêhë cjuandaja xi casua ná Nina ne, casahme sacuaaha ngu chjine vexo ne, cavejña ngu xihndëñaña, peru xcun xihndëñaña xi casahme jan ne, jingu sa xuta canduva casahmi me ngu ndihya. Peru jima ngu xuta xi sahmi me ndihya xcun xihndëñaña vêhë ne, meje rë xi tjin rë me cuidadu hacutjin xi sahmi me ta, <sup>11</sup>tsêhë xi tsajin sa cjín xihndëñaña xi tjin ta ngu tu tu ni má. Hane xihndëñaña xi ha tacun vë ne, hacui Jesucristu. <sup>12</sup>Quihndë ne, xi nihña xa rë Nina ne, cuejña xi yahnga xuta sahmixa me cojo oro, o sa quicha tyava, o sa ndyojo xi jercu vengui chji rë. Hane yahnga nga me ne, sacuaaha sahmixa me cojo ya, o sa cojo ndiji, o sa cojo xca ni. <sup>13</sup>Peru nixtin hya xi tsichuva naja Nina ne, hya cuma cumatsejen xcusun rë xa xi casahmi jima ngu xuta xi cuacun vë. Nixtin hya ne, cuejña Nina ngu ndihi xi tsichuva xa xi casahmi jima ngu me, cojo sa xi cumatsejen mé xcusun sa vêhë. <sup>14</sup>Sa xi xa xi casahmi ngu xuta scaa rë cojo suë rë ndihi vêhë ne, sacú rë me ngu cjuandaja rë xi sua Nina. <sup>15</sup>Peru sa xi xa xi casahmi ngu xuta jan cjuëya cojo suë rë ndihi vêhë ne, tsichajá me yêjê, peru me vêhë ne, cuetjutje me sacuaaha ngu xi vetjutje tsêhë ngu ndihi.

<sup>16</sup>Ngayujun ni ne, ha ndaja hyun xi sacuaaha yungun rë Nina má ngayun, ta Hasen rë Nina ne, hacuaaha tacuncahndë cahntsua xahasen nuju. <sup>17</sup>Sa xi yo xi tsinguetsun yungun rë Nina, Nina ne, hacuaaha jercu sahmi me castigu xuta jan, tsêhë xi yungun rë Nina ne, hatuxa tsêhë Nina. Hane ngayun ne, hacuaaha yungun rë Nina má ngayun.

<sup>18</sup>Xicavindachuun suvun rë yojo nuju. Sa xi tjin ngu ngayun xi ningatuhun tacún xi jemu vechú cjuatacun nuju sacuaaha cjuatacun rë xuta ngasunhdë vihi ne, nihñucundun chjuhunxun cjuatacun vêhë sacuaaha xi vechiñ cjuatacun nuju. Hane xi cuatjin nihñu ne, sehe cuechú tuhun cojo cjuaquixi ngu cjuatacun nuju. <sup>19</sup>Cuatjin meje rë ta, tsêhë xi cjuatacun rë xuta ngasunhdë vihi ne, xi cuma rë Nina ne, suvé cjuangarca. Hisca camahindu xcun xujun rë Nina cuitjin: “Nina ne, sahmi me xi xuta xi jemu vechú cjuatacun rë me vetju sava me xcun cjuandacha xi sahmi me.” <sup>20</sup>Hacuaha camahindu nga cuitjin: “Nina ne, vëë me xi cjuatacun rë xuta xi jemu vechú cjuatacun rë ne, tu mahya.” <sup>21</sup>Vêhë xi hisca ngu ngayan ne, mijí rë xi naxenndajan cjuatacun rë xuta ngasunhdë ta, tsêhë xi yêjê ngarca ni ne, tsujun: <sup>22</sup>há xi Pablo, há xi Apolos, há xi Pedru, há ngasunhdë, há cjuahñu, há cjuaveya, há xi nixtin quihndë, há xi nixtin nduva ne, ta yêjê ngarca ni ne, tsujun vë. <sup>23</sup>Hane ngayun ne, tsêhë Jesucristu ngayun, hane Jesucristu ne, tsêhë Nina me.

## 4

*Xa rë apóstol*

<sup>1</sup>Meje rë xi nihñucundun xi ngayin ne, xuta sahmi xa rë Jesucristu má ngayin, hacuaaha cachjihinntsín xa xi tihin cumachaya rë xuta tsêhë cjuatahahma xi sehe tisua Nina jimachaya naja. <sup>2</sup>Hacuaha jemu sahmi ngujyê xi ngu xuta xi tjin tsjá me xa ne, tsejen tsêhë me xi cuma cumangu tacuun cojo rë me. <sup>3</sup>Xi cuma ná ngahan ne, tsajin mé sahmi rë sa xi chjuhunchuvun ná cojo cjuatacun naha, o sa xi cjuahachuva ná xuta ngasunhdë. Hisca ngahan suva ne, fahachuvañ cjuatacun naha. <sup>4</sup>Xi má ná ne, tsajin jyê naha. Peru hacuiñ ngatsë rë vêhë xi hatuxa tsajin jyê naha. Nai naja ne, me vêhë xi tsichuva ná me. <sup>5</sup>Vêhë

xi mijí rë xi yo chjuhunchuvun, xi chaja sa cuechú nixtin xi cuinduva Nai naja ta, tsêhë xi me vëhë cuaxêcaatsejen me yêjê ni cjuua xi tsajin yo vëhë. Hacuaha cuaxêcaatsejen me yêjê cjuatacun rë xuta. Nixtin hya ne, cuaxëndaja Nina jima ngu xuta sacuatjin vechú chuva rë tsêhë jima ngu me.

<sup>6</sup> Ngayun ni ne, cachjá cojo nuju yêjê cjuua vëhë tsahan suva cojo tsêhë Apolos, cojo sa xi ndaja tsujun, cojo sa xi cuijnercun mé meje cuichja cjuua xi chja cuitjin: “Nihñuchuhun sacuatjin chja cjuua xi camahindu.” Cuatjin chja cjuua. Cuatjin meje rë cojo sa xi hacuiin nihñu yehe yojo nuju ngatsë rë ngu xi tjengun cjuua rë, hane me xi yahnga ne, nitjungun me. <sup>7</sup> ¿Yo casahmi xi hitsë sa vengui chji nuju ngayun xi cuma rë me xi yahnga? Hacuaha ¿mé tjin nuju xi hacuiin Nina casua nuju me? Sa xi Nina casua nuju me ne, ¿mé má naxunndujun yojo nuju sacuaaha xi tsajin yo xi casua nuju ni?

<sup>8</sup> ¡Sacuaaha xi ngayun ne, má nuju xi ha tjin nuju yêjê xi meje rë xahasen nuju, ha jemu nchina camá ngayun! Ha xuta xi matitjun camá ngayun xi má nuju. Hacuaha quihndë tsajin mé xi machaja nuju xi cumatihin nuju. Jemu ndatjin sa xi matitjun jain ngayun, cojo sa xi ngayin ne, hacuaaha cojo ngayin cumatitjun tangun ngayin cojo nuju. <sup>9</sup> Xi má ná ngahan ne, casahmi Nina xi venguiin chji niji ngayin xi má ngayin apóstol, sacuaaha xuta xi cjue cueya me ngatsë rë jyë rë me. Tivutsejen yêjê ni xuta cojo yêjê ni ángel hacutjin tivatjin tijima. <sup>10</sup> Ngatsë rë xi tjengun rë Jesucristu ne, má rë xuta sacuaaha xi jemu ngarca ngayin. Peru ngayun ne, xi má nuju ne, jemu quicun tacún ngatsë rë xi tjengun rë Jesucristu. Ngayin ne, jemu ndaya tacún, peru ngayun ne, jemu hñu ngahñu nuju. Ngayun ne, chjahárcun nuju, hane ngayin ne, chjaharcuaain niji. <sup>11</sup> Hisca quihndë sa ne, jindya niji tsêhë xi xini xi sihin, hacuiin ndaja tsjian chíjín, choho sahmi xuta cojo niji, hacuaaha tu nujiyhinsin ni. <sup>12</sup> Nihñi xa xi hai. Hora xi choho chja xuta cojo niji ne, ndaja nújin cojo rë me. Hora xi tsujiyihiya tjengui niji me cojo cjuahngatacun ne, caa niji cojo xcusun xi sahmi me. Tsajin mé nihñi cojo rë me. <sup>13</sup> Hora xi choho chja xuta tsijin ne, nindijin cjuua cojo rë me. Camá ngayin sacuaaha xtë xi tjin ngasunhdë. Hitsë sa chuva vengui chji niji xi cuma rë yêjê ni xcusun xi tjin. Hisca quihndë ne, cuanitjin vatjin má.

<sup>14</sup> Xi titsihindu nuju cuitjin ne, hacuiin xi tsisava nuju ta xi suá nuju conseju sacuaaha quihndi naha suva xi jemu hmú cacún. <sup>15</sup> Handasa tjin nuju tã mil xuta xi vicuya nuju cjuua xi chja tsêhë Jesucristu ne, peru nahmi nuju ne, ngu ni ngahan, tsêhë xi hya xi casua camachaya nuju cjuandajiyihi xi chja tsêhë Jesucristu hacuaaha cavisuhun ladu rë me ne, hya camá ngahan sacuaaha nahmi nuju. <sup>16</sup> Vêhë xi ngayujun ni ne, meje ná xi nihñu sacuatjin sahme ngahan.

<sup>17</sup> Ngatsë rë vëhë ne, titsingátju nuju cha Timoteo, cha vëhë xi sacuaaha quihndi naha xi jemu hmú cacún hacuaaha jemu ndaja sahmi chihin me xa tsêhë Nai naja. Me vëhë sahmi me xi cuitsjen nuju hacutjin tifë cojo ndiya rë Jesucristu, sacuatjin vicuyá rë xuta rë yêjê ni yungun jingujyë ni.

<sup>18</sup> Quihndë ne, yahnga ngayun ne, canihñu yehe yojo nuju xi cuatjin caningatuhun tacún xi cjueen cjue scútsejen nuju. <sup>19</sup> Peru ngahan ne, cuinduva xati scútsejen nuju, sa Nai naja meje rë me. Hane hya cumachaya ná hacuiin sacuatjin xi visiajmi xuta xi cuacun casahmi yehe yojo rë jan ta sacuatjin ngahñu xi tjin rë me. <sup>20</sup> Cuatjin sahme ta sacuaaha gobiernu xi sahmi Nina ne, hacuiin cojo suvá cjuua ni rë me xi sahmi me ta cojo ngahñu xi tjin rë me. <sup>21</sup> ¿Hacutjin meje nuju xi nduva scútsejen nuju, há xi cojo ngu castigu ne, o há tsajin ne, há cojo ngu cjuahmutacun, cojo cjuandaja cjuajeya?

## 5

### *Cjuatsehen xi casahmi ngu cha xuta rë yungun*

<sup>1</sup> Tjin cjuua xi ngajñi nuju ngayujun ni ne, jiyajñi ngu cjuatsehen xi hisca xutaxín sa ne, sahmi me. Chja cjuua ta ngu ngayun ne, cachjuhun chjuun rë nahmi nuju, camá chjuun nuju. <sup>2</sup> ¡Hane ngayujun ni ne, jercu naxunndujun yojo nuju! Cahndë rë vëhë ne, meje rë xi choho cuma nuju. Cha xi cuatjin sahmi xcusun vëhë ne, catetjuxin cha tsujun. <sup>3</sup> Handasa tsajin ngahan tejña cojo nuju ndyá ne, peru cjuatacun naha ne, sacuaaha xi ndyá tacun cojo nuju. Hane sacuaaha xi tejña cojo nuju ne, ngahan ne, ngatsë rë xi sahme xa rë Nai naja Jesús ne, chjá cojo nuju ta meje rë xi cuma castigu cha xi cuatjin sahmi xcusun vëhë. <sup>4</sup> Hya xi cuma tangun ngayun, hacuaaha cjuatacun naha ne, sacuaaha xi tacun cojo nuju ne, cojo ngahñu xi sua naja Nai naja Jesús ne, <sup>5</sup> nihñu entregadu cha xi cuajiyihi vë cojo Satanás, cojo sa xi cueya cha. Cuatjin nihñu, cojo sa xi cuetjutje hasen rë cha nixtin hya xi cuya nga Nai naja.

<sup>6</sup> Ndajin tjin xi cuatjin nihñu yehe yojo nuju. Ha hyun cjuua xi chja cuitjin: “Hitsë lihndi ni san rë pan ne, caa rë tsisatjen rë yêjê nahyu.” Cuatjin chja cjuua. <sup>7</sup> Meje rë xi chjuhunxun cjuatsehen vëhë, xi sahmi sacuaaha san rë pan, cojo sa xi cuma tyjahi cjuatacun nuju,



sacuaha nahyu xi tsajin san rë. Hacuaha hvë ta hatuxa tyjahi cjuatacan nuju ta, tsëhë xi Jesucristu ne, me xi sacuaha chu tsánga tsëhë suhi rë Pascua naja ne, ha cahme me. <sup>8</sup> Vëhë xi meje rë xi nihña suhi, peru hacuian cojo san rë pan xi changá, cuma cuinújan ne, hacuian cojo cjuatsehen ta, cojo nahyu xi tsajin san rë, cuma cuinújan ne, cojo cjuandaja cojo cjuaquixi.

<sup>9</sup> Catsihindu nuju xcun xujun xi ha catsingátju nuju ta mijí rë xi nihñu tangun cojo xuta xi sahmi cjuatsehen cojo ngu chjuun o sa cojo ngu xihin. <sup>10</sup> Xi cachjá cojo nuju cuatjin ne, hacuian meje cuichja xi meje rë xi cuetjunxun camahani tsëhë xuta ngasunhndë xi hincha ndiia rë cjuatsehen vëhë, o sa tjenguitaha me xi hacuian tsëhë, o sa ndacha, o sa faharcun me nina ndoyojo. Sa xi cuatjin nihñu ne, meje rë xi cuetjun camahani tsëhë ngasunhndë. <sup>11</sup> Xi vijne cjua xi catsihindu nuju vë ne, xi hacuian nihñu tangun cojo ngu xuta xi chja me xi ladu rë Jesús má me hane sahmi me cjuatsehen cojo ngu chjuun o sa cojo ngu xihin, o sa tjenguitaha me xi hacuian tsëhë me, o sa faharcun me nina ndoyojo, o sa ndesu me, o sa cha chihí me, o sa xi ndacha me. Ngu xuta rë yungun xi cuatjin xcusun rë ne, hisca mijí rë xi xinu niñu cojo rë me. <sup>12-13</sup> Satiin ná ngahan xi tsichúva xuta xi hacuian xuta rë yungun má me. Nina ne, me vëhë xi tsichuva rë me. Peru ngayun ne, meje rë xi nichuvun xuta xi xuta rë yungun me. Vëhë xi hacuaha meje rë xi naxunxun cha tsehen vë tsëhë ngajñi nuju.

## 6

### *Vinchajyë yahnga xuta ladu rë Jesús xicjin me ngajñi rë me*

<sup>1</sup> Hya xi tjin ngu ngayun xi tjin ngu jyë xi meje cuinchun tsëhë xingun ne, ¿mé má cuatjin vetju tacún xi xcun xuta xi hisca sahmicuendaain me Nina vangun chjahyun xi cumacuenda tsujun, cahndë xi cuangun xcun xuta xi ladu rë Nina me? <sup>2</sup> ¿Há hyuun xi cuechú nixtin xi ngayaan xuta ladu rë Nina nichuvan xuta ngasunhndë cojo cjuatacan rë me? Hane sa xi ngayun cuatjin nichuvun xuta ngasunhndë ne, ¿há maji nichuvun ngu jyë lihndi quihndë ni? <sup>3</sup> ¿Há hyuun xi ngayaan nichuvan ángel cojo cjuatacan rë ni? ¡Hitsë guan cjuacjintacun rë ngasunhndë vihi! <sup>4</sup> Vëhë xi sa tjin ngu jyë xicjin vëhë xi meje cuinchun ne, ¿há cuangun cueñju jyë vëhë xcun ngu xutaxín xi faharcuaain me xcusun rë yungun? <sup>5</sup> Nguehe cuichjá cojo nuju ngujo cjua cuitjin, cojo sa xi cuma sava nuju: ¿há tsajin ndastu ngu xuta xi vechú hitsë cjuatacan rë me xi cuma sahmi cuenda me tu mé ni si xi nihñu cojo xingun? <sup>6</sup> Peru ngu ngayun xuta ladu rë Jesús ne, vinchun jyë rë jingu sa xuta ladu rë Jesús, ¡hane hisca vanguncujun jyë vëhë xcun xuta xi sahmicuendaain me Nina!

<sup>7</sup> Xi cuatjin vinchun jyë rë xingun xingu ngayun ne, ngajan matsejen xi ngayun canichujún. Hitsë sa ndaja xi ningatuhun xi cumandacha ngayun. Hitsë sa ndaja xi ningatuhun xi cjue chëjë tsujun. <sup>8</sup> Cahndë rë xi cuatjin ningatuhun ne, tu ngayun vindachun hacuaha nichujun tsëhë xingun ngajñi nuju ngayun xuta rë yungun.

<sup>9</sup> ¿Há hyuun ta xuta tsehen ne, cumaji cuisehen me hiscan sahmi Nina gobiernu? Ha quihndë xicatuun cahndë xi cuma ndacha sa ngayun ta, yëjë xcusun xuta xi cuicun vi ne, cumaji cuisehen me hiscan sahmi Nina gobiernu: xuta xi sahmi me cjuatsehen cojo chjuun o sa cojo xihin xi hacuian tsëhë me, xuta xi faharcun me nina ndoyojo, cha xi chuya rë ngu xihin, <sup>10</sup> xuta xi chëjë me, xuta xi tjenguitaha me xi hacuian tsëhë me, xuta xi hatuxa xuta chihí me, xuta xi ndesu me, xuta xi ndacha me, yëjë xcusun xuta xi cuacun vë ne, cumaji cuisehen me hiscan sahmi Nina gobiernu. <sup>11</sup> Yahnga ngayun ne, cuatjin cún ngayun titjun. Peru fahaxin me jyë nuju, camá tyjahi cjuatacan nuju, café jyë nuju. Cuatjin camá cojo nuju ngatsë rë Nai naja Jesucristu cojo ngatsë rë Hasen rë Nina naja.

### *Meje rë xi cojo yojo naja nihña jyë nihña hnga Nina*

<sup>12</sup> Yahnga ngayun ne, nújun cuitjin: “Cuma nihña yëjë ni xcusun.” Cuatjin nújun. Cuma, peru hacuian yëjë xcusun xi ndaja tsajan. “Cuma nihña yëjë ni xcusun”, peru ngahan ne, suaan cahndë xi scaa rë suhi rë tu mé ni xcusun cojo ná. <sup>13</sup> Yahnga nga ngayun ne, nújun cuitjin: “Casahmi Nina xi hatuxa matangun xi chinë cojo cahntsuan, hacuaha cahntsuan ne, hatuxa ma tangun cojo xi chinë.” Cuatjin nújun. Quixi jain, peru cuechú nixtin xi tsicjë Nina catsijo xcusun vëhë. Peru hacuian casahmi Nina xi hatuxa matangun yojo naja cojo cjuatsehen ta casahmi me xi hatuxa matangun cojo Nai naja, hacuaha hatuxa matangun Nai naja cojo yojo naja. <sup>14</sup> Nina ne, catsicuya me Nai naja cjuahñu, hacuaha cojo ngahñu rë súvã me ne, hacuanitjin ni tsicuya naja me ngayaan cjuahñu.

<sup>15</sup> ¿Há hyuun ta yojo nuju ne, tjin tangun cojo Jesucristu? Quihndë ne, yojo naja xi tjin tangun cojo Jesucristu ne, ¿há nihña tangun cojo ngu na viteña yojo rë ni? ¡Yéya! ¡Catamamiji rë Nina! <sup>16</sup> Hacuaha ¿há hyuun ta ngu xuta xi sahmi cjuatsehen cojo ngu na xi viteña yojo rë ne, sacuaha xi ngu yojo ni rë me cojo rë na? Cuatjin ma ta chja xujun rë Nina cuitjin: “Catsijo me ne, cuma ngu yojo ni rë me cojo xicjin me.” Cuatjin chja xujun rë Nina. <sup>17</sup> Peru

ngu xuta xi sahmi tangun me cjuatacun rē me cojo Nai naja ne, cuma ngu cjuatacun ni rē cojo rē me.

<sup>18</sup>Naxunxun yojo nuju tsēhē cjuatsehen xi sahmi ngu xuta cojo ngu chjuun o sa cojo ngu xihin xi hacuiin tsēhē me. Yējē sa cjuatsehen xi sahmi ngu xuta ne, hacuiin cojo yojo rē me sahmi me. Peru xuta xi sahmi cjuatsehen cojo ngu chjuun o sa ngu xihin xi hacuiin tsēhē ne, cojo yojo rē me sahmi me cjuatsehen vēhē. <sup>19</sup>¿Há hyuun ta yojo nuju ne, sacuaaha ngu yungun rē Hasen rē Nina xi caveya Nina cahntsua xahasen nuju? Ngayun ne, hacuiin tsujun suvun yojo nuju ta, <sup>20</sup>tsēhē xi ngayun ne, cojo chji cachaha nuju. Vēhē xi meje rē xi cojo yojo nuju nihñu jyē nihñu hnga Nina.

## 7

### *Cjuacjintacun tsēhē cjuavixan*

<sup>1</sup>Quihndē ne, nguēhe tsicūya cjuatacun tsēhē cjuatacun xi canihindun ná.

Ndatjin xi cuixaain xuta. <sup>2</sup>Peru ngatsē rē cjuatsehen ne, catisacu chjuun rē jima ngu xihin, hacuaaha jima ngu chjuun ne, catisacu xihin rē na. <sup>3</sup>Sa chjuun sa xihin me ne, catisahmi chihin me sacuatjin mameje rē cjuavixan xi casahmi me. <sup>4</sup>Sacuaaha chjuun ne, hacuiin na vēhē vitexa na yojo rē na ta xihin rē na vitexa cha. Hacuanitjin ni xihin ta hacuiin cha vēhē vitexa cha yojo rē cha ta chjuun rē cha vitexa na. <sup>5</sup>Mijí rē xi nichuhun rē xingun yojo nuju sa chjuun sa xihin ngayun. Cuma nihñu cuatjin, peru sa xi catsijo ni ngayun canihñu tangun cjuatacun xi cuejñuxun ngujo nixtin, tsēhē xi meje nuju xi ngujo nixtin vēhē ne, nihñu oración nuju cojo Nina. Hane xi cuatju vēhē ne, sehe tuyun nihñuchuhun sacuatjin mameje rē cjuavixan xi canihñu, sá tu ngatsē rē xi scaain nuju ne, sahmi Satanás ngahñu xi nihñu cjuatsehen.

<sup>6</sup>Cuatjin cachjá cojo nuju cojo sa xi hacuiin chja cuatjun, cachjaan sacuaaha xi hatuxa vitexa nuju. <sup>7</sup>Xi má ná ngahan ne, ndatjin sa xi yējē ni xuta ne, scaa rē me sacuaaha ngahan. Peru jima ngu xuta ne, casacu rē me jima ngu xcusun cjuandaja xi casua Nina me: ngu me ne, casacu rē me xcusun vihi, ngu nga me ne, casacu rē me xcusun vēhē.

<sup>8</sup>Quihndē ne, ngu ngu ngayun xi cjēē sacú chjuun nuju, cjēē sacú xihin nuju, hacuaaha cojo ngayun xi cahan ngayun ne, cuichjá cojo nuju ta ndatjin xi cuinechun suvun sacuaaha ngahan. <sup>9</sup>Peru sa xi scaain nuju ne, tixun. Hitsē sa ndaja xi cuixun xi cuma rē xi nicjun suvun yojo nuju cjuandaja rē xihin.

<sup>10</sup>Hane ngu ngu ngayun xi cavixun ne, cuichjá cojo nuju ta ngu chjuun ne, mijí rē xi tsismi na xihin rē na. <sup>11</sup>Hane sa xi tacun xín na ne, catejña suvá na, o sa tsajin ne, catisehen nga na cjuandaja cojo xihin rē na. Hacuaaha ngu xihin ne, mijí rē xi tsismi cha chjuun rē cha. Hacuiin ngahan xi chjá cuatjin ta Nai naja chja me.

<sup>12</sup>Quihndē ne, hacuiin Nai naja cuichja me ta ngahan cuichjá cojo nuju ngayujun ni xi cjēē cuichjá cojo nuju. Sa xi cachjuhun ngu chjuun xi manguaain cacun na cojo Nai naja, hane tsingatihin na cuejña sa na cojo nuju ne, xicanismuu na. <sup>13</sup>O sa xi cachjuhun ngu xihin xi manguaain cacun cha cojo Nai naja, hane tsingatihin cha cuejña sa cha cojo nuju ne, xi canismuu xihin nuju vē. <sup>14</sup>Cuatjin nihñu ta, xihin nuju xi manguaain cacun cojo Nai naja jan ne, ngatsē nuju ngayun ne, hacuaaha cojo cha cumá cha ladu rē Nina. Hacuanitjin ni chjuun nuju xi manguaain cacun cojo Nai naja jan ne, ngatsē nuju ngayun xi ladu rē Jesús ne, hacuaaha cojo na cumá na ladu rē Nina. Sa xi hacuiin cuatjin ne, quihndi nuju ne, hacuiin ladu rē Nina má. Peru xi cjuaquixi ne, quihndi nuju ne, ladu rē Nina má. <sup>15</sup>Peru sa chjuun sa xihin xi manguaain cacun cojo Nai naja ne, sa xi meje tsismi nuju ne, catitsismi nuju. Sa xi cuatjin cuatjun cuma ne, ngayun xi ladu rē Jesús ngayun ne, ha ndaya tjin ngayun tsēhē cjuavixan. Cuatjin meje rē xi nihñu ta, tsēhē xi Nina cajundaya nuju me xi cuangun ndiya rē cjuandaja cjuajeya. <sup>16</sup>Tsajin yo vēē rē há cuma naxuntjun chjuun nuju o sa xihin nuju.

### *Chja Pablo hacutjin meje rē xi cjue xuta cojo ngasunhndē rē me*

<sup>17</sup>Meje rē xi ngayujun ni ne, nihñu xa xi casua Nina xi nihñu jima ngu ngayun, hacuaaha ha sacuanitjin ni cún ngayun hya xi cavaxijin nuju Nina ne, hacuanitjin ni tángun nduju cojo. Cuatjin chjá cojo xuta tsēhē yējē ni yungun. <sup>18</sup>Sa xi ha cati rē chuxin nuju hya xi cavaxijin nuju Nina ne, xicavinchuun chuxa rē xi nindeyung xcusun vēhē. O sa xi cjēē xti rē chuxin nuju hya xi cavaxijin nuju Nina ne, xicanihñuu. <sup>19</sup>Xi xti rē chuxin naja o sa xtiin rē ne, tsajin mé vengui chjí rē ta xi vengui chjí rē ne, xi cuinuhyan cjuatacun vitexa Nina. <sup>20</sup>Ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo. <sup>21</sup>Sa xi ngu mosu hndixahan ngayun nixtin hya ne, xicamacjiin tacún. Peru sa xi cuma cuetjuntjun tsēhē xi má ngayun mosu hndixahan ne, naxuntjun yojo nuju ta, <sup>22</sup>tsēhē xi ngu mosu hndixahan xi Nai naja vaxijin me ne, ndaya tjin xi cuma rē Nai naja. Hacuanitjin ni ngu xuta xi hacuiin mosu hndixahan me peru Nai naja cavaxijin rē me ne,

mosu hndixahan rē Jesucristu má me. <sup>23</sup> Cojo chj cavatsē nuju Nina. Vēhē xi mijj rē xi mosu hndixahan rē xuta cuma ngayun. <sup>24</sup> Ngayujun ni ne, ha sacuanitjin ni cūn jima ngu ngayun hya xi cavaxijin nuju Nina ne, hacuanitjin ni tángun nduju cojo, xi tjin tangun cjuatacun nuju cojo Nina.

*Chja Pablo tséhē xuta xi tsajin chjuun tsajin xihin rē me*

<sup>25</sup> Quihndē ne, sacua ha tséhē xuta xi cjēē cjuaha me chjuun cjēē cjuaha me xihin ne, tsajin ngu cjuaxi cavitexa ná Nai naja xi cuichjá cojo nuju. Peru cuichjá cojo nuju sacuatjin tsingátaha cacún, tséhē xi ngatsē rē cjuandaja xi casua ná Nai naja ne, cuma cumangu tacún cojo ná. <sup>26</sup> Xi má ná ne, ngatsē rē cjuandaja xi tjin naja quihndē ne, ngu xihin ne, ndatjin xi cuejña ni cha chuva xi ha tacun cha. <sup>27</sup> Sa xi ha tjin chjuun nuju ne, xicanismuu ná. Hane sa xi tsajin chjuun nuju ne, xicachjuun chjuun. <sup>28</sup> Peru sa xi cuixun ne, tsajin mé jyé nuju tjin, hacua ha sa xi ngu na nixti cuixan na ne, tsajin mé jyé rē na tjin. Peru sa xi ngayun cuixun ne, hatuxa tjin nuju cjuacjintacun nchunchujun ni cahntsua ndya nuju, hane vēhē ngu cjuacjintacun xi mijj ná xi cuatjun cuma.

<sup>29</sup> Peru meje cuichjá cojo nuju ngayujun ni ta ha jemu camachúva nixtin. Vēhē xi hacuiin jercu nicjun yojo nuju tséhē cjuandaja rē ngeuhe ngasunhndē ta xuta xi tjin chjuun rē me ne, catisahmi cuenda me sacua ha xi tsajin chjuun rē me; <sup>30</sup> xuta xi jihnda me ne, catisahmi cuenda me sacua ha xi hacuiin jihnda me; xuta xi jemu tjin rē me cjuasua ne, catisahmi cuenda me sacua ha xi hacuiin jemu tjin rē me cjuasua; xuta xi vatsē me ne, catisahmi cuenda me sacua ha xi hacuiin tséhē me xi cavatsē me; <sup>31</sup> hane xuta xi jemu sahmixa cojo yējē ni xcusun xi tjin ngasunhndē ne, hacuiin cuatjutaha sahmixa me cojo. Cuatjin meje rē xi tsingátaha cacun xuta ta, tséhē xi ngasunhndē xi chutsejen vi ne, hatuxa cjuē.

<sup>32</sup> Ngahan ne, meje ná xi ngayun ne, tsajin nuju mé cjuandaja. Xuta xi tsajin chjuun rē me ne, marcun rē me tséhē xa rē Nai naja ta, tséhē xi meje sahmí me hacutjin xi chuya rē Nai naja. <sup>33</sup> Peru xuta xi tjin chjuun rē me ne, marcun rē me tséhē cjuandaja rē ngasunhndē ta, tséhē xi meje sahmí me hacutjin xi chuya rē chjuun rē me. <sup>34</sup> Hane xi cuatjin sahmí me ne, ma jo cjuatacun rē me. Hane ngu chjuun xi tsajin xihin rē o sa xi ngu chjuun xungun ne, marcun rē na tséhē xa rē Nai naja, cojo sa xi cuma tséhē Nina na cojo yojo rē na cojo hasen rē na. Peru na xi cavixan ne, marcun rē na tséhē xa rē ngasunhndē ta, tséhē xi meje sahmí na hacutjin xi chuya rē xihin rē na.

<sup>35</sup> Cachjá cuatjin cojo nuju, peru hacuiin xi cuátēcja cjuatacun nuju ta xi ndaja tsujun. Meje ná xi cuanguncujun ngu ndiya rē cjuandaja. Hacua ha meje ná xi tuhun yojo nuju ngundiyaxa ni xi nihñu xa rē Nai naja.

<sup>36</sup> Peru sa xi ngu xuta tsingátaha cacun me xi cuaaintjin xi sahmí me xi cjēē cuixan me cojo rē na xi tacunvasen cjuavixan rē me cojo, hane na vēhē ne, ha cavechú nixtin rē na xi cuma cuixan na, hacua ha sa xi ha tuxa meje rē xi cuixan na ne, catisahmi me mé xi meje sahmí me. Catixan me cojo rē na ta, tsajin mé jyé rē me xi cuatjin sahmí me. <sup>37</sup> Peru ngu sa xuta xi hacuiin sahmí nguyjē xi cuixan me hacua ha ma vēhēñu me yojo rē me ne, sa xi ha cavejña cacun me xi cuixaan me ne, ndaja sahmí me xi cuixaan me. <sup>38</sup> Vēhē xi me xi vixan cojo rē na xi tacunvasen cjuavixan rē me cojo ne, ndaja sahmí me. Hane me xi vixaan ne, hitsē sa ndaja sahmí me.

<sup>39</sup> Ngu chjuun ne, tsajin ndaja tjin na tséhē xihin rē na jinguyjē rē xi tacun cha cjuahñu. Peru sa xi cueya xihin rē na ne, ha ndaja tjin na xi cuixan na cojo tu yo ni xi meje rē na, ndastu xi ladu rē Nai naja má cha. <sup>40</sup> Peru xi má ná ne, hitsē sa ndaja cuma rē xahasen rē na sa xi cuejña cuanitjin ni na. Hane tsingátaha cacún xi ngahan ne, hacua ha cojo ngahan jiya Hasen rē Nina cahntsua xahasen naha.

## 8

*Xichiné xi viyuju xcun nina ndyojo*

<sup>1</sup> Quihndē ne, ngeuhe cuichjá cojo nuju tséhē xichiné xi viyuju xcun nina ndyojo. Ha hyan ta ngayejen ni ne, tjin cjuatacun xi hyan. Hya xi jemu cjin cjuatacun xi hyan ne, nihña yehe yojo naja suvaan, peru hya xi tjin naja cjuahmutacun ne, nihña yehe xingueen. <sup>2</sup> Sa xi ngu xuta tsingátaha cacun me xi ndaja vēē me ngu cjuatacun ne, cjēē sa cuijnercu me sacuatjin xi meje rē. <sup>3</sup> Peru sa xi ngu xuta hmu cacun me Nina ne, me vēhē ne, vēē Nina me.

<sup>4</sup> Quihndē ne, sacua ha cjuatacun tséhē xichiné xi viyuju xcun nina ndyojo ne, ha hyan ta tsajin camahani mé vengui chj rē nina ndyojo jinguyjē ni ngasunhndē, hacua ha hyan ta ngu tutu ni Nina xi tacun me. <sup>5</sup> Handasa xi jemu tjin xi hmi rē nina, sa ngahnga sa nangui ne, hacua ha handasa jemu cjin nina xi cuacun vē hacua ha jemu cjin nai vihi nai vēhē tjin ne, <sup>6</sup> peru xi cuma naja ngayaan ne, ngu tutu ni Nina xi tacun me, me xi Nahmi naja. Me vēhē xi casahmi me ngayējē ni, hacua ha ngayaan ne, nechan ngeuhe ngasunhndē xi nihña tutjin xi meje rē me. Hacua ha ngu tutu ni Nai naja Jesucristu xi tacun me, me xi hacua ha

cojo casahmi Nina jinguyejë ni. Hacuaha ngayaan ne, nechan nguehe ngasunhndë ngatsë rë xi cuatjin meje rë Jesucristu.

<sup>7</sup> Peru hacuiin yëjë xuta vëë me cjuatacun vëhë. Yahnga xuta ne, ngatsë rë xi cuatjin xcusun rë me hatsëë ne, vutsejen me xichinë vëhë sacuaha ngu cjuatjo xi tsëhë cuaha nina ndyojo. Hane hya xi jinë me ne, jemu choho má cacun me, tsëhë xi, xi má rë me ne, jemu tsavi. <sup>8</sup> Peru xcusun xi chinë ne, visecuain naja xi chuya rë Nina tsajan. Sa xi xinë ngu xcusun ne, tsajin mé nichajan, hacuaha sa xi xinëë ne, tsajin mé ndaja sacú naja. <sup>9</sup> Nechun cuidadu, ngayun xi vijne rcun xi tsajin mé sahmi rë xi xinë ngu xcusun xi caviyuju xcun nina ndyojo. Nechun cuidadu, sá tu cuechú nixtin xi ngu xuta ladu rë Jesús xi cjëë ndaja cuijnercu cjuachacun rë Nina ne, tsismi cacun me ndiya rë Nina ngatsë rë xcusun xi nihñu. <sup>10</sup> Cuatjin nechun cuidadu ta, tsëhë xi ngayun xi vijnercun ne, sa xi yo scuëë nuju xi tichinu niñu yungun rë nina ndyojo ne, me vëhë ne, ngatsë rë xi cjëë ndaja cuijnercu cjuatacun rë me ne, cojo me cuetju cacun me sinë me xi chinu xi caviyuju xcun nina ndyojo. <sup>11</sup> Xi cuatjin cuma ne, xuta ladu rë Jesús xi cjëë cuijnercu ndaja jan ne, chajá me ngatsë rë cjuatacun nuju xi cuatjin nihñu, handasa Jesucristu cahme me ngatsë rë xuta vëhë. <sup>12</sup> Vëhë xi, xi cuatjin ninguetsun cjuatacun rë xuta xi cuacun cjëë cuijnercu ndaja me ne, hacuiin suvá ni me xi cuacun vëhë xi choho nihñu cojo rë me ta hacuaha cojo Jesucristu. <sup>13</sup> Vëhë xi sa xi xichinë sahmi xi tsismi cacun ngu xuta ladu rë Jesús ndiya rë Nina ne, tsajin nu tsajin nixtin xi cúa sínë sa vëhë, cojo sa xi sahmeë xi tsismi cacun ngu xuta ladu rë Jesús jan ndiya rë Nina.

## 9

### *Xcusun xi vechú chuva rë xi sahmi ngu apóstol*

<sup>1</sup> Ngahan ne, ngu apóstol ngahan, hane vechú chuva rë xi sahme yëjë ni xcusun xi sahmi ngu apóstol, tsëhë xi ngahan ne, cahvë Nai naja Jesús. Ngayun ne, camá ngayun ladu rë Nai naja, ngatsë rë xi cëjë casahme xa rë me ngajñi nuju. <sup>2</sup> Handasa mijí cumacjain rë yahnga xuta xi apóstol má ngahan ne, peru ngayun ne, macjain nuju ta, tsëhë xi tsejen xi apóstol ngahan ngatsë rë xi ngayun ne, cavisuhun ladu rë Nai naja ngatsë rë cja xi cachjá cojo nuju.

<sup>3</sup> Cuitjin tsicúya cja vihi tsëhë xuta xi sahmi chuva ná me ndyá ngajñi nuju: <sup>4</sup> Tjin ná chuva rë xi tuhun xi xini xi sihin. <sup>5</sup> Tjin ná chuva rë xi chjihín chjuun xi cuma chjuun niji, sacuatjin rë apóstol xi yahnga cojo xicjin Nai naja cojo Pedru. <sup>6</sup> ¿Há Bernabé cojo ngahan tutu ni xi meje rë xi nihñi xa sehe sacú xi xini xi sihin? <sup>7</sup> Ngu xuta xi má me sindadu ne, ¿há tujún rë suvá me tsicojo me xi sahmi me xa vëhë? Ngu xuta xi sahmi me xitjë ne, ¿há jinii me xitjë xi vunihnga me jan? Ngu xuta xi sahmi cuidadu chu tsánga ne, ¿há hviin me lechi rë chu? <sup>8</sup> Ngahan ne, hacuiin suvá cjuatacun rë xuta xi tichjá ta ley rë Moisés ne, hacuaha cuatjin chja. <sup>9</sup> Xcun ley rë Moisés ne, cuitjin camahindu: “Ngu ndyaja xi visecoo nuju ne, hacuiin nichaan xi sinë chu ta, hacuaha tjin ru chuva rë xi sinë chu tsëhë xa xi sahmi chu.” Cja vëhë ne, hacuiin meje cuichja xi vityangui cacun Nina tsëhë chu ndyaja ta <sup>10</sup> xi vityangui cacun me ne, tsijin ngayin. Cja vëhë ne, camahindu ngatsë niji ngayin. Xuta xi vacjan me nangui cojo xuta xi vechjunne me tutjë ne, hya xi sahmi me xa vëhë ne, meje rë xi cuetaha cacun me xi sacú rë me hitsë tutjë vëhë. <sup>11</sup> Ngayin canitjin cja rë Nina cahntsua xahasen nuju xingu xingu ngayun. Vëhë xi hacuiin choho tjin sa xi tuhun niji hitsë cjuachaja niji. <sup>12</sup> Sa xi vechú chuva rë xi tuhun cjuachaja rë jingu sa apóstol ne, ¡hitsë sa guan ngayin!

Peru ngayin ne, cjëë camahani mé xi chjahyin nuju. Cahndë rë vëhë ne, cacaa niji cojo jemu cjín cjuacjintacun, cojo sa xi hacuiin nihñi xi tjin yo xi tsitjungui cjuandajyihí xi chja tsëhë Jesucristu. <sup>13</sup> Ngayun ne, ha hyun ta nahmi xi sahmi me xa cahntsua yungun xi matitjun ne, hacuaha ngajan vaxë me cjuachaja rë me. Cuma cuintújan ne, nahmi xi sahmixa me cojo chu xi sua xuta cjuatjo ngajan ngasunscun ne, hacuaha ngajan faha me xi jinë me. <sup>14</sup> Ha chuva vëhë ni ne, cavitexa Nai naja xi me xi sua machaya rë xuta tsëhë cjuandajyihí xi chja tsëhë Jesús ne, ha xcun xa vëhë ne, ngajan cuaxë me cjuachaja rë me.

<sup>15</sup> Peru ngahan ne, cjëë camahani mé xi cjuéhya rë xuta rë yungun. Hane cja xi titsihindu nuju vi ne, hacuiin tsëhë xi féhya nuju cjuachaja naha. Xi má ná ne, hitsë sa ndaja tsahan xi cueya, xi cuma rë xi chjahátahá rë cjuasua naha xi sahme xa rë Nina tu cjuatjo. <sup>16</sup> Xi suá machaya rë xuta cjuandajyihí xi chja tsëhë Jesucristu ne, tsajin mé má vaxëndaja suva yojo naha ta, hatuxa tjin ná xi sahme cuatjin. Jemu chojyihí tsahan sa xi suaan cumachaya rë xuta cjuandajyihí vëhë. <sup>17</sup> Vëhë xi, sa xi ngatsë rë xi meje ná suva xi cuatjin suá machaya rë xuta cjuandajyihí vëhë ne, ha tjin chjí naha. O sa xi sahme handasa mijí ná ne, peru Nina casua ná me xa vëhë. <sup>18</sup> Peru ¿jarë xi chjí naha ni? Chjí naha ne, xi tu cjuatjo ni suá machaya rë xuta cjuandajyihí xi chja tsëhë Jesucristu. Vëhë xi chjí naha,

vêhê xi sua rê xahasen naha cjuasua. Cuma cuinújan xi handasa xi tjin ná chuva rê ne, cjêê camahani cjuéhya rê xuta rê yungun xi sua me cjuachaja naha xi sahme xa rê Nai naja.

<sup>19</sup> Ngahan ne, ha ndaya tjin ngahan. Hacuini mosu hndixahan rê xuta má ngahan. Peru sahme sacuaaha xi mosu hndixahan rê yêjê ni xuta má ngahan, cojo sa xi cjín sa xuta cuisécoo rê me xi cuisehen me ladu rê Jesucristu. <sup>20</sup> Hya xi tejñayajñe ngajñi rê xuta tjê rê Israel ne, sahme sacuaaha sahmi xuta xi cuacun vê, cojo sa xi cjín sa xuta tjê rê Israel cuisécoo rê me xi cuisehen me ladu rê Jesucristu. Hya xi tejñayajñe ngajñi rê xuta xi tjengui me ley rê Moisés ne, sahme sacuaaha sahmi xuta xi cuacun vê, handasa hacuini ngahma gobiernu rê ley vêhê tejña. Cuatjin sahme, cojo sa xi cjín sa xuta xi tjengui ley vê cuisécoo rê me xi cuisehen me ladu rê Jesucristu. <sup>21</sup> Hya xi tejñayajñe ngajñi rê xuta xi faharcuaain ley rê Moisés ne, sahme sacuaaha sahmi xuta xi cuacun vê, handasa fahárcun ngahan ley rê Nina, tsêhê xi tejña ngahma gobiernu rê ley rê Jesucristu. Cuatjin sahme, cojo sa xi cjín sa xuta xi faharcuaain ley rê Moisés vê cuisécoo rê me xi cuisehen me ladu rê Jesucristu. <sup>22</sup> Hya xi tejñayajñe ngajñi rê xuta xi cjêê ndaja cuijnercu me cjuachacun rê Nina ne, sahme sacuaaha sahmi xuta xi cuacun vê, cojo sa xi cjín sa xuta xi cjêê ndaja cuijnercu me cjuachacun rê Nina cuisécoo rê me xi ndaja cuisehen me ladu rê Jesucristu. Cuma cuinújan ne, sahme sacuaaha sahmi yêjê ni xuta, cojo sa xi sacú ná chuva rê xi cuma cuáxêjtê ngujo me. <sup>23</sup> Cuatjin sahme yêjê xcusun vêhê ngatsê rê cjuandajyihî xi chja tsêhê Jesucristu, cojo sa xi hacuaaha cojo ngahan satê ná.

<sup>24</sup> Ngayaan ne, ha hyan ta cha xi vincha carrera ne, yêjê ni cha sahmi cha ngahñu, peru ngu ni cha caa rê cha xi fehe titjun cha, hane cha vêhê xi fahatsja cha cjuatjo rê. Ha chuva vêhê ni meje rê xi ngayujun ni ne, nihñu ngahñu, cojo sa xi hacuaaha sua nuju Nina ngu premiu xi cuma ngascan. <sup>25</sup> Quihndê ne, cha xi cuatjin vincha carrera ne, hya xi vêhêchiine cha yojo rê cha ne, hatuxa jemu viyuju cha cuidadu tsêhê yêjê ni xcusun xi choho sahmi cojo cha. Cuatjin sahmi cha, cojo sa xi sacú rê cha ngu premiu xi ficani rê. Peru ngayaan xi ladu rê Jesucristu ngayaan ne, cuatjin nihña, cojo sa xi Nina ne, sua naja me ngu premiu xi tsajin nixtin vetsun. <sup>26</sup> Vêhê xi ngahan ne, hacuini tujyê vánga, hacuini tujyê sahme ta <sup>27</sup> jemu tsijênda rê yojo naha, hacuaaha sahme rê ngu yêjê xi sahmi hacutjin xi meje ná. Cuatjin sahme, sá tu ha xcun xi ha casuá camachaya rê xuta cjuandajyihî xi chja tsêhê Jesucristu ne, ngahan suva tsichajá.

## 10

### *Mijî rê xi chjahanrcun nina ndyojo*

<sup>1</sup> Ngayujun ni ne, meje ná xi hacuini nichayun xcusun xi cavatju xutachanga naja xi caviyuju nixtin rê Moisés. Ngayêjê ni me xi cuacun vê ne, quiji me sacuatjin quiji yuffi, hacuaaha yêjê ni me cavatjucja me ndachacun Hani. <sup>2</sup> Hane xi casahmi me cuatjin ne, cuatjin camá xi yêjê ni me cavisehen me ladu rê Moisés. <sup>3</sup> Hacuaaha yêjê ni me cajiné me niñu xi casua Nina. <sup>4</sup> Hacuaaha yêjê ni me cahvi me nandá xi casua Nina. Cahvi me nandá xi cavetju rê naxi xi casua Nina xi cjue cojo rê me. Hane naxi vêhê ne, hacui Jesucristu. <sup>5</sup> Peru jemu cjín xuta xi cuacun vê xi cachujiin rê Nina tsêhê me. Vêhê xi ngajan ngu cahndê xín camahani cahme nguêhe cahme ngajan me.

<sup>6</sup> Cuatjin camá yêjê xcusun vêhê sacuaaha ngu ejemplu xi cuma naja, cojo sa xi hacuini cumameje naja cjuatsehen, sacuatjin camameje rê me xi cuacun vêhê. <sup>7</sup> Hacuaaha mijî rê xi chjuhuncun nina ndyojo sacuatjin casahmi ngujo me xi cuacun vêhê. Cuitjin camahindu xcun xujun rê Nina: “Caviyuju xuta cajiné cahvi me, sehe cavisatjenhnga me quiji casua me cjuasua xahasen rê me.” Cuatjin camahindu. <sup>8</sup> Mijî rê xi nihña cjuatsehen cojo ngu chjuun o sa cojo ngu xihin sacuatjin casahmi ngujo me xi cuacun vêhê. Hane ha nixtin vêhê ni ne, cahme can jyan mil me. <sup>9</sup> Hacuaaha mijî rê xi chjahanchuvan Nai naja sacuatjin casahmi ngujo me xi cuacun vêhê, hane cahme me xi cafaha chu yê me. <sup>10</sup> Hacuaaha mijî rê xi choho cuisiajmuhmu tsêhê Nina sacuatjin casahmi ngujo me xi cuacun vêhê, hane catsiquehen rê me ángel xi hatuxa tsiquehen naja.

<sup>11</sup> Yêjê xcusun vêhê ne, cavatju me xi cuacun vêhê camá sacuaaha ejemplu xi cuma naja. Hacuaaha camahindu cjuá vêhê cojo sa xi sua naja conseju, ngayaan xi nechan quihndê xi ha meje cuijnetaha ngasunhndê. <sup>12</sup> Vêhê xi xuta xi má rê me xi jemu hñu siu cjuatacun rê me xi mangucacun me cojo Nina ne, catiyuju me cuidadu, sá tu chajá me tsêhê ndiya rê Nina. <sup>13</sup> Ngayun ne, hya xi chjaháchuva nuju ne, chjaháchuva nuju sacuaaha chjaháchuva rê yêjê xuta. Peru Nina ne, hatuxa cuma cumangu tacuun cojo rê me ta, tsêhê xi me vêhê ne, suaain me cahndê xi chjaháchuva nuju cojo ngu chuva rê xi scaain nuju cojo. Hya xi chjaháchuva nuju ne, me vêhê sua me chuva rê hacutjin cuetjuntjun, cojo sa xi scaa nuju hisca xi cuetjuntjun.

<sup>14</sup> Vêhê xi ngayujun ni ne, xicavisuhunjñuu cojo xuta xi faharcun me nina ndyojo. <sup>15</sup> Cuitjin tichjá cojo nuju, tsêhê xi jemu xuta quicun cacun ngayun. Nichuvun suvun cjuaxi xi chjá cojo nuju. <sup>16</sup> Ngayaan ne, hya xi hyuun xi hinchá copa rê Nai naja ne, jemu ndaja tsajan. Nihña tangun cjuatacun naja cojo Jesucristu xi ninguitsjen hacutjin cavanga jni rê me hya xi cahme me. Hane hya xi chinê pan xi chotooncjan ne, nihña tangun cjuatacun naja cojo Jesucristu xi ninguitsjen hacutjin cavatju me camá xcun cru. <sup>17</sup> Sacuatjin rê pan xi ngu ni má handasa jemu cjin rquí xtotoho ne, hacuanitjin naja ngayaan ta tjin tangun cjuatacun naja cojo xingueen, handasa jemu cjin má ngayaan. Cuatjin ta, tsêhê ngu ni pan ne, chinê ngayejen ni hacuaha ngu ni má ngayaan.

<sup>18</sup> Ningatuhun tacún hitsê tsêhê xuta tjê rê Israel. Xuta xi vejña me chu xi cahme sacuaaha cjuatjo xcun Nina ne, sahmi tangun me cjuatacun rê me cojo Nina. <sup>19</sup> Xi chjá cuatjin ne, ¿há chjá xi nina ndyojo ne, jemu vengui chjí rê? ¿Há chjá xi yojo xi cavejña xcun nina ndyojo ne, jemu vengui chjí rê? <sup>20</sup> Hacuiin ta, yojo xi vejña me ne, xcun xitsehen vejña me, hacuiin xcun Nina. Quihndê ne, mijí ná xi ngayun ne, nihña tangun cjuatacun nuju cojo xitsehen. <sup>21</sup> Ngayujun ni ne, cumaji siuhun xi xinchá copa rê Nai naja hane hacuaha siuhun xi xinchá copa rê xitsehen. Hacuaha cumaji xinu xi viyuju xcun Nina hane hacuaha xinu xi viyuju xcun xitsehen. <sup>22</sup> ¿Há ndatjin xi nihña xi cuma chini Nai naja? ¿Há hitsê sa hñu ngayaan xi cuma rê me? ¡Hacuiin!

*Hacuiin yêjê xcusun xi ndaja tsajan xi nihña*

<sup>23</sup> Yahnga ngayun ne, nújun cuitjin: “Cuma nihña yêjê ni xcusun.” Cuatjin nújun. Cuma, peru hacuiin yêjê xcusun xi ndaja tsajan. “Cuma nihña yêjê ni xcusun”, peru hacuiin yêjê xcusun xi cuisecoo naja xi cuanguen nduju cojo cjuaxi rê Nina. <sup>24</sup> Mijí rê xi jima ngu ngayaan nihña ngahñu xi ndaja tsajan suvaan ta xi meje rê ne, nihña ngahñu xi ndaja tsêhê xingueen.

<sup>25</sup> Xinu tu mé ni hiscan xi xteña yojo. Xicachjinengunsuun vihi vêhê tsêhê yojo jan ngatsê rê xi chuyiin rê cjuatacun nuju tsêhê yojo xi cavejña xcun nina ndyojo. <sup>26</sup> Cuatjin nihñu ta, xcun xujun rê Nina ne, cuitjin camahindu: “Ngasunhndê cojo yêjê ni xi tjin ngasunhndê ne, tsêhê Nina.” Cuatjin camahindu.

<sup>27</sup> Sa xi ngu xuta xi manguaain cacun cojo Jesucristu cuichja me xi cuangun xinu niñu ndava me ne, tángun. Hacuaha xinu tu mé ni xcusun xi cuiyuju me xi xinu. Xicachjinengunsuun vihi vêhê tsêhê xi caviyuju me jan ngatsê rê xi chuyiin rê cjuatacun nuju tsêhê yojo xi caviyuju xcun nina ndyojo. <sup>28-29</sup> Peru sa xi yo sua cumachaya nuju xi yojo jan ne, cavejña xcun ngasuncun ne, xicachinuu yojo jan ngatsê rê me xi casua camachaya nuju hacuaha ngatsê rê xi chuyiin rê cjuatacun rê me tsêhê yojo xi viyuju xcun nina ndyojo. Hacuiin ngatsê rê xi chuyiin nuju suvun.

Peru tjin yahnga xuta xi cuma cjuinenguise me cuitjin: “¿Mé má chjaháchuva rê xcusun xi ngahan cuma sahme ngatsê rê xi chuyiin rê cjuatacun rê jingu sa xuta tsêhê? <sup>30</sup> Sa xi suá nacuechji rê Nina tsêhê xcusun xi jinê ne, ¿mé má chho chja me tsahan ngatsê rê xi cuatjin jinê ni?” Cuatjin cjuinenguise me.

<sup>31</sup> Vêhê xi, sa xi xinu o sa xi siuhun o sa xi tu mé ni xcusun xi nihñu ne, meje rê xi nihñu yêjê cojo sa xi nihñu jyê nihñu hnga Nina. <sup>32</sup> Mijí rê xi nicjun rê xuta, há xi xuta tjê rê Israel ne, o há xi xutaxín ne, o há xi xuta rê yungun rê Nina. <sup>33</sup> Hya xi sahme tu mé ni xcusun ne, sahme ngahñu xi chuya rê yêjê xuta tsahan. Sahmee ngahñu xi ndaja tsahan suva ta sahme ngahñu xi ndaja tsêhê jemu cjin xuta, cojo sa xi cuetjutje me.

## 11

<sup>1</sup> Vêhê xi ngayujun ni ne, meje rê xi nihñu sacuatjin sahme ngahan, sacuaaha ngahan xi sahme sacuatjin casahmi Jesucristu.

*¿Há meje rê xi cuetsan rcuun hya xi chjahanrcun Nina?*

<sup>2</sup> Ngayujun ni ne, ngahan ne, vaxéndaja nuju ta, tsêhê xi yêjê ni hora ne, vitsjen nuju ngahan, hacuaha tivangun nduju cojo yêjê xcusun xi casuá camachaya nuju. <sup>3</sup> Peru meje ná xi cumachaya nuju ta me xi matitjun tsêhê jima ngu xihin ne, hacui Jesucristu, hane xi matitjun tsêhê ngu chjuun ne, hacui xihin rê na, hane xi matitjun tsêhê Jesucristu ne, hacui Nina. <sup>4</sup> Sa xi ngu xihin titsa rcu cha hora xi sahmi cha oración rê cha o sa hora xi chja cha cjuaxi rê Nina cojo xuta ne, jemu choho sahmi cha cojo Jesucristu, me xi matitjun tsêhê cha. <sup>5</sup> Hane sa xi ngu chjuun tsajin titsa rcu na hora xi sahmi na oración rê na o sa hora xi chja na cjuaxi rê Nina cojo xuta ne, jemu choho sahmi na cojo xihin rê na, cha xi matitjun tsêhê na. Ha tangun ni sacuaaha xi casejnu rê rcu na. <sup>6</sup> Sa xi ngu chjuun vetsaain na rcu na ne, hacuaha catisejnu rê. Peru sa xi sava tsejen xi xtisun rê tsjarcu na o sejnu rê ne, catetsa na rcu na. <sup>7</sup> Xuta xi xihin ne, mijí rê xi titsa rcu me ta, me vêhê ne, matitjun me sacuatjin matitjun Nina hacuaha tsingacun me hacutjin jyê hnga Nina cojo Hasen rê

me. Peru yachjin ne, tsingacun na hacutjin yehe hnga xuta xi xihin cojo cjuatacun rë me. <sup>8</sup> Cuaatjin ta hya xi casahmi Nina xuta ne, titjun casahmi me ngu xihin, sehe cafaha me ngu rquí ninda rë xihin jan casahmi me ngu chjuun. <sup>9</sup> Hacuaha xuta xi xihin ne, hacuiin catsindaja Nina me ngatsë rë yachjin ta yachjin ne, catsindaja Nina ngatsë rë xuta xi xihin. <sup>10</sup> Vêhë xi ngatsë rë xi tivutsejen ángel ne, yachjin ne, meje rë xi cuetsa na rcu na, cojo sa xi tsingacun na xi ngahma gubiernu rë xihin ran siu na. <sup>11</sup> Ngayejen ni ngayaan xuta ladu rë Jesucristu ne, hacuiin súvá ni chjuun o sa xi súvá ni xihin xi vengui chji rë me ta catsijo xcusun ni ngayaan vengui chjí naja. <sup>12</sup> Quixi xi cafaha Nina ngu rquí ninda rë xihin xi casahmi me chjuun xi tjun tjun casahmi me. Peru quihndë ne, ngayaan xihin ne, hacuaha tsin ngayaan tsêhë yachjin. Peru Nina casahmi me ngayêjê ngarca.

<sup>13</sup> Ngayujun ni ne, ha hyun ta ngu chjuun ne, ndajin tjin xi cuetsaain na rcu na hya xi sahmi na oración rë na cojo Nina. <sup>14</sup> Súvá tsejen xi jemu cjuasava xi cuma rë ngu xihin sa xi nduju tsjarcu cha. <sup>15</sup> Peru yachjin ne, ndaja tsejen na xi nduju tsjarcu na ta, tsêhë xi Nina casua me xi cuetsa rë rcu na. <sup>16</sup> Peru sa xi yo meje cuichja xi ndajin tjin xcusun vêhë ne, catamachaya rë ta ngayin cojo ngayujun ni xuta rë yungun ne, ha vêhë ni xcusun naja.

### *Cuaain tjin xi má hya xi má suhi rë Comida tsêhë Nai naja ngajan Corinto*

<sup>17</sup> Nguehe tsihindu nuju ngujo cjuua. Vaxeenndajan nuju ta, tsêhë xi hya xi matangun ngayun xi chjuhunrcun Nina ne, cahndë rë xi ndaja cuetjucaa tsujun ne, tu chohotjin vetju. <sup>18</sup> Xi tjtujun ne, fehe cjuua tsahan xi hya xi cuaatjin matangun ngayun ne, hacuiin ngu tangun ni má cjuatacun nuju. Hane ngahan ne, macjain ná hitsë. <sup>19</sup> Xi má nuju ne, ¡hatuxa meje rë xi cuaatjin cuma, cojo sa xi cuma tsejen yo xi tsêhë jain Nina! <sup>20</sup> Hya xi matangun ngayun ne, hacuiin comida rë Nai naja xi chinu ta, <sup>21</sup> hora xi chinu niñu ne, jima ngu ngayun vangun titjun chjuhun comida nuju suvun xinu. Hane ngujo ngayun ne, hisca vojo sa nuju. Hane ngujo nga ngayun ne, hisca camachuhun. <sup>22</sup> ¡Sacuaha xi tsajin ndya nuju xinu siuhun! O sa tsajin ne, sacuaha xi nihñuchuvun xuta ladu rë Nina hacuaha chandunsavun xuma me xi tsajin rë. ¿Mé cuichjá cojo nuju ni? ¿Há cuáxëndaja nuju? ¡Xi cuaatjin nihñu ne, cumaji!

### *Comida tsêhë Nai naja*

<sup>23</sup> Cjuua xi casuá camachaya nuju ne, hacui cjuua xi cafahántsa tsêhë Nai naja xi chja cuitjin: Nguixun xi camá entregadu Nai naja Jesús ne, tacun me cojo tejó xuta ladu rë me xi sinë nguixun me tsêhë suhi Pascua. Hane hora vêhë ne, cafaha me ngu pan. <sup>24</sup> Hane xi café casua me nacuechji rë Nina ne, cavotohocja me pan jan, sehe cachja me cuitjin: “Vihi ne, yojo naha xi cueya ngatsë nuju. Cuitjin nihñu xcusun vihi yasen ni, cojo sa xi ninguitsjun ná.” Cuaatjin cachja Jesús. <sup>25</sup> Hane xi cajnetaha cajinë nguixun me ne, hacuanitjin ni cafaha me copa, sehe cachja me cuitjin: “Xan vihi ne, vihi jni naha xi sahmichihin rë compromisu xatsë xi tisahmi Nina cojo xuta. Cuitjin nihñu xcusun vihi jima ngu ndiya xi siuhun cuitjin, cojo sa xi ninguitsjun ná.” Cuaatjin cachja me. <sup>26</sup> Vêhë xi jima ngu ndiya xi tichinu pan vêhë hacuaha tjihyún xi hincha copa vêhë ne, tininguitsjun tsêhë cjuaveya rë Nai naja. Hane cuanitjin cjín ni cumá hisca hya xi cuinduva nga me.

### *Hacutjin meje rë xi xinëe xi hmí rë Comida tsêhë Nai naja*

<sup>27</sup> Ngajan xi tu yo ni xi tujyë jinë pan vêhë o sa xi hvi xan vêhë xcun Comida tsêhë Nai naja ne, quitjen jyë xi tsixcuehyu yojo rë Nai naja, quitjen jyë xi tsixcuehyu jni rë me. <sup>28</sup> Vêhë xi meje rë xi jima ngu ngayaan ne, nichuvan suvaan cjuatacun naja, sehe xinë pan jan hacuaha siuhun xan jan ta, <sup>29</sup> tsêhë xi yo xi tsinguitsjin yojo rë Nai naja hora xi sinë cuihi xcusun vêhë ne, sacú rë ngu castigu xi cuaatjin tujyë jinë hvi. <sup>30</sup> Vêhë xi jemu cjín xuta tsêhë ngajñi nuju ne, ndaya tjin cacun me hacuaha hmu rë me; yahnga nga me ne, hisca cahme me. <sup>31</sup> Peru sa xi ngayaan ndaja nichuvan suvaan cjuatacun naja ne, Nai naja ne, hacuaha sahmii naja me castigu. <sup>32</sup> Peru sa xi Nai naja sahmii naja me castigu ne, cuaatjin sahmii me cojo sa xi cueyaquixi naja me ndiya hane hacuiin tangun cuma ngayaan castigu cojo xuta tsehen.

<sup>33</sup> Vêhë xi ngayujun ni ne, hya xi cumatangun ngayun xi xinu niñu ne, tinechunyun xingun xingu xingu ngayun. <sup>34</sup> Sa xi tjin yahnga ngayun xi jemu vojo nuju ne, cojo tjun ni xinu ngajan ndya nuju, cojo sa xi hacuiin sahmii nuju Nina castigu xi cuaatjin vinechunyuun xingun. Quihndë ne, sacuaha cjuacjintacun xi yahnga ne, hya xi cuinduvatjengë nuju ne, hya sahmechehen.

## 12

### *Cjuatjo xi sua Nina ngayaan*

<sup>1</sup> Ngayujun ni ne, meje ná xi cuijnercun sacuaha tsêhë cjuatjo xi cuacun sua naja Nina. <sup>2</sup> Ngayun ne, ndaja hyun xi hya xi cjêë cuisuhun ladu rë Nina ne, tujyë caningatuhun cachjuhunrcun nina ndyojo xi hatuxa tsajin cjuahñu rë. <sup>3</sup> Vêhë xi meje ná xi cuijnercun

xi ngu xuta xi tichja me ngu cjua xi casua Hasen rè Nina me ne, hatuxa cuichjaain me cjua vihi: “¡Jesús ne, catji me cojo xitsehen!” Hacuaha suvá ni xuta xi jiya Hasen rè Nina cahntsua cjuatacun rè me xi cuma cuichja me cjua vihi: “¡Jesús ne, Nai naha me!”

<sup>4</sup> Quihndé ne, jemu cjin xcusun cjuatjo xi tjin, peru suvá ni Hasen rè Nina xi sua naja yéjé cjuatjo vèhé. <sup>5</sup> Hacuaha jemu cjin xcusun xa rè Nina xi tjin, peru suvá ni Nai naja xi suaxa naja me. <sup>6</sup> Hacuaha hacuiin ngu chihin xcusun xa xi Nina sahmi me xcun cjuahñu naja, peru ngu ni Nina sahmi me vèhé ngajñi jima ngu jima ngu ngayaan. <sup>7</sup> Nina sahmi me xi ma tsejen xi jiya Hasen rè me cahntsua xahasen naja xingu xingu ngayaan, cojo sa xi ndaja tsajan ngajñi naja ngayejen ni. <sup>8</sup> Ngu xuta ne, jemu vechú cjuatacun rè me hya xi chja me ngu cjua xi sua Hasen rè Nina me. Hane ngu nga xuta ne, jemu ndaja vijnercu me hya xi chja me ngu cjua xi sua Hasen rè Nina me. <sup>9</sup> Hane ngu nga xuta ne, ha Hasen vèhé ni ne, sahmi xi ndaja mangucacun me cojo Nina. Hane ngu nga xuta ne, ha Hasen vèhé ni sahmi xi ma sahmi me xi mandaja xuta hmu rè. <sup>10</sup> Hane ngu nga xuta ne, fahatsja me cjuatacun xi sahmi me cjuarcun, hane ngu nga xuta ne, fahatsja me cjuatacun xi cuichja me ngu cjua xi sua Nina me. Ngu nga me ne, fahatsja me cjuatacun xi cuijnercu me mé xcusun hasen catsingatju ngu cjuatacun xi cafahatsja ngu xuta, ¿há hasen ndaja?, o ¿há hasen tsehen? Ngu nga xuta ne, fahatsja me cjuatacun xi cuichja me ngujo xcusun hne xi hvíin me. Hane ngu nga me ne, fahatsja me cjuatacun xi sua me machaya naja mé vijne xi cuacun vèhé. <sup>11</sup> Ngu tu tu ni Hasen rè Nina xi sahmi yéjé cjuandaja vèhé, hacuaha hacui ni Hasen rè Nina xi sua naja jima ngu ngayaan hacutjin xi chuya rè.

### *Sacuaha ngu ni yojo má ngayejen ni*

<sup>12</sup> Ha hyan ta yojo rè ngu xuta ne, tjin tsja, tjin ntsacu, tjin nguisin, tjin jingusa cahndé tsèhé. Peru yéjé ni cahndé vèhé ne, má ngu ni yojo rè xuta. Hacuaha cuanitjin rè Jesucristu. <sup>13</sup> Hacuaha cuanitjin naja ngayaan ta ngayejen ni ne, hya xi caxtenda ngayaan, handasa xuta ladu rè Nina o sa xutaxin, handasa mosu hndixahan o sa xuta xi ndaya tjin má ngayaan ne, peru camá ngayaan sacuaaha ngu ni yojo ngatsé rè ngu tu tu ni Hasen rè Nina. Hacuaha ngayejen ni ne, ngu tu tu ni Hasen rè Nina xi cavisehen cahntsua xahasen naja.

<sup>14</sup> Cuatjin ta yojo rè ngu xuta ne, hacuiin ngu cahndé ni tjin rè ta jemu cjin cahndé tjin rè. <sup>15</sup> Ntsacun ne, cuma cuichja cuitjin: “Ngatsé rè xi hacuiin ntsun má ngahan ne, vèhé xi hacuiin tsèhé yojo nuju má ngahan.” Cuatjin cuichja. Peru handasa cuatjin cuichja ne, hacuiin vèhé sahmi xi hacuiin tsèhé yojo naja má. <sup>16</sup> Hacuaha tyjavañujú nga ne, cuma cuichja cuitjin: “Ngatsé rè xi hacuiin túxcun má ngahan ne, vèhé xi hacuiin tsèhé yojo nuju má ngahan.” Cuatjin cuichja. Peru handasa cuatjin cuichja ne, hacuiin vèhé sahmi xi hacuiin tsèhé yojo naja má. <sup>17</sup> Sa xi suvá túxcun má yéjé yojo naja ne, ¿hacutjin cuinuhyan? O sa xi suvá tyjavañujú má yéjé yojo naja ne, ¿hacutjin cuijné naja? <sup>18</sup> Peru Nina ne, caviyujutahá me jima ngu cahndé tsèhé yojo naja tucutjin ni xi cachuya rè me. <sup>19</sup> Sa xi yéjé ni yojo naja má ngu ni ntsan o sa xi ngu ni túxcun ne, vèhé ne, hisca hacuiin yojo naja hmi rè. <sup>20</sup> Cuatjin xi jemu cjin cahndé xi cuacun vèhé xi má ngu ni yojo naja.

<sup>21</sup> Quihndé ne, túxcun ne, cumaji cuichja xi mamiji rè ntsan, o sa rcuun ne, cumaji cuichja xi mamiji rè ntsacun ta, <sup>22</sup> xi cjuaquixi ne, cahndé tsèhé yojo naja xi má naja xi hitsé sa tsavi ne, vèhé cahndé xi hitsé sa mameje. <sup>23</sup> Hane cahndé tsèhé yojo naja xi hitsé sa chjaharcuaain rè ne, vèhé cahndé xi hitsé sa ndaja nicaja rè. Hane cahndé tsèhé yojo naja xi má naja xi miji rè xi ningacun rè ne, vèhé cahndé xi hitsé sa ndaja cuidadu má. <sup>24</sup> Peru hacuiin sahmi ngujyè nihña cuatjin cojo cahndé tsèhé yojo naja xi ma ningacun rè. Nina ne, hya xi catsindaja me yojo naja ne, casahmi me xi hitsé sa chjaharcun rè cahndé xi hitsé sa tsavi. <sup>25</sup> Cuatjin casahmi Nina yojo naja, cojo sa xi ngu chihin ni sahmixa yéjé yojo naja, hacuaha yéjé ni cahndé tsèhé yojo naja ne, ngu tangun ni marcun rè tsèhé xicjin. <sup>26</sup> Hane sa xi ngu cahndé tsèhé yojo naja choho vatju má ne, hacuaha cojo sa yéjé cahndé tsèhé yojo naja choho má rè. O sa xi ngu cahndé tsèhé yojo naja vaxëndaja xuta ne, hacuaha cojo yéjé sa cahndé tsèhé yojo naja ndamá rè.

<sup>27</sup> Quihndé ne, ngayejen ni xuta ladu rè Nina ne, sacuaaha yojo rè Jesucristu má ngayaan, hane jima ngu ngayaan ne, má ngayaan sacuaaha ngu cahndé tsèhé yojo rè me. <sup>28</sup> Hane ngajñi naja ngayaan xuta ladu rè Nina ne, tjuntjun ne, caviyuju me apóstol; xi ma jo ne, caviyuju me profeta; xi ma jyan ne, caviyuju me xuta xi vicuya cjua rè me; hane xi cjuí sa ne, caviyuju me xuta xi ma sahmi cjuarcun, cojo xuta xi ma sahmi xi mandaja xuta hmu rè, xuta xi visecoo me jingu sa xuta, xuta xi vítexa naja, xuta xi ma chja me ngu hne xi hvíin me mé vijne. <sup>29</sup> Tsèhé cjuatjo vihi ne, hacuiin yéjé vihi saté naja jimangu yaan ta, ¿há ngayejen ni má ngayaan apóstol ni? ¿há ngayejen ni má ngayaan profeta ni? ¿há ngayejen ni vicuyan cjua rè Nina ni? ¿há ngayejen ni ma nihña cjuarcun ni? <sup>30</sup> ¿há ngayejen ni ma nihña xi mandaja xuta hmu rè ni? ¿há ngayejen ni ma nújan hne xi hisca núhyaan mé vijne



ni? ¿Há ngayejen ni ma tahan machaya rê xuta mé vijne hne vëhë ni? <sup>31</sup> Vëhë xi meje rê xi ngayun ne, catamameje nuju cjuatjo rê Nina xi hitsë sa vengui chji rê.

Quihndë ne, tsingácun nuju ngu ndiya xi hitsë sa jercu ndaja.

## 13

### *Mé vijne xi tjin naja cjuahmutacun*

<sup>1</sup> Ngahan ne, sa xi cuichjá yëjë hne rê xuta hacuaha cuichjá hne rê ángel, peru tsajin ná cjuahmutacun ne, tangun ngahan cojo ngu quicha xi choho fane o sa ngu quicha xi hmí platillu xi jercu fane camahani. <sup>2</sup> Sa xi cuichjá ngu cjua xi sua ná Nina, sa xi vijnercú yëjë cjua rê Nina xi tjihma, sa xi hvë yëjë cjuatacun, hacuaha sa xi ma tsiniya ngu naxi ngatsë rê xi jercu ndaja mangucacún cojo Nina, peru tsajin ná cjuahmutacun ne, tsajin mé vengui chji naha. <sup>3</sup> Sa xi suá rê xuta yuma yëjë xi tjin ná, hacuaha hisca suá yojo naha xi cueti, peru tsajin ná cjuahmutacun ne, tsajin mé machjirëhë ná xi cuatjin sahme.

<sup>4</sup> Hya xi tjin naja cjuahmutacun ne, hacuaha jyë tacun, ndaja ngayaan, hacuiin chini ngayaan, hacuiin xta ngayaan, hacuiin nihña yehe suvaan yojo naja, <sup>5</sup> hacuiin xcuahya ngayaan, hacuiin meje naja xi suvaan ni ndaja tsajan, hacuiin ma cjan naja, hacuiin veyantacun cjuatsehen xi sahmi xuta cojo naja. <sup>6</sup> Xi tjin naja cjuahmutacun ne, tsajin mé ndama naja tsëhë cjuatsehen ta xi ndama naja ne, tsëhë cjuaquixi. <sup>7</sup> Xi tjin naja cjuahmutacun ne, ngajñi rê tu mé ni cjuacjintacun ne, hatuxa jyë tacuun, hatuxa mangu tacuun, hatuxa vetahan tacun, hatuxa caa naja.

<sup>8</sup> Cjuahmutacun ne, tsajin nixtin xi cjuë. Peru cuechú nixtin xi ha quihndë suaain sa Nina cjua xi cuichja profeta, ha quihndë cuichjaain sa xuta hne xi vijni rcu me, hacuaha ha quihndë suaain sa Nina cjuatacun xi ndaja cuijnercu ngu xuta cjua rê me. <sup>9</sup> Cuatjin cuma ta cjua rê Nina ne, sehe hitsë xi vijnercuun, hacuaha sehe hitsë cjua rê Nina xi chja profeta. <sup>10</sup> Peru hya xi cjehe me xi vëë chichihin yëjë cjua rê Nina ne, hya cjuë xi tsë tsë ni hyan.

<sup>11</sup> Hya xi lihndi ngahan ne, cavisiajme sacuaha visiajmi langa, catsingátaha cacún sacuaha tsingataha cacun langa, hacuaha cjuatacun naha ne, sacuaha cjuatacun rê langa. Peru xi camachangá ngahan ne, cavejñáxen xcusun rê langa. <sup>12</sup> Quihndë ne, sehe hitsë vijnercuun cjua rê Nina sacuaha tsejen naja hya xi chutsejenyan ni ngu speju xi hacuiin ndaja tsejen. Peru cuechú nixtin xi chutsejen xcun cojo xcun. Quihndë ne, sehe hitsë xi vijnercú. Peru cuechú nixtin xi chichihin ni cuijnercú, sacuatjin vëë ndaja ná Nina. <sup>13</sup> Quihndë ne, tjin jyan xcusun xi nihña xi tsajin nixtin xi cjuë. Tjin ne, xi mangu tacuun cojo Nina. Xi má jo ne, xi vetahan tacun Nina. Xi má jyan ne, xi tjin naja cjuahmutacun. Peru xi hitsë sa matitjun ngajñi rê xi catsijyan vëhë ne, xi tjin naja cjuahmutacun.

## 14

### *Hne xi hyaan mé vijne*

<sup>1</sup> Quihndë ne, nihñu ngahñu xi tjin nuju cjuahmutacun. Hacuaha catamameje nuju xi sua nuju Nina cjuatjo rê me. Peru hitsë sa chjahyun rê me cjuatacun xi cuinújun cojo xuta ngu cjua xi sua nuju me ta, <sup>2</sup> xuta xi chja me ngu hne xi hvín me mé vijne ne, hacuiin chja me cojo xuta ta suvá ni Nina chja me cojo ta, tsëhë xi tsajin yo vijnercu. Hasen rê me sahmi xi chja me cjua xi tsajin yo vëë. <sup>3</sup> Peru me xi chja cjua xi casua Nina me ne, chja me cojo xuta, cojo sa xi cuisecoo me xuta hacuaha sua rê me cjuetacun. <sup>4</sup> Xuta xi chja me ngu hne xi hvín me mé vijne ne, visecoo suvá rê me yojo rê me. Peru xuta xi chja me ngu cjua xi casua Nina me ne, visecoo rê yëjë xuta rê yungun.

<sup>5</sup> Ngayujun ni ne, meje ná xi cuma cuinújun hne xi vijniircun, peru hitsë sa meje ná xi chjuhunnuntsun cjuatacun xi cuinújun cojo xuta ngu cjua xi sua nuju Nina ta xuta xi chja me cojo xuta ngu cjua xi sua Nina me ne, hitsë sa matitjun me xi cuma rê me xi chja hne xi vijniircuun. Peru sa xi cuma cuichja me cojo naja mé vijne hne vëhë ne, ndatjin ta cuisecoo naja ngayejen ni xuta rê yungun xi cuatjin sahmi me. <sup>6</sup> Vëhë xi hya xi cjuëjtjengë nuju ne, venguiin chji rê xi cuichjá cojo nuju ngu hne xi vijniircun. Xi vengui chji rê ne, hacui xi suá cumachaya nuju ngu cjua xi casua ná Nina, o sa xi cuichjá cojo nuju ngu cjuatacun xi sua Nina, o sa xi cuicuyá nuju ngu cjua rê Nina o ngu cjuachacun.

<sup>7</sup> Cuma cuinújan ne, sa xi ngu tyjo o sa ngu arpa hacuiin ndaja fane ne, hisca hyaan mé pieza fane. <sup>8</sup> Hacuaha sa xi ngu tyjo rê sindadu hacuiin ndaja sua xta rê ne, tsajin yo cuëhëchjine rê xi cjue xcun si. <sup>9</sup> Hacuaniitjin nuju ngayun ta sa xi cojo ntsuvun nújun ngu cjua xi nuhyaain rê ne, tsajin yo xi cuijnercu cjua vëhë ta sacuaha xi ngajñi tjo ni nújun. <sup>10</sup> Nguehe ngasunhndë ne, hisca hyaan há cjín xcusun hne tjin, hane yëjë ni ne, tjin mé vijne. <sup>11</sup> Peru sa xi vihndeen ngu hne ne, sacuaha ngu xuta ngu nangui ngahan xi cuma rê xuta xi tichja cojo ná jan, hacuaha me vëhë ne, sacuaha xuta ngu nangui me xi cuma

na ngahan. <sup>12</sup> Vêhê xi quihndê ta ngayujun ni jemu meje nuju cjuatjo rê Nina ne, nihñu ngahñu xi sacú nuju ngu cjuatjo xi visecoo rê yêjê sa xuta rê yungun.

<sup>13</sup> Vêhê xi xuta xi chja me ngu hne xi hvín me mé vijne ne, catjehya rê me Nina cojo sa xi cuma suacuenda me mé vijne. <sup>14</sup> Sa xi sahme oración naha cojo ngu hne xi vijniircú ne, hasen naha ne, sahmixa, peru cjuatacun naha ne, sahmixaain. <sup>15</sup> ¿Hacutjin sahme ni? Sahme oración naha cojo hasen naha, hacuaaha sahme oración naha cojo cjuatacun naha. Sê cojo hasen naha, hacuaaha sê cojo cjuatacun naha. <sup>16</sup> Sa xi ngayun nihñuu cuatjin ne, hya xi tuhun nacuechji rê Nina cojo hasen nuju ne, cumaji cuichja xuta xi yahnga sa: “Cuatjin jain” ta, tsêhê xi cjua xi nújun ne, vijniircu me. <sup>17</sup> Handasa jemu ndaja tuhun nacuechji rê Nina, peru xuta xi yahnga ne, visecuaain camahani rê me. <sup>18</sup> Súa nacuechji rê Nina ta hitsê sa chjá ngahan hne xi vijniircú xi cuma nuju ngayujun ni. <sup>19</sup> Peru hya xi ma tangun ngahan cojo xuta ngajan yungun ne, hitsê sa chuya ná xi cuichjá ndastu hñu cjua cojo cjuatacun naha cojo sa xi cuicuyá rê xuta, xi cuma rê xi cuichjá tê mil cjua cojo ngu hne xi vijniircu me.

<sup>20</sup> Ngayujun ni ne, ha quihndê xicaningatuun tacún sa sacuatjin tsingataha cacun quihndi. Sacuatjin rê ngu quihndi xi hisca hvín mé xi hmí rê cjuatsehen ne, cuatjin meje rê xi hacuaaha hyuun. Peru xi cojo cjuatacun nuju ne, meje rê xi ningatuhun tacún sacuaaha tsingataha cacun ngu xuta changá. <sup>21</sup> Xcun xujun rê Nina ne, camahindu cjua xi cachja me cuitjin: “Ngahan ne, tsingátju xuta ngu nangui xi chja jingu sa hne, hane hne rê me cuichja me cjua naha cojo yêjê xuta ladu naha. Peru handasa cuatjin sahme ne, cuetaharcuaain me cjua naha, chja Nina.” Cuatjin camahindu. <sup>22</sup> Vêhê xi cjuatjo xi casua naja Nina xi ma nújan hne xi hisca hyaan mé vijne ne, hacuiin ngatsê rê xuta xi ha mangu cacun cojo Nina xi casua me ta ngatsê rê xuta xi tsitjungui cjua rê me. Hane cjuatjo xi ma nújan ngu cjua xi sua naja Nina ne, hacuiin ngatsê rê xuta xi tsitjungui cjua rê me xi casua me ta ngatsê rê xuta xi ha mangu cacun me cojo rê me. <sup>23</sup> Vêhê xi hya xi matangun ngayujun ni ngayun xuta rê yungun, sa xi ngayujun ni nújun ngu hne xi hisca hyuun mé vijne hane cjuehe ngujo cha xi hvín cjua rê Nina hacuaaha hisca manguaain cacun cha cojo me ne, ¿hácuiin tsingataha cacun cha xi sca nuju ni? <sup>24</sup> Peru sa xi ngayujun ni ngayun nújun ngu cjua xi sua nuju Nina hane cjuehe ngu cha xi manguaain cacun cojo Nina hacuaaha hisca hvín cha cjua rê me ne, xi vihndê cha yêjê cjua vêhê ne, cuijnercu cha xi jemu tjin jyê rê cha, suvá ni cha tsichuva cha cjuatacun rê cha, <sup>25</sup> hacuaaha cjua xi hinchahma ngajñi rê cjuatacun rê cha ne, cuitsjen rê cha. Ngajan xi cjue cuiticjexcun cha, cjuaharcun cha Nina. Hacuaaha tsinguixi cha xi tacun jain Nina nguêhe ngajñi nuju.

*Meje rê xi ndandaja nihña yêjê ni*

<sup>26</sup> Ngayujun ni ne, cuitjin vijne cjua xi titsihíndu nuju. Hya xi matangun ngayujun ni ne, ngu ngayun ne, sun tsêhê Nina, ngu nga ngayun ne, vicuyun ngu cjua rê Nina, ngu nga ngayun ne, nújun ngu cjua xi casua nuju Nina, ngu nga ngayun ne, nújun ngu hne xi hisca hyuun mé vijne, hane ngu nga ngayun ne, nújun mé vijne cjua rê hne jan. Xi meje rê ne, yêjê ni xcusun xi nihñu vê ne, cuatjin nihñu cojo sa xi cuisecun xingun ngajñi nuju. <sup>27</sup> Sa xi tjin xuta xi cuichja me hne xi vijniircun ne, catichja jo o sa xi jyan ni me, hacuaaha chuya ngu me catichja me. Hane meje rê xi cuinújun ngu ngayun mé vijne cjua xi cachja xuta xi cuacun jan. <sup>28</sup> Peru sa xi tsajin ngu ngayun xi cuma nihñu cuatjin ngajan yungun ne, catiyujuyuu ni xuta xi cuacun vê. Catichja suvá ni me cahntsua xahasen rê me, o sa suvá ni Nina catichja me cojo me. <sup>29</sup> Hacuanitjin ni sa xi tjin xuta xi cjuahahtsja me ngu cjua tsêhê Nina ne, jo jyan ni me catichja me, hane yêjê sa ngayun ne, nichuvun cjua vêhê. <sup>30</sup> Sa xi ngu ngayun xi nechun ndyá chjuhunntsun ngu cjua tsêhê Nina ne, catisejyu me xi titjun tichja jan. <sup>31</sup> Xi cuatjin ne, ngayujun ni cuma cuinújun chuya ngu chuya ngu ngayun ngu cjua xi chjuhunntsun tsêhê Nina, cojo sa xi hacuaaha cojo yêjê sa ngayun ne, cumachaya nuju hacuaaha sacú nuju cjuetacun. <sup>32</sup> Xuta xi chja me ngu cjua xi fahatsja me tsêhê Nina ne, cjua vêhê cuitexa me cjuatacun rê suvá me ta, <sup>33</sup> tsêhê xi Nina ne, chuyiin rê me xi tujyê nihña ta xi chuya rê me ne, ngu cjuandaja cjuajeya.

Sacuatjin xcusun xi nihña ngayejen ni xuta ladu rê Nina ne, <sup>34</sup> yachjin ne, mijí rê xi cojo na cuichja na hya xi tjin tangun ngayaan yungun ta, tsêhê xi tsajin cahndê xi cuichja na. Xi meje rê ne, catiyuju na ngahma gobiernu rê xihin rê na, sacuatjin vitexa ley rê Nina. <sup>35</sup> Sa xi tjin ngu cjua xi meje cumachaya rê na ne, ndava na catinenguise na xihin rê suvá na ta, tsêhê xi jemu cjuasava xi ngu chjuun cuichja na hya xi tjin tangun ngayaan ngajan yungun.

<sup>36</sup> ¿Há tjtutjun ngayun canújun cjua rê Nina cojo xuta? ¿Há suvun ni catsingatju nuju Nina cjua vêhê ni? <sup>37</sup> Sa xi tjin ngu xuta xi má rê me xi profeta me o sa quitsê rê xahasen rê me cojo Hasen rê Nina ne, catijnercu me ta cjua xi titsihindu nuju vi ne, Nai naja vitexa me. <sup>38</sup> Peru sa xi mijí sahmicuenda me cjua naha ne, hacuaaha xicanihñucunduun cjua rê me.

<sup>39</sup> Vêhê xi ngayujun ni ne, catamameje nuju xi cuma ngayun profeta, hacuaha xicanichuun rê xuta cahndê xi cuichja me hne xi vijniircu me. <sup>40</sup> Xi meje rê ne, yêjê ni xcusun xi nihñu ne, ndandaja nihñu hacuaha chichihin ni nihñu yêjê.

## 15

### *Cjuandajyihî xi chja tsêhê xi cavuya Jesucristu cjuahñu*

<sup>1</sup> Ngayujun ni ne, meje tsinguitsjen nuju tsêhê cjuandajyihî xi casuá camachaya nuju, cjuandajyihî xi chja tsêhê Jesucristu. Cachjuhunntsun cjuandajyihî vêhê, hacuaha ndaja sa tijimangu tacún cojo. <sup>2</sup> Hane ngatsê rê cjuandajyihî vêhê ne, tivetjuntjun tsêhê jyê nuju, sa xi nismutacuun cjuandajyihî vêhê. Cuatjin tivetjuntjun sa xi hacuñin tu mahya camangu tacún cojo.

<sup>3</sup> Ngahan ne, casuá camachaya nuju cjuaxi matitjun xi cafahántsaxi. Cachjá ta Jesucristu ne, cahme me cojo sa xi tsicjê me jyê naja, sacuatjin camahindu xcun xujun rê Nina. <sup>4</sup> Hacuaha cachjá cojo nuju ta caseyaniji me hane xi ma jyan nixtin ne, cavuya nga me cjuahñu, sacuatjin camahindu xcun xujun rê Nina. <sup>5</sup> Hacuaha cachjá cojo nuju ta cavêê Pedru Jesucristu, sehe cavêê yêjê tejó apóstol jan me. <sup>6</sup> Sehe ngu tangun ni cavêê nga vatju sa hñú cientu xuta ladu rê me me. Hane handasa cahme yahnga me ne, peru jemu cjín me xi siu quicun sa hisca quihndê. <sup>7</sup> Sehe cavêê Jacobo me, sehe cavêê nga yêjê apóstol me.

<sup>8</sup> Hane xi camá ngascan xi cavuya cjuahñu rê me ne, ngahan cahvê me. Ngahan xi sacuaha ngu quihndê xi cavatjutaha tsêhê nixtin rê, sehe catsin. <sup>9</sup> Cuatjin chjá ta, tsêhê xi ngahan ne, hitsê sa chúva vengui chji naha xi cuma rê apóstol xi yahnga. Ngahan ne, hisca vechiin chuva rê xi apóstol cuichja xuta tsahan ta, tsêhê xi jemu jyê cjuahñi casuá rê xuta ladu rê Nina titjun. <sup>10</sup> Peru ngatsê rê cjuandaja rê Nina ne, ngahan ne, apóstol má ngahan. Hane cjuandaja xi casahmi me cojo ná ne, hacuñin tu mahya ta hitsê sa hñu casahme xa xi cuma rê yêjê sa apóstol. Peru hacuñin suva casahme ta cjuandaja rê Nina cavisecoo ná. <sup>11</sup> Quihndê ne, cuendaain rê çhá ngahan? o çhá me vêhê ne?, peru cjuandajyihî vêhê xi catihin camachaya nuju, hacuaha cjuaxi vêhê xi camangu tacún cojo.

### *Cjuandajyihî xi chja tsêhê xi cuxa nima cjuahñu*

<sup>12</sup> Quihndê ne, quihndê ta tihin machaya rê xuta xi Jesucristu ne, cahme me sehe cavuya nga me cjuahñu ne, çhacutjin má xi nújun yahnga ngayun xi nima ne, vuyaaain nga cjuahñu ni? <sup>13</sup> Sa xi vuyaaain nima cjuahñu ne, ngajan xi Jesucristu ne, hacuaha cavuyaaain nga me cjuahñu. <sup>14</sup> Hane sa xi cavuyaaain Jesucristu cjuahñu ne, ngajan xi tu mahya xi cuatjin tihin machaya rê xuta, hacuaha ngayun ne, tu mahya xi cuatjin mangu tacún. <sup>15</sup> Sa xi cuatjin ne, ngajan xi hacuñin cuatjin cjuaxi nújin tsêhê Nina ta, tsêhê xi nújin xi Nina ne, catsicuya me Jesucristu cjuahñu. Peru quixiin xi catsicuya Nina Jesucristu cjuahñu sa xi hatuxa vuyaaain nima cjuahñu. <sup>16</sup> Sa xi hatuxa tsicuyaaain Nina nima cjuahñu ne, ngajan xi hacuaha catsicuyaaain me Jesucristu cjuahñu. <sup>17</sup> Hane sa xi catsicuyaaain me Jesucristu cjuahñu ne, ngajan xi tsajin mé vengui chji rê xi cuatjin mangu tacún cojo rê me, hacuaha cjêê camahani cjêê jyê nuju. <sup>18</sup> Hacuaha nima xi camangu cacun cojo Jesucristu ne, hacuaha cachajá me. <sup>19</sup> Sa xi suvá ni quihndê xi nechan cjuahñu machjirêhê xi cuitjin vetahan tacun Jesucristu ne, hitsê sa jemu chojyihî tsajan xi cuma rê yêjê sa xuta.

<sup>20</sup> Peru xi cjuaquixi ne, Jesucristu ne, Nina catsicuya rê me cjuahñu. Tsêhê yêjê nima xi cahme ne, me vêhê tjutjun me cavuya me cjuahñu. <sup>21</sup> Sacuatjin xi ngatsê rê ngu xihin cavisehen cjuaveya ngasunhndê ne, hacuanitjin ni ngatsê rê ngu xihin ne, cavisehen cjuatacun xi nima ne, cuxa cjuahñu. <sup>22</sup> Ngatsê rê xi tjê rê Adán má xuta ne, vêhê xi yêjê ni me ne, hme me. Hacuanitjin ni ngatsê rê xi sahmitangun xuta cjuatacun rê me cojo Jesucristu ne, vêhê xi yêjê ni me xi cuacun vê sacú rê me cjuahñu xatsê. <sup>23</sup> Peru cuatjin sacú rê jima ngu me hacutjin xi satê rê me: tjutjun ne, Jesucristu; ngaxton vêhê ne, hya xi cuxa nga Jesucristu ne, xuta xi ladu rê me ne, tsicuya me cjuahñu, sacú rê me cjuahñu xatsê. <sup>24</sup> Ngaxton vêhê nga ne, tsicjê Jesucristu yêjê xutaxa rê xi jemu tsehen, hacuaha tsicjê me yêjê xitsehen. Hane xi matjenguicjin ne, sahmi me entregadu cojo Nina Nahmi naja gobiernu xi sahmi me. Hane hya cuijnetaha ngasunhndê. <sup>25</sup> Cuatjin cuma ta meje rê xi Jesucristu ne, sahmi me gobiernu hisca hya xi cuiyuju Nina ngahma gobiernu rê Jesucristu yêjê ni xi sahmi rê me condra. <sup>26</sup> Hane xi cuatju tsicjê Nina yêjê sa xi sahmi rê Jesucristu condra ne, sehe tsicjê me cjuaveya ta, tsêhê xi hatuxa yêjê ngarca ni caviyuju Nina ngahma gobiernu rê Jesucristu. <sup>27</sup> Chja xujun rê Nina xi caviyuju me yêjê ngarca ni ngahma gobiernu rê Jesucristu. Peru ha suvá tsejen xi hacuñin cojo Nina, me xi caviyuju yêjê ngarca ni jan, cavêjña me. <sup>28</sup> Peru hya xi ha yêjê ngarca ni cuiyuju ngahma gobiernu rê Jesucristu, me xi Quihndê rê Nina ne, hya cuejñá suvá Jesucristu jojo rê me ngahma gobiernu rê Nina, me xi caviyuju yêjê ngarca ni ngahma gobiernu rê Jesucristu. Cuatjin cuma, cojo sa xi Nina ne, cuma titjun camahani me tsêhê yêjê ngarca ni.

<sup>29</sup> Quihndé ne, sacuaaha xuta xi cuatjin xtenda me ngatsé rë nima ne, ¿mé machjiréhë? Sa xi hatuxa vuyaaïn nima cjuahñu sacuatjin chja yahnga xuta ne, ¿mé má cuatjin xtenda xuta ngatsé rë nima? <sup>30</sup> Hane sacuaaha ngayin ne, ¿mé má yějë ni hora nechintihin tsavi? <sup>31</sup> Nina vëë me xi hacuaaha ngahan ne, ngu nixtin ngu nixtin ne, tejñataha tsavi tséhë cjuaveya. Ngayujun ni ne, jemu vaxëndaja nuju ngatsé rë xi tjin tangun cjuatacun naja cojo Nai naja Jesucristu. <sup>32</sup> Sa xi ngahan cavitejñataha tsavi nguehe Efeso sacuaaha ngu xuta xi hacuiïn ladu rë Nina má me ne, ¿mé ndaja tsahan ni? Sa xi hatuxa vuyaaïn nima cjuahñu ne, sacuatjin chja cjuua ne: “Jemu sa ndaja xi xinëë siuun ta, nchujun ni nguini ne, cueyan!” <sup>33</sup> Ha quihndé xicatuun cahndé xi cumandacha sa ngayun ta, tjin ngu cjuua xi chja cuitjin: “Xi nihña tangun cojo xuta tsehen ne, vëhë tsinguetsun rë xcusun ndaja xi nihña.” <sup>34</sup> Catuya nga catejña chihin cjuatacun nuju, hacuaaha ha quihndé xicanihñuu sa cjuatsehen. Tjin yahnga ngayun ne, hisca hyuun Nina. Cuatjin chjá cojo nuju cojo sa xi cuma sava nuju.

*Xcusun yojo xi sacú rë nima hya xi cuya cjuahñu*

<sup>35</sup> Peru tjin rë yahnga ngayun xi chjinengunsun cuitjin: “¿Hacutjin nga cuya nima cjuahñu? ¿Mé xcusun yojo rë me xi cuya?” Cuatjin chjinengunsun. <sup>36</sup> ¡Ngarca, xan! Hya xi nitjen ngu tutjé ne, titjun cueya sehe cuetju. <sup>37</sup> Xcusun xi nitjen ne, hacuiïn xcusun xi sehe cuma jyë jan, ta ngu tutjé ni xi nitjen, sacuaaha ngu trigu o sa tu mé sa xcusun tutjé. <sup>38</sup> Peru Nina sua me xcusun rë hacutjin jyih xi cachuya rë me. Jima ngu tutjé ne, sua rë me xcusun rë xi tséhë súvá. <sup>39</sup> Yojo ne, hacuiïn ngu xcusun ni tjin ta hacjahi xcusun yojo rë xuta, hacjahi xcusun yojo rë chu, hacjahi xcusun yojo rë chu nisé, hacuaaha hacjahi xcusun yojo rë chu ti. <sup>40</sup> Tjin hasen xi tjin ngajan ngahnga hacuaaha tjin hasen rë yějë xi tjin nguehe nangui. Peru hacjahi tsejen xcusun xi tjin ngajan ngahnga hacuaaha hacjahi tsejen yějë xi tjin nguehe nangui. <sup>41</sup> Hacjahi hasen ndajyih rë tshu, hacjahi hasen ndajyih rë sá, hacuaaha hacjahi hasen ndajyih rë niñú. Hisca ngajñi rë niñú ne, hacjahi hacjahi hasen rë jima ngu.

<sup>42</sup> Hacuaaha cuatjin cuma hya xi nima cuya cjuahñu. Hya xi seyaniji nima jan ne, hatuxa fë fehndu yojo rë. Peru hya xi nima cuya nga cjuahñu ne, tsajin nu tsajin nixtin xi cjuehndu yojo rë. <sup>43</sup> Hya xi seyaniji ne, tsajin camahani mé ndajyih, peru hya xi cuya nga cjuahñu ne, jercu ndajyih camahani. Hya xi seyaniji ne, tsajin camahani ngahñu rë, peru hya xi cuya nga cjuahñu ne, jemu hñu camahani ngahñu rë. <sup>44</sup> Hya xi seyaniji ne, seyaniji ngu yojo naja xi hatuxa tséhë cjuahñu xi tjin nguehe ngasunhndé vihi, peru hya xi cuya nga cjuahñu ne, cuya ngu yojo naja xi hatuxa tséhë cjuahñu xi tjin ngajan ngahnga. Quihndé ta tjin yojo naja xi tséhë cjuahñu xi tjin nguehe ngasunhndé ne, ngajan xi hatuxa tjin yojo naja xi tséhë cjuahñu xi tjin ngajan ngahnga.

<sup>45</sup> Hacuaaha cuatjin camahindu xcun xujun rë Nina hiscan chja cuitjin: “Adán, xihin xi tjutjun camá ne, casua Nina me cjuahñu.” Peru Jesucristu, me xi canduva camá ngascan ne, me vëhë Hasen xi sua cjuahñu. <sup>46</sup> Hacuiïn titjun sacú naja cjuahñu xi tséhë ngahnga ta tséhë ngasunhndé titjun sacú naja, sehe sacú naja cjuahñu xatsé xi tséhë ngahnga. <sup>47</sup> Xihin xi tjutjun camá jan ne, cojo nihndé camá. Vëhë xi tséhë ngasunhndé má. Peru Jesucristu, xihin xi majo jan ne, canduva me tséhë ngahnga. <sup>48</sup> Yějë xuta xi tséhë ngasunhndé me ne, hatuxa tangun me cojo xihin xi nihndé camá jan. Hane yějë xuta xi tséhë ngahnga me ne, hatuxa tangun me cojo xihin xi canduva tséhë ngahnga. <sup>49</sup> Sacuatjin xi camá ngayaan sacuaaha xihin xi nihndé camá jan ne, hacuanitjin cuma ngayaan sacuaaha xihin xi canduva tséhë ngahnga jan.

<sup>50</sup> Ngayujun ni ne, nguehe cuichjá cojo nuju ta yojo naja xi yojo cojo jni camá ne, cumaji cuisehen hiscan sahmi Nina gobiernu. Hacuaaha ngu xcusun xi hatuxa fehndu ne, cumaji cuisehen hiscan tsajin camahani mé xi fehndu. <sup>51</sup> Chutsujun ni. Nguehe cuichjá cojo nuju ngu cjuatacun xi jiyahma titjun: Hacuiïn ngayejen ngayaan cueyan. Peru ngahyan ni sacú yojo xatsé naja <sup>52</sup> ngu marcu macjain ni, sacuaaha xi ngu cuechjan ngu chuxahan ni tuxcun, hya xi cjuane sacuaaha ngu tyjo xi meje cuijnetaha fane ta, cjuane sacuaaha ngu tyjo, sehe cuya nima cjuahñu cojo yojo xatsé rë xi tsajin nu tsajin nixtin cjuehndu. Hane ngayaan ne, hacuaaha sacú naja yojo xatsé naja. <sup>53</sup> Cuatjin cuma ta, yojo naja vi xi hatuxa fehndu ne, meje rë xi cuya ngu yojo xi hatuxa fehndiïn. Yojo naja vi xi hatuxa hme ne, meje rë xi cuya ngu yojo xi hatuxa hmii. <sup>54</sup> Hane hya xi cuatjin cuma ne, hya cuetjuuca cjuua xi camahindu xcun xujun rë Nina xi chja cuitjin: “Cjuaveya ne, cjuë camahani. Cjuahñu xatsé xi fehndiïn ne, vëhë scaa rë cuetjundaja. <sup>55</sup> ¡Cjuaveya ne, ha quihndé tsajin camahani rë ngahñu! ¡Cjuaveya ne, ha quihndé tsajin camahani mé cjuahngatacun xi cuma sahmi cojo naja!” <sup>56</sup> Cjuaveya ne, sahmi cjuahngatacun cojo xuta ngatsé rë cjuatsehen, hacuaaha cjuatsehen ne, tjin rë ngahñu ngatsé rë ley rë Moisés. <sup>57</sup> Peru nacuechji rë Nina, me xi sahmi xi vetjunndajan ngatsé rë yějë ni xi casahmi Nai naja Jesucristu.

<sup>58</sup> Vêhê xi ngayujun ni ne, ngayun xi jemu hmú cacún nuju ne, tejñuhñu xahasen nuju, xicavetjunxuun tsêhê ndiya rê Nina. Yêjê ni nixtin ne, tángun nduju camaha sa nihñu xa xi casua nuju Nai naja. Ha hyun ta yêjê xa xi nihñu ne, hacuiin tu mahya, xi cuatjin tjin tangun cjuatacun nuju cojo Nai naja.

## 16

### *Cuma tangun tujún xi cjue Jerusalén*

<sup>1</sup> Quihndê ne, sacuaaha tujún xi jima tangun xi cjue cuisecoo rê xuta ladu rê Jesucristu, me xi jemu choho tivatju tijima ngajan Jerusalén ne, sacuatjin cachjá cojo xuta rê yungun ngajan distritu Galacia ne, cuatjin nihñu. <sup>2</sup> Jima ngu domingu ne, meje rê xi ngayujun ni ne, tejñuxun tsê tsê tujún xi nihñu ganar tsêhê xa xi nihñu. Tetjún ne, cojo sa xi hya xi cjuêhê ndyá ne, mijí rê xi chjahya nga rê tujún. <sup>3</sup> Hane hya xi cjuêhê ndyá ne, yo xuta xi cuinújun xi cjue ne, tshihindu ngahan xujun xi cuaha me, sehe tsingátju me cjuecani me cjuatjo nuju ngajan Jerusalén. <sup>4</sup> Hane sa xi tsejen ta ndatjin xi ngahan cjuê ne, cuma cjue me cojo ná.

### *Sua Pablo machaya rê xuta Corinto xi cjuetjengui me me*

<sup>5</sup> Cuechú nixtin xi cjuêjtjêngê nuju, peru hya xi ha cavátju distritu Macedonia, tsêhê xi hatuxa tjin ná xi cuátju ngajan. <sup>6</sup> Cuma rê cuitejñataha cojo nuju ngujo nixtin, o sa xi yêjê nixtin rê chan hnchan. Hane xi cuatjin ha cavitejñataha cojo nuju hitsé ne, cuma cuisecuun ná hitsé xi cjuê sa hiscan xi cjuê. <sup>7</sup> Cuatjin tsingátaha cacún ta, tsêhê xi mijí ná xi nduva scútsejen nuju xi tu ñaja cuátju ni ta xi vetahá cáacun ne, xi cuitejñataha cojo nuju jyê nixtin, sa xi sua Nai naja cahndê.

<sup>8</sup> Peru cuitejñataha nguehe Efeso hisca xi cuechú suhi tsêhê Pentecostés ta, <sup>9</sup> tsêhê xi jemu casacu ná cahndê xi sahme xa xi ndatjin cuetjucaa, handasa hacuaaha jemu tjin xuta xi sahmi ná me condra.

<sup>10</sup> Quihndê ne, sa xi cjue scusehenya nuju Timoteo ne, nihñu xi hacuiin cumacjín cacun me xi cuejña me ngajñi nuju ta, tsêhê xi sahmi me xa rê Nai naja sacuatjin sahme ngahan. <sup>11</sup> Vêhê xi hisca ngu yun ne, mijí rê xi nihñuchuvun me. Tisecuun rê me xi cjue sa me cojo cjuandaja cjuajeya, cojo sa xi cuma cuinduvatjengui ná me ta, tsêhê xi nguehe tejñaya rê me cojo sa ngujo xuta ladu rê Nai naja xi nduva cojo me.

<sup>12</sup> Quihndê ne, sacuaaha Apolos ne, jemu cachjá cojo rê me xi cjue me cojo ngujo sa xuta ladu rê Nai naja jan, cjuetjengui nuju me, peru mijí cjue me xi ngutjen. Peru cjue me nixtin hya xi sua rê me chuva rê.

### *Cjua xi vijnetaha*

<sup>13</sup> Nechun cuidado. Ndaja sa catamangu tacún cojo cjuachacun xi macjain naja. Tiyujunhñu cjuatacun nuju hacuaaha tuhun ngahñu xahasen nuju. <sup>14</sup> Yêjê ni xi nihñu ne, nihñu cojo cjuahmutacun.

<sup>15</sup> Ngayujun ni ne, ha hyun ta yêjê me xi siu ndava Estéfanos ne, me xi cuacun vê tjutjun cavisehen me ladu rê Jesucristu ndyá Acaya, hacuaaha casua suvá me yojo rê me xi cuisecoo me xuta ladu rê Jesucristu. <sup>16</sup> Meje ná xi ngayujun ni ne, tinuhyun tsêhê xuta xi cuatjin sahmi, hacuaaha tinuhyun tsêhê xuta xi visecoo me xcun xa rê me xi cuacun vêhê.

<sup>17</sup> Jemu ndama ná xi cafehe Estéfanos nguehe, cojo Fortunato cojo Acaico. Handasa tsajin ngayujun ni nguehe, <sup>18</sup> peru ndastu me xi jyan vi ne, casua ná me cjuetacun, sacuatjin casua nuju me ngayun cjuetacun. Xuta xi cuatjin sahmi ne, meje rê xi chjuhunrcun me.

<sup>19</sup> Xuta tsêhê yêjê ni yungun nguehe distritu Asia ne, tsingatju me ngu nina rê me tsujun ngayujun ni. Aquila cojo Priscila, cojo yêjê sa xuta ladu rê Jesucristu xi ma tangun me ndava me vêhê ne, hacuaaha tsingatju me ngu nina rê me tsujun ngayujun ni xi hacuaaha tjin tangun cjuatacun nuju cojo Jesucristu. <sup>20</sup> Yêjê ni xuta ladu rê Jesucristu nguehe ne, tsingatju me ngu nina rê me tsujun. Tuhun rê xingun nina, cojo cjuandaja cojo cjuahmutacun chutatsuhun xingun, sacuatjin xcusun naja.

<sup>21</sup> Suva ngahan, Pablo, tshihindu nuju ngu cjua vihi, xi tísua nuju ngu nina.

<sup>22</sup> Sa xi ngajñi nuju tjin ngu me xi hmaai cacun me Nai naja ne, catisatiin rê me cjuandaja rê Nai naja. ¡Ngayun Nai naja, nduvun!

<sup>23</sup> Nai naja Jesucristu catisua me cjuandaja rê me. <sup>24</sup> Ngahan ne, hacuaaha tsingátju cjuahmutacun naha xi cuma nuju ngayujun ni, ngatsé rê xi tjin tangun cjuatacun naja cojo Jesucristu.

## Carta xi majo catsingatju San Pablo xi cafahatsja xuta nandya Corinto

<sup>1</sup> Ngahan Pablo ne, casuaxa ná Jesucristu xi má ngahan apóstol tséhê me, tséhê xi cuatjin xi meje rê Nina. Hane ngahan cojo cha Timoteo xingueen ne, ningatjin ngu xujun vi tsujun, ngayujun ni xuta Corinto xi xuta ladu rê Nina ngayun. Hacuaha ningatjin xujun vi xi scutaya yêjê sa xuta ladu rê Nina jingujyê ni estadu Acaya vê. <sup>2</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya.

### *Vaxëndaja Pablo Nina ngajñi rê cjuañihi*

<sup>3</sup> Nina Nahmi rê Nai naja Jesucristu ne, jemu tjin rê me cjuandaja. Me vêhê ne, hatuxa tjin rê me cjuayumatacun cojo niji hacuaha hatuxa sua niji me cjuetacun. <sup>4</sup> Sua niji me cjuetacun ngajñi rê yêjê ni cjuañihi xi vatjin má, cojo sa xi ngayin ne, hacuaha cuatjin cuma tihín rê xuta xi yahnga cjuetacun vêhê ngajñi rê yêjê cjuañihi xi vatju me má. <sup>5</sup> Chuva rê xi vatjin cjuañihi sacuatjin xi cavatju Jesucristu camá ne, hacuaha cuatjin sua niji me cjuetacun. <sup>6</sup> Hya xi cuatjin vatjin cjuañihi ne, hatuxa cuatjin má cojo sa xi ngayun ne, sacú nuju cjuetacun hacuaha cuetjuntjun tséhê jyê nuju. Hacuaha hya xi cuatjin sacú niji cjuetacun ne, cuatjin má cojo sa xi hacuaha cojo ngayun ne, sacú nuju cjuetacun. Hane sacú nuju cjuetacun vêhê ngatsê rê xi hacuaha caa nuju cojo cjuañihi sacuaha cjuañihi xi vatjin má. <sup>7</sup> Ngayin ne, jemu vetihin tacuin nuju ta, tséhê xi hyin ta sacuatjin xi tivatjun cjuañihi ne, hacuaha tisacu nuju cjuetacun.

<sup>8</sup> Ngayujun ni ne, meje niji xi cumachaya nuju cjuacjintacun xi cavatjin camá ngajan estadu Asia. Jemu jyê camahani cjuañihi xi cavatjin camá, hisca ngahñu sa tsajin niji xi scaa niji cojo cjuañihi vêhê; quihndê tsajin niji cjuetacun xi cojo cjuahñu cuijnitihin. <sup>9</sup> Peru ngayin ne, hisca hatsêê camangu tacuin cojo cjuaveya niji. Cuatjin camá cojo sa xi hacuain cuetihin tacuin cjuatacun niji suvin ta cuetihin tacuin Nina, me xi tsicuya cjuahñu rê nima. <sup>10</sup> Nina ne, cavaxêtje niji me tséhê cjuacjintacun jyê xi meje tsiquehen niji jan, hacuaha cuaxêtje sa niji me. Cavetihin tacuin Nina xi cuatjin cuaxêtje sa niji me, <sup>11</sup> tséhê xi ngayun ne, hacuaha tivisecuun niji xi tichjahyun rê Nina ngatsê niji. Hane xi cjin xuta sahmi me cuatjin ne, hacuaha jemu cjin cuma ngayun xi tuhun nacuechji rê Nina tséhê cjuandaja xi sua niji me.

### *Chja Pablo mé má cjêê cjue me Corinto*

<sup>12</sup> Ngayin ne, nihñi yehe yojo niji ngatsê rê xi ha hyin cojo cjuatacun niji ta tyjahi xahasen niji hacuaha nechin nguñaja tacuin xi tivanguin cojo ngasunhndê niji. Peru hacuain cojo cjuatacun niji suvin xi cuatjin cun ngayin ta cojo cjuandaja rê Nina. Hacuaha hatuxa cuatjin cun ngayin hya xi nechin ngajñi nuju. <sup>13-14</sup> Sacuaha cjuax xi nihindin nuju ne, suvá cjuax xi ma chutayun hacuaha vijnercun. Ha vijnercun hitsê, peru meje niji xi ndaja sa cuijnercun cjuetacun vihi: Cuma nihñu yehe yojo nuju ngatsê niji sacuatjin xi cuma nihñi yehe yojo niji ngatsê nuju, hya xi cuya nga Nai naja Jesucristu.

<sup>15</sup> Xi cuatjin catsingátaha cáacun ne, cavejñá xi cjuê scusehenya nuju titjun, cojo sa xi jo ndiya sacú nuju cjuandaja. <sup>16</sup> Meje cuátju nangui nuju hya xi canduvá ngeuehe estadu Macedonia. Hane xi cuijnetaha cjuacjintacun naha ngeuehe Macedonia ne, hacuaha meje cúa scusehenya nga nuju ngu ndiya. Sehe ngajan xi ngayun ne, cuma cuisecun ná cojo sa xi cuma cjuê ngajan distritu Judea. <sup>17</sup> Xi cuatjin cavejñá cjuatacun naha sehe casahmee ne, ¿há tsajin rê cjuaquixi cjuax naha, má nuju? ¿Há má nuju ngayun ne, hya xi vejñá xi sahme ngu xcusun xi sahme ne, tangun han cojo ngu xuta ngasunhndê xi xcun cojo xcun ne, chja me ta cuma, hane xi taha ngaxtun ne, chja me ta cumajj? ¡jéya, hacuain cuatjin! <sup>18</sup> Nina, me xi hatuxa cjuaquixi ne, vêê me ta hacuain jo ma tacuin xi nújin cojo nuju. <sup>19</sup> Sacuaha Jesucristu, Quihndi rê Nina, me xi catihin camachaya nuju cjuax rê, cojo cha Silvanu cojo cha Timoteo ne, hacuain jo tjin cacun me ta, yêjê ni cjuax xi cachja me ne, hatuxa cjuaquixi. <sup>20</sup> Hane Jesucristu vê ne, me vêhê xi sahmi chihin me yêjê ni cjuax xi ha cachja Nina xi cuma. Vêhê xi hora xi chjahanrcun Nina xi nújanjuman cojo Jesucristu ne, nújan “Amén” (O sa tsajin ne, nújan “Cuatjin jain.”) <sup>21</sup> Nina ne, hacui me xi sahmi xi viyujucahndê cjuatacun naja xi macjain naja Jesucristu. Hacui ni me xi cavaxijin me गयाan. <sup>22</sup> Sacuaha xi cavisane me sellu rê me गयाan; caveya me Hasen rê me cahntsua xahasen naja cojo sa xi ngutjen tsejen ta quixi jain xi, hya xi cuma ngascan ne, sua jain naja me yêjê ni xi ha cachja me.

<sup>23</sup> Quihndê ne, quejen cavusehenya nuju sacuatjin xi ha cachjá cojo nuju ngatsê rê xi mijí tsisava nuju xi cuichjátaha nuju. Sa xi quixiin xi chjá ne, catitsingatju Nina cjuaveya xi cuma ná. <sup>24</sup> Hacuain xi meje cuitexin nuju jarê ngu cjuax xi hatuxa meje rê xi cumacjain

nuju ta, tsèhè xi ngayun ne, ha siucahndè cjuatacun nuju cojo cjuachacun xi macjain naja. Ta ngayin ne, tivisecuiin nuju cojo sa xi cuma sua sa rë xahasen nuju.

## 2

<sup>1</sup> Hya xi camá ne, cavejñá cjuatacun naha xi hacuiin ngutjen cjuë scusehenya nuju sá tu choho cuma rë xahasen nuju ngatsë rë cjuá xi cuichjá cojo nuju. <sup>2</sup> Cuatjin cavejñá cjuatacun naha ta, ngayun tinihñu xi ma sua rë xahasen naha. Vèhè xi sa xi sahme xi cuma va rë xahasen nuju ne, ndajin tjin ta, xi cuatjin sahme ne, sahme xi cuma va rë xahasen rë xuta xi tisahmi xi ma sua rë xahasen naha. <sup>3</sup> Vèhè xi cuatjin catsihindu nuju nixtin hya, cojo sa xi hya xi cuinduva ndyá ne, hacuiin cuma va rë xahasen naha ngatsë nuju ta, xi meje rë ne, tuhun rë xahasen naha cjuasua. Hacuaha mangu cáacun cojo nuju ngayujun ni. Mangu cáacun xi tu mé ni xi sahmi xi jemu sua ma rë xahasen naha ne, hacuaha vèhè ni ne, sahmi xi jemu sua ma rë xahasen nuju. <sup>4</sup> Hya xi catsihindu nuju cjuá vèhè ne, jemu choho ma ná, jercu cjin catsingátaha cáacun ngatsë nuju, hisca jercu cajihnda; mijí ná xi cuma va tacún ta xi meje ná ne, xi cumachaya nuju ta cjuahmutacun xi tjin ná cojo nuju ne, jemu jyë camahani.

### *Ma manchataha me xi cavinchachoho*

<sup>5</sup> Quihndè ne, sacuaaha ngu xuta xi cavinchachoho vë ne, hacuiin ngahan ni choho camá ná ta, ngayujun ni ne, hacuaha choho camá nuju hitsë. “Hitsë ni” chjá ta, mijí cuátjutaha xi tichjátaha nuju. <sup>6</sup> Quihndè xi cjin ngayun canújuntuhun rë xuta jan ne, cojo vèhè ni ne, ha cuma. <sup>7</sup> Cahndè rë xi cuinújuntuhun sa rë me ne, ninchatuhun rë me, tuhun rë me cjuetacun, sá tu scaain rë me cojo cjuachoho jyë vèhè. <sup>8</sup> Vèhè xi chjá cojo nuju ta tuhun nga catamachaya rë me tsèhè cjuahmutacun xi tjin nuju cojo me. <sup>9</sup> Vèhè jain xi cuatjin catsihindu nuju ta, tsèhè xi meje cjuaháchuva nuju ne, há tjin ngu tacún xi nihñu yějé ni hacutjin chjá cojo nuju. <sup>10</sup> Quihndè ne, yo xi ninchatuhun rë tsèhè ngu jyë xi sahmi ne, ngahan ne, hacuaha tsinchátaha rë ta, tu mé ni xi catsinchátaha ne, vëë Jesucristu ta ngatsë nuju ngayun ne, vèhè xi cuatjin catsinchátaha, <sup>11</sup> cojo sa xi cumaji sahmi Satanás xi meje sahmi cojo naja. Ngayaan ne, ha ndaja hyan hacutjin meje sahmi xitsehen vë cojo naja.

### *Cjuacjintacun rë Pablo ngajan nandya Troas*

<sup>12</sup> Hya xi camá ne, cëjë ngajan Troas xi cuichjá cojo xuta cjuandajyihí xi chja tsèhè Nai naja Jesucristu. Hane xi cafèhè ngajan ne, vutsején ne, jemu casacu ná cahndè xi cuichjá cojo xuta cjuandajyihí jan. <sup>13</sup> Peru hacuiin ndaja má cáacun xi casacuiin ná cha Titu xingueen sacuatjin xi catsingátaha cáacun. Vèhè xi catsingúfnetaha cjuá cojo xuta jan sehe cavétju canduvá nguehe estadu Macedonia.

### *Tsinguitsojo Pablo cjuá rë Nina*

<sup>14</sup> Peru nacuechji rë Nina ta hatuxa sahmi me xi caa niji vetjintjin ngatsë rë xi tjin tangun cjuatacun niji cojo Jesucristu. Chuva vèhè xi Nina ne, sahmi me xi cumachaya rë xuta cjuatacun rë me jinguyë ni. <sup>15</sup> Ta ngayin ne, sacuaaha xta rë tyjungunsa ngayin xi tisua Jesucristu xi cuma rë Nina. Xta ndajyihí vèhè ne, vitsojo vechutaha rë yějé ni xuta, sa xuta xi tivetjutje me tsèhè jyë rë me o sa xuta xi tivetjintjiin me. <sup>16</sup> Xi vutsejen niji xuta xi cuacun tivetjintjiin jan ne, sacu rë me cjuaquixi ta quixi jain xi cuechiin me xcun Nina. Peru xi vutsejen niji xuta xi cuacun tivetjutje jan ne, sacu rë me cjuaquixi xi quixi jain xi cuechu me xcun Nina. Ngayin ne, cumaji nihñi cojo cjuatacun niji suvin xa vë xi sacu rë xuta cjuaquixi jan. <sup>17</sup> Ngayin ne, hacuiin tiviteñi cjuá rë Nina sacuatjin jemu cjin xuta tisahmi me ta ngayin ne, nechin nguñaja tacuin xi nújin cojo xuta cjuá vèhè. Nina casua niji me xa hacuaha vutsejen me xa xi nihñi. Hacuaha tinihñi xa vèhè ta tsèhè xi tjin tangun cjuatacun niji cojo Jesucristu.

## 3

### *Compromisu xatsë xi casahmi Nina*

<sup>1</sup> ¿Há má nuju xi tinaxinndijin suvin nga yojo niji xi cuatjin nújin? O há tsajin ne, ¿há mameje rë xi tihín nuju o sa xi chjahyin nuju ngu carta xi chja ngatsë niji, sacuatjin sahmi yahnga xuta? <sup>2</sup> ¡Jéya! mamijí rë ta, ngayun xi má ngayun sacuaaha carta niji, sacuaaha ngu carta xi camahindu cahntsua xahasen niji, ngu carta xi cuma scutsejen yějé ni xuta ne, hacuaha cuma scutaya me. <sup>3</sup> Hane súv tsejen xi Jesucristu catsihindu me carta jan, hane ngayin ne, tu canihñi entregadu ni. Hacuiin cojo tinta camahindu ta cojo Hasen rë Nina xi quicun me. Hacuaha hacuiin xcun ndyojo të camahindu ta cahntsua xahasen rë xuta.

<sup>4</sup> Cuatjin nújin cojo nuju ta, tsèhè xi mangu tacuin cojo Nina ngatsë rë Jesucristu. <sup>5</sup> Hacuiin cjuatacun niji suvin, hacuiin ngahñu niji suvin xi ma nihñi mé xi nihñi ta Nina casua niji me cjuatacun, Nina casua niji me ngahñu. <sup>6</sup> Me vèhè casahmi me xi machjirèhè

rë me ngayin xi tihín cumachaya rë xuta compromisu xatsë xi sehe tivetsihin tisahmi Nina cojo xuta, hane compromisu xatsë vëhë ne, hacuiin ngu ley xi cuinuhyan tsëhë ta ngu ndiya ndajiyi xi tsingacun naja Hasen rë Nina xi cuanguencojon. Cuatjin casahmi Nina ta tsëhë xi xuta xi cumaji sahmichihin me yëjë ni cjuua xi vitexa ley ne, sacú rë me ngu castigu xi cuetsun cjuatacun rë me hacuaha tsajin nu tsajin nixtin xi cuechu me xcun Nina. Peru xuta xi tjengui me Hasen rë Nina ne, sacú rë me ngu cjuahñu ndajiyi, hacuaha cuechu me xcun Nina.

<sup>7</sup> Ngayujun ni ne, ha hyun ta sacuaha ley rë Nina xi catsihindu Moisés ne, catiya xcun ndoyojo të hya xi camahindu, hacuaha xuta xi maji sahmi me yëjë hacutjin vitexa ley jan ne, cumaji cuechu me xcun Nina. Hane sacuaha xa xi casahmi Moisés hya xi casua me camachaya rë xuta cjuua rë ley jan ne, hacuaha ha hyun xi jercu vengui chji rë ta, tsëhë xi camatsejen ngu hasen ndajiyi xi hisca camaji cavutsejenndaja xuta Israel xcun Moisés ta jercu tu seti camahani jyihi xcun me. Peru hasen ndajiyi vëhë ne, tafi tafi ne, caffèya súvá. <sup>8</sup> Hacuaha ha hyun ta ngayin ne, tihín tijmachaya rë xuta cjuua tsëhë hacutjin sua naja Nina Hasen rë me. Quihndë ne, sa xi cuatjin jemu cavengui chji rë xa xi casahmi Moisés jan ne, hitsë sa jercu vengui chji rë xa xi tihñi ngayin. <sup>9</sup> Cuma cuinújan ne, sa xi jemu cavengui chji rë xa xi casahmi Moisés, hya xi casua me ley xi chja xi sacú naja ngu castigu sa xi hacuiin nihña chehen cjuua rë ne, hitsë sa jemu vengui chji rë xa xi tihñi ngayin, quihndë xi tinújan cojo xuta xi cuma sacú naja ngu xahasen tyjahi, ngu cjuatacun tyjahi. <sup>10</sup> Cuma cuinújan ne, sacuaha xa rë Nina xi casahmi Moisés xi jemu ndajiyi titjun ne, quihndë ne, sacuaha xi ha quihndë tsajin mé ndajiyi tsëhë ta, xa rë Nina xi tihñi ne, jercu tu ndajiyi camahani. <sup>11</sup> Sa xi jercu ndajiyi ngu xcusun xi hacuiin cueña tsëe ne, hitsë sa ndajiyi ngu xi cueña tsëe.

<sup>12</sup> Ngatsë rë xi cuatjin vetihin tacuin Nina ne, vëhë xi ngayin ne, rcuiin camahani xi nújin cojo xuta. <sup>13</sup> Hacuiin nihñi sacuatjin casahmi Moisés, hya xi cavetsa me xcun me cojo ngu tsjian cojo sa xi xuta tjë rë Israel ne, scuiin me hacutjin tifëya súvá hasen ndajiyi xi jyihi xcun Moisés jan. <sup>14</sup> Peru xuta jan ne, camajñu tsëhë cjuatacun rë me. Hisca quihndë nixtin vihi ne, hya xi visiñuju me cjuua rë ley changa vëhë ne, maji vijnercu me cjuua rë, sacuaha xi tita rë cjuatacun rë me cojo tsjian jan. Hisca hya xi cumacjain rë me Jesucristu ne, hya sacuaha xi cuetjuxin tsjian jan, hya cuma cuijnercu me. <sup>15</sup> Peru hisca quihndë ne, hya xi visiñuju me cjuua xi catsihindu Moisés ne, sacuaha xi tsjian jan vechja rë cjuatacun rë me, hane maji vijnercu me. <sup>16</sup> Peru hya xi ngu xuta cuisehen me ndiya rë Nai naja ne, sacuaha tsjian jan ne, cjuxin tsëhë me, hane cuma cuijnercu me. <sup>17</sup> Nai naja ne, hacui me xi Hasen rë Nina, hane hiscan xi tacun Hasen rë Nai naja ne, tsajin mé xi vechja rë cjuatacun naja. <sup>18</sup> Vëhë xi ngayejen ngarcen ni ne, tsajin tita rë cjuatacun naja cojo tsjian vëhë, hacuaha xi vutsejen xuta ngayaan ne, ma vutsejen me cjuandaja rë Nai naja sacuaha tsejen mé xi tsejen xcun ngu speju. Hane ngayaan ne, jima tiña jima tiña sa cjuatacun naja cojo cjuatacun rë Nai naja ta, tsëhë xi jima ngu ndiya ne, tisacu sa naja cjuandaja rë me. Nai naja ne, súvá hasen me, hane hacui me xi cuatjin tisahmi.

#### 4

<sup>1</sup> Nina casahmi me cjuandaja cojo niji, hane casua me xa vëhë xi nihñi. Vëhë xi hatuxa hacuiin machuva tacuin. <sup>2</sup> Ngayin ne, cavejñi tacuin xi nihñi yëjë ni xi ticojo rë cjuasava xi tahahma má; hacuiin vindachin, hacuiin nindeyin cjuua rë Nina ta, súvá cjuaquixi yëjë ni xi nújin cojo xuta. Cuatjin nihñi cojo sa xi scuëe yëjë ni xuta ta cuatjin jain xi nújin. Hacuaha vëë Nina xi cuatjin nújin. <sup>3</sup> Hane sa xi vijniircu xuta cjuandajiyi xi chja tsëhë Jesucristu xi tihín cumachaya rë me ne, peru súvá xuta xi tivetjintjiin me ne, me vëhë xi cuatjin vijniircu me. <sup>4</sup> Xitsehen xi matitjun xi tacun nixtin vihi ne, cavetsa cjuatacun rë xuta xi cuacun macjain rë Nina xi cjuaquixi, cojo sa xi cuiisin rë me cjuahasen rë cjuandajiyi xi chja hacutjin xi jyë hnga Jesucristu cojo cjuatacun rë me. Hya xi machaya naja tsëhë Jesucristu ne, hacuaha hyan hacutjin jemu ndaja camahani Nina. <sup>5</sup> Ngayin ne, hacuiin nújin cojo xuta xi nai nuju ngayin ta xi nújin ne, Jesucristu xi Nai naja me; hane ngayin ne, tivisecui nuju sacuaha ngu mosu hndixahan nuju ta, tsëhë xi cuatjin cavitexa niji Jesucristu. <sup>6</sup> Hane ntsacu cavetsihin ne, cachja Nina ta ngajñi rë jñu ne, cuma hasen. Hane hacui ni me xi caveya me cjuahasen ngajñi rë cjuatacun niji, cojo sa xi ngayin ne, tihín cumachaya rë xuta, cuijnercu me hacutjin jemu ndaja camahani Nina. Hane hya xi machaya naja tsëhë Jesucristu ne, hacuaha hyan hacutjin jemu ndaja camahani Nina.

#### *Cjuahñu xatsë xi sua Nina*

<sup>7</sup> Cjuahasen xi casua niji Nina jan ne, quichihin ngajñi rë cjuatacun niji, sacuatjin xi jiya cjuanchina cahntsua ngu tiji xi nihndë ni camá. Cuatjin casahmi Nina cojo sa xi matsejen xi jemu hñu camahani ngahñu xi sua niji Nina. Hacuiin cojo ngahñu niji suvin xi caa niji



nihñi yějē ni xi tinihñi ta Nina ne, me vėhė xi casua niji me ngahñu; hacuaha jemu ndaja camahani ngahñu xi sua niji me. <sup>8</sup> Ha tu yani ni xi vanguin ne, jemu yehe cjuacjintacun vatjin má, peru sacuya niji chuva rė hacutjin xi naxintjin yojo niji; hisca hyiin mé xi ndatjin nihñi. Peru nihñichuviin cjuatacun niji; <sup>9</sup> jemu suaxti niji xuta hacuaha choho sahmi me cojo niji, peru Nina ne, tsismicacuaain niji me; vaja niji xuta, hisca veticjin, peru hacuiin tsiquehen niji me. <sup>10</sup> Xi nujiyhinyin cojo cjuar rė Nina ne, hatuxa meje tsiquehen niji xuta, sacuatjin catsiquehen me Jesucristu. Cuatjin tijima ne, cojo sa xi xuta ne, xi scutsejen me hacutjin ticaa niji ne, cumachaya rė me ta quixi jain xi tisacu niji cjuahñu sacuaaha cjuahñu rė Jesucristu. <sup>11</sup> Ngayin xi quicun ngayin ne, tjin xuta xi jemu meje tsiquehen niji me ngatsė rė xi quichihin cjuandajyihni xi chja tsėhė Jesús. Cuatjin tijima ne, cojo sa xi cuma tsejen xi yojo jyė niji vi xi hatuxa cueya ne, hacuaha tisacu rė cjuahñu sacuaaha cjuahñu rė Jesús. <sup>12</sup> Ngajan xi ngayin ne, tisacu niji cjuaveya; peru ngayin ne, tisacu nuju cjuahñu xatsė.

<sup>13</sup> Tjin hiscan xi chja xcun xujun rė Nina cuitjin: “Camacjain ná, vėhė xi cachjá”; hane ngayin ne, tangun macjan niji cojo me xi cuatjin catsihndu cjuar jan. Vėhė xi hacuanitjin ni nujin ngayin: “Macjain niji, vėhė xi nujin.” <sup>14</sup> Hacuaaha hyin ta Nina, me xi catsicuya cjuahñu rė Nai naja Jesús hya xi cahme me ne, hacuaha cuechu nixtin xi cuatjin tsicuya me cjuahñu niji, hane sahmi tangun me ngayin ngajan hiscan tacun Jesús. Hacuaaha cuatjin sahmi me cojo nuju. <sup>15</sup> Yějē ni xcusun xi tivatjin tijima ne, ngayin ndaja tsujun ta, xi cuma cjin sa ngayin xi sacu nuju cjuandaja rė Nina ne, ha cuatjin cjin sa cuma ngayin xi tuhun nacuechji rė me. Hane cuatjin cuma tsejen xi Nina ne, jemu ndaja camahani me.

<sup>16</sup> Vėhė xi hatuxa nihñichuviin cjuatacun niji. Handasa tivetsun hitsė tivetsun hitsė yojo niji xi jima changa ngayin ne, peru cjuatacun niji ne, jima xatsė ngu nixtin ngu nixtin. <sup>17</sup> Hane cjuacjintacun xi tivatjin tijima ngeuehe ngasunhndė ne, sacuaaha xi hacuiin yehe camahani ta, tsėhė xi hya xi ha cacaa niji ne, hya sacú niji cjuandaja, sacú rė xahasen niji ngu cjuasua xi jemu ndajyihni camahani, hacuaha tsajin nixtin xi cjuė. <sup>18</sup> Ngayin ne, hacuiin tivetihiin rcuin yějē ni xi tsejen ta xi vetihin rcuin ne, xi cjėė cuma tsejen. Cuatjin nihñi ta, tsėhė xi yějē ni xi tsejen ne, cuechu nixtin xi cjuė, peru xi cjėė cuma tsejen ne, tsajin nixtin cjuė.

## 5

<sup>1</sup> Hacuaaha nihñichuviin cjuatacun niji ta, tsėhė xi ha hyin ta sa xi cueya yojo niji sacuatjin vetsun ngu ndihya yuma ne, sacú niji ngu xcusun yojo xatsė ngajan ngahnga xi tsajin nu tsajin nixtin cueya, sacuaaha ngu ndihya ndajyihni xi suvá Nina casahmi me xi cuma niji. <sup>2</sup> Vėhė xi ngayin ne, hisca fė tacuin ta, tsėhė xi jercu meje chjihinntsinn sacuaaha yojo xatsė niji xi sua Nina jan, <sup>3</sup> cojo sa xi chijin yojo xatsė vėhė sacuatjin chajá rė ngu tsjan. Xi cuatjin ne, cuechiin ngu nixtin xi siu suvá hasen niji xi tsajin yojo niji. <sup>4</sup> Ngayin xi nechin cojo yojo jyė niji vi ne, hisca fė tacuin ngatsė rė xi jercu meje niji yojo xatsė xi sehe sacú niji. Hacuiin meje niji xi cueyin ta xi meje niji ne, yojo xatsė niji. Cuatjin meje niji cojo sa xi yojo jyė xi hatuxa cueya ne, cjuėya; hane suvá cjuahñu xatsė vėhė cuejña. <sup>5</sup> Quihndė ne, me xi cuatjin cavejña cjuatacun rė xi cuitjin cun cuma ngayin ne, hacui Nina. Hacuaaha me vėhė xi caveya me Hasen rė me cahntsua xahasen niji, cojo sa xi ngutjen tsejen ta quixi jain xi, hya xi cuma ngascan ne, sua jain niji me yojo xatsė vėhė.

<sup>6</sup> Vėhė xi hatuxa tihin ngahñu xahasen niji. Hyin ta jinguyějē rė xi nechinchahndin cojo yojo jyė niji vi ne, sacuaaha xi nechintihin ngu nangui ta, tsėhė xi cjėė cuechin hiscan xi cuinechinchahndin cojo Nai naja. <sup>7</sup> Ngayin ne, mangu tacuin cojo Nai naja xi tivanguin cojo ngasunhndė niji, handasa matsijin me. <sup>8</sup> Cuyin cuinujin cojo nuju ta ngayin ne, titihin ngahñu xahasen niji. Hacuaaha xi má niji ne, hitsė sa ndatjin xi cjuatjinxin tsėhė yojo jyė niji, hane cjuanguin cuinechinchahndin cojo Nai naja. <sup>9</sup> Vėhė xi sa xi cuinechintihin sa ngeuehe ngasunhndė, o sa xi cuinechinchahndin cojo Nai naja ne, jemu meje nihñi yějē ni hacutjin chuya rė me ta, <sup>10</sup> tsėhė xi ngayejen ni ne, cuechu nixtin xi cuma tsejen xi cun xi má ngayaan hya xi cuechuun xcun Jesucristu, xi cjuahacuenda me xcusun xi canihña, cojo sa xi jima ngu ngayaan ne, sacú naja xi satė naja ha tucutjin xcusun xi canihña xi cavinechan ngasunhndė, há ndaja ne, há ndajin.

### *Cjuandajyihni xi sahmi tangun cjuatacun naja cojo Nina*

<sup>11</sup> Ngayin ne, ha hyin mé vijne xi rcuin Nina. Vėhė xi meje nihñi xi cuijne cacun xuta. Nina ne, ha vėe me xi cun xi má ngayin. Hacuaaha cojo ngayin ne, vetihin tacuin xi cumachaya nuju xi cun xi má ngayin. <sup>12</sup> Hacuiin tivėsihni tinihñi yehe suvin nga yojo niji ta tu titihin cumachaya nuju hacutjin cuma naxunndujun niji, cojo sa xi cuma nicuyun cjuar tsėhė xuta xi chuya rė me tsėhė xcusun xi jyhni ngu cha, hane sahmicuendaain me cjuatacun rė cha. <sup>13</sup> Chja yahnga xuta ta sca niji, hane yahnga me ne, jemu xta ngayin; peru há sca niji o há xta ngayin ne, peru nihñi yějē ni ngatsė rė xi tsėhė Nina ngayin, hacuaaha ngatsė rė xi meje

cuissecuin nuju. <sup>14</sup> Cuatjin nihñi ta tsêhê xi cjuahmutacun xi tjin rê Jesucristu cojo niji ne, vêhê xi vitexa niji. Cuitjin ningatihin tacuin: ngu ni Jesucristu xi cahme ne ngatsê rê jyê naja ngayejen ni, vêhê xi ngayejen ni ne, sacuaaha xi ha caveyan xi cuma rê jyê xi cuacun vê. <sup>15</sup> Jesucristu ne, cahme me ngatsê naja ngayejen ni ne, cojo sa xi ngayaan xi casacu naja cjuahñu xatsê ne, hacuiin nihñacuendan suvá ni yojo naja ta hacuaaha nihñacuendan tsêhê me vêhê, me xi cahme hacuaaha cavuya me cjuahñu ngatsê naja.

<sup>16</sup> Vêhê xi ha quihndê hacuiin nutsijin xuta sacuatjin vutsejen ngu xuta xicjin me cojo cjuatacun rê ngasunhdê. Hatsêe ne, cuatjin canutsijin Jesucristu, peru quihndê ne, hacuiin cuatjin nutsijin me. <sup>17</sup> Yêjê xuta xi tjin tangun cjuatacun rê me cojo cjuatacun rê Jesucristu ne, ngu xuta xatsê camá me. Xcusun changá xi tjin rê me ne, café, ha cama xatsê. <sup>18</sup> Nina ne, me vêhê xi tisahmi me yêjê cjuatacun xatsê vêhê. Ngayin xi condra rê Nina camá ngayin hatsêe ne, casahmi me xi camatangun cjuatacun niji cojo cjuatacun rê me ngatsê rê cjuacjintacun xi cavatju Jesucristu. Hacuaaha casua niji me xa xi tihín cumachaya rê xuta hacutjin tisahmi tangun me cjuatacun rê xuta cojo cjuatacun rê me. <sup>19</sup> Cojo cjuacjintacun xi cavatju Jesucristu camá ne, cavetsihin casahmi Nina xi cuma tangun cjuatacun rê xuta cojo rê me, cavetsihin cafahacuendaain me tsêhê cjuatsehen xi casahmi xuta, hacuaaha cavetsihin casua niji me cjuandajyihî xi tinújin cojo xuta xi Nina ne, meje rê me xi cuma tangun cjuatacun naja cojo rê me. <sup>20</sup> Vêhê xi ngayin ne, cuatjin nújin cojo xuta cjuatacun rê Jesucristu ta, Jesucristu casua niji me xa xi cuatjin nújin, sacuaaha xi tichja suvá Nina cojo xuta ngajñi rê cjuatacun rê me. Vêhê xi sacuatjin xi vitexa niji Jesucristu ne, chjahyin rê xuta xi catisahmi tangun me cjuatacun rê me cojo Nina. <sup>21</sup> Jesucristu ne, tsajin mé jyê rê me xi tjin, peru ngatsê naja ngayaan ne, Nina casahmi me xi Jesucristu ne, sacuaaha xi jercu tjin camahani jyê rê me. Cuatjin casahmi Nina cojo sa xi ngayaan xi tjin tangun cjuatacun naja cojo Jesucristu ne, hacuaaha jemu tyjahi camahani cuma cjuatacun naja sacuatjin tyjahi cjuatacun rê Nina.

## 6

<sup>1</sup> Hane xi tinihñi tangun xa cojo Nina ne, hacuaaha nújin cojo nuju ta, mijí rê xi tu mahya xi casacu nuju cjuandaja rê Nina. <sup>2</sup> Cachja Nina cuitjin xcun xujun rê me: Ngu hora ndajyihî ne, cahndê cjuatacun rê me, canoje cojo ná; ngu nixtin xi vetjutje xuta ne, cavisécoo ri. Quihndê ne, ha cavechu ngu hora ndajyihî vêhê, sacuatjin cachja Nina; ha cavechu ngu nixtin xi tivetjutje xuta.

<sup>3</sup> Ngayin ne, nihñi camahani xcusun xi sahmi xi secjan cjuatacun rê xuta, sá tu choho cuichja xuta tsêhê xa xi tinihñi. <sup>4</sup> Yêjê xcusun xi tivatjin tijima xcun xa xi tinihñi ne, tsingacun rê xuta ta ngayin ne, tivisecuin jain rê Nina cojo xa xi meje rê me xi nihñi. Jemu cjin cjuacjintacun xi cacaa niji: tjin hora ne, jemu cavatjin cjuañihî, tjin hora ne, cavatjin ngu cjuandaja jyê, tjin hora ne, casacuinyiin niji hacutjin naxintjin yojo niji. <sup>5</sup> Tjin hora ne, cavaja niji xuta, tjin hora ne, cavincha niji me ndavaya, tjin hora ne, choho casahmi xutacjin cojo niji, tjin hora ne, jemu chja xa canihñi, tjin hora ne, camaji catsjuñifin, tjin hora ne, hisca casacuiin mé xi ciní. <sup>6</sup> Hacuaaha tsejen xi tivisecuin jain rê Nina ngatsê rê xi tyjahi xahasen niji, vechu cjuatacun niji, jemu jyê tacuin, jemu nihñi cjuandaja, jiya Hasen rê Nina cahntsua xahasen niji, nguñaja tacuin xi hmu tacuin xinguin, <sup>7</sup> hacuaaha suvá cjuaquixi tjin rê cjuatacun niji, Nina ne, sua niji me ngahñu. Hatuxa cjuaquixi cjuatacun rê me, há xi titihín jimachaya rê xuta cjuatacun rê Nina, o há xi tinaxintjin yojo niji tsêhê xuta xi choho chja tsijin. <sup>8</sup> Yahnga xuta ne, faharcun me ngayin, yahnga me ne, faharcuaain me ngayin. Yahnga xuta ne, ndaja chja me tsijin, yahnga me ne, choho chja me tsijin. Xi má rê ngujo xuta ne, jemu ndacha ngayin, handasa quixi ngayin cojo ngasunhdê niji xi tivanguin cuijin. <sup>9</sup> Yahnga xuta ne, hisca hvlin me yo ngayin, peru yahnga me ne, vêe me ngayin. Ngayin ne, sacuaaha xi ha tiveyin, peru cjêe cueyin ta nechincuihin cjuahñu. Sahmi xuta ngayin castigu, peru hacuiin tsiquehen niji me. <sup>10</sup> Sacuaaha xi jemu choho má rê xahasen niji, peru xahasen niji ne, hatuxa jemu sua rê. Sacuaaha xi jemu yumi ngayin, peru jemu nihñi nechina xuta cojo cjuatacun rê Nina. Sacuaaha xi tsajin camahani mé xi tjin niji, peru ha tsijin yêjê ni xi tjin ngasunhdê.

<sup>11</sup> Ngayun xuta Corinto ne, ha canújin cojo nuju yêjê ni hacutjin ningatihin tacuin, hacuaaha jemu hmu tacuin nuju. <sup>12</sup> Ngayin ne, hacuiin camachuva cjuahmutacun xi tjin niji cojo nuju ta ngayun xi camachuva cjuahmutacun xi jiya cahntsua xahasen nuju. <sup>13</sup> Vêhê xi chjá cojo nuju sacuaaha xi quihndi naha ngayun, catamajyê sa cjuahmutacun xi tjin nuju sacuaaha cjuahmutacun xi tjin niji cojo nuju.

*Yungun rê Nina xi quicun me ngayaan*

<sup>14</sup> Peru mijí rë xi nihñu tangun cojo xuta xi macjaain rë me cja rë Jesucristu sacuatjin ma hñu jo chu ndyaja xi tangun cjue chu. Sacuaa cjuandaja ne, matanguaain camahani cojo cjuatsehen. Hacuaha cumaji cuma jñu hiscan xi jemu hasen. <sup>15</sup> Cumaji camahani cumatangun cjuatacun rë Jesucristu cojo cjuatacun rë Satanás. Hacuaha cumaji camahani cumatangun cjuatacun rë ngu xuta xi macjain rë me cja rë Jesucristu cojo cjuatacun rë ngu xuta xi macjaain rë me cja rë Jesucristu. <sup>16</sup> Sacuaa yungun rë Nina xi cjuaquixi ne, cumaji cuiyuju nina xi tsindaja xuta. Hane ngayaan ne, sacuaa yungun rë Nina xi quicun me ngayaan ta, tsëhë xi súvá Nina cachja me cuitjin: Ngahan ne, cuitejñacahndë cahntsua xahasen rë me, hacuaa tsujyëhëya ngajñi rë me; hane ngahan cuma nina rë me ngahan, hacuaa me xi cuacun vëhë ne, cuma me xuta naha.

<sup>17</sup> Hacuaha cachja sa Nina cuitjin:

Vëhë xi tetjuncun tsëhë xuta xi cuacun faharcun me nina xi mandaja, hacuaa nechuncun tsëhë me;

mijí rë xi nicujun sa xcusun xi chjá cojo nuju xi tsavi.

Xi cuatjin nihñu ne, cuitejña ngatsë nuju

<sup>18</sup> hacuaa ngahan ne, cuma ngahan nahmi nuju,

hane ngayujun ni ne, hacuaa cuma ngayun quihndi naha,

chja Nai naja, me xi ma sahmi yëjë ni xcusun.

## 7

<sup>1</sup> Quihndë ngayujun ni tsan ne, tsëhë xi cuatjin cachja Nina xi sahmi me cojo naja ne, meje rë xi cuiyujunxen yëjë ni cjuatsehen xi meje rë yojo naja o sa xi ningatahan tacun. Hane xi rcun ngayaan Nina ne, meje rë xi nihña ngahñu xi cuma tyjahi xahasen naja, cuma tyjahi cjuatacun naja.

### *Cavindëya cjuatacun rë xuta Corinto*

<sup>2</sup> Nuxuhun xahasen nuju xi cuma niji. Hisca ngu ngayun ne, hacuiin choho canihñi cojo nuju; hisca ngu ngayun ne, hacuiin caninguetsin cjuatacun nuju; hisca ngu ngayun ne, hacuiin cavindachin nuju. <sup>3</sup> Hacuuiin titsicaneje jyë nuju xi cuatjin chjá cojo nuju. Ha cachjá cojo nuju ta hatuxa jemu vinga niji ngayun, hisca tihín yojo niji ngatsë nuju sa xi cuatjin meje rë. <sup>4</sup> Jemu camangu cáacun cojo nuju, hacuaa hya xi visiajme cojo xuta ne, jemu vaxëndaja nuju.

Jemu casacu ná cjuetacun. Jemu sua ma rë xahasen naha ngajñi rë yëjë cjuañihi xi cavatjin camá.

<sup>5</sup> Hisca nixtin xi cafiñin nguehe estadu Macedonia hisca quihndë ne, cjëë cjuahajenda xahasen niji, ta yëjë ni nixtin vihi ne, jercu cjín cjuañihi tivatjin tijima. Ticjan xuta cojo niji, hacuaa jemu macjín tacuin. <sup>6</sup> Peru Nina xi sua cjuetacun xuta yuma ne, hacuaa cuatjin casua niji me cjuetacun hya xi cafehe cha Tito. <sup>7</sup> Hacuuiin tsëhë xi cafehe ni cha xi casacu niji cjuetacun ta, hacuaa ngatsë rë cja xi cachja ha hacutjin xi casacu rë cha cjuetacun ngajñi nuju. Cachja cha cojo niji ta jemu meje nuju xi sacú xingueen. Hacuaha casacuenda niji cha tsëhë cjuachoho xi tjin nuju. Hacuaha cachja cha ta jemu meje nihñu xcusun xi chuya ná. Vëhë xi hitsë sa camasua rë xahasen naha quihndë.

<sup>8</sup> Hacuuiin choho ma ná xi cuatjin catsihindu nuju xujun vëhë, handasa choho camá nuju ngatsë rë cja xi cachjá cojo nuju. Choho camá ná hitsë ta, tsëhë xi cahvë ta cja naha jan ne, casua nuju cjuachoho ndastu ngu hora. <sup>9</sup> Peru quihndë ne, jemu ndama ná, hacuiin ngatsë rë xi choho camá nuju ta ngatsë rë xi sacuaa cjuachoho xi camá nuju ne, vëhë casahmi xi canindëyun cjuatacun nuju. Hacuaha hya xi choho camá nuju ne, canihñu hacutjin chuya rë Nina, vëhë xi tsajin mé xi choho cavatjun camá ngatsë rë cja xi canihindin nuju. <sup>10</sup> Hya xi nihñachehen hacutjin chuya rë Nina hora xi choho ma naja ne, vëhë sahmi xi nindëyan cjuatacun naja cojo sa xi cuetjuntjen tsëhë jyë naja. Hane xi cuatjin sahmi ngu xuta ne, tsajin yo xi chuyiin rë. Peru hya xi tu choho má naja hora xi vatjun ngu cjuachoho sacuatjin sahmi xuta ngasunhndë ne, vëhë sahmi xi cueyan. <sup>11</sup> Chutsujun hacutjin canihñu hya xi canihñu hacutjin chuya rë Nina ngajñi rë cjuachoho xi cavatjun camá: jemu nguñaja tacun; jemu ndaja catuhun cjuaquixi nuju; hisca camacjan nuju; hisca carcun camá; canújun ta jemu meje chun ná ngu ndiya nga; jemu meje nihñu xcusun xi chuya ná; ngutjen canihñu castigu xuta xi choho casahmi me. Cuatjin camatsejen xi tyjahi jain cjuatacun nuju hacuaa tyjahi jain xahasen nuju. <sup>12</sup> Vëhë xi hya xi cuatjin catsihindu nuju xujun vëhë ne, hacuiin ngatsë rë xuta xi cavangui jyë, hacuiin ngatsë rë xuta xi choho cavatju me camá ta xi cuatjin catsihindu nuju ne, ngatsë rë xi meje ná xi cuma tsejen

hacutjin xi meje nihñu xcusun xi chuya niji ta, tsêhê xi hyun ta cuatjin xi meje rê Nina.<sup>13</sup> Hane hacuaha ngatsê rê vêhê xi ngayin ne, casacu niji cjuetacun.

Peru hacuiin suvá cjuetacun vêhê ni xi casacu niji ta hacuaha jemu ndaja camá rê xahasen niji ngatsê rê cjuasua xi tjin rê cha Tito. Cuatjin tjin rê cha cjuasua ta, tsêhê xi ngayujun ni ne, catuhun rê cha cjuandaja cjuajeya.<sup>14</sup> Jemu cavaxêndaja nuju hya xi cachjá cojo cha Tito, hane hacuiin cavétju sava ngahan xi camá ngascan. Hatuxa cjuaquixi yêjê ni cjuaxi canújin cojo nuju. Hacuanitjin ni cjuaxi canújin tsujun cojo cha Tito ta hacuaha cavetjucaac cjuaquixi.<sup>15</sup> Hacuaha jemu hmu cacun nuju cha, xi tsinguitsjen cha hacutjin canihñu yêjê hacutjin xi cachja cha cojo nuju, cojo hacutjin jemu ndaja cachjuhuncun cha hya xi cachjuhunnusun cha.<sup>16</sup> Jemu ndama ná ta tsêhê xi hvê ta ngayun ne, mangu tacún cojo ná.

## 8

### *Cjuatjo xi cjue Jerusalén*

<sup>1</sup> Ngayujun ni ne, nguehe tihín cumachaya nuju hacutjin casua Nina cjuandaja rê me cojo xuta xi matangun me yêjê ni yungun xi siu taha ladu tsêhê estadu Macedonia vi.<sup>2</sup> Xuta xi cuicun vi ne, handasa jercu cavatju me cjuañihi, peru jemu sua ma rê xahasen rê me. Handasa jemu yuma camahani me ne, peru jemu jyê cjuatjo xi cavisecoo me.<sup>3</sup> Cahvê xi casua me tucutjin xi camá casua me, hisca quisun sa casua me. Hacuaha cjuatacun rê suvá me<sup>4</sup> xi cafehya me xi tihín cahndê xi cojo me sahmi me cjuandaja xi cuisecoo me xuta ladu rê Jesucristu ngajan Jerusalén.<sup>5</sup> Hitsê sa ndaja casahmi me xi cuma rê sacuatjin caningatihin tacuin ngayin. Titjun ne, casua me yojo rê me cojo Nai naja ne, sehe casua me yojo rê me cojo niji ngayin, sacuatjin meje rê Nina.<sup>6</sup> Vêhê xi canújin cojo cha Tito xi, sacuatjin xi ha cavetsihin casahmi tangun cha ngu cjuatjo vêhê ngajñi nuju hatsêê ne, quihndê ne, hacuanitjin ni catitsinguijnetaha cha hiscan xi cavejñavasen.<sup>7</sup> Ngayujun ni ne, jemu tjin ngu tacún cojo Jesucristu; jemu ndaja nújun cjuaxi rê Nina; jemu vechu cjuatacun nuju; jemu nguñaja tacún xi meje cuisecun; jemu tjin nuju cjuahmutacun cojo niji. Sacuatjin tivangun xcun cojo yêjê ni cjuatacun vêhê ne, hacuaha meje niji xi cuanitjin ni cuangun xcun cojo ngu cjuandaja vi xi cuisecun rê xuta yuma.

<sup>8</sup> Hacuiin tivitêxa nuju xi cuitjin tichjá cojo nuju ta, tu titsingácun ni nuju hacutjin sahmi nguñaja cacun xuta Macedonia, cojo sa xi cuma tsejen há nechun nguñaja tacún jain cojo cjuahmutacun xi tjin nuju.<sup>9</sup> Ha ndaja hyun hacutjin casahmi Nai naja Jesucristu cjuandaja. Handasa jemu tjin rê me cjuanchina peru catsiyuma me yojo rê me ngatsê rê xi hmu cacun nuju me, cojo sa xi ngatsê rê xi camayuma me ne, ngayun xi cuisuhun ladu rê me ne, sacú nuju cjuanchina xi sua Nina.

<sup>10</sup> Nguehe cuichjá cojo nuju hacutjin xi tsingátaha cáacun. Ngayun xi hatuxa meje cuisecun hacuaha hisca cuyanu cavetsuhun cavisecun ne,<sup>11</sup> quihndê ne, meje rê xi ninguijnuthun cjuandaja vêhê. Tuhun hitsê xi tjin nuju sacuatjin canihñu titjun xi cojo cjuasua catuhun.<sup>12</sup> Sa xi ngu गयाan meje jain tahan ngu cjuatjo ngu cjuandaja ne, cuma tahan tucutjin xi tjin naja xi tahan ta, vêhê xi chuya rê Nina. Nina ne, fehyaain me hisca cojo xi tsajin naja.

<sup>13</sup> Hacuiin meje rê xi ngayun ne, hisca cuma chaja nuju ngatsê rê xi cuisecun rê jingu sa xuta. Xi meje rê ne, tangun ni cuatjun ngayejen ni.<sup>14</sup> Ngayun xi cjín tjin nuju quihndê ne, cuma cuisecun rê me xi tsajin rê, cojo sa xi hya xi ngayun tsajin nuju ne, me xi cuacun vê ne, cuma cuisecoo nuju me. Cuatjin xi tangun cuatjun ngayun cuma cojo rê me.<sup>15</sup> Cuitjin chja ngu cjuaxi xcun xujun rê Nina: “Xuta xi cjín cafaya me ne, cavanguiin rê me; hane xuta xi chuya cafaya me ne, camachajin rê me.”

### *Cha Tito cojo xicjin cha*

<sup>16</sup> Suá nacuechji rê Nina xi cavuxaha me cjuatacun rê cha Tito cojo sa xi cuma meje cuisecoo nuju cha sacuatjin xi meje ná ngahan.<sup>17</sup> Hya xi cachjá cojo rê cha xi cjuetjengui nuju cha ne, jemu cachuya rê cha cjuaxi jan. Hane tsêhê xi jemu tjin rê cha cjuasua xi sahmi cha tu mé ni xi satêxa rê cha ne, vêhê xi cojo cjuatacun rê suvá ni cha ne, cjuetjengui nuju cha.<sup>18</sup> Hacuaha ningatjin sa ngu cha ladu naja cojo cha Tito. Xuta xi matangun me yêjê ni yungun ne, jemu vaxêndaja me cha xi cuajiyihî vê, xi jemu ndaja xa sahmi cha xi tsinguitsojo cha cjuandajiyihî xi chja tsêhê Jesucristu.<sup>19</sup> Hacuaha xuta xi cuacun jan ne, casua me cha xa xi cuisecoo niji cha xi cuanguin chani ngu cjuandaja vihi ngajan Jerusalén. Cuitjin tihñi cjuandaja vihi cojo sa xi cuma tsejen ta Nai naja ne, jemu jyê hnga me cojo cjuatacun rê me hacuaha cojo sa xi cuma tsejen ta nguñaja tacuin xi visecuín xinguin.<sup>20</sup> Jemu nechin cuidadu, sá tu yo choho cuichja tsijin tsêhê cjuatjo rê xuta vi xi tacun ntsin.<sup>21</sup> Meje nihñi cjuandaja, hacuiin suvá xcun Nina ni ta hacuaha cojo xcun xuta.

<sup>22</sup> Hacuaha cojo cha xi cuacun jan ne, ningatjin sa ngu cha ladu naja. Jemu cjín xcusun casahmi cha xi camatsejen xi jemu nguñaja cacun cha. Quihndê ne, hitsê sa nguñaja cacun

cha xi meje cjue cha ta, tsêhê xi jemu camangu cacun cha cojo nuju. <sup>23</sup> Sacuaha cha Tito ne, jemu visecoo ná cha xi cuatjin visecuin nuju. Sacuaha cha ladu naja xi cuacun vè ne, xuta rê yungun catsingatju me cha hacuaha sahmi jyê sahmi hnga cha Jesucristu. <sup>24</sup> Vêhê xi meje ná ngahan xi tuhun cumachaya rê cha xi cuacun vè cjuahmutacun xi tjin nuju, cojo sa xi yêjê ni xuta rê yungun cumachaya rê me ta quixi jain cjua xi nújin xi cuatjin naxinndijin nuju.

## 9

### *Cjuatjo xi cjue Jerusalén*

<sup>1</sup> Quihndê ne, hacuïn hatuxa meje rê xi tsihindu nuju hacutjin tijima tsêhê cjuatjo xi cjue cuisecoo rê xuta ladu rê Jesucristu ngajan Jerusalén ta, <sup>2</sup> tsêhê xi ha hvê ta jemu meje cuisecon rê xuta xi cuacun vè. Vêhê xi ha cachjá cojo xuta nguehe Macedonia xi ngayun xuta Acaya ne, hisca cuyanu cavetsuhun canihñu tangun tujún. Hane tsêhê xi jemu nguñaja tacún xi cuatjin canihñu ne, vêhê casahmi xi jemu cjín xuta Macedonia xi hacuaha caviyujungu cacun me xi cuisecoo me. <sup>3</sup> Vêhê xi tsingátju nuju ngujo cha ladu naja xi ha cachjá cojo nuju jan, sá tu cuetjicaain yêjê ni cjua xi cachjá tsujun tsêhê cjuacjintacun vêhê. Meje ná xi tjin chjine ngayun sacuatjin xi ha cachjá tsujun, <sup>4</sup> tuxa má sa xi cojo ngujo xuta Macedonia cuinduva me cojo ná ndyá, hane tsajin tjin chjine ngayun ne, jemu cuixu sava ngayin, hisca cojo ngayun cuixu sava ngayun ta, tsêhê xi cuatjin camangu tacuïn cojo nuju. <sup>5</sup> Vêhê xi catsingátaha cáacun xi casahmi ná ngujoyê xi caféhya cha xi cuacun vè xi cjuetjengui cha ngayun cojo chaja sa, cuisecoo nuju cha xi ninguiñunñuju tujún xi canújun jan. Xi cuatjin tjin chjine cjuandaja nuju vè ne, ngajan cuma tsejen xi hacuïn ngujoyê canihñi nuju ta cojo cjuasua nuju xi canihñi.

<sup>6</sup> Ha hyun ta yo xi chuva tjê cuincha ne, hacuaha chuva tutjê sacú rê; hane yo xi cjín tjê cuincha ne, hacuaha cjín tutjê sacú rê. Hacuanitjin ni ngayun cojo cjuatjo nuju. <sup>7</sup> Jima ngu ngayun ne, meje rê xi tuhun hacutjin xi cavejñu tacún xi tuhun, peru hacuïn taha choho ma tacún, hacuïn cojo ngujoyê. Cuatjin nihñu ta ngu xuta xi cojo cjuasua sua me ne, xuta vêhê xi jemu chuya rê Nina tsêhê me. <sup>8</sup> Nina ne, cuma sua nuju me yêjê ni cjuandaja rê me, cojo sa xi tsajin nixtin xi cuma chaja nuju; hisca cuangui sa nuju, cojo sa xi cjín xcusun cjuandaja cuma nihñu. <sup>9</sup> Xcun xujun rê Nina ne, cuitjin chja: Xuta ndaja jan ne, chuva cjín sua me xuta yuma.

Hane cjuandaja xi sahmi me vêhê ne, tsajin nu tsajin nixtin xi chaya rê Nina.

<sup>10</sup> Nina, me xi sua tjê xi nitjen cojo niñu xi chinê ne, hacuaha sua nuju me yêjê ni tjê xi mameje nuju, hacuaha me vêhê sahmi me xi cuma cjín sa tutjê xi sacu nuju. Hacuaha sahmi me xi cuma yehe sa yêjê ni cjuandaja xi nihñu. <sup>11</sup> Cuatjin sahmi Nina xi jemu ndaja cuatjun cuma, cojo sa xi yehe cjuandaja cuma nihñu. Hane xi nihñi entregadu cjuandaja nuju jan cojo xuta yuma ne, sua me nacuechji rê Nina. <sup>12</sup> Xi cuitjin cuanguinchani ngu cjuandaja nuju vè ne, hacuïn suvá xi nicjen cjuachaja xi tjin rê xuta ladu rê Jesucristu ta, hacuaha nihña xi jemu cjín xuta ne, sua me nacuechji rê Nina. <sup>13</sup> Xi cuitjin nihñi ngu cjuandaja vè ne, ngajan cuma tsejen xi ngayun ne, tiniñu jain sacuatjin xi nújun xi macjain nuju cjuandajiyi xi chja tsêhê Jesucristu. Hacuaha cuma tsejen ta jemu ndaja tivisecon rê xuta Jerusalén, hacuaha jemu ndaja visecon rê yêjê ni xuta yuma xi ladu rê Jesucristu. Vêhê xi ngahan cojo yêjê ni me xi visecoo ná ne, jemu nihñi jyê Nina. <sup>14</sup> Hacuaha xuta ladu rê Jesucristu ngajan Jerusalén ne, sahmi me oración rê me cojo Nina ngatsê nuju, hacuaha jemu cuinga rê me ngayun xi cumachaya rê me tsêhê cjuandaja xi jemu casua nuju Nina. <sup>15</sup> Nacuechji rê Nina xi casua naja me ngu cjuandaja ngu cjuatjo xi hisca hyaan hacutjin cuinújan xi venguichji rê.

## 10

### *Vaxêtje Pablo xa xi casua Nina me*

<sup>1</sup> Ngahan Pablo ne, nguehe cuichjá cojo nuju cojo cjuandaja cjuajeya rê Jesucristu. Chja yahnga xuta ta ngahan ne, hya xi teññataha tangun cojo nuju ne, jemu jeya ngahan; peru hya xi cjín teññataha tsujun ne, jemu hñu cjua naha cojo nuju. <sup>2</sup> Ndatjin, peru nguehe cjuéhya nuju ngu cjuandaja: xicanihñuu xcusun xi sahmi xi sahme hñu cjua naha hya xi cjuêjtjengê nuju. Ha hvê ta cuma sahme hñu cjua naha cojo xuta xi chja cojo nuju xi ngayin ne, suvá cjuatacun rê xuta ngasunhndê xi quichihin. <sup>3</sup> Quixi jain xi xuta ngasunhndê ngayin, peru hacuïn si rcuin sacuatjin sí rcu xuta ngasunhndê. <sup>4</sup> Hacuïn chicjin cojo quicha ta Nina ne, sua niji me ngahñu xi caa niji ninguetsinyin cjuatacun rê xuta xi tsitjungui me Nina; xi visajmí ngayin cojo xuta xi cuacun jan ne, ngutjen tsejen ta machjiriin cjuatacun rê me. <sup>5</sup> Ninguetsinyin cjuaxin xi sahmi xi maji vijnercu me yo xi Nina, hacuaha ninguiñin cjuatacun rê xuta cojo sa xi tsingataha cacun me sacuatjin meje rê Jesucristu. <sup>6</sup> Hane hya

xi cuechu nixtin xi ngayun ne, jemu ndaja camahani cuinuhyun tsêhê Nina ne, ha tjin ngu tacuin xi nihñi castigu yêjê ni me xi vihndiin tsêhê Nina.

<sup>7</sup> Ngayun ne, tiningatuhun tacún sacuaaha tsingataha cacun xuta ngasunhndê. Sa xi tjin yahnga xuta xi tsingataha cacun me xi ladu rê Jesucristu me ne, ndatjin; peru hacuaaha catitsingataha cacun me xi, sacuatjin xi ladu rê Jesucristu me ne, ngayin ne, hacuaaha cojo ngayin ladu rê Jesucristu ngayin. <sup>8</sup> Handasa cuátjutaha hitsê xi cuichjá cojo nuju sacuaaha tsêhê xa xi casua niji Nai naja ne, peru hacuiin cuma sava ná. Nai naja casua niji me xa vêhê, cojo sa xi cuisecuin nuju xi cuangunndujun xi mangu tacún cojo cja rê Nina, hacuiin xi ninguetsein cjuatacun nuju. <sup>9</sup> Hacuaaha mijí ná xi ningatuhun tacún xi meje cuinchárcun nuju cojo yêjê cja xi tsihindu nuju. <sup>10</sup> Cuinújun ngu ngayun ta jemu hñu cja naha xi tsihindu nuju, peru hya xi tejñataha cojo nuju ne, jemu yuma hasen ngahan, hacuaaha hisca chuyiin nuju chuva rê xi visiajme. <sup>11</sup> Peru cuidadu xi cuatjin nújun ta, chuva rê xi nújin cojo nuju xcun xujun xi nihndin nuju quihndê xi xín nechintihin tsujun ne, ha chuva vêhê ni nihñi hya xi cuéchintihin nuju.

<sup>12</sup> Ngayin ne, vetjün tacuin xi cuinújin xi tangun ngayin cojo ngujo me xi vaxêndaja suvá me yojo rê me. Xi cuatjin tsichuva me cjuatacun rê me ngajñi rê suvá me ne, jemu ngarca me. <sup>13</sup> Ngayin ne, cuinujün xi jemu ndaja canihñi ngu xa xi hisca canihñi. Ha tucutjin xa xi canihñi ne, ha vêhê ni xi cuinújin. Nina ne, me vêhê xi vitexa niji me jani hiscan cuechin xi nihñi xa, hacuaaha me vêhê cavitexa niji me xi catsanguin hisca ngajan nangui nuju. <sup>14</sup> Vêhê xi hya xi ndaja nújin tsujun ne, hacuiin sacuaaha xi vatjintihin rê xa xi casua niji Nina ta, tjun tjun ngayin cafilhin nangui nuju cojo cjuandajiyi xi chja tsêhê Jesucristu. <sup>15</sup> Hacuaaha hacuiin naxinndijün yojo niji tsêhê ngu xa xi casahmi jingu sa xuta. Peru vetihin tacuin xi sacuatjin xi cuangun xcun xi hitsê sa ndaja cumacjain nuju Jesucristu ne, hacuaaha hitsê sa jyê xa cuma nihñi ngajñi nuju. <sup>16</sup> Ngajan xi cuma cuanguin tihín cumachaya rê xuta cjuandajiyi tsêhê Jesucristu hisca ngajan sa tsêhê nangui nuju. Xi cuatjin ne, tsajin yo cuichja xi ngayin ne, naxinndijün yojo niji tsêhê ngu xa xi jingu sa xuta casahmi me.

<sup>17</sup> Yo xi meje cuaxêndaja rê tu yo ni ne, cataxêndaja me Nai naja, sacuatjin chja xujun rê Nina. <sup>18</sup> Cuatjin ta, xi naxenndajan suvaan yojo naja ne, machjiriin camahani. Xi machjirêhê ne, xi Nai naja cuaxêndaja naja me.

## 11

### *Chja Pablo tsêhê apóstol ndacha*

<sup>1</sup> Nijyun tacún. Caticaa nuju ndastu ngujo cjuasca xi cuichjá cojo nuju. Handasa hacuiin sca ná peru cuichjá cjuasca ta, <sup>2</sup> tsêhê xi jemu chini ngahan tsujun. Nina ne, casua ná me cjuatacun xi cuatjin chini ngahan ta, tsêhê xi ngayujun ni ne, sacuaaha ngu quihndi naha xi chjuun xi casuá xi cuixan cojo ngu ni xihin. Cuatjin nuju ngayun. Hane xihin jan ne, hacui Jesucristu. <sup>3</sup> Hatsêê ne, chu yê cavindacha chu na Eva cojo cjuatacun tsehen rê chu. Hane hacuaaha jemu macjín cáacun tsujun ta sá tu cuatjin ningatuhun cumandacha ngayun, hane ha quihndê hacuiin nguñaja tacún cuangunndujun cojo ndiya rê Jesucristu xi tivanguncujun. <sup>4</sup> Hya xi fehe ngu cha xi sua cumachaya nuju ngu cja xi chja tsêhê Jesús xi hacuiin tangun cojo cja xi cachjá cojo nuju ntsacu cavetsihin ne, ¿mé má cha vêhê xi jemu ndaja caa nuju cojo cja rê cha? O sa xi chjuhunntsun ngu cjuatacun xi hacjahi, xi hacuiin tangun cojo cjuatacun xi cachjuhunntsun ntsacu cavetsihin ne, ¿mé má cjuatacun vêhê xi jemu ndaja caa nuju cojo? O sa xi fehe ngu cjuandajiyi xi hacjahi, xi hacuiin tangun cojo cjuandajiyi xi cachjuhunntsun ntsacu cavetsihin ne, ¿mé má cja vêhê xi jemu caa nuju cojo?

<sup>5</sup> Quihndê ne, nguehe cuetsehen cuichjá cojo nuju cjuasca. Caticaa nuju hitsê ta, tsêhê xi xi má ná ngahan ne, hacuiin tjêngê ngahan xi cuma rê cha xi cuacan nújun xi apóstol yehe cha. <sup>6</sup> Handasa cjêê scutaya hacutjin xi jemu ndaja cuma cuichjá cojo xuta, peru jemu cavutaya cjuatacun rê Nina. Hane ngajñi rê yêjê ni xcusun xi canihñi, ngajñi rê yêjê ni cja xi canújin ne, cahyun suvan hacutjin vechu cjuatacun niji.

<sup>7</sup> Catsingujne suva yojo naha cojo sa xi ngayun ne, cuma yehe cuma hnga ngayun cojo cjuatacun nuju. Hane xi casuá camachaya nuju cjuandajiyi xi chja tsêhê Nina ne, cafaan camahani chji tsujun. ¿Mé jyê quítjen xi cuatjin casahme? <sup>8</sup> Ngahan ne, cafa há tujún tsêhê xuta xi matangun yungun xi yahnga. Me vêhê cavechji ná me cojo sa xi cuma cuiséoo nuju ngayun. <sup>9</sup> Hora xi camachaja ná hya xi cavitejñataha cojo nuju ne, hisca ngu ngayun ne, casuandyaan nuju xi cuisecon ná ta, ngujo cha xingueen xi canduva cha tsêhê Macedonia ne, cha vêhê casua ná cha mé xi casahmi chaja ná. Hatuxa cavitejña cuidadu xi tsajin camahani mé cjuandya xi suá nuju, hacuaaha ha cuanitjin ni sahme nchujunni nguini. <sup>10</sup> Jiya cjaquixi rê Jesucristu cahntsua zahasen naha. Hatuxa cuichjá sa cojo xuta ngajan

yějě ladu tséhě estadu Acaya hacutjin casuandyaan camahani nuju. <sup>11</sup> ¿Mé má cuatjin cuichjá sa? ¿Há tséhě xi mijí ná ngayun? Véhě Nina ta jercu meje ná ngayun.

<sup>12</sup> Peru sacuatjin xcusun xi ha sahme ne, ha cuatjin cjuénduju sa sahme, cojo sa xi tsinguétsun cjuá rě cha xi cuacun vanguise chuva rě xi cuichjá cha xi xa xi sahmi cha ne, tangun cojo xa xi nihñi. <sup>13</sup> Cha vėhě ne, hacuiin apóstol xi cjuaquixi cha. Tu vindacha ni cha xi chja cha xi apóstol tséhě Jesucristu má cha. <sup>14</sup> Peru hacuiin fircun ná xi cuatjin ma vindacha cha ta, hisca Satanás ne, ma vindacha naja xi sahmi yojo rě sacuaaha ngu xi catsingatju Nina. <sup>15</sup> Véhě xi cojo cha xi cuacun sahmi xa rě xitsehen vė ne, hacuiin chja ma sahmi cha xi cuma cha sacuaaha cha xi sahmi cjuaquixi jain. Peru cha xi cuacun vė ne, ha cuatjin cjué cha sacuatjin meje rě xcusun xi sahmi cha.

### *Cjuañihi xi vatju apóstol Pablo*

<sup>16</sup> Cuichjá nga cojo nuju ngu ndiya ta, xicaningatuun tacún xi sca ná. O sa tsajin ne, handasa sacuaaha xi sca ná má nuju ne, peru tuhun cahndě xi hacuaaha cojo ngahan ne, cuaxéndaja hitsě yojo naha sacuatjin sahmi cha xi vaxéndaja yojo rě vė. <sup>17</sup> Xi cuitjin vaxéndaja yojo naha ne, hacuiin tichjá sacuatjin chja Nai naja ta tichjá sacuaaha xi sca ná. <sup>18</sup> Jemu cjín xuta xi vaxéndaja me yojo rě me ngatsě rě xcusun xi cun xi má súvá me hacuaaha xi vatju súvá me má, vėhě xi hacuaaha cojo ngahan ne, cuatjin cuaxéndaja hitsě yojo naha. <sup>19</sup> Xi má nuju ngayun ne, jemu quicuntacun. Peru jemu ndaja caa nuju cojo cjuá rě xuta sca rě. <sup>20</sup> Jemu caa nuju tu yo ni xi vitexa nuju hacuaaha xi mosu rě ngayun, sacuaaha xi matitjun me tsujun; tu yo ni xi sahmi jyě sahmi hnga súvá yojo rě, tu yo ni xi sahmi chuva nuju. <sup>21</sup> Peru savaain camahani ná xi cuichjá cojo nuju xi ngayin ne, sacuaaha xi jemu yuma hasen ngayin xi cuatjin nihñi cojo nuju.

Peru sacuatjin vetju cacun cha xi cuacun jan xi vaxéndaja cha yojo rě cha ne, hacuaaha ngahan ne, cuatjin vetju cáacun xi cuaxéndaja yojo naha. Peru sacuaaha xi sca ná xi cuitjin tichjá cojo nuju. <sup>22</sup> ¿Há ma chja cha hne hebreo? Ngahan ne, hacuaaha ma chjá. ¿Há xuta tjě rě Israel cha? Ngahan ne, hacuaaha xuta tjě rě Israel ngahan. ¿Há tjě rě Abraham cha? Ngahan ne, hacuaaha tjě rě Abraham ngahan. <sup>23</sup> ¿Há sahmi cha xa rě Jesucristu? Sacuaaha xi jercu sca ná xi cuitjin chjá, peru ngahan ne, hitsě sa ndaja sahme xa rě Jesucristu. Hitsě sa jercu casahme xa xi cuma rě cha xi cuacun vė. Hitsě sa cjín ndiya cějě ndavaya. Hitsě sa cjín ndiya casehen ná. Jemu cjín ndiya xi hitsě sa ne, caveya ngahan. <sup>24</sup> Xutaxa rě xuta Judea ne, hñú ndiya casahmi ná me castigu xi cavaja ná me can tyjuhun ñuju can tyjuhun ñuju cuarta xi ngu ngundiya. <sup>25</sup> Jyan ndiya ne, ya cavaja ná xuta; ngundiya ne, cavetaha ná me ndoyojo; jyan ndiya nga ne, quijingahma barcu xi cjuicojo ná; ngundiya tséhě jyan ndiya vėhě ne, cavitejñaya ngu nixtin cojo ngu nixten ngajñi ndachacun. <sup>26</sup> Jercu fě camahani ngu nangui; hane xi cuatjin tsujyéhěya ne, hacuaaha jemu tsavi xi vátju ndajyě, jemu tsavi tséhě cha chějě, jemu tsavi cojo cjuahngatacun xi sahmi xuta nangui naha, hacuaaha tsavi cojo cjuahngatacun xi sahmi xutaxín; jemu cojo tsavi xi tejjñataha ngu nandya; jemu cojo tsavi xi tejjñataha ngu nguñña; jemu tsavi xi vátju ndachacun; jemu tsavi xi tsujyéhěya cojo cha ndacha xi chja cha xi cha ladu naja cha. <sup>27</sup> Jemu chja camahani xa xi casahme hacuaaha jemu chja cavátju camá; jemu cjín ndiya xi hisca camaji cafañafě; tjin hora ne, jemu yojo ná, jemu xinda ná; jemu cjín ndiya xi cajiněě niñu; tjin hora xi jemu hnchan ná, hacuaaha camachaja tsjian naha.

<sup>28</sup> Hane tséhě yějě ni cjuacjintacun xi cuacun vėhě ne, nchu nchujunni ne, sesuntaha sa ngu: jemu vityanguě cáacun tséhě xuta xi ma tangun me yějě ni yungun, hacutjin tivatju me tijima. <sup>29</sup> Sa xi choho vatju ngu xingueen má ne, ngahan ne, hacuaaha choho ma ná. Sa xi yo sahmi xi cjuinenguia ngu xingueen ngajñi rě cjuatsehen ne, hacuaaha ngahan ne, jemu cuma cjan camahani ná. <sup>30</sup> Sa xi meje rě xi cuaxéndaja yojo naha ne, cuichjá cojo nuju hacutjin yuma hasen ngahan. <sup>31</sup> Nina Nahmi rě Nai naja Jesús ne, me vėhě xi hatuxa jyě hnga me yějě nu yějě nixtin ne, me vėhě xi vėě jain me ta hacuiin tivindácha xi cuitjin tichjá cojo nuju. <sup>32</sup> Ngundiya hya xi cavitejñataha ngajan nandya Damasco hiscan vitexa Aretas ne, ngu xutaxa rě xi catsingatju Aretas ne, caviyujutaha me sindadu tingotjo rě nandya jan xi cjuaha cha ngahan cjuacojo ná cha. <sup>33</sup> Peru ngujo xingueen ne, quijicojo ná me xcun ngu ventana tséhě taha xihndě tséhě hnchua rě nandya jan, caveya ná me cahntsua ngu changa jyě, sehe catsitujne ná me taha candatsen. Cuatjin camá xi cavětjutjě tséhě gobernador jan.

## 12

### *Chja nijña cojo Pablo*

<sup>1</sup> Tjin ná xi cuaxéndaja sa yojo naha. Hacuaaha handasa tsajin mé machjiréhě xi cuitjin sahme ne, peru nguehe cuichjá cojo nuju hacutjin casahmi Nai naja xi cuichjá nijñá cojo ná ngu jo ndiya. <sup>2-3</sup> Ngahan ne, hvě ngu xihin xi ma ladu rě Jesucristu, hane camateñuju nu jan ne, quijicojo rě cha hisca hiscan majyan ngahnga hisca hiscan tacun Nina. (Xihin

xi quijicojo rë ne, hacui Pablo.) Hveen ne, ¿há xi cojo yojo rë cha quiji cha? ne, o ¿há xi hasen ni rë cha xi quiji? ta, suvá Nina ni vëë me hacutjin camá. Mé ta cha xi cuajyihí vë ne, <sup>4</sup>quijicojo rë cha ngajan ngahnga ngu cahndé ndajyihí xi hmí paraíso, hane ngajan cahndé cha cjuá xi hisca sacuiin chuya rë hacutjin cuichja nga cha cojo xuta, hacuaha hisca sacuiin cahndé xi cuya cuichja nga cha cjuá jan cojo xuta. <sup>5</sup>Cuaxëndaja xcusun xi casahmi Nina cojo rë cha vëhë, peru hacuiin cuaxëndaja yojo naha suva; sa xi cuichjá tsahan ne, cuichjá hacutjin xi yuma hasen ngahan. <sup>6</sup>Sa xi meje cuaxëndaja sa yojo naha ne, hacuiin sca ná ta, tsëhé xi suvá cjuaquixi xi cuichjá. Peru ha quihndé sahme sa cuatjin ta, tsëhé xi mijí ná xi ngatsé rë cjuá vëhë ne, tsingataha cacun ngu xuta xi jemu ngu cha machjirëhé ngahan. Xi meje ná ne, xi catutsejen xuta jan xcusun xi sahme hacuaha catisiñuj me cjuá xi chjá, sehe tsingataha cacun me ne, há machjirëhé ne, o há machjiriin ngahan.

<sup>7</sup>Hacuaha cojo sa xi hacuiin cuátjutaha xi ndaja tsingátaha cáacun tsahan suva ngatsé rë cjuandaja xi casahmi Nina cojo ná xi cuatjin cachja nijná cojo ná ne, vëhë xi casua me cahndé xi Satanás ne, suandya ná sacuatjin suandya naja ngu nahyá xi maji naxenxen, cojo sa xi hacuiin cuátjutaha xi ndaja tsingátaha cáacun tsahan suva. <sup>8</sup>Jyan ndiya caféhya rë Nai naja xi cuetjuxin cjuandya jan; <sup>9</sup>peru cachja me cojo ná cuitjin: “Cjuandaja xi suá ri ne, vëhë yëjé ni xi mameje ri ta, tsëhé xi hiscan xi yuma hasen xuta ne, ngajan xi ma visehen ngahñu naha.” Cuatjin cachja me. Vëhë xi hisca nguñaja cáacun xi vaxëndaja yojo naha ngatsé rë xi yuma hasen ngahan, cojo sa xi ngahñu rë Jesucristu ne, cuma cuisehen ngajñi rë cjuatacun naha. <sup>10</sup>Vëhë xi hisca ndama ná xi jeya ngahan, ndama ná hya xi choho chja xuta tsahan, ndama ná xi vátju ngu cjuandya jyë, ndama ná hya xi vátju cjuañihí, ndama ná hya xi sacuiyiin ná hacutjin cuaxëtjé yojo naha. Jemu ndama ná xi cuatjin vátju má cjuacjintacun vëhë ngatsé rë Jesucristu ta, tsëhé xi hya xi jemu yuma hasen ngahan ne, hya jemu sacú ná ngahñu rë Nina.

#### *Cjín tsingataha cacun Pablo tsëhé xuta rë yungun Corinto*

<sup>11</sup>Ngahan ne, sacuaaha xi sca ná, peru ngayun quitjun jyë xi cuitjin tichjá cojo nuju. Xi meje rë ne, ngayun ndaja cuinújun tsahan ta, tsëhé xi handasa chja yahnga xuta ta tsajin mé venguichji ná, peru cumaji cuatjutaha ná cha xi nújun xi apóstol yehe vë. <sup>12</sup>Xcusun xi casahme ngajñi nuju ne, casua machaya nuju ta ngu apóstol xi cjuaquixi ngahan. Jemu cacaa ná cojo nuju xi cuatjin cavisécoo nuju hya. Ngayun ne, jemu quijircun nuju hisca carcun xi cahyun cjuarcun xi casahme. <sup>13</sup>Tangun casahme ngajñi nuju cojo xi casahme ngajñi rë yëjé xuta rë yungun xi yahnga, cuenda xi casuandyaan nuju xi cuisecun ná tsëhé gastu naha. Sa xi cuaaintjin xi casahme cojo nuju xi má nuju ne, nijyun tacún cojo ná.

#### *Chja Pablo xi cjue me má jyan ndiya nandya Corinto*

<sup>14</sup>Quihndé ne, cuma jyan ndiya xi cjuëtjengé nuju ne, hacuaha suandyaan camahani nuju ta, hacuiin xcusun xi tjin nuju xi meje ná ta suvun xi meje ná ngayun. Mijí rë xi nixti cuetjo tujún xi cuisecoo rë xutacha rë ta xutacha rë cuetjo me tujún xi cuisecoo rë nixti rë me. <sup>15</sup>Ngahan ne, cojo yëjé ni xi cjuasua tsicojó tujún naha ngatsé nuju, hisca tsicjé ngahñu naha ngatsé nuju. Xi má ná ne, tucutjin xi hitsé sa vinga ná ngayun ne, ngayun ne, hitsé sa chuya vinga nuju ngahan.

<sup>16</sup>Cuichja yahnga xuta tsahan ne: “Jéya. Hacuiin casuandya naja cha tsëhé gastu rë cha, peru tsëhé xi jemu quicun cacun cha ne, jemu cavindacha naja cha.” Cuatjin cuichja yahnga xuta tsahan. <sup>17</sup>¿Há cavindacha nuju xi catsingátju nuju gujo cha xi quijitjengui nuju cojo cjuá naha? <sup>18</sup>Cachjá cojo cha Tito xi cjuetjengui nuju cha, hacuaha catsingátju sa ngu cha xingueen cojo cha Tito. ¿Há cavindacha nuju cha Tito vë? Jéya. Ha ndaja hyun ta cha vëhë ne, hya xi quitaha cha cojo nuju ne, tangun cjuatacun rë cha cojo cjuatacun naha, hacuaha tangun xcusun xi casahmi cha cojo xcusun xi ha casahme ngahan.

<sup>19</sup>Ngu ngu ngayun ne, ningatuhun tacún xi cojo nuju ngayun titihín cjuaquixi niji. Peru hacuiin cuatjin ta, xcun Nina ne, cuitjin tinújin ngatsé rë xi tjin tangun cjuatacun niji cojo Jesucristu. Peru yëjé ni cjuá xi tinújin ne, tinújin ngatsé nuju ngayujun ni, tsan, cojo sa xi cuma yehe sa cjuatacun rë Nina xi tjin nuju. <sup>20</sup>Jemu macjín cáacun, sá nihñuu tutjin xi meje ná, hacuaha sá sahme tutjin xi meje nuju, hya xi cjuëhé nangui nuju. Jemu macjín cáacun, sá tacun si ngajñi nuju, sá tjin cjuachini ngajñi nuju, sá cjan nuju cojo xingun, sá hnga tacún, sá tjin cjuandesu ngajñi nuju, sá tjin cjuachjataha ngajñi nuju, sá tjin cjuaxta ngajñi nuju, sá tujyé tiniñu. <sup>21</sup>Jemu macjín cáacun sá sahmi chuya Nina ngahan ngajñi nuju hya xi cjuëhé nga ngundiya nangui nuju; hacuaha jemu macjín cáacun, sa choho cuma rë xahasen naha ngatsé rë ngu ngu ngayun xi mijí nindeyun cjuatacun nuju hacuaha hacuiin caviyujunxun cjuatsehen xi nihñu, hacuaha cjuatsehen xi sahmi xuta cojo ngu xi hacuiin chjuun rë me, hacuiin xihin rë me.



## 13

### *Conseju xi sua Pablo*

<sup>1</sup> Quihndê ne, cuma jyan ndiya xi cjuêjtjêngê nuju. Sacuatjin camahindu xcun xujun rê Nina xi jo o sa xi jyan xuta sua me cjuaquixi rê me tsêhê ngu cha xi caxincha jyê rê ne, sehe cuma chihin cjua jan, há cuma cha castigu o há xi cumaji cha castigu. <sup>2</sup> Hya xi cavitejñataha cojo nuju xi ma jo ndiya ne, cachjátaha rê xuta xi casahmi cjuatsehen; hane quihndê xi xín tejñataha ne, cúa cuichjá nga cuatjin cojo nuju ngayujun ni xi cjêê cuichjá cojo nuju ta, hya xi cuinduva nga ngundiya ne, ha quihndê tsajin yo cuetjutje tsêhê castigu xi fehya jyê rê. <sup>3</sup> Cuatjin sahme ta, tsêhê xi ngayun ne, tivinchunsun chuya rê xi meje cumachaya nuju há cjuaquixi xi Jesucristu ne, sua ná me cjua xi chjá cojo nuju. Me vêhê ne, hya xi tsichuva nuju me ne, hacuiin jemu yuma hasen me ta jemu hñu ngahñu rê me, jemu hñu cjuatacun rê me ngajñi nuju. <sup>4</sup> Cjuaquixi xi jemu yuma hasen me hya xi catsiquehen xuta me xcun cru; peru tjin rê me ngahñu rê Nina quihndê xi tacun nga me cjuahñu. Hacuaha ngayin ne, xi tjin tangun cjuatacun niji cojo rê me ne, jemu yuma hasen ngayin. Peru cuinechin cjuahñu cojo rê me cojo ngahñu rê Nina cojo sa xi cuma cuisecuiin nuju.

<sup>5</sup> Chjuhunchuvun suvun ni yojo nuju, ¿há nechunyun jain ndiya rê Jesucristu? Nichuvun suvun ni yojo nuju. Ngayun ne, hatuxa machaya nuju suvun xi Jesucristu ne, jiya me cahntsua xahasen nuju, jiya me ngajñi rê cjuatacun nuju. Sa xi tsajin ne, cuetjun ndesu ngayun. <sup>6</sup> Hacuaha vetahá cáacun ta ngayun ne, cumachaya nuju ta ngayin ne, hacuiin ndacha ngayin. <sup>7</sup> Tichjahyin rê Nina cojo sa xi ngayun ne, hacuiin nihñu cjuatsehen. Cuatjin chjahyin, peru hacuiin ngatsê rê xi meje niji xi cuichja xuta ta jemu ndaja xa canihñi ta, xi meje niji ne, xi nihñu cjuandaja, handasa cuichja xuta xi ngayin ne, sacuaaha xuta ndacha ngayin. <sup>8</sup> Ngayin ne, tsajin mé venguichji rê xi nihñi xcusun xi hacuiin cjuaquixi ta xi venguichji rê xi nihñi ne, xcusun xi cjuaquixi. <sup>9</sup> Jemu ndama niji hya xi jemu yuma hasen ngayin hane ngayun ne, jemu hñu cjuatacun nuju. Hacuaha chjahyin rê Nina xi xcun ngasunhndê nuju ne, cuiyujuchihin cjuatacun nuju, cuma tyjahi xahasen nuju. <sup>10</sup> Vêhê xi cuatjin titsihindu nuju cjua vêhê xcun xujun vihi quihndê xi chaja sa cjuêjtjêngê nuju, cojo sa xi hya xi cjuêhê ngajan ne, hacuiin jemu hñu cjua naha cojo nuju ta Nai naja ne, casua ná me xa xi cuisécoo nuju, hacuiin xi tsinguétsun cjuatacun nuju.

### *Tsinguijnetaha Pablo cjua*

<sup>11</sup> Quihndê ne, ngayujun ni ne, catama sua rê xahasen nuju; tiyujunchuhun cjuatacun nuju; tuhun cjuetacun xahasen nuju; nihñu tangun cjuatacun nuju cojo xingun; tinechun cojo cjuandaja cojo cjuajeya; hacuaaha xicamacjiin tacún ta Nina xi sua cjuahmutacun sua cjuajeya ne, cuisecoo nuju me. <sup>12</sup> Tuhun rê xingun nina, cojo cjuandaja cojo cjuahmutacun chutatsuhun xingun, sacuatjin xcusun naja. <sup>13</sup> Yêjê xuta ladu rê Jesucristu ne, tsingatju me ngu nina tsujun. <sup>14</sup> Jesucristu, Nai naja ne, catisua nuju me cjuandaja rê me; Nina ne, catisua nuju me cjuahmutacun rê me; hane Hasen rê Nina ne, catisecoo nuju ngayujun ni.

## Carta xi catsingatju San Pablo xi cafahatsja xuta ladu rë Jesucristu ngajan distritu Galacia

<sup>1</sup> Ngahan Pablo ne, má ngahan apóstol, hacuiin ngatsë rë xi xuta catsingatju ná me o sa xi cavetahaxa ná me ta ngatsë rë xi cavetahaxa ná Jesucristu cojo Nina Nahmi naja, me xi catsicuya nga rë Jesucristu cjuahñu tsëhë ngajñi rë nima. <sup>2</sup> Ngahan cojo yëjë sa xuta ladu naja xi siu cojo ná nguehe ne, ningatjin nuju carta vihi, ngayujun ni xuta ladu rë Nina xi tsëhë yëjë ni nandya ngajan distritu Galacia. <sup>3</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya. <sup>4</sup> Jesucristu ne, casua me yojo rë me xi cueya me ngatsë rë yëjë ni jyë naja, cojo sa xi cuëhëndaya naja me tsëhë nixtin tsehen vihi, sacuatjin meje rë Nina Nahmi naja. <sup>5</sup> Catamajyë catamahnga Nina cojo Hasen rë me yëjë ni nu yëjë ni nixtin. Cuatjin jain.

*Ngu ni má cjuandajyihí xi chja tsëhë Jesucristu*

<sup>6</sup> Jercu fircun ná xi ngayujun ni ne, jercu xati tinihñu cjin tsëhë Nina, me xi cajindaya nuju cojo cjuandaja rë Cristu, hane tinihñu tiña tsëhë ngu nga cjuachacun. <sup>7</sup> Xi cjuaguixi ne, tsajin sa ngu cjuachacun ndajyihí xi hacjahi xi cuaxëtje naja. Peru tjin yahnga me xi tisuandya nuju hacuaha meje tsindeya me cjuandajyihí xi chja tsëhë Jesucristu. <sup>8</sup> Peru sa xi tjin ngu me xi sua cumachaya nuju ngu cjuandajyihí xi tanguaain cojo xi ha catihín camachaya nuju ne, ¡catji me cojo nai rë me! Cuatjin catama, handasa ngahan suva o sa xi ngu ángel tsëhë ngahnga cuichja cjuajan. <sup>9</sup> Sacuatjin canújin cojo nuju titjun ne, hacuanitjin ni cúa cuichjá cojo nuju quihndë cjuavihi: Sa xi tjin ngu me xi tisua tijimachaya nuju ngu cjuandajyihí xi tanguaain cojo xi ha camacjain nuju ne, ¡catji me cojo nai rë me!

<sup>10</sup> Ngahan ne, tsajin jercu meje ná xi chuya rë xuta tsahan ta xi meje ná ne, xi Nina chuya rë me tsahan. Sa xi meje sa ná xi xuta chuya rë me tsahan sacuatjin camameje ná hatsëë ne, hacuaha hacuiin mosu hndixahan rë Cristu ngahan.

*Hacutjin camá xi camá Pablo apóstol*

<sup>11</sup> Nguehe cuichjá cojo nuju ngayujun ni xi cjuandajyihí xi suá machaya rë xuta ne, hacuiin cjuatacun rë xuta. <sup>12</sup> Hacuiin xuta casua ná me cjuandajyihí vë, hacuaha hacuiin xuta cavicuya ná me ta Jesucristu ne, me vëhë xi casua me camachaya ná.

<sup>13</sup> Ngayujun ni ne, ha camachaya nuju hacutjin xi casahme hatsëë, hya xi jemu cavétaha yojo naha cjuachacun rë xuta tjë rë Israel. Camachaya nuju tsëhë hacutjin jercu tisuá rë xuta ladu rë Nina cjuañihí nixtin hya hacuaha jercu tisahme ngahñu xi tscjéya me. <sup>14</sup> Hane ngahan ne, tsëhë yëjë xuta xi hacuaha tjë rë Israel xi tangun nu naha cojo ne, cavátjutaha rë xi casahmechehen yëjë ni xcusun rë xuta naha ta, tsëhë xi jercu tu cavétaha camahani yojo naha cojo xcusun rë xutachanga naha. <sup>15</sup> Peru Nina ne, cavaxijin ná me chaja sa xi tsin ngahan, hane cojo cjuandaja rë me ne, casuaxa ná me. Hya xi Nina cavejña ngu cacun me <sup>16</sup> xi tsingacun me ngahan Quihndi rë me, cojo sa xi sua cumachaya rë xutaxín tsëhë cjuandajyihí tsëhë me ne, hya tsajin yo xuta xi cëjë cavinengësë rë, <sup>17</sup> hacuaha cejen ngajan Jerusalén xi cjuëtjängë me xi ha má apóstol chaja sa xi cuma ngahan apóstol. Cahndë rë vëhë ne, ngutjen cëjëxen ngajan distritu Arabia, sehe cavúya nga nandya Damasco.

<sup>18</sup> Hya xi camá ne, xi cavatju jyan nu ne, cëjë ngajan Jerusalén, cëjëjtjängë Pedru, hane cavitejñataha cojo rë me tyjuhun nixtin. <sup>19</sup> Peru cahveen apóstol xi yahnga ta ngu ni Jacobo, xicjin Nai naja, xi cahvë. <sup>20</sup> Cjuu xi tichjá cojo nuju ne, vëë Nina ta hacuiin vindácha.

<sup>21</sup> Hya xi camá ne, cëjë distritu Siria cojo distritu Cilicia. <sup>22</sup> Hane xuta ladu rë Cristu ngajan distritu Judea ne, hisca cjëë sa scuëë me ngahan. <sup>23</sup> Sehe tu vihndë me cjuavihi: “Cha xi jercu casua naja cjuañihí hatsëë ne, quihndë ne, tisua cha tijimachaya rë xuta tsëhë cjuachacun xi jercu casahmi cha ngahñu xi tscjéya cha.” Cuatjin vihndë me. <sup>24</sup> Hane casahmi jyë casahmi hnga me Nina cojo Hasen rë me ngatsë naha.

## 2

*Quiji tjengui Pablo apóstol xi yahnga*

<sup>1</sup> Hya xi camá ne, xi cavatju teñuju nu ne, cavúya ngahan nga ngu ndiya ngajan Jerusalén. Hacuaha Bernabé ne, quijitangun me cojo ná. Hacuaha cëjëcojo cha Tito. <sup>2</sup> Cëjë ta cuatjin cachja Nina. Hane xcun ngu junta xi camá cojo suvá xuta matitjun ne, cachjá cojo rë me hacutjin fi cjuandajyihí xi suá machaya rë xutaxín. Cuatjin casahme, tsëhë xi mijí ná xi xa xi tisahme o xi ha casahme ne, tu mahya ni. <sup>3</sup> Peru hisca cha Tito xi quitahátangun cha cojo ná ne, handasa xutaxín má cha ne, camaji cha nguyë xi xtí chuxin rë cha. <sup>4</sup> Ngujo cha ndacha xi chja cha xi ladu rë Jesucristu má cha ne, cavisehen tahahma cha ngajñi niji xi

scutsejen cha hacutjin xcusun nihi xi tjin ndaya ngayin ngatsë rë xi tjin tangun cjuatacun nihi cojo Jesucristu. Meje rë cha xi cuetihin nga yojo nihi cojo ley rë Moisés. <sup>5</sup> Peru ngayin ne, caningatiin rë cha hisca hitsë, cojo sa xi cjuandajyihî xi hatuxa cjuaquixi ne, chajin xi cuma nuju.

<sup>6</sup> Peru me xi chjahárcun rë sacuaaha xuta xi matitjun jan ne, (cuatjin chjá ta xa xi quitahá me jan ne, hisca cuendaain ná ta, Nina ne, texta ni vutsejen naja me ngayejen ni), me xi cuacun matitjun jan ne, cavesintaain me hisca ngu cjua tséhë cjuandajyihî xi chjá cojo xuta, tséhë xi ha tjin chihin. <sup>7</sup> Hacuaha cajnercu me xi Nina casua ná me xa xi cuichjá cjuandajyihî cojo xutaxín, sacuahatjin rë Pedru xi casatë rë me xi cuichja me cojo xuta tjë rë Israel. <sup>8</sup> Nina ne, me xi catsingatju rë Pedru xi cuma me apóstol ngajñî rë xuta tjë rë Israel ne, hacuaaha hacui ni me xi catsingatju ná xi cuma ngahan apóstol ngajñî rë xutaxín.

<sup>9</sup> Hane Jacobo cojo Pedru cojo Juan, me xi chjahárcun rë sacuaaha xuta xi matitjun ne, hya xi cuatjin cajnercu me xi Nina casua ná me cjuandaja jan ne, cafaha me ntsin, ngahan cojo Bernabé, hane cuatjin catsingacun me xi ngayin ne, tinihñitangun cojo rë me xa rë Nina. Hane camangu tacuín xi ngayin ne, nihñî xa ngajñî rë xutaxín, hane me xi cuacun jan ne, sahmi me xa ngajñî rë xuta tjë rë Israel. <sup>10</sup> Ngu tu tu ni xi cafehya nihi me ne, xi cuisecuin ngajñî rë cjuachaja rë xuta yuma xi hinchajñî ngajñî me. Sacuatjin xcusun vëhë ne, hatuxa jercu vejñá xi sahme.

#### *Cachjataha Pablo Pedru ngajan Antioquía*

<sup>11</sup> Peru hya xi quiji Pedru ngajan nandya Antioquía ne, cachjátáha rë me xcun cojo xcun ta, tséhë xi súv tsejen xi cuaain tjin xi tisahmi me. <sup>12</sup> Chaja sa xi cjeuhe ngujo cha xi catsingatju Jacobo ne, tijinë tangun Pedru niñu cojo xutaxín xi ladu naja. Peru tu ngu cafehe cha xi cuacun jan ne, cavetsihin cavejñaxin me xi jinë tangun me cojo xutaxín xi cuacun jan ta, tséhë xi tsacjun me yahnga xuta tjë rë Israel xi ladu naja xi meje rë xi xtí chuxin rë yëjë ni xuta xi visehen ladu rë Nina. <sup>13</sup> Hacuaha yëjë sa xuta tjë rë Israel xi siu ngajan ne, cavetsihin casahmi jo xcun jo hntsua me sacuatjin rë Pedru, hane hisca cojo Bernabé camatangun me cojo me xi cuacun jan cojo xcusun me xi casahmi me. <sup>14</sup> Peru hya xi cahvë xi xcusun xi tisahmi me ne, matanguaain cojo cjuaquixi xi vicuya naja cjuandajyihî ne, xcun yëjë ni xuta jan ne, cuitjin cachjá cojo rë Pedru: “Ngayun xi ngu xuta tjë rë Israel má ngayun ne, sa xi nihñu sacuaaha sahmi xutaxín, hacuiin sacuaaha sahmi xuta tjë rë Israel ne, ¿hacutjin meje nihñu ngu yëjë xi xutaxín jan ne, sahmi me sacuaaha nihña ngayaan xuta tjë rë Israel?”

#### *Xi mangu tacuun cojo Jesucristu ne, vetjuntje xuta, sa xuta tjë rë Israel o sa xutaxín*

<sup>15</sup> Ngayaan ne, hatuxa xuta tjë rë Israel má ngayaan, hacuiin xuta tsehen má ngayaan. <sup>16</sup> Handasa cuatjin ne, ha hyan xi ngu xuta ne, tsicjiin Nina jyë rë me ngatsë rë xi vihndë me tséhë ley rë Moisés ta súv ni ngatsë rë xi mangu cacun me cojo Jesucristu. Hane cojo ngayaan ne, hacuaaha camangu tacun cojo Jesucristu, cojo sa xi tsicjë Nina jyë naja ngatsë rë xi mangu tacun cojo rë Cristu, hacuiin ngatsë rë xi canuhyaan tséhë ley jan ta, tséhë xi tsajin camahani yo xi cjuë jyë rë ngatsë rë xi vihndë tséhë ley rë Moisés jan.

<sup>17</sup> Hya xi canihña tangun cjuatacun naja cojo Cristu cojo sa xi cjuë jyë naja ne, sa xi hya camatsejen xi hacuaaha ngayaan xuta tsehen yaan ne, ¿há vëhë vijne xi Cristu ne, casahmi me xi caxincha ngayaan ndiya rë cjuatsehen? ¡Jéya, hacuiin cuatjin vijne! <sup>18</sup> Sa xi cúa tsindaja nga xcusun xi ha catsinguétsun ne, ngajan matsejen xi xuta tsehen má ngahan. <sup>19</sup> Ngahan ne, xi cuma rë ley rë Moisés ne, sacuaaha xi cavéya, sacuaaha xi súv ley jan catsiquehen ná. Cuatjin camá cojo sa xi cuma ngahan tséhë Nina. Sacuaaha xi casetaha tangun ngahan xcun cru cojo Cristu. <sup>20</sup> Ngajan xi sacuaaha xi ha quihndë hacuiin cjuahñu naha xi tjin ná ta sacuaaha cjuahñu rë Cristu. Peru quihndë xi tjin ná cjuahñu cojo yojo naha ne, mangu cacún cojo Quihndi rë Nina, me xi catsihmu cacun ná hacuaaha casua me yojo rë me xi cueya ngatsë naha. <sup>21</sup> Hacuiin tsitjungë cjuandaja rë Nina. Sa xi cuma cjuë jyë rë xuta ngatsë rë xi vihndë me tséhë ley rë Moisés ne, ha tu mahya ni cahme Cristu.

### 3

#### *¿Há cojo ley o há cojo Jesucristu mangutacuun?*

<sup>1</sup> Ngayujun ni xuta Galacia ne, ¡jercu yuma hasen yun! ¿Há tjin yo cafehya cacun tsujun xi cuatjin ningatuhuntacún? Jercu tu ndaja camachaya nuju hacutjin xi cahme Jesucristu xcun cru. <sup>2</sup> Ngu tu tu ni cjua xi meje cuinengësë nuju ne: ¿Há cachjuhunntsun Hasen rë Nina ngatsë rë xi canihñu sacuatjin vitexa ley jan, o sa tsajin ne, há ngatsë rë xi camacajin nuju cjuandajyihî xi cavisiñuju? <sup>3</sup> ¿Há tuxa yuma hasen ngayun? Quihndë xi cavetsuhun cojo Hasen rë Nina ne, ¿há meje nihñuchuhun cojo ngahñu nuju suvun ni? <sup>4</sup> ¿Há tu mahya ni xi cuatjin cjin xcusun cavatjun ni? ¡Hatuxa hacuiin tu mahya! <sup>5</sup> Hya xi Nina sua nuju me Hasen rë me hacuaaha sahmi me cjuarcun ngajñî nuju ne, ¿mé má cuatjin casahmi me?

Hacuiin ngatsë rê xi nihñu sacuatjin vitexa ley ta, ngatsë rê xi macjain nuju cjuandajyihî xi visiñuju.

*Compromisu rê Nina cojo Abraham*

<sup>6</sup> Xcun xujun rê Nina ne, cuitjin camahindu: “Abraham ne, camangu cacun me cojo cja xi cachja Nina cojo rê me, hane ngatsë rê vëhë xi catsicjë Nina jyë rê me.” Cuatjin camahindu. <sup>7</sup> Ngajan xi meje rê xi cuijnercun xi xuta xi mangu cacun me cojo Nina ne, me vëhë jain xi quihndi rê Abraham me. <sup>8</sup> Xujun rê Nina jan ne, ha tjun sa vëë xi tsicjë Nina jyë rê xutaxin ngatsë rê xi camangu cacun xutaxin jan cojo rê me. Vëhë xi xcun xujun rê Nina ne, camahindu cja xi cuitjin cachja Nina cojo Abraham: “Ngatsë rijî ngaye ne, cumanchacuntihin yëjê ni xuta ngasunhdë.” <sup>9</sup> Ngajan xi yëjê ni xuta xi mangu cacun me cojo Nina ne, cumanchacun tangun me cojo Abraham, me xi hacuaha camangu cacun.

<sup>10</sup> Yëjê ni xuta xi mangu cacun me cojo ley rê Moisés ne, hatuxa cuatju me castigu, tsëhë xi xcun xujun rê Nina ne, cuitjin camahindu: “Nina ne, sahmi rê me castigu yëjê ni xuta xi vihndiin me tsëhë yëjê ni cja xi camahindu xcun xujun rê ley rê Moisés.” Cuatjin camahindu. <sup>11</sup> Ngajan xi suvâ tsejen xi xcun Nina ne, cjuin jyë rê hisca xi ngu xuta ngatsë rê xi cahndë me tsëhë ley jan, tsëhë xi xcun xujun rê Nina ne, cuitjin camahindu: “Xuta xi tsajin jyë rê me ngatsë rê xi mangu cacun me cojo Nina ne, sacû rê me cjuahñu xatsë.” Cuatjin camahindu. <sup>12</sup> Peru ley rê Moisés jan ne, cuendaain camahani rê xi mangu tacuun cojo Nina ta, xcun xujun rê Nina ne, cuitjin camahindu: “Xuta xi sahmi me sacuatjin vitexa ley ne, sacû rê me cjuahñu xatsë sa xi sahmi chihin me ley jan.” Cuatjin camahindu.

<sup>13</sup> Cristu ne, cavëhëndaya naja me tsëhë castigu xi vitexa ley jan, hya xi cavatju me castigu jan ngatsë naja. Camahindu nga cuitjin xcun xujun rê Nina: “Yëjê nima xi xtyangui tsëhë ngu ya ne, hatuxa cuatju me castigu rê Nina cuma.” Cuatjin camahindu. <sup>14</sup> Cristu ne, cuatjin cavëhëndaya naja me, cojo sa xi cjuaninchacuntihin xi cachja Nina xi sua me Abraham ne, hacuaha satë rê xutaxin ngatsë rê Jesucristu, hacuaha cojo sa xi ngatsë rê xi mangu tacuun cojo Jesucristu ne, sacû naja Hasen rê Nina xi cachja Nina xi sua me.

*¿Há ley o cja xi cachja Nina mangutacun?*

<sup>15</sup> Ngayujun ni ne, cuichjá cojo nuju ngu ejemplu xi ha ndaja hyan. Hya xi ha camachihin xujun tsëhë ngu compromisu ne, tsajin yo xi tsicjëya rê o sa cuesuntaha sa rê ngu cja. <sup>16</sup> Nina ne, cachja me cojo Abraham xi sua me cjuandaja rê me xi cuma rê Abraham cojo tjê rê me. Chjaain xujun rê Nina xi “yëjê tjê rê”, sacuaha xi jercu cjin xuta tichja tsëhë ta xi chja ne, “cojo tjê rijî”, sacuaha xi ngu ni xuta tichja tsëhë. Hane tjê vëhë ne, hacui Cristu. <sup>17</sup> Xi meje cuichjá ne, Nina ne, casahmi me ngu compromisu cojo Abraham titjun. Vëhë xi ley rê Moisés, xi cavejña Nina xi cavatju ñuju cientu cojo cantê nu ne, maji tsicjëya rê compromisu jan, maji tsinguetsun rê cja xi cachja Nina jan. <sup>18</sup> Sa xi sacû naja cjuandaja xi sua Nina ngatsë rê xi vinuhyan tsëhë ley rê Moisés ne, ngajan xi hacuiin ngatsë ni rê xi cuatjin cachja Nina xi sacû naja. Peru Nina ne, casua me cjuandaja jan Abraham ngatsë ni rê xi cuatjin cachja me titjun.

*Mé ngatsë rê xi tjin ley rê Moisés*

<sup>19</sup> Sa xi cuatjin ne, ¿mé machjirëhë ley rê Moisés? Xi camá ngascan ni, Nina casua me ley jan, cojo sa xi cumatsejen xi xuta ne, hatuxa vihndiin me cja xi vitexa Nina. Ley jan ne, cavitexa hisca xi cafehe tjê rê Abraham jan, me xi cachja Nina xi sacû rê cjuandaja. Hacuaha ley jan ne, casahmi entregadu ángel tsja Moisés, me xi cavëjña vasentjin ngajñi rê Nina cojo xuta. <sup>20</sup> Peru hindë ne, tsëhë cja rê Nina ne, mamiji sa ngu me xi vëjña vasentjin, ta ngu tu tu ni me ne, tifahacuenda me.

<sup>21</sup> ¿Há vëhë vijne xi ley rê Moisés ne, sahmi rê condra cja xi cachja Nina jan ni? ¡jéya, hacuiin cuatjin! ta, sa xi ley jan camá casua naja cjuahñu xatsë ne, ha cafë jyë naja ngatsë rê xi canuhyan tsëhë ley jan. <sup>22</sup> Peru xujun rê Nina ne, chja xi cjuatsehen vitexa rê yëjê ngarca ni, cojo sa xi xuta xi mangu cacun me cojo Jesucristu ne, cuma cjuahatsja me cjuandaja xi cachja Nina xi sua me.

<sup>23</sup> Peru chaja sa xi nduva nixtin xi camá camangu tacun cojo Jesucristu ne, ley jan ne, cavinchahñu naja sacuaha xi ndavaya cavinechanyaan, hisca nixtin xi casacu camachaya naja xi fë jyë naja ngatsë rê xi mangu tacuun cojo Jesucristu. <sup>24</sup> Cuatjin xi ley ne, cavitexa naja hisca xi canduva Cristu cojo sa xi cjuë jyë naja ngatsë rê xi mangu tacuun cojo Jesucristu. <sup>25</sup> Peru quihndë xi ha cafehe nixtin xi mangu tacuun cojo Jesucristu ne, ha quihndë vitexaain sa naja ley rê Moisés jan. <sup>26</sup> Cuatjin ta, tsëhë xi quihndë xi tjin tangun cjuatacun nuju cojo Jesucristu ne, ngayujun ni ne, quihndi rê Nina má ngayun ngatsë rê xi mangu tacun cojo rê me. <sup>27</sup> Ngayujun ni xi caxtenda ngayun xi nihñutangun cjuatacun nuju cojo Cristu ne, hacuaha cavisehen nuju cjuatacun rê me jan sacuaha xi cachujun ngu tsjan xatsë. <sup>28</sup> Ngajan xi cuendaain rê sa xi xuta tjê rê Israel o sa xi xutaxin ngayun, cuendaain

rè sa xi xuta caxteña o sa xi xuta tjin ndaya ngayun, cuendaain rè sa xi chjuun o sa xi xihin ngayun ta, tsèhè xi ngayujun ni ne, xi tjin tangun cjuatacun nuju cojo Jesucristu ne, ngu tangun ni cún yun xi cuma rè Nina. <sup>29</sup> Hane sa xi tsèhè Cristu má yun ne, ngajan xi hacuaha tjè rè Abraham má yun, hane satè nuju cjuandaja xi cachja Nina xi sua me.

#### 4

<sup>1</sup> Cuma cuinújan ne, sacuaha cha xi cjuahatsja cjuanchina rè xutacha rè ne, nguyèjè rè xi chúva nu rè cha ne, tangun cha cojo ngu mosu xi cachahá rè, handasa cjuaquixindaja xi cha vèhè má cha nai rè yèjè ni cjuanchina jan. <sup>2</sup> Tjin xuta xi sahmi rè cha cuidadu hacuaha fahacuenda me cjuacjintacun rè cha, hisca nixtin xi cachja nahmi rè cha xi cuatjin cuma cojo cha. <sup>3</sup> Cuanitjin ni naja ngayaan ta, hya xi cjualanga naja ne, hatuxa cavinuhyan tsèhè xitsehen xi vitexa rè ngasunhndè, sacuaha xi má ngayaan hndixahan xi cachahá rè. <sup>4</sup> Peru hya xi cavechútáha rè nixtin rè ne, Nina ne, catsingatju me Quihndi rè me, xi catsin sacuaha tsin ngayaan xuta ngasunhndè, hacuaha ley rè Moisés cavitexa rè jan. <sup>5</sup> Cuatjin catsingatju me, cojo sa xi Quihndi rè me jan ne, cuèhèndaya naja ngayejen ni xi cavitexa naja ley jan, hacuaha cojo sa xi cuma ngayaan quihndi rè Nina. <sup>6</sup> Cojo sa xi cumatsejen xi quihndi rè Nina má ngayun ne, Nina ne, caveya me Hasen rè Quihndi rè me cahntsua cjuatacun naja. Hane Hasen jan ne, cuitjin chja cojo Nina: “¡Papá, Nahmi naha!” <sup>7</sup> Vèhè xi ngayun ne, hindè hacuiin má ngayun mosu hndixahan xi caxteña ta quihndi rè Nina. Hane xi cuatjin quihndi rè me ngayun ne, Nina ne, sua nuju me yèjè ni xi satè rè quihndi rè me.

#### *Macjincacun Pablo tsèhè xuta Galacia*

<sup>8</sup> Hatsèè nixtin ne, hya xi chaja sa cumachaya nuju yo xi Nina ne, jemu cavetuhun yojo nuju cojo jemu cjin xcusun nina xi hatuxa hacuiin nina. <sup>9</sup> Peru quihndè xi ha camachaya nuju yo xi Nina ne, o cuma cuinújan ne, quihndè xi Nina ne, vutsejen nuju me cojo cjuandaja ne, ¿hacutjin nga meje cuyun cuisuhun cojo cjuahasen xi chúva ngahñu rè hacuaha yuma cojo cjuatacun rè ni? ¿Hacutjin nga meje cuetuhun yojo nuju cojo cjuahasen xi cuacun jan ni? <sup>10</sup> Jercu nihñu suhi. Tjin nixtin xi jercu chjuhunrcun, tjin suhi xi nihñu chuva sá o sa xi chuva nu. <sup>11</sup> Macjin cacún, sá tu xa xi casahme ngajñi nuju ne, tu mahya ni camá.

<sup>12</sup> Ngayujun ni ne, cjuéhya nuju favor ne, catama ngayun sacuaha ngahan ta, tsèhè xi ngahan ne, ha camá ngahan sacuaha ngayun. Tsajin mé xi choho canihñu cojo ná. <sup>13</sup> Hacuaha hyun xi titjun ne, casuá camachaya nuju tsèhè cjuandajyihí xi chja tsèhè Jesucristu ngatsè rè ngu chíhin xi yaha ná. <sup>14</sup> Peru handasa casuándya nuju cojo chíhin naha jan ne, ngayun ne, tsajin canitjungun ná hacuaha tsajin canihñuchuvun ná. Cahndè rè vèhè ne, cachjuhunntsun ná sacuaha xi ngu ángel xi catsingatju Nina má ngahan, o sacuaha xi suvá Jesucristu má ngahan. <sup>15</sup> ¿Mé camá cojo cjuandaja xi tjin nuju hatsèè ni? Ngahan ne, tsinguxè xi ngayun ne, hisca canaxun túxcun tuhun ná nixtin hya, sa xi camá canaxun. <sup>16</sup> ¿Há camá ngahan condra nuju ngatsè rè xi cachjá cojo nuju cjuaquixi?

<sup>17</sup> Tjin xuta xi jercu meje cuisecoo nuju me, peru hacuiin cojo cjuandaja ta xi meje rè me ne, xi cuaxèxin nuju mé tsahan, cojo sa xi ngayun ne, ninguisuhunñurcun cojo rè me. <sup>18</sup> Jercu ndatjin xi meje cuisecoon rè xingueen, hya xi cojo cjuandaja. Peru meje rè xi yèjè ni nixtin cuatjin nihña, hacuiin suvá ni hya xi teññataha cojo nuju. <sup>19</sup> Ngayujun ni tsan, jercu jyè cjuahmu xi tivátju nga tijima ngatsè nuju, sacuaha vatju ngu chjuun xi tsin quihndi rè me. Hacuaha cuatjin cjuendujó cojo cjuahmu vihi hisca xi cumatsejen xi jiya té Cristu ngajñi cjuatacun nuju hacuaha cuitexa me cjuatacun nuju tsèhè yèjè ni xcusun xi nihñu. <sup>20</sup> Jercu meje cuitèjña cojo nuju ndicumaha ni, cojo sa xi cuma tsindéya cjuavisiajmi naha cojo nuju ta, tsèhè xi jercu vitangè cacún tsujun.

#### *Ejemplu tsèhè Agar cojo Sara*

<sup>21</sup> Ngayujun ni xi meje nuju xi ley rè Moisés cuitexa nuju ne, tinújun cojo ná, ¿há cjèè cuinuhyun cjuarè ley jan? <sup>22</sup> Camahindu xi Abraham ne, jo xu camá quihndi rè me: ngu ne, tsèhè na mosu hndixahan xi sahmi xa rè chjuun rè me, hane xingu jan ne, tsèhè chjuun rè suvá me, na xi hacuiin hndixahan ta hatuxa xuta ndaya tjin. <sup>23</sup> Quihndi rè na mosu hndixahan jan ne, catsin sacuaha tsin yèjè ni langa; peru quihndi rè na ndaya jan ne, camá tsèhè cjuarcun rè Nina. <sup>24</sup> Cjuarè xi cuicun vi ne, sacuaha ngu ejemplu: jo chjuun jan ne, sacuaha jo compromisu má na. Ngu na ne, Agar hmí rè na, hane yèjè ni quihndi rè na ne, hatuxa hndixahan cachahá rè. Hane chjuun jan ne, sacuaha compromisu xi casahmi Nina cojo Moisés ngajan Naxi Siná. <sup>25</sup> Na Agar, na xi sacuaha Naxi Siná ngajan Arabia ne, sacuaha ngu ejemplu tsèhè nandya Jerusalén xi tacun quihndè. Hane yèjè ni xuta tsèhè Jerusalén vèhè ne, sacuaha hndixahan cachahá rè má me. <sup>26</sup> Peru yèjè ni xuta tsèhè Jerusalén xi tacun ngahnga ne, hatuxa ndaya tjin me. Hane ngayaan ne, quihndi rè nandya Jerusalén vèhè má ngayaan. <sup>27</sup> Cuitjin chja xujun rè Nina:

Catamasua ri ngaye chjuun xi maji sacu ri quihndi; chjindaye cjuasua, ngaye xi cjéë cuatji cjuahmu xi tsin ri quihndi. Tséhë xi ngaye xi cavixin cojo ra, hitsë sa cjín cuma ye cojo quihndi riji xi cuma ran xi fi vejña na cojo cha.

<sup>28</sup> Ngayujun ni ne, hacuaha quihndi rë Nina má ngayun, sacuatjin rë Isaac, ngatsë rë xi cuatjin cachja Nina. <sup>29</sup> Nixtin hya ne, cha xi catsin sacuaha tsin yëjë ni langa ne, catsujyihya tjengui cha cojo cjuahngatacun cha xi catsin ngatsë rë Hasen rë Nina. Quihndë ne, ha cuanitjin ni tijima. <sup>30</sup> Peru ¿mé chja xujun rë Nina? Cuitjin chja: “Naxendihye na mosu hndixahan jan cojo quihndi rë na ta, tséhë xi quihndi rë na hndixahan jan ne, hatuxa cumaji sacu tangun rë cjuanchina rë nahmi rë cojo quihndi rë na xi ndaya tjin.” Cuatjin chja xujun rë Nina. <sup>31</sup> Véhë xi ngayejen ni ne, hacuiin quihndi rë na mosu hndixahan má ngayaan ta quihndi rë na xi ndaya tjin.

## 5

*Meje rë xi cuanguenndujun xi tjin ndaya ngayaan*

<sup>1</sup> Cristu ne, cavéhëndaya naja me, cojo sa xi ndaya tjin ngayaan. Véhë xi tiyujunhñu cjuatacun nuju, xicaninguisunjñuu rcun nga cojo ngu xcusun xi sahmi xi cuyun nga ngayun sacuaha hndixahan.

<sup>2</sup> Nutsujun ni. Ngahan Pablo ne, cuichjá cojo nuju ta, sa xi xtí chuxin nuju sacuatjin xcusun rë xuta tjë rë Israel ne, Cristu ne, cumachjiriin nuju me. <sup>3</sup> Cúya cuichjá cojo nuju ta yëjë ni xihin xi cuatjin xtí chuxin rë ne, hatuxa tjin rë xi sahmi yëjë ni hacutjin chja ley rë Moisés. <sup>4</sup> Ngayun xi meje nuju xi cjuë jyë nuju ngatsë rë xi vinuhyun tséhë ley rë Moisés ne, hindë tsajin tjin tangun cjuatacun nuju cojo Cristu, hacuaha jemu cjín nechun tséhë cjuandaja rë Nina. <sup>5</sup> Peru ngayin ne, jercu vetihin tacuin xi tsicjë Nina jyë niji. Hacuaha jercu nechinyin xi cuatjin sahmi Nina ta, tséhë xi Hasen rë Nina ne, visecoo niji xi mangu tacuin cojo Jesucristu. <sup>6</sup> Hya xi tjin tangun cjuatacun naja cojo Jesucristu ne, venguin chji rë sa cati rë o sa xi catiin rë chuxin naja. Xi vengui chji rë ne, xi mangu tacuin cojo Jesucristu, hane ngatsë rë véhë ne, xi hacuaha tjin naja cjuahmutacun.

<sup>7</sup> Ngayun ne, ha jercu ndaja titsangun titjun. ¿Yo xi casuandya nuju xi mijí cuanguenndujun xi cuinuhyun tséhë cjuaquixi rë Nina? <sup>8</sup> Nina xi tsingatju: “Hitsë lihndi ni san rë pan ne, caa rë tsisatjen rë yëjë nahyu.” Cuatjin chja cju. <sup>10</sup> Macjiin cacun tsujun ta, ngatsë rë xi tjin tangun cjuatacun naja cojo Nai naja ne, xi má ná ne, ningatuhun tacuin sacuatjin tsingátaha cacún ngahan. Hane tu yo ni xi tisuandya nuju ne, cuatju castigu cuma.

<sup>11</sup> Sacuaha ngahan ne, sa xi quixi xi tichjá sa cojo xuta xi sahmi nguyjé xi xtí chuxin naja ne, ¿mé tséhë xi yahnga me ne, tsujyihyatjengui sa ná me cojo cjuahngatacun? Sa xi quixi xi cuatjin sahme sa ne, ngajan xi hya xi chjá cojo xuta tséhë hacutjin cahme Jesucristu xcun cru ne, tsajin cjuandya xi cuma rë yahnga xuta xi cuacun jan. <sup>12</sup> Jercu ndatjin sa xi xuta jan xi cuatjin tisuandya nuju me ne, catatëxin súv me yojo rë me ngu ndiya xa ni!

<sup>13</sup> Sacuaha ngayujun ni ne, catsingatju Nina cju nuju, cojo sa xi cumandaya ngayun. Peru hacuiin tu cuaain rë xi cavéhëndaya nuju Nina xi ningatuhun rë cjuatacun nuju yëjë ni xcusun tsehen xi vitexa nuju. Cahndë rë véhë ne, tisecon xingun ngatsë rë cjuahmutacun xi tjin ngajñi nuju. <sup>14</sup> Cuatjin nihñu ta, yëjë ni cju. xi vitexa ley rë Moisés ne, cumachihin hya xi nihña ngu ni cju. vihi: “Meje rë xi nihmu tacún xingun sacuatjin nihmu tacún svunvun yojo nuju.” <sup>15</sup> Peru sa xi choho nihñu cojo xingun sacuatjin sahmi chu xi cjan rë xi jinëxcuen xicjin chu ne, nechun cuidadu, sá tu nicjuyun cjuandaja xi tjin ngajñi nuju.

*Hacutjin sahmi Hasen rë Nina, hacuaha hacutjin sahmi cjuatacun tsehen naja*

<sup>16</sup> Nutsujun ni. Tuhun cahndë xi Hasen rë Nina ne, cuitexa rë cjuatacun nuju. Hane xi cuatjin ne, hatuxa nihñuu yëjë ni xi fehya cjuatacun tsehen nuju. <sup>17</sup> Cjuatacun tsehen naja ne, sahmi condra cojo Hasen rë Nina, hacuaha Hasen rë Nina ne, sahmi condra cojo cjuatacun tsehen naja. Catsijo ni vihi ne, sahmi condra cojo xicjin. Ngajan xi ngayujun ni ne, maji nihñu tu mé ni xcusun xi meje nihñu. <sup>18</sup> Sa xi Hasen rë Nina vitexa rë cjuatacun nuju ne, ngajan xi cuitexaain nuju ley rë Moisés.

<sup>19</sup> Quihndë ne, ha ndaja ni hyan xcusun tsehen xi nihña hya xi vitexa naja cjuatacun tsehen naja. Nihña cjuatsehen xi sahmi ngu xuta cojo ngu xi hacuiin chjuun rë me, hacuiin xihin rë me, o sa xi ngajñi ni xihin me, o ngajñi ni chjuun me, o tu mé sa xcusun cjuatsehen jan. <sup>20</sup> Chjahanrcun nina ndyojo, hacuaha nihña cjuasurqui. Choho hyaan xingueen, nihña si ngajñi naja cojo xingueen, hacuaha tjin naja cjuachini. Jercu ma cjan naja, jercu hnga tacun, jercu chicjan cojo xingueen, ngujo yaan ne, naxenxeen yojo naja tséhë xingueen. <sup>21</sup> Jercu tjin naja cjuaxin, jercu xuta chihi má ngayaan, jercu maxti nuju ngayaan hya xi nihñu ngu suhi, cojo jercu cjín sa xcusun véhë xi nihña. Cojo tjun sa ne, cuichjá cojo nuju

sacuatjin xi ha cachjá cojo nuju ta xuta xi sahmi me sacuahatjin rë xcusun vëhë ne, sатиin rë me xi cuisehen me hiscan xi sahmi Nina gubiernu.

<sup>22</sup> Peru hya xi Hasen rë Nina vincha cjuandaja ngajñi rë cjuatacun naja ne, jercu tjin naja cjuahmutacun, tjin naja cjuasua, tjin naja cjuajeya, yehe tacun, tjin naja cjuandaja, cuma cumangu cacun xuta cojo naja, <sup>23</sup> jeya ngayaan, caa naja xi hacuiin ningatehen rë cjuatacun tsehen naja cojo xcusun xi fehya xi nihña. Sacuaha yëjë ni cjuandaja vëhë ne, tsajin camahani ley xi vitexa xi cumaji nihña. <sup>24</sup> Hane yëjë ni xuta ladu rë Jesucristu ne, ha caviyujuxin me cjuatacun tsehen rë me cojo yëjë ni xcusun tsehen xi fehya rë me xi sahmi me. <sup>25</sup> Sa xi Hasen rë Nina casua naja cjuahña xatsë ne, meje rë xi hacuaha ningatehen xi Hasen jan cuitexa rë cjuatacun naja.

<sup>26</sup> Mijí rë xi xta ngayaan, mijí rë xi si rcun, mijí rë xi tjin naja cjuaxin cojo xingueen.

## 6

### *Meje rë xi cuisecoon xingueen*

<sup>1</sup> Ngayujun ni ne, sa xi yo sacutsja rë ngu xuta xi tisahmi me cjuatsehen ne, ngayun xi ningatuhun xi vitexa Hasen rë Nina cjuatacun nuju ne, meje rë xi cuisecon rë me xi cuya ndaja me, peru tisecon rë me cojo yëjë ni cjuandaja cjuajeya. Hacuaha meje rë xi tjin nuju cuidadu, sá tu cojo ngayun cuinengunyun ngajñi rë cjuatsehen. <sup>2</sup> Tisecon xingun cojo sa xi scaa nuju cojo cjuacjintacun xi quichuhun xingu xingu ngayun. Hane xi cuatjin nihña ne, ngajan xi machihin ley xi cavicuya naja Cristu. <sup>3</sup> Sa xi yo sahmi jyë jojo rë handasa tsajin mé vechú ne, vindacha suvá jojo rë. <sup>4</sup> Xingu xingu ngayaan ne, meje rë xi nichuvan suvaan jojo naja cojo xcusun naja. Xi cuatjin nihña ne, cumasua naja cojo xcusun ndaja xi canihña suvaan, hisca sahmi ngayë xi nutsejen xcusun xi sahmi xingueen. <sup>5</sup> Xingu xingu ngayaan ne, tjin naja xi chaan cjuacjintacun naja suvaan.

<sup>6</sup> Xuta xi vutaya cjuandajiyi xi chja tsëhë Jesucristu ne, hacuaha meje rë xi cuisecon me xuta xi tivicuya rë me jan cojo yëjë ni xcusun ndaja xi tjin rë me.

<sup>7</sup> Xicavindachuun suvun rë jojo nuju ta Nina ne, cumaji cumandacha me. Xcusun xi nitjen ne, ha vëhë ni sacú naja. <sup>8</sup> Xuta xi fi tjengui me ndiya rë cjuatacun tsehen xi fehya jojo rë me ne, cuechú nixtin xi sacú chjí rë me xi jojo rë me jan ne, cjuendu. Peru xuta xi fi tjengui me ndiya rë Hasen rë Nina ne, cuechú nixtin xi sacú chjí rë me xi Hasen rë Nina ne, sua rë me cjuahña xatsë. <sup>9</sup> Sacuaha ngayaan ne, mijí rë xi nihñachuvan ngajñi rë yëjë ni cjuandaja xi tihñña ta, tsëhë xi hya xi cuechú jain nixtin rë ne, sacú chjí naja, sa xi scaa naja. <sup>10</sup> Vëhë xi ngayëjë rë xi tjin sa nixtin ne, ha tuxa meje rë xi nihña cjuandaja cojo yëjë ni me xi sacuaha xingueen tsëhë xi hacuaha mangucacun me cojo Jesucristu. Hacuaha meje rë xi nihña cjuandaja cojo ngayëjë ni xuta.

### *Sua Pablo conseju, hacuaha sua me Nina rë me cojo xuta Galacia*

<sup>11</sup> Ngayujun ni ne, ¡nutsujun letra yehe vihi xi titsihindu nuju cojo hntsa suva! <sup>12</sup> Xuta xi meje rë me xi ndaja cuichja xuta tsëhë me ne, me vëhë xi meje sahmi nuju me ngayëjë xi xti chuxin nuju. Cuatjin sahmi me, cojo sa xi tsajin cuatju me cjuañihi ngatsë rë xi chja me tsëhë cru rë Cristu. <sup>13</sup> Hisca me xi ti chuxin rë ne, vihndiin me tsëhë ley rë Moisés. Peru meje rë me xi xti chuxin nuju, cojo sa xi cuaxëndaja me jojo rë me xi cuatjin camá cojo nuju. <sup>14</sup> Peru sacuaha ngahan ne, ngatsë ni rë cru rë Nai naja Jesucristu xi cuaxëndaja jojo naha. Cuatjin sahme, tsëhë xi ngatsë rë cru rë Cristu jan ne, sacuaha xi cahme ngasunhndë xi cuma ná ngahan, hacuaha ngahan ne, sacuaha xi cavéya xi cuma rë ngasunhndë. <sup>15</sup> Tsajin mé vengui chjí rë xi cati o xi catiin rë chuxin naja ta xi vengui chjí rë ne, xi cuma ngayaan xuta xatsë. <sup>16</sup> Ngayujun ni xi tsangunduyun cojo cjuatacun xi sehe cachjá cojo nuju jan ne, Nina catisua nuju me cjuajeya cojo cjuayumatacun. Hacuaha cojo yëjë sa me xi má xuta ladu rë Nina ne, cuatjin catisua Nina me.

<sup>17</sup> Nchujun ni nguini ne, mijí ná xi yo sua sa ná cjuandya ta, tsëhë xi yëjë yanda xi yaha jojo naha ne, vëhë tsingacun xi sahme xa rë Jesús sacuaha mosu hndixahan rë me.

<sup>18</sup> Nai naja Jesucristu ne, catisua nuju me cjuandaja ngayujun ni. Cuatjin jain.

## Carta xi catsingatju San Pablo tsëhë xuta nandya Efeso

### *Pablo tshindu me xuta rë yungun*

<sup>1</sup> Ngahan Pablo ne, apóstol tsëhë Jesucristu ngahan ta, tsëhë xi cuatjin camameje rë Nina. Tsingátju nuju carta vihi ngayun xuta nandya Efeso, ngayujun ni xuta ladu rë Nina xi jercu ndaja titsangunndujun cojo ndiya rë me. <sup>2</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya rë me xi cuma nuju.

### *Ximinchacun xi cachjahantsan tsëhë Cristu*

<sup>3</sup> <sup>1</sup>Nina ne, me vëhë xi Nina rë hacuaha nahmi rë Jesucristu me xi matitjun tsajan, jemu jyë hnga camahani me cojo hasen rë me! Me vëhë ne, ngatsë rë xi tsëhë Cristu ngayaan ne, catsinchacun naja me cojo yëjë ni xcusun cjuandaja xi siu tsja me. <sup>4</sup> Nihña jyë hnga Nina cojo hasen rë me ta hisca hya xi chajasa casahasen ngasunhndë ne, hya cavaxijin naja Nina ngatsë rë xi tsëhë Cristu ngayaan, hane ngatsë rë xi casahmi tsëhë me ngayaan ne, camatyjahi cjuatacun naja hacuaha tsajin xi cún naja. Hacuaha Nina cojo cjuahmutacun xi tjin rë me cojo naja ne, <sup>5</sup> vëhë xi ha tjin chjine rë me cjuatacun xi ngatsë rë mé xi casahmi Jesucristu ne, ngayaan ne, quihndi ndaja jain rë me má ngayaan. Cuatjin tjin cacun me xi cumá, cuatjin cavejñacacun me. <sup>6</sup> Cuatjin nihña jyë hnga me cojo hasen rë me tsëhë cjuandaja rë me. Jemu cavincha naja me cjuandaja ngatsë rë xi ngayaan ne, tsëhë Cristu yaan; hane Nina ne, hmucacun me Cristu. <sup>7</sup> Cojo jni rë Cristu xi cavanga hya xi cahme me, vëhë machji rë xi camandaya yaan tsëhë castigu xi satë naja, cavaxëtje rë cjuatsehen xi canihña, tucu cjuahmucacun rë me xi jercu jyë camahani. <sup>8</sup> Tjercu tu ndaja casahmi me cjuandaja cojo naja xi cavuxaha ndaja me cjuatacun naja xi vijnercun cjuarë me ta, <sup>9</sup> casua camachaya naja tsëhë cjuatahahma xi tjin cacun me xi cumá, tsëhë cjuatacun xi cavejñangucacun suva me xi cumachihin. <sup>10</sup> Cjuatahahma vë ne, cumachihin hya xi cuetjucaa xi cuechu nixtin rë. Hya ne, Nina sahmitangun me ngu nguyëjë ni ngahma Cristu, me xi matitjun rë. Sahmitangun me yëjë xi siu ngahnga hacuaha yëjë xi siu nangui, hane sacuaha ngu ni cjuatacun cuma.

<sup>11</sup> Hacuaha ngatsë rë xi tsëhë Cristu ngayaan ne, Nina cavaxijin niji xi satë niji hitsë tsëhë mé xi satë rë Cristu ta, Nina sahmicihin me yëjë ni mé xi sua má rë me sacuahatjin ha cavejñacacun me xi cumá. <sup>12</sup> Cuatjin casahmi me cojo sa xi ngayin xuta tjë rë Israel xi tjun tjun cavinechinyin rë xi nduva Cristu ne, nihña jyë hnga Nina cojo hasen rë me ngajñi rë yëjë ni mé xi nihña. <sup>13</sup> Hacuaha ngayun ni, hya xi canuhyun rë cjuaquixi cjuandajiyi xi chja hacutjin cuma cuetjuntjun tsëhë jyë nuju ne, camatangun cjuatacun nuju cojo Cristu. Hane sacuaha xi setaha sellu ngu xujun rë nangui xi tsejen xi quixi xi tsëhë me, cuatjin caveya Nina Hasen rë me sacuaha cavejña me cjuarë me cojo sa xi tsejen xi tsëhë me yun. <sup>14</sup> Hane tsëhë xi hinchaja naja Hasen rë Nina ne, vëhë tsinguixi rë xi chjahanntsant yëjë xi cavejñacacun Nina xi cumá tsajan, tsinguixi rë xi sahmi ndaya me yaan tsëhë jyë naja, hane ngatsë rë vëhë ne, me vëhë cuma jyë hnga sa me cojo hasen rë me.

### *Pablo ne, fehya me Nina xi scuxaha me cjuatacun rë xuta xi ndaja macjain rë me Jesucristu*

<sup>15</sup> Hindë ta cuatjin catsinchacun Nina yaan ne, vëhë xi ngahan, hisca xi camachaya ná xi naxunndujun Jesucristu hane xi tjin nuju cjuahmutacun cojo yëjë ni xuta xi tsëhë Nina me, <sup>16</sup> suá cuaha nacuechji rë Nina ngatsë nuju. Hane yëjë ni hora xi tisahme oración naha, veyanangë nuju, chjayuma ngatsë nuju. <sup>17</sup> Féhya rë Nina rë Nai naja Jesucristu, Nina Nahmi naja xi jemu hnga me cojo hasen rë me. Féhya rë me xi sua me yun cjuatacun rë Hasen rë me cojo sa xi cuijnercun mé xi tsëhë me hane xi hitsë sa ndaja chun yo me. <sup>18</sup> Féhya rë Nina xi scuxaha me cjuatacun nuju cojo sa xi cumachaya nuju tsëhë xcusun vëhë xi vetahan tacun ngatsë rë xi cavaxijin naja Nina. Xi machaya nuju xi jercu vatjutaha ndajiyi cjuatjo rë me xi cuatëcja me ngajñi xuta ladu rë me. <sup>19</sup> Hacuaha xi machaya nuju ta ngahñu rë me ne, tsajin chuva rë ne, hane tacunntsaan. Hacuaha ngahñu jan catsingacun me ta jemu hñu cjuarë. <sup>20</sup> Catsingacun me chuva rë ngahñu jan hya xi catsicuya me cjuahñu rë Cristu tsëhë cjuaveya hane hacuaha hya xi casahmi jyë hnga me Cristu xi cavejña me cahndë ladu quixi rë me ngajan ngahnga. <sup>21</sup> Jercu hñu camahani cjuarë Jesucristu xi cumá rë yëjë ni hasen, yëjë ni ángel, yëjë ni rey hasen xi hacuaha vitexa ngajan sa xi nixtin quihndë o sa xi nixtin xi nduva ngascan. Hacuaha hitsë sa jyë hnga ñihi rë xa xi tacuntsja me. <sup>22</sup> Hacuaha yëjë xcusun xi siu, Nina ne, caviyuju me ngahma gobiernu rë Cristu. Hacuaha ha Cristu nga ni, casua me xi cumá titjun me tsëhë yëjë ni xuta rë yungun hane vitexa me xuta ladu rë Nina sacuatjin rë rcuun xi vitexa rë yojo naja. <sup>23</sup> Hane sacuaha vitsojo cjuatacun rë rcuun ngajñi yëjë yojo naja ne, cuatjin vitsojo Cristu ngajñi rë jinguyëjë ni xuta yungun, hane cojo Cristu ne, majingu jinguyëjë ni xcusun.



## 2

*Ngatsë rë xi hmucacun naja Nina ne, cavaxëtje naja me*

<sup>1</sup> Hacuaha ngayun ne, catsingasca Nina cjuatacun nuju ta, titjun ne, camá ngayun sacuaaha xi caveyan xi cuma rë Nina ngatsë rë xi canuhyuun tséhë Nina hane canihñu cjuatsehen. <sup>2</sup> Cavanguntengun cjuatsehen sacuaaha xcusun rë xuta tsehen rë ngasunhdë. Canuhyun tséhë rey xi hacui hasen tsehen xi vitexa rë yahnga hasen tsehen ngajan ngahnga, rey jan xi vitexa rë xuta xi vihndiin me tséhë Nina. <sup>3</sup> Hacuaha ngayëjë ni ngayaan ni, cuatjin xcusun naja hatsëë. Canihña yëjë cjuatsehen xi cafehya rë yojo jyë naja, xi masua rë xahasen naja. Tséhë xi hatuxa xuta tsehen yaan, ngatsë rë vëhë ne, tacunya castigu xi cuma naja sacuaaha yëjë sa yahnga xuta. <sup>4</sup> Peru Nina ne, tjercu tu tjin rë me cjuayumatacun ngatsë rë xi jemu tu jyih camahani cjuahmutacun xi tjin rë me cojo naja. <sup>5</sup> Hane handasa xi camá sacuaaha xi caveyan ngayaan xi cuma rë Nina ta canuhyaan tséhë me, peru hindë ne, sacuaaha xi casacu naja cjuahñu xatsë tangun cojo Cristu. (Cjuanijyutacun rë Nina ne, vëhë casahmi xi cavaxëtje nuju me tséhë cjuatsehen xi canihñu.) <sup>6</sup> Hacuaha sacuaaha catsucuya nga naja Nina cjuahñu tangun cojo Cristu hane casahmi jyë hnga me yaan xi cavejña me yaan cojo Cristu ngajan ngahnga ngatsë rë xi tséhë Jesucristu yaan. <sup>7</sup> Cuatjin casahmi me cojo sa xi hisca nixtin xi sehe nduva ne, cumatsejen xi jercu vatjutaha cjuanijyëtacun xi tjin rë me cojo naja, cjuanijyëtacun vë xi matsejen ngajñi rë cjuahmutacun xi tsingacun me yaan ngatsë rë Jesucristu. <sup>8</sup> Cuatjin jan ne, cjuanijyëtacun rë Nina ne, vëhë casahmi xi cavaxëtje nuju me tséhë jyë nuju hya xi camacjain nuju ta, hacuiin suvun cavinchunsum chuva rë xi cavetjuntjun ta tséhë xi Nina ne, tu cuatjo ni casua nuju me cahndë. <sup>9</sup> Hacuiin tséhë xi canihñu suvun xi jemu ndaja xi cavëchuntuhun xcusun vë ne, ngatsë rë vëhë ne, hisca ngu xuta cumaji sahmi jyë me yojo rë me. <sup>10</sup> Ta sacuaajyih ngayaan ne, Nina casahmi naja me. Hane ngatsë rë xi tséhë Jesucristu yaan, vëhë xi catsindaja me ngayaan cojo sa xi ndaja nihña, sacuatjin xi ha cojo tjun sa cavejñacacun me xi má xcusun naja.

*Ngatsë rë jni rë Cristu ne, ma vetjutje xutaxín*

<sup>11</sup> Ngajan xi ninguitsjun ta, ngayun ne, xutaxín yun ta hacuiin tséhë xuta tjë rë Israel catsin ngayun. Hacuaha xuta tjë rë Israel jan ta casahmi suva me sacuaaha vitexa ley rë Moisés, me vëhë chja me tsujun ta, xuta xi catiin rë chuxin rë; hane chja me suva me ta, xuta xi cati rë chuxin rë. <sup>12</sup> Hacuaha hya ne, hisca tsajin quitahatacun xi sacuse nuju Cristu. Casatiin nuju cahndë cojo xuta tjë rë Israel hacuaaha casatiin nuju compromisu xi vetaha cacun me. Jemu va cavinechun cojo ngasunhdë nuju ta hacuiin vinga nuju Nina xi cjuaquixi. <sup>13</sup> Peru quihndë xi camá tséhë Cristu yun, handasa xi hya jemu xin nechun xi cuma rë Nina, peru hindë casacu cahndë camatiña yun ngatsë rë jni rë Cristu xi cavanga hya xi cahme me. <sup>14</sup> Ta Cristu ne, me vëhë casahmi me xi cavisehen naja ngayëjë ni cjuandaja cjuajeya. Hane xi cuatjin casahmi me ne, sa xuta tjë rë Israel yaan o sa xutaxín yaan, sacuaaha ngu ni xuta má ngayaan. Ta hya xi cahme me, caphaxin me cjuachan xi vetsuntaha naja. <sup>15</sup> Catsicjë me ngahñu rë ley rë Moisés cojo yëjë ni cjuaxi vitexa jan. Hane cuatjin ne, tséhë catsijo tjë rë xuta jan ne, tsajin sa cjuachan ta casahmitangun Cristu me xi sacuaaha ngu ni xuta má me xi tséhë me suva me. Cuatjin cavisehen me cjuandaja tséhë xcusun xi cavetsutaha rë me titjun. <sup>16</sup> Hacuaha cuatjin casahmitangun me catsijo tjë jan xi cumá ngu ni hane tangun catsindajacacun me me jan cojo Nina ngatsë rë xi cahme me xcun cru. Hane cuatjin cavatëcja me cjuachan xi tjin ngajñi rë me jan.

<sup>17</sup> Cuatjin camá xi canduva Jesucristu cachja me cjuandajyih tséhë cjuajeya cojo nuju ngayun xutaxín xi xín nechun xi cuma rë Nina, hacuaaha cojo xuta nangui Israel xi tiña siu me xi cuma rë Nina. <sup>18</sup> Vëhë xi ngatsë rë mé xi casahmi Cristu hane cojo ngu ni Hasen rë Nina ne, xingu xingu ngayaan ne tjin naja cahndë cojo Nina Nahmi naja. <sup>19</sup> Vëhë xi ngayun ne, hindë hacuiin xutaxín yun hacuiin xín tujyuhunyun ni xi cumá rë xuta rë Nina ta hindë ne, sacuaaha camá ngu nangui nuju ngayujun ni hacuaaha cojo rë me ne xuta rë Nina má ngayun. <sup>20</sup> Cojo rë me ne, ngayun ne tangun ngayun sacuaaha xihndë rë ngu yungun xi sehe tjuniñga rë. Xihndënaña rë ne, vëhë casahmi apóstol cojo profeta hya xi cachja me cjua rë Nina. Hane Jesucristu ne, me vëhë má me ndoyojo xi matitjun xi vejña yuju rë, <sup>21</sup> ta sacuaaha ndoyojo jan vaniji hai rë ndihya xi ndaja hñu cuejña xihndë rë xi cuijin, hacuaaha ngatsë rë Jesucristu sacuaaha ndaja setahacoo ngu xihndë ne, cuatjin vetahacoo Jesucristu xuta rë yungun hya xi scunihnga me xi cuma me sacuaaha ngu yungun quicun xi camanchacun tséhë me. <sup>22</sup> Hacuaha cuanitjin ngayun ne, cavinchajñi me yun sehe cojo yun cumá ngayun sacuaaha yungun quicun jan rë Nina hiscan cuejña me.

## 3

*Cjua tséhë xa xi sahmi Pablo ngajñi rë xutaxín*

<sup>1</sup> Cuatjin camá xi ngahan Pablo ne, tejñaya ndavaya ngatsë rë xa rë Jesucristu, xa jan xi sahme ngajñi nuju xutaxín. <sup>2</sup> Cuejña ni xi há machaya nuju tsëhë cjuanjyëtacun xi Nina cavincha ná me xi satë ná sahme xa ngatsë nuju ta, <sup>3</sup> Nina casua me camachaya ná tsëhë cjuatacun hma jan sacuaa xi ha catsíhíndu nuju hitsë tsëhë. <sup>4</sup> Hane xi chutahayun tsëhë ne, mangutacun xi ngahan ne vijnercu cjuatahahma jan xi sahmichihin Jesucristu. <sup>5</sup> Cjuatacun jan ne, hatsëë nixtin tsajin yo camachaya rë tsëhë. Peru hindë ne, cojo Hasen rë me catsingacun me tsëhë xi cumachaya rë apóstol cojo profeta xi cavaxijin me. <sup>6</sup> Cjuatacun hma jan ne, cuatjin fi: Camá xi cojo cjuandajyihí rë Nina ne, xutaxín ne, fahatsja tangun me cuatjo rë Nina cojo xuta tjë rë Israel, hacuaa cojo me ngu xuta má me. Hacuaa ngatsë rë xi tsëhë Jesucristu me ne, hacuaa satë rë me compromisu xi vetahacacun xuta tjë rë Israel.

<sup>7</sup> Sacuaa cjuatahahma vëhë ne, casatë ná ngahan xi sahme xa xi cuichja tsëhë. Cuatjin casatë ná ngatsë rë cjuanjyëtacun xi casua Nina ngahan xi cojo ngahñu rë me cuma. <sup>8</sup> Ngahan ne, handasa tsajin chuva rë xi ngahan sahme xi cuma rë xi sahmi tu yo sa yahnga xuta tsëhë Nina, peru casua ná Nina cjuanjyëtacun xi satë ná xa xi cuichjá cojo xutaxín xi cumachaya rë me tsëhë cjuanchina ndajyihí rë Cristu xi tsajin cojo chuva rë. <sup>9</sup> Hacuaa cavetahaxa ná Nina xi scuxáha cjuatacun rë xuta cojo sa xi cumachaya rë me cjuatacun hma jan. Nina, xi casahmi me yëjë ni ne, hisca ntsacu cavetsihin cavejñacacun hma me xi cuatjin cumá. <sup>10</sup> Cuatjin camá cojo sa xi nixtin quihndë ne, ngajñi xuta yungun rë Nina ne, tsingacun rë cjuahasen rë Nina, cojo sa xi yëjë ni hasen, yëjë ni ángel xi hacuaa vitexa ngajan ngahnga, machaya rë xi jemu cjín xcusun rë cjuahasen jan ta, <sup>11</sup> cjuatacun jan ne, hisca ntsacu cavetsihin cuatjin cavejñacacun me, hane casahmichihin me cojo Cristu Jesús, me xi matitjun tsajan. <sup>12</sup> Hacuaa ngatsë rë xi tsëhë Cristu yaan hane ngatsë rë xi mangutacun cojo me ne, rcuun nihña tiña tsëhë Nina cuinújan cojo me ta, tjin ngutacun xi sacu naja cahndé. <sup>13</sup> Vëhë xi cojo cjuatacun vëhë ne, cuichjá cojo nuju ta hacuini nihñuchuvuntacun ngatsë naha ngahan xi choho tivatju tijima tsëhë xa xi sahme ngatsë nuju, ta ngajñi rë xi cuatjin tivatju ngahan ne, hitsë sa tivaxëndaja nuju.

#### *Cjuahmutacun xi tjin rë Nina*

<sup>14</sup> Cuatjin camá xi ngatsë rë vëhë ne, vixcuhnchëtaha xcun Nina nahmi rë Jesucristu me xi matitjun tsajan. <sup>15</sup> Yëjë ni tjë rë xuta o sa ángel, sa ngahnga o sa ngasunhndë viyuju me ne, faha ñihi me tsëhë Nina sacuaa tsëhë Nahmi rë me. <sup>16</sup> Nina Nahmi naja ne, tjemu tjin rë me ngahñu xi casahmi hnga hasen me ngajan ngahnga. Chjáhya rë me xi tucu chuva rë yëjë cjuandaja rë me jan ne, sua nuju me xi cuiyujuhñu xahasen nuju cojo ngahñu rë Hasen rë me. <sup>17</sup> Hane ngatsë rë xi cuatjin macjain nuju Cristu ne, hacuaa cuejña cahndé me cahntsua xahasen nuju. Hane cjuahmutacun xi hincha nuju ne, cuma sacuaa ngu tyjama xi sua nuju ngahñu hane tsuvanguí nuju, <sup>18</sup> cojo sa xi hacuaa cuijnercunndujun ngayun cojo yëjë yahnga xuta xi macjain rë me, ta tsajin hisca cjuë ta jemu tu jyë hnga cjuahmutacun xi tjin rë Cristu cojo naja. <sup>19</sup> Hacuaa cjuëhyá xi sacuse nuju cjuahmutacun xi tjin rë Cristu cojo nuju, ngu cjuahmutacun xi jercu vatjutaha rë hisca tsajin chuva rë xi hatuxa hyan, cojo sa xi ma tsë rë cjuatacun nuju suva cojo yëjë ni xi tsëhë Nina.

<sup>20</sup> Quihndë ne, catama jyë catama hnga Nina. Me vëhë cojo ngahñu rë me xi sahmixa ngajñi naja ne, hitsë sa cjín cuma sahmi me tsëhë xi cuma chjahyan o sa xi matacun xi ma sahmi me. <sup>21</sup> Catama jyë catama hnga me ngajñi xuta yungun rë me hacuaa ngajñi Jesucristu; catama jyë catama hnga me yëjë ni nu yëjë ni nixtin. Cuatjin jain.

## 4

#### *Tjin tangun yaan ngatsë rë Hasen rë Nina*

<sup>1</sup> Ngatsë rë vëhë ne, ngahan xi tejñaya ndavaya ngatsë rë xa xi sahme tsëhë Nina, ngahan fehya nuju xi tangun nduju cojo ngasunhndë nuju sacuaa meje rë xi sahmi me xi cavaxijin Nina, sacuahatjin ngayun xi catuxijin nuju. <sup>2</sup> Tjin nuju cjuajeya hacuaa ninguijnu yojo nuju cojo xingun. Hacuaa jyëtacun xingu xingu yun cojo xingun ngatsë rë cjuahmutacun xi tjin nuju. <sup>3</sup> Nihñu ngujoyë xi yëjë nixtin tjin tangun yun, cojo ngahñu rë cjuajeya xi sua Hasen rë Nina xi sahmi tangun nuju ngayun ngayujun ni. <sup>4</sup> Ngayaan ne, ngu ni yojo má yaan, hacuaa ngu ni má Hasen rë Nina. Hacuaa cuanitjin ne, ngu ni cjuaxi cuetaha tacun xi sacu naja cjuahñu xatsë, ngayaan xi cajindaya naja me. <sup>5</sup> Hacuaa ngu ni Jesucristu xi Nai naja, ngu ni cjuachacun xi macjain naja, hacuaa ngu cjuatacun ni xi xtenda yaan. <sup>6</sup> Ngu ni Nina Nahmi naja ngayeyen ni. Hane Nina ne, matitjun me tsëhë ngayëjë ngarca ni ne, tsinguitsojo me jinguijyë ni ngajñi yojo naja, hacuaa tacun me ngajñi naja.

<sup>7</sup> Peru jimangu yaan ne, ha casua naja me cuatjo cjuatacun xi satë naja xa xi nihña jimangu yaan, sacuaa chuva rë xi casua Cristu. <sup>8</sup> Vëhë xi xujun rë Nina chja cuitjin:

Hya xi camiji me ngahnga, hacuaha quiji cojo me xuta presu xi cafaha me.

Hane casua me cjuatjo xi cafhatsja xuta rë me.

<sup>9</sup> ¿Hane mé vijne cjua xi camiji me? Cjua vëhé ne, vijne xi titjun ne cajne me hiscan xi hitsë sa nangui tsëhé ngasunhdë. <sup>10</sup> Hane xi cajne jan ne, hacui ni me xi hacuaha camiji hiscan xi hitsë sa hnga tsëhé ngahnga, cojo sa xi jinguyë ni cueña cahndë me. <sup>11</sup> Ha me vëhé ni casua me cjuatjo cjuatacun xingu xingu. Casua me xi yahnga me ne, cumá me apóstol, yahnga me ne xi sua me xi cumachaya rë xuta cjua xi cafhatsja me tsëhé Nina, hane yahnga nga me ne, cuichja me cojo xuta tsëhé cjua xi cuaxëtje naja, hane yahnga nga me ne, pastor xi vicuya. <sup>12</sup> Cuatjin cavëhëchjine me xuta rë me jan cojo sa xi xa xi sahmi me jan ne, cuisecoo rë xuta yungun xi sacu hñu rë me. <sup>13</sup> Hisca xi ngayejen ni ne, cuma tangun yaan cojo ngu ni cjuachacun xi macjain naja hacuaha cojo yëjë cjua xi machaya naja tsëhé me xi Quihndi rë Nina. Hane xi cuatjin cuma tangun yaan, cumacha yaan hane cuiyuju cahndë cjuatacun naja sacuaha tjin chihin yëjë cjuatacun rë Cristu. <sup>14</sup> Hane sehe hacuiin tangun yaan cojo langa xi tsindeya cjuatacun rë hane fi tjengui ndiya rë tu mé ni cjuachacun xatsë sehe vixuya ngajñi cjuandacha rë xuta xi vincha haxi me. <sup>15</sup> Hitsë sa ndaja xi cuinújan cjuaquixi ngatsë rë cjuahmutacun xi tjin naja cojo rë me cojo sa xi cumacha yaan cojo sa xi yëjë ni xcusun naja cuma yaan sacuaha Cristu, me xi matitjun tsajan. <sup>16</sup> Hane ngatsë rë ngahñu rë me vëhé ne, yëjë xuta xi macjain rë me Nina ne, ndaja yahangui xicjin me, sacuaha naxahñu naja ne, tsuvangui rë yojo naja, ngatsë rë xi hincha xicjin. Hacuaha ngatsë rë xi jima ngu xuta jan ndaja sahmi me xa ne, ngu tangun ni cuma yehe me, hacuaha sacu hñu rë me ngajñi rë cjuahmutacun jan.

*Xcusun xatsë xi casacu naja ngatsë rë xi macjain naja Cristu*

<sup>17</sup> Ha cuanitjin ne, sacuaha tichjá cojo nuju cojo cjua rë Nai naja Jesucristu xi quihndë hacuiin cuinechun sa sacuaha siu xuta xi hviiin me yo xi Nina, ta me vëhé ne, siu me cojo cjuatacun jñu rë me xi tsajin me vetjuncaa. <sup>18</sup> Vijniircu me ta tsëhé xi tsajin rë me cjuahñu xi sua Nina ta, tsëhé xi taja rcu me ngatsë rë xi taja xahasen rë me. <sup>19</sup> Hacuaha cachaja cjuatacun rë me, hane casuatë me yojo rë me, vëhé xi jercu macacun me xi sahmi me yëjë xcusun cjuatsehen xi tjin ngasunhdë. <sup>20</sup> Peru ngayun ne, hacuiin cuatjin camá nuju tsëhé Cristu <sup>21</sup> ta ngayun ne, hatuxa cachutayun jain tsëhé me, hacuaha camá nuju tsëhé me, cojo cjuaquixi xi tjin rë Cristu. <sup>22</sup> Sacuaha cjuatacun changá xi canduvuncujun ne, tejñuxun ta tsëhé xi vëhé xi tsitsehen cojo cjuandacha xi jercu matacun cojo. <sup>23</sup> Meje rë cuma xatsë yun cojo cjuatacun nuju hacuaha cojo hasen nuju. <sup>24</sup> Hane nihñu tsujun cjuatacun xatsë xi ha tjin ndaja xi fayangui xcusun xi tsëhé Nina ta xcusun vëhé ne, tsingacun ngu cjuahñu xi hatuxa cjuaquixi hacuaha tyjahi.

<sup>25</sup> Quihndë ta cuatjin ne, canújuun cjuandacha cojo cjuandesu ta, jima ngu yun ne, tinújun cjuaquixi cojo xingun tsëhé xi ngayëjë ni ngayaan ne, camatangun yaan ta ngu ni yojo má ngayaan.

<sup>26</sup> Handasa cjan nuju ne, cavinchun ngu jyë, hane cjuacjan jan ne, hacuiin xi cjuecani rë cuaha nixtin, <sup>27</sup> hane hisca xi hitsë ne, caningatjuun rë xitsehen xi sahmi xi nihñu ngu jyë.

<sup>28</sup> Xuta xi catsichëjë me ne, catejñaxin me xcusun vëhé, hane catisahmi me xa nguñajacacun me cojo sa xi cuechutaha me yëjë xcusun xi machaja rë me. Hane hacuaha cuma cuisecoo me xuta xi machaja rë.

<sup>29</sup> Canújuun cjuatsehen. Nújun ngu cjua xi ndajiyi xi cuincha ndiya rë xuta xi cuiseñuju me cojo sa xi tsëhé me ndaja. <sup>30</sup> Xi canihñuuu xi cuma va rë Hasen rë Nina ta, cojo Hasen rë me jan ne, ngayun ne, casetaha nuju chuva xi tsingacun xi sacu nuju cjuahñu xatsë nixtin xi cuaxëtje nuju me tsëhé jyë nuju.

<sup>31</sup> Hacuaha tiyujunxun yëjë ni cjuachan, yëjë ni cjuasuë, yëjë ni cjuahnga, yëjë ni cjuachjataha cojo yëjë sa xcusun cjuatsehen <sup>32</sup> ta cahndë rë vëhé ne, nihñu cjuandaja cjuajeya xingu xingu yun cojo xingun. Tjin nuju cjuayumatacun cojo xingun. Hacuaha ninchatuhun xingun sacuaha catsinchataha Nina yun ngatsë rë Cristu.

## 5

*Hacutjin meje rë xi cuiyuju xuta ladu rë Nina*

<sup>1</sup> Ngatsë rë xi jemu hmucacun nuju Nina ta, tsëhé xi quihndi rë me yun, vëhé xi chjayunngun tsëhé me. <sup>2</sup> Hane nechun cojo cjuahmutacun xi catsihmucacun naja Cristu hane hisca casua me yojo rë me ngatsë naja sacuaha ngu tsánga ndajiyi xi cueya chu hane cuma tsëhé Nina sacuaha ngu cuatjo xi chuya rë me.

<sup>3</sup> Quihndë ta ngayun ne, tsëhé Nina yun ne, hisca xi caveyunnanguun cjuatsehen xi matacun cojo yojo jyë nuju ngajñi nuju. Caveyunnanguun hisca ngu sa cjuatacun chocun cojo cjuachan ta, ngayun ne, tsajin chuva rë xi nihñu xcusun vëhé. <sup>4</sup> Cavisiajmuun xcusun xi cjuasava, cojo cjuangarca cojo cjuaxcuehyu hya xi hacuiin mameje rë ta cahndë rë vëhé

ne, tuhun nacuechji rë Nina. <sup>5</sup> Ha hyun ta xuta xi sahmi me cjuatsehen xi sahmi ngu xuta cojo ngu xi hacuiin tsêhë me, o sa ngajñi ni xihin me o ngajñi ni chjuun me o tu mé sa xcusun cjuatsehen jan o sa xi choho me, tangun cún me sacuaaha me xi faharcu me nina ndyojo hane sacuiin rë me cahndë hiscan sahmi gobiernu Cristu cojo Nina. <sup>6</sup> Cuidadu cojo sa xi tsajin yo xi cuindacha nuju cojo cjuangarca ta, hatuxa ngatsë rë cjuachocun xi cuicun vihi ne, vinduva castigu jyë xi sua Nina xi cuma rë xuta xi vihndiin tsêhë me. <sup>7</sup> Vêhë xi ngayun ne, caninguisuunñuu cojo rë me.

<sup>8</sup> Ta handasa xi hatsëë ne, ngayun cavinechun ngajñi jñu vë, peru quihndë xi tjin tangun yaan cojo Nai naja ne, camá hasen tsujun, hane nihñu sacuaaha sahmi xuta xi cama hasen cjuatacun rë me. <sup>9</sup> Ta tsêhë hasen jan ne, vetjucun xi jemu ndaja xuta jan hacuaaha tyjahi cjuatacun rë me, hacuaaha quixi me cojo xcusun rë me. <sup>10</sup> Nihñu xatitacun xi cuma nuju mé xi chuya rë Nina. <sup>11</sup> Caninguisuunñuu cojo xcusun xi venguichjiin rëhë xcun Nina xi sahmi xuta xi jñu cjuatacun rë me. Hitsë sa ndaja ne, ningacun tsejen cjuatsehen vëhë ta, <sup>12</sup> tsêhë xi cjuatsehen vëhë xi sahmihma me ne, hisca mijí rë xi cueyananguen ta sava tsejen. <sup>13</sup> Ta hya xi vetjucaa tsejen xcusun xi sahmihma me jan ne, matsejen ndaja xi hatuxa cjuatsehen. <sup>14</sup> Cuatjin ta hya xi vetjucaatsejen ne, ma quixi yëjë xcusun, sa xi cjuatsehen o sa xi cjuandaja. Vêhë xi chja cjuatcujin:

Ningascun rë cjuatacun nuju, ngayun xi catuhun rë cahndë xi cjuahajenda hane nduvunxun tsêhë xuta xi cachaja cjuatacun rë me, hane sehe Cristu ne, sua hasen nuju me.

<sup>15</sup> Vêhë xi ngatsë rë yëjë ni cjuat vëhë ne, chjuhun chvun hacutjin cuangun cojo ngasunhndë nuju, hacuiin nechun sacuaaha xuta xi jñu cjuatacun rë me, ta nechun sacuaaha siu xuta xi jemu chutaha cjuatacun rë me. <sup>16</sup> Chjavunvuhun hora nuju ne, tetjún cjuandaja ta nixtin vihi ne, jemu tjin cjuatsehen. <sup>17</sup> Vêhë xi hacuiin ngarca yun ta, nihñu xati tacun xi cuma nuju mé xi chuya rë Nina. <sup>18</sup> Hacuiin nihñu cjuachihí ta, vëhë ne, tsinguetsun rë cjuatacun nuju ne, hane cahndë rë xi ningatjuntuhun xi siuhun nandá xi cuitexa rë cjuatacun nuju jan ne, tuhun cahndë xi Hasen rë Nina ne, cuitexa rë cjuatacun nuju. <sup>19</sup> Vêhë xi ngajñi cjuavisiajmi nuju ne, teyunnangun cjuat rë salmo, cojo himno cojo yëjë sa xcusun xi sen xi tsêhë Nina, quitaha tisun ne, cojo vëhë ne, hacuaaha nihñu jyë nihñu hnga Nina cojo nguñajatacun. <sup>20</sup> Hacuaaha tuhun nacuechji rë Nina Nahmi naja yasen ni tsêhë yëjë ni xcusun xi vatjun má, hane nihñu cojo ñihi rë Nai naja Jesucristu.

#### *Hacutjin cuinechan cahntsua ndya naja*

<sup>21</sup> Ninguijnu yojo nuju cojo sa xi cuma chjuhunrcun xingu xingu ngayun, cuatjin nihñu ngatsë rë xi chjuhun rcun Nina.

<sup>22</sup> Ngayun yachjin ne, ninguijnu yojo nuju tinuhyun tsêhë xihin nuju ta, cuatjin vitexa Nai naja. <sup>23</sup> Ta xihin nuju ne, vitexa nuju me sacuaaha rcun, cuanitjin sacuaaha Cristu vitexa rë yëjë xuta xi macjain rë me sacuaaha rcu me. Hane Cristu cavaxëtje me xuta yungun jan sacuaaha xi hacui yojo rë suva me. <sup>24</sup> Cuanitjin ne, sacuaaha xuta yungun ne, vihndë me tsêhë Cristu ne, cuanitjin ni ngayun yachjin ne, yëjë xi nihñu xcun cjuahñu nuju ne, tinuhyun tsêhë xihin nuju.

<sup>25</sup> Hacuaaha ngayun xihin ne, nihmutacun chjuun nuju, sacuatjin Cristu ne, catsihmucaun me xuta rë yungun hane casua me yojo rë me ngatsë rë xuta jan. <sup>26</sup> Cuatjin casahmi me cojo sa xi sahmi tyjahi me cjuatacun rë xuta yungun jan cojo sa xi cuma xatsë me, hane catsityjahi me cojo cjuat rë me sacuaaha má xi matyjahi cojo nandá. <sup>27</sup> Cojo sa xi cuma tsingacun suva me xi xuta yungun jan ne, cun tyjahi tyjahi me, ta hisca hitsë tsajin mé camá chojyihí cjuatacun rë me. <sup>28</sup> Vêhë xi ngayun xihin ne, meje rë xi nihmutacun chjuun nuju sacuaaha yojo nuju suvun ta, yo xi tsihmucaun chjuun rë ne, tsihmucaun suva yojo rë. <sup>29</sup> Tsajin yo xi tsitjunngi suva yojo rë ta, hatuxa vangui me xi xinë me sehe sacuhñu rë yojo rë me, hacuaaha sahmi me cuidadu tsêhë. Hacuaaha Cristu ne, cuanitjin ni sahmi me cojo xuta rë yungun ta, <sup>30</sup> tsêhë xi sacuaaha yojo rë me má xuta jan. Cuatjin ngayaan ta camá yaan tsêhë yojo tsêhë ninda rë me casahmi me yaan sacuaaha xcusun rë suva me. <sup>31</sup> Ngatsë rë vihi ne, xihin ne, cuiyuju cha nahmi ra cojo naa rë cha, sehe cumatangun cha cojo chjuun ra, hane catsijo ni jan ne, cumatangun sacuaaha xi ngu ni yojo. <sup>32</sup> Vihi ngu cjuatacun xi jemu chja vinuhya rë peru hacuaaha jemu ndajyihí ta, chjá cojo nuju ta cjuat vëhë ne, tichja tsêhë Cristu cojo xuta yungun. <sup>33</sup> Peru handasa cuatjin vijne cjuat vëhë ne, hacuaaha sahmi ngu jyë xi jimangu yun ne, nihmutacun chjuun nuju, sacuaaha yojo nuju suvun. Hane ngayun chjuun ne, mameje rë xi chjuhunrcun xihin nuju.

## 6

<sup>1</sup> Ngayun quihndi ne, xi vitexa tsujun sacuaaha xuta xi macjain rë me Nina ne, tinuhyun tsëhë xutacha nuju ta, tsëhë xi cuatjin mameje rë ta, <sup>2</sup> cuitjin chja cjuat tsëhë ley: “Chjuhunr-cun chjuhunjeyun nahmi nuju cojo naa nuju.” Hane cjuat rë ley jan, vihi xi tjun cachja Nina xi hacuaaha ticojo rë ngu cjuandaja xi hacui vi: <sup>3</sup> “Cuatjin nihñu cojo sa xi ndatjin cuinechun hacuaaha jyë nixtin cjuacani nuju nguehe xcun cjuahñu nuju.”

<sup>4</sup> Hacuaaha ngayun nahmi ne, hacuiin xi tuhun xti rë quihndi nuju ta, xi hitsë sa ndaja ne, nichun hacuaaha tinújuntuhun rë cojo cjuandaja cojo cjuajeya hacuaaha ningacun rë xi cumacjain rë Nina.

<sup>5</sup> Hacuaaha ngayun xi nihñu xa handasa mosu xi cavatsë me yun ne, tinuhyun tsëhë patrón nuju nguehe xcun cjuahñu vihi, tjün ngutacun xi nihñu xa, hacuaaha nihñu nguñajatacun, sacuaaha xi tinihñu ngatsë rë Cristu. <sup>6</sup> Nihñu nguñajatacun, hacuiin suva hya xi tivutsejen nuju me cojo sa xi cuichja ndaja me tsujun ta, nihñu sacuaaha meje rë xi sahmi mosu xi cachaha rë xi sahmi xa rë Cristu. <sup>7</sup> Nihñu nguñaja ni cjuasua, sacuaaha xi tinihñu tsëhë Nina, hane hacuiin tsëhë ngu xuta. <sup>8</sup> Cuatjin nihñu ta, ha hyun ta yëjë xcusun ndaja xi nihñu ne, Nina ne, sua me chji nuju.

<sup>9</sup> Hacuaaha ngayun patrón ne, ha chuya vëhë ni nihñu cojo mosu xi siu ntsun hane hacuiin cojo cjuachan ta, ninguitsun ta sa ngayun sa me vëhë ne, Nina siu tsja nuju me. Hane Nina ne, texta ni vutsejen naja me ngayëjë ni.

*Xcusun ndaja xi sua Nina yaan xi cuisecoo naja xi nihña si cojo xitsehen*

<sup>10</sup> Sacuaaha ngu sa cjuat xi cuichjá cojo nuju ngayun xingueen, cojo ngahñu xi sua me xi tjercu hñu camahani ne, tiyujuhñu cjuatacun nuju xi tjün tangun yun cojo Nai naja. <sup>11</sup> Chjuhun yëjë ni xcusun xi siu ntsun xi casua Nina yun cojo sa xi cuiyujunhñu cjuatacun nuju tsëhë cjuandacha xi sahmi xitsehen xi matitjun ta, <sup>12</sup> si xi nihña ne, hacuiin cojo ngu xuta ngasunhndë má ta, cojo jingu sa hasen tsehen xi matitjun hacuaaha cojo yëjë xi vitexa rë ngasunhndë jñu vi cojo yëjë sa xi siu ngahnga. <sup>13</sup> Vëhë xi quihndë ne, chjuhun yëjë ni xcusun xi siu ntsun xi casua Nina yun cojo sa xi scaa nuju cuangun xcun hya xi nduva cjuacjintacun vë, hane handasa cuatjun vëhë ne, cuiyujunhñu cuaha cjuatacun nuju. <sup>14</sup> Cuiyujuhñu cjuatacun nuju sacuaaha ngu sindadu xi tjün chjine cha. Nechun cojo cjuaquixi rë Nina ta, vëhë cumachji rëhë nuju sacuaaha ngu cinturón xi cuetuhun cahntsua nuju. Hacuaaha quixi yun cojo cjuatacun nuju ta, vëhë sahmi chji rëhë nuju sacuaaha chingá quicha rë sindadu xi cuetjo rë ndanisin rë cha. <sup>15</sup> Hacuaaha tjün chjine yun cojo cjuat rë Nina xi chja tsëhë cjuajeya sacuaaha tjün chjine cha sindadu xi vincha ntsacu cha zapatu. <sup>16</sup> Hacuaaha cojo yëjë sa vihi ne, ndaja catamacjain nuju cojo sa xi cuma tsicangui rë yojo nuju hane tsicjé ngahñu rë cjuañihi xi sahmi si xitsehen cojo nuju, sacuaaha sahmi ngu quichatë xi yahatsja sindadu xi tsicangui rë yojo rë cha. <sup>17</sup> Chjuhunntsun cjuaninchataha rë Nina xi vetahatacun xi cumachji rëhë sacuaaha ngu cascu xi vaxëtje rë rcuun, hacuaaha chjuhunntsun cjuat rë Nina sacuaaha ngu espada xi sua nuju Hasen rë Nina. <sup>18</sup> Hacuaaha quitaha tinihñu oración nuju yëjë ni hora. Tinújun hacuaaha chjahyun rë Nina ngatsë rë Hasen rë Nina. Cojo sa xi cuma nihñu vihi, quitaha nechun cuidadu, hacuaaha tinihñu oración nuju ngatsë rë yëjë xuta ladu rë Nina. <sup>19</sup> Hacuaaha tinihñu oración ngatsë naha. Chjahyun xi Nina ne, sua sa ná me cjuat hya xi cuichjá, hane cuma cuichjá nguñajacacun cojo sa xi suá cumachaya rë xuta tsëhë cjuat ndajiyihi rë Nina xi cuaxëtje rë xuta ta, <sup>20</sup> ngatsë rë cjuat vëhë ne, Nina catsingatju me ngahan, hacuaaha ngatsë rë cjuat vëhë ne, tejñaya ndavaya quihndë. Vëhë xi nihñu oración cojo sa xi cuma cuichjá cjuat vihi cojo xuta cojo yëjë ngahñu xi mameje rë.

*Nina rë Pablo xi titsinguijnetaha me cjuat*

<sup>21</sup> Tiquico, xingueen, xi vinga ná hacuaaha ndaja cjuinduju me cojo xa rë Nai naja ne, sua me vëhë xi cumachaya nuju tsëhë yëjë ni xcusun xi tivatju tijima, cojo tsëhë yëjë ni xcusun xi tisahme. <sup>22</sup> Vëhë xi tsingátju nuju me cojo sa xi cuichja me cojo nuju hacutjin nechun hane cojo vëhë ne, cuma suatacun.

<sup>23</sup> Hane Nina nahmi naja ne cojo Nai naja Jesucristu ne, catisua nuju me ngayun xingueen cjuandaja cjuajeya cojo cjuahmutacun ngajñi xi cumangutacun. <sup>24</sup> Hane Nina ne, catsinchacuntihin me yëjë xuta xi hmucacun me Nai naja Jesucristu cojo ngu cjuahmutacun xi tsajin nixtin fëya. Cuatjin jain.

## Carta xi catsingatju San Pablo xi cafahtsja xuta nandya Filipos

*Cristu má me cjuahñu rë xuta xi macjain rë me*

<sup>1</sup> Ngahan Pablo cojo Timoteo ne, sacuaaha mosu hndixahan rë Jesucristu ngayin. Ningatjin nuju ngu nina niji, ngayujun ni xi tsêhë Nina ngayun, hacuaaha macjain nuju Jesucristu ndyá nandya Filipos. Hacuaaha cojo me xi matitjun tsujun sacuaaha obispos hacuaaha cojo me xi visecoo rë me ne, ningatjin nina niji tsêhë me. <sup>2</sup> Nina Nahmi naja cojo Jesucristu, me xi matitjun tsajan ne, catisua nuju me cjuandaja cjuajeya rë me.

*Oración xi sahmi Pablo tsêhë xuta xi macjain rë me Nina*

<sup>3</sup> Hya xi tsingátahacacun ngatsë nuju ne, suá nacuechji rë Nina. <sup>4</sup> Hya xi féhya rë Nina ngatsë nuju ngayujun ni ne, hatuxa tjin ná cjuasua ta, <sup>5</sup> tsêhë xi ngayun ne, cuatjin visecun ná xi cumachaya rë xuta cjuá ndajiyi tsêhë Jesucristu. Cuatjin visecun ná hisca hya xi cafêhë tjêngé nuju ne, hisca quihndë. <sup>6</sup> Cavetsihin casahmi ndajiyi Nina cjuatacun nuju. Vêhë xi ngahan ne, tjin ngucacun xi cuatjincin ni sahmi me hisca nixtin xi cya Jesucristu. <sup>7</sup> Hacuaaha ndatjin xi cuatjin tsingátahacacun ngatsë nuju ngayujun ni ta, tsêhë xi jemu vinga ná ngayun. Vinga ná ngayun ta, tsêhë xi ngayujun ngarcun ni ne, cojo ngayun tinihñu tsë tsë xa xi casua ná Nina cojo cjuandaja rë me, quihndë xi tejñaya ndavaya ngeue, hora xi tisuá cjuaquixi naha cojo xutaxa rë, xi cjuá ndajiyi tsêhë Jesucristu ne, jemu ndaja camahani hacuaaha hatuxa cjuaquixi. <sup>8</sup> Hisca vëë jain me ta jemu meje cuinduva tjêngé nga nuju ta, tsêhë xi ngahan ne, hmú cacún nuju ngayujun ni sacuatjin hmucacun nuju Jesucristu.

<sup>9</sup> Féhya rë Nina xi cuma jyë sa cjuahmutacun xi tjin nuju, hacuaaha féhya rë me xi cuechutaha sa cjuatacun nuju, <sup>10</sup> cojo sa xi cuijnercun jarë xcusun xi ndatjin xi nihñu. Sehe ngajan xi cuma tyahi xahasen nuju, hacuaaha ha café jyë nuju nixtin xi cya nga Jesucristu ta, <sup>11</sup> tsêhë xi Jesucristu ne, ha casua nuju me cjuandaja xi cuma nihñu hacutjin xi cjuaquixi. Xi cuatjin ne, xuta ne, cjuaharcun me Nina hacuaaha jemu ndaja cuichja me tsêhë me.

*Cjuasua ne, caa rë fi xcun handasa vatju me cjuañi*

<sup>12</sup> Meje ná xi cumachaya nuju tsan, ta handasa cuitjin tejñaya ndavaya ne, hacuiin ndajintjin ta xuta ne, hitsë sa tijima chaya rë me cjuá ndajiyi tsêhë Jesucristu. <sup>13</sup> Hisca yëjë sindadu xi jiyahñu rë ngahan cojo yëjë ni xuta xi yahnga ne, vëë me xi tsêhë xi jemu xuta rë Jesucristu ngahan ne, vëhë xi caveya ná me ndavaya. <sup>14</sup> Hacuaaha jemu cjin xingueen ne, tsêhë xi camachaya rë me hacutjin vatju quihndë xi tejñaya ndavaya ne, hitsë sa mangucacun me cojo Nina. Hane vëhë xi macjin cacun me xi chja me cjuá rë Nina.

<sup>15</sup> Quixi ta hacuaaha tjin xuta xi sua me machaya rë xuta cjuá tsêhë Jesucristu. Peru tsêhë xi sahmi xín cacun me cojo ná, hacuaaha mijí rë me xi cjuá naha cjuexcun, vëhë xi cojo me chja me. Peru yahnga nga me ne, cuatjin chja me ta, tsêhë xi jemu tjin rë me cjuandaja. <sup>16</sup> Cuma cuinújan ne, me xi cuacun tjin rë cjuandaja jan ne, sua me machaya rë xuta cjuá tsêhë Jesucristu ngatsë rë cjuahmutacun xi tjin rë me cojo ná, tsêhë xi ha vëë me ta Nina ne, casua ná me xa xi cuichjâté ngatsë rë cjuá ndajiyi tsêhë Jesucristu. <sup>17</sup> Peru me xi cuacun tjin rë cjuaxintacun jan ne, sua me machaya rë xuta cjuá vëhë ngatsë rë xi meje sahmi yehe súvá me yojo rë me. Tsajin rë me ngu cjuatacun xi ndajiyi xi cuatjin chja me. Xi má rë me ne, ngahan ne, xi tejñaya ndavaya ngeue ne, cumacjincacun ngatsë rë xcusun xi tsahmi me. <sup>18</sup> Tsimi sahmi rë xi cuatjin cjuatacun rë me xi chja me cjuá rë Nina, ¿há xi nguñajacacun me ne?, o ¿há xi hacuiin nguñajacacun me ne?, ndastu cuenda xi cjuá tsêhë Jesucristu ne, tijimachaya rë xuta. Vêhë xi jemu ndama ná.

<sup>19</sup> Hya xi ha cuatju cjuacjintacun naha ne, hacuaaha ndaja cuma ná ta tsêhë xi ha hvë ta hya cuma tsejen xi tsajin jyë naha. Cuatjin cuma ta tsêhë xi tichjahyun rë Nina ngatsë naha, hacuaaha tsêhë xi Hasen xi casua naja Jesucristu ne, cuisecoo ná. <sup>20</sup> Jemu meje ná xi ngajñi rë yëjë ni xcusun xi sahme ne, tsajin mé xi sua sava ná. Hacuaaha meje ná xi cumacjincacun cacún ngajñi rë tu mé ni cjuacjintacun, cojo sa xi xuta ne, hatuxa sahmi jyë hnga me Jesucristu ngatsë naha, sa xi tsismi ná xutaxa rë ne, o sa tsajin ne, sa xi tsiquehen ná me. <sup>21</sup> Peru jinguyëjë rë xi tejña cjuahñu ne, hatuxa meje sahme nguñajacacun yëjë ni hacutjin xi Jesucristu meje rë me. Hacuaaha sa xi cueya ne, jemu ndaja tsahan. <sup>22</sup> O sa xi cuitejña sa cjuahñu ne, xa xi sahme ngatsë rë Jesucristu ne, ndatjin cuetju. Vêhë xi hisca hveen ne, jarë xi hitsë sa chuya ná, ¿há xi cueya ne?, ¿há xi cuitejña cjuahñu? <sup>23</sup> Cuma cuinújan ne, jemu chja sacuse ná jarë xcusun xi ndatjin. Jercu meje cjué tjêngé Jesucristu ngajan hiscan tacun me ta, jemu sa ndaja tsahan xi cuatjin. <sup>24</sup> Peru hitsë sa mameje rë xi cuitejña cjuahñu ngatsë

nuju. <sup>25</sup> Tsêhê xi cajnecacún tsêhê cjuatacun vêhê ne, vêhê xi hvê ta cuitejña sa cjuahñu. Cuitejña sa cojo nuju ngayujun ni ne, cojo sa xi cuisécoo nuju xi tuxaha sa cjuatacun nuju xi chutayun cjuachacun xi macjain naja, hacuaha hitsê sa ndaja cuma rê xahasen nuju tsêhê cjuatacun vêhê. <sup>26</sup> Hacuaha hya xi cuinduvá cuitejña nga cojo nuju ne, cuinújan ta jemu ndaja Jesucristu, ngatsê rê xi cavétju ndavaya.

<sup>27</sup> Nihñu yêjê ni hacutjin xi meje rê xi sahmi xuta xi ha macjain jain rê me cjuatacun ndajiyihi tsêhê Jesucristu. Cuatjin nihñu, cojo sa xi ndaja cjuatacun sacú ná tsujun, ¿há xi cuinduvá tjêngê nuju?, o sa tsajin ne, ¿há xi tejnataha jingu sa ladu? Peru meje cumachaya ná xi ngayun ne, tjín tangun cjuatacun nuju, hacuaha visecuun xingun xi nújan tjún ngatsê rê cjuatacun ndajiyihi xi macjain naja. <sup>28</sup> Hacuaha meje cumachaya ná xi ngayun ne, rcuun camahani tsêhê xuta xi sahmi nuju me condra. Xi cuatjin rcuun ne, cuma tsejen xi Nina ne, tacun jain me cojo nuju. Hacuaha cuma tsejen xi cuechu nixtin xi Nina ne, tsingatju me xuta xi cuacun jan xcun ndihi, peru ngayun ne, cuaxétje nuju me. <sup>29</sup> Nina ne, ndaja casahmi me cojo nuju xi hacuini suvá xi cumacjain ni nuju Jesucristu ta hacuaha cuatjun cjuañihi ngatsê rê xi macjain nuju me. <sup>30</sup> Titjun ne, cahyun cjuañihi xi cavátju camá. Quihnê ne, camachaya nga nuju xi ha cuanitjin ni tivátju tijima. Hacuaha ngayun ne, hacuanitjin ni tivátjun tijima quihnê.

## 2

*Meje rê xi chjayanguen tsêhê Cristu sacuaaha catsinguijne me yojo rê me*

<sup>1</sup> Tjin rê xahasen nuju cjuasua ta, tsêhê xi me vêhê ne, hmucacun nuju me. Tjin tangun cjuatacun nuju cojo Hasen rê Nina. Hacuaha tjín nuju cjuahmutacun cjuayumatacun cojo xingun, xingu xingu ngayun. <sup>2</sup> Quihnê ne, cojo sa xi cuma chihin cjuasua xi tjín rê xahasen naha ne, cuatjin nihñu. Nihñu tangun cjuatacun nuju cojo xingun. Hacuaha ngajñi nuju ne, nihmutacun xingun cojo ngu ni cjuatacun nuju. <sup>3</sup> Sa xi meje nuju xi suvun ni xi ndajiyihi cuatjun cuma ne, ndajin tjín. Hacuaha mijí rê xi nihñu yehe yojo nuju ta, xi meje rê ne, jeya ngayun. Hacuaha meje rê xi chutsujun xingun sacuaaha xi hitsê sa vengui chjí rê me xi cumá nuju ngayun. <sup>4</sup> Mijí rê xi tsujun suvun ni cuinchunsun xi ndaja ta, hacuaha meje rê xi tinchunsun xi ndaja xi cumá rê jingu sa xuta.

<sup>5</sup> Meje rê xi ningatuhuntacun sacuaaha catsingatahacacun Jesucristu. <sup>6</sup> Me vêhê ne, handasa ha Nina me ne, peru hacuini casahmi jyê hnga me yojo rê me xi meje cuejña me sacuaaha Nina ta, <sup>7</sup> cahndê rê vêhê ne, cavejñaxin me cahndê rê me xcun Nina, hane casahmicuenda me xuta camá me ngu xuta sacuaaha yaan, cojo sa xi sahmi me yêjê ni hacutjin cuiteja Nina me. Hya xi ha camá me xuta ne, <sup>8</sup> cahndê me yêjê ni hacutjin cachja Nina, hacuaha catsingathin me xi catsisava xuta me, hisca catsingathin me xi catsiquehen xuta me xcun cru, sacuaaha xi jemu jyê jyê rê me. <sup>9</sup> Vêhê xi Nina ne, hya xi catsicuya me Jesucristu cjuahñu ne, hya casahmi jyê hnga me Jesucristu, hacuaha ngu ni me vêhê xi jemu vengui chjí rê ñihi rê me. <sup>10</sup> Cuatjin casahmi Nina, cojo sa xi yêjê ni ángel, yêjê ni xuta, cojo yêjê ni xitsehen ne, cuechu nixtin xi cuixcuhnchi xcun Jesucristu xi cjuaharcun rê me. <sup>11</sup> Hacuaha cuichja ta Jesucristu ne, hatuxa matitjun jain me. Xi cuatjin ne, cumatsejen xi Nina Nahmi naja ne, hatuxa jemu jyê hnga me cojo cjuatacun rê me.

*Xuta xi macjain rê me Nina ne, tsejen xcusun rê me xcun yahnga xuta*

<sup>12</sup> Sacuatjin ndaja canuhyun tsahan hya xi cavinechan cojo nuju, tsan ne, cuatjin hitsê sa nguñajatacun tinuhyun tsahan quihnê xi xín tejnataha. Hacuaha meje rê xi nihñu yêjê ni hacutjin xi chuya rê Nina ta, tsêhê xi me vêhê xi vaxétje nuju me. Ndaja cuidadu cojo sa xi cumachihin cjuatacun vêhê. <sup>13</sup> Hacuaha scaa nuju nihñu cuatjin ta, tsêhê xi Nina sahmi me xi meje nihñu yêjê ni hacutjin xi chuya rê me, hacuaha sua nuju me ngahñu xi scaa nuju nihñu cuatjin.

<sup>14</sup> Ngajñi rê yêjê ni cjuacjintacun xi tjín nuju ne, xi canújunjyuan cojo xingun xi chuyiin nuju, xi canujuun cuitjin cuatjin. <sup>15</sup> Xi cuatjin ne, tsajin jyê nuju hacuaha tyjahi xahasen nuju. Cuma cuinújan ne, ngayun xi ha quihnê rê Nina ngayun ne, tsajin jyê nuju, xi nechun ngajñi rê xuta tsehen xuta ndajin xi siu ngasunhndê. Meje rê xi cumatsejen xi jemu ndaja ngayun ngajñi rê xuta tsehen, <sup>16</sup> xi tuhun machaya rê xuta cjuatacun ndajiyihi xi sua naja cjuahñu xatsê. Cuatjin nihñu ne, cojo sa xi ndaja cuma ná ngatsê nuju nixtin xi cuya nga Jesucristu ta, tsêhê xi xi cuatjin ne, hya cumatsejen xi hacuini tu mahya casahme ngahñu xi sahme hacutjin xi chuya rê Jesucristu, hacuaha hacuini tu mahya casahme xá. <sup>17</sup> Ha ndasa tsiquehen ná xutaxa rê tsêhê xi ngahan cavisécoo nuju xi cumacjain nuju Jesucristu hacuaha cavisécoo nuju xi nihñu xa rê me, peru ndaja cuma ná. Hacuaha ndama ná xi ngayujun ni ne, casua nuju Nina cjuandaja rê me. <sup>18</sup> Ha chuva vêhê ni ne, ndaja catama nuju ngatsê rê cjuandaja vê, hacuaha ndaja catama nuju ngatsê naha.

*Ejemplu xi sua apóstol*

<sup>19</sup> Sa xi meje rë Jesucristu, me xi matitjun tsajan, sacuatjin xi meje ná ne, tsingátju nuju Timoteo. Meje tsingátju nuju me cojo xati, cojo sa xi ngahan ne, hacuaha ndaja cuma rë xahasen naha, hya xi cuya nga me cojo cjuacutjin tivatjun tijima. <sup>20</sup> Me vëhë tsingátju me ta, tsëhë xi tsajin sa ná ngu xuta xi vinga nuju sacuaha me vëhë. Me vëhë ne, jemu meje rë me xi ndaja cuatjun cuma. <sup>21</sup> Peru yëjë me xi yahnga ne, sahmi cuenda me cjuandya rë súvá ni me, sahmi cuenda in me xa xi meje rë Jesucristu xi cumá. <sup>22</sup> Peru ha hyun xcusun rë Timoteo. Ha hyun ta hya xi cavisecoo ná me xi catihin cumachaya rë xuta cjuacutjin rë Nina ne, cavisecoo ná me sacuaha visecoo ngu quihndi nahmi rë. <sup>23</sup> Vëhë xi, xi tu sacú cumachaya ná me xi cuátju cuma ne, me vëhë xi meje tsingátju nuju me. <sup>24</sup> Hacuaha xi má ná ne, me xi matitjun tsajan ne, sua me cahndë xi cojo xati ne, cuinduvá tjëngë nuju.

<sup>25</sup> Peru xi má ná ne, hacuaha sahmi ngu yëjë xi tsingátju nuju Epafrodito xingueen. Me vëhë ne, casahmi me coná xa, hane cojo me vëhë cacaa niji cojo cjuahngatacun rë xuta xi chohovëë naja. Hacuaha cavisecoo ná me sacuatjin xi meje nuju ngayun xi caningatjun me. <sup>26</sup> Hane me vëhë ne, jemu tjin cacun me xi meje scuëë nuju me ngayujun ni ta, tsëhë xi choho camá rë me xi camachaya nuju cjuacutjin xi hmu rë me. <sup>27</sup> Hacuaha quixi xi jemu cama hmu rë Epafrodito. Na meje cueya me. Peru cahmii me ta, tsëhë xi camayuma rë Nina me. Hacuaha camayuma rë Nina ngahan ta, tsëhë xi mijí rë me xi cuma jyë sa cjuachoho xi tivátju tijima. <sup>28</sup> Vëhë xi cojo xati ne, tsingátju nuju Epafrodito, sehe cuma sua rë xahasen nuju xi chun nga me ngu ndiya. Hacuaha ngahan ne, cuma chuva hitsë cjuachoho xi tivátju tijima. <sup>29</sup> Vëhë xi chjuhunnstun me cojo cjuasua, tsëhë xi me vëhë ne, hacuaha macjain rë me me xi matitjun tsajan. Hacuaha chjuhunnrcun yëjë ni xuta xi tangun cjuatacun rë cojo rë me. <sup>30</sup> Me vëhë ne, tsëhë xi jercu casahmi me xa tsëhë cjuacutjin rë Jesucristu ne, vëhë xi hitsë sa ne, cahme me. Handasa cavetaha tsavi me yojo rë me xi cavisecoo ná me ne, peru camacjaincacun me xi cavisecoo ná me cahndë nuju ngayun.

**3***Xcusun xi jemu vengui chjí camahani rë*

<sup>1</sup> Quihndë tsan ne, catamasua rë xahasen nuju ngatsë rë me xi matitjun tsajan.

Ngahan ne, hacuaha ndya ma ná xi cúa tsihindu nga nuju cjuacutjin xi ha cachjá cojo nuju ta, tsëhë xi cjuacutjin vëhë ne, cuisecoo nuju xi tsajin yo tsingueetsun cjuatacun nuju xi macjain nuju Jesucristu. <sup>2</sup> Nechun cuidadu cojo xuta machjiriin xi vindacha xi chja xi hachu meje rë xi xti yojo naja, sehe tsejen xi tsëhë Nina ngayaan. <sup>3</sup> Quixiin cjuacutjin rë me ta ngayaan xi tsejen xi tsëhë Nina ngayaan. Hane Hasen rë Nina ne, visecoo naja xi ma chjahanrcun Nina, hacuaha nechun cjuasua ngatsë rë Jesucristu. Ha hyan ta hatuxa cumaji cuetjuntjen ngatsë rë xcusun xi cun ngayaan cojo xcusun xi nihña. <sup>4</sup> Peru sa xi cuatjin cuma cuetjuntjen suvaan ne, ngahan ne, hitsë sa tjin ná chuva rë xi cuëtjutjë xi cumá rë xuta xi yahnga. <sup>5</sup> Ngahan ne, hacuaha cati ná xi cavëchu xi jyin nixtin, sacuaha xcusun rë xutachanga naha. Ngahan ne, tjë rë xuta nangui Israel ngahan. Hacuaha quihndindai cjin rë Benjamín ngahan. Ha tuxa xuta tjë rë Israel ngahan ta xutacha naha ne, hacuaha xuta tjë rë Israel me. Ngahan ne, tsëhë partidud fariseo ngahan hacuaha casahme yëjë ni hacutjin chja ley rë yungun naha. <sup>6</sup> Ngahan ne, jercu cavétaharcu xcusun rë xutachanga naha, hane vëhë xi hisca casuá cjuañihi xi cuma rë xuta xi macjain rë Jesucristu. Ngahan ne, tsëhë xi casahme sacuatjin chja ley rë yungun naha ne, vëhë xi camaji catsicaniji ná xuta hisca ngu jyë. <sup>7</sup> Xi catsingátahacacun hatsëë ne, jemu vengui chjí rë yëjë xcusun vëhë. Peru ngatsë rë Jesucristu ne, xi má ná quihndë ne, venguin camahani chjí rë xcusun vëhë ta, cumaji cuaxëtje ná. <sup>8</sup> Hisca venguin chjí rë yëjë sa xcusun, má ná ta, tsëhë xi jercu vengui chjí rë xi tjin tangun cjuatacun naha cojo Jesucristu, me xi matitjun tsajan. Ngatsë rë me vëhë ne, ngahan ne, cacandëxen yëjë ni xcusun, sacuaha xi chanden xtë, cojo sa xi ngahan ne, cuma tsëhë Jesucristu ngahan. <sup>9</sup> Hacuaha cuma tangun cjuatacun naha cojo rë me. Xi cuatjin ne, cjuë jyë naha, hacuaha ngatsë rë xi sahme hacutjin chja ley rë yungun ta ngatsë rë xi macjain ná Jesucristu. Nina ne, tsicjé me jyë naja ngatsë rë xi macjain naja Jesucristu. <sup>10</sup> Jemu meje ná xi ndaja cuma tangun cjuatacun naha cojo Jesucristu. Hacuaha meje ná xi cojo ngahan sacú ná ngahña xi catsingacun Nina, hya xi camá catsicuya me Jesucristu cjuahña. Sa xi meje rë Nina ne, ngahan ne, tsingatehen xi cuátju cjuañihi hacuaha hisca tsingatehen xi tsiquehen ná xuta ta, tsëhë xi cuatjin cavatju Jesucristu camá. <sup>11</sup> Hane hya xi cueya ne, meje rë Nina xi hacuaha tsicuya ná me cjuahña xi tejña ngajñi rë nima.

<sup>12</sup> Cjëë cuma chihin yëjë ni cjuatacun xi meje ná vë, hacuaha chaja sa cuma tyjahi cjuatacun naha. Peru tisahme sa ngahña, cojo sa xi cuma sahme chehen cjuatacun vëhë. Cuatjin sahme ta, tsëhë xi Jesucristu ne, ha casahmi tsëhë me ngahan. <sup>13</sup> Cúa cuichjá cojo nuju tsan ta, cjëë sahme chehen cjuatacun vëhë. Peru cuitjin meje sahme: tsicháya xcusun



xi ha cavatju camá, hacuaha sahme ngahñu xi cuma sahme xcusun xi vengui chji rë xi sehe nduva. <sup>14</sup>Tisahme ngahñu xi cuma sahme chehen xcusun vëhë, cojo sa xi sacú ná cuatjo xi sua ná Nina ngatsë rë xi macjain ná Jesucristu. Nina ne, cuaxijin ná me xi cuitejña ngajan ngahnga hiscan tacun me.

*Meje rë xi tjin tangun yaan xi macjain naja Nina*

<sup>15</sup>Vëhë xi ngayaan xi ha ndaja macjain naja Jesucristu ne, meje rë xi cuatjin cuiyujun cjuatacun naja. Hane sa xi tjin yahnga ngayun xi hacuüin cuatjin cuiyujun cjuatacun nuju ne, Nina tsingacun nuju me hacutjin xi cjuaquixi. <sup>16</sup>Ndastu sahmi ngujoyë xi nihña cuenda tsëhë cjuaquixi xi ha hyan ne, cuatjin meje rë xi nihña.

<sup>17</sup>Vëhë xi meje rë xi nihña hacutjin xi sahme, tsan. Hacuaha tetuhunrcun xcusun rë xuta xi sahmi hacutjin xi sahme. <sup>18</sup>Ha jemu cachjá cojo nuju ta jemu cjin xuta xi condra me tsëhë cjuanda jnyih xi sua machaya naja hacutjin cahme Jesucristu xcun cru. Ña tijihnda xi tichjá nga ngu ndiya cojo nuju cju vëhë. <sup>19</sup>Peru xuta xi sahmi me condra cjuanda jnyih vë ne, cju me xcun ndihi. Cahndë rë xi cjuaharcun me Nina xi cjuaquixi ne, hitsë sa faharcun me tu mé ni xcusun xi chuya rë me. Cahndë rë xi cuma sava rë me tsëhë xcusun xi sahmi me ne, tu hitsë sa sahmi yehe me yojo rë me. Cuma cuinújan ne, tjin tangun cjuatacun rë me cojo cjuatacun rë ngasunhdë. <sup>20</sup>Peru ngayaan ne, xuta tsëhë ngahnga ngayaan. Hacuaha ha nechayan rë Jesucristu, me xi matitjun tsajan, ta cuinduva me tsëhë ngajan xi cuaxëtje naja me. <sup>21</sup>Me vëhë tsindeya me yojo jyë naja xi tsajin mé machji rëhë, hane sahmi me sacuaha yojo rë suvá me xi jercu vengui chji rë. Cojo ngahñu rë suvá me ne, sahmi me ta, tsëhë xi me vëhë matitjun me tsëhë yëjë ni xcusun.

## 4

*Tahan cjuasua yëjë ni nixtin ngatsë rë Nai naja*

<sup>1</sup>Vëhë xi sacuatjin xi ha macjain nuju me xi matitjun tsajan tsan ne, cuatjin tangun cojo ngasunhdë nuju. Jercu meje cuinduvá tjëngë nuju tsan. Jemu ma sua rë xahasen naha ta, tsëhë xi ngayun ne, tivangun nduju cojo cjuatacun nuju xi macjain nuju Jesucristu.

<sup>2</sup>Quihndë ne, féhya nuju ngayun Evodia cojo ngayun Síntique nihña favor ne, ngu tangun ni catama cjuatacun nuju cojo xingun, sacuatjin meje rë xi nihña ngayejen ni xi tsëhë me xi matitjun tsajan ngayaan. <sup>3</sup>Hacuaha ngaye xi ndaja compañeru naha ngaye ne, nihña favor ne, tisecuee rë na xi cuacun vë, xi cuijnetaha si xi tisahmi na cojo xicjin na. Ta na xi cuacun vë ne, jercu casahmi na cojo ná xa, hya xi catihin camachaya rë xuta cjuanda jnyih tsëhë Jesucristu. Hacuaha cojo cha Clemente cojo sa yahnga compañeru naha ne, cavisecoo ná me. Xuta xi cuacun vë ne, hatuxa sacú rë me cjuahñu xatsë ta, tsëhë xi ha tsëhë Nina me.

<sup>4</sup>Ndaja catama rë xahasen nuju ngatsë rë xi tjin tangun cjuatacun nuju cojo me xi matitjun tsajan. Cúya cuichjá nga cojo nuju, ndaja catama rë xahasen nuju. <sup>5</sup>Meje rë xi cuma tsejen xi tjin nuju cjuandaja cojo yëjë ni xuta ta, tsëhë xi me xi matitjun tsajan ne, ha tacun xati xi cuinduva nga me. <sup>6</sup>Ngajñi rë yëjë ni cjuacjintacun nuju ne, xi camacjintacun. Tinújun cojo Nina hacuaha chjahyun rë me cjuandaja rë me. Hacuaha tuhun nacuechji rë me. Cuatjin meje rë xi tuhun cumachaya rë Nina tu mé ni xi meje nuju. <sup>7</sup>Ngajan xi cjuajeya xi sua nuju Nina ne, vëhë cuetjo nuju, cojo sa xi cumacjintacun, xi tjin tangun cjuatacun nuju cojo Jesucristu. Sacuaha cjuajeya xi sua nuju Nina jan ne, hisca vijniircun ndandaja ta, tsëhë xi jemu tu ndaja camahani cjuajeya vëhë.

*Xcusun ndaja xi meje rë xi cuinchan cjuatacun naja*

<sup>8</sup>Quihndë tsan ne, nihña tangun cjuatacun nuju cojo cjuatacun xi cuicun vihi: cjuatacun xi cjuaquixi, cjuatacun xi chjaharcun rë, cjuatacun xi ndatjin, cjuatacun xi tyjahi, cjuatacun xi ndacun, cjuatacun xi chuya rë xuta ndaja. Cuma cuinújan ne, tu jarë ni cjuatacun xi jemu ndaja o sa xi hatuxa tjin chuva rë xi chjaharcun rë ne, vëhë nihña tangun cjuatacun nuju cojo. <sup>9</sup>Hacuaha nihña yëjë ni hacutjin xi camá nuju hya xi cavicuyá nuju hacutjin meje rë xi nihña. Peru hacuüin suvá cju xi cachjá cojo nuju ta hacuaha cojo xcusun xi casahme ngajñi nuju ne, cojo vëhë meje rë xi nihña. Hane cuatjin ne, Nina xi sua naja cjuajeya ne, tacun me cojo nuju.

*Cjuatjo tsëhë xuta nandya Filipino xi cuma rë Pablo*

<sup>10</sup>Ngatsë rë me xi matitjun tsajan ne, jercu ndama ná ta, handasa jemu cavatju nixtin ne, hindë cavuyun caningatuhuntacun nga ngatsë naha. Hacuüin hatuxa canichayun ná ta, cuenda xi casacuinyin nuju hacutjin cuma xi cuisecun ná hisca quihndë. <sup>11</sup>Hacuüin tichjá cojo nuju cuatjin ngatsë rë xi tjin mé xi ma chaja ná ta, ngahan ne, ha casacu ná chuva rë hacutjin cumangucacún cojo tu mé ni cjuacjintacun xi nduva. <sup>12</sup>Sa yuma sa nchina ngahan ne, hatuxa mangucacún. ¿Há tjin xi sínë?, o ¿há tsajin xi sínë?; ¿há xi jercu tjin ná?, o ¿xi ma chaja ná?, tsimii sahmi rë ta ngahan ne, ha catuxaha cjuatacun naha xi cumangucacún cojo

tu mé ni cjuacjintacun xi nduva. <sup>13</sup>Scaa ná cojo tu mé ni cjuacjintacun ta, tséhë xi Jesucristu ne, tisua ná me ngahñu. <sup>14</sup>Peru, jemu ndaja canihñu xi caviseacun ná ngajñi rë cjuañi xi tivátju tijima.

<sup>15</sup>Ngayun xuta nandya Filipo ne, ha hyun ta hya xi tjutjun casuá camachaya nuju cjuandajyihí tséhë Jesucristu hacuaha sehe cavétju tséhë distritu Macedonia ne, hisca ngu yungun cavisecuaain ná cojo tujún hya. Suvun tutu xi caviseacun ná. <sup>16</sup>Hacuaha hya xi tejñataha ngajan nandya Tesalónica ne, ngu jo ndiya ne, caningatjun tujún tséhë cjuachaja xi tjin ná. <sup>17</sup>Hacuiin jercu meje ná cjuandaja xi ningatjun ná ta xi hitsè sa meje ná ne, xi sacu nuju cjuandaja rë Nina ngatsè rë cjuandaja xi nihñu. <sup>18</sup>Ha cafahántsa yějë ni xi caningatjun ná cojo Epafrodito. Véhë xi ha tjin ná yějë ni xi mameje ná. Hisca vangui sa xi tjin ná. Cuatjo nuju vë ne, tangun cojo ngu cuatjo xi ndaja jne, xi vejñaaxcun ngasuncun. Hane Nina ne, fahatsja me cuatjo jan ta jemu chuya rë me tséhë. <sup>19</sup>Hacuaha Nina naja ne, tséhë cjuanchina ndajyihí xi tjin rë me ne, hatuxa sua nuju me tu mé ni xi machaja nuju, ngayujun ni xi tjin tangun cjuatacun nuju cojo Jesucristu. <sup>20</sup>Quihndë ne, catichja xuta ta Nina Nahmi naja ne, jercu ndaja camahani me yějë ni nu yějë ni nixtin. Cuatjin jain.

*Cjua xi vijnetaha*

<sup>21</sup>Yějë ni xuta xi tjin tangun cjuatacun rë cojo Jesucristu ndyá ne, tuhun rë me nina naha. Hacuaha xingueen xi siu cojo ná nguehe ne, tsingatju me ngu nina nuju. <sup>22</sup>Hacuaha cojo sa yějë me xi tséhë Nina, hisca cojo me xi siu ngajan ndava me xi matitjun camahani tséhë xuta Roma ne, tsingatju me nina nuju.

<sup>23</sup>Cjuandaja rë Jesucristu, me xi matitjun tsajan ne, catejña cojo nuju.

## Carta xi catsingatju San Pablo xi cafahatsja xuta ladu rê Jesucristu ngajan nandya Colosas

<sup>1</sup> Ngahan Pablo ne, apóstol tséhê Jesucristu ngahan ta, tséhê xi cuatjin camameje rê Nina. Ngahan cojo Timoteo xingueen ne, <sup>2</sup> ningátjin nuju carta vihi ngayun xuta nandya Colosas, ngayujun ni xuta ladu rê Nina xi jercu ndaja titsangunndujun cojo ndiya rê me hacuaha tjin tangun cjuatacun nuju cojo Jesucristu. Nina Nahmi naja ne, catisua nuju me cjuandaja cjuajeya.

*Sua Pablo nacuechji rê Nina ngatsê rê xuta nandya Colosas*

<sup>3</sup> Jercu tihín nacuechji rê Nina Nahmi rê Nai naja Jesucristu yasen yasen ni, hya xi nihñi oración ngatsê nuju. <sup>4</sup> Tihín nacuechji rê Nina ta camachaya niji hacutjin xi ngayun ne, mangutacún cojo Jesucristu hacuaha nihmutacún yêjê ni xuta ladu rê Nina. <sup>5</sup> Cuatjin tinihñu ta, jercu vetuhun tacún cjuandaja xi Nina tacunxin rê me ngajan ngahnga xi cuma nuju ngayujun ni. Cavetsuhun cavetuhun tacún cuatjin, hatsê hya xi canuhyun cjuandajiyi xi cjuaquixi, xi chja tséhê Jesucristu. <sup>6</sup> Cjuandajiyi jan ne, casacu camachaya nuju sacuatjin sa rê yahnga xuta tséhê jercu cjín sa cahndê. Hane xi macjain rê xuta cjuandajiyi jan ne, jercu tisahmi me cjuandaja, hacuaha jercu cjín sa xuta tijimacjain rê me. Cuanitjin tivatju ngajñi nuju ngayujun ni, hisca hya xi camachaya nuju cjuaj jan hacuaha ndaja cavijnercun xi Nina ne, jercu sahmi me cjuandaja. <sup>7</sup> Cuatjin cachja cojo nuju Epafra, me xi jercu vinga niji hacuaha tangun fahacuenda me cojo niji xa xi vitexa Jesucristu. Me vêhê ne, jercu ndaja cjuinduju me tifahacuenda me tséhê xa jan cojo sa xi tsujun ndaja. <sup>8</sup> Hacuaha casua me camachaya niji xi ngayujun ni ne, tjin nuju cjuahmutacun cojo yêjê ni xuta ladu rê Nina, cojo cjuahmutacun xi sua nuju Hasen rê Nina.

<sup>9</sup> Ngatsê rê xi cuatjin camachaya niji tséhê cjuaj xi chja tsujun ngayujun ni ne, vêhê xi tinihñi oración tsujun ngayujun ni yasen yasen ni hisca hya xi camachaya niji. Tichjahyin rê Nina xi cuijnercun yêjê hacutjin xi meje rê Nina xi nihñu. Tichjahyin rê me xi ndaja tuxaha cjuatacun nuju hacuaha cuijnercun cojo cjuatacun xi sua nuju Hasen rê Nina. <sup>10</sup> Cuatjin tichjahyin rê me, cojo sa xi ngayujun ni ne, cuangunndujun cojo ngasunhndê nuju sacuatjin meje rê xi sahmi xuta ladu rê Nai naja, cojo sa xi chuya rê me tséhê yêjê ni xi nihñu. Cuatjin tichjahyin rê me, cojo sa xi ngayujun ni ne, nihñu yêjê ni xcusun cjuandaja, hacuaha ndaja sa chun Nina ngu nixtin ngu nixtin. <sup>11</sup> Nina catisua nuju me ndaja cjín ngahñu, tucu ngahñu xi tjin rê me, cojo sa xi yêjê ni nixtin scaa nuju cojo yêjê ni xcusun xi vatjun má hacuaha nijyun tacún cojo xuta, táha tijimasua nuju. <sup>12</sup> Cuatjin tichjahyin rê Nina, cojo sa xi ngayujun ni ne, tuhun nacuechji rê Nahmi naja ngatsê rê xi me vêhê ne, cavêhêchjine nuju me cojo sa xi cojo ngayun satê nuju cjuandaja xi sua me xuta ladu rê me ngajan ngahnga. <sup>13</sup> Nina Nahmi naja ne, cavaxêtje naja me tséhê xitsehen xi matitjun tséhê yêjê ni cjuatsehen, hane cavejña naja me tsja Quihndi rê me xi jercu hmucacun me. <sup>14</sup> Cojo xcusun xi casahmi Quihndi rê me jan ne, Nina ne, cavechjitje me yêjê ni jyê xi quitjen xuta, hane catsinchataha me ngayaan.

*Sahmi Nina xi cuya cumandaja ngayaan cojo rê me*

<sup>15</sup> Quihndi rê me jan ne, tsingacun naja hacutjin xcusun rê Nina cojo Hasen rê me, handasa maji matsejen Nina. Quihndi rê me jan ne, hatuxa matitjun me tséhê yêjê ni xi casahmi Nina ta, <sup>16</sup> tséhê xi cojo me ne, Nina ne, casahmi me yêjê ni xi tjin ngasunhndê xi tsejen, cojo yêjê ni xi tjin ngahnga xi matsijin, sacuaaha yêjê ni xcusun hasen xi matitjun sa hasen ndaja sa hasen tsehen. Cojo me vêhê ne, casahmi Nina yêjê ni, cojo sa xi yêjê ni xi cuacun jan ne, sahmi jyê sahmi hnga rê me. <sup>17</sup> Quihndi rê me jan ne, hatuxa matitjun me tséhê yêjê ni xi casahmi Nina ta, tséhê xi me vêhê xi tjun sa tacun me xi cuma rê yêjê ni hacuaha ngatsê rê me vêhê ne, siuchihin yêjê ni. <sup>18</sup> Me vêhê ne, vitexa me xuta ladu rê Nina sacuatjin rê rcuun xi vitexa rê yojo naja. Hacuaha sua me cjuahñu xatsê xuta ladu rê Nina ta, tséhê xi me vêhê tjun tjun me cavuya me cjuahñu tséhê ngajñi rê yêjê nima, cojo sa xi cumatitjun camahani me. <sup>19</sup> Quihndi rê Nina jan ne, tsingacun naja hacutjin xcusun rê Nina cojo Hasen rê me ta, tséhê xi cachuya rê Nina xi cuisehentê me cuejñacahndê suvá me cahntsua xahasen rê Quihndi rê me. <sup>20</sup> Nina Nahmi naja ne, cavejña naja me tsja Quihndi rê me, tséhê xi cavejñangucacun me xi cojo Quihndi rê me ne, tsicuya me ladu rê me ngayêjê ngarca ni, sa ngahnga sa ngasunhndê, cojo sa xi cumajyê cumahnga Quihndi rê me jan. Hane ngatsê rê jni rê Quihndi rê me xi cavanga xcun cru ne, hindê tsajin mé cjuachan.

<sup>21</sup> Ngayujun ni ne, handasa hatsê ne, jemu cjín nechun tséhê Nina hacuaha condra nuju me ngatsê rê xi jemu tsehen cjuatacun nuju hacuaha jemu tsehen xcusun xi canihñu, <sup>22</sup> peru quihndê ne, casahmi Nina xi cavuya nga camandaja yun cojo rê me. Cuatjin

casahmi me cojo cjuaveya tsêhê yojo rê Quihndi rê me, cojo sa xi ngayujun ni ne, tsêhê me yun hacuaha tsajin camahani jyê nuju, hya xi squindaya nuju me xi cuangun xcun me. <sup>23</sup> Cuatjin cuma sa xi cjuenduju xi siu cahndê cjuatacun nuju xi macjain nuju cjuandajyihî xi chja tsêhê Cristu, hacuaha cjuenduju xi vetuhun tacún cjuandajyihî xi canuhyun jan. Hane cjuandajyihî jan ne, casac camachaya rê xuta tsêhê jercu cjín cahndê. Hane ngahan Pablo ne, casatêxa ná xi su machaya rê xuta cjuandajyihî jan.

*Casuaxa Nina Pablo xi cuichjatê me cjuatahama ndajyihî xi chja tsêhê Jesucristu*

<sup>24</sup> Quihndê ne, ma sua ná xi tivátju cjuañihî cojo sa xi tsujun ndaja. Tisahmechehen tsêhê yêjê ni cjuañihî xi cachja Cristu xi cuátju cuma cojo yojo naha, cojo sa xi tsêhê xuta ladu rê me ndaja, hane ngayejen ni xi ladu rê me ne, sacuaaha yojo rê me ngayaan. <sup>25</sup> Ngahan ne, camá ngahan ngu xuta xi visécoo rê xuta ladu rê Cristu, tsêhê xi Nina casuaxa ná me xi cuisécoo nuju ngayun xutaxín, cojo sa xi suá cumachaya nuju tsêhê yêjê ni cjuandajyihî xi cachja me. <sup>26</sup> Cjuandajyihî jan xi cachja me ne, hacui cjuatahama. Cjua vêhê ne, cavetjo Nina tsêhê yêjê ni xuta xi caviyuju me yêjê ni nixtin xi cavatju, peru quihndê ne, casua me camachaya rê yêjê ni xuta ladu rê me. <sup>27</sup> Nina ne, cavejñaguncun me xi sua me cumachaya rê xuta xi cuacun jan xi cjuatahama vihi ne, chja xi jercu tsinchacuntihî Nina xutaxín jan. Cuma cuinújan ne, Cristu ne, cuejñacahndê me cahntsua xahasen nuju ngayun xutaxín. Hane cuetuhun tacún xi sehe cuaxêndaja me yun. <sup>28</sup> Ngayin ne, tihín cumachaya rê xuta tsêhê cjuaxi chja tsêhê Cristu. Yêjê ni xcusun xuta ne, viyijin me cuidadu hacuaha vicuyin rê me cojo yêjê ni cjuahasen xi tjín niji. Cuatjin nihñi, cojo sa xi yêjê ni xuta xi cuacun jan ne, tyjahî camahani me xi tjín tangun cjuatacun rê me cojo Cristu, hya xi ningacuin me xcun Nina. <sup>29</sup> Ngatsê rê vêhê ne, ngahan ne, hacuaha hñu tisahme xa, hacuaha tisahme ngahñu cojo yêjê ni ngahñu xi tisua ná Cristu.

## 2

<sup>1</sup> Hacuaha meje ná xi cumachaya nuju xi jercu tisahme ngahñu ngatsê nuju cojo ngatsê rê me xi siu ngajan nandya Laodicea cojo tsêhê yêjê sa me xi cjêê scuêê ná. <sup>2</sup> Cuatjin sahme, cojo sa xi ngayujun ni ne, sacú hñu rê xahasen nuju ngatsê rê xi tjín tangun cjuatacun nuju cojo xingun cojo yêjê ni cjuahmutacun. Hacuaha cuatjin sahme, cojo sa xi sacúndaja cumachaya nuju hacuaha jercu ndaja camahani cuijnercun cjuatahama ndajyihî rê Nina, xi chja tsêhê Cristu. <sup>3</sup> Cristu ne, suvá ni me vêhê cuma sua naja me cjuatacun xi jercu ndaja cuijnercun yêjê ni cjuatahama ndajyihî jan. <sup>4</sup> Cuitjin tichjá cojo nuju, cojo sa xi tsajin yo cuma cuindacha nuju cojo cjua xi matanguaain cojo cjua xi cjuaquixi, handasa jercu ndaja nuhya rê, xi má nuju. <sup>5</sup> Handasa tsajin tejñataha cojo nuju ne, peru jercu vityangê cacún tsujun ngayujun ni. Hacuaha ma sua ná, tsêhê xi hvê xi ngayujun ni ne, tjín tangun cjuatacun nuju cojo xingun hacuaha jercu ndaja mangu tacún cojo Cristu.

*Vitexa Pablo xi nihña sacuatjin meje rê xi sahmi xuta ladu rê Jesucristu*

<sup>6</sup> Vêhê xi, sacuatjin xi camacjain nuju cjuandajyihî xi chja tsêhê Jesucristu, me xi Nai naja ne, cuatjin tangunndujun cojo ngasunhndê nuju xi tjín tangun cjuatacun nuju cojo rê me. <sup>7</sup> Catjinduju xi ndaja macjain nuju cjua jan, hacuaha ndaja sa catamacjain nuju ngu nixtin ngu nixtin. Catjinduju xi siu cahndê cjuatacun nuju cojo cjuachacun xi macjain naja, sacuatjin cavicuya nuju Epafras. Hacuaha catjinduju xi jercu tuhun nacuechji rê Nina Nahmi naja.

*Tsavi cojo ngu cjuachacun xatsê xi vicuya xuta ndacha*

<sup>8</sup> Nechun cuidadu, sá tu yo sahmi xi cuisuhun ladu rê ngatsê rê xi cuindacha nuju cojo ngu cjuachacun xi venguiin chji rê, tsêhê xi cjuachacun jan ne, nduva tsêhê xcusun rê xuta ngasunhndê ni, hacuaha tsêhê suvá ngasunhndê vihi yêjê ni cjua rê jan, hacuiin tsêhê Cristu. <sup>9</sup> Nihñu cuidadu ta, yêjê xcusun rê Nina ne, tjín Cristu, ta Nina ne, vejñacahndê me yojo rê Cristu, <sup>10</sup> hacuaha ngayun ne, tsajin mé xi chja rê hasen nuju, tsêhê xi tjín tangun cjuatacun nuju cojo Cristu, me xi matitjun camahani tsêhê yêjê ni hasen xi hacuaha vitexa, sa hasen ndaja sa hasen tsehen. <sup>11</sup> Ngatsê rê xi tjín tangun cjuatacun nuju ngayujun ni cojo rê me ne, ha sacuaaha xi me vêhê cavatê me chuxin nuju. Hane vêhê ne, hacuiin vijne xi cati jain chuxin nuju sacuaaha sahmi xuta cojo quihndi langa ta xi vijne jan ne, yêjê ni cjuatsehen xi tjín naja cojo yojo naja ne, cavaxêxin camahani Cristu. <sup>12</sup> Hya xi caxtenda ngayun ne, ha sacuaaha xi caveyun ne, hacuaha Nina caveyaniji nuju me tangun cojo Cristu, sehe catsicuya nuju me cjuahñu nga cojo rê me, ngatsê rê xi camangu tacún cojo ngahñu rê Nina, me xi catsicuya rê Cristu cjuahñu tsêhê ngajñi rê yêjê nima. <sup>13</sup> Hatsêê ne, ha sacuaaha xi nima má ngayun ngatsê rê jyê nuju hacuaha ngatsê rê yêjê cjuatsehen xi tjín nuju cojo yojo nuju. Peru quihndê ne, ngayujun ni xi catsicuya nga nuju Nina cjuahñu tangun cojo Cristu, Nina ne, catsinchataha naja me cojo yêjê jyê naja. <sup>14</sup> Cuma cuinújan ne, sacuaaha xi cavujnu Nina cjua xi hinchaxcun xujun xi tsicaniji jyê naja. Sacuaaha xi catsicjêya me

xujun jan, hya xi cahme Cristu xcun cru. <sup>15</sup> Nina ne, cafachaxin me xa xi siutahá yějē ni hasen ndaja cojo hasen tsehen xi cavitexa, hane catsingacuntē me xi cuatjin casahmi me. Cacaá rē me cavinchangahma me hasen xi cuacun jan, cojo yějē ni xi casahmi Cristu.

<sup>16</sup> Xicachasuun tsēhē xuta xi tsicanijijyē me ngayun ngatsē rē xcusun xi chinu o xi hyun, o ngatsē rē suhi xi nihñu, há chuya nu, há chuya sá, o há chuya totje. <sup>17</sup> Xicachasuun ta yějē ni xcusun xi cuacun jan ne, sacuaa tjangngun ni rē yějē ni cjuandaja xi casua nuju Cristu. <sup>18</sup> Xicachasuun tsēhē xuta xi cuatjin tsicanijijyē nuju me xi chja me xi hatuxa meje rē xi ninguijnu yojo nuju hacuaa chjuhuncun ángel. Xuta xi cuacun jan ne, chja me xi chja xu nijñá cojo rē me hacuaa sahmi yehe me yojo rē me suvá me ngatsē rē cjuatacun tsehen xi vitexa rē me. <sup>19</sup> Cuatjin sahmi me ta, vicuyaa in me cjuachacun cjuaquixi tsēhē Cristu, me xi sahmi xi cumatangun cjuatacun rē yějē ni xuta ladu rē Nina cojo xicjin hacuaa sahmi xi cuijin xcun xi cjuenduju me cojo ndiya rē Nina sacuatjin xi meje rē Nina.

<sup>20-21</sup> Ngayujun ni ne, ngatsē rē xi tjin tangun cjuatacun nuju cojo Cristu, me xi cahme ne, vėhē xi camandaya ngayun tsēhē xcusun rē xuta ngasunhdē, sacuaa mandaya ngu xuta tsēhē yějē ni cjuandaja rē me hya xi hme me. Vėhē xi mijí rē xi cuanguntjengun xcusun rē xuta xi chja xi cumaji chjahan vihi, cumaji xinēē vėhē, cumaji nicojon xingu vė, sacuaa xi tuxa sahmi nguyjē xi cuinuhyun jan. <sup>22</sup> Mijí rē xi cuanguntjengun xcusun xi cuacun jan ta, tsēhē xi xichinē cojo xi hyun ne, hatuxa fē hya xi nicoyo rē. Hacuaa xcusun xi cuacun jan ne, nduva tsēhē cjuá xi vitexa xuta ngasunhdē ni, nduva tsēhē cjuá xi vicuya xuta ngasunhdē ni. <sup>23</sup> Hacuaa xcusun xi cuacun jan ne, sahmi xi xuta ne, sahmi me yějē ni xi meje rē cjuatacun tsehen xi vitexa rē me, handasa tsejen sacuaa xcusun ndaja, ngatsē rē xi vitexa naja xi chjahanrcun nina sacuatjin meje rē xuta ngasunhdē ni hacuaa xi ninguijne yojo naja hacuaa xi chjahanñehe cojo yojo naja. Peru xcusun xi cuacun jan ne, vitexa in camahani xi nihña cjuandaja.

### 3

#### *Catamameje naja yějē ni xi tsēhē ngahnga*

<sup>1</sup> Ngayujun ni ne, casua nuju Nina cjuahñu xatsē, ha sacuaa xi catsicuya nuju me cjuahñu tangun cojo Cristu. Vėhē xi yějē ni hora ne, catamameje nuju yějē ni xi tsēhē ngahnga, hiscan tacun Cristu, me xi Nina casahmi jyē casahmi hnga rē xi cuitexa me ngayějē ni. <sup>2</sup> Catamameje nuju yějē ni xi tsēhē ngahnga, hacuiin cjuatsehen xi tsēhē ngasunhdē ta, <sup>3</sup> tsēhē xi ngayun ne, ha caviyujunxcun xcusun xi canihñu hatsēē, sacuatjin rē nima xi ha quihndē tsajin mé cuma sahmi sacuaa hya xi tacun sa xcun cjuahñu. Hacuaa quihndē ne, tjin nuju cjuahñu xatsē tangun cojo Cristu, me xi tacun xcun Nina. Hane xcusun vėhē ne, hatuxa matsijin. <sup>4</sup> Hya xi Nina tsingacuntē me Cristu, me xi sua nuju cjuahñu xatsē ne, hya tsingacuntē nuju me hacuaa sahmi jyē sahmi hnga nuju me tangun cojo rē Cristu jan.

#### *Xcusun changá cojo xcusun xatsē*

<sup>5</sup> Vėhē xi xicanihñuu cjuatsehen, sacuatjin rē nima xi maji sahmi cjuatsehen. Xicanihñuu cjuatsehen sacuaa cjuatsehen xi sahmi xuta cojo ngu xi hacuiin chjuun rē me, hacuiin xihin rē me, o sa xi ngajñi ni xihin me, o ngajñi ni chjuun me. Hisca ndajin tjin xi meje nihñu xcusun xi cuacun vė, cojo yějē sa xcusun cjuatsehen. Mijí rē xi jercu nihmu tacun cjuanchina ta, sa xi cuatjin nihñu ne, hitsē sa nihmu tacun cjuanchina jan xi cuma rē Nina. <sup>6</sup> Nina ne, sahmi me castigu yějē ni xuta xi vihndiin tsēhē me, xi cuatjin sahmi. <sup>7</sup> Hacuaa ngayujun ni ne, cuatjin canihñu hatsēē, hya xi tivinuhyuun tsēhē Nina. <sup>8</sup> Peru quihndē ne, mijí rē xi nihñu yějē ni xcusun xi cuichjá cojo nuju vihi: hacuiin cumacjan nuju, hacuiin nihñu cjuatsehen, hacuiin choho cuinúnun tsēhē xingun, <sup>9</sup> hacuiin cuinúnun cjuandacha cojo xingun. Xicanihñuu cuatjin ta, tsēhē xi ha caviyujunxcun cjuatacun changá cojo yějē ni xcusun xi canihñu xi cavitexa nuju cjuatacun jan, <sup>10</sup> hane ha cavisehen nuju cjuatacun xatsē xi Nina tisahmi me xi cuijin xcun xi cuma sacuaa cjuatacun rē suvá me xi catsindaja cjuatacun jan, cojo sa xi ngayujun ni ne, cumachaya ndaja sa nuju nguñaja cjuaquixi yo me. <sup>11</sup> Ngajan xi cuendaain rē ¿há xutaxín o há xuta tjē rē Israel má ngayaan?, ¿há cati chuxin naja o há catin rē?, ¿há xuta ngu nangui ngayaan?, ¿há tichjá cjuatacun naja?, ¿há xuta caxteña ngayaan, o há xuta ndaya tjin ngayaan? ta Cristu ni ne, me vėhē xi jercu tu vengui chji camahani rē me.

<sup>12</sup> Ngayujun ni ne, tsēhē xi cavaxijin nuju Nina, hacuaa caviyujuxin nuju me, hacuaa hmu cacun nuju me ne, vėhē xi meje rē xi tjin nuju cjuayumatacun cojo xingun, meje rē xi tjin nuju cjuandaja cojo xingun, meje rē xi tjin nuju cjuajeya cojo xingun, meje rē xi yehe tacun cojo xingun. <sup>13</sup> Hacuaa meje rē xi scaa nuju cojo xingun hacuaa ninchatuhun xingun, sa xi tjin mé tsēhē xi cuinchunjun xingun. Sacuatjin rē Nai naja xi catsinchataha nuju me ne, cuanitjin ni nuju ngayujun ni cojo xingun. <sup>14</sup> Peru xi jercu vengui chji sa rē

xi cuma rë yějë ni cjuaxi cachjá cojo nuju jan ne, meje rë xi tjin nuju cjuahmutacun cojo xingun ta, xi cuatjin nihñu ne, hatuxa jercu ndaja cuma tangun cjuatacun nuju cojo xingun xingu xingu ngayun.

<sup>15</sup> Cjuajeya xi casua nuju Cristu ne, catitexa rë cjuatacun nuju ta, tséhë xi Nina ne, cavaxijin nuju me cojo sa xi cuinechun cojo cjuajeya ngajñi nuju cojo xingun. Hane meje rë xi yasen yasen ni ne, tuhun nacuechji rë Nina. <sup>16</sup> Cjuandajyihí xi chja tséhë Cristu ne, catiyujucahndé cahntsua xahasen nuju. Ticuyun xingun hacuaha tiyujun xingun cuidadu xingu xingu ngayun cojo yějë cjuahasen xi sua nuju Nina. Sún nguñaja tacún tséhë Nina, sacuaha salmo cojo himno cojo yějë sa xcusun xi sen xi tséhë Nina, sacuaha ngu nacuechji rë me xi tuhun.

<sup>17</sup> Tu mé ni xi cuinújun o xi nihñu ne, catama sacuatjin meje rë xi sahmi xuta xi tjin tangun cjuatacun rë me cojo Nai naja Jesús. Hacuaha tuhun nacuechji rë Nina Nahmi naja, xi nihñu oración cojo Jesús.

*Chja Pablo hacutjin meje rë xi nihña cojo xingueen cahntsua ndaya naja*

<sup>18</sup> Ngayujun ni yachjin ne, tinuhyun tséhë xihin nuju ta, tséhë xi cuatjin ndatjin xi cuma ta, tjin tangun cjuatacun nuju cojo Nai naja. <sup>19</sup> Ngayujun ni xihin ne, hacuaha meje rë xi nihmu tacún chjuun nuju, hacuiin choho xcusun nuju cojo rë me.

<sup>20</sup> Ngayujun ni xi siucuaha xutacha nuju ne, tinuhyun tséhë me tséhë yějë ni xi cuichja me cojo nuju ta, hya xi cuatjin nihñu ngayujun ni xi tjin tangun cjuatacun nuju cojo Nai naja Jesús ne, jercu chuya rë Nina. <sup>21</sup> Ngayujun ni xi má yun nahmi ne, xicaningatjuntuun xi cuinújuntuhun rë quihndi nuju, ta sá tu sahmi chúvacacun.

<sup>22</sup> Ngayujun ni xi má yun mosu hndixahan ne, tinuhyun tséhë xuta xi má me nai nuju tséhë yějë ni xi cuichja me cojo nuju, hacuiin súvá hya xi tivutsejen me ngayun, sacuatjin sahmi yahnga xuta xi meje cuaxëndaja súvá me yojo rë me xcun xuta, ta tinuhyun tséhë me cojo ngu xahasen tyjahi ngatsé rë xi chjuhuncun Nai naja. <sup>23</sup> Tu mé ni xcusun xi nihñu ne, nihñu nguñaja tacún, sacuaha xi tinihñu tséhë Nai naja, hacuiin tséhë xuta ni. <sup>24</sup> Cuatjin nihñu, tséhë xi ha hyun ta Cristu Nai naja ne, me yějë cuechji nuju me ta hacui me xi tivisecon rë. <sup>25</sup> Peru sa xi tjin ngajñi nuju xi hatuxa choho tisahmi ne, Nina sahmi rë me castigu tucu xcusun tsehen xi casahmi me, hacuaha Nina ne, hatuxa quixi jain me cojo cjuatacun rë me xi tsichuva me yějë ni xuta cojo cjuatacun rë me.

## 4

<sup>1</sup> Ngayujun ni xi má yun nai tséhë mosu hndixahan ne, ndaja nihñu cojo mosu hndixahan xi siu ntsun, sacuatjin nameje rë ta, tséhë xi ha hyun xi hacuaha cojo ngayun ne, tjin nai nuju xi tacun ngajan ngahnga.

*Vitexa Pablo xi nihña oración hacuaha cuisiajme cjuandaja*

<sup>2</sup> Ngayujun ni ne, nihñu oración yasen yasen ni. Mijí rë xi cuma tséhë tacún. Tuhun nacuechji rë Nina. <sup>3</sup> Hacuaha nihñu oración ngatsé niji. Chjahyun rë Nina xi tuxaha ndiya xi cuisiajmi cojo xuta, cojo sa xi cuma tihín cumachaya rë me tséhë cjuatahama ndajyihí xi chja tséhë Cristu. Hane ngatsé rë cjuandajyihí jan ne, tejñaya ndavaya. <sup>4</sup> Nihñu oración ngatsé naha, cojo sa xi ngahan ne, cuichjáté cjuatahama jan, sacuatjin meje rë xi cuichjá.

<sup>5</sup> Hacuaha yějë ni xuta xi hacuiin ladu rë Nai naja me ne, meje rë xi ndaja nihñu cojo rë me cojo yějë ni cjuahasen xi tjin nuju, yějë ni hora xi cuma. <sup>6</sup> Hacuaha yějë ni cjuavisiajmi nuju ne, meje rë xi cojo cjuandaja cuinújun yějë ni hora. Xi cuatjin nihñu ne, sacú cumachaya nuju hacutjin chjayunngun cjuaxi tséhë xingu xingu xuta xi cuacun jan.

*Tsingujnetaha Pablo cjuaxi rë me*

<sup>7</sup> Yějë ni xi tivátju tijima ne, Tiquico ne, sua me cumachaya nuju. Me vèhë ne, ngu xuta ladu rë Jesús xi jercu vinga ná, hacuaha jercu ndaja cjuinduju me tivisecoo me ngahan xi tangun fahacuenda me cojo ná xa xi vitexa Cristu. <sup>8</sup> Titsingátju nuju me, cojo sa xi ngayujun ni ne, cumachaya nuju tsijin hacuaha cojo sa xi sua nuju me cjuajyétacun. <sup>9</sup> Hane cojo me vèhë ne, titsingátju nuju cha Onésimo, cha nangui nuju. Cha vèhë ne, cha ladu rë Nina xi jercu ndaja cjuinduju cha cojo ndiya rë me, hacuaha jercu vinga ná cha. Catsijo me xi cuacun vè ne, sua me cumachaya nuju tséhë yějë ni xi cavatju nguehe camá.

<sup>10</sup> Aristarco ne, me xi jiyatangun cojo ná nguehe ndavaya ne, tsingatju me nina nuju. Hacuanitjin ni Marcos, xicjin Bernabé. Ha cachjá cojo nuju tséhë Marcos jan. Vèhë xi sa xi cjeuhe me nangui nuju ne, chjuhunntsun me cojo cjuandaja. <sup>11</sup> Jesús, me xi hacuaha hmí rë Justo ne, hacuaha tsingatju me nina nuju. Ngajñi rë yějë ni xuta tjé rë Israel ne, jyan tu tu ni me vèhë xi tisahmitangun cojo ná xa, cojo sa xi xuta ne, tsingatihin me xi Nina cuitexa rë me. Jyan me xi cuacun jan ne, casua ná me cjuajyétacun. <sup>12</sup> Hacuaha Epafras, me xi tangun nangui nuju cojo hacuaha fahacuenda tséhë xa xi vitexa Cristu ne, tsingatju me nina nuju. Me vèhë ne, jercu sahmi me oración ngatsé nuju yasen yasen ni, cojo sa

xi ngayujun ni ne, cuma tyjahi camahani ngayun xcun Nina, hacuaha cojo sa xi ndaja cuijnercun yějě ni hacutjin xi meje rě Nina. <sup>13</sup> Ngahan ne, cuichjá cojo nuju ta Epafras jan ne, jercu vityanguicacun me tsujun cojo xuta Laodicea cojo xuta Hierápolis. <sup>14</sup> Hacuaha tsingatju nina nuju Demas cojo Lucas, me xi doctor xi jercu vinga ná.

<sup>15</sup> Tuhun rě ngu nina yějě ni xuta ladu rě Nina ngajan nandya Laodicea. Hacuaha tuhun rě Ninfa ngu nina cojo yějě sa me xi matangun me ndava na. <sup>16</sup> Hane xi cjuě chutahaya tě rě xujun vi ngajñi nuju ne, nihñu xi hacuaha catichutahaya tě rě ngajñi rě xuta ladu rě Nina ngajan nandya Laodicea. Hacuaha xujun xi catsingátju tsěhě xuta Laodicea ne, hacuaha chutahayun tě ngajñi nuju. <sup>17</sup> Hane tinújun cojo Arquipo cjua vihi: “Catjiniya tacún xi nihñuchuhun xa xi casatěxa nuju, xi tjin tangun cjuatacun nuju cojo Nai naja.” nina vi.

<sup>18</sup> Ngahan, Pablo ne, titsihindu nuju cojo hntsa ngahan ngu nina vi. Ninguitsjun ná nguehe ndavaya. Nina ne, catisua nuju me cjuandaja.

## Cjua xi titjun catsihindu San Pablo xi camá rë xuta nandya Tesalónica

<sup>1</sup> Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi matangun ngayun tsêhë xi macjain nuju Nina Nahmi naja cojo Nai naja Jesucristu, ngajan nandya Tesalónica. Catisua nuju Nina cjuandaja cjuajeya.

### *Macjain ndaja rë xuta nandya Tesalónica*

<sup>2</sup> Jercu tihin nacuechji rë Nina Nahmi naja ngatsë nuju ngayujun ni, hacuaha hatuxa veyinnanguin nuju tu ya ni hya xi nihñi oración. <sup>3</sup> Hya ninguitsjin hacutjin jercu nihñu xa tsêhë xi ndaja macjain nuju, hacutjin jercu nihñu cjuandaja tsêhë xi hmu tacún Nina cojo xuta yumacujun, hacuaha hacutjin jercu ndaja ticaa nuju xi tinechunyun rë Nai naja Jesucristu. <sup>4</sup> Ngayun ne, jemu hmucajun nuju Nina, hacuaha hyin xi cavaxijin nuju me. <sup>5</sup> Cuatjin ta xi catihin camachaya nuju cjua rë Nina ne, hacuiin suvá cjua ta hacuaha Hasen rë Nina ne, casua niji ngahñu xi cuatjin canújin cojo nuju cjua jan xi hatuxa cjuaquixi. Ngayun ne, ha hyun hacutjin xcusun niji ngajñi nuju, xi ndajyihí xi cuma nuju.

<sup>6</sup> Ngayun ne, sacuaha canihñi hacuaha sacuaha casahmi Nai naja ne, ha cuanitjin ni canihñu xi cachjuhunntsun cjua jan cojo cjuasua xi casua nuju Hasen rë Nina, handasa jemu choho cavatjun camá. <sup>7</sup> Cuatjin camá xi ngayëjë ni me xi macjain rë Nina ngajan ladu tsêhë Macedonia cojo Acaya ne, hisca casahmi me sacuatjin canihñu ngayun. <sup>8</sup> Hisca hya xi titjun ngayun cachjuhunntsun cjua rë Nai naja ne, sehe jercu cjin quiji cjua jan, peru hacuiin tu ngajan ni Macedonia cojo Acaya ta hisca jingujyë ni. Hacuaha camachaya rë xuta xi jemu ndaja camacjain nuju tsêhë Nina. Cuatjin ne, ha quihndë tsajin sa mé xi cuinújin ta <sup>9</sup> suvá xuta ne, chja me hacutjin cojo cjuandaja cachjuhunntsun niji hacuaha hacutjin caviyujunxun nina xi macjain nuju titjun, hane camacjain nuju ngu Nina xi cjuaquixi xi quicun. <sup>10</sup> Hacuaha chja me hacutjin tinechunyun rë Jesús, Quihndi rë Nina, xi cuya me tsêhë ngahnga. Jesús jan ne, me vëhë xi catsicuya Nina cjuahñu rë me xi cavaxë Nina me ngajñi rë nima, hacuaha me vëhë ni xi cuaxëtje naja me tsêhë castigu xi nduva.

## 2

### *Xa xi casahmi Pablo ngajan nandya Tesalónica*

<sup>1</sup> Ngayun ne, ha hyun ta xi catsanguin tjenguin nuju ne, hacuiin tu mahya ta <sup>2</sup> handasa jemu choho cavatjin camá ngajan nandya Filipos sacuatjin xi ha hyun, peru camacjain tacuin xi canújin cojo nuju cjua rë Nina ta, tsêhë xi Nina jan ne, cavisecoo niji me, handasa jemu camacjan rë yahnga xuta. <sup>3</sup> Hacuaha xi nújin cojo nuju ne, hatuxa cojo cjuaquixi cojo cjuandaja. Hacuuiin vindachin. <sup>4</sup> Nina ne, me vëhë xi cafahachuva niji me, hane cachuya rë me tsijin, hacuaha casua me ngayin xa xi cuinújin cjua rë me cojo xuta. Vëhë xi cuatjin nújin. Hacuuiin xi xuta chuya rë me ta xi Nina chuya rë me, tsêhë xi Nina ne, me vëhë xi vëë me cjuatacun niji cojo xahasen niji. <sup>5</sup> Ngayun ne, ha hyun ta hacuiin cjuahaxi xi canújin cojo nuju, hacuaha vëë Nina jain ta hacuiin xi tujün meje niji. <sup>6</sup> Hacuuiin jemu meje niji xi cjuaharcun niji xuta, sa ngayun sa xuta xi yahnga, handasa tjin niji chuya rë xi chjaharcun niji tsêhë xi apóstol rë Cristu ngayin. <sup>7</sup> Peru jemu cojo cjuajeya cavinechin ngajñi nuju, sacuaha xi sahmi ngu naa xi sahmi cuidadu me quihndi rë me. <sup>8</sup> Jemu cavinga niji ngayun. Hacuaha meje niji xi hacuiin tu suvá cjua rë Nina xi canújin cojo nuju ta hisca mé sa cjuacjintacun ne, caveññitacuini xi cuisecuin nuju ta, tsêhë xi jemu cachuya niji tsujun. <sup>9</sup> Ngayun ne, vitsjen rë nuju tsêhë xi jemu jyë xa canihñi. Canihñi nixtin nixten, tsêhë xi hisca ngu ngayun mijí tihin nuju ngu cjuandaja hya xi canújin cojo nuju cjua rë Nina.

<sup>10</sup> Ngayun xi macjain nuju Nina ne, cahyun, hacuaha hisca Nina ne, vëë jain me ta jemu ndaja cavinechin cojo nuju. Hisca ngu jyë cumaji nicanuju niji. <sup>11</sup> Hacuaha ngayun ne, ha hyun hacutjin canújin cjuandaja cojo nuju jima ngu ngayun, sacuaha chja ngu nahmi cojo quihndi rë me. <sup>12</sup> Hacuaha catihin nuju cjua xi nchunchujun ni ne, nihñu cjuandaja sacuatjin meje rë ndiya rë Nina ta, Nina ne, me vëhë xi vaxijin me ngayun xi sacú nuju cahndë hiscan xi me vëhë tacun tsja me. Ngajan ne, jemu cahndë ndajyihí camahani.

<sup>13</sup> Vëhë xi jercu tihin nacuechji rë Nina, tsêhë xi hya xi canuhyun cjua rë Nina xi canújin cojo nuju ne, camacjain nuju cjua jan. Hane ndatjin sacuatjin caningatuhuntacun ta cjua rë Nina jain, hacuiin cjua rë ngu xuta. Hacuaha jemu ndajyihí tsujun xi cuatjin macjain nuju cjua jan. <sup>14</sup> Hacuaha ngayun ne, cavatjun camá sacuaha cavatju me camá titjun, me xi camacjain rë Jesucristu ngajan nangui Judea. Sacuaha xuta nangui rë me ne, jercu casuandya rë me, hacuanitjin ni xuta nangui nuju ne, jercu casuandya nuju me. <sup>15</sup> Nai naja Jesús ne, catsiquehen xuta nangui Judea me, hacuanitjin catsiquehen xuta jan xutachanga



xi cachja cjua rë Nina hatsëe. Hisca cojo ngayin ne, hacuaha casuandya niji me. Chuyiin rë Nina tsëhë xuta jan xi cuatjin sahmi me. Hacuaha choho vëë me me xi yahnga sa ta, <sup>16</sup>tsëhë xi mijj sua me cahndë xi cuinújin cjua rë Nina cojo xuta xi hacuiin tsëhë nangui Judea ne, catamacjain rë me hacuaha cuetjutje me. Jercu tu jyë camahani jyë rë me xi cuatjin sahmi me. Peru quihndë ne, cavechu nixtin xi cuma me castigu xi cuichja Nina.

*Pablo ne, meje cjue scutsejen nga me xuta Tesalónica*

<sup>17</sup>Hya xi ha catsanguinxin ngu jo nixtin tsujun ne, handasa cahyiin nuju, peru hatuxa ninguitsjin nuju cojo xahasen niji. Hacuaha jercu meje cuanguin tjenguin nga nuju. <sup>18</sup>Cavejñi xi cuanguin. Ngahan Pablo ne, ngu jo ndiya ne, cavejñá xi cjué, peru Satanás ne, casuaain cahndë. <sup>19-20</sup>¿Mé ngatsë rë xi tivinechinyin rë Jesús? ¿Mé ngatsë rë xi tjin niji cjuasua? ¿Mé ngatsë rë xi ndaja cuichja xuta tsijin? Ngatsë nuju ngayun xi camacjain nuju cjua rë Nina xi canújin cojo nuju. Ngatsë rë vëhë xi hya xi cuinduva Jesús Nai naja ne, jemu ndaja cuichja xuta tsijin hacuaha jercu ndaja cuma niji.

### 3

<sup>1</sup>Xi camá ne, tsëhë xi ha quihndë cacain niji xi meje niji cumachaya niji hacutjin tivatjun tijima ne, vëhë xi camangutacuin xi cuinechin suvin ngajan nandya xi hmí Atenas. <sup>2</sup>Hane caningatjin cha Timoteo xingueen xi quiji tjengui cha ngayun. Cuatjin caningatjin cha ta, tsëhë xi mosu rë Nina cha, xi chja cha cjua ndajiyihi tsëhë Cristu. Cuatjin caningatjin cha, cojo sa xi tsinguixi nuju cha hacuaha cuichja sa cha cjua cojo nuju, cojo sa xi hitsë sa ndaja cumacjain nuju <sup>3</sup>hacuaha hacuiin cuma chuva tacún ngajñi rë cjuacjintacun xi tivatjun tijima. Hane ngayun ne, ha hyun xi hatuxa cuatjin cuatjuun cjuacjintacun xi choho scuëë naja xuta, <sup>4</sup>tsëhë xi hisca hya xi cavinechin cojo nuju ne, hya catihin camachaya nuju xi hatuxa cuatjun cjuañihi. Xi camá ne, cuatjin camá, sacuatjin xi ha hyun. <sup>5</sup>Hane ngahan ne, xi meje xati ná cumachaya ná hacutjin tivatjun tijima, vëhë xi catsingátju cha Timoteo, quiji cjaha cha cjua sa xi ngayun ne, macjain cuaha nuju. Cuatjin casahme, tsëhë xi camacjincácun ngatsë nuju tsëhë xi sa cavindacha nuju naain xi cuinengun ngajñi cjuatsehen ne, xa xi canihñi ne, tu mahya.

<sup>6</sup>Peru quihndë ne, cavuya cha Timoteo xi quiji tjengui cha ngayun. Hane ndajiyihi cjua yaha cha tsujun, tsëhë xi macjain cuaha nuju cjua rë Nina hacuaha hmutacun cuaha yëjë ni xuta. Hacuaha cachja cha cojo niji ta ninguitsjun cuaha niji cojo cjuandaja, hacuaha xi jercu meje chun niji sacuahatjin jercu meje chin nuju. <sup>7</sup>Cuatjin xi handasa jemu ndya tivatjin tijima cojo cjuañihi cojo cjuaxti, peru jemu casacu niji cjuetacun, tsëhë xi ngayun ne, macjain cuaha nuju. <sup>8</sup>Quihndë ne, jercu tu ndaja camahani cuma niji ngayin, sa xi ngayun ne, ha ndatjin siu nuju cjuatacun nuju cojo Nai naja. <sup>9</sup>Hacuaha jemu meje tihin nacuechji rë Nina naja tsëhë yëjë ni cjuasua xi casua niji me ngatsë nuju. <sup>10</sup>Nixtin nixten ne, jemu tichjahyin rë Nina xi sua me cahndë xi tjin ngu hora tjin ngu nixtin sacú xingueen ne, cuicuyin sa nuju cjua rë Nina xi cjëë cumachaya nuju.

<sup>11</sup>Meje niji xi Nina Nahmi naja cojo Nai naja Jesús ne, catisecoo niji me xi cuechintihin nuju. <sup>12</sup>Hacuaha Nai naja meje rë me xi catamajyë sa cjuahmutacun ngajñi nuju cojo xingun hacuaha cojo xuta xi yahnga sa, sacuatjin ngajñi naja cojo nuju. <sup>13</sup>Nina Nahmi naja catisahmi me cuatjin, cojo sa xi tsajin jyë nuju xcun me hya xi cuya Nai naja Jesús cojo yëjë ni ángel rë me.

### 4

*Xcusun xi Nina chuya rë me hacutjin xi nihña*

<sup>1</sup>Quihndë ne, ha tinihñu hacutjin xi cavicuyin nuju xi meje rë xi cumá, cojo sa xi chuya rë Nina tsujun. Vëhë xi jemu nújin cojo nuju tsan ta hitsë sa nihñu cuatjin ta, tsëhë xi hatuxa cuatjin meje rë Nai naja Jesús.

<sup>2</sup>Hane ngayun ne, ha hyun cjua rë Nai naja Jesús xi ha cavicuyin nuju. <sup>3</sup>Cjuatacun xi meje rë Nina ne; xi cuma tyahi cjuatacun nuju, xi canindesuun cojo chjuun xi xín, xi canindesuun cojo xihin xi xín. <sup>4</sup>Meje rë me xi jima ngu ngayun ne, catisacu chjuun nuju, peru cojo cjuandaja, xi tyahi cjuatacun nuju. <sup>5</sup>Miji rë xi cojo cjuatsehen, sacuatjin sahmi xuta xi hvíin me Nina. <sup>6</sup>Sacuaha cjuacjintacun vëhë ne, xi canihñuu xi cuindachun rë xingun ta, tsëhë xi Nai naja ne, sahmi me castigu ngayëjë ni cjuatsehen vëhë, sacuatjin xi ha canújin cojo nuju. <sup>7</sup>Hacuaha hacuiin cajindaya naja Nina xi cjuatsehen nihña ta cajindaya naja me xi fë jyë naja. <sup>8</sup>Vëhë xi me xi tsitjungui cjuatacun vëhë ne, hacuiin xuta tsitjungui me ta Nina xi tisua nuju Hasen rë ne, vëhë tsitjungui me.

<sup>9</sup>Quihndë ne, tsajin sahmi ngu jyë xi nihindin nuju xi nihñu hmutacun xingun ta, tsëhë xi suvá Nina ne, ha cavicuya nuju me hacutjin meje rë me xi nihñu hmutacun xingun. <sup>10</sup>Hacuaha tinihñu jain hmutacun yëjë ni xuta xi macjain rë Nina ngajan yëjë ni nandya

tsêhê distritu Macedonia. Peru nújin cojo nuju ta cuatjin ndaja sa nihñu. <sup>11</sup> Hacuaha tejñu tacún xi jyuu nechun, nihñucuendun xi tsujun. Peru nihñu xa, sacuatjin xi ha cavicuyin nuju. <sup>12</sup> Sa xi cuatjin nihñu ne, hisca cojo xuta xi macjaain rê Nina ne, cjuaharcun nuju me, hacuaha sacú nuju yêjê ni xi cuma meje nuju.

*Cuinduva nga Nai naja*

<sup>13</sup> Quihndê ne, meje niji xi cuma chaya nuju hacutjin cuatju nima xi ha cahme, cojo sa xi hacuiin jemu choho cuma nuju sacuatjin rê xuta xi sacuiin rê me ngu cjuetacun, tsêhê xi macjaain rê me Nina. <sup>14</sup> Tsêhê xi macjain naja xi cahme jain Jesús hacuaha cavascaya nga rê me ne, vêhê xi hacuaha macjain naja xi Nina ne, tsingascaya rê me nima xi xcun cjuahñu rê camacjain rê me Jesús.

<sup>15</sup> Vêhê xi nguehe tihin cumachaya nuju ngu cjuat tsêhê Nai naja ta jarê ngayaan xi nechun quicun hisca xi cuya Nai naja ne, hacuiin cuma titjun ngayaan tsêhê me xi ha cahme. <sup>16</sup> Tsêhê xi suvá Nai naja ne, cuinduvajne me tsêhê ngahnga. Cuinuhya rê sacuaha cjuat rê ngu me xi vitexa jain. Cuinuhya rê sacuaha cjuat rê ngu ángel xi ma titjun. Cuinuhya rê sacuaha xta rê tyjo xi tsêhê Nina. Xi camá ne, nima xi camacjain rê me Cristu ne, tjun tjun me cuascaya rê me, <sup>17</sup> sehe ngayaan xi nechun quicun ne, cjuaha Nina ngayaan ngajñi rê yufi, hacuaha cojo nima xi cuacun jan, cumatangun ngayejen ni cojo Nai naja ngajan ngajñi tjo. Sehe yêjê ni hora yêjê ni nixtin cuinechan cojo rê Nai naja. <sup>18</sup> Vêhê xi meje rê xi tinújun cojo xingun cjuat vihi ne, sacú nuju cjuetacun.

## 5

<sup>1</sup> Peru sacuaha nixtin xi cuma cjuacjintacun vêhê ne, sáhmii nguýê nihindin nuju ta, <sup>2</sup> tsêhê xi ngayun ne, ha hyun ta, hya xi cuya Nai naja ne, jemu cjuercun camahani rê ngayêjê ni xuta, tsêhê xi tu ñahñu ni cuinduva me. <sup>3</sup> Hya xi cuichja xuta xi macjain rê Nina ta: “Jemu ndatjin ta jemu jyuu tjin”, peru hya ne, tu ñahñu ni ne cuatju me ngu cjuañihi, sacuatjin vatju ma ngu chjuun xi tu ñahñu meje tsin quihndi rê me. Hane cuatjin cuatju me ta hisca ngu me cuatjinhngaain me. <sup>4</sup> Xi nguixun cjuêhe ngu chêjê ne, jemu cjuercun naja. Peru ngayun ne, hacuiin jñu camaha tsujun xi nihñu cjuatsehen, xi cjuercun nuju hya xi cuechutaha nixtin xi cuya Nai naja ta, <sup>5</sup> ngayujun ni ne, nechun sacuaha hasen rê nguixtin. Ngayaan ne, hacuiin jñu camaha tsajan xi nihña cjuatsehen. <sup>6</sup> Cuatjin xi mijí rê xi nechun sacuaha xi titsuñafen, sacuaha viyuju yahnga xuta xi macjain rê me Jesús ta, meje rê xi nechun quicun, nguñajatacun. <sup>7</sup> Hatuxa xcusun naja xi nguixun xi tsjuñafen. Hacuaha xcusun rê xuta chihi ne, nguixun ma chihi me. <sup>8</sup> Peru ngayaan ne, tsêhê xi nechun sacuaha ndavá rê nguixtin ne, vêhê xi meje rê xi nechun nguñajatacun. Meje rê xi ndaja cumacjain naja hacuaha nihña hmu tacun xinguen. Xi cuatjin nihña ne, hacuaha vêhê ne, cuisecoo naja ta cuetjo naja Nina. Hacuaniitjin ni meje rê xi cuetahan tacun ta cjuaquixi xi cuaxêtje naja Nina. <sup>9</sup> Cuatjin meje rê ta, tsêhê xi Nina ne, hacuiin cavaxijin me ngayaan xi cuatjun castigu rê me ta, cavaxijin naja me xi cuaxêtje naja me, ngayaan xi macjain naja Nai naja Jesucristu ta, <sup>10</sup> Jesucristu ne, cahme me ngatsê naja, cojo sa xi tangun cuinechan cojo rê me, sa xi nechancuaan cjuahñu o sa xi nima camá ngayaan. <sup>11</sup> Vêhê xi meje rê xi tinújun cojo xingun cjuat vêhê, hane sacú nuju cjuetacun, sacuatjin xi ha tinihñú.

*Pablo ne, tisua me cjuat xuta xi macjain rê Nina*

<sup>12</sup> Ngayun ne, nihñu favor ne, chjuhuncun rê xuta xi cavaxijin Nai naja xi cuma titjun tsujun, xi sahmi xa ngajñi nuju, xi tsinguixi nuju. <sup>13</sup> Jemu meje rê xi chjuhuncun me hacuaha nihñu hmu tacun me tsêhê xi tisahmi me xa vêhê. Ndaja tinechan cojo xingun.

<sup>14</sup> Hacuaha nújin cojo nuju ta xuta xi mijí sahmi xa ne, tinújun cojo rê me catisahmi me xa. Hane xuta xi jima chuvacacun ne, tinújun cojo rê me, hane sacú rê me cjuetacun. Hacuaha tisecuun rê me xi cjiê ndaja cumacjain rê. Hane tjin nuju cjuajeya cojo ngayêjê ni me.

<sup>15</sup> Hacuaha nechun cuidadu xi hacuiin choho nihñu cojo rê me xi choho sahmi cojo nuju ta, xi meje rê ne, yêjê ni hora yêjê ni nixtin ne, suvá cjuandaja nihñu cojo xingun hacuaha cojo yêjê ni xuta.

<sup>16</sup> Ndaja catama nuju yêjê ni nixtin. <sup>17</sup> Meje rê xi jemu nihñu oración. <sup>18</sup> Hacuaha hatuxa tuhun nacuechji rê Nina, handasa choho cuatjun cuma. Cuatjin meje rê Nina xi nihñu, ngayujun ni xi macjain nuju Jesucristu.

<sup>19</sup> Hacuain nitjunngun xcusun xi sahmi Hasen rê Nina ngajñi nuju. <sup>20</sup> Hacuain nitjunngun cjuat rê me xi chja cjuat xi casua Nina. <sup>21</sup> Peru chjuhunchuvun ngayêjê ni cjuat. Hane jarê cjuat xi ndaja ne, vêhê tiseñuju hacuaha tinuhyun. <sup>22</sup> Peru tétjunxun tsêhê ngayêjê ni cjuatsehen.

<sup>23</sup> Nina xi tsicjê me cjuachan ne, catisahmi tyjahi tyjahi me hasen nuju cojo cjuatacun nuju cojo jojo nuju, cojo sa xi nixtin hya xi cuya Nai naja Jesucristu ne, tsajin camahani jyê

nuju. <sup>24</sup>Me xi tivaxijin nuju ne, cjuaquixi xi chja me. Hatuxa sahmichihin me hacutjin xi chja me.

*Cjua xi cuijnetaha*

<sup>25</sup>Ngayun ne, nihñu oraci6n ngats6 niji.

<sup>26</sup>Nuvuncjun y6j6 ni me xi macjain r6 Jes6s xi tuhun r6 me ngu nina niji, sacuaaha xcusun naja.

<sup>27</sup>Ts6h6 xi cavaxijin n6 Nai naja ne, v6h6 xi vit6xa nuju xi n6jun cojo xujun vi xi cuihnd6 y6j6 ni me xi macjain r6 Jes6s.

<sup>28</sup>Cjuandaja r6 Nai naja Jesucristu ne, catisehen xahasen nuju.

## Cjua xi ma jo catsihindu San Pablo xi cumá rê xuta nandya Tesalónica

<sup>1</sup> Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi ma tangun ngayun tsêhê xi macjain nuju Nina Nahmi naja cojo Nai naja Jesucristu, ngajan nandya Tesalónica. <sup>2</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya.

*Hya xi cuinduva Cristu ne, Nina ne, sahmi me castigu xuta xi tjin jyê rê*

<sup>3</sup> Hachu tjin nihi xi tihin nacuechji rê Nina ngatsê nuju ngayun. Hacuaha ndatjin xi cuatjin nihni ta, tsêhê xi jemu xcun tivangun xi macjain nuju, hacuaha hitsê sa jima tsejen cjuahmutacun xi tjin nuju jima ngu ngayun cojo xingun. <sup>4</sup> Vêhê xi ngayin ne, hya xi ma tangun me xi macjain rê Nina ne, nújin cojo rê me ta jemu sua má nihi tsêhê xi ngayun ne, jemu yehe tacún hacuaha jemu macjain nuju, handasa jemu yehe cjuañihi xi tivatjun tijima. <sup>5</sup> Cuatjin ma tsejen xi Nina ne, fahachuva naja me cojo cjuaquixi. Hane xi cuijnetaha ne, cuichja Nina ta sacú nuju ngu cahndê hiscan xi me vêhê má titjun me, ta ngatsê rê vêhê xi jercu choho tivatjun tijima.

<sup>6</sup> Xi tsingatahacacun Nina ne, yêjê ni xuta xi choho tisahmi cojo nuju ne, ndatjin xi hacuaha cuma ngojo cojo rê me, <sup>7</sup> hacuaha ndatjin xi ngayaan xi choho tivatjuun tijima ne, sacú naja ngu cahndê xcun Nina xi chjahanjendan, hya xi Nai naja Jesús cuya me tsêhê ngahnga ngajni rê ngu ndihi jyê cojo ángel rê me xi jercu hñu ngahñu rê. <sup>8</sup> Hya sahmingojo me cojo xuta xi macjaain rê Nina, xi hacuaha hndiin me tsêhê cjua ndajiyihi tsêhê Nai naja Jesús. <sup>9</sup> Hane castigu xi cuma xuta xi cuacun vê ne, cuaxêxin Nina me ngu ladu hiscan xin, xi tsajin nu tsajin nixtin xi cuechu me xcun Nai naja. Cuatjin ne, xi scuiin me hasen ndajiyihi cojo ngahñu rê Nai naja. <sup>10</sup> Cuatjin cuma nixtin xi cuinduva Nai naja xi cuma jyê cuma hnga me. Hya ne, cuinduva me, cojo sa xi ngayêjê ni xuta xi camacjain rê me ne, cjuaharcun rê me hacuaha cjuercun rê me, hisca cojo ngayujun ni ta tsêhê xi camacjain nuju cjua ndajiyihi xi canújin cojo nuju.

<sup>11</sup> Vêhê xi ngayin ne, jercu chjahyin rê Nina naja xi ngayun xi má yun ladu rê me ne, catamachji rêhê rê me ngayun. Hacuaha chjahyin rê Nina xi cojo ngahñu rê me ne, cuetjucaa jain yêjê ni cjuandaja xi ningatuhuntacun hacuaha yêjê ni xa xi nihñu tsêhê xi macjain nuju me. <sup>12</sup> Hacuaha xi cuatjin cumá ne, xuta xi vutsejen me ne, sahmi jyê sahmi hnga me Nai naja Jesús, hacuaha ngayun ne, cuma yehe cuma hnga ngayun ngatsê rê cjuandaja rê Nina naja cojo cjuandaja rê Nai naja Jesucristu.

## 2

*Cuinduva ngu cha tsehen*

<sup>1</sup> Quihndê ne, ha hyun xi Nai naja Jesucristu ne, cuinduva nga me xi sahmi tangun naja me. Vêhê xi nújin cojo nuju ta <sup>2</sup> hacuiin ngutjen cumacjintacun, hacuiin rcun cuma, sa xi sacú nuju cjua xi ha cavechu nixtin xi cafehe Nai naja. Handasa cuatjin cuichja xuta cojo nuju, o sa xi cuichja me xi cuatjin casua Nina me cjuatacun, o sa xi chjuhunntsun ngu xujun xi cuichja cuatjin sacuaha xi ngayin caningatjin, peru hacuiin cumacjain nuju ta, quixiin. <sup>3</sup> Catuun camahani cahndê xi cumandacha ngayun, tsêhê xi chaja sa xi cuechu nixtin vêhê ne, titjun ne, jemu sahmi xuta condra Nina, hacuaha cuinduva ngu cha tsehen xi hatuxa cuechiin cha xcun Nina. <sup>4</sup> Cha tsehen jan ne, choho scuêê cha yêjê ni xi hmí nina, hacuaha choho scuêê cha yêjê ni xi vechu chuva rê xi chjaharcun rê. Hane hisca cjue cha cueña cha cahntsua yungun xi matitjun xi tsêhê Nina, hane cuichja cha ta cha vêhê nina cha.

<sup>5</sup> ¿Há vitsjiin nuju ta ha cachjá cojo nuju cjua vihi, hya xi cavitejña nandya nuju? <sup>6</sup> Hacuaha ha hyun ta xi ngutjen ne, tsajin cahndê cuinduva cha tsehen jan ta, cuinduva cha hisca xi cuechu nixtin xi Nina sua me cahndê. <sup>7</sup> Hacuaha cjuatsehen ne, hisca hyan, ta jemu tijima yehe. Hane hisca xi cjuexin me xi tivechja cahndê ne, <sup>8</sup> sehe hya cuinduva cha tsehen jan. Peru Nai naja Jesús ne, tsiquehen me cha cojo tjo hntsua ni me, hacuaha tsicjê me cha, hya xi cuinduva me. <sup>9</sup> Hya xi cuinduva cha tsehen jan ne, tsêhê xi Satanás tsingatju rê cha ne, jemu hñu ngahñu rê cha hacuaha jemu jíin xcusun cjuarcun ndacha xi sahmi cha. <sup>10</sup> Hacuaha sahmi cha yêjê ni xcusun cjuatsehen xi cuindacha cha xuta. Cuindacha cha xuta xi cuechiin xcun Nina ta, tsêhê xi mijí rê me chuyiin rê me cjuaquixi xi vaxêtje naja. <sup>11</sup> Ngatsê rê vêhê ne, sua Nina cahndê xi cumandacha xuta jan, cojo sa xi cumacjain rê me cjuandesu jan. <sup>12</sup> Ngajan xi cuma me castigu, ngayêjê ni me xi camacjaain rê cjuaquixi jan ta, tu cjuatsehen jan cachuya rê me.

*Nina cavaxijin nuju me xi cuetjuntjun*

<sup>13</sup> Peru ngayin ne, meje rë xi jercu tihin nacuechji rë Nina ngatsë nuju ngayun xi hmucaacun nuju Nai naja ta, tsëhë xi Nina ne, cavaxijin nuju me xi tjun tjun ngayin cuetjuntjun. Ngatsë rë xi Hasen rë Nina ne, titsityjahi rë xahasen nuju xi tsajin xi cún nuju xcun Nina, hacuaha ngatsë rë xi macjain nuju cjuaquixi ne, vëhë xi cuetjuntjun. <sup>14</sup> Hya xi canújin cojo nuju cjuandajiyihi rë Nina ne, hya cavaxijin nuju me xi cuetjuntjun. Cavaxijin nuju me xi sacú nuju cjuahñu ndajiyihi sacuaha xi tjin rë Nai naja Jesucristu. <sup>15</sup> Vëhë xi nújin cojo nuju ta xi camacjiintacun, hacuaha xi canichayuun cjuaxi cavicuyn nuju, cjuaxi canújin jan cojo cjuaxi canihindín jan. <sup>16</sup> Nai naja Jesucristu cojo Nina Nahmi naja ne, casahmi hmucaacun me ngayaan, hacuaha cojo cjuandaja rë me casua naja me cjuetacun xi tsajin hora tsajin nixtin xi cjuë, hacuaha casua naja me ngu cjuaxi ndajiyihi xi nechayan ni rë nixtin xi cuetjucaa. <sup>17</sup> Me vëhë ne, catisua me cjuetacun xahasen nuju, hacuaha catisua nuju me ngahñu xi cuinújun hacuaha xi nihñu yëjë ni cjuandaja.

### 3

*Nihñu oración ngatsë niji*

<sup>1</sup> Quihndë ne, nihñu oración ngatsë niji, cojo sa xi cjuaxi rë Nai naja ne, xati cuechu jingujyë ni, hacuaha cojo cjuasua cjuahatsja xuta cjuaxi rë me, sacuatjin camá ngajñi nuju. <sup>2</sup> Hacuaha nihñu oración, cojo sa xi cuetjintjin tsëhë xuta tsehen ta, hacuiin ngayëjë xuta xi macjain rë me Nina. <sup>3</sup> Peru Nai naja ne, hatuxa quixi me cojo cjuaxi rë me. Sua me yun ngahñu xi scaa nuju, hacuaha cuetjo nuju me, cojo sa xi tsajin mé cuma sahmi Satanás cojo nuju. <sup>4</sup> Ngatsë rë Nai naja ne, fë mangutacuin ta ngayun ne tinihñú jain, hacuaha nihñu sa cjuaxi vitexin nuju. <sup>5</sup> Nai naja ne, catincha me cjuahmutacun rë Nina xahasen nuju, hacuaha catisua nuju me ngahñu rë Cristu xi scaa nuju tsëhë yëjë ni cjuacjintacun.

*Meje rë xi nihña xa*

<sup>6</sup> Quihndë ne, sacuahatjin meje rë Nai naja Jesucristu ne, vitexin nuju xi naxunxun yoyo nuju tsëhë yëjë ni me xi jemu tsëhë me sahmi me xa, hacuaha xi sáhmi hacutjin xi cavicuyn nuju xi nihñu. <sup>7</sup> Ngayun ne, ha hyun ta meje rë xi nihñu ngu xa sehe sacú xi xinu, sacuatjin xi cahyun xi canihñí. Hacuiin tu jyu ni cavinechinyinjñi ngajñi nuju ne, <sup>8</sup> hacuiin tu cjuatjo ni casacu niji niñu xi cachini ta, nixtin nixten ne, jercu canihñí xa, cojo sa xi hacuiin ngayun nihñu gastu ngatsë niji. <sup>9</sup> Handasa satë niji cahndë xi chjahyin nuju xi cuisecun niji, peru cachjahyiin ta canihñíxin xa, xi cuejñi ngu xcusun xi cuatjin nihñu. <sup>10</sup> Hacuaha hya xi cavinechintihin cojo nuju ne, hya canújin cojo nuju ta: Me xi mijí sahmi xa ne, xi catuun sinë me. <sup>11</sup> Cuitjin tinújin cojo nuju ta, tsëhë xi casacu niji cjuaxi ngajñi nuju ne, hinchajñi me xi sáhmi xa. Tu tsingisehenjñi me xcun cjuacjintacun xi ña cuendaain rë me. <sup>12</sup> Ngajan xi vitexin rë me xi cuacun vë, sacuatjin meje rë Nai naja Jesucristu, xi catiyujuyuu cjuatacun rë me, hane catisahmi me xa xi sacú sinë me.

<sup>13</sup> Hacuaha ngayun ne, xi camacjiintacun tsëhë cjuandaja xi tinihñú. <sup>14</sup> Sa xi tjin jarë me xi mijí cuihndë cjuaxi tinújin xcun xujun vihi ne, chjuhuncuendun jarë me jan, hacuaha xi caninguisuunjñuu cojo rë me, sehe me vëhë ne, cuma sava rë me. <sup>15</sup> Peru hacuiin choho chun me ta, tuhun rë me cjuaxi cojo cjuandaja ta, tsëhë xi xingun me.

*Cjuaxi cuijnetaha*

<sup>16</sup> Hane Nai naja, me xi tsëhë cjuajeya ne, catisua nuju me cjuajeya yëjë ni nixtin hacuaha xcun yëjë ni cjuacjintacun. Hacuaha Nai naja yaha nuju me ngayujun ni. <sup>17</sup> Suva ngahan, Pablo, tsihindu nuju ngu cjuaxi vi, xi tisuá nuju ngu nina. Hatuxa xcusun naha xi cuitjin tsihindu xcun yëjë ni xujun xi tsingátju. <sup>18</sup> Cjuandaja rë Nai naja Jesucristu ne, catisehen xahasen nuju ngayujun ni.

## Xujun xi titjun catsihindu San Pablo cha Timoteo

<sup>1</sup> Ngahan Pablo ne, apóstol tsèhë Cristu Jesús má ngahan ta, tsèhë xi cuatjin cavitexa Nina, me xi vaxètje naja, hacuaha cuatjin cavitexa Cristu Jesús, me xi vetahan tacun. <sup>2</sup> Tsihindu ri xujun vihi, ngaye Timoteo. Ngaye ne, sacuaha quihndi ndaja naha ngaye ta, tsèhë xi camacjain ri cjuua rë Nina, hora xi cachjá cojo ri cjuua jan. Nina Nahmi naja cojo Nai naja Cristu Jesús ne, catamayuma rë me ngaye, catisua ri me cjuandaja cjuajeya.

*Tjin xuta xi vicuya ngu cjuachacun xi machjiriin*

<sup>3</sup> Sacuahatjin xi ha cachjá cojo ri, hora xi cavétju cèjë hiscan ladu tsèhë Macedonia ne, tinechintehe sa ngajan nandya Efeso. Tjin ngu jo cha ngajan xi tivicuya cha cjuachacun xi hacjahi. Hane ngaye ne, titexe rë cha xi cuacun vë ta ha quihndë cuicuyaaïn sa cha cuatjin. <sup>4</sup> Hacuaha titexe rë cha ne, hacuiin cuetaharcu cha yëjë cuentu rë xutachanga naja ta, tsèhë xi hacuiin yëjë xi cjuaquixi. Ngu jo cuentu xi cuacun vëhë ne, jemu nduju fi, hane tsajin mé machjirëhë ta suvá ni xi si vangui, hacuaha tsajin mé visecoo naja xi nihña hacutjin xi meje rë Nina. Tsèhë xi macjain naja cjuua rë Nina ne, vëhë xi hyan hacutjin xi Nina meje rë me xi nihña.

<sup>5</sup> Tichjá cojo ri xi cuatjin titexe rë cha xi cuacun vë, sehe cuma tyjahi xahasen rë cha, cuma ndajyihí cjuatacun rë cha, hacuaha cumacjain nguñajacacun rë cha. Xi cuatjin ne, hacuaha sacú rë cha cjuandaja xi cuma tsihmucacun xicjin cha. <sup>6</sup> Peru ngu jo cha xi cuacun vë ne, cachaja cha ndiya rë cjuaquixi, cavetjuxin cha tsèhë cjuandaja jan, hane tu cjuua xi machjiriin, vëhë tivisiajmi cha. <sup>7</sup> Meje sahmi cha maestru tsèhë cjuua xi cavitexa Nina xutachanga naja. Peru hvíin cha mé vijne cjuua xi visiajmi cha, hisca suvá cha vijniircu cha cjuua xi vicuya nguñaja nguñajacacun cha.

<sup>8</sup> Quihndë ne, ha hyan ta cjuua xi cavitexa Nina jan ne, jemu ndaja. Peru meje rë xi cuijnercun, mé ngatsë rë xi Nina ne, cavitexa me cjuua jan. <sup>9</sup> Nina ne cavitexa me cjuua jan, peru hacuiin ngatsë rë xuta xi ndaja sahmi ta, ngatsë rë xuta xi choho sahmi, xuta xi hndiin tsèhë ngu xuta xi matitjun tsèhë, xuta xi cuendaain rë tsèhë Nina, xuta xi sahmi cjuatsehen, cojo xuta xi faharcuaain rë Nina, xuta xi macjaain rë cjuua rë Nina, xuta xi tsiquehen nahmi rë, tsiquehen naa rë, cojo sa tsiquehen xicjin. <sup>10</sup> Hacuaha cavitexa Nina cjuua jan ngatsë rë xuta xihin xuta chjuun xi tjin chjuunnahñu rë, xuta xi xanda, xuta xi vinchahma ngu xuta sehe fehya tujún xuta rë, xuta xi chja cjuandacha cojo xicjin, xuta xi chja cjuandacha hisca xcun xutaxa rë, hacuaha xuta xi sahmi vihi sahmi vëhë xi matanguaain cojo cjuaquixi. <sup>11</sup> Peru cjuaquixi jan ne, matangun cojo cjuua ndajyihí tsèhë Nina. Hacuaha Nina xi jercu ndaja me ne, me vëhë casua ná me cjuua xi cuatjin cuichjá.

*Nacuechji rë Nina tsèhë cjuandaja rë me*

<sup>12</sup> Suá nacuechji rë Nai naja Cristu Jesús ta, tsèhë xi camangucacun me cojo ná xi casua ná me xa rë me, hacuaha tisua ná me ngahñu cjuua xi scaa ná sahme xa jan. <sup>13</sup> Cuatjin casahmi me cjuandaja cojo ná quihndë, handasa hatsëë ne, jemu choho cachjá tsèhë me hacuaha jemu choho casahme, xi jemu yehe cjuafihí casuá rë xuta ladu rë me. Peru Nai naja ne, cama yuma rë me ngahan ta, tsèhë xi cjëë xi cumacjain ná me, hane vëhë xi hveen mé xi casahme. <sup>14</sup> Hane jemu casahmi camahani me cjuandaja cojo ná, xi casua me cahndë xi camacjain ná me hacuaha xi caveya me cjuahmutacun cahntsua xahasen naha. Cuatjin sahmi me cojo naja xi nihña tangun cjuatacun naja cojo Cristu Jesús.

<sup>15</sup> Cjuua xi cuichjá nguehe ne, jemu cjuaquixi, hacuaha ndaja tjin xi cumacjain rë ngayëjë ni xuta ta, Cristu Jesús ne, canduva me nguehe ngasunhndë xi cuaxëtje me xuta xi sahmi cjuatsehen. Tsèhë yëjë xuta tsehen xi cuacun jan ne, ngahan hitsë sa tsehen ngahan. <sup>16</sup> Peru Jesucristu ne, camayuma rë me ngahan ta, tsèhë xi meje rë me xi cumachaya rë yëjë ni xuta ta jemu sahmi jyë cacun me cojo ngu xuta xi jercu sahmi cjuatsehen. Sacuatjin xi casahmi me cjuandaja cojo ná ne, hacuaha ni tjin sahmi me cjuandaja cojo yëjë ni xuta xi cumacjain rë cjuua rë me. Sehe sacú rë xuta jan cjuahñu xatsë xcun Nina. <sup>17</sup> Vëhë xi meje rë xi hatuxa chjahancun rë Nina, ndaja cuinújan tsèhë Nina yëjë ni nixtin ta, me vëhë xi matitjun me, xi vitexa me yëjë ni nixtin ta, suvá ni me vëhë xi Nina me, hacuaha matsijin naja me. Hacuaha tsajin nixtin tsajin hora cueya me. Cuatjin jain.

<sup>18</sup> Ngaye Timoteo ne, sacuatjin cjuatacun xi ha cachja me xi hmí profeta tsiji hatsëë nixtin tsan ne, ha chuva vëhë ni tivitëxa ri xi nihñi. Hane cjuatacun vëhë ne, cumachjirëhë rijí xcun xa rë Nina xi tinihñi sacuaha tjin machjirëhë ngu quicha ngajñi rë ngu si. <sup>19</sup> Mijí rë xi cuihin ngaxtin xi macjain ri cjuua rë Nina ta, meje rë xi nihñicuende cjuatacun ndajyihí xi quichehe. Ngu jo xuta ne, casahmi cuendaain me cjuatacun ndajyihí xi cavaha me, hane cuatjin catsichaja me cjuatacun rë me, hacuaha ha quihndë macjaain rë me Jesucristu.

<sup>20</sup> Cuatjin cavatju cha Himeneo cojo cha Alejandro camá. Vêhê xi ngahan ne, casuá cahndê xi suandyá hitsê Satanás cha xi cuacun vê, sehe cumachaya rê cha ta cuaaintjin camahani xi choho chja cha tsêhê Nina.

## 2

### *Meje rê xi nihña oración*

<sup>1</sup> Vêhê xi nguehe cuichjá cojo ri ta jemu meje rê xi chjahyan rê Nina cjuandaja, meje rê xi tahan nacuechji rê me, hacuaha meje rê xi nihña oración ngatsê rê yêjê ni xuta. <sup>2</sup> Meje rê xi nihña oración ngatsê rê xutaxa rê, hacuaha ngatsê rê ngayêjê ni xuta xi vitexa naja, sehe ngayaan ne, tsajin yo suandyá naja suaxti naja, xi tsejen xi chjahancun rê Nina, hacuaha xi nihña cjuandaja. <sup>3</sup> Jercu ndaja tjin xi cuatjin nihña oración ta, Nina, me xi vaxêtje naja ne, cuatjin chuya rê me. <sup>4</sup> Meje rê me xi ngayejen ni xuta ne, cuetjuntjen hacuaha ndaja cuijnercun cjuá xi cjuaquixi. <sup>5</sup> Ngu ni Nina xi tacun me, hacuaha ngu ni me xi sahmi xi matangun cjuatacun naja ngayaan xuta cojo Nina. Me xi cuatjin sahmi jan ne, hacui ngu xuta xi hmí Cristu Jesús. <sup>6</sup> Me vêhê xi casua me yojo rê me xi cuechjitje me jyê naja ngayejen ni ngayaan. Hane hya xi cavetjuaca nixtin ne, cuatjin cama tsejen xi Nina ne, meje rê me xi cuetjuntjen. <sup>7</sup> Vêhê xi casatê ná xi má ngahan apóstol, xi cuicuyá rê xuta xi xín nangui rê me, cuichjá cojo rê me cjuá xi cjuaquixi xi macjain naja. Hatuxa cjuaquixi cjuá xi chjá cojo ri. Hacuiin vindácha.

<sup>8</sup> Hacuaha meje ná xi xuta xihin ne, sahmi me oración ha tu jani ni hiscan xi matangun me. Hya xi scunitjen me tsja me xi sahmi me oración ne, meje rê cojo ngu xahasen tyjahi. Mijí rê xi quitaha cjan rê me, hacuaha mijí rê xi cojo si. <sup>9</sup> Hacuaha yachjin ne, cataja me tsjian rê me hacutjin xi ndaja tjin, hacuiin ngu xcusun xi jemu nchana tsejen. Mijí rê xi cuircu cun sahmi me tsjarcu me. Mijí rê xi tsindaja me yojo rê me cojo oro, cojo tuseti xi jemu hnga chjí rê, cojo tsjian hnga chjí rê. <sup>10</sup> Meje rê xi sahmi me cjuandaja ta, cuatjin ndaja tsejen tsêhê yachjin xi macjain rê me Nina. <sup>11</sup> Hacuaha hya xi viseñuju me ngu cjuá rê Nina ne, catísinguijne me yojo rê me, jyu ni catiyuju me. <sup>12</sup> Hacuaha suaan cahndê xi yachjin ne, cuicuya me ngajñi rê xuta cjin, hacuaha suaan cahndê xi me vêhê cuitexa me xuta xihin. Xi meje rê ne, tu catiseñuju ni me. <sup>13</sup> Cuatjin meje rê ta, tsêhê xi hya xi casahmi Nina xuta ne, titjun casahmi me xutachanga naja Adán, sehe má jo ne, casahmi me Eva. <sup>14</sup> Hane Adán ne, hacuiin camandacha me ta, chjuun jan ne, me vêhê xi camandacha me, hane cuatjin camá xi casahmichiin chjuun jan cjuá xi cavitexa Nina. <sup>15</sup> Peru yachjin ne, meje rê xi catisacu rê me quihndi. Cuatjin xi cuetjutje me, sa xi macjain rê me Nina, sa xi tsihmu cacun xicjin me, sa xi tyjahi xahasen rê me, hacuaha sa xi vetjo me cjuatacun rê me.

## 3

### *Xuta xi vitexa ngajñi rê xuta ladu rê Nina*

<sup>1</sup> Nguehe cuichjá cojo ri ngu cjuá xi cuatjin jain: yo xi meje cuitexa sacuaha obispo ngajñi rê xuta ladu rê Nina ne, jemu ndaja xa xi meje rê xuta jan. <sup>2</sup> Ngajan xi me xi cuitexa ngajñi rê xuta ladu rê Nina ne, meje rê xi ngu xuta ndaja xi tsajin mé choho sahmi. Meje rê xi ngu xuta xi ngu ni chjuun rê, hacuaha xi vetjo yojo rê, xi tacun cahndê cjuatacun rê. Mijí rê xi tujyê sahmi me. Meje rê xi ngu xuta xi cojo cjuandaja cjuahatsja me xuta xi nduva tjengui rê me ndava me. Hacuaha meje rê xi chutaha cjuatacun rê me xi cuicuya me xuta. <sup>3</sup> Mijí rê xi ngu xuta chihi. Mijí rê xi choyo xuta me ta, meje rê xi tjin rê me cjuandaja cjuajeya. Mijí rê xi jercu tsimeje me tujún. <sup>4</sup> Hacuaha me xi vitexa ngajñi rê xuta ladu rê Nina jan ne, meje rê xi ngu xuta xi ndaja sahmi gobiernu ndava, hacuaha quihndi rê ne, vihndê tsêhê hacuaha faharcun rê. <sup>5</sup> Ta sa xi hacuiin ndaja ma sahmi me gobiernu ndava me ne, ¿hacutjin cuma cjuahacuenda me xuta ladu rê Nina? <sup>6</sup> Hacuaha mijí rê xi ngu xuta xi sehe tiña nixtin cavisehen me ndiya rê Nina, sá tu jemu sahmi jyê xuta jan yojo rê me, cjuê ne, cuatju me castigu rê Nina, sacuaha tjin cavatju xitsehen matitjun camá. <sup>7</sup> Hane meje rê xi ngu xuta xi ha chjaharcun rê me, xi hisca cojo xuta xi hacuiin ladu rê Nina ne, ha tifaharcun rê me. Cuatjin xi xuta xi vitexa jan ne, hacuiin cuetju sava me, hacuaha hacuiin tsinguetsun xitsehen xi matitjun cjuatacun rê me.

### *Xuta xi visecoo ngu me xi vitexa*

<sup>8</sup> Hacuaha ni tjin ni xuta xi visecoo rê ngu me xi vitexa jan ne, meje rê xi ngu xuta xi ha chjaharcun rê, ngu xuta xi hacuiin jo xcun jo hntsua. Mijí rê xi ngu xuta xi jercu hvi xan. Mijí rê xi ngu xuta xi jercu tsimeje tujún. <sup>9</sup> Meje rê xi ngu xuta xi cojo ngu cjuatacun tyjahi macjain rê cjuá xi cama ngascan casuacuenda naja Nina, cjuá xi tsajin yo vêê rê hatsêê nixtin. <sup>10</sup> Tjun tjun ne, meje rê xi chjahachuva rê xuta jan. Hane sa xi tsejen ta tsajin mé jyê rê xuta jan ne, cuma cjue me xa xi cuisecoo me xuta xi vitexa. <sup>11</sup> Hacuaha chjuun rê me

ne, meje rë xi ngu chjuun xi ha chjaharcun rë, ngu chjuun xi visiajmii cjuandesu. Meje rë xi ngu chjuun xi vetjo me cjuatacun rë me, ngu chjuun xi ha sahmi chihin xa rë. <sup>12</sup> Hane xuta xi visecoo rë ngu me xi vitexa jan ne, meje rë xi ngu ni chjuun rë me. Hacuaha meje rë xi ngu xuta xi ndaja sahmi me gubiernu ndava me cojo quihndi rë me. <sup>13</sup> Hane me xi jemu ndaja jain xa sahmi ne, jercu cjuaharcun xuta me, hacuaha hitsë sa tsacjuuin me xi cuichja me cjuu ndajyihl tsëhë Cristu Jesús xi macjain naja.

*Ngu cjuu rë Nina xi tsajin yo vëë*

<sup>14</sup> Quihndë xi titsihindu ri cjuu vihi ne, vetahá cáacun ta xati cuma cjuë tjëngë ri. <sup>15</sup> Peru sa xi cuindeya ná ne, cjuu xi titsingátju ri vi ne, sua cumachaya ri hacutjin xi mameje rë xi sahmi xuta rë Nina. Hane xuta rë Nina jan ne, hacui ngayaan xi macjain naja Nina xi quicun, hacui ngayaan xi nújantjen ngatsë rë cjuaquixi. <sup>16</sup> Cjuatacun rë Nina xi tsajin yo vëë, xi macjain naja vi ne, súv tsejen ta jemu vengui chji rë:

Cristu Jesús ne, hya xi canduva me nguehe ngasunhdë vihi ne, camá me ngu xuta sacuahatjin ngayaan xuta.

Peru tsajin camahani jyë rë me, chja Hasen xi tsëhë Nina.

Hacuaha cavëë ángel me.

Hane camachaya rë xuta tsëhë me yëjë ni nangui.

Hacuaha camacjain rë xuta me jingujyë ni ngasunhdë.

Hacuaha cafahatsja Nina me ngajan ngahnga.

## 4

*Xuta xi vicuya cjuandacha*

<sup>1</sup> Quihndë ne, Hasen rë Nina ne, chja quixi ta cuechu nixtin xi yahnga xuta ne, cuiyujuxin me cjuu tsëhë Cristu Jesús, cjuu xi macjain naja, hane tu cjuu tsëhë xitsehen xi vindacha ne, vëhë scutaya me hacuaha vëhë cuetaharcu me. <sup>2</sup> Hacuaha cuetaharcu me cjuu xi cuicuya xuta xi jo xcun jo hntua xi vindacha. Sacuahatjin má taja chuxin rë ndyaja hiscan xi faha chu quicha ne, cuatjin cuetsun cjuatacun rë xuta ndacha xi cuacun vë. <sup>3</sup> Cjuavixan ne, suaain me cahndë cuma, hacuaha cuichja me ta tjin yahnga xcusun xi ndajin xi xinë. Peru Nina ne, casahmi me yëjë ni xcusun ne, cuma xinë ngayejen ni xi macjain naja me, ngayejen ni xi cavijnercun cjuatacun xi cjuaquixi. Peru meje rë xi tahan nacuechji rë me ta, <sup>4</sup> yëjë ni xcusun xi Nina casahmi me ne, jemu ndaja. Vëhë xi mijí rë xi nitjunnguen tu mé ni xcusun, ta meje rë xi chjahanntsan, peru tahan nacuechji rë Nina. <sup>5</sup> Hane ngatsë rë cjuu rë Nina cojo cjuu xi nujan hya xi tahan nacuechji rë me ne, vëhë sahmi xi tsajin tsavi tsëhë tu mé ni xcusun.

*Ngu me xi ndaja sahmi xa rë Cristu Jesús*

<sup>6</sup> Sa xi tehe rë xuta ladu rë Nina yëjë ni cjuu xi sehe catsihindu ri vë ne, jemu ndaja nihñi, xi tinihñi xa rë Cristu Jesús. Hacuaha hitsë sa cuma jyë cjuatacun riji ngatsë rë cjuu xi macjain naja, hacuaha ngatsë rë cjuandaja xi cachutaye xi nihñi. <sup>7</sup> Peru xi canihñicuendiin yëjë ni cuentu rë xutachanga naja ta, hacuiin yëjë xi machjirëhë ta, ngu jo ne, súv ni xutachanga naja, me vëhë xi cavaxëcun me. Cahndë rë vëhë ne, ngaye ne, nihñi ngahñu yëjë ni nixtin xi tsejen xi chjehercuin rë Nina nguñajatacuin. <sup>8</sup> Xi niniyan yojo naja ne, jemu ndaja tjin. Peru hitsë sa ndaja tjin xi tsejen xi chjahanrcun rë Nina ta, tsëhë xi hya xi cuatjin nihña ne, sacu naja cjuandaja rë Nina quihndë nguehe xcun cjuahñu naja, hacuaha ni tjin ngajan xcun Nina. <sup>9</sup> Cjuu xi titsihindu vi ne, hatuxa vechu chuva rë xi cumacjain naja ta, tsëhë xi jemu cjuaquixi. <sup>10</sup> Vëhë xi jercu tinihña xa, tsëhë xi ha vetahan tacun Nina xi quicun, Nina xi vaxëtje naja ngayejen ni ngayaan xuta, hacutjin ngayejen ni ngayaan xi macjain naja me.

<sup>11</sup> Ticoye rë xuta cjuatacun xi catsihindu vë, hane hisca titexe rë me. <sup>12</sup> Nihñi cjuandaja ne, sehe tsajin yo xi chuyiin rë tsiji ngatsë rë xi chuva nu riji. Nihñi cjuandaja ne, sehe xuta xi macjain rë Nina ne, xi scuëë me hacutjin nihñi ne, hacuaha ni tjin sahmi me; sacuaha tjin xi ha noje, sacuaha tjin xi nihñi, sacuaha tjin xi hmu tacuin xinguin, sacuaha tjin xi macjain ri Nina, sacuaha tjin xi ndajyihl xahasen riji. <sup>13</sup> Nguyëjë rë xi cjëë cjuëhë ne, hñu tinoje cojo xujun rë Nina, hya xi ma tangun xuta ngajan yungun. Ndaja tinoje cojo rë me ne, catisahmi me cjuandaja, hacuaha ticoye rë me. <sup>14</sup> Nihñixë cojo cjuatjo xi Nina casua ri me, nixtin hya xi me xi vitexa xuta ladu rë Nina ne, cavetahatsja ri me. Cuatjin camá ta, tsëhë xi cuatjin cachja Nina cojo ngu xuta xi hmí profeta xi cuatjin meje rë me xi cuma.

<sup>15</sup> Nihñi nguñajatacuin ngayëjë ni hacutjin xi vitexa xujun vi. Xi cuatjin ne, ngayëjë ni xuta scuëë me hacutjin tihmi xcun cojo cjuandaja rë Nina. <sup>16</sup> Cuidadu ni tjin ri tsiji sove, hacuaha cojo cjuatacun xi vicoye. Tu chihin ni tihincueje cjuatacun vë. Sa xi cuatjin nihñi ne, cuma naxetje yojo riji, hacuaha cuma naxetje me xi cuiseñuju cjuu xi vicoye.



## 5

*Hacutjin xi cuitexe rë xuta ladu rë Cristu*

<sup>1</sup> Sa xi ngu me xi ha nchava ne, choho sahmi me ne, hacuiin cuinojetehe rë me ta, cojo jeya tinoje cojo rë me, hacutjin xi sahmi me cjuandaja, sacuaaha tjin xi nujan cojo nahmi naja. Hacuaha cojo xuta xihin, xi xi vasen xuta ni ne, tinoje cojo rë me sacuaaha tjin xi nujan cojo tseen. <sup>2</sup> Hane yachjin xi ha chicuhun me ne, cojo cjuandaja tinoje cojo rë me sacuaaha tjin xi nujan cojo naa naja. Hacuaha cojo yachjin xi vasen xuta ni me ne, tinoje cojo rë me sacuaaha tjin xi nujan cojo na xi tichjan, cojo ngu xahasen ndajyih.

<sup>3</sup> Yachjin cahan xi cjuaquixi xi tsajin yo ngatsë rë me ne, meje rë xi chjahanrcun rë me, cuisecon rë me. <sup>4</sup> Peru ngu chjuun cahan ne, sa xi tjin rë na quihndi o quihndindai ne, catisahmi nixti jan cjuandaja, catisecoo rë na, cojo sa xi cuatjin sahmingojo nixti jan cojo xutacha rë. Xi cuatjin cuma ne, hatuxa chuya rë Nina. <sup>5</sup> Tjin chjuun xi cjuaquixi xi cahan me, me xi ha siu suvá. Me vëhë xi vetaha cacun me Nina, hane sahmi me oración, fehya me cjuandaja rë Nina nixtin nixten. <sup>6</sup> Peru hacuaaha tjin chjuun cahan xi sahmi ni me hacutjin xi ma sua rë xahasen rë me. Hane chjuun cahan xi cuatjin sahmi jan ne, handasa ndaja cun cjuahñu rë me ne, peru cjuatacun xi sahmi me ne, tsajin mé machjirëhë. <sup>7</sup> Cuatjin tinoje cojo xuta ladu rë Cristu, sehe tsajin mé jyë rë me cojo xutacha rë me. <sup>8</sup> Peru sa xi ngu xuta marcuaain rë me tsëhë xuta rë me, o sa xi marcuaain rë me tsëhë cahntsua ndava me ne, vëhë tsingacun naja xi catsitjungui me cju rë Nina xi macjain naja. Hacuaha hitsë sa choho sahmi me xi cuma rë ngu xuta xi hatuxa macjaain rë Nina.

<sup>9</sup> Xcun xujun xi yaja ñihi rë yëjë ni yachjin cahan ne, cumahindu ñihi rë na xi ha cafahá rë xi jyanchan nu, na xi cavejña cojo ngu ni xihin, <sup>10</sup> na xi ha vëë xuta xi ndaja xcusun rë, xi ha casahmi yëjë ni cjuandaja vihi: ha catsicha na quihndi, ha cafahatsja na cojo cjuandaja xuta xi quiji tjengui me na ndava na, ha cavisecoo na yahnga me xi ladu rë Cristu, ha casua na cjuatacun me xi tjin rë ngu cjuacjintacun, hacuaaha ha casahmi na jingu sa xcusun xi ndatjin.

<sup>11</sup> Peru xcun xujun jan ne, mijí rë xi cuaquí ñihi rë na cahan xi chuva nu rë, sá cuechu ngu nixtin xi ha quihndë sahmi na xa rë Cristu nguñajacacun na, hane meje nga cuixan na ngu ndiya. <sup>12</sup> Xi cuatjin sahmi na ne, cuetjucaa jyë rë na, tsëhë xi tsichaja na cju xi ha catsingusehenjñi na. <sup>13</sup> Hacuaha cuma tsëhë na xi tu tsujihya ni na ndava xuta. Hane hacuiin tu suvá ni cuma tsëhë na ta, hisca cuetsihin cuichja na cjuandesu, cuetsihin tsingusehenjñi na jingu sa cjuatacun xi cuendaain rë na, hacuaaha cuetsihin cuisiajmi na cju xi mamijí rë xi cuichja na. <sup>14</sup> Vëhë xi meje ná xi catixan nga na cahan xi chuva nixtin rë. Catisacu rë na quihndi, hacuaaha catjahacuenda na cahntsua ndava na. Sehe xuta xi chuyiin rë me tsajan ne, sacuiin rë me hacutjin choho cuichja me tsëhë xcusun xi ndaja sahmi na yachjin cahan jan. <sup>15</sup> Cuatjin chjá ta, tsëhë xi tjin ngu jo na cahan xi ha cavetjuxin na tsëhë ndiya rë Nina, cavisehen na ndiya rë Satanás.

<sup>16</sup> Ngu chjuun xi ladu rë Cristu me ne, sa xi tjin ngu chjuun xi xicjin me xi cahan ne, mijí rë xi xuta ladu rë Cristu sahmi me gastu ngatsë rë chjuun cahan jan ta, me xi xicjin ni na ne, catisecoo me na. Xi cuatjin ne, xuta ladu rë Cristu ne, cuma cuisecoo me yachjin cahan xi tsajin yo ngatsë rë.

<sup>17</sup> Yëjë ni xuta changá xi ndaja vitexa me ngajñi rë xuta ladu rë Cristu ne, vechu chuva rë xi chjaharcun rë me hacuaaha ndaja chjí sacú rë me. Peru me xi sahmi ngu yëjë xi chjaharcun rë hacuaaha ndaja chjí sacú rë me ne, me xi sua machaya rë xuta cju tsëhë Jesús cojo me xi vicuya naja cjuachacun. <sup>18</sup> Cuatjin chjá ta, tsëhë xi xcun xujun rë Nina ne, cuitjin camahindu cju vihi: “Mijí rë xi cweyün changa hntsua ngu ndyaja hya xi sahmi chu xa nuju xi sunesun chu naxu rë trigu xi cuetju trigu rë.” Hacuaha: “Ngu mosu ne, tjin rë cha chuva rë xi cjuaha cha chjí rë cha.”

<sup>19</sup> Hya xi xinchajyë rë ngu xuta changá xi vitexa me xuta ladu rë Cristu ne, xi canihñicuendiin jyë jan sa xi ngu ni cha tichja cha. Hisca xi cjuethe jo jyan cha xi cavëë cha xcusun xi casahmi xuta changá jan ne, sehe nihñicuende jyë xi vincha cha. <sup>20</sup> Peru me xi tisahmi jain cjuatsehen ne, tinoje cojo rë me xcun ni ngayëjë xuta ne, hacuaaha yëjë ni xuta jan ne, tsacjun me cuma, hane sahmi me cjuatsehen. <sup>21</sup> Nihñi ngayëjë ni cju hacutjin xi titsihindu ri. Hacuaha meje rë xi chuva xi nihñi cojo ngu ne, nihñi cojo ngayëjë ni xuta, sa xi vinga ri me o sa xi vingaain ri me. Hisca Nina cojo Cristu Jesús cojo ángel xi cavaxijin me ne, vëë me hacutjin xi titsihindu ri vi. <sup>22</sup> Cuechu nixtin xi cuma meje sa xuta xi cjuahatsja me xa ngajñi rë xuta ladu rë Cristu, sacuaaha ngu me xi cuitexa, o ngu me xi sahmi tu mé ni ngu xa xi cuma meje. Peru hacuiin marcú macjain cuinoje yo xuta xi satë rë xa jan. Ndaja ningatehetacuin titjun yo xuta xi ndaja me ta, tsëhë xi mijí rë xi ninguisihinjñi cojo xuta tsehen. Hisca sove ne, mijí rë xi nihñi cjuatsehen.

<sup>23</sup> Ha quihndë xi cahyiin suvá ni nandá ta, sihi hitsë xan rë uva ngatsë rë cahntsue, hacuaha ngatsë rë chíhin xi tu quitaha tu quitaha sacu ri.

<sup>24</sup> Tjin xuta xi suvá tsejen tsëhë me xi sahmi me cjuatsehen. Hane cjuatsehen ni rë me jan ne, vëhë sahmi xi cuma me castigu. Hacuaha tjin yahnga xuta xi matsijin tsëhë me xi sahmi me cjuatsehen. Peru xi cuma ngascan ne, cuma tsejen xi cun xi má me cojo jyë rë me. <sup>25</sup> Hacuaha ni tjin xcusun xi ndaja ta suvá tsejen. Hane ha ndaja sa hacuiin ngutjen cuma tsejen, peru hatuxa cumaji cuiyujhma ta, tjin xi cuma tsejen.

## 6

<sup>1</sup> Xuta ladu rë Cristu xi má mosu hndixahan rë ngu xuta ne, jemu meje rë xi cjuaharcun me xuta xi má nai rë me. Sa tsajin ne, choho cuma cuichja xuta tsëhë Nina hacuaha cojo tsëhë cjuachacun xi vicuyan. <sup>2</sup> Hane me xi nai rë mosu hndixahan jan ne, sa xi macjain rë me Cristu ne, mijí rë xi choho scuëe hndixahan jan me, tsëhë xi tangun ni macjain rë me Cristu. Cahndë rë xi choho scuëe rë me ne, meje rë xi cuisecoo hndixahan jan me yëjë ni xa xi cuitexa me ta, tsëhë xi me xi cuma tsëhë yëjë ni cjuandaja xi sahmi hndixahan jan ne, xuta ladu rë Cristu me. Hane vëhë xi jemu hmucacun hndixahan jan me. Tinoje cojo xuta yëjë ni cjuat vëhë, hya xi cuicoye rë me.

### *Cjuandacha cojo cjuanchina*

<sup>3</sup> Sa xi ngu xuta vicuya me ngu cjuachacun xi hacjahi fi ne, sa xi manguaaíncacun me cojo cjuat cjuat xi cjuaquixi xi cachja Nai naja Jesucristu ne, hacuaha manguaaíncacun me cojo cjuachacun xi tsëhë Nina ne, <sup>4</sup> me vëhë ne, ngu xuta xi jemu sahmi jyë me yojo rë me. Peru hvíin camaha ni me, hacuaha machjiriin cjuatacun rë me ta, tsëhë xi jemu meje cuisiajmi me tsëhë tu mé ni cjuat: “Cuitjin vijne cjuat vëhë; jéya, cuatjin vijne”, chja me. Hatuxa jemu meje scaan me cojo cjuat ngajñi rë cjuavisiajmi rë me. Hane xi cuatjin visiajmi me ne, vetjucaa cjuaxintacun, vetjucaa cjuahngatacun, hacuaha choho chja me tsëhë xicjin me, choho tsingatahacacun me tsëhë xicjin me, <sup>5</sup> hacuaha ngajan fë ngajan vetsihin ticjan me cojo cjuat, xi tsajin hiscan cuijnetaha. Cuatjin sahmi me ta, tsëhë xi ha cavetsun cjuatacun rë me ne, cjuat xi cjuaquixi ne, hvíin camahani me. Xi tsingatahacacun me ne, xuta xi faharcun rë Nina ne, jemu ndaja cuatju me cuma ta, jercu sacú rë me cjuanchina. <sup>6</sup> Bueno, quixi ta ndaja cuatjun cuma xi tsejen xi chjahanrcun rë Nina, sa xi cumangutacun cojo xi tjin naja. <sup>7</sup> Ta tsajin camahani mé quichahan xi catsin yaan xi cafehen ngasunhndë vi, hacuaha tsajin camahani mé xi cuma cuanguenocjon, hya xi cueyan. <sup>8</sup> Peru sa xi ha tjin naja xi xinë cojo xi chajan ne, meje rë xi cojo vëhë ne, cumangutacun. <sup>9</sup> Peru xuta xi jemu meje rë me cuma nchina me ne, ndaya ndaya ni tsingatihin me xi cumandacha me xi sahmi me cjuatsehen. Xitu tsinguisehenjñi me ngajñi rë cjuatsehen jan me, ha quihndë cumaji cuetjuxin me, sacuatjin rë ngu chu xi jiyahñu cahntsua ngu chen. Hacuaha jemu cjin xcusun yumahasen xi meje rë me. Peru machjiriin xcusun jan ta, tu tsichaja tu tsinguetsun ni rë cjuatacun rë me. <sup>10</sup> Sacuaha xuta xi jercu meje rë me tujún ne, jemu cjin xcusun cjuatsehen sahmi me xi sacú rë me tujún. Yahnga me xi cuacun jan ne, hisca caviyujuxin me cjuachacun xi macjain naja. Hane ngatsë rë xi cavetjuxin me ne, vëhë xi jemu choho tivatju me jima.

### *Pablo ne, tsinguixi me Timoteo*

<sup>11</sup> Peru ngaye xi ladu rë Nina ngaye ne, tihinxin tsëhë xcusun xi cuacun vëhë. Tihin tjengui ndiya xi tsëhë cjuaquixi, hacuaha nihñi hacutjin xi Nina chuya rë me. Ndaja cata-macjain ri me, hacuaha ndaja nihmutacuin me. Caticaa ri xcun ngayëjë ni cjuacjintacun xi cuatji cuma, hacuaha nihñi jeya cjuatacun riji. <sup>12</sup> Nihñi ngahñu xi yëjë ni xcusun xi nihñi ne, cumatangun cojo cjuatacun xi macjain ri, sehe sacú ri cjuahñu xatsë ngajan xcun Nina xi tsajin nixtin cjué. Tsëhë vëhë xi Nina cavaxijin ri me. Hacuaha ha catehe cjuaquixi riji xcun jemu cjin xuta hacutjin xi macjain jain ri Nina. <sup>13</sup> Nina xi tsua me cjuahñu rë ngayëjë ni xi tjin ne, vëë me hacutjin tivitëxa ri. Hacuaha Cristu Jesús, me xi casua cjuaquixi rë xcun Poncio Pilatu ne, vëë me hacutjin tivitëxa ri. <sup>14</sup> Cjuat xitivitëxa ri ne, tinohye. Hacuain nindeye cjuat vë ta nihñichihin, hisca xi cuechu nixtin xi cuinduva nga Nai naja Jesucristu. <sup>15</sup> Hane hya xi cuechutaha nixtin vëhë ne, Nina tsingatju nga me Jesucristu. Nina ne, me vëhë xi ndaja me, me vëhë xi tyjahi me. Ngu ni me vëhë xi matitjun me. Matitjun me tsëhë ngayëjë ni xi matitjun. Matitjun me tsëhë ngayëjë ni xi vitëxa. <sup>16</sup> Ngu ni me vëhë xi tsajin nixtin cueya me. Tacun me xcun ngu ndavá seti ndajyihí, xi tsajin yo cuma cuechu. Hacuaha tsajin yo cavëë rë me, hacuaha hisca ngu cumaji scutsejen rë me. Me vëhë xi catjaharcun xuta me. Me vëhë xi catitëxa me yëjë ni nixtin yëjë ni hora. Cuatjin jain.

<sup>17</sup> Xuta xi jemu tjin rë me cjuanchina rë ngasunhndë vihi ne, titëxe rë me xi hacuiin sahmi yehe me yojo rë me. Hacuain cuetaha cacun me cjuanchina xi tjin rë me ta, vëhë ne, tsajin cjuaquixi xi cjuecani rë. Peru catetaha cacun me Nina ta, Nina ne, hacuiin choho me ta, me

vëhë xi sua naja me yëjë ni xcusun xi ndajyihî tsajan. <sup>18</sup> Hacuaha tinoje cojo rë xuta nchina xi cuacun jan ne, yehe cjuandaja catisahmi me cojo ngayëjë ni xuta. Mijî rë xi choho me. <sup>19</sup> Xi cuatjin sahmi me ne, tivetjo me cjuandaja xi sehe cumachjirëhë rë me, hacuaha sacú rë me cjuahñu xi cjuaquixi.

*Cjua xi vijnetaha*

<sup>20</sup> Ngaye Timoteo ne, chjehecuende cjua xi ha ntse siu. Xi cavetnrcuiin cjuavisiajmi yumahasen xi chuyiin rë Nina tsëhë. Hacuaha xi cavetnrcuiin yëjë ni cjua rë xuta xi hisca ngajñi rë me matanguaaïn cjua rë me, handasa chja me xi jemu vechu cjuatacun rë me xi vijnercu me cjua. <sup>21</sup> Peru me xi cuatjin chja ne, ha cavetjuxin me tsëhë cjuachacun xi macjain naja.

Nina catisua nuju me ngayujun ni cjuandaja rë me.

## Xujun xi majo xi catsihindu San Pablo cojo Timoteo

<sup>1</sup> Ngahan Pablo ne, apóstol tséhë Cristu Jesús má ngahan ta, tséhë xi cuatjin meje rë Nina. Véhë xi catsingatju ná me, xi cuichjá cojo xuta ta sua naja me ngu cjuahñu ndajiyihi, sa xi nihña tangun cjuatacun naja cojo Cristu Jesús. <sup>2</sup> Ngaye Timoteo ne, tsihindu ri xujun vihi ta, tséhë xi sacuaha quihndí ndaja naha ngaye. Nina Nahmi naja cojo Cristu Jesús Nai naja ne, catamayuma rë me ngaye, catisua ri me cjuandaja, cjuajeya.

### *Tisua me cjuaquixi tséhë Nina*

<sup>3</sup> Nixtin nixten, hora xi sahme oración naha ne, jercu veyanangë ri, hacuaha suá nacuechji rë Nina. Hacuaha sahme xa rë Nina cojo ngu cjuatacun tyjahi, sacuahatjin casahmi xutachanga naha. <sup>4</sup> Vitsjen ná hacutjin cachjihnde, ngatsë rë xi cavétju cëjë tsiji. Hacuaha jemu meje ná xi ndove tjengui ná, sehe ngahan ne, jemu ndaja cuma ná. <sup>5</sup> Hacuaha vitsjen ná hacutjin xi jemu ndaja macjain ri cjuarë Nina, sacuaha tjin xi titjun camacjain rë chicuhun riji, chicuhun Loida, cojo na Eunice naa riji. Hane fëmangúcacun xi cojo ngaye ne, ha cuatjin ndaja macjain ri.

<sup>6</sup> Véhë xi chjá cojo ri ta xi catiin cahndë xi cjuë cjuatacun xi casua ri Nina, hya xi cavëtahantsa ri. <sup>7</sup> Ta Nina ne, hacuiin casua naja me ngu cjuatacun xi ngayaan ne, cumacjintacun ta, casua naja me ngu cjuatacun xi sacú naja ngahñu, xi nihña hmu tacuun xingueen, hacuaha xi scaa naja cuetjoon yojo naja. <sup>8</sup> Véhë xi hacuiin nihñi savá, hya xi cuinoje cjuandajiyihi tséhë Nai naja. Hacuaha hacuiin nihñi savá ngatsë naha ngahan xi tejñaya ndavaya, ngatsë rë xi chjá cjuarë me. Hacuiin nihñi savá ta, nihñi ngahñu cojo yëjë ni cjuañihi xi cuátji cuma, ngatsë rë cjuandajiyihi xi tinoje. Cuatjin nihñi hacutjin chutaha ngahñu xi tisua ri Nina. <sup>9</sup> Nina ne, cavaxëtje naja me hacuaha cavaxijin naja me, xi cuma tséhë me ngayaan. Hacuiin ngatsë rë xi jemu ndaja canihña xi cuatjin casahmi me ta ngatsë rë xi cuatjin meje rë me, tséhë xi jemu ndaja me. Hisca xi chaja sa cuejña ngasunhndë ne, ha catsingatahacacun Nina xi sua naja me cjuandaja rë me, ngayejen ni xi tséhë Cristu Jesús ngayaan. <sup>10</sup> Hane hya xi cafehe Cristu Jesús, me xi vaxëtje naja ne, hya camachaya jain naja cjuandaja rë Nina jan. Hane Cristu jan ne, catsicjë me ngahñu rë cjuaveya, hacuaha casuacuenda naja me ta sua naja Nina ngu cjuahñu ndajiyihi, xi tsajin nu tsajin nixtin cueyan nga. Véhë cjuatacun xi vicuya naja cjuandajiyihi rë me.

<sup>11</sup> Nina ne, casua ná me xa xi suá cumachaya rë xuta hacuaha cuicuyá rë xuta cjuandajiyihi rë me. <sup>12</sup> Ngatsë rë xa véhë ne, jemu cjin cjuañihi tivátju jima. Peru ma savaain ná, tséhë xi ha hvë Cristu, hacuaha camangucácun cojo rë me. Hacuaha tjin ná cjuaquixi xi me véhë ne, jyë me cojo cjuatacun rë me xi cuetjo ná me, hisca nixtin xi cuinduva nga me nguehe ngasunhndë.

<sup>13</sup> Nihñi sacuaha tjin cjuaquixi xi ha cachjá cojo ri. Hacuaha nguñajatacun catamacjain ri Nina, hacuaha nihñi hmutacuun xinguin, tséhë xi ngaye ne, ladu rë Cristu ngaye. <sup>14</sup> Nihñicuende cjuaquixi xi casua ri Nina. Hane Hasen rë Nina xi tacun cahntsa xahasen naja ngayejen ni xi macjain naja me ne, Hasen véhë xi sua ri ngahñu xi cuatjin nihñi.

<sup>15</sup> Ngaye ne ha hye xi ngayëjë ni xuta xi tséhë ladu xi hmí rë Asia ne, casmicacun ná me. Ngajñi rë xuta xi cuacun jan ne, hinchajñi cha Figelo cojo cha Hermógenes. <sup>16</sup> Peru cha Onesiforo ne, catamayuma rë Nina yëjë ni ndava cha ta, tséhë xi jemu cjin ndiya xi casahmi cha cjuandaja xi cavisecoo ná cha. Hane cama savaain rë cha xi tejñaya ndavaya. <sup>17</sup> Xi tu cafehe cha nguehe nandya Roma ne, cavetsihin cavanguise cha ngahan, hisca xi casacu rë cha ngahan. <sup>18</sup> Nai naja ne, catamayuma rë me cha, nixtin hya xi cuinduva nga me nguehe ngasunhndë. Ta ngaye ne, ha ndaja hye hacutjin xi jemu cavisecoo ná cha ngajan nandya Efeso.

## 2

### *Xuta xi ndaja sahmi me xa rë Cristu*

<sup>1</sup> Peru ngaye tsan ne, catisua ri Cristu Jesús cjuandaja rë me, xi cuma cuinechin nguñajatacun. <sup>2</sup> Jemu cjin xuta xi hacuaha caviseñuju me yëjë ni cjuarë cachjá cojo ri. Peru quihndë ne, meje rë xi ticoye rë ngujo cha cjuarë jan, cha xi tsejen xi mangutacuun cojo rë hacuaha chutaha cjuatacun rë, sehe cha xi cuacun jan ne, hacuaha cuicuya cha xuta xi yahnga.

<sup>3</sup> Ngaye ne, nihñi ngahñu xi scaa ri cojo yëjë ni cjuañihi xi cuátji cuma ngatsë rë Cristu Jesús, sacuaha tjin caa rë ngu sindadu xcun ngu si. <sup>4</sup> Hane sindadu xi hinchajñi cha tséhë xa xi yaha cha ne, cumaji tsingusehenjñi cha tu mé ni xa ta, tjin rë cha xi sahmi cha hacutjin xi chuya rë me xi matitjun tséhë cha. <sup>5</sup> Hacuaha ngu cha xi cuisehen xcun ngu juegu xi ntsavë

cha ne, sa xi chohotjin ntsavë cha ne, sacuiin rë cha cjuatjo, handasa tjun cha cuetju cha. <sup>6</sup> Hacuaha cha xi sahmi xa nguijña ne, meje rë xi cha vëhë xi titjun satë rë cha tsëhë xitjë xi casahmi cha. <sup>7</sup> Ndaja ningatehetacuin hacutjin cjuatjo xi tichjá cojo ri. Sehe Nai naja ne, me vëhë sahmi me xi cuijnercui cjuatjo vë.

<sup>8</sup> Ninguitsjin xi Jesucristu ne, cavascaya rë me ngajñi rë nima, hacuaha canduva tjë rë me xutachanga naja David. Vëhë cjuandajyihî xi ngahan visiajme cojo xuta. <sup>9</sup> Hane ngatsë rë xi cuatjin visiajme cjuandajyihî jan ne, vëhë xi choho tivátju jima. Hisca quitahahñu rë xuta ngahan nguëhe ndavaya, sacuaha tjin rë ngu xuta tsehen xi yehe jyë rë. Peru cjuatjo rë Nina ne, hacuiin quitahahñu. <sup>10</sup> Vëhë xi ticaa nã ngayëjë ni cjuañihî xi tivátju jima, cojo sa xi yëjë ni xuta xi cavaxijin Nina ne, cuetjutje me ngatsë rë xi macjan rë me Cristu Jesús, hacuaha cuechu me xcun Nina ngajan cuiyuju me nu cjuatjo nu nduva.

<sup>11</sup> Cjuatjo vihi ne jemu cjuatjoxi:

Sa xi ha macjan naja Cristu hya xi cueyan ne, hacuaha cuinechan quicun nga cojo rë me; <sup>12</sup> sa xi ha cacaa naja ne, hacuaha cuisecon rë me cuitxan.

Sa xi ha canújan xi hyaan yo me ne, hacuaha ni tjin cuichja me ta hvín me yo ngayaan.

<sup>13</sup> Handasa ngayaan ne, nihñacheen cjuatjo naja, peru me vëhë ne, hatuxa sahmi chihin me cjuatjo rë me ta, tsëhë xi hatuxa vindachaain me.

#### *Hacutjin xi Nina chuya rë me*

<sup>14</sup> Ninguitsjin rë xuta jan cjuatjo xi chjá cojo ri. Hacuaha tinojetehe rë me xi ha quihndë scaain me cojo cjuavisiajmi rë me ta, tsëhë xi cuatjin meje rë Nina. Venguin camahani chjî rë xi cuatjin tjcjan me cojo cjuatjo ta, xi cuatjin sahmi me ne, tu titsinguetsun me cjuatjo rë xuta xi viseñuju. <sup>15</sup> Nihñi nguyjë xi Nina ne, chuya rë me tsëhë xa xi tinihñi. Xi cuatjin ne, tsajin mé nihñi sava ta, tsëhë xi ha chihin tivicoye rë xuta cjuatjo xi cjuatjoxi. <sup>16</sup> Xi caninguisinjñi ngajñi rë cjuavisiajmi ngarca xi tsajin mé machjirëhë xi visiajmi xuta ta, me xi cuatjin visiajmi ne, quihndë nga nchujun ne, tjjima yehe sa cjuatsehen xi tjin rë me. <sup>17</sup> Hacuaha cjuavisiajmi rë me xi cuacun jan ne, tangun cojo hiscan xi hmu, xi quihndë nga nchujun ne, tjjima tojo sa. Cuatjin tivatju cha Himeneo cojo cha Fileto ta, <sup>18</sup> tsëhë xi ha cavetjuxin cha tsëhë ndiya rë cjuatjoxi. Chja cha ta quixiin xi cuascaya naja hya xi ha caveyan. Hane cojo cjuatjo vëhë ne, titsinguetsun cha cjuatjo rë ngujo xuta xi macjan rë me Nina. <sup>19</sup> Peru Nina ne, cavejña me ngu cjuatjo rë hatuxa cjuatjoxi, xi tsajin yo cuma tsinguetsun rë. Hacuaha jo cjuatjo rë Nina xi hatuxa cjuatjoxi. Ngu ne, chja cuitjin: “Nai naja ne, vëë me jarë xuta xi tsëhë me”; ngu nga ne, chja cuitjin: “Yëjë ni xuta xi chja me xi ladu rë Nai naja me ne, meje rë xi catiyujuxin me tsëhë cjuatsehen.”

<sup>20</sup> Ndava ngu xuta xi ndaja vatju me ne, jemu cjuatjo xcusun trasti xi tjin. Tjin trasti xi tsëhë oro cojo xi tsëhë quicha. Hacuaha tjin xi tsëhë ya cojo xi tsëhë nihndë. Ngujo trasti jan ne, jemu machjirëhë. Hane ngujo nga ne, chuva machjirëhë. <sup>21</sup> Cuatjin naja ngayaan xuta ladu rë Cristu ta, jemu tecjanjñi ngayaan. Peru xi cuma yaan xuta xi vengui chjî rë ne, meje rë xi cuiyujuxen yëjë ni cjuatsehen. Xi cuatjin ne, cuma tyahi cjuatjo naja, cumachjirëhë rë Nai naja ngayaan, hacuaha tjin ndaja ngayaan xi nihña yëjë ni cjuandaja.

<sup>22</sup> Yëjë ni cjuatjo tsehen xi meje rë xuta xi chihndë me ne, ngaye ne, tiyijixin. Tihin tjengui ndiya rë cjuatjoxi. Catjë catamacjan ri. Tihin tjengui cjuatmutacun. Tihin tjengui cjuatjo, sacuaha tjin sahmi yëjë ni xuta xi cojo ngu cjuatjo tyahi fehya rë me Nai naja xi cuisecon rë me. <sup>23</sup> Hya xi tivinenguise xicjin xuta tsëhë cjuatjo ngarca xi venguin chjî rë ne, xi canihñicundiin cjuatjo xi chja me. Tsëhë xi ha hya ta tsëhë cjuatjo vëhë ne, hatuxa cuetjucaa ngu si. <sup>24</sup> Hane xuta xi sahmi xa rë Nai naja ne, mijî rë xi circu me ta meje rë xi ndaja me cojo ngayëjë ni xuta. Meje rë xi quicun cacun me xi cuicuya me xuta. Meje rë xi yehe cacun me. <sup>25</sup> Hacuaha xuta xi chuyiin rë me tsëhë cjuatjoxi ne, meje rë xi cuma quixi me, peru cojo cjuandaja cojo cjuatjo. Xi cuatjin ne, cuma xi sua Nina cahndë xi cuindeya cjuatjo rë xuta xi cuacun jan, hacuaha xi cuijnercui jan me cjuatjo xi cjuatjoxi. <sup>26</sup> Sehe hacuaha sacú nga rë me cjuatjo ndajyihî, hacuaha cuetjutje me tsëhë xitsehen matitjun xi cavindacha rë me. Cavindacha xitsehen xuta jan, xi casahmi me yëjë ni hacutjin xi meje rë xitsehen jan.

### 3

#### *Nixtin xi cuijnetaha*

<sup>1</sup> Catijnercui cjuatjo vihi: hya xi cuma tiña nixtin xi cjuatjo ngasunndë ne, jemu choho cuatjo xuta cuma ta, <sup>2</sup> tsëhë xi xuta ne, cuitjin sahmi me: meje rë me xi súvã ni me ndajyihî cuatjo me cuma; jercu sahmi me cojo tujún; jemu haxi me ta jercu cuichja me xi ndaja vatju me. Hacuaha jercu sahmi hngacacun me; choho cuichja me tsëhë xicjin me hacuaha choho cuichja me tsëhë Nina. Cuihndiin me tsëhë xutacha rë me. Hisca ngu nacuechji naja suaain

me, hisca ngu nacuechji rë Nina suaain me. Cuendaain rë me tsêhë Nina; <sup>3</sup> tsajin rë me cjuahmutacun; tsajin rë me cjuayumatacun; cuichja me cjuandesu. Hacuïn cuetjo me yojo rë me; jemu sahmi xcuahya me; chuyiin rë me tsêhë yêjê ni cjuandaja. <sup>4</sup> Jo xcun jo hnt sua me ta, cuitëña xicjin me; jemu tujyê sahmi me; jemu sahmi yehe me yojo rë me. Chuyiin rë me tsêhë Nina ta cjuasua xi tsêhë ngasunhndë ne, vêhë jemu chuya rë me tsêhë. <sup>5</sup> Hacuaha sahmi me xcusun rë xuta xi macjain jain rë Nina, peru tsitjungui me hacutjin xi cjuaquixi.

Xi caninguisinjnïi cojo xuta xi cuacun vë ta, <sup>6</sup> tsêhë xi ngajñi rë me ne, hinchajñi cha xi vanguisse chuya rë xi cuma cuisehen ndava xuta, hanë cuindacha cha yachjin xi ha tsingatihin mandacha. Tsingatihin na mandacha na ta, tsêhë xi jemu va tjin cacun na tsêhë jyê rë na, xi tisahmi na yêjê ni hacutjin xi xahasen rë na meje rë. <sup>7</sup> Hacuaha yachjin jan ne, jemu vutaya na yêjê ni cjuatacun xatsë, peru hatuxa vijniürca na cjuaxi cjuaquixi. <sup>8</sup> Ha hye ta hatsëë nixtin ne, jo cha surqui xi hmi Janes cojo Jambres ne, casahmi cha condra xutachanga naja Moisés. Hacuaha ni tjin rë cha ndacha xi cuacun jan ne, sahmi cha condra cjuaxi cjuaquixi ta, cavetsun cjuatacun rë cha, hacuaha machjiriin cha xi cumacjain rë cha Nina. <sup>9</sup> Hane hacuïn jemu xcun cuma cjue cha cojo cjuandacha rë cha ta, tsêhë xi ngayêjê ni xuta ne, cjuahacuenda me xcusun yumahasen xi cun cha, sacuatjin cama tsejen xcusun yumahasen xi cun cha surqui xi cuacun jan hatsëë nixtin.

*Pablo ne, tsinguixi me Timoteo*

<sup>10</sup> Peru ngaye ne, jemu ndaja tichutaye cjuaxi vicuyá cojo xcusun xi sahme cojo cjuatacun xi tjëngë. Hacuaha jemu ndaja hye hacutjin xi fë macjain ná, hacutjin xi jyê cáacun, hacutjin xi hmu cáacun, cojo hacutjin xi ndaja ticaa ná. <sup>11</sup> Hacuaha ndaja camachaya ri tsêhë yêjê ni cjuañihi xi cavátju camá. Jercu choho cavátju camá ngajan nandya Antioquia cojo Iconio cojo Listra. Peru Nai naja ne, cavaxëtje ná me tsêhë yêjê ni cjuañihi xi cavátju camá jan. <sup>12</sup> Hacuaha yêjê ni xuta xi meje cjuaharcun me Nina ta tsêhë xi macjain rë me Cristu Jesús ne, hatuxa tjin xi cuatju me cjuañihi. <sup>13</sup> Peru xuta tsehen cojo xuta ndacha ne, quihndë nga nchujun ne, tichaja sa cjuatacun rë me, xi vindacha me yahnga xuta ne, hacuaha jima ndacha súvá me.

<sup>14</sup> Ngaye ne, hacuïn cuejnïixin cjuaxi cachutaye, cjuaxi café ma ngu tacuin cojo. Ha hye yo xi cavicuya ri ta, <sup>15</sup> tsêhë xi hisca cjuaquihndi riji ne, cachutaye xujun rë Nina. Hane xujun jan ne, vêhë sua machaya ri xi Nina ne, cuaxëtje naja me, ngayaan xi macjain naja Cristu Jesús. <sup>16</sup> Nina ne, casua me cjuatacun rë me ngujo xuta, sehe xuta jan ne, catsihindu me xujun rë Nina. Vêhë xi xujun jan ne, jemu machjirêhë xi cuicuya naja, xi cuichjataha naja, xi tsinguixi naja, xi cuincha naja ndiya rë cjuaquixi, <sup>17</sup> cojo sa xi ngayaan xuta ladu rë Nina ne, cuechutaha cjuatacun naja xi cuma nihña yêjê ni cjuandaja.

## 4

<sup>1</sup> Tivutsejen naja Nina. Hacuaha tivutsejen naja Cristu Jesús, me xi tsichuva naja ngayêjê ni ngayaan xuta, sa xi quicun cuaha ngayaan, o sa xi caveyan. Tsêhë xi cuinduva nga me, hacuaha tsêhë xi cuitexa naja me ne, vêhë xi chjá cojo ri ta <sup>2</sup> tinoje cjuaxi rë Nina cojo xuta. ¿Há chuya rë me? ¿há chuyiin rë me? peru tsimii sahmi rë, tinoje cojo rë me. Hacuaha tinojetehe rë me. Ninguixi me. Ticoye rë me. Peru nijyëtaquin cojo rë me. <sup>3</sup> Cuatjin nihñi ta, tsêhë xi cuetjucaa nixtin xi xuta ne, ha quihndë chuyiin rë me tsêhë cjuaxi cjuaquixi. Sahmi me hacutjin xi meje rë me, hane cuihndë me tu mé ni cjuaxi cuicuya maestru xi yahnga ta, maestru xi cuacun jan ne, súvá cjuaxi chuya rë xuta ne, vêhë cuicuya me. <sup>4</sup> Cuatjin xi xuta ne, sahmi ngaxtun me cjuaxi cjuaquixi ne, tu cuentu xi machjiriin ne, vêhë cuetaha rcu me. <sup>5</sup> Peru ngaye ne, meje rë xi tacun cahndë cjuatacun riji ngajñi rë tu mé ni ngu cjuacjintacun. Hacuaha tehe tacuin tsêhë yêjê ni cjuañihi. Tinoje cojo xuta cjuaxi rë Nina, nihñichihin xá xi casua ri me.

<sup>6</sup> Ngahan ne, chuya sa nixtin xi cjuë ngahan. Ha cama tiña nixtin xi cueya. <sup>7</sup> Ndaja casahme xa, casahmechen xa xi casua ná Nina. Hacuaha ndaja macjain cuaha ná Nina. <sup>8</sup> Vêhë xi ha tjin ndaja cjuatjo xi sacú ná, tsêhë xi tyjahi cjuatacun naha. Nai naja, me xi tsichuva naja cojo cjuaquixi ne, me vêhë xi sua ná me cjuatjo jan hya xi cuechutaha nixtin. Hacuaha hacuïn tu suva ni ngahan xi sua ná me ta cojo ngayêjê ni xuta xi jemu meje rë me xi cuya nga Nai naja.

*Pablo ne, fehya me ngu cjuandaja*

<sup>9</sup> Nihñi xati tacuin ndove tjëngui ná ta, <sup>10</sup> tsêhë xi cha Demas ne, cavetjuxin cha tsahan, quiji cha ngajan nandya Tesalónica. Cuatjin casahmi cha ta, tsêhë xi hitsë sa chuya rë cha tsêhë xcusun rë ngasunhndë. Cha Crescente ne, quiji cha ladu tsêhë Galacia. Hane cha Tito ne, quiji cha ladu tsêhë Dalmacia. <sup>11</sup> Hane súvá ni cha Lucas quitaha cha cojo ná. Noje cojo cha Marcos ne, sehe ndove cojo cha ta, tsêhë xi jemu machjirêhë cha xi cuisecoo ná cha tsêhë xa xi sahme. <sup>12</sup> Cha Tíquico ne, catsingátju cha ngajan nandya Efeso. <sup>13</sup> Hya xi

cuindove ne, ndovecueje tsjian tsangá naha xi cavejñá ndava cha Carpo, ngajan nandya Troas. Hacuaha cojo xujun naha, hacuaha cojo yějě ni sa xujun naha ne, ndovecueje.

<sup>14</sup> Cha Alejandro chjine quicha ne, jemu choho casahmi cha cojo ná. Peru Nai naja ne, sehe sahmingojo me cojo rě cha, chuva rě jyě xi tjin rě cha. <sup>15</sup> Hane ngaye ne, tjin ri cuidadu tséhě cha ta, tséhě xi jemu casahmi cha condra cjua rě Nina xi canújin.

<sup>16</sup> Hya xi tjun tjun casuá cjuaxixi naha xcun xutaxa rě ne, tsajin yo cavisecoo ná. Yějě ni amigu naha ne, cavetjuxin me tsahan. Hane catitsiyēcacun Nina cojo me xi cuacun cavetjuxin tsahan jan. <sup>17</sup> Peru Nina ne, cavisecoo ná me, casua ná me ngahñu, xi cama cachjá cjua rě me cojo yějě ni xuta xi hacuiin tséhě nación tséhě Israel. Hacuaha Nina ne, cavaxětje ná me tséhě xuta xi meje tsiquehen ná. <sup>18</sup> Hacuaha cuaxětje ná Nai naja tséhě ngayějě ni cjuatsehen, sehe cjuahatsja ná me ngajan ngahnga hiscan xi vitexa me. Me vėhě xi hatuxa jyě me, hatuxa hñu me yějě ni nixtin. Cuatjin jain.

*Tsingujnetaha me cjua*

<sup>19</sup> Cha Aquila cojo chjuun rě cha, na Prisca ne, tehe rě me ngu nina naha. Hacuaha cojo xuta rě cha Onesíforo ne, tehe rě me ngu nina naha. <sup>20</sup> Cha Erasto ne, casetaha cha nandya Corinto. Hane cha Trófimo ne, tséhě xi hmu rě cha ne, cafaña cha ngajan nandya Mileto. <sup>21</sup> Nihñi xati tacuin, ndove tjengui ná quihndě xi chaja sa chan hnchan. Cha Eubulo ne, cha Pudente ne, cha Lino ne, na Claudia ne, cojo ngayějě ni xuta xi macjain rě cjua rě Cristu Jesús ne, tsingatju me nina riji.

<sup>22</sup> Nai naja yaha ri me. Nina catisua nuju me cjuandaja rě me ngayujun ni.

## Carta xi catsingatju San Pablo xi cafahtsja Tito

<sup>1</sup>Ngahan Pablo, sacuaaha ngu mosu hndixahan tséhë Nina ngahan, hacuaaha apóstol tséhë Jesucristu ngahan.

Jesucristu casuaxa me ngahan xi cuisécoo rë xuta xi cavaxijinñi Nina, cojo sa xi cumacjain rë me tséhë Jesucristu, hacuaaha cojo tséhë xi cumachaya rë me cjuaquixi rë Nina hane ndaja tsejen xi má me tséhë Nina. <sup>2</sup>Jercu vetahan tacun xi sacú naja cjuahñu xatsë, tséhë xi cuatjin cachja Nina hisca hya xi chaja sa cuma ngasunhndë. Hacuaaha Nina ne, vindachaaan me cojo cjuarë me. <sup>3</sup>Quihndë ne, jercu nixtin rë xi casua me camachaya naja tséhë cjuarë me. Ngahan ne, casatëxa ná xi suá cumachaya rë xuta tséhë cjuarë vëhë, tséhë xi Nina xi vaxëtje naja ne, cuatjin cavitëxa me.

<sup>4</sup>Tito, tsihindu ri carta vihi, ngaye xi sacuaaha quihndi naha ngaye, tséhë xi tangun mangutacun cojo Jesucristu. Nina Nahmi naja cojo Jesucristu xi vaxëtje naja ne, catisua ri me cjuandaja cjuajeya.

### *Xa xi sahmi Tito ngajan distritu Creta*

<sup>5</sup>Cavejñá ri hiscan distritu Creta, cojo sa xi ngaye nihñichihin yëjë xi caviyuju vasen, hacuaaha cojo sa xi tehe xa ngu jo xuta xi cumatitjun me tséhë yungun tséhë jima ngu nandya sacuahatjin cavitëxa ri. <sup>6</sup>Xuta xi cuatjin tehe xa rë me ne, meje rë xi jercu tyjahi xahasen rë me, hacuaaha ngu ni chjuun rë xingu xingu me. Hacuaaha meje rë xi quihndi rë me ne, ladu rë Jesucristu me, hacuaaha xi tsajin cjuarë me xi choho sahmi me o sa xi vihndiin me. <sup>7</sup>Cuatjin meje rë, tséhë xi xuta xi matitjun me sacuaaha obispo ngajñi rë xuta rë yungun ne, me vëhë fhacuenda me tséhë ngu tsé ngu xti tséhë Nina. Vëhë xi meje rë xi jercu tyjahi xahasen rë me. Mijí rë xi xta me, mijí rë xi ngutjen ma xti rë me, mijí rë xi cha chihi me, mijí rë xi hngaacun me, mijí rë xi jercu vetahacacun me tujún xi sacú rë me ngajñi rë ngu cjuandacha cojo xicjin me. <sup>8</sup>Xi meje rë ne, xuta xi cumatitjun me jan ne, tjin rë me cjuandaja cojo xuta hincha ndiya, hatuxa sahmi me cjuandaja, yehe cacun me, tsajin jyë rë me, hacuaaha jiya me ndiya rë Nina, hacuaaha jercu yehe xahasen rë me. <sup>9</sup>Hacuaha meje rë xi cuetaha me yojo rë me tséhë cjuarë xi cjuaquixi xi ha camá rë me, cojo sa xi cuma cueya me xahasen rë xingu xingu sa xuta cjuachacun xi cjuaquixi, hacuaaha cojo sa xi cuma sahmi me xi cuijnecacun xuta xi chjataha me tséhë cjuachacun vëhë.

<sup>10</sup>Meje rë xi xuta xi cuacun vë ne, tséhë xi jercu tjin xuta xi vihndiin me tséhë xutaxa rë yungun ne, jercu tjin xuta xi tujyë visiajmi me, jercu tjin xuta xi vindacha. Hatuxa ngajñi rë xuta tjë rë Israel xi cavisehen ladu tséhë Jesucristu ne, jercu tjin xuta xi cuacun vë. <sup>11</sup>Sahmi ngujyë xi nihña xi hindë cuichjaain me, tséhë xi tsinguetsun me cjuandacha rë xuta tséhë yëjë ngu ndihya. Cuatjin sahmi me hya xi vicuya me ngu cjuarë xi hisca mijí rë xi cuatjin cuicuya me. Hane cuatjin sahmi me, cojo sa xi sacú rë me tujún ngajñi rë ngu cjuandacha.

<sup>12</sup>Ngu profeta tséhë distritu Creta ne, ha suvá me vëhë xi cachja me tséhë xuta rë nangui rë me cuiñin: Yëjë ni xuta Creta ne, hatuxa ndacha me, jercu chu me, jercu vatjutaha jinë me, hacuaaha jercu tséhë me. Cuatjin cachja me. <sup>13</sup>Hane jercu quixi xi cachja me. Vëhë xi hñu nojetehe rë me, cojo sa xi ndaja cumacjain rë me cjuachacun, <sup>14</sup>hacuaha cojo sa xi cuetaharcuaan me tséhë cuentu tséhë xuta tjë rë Israel o sa xi cjuarë xi vitëxa xuta xi tsindeya me cojo cjuandacha cjuarë xi cjuaquixi.

<sup>15</sup>Me xi tyjahi cjuatacun rë ne, tsajin mé xi tsavi xi cuma rë me. Peru me xi macjaain rë cjuachacun ne, tsajin mé xi tsaviin xi cuma rë me ta hisca cjuatacun cojo xahasen rë me ne, ha camachocun. <sup>16</sup>Chja me xi vë me Nina, peru yëjë ni xi sahmi me ne, tsingacun me xi quixiin. Xuta xi cuatjin cun ne, sahmi xi choho vë Nina me. Hatuxa vihndiin me, hane machjiriin me xi sahmi me cjuandaja.

## 2

### *Cjuachacun xi cjuaquixi*

<sup>1</sup>Cjuarë xi noje ne, meje rë xi matangun cojo cjuachacun xi cjuaquixi. <sup>2</sup>Tinoje cojo yëjë ni xihin changá, hacuiin tsingatjutaha me xi cuihi me o sa xi sinë me, hacuaaha meje rë xi cuma chjahárcun rë me, meje rë xi yehe cacun me. Meje rë xi ndaja cumangucacun me cojo Nina, hacuaaha ndaja tjin rë me cjuahmutacun, hacuaaha ndaja scaa rë me tu mé ni cjuacjintacun. <sup>3</sup>Hacuaniñin ni tinoje cojo yëjë ni yachjin changá ne, meje rë xi jeya me, hacuaaha mijí rë xi ndesu me, hacuaaha mijí rë xi cuetaha me yojo rë me vinu. Meje rë xi cuicuya me yëjë ni xi ndaja. <sup>4</sup>Meje rë xi cuicuya me yëjë yachjin xi hitsë ni chuva nu rë ta meje rë xi tsihmucacun me xihin rë me cojo quihndi rë me, <sup>5</sup>hacuaha xi yehe cacun me, tyjahi xahasen rë me, hacuaaha xi ndaja cjuahacuenda me cahntsua ndava me, hacuaaha xi



ndaja me, hacuaha xi cuihndë me tsêhë xihin rê me. Cuatjin meje rê xi cuicuya na me, cojo sa xi tsajin yo choho cuichja tsêhë cjuar rê Nina.

<sup>6</sup> Hacuaha ni tjin ni tinoje cojo yêjê ni xuta xi xihin xi hitsë ni chûva nu rê ta hacuaha meje rê xi yehe cacun me. <sup>7</sup> Hacuaha ngaye sove tejñi ntsacu tsêhë cjuandaja. Hane hya xi cuicoye ne, meje rê xi jercu tyjahi cjuatacun rijî, hacuain xcuehyu cuinoje ta <sup>8</sup> suvá cjuar xi ndaja, xi tsajin yo cuma cuichjataha tsêhë. Cuatjin meje rê, cojo sa xi xuta condra rijî ne, cuma sava rê me, tsêhë xi tsajin mé xi choho cuichja me tsajan.

<sup>9</sup> Tinoje cojo mosu hndixahan ne, meje rê xi cuihndë me tsêhë yêjê cjuar xi cuichja nai rê me. Meje rê xi ndaja me, hacuain choho cjuayangui me tsêhë nai rê me. <sup>10</sup> Mijî rê xi tsichêjê me ta meje rê xi tsingacun me xi cuma cumangutacun cojo rê me. Cuatjin meje rê xi sahmi me, cojo sa xi yêjê xuta ne, cumachaya rê me xi jercu ndajyihî cjuachacun rê Nina, me xi vaxêjê naja.

<sup>11</sup> Nina ne, catsingacun me cjuandaja rê me, hane cjuandaja vë ne, hacui xi cuaxêjê naja ngayeyen ni xuta. <sup>12</sup> Hacuaha cjuandaja vëhë ne, vicuya naja xi meje rê xi cuejñaxen yêjê ni cjuatsehen cojo yêjê ni xcusun tsêhë ngasunhndë xi meje naja, hacuaha vicuya naja xi meje rê xi tyjahi cjuatacun naja, meje rê xi tsajin jyê naja, meje rê xi nechanyan ndiya rê Nina xi tivanguen cojo ngasunhndë naja. <sup>13</sup> Meje rê xi cuatjin nihña nguyêjê rê xi nechanyan rê nixtin ndajyihî xi jercu vetahantacun, nixtin xi cuetjuaatsejen cjuahasen ndajyihî rê Nina naja Jesucristu, me xi cuaxêjê naja, me xi jercu jyê hnga me cojo hasen rê me. <sup>14</sup> Me vëhë ne, casua me yojo rê me xi cueya me ngatsë naja, cojo sa xi cuaxêjê naja me tsêhë yêjê ni cjuatsehen, hacuaha tsityjahi me ngayaan ne, sehe sahmi tsêhë me ngayaan, hane ngayaan ne, jercu meje nihña cjuandaja.

<sup>15</sup> Tinoje yêjê cjuar vëhë. Tinche ndiya xuta hacuaha tinojetehe rê me nguñajatacuin. Catiin cahndë xi yo sahmi chûva ri cojo cjuatacun rijî.

### 3

#### *Yêjê ni xcusun xi meje rê xi sahmi xuta ladu rê Jesucristu*

<sup>1</sup> Ninguitsjin rê yêjê xuta ladu rê Jesucristu xi meje rê xi cuihndë me tsêhë xutaxa rê xi vitexa, hacuaha meje rê xi yêjê ni nixtin ne, tjin ngu cacun me xi sahmi me cjuandaja. <sup>2</sup> Tinoje cojo rê me ta mijî rê xi choho cuichja me tsêhë hisca ngu xuta. Meje rê xi hacuain hngacacun me ta xi meje rê ne, jeya me, hacuaha ndaja me cojo xcusun rê me cojo yêjê ni xuta. <sup>3</sup> Cuatjin noje cojo rê me, tsêhë xi ngayaan ne, hacuaha jemu chûva ningatahantacun hatsëê, hacuaha cavinuhyaan tsêhë Nina, hacuaha cavinechanyaan ngu ndiya xi hacuain hacui. Cavingusehen rcun cojo yêjê ni xcusun cjuasua. Cavinechanyan ngu ndiya rê cjuatsehen, ngu ndiya rê cjuaxin. Xuta ne, choho cavëê me ngayaan, hacuaha choho cahyan xingueen xingu xingu ngayaan. <sup>4</sup> Peru Nina, me xi vaxêjê naja ne, hya xi catsingacun me cjuandaja rê me cojo cjuahmutacun xi tjin rê me xi cuma rê yêjê ni xuta ngasunhndë ne, <sup>5</sup> cavaxêjê me ngayaan. Hacuain tsêhë xi jercu ndaja canihña ta tsêhë xi yuma camá rê me ngayaan xi cavaxêjê me ngayaan. Cuatjin cavaxêjê me ngayaan hya xi casahmi me xi cavuya catsin ngayaan hya xi catsityjahi me ngayaan. Hacuaha cuatjin cavaxêjê me ngayaan hya xi casua naja me cjuahñu xatsë hya xi casua me ngayaan Hasen rê me. <sup>6</sup> Hane ngatsë rê cjuandaja xi casahmi Jesucristu, me xi vaxêjê naja ne, vëhë xi cuatjin jemu casua Nina ngayaan Hasen rê me, <sup>7</sup> cojo sa xi cjuê jyê naja ngatsë rê cjuandaja rê Jesucristu, hacuaha chjahanntsán cjuahñu xatsë xi jercu vetahan tacun.

<sup>8</sup> Yêjê ni cjuar xi cachjá cojo ri vëhë ne, jemu cjuaquixi. Hacuaha meje ná xi cuinoje yasen yasen ni yêjê cjuar vëhë cojo xuta xi camangucacun me cojo Nina, cojo sa xi me xi cuacun jan ne, sahmi me ngahñu xi sahmi me suvá cjuandaja. Yêjê ni cjuar vëhë ne, jercu ndaja hacuaha jercu machjirêhë rê xuta. <sup>9</sup> Xín tejñi yêjê ni cjuavisiajmi xi hacuain machjirêhë; xín tejñi cjuavisiajmi tsêhë ñihî rê yêjê xutachanga rê xingu xingu me; xín tejñi yêjê ni cjuavisiajmi tsêhë xuta xi cjan cojo xicjin; xín tejñi yêjê ni cjuavixcan tsêhë ley rê Moisés. Yêjê ni cjuavisiajmi vëhë ne, machjiriin hacuaha tu mahya cuisiajme. <sup>10</sup> Ngu xuta xi vaxë me ngu ngu xuta tsêhë ngajñi rê xuta yungun xi cjuê ladu rê me ne, tinojetehe rê me ngu ndiya o hisca jo ndiya. Xi cjuê vëhë ne, hindë xicachasiin tsêhë me, <sup>11</sup> tsêhë xi ngaye ne, ha hye xi ngu xuta xi cuatjin sahmi ne, jiya me ngu ndiya xi xín cjuî, hacuaha sahmi me cjuatsehen. Hane cjuatsehen rê me jan ne, vëhë tsingacun xi cuaintjin xi sahmi me.

#### *Cjuacjintacun tsêhë suvá Pablo cojo Tito*

<sup>12</sup> Hya xi tsingátju Artemas o sa Tíquico xi cjuetjengui ri ne, nihñi ngujoyê xi cuindove tjengui ná ngajan Nicópolis, tsêhë xi tuxa ngajan cavejñángucacun xi tsingátju chan hnchan. <sup>13</sup> Tisecuee rê Zenas, me xi abogado me, cojo Apolos ne, catjindujú me cojo ndiya rê me, hane chjehecuende xi tsajin mé tsichaja rê me ndiya. <sup>14</sup> Hacuaha meje rê xi xuta naja ne,

cuma rë me hacutjin sahmi me cjuandaja, cojo sa xi cuisecoo me ngajñi rë ngu cjuachaja xi jercu sahmi ngu jyë. Meje rë xi cuengui chjí rë me cojo ngasunhdë rë me.

*Pablo ne, tisua me ngu nina*

<sup>15</sup> Yëjë ni me xi siutahá cojo ná ne, tsingatju me ngu nina riji. Hacuaha tehe rë xuta xi hmucacun me ngayaan ngatsë rë xi tjin tangun cjuatacun naja cojo Jesucristu ngu nina. Nina ne, catisua nuju me cjuandaja ngayujun ni. Cuatjin jain.

## Carta xi Catsingatju San Pablo tséhë Filemón

<sup>1</sup> Ngahan Pablo, xi tejñaya ndavaya ngatsë rë xi sahme xa rë Jesucristu ne, tsihindu cojo Timoteo xingueen xujun vihi xi ningatjin nuju ngayun Filemón, ngayun xi jemu hmutacuin nuju, ngayun xi visecun niji xcun xa xi nechantahan. <sup>2</sup> Hacuaha ningatjin nuju xujun vihi ngayun Apia, ngayun xi hacuaha xinguin nuju, cojo ngayun Arquipo, ngayun xi tangun canihña cojo nuju ngahñu ngatsë rë cja rë Nina, cojo ngayujun sa xuta ladu rë Nina xi ma tangun ngayun ngajan ndava me vëhë. <sup>3</sup> Nina Nahmi naja cojo Nai naja Jesucristu ne, catisua nuju me cjuandaja cjuajeya.

### *Vaxëndaja Pablo Filemón*

<sup>4</sup> Ngayun Filemón, hya xi veyanangë nuju ngajñi rë oración naha xi tisahme ne, nchunchujun ni ne, suá nacuechji rë Nina naha ta, <sup>5</sup> tséhë xi tivechutaha ná cja xi jemu tjin nuju cjuahmutacun cojo yëjë xuta ladu rë Nina hacuaha jemu tjin ngu tacún cojo Nai naja Jesús. <sup>6</sup> Hacuaha féhya rë Nina xi ngayun xi mangutacun cojo Nai naja sacuatjin niji ngayin ne, catuxaha sa me cjuatacun nuju xi cuijnercun yëjë ni cjuandaja xi tjin naja ngatsë rë xi tjin tangun cjuatacun naja cojo Jesucristu. <sup>7</sup> Jemu ndama ná, tai, hacuaha jemu sacu ná cjuetacun ngatsë rë cjuahmutacun xi tjin nuju ta, tséhë xi ngatsë nuju ne, casacu rë xahasen rë xuta ladu rë Nina cjuetacun.

### *Pablo fehya rë Filemón cjuandaja xi cuma rë Onésimo*

<sup>8</sup> Vëhë xi handasa tsacjun xi cuitéxa nuju mé xi ndatjin nihñu tséhë xi tjin tangun cjuatacun naha cojo Jesucristu ne, <sup>9</sup> peru hitsë sa chuya ná xi cjuéhya nuju tséhë xi ngajñi naja ne, jiya vassen xi hmí cjuahmutacun. Ngahan, Pablo ne, jemu changá ngahan hacuaha tejñaya ndavaya quihndë ngatsë rë xi sahme xa rë Jesucristu ne, <sup>10</sup> tiféhya nuju ngu cjuandaja xi cuma rë cha Onésimo, cha xi sacuaha quihndi naha tséhë xi camá cafaha cha cjuandajyihí xi chja tséhë Jesucristu xi casuá rë cha nguehe ndavaya.

<sup>11</sup> Handasa camachjiriin nuju cha mosu hndixahan nuju cha Onésimo hatsëë nixtin jan ne, peru quihndë ne, hisca ngayun hisca ngahan ne, jemu machjiréhë naja cha. <sup>12</sup> Quihndë ne, titsingátju nga nuju cha, hane meje ná xi chjuhunnstun cha sacuaha xi ngahan suva xi chjuhunnstun ná. <sup>13</sup> Hacuaha meje ná xi cuejña cha cojo ná, cojo sa xi cjuahacuenda ná cha ngojo nuju jinguyëjë rë xi tejñaya ndavaya ngatsë rë cjuandajyihí xi chja tséhë Jesucristu. <sup>14</sup> Peru mijí sahme tu mé ni hya xi chaja sa cuinújun mé xi ndatjin xi sahme. Cuatjin ta, tséhë xi meje ná xi cjuandaja xi nihñu ne, hacuiin cojo cjuachan ta suvá cojo cjuasua nuju. <sup>15</sup> Cavetjuxin rë xuma quihndi tsujun ngujo nixtin cojo sa xi quihndë xi cuya cha ne, cuejñacahndë nga cha cojo nuju yëjë ni nu yëjë ni nixtin. <sup>16</sup> Peru ha quihndë hacuiin sacuaha ngu mosu hndixahan nuju cha xi cuejña cha cojo nuju ta sacuaha ngu xuta xi jemu vengui sa chji rë me, sacuaha ngu xingun xi jercu hmutacún. Ngahan ne, jercu hmú cacún cha, hacuaha ngayun ne, hitsë sa ndaja hmutacún cha, hacuiin suvá sacuaha ngu xuta ni ta sacuaha ngu xuta ladu rë Nai naja.

<sup>17</sup> Quihndë ne, ngayun Filemón ne, ngatsë rë xi ha hyun ta ngayaan ne, tangun ni mangutacun cojo Jesucristu ne, vëhë xi quihndë ne, chjuhunnstun cha sacuaha xi chjuhunnstun ná ngahan. <sup>18</sup> Hane sa xi mé choho casahmi cha cojo nuju, o sa xi quitjen cha tsujun ne, vëhë ne, tejñu ladu naha. <sup>19</sup> Ngahan Pablo ne, cojo letra naha suva titsihindu cja vihi; ngahan cuejñángojo vëhë. Mijí tsinguitsjén nuju xi ngayun ne, jemu quitjun camahani tsahan, tséhë xi casuá camachaya nuju cjuandajyihí xi chja tséhë Jesucristu. <sup>20</sup> Quihndë tai ne, tisecun ná hitsë ta ngayaan ne, tjin tangun cjuatacun naja cojo Nai naja; tuhun hitsë cjuetacun xahasen naha ta ngayaan ne, tjin tangun cjuatacun naja cojo Jesucristu.

<sup>21</sup> Cuitjin tsihindu nuju ta, tséhë xi tjin ngu cáacun cojo nuju ta cuinuhyun tsahan, hacuaha hvë ta hisca quisun sa nihñu tséhë cja xi chjá cojo nuju. <sup>22</sup> Hacuaha tuhunndujun ngu cahndë hiscan xi cuitejña ta, ngahan ne, vetahácacun xi Nina ne, sua me cahndë cjuëtjengë nga nuju ngatsë rë xi cuatjin chjahyun rë me.

### *Tsinguijnetaha Pablo cja*

<sup>23</sup> Epafras, me xi hacuaha jiya ndavaya cojo ná ngatsë rë xi sahmi me xa rë Jesucristu ne, hacuaha tsingatju me ngu nina tsujun ngayun Filemón. <sup>24</sup> Hacuaniitjin ni Marcos, Aristarco, Demas, cojo Lucas, me xi cuacun tangun sahmi xa cojo ná ne, hacuaha tsingatju me ngu nina tsujun.

<sup>25</sup> Catisehen cjuandaja rë Nai naja Jesucristu cahntsua xahasen nuju ngayujun ni. Cuatjin jain.

## Xujun xi camahindu xi cjuahatsja xuta xi visiajmi Hebreo

<sup>1</sup> Nixtin titjun ne, jemu cjin ndiya hacuaha jemu cjin chuva rë xi casua Nina camachaya rë xutachanga naja ngu cju hya xi catsingatju me cju cojo profeta rë me. <sup>2</sup> Peru quihndë nixtin vihi ne, casua me camachaya naja hya xi catsingatju me cju cojo Quihndi rë me. Hane me vëhë xi cachja Nina xi cuma Nai rë yëjë ni xcusun xi tjin ngasunhdë, hacuaha casuaxa Nina Quihndi rë me jan xi me vëhë casahmi me ngasunhdë. <sup>3</sup> Hacuaha sacuatjin jemu jyë hnga Nina cojo hasen ndajyihni rë me ne, cuatjin jyë hnga Quihndi rë me cojo hasen rë. Hacuaha sacuaajyihni suvá Nina ne, cuajyihni camahani Quihndi rë me. Hacuaha Quihndi rë Nina jan ne, yahangui me yëjë ni xcusun xi tjin ngasunhdë cojo cju rë me xi jemu hñu ngahñu rë. Hane xi cafë catsityjahi me xuta tsëhë jyë rë ne, sehe quiji me ngahnga, cavejña me taha ladu quixi tsëhë Nina.

*Hitsë sa matitjun Quihndi rë Nina xi cumá rë yëjë ni ángel*

<sup>4</sup> Hacuaha tu tjin xi hitsë sa jemu ndajyihni xa xi casacu rë Quihndi rë Nina xi cumá rë xa xi casacu rë ángel ne, hacuanitjin ni cavechutaha me xi hitsë sa jemu camatitjun me tsëhë ángel xi cuacun jan, hya xi quiji cavejña me cojo Nina. <sup>5</sup> Hisca xi ngu ángel ne, cachjaain Nina cojo cju vihi, sacuatjin cachja me cojo Quihndi rë me:

Ngaye xi quihndi naha ngaye;

hacuaha quihndë casuáxa ri.

Cuatjin cachja me. Hacuaha cachjaain me tsëhë ngu ángel cuitjin:

Ngahan cumá ngahan nahmi rë cha,

hane cha vëhë ne, cumá cha quihndi naha.

Cachjaain me cuatjin cojo ángel. <sup>6</sup> Hane ngu ndiya nga, hya xi tsingatju me Quihndi ngu rë me ngasunhdë ne, cuitjin chja me tsëhë Quihndi rë me:

Yëjë ni ángel naha ne, catjaharcun rë me.

Cuatjin cachja me. <sup>7</sup> Hane xi tsëhë ángel rë me ne, cuitjin chja me:

Ngahan sahme xi ángel naha ne, tangun xcusun rë cojo tjo,

hane ángel xi fahacuenda xa naha ne, sahme xi tangun xcusun rë cojo ndihi.

Cuatjin cachja me. <sup>8</sup> Peru xi tsëhë Quihndi rë me ne, cuitjin chja me:

Ngayun Nina, tsajin nu tsajin nixtin cuijnetaha gobiernu nuju,

hacuaha gobiernu xi nihñu ne, hatuxa cjuaquixi.

<sup>9</sup> Canihmutacun cjuaquixi hane choho cahyun cjuatsehen;

hane vëhë xi ngahan Nina nuju ne, cavaxejen nuju,

hacuaha hitsë sa jyë cjuasua casuá nuju ngayun

xi cuma rë xingun.

Cuatjin cachja me. <sup>10</sup> Hacuaha chja nga me cuitjin:

Ngayun, Nai naha, ntsacu cavetsihin ne, ngayun canindujun nangui;

hacuanitjin ni ngahnga, hacuaha ngayun canindujun.

<sup>11</sup> Yëjë xcusun vëhë ne, cuechu nixtin xi cjuë,

peru ngayun ne, tsajin nu tsajin nixtin xi cjuë ngayun.

Hacuaha yëjë xcusun vëhë ne, cuma changá sacuatjin rë ngu tsjian xi chajá rë;

<sup>12</sup> hacuaha cuechu nixtin xi nijeyun xcusun xi cuacun vë sacuaha ngu tsjian tsjanga,

hacuaha nindeyun sacuaha vindeya ngu tsjian xi chajá rë.

Peru ngayun ne, hatuxa vindeyaain ngayun;

hacuaha nixtin nuju ne, hatuxa cuijnitaain.

Cuatjin cachja me. <sup>13</sup> Hacuaha hisca ngu ángel ne, cachjaain Nina cojo rë cju vihi, sacuatjin cachja me cojo Quihndi rë me:

Tinechin nguehe ladu quixi naha,

hisca hya xi yëjë ni xi sahmi ri condra ne, cuiyujú ngahan ngahma gobiernu riji.

<sup>14</sup> Sacuaha ángel ne hacui hasen xi tsujyihya tixa tsëhë Nina. Nina tsingatju me ángel xi cuacun vë xi fehe visecoo naja ngayaan xi cuetjuntjen tsëhë jyë naja.

## 2

*Miji rë xi chasen cjuandajyihni xi chja hacutjin cuetjuntjen*

<sup>1</sup> Vëhë xi meje rë xi hitsë sa ndaja cuetahanrcun cjuandajyihni xi cavisiñuju, cojo sa xi hacuain tu hitsë tu hitsë ne, cuetjunxen tsëhë ndiya ndajyihni xi tivanguen. <sup>2</sup> Ta sacuaha ley rë Nina xi cachja ángel hatsë nixtin ne, tjin jain rë ngahñu. Hane yëjë xuta xi casahmi cjuatsehen hacuaha cahndiin me tsëhë ley jan ne, camá me castigu sacuatjin xi mameje

rê jyê rê me. <sup>3</sup> Hacuaha ngayaan ne, cumaji cuatjuhnga ngayaan tsêhê castigu xi satê naja, sa xi chasen cjuandajyihî xi jercu tu ndajyihî camahani xi chja hacutjin cuetjuntjen. Cjuandajyihî vêhê ne, titjun Nai naja cachja me, hane xuta xi cahndê me cjuarê Nai naja ne, hacuanitjin ni cachja me cojo naja xi camá ngascan. <sup>4</sup> Hacuaha Nina ne, cojo jemu cjin cjuarcun xi ña quijircun naja hisca carcun cachutsejen ne, casua me camachaya naja xi cjuandajyihî vêhê ne, cjuaquixi jain. Hacuaha hya xi casua naja Nina Hasen rê me sacuatjin cavejñangucacun me ne, cuatjin xi casua me camachaya naja xi cjuandajyihî vêhê ne, cjuaquixi jain.

*Hacutjin vaxêtje naja cjuaveya rê Jesús*

<sup>5</sup> Nina ne, cachjaain me xi ngahma gobiernu rê ángel cuejña ngasunhdê, hya xi cuiндуva me sahmi me gobiernu ngasunhdê xi tinújan tsêhê vi. <sup>6</sup> Tjin ngu cahndê tsêhê xujun rê Nina xi cachja ngu xuta cojo Nina cuitjin:

¿Mé vengui chjî niji ngayin xuta, xi cuatjin ninguitsjun niji?

¿Mé vengui chjî niji xi cuatjin chjuhuncuendun niji?

<sup>7</sup> Ngayun ne, ngujo nixtin ne, hitsê sa caninguijnu niji xi cuma rê ángel,

peru canihñu yehe canihñu hnga niji cojo cjuatacun niji hacuaha canihñu xi chjihinjendin;

<sup>8</sup> yêjê ni xcusun xi tjin ngasunhdê ne, caviyujun ngahma

gubiernu niji ngayin xuta.

Cuatjin cachja ngu xuta cojo Nina. Hya xi cuatjin caviyuju Nina yêjê xcusun xi cuacun vê ngahma gobiernu rê xuta ne, yêjê ni caviyuju me, hisca ngu xcusun catsicanguin me. Peru hisca quihndê ne, cjêê chan xi yêjê xcusun xi cuacun vê ne, cuiyuju ngahma gobiernu rê xuta. <sup>9</sup> Peru xi hyan ne, Jesús, xi ngu jo nixtin ne, hitsê sa catsinguijne Nina me xi cumá rê ángel, peru quihndê ne, casahmi jyê casahmi hnga Nina me cojo hasen rê me hacuaha casahmi me xi Jesús ne, cjuahájenda me. Cuatjin casahmi Nina cojo rê me tsêhê xi jemu jyê cjuañihî cavatju me hya xi cahme me. Cuatjin camá cojo sa xi cojo cjuandaja rê Nina ne, Jesús cueya me ngatsê rê yêjê ni xuta.

<sup>10</sup> Nina ne, casahmi me yêjê ni xcusun xi tjin, tsêhê xi cuatjin chuya rê me. Hacuaha meje rê me xi jemu cjin quihndî rê me xi cuma yehe cuma hnga cojo cjuatacun rê. Vêhê xi ndatjin xi sahmi Nina xi ngajñî rê cjuañihî xi cavatju Jesús, me xi vaxêtje naja ne, cuechutaha me yêjê ni hacutjin xi meje rê Nina xi cuechutaha me. <sup>11</sup> Me xi tiviyujuxin rê xuta xi cumá tsêhê Nina me cojo yêjê ni xuta xi tiviyujuxin ne, ngu ni nahmi rê me. Hane vêhê xi me xi Quihndî rê Nina ne, ma savaain rê me xi chja me xi xicjin me xuta xi cuacun jan, <sup>12</sup> sacuatjin chja me xcun xujun rê Nina xi chja me cuitjin:

Suá cumachaya rê yêjê xingueen yo ngayun,

hacuaha cuaxêndaja nuju sé tsujun ngajñî rê me hiscan xi matangun me.

Cuatjin cachja Quihndî rê Nina. <sup>13</sup> Hacuaha chja nga me cuitjin:

Hacuaha ngayun xi cumangu cáacun cojo nuju.

Cuatjin cachja nga me. Chja nga me cuitjin:

Nguehe cuajyihî ngahan cojo yêjê quihndî nuju xi catuhun ná.

Cuatjin cachja me.

<sup>14</sup> Tsêhê xi ngayaan quihndî rê Nina ne, tjin jni tjin yojo naja ne, vêhê xi Jesús ne, hacuaha casacu rê me jni casacu rê me yojo rê me, cojo sa xi ngatsê rê cjuaveya rê me ne, cjuahataha me ngahñu rê xitsehen xi matitjun xi vitexa rê cjuaveya. <sup>15</sup> Hacuaha ngatsê rê cjuaveya rê me ne, ma sahmi ndaya naja me ngayejen ni xuta xi rcun cjuaveya. Hane tsêhê xi cuatjin rcun cjuaveya ne, vêhê xi sacuaha xi cjuaveya ne, cavitexa naja xcun cjuahñu naja. <sup>16</sup> Ha cjuaquixi ta hacuain canduva me xi cuiSecoo me ángel ta xi canduva me ne, tsêhê xi cuiSecoo naja me ngayaan xuta tjê rê Abraham. <sup>17</sup> Hane ngatsê rê vêhê xi casahmi ngujyê xi camá me sacuaha ngayaan cojo ngayêjê ni chuya rê sacuatjin cun ngayaan xicjin me, cojo sa xi hacuaha cuma me ngu nahmi xi matitjun xi tjin rê me cjuayumatacun, hacuaha jemu ndaja sahmichihin me xa rê Nina, hacuaha cojo sa xi cuechjite me jyê naja. <sup>18</sup> Hane tsêhê xi cuatjin suvá Jesús cavatju me cjuañihî hya xi cafahachuva xitsehen me ne, vêhê xi quihndê ne, hacuaha cuma cuiSecoo naja me ngayaan hya xi tifahachuva naja xitsehen.

### 3

*Hitsê sa jyê hnga Jesús cojo hasen rê me xi cumá rê Moisés*

<sup>1</sup> Ngayujun ni xuta ladu rê Nina xi cavaxijin nuju me xi cuma tsêhê me ngayun ne, cuiSajme hitsê tsêhê Jesús, me xi catsingatju Nina xi sua cumachaya naja tsêhê cjuachacun xi nújan xi macjain naja, me xi hacuaha má nahmi xi matitjun tsêhê cjuachacun xi nújan xi macjain naja. <sup>2</sup> Jesús ne, jemu ndaja casahmichihin me yêjê hacutjin xi meje rê Nina xi casuaxa rê me, sacuatjin casahmi xutachanga naja Moisés hatsêê xi hacuaha jemu ndaja casahmichihin me xa xi cavisecoo me xuta rê Nina. <sup>3</sup> Jesús ne, vechú chuya rê xi hitsê sa

cuma jyë cuma hnga me cojo hasen rë me xi cuma rë Moisés. Má sacuatjin rë ngu cha xi sahmi ngu ndihya, xi vechú chuva rë xi hitsë sa chjarcun rë cha xi cuma rë ndihya xi casahmi cha jan ta, <sup>4</sup> tsëhë xi yëjë ni ndihya ne, tjin ngu xuta xi casahmi me, vëhë xi camá, peru me xi casahmi yëjë ni xcusun xi tjin ngasunhdë ne, hacui Nina. <sup>5</sup> Moisés ne, ngu xuta xi sahmi xa rë Nina ni má me, hane jemu ndaja chihin casahmi me xa xi casatëxa rë me ngajñi rë yëjë ni xuta rë Nina. Hane xa xi casahmi me jan ne, xi catsingasca rë me cjuatacun rë xuta tsëhë cjuaxi cuichja Nina cuma ngascan. <sup>6</sup> Peru Cristu ne, Quihndi rë Nina camahani má me, hane jemu ndaja chihin casahmi me cuidadu yëjë ni xuta rë Nina. Xuta xi cuacun vë ne, hacui ngayaan, sa xi hacuiin nismetacun cjuatacun xi rcun camahani hacuaha sa xi hacuiin nismetacun cjuasua xi tjin rë xahasen naja xi vetahan tacun Nina.

*Cjuahajenda tangun xuta rë Nina cojo rë me*

<sup>7</sup> Vëhë xi meje rë xi cuetuhuncun cjuaxi chja Hasen rë Nina xi chja cuitjin: Sa xi cuisiniuju cjuaxi chjá quihndë ne,

<sup>8</sup> hacuiin nihñu taja tacún sacuatjin casahmi xuta hya xi cachjataha me Moisés hacuaha cafahachuva ná me ngajan hiscan jemu xín tsëhë nandya.

<sup>9</sup> Hane ngajan cafahachuva ná xutachanga nuju, handasa ha cavëë me yëjë cjuandaja xi casahme cahntsua yachan nu xi catsuyiyihiya me jan.

<sup>10</sup> Vëhë xi camacjan ná cojo yëjë xuta xi caviyuju nixtin hya, cuitjin cachjá tsëhë me: “Cjuatacun rë me ne, hatuxa hacjahi ndiya fi, hvíin me ndiya naha.” Cuatjin cachjá.

<sup>11</sup> Vëhë xi camacjan ná cojo rë me hane cachjá quixi xi tsajin nu tsajin nixtin xi cuisehen cjuahajenda tangun me cojo ná. Cuatjin cachja Hasen rë Nina.

<sup>12</sup> Nechun cuidadu, ngayujun ni, cojo sa xi tsajin hisca ngu ngayun xi cumatsehen cjuatacun nuju hacuaha cumacjaain nuju tsëhë me, sa tu cjuatacun tsehen jan ne, cuaxëxin nuju tsëhë Nina xi quicun me. <sup>13</sup> Cahndë rë vëhë ne, nchunchujun ni ne, tuhun cjuetacun xingun xingu xingu ngayun jinguyëjë rë xi tjin sa hora quihndë, cojo sa xi tsajin ngu ngayun xi cuma taja cjuatacun nuju ngatsë rë cjuandacha xi sahmi cjuatsehen. <sup>14</sup> Ta cojo ngayaan satë naja cjuandaja xi tjin rë Cristu, sa xi scaa jain naja cumangutacun hisca xi cuijnetaha nixtin naja, sacuatjin camangutacun ntsacu cavetsihin.

<sup>15</sup> Tetuhuncun nga sacuatjin chja xujun rë Nina xi chja cuitjin: Sa xi cuisiniuju cjuaxi chjá quihndë ne,

hacuiin nihñu taja tacún sacuatjin casahmi xuta hya xi cachjataha me Moisés.

Cuatjin chja xujun rë Nina. <sup>16</sup> ¿Yo me xi cuatjin cachjataha rë Moisés hya xi cavatju cavisiniuju me cjuaxi rë Nina ni? Yëjë ni xutachanga naja xi cavaxëxin Moisés tsëhë nangui Egipto. <sup>17</sup> Hane ¿yo me xi camacjan rë Nina cojo rë cahntsua yachan nu ni? Ha hacui ni me changá xi cuacun vë xi casahmi cjuatsehen hane cahme me ngajan hiscan jemu xín tsëhë nandya. <sup>18</sup> Hane ¿yo me xi cachja quixi Nina cojo xi tsajin nu tsajin nixtin xi cuisehen cjuahajenda tangun cojo me ni? Ha hacui ni me changá xi cuacun vë xi cahndiin tsëhë Nina. <sup>19</sup> Hane cuatjin camá xi camaji cavisehen cafahajenda me ngajan, tsëhë xi camacjaain rë me.

## 4

<sup>1</sup> Vëhë xi jinguyëjë rë xi tacun quicun cjuaxi cachja Nina xi cuisen chjahanjendan tangun cojo rë me ne, meje rë xi cumacjintacun sá tu tjin ngu ngayun xi cuechuntuun xcusun ndajiyihi vëhë. <sup>2</sup> Ngayaan ne, hacuaha cojo ngayaan camachaya naja cjuandajiyihi vëhë sacuatjin camachaya rë xutachanga naja xi cuacun jan; peru me xi cuacun jan ne, tsajin mé camachjirëhë rë me cjuaxi cavisiniuju me jan ta, tsëhë xi hya xi cavisiniuju me cjuaxi jan ne, camacjaain rë me. <sup>3</sup> Peru ngayaan xi camacjain naja ne, cuma cuisehen chjahanjendan tangun cojo rë Nina. Sacuatjin xi ha cachja me tsëhë cjuandajiyihi vëhë, xi cachja me cuitjin: Vëhë xi camacjan ná cojo rë me hane cachjá xi tsajin nu tsajin nixtin xi cuisehen cjuahajenda tangun me cojo ná. Cuatjin cachja me. Nina ne, catsinguijnetaha me xa xi sahmi me hisca hya xi casahmi me ngasunhdë; <sup>4</sup> hacuaha tjin ngu cahndë tsëhë xcun xujun rë me ne, cachja me tsëhë nixtin xi má yatu jan cuitjin:

Ngahan ne, nixtin xi má yatu ne, cafahájenda tsëhë yëjë ni xa xi casahme.

Cuatjin cachja me. <sup>5</sup> Hacuaha ha xujun vëhë ni ne, cachja nga me cuitjin:

Tsajin nu tsajin nixtin xi cuisehen cjuahajenda tangun me cojo ná.

Cuatjin cachja me. <sup>6</sup> Hane tsëhë xi chaja sa cuisehen yahnga xuta xi cjuahajenda tangun me cojo Nina ne, hacuaha tsëhë xi xutachanga naja xi cojo tjun camachaya rë cjuandajiyihi

jan ne, cavisiin me cafahajenda tangun me, ngatsë rë xi cahndiin me tsëhë cjua xi tjun camachaya rë me jan ne, <sup>7</sup> vëhë xi Nina ne, cavejña nga me ngu nixtin, xi hacui quihndë. Jemu tsëë cavatju nixtin xi cavitexa Moisés, hya xi catsihindu xutachanga naja David cjua rë Nina xi ha canújan titjun xi chja cuitjin:

Sa xi cuisifúju cjua xi chjá quihndë ne, hacuiin nihñu taja tacún.

Cuatjin cachja Nina. <sup>8</sup> Sa xi xutachanga naja Josué quijicojo me xuta xi cjuahajenda tangun cojo Nina ne, Nina ne, hacuaha cachjaain me xi camangaskan xi tjin sa ngu nixtin xi cuiseen chjahanjendan tangun cojo rë me. <sup>9</sup> Ngajan xi tjin sa ngu nixtin xi cuisehen xuta rë Nina cjuahajenda tangun me cojo Nina. <sup>10</sup> Ta xuta xi visehen fahajenda tangun cojo Nina ne, hacuaha fahajenda me tsëhë xa xi casahmi me sacuatjin cafahajenda Nina tsëhë xa xi casahmi me. <sup>11</sup> Ngajan xi meje rë xi nihña ngahñu xi cuma cuiseen chjahanjendan cojo rë Nina, cojo sa xi hisca ngu ngayaan ne, hacuiin nihña sacuatjin casahmi xuta xi cahndiin me tsëhë Nina.

<sup>12</sup> Cjua xi chja Nina ne, quicun jain, hacuaha jemu tjin rë ngahñu, hatuxa vetjucaa. Sacuaha xi hitsë sa yuju xi cumá rë quicha xi jo yuju rë, xi vatjucja rë hisca hasen naja, hacuaha handasa hiscan hinchacoo ninda naja ne, cuatju, cuechu hisca ngajñi rë xineninda naja. Cjua xi chja Nina jan ne, vëë hacutjin ningatahantacun, hacuaha vëë hacutjin má rë zahasen naja.

<sup>13</sup> Hisca ngu xcusun xi Nina catsindaja me ne, cumaji chahma xi cumá rë me; yëjë ni xcusun vëhë ne, tjin tsejen xi cuma rë Nina, me xi tahancuendan rë yëjë ni xcusun xi canihña.

*Jesús ne, hacui me xi má nahmi xi matitjun*

<sup>14</sup> Jesús, Quihndi rë Nina ne, hacui me xi nahmi xi matitjun xi tjin naja. Jemu ndaja camahani me, hacuaha cavatjutaha me ngahnga, sehe cavechu me xcun Nina. Vëhë xi meje rë xi hacuiin nismetacun cjuachacun xi nújan xi macjain naja. Cuatjin meje rë ta, <sup>15</sup> tsëhë xi nahmi xi matitjun xi tjin naja ne, ma mayuma rë me ngayaan xi jemu chuva tacun ta, tsëhë xi me vëhë ne, hacuaha cavatju me camá yëjë ni cjuacjintacun sacuatjin vatjun ngayaan má. Peru handasa cuatjin cavatju me camá ne, hisca ngu cjuatsehen ne, casahmii me. <sup>16</sup> Vëhë xi meje rë xi rcun camahani xi nihña tiña tsëhë Nina, me xi sahmi naja gobiernu cojo cjuandaja. Nihña tiña cojo sa xi chjahanntsan cjuayumatacun rë me, hane hacuaha sacú naja cjuandaja rë me xi cuisecoo naja hora xi mameje rë.

## 5

<sup>1</sup> Yëjë ni nahmi xi matitjun xi tuxijin rë ngajñi rë xuta ne, satë xa rë me xi visecoo me xuta, cojo sa xi sahmi tiña xuta tsëhë Nina. Hacuaha nahmi xi cuacun vë ne, satëxa rë me xi sua me yëjë ni xcusun cjuatjo cojo Nina ngatsë rë cjuatsehen xi sahmi xuta. <sup>2</sup> Nahmi xi cuacun vë ne, ma tsijyëcacun me cojo xuta xi hvín camahani hacuaha cachaja tsëhë ndiya rë Nina ta, tsëhë xi nahmi vë ne, hacuaha chuva cacun me. <sup>3</sup> Vëhë xi tjin rë me xi sua me cjuatjo cojo Nina ngatsë rë cjuatsehen xi casahmi suvá me, cojo ngatsë rë cjuatsehen xi casahmi jingu sa xuta.

<sup>4</sup> Tsajin ngu xuta xi cojo cjuatacun rë suvá ni me ne, cjuaha me ngu xa ndajyihí vëhë ta me xi cjuaha ne, me xi suvá Nina cuichja me xi satë rë, sacuatjin cavatju xutachanga naja Aarón camá. <sup>5</sup> Hacuanitjin ni rë Cristu ta, hacuiin casahmi jyë casahmi hnga suvá me yojo rë me xi cuma me ngu nahmi xi matitjun ta me xi cachja xi cuma me nahmi ne, hacui Nina, xi cachja me cuitjin:

Ngaye xi quihndi naha ngaye;  
hacuaha quihndë casuá xa ri.

Cuatjin cachja Nina. <sup>6</sup> Hacuaha chja me jingu sa cahndë tsëhë xujun rë me cuitjin:

Ngaye xi nahmi ngaye yëjë nu yëjë nixtin  
sacuaha camá Melquisedec hatsëë nixtin.

Cuatjin cachja Nina. <sup>7</sup> Hane jinguyëjë rë xi Cristu tacun sa me cjuahñu cojo yojo rë me ne, hora xi cafehya rë me Nina, Nina xi tjin rë chuva rë xi cuaxëtje rë me tsëhë cjuaveya ne, jercu cajindaya me hacuaha jercu cajihnda me. Hane cafahacuenda Nina cjua rë me ta, tsëhë xi jemu cafaharcun me Nina. <sup>8</sup> Cristu ne, handasa Quihndi rë Nina me xi cjuaquixi, peru cjuañihí xi cavatju me camá gnehe ngasunhndë ne, vëhë hitsë sa cavicuya rë me mé vjine xi nuhyan tsëhë Nina. <sup>9</sup> Hane xi cuatjin casahmi Nina xi cavechutaha Jesús yëjë ni hacutjin xi meje rë Nina xi cuechutaha me ne, vëhë xi Jesús ne, ma vaxëtje me yëjë ni xuta xi vihndë tsëhë me, hacuaha tsajin nu tsajin nixtin xi cuatju xuta xi cuacun vë castigu.

<sup>10</sup> Hane hacuaha Nina casuaxa me Jesús xi má me nahmi xi matitjun sacuaha camá Melquisedec hatsëë nixtin.

*Mijí rë xi nismetacun ndiya rë Nina*

<sup>11</sup> Sacuaha tsêhë cjuatacun vëhë ne, jemu tjin cjuaxi cuinújin cojo nuju, peru jemu chja cuátjin xi tihincueñdin nuju ta, tsêhë xi hacuñin ndaja meje cuisñuju. <sup>12</sup> Ngayun xi ha jemu tsêë nduvun chutayun cjuaxi rë Nina ne, ha tivicyun rë xuta cjuaxi rë Nina. Peru cahndë rë xi ha tivicyun ne, tu ngayun meje rë ngu xi cuicuya nga nuju cjuaxi tjin tjun chutaya rë tsêhë cjuaxi rë Nina. Sacuaha xi mameje rë xi cuyun shuhun nga lechi, cahndë rë xi xinú niñu. <sup>13</sup> Sacuaha quihndi langa ne, vëhë xi suvá lechi hvi, hacuaha hvñin camahani mé xi ndaja o mé xi ndajin. <sup>14</sup> Peru sacuaha niñu xi chinë ne, xuta changá xi jinë me, xuta xi ha vëë me mé xi ndaja mé xi ndajin ta, tsêhë xi cjuatacun rë me ne, ha jemu nduva sahmixa.

## 6

<sup>1</sup> Quihndë ne, meje rë xi cueññaxen hitsë cjuachacun xi cachutayan hya xi tjin tjun camangutacun cojo Cristu, hane chutayan jingu sa cjuaxi hitsë sa chja, cojo sa xi cueññachihin ndaja cjuatacun naja. *Mijí rë xi cuyun chutayan nga cjuaxi xi ha cama naja titjun, sacuaha cjuaxi chja xi meje rë xi cueññaxen rë yëjë xcusun xi machjirñin xi nihña; sacuaha cjuaxi chja xi meje rë xi cumangutacun cojo Nina;* <sup>2</sup> sacuaha cjuaxi chja xi meje rë xi cuma tyjahi vihi cuma tyjahi vëhë xi cuma rë Nina; sacuaha cjuaxi chja xi meje rë xi cuisanentsan ngu xuta; sacuaha cjuaxi chja xi cuya nima cjuahñu; sacuaha cjuaxi chja xi cuechu nixtin xi Nina ne, tsichuva naja me ngayeyen ni cojo cjuatacun naja. <sup>3</sup> Vëhë xi quihndë ne, cueññaxen hitsë cjuaxi cuacun vë, hane chutayan jingu sa cjuaxi hitsë sa chja cuinjnercuun, sa xi sua Nina cahndë.

<sup>4</sup> Xuta xi ha cavisehen cjuahasen rë Nina ngajñi rë cjuatacun rë me ne, hacuaha casacu rë me hitsë cjuandaja xi Nina sua me, hacuaha cavisehen Hasen rë Nina cahntsua xahasen rë me, <sup>5</sup> hacuaha caveñña rë me hitsë cjuandajyihñi rë Nina, hacuaha camachaya rë me hitsë cjuarcun xi hitsë sa rcu cjin cuma nixtin xi sehe nduva. <sup>6</sup> Sa xi xuta xi cuacun vë tsismicacun me ndiya rë Nina ne, cumaji cuisecoon rë me xi tsindeya me cjuatacun rë me ngu ndiya nga ta, xcusun xi tsahmi me ne, titsixcuehu me Quihndi rë Nina, sacuaha xi tivuya tivetaha suvá me me xcun cru. <sup>7</sup> Xuta xi cuacun vë ne, tangun me cojo nangui xi hvi rë tsi xi vaha xcun: sa xi nangui vëhë ma ngu xcusun xitjë xi cumachjirëhë rë xuta xi nai rë ne, tsinchacun Nina nangui vëhë; <sup>8</sup> peru sa xi suvá nahyá cuetju xcun nangui vëhë ne, venguñin camahani chji rë. Hacuaha choho cuichja Nina cojo, hane hiscan xi cuijnnetaha ne, cueti.

*Cuanguen nduju cuetahantacun Nina*

<sup>9</sup> Peru handasa cuatjin nújin cojo nuju, ngayujun ni xi jemu hmutacuin nuju ne, peru ha hyin cojo cjuatacun niñi xi ngayun ne, ndaja tivatjun tijima, cuma cuinújan ne, ha tivanguncujun ndiya xi cuaxëtje nuju. <sup>10</sup> Nina ne, quixi me cojo cjuaxi rë me. Vëhë xi tsichayaain me yëjë xcusun xi canihñu, hacuaha tsichayaain me cjuahmutacun xi camatsejen xi tjin nuju cojo rë me, hya xi cavisehun rë xuta ladu rë me, sacuatjin xi tihñu hisca quihndë. <sup>11</sup> Xi meje niñi ngayin ne, jima ngu ngayun ne, hacuanitjin ni tinehun ngunajatacun jinguyëjë rë xi nechun cjuahñu, cojo sa xi sacú nuju yëjë cjuandaja rë Nina xi vetuhun tacun. <sup>12</sup> Hacuaha meje niñi xi hacuñin cuma tsêhë ngayun ta xi meje niñi ne, nihñu sacuatjin sahmi xuta xi ngatsë rë xi jemu ndaja ticaa rë me xi mangucacun me cojo Nina ne, vëhë xi tifahatsja me cjuandaja xi ha cachja Nina xi sacú rë me.

<sup>13-14</sup> Hya xi cachja quixi Nina cojo Abraham xi sua rë me ngu cjuandaja ne, tsêhë xi ha quihndë tsajin sa yo xi matitjun xi cuma rë Nina ne, vëhë xi cachja me cuitjin: “Ngahan suva hvë xi cjuaquixi xi tsinchácun ri, hacuaha jemu cjin sahme ri cojo xuta riji.” Cuatjin cachja me. <sup>15</sup> Hane xi cuatjin cacaa rë Abraham caveñña me cojo cjuajeya cjuaxi cachja Nina ne, cavechu nixtin xi casacu jain rë me cjuandaja xi ha cachja Nina xi sua rë me. <sup>16</sup> Hya xi ngu xuta sua me ngu cjuaxi rë me xi cjuaquixindaja ne, hisca veyanangui me ngu xi hitsë sa matitjun xi cumá rë me, xi hacui Nina; hane hya xi jo xuta tisua cjuaxi rë me ne, sa xi cuetjuñi ngu me xi cuacun vë xi cuichja me: “Vëë Nina jain xi quixi” ne, ngajan ma chihin cjuavisajmi rë me. <sup>17</sup> Vëhë xi hya xi cachja Nina xi sua rë me Abraham ngu cjuandaja ne, cuitjin cachja me: “Ngahan suva hvë.” Cuatjin cachja me cojo sa xi ngayaan xi chjahanntsan cjuandaja vëhë ne, cumachayandaja naja ta Nina ne, hya xi cuichja me ngu cjuaxi ne, tsindeyaain me cjuatacun rë me. <sup>18</sup> Cuatjin cachja Nina cojo sa xi jercu ndaja sacú naja cjuetacun ngatsë rë jo xcusun xi hatuxa cumaji cuindeya. Ngu xcusun jan ne, hacui suvá Nina, hane xi ma jo jan ne, hacui cjuaxi cachja me cojo Abraham. Hacuaha Nina ne, hatuxa maji vindacha me. Hane ngayaan xi vetahan tacun Nina ne, sacú naja cjuetacun vëhë, cojo sa xi cumangutacun cojo cjuaxi Nina cachja me xi cuechu nixtin xi cuiseen chjahanjendan tangun cojo rë me. <sup>19</sup> Hane xi cuatjin vetahan tacun Nina ne, tsajin camahani mé cuma rë hasen naja, hacuaha cuma cuechun hisca hiscan tacun



Nina, <sup>20</sup> hiscan xi quiji Jesús cavuxaha me ndiya tsajan. Hane Nina casua xa me Jesús xi camá Jesús nahmi xi matitjun xi tsajin nu tsajin nixtin xi cjuë xa rê me, sacuaaha camá Melquisedec hatsëë nixtin.

## 7

### *Jesús ne, má me nahmi sacuaaha camá Melquisedec*

<sup>1</sup> Melquisedec vë ne, matitjun me tsëhé nandya Salem, hacuaaha má me nahmi xi sahmi me xa tsëhé Nina xi hatuxa jyë hnga cojo Hasen rê. Hane hya xi cavuya Abraham xi quiji cavaxëtje me quihndi rê hntse me tsëhé condra rê ne, cavetju Melquisedec tsëhé nandya Salem quijitjengui me Abraham hiscan nduva, hane xi casacu xicjin me ndiya ne, catsinchacun Melquisedec Abraham. <sup>2</sup> Hya xi camá ne, të cahndë cavatëcja Abraham yëjë ni xcusun xi camá sa cafaha me tsëhé xuta xi cuacun condra jan ne, casua rê me Melquisedec ngu cahndë tsëhé të cahndë jan, tsëhé xi Abraham ne, faharcun me Nina. Nihi xi Melquisedec ne, meje cuichja “ngu me xi matitjun xi vitexa cojo yëjë ni cjuaqixi”; hacuaaha nihi xi chja Me xi Matitjun tsëhé Salem ne, meje cuichja “ngu me xi matitjun xi vitexa cojo yëjë ni cjuajeya.” <sup>3</sup> Xcun xujun rê Nina ne, tsajin camahani hiscan xi chja tsëhé naa tsëhé nahmi rê Melquisedec. Hisca tsëhé xutachanga rê me ne, tsajin hiscan xi chja. Hacuaaha chjaain hacutjin catsin me ne, chjaain hacutjin cahme me. Cuatjin xi Melquisedec ne, meje tangun me cojo Quihndi rê Nina, tsëhé xi hacuaaha ngu nahmi má me xi tsajin nu tsajin nixtin fë xa rê me.

<sup>4</sup> Chutsujun hacutjin jercu vengui chji rê Melquisedec, xi hisca xutachanga naja Abraham ne, casua me ne ngu cahndë tsëhé yëjë xcusun xi cavatëcja me të cahndë jan. <sup>5</sup> Ley xi casua Nina rê Moisés xi camá ngascan ne, chja ta nahmi xi nduva tjë rê Levi ne, tjin rê me chuva rê xi cjuéhya me cojo naja ngayaan xuta tjë rê xuta Israel xi cuichancjan të cahndë yëjë ni xcusun xi tjin naja, cjuaha nahmi vëhé ngu cahndë tsëhé të cahndë jan. Cuatjin chja ley rê Moisés xi cuechjen diezmu naja, handasa xicjin nahmi jan má ngayaan, hacuaaha tjë rê Abraham ngayejen ni. <sup>6</sup> Melquisedec ne, handasa hacuiin tjë rê Levi má me, peru caphatsja me ngu cahndë tsëhé xi camá të cahndë jan, xi casua Abraham. Hacuaaha catsinchacun Melquisedec Abraham, me xi ha cachja Nina xi sacú rê cjuandaja. <sup>7</sup> Ngayejen ni ne, ha hyan ta me xi tsinchacun ne, me vëhé xi matitjun me tsëhé me xi manchacun. <sup>8</sup> Nguehe xcun cjuahñu naja vi ne, nahmi xi fahatsja me diezmu tsëhé yëjë xcusun xi ticja të cahndë ne, hacuaaha xuta ngayaan ni me xi hacuaaha hme me; peru xcun xujun rê Nina ne, chja tsëhé Melquisedec sacuaaha xi tacun cuaha me. <sup>9</sup> Nahmi xi nduva tjë rê Levi xi hacuaaha coje me tifahatsja me diezmu ne, cuma cuinújan ne, sacuaaha xi coje me cavechji me diezmu rê me hya xi casua Abraham cojo Melquisedec jan diezmu rê me. <sup>10</sup> Cuatjin sacuaaha xi cavechji nahmi xi cuacun jan ta, tsëhé xi Abraham ne, ha cojo tjë xi cuacun vë yaha me hya xi casua me diezmu rê me cojo Melquisedec.

<sup>11</sup> Xuta Israel ne, caphatsja me cja xi chja hacutjin meje rê Nina xi sahmi yëjë xuta xi tjë rê Levi xi sahmi me xa sacuaaha nahmi. Quihndë ne, sa xi nahmi xi cuacun vë camá casahmi me xi cavechutaha xuta yëjë ni hacutjin xi meje rê Nina xi sahmi me ne, ha quihndë hacuiin sahmi ngujyë xi cuetjújñi sa ngu nahmi xi hacjahi xcusun rê, ngu nahmi xi hacuiin tangun xcusun rê cojo Aarón ta ngu nahmi xi tangun xcusun rê cojo Melquisedec. <sup>12</sup> Hane hya xi vindeya xcusun rê xa xi sahmi nahmi ne, hacuaaha hatuxa vindeya ley xi vitexa rê me. <sup>13</sup> Hane Nai naja, me xi cuatjin chja xujun rê Nina tsëhé ne, hacjahi tjë me, hane sacuaaha tjë vëhé ne, hisca ngu nahmi cjëë cuetjújñi me. <sup>14</sup> Hacuaaha ha hyan ta Nai naja ne, tsëhé tjë rê Judá canduva me, hane Moisés ne, cachjaain camahani me xi tjë vëhé ne, ngajan cuetjújñi ngu nahmi.

<sup>15</sup> Yëjë cja xi tinújan vi ne, tsejen xi jemu cjuaqixi, hya xi vetjújñi sa ngu nahmi sacuaaha Melquisedec. <sup>16</sup> Hane nahmi xingu jan ne, hacui Nai naja, me xi cavechutaha xi camá nahmi, hacuiin ngatsë rê ngu ley xi chja yo tjë rê xi cuma nahmi ta ngatsë rê ngahñu rê ngu cjuahñu xi tjin rê me xi tsajin nu tsajin nixtin vetsun. Ngatsë rê vëhé xi cavechutaha me xi camá me nahmi.

<sup>17</sup> Hacuaaha Nina ne, cuitjin chja me tsëhé Nai naja:

Ngaye xi nahmi ngaye yëjë nu yëjë nixtin  
sacuaaha camá Melquisedec hatsëë nixtin.

Cuatjin cachja Nina. <sup>18</sup> Sacuaaha cja rê ley xi cavitexa titjun ne, cavetsunya, tsëhé xi hatuxa tsajin rê ngahñu hacuaaha machjiriin ta, <sup>19</sup> tsëhé xi camaji casahmi xi cavechutaha xuta yëjë ni hacutjin xi meje rê Nina xi cuechutaha me. Hane cahndë rê ley vëhé ne, vetahan tacun ngu cja xi hitsë sa ndajyih, hane ngatsë rê xi cuatjin vetahan tacun ne, vëhé xi niñña tiña tsëhé Nina.

<sup>20</sup> Hya xi casua xa Nina Jesús xi cuma me nahmi xi matitjun ne, cachja me cja vihi: “Ngahan suva hvê.” Cuatjin cachja me. Peru hya xi cafaha xa nahmi xi yahnga jan ne, cachjaain Nina: “Ngahan suva hvê.” <sup>21</sup> Peru sacua ha tsêhê Nai naja ne, xujun rê Nina ne, cuitjin chja:

Nai naja ne, cachja me cja vihi: “Ngahan suva hvê.” Cuatjin cachja me, hacua ha tsajin hora tsindeya me cjuatacun rê me xi cachja me cja vihi: “Ngaye xi nahmi ngaye yêjê nu yêjê nixtin sacua ha camá Melquisedec.”

Cuatjin cachja me. <sup>22</sup> Hane xi cuatjin casua xa Nina Jesús xi camá me nahmi xi matitjun tsajan ne, vêhê xi sacu naja cjuaquixindaja xi Nina ne, sahmichihin jain me compromisu xi sehe tisahmi me. Hane compromisu vêhê ne, hitsê sa ndajiyihi xi cuma rê xi casahmi me titjun. <sup>23</sup> Sacuatjin rê nahmi xi yahnga jan ne, sacuiin rê me cahndê xi cjuenduju me sahmi me xa yêjê nu yêjê nixtin ta, tsêhê xi hatuxa hme me. Vêhê xi hisca ntsacu cavetsihin hisca quihndê ne jemu cjîn camá me cojo yêjê sa tjê rê me xi yahnga xi hacua ha camá nahmi. <sup>24</sup> Peru Jesús ne, tsêhê xi tsajin nu tsajin nixtin xi cueba me ne, vêhê xi hacua ha tsajin nu tsajin nixtin xi jingu sa cjuahatsja xa rê me xi má me nahmi. <sup>25</sup> Vêhê xi ma vaxêtje me xuta xi sahmi tîna tsêhê Nina ngatsê rê xi camangucacun xuta jan cojo Jesús. Hane hya xi vaxêtje me xuta xi cuacun vê ne, ha quihndê tsajin nu tsajin nixtin xi cumameje nga cuetjutje me ta, tsêhê xi Jesús ne, tacun me yêjê nixtin xi cjuehya rê me Nina ngatsê rê xuta xi cuacun vê.

<sup>26</sup> Jemu ndatjin xi tjîn naja ngu nahmi xi matitjun xi cuatjin xcusun rê me. Jesús, nahmi xi matitjun jan ne, jemu tyjahi me, tsajin rê me cjuatsehen, tsajin mé jyihí mé má me, cavetjuxin me tsêhê xuta tsehen, quiji me hisca ngajan sa tsêhê ngahnga. <sup>27</sup> Me vêhê ne, hacuiin tangun me cojo nahmi xi matitjun xi yahnga jan ta, me vêhê ne, tsajin mé má xi cojo me nchunchujun ni sua rê me Nina ngu chu xi cahme ngatsê rê jyê rê súvá me, hane xi cuma ngascan ne, sua nga me ngu chu xi cahme ngatsê rê jyê rê xuta. Jesús ne, ngu ndiya ni casua me ngu cjuatjo cojo Nina ngatsê rê jyê rê xuta, hya xi casua me yojo rê me xi cahme me. <sup>28</sup> Sacua ha ley rê Moisés ne, sua xa rê xuta xi cuma me nahmi xi matitjun tsêhê yêjê ni nahmi. Hane xuta ne, hatuxa caain rê cjuatacun rê me xi súvá cjuandaja sahmi me. Peru sacua ha cja xi cachja Nina hya xi cachja me xi “Ngahan suva hvê” ne, cja vêhê casua xa rê Quihndi rê Nina xi cuma me ngu nahmi xi matitjun. Hane cja xi cachja Nina jan ne, camá ngascan canduva xi cuma rê ley. Hacua ha Quihndi rê Nina ne, tsajin nu tsajin nixtin xi caain rê cjuatacun rê me xi súvá cjuandaja sahmi me.

## 8

*Jesús ne, sahmi tangun me xuta cojo Nina ngatsê rê ngu compromisu xatsê*

<sup>1</sup> Quihndê ne, cja xi hitsê sa matitjun tsêhê yêjê ni cja xi tinújan vi ne, hacui cja vihi: tjîn naja ngu nahmi xi matitjun xi cuatjin xcusun rê me. Quiji me ngahnga, cavejña me taha ladu quixi tsêhê Nina xi jemu jyê hnga cojo hasen rê. <sup>2</sup> Ngajan sahmi me xa xi má me nahmi ngajan ndava Nina. Peru ndava Nina jan ne, hacuiin ngu ndihya xi catsindaja ngu xuta ta cahndê vêhê ne, súvá Nai naja catsindaja me.

<sup>3</sup> Yêjê ni nahmi xi matitjun ne, hatuxa xa rê me xi sua me cjuatjo cojo Nina sua me ngu chu xi tsiquehen xuta. Vêhê xi cojo Jesús camameje rê xi tjîn mé xi sua me cjuatjo cojo Nina. <sup>4</sup> Sa xi nguehe ngasunhdê tacun cuaha me quihndê ne, hacuiin cojo me má me nahmi ta nguehe ne ha tjîn nahmi xi sua cjuatjo cojo Nina sacuatjin vitexa ley rê Moisés. <sup>5</sup> Sacua ha xi sahmi nahmi nguehe ngasunhdê vi ne, hacuiin tangun cojo xa xi má ngajan ngahnga ta, sacua ha ejemplu o tjangnuen ni rê xa xi má jan ne, vêhê xi má nguehe. Hya xi ha cuetsihin sahmi Moisés ndava Nina jan ne, cuitjin cachja Nina cojo rê me: “Nechin cuidadu ne ndandaja nihñi yêjê ni xcusun vê sacua ha xcusun xi ha catsingácun ri ngajan hiscan naxi jan.” Cuatjin cachja Nina. <sup>6</sup> Quihndê ne, Jesús casacu rê me ngu xa xi hitsê sa ndaja, tsêhê xi hacua ha me vêhê sahmi tangun me xuta cojo Nina ngatsê rê ngu compromisu vêhê hane hitsê sa ndaja cja cachja me.

<sup>7</sup> Sa xi ndatjin tjîn chíhin compromisu xi casahmi Nina titjun ne, sehe camamiji rê ngu nga compromisu xi ma jo xi hitsê sa ndaja. <sup>8</sup> Peru Nina ne, cavêê me xi xutachanga naja ne, quitjen me jyê, vêhê xi cachja me cuitjin:

Ngahan Nai nuju ne, cuichjá cojo nuju ta cuechu nixtin xi sahme nga ngu compromisu xatsê cojo nuju ngayun xuta tjê rê Israel cojo xuta tjê rê Judá.

<sup>9</sup> Peru ha quihndê hacuiin sacua ha compromisu xi casahme titjun cojo xutachanga nuju, hya xi cojo cjuahmutacun naha ne, cavaxêxen me tsêhê nangui Egipto; hane tsêhê xi hacuiin quiji nduju me sacuatjin compromisu xi casahme cojo rê me ne,

vêhë xi ngahan ne, casahmecuendaan me, cuatjin chjá ngahan, Nai nuju.

<sup>10</sup> Sacuaha compromisu xatsë xi sahme cojo nuju ngayun xuta tjë rë Israel hya xi cuma ngascan tsêhë nixtin vêhë ne, hacui vihi:

Cueyá ley naha cahntsua cjuatacun nuju, sacuaha xi cuma hindu cjuar rë ley vêhë cahntsua cjuatacun nuju.

Hacuaha ngahan cuma ngahan Nina nuju hane ngayun cuma ngayun xuta naha.

<sup>11</sup> Tsajin yo xi cuicuya xicjin,

tsajin yo xi cuichja cojo xicjin cuitjin: “Meje rë xi cumachaya ri yo xi Nai naja.”

Tsajin yo xi cuichja cuatjin ta tsêhë xi yějë ni sa quihndi sa changá ne, ha camachaya rë yo ngahan.

<sup>12</sup> Nixtin hya ne, jemu tsjin ná cjuaninchataha cojo cjuatsehen xi cún me

hacuaha ha quihndë tsajin nixtin tsinguátsjen jyë rë me.

Cuatjin cachja Nina. <sup>13</sup> Hya xi chja Nina tsêhë ngu compromisu xi tjun jan ne, casahmi changá me. Hane xcusun xi ha jima changá jan ne, ha meje cjuëya.

## 9

### *Ndava Nina nguehe nangui*

<sup>1</sup> Quihndë ne, ngajñi rë cjuar tsêhë compromisu xi casahmi Nina titjun ne, cachja me hacutjin xi chjahanrcun rë me, cojo xi cuma ndava me nguehe ngasunhndë. <sup>2</sup> Vêhë xi camá ngu ndihya tsjian xi camá ndava Nina. Ngu cahntsua xi tjun tjun tacun, xi hmí rë Cahndë Rcu ne, ngajan tacun candelero, tacun maxë, siu pan xi viyuju xcun Nina. <sup>3</sup> Ngu cahntsua xi tacun cahncun taha cahntsua tsjian xi tyjangui má jo cahndë jan ne, ngajan tacun cahndë xi hmí Cahndë Xi Jercu Tu Rcu Camahani. <sup>4</sup> Ngajan tacun ngasunscun xi suvá oro camá hiscan xi tí tyjungunsa. Hacuaha ngajan tacun caxa tsêhë compromisu xi suvá oro casaxtë rë yějë ni ladu rë. Hane cahntsua caxa jan ne, ngajan jiya tilu xi suvá oro camá, hane cahntsua tilu jan hinchandaja scuan cjuarcun xi hmí rë maná. Hacuaha bastón tsêhë Aarón xi cavetjusehen jan ne, cahntsua caxa jan jiyandaja. Hacuaha ngajan hinchandaja ndoyojo tã xi camahindu cjuar rë ley. <sup>5</sup> Xcun caxa jan ne, hinchacun jo quicha, xi sacuaha ángel rë Nina, xi fehma rë tyjunga rë xcun caxa jan. Hane xcun tyjavaxcun caxa jan ne, ngajan tsejen hasen rë ngahñu cjuar rë Nina hiscan tsicjë me jyë rë xuta. Peru quihndë ne, tsêhë cjuar xi ha cachjá cojo nuju vë ne, ha quihndë cuichjaan chichihin sa cojo nuju.

<sup>6</sup> Quihndë xi ha caviyuju chihin yějë ni xcusun vêhë cuatjin ne, yějë ni nahmi ne, visehen me nchunchujun ni cahntsua xi tjun tjun tacun tsêhë ndihya tsjian jan, xi sahmi me xa rë me sacuaha nahmi. <sup>7</sup> Peru cahntsua xi má jo tacun tsêhë ndihya jan ne, suvá ni nahmi xi matitjun visehen me ngu ndiya xi ngu nu, hane hatuxa vaha me jni rë chu xi sua me cjuatjo cojo Nina ngatsë rë cjuatsehen xi casahmi suvá me, cojo ngatsë rë cjuatsehen xi casahmi xuta xi hisca hvíin me xi tjin rë me jyë. <sup>8</sup> Cojo cjuatacun vêhë ne, Hasen rë Nina ne, sua machaya naja xi ndiya xi cjuecani naja xcun Nina ne, cjëë tuxaha, jinguyëjë rë xi ndava Nina jan ne, tisahmi xa cuaha. <sup>9</sup> Yějë cjuatacun xi cuatjin má vë ne, machjirëhë naja ngayaan sacuaha ngu ejemplu ni, quihndë nixtin vihi. Ta sacuaha cjuatjo xi sua me cojo Nina ngajan ndihya vêhë cojo chu xi tsiquehen xuta ne, maji tsityjahi rë cjuatacun rë xuta xi cuatjin faharcun me Nina. <sup>10</sup> Yějë cjuatacun vêhë ne, vitexa suvá tsêhë xi chinë xi hyun ni cojo tsêhë xi ma tyjahi vihi ma tyjahi vêhë xi cumá rë Nina. Cjuatacun vêhë ne, vitexa suvá ni tsêhë taha xcun, hacuiin tsêhë cahntsua xahasen naja. Peru cjuatacun vêhë ne, cuitexa hisca nixtin xi Nina tsindeya me cjuatacun vêhë.

### *Ndava Nina ngajan ngahnga*

<sup>11</sup> Peru Cristu ne, ha cavetjucun me xi má me nahmi xi matitjun xi sua naja me yějë ni cjuandaja xi titsingatu Nina. Sacuaha cahndë hiscan xi tisahmi me xa xi má me nahmi ne, hitsë sa vengui chji rë hacuaha hitsë sa tjin rë cjuaquixi. Hacuaha hacuiin xuta casahmi me, cuma cuinújan ne, hacuiin nguehe ngasunhndë vihi tacun. <sup>12</sup> Hacuaha hacuiin ngatsë rë jni rë chu tentsun cojo jni rë chu ndyaja chihndë xi cavisehen me xcun Nina ta ngatsë rë jni rë suvá me. Hane ngu ndiya cavisehen ni me, hya xi ha cavaxëtje naja me xi quihndë tsajin nu tsajin nixtin chajá ngayaan. <sup>13</sup> Hane jni rë chu tentsun cojo jni rë chu ndyaja cojo ndesu rë chu ndyaja chihndë ne, hora xi xinchutaha rë xuta xi camachocun yojo rë ne, caa rë tsityjahi rë yojo rë xuta jan cojo sa xi cuma tyjahi me xcun Nina. <sup>14</sup> Ha hitsë sa jni rë Cristu, me xi tsajin nu tsajin nixtin cjuë Hasen rë, hacuaha casua suvá me yojo rë me cojo Nina, ngu cjuatjo xi hatuxa jercu tu tyjahi camahani. Jni rë me jan ne, tsityjahi rë cjuatacun naja tsêhë yějë xcusun xi machjiriin xi nihña, cojo sa xi cuma nihña xa rë Nina, me xi quicun.

*Ngatsë rë jni ne, ma tyjahi yějë ni xcusun*

<sup>15</sup> Vêhê xi Cristu ne, me vêhê xi sahmi tangun me xuta cojo Nina ngatsê rê ngu compromisu xatsê. Cahme me xi cuaxêtje me xuta tsêhê cjuatsehen xi casahmi xuta jinguyêjê rê xi sahmi xa cuaha compromisu xi tjun casahmi Nina. Hane ngatsê rê xi cuatjin cahme Cristu ne, vêhê xi xuta xi cavaxijin Nina ne cuma cjuahatsja me cjuandaja xi ha cachja Nina xi sua rê me, cjuandaja xi tsajin nu tsajin nixtin chjahataha rê. <sup>16</sup> Hiscan xi tjin rê xuta ngu testamentu ne, cuma sahmi xa, peru hisca hya xi ha tjin cjuaquixi xi ha cahme me xi casahmi xujun jan. <sup>17</sup> Ta ngu testamentu ne, vetsihin sahmi xa ngatsê rê ngu cjuaveya ta, tsêhê xi jinguyêjê rê xi tacun quicun me xi casahmi ne, hatuxa tsajin rê ngahû. <sup>18</sup> Vêhê xi hisca compromisu xi tjun casahmi Nina cojo xutachanga naja ne, hacuaha cojo jni rê chu camachihin. <sup>19</sup> Xi cavatju casua Moisés camachaya rê yêjê ni xuta yêjê ni cjua tsêhê ley xi casua Nina ne, sehe cafaha me hitsê tsanga hani cojo ngu tsja rê ya xi hmî rê hisopo, sehe catsicahnchi me cojo jni rê chu hndindyaja cojo jni rê chu tentsun, caviseçjan rê me nandâ ne, sehe cavinchutaha rê me libru tsêhê ley hacuaha cavinchutaha rê me yêjê ni xuta. <sup>20</sup> Ngajan xi cachja Moisés cojo xuta cuitjin: “Vihi hni xi sahmichihin rê compromisu xi cavitexa Nina hacutjin xi meje rê me xi nihña.” Cuatjin cachja me. <sup>21</sup> Hacuanitjin ni cojo yêjê ni xcusun xi sahmi xa cahntsua ndihya jan. <sup>22</sup> Sacuatjin vitexa ley ne, ha ña meje yêjê ni xcusun ne, ma tyjahi ngatsê rê jni. Hane sa xi cuangaain jni ne, hacuaha sacuiin cjuaninchataha.

*Casua Cristu yojo rê me xi cjuahaxin me cjuatsehen*

<sup>23</sup> Vêhê xi camameje rê xi cuatjin camatyjahi rê yêjê xcusun xi sacuaha tjahnguen rê xcusun xi tjin ngajan hiscan tacun Nina. Peru xcusun xi tjin ngajan hiscan tacun Nina ne, camameje rê xi camatyjahi ngatsê rê cjuaveya xi hitsê sa ndacun xi cuma rê cjuaveya xi cuacun vê. <sup>24</sup> Cristu ne, hacuiin cavisehen me ndava Nina xi xuta catsindaja me, ndihya xi tu cavetjutaha ni tsêhê hiscan xi cjuaquixi xi tacun Nina ta hisca ngahnga hiscan xi tacun Nina ne, ngajan xi cavisehen me. Cuatjin cavisehen me cojo sa xi quihndê ne, cuejña me xcun Nina, cuichjatje me ngatsê naja. <sup>25</sup> Peru hacuiin cavisehen me xi sua me yojo rê me cojo Nina jemu cjîn ndiya, sacuatjin sahmi nahmi xi matitjun xi chuya nu chuya nu visehen me ndava Nina cojo jni xi hacuiin jni rê me. <sup>26</sup> Sa xi cuatjin cjîn ndiya cavisehen Cristu ne, hacuaha cuatjin cjîn ndiya camameje rê xi cueya me hisca hya xi cavetsihin ngasunhndê ne hisca quihndê. Peru quihndê xi ha tivijnetaha nixtin changá vêhê ne, Cristu ne, ngu ndiya canduva ni me xi sua me yojo rê me xi cueya me cojo sa xi cjuahaxin me cjuatsehen. <sup>27</sup> Ngayejen ni ne, hatuxa ngu ndiya ni cueyan. Ngaxtun vêhê ne, sehe tsichuva naja Nina cojo cjuatacun naja. <sup>28</sup> Hacuanitjin ni Cristu ta hacuaha ngu ndiya ni casua me yojo rê me xi cjuahaxin me jyê rê jemu cjîn xuta. Ngaxtun vêhê ne, cuinduva nga me xi ma jo ndiya, peru ha quihndê hacuiin tsêhê jyê rê xuta ta tsêhê xi cuaxêtje me xuta xi siuya rê me.

## 10

<sup>1</sup> Peru ley rê Moisés ne, sacuaha tjahnguen ni rê yêjê cjuandaja xi sehe sua naja Nina. Hacuiin ndandaja sua ley vêhê machaya naja hacutjin jain cun cjuandaja vêhê. Vêhê xi ley ne, tsajin nixtin xi cuma tsityjahi rê cjuatacun rê xuta xi tu nu tu nu fi me ndava Nina cojo chu xi tsiquehen me jan xi sua me cjuatjo cojo Nina. <sup>2</sup> Sa xi cjuaveya rê chu vêhê cacaa rê catsityjahi jain rê cjuatacun rê xuta xi cafaharcun rê me ne, hacuaha ha quihndê tsiquin sa me chu ta, tsêhê xi xi má rê me ne, ha quihndê tsajin jyê rê me. <sup>3</sup> Peru xi cuatjin tsiquehen xuta chu ne, tu nu tu nu tsinguitsjen rê me tsêhê jyê rê me ta, <sup>4</sup> tsêhê xi jni rê chu ndyaja cojo jni rê chu tentsun ne, hatuxa maji fahaxin rê jyê rê xuta.

<sup>5</sup> Vêhê xi hya xi cavêjña Cristu ngasunhndê ne, cachja me cojo Nina cuitjin: Ngayun ne, hacuiin suvá cjuaveya rê chu xi meje nuju, hacuiin suvá cjuatjo xi meje nuju, vêhê xi canihû yojo naha.

<sup>6</sup> Hacuiin suvá cjuatjo xi tí xi chuya nuju tsêhê, hacuaha hacuiin suvá ni jingu sa cjuatjo xi sua nuju xuta ngatsê rê jyê rê me xi chuya nuju tsêhê.

<sup>7</sup> Sehe ngajan xi cachja nga Cristu: “Cuajyihî ngahan nguehe, xi sahme yêjê ni hacutjin xi meje nuju, ngayun Nina naha, sacuatjin camahindu tsahan xcun xujun nuju.”

Cuatjin cachja Cristu cojo Nina. <sup>8</sup> Xi tjun tjun ne, cachja Cristu xi Nina ne, mijî rê me hacuaha chuyiin rê me tsêhê cjuaveya rê chu cojo jingu sa cjuatjo, cojo cjuatjo xi tí, cojo cjuatjo xi sua xuta ngatsê rê jyê rê me, handasa cuatjin vitexa ley xi cuatjin sahmi xuta. <sup>9</sup> Ngaxtun vêhê ne, cachja nga me xi tacun me xi sahmi me yêjê ni hacutjin xi meje rê Nina. Cuma cuinújan ne, tsicjê me xcusun changá xi hme chu, cojo sa xi cuejña me ngu xcusun xatsê xi sahmi xuta yêjê hacutjin xi meje rê Nina. <sup>10</sup> Nina ne, catsityjahi me cjuatacun naja ngatsê rê xi Jesucristu ne, casahmi me yêjê ni hacutjin xi meje rê Nina, ngatsê rê cjuatjo xi casua Jesucristu xi casua me yojo rê me ngu ndiya ni.

<sup>11</sup> Yějē ni nahmi ne, nchunchujun ni hinchacun me fahacuenda me xa rē me xi má me nahmi, hacuaha cuatjin cjin ndiya vuya sua me cjuatjo xi tu vėhė tu vėhė ni, xi hatuxa tsajin nixtin xi ma fahaxin rė jyė rė xuta. <sup>12</sup> Peru Cristu ne, xi cavatju casua me ngu ni cjuatjo cojo Nina ngatsė rė jyė rė xuta ne, sehe quiji me ngahnga cavejña me taha ladu quixi tsėhė Nina. Hane cjuatjo xi casua me jan ne, tsajin nu tsajin nixtin xi meje rė xi cuya cjue nga xcun Nina. <sup>13</sup> Hane quiji me ngajan, cojo sa xi nixtin xi cjui sa ne, ngajan cuejñaya me hisca hya xi yějė ni xi sahmi rė me condra ne, cuiyuju ngahma gobiernu rė me. <sup>14</sup> Vėhė xi ngatsė rė ngu ni cjuatjo vėhė ne, catsityjahi Cristu cjuatacun rė xuta xi ha Nina tiviyujuxin rė me xi cuma tsėhė me me, hane tsajin nu tsajin nixtin xi cuya cuetsun nga cjuatacun rė xuta xi cuacun vė. <sup>15</sup> Hasen rė Nina ne, ha cuantjin ni sua machaya naja cuitjin:  
<sup>16</sup> Sacuaha compromisu xi sahme cojo xuta xi cuacun vė hya xi cuma ngascan tsėhė nixtin vėhė ne, hacui vihi:

Cueyá ley naha cahntsua cjuatacun rė me,  
 sacuaha xi cumahindu cjua rė ley vėhė cahntsua cjuatacun rė me.

<sup>17</sup> Hacuaha jyė rė me cojo cjuatsehen xi sahmi me ne,  
 ha quihndė tsajin nixtin xi tsinguitsjen.

Cuatjin cachja Hasen rė Nina. <sup>18</sup> Hya xi ha camanchataha jyė ne, ha quihndė mamijí rė xi cjue sa cjue sa cjuatjo xcun Nina ngatsė rė jyė vėhė.

*Meje rė xi nihña tiña tsėhė Nina*

<sup>19</sup> Vėhė xi ngayejen ni ne, rcuun camahani xi cuiseen xcun Nina quihndė ngatsė rė jni rė Jesús. <sup>20</sup> Jesús ne, cavuxaha me ngu ndiya xatsė xi cuma naja, ngu ndiya xi cjuecojo naja xcun cjuahñu, ngu ndiya xi cjuecojo naja xcun Nina ngatsė rė cjuaveya rė Jesús. <sup>21</sup> Jesús ne, me vėhė má me nahmi xi jercu tu vengui camahani chjí rė, hacuaha sahmi naja me cuidadu ngayejen ni xi má ngayaan ladu rė Nina. <sup>22</sup> Ngatsė rė yějė cjuatacun vėhė ne, meje rė xi nihña tiña tsėhė Nina cojo nguñajatacun, meje rė xi tjin ngu tacun xi macjain naja Jesús ta, tsėhė xi cjuatacun naja ne, cachjahaxin rė cjuatsehen xi cún tsėhė xi sacuaha xi caxinchutaha rė jni, hane yojo naja ne, sacuaha xi cafengui cojo nandá tyjahi. <sup>23</sup> Meje rė xi hacuain nismetacun cjuandaja xi nujan xi vetahan tacun ta, tsėhė xi me xi cachja cojo naja yějė cjuandaja xi sahmi me ngascan ne, hatuxa sahmicihin me yějė cjuandaja vėhė. <sup>24</sup> Meje rė xi cuinchan chuya rė hacutjin cuisecoon xingueen xingu xingu ngayaan cojo sa xi tjin naja cjuahmutacun hacuaha nihña cjuandaja. <sup>25</sup> Mijí rė xi cuejñaxen xi ma tangun ngayaan sacuaha xcusun rė jingu sa xingueen. Xi meje rė ne, cuma tangun ngayaan cojo sa xi tahan cjuetacun xingueen xingu xingu ngayaan, hitsė guan ta nixtin xi cuinduva Jesús ne, chutsejen ta ha tijima tiña.

*Handajasa cjuatjo casacu naja cjuahñu xatsė, peru suain cahndė xi tuyjė nihña cjuatsehen*

<sup>26</sup> Cuatjin meje rė xi nihña ta sa xi ngu xingueen xi ha ndaja cafahatsja me cjua xi ha cjuaquixi cjuenduju me cojo ngu ndiya rė cjuatsehen ne, ha quihndė tsajin sa mé cjuatjo xi cuma cjue ngatsė rė jyė rė me. <sup>27</sup> Cahndė rė vėhė ne, hatuxa sacú rė me castigu, cjue cuetí me xcun ndihi xi ha jima tiña nixtin xi tsicjė rė yějė xi choho vėė rė Nina. <sup>28</sup> Hya xi ngu xuta tsitjungui me ley rė Moisés ne, cojo jo cojo jyan ni xuta xi tsinguixi me xi cuaaintjin sahmi xuta vėhė ne, chja ley ta hatuxa cueya me, hacuaha hisca ngu tsajin yo cumayuma rė tsėhė me. <sup>29</sup> Ngayun ne, ha ndaja hyun ta hitsė sa jercu jyihí camahani castigu meje rė xi cuma xuta xi sune tsufė me Quihndi rė Nina, hacuaha tsingatahacacun me xi tsajin mé vengui chjí rė jni rė Quihndi rė Nina jan, hacuaha choho chja me tsėhė Hasen rė Nina xi jercu casua rė xuta jan cjuandaja. Jni xi tsitjungui xuta jan ne, jni vėhė xi casahmicihin rė compromisu xi cachja Nina, hacuaha ngatsė rė jni vėhė ne, camatyjahi cjuatacun rė xuta jan. <sup>30</sup> Ngayaan ne, ha hyan Nai naja, hane me vėhė xi cachja me cuitjin: “Ngahan satė ná xi sahmengojo cojo xuta tsehen; hatuxa ngahan sahmengojo.” Hacuaha chja nga me ngu ndiya cuitjin: “Ngahan Nai nuju ne, cjuahá chuya xuta naha.” Cuatjin cachja Nai naja. <sup>31</sup> Jemu jyė chiracun sa xi ngayaan cjuinenguenyan ngajñi rė castigu xi sahmi Nina, me xi quicun!

<sup>32</sup> Peru nguuitsjun nixtin titjun, hya xi ha cafė cachjuhunntsun cjuahasen rė Nina sehe caca naju cojo ngu cjuacjintacun jyė xi casua nuju cjuañihi xi cavatjun camá. <sup>33</sup> Jiya hora ne, xcun cojo xcun ni choho cachja xuta tsujun hacuaha casua nuju me cjuañihi, hacuaha jiya hora nga ne, cavisecun rė xuta xi cuatjin cavatju me camá. <sup>34</sup> Chjá cuatjin ta hacuaha hvė xi hacuaha camayuma nuju me xi hinchá ndavaya. Hacuaha hisca cojo cjuasua caningatuhun xi cachjahataha cjuachan rė yějė ni xcusun xi ngayun tsujun, tsėhė xi ha hyun ta ngajan ngahnga ne, ha tjin nuju ngu xcusun xi hitsė sa ndaja, xi tsajin nu tsajin nixtin cjue. <sup>35</sup> Xicanismutacun cjuatacun xi rcun camahani, ta xi cuatjin cuanguncun cjuatacun vėhė ne, Nina ne, hatuxa jemu jyė cjuatjo xi sua nuju me. <sup>36</sup> Ngayun ne, meje rė

xi scaa nuju cojo cjuacjintacun xi vatjun má, cojo sa xi hya xi cuatjin cafë canihñu hacutjin xi meje rê Nina ne, sacú nuju cjuandaja xi ha cachja Nina xi sua nuju me. <sup>37</sup> Xujun rê Nina ne, cuitjin chja:

Ha tu chúva sa nixtin ne,

me xi cuinduva ne, hatuxa cuinduva me, ha quihndë cuindeyaain rê me.

<sup>38</sup> Xuta naha xi tsajin jyë rê me ne, sacú rê me cjuahñu xatsë ngatsë rê xi mangucacun me cojo ná;

peru sa xi cuya me cjue ngaxtun me ne, chuyiin ná tséhë me.

Cuatjin chja xujun rê Nina. <sup>39</sup> Peru ngayaan ne, hacuiin tangun ngayaan cojo xuta xi vuya fi ngaxtun me sehe tsicjë Nina me ta ngayaan ne, tangun ngayaan cojo xuta xi mangucacun me cojo Nina sehe cuaxëtje Nina me.

## 11

*Ninguitsjen xutachanga naja xi jemu camangucacun me cojo Nina*

<sup>1</sup> Quihndë ne, hya xi ha camangutacun cojo ngu cjuane, sacua ha xi ha tjin naja cjuaquixi xi hatuxa sacú naja ngu xcusun xi vetahan tacun, sacua ha xi ha hyan xi xcusun xi matsijin ne, hacua ha cjuaquixi. <sup>2</sup> Tséhë xi xutachanga naja ne, camangucacun me cojo Nina, vëhë xi Nina cachja tséhë me xi tsajin xi cún rê me xcun Nina.

<sup>3</sup> Tséhë xi mangutacun cojo Nina ne, vijnercun xi Nina cojo cjuane ni rê me ne, catsindaja me ngasunhndë, hacuiin cafaha me ngu xcusun xi matsejen xi catsindaja me ngasunhndë vi xi tsejen naja.

<sup>4</sup> Tséhë xi camangucacun xutachanga naja Abel cojo Nina ne, hitsë sa ndaja cjuatjo xi casua rê me Nina xi cuma rê cjuatjo xi casua xutachanga naja Caín. Vëhë xi Nina ne, cachja me xi Abel ne, tyahi me cojo cjuatacun rê me. Hacuaha suvá Nina catsingacun me xi cjuatjo xi casua Abel ne, jemu ndaja. Hane tséhë xi cuatjin camangucacun Abel cojo Nina ne, vëhë xi handasa cahme me, peru hisca quihndë ne, cumachjirëhë sa naja cjuatacun rê me.

<sup>5</sup> Tséhë xi camangucacun xutachanga naja Enoc cojo Nina ne, cachjahataha rê me tséhë ngasunhndë vi, cojo sa xi cueyaain me. Hane ha quihndë casacuiin me ta, tséhë xi Nina cafahataha rê me. Peru chaja sa xi cjuahataha Nina me ne, ha camatsejen xi Nina ne, jemu cachuya rê me tséhë Enoc. <sup>6</sup> Peru sa xi manguaaintacuun cojo Nina ne, cumaji nihña xi chuya rê me tsajan. Xuta xi sahmi tiña me tséhë Nina ne, meje rê xi macjain rê me xi tjin jain Nina, hacua ha Nina vëhë xi jemu jyë cjuatjo xi sua rê me xuta xi cuacun vangui rê me.

<sup>7</sup> Tséhë xi camangucacun xutachanga naja Noé cojo Nina ne, hya xi casua Nina camachaya rê me tséhë xcusun xi cjëë cuma ne, casahmi me ngu barcu cojo sa xi cuetjutje me cojo xuta rê me. Cuatjin casahmi me ta, tséhë xi faharcun me Nina. Hane xi cuatjin camangucacun me cojo Nina hacua ha casahmi me cuatjin ne, ngajan camatsejen xi yëjë sa xuta tséhë ngasunhndë ne, chajá me. Hane Noé ne, cuatjin camatyjahi me cojo cjuatacun rê me sacuatjin matyjahi ngayaan cojo cjuatacun naja xi mangutacun cojo Nina.

<sup>8</sup> Tséhë xi camangucacun xutachanga naja Abraham cojo Nina ne, hya xi cachja Nina xi cuetjuxin me tséhë nangui hiscan xi tacun me xi cjue me ngu cahndë hiscan xi sua Nina xi cuma tséhë me ne Abraham ne, cahndë me tséhë Nina hane cavetju me quiji me, handasa hviiin me jani cuechú me. <sup>9</sup> Tséhë xi camangucacun Abraham cojo Nina ne, caviyujutaha me ngu nangui xín xi cachja Nina xi sua rê me. Hane ndihya tsjan ni caviyuju me cojo quihndi rê me, Isaac cojo Jacob, quihndi xi hacua ha cojo cjuahatsja cjuandaja xi ha cachja Nina xi sua me jan. <sup>10</sup> Cuatjin caviyuju Abraham ta, tséhë xi jemu meje rê me xi cuechú me ngu nandya xi ndaja hñu cun ndihya rê cojo xihndënaña rê, ngu nandya xi Nina cavejña me cjuatacun rê me hacutjin cuma, hacua ha me vëhë casahmi me. <sup>11</sup> Tséhë xi camangucacun Abraham cojo Nina ne, Nina casua rê me ngahñu xi cuma sacú rê me quihndi, handasa Sara chjuun rê me ne, hatuxa maji sacú rê me quihndi hacua ha Abraham ne, jemu changá me xi sehe sacú rê chjuun rê me quihndi. Cuatjin camá ta, tséhë xi camangucacun Abraham xi Nina ne, hatuxa sahmichihin me cjuane xi cachja me. <sup>12</sup> Vëhë xi ngatsë rê ngu ni Abraham ne, handasa hatuxa ha quihndë tsajin rê me ngahñu xi sacú rê chjuun rê me quihndi ne, peru tjë rê me ne, tangun cjín camá cojo niñú xi yaja ngahnga, tangun cojo tsumi rê tjeen ndachacun xi maji maxqui.

<sup>13</sup> Yëjë ni xutachanga naja xi cuacun vë ne, mangucacun cuaha me cojo Nina hya xi cahme me. Casacuiin rê me cjuandaja xi cachja Nina xi sua rê me, peru sacua ha xi ha cavëë me cjuandaja vëhë hane jemu ndama rê me. Cachja quixi me xi sacua ha xuta ngu nangui me xi caviyujutaha me nguehe ngasunhndë. <sup>14</sup> Hane xuta xi chja cuatjin ne, jemu quixi sua me machaya naja xi tivangui sa me ngu nangui xi cuma tséhë suvá me. <sup>15</sup> Sa xi catsinguitsjen sa me nangui hiscan cavetju me ne, tjin sa rê me chuva rê xi camá cavuya

me jan. <sup>16</sup> Peru me xi cuacun vë ne, xi meje rë me ne, ngu nangui xi cuma tsëhë súvá me ngajan ngahnga hiscan tacun Nina. Vëhë xi Nina ne, ma savaain rë me xi hmí rë me Nina rë xutachanga naja xi cuacun vë, tsëhë xi ha tjin ndaja rë Nina ngu nandya xi cumá rë me.

<sup>17</sup> Tsëhë xi camangucacun xutachanga naja Abraham cojo Nina ne, hya xi catsichuva Nina me cojo cjuatacun rë me ne, casua Abraham cojo Nina quihndi rë me Isaac. Hane Abraham, me xi cachja Nina xi sua rë cjuandaja ne, cavejñangucacun me xi sua me quihndi ngu rë me, <sup>18</sup> handasa cuitjin cachja Nina cojo rë me: “Súvá tjë rë quihndi riji Isaac ne, vëhë ni xuta xi cumá tjë riji xi cjuaquixi.” Cuatjin cachja Nina. <sup>19</sup> Abraham ne, camacjain rë me xi Nina ne, tjin jain rë me chuva rë xi hisca nima ne, tsicuya me cjuahñu. Cuatjin camá xi sacuaaha xi ngajñi rë nima jain cavuya cafahatsja Abraham quihndi rë me.

<sup>20</sup> Tsëhë xi camangucacun xutachanga naja Isaac cojo Nina ne, catsinchacun me quihndi rë me Jacob cojo Esaú. Cachja me yëjë mé xi nduva ngascan xi cuma rë quihndi rë me.

<sup>21</sup> Tsëhë xi camangucacun xutachanga naja Jacob cojo Nina ne, hya xi ha meje cueya me ne, catsinchacun me jima ngu quihndindai rë me xi quihndi rë xutachanga naja José, hacuaaha cafaharcun me Nina taha yahangui me bastón rë me.

<sup>22</sup> Tsëhë xi camangucacun José cojo Nina ne, hya xi ha meje cueya me ne, caveyanangui me xi cuehiv nixtin xi yëjë ni xutachanga naja ne, cuetjuxin me tsëhë nangui Egipto, hacuaaha caviteza me hacutjin cuma cojo rë ninda rë me hya xi ha cahme ne.

<sup>23</sup> Tsëhë xi camangucacun xutacha rë xutachanga naja Moisés cojo Nina ne, hya xi catsin Moisés ne, jyan sá caveyahma me, tsëhë xi cavëë me xi quihndinda jan ne, jemu ndajiyihi camahani, hane cavincharcuaain rë me yojo rë me tsëhë cjua xi caviteza me xi matitjun xi cueya yëjë ni quihndinda xi xihin tsëhë xutachanga naja.

<sup>24</sup> Tsëhë xi camangucacun Moisés cojo Nina ne, hya xi camachangá me ne, catsitjungui me cahndé rë me xi má me quihndi rë na quihndi rë me xi matitjun tsëhë nangui Egipto. <sup>25</sup> Hitsë sa cachuya rë me xi cjue me choho cuatju me cuma cojo xuta rë Nina, xi cuma rë xi sua me cjuasua xahasen rë me nguhñu ngu hora ni ngajñi rë cjuatsehen. <sup>26</sup> Catsingatahacacun me xi hitsë sa vengui chjí rë xi scaa rë me xi choho cuichja xuta tsëhë me ngatsë rë xi sahmi tangun me cojo xutachanga naja xi ha Nina cavaxijin me, xi cuma rë xi sacú rë me cjuanchina rë Egipto. Cuatjin catsingatahacacun me ta, tsëhë xi hatuxa quitahacacun me cjuatjo xi sua Nina me ngascan. <sup>27</sup> Tsëhë xi mangucacun me cojo Nina ne, cavetjuxin me tsëhë nangui Egipto, hacuaaha hisca cavincharcuaain rë me yojo rë me tsëhë xi cjan rë me xi matitjun jan. Caca rë me cojo yëjë ni cjuacjintacun vëhë sacuaaha xi tivutsejen me Nina xi matsijin. <sup>28</sup> Tsëhë xi mangucacun me cojo Nina ne, casahmi me suhi tsëhë Pascua, hane caviteza me yëjë ni xutachanga naja xi cuinchataha me jni rë chu ngajan ya ngahñu rë tingotjo ndava me xingu xingu me, cojo sa xi hora xi cjuethe hasen xi tsiquehen rë quihndi tjun rë yëjë ni xuta ne, tsiquiin rë hisca xi ngu quihndi tjun rë xutachanga naja.

<sup>29</sup> Tsëhë xi mangucacun xutachanga naja cojo Nina ne, cavatjucja me Ndachacun Hani sacuaaha vatju me nangui quixí. Hya xi camá ne, xi canduva xuta Egipto tivatju me ne, hora vëhë cavuya camatangun nga nandá hane ngajan cafë xuta xi cuacun vë.

<sup>30</sup> Tsëhë xi mangucacun xutachanga naja cojo Nina ne, cavitjñundee me hnhua xondyojo tsëhë nandya Jericó, hane xi cavatju yatu nixtin ne, cavixujne hnhua vëhë. <sup>31</sup> Hacuaaha tsëhë xi mangucacun ngu na Jericó xi hmí rë Rahab cojo Nina ne, hacuiin hya xi cahme yëjë sa xuta Jericó xi cahndiin tsëhë Nina, hya cahme na xi viteña yojo rë vë ta, tsëhë xi cojo cjuandaja cafahatsja na ngu jo xutachanga naja xi quiji cavutsejensun me nandya Jericó jan.

<sup>32</sup> ¿Mé sa xi meje nuju xi cuichjá cojo nuju? ta hisca chutaain sa hora xi cuichjá cojo nuju tsëhë xutachanga naja Gedeón, cojo Barac, cojo Sansón, cojo Jefe, cojo David, cojo Samuel, cojo yëjë sa profeta. <sup>33</sup> Xuta xi cuacun vë ne, tsëhë xi camangucacun me cojo Nina ne, caca rë me hya xi casahmi me si cojo xuta tsëhë jingu sa nandya, casahmi me xi ndiya rë cjuaquixi, cavetjucaa ngu jo cjua xi cachja Nina cojo rë me. Camaji cavuxaha chu xa hntsua chu hora xi meje siné chu me. <sup>34</sup> Catiin me hya xi cavincha xuta me ngajñi ndihi xi meje cuaca me me. Cavatjuhnga me tsëhë xuta xi meje tsiquehen rë me cojo quicha. Handasa jemu ndaya tjin cacun me ne, casacu rë me ngahñu. Jemu casacu rë me ngahñu hya xi casahmi me si cojo xuta tsëhë jingu sa nandya, caca rë me catsingujne me xuta xi choho vëë rë me. <sup>35</sup> Ngu jo yachjin ne, cavuya cafahatsja me xuta rë me xi cavuya cjuahñu hya xi cahme.

Peru ngu jo nga xutachanga naja ne, jercu cavaja xuta me. Peru catsingatiin me xi sehenndaya me ta, tsëhë xi mijí tsismicacun me Nina hacuaaha meje rë me xi sacú rë me ngu cjuahñu xatsë xi hitsë sa ndajiyihi. Vëhë xi caca rë me hya xi cavaja xuta me hisca xi cahme me. <sup>36</sup> Hane ngu jo nga me ne, catsixcuehyu xuta me, hacuaaha cavaja xuta me cojo cuarta rë chu, hisca quiji me ndavaya hacuaaha camahñu me cojo cadena. <sup>37</sup> Catsiquehen

xuta me cojo ndyojo, cavatêcja vasen xuta me cojo quicha nehñu, catsiquehen xuta me cojo quicha, catsujyihya nguehe catsujyihya ngajan me tixtê rê me chuxin rê chu tsánga cojo chuxin rê chu tentsun. Jemu camachaja rê me, jemu jyê cjuañihi cavatju me camá, choho casahmi xuta cojo rê me. <sup>38</sup>Xutachanga naja xi cuacun vê ne, hisca vechiin chuva rê xi sacú rê ngasunhndê me. Catsujyihya me ngajan ngu xín camahani hiscan naxindya, hiscan ngujo, hisca ngu ngojo naxi caviyuju me.

<sup>39</sup>Peru xuta xi cuacun vê ne, handasa ha cavetjundaja me ngatsê rê xi mangucacun me cojo Nina ne, peru hisca xi ngu me casacuiin rê me cjuandaja xi ha cachja Nina xi sua rê me, <sup>40</sup>tsêhê xi Nina ne, hya xi catsingatahacacun me ngatsê naja ne, ha caveñangucacun me xi sahmi me ngu xcusun xi hitsê sa ndaja, xi hisca nixtin quihndê ne, sahmi Nina xi cuechutaha xutachanga naja xi cuacun vê yêjê ni hacutjin xi meje rê Nina xi cuechutaha me, sacuatjin tisahmi Nina cojo naja ngayaan quihndê.

## 12

### *Meje rê xi cueñahñu cjuatacun naja cojo Jesús*

<sup>1</sup>Vêhê xi ngayaan ta ha jemu cjin xutachanga naja xi machaya naja xi camangucacun me cojo Nina ne, meje rê xi cueñaxen yêjê ni xcusun xi sahmindya naja, hacuaha cueñaxen cjuatsehen xi miji cjuexin tsajan, hacuaha nihña ngahñu xi scaa naja cuanguen nduju cojo ndiya xi Nina cavejña me xi cuma naja. <sup>2</sup>Hacuaha meje rê xi cueñahñu cjuatacun naja cojo Jesús, me xi cavejña ntsacu cjuachacun xi macjain naja hacuaha catsichihin me. Ngatsê rê cjuasua xi cavejña Nina xi cuma rê Jesús ne, cacaa rê me cojo cjuañihi xi casetaha me xcun cru, hisca casahmicuendaain me xi jemu cjuasava xi cuatjin cahme me. Hya xi camá ne, sehe quiji me ngahnga, hane ngajan tacun me taha ladu quixi tsêhê Nina.

### *Meje rê xi ningatehen xi cueyaquixi naja Nina ndiya*

<sup>3</sup>Vêhê xi ninguitsjun Jesús, me xi cacaa rê cojo yêjê xcusun xi casahmi xuta tsehen hya xi catsitjungui me Jesús. Ninguitsjun me, cojo sa xi hacuiin cjuenda rê cjuatacun nuju, hacuiin cuma ndaya tacún. <sup>4</sup>Ta ngayun ne, hisca cjuaveya cjêê cuechuntuhun xi nihñu ngahñu xi ningatuun rê cjuatsehen. <sup>5</sup>Sacuaha xi ngayun ne, canichayun cjuaxi chja Nina cojo nuju sacuaha chja ngu nahmi cojo quihndi rê me xi chja cuitjin:

Hacuiin tu xuehyu ni cumacjain ri hya xi Nai naja tiveyaquixi me ngaye ndiya, tsan, hacuaha hacuiin cuma ndaya tacuin hya xi tichjataha me ngaye.

<sup>6</sup>Ta Nai naja ne, quihndi xi hmucacun me ne, veyaquixi me ndiya, hacuaha sahmi me castigu yêjê ni xuta xi fahatsja me sacuaha quihndi rê me.

Cuatjin chja cjuaxi. <sup>7</sup>Ngayun ne, catiaca nuju cojo yêjê ni cjuacjintacun, ta xi cuatjin vatjun má ne, Nina tiveyaquixi nuju me ndiya. Nina ne, vutsejen me ngayun sacuaha quihndi rê me ta, cjuaquixi xi tsajin ngu quihndi xi nahmi rê ne, veyaquixiin rê ndiya.

<sup>8</sup>Peru sa xi Nina cueyaquixiin nuju me ndiya sacuatjin veyaquixi me ndiya tsajan ngayejen ni ne, ngajan matsejen xi hacuiin quihndindaja rê me ngayun. <sup>9</sup>Ngayaan ne, hacuaha tjin xutacha naja nguehe ngasunhndê xi cavinchaquixi naja me ndiya, hacuaha cachjahanrcun me. Peru hitsê sa meje rê xi cuinuhyan tsêhê Nina Nahmi naja xi tacun me ngahnga. Xi cuatjin ne, cuechuntahan ngu cjuahñu xatsê. <sup>10</sup>Me xi cuacun vê ne, cavinchaquixi naja me ndiya ngu jo nixtin ni hacutjin xi má rê me xi ndatjin. Peru xi vinchaquixi naja Nina ndiya ne, ngayaan ndaja tsajan, cojo sa xi cuma tyjahi cjuatacun naja sacuatjin tyjahi cjuatacun rê suvá me. <sup>11</sup>Hya xi tjin yo vinchaquixi naja ndiya ne, hacuiin ndama naja ta choho má naja, hora xi tichja me cojo naja. Peru sa xi cuinuhyan ne, xi cuma ngascan ne, sacú naja cjuandaja cjuajeya xi cuma tyjahi cjuatacun naja.

### *Miji rê xi nitjunguen Nina*

<sup>12</sup>Vêhê xi ngayun xi ndaya tjin tacún xi tivangun cojo ndiya rê Jesús ne, tuhun ngahñu xahasen nuju. <sup>13</sup>Ngu quixi tángun ni cojo ndiya rê Jesús, cojo sa xi yo xi ndaya tjin cacun ne, hacuiin chajá tsêhê ndiya rê Jesús ta sacú rê ndiya xi cjuaquixi.

<sup>14</sup>Nihñu ngahñu xi cuinechun ngu cjuandaja ngu cjuajeya cojo yêjê ni xuta, hacuaha nihñu ngahñu xi cuma tyjahi cjuatacun nuju, ta hisca xi ngu xuta ne, cuechiin me xcun Nai naja sa xi hacuiin tyjahi cjuatacun rê me. <sup>15</sup>Nechun cuidadu cojo sa xi tsajin ngu xuta xi cuechintaain me cjuandaja rê Nina, ta ngaxtun vêhê ne, choho cuma rê me hane tu hitsê tu hitsê ne, tsinguetsun me cjuatacun rê jemu cjin xuta. <sup>16</sup>Nechun cuidadu cojo sa xi tsajin ngu xuta xi sahmi me cjuatsehen cojo ngu xi hacuiin chjuun rê me. Hacuaha nechun cuidadu cojo sa xi tsajin ngu xuta xi hisca sahmuciendaain me Nina, sacuatjin rê xutachanga naja Esaú, xi casua me yêjê cjuanchina xi satê rê me xi má me quihndi tjun, ngatsê rê ngu comida xi cajiné me. <sup>17</sup>Ngayun ne, ha hyun ta xi camá ngascan hya xi meje cjuahatsja me ximinchacun rê nahmi rê me ne, cavitjungui me, tsêhê xi ha quihndê tsajin



chuva rë xi tsindeya me cjuatacun rë me, handasa hisca cajihnda me xi meje rë me xi cuatjin cuma.

<sup>18</sup> Ha jemu hatsëe xi xutachanga naja ne, quiji casahmi tiña me tsëhë ngu naxi xi tacun nguehe ngasunhdë hiscan xi cati ngu ndihi jyë, hiscan xi jemu jñu camahani, hiscan xi jercu hñu camahani cavanga tjo, <sup>19</sup> hiscan xi canuhya rë xi fane ngu tyjo, hiscan xi canuhya rë cjuaxi cachja Nina. Hane xuta xi cahndë me cjuaxi vëhë ne, jercu cafehya rë me xutachanga naja Moisés xi ha quihndë cuichjaain sa Nina cojo xuta xi cuacun vë. <sup>20</sup> Cuatjin cachja me ta, tsëhë xi cacaain rë me cojo cjuaxi cachja Nina hya xi cachja me cuitjin: “Yo xi cjue cuisane ntsacu hiscan naxi vë ne, meje rë xi cueya cojo ndyoyo, handasa ngu chu.” Cuatjin cachja Nina. <sup>21</sup> Xcusun vëhë ne, ngu chircun jyë, vëhë xi hisca Moisés ne, cuitjin cachja me: “Jemu tsájcun, ña fatsë ngahan.” Cuatjin cachja me.

<sup>22</sup> Peru ngayun ne, casatiin sa nuju cjuacjintacun vëhë ta ngayun ne, canihñutangun cjuatacun nuju cojo Nina xi quicun, me xi tacun ngajan ngahnga, sacuaaha nandya xi hmí rë Jerusalén, ndetjún xi hmí Sión. Canihñutangun cjuatacun nuju cojo yëjë jercu tu cjin camahani ángel xi tjín tangun xi sahmi jyë sahmi hnga rë Nina. <sup>23</sup> Ngayun ne, canihñutangun cjuatacun nuju cojo yëjë xuta xi cahme xi quihndi rë Nina xi tjín tangun ngajan ngahnga hiscan xi siutahaxujun fihi rë. Yëjë nima vëhë ne, vëhë xi sacuaaha quihndi tjún rë Nina. Canihñutangun cjuatacun nuju cojo Nina, Nina xi tsichuva rë yëjë ni xuta cojo cjuatacun rë me. Ngayun ne, canihñutangun cjuatacun nuju cojo hasey rë xuta xi tsajin jyë rë, xi casahmi Nina xi cavechutaha me yëjë ni hacutjin xi meje rë Nina xi cuechutaha me. <sup>24</sup> Ngayun ne, canihñutangun cjuatacun nuju cojo Jesús, me xi sahmitangun rë xuta cojo Nina ngatsë rë ngu compromisu xatsë. Hacuaha canihñutangun cjuatacun nuju cojo jni rë Jesús jan ne, hitsë sa ndaja sua machaya naja tsëhë cjuandaja rë Nina xi cuma rë jni rë xutachanga naja Abel.

<sup>25</sup> Nechun cuidadu, hacuiin nitjungun Nina, me xi tichja cojo naja. Ta sa xi xutachanga naja cavatjinhngaain me tsëhë castigu hya xi catsitjungui me Moisés, me xi cachja cjuaxi rë Nina cojo xuta nguehe ngasunhdë ne, hitsë guan ngayaan, sa xi nicuyan taha ngaxtuun tsëhë Jesús, me xi tichja cojo naja hisca ngajan ngahnga. <sup>26</sup> Sacuaaha nixtin rë xutachanga naja jan ne, ña nangui cafiniya cojo cjuaxi cachja Nina, peru quihndë ne, chja me cuitjin: “Ngu ndiya sa tsiniya nangui, peru hacuiin suvá nangui ni tsiniya ta cojo ngahnga tsiniya.” Cuatjin chja Nina. <sup>27</sup> Hya xi chja me cjuaxi “ngu ndiya sa” ne, sua machaya naja xi chjahaxin rë yëjë ni xcusun xi finiya, cuma cuinújan ne, yëjë ni xcusun xi Nina casahmi me, cojo sa xi cuiyuju xcusun xi maji finiya. <sup>28</sup> Vëhë xi quihndë ne, tahan nacuechji rë Nina ngatsë rë xi tivisey ngahma gobiernu rë me; gobiernu vëhë ne, vëhë xi maji finiya. Hane xi cuatjin nihña ne, chjahanrcun Nina sacuatjin xi chuya rë me, cojo yëjë ni cjuandaja cjuajeya tsëhë xi ngayaan ne, rcun me. <sup>29</sup> Cuatjin meje rë xi nihña ta Nina naja ne, tsicjë me yëjë ni xi cjuatsehen sacuatjin rë ngu ndihi jyë xi tsicjë cuaca rë yëjë ni xcusun xi ma tí.

## 13

### *Meje rë xi nihña hacutjin xi chuya rë Nina*

<sup>1</sup> Tángun nduju cojo xcusun naja xi nihñahmutacun xingueen sacuaaha xi ngu jni ngu yojo naja. <sup>2</sup> Hacuiin nichayun xi cojo cjuandaja chjuhunnstun xuta ngu nangui xi cjuehe nangui nuju ta tjín ngu jo xutachanga naja ne, cuatjin cafahatsja me xuta ngu nangui xi cafehe nangui rë me ne, hisca hvíin me ne, ángel xi cafahatsja me jan.

<sup>3</sup> Ninguitsjun xuta xi hincha me ndavaya. Nihñucueendun sacuaaha xi cojo ngayun nechunyun cojo rë me ndavaya. Hacuaha ninguitsjun xuta xi choho sahmi jingu sa xuta cojo ta, tsëhë xi ngayun ne, tjín ngu nixtin ne, hacuaaha cuma cuatjin cuatjin. <sup>4</sup> Ngayujun ni ne, meje rë xi chjuhunrcun xi hmí rë cjuavixan. Hisca ngu ngayun ne, mijí rë xi ninguitsjun ngu cjuavixan xi ha tjín ndaja ta cuechu nixtin xi Nina ne, sahmi me castigu xuta xi sahmi me cjuatsehen cojo ngu xi hacuiin chjuun hacuiin xihin rë me, há tjín chjuun tjín xihin rë me ne, o há tsajin chjuun tsajin xihin rë me.

<sup>5</sup> Hacuiin jercu meje nicujun tujún xi tivangun cojo nixtin nuju. Catamangutacun ni cojo xi ha tjín nuju. Cuatjin nihñu ta, tsëhë xi Nina ne, cuitjin cachja me: “Hatuxa tsajin nixtin xi tsismecácun nuju.” Cuatjin cachja me. <sup>6</sup> Vëhë xi jemu ndama naja xi cuitjin nújan: Nai naja ne, me vëhë xi visecoo ná me; vëhë xi tsacjuun.

jNdastu mé sahmi xuta cojo ná ngahan!  
Cuatjin nújan.

<sup>7</sup> Ninguitsjun me xi matitjun ngajñi nuju, me xi cuacun cachja cojo nuju cjuaxi rë Nina. Ningatuhuntacún tsëhë cjuandaja xi cavetjuaca tsëhë xcusun xi casahmi me, hacuaaha catamangutacún cojo Nina sacuatjin camangucacun me xi cuacun vë.

<sup>8</sup> Yějē ni cjuatacun xi tjin rē Jesucristu hisca ntsacu cavetsihin ne, cjuatacun vēhē tjin rē me hisca quihndē, hacuaha cjuatacun vēhē tjin rē me yějē nixtin xi cju sa. <sup>9</sup> Xicatsanguun ndiya rē jingu sa cjuachacun xi hacuiin tangun cojo cjuachacun xi cjuaquixi. Hitsē sa ndaja xi ngayaan ne, cumangutacun cojo Nina ngatsē rē cjuandaja rē me, xi cuma rē ngatsē rē cjuachacun xi vicuya yahnga xuta hacutjin xi meje rē xi xinē xi sihun ta, tsēhē xi cjuachacun xi vicuya xuta xi cuacun vē ne, tsajin mé machjirēhē rē xuta xi tjengui me cjuachacun vēhē.

<sup>10</sup> Cjuaveya rē Jesucristu ne, tangun hitsē cojo cjuatjo xi tu nu tu nu ni cjue xcun Nina ngatsē rē jyē rē yějē ni xuta. Tangun hitsē ta, tsēhē xi sacuaha nahmi xi sahmi me xcusun rē xutachanga naja ne, hatuxa cumaji sinē me yojo rē chu xi hme xi sua me sacuaha ngu cjuatjo vēhē. <sup>11</sup> Ngayujun ni ne, ha ndaja hyun ta nahmi xi matitjun ne, vaha me jni rē chu xi cahme, ficojo me ngajan Cahndē Rcon, xi sua rē me Nina sacuaha ngu cjuatjo ngatsē rē jyē rē xuta, peru yojo rē chu ne, cahndē rē xi sinē me ne, cjue ngajan ngu xín tsēhē nandya, hane ngajan cjuē cueti. <sup>12</sup> Cuanitjin rē Jesús ta ngajan ngu xín tsēhē nandya cahme me. Cahme me cojo sa xi tsityjahi me cjuatacun rē xuta ngatsē rē jni rē suvá me. <sup>13</sup> Ngajan xi ngayaan ne, cuetjunxen tsēhē nandya, cuma cuinújan ne, cuetjunxen tsēhē xcusun rē xutachanga naja, cuanguentjenguen Jesús, hacuaha meje rē xi scaa naja xi choho chja xuta tsajan sacuatjin choho cachja me tsēhē Jesús. <sup>14</sup> Cuma cuetjunxen tsēhē nandya vē ta, tsēhē xi nguehe ngasunhndē vi ne, tsajin naja ngu nandya xi cuejña yějē nu yějē nixtin ta ngayaan ne, tivinchasen sa nandya xi tsindaja Nina xi cuma ngascan, cuma cuinújan ne, ngajan ngahnga. <sup>15</sup> Vēhē xi ngayaan ne, xi tivanguen ndiya rē Jesús ne, meje rē xi yějē ni hora naxenndajan Nina, sacuaha xi titahan ngu cjuatjo xi cuma rē me, cuma cuinújan ne, meje rē xi ndaja cuinújan tsēhē me, meje rē xi cuinújanquixen xi tsēhē me ngayaan. <sup>16</sup> Hacuiin nichayun xi nihñu cjuandaja hacuaha cuisecun xingun xingu xingu ngayun ta xi cuatjin nihñu ne, sacuaha xi titahun rē Nina ngu cjuatjo xi jemu chuya camahani rē me tsēhē.

<sup>17</sup> Tinuhyun tsēhē me xi matitjun ngajñi nuju, hacuaha nihñu yějē hacutjin xi meje rē me xi cuacun vē ta me vēhē xi sahmi cuidadu nuju me hacuaha vēē me xi cuechu nixtin xi sua me cuenta cojo Nina. Nihñu ngahñu xi me xi cuacun vē ne, cuma sua rē xahasen rē me, hacuiin choho cuma rē me xi tisahmi me xa cuatjin ta sa xi choho cuma rē me ne, tsajin mé machjirēhē xi cuma nuju.

<sup>18</sup> Nihñu oración ngatsē niji ta, tsēhē xi ngayin ne, hyin cojo cjuatacun niji xi cjuatacun niji ne, tyjahi, hacuaha hatuxa meje nihñi cjuandaja ngajñi rē tu mé ni cjuacjintacun. <sup>19</sup> Hacuaha ngahan ne, jercu cjuéhya sa nuju xi cuatjin nihñu oración ngatsē niji, cojo sa xi sua Nina cahndē xi hitsē sa xati cuinduvatjengē nuju.

#### *Nguehe cuijnetaha cju*

<sup>20</sup> Quihndē ne, ngayaan ne, ha hyan ta Nina ne, sua naja me cjuandaja cjuajeya, hacuaha catsicuya me Nai naja cjuahñu, me xi cavejña ngajñi rē nima. Nai naja ne, hacuaha jemu ndaja sahmi naja me cuidadu sacuaha sahmi cuidadu ngu xuta chu tsánga rē me. Cuatjin ma sahmi Nai naja ngatsē rē jni rē me xi cavetju hya xi cahme me, jni xi casahmichihin rē compromisu xi yějē nu yějē nixtin sahmi xa. <sup>21</sup> Nina catisua nuju me yějē cjuandaja rē me, cojo sa xi ngayun ne, cuma nihñu yějē hacutjin xi meje rē me. Hacuaha catisahmi me cojo naja hacutjin xi chuya rē me, ngatsē rē xi ngayaan ne, tjin tangun cjuatacun naja cojo Jesucristu. Hane ngayaan ne, meje rē xi nihña jyē nihña hnga Jesucristu yějē nu yějē nixtin. Cuatjin jain.

<sup>22</sup> Ngayujun ni ne, nihñu favor ne, tisiñuju cojo cjuasua cju a xi catsihindu nuju vē ta hacuaha hacuiin cjín cju a vē xi catsihindu nuju. <sup>23</sup> Nguehe tisuá tijimachaya nuju ta cha Timoteo xingueen ne, ha camandaya cha tsēhē cjuañihi. Sa xi cjuehe xati cha ne, cuinduvintjenguin nuju ndyá, hane ndyá sacú xingueen. <sup>24</sup> Tuhun ngu nina naha cojo yějē me xi matitjun ngajñi nuju cojo yějē sa me xi má ladu rē Nina. Xuta Italia xi xuta rē Nina ne, hacuaha tsingatju me ngu nina nuju.

<sup>25</sup> Nina catisua nuju me cjuandaja rē me. Cuatjin jain.

## Carta xi catsihindu Santiago

### *Cjua xi catsihindu Santiago me xi hacuaha yahañihi rê Jacobo*

<sup>1</sup> Ngahan Santiago, xi mosu hndixahan tsêhê Nina cojo tsêhê Nai naja Jesucristu ne, tsingátju ngu nina tsujun, ngayujun ni xi xuta ladu rê Nina ngayun, ngayujun ni xi cavitsojo yun ngasunhndê.

### *Cjuatacun ndaja xi nduva tsêhê Nina*

<sup>2</sup> Ngayujun ni tsan ne, ngajñi rê yêjê ni xcusun cjuacjintacun xi cuátjun cuma ne, meje rê xi ndaja catama rê xahasen nuju ta, <sup>3</sup> tsêhê xi ha hyun ta, hya xi cavatju xi cacaa nuju cojo ngu cjuacjintacun jan ne, sa xi hacuiin canismutacún cjuachacun xi macjain nuju ne, vêhê cuisecoo nuju xi hitsê sa scaa nuju tu mé ni cjuacjintacun xi cuátjun sa cuma. <sup>4</sup> Peru nihñu nguujyê xi scaa nuju cojo yêjê ni cjuacjintacun jan hisca xi cuijnetaha. Sehe ngajan xi cuma yun xuta tyahi xi chutaha cjuatacun rê xi cuma sahmi yêjê ni cjuandaja.

<sup>5</sup> Peru sa xi yo yun xi sahmi chaja nuju cjuatacun ne, chjahyun rê Nina, hane sacú nuju ta, tsêhê xi Nina ne, hisca sesuntaha sa hya xi sua naja me, hacuaha hacuiin chjahnga me cojo naja, hya xi chjahyan rê me. <sup>6</sup> Peru meje rê xi catamangutacún hora xi chjahyun rê me, hacuiin jo cuma tacún ta, tsêhê xi xuta xi jo má cacun me ne, tangun me cojo tsindyu rê ndachacun xi ficojo rê tjo, xi fi guehe fi ngajan. <sup>7</sup> Xuta xi cuatjin cun me ne, catijnercu me ta tsajin mé xi sua Nina me ta, <sup>8</sup> tsêhê xi jo má cacun me, jo xcun jo hntsua me tsêhê yêjê ni xcusun xi sahmi me.

<sup>9</sup> Peru xuta yuma xi ladu rê Nina me ne, ndaja catama rê xahasen rê me ta, xcun Nina ne, jercu vengui chjí rê me. <sup>10</sup> Hane xuta nchina xi ladu rê Nina me ne, hacuaha ndaja catama rê xahasen rê me, hya xi cuijnercu me xi yêjê ni cjuanchina rê me ne, hisca venguiin chjí rê xi cuma rê Nina. Xuta nchina ne, cjué me sacuatjin fê naxu ndexin. <sup>11</sup> Hya xi tjercu ma suê chan ndavá ne, xca jan ne, fê yêjê xi. Hacuaha naxu rê ne, fê vixu. Xcusun rê ne, handasa tjercu ndajiyihi camahani ne, fê vetsun. Hacuanitjin ni cjué xuta nchina ngajñi rê cjuayuma xi sahmi me.

### *Cjuatacun tsehen*

<sup>12</sup> Jemu ndaja tsajan ngayaan, sa xi scaa naja cojo yêjê ni cjuacjintacun xi cuátjun cuma ta, hya xi cavatju xi cacaa naja ne, hya sacú naja ngu cjuahñu ndajiyihi ngajan xcun Nina. Ta cachja Nina xi, sa xi hmutacun me ne, sua naja me ngu cjuahñu ndajiyihi jan. <sup>13</sup> Hya xi xahasen naja meje rê xi nihña ngu cjuatacun tsehen ne, miji rê xi cuinújan xi Nina casua naja me cjuatacun tsehen jan, ta Nina ne, hatuxa tsajin rê me cjuatacun tsehen, hacuaha hatuxa suaain naja me cjuatacun tsehen xi nihña. <sup>14</sup> Peru cjuatacun tsehen xi meje nihña ne, hatuxa vetju tsêhê xahasen naja suvaan. <sup>15</sup> Hya xi ningatahantacun xi meje nihña cjuatsehen ne, cjuatacun jan sahmi xi nihña cjuatsehen. Hane sa xi hatuxa ningatehen rê yêjê ni cjuatsehen xi nihña ne, sacuiin cahndê cuechun xcun Nina.

<sup>16</sup> Ngayujun ni tsan ne, mijí ná xi cuma ndacha ngayun. <sup>17</sup> Yêjê ni cjuandaja ndajiyihi xi sacú naja ne, nduva tsêhê ngahnga ta, Nina xi casahmi me yêjê ni ndihi xi siutaha ngahnga ne, me vêhê sua naja me yêjê ni cjuandaja jan. Ndihi xi siutaha ngahnga jan ne, vindeya xcusun rê ta, tjin hora sua ndavá rê ne, tjin hora suaain ndavá rê. Peru Nina ne, chuya xi tacun ni me, tsajin vindeya cjuatacun rê me. <sup>18</sup> Hane hora xi camacjain naja cjua xi cjuaquixi ne, hora hya casua naja me ngu cjuahñu xatsê. Cuatjin casua naja me ta, tsêhê xi meje rê me xi ngayaan ne, tjun tjun cuma yaan xuta ladu rê me. Sehe ngaxtun vêhê ne, cjin sa xuta xi hacuaha cuma me ladu rê Nina.

### *Cuitjin xi chjahanrcun jain Nina*

<sup>19</sup> Ngayujun ni tsan ne, hya xi yo cuichja cojo nuju ngu cjua ne, titjun tinuhyunndujun mé cjua xi cuichja me. Hacuiin ngutjen chjayunngun, hacuiin ngutjen cuma cjan nuju. <sup>20</sup> Ta sa xi cjan nuju ne, nihñuu cjuandaja sacuahatjin xi meje rê Nina. <sup>21</sup> Peru yêjê ni cjuatsehen ne, meje rê xi tiyujunxun. Hane cjua rê Nina xi camacjain nuju ne, tetjün cojo cjuandaja cojo cjuajeya cahntsua xahasen nuju ta, tsêhê xi cjua vêhê ne, cuma cuaxêtje nuju.

<sup>22</sup> Hane sa xi tu cuisinúju ni cjua rê Nina jan, hane nihñuu hacutjin xi chja ne, tu cuindachun svun ni rê yojo nuju. Vêhê xi hacuiin tu cuisinúju ni ta, meje rê xi nihñu yêjê ni hacutjin xi vitexa cjua rê Nina. <sup>23</sup> Sa xi tu cuisinúju ni hane nihñuu hacutjin xi vitexa cjua jan ne, tangun yun cojo ngu cha xi vutsejenya cha xcun cha cojo espeju. <sup>24</sup> Cavutsejenya cha xcun cha hacutjin jyihí cha ne, peru xi café cha ne, ngutjen cachaya rê cha hacutjin jyihí cha. <sup>25</sup> Peru hya xi cuisinúju cjua xi vitexa Nina jan ne, sa xi chutayun sa cjua, sa xi chayaain nuju cjua, sa xi nihñu jain hacutjin xi vitexa cjua jan ne, sacú nuju cjuandaja rê

Nina xcun ngasunhndë nuju. Cjua rë Nina xi cuacun jan ne, hatuxa cjuaquixi, hacuaha cjua vëhë xi vëhëndaya naja tsëhë ngajñi rë cjuatsehen.

<sup>26</sup> Sa xi tiningatuhuntacún xi jemu ndaja tichjuhuncun jain rë Nina, ngajñi rë xi tujyë choho vetju ntsuvun nújun ne, tu mahya xi chjuhuncun rë Nina ta, tu tivindachun suvun ni rë yojo nuju. <sup>27</sup> Jyan xcusun vihi xi chuya rë Nina Nahmi naja xi nihña: ngu ne, xi chjahanrcun jain me cojo ngu xahasen xi tyjahi; má jo ne, xi cuisecon rë hndixahan cojo chjuun cahan ngajñi rë cjuacjintacun rë me; xi ma jyan ne, xi hacuiin nihña cjuatsehen.

## 2

### *Meje rë xi chjahanrcun yëjë ni xuta*

<sup>1</sup> Ngayujun ni tsan ne, quihndë xi macjain nuju Nai naja Jesucristu, me xi tjemu tjin rë cjuandaja ne, mijí rë xi nihñu jyë ngu xuta ne, hane nihñu chuvun nga ngu me. <sup>2</sup> Sa xi cuisehen ngu xuta nchina cahntsua yungun nuju, xi hisca oro xtungun rë me hacuaha tjercu ndajyihí tsjan rë me ne, hacuaha cuisehen nga ngu xuta xi yuma cojo tsjan rë me xi jyihí ntsun ntsun me ne, ¿mé cuinújun cojo rë me? <sup>3</sup> Me xi ndajyihí tsjan rë jan ne, ¿há jemu chjuhuncun me, xi cuitjin cuinújun cojo rë me?: “Tinechun nguehe cahndë ndajyihí vihi.” Hane me xi yuma jan ne, ¿há cuitjin cuinújun cojo rë me?: “Ngaye ne, ngajan nechín jan”, o sa tsajin ne: “Nguehe nechín nguehe nangui.” <sup>4</sup> Sa xi cuatjin cuinújun ne, ngajan matsejen xi hisca ngajñi nuju ne, hacuiin tangun xcusun nuju xi nihñu cojo ngayëjë ni xuta. Tinichuvun xingun ni ne, peru cojo ngu cjuatacun tsehen.

<sup>5</sup> Ngayujun ni tsan ne, tinuhyun cjua vihi. Nina ne, cavaxijin me xuta xi yuma xcun ngasunhndë, cojo sa xi tjemu ndaja cumacjain rë xuta jan me, hacuaha sacú rë xuta jan cahndë ndajyihí nixtin xi cuetsihin cuitexa jain me ngajñi rë yëjë ni xuta ngasunhndë, sacuatjin xi ha cachja me xi sacú rë yëjë ni xuta xi tshimucacun me Nina. <sup>6</sup> Peru ngayun ne, nisavun rë xuta yuma. Peru ¿yo xi choho sahmi cojo nuju ni? ¿Yo xi faha nuju, fi vinchajyë nuju xcun xutaxa rë? Xuta nchina xi cuatjin sahmi cojo nuju. <sup>7</sup> Hacuí jain me. Hacuaha xuta xi nchina ne, me vëhë xi choho chja me tsëhë Jesucristu. Hane Jesucristu jan ne, hacui me xi casua naja fihi xi tsëhë súvá me.

<sup>8</sup> Xcun xujun rë Nina ne, camahindu ngu cjua xi cavitexa Nina, xi chja cuitjin: “Meje rë xi nihmitacuín xingun sacuahatjin nihmitacuín yojo rijl.” Sa xi cuatjin jain nihñu ne, jemu ndaja tjin. <sup>9</sup> Peru sa xi nihñu jyë ngu xuta hane nihñu chuvun nga ngu me ne, ha canichujún cjua xi cavitexa Nina. Hacuaha súvá cjua jan ne, vëhë cuinchajyë nuju ta canihñuu hacutjin chja cjua jan. <sup>10</sup> Ta sa xi nichujún ngu cjua xi cavitexa Nina ne, handasa nihñu yëjë ni cjua xi yahnga ne, peru tangun jyë nuju cojo jyë rë ngu xuta xi hndin camahani tsëhë yëjë ni cjua xi cavitexa Nina jan. <sup>11</sup> Cuatjin ta, tsëhë xi ngu ni Nina xi cavitexa me catsijo cjua vihi. Ngu ne: “Xi canindesiin cojo rë ngu chjuun, o cojo rë ngu xihín xi xín.” Ngu nga ne: “Xi caniquiin xuta.” Vëhë xi handasa hacuiin nindesun cojo rë ngu chjuun, peru sa xi nicuhun ngu xuta ne, ha canichujún cjua xi cavitexa Nina jan, hane tjin jyë nuju xcun cjua vëhë. <sup>12</sup> Ngajan xi meje rë xi tinújun hacuaha nihñu cjuandaja, sacuaa xi ha ndiya tsichuva nuju Nina, scutsejen me hacutjin canihñu xi vitexa cjua xi vëhëndaya naja. <sup>13</sup> Hane sa xi tsajin nuju cjuayumatacun cojo jingu sa ne, hacuaha tsajin rë Nina cjuayumatacun cojo nuju nixtin hya xi tsichuva nuju me. Peru sa xi tjin nuju cjuayumatacun ne, hacuaha tjin rë Nina cjuayumatacun cojo nuju nixtin hya.

### *Sa xi macjain jain naja ne, nihña cjuandaja*

<sup>14</sup> Ngayujun ni tsan ne, sa xi cuinújun xi macjain nuju Jesucristu, peru nihñuu cjuandaja ne, hisca vengui chjiin rë ta, tsëhë xi Nina ne, cuaxintjiin nuju me xi cuatjin nihñu. <sup>15</sup> Hya xi sacú xingun cojo ngu xuta ladu rë Jesucristu xi jemu yuma camahani, xi jercu ntsun tsjan rë me, hacuaha hisca tsajin niñu xi sinë me ne, <sup>16</sup> ¿há cuitjin cuinújun cojo rë me? “Tangún ni tsan. Xicamacjiintacún. Ndaja tetsun yojo nuju ta jemu hnchan, hacuaha ndaja xinu niñu ta quiji hora.” Peru sa xi tsajin mé catuhun rë me xi cuaja xi sinë me ne, vengui chjiin camahani rë xi cuatjin cuinújun cojo rë me. <sup>17</sup> Vëhë xi vengui chjiin rë xi tu súvá cuinújan ni xi macjain naja Jesucristu ngayëjë rë xi mijí nihña cjuandaja.

<sup>18</sup> Peru tjin ngu cha xi cuichja cuitjin: “Hacjahi xuta xi macjain rë me Jesucristu, handasa sahmi me cjuandaja. Hacjahi xuta xi sahmi me cjuandaja, handasa macjaain rë me Jesucristu.” Peru ngahan cuichjá cojo rë cha jan ta hacuiin hacjahi xuta ta ¿hacutjin cuma xi macjain jain naja, sa xi hacuiin nihña cjuandaja? Ngatsë rë cjuandaja xi nihña ne, vëhë tsejen xi macjain jain naja Jesucristu. <sup>19</sup> Cha vëhë ne, ¿há macjain jain rë cha xi tjin ngu ni Nina? Tjemu ndaja tjin xi cuatjin macjain rë cha. Peru hacuaha xitsehen ne, cuatjin macjain rë, hane ña fatsë xitsehen má xi tsacjun. <sup>20</sup> Tjemu yumahasen cha xi cuatjin cuichja jan. Peru nguehe cuichjá cojo rë cha ngu jo cjua, cojo sa xi cuinjercu cha ta, vengui chjiin rë xi cuinújan xi jercu macjain naja Jesucristu, sa xi mijí nihña cjuandaja. <sup>21</sup> Sacuaha

xutachanga naja Abraham ne, ha hyan xi hatsëe nixtin ne, camangucacun me xi tsiquehen me quihndi rë me xi hmí Isaac ngajan xcun ngasuncun, sacuatjin xi ha cachja Nina cojo rë me. Hane ngatsë rë xi cuatjin cahndë me tsëhë Nina ne, vëhë xi cachja Nina xi ngu xuta ndaja me, ngu xuta tyjahi me. <sup>22</sup>Ngajan matsejen ta xcusun xi casahmi me ne, cama tangun cojo cja xi macjain rë me. Hacuaha ngatsë rë xi cuatjin casahmi me ne, vëhë xi camatsejen ta macjain jain rë me. <sup>23</sup>Cuatjin camá sacuatjin chja ngu cja xi camahindu xcun xujan rë Nina, xi chja cuitjin: “Abraham ne, camacjain rë me Nina. Vëhë xi Nina cachja me xi ngu xuta ndaja me, ngu xuta tyjahi me.” Hacuaha cachja Nina tsëhë me ta amigu rë me.

<sup>24</sup>Cuatjin xi hyan xi chja Nina xi xuta tyjahi yaan sa xi nihña cjuandaja, hacuiin sa xi tu suvá ni macjain naja. <sup>25</sup>Hacuaha ni tjin ni cavatju na xi hmí rë Rahab, na xi caviteña na yojo rë na. Cama tyjahi xahasen rë na ta, tsëhë xi casahmi na ngu cjuandaja, hya xi cojo cjuandaja casua na cahndë xi caviyuju xuta ndava na, xuta xi catsingatju xutachanga naja ngajan nangui rë na. Hacuaha hacjaji ndiya xi catsingacun na me, xi cuetju me cjue me hiscan xi tsajin condra rë me. <sup>26</sup>Sacuatjin xi machjiriin yojo rë ngu nima ta tsajin hasen rë ne, ha cuatjin machjiriin xi macjain naja Jesucristu, sa xi tsajin cjuandaja xi nihña.

### 3

#### *Hacutjin sahmi neje*

<sup>1</sup>Miji rë xi cjin ngayun cuma yun maestru tsëhë cjuachacun tsan ta, ha hyun ta ngayin xi vicuyin cjuachacun ne, hitsë sa tsichuva niji Nina xi cuma rë xuta xi yahnga. <sup>2</sup>Ngayejen ni ne, hatuxa cjin cjuatsehen xi nihña. Peru sa xi suvá cjuandaja chja ngu xuta, hane hisca ngu cja chojyihin chjaain me ne, me vëhë ne, ngu xuta ndaja me, ngu xuta tyjahi me. Hacuaha ma vetjo me yojo rë me. <sup>3</sup>Sacuaha ngu naxin ne, sa xi cueyan frenu hntsua chu cojo sa xi cuihndë chu tsajan ne, vëhë sahmi xi cuma cuanguen cojo chu tu cutjin hiscan xi meje naja. <sup>4</sup>Hacuaha sacuaaha tjin barcu ne, handasa tjercu jyihí, handasa jemu hñu ngahñu rë tjo xi tsivaha rë ne, peru cha xi cjuicojo barcu jan ne, ngu sasa ni tsiniya cha ngu ya lihndi xi hmí rë tímú, sehe ficojo cha tu cutjin hiscan xi meje cjue cha. <sup>5</sup>Hacuaha ni tjin ni neje ta, ngu rquí lihndi ni tsëhë yëjë ni yojo naja. Peru handasa lihndi ne, tjemu yehe cjuahaxi xi nújan cojo rë. Sacuaaha ngayaan ne, xi cuetahan rë ngu ndihi ne, handasa ngu ndihi lihndi ni ne, peru cuma cuaca rë yëjë ni ngu nguijñacha. <sup>6</sup>Hane neje ne, tangun cojo ndihi ta tjemu cjan rë. Tjercu na chja cjuatsehen. Handasa tjin cahndë rë xi quitaha ngajñi yojo naja ne, peru caa rë tsinguetsun naja. Vëhë xi tjercu choho vatjun má xcun ngasunhndë naja ta, tsëhë xi xitsehen ne, vëhë sahmi xi choho nújan. <sup>7</sup>Ngayaan xuta ne, camá canimaxun yëjë ni xcusun chu, sacuaaha chu nguijña, chu nisë, chu yë, cojo chu tí. <sup>8</sup>Peru neje ne, tsajin yo cuma tsimaxu rë ta, hatuxa tsehan yojo vëhë. Suaain cahndë xi cuma maxu. Hacuaha sacuaaha nehñu chu yë cjan rë, xi quitsë rë xan rë chu xi tsiquehen naja hya xi faha chu ne, cuatjin neje ta, quitsë rë cjuatsehen xi choho nújan. <sup>9</sup>Ha cojo neje ni ne, ndaja nújan tsëhë Nina Nahmi naja, hane ha cojo vëhë ni ne, nchaten tsëhë xingueen, handasa casahmi naja Nina sacuaaha jyihí suvá ni me. <sup>10</sup>Tsëhë ntsuvan ni ne, tecjan cjuandaja cojo cjuatsehen xi vetju nújan. Cuaaintjin camahani xi nújan, tsan. <sup>11</sup>Ngu nandan ne, hatuxa cumaji cuetju tangun nandá xi hyun cojo nandá xi sa. <sup>12</sup>Hane ngu ya laxa ne, cumaji cuaqui rë tsë. Hacuaha ngu nahñu tutsëjë ne, cumaji sua laxa rë. Hacuaha ni tjin ni nandá xtya ne, suaain nandá yufa.

#### *Cjuatacun xi vengui chjí rë*

<sup>13</sup>Sa xi tjin ngajñi nuju ngu ngayun xi tjemu vechutaha cjuatacun nuju ne, meje rë xi nihñu cjuandaja. Meje rë xi cuma tsejen xi xuta ndaja xuta jeya ngayun, ngatsë rë xi nihñu cjuandaja xi vitexa cjuatacun nuju. <sup>14</sup>Peru sa xi tjin nuju cjuaxin cahntsua xahasen nuju, hane sa xi meje nuju xi suvan ni ngayun xi ndajyihí cuátjun cuma ne, meje rë xi hacuiin nihñu yehe yojo nuju, hacuiin nújun xi tjercu vechutaha cjuatacun nuju ta, quixiin vë. <sup>15</sup>Ta cjuatacun vëhë ne, hacuiin ngu cjuatacun xi casua Nina ta cjuatacun ni rë xutajyë ngasunhndë vihi, sacuaaha cjuatacun rë xitsehen. <sup>16</sup>Hiscan xi tjin cjuaxin, hiscan xi tjemu choho me, ngajan ne, tjemu tujyë sahmi xuta, tjemu sahmi me yëjë ni cjuatsehen. <sup>17</sup>Peru sa xi tjin naja cjuatacun xi nduva tsëhë Nina ne, tjemu tyjahi xahasen naja, tjemu tjin rë cjuajeya xahasen naja, nihña yëjë ni ngu cjuandaja, tjin naja cjuayumatacun cojo xuta, tacun cahndë cjuatacun naja, hacuiin jo má tacun. <sup>18</sup>Hane sa xi ngatsë rë cjuandaja xi nihña cuma cuijnetaha si xi tjin ngajñi rë xingueen ne, cjuandaja cuinechan cojo xingueen, hane yahnga sa xuta ne, hacuaaha cuetsihin sahmi me cjuandaja.

### 4

#### *Xuta xi tjercu macacun me cojo ngasunhndë*

<sup>1</sup>¿Mé má cuatjin tjercu nihñu si ngajñi nuju? ¿Mé má cuatjin chicjun cojo xingun? Nihñu ngatsë rë yëjë ni cjuatsehen xi tjercu meje rë xahasen nuju. <sup>2</sup>Tu mé ni ne, meje nuju,

peru ngatsë rë xi sacuiin nuju ne, vëhë xi nicuhun xingun. Tjin nuju ngu cjuaxin tsëhë tu mé ni, peru ngatsë rë xi sacuiin nuju ne, vëhë xi vetsuhun si cojo xingun, vetsuhun chicjun cojo xingun. Sacuiin nuju xi meje nuju ta, tsëhë xi chjahyuun rë Nina. <sup>3</sup> Hacuaha handasa chjahyun ne, peru sacuiin nuju ta, tsëhë xi hacuiin tsëhë cjuandaja xi chjahyun ta, xi chjahyun ne, tu nicujun ngajñi rë ngu cjuasua xi fehya xahasen nuju. <sup>4</sup> Ngayun xi jo xcun jo ntuvun ne, ¿há hyuun ta sa xi tjengun xcusun rë xuta ngasunhdë ne, má yaan condra tsëhë Nina? Vëhë xi tu yo ni xi vejñangucacun xi tjengui xcusun rë xuta ngasunhdë ne, sahmi me condra Nina. <sup>5</sup> Hacuiin tu cuenda camahindu xcun xujun rë Nina, hiscan xi chja cuitjin: “Nina ne, casua naja me ngu hasen xi tacun cahndë cahntsua xahasen naja. Vëhë xi miji rë Nina xi cuetjunxen tsëhë ladu rë me.” <sup>6</sup> Hacuaha Nina ne, visecoo naja me cojo yëjë ni cjuandaja rë me, ta tjin sa ngu cahndë ngajan xujun rë me xi chja cju rë me cuitjin: “Nina ne, chuyiin rë me tsëhë xuta xi sahmi yehe yojo rë, peru xuta xi jeya me ne, sua Nina me cjuandaja.” <sup>7</sup> Vëhë xi meje rë xi tinuhyun tsëhë Nina. Sa xi nihñuu hacutjin xi meje rë xitseen ne, cuetjuxin xitseen tsujun. <sup>8</sup> Tejñutsja Nina cjuatacun nuju, hane sehe Nina ne, cuaha nuju me. Tiyujunxun cjuatsehen xi tinihñu, hane ngayun xi jo má tacún ne, nihñu tyjahi xahasen nuju. <sup>9</sup> Catamavatacún, hacuaha chjihndun, tsëhë xi canihñu cjuatsehen. Cahndë rë xi cuëjnu ne, chjihndun, hane cahndë rë xi sua ma nuju ne, choho catama nuju. <sup>10</sup> Ninguijnu cjuatacun nuju xi chjuhuncun Nai naja, sehe Nai naja ne, sahmi yehe nuju me.

#### *Miji rë xi nichuvan xingueen*

<sup>11</sup> Hacuiin choho nújun tsëhë xingun tsan ta, sa xi choho nújun tsëhë xingun ne, tangun vëhë cojo xi choho nújun tsëhë cju rë vitexa Nina. O sa xi nichuvun xingun ne, tangun vëhë cojo xi nichuvun cju rë vitexa Nina. Hane sa xi nichuvun cju rë vitexa Nina jan ne, hacuiin tinihñu hacutjin xi vitexa ta, tinihñu yojo nuju sacuaha ngu xutaxa rë. <sup>12</sup> Peru ngu ni me xi cavitexa hacutjin xi nihña, hane ngu ni me vëhë xi tsichuva me. Me vëhë ni xi cuma cuaxëtje naja me, me vëhë ni xi cuma tsinguetsunya naja me. Peru ngayun ne, ¿yo cavitexa nuju xi nichuvun xingun?

#### *Tsajin yo vëë rë mé xi cuma nchujun ni*

<sup>13</sup> Nguehe cuichjá ngu cju rë. Tjin ngu jo yun xi cuitjin nújun cojo xingun: “Nchujun ni nguini ne, cuetjun cuanguen ngu nangui. Ngajan cuinechan ngu nu xi nihña cjuayuma naja. Cuetjin nihña, sehe sacú naja tujún.” <sup>14</sup> Peru hisca hyúun hacutjin cuátjun cuma nchujun ni nguini. Ngayaan xcun ngasunhdë naja ne, tangun yaan cojo yufí nangui ta, yufí jan ne, tsejen hora xi nduva. Peru xi tu ngu hora ne, ha cavatjucjin, cafëya. <sup>15</sup> Vëhë xi hitsë sa ndatjin xi cuitjin cuinújun: “Sa xi Nai naja meje rë me ne, sua sa me cjuahñu naja xi nihña cuitjin cuatjin xa.” <sup>16</sup> Peru ngayun ne, tjercu nihñu yehe yojo nuju xi nújun cojo xingun hacutjin xi meje nihñu. Hane xi cuatjin nihñu yehe yojo nuju ne, ngu cjuatsehen vëhë. <sup>17</sup> Hane sa xi ha hyan hacutjin fi yëjë ni cjuandaja, peru miji nihña ne, tjin jyë naja xcun Nina.

## 5

#### *Hacutjin cuatju xuta nchina cuma*

<sup>1</sup> Quihndë ne, ngayujun ni xi nchina yun ne, meje rë xi chjindayun chjihndun, ngatsë rë yëjë ni cjuachoho xi cuátjun cuma. <sup>2</sup> Yëjë ni cjuanchina nuju ne, cuenguichjiin rë ta, tsëhë xi cjuë yëjë cjuhndu. Sacuaha tsjian ndaja nuju ne, cjuë sinë chu quixún. <sup>3</sup> Sacuaha tujún ndaja nuju ne, cuma xutsë. Hane tsëhë xi cuatjin xutsë tujún nuju ne, vëhë tsejen xi canihñuu cjuandaja cojo tujún jan, hane ngatsë rë vëhë ne, cuátjun castigu cuma. Tjercu tivetjun camahani cjuanchina nuju quihndë, nixtin xi ha ndiya cuijnetaha cjuë ngasunhdë. <sup>4</sup> Cjëë cjuë cuechjun yëjë ni chji rë mosu nuju xi casahmi xa nguijña nuju, hane Nai naja ne, me xi ma titjun tsëhë yëjë ni ne, vihndë me cju rë tivinchajyë yëjë ni mosu nuju xi quitjun tsëhë. <sup>5</sup> Nguehe ngasunhdë vihi ne, tjercu ndajyihí cavatjun camá, tjercu catuhun rë cjuasua yojo nuju. Peru sacuatjin xi hatuxa vechu nixtin xi cueya chu chinga xi jercu hñucacun chu ne, hacuaha ni tjin ni cuechu nixtin xi cuátjun castigu cuma. <sup>6</sup> Ngayun ne, canihñu castigu canicuhun xuta ndaja xuta tyjahi. Hane xuta ndaja xi cuacun jan ne, joho ni rë me xi canihñu cojo rë me.

#### *Meje rë xi cuinechanyan rë Nina cojo jeya hacuaha chjahyan rë Nina*

<sup>7</sup> Vëhë xi tinechunyun cojo jeya tsan, hisca xi cuinduva nga Nai naja. Cha xi sahmi xa nguijña ne, xi cjuë cuincha cha tjë ne, cuejñaya cha cojo jeya hisca xi cuatju chan tsi ne, sehe cuma sacú rë cha ngu cosecha xi ndajyihí tsëhë xitjé rë cha. <sup>8</sup> Hacuaha ni tjin ni, meje rë xi tinechunyun cojo jeya, hacuaha tejñuhñu xahasen nuju ta, tsëhë xi jima tiña nixtin xi cuinduva nga Nai naja. <sup>9</sup> Sa xi cuinchunyun xingun tsan ne, hacuaha cojo ngayun cuma

yun castigu. Vêhê xi mijí rê xi cuinchunyun xingun ta, tsêhê xi me xi tsichuva naja ne, chaja sa hitsê xi cuinduva nga me. <sup>10</sup> ¿Há vitsjiin nuju hacutjin cacaa rê yêjê ni xutachanga naja xi cachja me cjuaxi caveya Nina cjuatacun rê me hatsêê nixtin? Me xi cuacun vêhê ne, casahmi me cjuetacun ngajñi rê yêjê ni cjuañihi xi cavatju me camá. Hacuaha cuatjin meje rê xi nihñu tsan. <sup>11</sup> Hatuxa nújan xi tjercu ndaja tsêhê me xi cacaa rê cojo cjuañihi. Ngayujun ni ne, ha machaya nuju cjuaxi chja hacutjin cacaa rê ngu xutachanga naja xi hmi rê Job, hya xi cavatju me cjuañihi camá. Hacuaha ha hyun ta, hya xi cajnetaha cjuañihi xi cavatju me camá ne, tjemu ndaja casahmi Nai naja cojo rê me ta, tsêhê xi Nai naja ne, hatuxa tjín rê me cjuandaja, tjín rê me cjuayumatacun.

<sup>12</sup> Nguehe cuichjá cojo nuju ngu cjuaxi tjemu vengui chji rê tsan. Hora xi tivisiajmu cojo xingun ne, hacuiin cuinújun xi vêê Nina, vêê tsuhi, hacuiin cuinújun xi vêê tu mé sa ni xcusun. Meje rê xi yêjê ni xi cuinújun ne, cjuaquixi, hacuiin cuindachun. Sehe ngajan xi Nina ne, sahmii nuju me castigu.

<sup>13</sup> Sa xi choho tivatjun jima ne, chjahyun cjuandaja rê Nina. Sa xi tjemu sua nuju ne, sun ngu xi nihñu jyê nihñu hnga Nina. <sup>14</sup> Sa xi hmu nuju ne, chjindayun rê xuta changá xi vitexa ngajñi rê xuta ladu rê Nina, xi tsufê nuju me aceite hacuaha cjuéhya me cjuandaja rê Nai naja ngatsê nuju. <sup>15</sup> Sa xi nguñajatacun hora xi chjahyan cjuandaja rê Nina ne, xuta hmu rê jan ne, cumandaja me ta, Nai naja ne, sua rê me cjuahñu. Hane sa xi casahmi xuta hmu rê jan ngu cjuatsehen ne, Nina tsinchataha jyê rê me. <sup>16</sup> Vêhê xi tijacun jyê nuju cojo xingun, hacuaha chjahyun cjuandaja rê Nina ngatsê rê xingun, sehe cumandaja me. Ngu xuta xi tyjahi cjuatacun rê me xcun Nina ne, hya xi fehya me cjuandaja rê Nina ne, tjercu vengui chji rê cjuaxi rê me ta, Nina ne, visecoo rê me. <sup>17</sup> Ngu xutachanga naja xi hmi rê Elías ne, vêhê ngu xuta sacuaha ngayaan. Peru cafehya nguñajacacun me cojo Nina xi cuaain tsi. Hane chuva rê jyan nu vasen ne, cavaain camahani tsi xcun nangui. <sup>18</sup> Hya xi camá ne, cafehya nga rê me Nina xi cataha tsi, hane cavuya cavaha nga tsi, hacuaha camá nga yêjê ni xitjê.

<sup>19</sup> Ngayujun ni tsan ne, sa xi tjín ngu xuta ngajñi nuju xi cuetjuxin me tsêhê ndiya rê cjuaquixi, hane sa xi tjín ngu yun xi cuiseacun rê me xi cuya cuisehen nga me ndiya rê cjuaquixi ne, <sup>20</sup> ninguitsjun cjuaxi vihi: yo yun xi cuiseacun rê ngu xuta tsehen xi cuetjuxin me tsêhê cjuatsehen xi sahmii me ne, ngatsê nuju ne, cuetjutje me tsêhê castigu xi cuatju me cuma. Hacuaha ngatsê nuju ne, tjercu cjin jyê xi cumanchataha.

## Carta xi tjun tjun catsingatju San Pedru

<sup>1</sup> Ngahan Pedru, apóstol tsêhê Jesucristu ne, tsingátju carta vihi xi cuma nuju ngayujun ni xi cavitsojo ngayun ngajan distritu Ponto, distritu Galicia, distritu Capadocia, distritu Asia, cojo distritu Bitinia, cahndê xi nechuntuhun. <sup>2</sup> Hisca hatsêê ne, Nina ne, cavejñangucacun me cavaxijin me ngayun, hacuaha Hasen rê me ne, caviyujuxin nuju, cojo sa xi cuinuhyun tsêhê Jesucristu hacuaha cuma tyjahi xahasen nuju ngatsê rê jni rê me. Nina ne, catitsixuva me cjuandaja cjuajeya xi cuma nuju ngayujun ni.

*Cuetahantacun ngu cjuahñu xatsê*

<sup>3</sup> Nihña jyê nihña hnga me xi Nina Nahmi rê Nai naja Jesucristu cojo Hasen rê me. Jercu hmu camá rê Nina ngayaan, hane ngatsê rê xi Jesucristu cavuya me cjuahñu tsêhê ngajñi rê nima. Nina ne, casahmi me xi cavuya catsin ngayaan cojo sa xi cuetahan tacun ngu cjuahñu xatsê, <sup>4</sup> hacuaha cojo sa xi satê naja ngu cjuandaja rê Nina xi tsajin nixtin xi cuetsun, hatuxa tyjahi, hacuaha tsajin nixtin cjuêya. Hane yêjê ni cjuandaja vêhê ne, tetjo vêhê ngahnga xi cuma nuju ngayujun ni. <sup>5</sup> Hane tsêhê xi ngayujun ne, mangutacun cojo Nina ne, vêhê xi me vêhê tisahmi me cuidadu ngayujun ni cojo ngahñu rê me, cojo sa xi cuechuntuhun cjuandaja xi cuaxêtje me ngayun. Hane cjuandaja vêhê ne, ha tjín ndaja rê Nina cojo sa xi tsingacun me hya xi cjuê nixtin xi nechantahan ngasunhdê.

<sup>6</sup> Tsêhê vêhê xi ngayujun ni ndama nuju, handasa hitsê sa nixtin ne, sahmi nguujê xi jemu cuatjun cjuañihi cuma. <sup>7</sup> Cuatjin meje rê xi chutaha nuju, cojo sa xi cumatsejenquixi xi ndaja mangutacun cojo Nina. Sacuaha oro xi ma vetsun ne, ma churahachuva rê cojo ndihi. Hacuaha ni tjín ni nuju ngayun ne, meje rê xi chutaha chutava rê xi mangutacun cojo Nina. Hane xi cuatjin mangutacun cojo Nina ne, jercu sa vengui chji rê xi cuma rê oro. Hane xi cuatjin ndaja mangutacun cojo Nina ne, Nina ne, sahmi jyê sahmi hnga me ngayun, jemu ndajiyihi cjuandaja xi sua nuju me, hacuaha cjuahacun nuju me nixtin hya xi cuya cumatsejen nga Jesucristu. <sup>8</sup> Ngayun ne, hmutacún Jesucristu handasa cahyuun me, hacuaha mangutacun cojo rê me handasa hacuain tinutsujun me. Vêhê xi jercu ndama rê xahasen nuju ne, xi hisca maji nújun mé xi má nuju cojo xahasen nuju. <sup>9</sup> Ngajan xi Nina ne, cuaxêtje me ngayun, ngatsê rê xi jercu ndaja camangutacun cojo rê me.

<sup>10</sup> Profeta ne, jercu cavutahahya camahani me hacutjin xi Nina cuaxêtje me xuta. Hacuï me vêhê xi ha tjun sa cachja me tsêhê cjuandaja xi ngascan sua Nina ngayujun ni. <sup>11</sup> Jercu cavutaya profeta xi cuacun jan janihya hacuaha hacutjin cuechú nixtin xi cachja Hasen rê Cristu xi jiya cahntsa xahasen rê me, hya xi tjun sa casua me camachaya rê xuta tsêhê yêjê ni cjuañihi xi ngascan cuatju Cristu cuma cojo cjuandaja ndajiyihi xi satê rê me ngascan. <sup>12</sup> Nina ne, casua me camachaya rê profeta xi cuacun jan ta cjuá xi cachja me ne, hacuain tsêhê me ndaja ta tsujun ndaja. Hane cjuá vêhê ne, hacuï cjuá xi cachja xuta xi casua me camachaya nuju cjuandajiyihi xi chja tsêhê Jesucristu ngatsê rê xi Hasen rê Nina xi caningatjun rê tsêhê ngahnga ne, cuatjin casua rê me chuva rê xi cuichja me. Cjuá vêhê ne, hisca ángel ne, jercu meje cuijercu.

*Meje rê xi naxenxen yojo naja tsêhê cjuatsehen*

<sup>13</sup> Vêhê xi meje rê xi tjín chjine ngayujun ni, hacuaha catiyuju chihin cjuatacun nuju. Ndaja tetuhun tacún tsêhê cjuandaja xi sua nuju Nina nixtin hya xi cuya cumatsejen nga Jesucristu. <sup>14</sup> Sacuaha quihndi xi ndaja vihndê ne, xicatuun cahndê xi cuítexa nuju cjuatacun tsehen xi tjín nuju hatsêê, hya xi jñu cjuatacun nuju. <sup>15</sup> Cahndê rê vêhê ne, ngajñi rê yêjê xi nihñu ne, naxunxun yojo nuju tsêhê cjuatsehen cojo sa xi tsêhê Nina cuma ngayun, sacuahatjin Nina, me xi cavaxijinñi nuju ne, tuxa jercu xín me tsêhê yêjê ni cjuatsehen. <sup>16</sup> Tsêhê xi xcun xujun rê Nina ne, cuitjin camahindu cjuá xi cachja Nina: “Meje rê xi naxunxun yojo nuju tsêhê cjuatsehen cojo sa xi tsahan cuma ngayun ta, ngahan ne, tuxa jercu xín ngahan tsêhê yêjê ni cjuatsehen.”

<sup>17</sup> Ngayujun ni ne, tsêhê xi “Nahmi” nújun tsêhê me xi texta ni tsichuva cjuatacun rê xingu xingu tucu xcusun xi sahmi me ne, vêhê xi meje rê xi ndaja chjuhuncun Nina guyéjê rê xi nechuntuhun nguehe ngasunhdê vi. <sup>18</sup> Ha hyun xi Nina ne, cavaxêtje nuju me tsêhê ndiya xi hacuain machjirêhê, ndiya xi caviyuju nuju xutachanga nuju. Hacuaha hyun xi hacuain ngatsê rê ngu xcusun xi cuma cuetsun sacuaha plata cojo oro xi cuatjin casahmi Nina ta <sup>19</sup> ngatsê rê jni rê Cristu xi cavanga xi jercu machjirêhê, sacuahatjin machjirêhê jni rê cjuaveya rê ngu chu hnditsánga xi tsajin camahani mé má rê chu. <sup>20</sup> Cristu jan ne, casuaxa Nina me hisca chaja sa xi cuejña ngasunhdê, peru quihndê xi tijima chuva nixtin xi nechantahan ngasunhdê vi ne, casua Nina xi catimachaya naja tsêhê me cojo sa xi ndaja cuatjun. <sup>21</sup> Ngatsê rê me vêhê ne, ngayun ne, camangutacun cojo Nina, me xi



catsicuya Cristu cjuahñu tsêhê ngajñi rê yêjê nima hacuaha casahmi jyê casahmi hnga me Cristu. Vêhê xi mangutacun cojo Nina hacuaha vetuhun tacun me.

<sup>22</sup> Ngayujun ni ne, xi tivinuhyun cjuaquixi rê Nina ne, cuatjin canitsiuhun xahasen nuju cojo cjuatacun nuju, cojo sa xi nihmutacún cojo nguñaja ni cjuandaja yêjê sa me xi ladu rê Jesucristu. Ngajan xi meje rê xi hñu nihmutacún xingun cojo nguñaja xahasen nuju.

<sup>23</sup> Ngayujun ni ne, hacuaha cavuya catsin nga ngayun, peru hacuiin tsêhê xuta xi hatuxa hme ta tsêhê ngu tjê xi cueyaain ta cjuar rê Nina, cjuar xi sua naja cjuahñu hacuaha tsajin nixtin cjuêya. <sup>24</sup> Xujun rê Nina ne, cuitjin chja:

Yêjê ni xuta ne, sacuaaha xca nguijnã me,  
yêjê ni xi ndaja tsêhê me ne, sacuaaha naxu rê xca jan.

Xca nguijnã jan ne, xí ne, naxu ne, vixu,  
<sup>25</sup> peru cjuar rê Nai naja ne, tsajin nixtin xi cjuêya.

Hane cjuar vêhê ne, hacui cjuandajiyi xi casacu camachaya nuju.

## 2

<sup>1</sup> Vêhê xi ngayujun ni ne, meje rê xi tiyujunxun yêjê ni cjuatsehen, yêjê ni cjuandacha, yêjê xcusun xi sahmi xuta xi jo xcun jo hntsua tjin rê me, yêjê ni cjuaxin, yêjê ni cjuachjataha. <sup>2</sup> Sacuatjin rê ngu quihndinda xi meje rê súvã lechi ne, cuatjin catamameje nuju cjuar rê Nina, cojo sa xi nguyêjê rê xi tivisehen nuju cjuar jan ne, tuxaha sa cjuatacun nuju hisca xi cuetjuntjun. <sup>3</sup> Cuatjin nihñu, sa xi ha camachaya nuju xi Nai naja ne, jercu ndaja me.

*Sacuaha ngu ndyojo xi jercu vengui chji rê ne, cuitjin rê Jesucristu*

<sup>4</sup> Nihñutiñu tsêhê me ta me vêhê ne, quicun me. Me vêhê ne, sacuaaha ngu ndyojo xi handasa catsitjungui xuta ne, peru xi cuma rê Nina ne, hatuxa catuxijin rê hacuaha jercu vengui chji rê. <sup>5</sup> Hacuaaha ngayujun ni ne, sacuaaha ndyojo xi quicun ne, tuhun cahndê xi cjuaha nuju Nina, cojo sa xi cuma ngayun sacuaaha ngu yungun hiscan xi nechunxun, hane satêxa nuju nihñu xa rê Nina sacuaaha nahmi, xi tuhun cjuandaja nuju xcun Nina. Hane yêjê ni cjuandaja vêhê ne, chuya rê Nina ngatsê rê Jesucristu. <sup>6</sup> Xcun xujun rê Nina ne, cuitjin camahindu cjuar xi cachja Nina:

Ngahan vejñãvasen ngu xihin ngajan ndetjún Sión,

hane xihin jan ne, sacuaaha ngu ndyojo xi jercu vengui chji rê, xi hacuaha catuxijin rê xi cuma titjun tsêhê xihndênaña;

hane xuta xi cumangucacun cojo xihin jan ne, tsajin nu tsajin nixtin xi cuetju sava me.

<sup>7</sup> Hane xi cuma nuju ngayujun ni xi mangutacun cojo Jesucristu jan ne, jercu vengui chji rê me. Peru xi cuma rê xuta xi manguaaincacun me ne, cuetjucaa cjuar xi camahindu xcun xujun rê Nina xi cuitjin chja:

Me xi catsitjungui xuta sacuaaha tsitjungui chjinevexo ngu ndyojo xi chuyiin rê me tsêhê ne,

me vêhê ne, camatitjun me tsajan ngayejen ni.

Cuatjin camahindu. <sup>8</sup> Hacuaaha cuetjucaa cjuar vihi:

Xihin jan ne, sacuaaha ngu ndyojo xi xtenguia rê xuta, ngu ndyojo xi sahmi xi tsichaja me ndiya rê me.

Cuatjin chja cjuar. Xuta xi manguaaincacun me ne, xtenguia rê me, tsêhê xi vihndiin me cjuandajiyi xi chja tsêhê Jesucristu. Hatuxa cuatjin cavejña Nina xi cuatjin cuatju me cuma.

*Xuta xi tsêhê Nina me*

<sup>9</sup> Ngayujun ni ne, ngu tjê xi cavaxijin Nina ngayun, sacuaaha nahmi xi fahacuenda yêjê ni xi tsêhê Nina ngayun, xuta xi hatuxa siuxin rê Nina ngayun, hacuaha xuta xi hatuxa tsêhê Nina ngayun. Cuatjin cun ngayujun ni, cojo sa xi ninguitsujun cjuandajiyi xi chja tsêhê yêjê ni cjuandaja xi casahmi Nina, me xi cajindaya nuju xi cavetjunxun tsêhê ngajñi jñu, xi cuisuhun ngajñi hasen ndajiyi rê me. <sup>10</sup> Hatsêe ne, hisca hacuiin xuta rê Nina ngayun, peru quihndê ne, xuta rê Nina camã ngayun. Hatsêe ne, hisca tsajin camayuma rê Nina ngayun, peru quihndê ne, camayuma rê me ngayun.

*Meje rê xi cuinechan ndiya rê Nina*

<sup>11</sup> Ngayujun ni xi sacuaaha xuta ngu nangui xi nechunyun ndiya ngehe ngasunhdê vihi ne, vinchangê nuju xi nechunxun tsêhê yêjê ni cjuatsehen xi fehya rê xahasen naja, tsêhê xi sacuaaha ngayaan xi vixcaan cojo xingueen ne, cuatjin rê yêjê ni cjuatsehen vêhê cojo hasen naja. <sup>12</sup> Ndaja nihñu ngajñi rê xuta xi hviiin me Nina, cojo sa xi me xi cuacun vê ne, handasa choho cuichja me tsujun quihndê sacuaaha xi ngayun xuta tsehen má yun ne, peru scuêe me yêjê ni cjuandaja xi tinihñu, sehe sahmi jyê sahmi hnga me Nina nixtin hya xi cjuahataha Nina jyê rê xingu xingu me.

<sup>13</sup> Ngatsë rë Nai naja ne, tinuhyun tsëhë yëjë ni xutaxa rë ngasunhdë vihi, há xi me xi matitjun camahani, <sup>14</sup> há xi xuta xi tsingatju me xi sahmi castigu rë xuta xi choho sahmi hacuaha cuaxëndaja me xuta xi ndaja sahmi. <sup>15</sup> Cuatjin nihñu ta, tsëhë xi Nina ne, meje rë me xi cjuandaja xi ngayun nihñu ne, sahmi xi xuta xi hvíin ne, cumaji choho cuichja me tsujun. <sup>16</sup> Tángun cojo ngasunhdë nuju sacuaha xuta xi tsajin camahani mé xi tjin tsavi xi cuma rë me, peru hacuiin ngatsë rë vëhë xi nihñu ngu xcusun cjuatsehen ta, xi meje rë ne, tángun cojo ngasunhdë nuju sacuaha xi mosu hndixahan rë Nina má ngayujun ni. <sup>17</sup> Chjuhuncun ni yëjë xuta. Nihmu tacún yëjë ni xi hacuaha ladu rë Jesucristu me, meje rë xi rcún Nina, hacuaha chjuhuncun me xi matitjun camahani.

*Cjuahmu xi cavatju Jesucristu camá*

<sup>18</sup> Ngayujun ni mosu hndixahan ne, tinuhyun tsëhë nai nuju, hacuaha chjuhuncun me, hacuiin suvá me xi xuta ndaja cojo me xi jeya ta cojo me xi hngacacun. <sup>19</sup> Cuatjin nihñu ta jercu chuya rë Nina sacuatjin rë ngu me xi caa rë cojo ngu cjuañihi ngatsë rë xi vihndë me tsëhë Nina, handasa tsajin jyë rë me xi cuatjin vatju me má. <sup>20</sup> Sa xi ngayun choho nihñu hane má yun castigu ne, zyó ndaja cuichja tsujun xi scaa nuju castigu jan? Peru sa xi ngayun ndaja nihñu hane má ngayun castigu ne, jercu chuya rë Nina sa xi ngayun scaa nuju. <sup>21</sup> Nina ne, cajindaya me ngayun xi cuatjin cuatjun cuma. Cristu ne, cavatju me cjuañihi camá ngatsë nuju, hane cuatjin cavejña me ntsacu, cojo sa xi ngayun nihñu sacuatjin casahmi me. <sup>22</sup> Me vëhë ne, hisca ngu cjuatsehen casahmii me, hacuaha hisca ngu cjuandacha ne, cavetjiin cachja me. <sup>23</sup> Hya xi xuta choho cachja cojo rë me ne, me vëhë ne, hacuiin choho catsicuya me tsëhë xuta jan. Hya xi cavatju me cjuañihi ne, hacuiin cavincharcun me xuta jan ta cavetahacacun me Nina, me xi tsichuva rë xuta cojo cjuatacun rë me cojo cjuaquixi. <sup>24</sup> Suvá Cristu jan ne, cavaha me yëjë cjuatsehen naja ngajñi yojo rë me, ngajan xcun cru, cojo sa xi cuma cuetjunxen tsëhë cjuatsehen, hane cuma cuangentjenguen ndiya rë cjuaquixi. Ngayun ne, cavetjuntjun ngatsë rë cjuahmu xi me vëhë cavatju me camá. <sup>25</sup> Titjun ne, sacuaha chu tsánga xi cachaja tjin nuju ngayun, peru quihndë ne, cavuyun nga ladu rë Cristu, me xi fahacuenda nuju sacuaha ngu xuta xi fahacuenda rë chu tsánga, cuatjin sahmi nuju me cuidadu.

### 3

*Cuitjin xi meje rë xi cuiyuju xuta cojo chjuun cojo xihin me ndava me*

<sup>1</sup> Quihndë ne, ngayujun ni yachjin ne, tinuhyun tsëhë xihin nuju xingu xingu ngayun, cojo sa xi yahnga me xi vihndiin me tsëhë cjua rë Nina ne, cuijnecacun me, xi scuëë me xcusun nuju, handasa tsajin mé xi nújun, <sup>2</sup> cuenda xi scuëë me xcusun ndaja xcusun jeya nuju. <sup>3</sup> Mijí rë xi jercu nihñuxun cojo yëjë ni ngu xcusun xi sahmi ndacun nuju cojo yojo nuju sacuatjin hya xi vatjutaha nihñu ndacun tsjarcun, hacuaha cojo hya xi nihñuxun cojo adorno tsëhë oro, hacuaha cojo hya xi chujun ngu tsjian hnga chjí rë. <sup>4</sup> Cahndë rë vëhë ne, meje rë xi nihñuxun cojo yëjë ni ngu xcusun xi hincha cahntsua xahasen nuju sacuatjin hya xi ningacun cjuajeya xi cun yun ta yëjë cjuandaja vëhë ne, jercu vengui chjí rë xcun Nina. <sup>5</sup> Hatsëë ne, cuatjin casahmi yachjin xi siuxin me xi cuma rë Nina, yachjin xi cavetaha cacun me Nina. Me xi cuacun jan ne, cavihndë me tsëhë xihin rë me. <sup>6</sup> Nima Sara ne, cuatjin cahndë me tsëhë xutachanga naja Abraham, xihin rë me, hane “nai naha” cachja me tsëhë me. Hane ngayujun ni ne, quihndi rë me ngayun, sa xi nihñu yëjë ni cjuandaja hacuaha tsajin mé xi rcún.

<sup>7</sup> Cuanitjin ni nuju ngayujun ni xihin, xi nechun tangun cojo chjuun nuju xingu xingu yun ne, meje rë xi hyun xi hitsë ni chúva ngahñu rë yachjin. Chjuhuncun me ta, me xi cuacun vé ne, hacuaha chjuhunntsun tangun cojo rë me cjuahñu xatsë xi sua nuju Nina cojo cjuandaja rë me. Cuatjin nihñu ngayun ne, cojo sa xi tsajin mé sahmíndya rë oración xi nihñu.

*Hya xi vatjun cjuañihi ngatsë rë nihña cjuandaja*

<sup>8</sup> Quihndë xi tsingufjnetaha cuichjá cojo nuju ne, ngayujun ni ne, meje rë xi tjin tangun cjuatacun nuju cojo xingun, meje rë xi tjin tangun xahasen nuju cojo xingun, meje rë xi nihmutacún xingun xingu ngayun sacuaha xi ngu naa ngu nahmi nuju ngayujun ni. Meje rë xi tjin nuju cjuayumatacun, hacuaha meje rë xi jeya ngayun cojo cjuatacun nuju. <sup>9</sup> Hacuaha cuéyanangë nuju xi mijí rë xi choho nihñu cojo yo xi choho sahmi cojo nuju, hacuaha sa xi yo choho cuichja cojo nuju ne, mijí rë xi choho chjayunngun tsëhë ta xi meje rë ne, ninchacuntuhun rë. Cuatjin meje rë xi nihñu ta, Nina ne, cajindaya me ngayujun ni xi chjuhunntsun ngu cjuaninchacuntihin. <sup>10</sup> Tjin ngu cahndë xcun xujun rë Nina xi chja cuitjin:

Me xi meje rë xi ndaja cjue cojo ngasunhdë rë hacuaha meje rë xi ndaja cuatju cuma ne, mijí rë xi choho cuichja me hacuaha mijí rë xi cuichja me cjuandacha;

11 catetjuxin me tsêhê ndiya rê cjuatsehen, hane catisahmi me cjuandaja, catanguise me ndiya rê cjuajeya, hane vêhê catjicojo me.

12 Cuatjin meje rê ta Nai naja ne, fahacuenda me xuta xi tsajin jyê rê, hacuaha vihndê me oraciôn xi sahmi xuta jan, peru Nai naja ne, chuyiin camahani rê me tsêhê xuta xi sahmi cjuatsehen. Cuatjin chja xujun rê Nina.

13 ¿Yo choho sahmi cojo nuju sa xi ngayun hatuxa nihñu cjuandaja? 14 Peru handasa cuatjun cjuañihi cuma ngatsê rê xi nihñu cjuandaja ne, tsimii sahmi rê ta ha tsujun ndaja. Hane xircarcun hisca xi ngu, hacuaha hacuïn cumacjintacún. 15 Meje rê xi chjuhuncun Cristu cojo cjuatcun nuju ta me vêhê xi Nai nuju me. Hacuaha meje rê xi yêjê ni hora ne, tjin chjine ngayujun ni, cojo sa xi tuhun cjuaquixi nuju cojo tu yo ni xi cjuinenguise nuju mé má cuatjin vetuhun tacún Nina, 16 peru tinújun cojo nguñaja ni cjuandaja cjuajeya. Tangun cojo ngasunhndê nuju cojo ngu xcusun xi ngascan ne, hisca hitsê tsajin cuma sava nuju, cojo sa xi xuta xi choho cuichja me tsêhê cjuandaja xi nihñu ngatsê rê xi tjin tangun cjuatcun nuju cojo Cristu ne, cuetju sava me tsêhê yêjê xi choho chja me tsujun. 17 Hitsê sa ndaja xi cuatjun cjuañihi ngatsê rê xi nihña ngu cjuandaja, sa xi cuatjin meje rê Nina, xi cuma rê xi cuatjun cjuañihi ngatsê rê xi nihña ngu cjuatsehen. 18 Cristu ne, ngundiya ni cahme me ngatsê rê jyê naja. Me vêhê ne, tsajin xi cún rê me xcun Nina, peru cahme me ngatsê naja xi tjercu tjin jyê naja, cojo sa xi cuma cuiseen ladu rê Nina. Cristu ne, sacuaha xihin xi má me ne, catsiquehen xuta me, peru sacuaha hasen xi hacuaha má me ne, catsicuya Nina me cjuahñu. 19 Hane sacuaha hasen me jan ne, quiji cachja me ngu cjuo cojo yêjê ni hasen xi hinchahñu. 20 Hane hasen xi cuacun jan ne, hacui xi cahndiin tsêhê Nina, hya xi tacunya tacunya Nina cojo jeya nguyêjê rê xi Noé titsindaja me barcu rê me. Hane ngu jo me xi caxincha me cahntsua barcu jan ne, chuva rê jyin má me xi yêjê me, cavetjutje me hya xi cavatju me xcun nandá. 21 Hane nandá jan ne, sacuaha nandá xi xtenda yaan xi vaxêtje naja quihndê. Hya xi xtenda yaan ne, hacuïn xi tinityjahin yojo naja ta tichjahyan rê Nina ngu cjuatcun tyjahi, ngu cjuatcun ndaja, hane cuatjin vetjuntjen ngatsê rê xi Jesucristu ne, cavuya nga me cjuahñu. 22 Me vêhê ne, quiji me ngahnga, hane tacun me ladu quixi rê Nina. Quihndê ne, me vêhê vitexa me ángel cojo jingu sa xcusun hasen sa hasen ndaja sa hasen tsehen xi hacuaha matitjun ngajan ngahnga.

## 4

### *Meje rê xi ningatahantacun sacuaha catsingatahacacun Jesucristu*

1 Vêhê xi, sacuatjin Cristu cavatju me cjuañihi nuehe ngasunhndê vihi ne, cuanitjin ni ngayujun ni, meje rê xi taha catamangutacun cojo cjuañihi quihndê, tuxa má sa xi ngascan cuatjun cuma. Cuatjin meje rê ta, me xi ha vacatun cjuañihi camá ne, ha quihndê cuitexaain rê me cjuatsehen, 2 hane cjuenduju me cojo ngasunhndê rê me sacuatjin meje rê Nina, hacuïn sacuaha meje rê cjuatcun naja ngayaan xuta ngasunhndê. 3 Ha jercu canichujun nixtin hatsêê, hya xi canihñu xcusun xi chuya rê xutaxin tsêhê. Jercu choho ndiya cavinechunyun, jercu camameje nuju cjuatsehen, jercu camachuhun, jercu catsangun suhi hisca xi jercu si rcu xuta hacuaha jercu vatjutaha hvi me, hacuaha jercu cachjuhuncun nina ndyojo, xcusun xi hatuxa ndajintjin. 4 Quihndê ne, xutaxin jan ne, fircun rê me hisca choho chja me, hya xi ngayun ne, matanguaain yun cojo rê me hya xi me vêhê findujú me cojo ndiya rê cjuatsehen xi hincha me. 5 Peru me vêhê ne, cuechú ngu nixtin xi sua me cuenta xcun me xi ha tjin chjine xi tsichuva me xuta xi quicun cojo xuta xi cahme cojo cjuatcun rê xingu xingu. 6 Vêhê xi hisca yêjê nima ne, casacu camachaya rê tsêhê cjuandajiyihi xi chja tsêhê Jesucristu, cojo sa xi, sacuaha hasen xi má jan ne, sacú rê cjuahñu sacuaha cjuahñu rê Nina. Cuatjin camá handasa, sacuaha xuta ngasunhndê xi má nima xi cuacun jan ne, ha cachjaháchuva rê xingu xingu cojo cjuatcun rê, sacuaha chjaháchuva rê yêjê xuta ngasunhndê.

### *Hacutjin meje rê xi cuisecoon xingueen cojo cjuandaja xi sua naja Nina*

7 Quihndê ne, ha camatiña nixtin xi cjuê ngasunhndê. Vêhê xi meje rê xi ngayujun ni ne, tiyujun chihin cjuatcun nuju hacuaha tjin chjine ngayun, xi nihñu oraciôn. 8 Hitsê meje sa rê xi nihmutacún xingun xingu xingu ngayun nguñajatacún ta, tsêhê xi cjuahmutacun ne, vujnu rê jercu cjin jyê naja. 9 Hacuaha chjuhunnuntsun xingun xingu xingu ngayun ndya nuju, xi hisca hitsê tsajin choho cuma tacún hya xi chjuhunnuntsun xingun. 10 Ngayun xi jercu cachjuhunnuntsun cjuandaja rê Nina hacuaha satêxa nuju xi ninguitsujun cjuandaja jan ne, meje rê xi xingu xingu ngayun ne, cuisecon rê xuta xi yahnga, ha chuva rê xi casua nuju Nina ngu cjuandaja. 11 Yo ngayun xi cuinújun ne, tinújun sacuaha ngu xi chja cjuo rê Nina. Hane yo ngayun xi cuisecon xingun ne, tisecon rê me cojo yêjê ni ngahñu xi sua nuju Nina. Cuatjin meje rê xi nihñu, cojo sa xi ngajni rê tu mé ni cjuacjintacun ne, Nina ne, cuma

jiyê cuma hnga me cojo Hasen rê me ngatsê rê Jesucristu. Me vêhê ne, hatuxa jiyê hnga me cojo Hasen rê me hacuaha jercu hñu me cojo cjuatacun rê me yêjê nu yêjê nixtin. Cuatjin jain.

*Cjuañihi xi cuatjun ngayaan xuta ladu rê Jesucristu*

<sup>12</sup> Ngayujun ni ne, mijí rê xi cjuercun nuju tsêhê cjuañihi jiyê xi vatjun má xi chuta-hachuva nuju ta, tsêhê xi hacuiin hacui ngu xcusun xi cjuercun naja. <sup>13</sup> Cahndê xi cjuercun nuju ne, meje rê xi catamasua nuju táha hacutjin tivatjun cjuañihi tijima sacuaha cjuañihi xi cavatju Jesucristu camá. Cuatjin catamasua nuju, cojo sa xi hacuaha jercu cumasua nuju nixtin hya xi cumatsejen hacutjin jiyê hnga Jesucristu cojo Hasen rê me. <sup>14</sup> Sa xi xuta choho chja me tsujun ngatsê rê xi tjin tangun cjuatacun nuju cojo Cristu ne, tsujun ndaja ta, vêhê meje cuichja xi Hasen rê Nina xi jercu jiyê hnga ne, tivêña cojo nuju. (Xuta xi cuacun jan ne, hatuxa choho chja me tsêhê Jesucristu, peru ngayun ne, nihñu jiyê nihñu hnga me.) <sup>15</sup> Sa xi yahnga ngayun cuatjun cjuañihi ne, mijí rê xi tsêhê xi caniquhun ngu xuta o sa tsêhê xi canihñu cjuachêjê o sa tsêhê xi tu mé sa ngu cjuatsehen o sa tsêhê xi visuhunñu ngajñi rê cjuacjintacun rê xuta xi yahnga. <sup>16</sup> Peru sa xi yahnga ngayun cuatjun cjuañihi ngatsê rê xi ladu rê Cristu ngayun ne, mijí rê xi cumasava nuju ta meje rê xi nihñu jiyê nihñu hnga Nina ngatsê rê vêhê.

<sup>17</sup> Ha cavechú nixtin xi cuetsihin tsichuva Nina xuta cojo cjuatacun rê xingu xingu me, hane cuetsihin me cojo naja ngayaan quihndi rê me. Hane sa xi tjun ngayaan tsichuva Nina ngayaan cojo cjuatacun naja ne, ç hacutjin cuatju me xi vihndiin tsêhê cjuandajiyi xi cachja Nina? <sup>18</sup> Hacuaha tjin ngu cahndê xcun xujun rê Nina xi cuitjin chja: Sa xi xuta xi café jiyê rê sehe tu ma vetjutje me ne, ç hacutjin cuatju me xi hisca cuendaain rê tsêhê Nina cojo me xi jercu sahmi cjuatsehen? Cuatjin chja xujun rê Nina. <sup>19</sup> Vêhê xi yêjê me xi vatju cjuañihi tsêhê xi cuatjin meje rê Nina ne, meje rê xi catjindujú me cojo cjuandaja xi sahmi me hacuaha cateña me yojo rê me tsja Nina, me xi catsindaja rê me ta, Nina ne, hatuxa sahmi chihin me yêjê cjuatacun rê me.

## 5

*Cjua rê Pedru xi vinchangui me xuta ladu rê Jesucristu*

<sup>1</sup> Quihndê ne, meje cuichjá cojo nuju ngayujun ni xuta changá xi vitexun ngajñi rê yêjê xuta ladu rê Jesucristu. Ngahan ne, hacuaha xuta changá ngahan xi cavêhê hacutjin cavatju Jesucristu cjuañihi camá. Hacuaha satê ná ngahan sacuatjin rê me xi cuacun jan cjuandaja xi cuetjucaa ngasca. <sup>2</sup> Cuichjá cojo nuju xi hacuaha meje rê xi chjuhuncuendun xuta ladu rê Nina xi siuntsun, sacuaha ngu cha xi fahacuenda rê chu tsánga. Cuatjin nihñu nguñaja cjuasua sacuatjin meje rê Nina, hacuiin cjuachan hacuaha hacuiin ngatsê rê xi jercu meje nuju tujún. Chjuhuncuendun me nguñajatacún, <sup>3</sup> hacuiin sacuaha xi ngayun má yun nai tsêhê me ta meje rê xi tejñu ntsacu, cojo sa xi xuta ne, tjengui me ngayun cojo xcusun nuju. <sup>4</sup> Ngajan xi hya xi cuinduva nga me xi matitjun ne, ngayun ne, chjuhunntsun cjuandaja xi sua nuju Nina, cjuandaja xi tsajin nu tsajin nixtin cjuéya.

<sup>5</sup> Cuatjin ngayujun ni xihin xi hitsê ni chúva nu nuju ne, tinuhyun tsêhê xuta changá. Hane ngayujun ni ne, meje rê xi jeya ngayun cojo cjuatacun nuju hacuiin xta yun ngajñi nuju cojo xingun ta tjin ngu cahndê xcun xujun rê Nina xi cuitjin chja: Nina ne, tsitjungui me xuta xi jercu tjin rê cjuaxta cahntsua xahasen rê, peru xuta xi jercu tjin rê cjuajeya cahntsua xahasen rê me ne, Nina ne, jercu sua rê me cjuandaja.

Cuatjin chja xcun xujun rê Nina. <sup>6</sup> Vêhê xi ngayujun ni ne, meje rê xi ninguijnu yojo nuju xi cuinuhyun tsêhê Nina, me xi jercu hñu cojo cjuatacun rê. Cuatjin nihñu cojo sa xi me vêhê ne, sahmi jiyê sahmi hnga me yun, hya xi cuechú nixtin rê. <sup>7</sup> Tiyujunxun yêjê ni cjuacjintacun nuju, tiyujun tsja Nina, tsêhê xi me vêhê ne, vutsejen me ngatsê nuju.

<sup>8</sup> Ngayujun ni ne, meje rê xi tjin chjine yun hacuaha nechun quicun ta, tsêhê xi Satanás ne, xitsehen xi maji vêê nuju ne, tsujiyihi sacuaha ngu chu xa xi jercu titsichan chu, xi vangi chu yo xi sacú ru xi sinê chu. <sup>9</sup> Xicaningatuun rê, hane tiyujunñu cjuatacun nuju xi mangutacún cojo Nina. Cuatjin nihñu ta ha hyun xi yêjê sa me xi hacuaha cojo ladu rê Cristu hincha jingujyê ni ngasunhndê ne, hatuxa tjin rê me xi cuatju me yêjê ni cjuañihi vêhê cuma. <sup>10</sup> Peru xi ha cavatjun cjuañihi hitsê nixtin ne, Nina ne, tsityjahi me cjuatacun nuju, cuiyujuchihin me cjuatacun nuju, cuiyujuhñu me xahasen nuju, hacuaha cuiyuju cahndê me cjuatacun nuju. Nina xi sahmi cuatjin jan ne, hacui me xi tjin rê yêjê ni cjuandaja, hacui me xi cajindaya nuju me xi satê nuju cjuahasen ndajiyi rê me xi tsajin nu tsajin nixtin xi cjuéya, ngayujun ni xi tjin tangun cjuatacun nuju cojo Cristu. <sup>11</sup> Nina ne, hatuxa jemu hñu me cojo cjuatacun rê me yêjê nu yêjê nixtin. Cuatjin jain.

*Cjua xi vijnetaha*

<sup>12</sup> Ngahan ne, catsihindu nuju ngu jo cjuva vëhë, cojo sa xi cuinchangë nuju hacuaha tsinguixë nuju xi cjuva vëhë ne, hacui cjuandaja jain rë Nina. Tiyujunhñu cjuatacun nuju xi cuangunndujun cojo cjuandaja vëhë. Silvanu ne, me xi ndaja fitjengui rë ndiya rë Cristu ne, cavisecoo ná me xi catsihindu nuju.

<sup>13</sup> Xuta rë yungun nguehe Babilonia, xi hacuaha cavaxijin rë me Nina ne, tsingatju me nina nuju. Hacuaha Marcos xi sacuaha quihndi naha ne, tsingatju cha nina nuju. <sup>14</sup>Tuhun rë xingun ngu nina, cojo cjuandaja cojo cjuahmutacun tindatsuhun xingun, sacuahatjin xcusun naja. Catisua nuju Nina cjuandaja cjuajeya ngayujun ni xi tjin tangun cjuatacun nuju cojo Cristu.

## Carta xi majo xi catsingatju San Pedru

*Pedru ne, tsingatju me cjuva tsêhê xuta xi macjain rê me Nina*

<sup>1</sup> Ngahan xi hmî ná Simón Pedru, mosu rê Jesucristu, hacuaha apóstol tsêhê me ne, tsingatju carta vihi tsujun ngayujun ngayun xi Nina naja Jesucristu cavaxêtje nuju me xi casua nuju ngu cjuatacun xi macjain nuju cuanitjin sacuahatjin ngayin. Cuatjin casahmi me ta Nina hatuxa yihi tyjahi tyjahi cjuatacun rê me. <sup>2</sup> Nina ne, catitsixuva me cjuandaja cjuajeya xi cuma nuju ngayujun ni ngatsê rê xi ndaja hyun Nina cojo Jesús, Nai naja.

*Hacutjin cun xuta xi macjain rê me Nina*

<sup>3</sup> Jesucristu xi cojo ngahñu ndajyihi rê me, jyê hnga me ne, cajindaya me yaan xi chan yo me. Hane cuatjin casua naja me yêjê ni xi mameje rê tsêhê cjuahñu xatsê hacuaha tsêhê ngu cjuatacun tyjahi. <sup>4</sup> Cojo ngahñu vêhê casua naja Nina cjuva rê me xi tjercu tu ndaja vengui chjî rê. Cojo sa xi ngatsê rê cjuva vê ne, ngayun ne cuechuntuhun ngu cjuatacun sacuaaha Nina, hacuaha cojo sa xi cuetjuntjun tsêhê xi cuetsun cjuatacun ngu cjuatsehen xi fehya rê xuta. <sup>5</sup> Hindê ngatsê rê vihi ne, ndaja nihñu ngahñu cojo sa xi ha macjain nuju Nina ne, má tyjahi cjuatacun nuju. <sup>6</sup> Hane hacuiin cuanitjin ni, ta hacuaha ningascunyun cjuatacun nuju. Sehe tuhun hñu jojo nuju tsêhê cjuatsehen. Hacuaha cuanitjin ne cojo xi nihñu jyê tacún. <sup>7</sup> Hacuaha cojo xi chjuhuncun Nina, hacuaha cojo xi chjuhuncun xingun, hane hacuiin tu cuanitjin chjuhuncun xingun ta cojo ngu cjuahmutacun.

<sup>8</sup> Sa xi cuatjin ndaja xcusun nuju, hane sa xi nihñu jain sacuatjin vitexa ne, xcun cjuahñu nuju ne, tjercu cuengui chjî nuju hacuaha hacuiin tu mahya ni camachaya nuju tsêhê Nai naja Jesucristu. <sup>9</sup> Peru xuta xi cuaintjin yihi xcusun rê me ne, cumá jñu cjuatacun rê me sacuaaha ngu rcá me o sacuaaha ngu cha xi vutsejen hiscan xi cjín peru hvíin cha mé xi tivutsejen cha. Ngatsê rê xi cachaya rê me xi camanchataha jyê rê me xi ha casahmi me. <sup>10</sup> Vêhê xi ngayujun ni xingueen ne, sa xi nihñu jain sacuatjin vitexa xcusun ndaja jan ne, ngajan machihín cjuva ta Nina ne, cajindaya nuju me hacuaha cavaxijin nuju me ne, hane cuatjin ha tuxa tsajin ngu nixtin xi cuetjuncun tsêhê ndiya rê Nina. <sup>11</sup> Cuahatjin jemu ndaja sacu nuju cahndê xi cuisuhun hiscan xi sahmi gobiernu Nai naja Jesucristu, me xi vaxêtje naja, hane tsajin nu tsajin nixtin cuetjuncun.

<sup>12</sup> Vêhê xi vejñacacun xi cúa tsinguitsjen nuju cjuandaja vihi ha ndasa ha hyun hane hacuaha quitahatacún cjuatacun nuju yêjê ni cjuaquixi xi camachaya nuju. <sup>13</sup> Peru jinguyêjê rê xi tjin ná cjuahñu ne, xi má ná ne, sahmi nguyjê xi cuascaya rê cjuatacun nuju xi tsinguitsjen nuju vi ta, <sup>14</sup> tsêhê xi tacun xati nixtin xi cuejñá ngasunhndê vi, sacuaaha ha casua Nai naja Jesucristu camachaya ndaja ná. <sup>15</sup> Hisca hacuaha xati tisahmecacun ne sehe ngajan xi handasa cavéya ne tu mé ni hora cuma cuitsjen nuju tsêhê yêjê ni cjuva vihi.

*Cavindeya xcusun rê Jesucristu, hacuaha cavaxêndaja Nina me*

<sup>16</sup> Cathin camachaya nuju cjuva sacuaaha tsêhê ngahñu xi tjin rê Nai naja Jesucristu cojo tsêhê hya xi cuinduva me. Cjuva vêhê hacuiin ngu cuentu ndacha xi ndaja nuhya rê peru cjuaquixi jain. Quixi ta cahyin cojo tuxcuin ta Jesucristu ne, jemu rcun me ta jemu jyê hnga hasen rê me. <sup>17</sup> Hya ne, Nina nahmi naja ne cafaharcun rê me hacuaha cavaxêndaja me Jesús ta cjuva rê Nina ne canduva tsêhê ngahnga xi cachja cojo rê me cuitjin: “Vihi quihndi naha xi hmucacun ne, xi ngatsê rê me ne tjercu ndaja má ná.” <sup>18</sup> Hindê ngayin suvin canuhyin cjuva vê ta canduva tsêhê ngahnga hya xi cavinechintihin ngajan cojo Nai naja rcu naxi hiscan cavatju camá.

<sup>19</sup> Cojo xcusun xi cahyin ne, vêhê catsinguixi rê cjuva changá xi catsihindu profeta. Ngayujun ni ne jemu ndaja nihñu xi tivetuhun rcun yêjê ni cjuva changá jan. Cjuva jan ne, tangun sahmi sacuaaha ngu ndihî xi sua hasen rê hiscan xi jñu, hane cjuecani rê hisca xi sahasen ne. Hane sacuaaha sua hasen rê tiña sahasen xi cuetju niñú seti ne hacuaha Jesucristu sua hasen rê xahasen nuju. <sup>20</sup> Cjuva xi hitsê sa sahmi nguyjê xi meje rê xi machaya nuju ne, cjuva vihi má: sacuaaha yêjê cjuva xi catsihindu profeta xcun xujun rê Nina ne, cumajin sesuntaha sa ngu cjuatacun rê xuta ta, <sup>21</sup> hisca ngu cjuva jan tsajin xi catsihindu profeta cojo cjuatacun rê suva ni me, ta Hasen rê Nina casua rê me cjuatacun xi cuichja me cjuva jan xi tsêhê Nina.

## 2

*Cuinduva maestru ndacha*

<sup>1</sup> Peru nixtin hatsëë ne ngajan nangui rë Israel ne, hacuaha cavetjufñi xuta xi tsejan sacuaha perufeta peru tu vindacha me. Hacuaha cuanitjin hindë ne cуетjucun maestru xindacha xi xinchajñi me ngajñi nuju. Me xi cuacun vë ne, tsingusehenhna me cjuanchacun ndacha. Hisca tsitjungui me Nai naja xi cavaxëtje rë me. Vëhë xi nguñhusasa cuechutaha rë me castigu xi satë rë me. <sup>2</sup> Ngajan xi tjemu cjin xuta cuisehen cojo me ndiya tsehan vëhë, hacuaha ngatsë rë me ne, choho cuichja yahnga xuta tsëhë ndiya rë cjuaquixi xi cjuccojo naja xcun Nina. <sup>3</sup> Maestru xi cuacun ne, jercu sahmi me cojo tujün. Vëhë xi cuaxë me tsujon cojo cjuandacha xi ndaja nuhya rë. Peru me xi cuacun ne, hisca hatsëë ne tacunvasen castigu xi cuechutaha rë me, tacun cuaha hatuxa maji cуетjutje me tsëhë.

<sup>4</sup> Cahyun ni ta Nina ne catsinchataain me ángel hya xi casahmi ángel cjuatsehan, ta cacandiya me catsihñu me cojo cadena hiscan jñu cojo sa xi siucuaha hisca cuechutaha nixtin xi sahmi cuenda me tsëhë. <sup>5</sup> Hacuanitjin ne, catsinchataain Nina xuta ngasunhndë hatsëë nixtin ta hisca catsingatju me ngu tsi cjuarcun xi catsicjë rë ngayëjë ni xuta tsehan jan. Cavetjutje me ngu tu tu xihin xi hmí rë Noé, ngu xihin xi casua camachaya rë xuta tsëhë ndiya rë cjuaquixi. Hacuaha yatu sa xuta cavetjutje me hya. <sup>6</sup> Hacuanitjin ne, casahmi Nina xi cavetsunya nandya Sodoma cojo nandya Gomorra, cavaca me ne hisca xi camá suva ndesu sa rë. Vëhë camá sacuaha ngu ejemplu xi chja xi cuatjin cuatju yëjë ni xuta xi sahmi me cjuatsehan. <sup>7</sup> Peru hya ne, cavaxëtjeñi Nina ngu cha xi tyjahi cjuatacun rë xi hmí rë Lot, cha vëhë ne jemu choho má rë xahasen rë cha tsëhë yëjë ni cjuatsehan xi casahmi xuta nandya jan.

<sup>8</sup> Jemu camá rë cha jan cjuaxti ta, tyjahi cjuatacun rë cha hane nchunchujun ni cavutsejen cha cavihndë cha xcusun tsehan xi casahmi xuta ta tsëhë xi cha vëhë jan ne, jiyajñi cha ngajñi rë me. <sup>9</sup> Cuatjin tsejen ta Nina ne, ma vaxëtjeñi me xuta tyjahi tsëhë cjuañihí hacuaha ma viyujvasen me xuta tsehan nguñhma castigu rë me xi cueñaya me hisca xi cuechutaha nixtin xi cumacuenda tsëhë me. <sup>10</sup> Quixi jain ta xuta xi sahmi me cjuatsehan xi fehya yojo jyë rë me hacuaha xuta xi tsitjungui me xi tjin rë Nai naja derechu xi vitexa me ne, xuta vëhë ne, viyujvasen me nguñhma castigu. Me xi cuacun jan ne, jemu hñu jni rë me, sehñu me cojo cjuatacun rë me hane tsacjuuin me xi choho cuichja me tsëhë ángel xi siu cojo Nina. <sup>11</sup> Peru ha ndasa sa xi ángel ne hitsë sa hñu cjuame me xi cumá rë me xi cuacun jan, hacjahi xcusun sahmi ángel ta vetjiincacun cuinchajyë xcun Nai naja.

<sup>12</sup> Xuta tsehan xi cuacun vë ne, jemu chu me, ta ngu chu ne, cjuatacun rë chu xi vitexa ru, hacuñin tsingatahacun chu. Hacuaha siu chu cojo sa xi chjaha ru sehe cueya chu, hane cuatjin cumachjirëhë chu. Cuanitjin ne xuta jan choho chja me tsëhë yëjë ni xcusun xi vijniircu me ta, tsingataaincacun me hacuaha sacuatjin catsijehnduya me cjuatacun hacuaha cjuë cjuehndu me suva me tangun me cojo ngu chu. <sup>13</sup> Cuatjin cuatju me ngu cjuañihí sacuaha casahmi me xi cavatju ñihí xuta. Xi má rë me ne, tjemu tjin rë me cjuasua xi tisahmi me ha tu cutjin ni xi masua rë xahasen rë me hora hya. Nguyëjë rë xi tichinu tangun tsëhë suhi xi tjin nuju ne, me xi cuacun vëhë ne, ngu cjuasava me, ngu xcuehyu hinchajñi me cojo nuju xi tisua me cjuasua yojo rë me cojo ngu cjuandacha.

<sup>14</sup> Xi tu scutsejen ni me jan ngu chjuun ne, hachu cuehya ran xahasen rë me. Fendaain rë me xi sahmi me cjuatsehan. Tsitsehan me xuta xi ndaya cacun. Yëjë fehya rë xahasen rë me ta cuatjin camanga rë. Ha tjinchihin xujun jyë rë me xcun Nina. <sup>15</sup> Cachaja me ndiya ta, tsëhë xi cavetjuxin me tsëhë ndiya quixi rë Nina. Cafayangui me xcusun xi casahmi Balaam quihndi rë cha Beor. Cha vë ne, jercu casahmi cha cojo tujün, hisca meje rë cha chji rë cjuatsehan. <sup>16</sup> Hacuaha Nina casahmi me xi ngu chu burra xi majin tsingatahacun chu cojo cjuatacun ru, pero cojo xta rë xuta cachjataha chu cha jan hane casuaain chu cahndë xi cju sa cha cojo cjuasca rë cha.

<sup>17</sup> Maestru jan ne, machjiriin cjuame rë me. Tangun me cojo ngu ndava nandá xi quixíya, hacuaha tangun me cojo yuffi xi ficojo rë tjojne. Nina tjin ndaja rë me ngu cahndë xi cuisehan me hiscan xi jñu cjin ni. <sup>18</sup> Maestru jan ne, jindayatë me cjuame sahmi yehe me xi ndastu venguichji rë. Hacuaha tsingascaya rë me cjuatacun rë jingu sa xuta xi cuma meje rë me cjuatsehan xi fehya yojo rë me. Xuta jan ne, sehe tisahmi me ngahñu xi tivetjutje me tsëhë ngajñi rë xuta xi hinchá ndiya rë cjuandacha. <sup>19</sup> Chja ndacha maestru xi cuacun ta cuma ndaya xuta jan tsëhë cjuame xi vitexa ley, cuatjin chja me. Peru suva ni me ne, cjëë cuma ndaya me tsëhë cjuatsehan. Hane jima ngu ngayaan ne, ha tu jarë ni xi scaa rë tsinguijne naja ne, vëhë scaa rë cuitexa naja tsihñu cjuatacun naja. <sup>20</sup> Cuatjin ne, xuta xi ha vëë me yo xi Nai naja Jesucristu xi vaxëtje naja hane yo xi cavetjuxin me tsëhë yëjë ni ngu cjuatsehan tsëhë ngasunhndë ne, sa xi tsingatihin me xi cuixuya nga me ngajñi cjuatsehan jan ngu ndiya nga ne, hane cjuatsehan jan scaa rë cuitexa rë me ne, hitsë sa sahmi yehe me jyë rë me xi cuma rë titjun. <sup>21</sup> Hya hitsë sa ndatjin tsëhë me sa xi camachayiin rë me ndiya quixi jan tsëhë xi cuma rë xi titjun quiji ndaja me ne, peru sehe catsismicacun me tsëhë cjuame ndajyihí rë Nina xi cafahatsja me. <sup>22</sup> Hya xi cuatjin sahmi xuta ne, ngajan tsejan xi

quixi jain cjua xi chja cuitjin: “Naña xi cavesu rē chu ne, vuya jinē chu tsēhē chu hane chu chinga xi sehe tu cafē catsinduya me chu ne, vuya vinduyachajo chu ngajñi ndasi.”

### 3

#### *Handajasa vindeya rē Nai naja, peru cuiduva me*

<sup>1</sup> Vihi má jo carta xi tsihindú nuju, ngayujun ni xingueen. Catsijo carta vi ne, yaha conseju xi ha hyun peru xi meje ná xi tsingascaya rē cjuatacun nuju cojo. <sup>2</sup> Ninguitsjun tsēhē cjua xi hatsēē cachja profeta rē Nina, hacuaha ninguitsjun tsēhē cjua xi cachja Nai naja xi vaxētje naja, cjua jan xi apóstol cavicuya nuju.

<sup>3</sup> Hacuaha hatuxa nihñucueendun tsēhē cjua vihi: nixtin ngascan rē ngasunhdē ne, hya cumatsejen xuta xi sahmi me cjuatsehen tu cutjin cuehya rē yojo rē me. Me vēhē ne, cuejnuccē me <sup>4</sup> cuinenguise me cuitjin: “¿Jani tsejen Cristu? ta, tacunvasen cuaha cjua xi cuinduva nga me. Peru cafē cahme xuta changá naja ne, hane ha nduva ni chuya xi nduva, cuanitjin sacuahatjin camá hisca xi casahasen ngasunhdē.” Cuatjin chja me. <sup>5</sup> Peru quixiin cjua xi chja me ta, hatuxa mijí cjuahacuenda me tsēhē xcusun xi cama vi: cojo cjua xi cachja Nina ne, ngasunhdē ne, ha tacun cuaha hisca hatsēē nixtin. Nangui ne, camatangun ngajñi nandá, hacuaha nandá ni ne, casua ngahñu rē ngasunhdē. <sup>6</sup> Sehe hacuaha nandá vēhē ni ne, catsinguetsun rē hya xi casesuntē nandá ngasunhdē nixtin vē. <sup>7</sup> Hindē ne hacuaha cojo cjua rē Nina jan ne, ngahnga cojo nangui xi tsejen quihndē ne, ha tetjo cuaha rē Nina peru cojo cjua vēhē ni ne, sehe cueti cojo ndihi. Ndihi vēhē ne cuaca rē hya xi cjuaháchuva Nina yējē ni xuta tsehen nixtin xi cjuēya me xi cuma rē Nina.

<sup>8</sup> Peru ngayun xingueen, chjuhuncueendun tsēhē cjuaquixi vi: xi má rē Nai naja ne, ngu nixtin ne, tangun ni nduju sacuaha ngu mil nu, hane xi ngu mil nu ne, tangun chuya sacuaha ngu nixtin. <sup>9</sup> Handasa xi ma tsingatahacacun xuta xi jemu tivindeya rē Nina xi cuma chihin cjua xi cachja me ne, peru quixiin vē. Nina ne, ta tsijyēcacun me cojo nuju, tisua sa nuju cahndē cojo sa xi tsajin hisca ngu xuta xi chaja me ta, meje rē me xi yējē ni xuta ne, tsindeya me cjuatacun rē me hane cuisehen me ndiya ndajyihi.

<sup>10</sup> Peru xi cuechun nixtin xi cuinduva Nai naja ne, ha sacutsja rē cjuēhe me sacuaha xi cjuēhe ngu chējē xi má nguixun. Sehe ngajan cumá xi ngahnga ne, cuetsunya cojo ngu chircun xi tjercu cjuaneya camahani, hane yējē xcusun xi camá cojo ne, cjuēya tundecjaya cojo ndihi. Hacuaha nangui ne, cjuē cueti cojo yējē xcusun xi tjin rē. <sup>11</sup> Tsēhē xi quixi jain xi hatuxa cuatjin cjuē cuetsunya yējē xcusun vē ni, ngajan xi sahmi nguujyē xi ngayun ne, ndandaja nihñu ngayun hacuaha tyjahi cjuatacun nuju. <sup>12</sup> Nechunyun rē nixtin xi cuinduva Nina hane nihñu xati tacun xi xati cumá cjuēhe. Nixtin vēhē ne, ngahnga ne cuetsunya cojo ndihi, hane yējē xcusun xi camá cojo ne, tundecjaya rē ne, cjuēya. <sup>13</sup> Peru ngayaan ne, nechayan rē cahndē xi cachja Nina xi cuiseen, ngu ngahnga xatsē, ngu nangui xatsē hiscan cuinechanchahnden cojo suva mé xi tsajin jyē rē.

<sup>14</sup> Vēhē xi ngayujun ni xingueen ne, jinguyējē rē xi nechunyun rē yējē ni xcusun vihi ne, nihñu nguñajatacun xi ndandaja nihñu cojo sa xi hya xi cuechutaha me yun ne, tyjahi cjuatacun nuju, tsajin xi cún nuju, hane hacuiin mé cjuachan tjin. <sup>15</sup> Ningatuhuntacun ngayun ta hindē xi titsijyēcacun Nai naja cojo naja ne xi jemu tafi me ne, vaxēcun rē xi xuta ne, cuetjutje me. Tangun ni chja Pablo xingueen ne, hane hacuanitjin catsihindu nuju tsēhē, sacuahatjin cjuatacun ndajyihi xi casua Nina me. <sup>16</sup> Ngajan xi xcun yējē ni carta xi catsihindu me ne, hacuaha chja me cojo nuju tsēhē yējē ni xcusun vihi, handasa hinchajñi yahnga cjua xi tjemu chja vijnercu. Xuta ngarca ne, xuta xi hacuiin nguñajacacun me ne, titsindeya me cjuatacun rē cjua jan xi chja vijnercu hane hacuaha tsindeya me cjuatacun rē yahnga xujun rē Nina. Xi cuatjin sahmi me ne, tivangui me suva me jyē rē me.

<sup>17</sup> Ngajan xi ngayun, xingueen, hangu ta hya xi chaja sa cumá ne ha camachaya nuju tsēhē cjuacjintacun vihi, nechun cuidadu tsēhē. Sehe ngajan hacuiin mahinda tacun cojo cjuandacha tsēhē xuta tsehen ta sehñu cuaha cojo cjuatacun quixi. <sup>18</sup> Peru catamajyē sa tsujun cjuandaja rē Nina hacuaha catuxaha sa cjuatacun xi tjin nuju tsēhē Nai naja Jesucristu, me xi vaxētje naja. Catama jyē catama hnga me yējē nu yējē nixtin. Cuatjin jain.



## Xujun titjun, xi catsihindu San Juan

### *Cumangutacun ta Jesús camá me Quihndi rë Xuta*

<sup>1</sup> Tihín cumachaya nuju ngujo cjuatsehë Jesucristu, me xi sua cjuahñu xatsë. Me vëhë xi ha tacun me hisca xi casahen ngasunhdë. Canuhyin cjuatsehë xi cachja me. Cahyin yëjë ni hacutjin xi casahmi me. Hisca casatë ntsin me. <sup>2</sup> Me xi sua cjuahñu jan ne, camatsejen me. Hane ngayin ne, cahyin me. Vëhë xi titihín cjuaquixi niiji, xi titihín tijimachaya nuju ta me vëhë ne, tsajin nu tsajin nixtin xi cavetsihin cjuahñu rë me, hacuaha tsajin nu tsajin nixtin xi cuijnetaha cjuahñu rë me. Ha tacun me ngajan cojo Nahmi rë me ne, peru canduva me nguëhe, cama tsejen me ngajñi niiji. <sup>3</sup> Vëhë xi titihín tijimachaya nuju cjuatsehë xi canuhyin cojo xcusun xi cahyin, sehe ngajan xi cuma tangun cjuatacun nuju cojo Nina sacuatjin tjin tangun cjuatacun niiji cojo Nina Nahmi naja cojo Jesucristu, Quihndi rë me. <sup>4</sup> Vëhë xi cuijnetahin tangun nuju, cojo sa xi jemu ndaja cuma rë xahasen niiji.

### *Xi cuanguen nduju cojo Nina ne, má sacuaha casua hasen rë cjuatacun naja*

<sup>5</sup> Cjuatsehë xi cachja Jesucristu cojo niiji ne, cuijnetahin fi: Nina ne, hatuxa tjemu ndaja me. Tsajin camahani cjuatsehë hiscan tacun me. Hane ha cjuatsehë ni xi tinújin cojo nuju. <sup>6</sup> Sa xi cuijnetahin xi tjin tangun cjuatacun naja cojo Nina hya xi tinihña cjuatsehë ne, tu vindachan ni ta, cjuatsehë xi tinihña ne, chuyiin rë Nina tsëhë. <sup>7</sup> Peru sa xi nechan ngajñi rë cjuandaja, sacuatjin rë Nina xi hatuxa tacun me ngajñi rë cjuandaja ne, cuatjin xi cuma tangun cjuatacun naja. Hacuaha cuatjin xi cjuengui xahasen naja tsëhë yëjë ni jyë naja, ngatsë rë xi cahme Jesús, Quihndi rë Nina.

### *Sa xi cuijnetahin cojo Nina ne, cumanchataha jyë naja*

<sup>8</sup> Sa xi cuijnetahin xi tsajin jyë naja ne, tu cuindachan suvaan ni rë yojo naja ta, quixiin xi náj. <sup>9</sup> Peru sa xi cuijnetahin jyë naja cojo Nina ne, tsinchataha naja me, hacuaha cuaxëxin me yëjë ni cjuatsehë xi hinchaxahasen naja. Cuatjin sahmi me ta tjercu ndaja me. Yëjë ni cjuatsehë xi chja me ne, hatuxa sahmi chihin me. <sup>10</sup> Sa xi cuijnetahin xi hisca ngu cjuatsehë cjëë camahani nihña ne, tangun vëhë cojo xi cuijnetahin xi Nina ne, jemu ndacha me xi chja me xi tjin jyë naja, hacuaha cuatjin cumatsejen xi cjuatsehë rë Nina ne, cavisiin camahani ngajñi rë cjuatacun naja.

## 2

### *Cristu, me xi chjatje ngatsë naja*

<sup>1</sup> Titsihindu nuju yëjë ni cjuatsehë xi vihi tsan ta, tsëhë xi cjuatsehë vihi ne, cuicuya nuju xi hacuiin nihña cjuatsehë. Peru sa xi tjin yo yaan xi nihña ngu cjuatsehë ne, hacuaha tjin naja ngu me xi cuichjatje ngatsë naja xcun Nahmi naja. Me vëhë ne, hacui Jesucristu, me xi hatuxa tyjahi. <sup>2</sup> Hacuaha me vëhë ne, cavechjitje me tsëhë yëjë ni jyë naja. Peru hacuiin tu suvá ni jyë naja ta hacuaha cojo jyë rë yëjë sa xuta.

<sup>3</sup> Sa xi nihña jain hacutjin xi vitexa Nina ne, ngajan matsejen xi cjuaquixi xi xuta rë me ngayaan. <sup>4</sup> Peru sa xi cuijnetahin xi hatuxa xuta rë Nina ngayaan hya xi miji nihña hacutjin vitexa me ne, tjercu ndacha yaan ta quixiin xi náj. <sup>5</sup> Peru hya xi nihña jain hacutjin xi vitexa me ne, hya matsejen xi nihmutacun jain me. Sa cuatjin ne, hyan ta tjin tangun cjuatacun naja cojo me. <sup>6</sup> Sa xi cuijnetahin xi tjin tangun cjuatacun naja cojo me ne, meje rë xi nechan ngajñi rë cjuandaja sacuatjin cavejña Jesucristu.

### *Cjuatacun xatsë*

<sup>7</sup> Cjuatsehë xi titsihindu nuju vihi tsan ne, hacuiin ngu cjuatacun xatsë xi sehe tivitéxa nuju xi nihmutacun xingueen ta, ha hacui ni cjuatacun xi cavitéxa nuju hya xi tjun tjun camacjain nuju. <sup>8</sup> Peru cjuatacun xi titsihindu nuju vihi ne, cuma cuijnetahin xi sacuaha ngu cjuatacun xatsë ta, hiscan xi ha cavechu cjuatacun jan ne, tivetsihin tisahmi xuta cjuandaja. Hane vëhë sahmi xi tivetsihin tifë cjuatsehë xi tjercu tjin ngasunhdë. Jesucristu ne, casahmi jain me yëjë ni hacutjin xi vitexa cjuatacun xatsë vihi, hacuaha ngayujun ni ne, tinihña hacutjin vitexa cjuatacun xatsë jan. <sup>9</sup> Sa xi cuijnetahin xi nechan ngajñi rë cjuandaja, hya xi choho hyan xingueen ne, quixiin xi náj ta nechancuaan ngajñi rë cjuatsehë. <sup>10</sup> Peru sa xi hmutacun xingueen ne, cuatjin matsejen xi nechan ngajñi rë cjuandaja. Hane tsajin mé nihña xi sahmi xi cuixuya xingueen ngajñi rë cjuatsehë jan. <sup>11</sup> Peru sa xi choho hyan xingueen ne, nechan ngajñi rë cjuatsehë, hacuaha sacuiyiin naja hacutjin ndatjin nihña ta tsëhë xi cjuatsehë xi tinihña ne, sahmi jñu tsajan.

<sup>12</sup> Ngayujun ni tsan ne, tsihindu nuju ta, jyë nuju ne, ha camanchataha ngatsë rë Jesucristu. <sup>13</sup> Ngayujun ni xi xuta changá yun ne, tsihindu nuju ta, tsëhë xi ha hyan me

xi ha tacun hisca xi casahasen ngasunhndë. Hane ngayujun ni xi cjëë cuma changá yun ne, hacuaha tsihindu nuju ta ha cacaa nuju cojo xitsehen má titjun.

<sup>14</sup> Ngayujun ni tsan ne, tsihindu nuju ta ha hyun Nina Nahmi naja. Ngayujun ni xi xuta changá yun ne, tsihindu nuju ta ha hyun me xi ha tacun hisca xi casahasen ngasunhndë. Hane ngayujun ni xi hacuiin changá yun ne, hacuaha tsihindu nuju ta nechun nguñajatacún xi macjain nuju cjua rë Nina, cjua xi quichuhun cahntsua xahasen nuju, hacuaha cacaa nuju cojo xitsehen ma titjun.

<sup>15</sup> Mijí rë xi chuya naja cjuatacun xi tjin ngasunhndë ta, sa xi chuya naja ne, cumaji nihmutacun Nina Nahmi naja. <sup>16</sup> Cuatjin ta, tsëhë xi yëjë ni cjuatacun xi tjin ngasunhndë vihi, sacuaa cjuatacun tsehen xi ningatahantacun, sacuaa cjuatacun xi tjercu meje naja yëjë ni xcusun xi chutsejen, sacuaa cjuatacun xi tjercu nihña yehe yojo naja ne, yëjë ni cjuatacun xi cuacun vëhë ne, hacuiin nduva tsëhë Nina Nahmi naja ta nduva tsëhë suvá ngasunhndë vihi. <sup>17</sup> Hane xcusun rë ngasunhndë vihi ne, cojo yëjë ni cjuatacun xi tjercu chuya rë xuta ne, cjuëya. Peru xuta xi sahmi jain me hacutjin meje rë Nina ne, me vëhë ne, tsajin nu tsajin nixtin cjuëya me.

### *Cjuaquixi cojo cjuandesu*

<sup>18</sup> Ngayujun ni tsan ne, ha tijima tiña nixtin xi cjuë ngasunhndë. Ha canuhyun ta cuinduva xu ngu cha xi sahmi condra tsëhë Cristu. Peru quihndë ne, tjemu cjin xuta xi ha tijimatsejen xi condra tsëhë Cristu me. Hane vëhë xi ha hyin ta cama tiña nixtin xi cjuë ngasunhndë. <sup>19</sup> Xuta xi cuacun jan ne, cavetjuxin me tsajan. Peru hatuxa hacuiin ladu naja me ta, sa xi quixi xi ladu naja me ne, caviyuju me ngajñi naja. Peru cavetjuxin me tsajan, cojo sa xi cuma tsejen ta hacuiin ladu naja me.

<sup>20</sup> Ngayujun ni ne, casua nuju Jesucristu Hasen xi tsëhë Nina. Vëhë xi vijnercun cjua xi cjuaquixi. <sup>21</sup> Hacuiin tsiingatahacacun xi vijniircun cjua xi cjuaquixi ta ha hvë xi vijnercun. Hacuaa hyun ta cjuandacha ne, hatuxa sacuiin naja ngajñi rë cjua xi cjuaquixi. Vëhë xi cuitjin tsihindu nuju cjua vihi.

<sup>22</sup> Tjin xuta xi chja xi Jesús ne, hacuiin Cristu me, hacuiin me xi cavaxijin Nina xi cuaxëtje naja. Hane xuta xi cuatjin chja me ne, hatuxa tjemu ndacha me. Hacuaa xuta xi tsitjungui me Nahmi naja xi tacun ngahnga cojo Quihndi rë ne, me vëhë xi sahmi condra tsëhë Cristu. <sup>23</sup> Yëjë ni xuta xi tsitjungui Quihndi rë Nina jan ne, tsajin tjin tangun cjuatacun rë me cojo Nahmi rë Quihndi jan. Peru xuta xi macjain rë Quihndi jan ne, hacuaa tjin tangun cjuatacun rë me cojo Nahmi jan.

<sup>24</sup> Ninguitsjun yëjë ni cjua xi canuhyun hisca nixtin hya xi tjun tjun camacjain nuju. Sa xi quichuhun cjua jan cahntsua xahasen nuju ne, hacuatjin tjin tangun cjuatacun nuju cojo Quihndi cojo Nahmi rë. <sup>25</sup> Hacuaa cachja Cristu xi sua naja me ngu cjuahñu xatsë.

<sup>26</sup> Cuitjin tsihindu nuju ta, tsëhë xi tjin xuta xi meje cuindacha nuju me. <sup>27</sup> Peru ngayun ne, Hasen xi tsëhë Nina xi casua Cristu ngayun ne, quichuhun cahntsua xahasen nuju. Vëhë xi hacuiin sahmi ngujyë xi cuinduva xuta cuicuya nuju me ta, tsëhë xi Hasen xi casua me jan ne, tivicuya nuju yëjë ni cjua. Hane cjua xi tivicuya nuju ne, hatuxa cjuaquixi, hacuiin cjuandacha. Quihndë ne, cuatjin tangunndujun cojo xi ha macjain nuju Jesucristu, sacuatjin xi ha cavicuya nuju Hasen xi tsëhë Nina jan.

<sup>28</sup> Quihndë tsan ne, cúa cuichjá cojo nuju ta tangun nduju cojo xi ha macjain nuju Jesucristu, sehe ngajan xi nixtin xi cuinduva nga me ne, ngayaan ne, hacuiin rcun cuma, hacuaa hacuiin tsisava naja me. <sup>29</sup> Ha hyan ta Cristu ne, hatuxa tyjahi naja. Vëhë xi cumangutacun ta yëjë ni xuta ndaja xuta tyjahi ne, me vëhë xi ha camá me quihndi rë Nina.

## 3

### *Me xi tsin ngatsë rë Hasen rë Nina ne, sacu rë me cjuahñu xatsë*

<sup>1</sup> Tjercu tsihmucacun naja Nina Nahmi naja. Hisca chja me xi quihndi rë me ngayaan. Peru hacuiin tu suvá chja ni me ta cjuaquixi jain xi quihndi rë me ngayaan. Peru xuta tsehen ne, hvíin me xi quihndi rë Nina ngayaan ta, tsëhë xi hacuiin xuta rë Nina me. <sup>2</sup> Ngayaan tsan ne, quihndë ne, quihndi rë Nina ngayaan. Peru cjëë cumachaya naja mé xcusun xuta cuma ngayaan xi cuma ngascan. Peru ha hyan ta, hya xi cuinduva Cristu ne, cuma ngayaan sacuaa me vëhë ta, tsëhë xi hya ne, chan jain me hacutjin xi jyihi me. <sup>3</sup> Yëjë ni xuta xi tivetahacacun me Cristu ne, sahmi tyjahi suvá me xahasen rë me, sacuatjin tyjahi xahasen rë Cristu.

<sup>4</sup> Peru yëjë ni xuta xi hinchajñi ngajñi rë cjuatsehen ne, hatuxa hndiin me tsëhë cjua xi cavitexa Nina. Ta xi hacuiin nuhyaan tsëhë cjua xi cavitexa Nina ne, vëhë xi hmí cjuatsehen. <sup>5</sup> Peru ha hyun ta Cristu ne, canduva me ngeuhe ngasunhndë, xi cjuahaxin me yëjë ni jyë naja. Hane me vëhë ne, hatuxa tsajin camahani jyë rë me. <sup>6</sup> Vëhë xi yëjë ni xuta xi cjuí nduju me cojo xi macjain rë me Jesucristu ne, ha quihndë tsajin hinchajñi me

ngajñi rë cjuatsehen. Peru yějë ni xuta xi hinchajñi cuaha me ngajñi rë cjuatsehen ne, me vëhë xi hatuxa cavijniircu me hacutjin cjuatacun rë Jesucristu, hacuaha hacuiin xuta rë Jesucristu me.

<sup>7</sup> Ngayujun ni tsan ne, nechun cuidadu xi tsajin yo cuindacha nuju. Xuta xi hatuxa hinchajñi me ngajñi rë cjuandaja ne, me vëhë xi tyjahi xahasen rë me, sacuatjin tyjahi xahasen rë Cristu. <sup>8</sup> Peru xuta xi hatuxa hinchajñi me ngajñi rë cjuatsehen ne, tsëhë xitsehen matitjun me ta, tsëhë xi xitsehen matitjun jan ne, hatuxa hisca ntsacu cavetsihin ne, sahmi cjuatsehen. Vëhë xi canduva Quihndi rë Nina ta, tsëhë xi meje tsicjëya me yějë ni cjuatsehen xi sahmi xitsehen matitjun jan.

<sup>9</sup> Xuta xi camá me quihndi rë Nina ne, tsajin hinchajñi me ngajñi rë cjuatsehen ta, tsëhë xi yaha me cjuatacun rë Nina. Hatuxa cumaji xinchajñi me ngajñi rë cjuatsehen ta, tsëhë xi quihndi rë Nina me. <sup>10</sup> Suvá tsejen yo xi quihndi rë Nina, hacuaha suvá tsejen yo xi quihndi rë xitsehen. Ta tu yo ni xi tsajin hinchajñi ngajñi rë cjuandaja, tu yo ni xi tsihmaaicacun xicjin ne, hacuiin quihndi rë Nina.

#### *Nihmu tacun xinguen xingu xingu yaan*

<sup>11</sup> Cjua rë Nina xi canuhyun hisca ntsacu cavetsihin ne, cuitjin chja: meje rë xi nihmutacun xingueen. <sup>12</sup> Mijí rë xi nihña sacuatjin casahmi cha Caín ta cha vëhë ne, quihndi rë xitsehen cha, hacuaha catsiquehen cha hntsë cha. Peru ¿há hyun mé ngatsë rë xi cuatjin catsiquehen cha hntsë cha ni? Catsiquehen cha hntsë cha ngatsë rë cjuaxin ta, tsëhë xi yějë ni xi casahmi cha ne, hatuxa suvá cjuatsehen, hane xi casahmi hntsë cha ne, hatuxa suvá cjuandaja.

<sup>13</sup> Vëhë xi hacuiin cjuercun nuju tsan, hya xi choho scuëë nuju xuta tsehen. <sup>14</sup> Ngayaan ne, nihmutacun xingueen. Hane cuatjin matsejen xi ha cavetjuxen tsëhë ngajñi rë cjuatsehen, caviseen ndiya rë cjuandaja. Peru yo xi tsihmaaicacun xicjin ne, hincha cuaha ngajñi rë cjuatsehen. <sup>15</sup> Yějë ni xuta xi choho vëë xicjin ne, tangun me cojo xuta xi tsiquehen xicjin. Hane ha hyun ta, yějë ni xuta xi tsiquehen xicjin ne, tsajin rë me cjuahñu xatsë. <sup>16</sup> Cristu ne, ngatsë rë xi tsihmucacun naja me ne, joho ni rë me xi catsiquehen xuta me. Cuatjin camatsejen xi hmí cjuahmutacun. Hane hacuatjin ngayaan ne, meje rë xi ningatehen xi tsiquehen naja xuta, sa xi cuatjin mameje rë, ngatsë rë xi nihmutacun xingueen. <sup>17</sup> Ngayaan xi tjin chinë tjin hyun ne, sa xi tsajin naja cjuayumatacun hya xi ma chaya naja xi tjin ngu xingueen xi tsajin mé sinë me tsajin mé cuihi me ne, cuatjin matsejen ta tsajin camahani cjuahmutacun rë Nina cahntsua xahasen naja. <sup>18</sup> Mijí rë xi tu cuinújan ni xi nihmutacun xingueen tsan ta meje rë xi nihña cjuandaja, cojo sa xi cumatsejen xi tjin jain naja cjuahmutacun cojo xingueen.

<sup>19</sup> Sa xi cuatjin nihña ne, vëhë matsejen xi tsëhë Nina xi cjuaquixi jain ngayaan, hacuaha vëhë xi cumangutacun tu ya ni ni hya xi chjahyan rë me cjuandaja rë me. <sup>20</sup> Hane ha ndasa xahasen naja cuinchajyë naja xcun Nina xi choho nihña ne, peru mijí rë xi cumacjintacun ta, tsëhë xi Nina ne, hitsë sa jyë me cojo cjuatacun rë me xi cumá rë xahasen naja ta, tsëhë xi me vëhë ne, vëë me yějë ni cjuatacun. <sup>21</sup> Ngajan xi sa xi tsajin mé cuinchajyë naja xahasen naja ne, hacuiin cumacjintacun hya xi chjahyan rë me cjuandaja rë me. <sup>22</sup> Hane me vehe ne, sua naja me yějë ni xi chjahyan rë me ta, tsëhë xi tinihña yějë ni hacutjin xi cavitexa me, hacuaha tsëhë xi yějë ni xi chuya rë me ne, cuatjin tinihña. <sup>23</sup> Cjua xi cavitexa naja Nina ne, cuitjin chja: meje rë me xi catamacjain naja Jesucristu, Quihndi rë me, hacuaha meje rë me xi nihmutacun xingueen. Cuatjin cavitexa me. <sup>24</sup> Hane yějë ni xuta xi vihndë cjua xi cavitexa Nina ne, tjin tangun cjuatacun rë me cojo Nina, hacuaha Nina ne, jiya cahntsua xahasen rë me. Ngayaan ne, hyan xi jiya Nina cahntsua xahasen naja ta, tsëhë xi casua naja me Hasen rë me.

## 4

#### *Chuva rë profeta ndacha*

<sup>1</sup> Ngayujun ni tsan ne, mijí rë xi ngutjen cumacjain nuju tsëhë yějë ni cjuatacun xi cuichja xuta cojo nuju ta titjun chjuhunchuvun cjuatacun jan, ¿há ma tangun cojo cjuatacun rë Nina? Cuatjin meje rë ta, tsëhë xi ngasunhdë ne, tjemu cjin xuta xi tivindacha me. Chja suvá me ta cjuatacun xi vicuya me ne, cjuatacun rë Nina, peru quixiin vë. <sup>2</sup> Peru sa xi ngu xuta cuichja quixi me ta Jesucristu ne, camá me ngu xuta ngasunhdë vihi ne, cumangutacún ta, ngajan matsejen xi me vëhë ne, chja jain me cjuatacun rë Nina. <sup>3</sup> Peru xuta xi hacuiin cuatjin chja quixi tsëhë Jesús ne, hatuxa tsajin camahani rë me cjuatacun rë Nina ta tjin rë me cjuatacun tsëhë xuta xi sahmi condra tsëhë Cristu. Ha canuhyun ta hatuxa cuechu nixtin xi cjehe ngu cjuatacun xi sahmi condra tsëhë Cristu, peru cuichjá cojo nuju ta cjuatacun vëhë ne, ha hisca hinchajñi ngajñi naja nguehe ngasunhdë. <sup>4</sup> Ngayujun ni tsan ne, tjin tangun cjuatacun nuju cojo Nina. Vëhë xi cacaa

nuju xi camacjaain nuju tsêhê xuta ndacha xi cuacun jan. Camá cacaa nuju cuatjin ta, tsêhê xi Nina xi jiya xahasen nuju ne, hitsê sa jyê me xi cuma rê xitsehen matitjun xi jiya xahasen rê xuta xi macjaain rê Jesucristu. <sup>5</sup> Xuta ndacha xi cuacun jan ne, hatuxa tjin rê me cjuatacun rê xuta xi macjaain rê Jesucristu. Vêhê xi cjuatacun xi vicuya me ne, cjuatacun rê xuta xi macjaain rê Jesucristu, hacuaha yêjê ni xuta xi macjaain rê Jesucristu ne, vetaharcu me cjuaja. <sup>6</sup> Peru ngayaan ne, tjin tangun cjuatacun naja cojo Nina. Yêjê ni xuta xi hacuaha tjin tangun cjuatacun rê me cojo Nina ne, vetaharcu me cjuaja xi vicuyan. Peru yêjê ni xuta xi tsajin tjin tangun cjuatacun rê me cojo Nina ne, vetaharcuaain me cjuaja xi vicuyan. Cuatjin xi ma sacuse naja yo xi chja cjuaquixi ne, o yo xi vindacha.

*Xuta xi tsêhê Nina ne, hacuaha tjin rê me cjuahmutacun xi nduva tsêhê Nina*

<sup>7</sup> Meje rê xi nihmutacun xingueen tsan ta, yêjê ni cjuahmutacun ne, hatuxa nduva tsêhê Nina. Yêjê ni xuta xi tjin rê me cjuahmutacun ne, quihndi rê Nina me, hacuaha amigu rê Nina me. <sup>8</sup> Peru me xi hacuiin tsihmucacun xicjin ne, hacuiin amigu rê Nina me ta, Nina ne, hatuxa tjin rê me cjuahmutacun. <sup>9</sup> Nina ne, ngu tutu ni Quihndi xi tjin rê me. Hane ngayaan ne, hyan ta Nina ne, tjin rê me cjuahmutacun cojo naja, tsêhê xi catsingatju me Quihndi rê me ngeuhe ngasunhndê. Cuatjin catsingatju me Quihndi rê me, cojo sa xi sacú naja cjuahñu xatsê ngatsê rê Quihndi jan. <sup>10</sup> Ngayaan ne, nihmutacun Nina. Peru Nina ne, hitsê sa tsihmucacun naja me. Vêhê xi hisca catsingatju me Quihndi rê me xi cuechjitje ngatsê rê yêjê ni jyê naja.

<sup>11</sup> Hane tsêhê xi cuatjin catsihmucacun naja Nina tsan ne, vêhê xi hacuaha meje rê xi nihmutacun xingueen. <sup>12</sup> Nina ne, hatuxa tsajin yo xi cavêê rê me. Peru sa xi nihmutacun xingueen ne, Nina ne, jiya me cahntsua xahasen naja, hane cuatjin matsejen xi tjin jain naja sacuaa cjuahmutacun xi tjin rê Nina.

<sup>13</sup> Ngayaan ne, hyan ta tjin tangun cjuatacun naja cojo Nina hacuaha hyan ta jiya me cahntsua xahasen naja, tsêhê xi casua naja me Hasen rê me. <sup>14</sup> Hane gayin ne, cahyin jain cojo tuxcuin Quihndi rê Nina. Vêhê xi tinújin cojo cjuaquixi ta Nina Nahmi naja ne, catsingatju me Quihndi rê me, xi cuaxêtje rê xuta ngasunhndê. <sup>15</sup> Tu yo ni xi chja cjuaquixi xi Jesús ne, Quihndi rê Nina jain me ne, me vêhê ne, jiya Nina cahntsua xahasen rê, hacuaha tjin tangun cjuatacun rê cojo Nina. <sup>16</sup> Ngayaan ne, macjain naja hacuaha ha hyan ta Nina ne, hmucacun jain me ngayaan. Nina ne, hatuxa tjin rê me cjuahmutacun. Hane xuta xi tjin rê cjuahmutacun ne, tjin tangun cjuatacun rê me cojo Nina, hacuaha Nina ne, jiya cahntsua xahasen rê me. <sup>17</sup> Hane hya xi cumachihin cjuahmutacun xi tjin naja ne, ngajan xi hacuiin rcun cuma, hya xi cuechutaha nixtin xi tsichuva naja Nina. Cuatjin ta, tsêhê xi ngeuhe ngasunhndê ne, hacuaha quihndi rê Nina ngayaan sacuatjin rê Jesucristu, xi Quihndi rê Nina me. <sup>18</sup> Hiscan xi tjin cjuahmutacun ne, tsajin mé chircon hinchajñi ta hya xi ha tjin chihin cjuahmutacun xi tjin naja ne, hisca hitsê ne, tsajin rcun cuma. Sa xi ningatahantacun xi Nina sahmi naja me castigu ne, vêhê xi rcun cuma. Peru sa xi cuatjin rcun cuma ne, ngajan matsejen xi tsajin tjin chihin cjuahmutacun xi tjin naja.

<sup>19</sup> Ngayaan ne, tjin naja cjuahmutacun ta, tsêhê xi Nina ne, tjun me catsihmucacun naja me. <sup>20</sup> Peru sa xi nújan xi nihmutacun Nina, hane choho hyan xingueen ne, tu vindachan ni xi nújan. Cuatjin ta, tsêhê xi sa xi hacuiin nihmutacun xingueen xi tsejen naja cojo tuxcun ne, hacuaha cumaji nihmutacun Nina xi cjêê camahani chaan me. <sup>21</sup> Nina ne, cavitexa naja me cjuaja vihi: yo xi tjin rê cjuahmutacun cojo Nina ne, hacuaha meje rê xi tjin rê cjuahmutacun cojo xicjin.

## 5

*Me xi má hya xi macjain naja Jesucristu*

<sup>1</sup> Jesús ne, hacui me xi Cristu, me xi cavaxijin Nina xi cuaxêtje naja. Hane ngayejen ni xi cuatjin macjain naja tsêhê cjuaja vêhê ne, quihndi rê Nina ngayaan. Yêjê ni xuta xi tsihmucacun me xi má xutacha rê ngu quihndi ne, hacuaha cojo quihndi jan tsihmucacun me. <sup>2</sup> Sa xi nihmutacun jain Nina hacuaha nihña sacuatjin xi cavitexa me ne, ngajan matsejen xi tjin naja cjuahmutacun cojo yêjê ni xuta xi quihndi rê Nina me. <sup>3</sup> Hacuaha sa xi chjahanrcun jain yêjê ni cjuaja xi cavitexa Nina ne, ngajan matsejen xi nihmutacun jain me. Hane yêjê ni cjuaja xi cavitexa me ne, hacuiin jercu chja xi nihña ta, <sup>4</sup> tsêhê xi yêjê ni xuta xi quihndi rê Nina ne, scaa rê me cojo yêjê ni cjuatsehen xi tjin ngeuhe ngasunhndê. Cuatjin caa naja cojo cjuatsehen jan ta, tsêhê xi macjain naja Jesucristu. <sup>5</sup> Hane súvá ni xuta xi macjain rê tsêhê Jesús xi Quihndi rê Nina jain me ne, me vêhê xi caa rê me cojo yêjê ni cjuatsehen xi tjin ngasunhndê.

*Hasen rê Nina ne, tsinguixi xi Jesús ne, hacui Quihndi rê Nina me*

<sup>6</sup> Hya xi canduva Jesucristu ne, camatsejen xi Quihndi rê Nina me nixtin xi cojo nandá caxtenda me cojo nixtin xi cavixu jni rê me hya xi cahme me. Peru hacuiin súvá ni nixtin

xi caxtenda ni me ta cojo nixtin xi cahme me ne, hya camatsejen xi Quihndi rë Nina me. Hasen xi tsëhë Nina ne, cuatjin tisua naja cjuaquixi ta, tsëhë xi Hasen jan ne, hatuxa cjuaquixi xi chja. <sup>7</sup> Siu jyan xcusun xi tisua machaya naja ta Jesús ne, Quihndi rë Nina jain me. <sup>8</sup> Ngu ne, cuatjin chja quixi Hasen xi tsëhë Nina. Ma jo ne, cuatjin camatsejen hya xi caxtenda Jesús. Ma jyan ne, hacuaha cuatjin cama tsejen hya xi cahme me. Hane catsijyan xcusun xi cuacun jan ne, tjin rë ngu ni cjuatacun. <sup>9</sup> Ngayaan ne, macjain naja tsëhë cjuaxi chja xuta cojo naja. Peru hitsë sa vengui chjí rë cjuaxi chja Nina. Hane Nina ne, casua me camachaya naja yo xi Quihndi rë me. <sup>10</sup> Xuta xi macjain rë me tsëhë Quihndi rë Nina ne, hatuxa vëë me cojo cjuatacun rë me ta quixi jain cjuaxi cachja Nina. Xuta xi macjaain rë me tsëhë cjuaxi cachja Nina ne, sacuaha xi cuichja me xi Nina ne, jemu ndacha me. Cuatjin chja me tsëhë Nina ta, tsëhë xi macjaain rë me tsëhë cjuaxi cachja quixi Nina, yo xi Quihndi rë me. <sup>11</sup> Hane Nina ne, cachja cjuahñu xatsë jan ngatsë rë Quihndi rë me. <sup>12</sup> Xuta xi tjin tangun cjuatacun rë me cojo Quihndi jan ne, tjin rë me cjuahñu xatsë vëhë. Peru xuta xi tsajin tjin tangun cjuatacun rë me cojo Quihndi rë Nina jan ne, hacuaha tsajin rë me cjuahñu xatsë jan.

*Conseju xi sua Juan xi cajnetaha*

<sup>13</sup> Vëhë xi cuitjin titsihindu nuju ngayujun ni xi macjain nuju tsëhë Quihndi rë Nina. Titsihindu nuju yëjë ni cjuaxi vihi, cojo sa xi cumangutacun ta quixi xi tjin jain nuju ngu cjuahñu xatsë xi tsajin nu tsajin nixtin xi cjuë. <sup>14</sup> Ngayaan ne, mangutacun jain cojo Nina ta, tsëhë xi ha hyan ta sa xi tjin tangun cjuatacun naja cojo rë me hora xi tichjahyan rë me ne, cuihndë me xi cuinújan. <sup>15</sup> Hane tsëhë xi hyan ta vihndë me yëjë ni cjuaxi nújan cojo rë me ne, vëhë xi hacuaha hyan ta sacú naja xi cachjahyan rë me.

<sup>16</sup> Yo ngayaan xi chutsejen xi tivixuya ngu xingueen ngajñi rë ngu cjuatsehen xi cuma cumanchataha ne, meje rë xi cuinújanyumatahan tsëhë me, hane cuatjin sacú rë me cjuahñu xatsë. Peru tjin cjuatsehen xi cumaji cumanchataha. Hane hacuiin tichjá cojo nuju xi cuinújunyumuntuhun tsëhë xuta xi tjin rë me jyë vëhë. <sup>17</sup> Yëjë ni cjuatsehen ne, Nina ne, chja me ta hatuxa jyë hmí rë. Peru tjin cjuatsehen xi cuma cumanchataha.

<sup>18</sup> Ngayaan ne, hyan ta yëjë ni xuta xi cjuaquixi xi quihndi rë Nina me ne, hatuxa tsajin hinchajñi me ngajñi rë cjuatsehen. Cuatjin ta, tsëhë xi Quihndi rë Nina ne, sahmi rë me cuidadu, hane xitsehen matitjun ne, cumaji mé sahmi cojo rë me.

<sup>19</sup> Ngayaan ne, ha hyan ta tsëhë Nina ngayaan. Hane yëjë sa xuta xi yahnga ne, tsëhë xitsehen má titjun me.

<sup>20</sup> Ngayaan ne, hacuaha hyan ta ha canduva Quihndi rë Nina. Hacuaha casua naja me cjuatacun, cojo sa xi cuijnercun yo xi Nina xi hatuxa cjuaquixi. Tjin tangun cjuatacun naja cojo me xi hatuxa cjuaquixi ta, tsëhë xi tjin tangun cjuatacun naja cojo Jesucristu, Quihndi rë me. Me vëhë xi Nina xi hatuxa cjuaquixi, hacuaha me vëhë xi sua naja cjuahñu xatsë xi tsajin nu tsajin nixtin xi cjuë.

<sup>21</sup> Ngayujun ni tsan ne, mijí camahani rë xi chjuhuncun nina xi hacuiin cjuaquixi.

## Xujun má jo, xi catsihindu San Juan

### *Cjuaquixi cojo cjuahmutacun*

<sup>1</sup> Ngahan, ngu xuta changá matitjun tséhë yungun ne, tsihindu nuju ngayun, ngu chjuun xi cavaxijin Nina. Hacuaha cojo yějë ni quihndi nuju ne, tsingátju nuju ngayujun ni ngu nina naha ta, tséhë xi tjemu hmú cáacun nuju cojo nguñaja cjuaquixi. Peru hacuun tu suva ni ngahan ta yějë ni me xi vëë jain me cjuaxi hatuxa cjuaquixi ne, hacuaha tsihmutacun nuju me. <sup>2</sup> Cuatjin nihmitacuin nuju, ngatsë rë cjuaquixi xi ha siu cahndë ngajñi rë cjuatacun naja. Hane cjuaquixi xi cuacun jan ne, tsajin nu tsajin nixtin xi cuetjuxin tsajan. <sup>3</sup> Nina nahmi naja cojo Jesucristu Quihndi rë me ne, hatuxa sua naja me cjuandaja cjuajeya cojo cjuayumatacun, cuatjin xi ma vanguen tjenguen cjuaxi cjuaquixi, hacuaha ma nihmutacun jain xingueen.

### *Cuanguennduju cojo cjuachacun rë Cristu*

<sup>4</sup> Tjemu ndaja camá rë xahasen naha ta, tséhë xi cavécutaha ngu jo quihndi nuju xi hatuxa hinchajñi me ngajñi rë cjuaquixi, sacuahatjin Nina Nahmi naja cavitexa naja me. <sup>5</sup> Quihndë ne, ngeuhe cuichjá cojo nuju tsan ta meje rë xi ngayejen ni ne, nihmutacun xingueen. Hane cjuaxi vihi xi tichjá cojo nuju ne, hacuun ngu cjuaxatsë xi sehe cavitexa naja Nina ta cjuaxi vihi ne, hacui xi tacun hisca hya xi sehe cavetseen camacjain naja cjuaxi rë Nina. <sup>6</sup> Hane sa xi nihña jain yějë ni cjuaxi cavitexa naja Nina ne, ngajan matsejen xi tjin jain naja cjuahmutacun. Hane cjuaxi cavitexa Nina ne, hacui vihi: meje rë xi nihmutacun xingueen. Hacuaha hacui cjuaxi vëhë xi camachaya nuju hisca hya xi sehe cavetsuhun camacjain nuju cjuaxi rë Nina.

### *Cjuaxi tanguin cojo cjuaxi rë Nina ne, má cjuaxi ndacha*

<sup>7</sup> Cuatjin chjá cojo nuju ta, tséhë xi ngasunhndë vihi ne, tjemu tjin xuta ndacha xi macjaan rë me xi Jesucristu ne, camá jain me ngu xuta ngasunhndë vihi. Xuta ndacha jan ne, hacui me xi vindacha, hacuaha hacui me xi má condra rë Cristu. <sup>8</sup> Tjin nuju cuidadu, sehe ngajan xi hacuun nichayun cjuandaja xi canihñi ngajñi nuju. Cahndë rë vëhë ne, sacú nuju yějë ni cjuatjo xi sua nuju Nina.

<sup>9</sup> Yějë ni xuta xi vatjutaha me tséhë cjuaxi cavicuya Cristu ne, tsajin tjin tangun cjuatacun rë me cojo Nina. Peru yějë ni xuta xi vetaharcu me suvá ni cjuaxi cavicuya Cristu jan ne, me vëhë ne, tjin tangun cjuatacun rë me cojo Nina Nahmi naja cojo Quihndi rë me. <sup>10</sup> Hya xi cjuehe ngu me xi cuichja xi vicuya me cjuaxi rë Nina, peru sa xi cuicuyaaan me cjuaxi cavicuya Cristu ne, xi catuun cahndë cuisehen me cueñña me ndya nuju. Hisca ngu nina cachjayunnguun tséhë me ta, <sup>11</sup> sa xi cuatjin tuhun rë me nina ne, sacuaaha xi ma tangun yun cojo cjuatsehen xi sahmi me.

### *Cjuaxi vijnetaha*

<sup>12</sup> Tjemu cjin sa cjuavisiajmi xi meje cuichjá cojo nuju ngayujun ni. Peru tsihinduun sa nuju sacuahatjin xcun ngu xujun vihi ta, tséhë xi hatuxa vejña xi cjuë tjëngë nuju, sehe cuinújan xcun cojo xcun, sehe ngajan xi tjemu ndaja cuma rë xahasen naja.

<sup>13</sup> Na tichjun, xi hacuaha cavaxijin Nina na ne, tsingátju quihndi rë na ngu nina tsujun.

## Xujun ma jyan, xi catsihindu San Juan

*Juan sua suva me nina rē me*

<sup>1</sup> Ngahan, ngu xuta changá matitjun tsēhē yungun ne, tsihindu ri ngaye Gayo, ta ngaye ne, tjemu vinga ná ngaye, tjemu hmú cáacun ri cojo nguñaja cjuaquixi.

<sup>2</sup> Catisecoo ri Nina, tsan, xi cuma cuihin xcun cojo yējē ni cjuandaja, hacuaha xi ndajyihí cjuahñu riji, sacuahatjin xi ha ndajyihí xahasen riji. <sup>3</sup> Tjemu ndaja camá rē xahasen naha ta, tsēhē xi jima ngu ndiya xi cafehe ngu ngu xingueen ne, tjemu ndaja cachja me tsiji. Ha tuxa chja me ta ngaye ne, nguñajatacuin hmi tjengui ndiya rē cjuaquixi. <sup>4</sup> Tjemu ndaja má camahani rē xahasen naha, hya xi machaya ná xi yējē ni xingueen xi sacuaa quihndi naha ne, cjui tjengui me ndiya rē cjuaquixi.

*Conseju xi cuma rē xinguen xi chja me cju rē Nina*

<sup>5</sup> Tjemu ndaja tinihñi, tsan, xi cuatjin tiviseeue rē jingu sa xingueen, hisca cojo sa xingueen xi hyiin yo jan ta, tsēhē xi cjín nandya nduva me. <sup>6</sup> Hane ngujo me xi cuacun vēhē ne, sehe cavuya cafehe nga me nguehe. Hane hya xi cama tangun ngayin yungun ne, cachja me cojo niji ngayijin ni xi tjemu tjin ri cjuahmutacun. Quihndē ne, tu jani hya ni xi cuatju nga me nandya riji ne, tjemu ndatjin xi cuiseeue rē me, cojo sa xi tsajin mé xi sahmi chaja rē me xi cuetju me cjue me ndiya ta, tsēhē xi cuatjin chuya rē Nina xi nihña. <sup>7</sup> Cuatjin meje rē xi nihña ta, tsēhē xi xuta xi cuacun jan ne, cavetju quiji me ngu nangui xi cuichja me cju rē Jesucristu. Hane hisca ngu hñú ngu tē ne, faain me tsēhē xuta xi macjaain rē Nina. <sup>8</sup> Vēhē xi ngayaan ne, meje rē xi cuatjin cuiseeue rē me xi cuacun jan ta, tsēhē xi cuatjin ne, hacuaha cuiseeue rē cju xi cjuaquixi.

*Diótrefes ne, choho chja cha tsēhē Juan*

<sup>9</sup> Ha catsihindu ngu xujun xi tsingátju rē xuta xi ma tangun ngajan yungun. Peru cha Diótrefes, xi tjemu meje sahmi tjun cha ngajñi rē me ne, handasa hacuaha xingueen cha, peru faharcuaain cha cju xi nújin. <sup>10</sup> Vēhē xi hya xi cjuēhē ndyá ne, cuichjáyē cojo nuju ngayujun ni yējē ni xcusun xi sahmi cha jan. Cuichjá quixé hacutjin choho chja cha tsijin. Hane manguaaíncacun cha cojo xi choho chja ni cha ta hacuaha tsitjungui cha ngu ngu xingueen xi nduva jingu sa nandya. Hane hya xi yahnga me xi meje sahmi me cjuandaja cojo xingueen xi cuacun nduva jan ne, mijí sua cha cahndé, hacuaha hisca mijí rē cha xi cuisehen nga me yungun.

<sup>11</sup> Xi canihñii cjuatsehen xi tisahmi yahnga xuta, tsan, ta tu tjin tisahmi xuta xi tisahmi cjuandaja ne, cuatjin meje rē xi nihñi. Xuta xi sahmi cjuandaja ne, tsēhē Nina me. Peru xuta xi sahmi cjuatsehen ne, hacuain amigu rē Nina me.

<sup>12</sup> Yējē ni xuta ne, ndaja chja me tsēhē cha Demetrio. Hacuaha suvá tsejen xi sahmi jain cha sacuaa tjin vitexa Nina. Hisca ngayin ne, ndaja nújin tsēhē cha. Hane ngaye ne, ha hye ta xi nújin ne, ha tuxa cjuaquixi.

*Cju xi vijnetaha*

<sup>13</sup> Tjemu tjin vasen sa xi meje cuichjá cojo ri, peru mijí cuichjá cojo ri sacuaa tjin xcun ngu xujun vihi. <sup>14</sup> Cahndé rē vēhē ne, tu tjenhñu ni ne, vejñá xi cjuē tjēngē ri, sehe cuisiajme xcun cojo xcun.

<sup>15</sup> Quihndē ne, tsingátju ngu nina tsiji, hacuaha yējē ni amigu riji ne, tsingátju me ngu nina tsiji. Nihñi favor ne, yējē ni amigu niji xi siutaha ndyá ne, tehe rē me ngu nina niji jima ngu jima ngu me.

## Carta tsèhë San Judas

*Judas ne, tichja me nina cojo yèjë ni xuta xi cavaxijin Nina*

<sup>1</sup> Ngahan Judas, xi mosu hndixahan rë Jesucristu, hacuaha xi hntse cha Jacobo ne, tsihindu xujun vihi xi tchutayun ngayujun ni xi cavaxijin nuju Nina Nahmi naja, tsèhë xi tjercu hmucacun me ngayun. Hane ngayujun ni xi camacjain nuju Jesucristu ne, Nina tisahmi cuidadu nuju me. <sup>2</sup> Yèjë ni cjuandaja cojo cjuajeya cojo cjuahmutacun tsèhë Nina ne, catamacjín sa ngajñi nuju.

*Xuta xi vicuya cjuandacha*

<sup>3</sup> Ngayujun ni tsan ne, casahme xati cacun xi tsihindu nuju tsèhë cjuandaja rë Nina xi cuaxètje naja. Peru quihndë ne, hacuaha sahmi nguyjë xi tsihindu nuju, cojo sa xi cuichjá cojo nuju xi cuinjuntjun ngatsë rë cjuachacun xi ha casua Nina ngayaan xi macjain naja me. <sup>4</sup> Tsèhë xi tjin xuta xi cavindacha xi caxinchajñi me ngajñi nuju. Peru hatsëë nixtin ne, camahindu xcun xujun rë Nina tsèhë castigu xi cuatju me cuma. Hatuxa xuta tsehen me, xi handasa tsejen sacuaha xi tjin rë me cjuandaja rë Nina naja ne, peru vatjutaha me yèjë ni cjuatsehen xi sahmi me, hacuaha tsitjungui me ngu ni Nai naja Jesucristu.

<sup>5</sup> Quihndë ne, handasa ha hyun cjuava vihi ne, cúa cuichjá cojo nuju hacutjin casahmi Nai naja. Ngu ne, xuta nangui Israel ne, handasa cavaxètje Nai naja me tsèhë nangui Egipto ne, peru cama ngascan ne, ngajñi rë xuta nangui Israel jan ne, hacuaha casahmi me castigu xuta xi camacjaan rë tsèhë me. <sup>6</sup> Ma jo ne, ángel xi caviyijin hiscan xi cachja Nai naja xi cuiyuju ta tu cavetjuxin tsèhë cahndë rë ne, cavinchahñu me hiscan jñu, hisca xi cuechutaha nixtin xi cuichja Nai naja mé castigu cuatju ángel jan cuma nu cjui nu nduva. <sup>7</sup> Hane xi ma jyan ne, xuta nandya xi hmí rë Sodoma cojo xuta nandya Gomorra cojo sa xuta xi siu tahndee rë jan ne, hacuanitjin ni cahndiin me tsèhë Nina. Tjercu casahmi me cjuatsehen xi tjin chjuunnahñu rë me. Hisca cavatjutaha sa me cjuatsehen ta ngajñi xihin ni me ne, casahmi me cjuatsehen sacuaha xi chjuunnahñu rë me xicjin me. Vèhë xi suvá sa cahndë rë nandya xi cuacun vèhë ne, siu cuaha xi ninguitsjen tsèhë castigu xi cavatju camá, xi café catí cojo ndihi rë Nina.

<sup>8</sup> Hacuanitjin ni tisahmi xuta tsehen xi hinchajñi ngajñi nuju jan ta, ngajñi rë cjuatacun rë me ne, tichja cojo rë me xi catisahmi me cjuatsehen jan, xi sahmi me cjuava xi vitexa Nai naja, hacuaha xi choho catichja me tsèhë ángel xi siu cojo Nina. <sup>9</sup> Peru suvá ángel matitjun xi hmí Miguel ne, hya xi ticjanya cojo xitsehen matitjun yojo rë Moisés ne, cavetjiincacun xi choho cuichja cojo xitsehen jan ta tu cuinitjin cachja: “Nina catichjataha me ngaye.” <sup>10</sup> Peru xuta tsehen xi cuacun vè ne, choho chja me tsèhë yèjë ni xcusun xi vijniuru me. Hane hitsë sa chu me xi cuma rë chu ta, handasa vèë me xi hmí rë cjuatsehen ne, hatuxa sahmi me. Hane cjuatsehen xi sahmi me jan ne, vèhë xi tsinguetsun rë cjuatacun rë me.

<sup>11</sup> Jemu choho cuatju me cuma, tsèhë xi fi me ndiya tsehen sacuatjin quiji xutachanga naja Caín, sahmi me cjuatsehen ngatsë rë tujún xi jercu meje rë me sacuatjin casahmi cha Balaam, hacuaha cueya me sacuatjin cahme cha Coré, ngatsë rë xi meje cjuahaxin cha xutaxa rë. <sup>12</sup> Xuta tsehen xi cuacun jan ne, ngu cjuasava me hora xi tichnutangun tsèhë cjuahmutacun xi tjin nuju cojo xingun ta, tsèhë xi hisca jinë hisca hvi me cojo nguñaja ni cjuasava, peru fahacuendaan ni xi cajiné yo xi cajini ta tu tsèhë suvá ni me fahacuenda me. Sacuaha yufi xi cavaain ta cavatjucjin xi cavaha rë tjo quiji ne, hacuaha cuatjin machjiriin me. Sacuaha ya xi machjiriin xi vaquin tú rë nixtin rë ne, tjune ni rë hisca tyjama rë sehe xi ne, hacuaha cuatjin machjiriin me. <sup>13</sup> Machjiriin me sacuaha tsindyu rë ndachacun xi hisca xu jima xcun xi cjan rë ne, hacuaha cuanitjin ni hisca xu jima cjuasava ngajñi rë me. Machjiriin me sacuaha machjiriin niñú xi siutaha ngahnga xi vejñaai cahndë rë ne, hacuaha cuatjin machjiriin me. Hane castigu xi cuatju me cumá ne, xi tsajin nu tsajin nixtin xi cuma ndaya me tsèhë hiscan xi tjercu tu jñu camahani.

<sup>14</sup> Hane ngu xutachanga ni xi hmí rë Enoc, xi quihndindaicjin rë Adán ne, hya xi cachja me ngu cjuava xi caveya Nina cjuatacun rë me xi cuma ne, hacuaha cachja me tsèhë xuta tsehen xi cuacun vè, cutjin cachja me: “Cahvë Nai naja xi nduva me ngajñi rë ángel rë me xi tjercu tu cjin camahani. <sup>15</sup> Nduva me xi cjuahachuva me ngayeyen ni, sehe cuichja me mé castigu xi cuatju yèjë ni xuta tsehen tsèhë yèjë ni cjuatsehen xi casahmi me, hacuaha tsèhë yèjë ni cjuava xi choho cachja xuta tsehen xi cuacun jan tsèhë Nina.” <sup>16</sup> Xuta tsehen jan ne, hatuxa choho chja me tsèhë yèjë ni, hacuaha sahmi me tu cutjin xi macacun me. Sahmi yehe suvá me yojo rë me, hacuaha chja me cjuahaxi cojo xuta, tsèhë xi meje rë me xi sahmi yehe xuta me.

*Conseju xi sua Judas xuta xi macjain rë Nina*



<sup>17</sup> Peru ngayujun ni tsan ne, ninguitsjun cju a xi ha cachja apóstol tséhë Nai naja Jesucristu, <sup>18</sup> xi cachja me cuitjin: “Hya xi ha jima tiña cuya Nai naja ne, hya tjin xuta xi cuejnucëë me tséhë yëjë ni cjuandaja rë Nina, hacuaha sahmi me yëjë ni cjuatsehen xi cuetju tséhë xahasen rë me.” <sup>19</sup> Xuta tsehen xi hinchajñi ngajñi nuju jan ne, vatëcja me ngajñi rë yëjë ni ngu cjuandaja xi cuma. Tsingatahacacun ni me xi sinë xi cuihi me, hane Hasen rë Nina ne, tsajin camahani rë me.

<sup>20</sup> Peru ngayujun ni tsan ne, sacuaha cju a rë Nina xi ha camacjain nuju ne, nihñu ngujoyë xi catamacjain sa nuju. Tinújunyumu ha tu cutjin xi visecoo nuju Hasen rë Nina. <sup>21</sup> Nihñu cuidadu xi hacuiin nichayun cjuahmutacun rë Nina. Hacuaha tinechunyun rë nixtin xi Nai naja Jesucristu ne, cojo cjuandaja rë me ne, sua naja me cjuahñu naja xi tsajin nu tsajin nixtin xi cueyan.

<sup>22</sup> Xuta xi jo má cacun me tséhë cjuandaja rë Nina ne, nújun cojo rë me ne, cojo sa xi hacuiin jo cuma cacun me. <sup>23</sup> Naxuntjun me sacuaha ngu xuta xi naxentjen me xi ha ndiya cueti me. Hane yahnga me ne, tjin nuju cjuayumatacun cojo rë me, peru cojo cuidadu, xi satiin nuju jyë rë me.

*Tsinguijnetaha Judas cju a*

<sup>24-25</sup> Ngu ni Nina xi vaxëtje naja ngatsë rë Nai naja Jesucristu ne, me vëhë xi cuma sahmi cuidadu me ngayun xi tsajin xtundiya yun ngajñi rë cjuatsehen, hacuaha cuiyuju me ngayun xcun me xi cun tyjahi tyjahi xahasen nuju ne, cojo yëjë ni cjuasua. Me vëhë xi tjin rë me yëjë ni ngu cjuandaja, hacuaha jyë me, hacuaha ma vitéxa me, hacuaha ma sahmi me, hisca xi chaja sa xi cumandaja ngasunhndë, hisca quihndë, hacuaha hisca xi cuetju xi cjuë ngasunhndë. Cuatjin jain.

## Apocalipsis, cjua xi sua cumachaya naja

*Cjua tsêhê Jesucristu xi cafehecani chini rê Juan*

<sup>1</sup> Cjua vihi ne, cjua tsêhê Jesucristu xi casua Nina cojo sa xi tsingacun Jesucristu xuta ladu rê me xcusun xi hatuxa sahmi nguÿyê xi cuatjû. Cjua jan ne, ngu ângel cafehecani nâ, ngahan xi hmî nâ Juan, ngu mosu hndixahan rê me. <sup>2</sup> Hane ngahan ne, tsinguixê ta cjuaquixi yêjê xcusun xi cahvê hya, xcusun tsêhê cjua rê Nina cojo tsêhê cjuaquixi xi chja Jesucristu. <sup>3</sup> Jemu ndaja tsêhê me xi cuichjasun me cjua rê xujun vihi, hacuaha jemu ndaja tsêhê me xi cuihndê me cuncha me xahasen rê me cjua xi camahindu xcun xujun vihi, tsêhê xi ha camâ tiña nixtin xi cuma chihin cjua rê.

*Cjua xi catsihindu Juan xi cafahatsja yatu yungun xi tjin ngajan Asia*

<sup>4</sup> Ngahan Juan ne, tshindû cjua vihi xi cjuahatsja yatu yungun xi tjin ngajan nangui Asia. Chjuhunnstun cjuandaja cjuajeya tsêhê Nina, me xi hacui, hacui ni me xi cavejña me hatsêê, hacuaha hacui ni me xi cuejña cuaha, hane cojo tsêhê Hasen rê me xi siu xcun me xi hacui sacuaa yatu hasen. <sup>5</sup> Hacuaha cojo tsêhê Jesucristu, me xi má testigu cjuaquixi, me xi tjun tjun cavuya cjuahñu tsêhê ngajñi rê nima, me xi hacuaha matitjun tsêhê yêjê ni xuta xi matitjun tsêhê ngasunhndê, hane me xi hmucacun naja hacuaha cavaxêtje naja tsêhê jyê naja hya xi cavanga jni rê me xi cahme me. <sup>6</sup> Hacuaha Jesucristu ne, casahmi me xi ngayaan ne, satê naja xi cuitexan ne, hacuaha cuma yaan sacuaa nahmi xi chjahancuendan Nina, Nina xi hacuaha má me nahmi rê me. Me vêhê ne, catimâ jyê hnga me hacuaha catimâ titjun me yêjê ni nu, yêjê ni nixtin. Cuatjin jain.

<sup>7</sup> ¡Nutsujun, ta cuinduva me cojo yufi! Hacuaha yêjê ni tuxcun ne, scuêê rê me. Hisca cojo me xi cahndiin tsêhê me ne, scuêê rê me. Hane yêjê xuta tsêhê jimangu tjê rê xuta ngasunhndê ne, cuatju me cjuandusin ngatsê rê me. ¡Cuatjin cumâ! ¡Cuatjin jain!

<sup>8</sup> Cuitjin chja Nina: “Ngahan sacuaa letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin. Ngahan xi teñña, hane ngahan xi vijnetaha. Cavêjña hatsêê, hacuaha cuêjña cuaha. Yêjê ni má sahme.”

*Juan ne, cavutsejen me xi jyê hnga Jesucristu*

<sup>9</sup> Ngahan Juan ne, xingun má ngahan, tangun satê naja cjuañihi, tangun nechan ngahma gubiernu hacuaha tangun caa naja ngatsê rê xi mangutacun cojo Jesús. Ngahan cavitejñataha ngu nandya xi hmî rê Patmos xi vetjucaa tsêhê ndachacun. Ngajan tejnataha ngatsê rê xi cachjá cjua rê Nina cojo tsêhê cjuaquixi xi chja Jesús. <sup>10</sup> Hya xi camâ ne, nixtin xi chjaharcun Nina ne, Hasen rê Nina ne, cavisehentê cjuatacun naha. Hora vêhê ni ne, tsêhê taha ngaxtun ne, cahndê ngu xta xi jemu hñu camahani nuhya rê, nuhya rê sacuaa xta rê tyjo <sup>11</sup> hane cuitjin cachja:

—Ngahan sacuaa letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Chjehe ngu xtê xujun ne, nihndi xcusun xi tichutsijin hane sehe ningatjin catahatsja xuta yungun xi siu yatu nandya Asia xi cuicun vi: Efeso, cojo Esmirna, cojo Pérgamo, cojo Tiatira, cojo Sardis, cojo Filadelfia cojo Laodicea. —Cuitjin cachja xta jan.

<sup>12</sup> Hya xi camâ ne, cavuya xi scutséjen yo xi tichja cojo ná, peru xi tu cavuya ne, xi cahvê ni ne, yatu candeleru xi camâ tsêhê oro. <sup>13</sup> Hane vasencja rê candeleru jan ne, jiyajñi ngu xihin xi tsejen sacuaa Quihndi rê Xuta Jain. Yaja me ngu tsjian tjin té ni xi vechu hisca ntsacu me, hane tjihñucja hiscan ndanisin rê me cojo ngu pañu nduju camâ cojo nachjun tsêhê oro. <sup>14</sup> Hane rcu cojo tsjarcu me ne, tyava tsejen sacuaa tsejen tyava tsja rê chu tsânga o sacuaa tsejen hnchan xi vixu. Hane tuxcun me ne, tsejen sacuaa ndihi xi ña vitjen. <sup>15</sup> Ntsacu me ne, seti sacuaa quicha sine xi catsicjê ndihi xutsê rê; hane xta rê ne, nuhya rê sacuaa xta rê nandan xi tjemu hñu vanga. <sup>16</sup> Tsja xi ladu quixi ne, vahangui me yatu niñú. Hane tsêhê hntsua me ne, vetju ngu espada yuju xi vatê taha xcun cojo taha ngaxtun. Hane xcun ne, tsejen sacuaa tsuhi hya xi sua hasen cojo yêjê ni ngahñu rê.

<sup>17</sup> Ngajan xi ngahan ne, xi cahvê xcusun rê me ne, catícja taha ntsacu me sacuaa xi cahme ngahan. Ngajan xi cavisane me tsja me ladu quixi xcun yojo naha, sehe cachja me cojo ná cuitjin:

—Xi carcuiin. Ngahan xi ntsacu vetsihin ne, hacui ni ngahan xi vijnetaha. <sup>18</sup> Ngahan, quicun ngahan. Cavéya, peru quihndê tacunntsa llavi tsêhê cjuaveya cojo tsêhê Hades, cahndê hiscan siu nima. <sup>19</sup> Hindê ngaye ne, nihndi xcusun xi cahye vi cojo xcusun xi tijima quihndê cojo xcusun xi sehe cumâ. <sup>20</sup> Sacuaa yatu niñú xi cahye hntsa ladu quixi naha cojo yatu candeleru xi camâ tsêhê oro jan ne, cuitjin vijne cjuatacun hma jan: yatu niñú

jan ne, hacui ángel xi sua cumachaya rë xuta rë yatu yungun jan cjua rë Nina, hane yatu candelero jan ne, hacui yatu yungun jan.

## 2

### *Cjua xi cjuahatsja yungun ngajan nandya Efeso*

<sup>1</sup> Hindë nihindi cjua vi xi cjuahatsja ángel rë yungun ngajan nandya Efeso. Cuitjin nihindi: “Cjua vihi ne, cjua rë cha xi vahangui yatu niñu jan tsja ladu quixi cha hacuaha tsujihiya cha vasencja rë yatu candelero jan xi camá tséhë oro: <sup>2</sup> Ha ndaja hvë tséhë xa nuju sacuaha cjuandaja xi nihñu, jemu chja tivatjun peru ticaa nuju titsangun nduju cojo. Hvë xi tuun rë xuta tsehen cahndë ta, nichuvun cjuatacun rë xuta xi vindacha me sacuaha xi má me apóstol. Hane camachaya nuju xi tu vindacha ni me. <sup>3</sup> Hacuaha titsangun nduju hacuaha ticaa nuju cojo cjuacjintacun xi tivatjun ngatsë rë xi veyunnangun ñihi naha, hacuaha machuvaain cjuatacun nuju ngajñi rë cjuacjintacun jan. <sup>4</sup> Peru cojo yëjë sa ne, tjin ná vihi condra nuju ta, hacuiin jemu nihmutacún ná sacuaha xi canihmutacún ná hya xi titjun camangutacún cojo ná. <sup>5</sup> Véhë xi ninguitsjun hacutjin cavatjun hya xi tjin nuju cjuahmutacun véhë, hane nindeyun cjuatacun nuju ne, cuyun nihñu nga xcusun sacuaha xi canihñu titjun. Cuatjin nihñu ta, sa tsajin ne, cuinduvá tjéngë nuju ne, cuaxëxen candelero xi satë nuju tséhë cahndë rë. <sup>6</sup> Peru hacuaha tjin sa nuju ngu xcusun xi ndaja tsujun ta, ndaja tsujun tséhë xi choho hyun xcusun xi sahmi xuta xi tjengui me cjuachacun tséhë Nicolás, ta cjuachacun jan ne, hacuaha cojo ngahan ne, choho hvë. <sup>7</sup> Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhuncun. Cuitjin chja: Yo xi scaa rë cjue xcun tséhë cjuatsehen ne, suá rë cahndë xi sinë tuxahi xi sua cjuahñu xi vaqui rë ya xi secun cahndë ndajiyihi xi tséhë Nina.”

### *Cjua xi cjuahatsja yungun ngajan nandya Esmirna*

<sup>8</sup> Hindë nihindi cjua vi xi cjuahatsja ángel rë yungun ngajan nandya Esmirna. Cuitjin nihindi: “Cjua vihi ne, cjua rë cha xi matitjun hacuaha matjengui. Cjua rë cha xi cahme jan hane hacuaha cavuya nga cjuahñu. Hacui cjua vihi: <sup>9</sup> Ha hvë cjuacjintacun xi tivatjun cojo cjuayuma nuju. Peru ngajñi rë véhë ne, ¡china ngayun! Hacuaha hvë cjua chjataha rë xuta vë xi chja me xi xuta tjë rë Israel, o sa xuta rë Nina, má me, peru quixiin ta, xuta ladu rë Satanás má me. <sup>10</sup> Xi carcuun tséhë xcusun xi cúatjun cuatjin. Naain ne, tsitsehen cha xuta cojo sa xi scandiya me yahnga ngayun ndavaya sehe chjahachuva nuju. Hacuaha tsujihiya tjengui nuju xuta jan cojo cjuañihi xcun të nixtin ni. Peru tangunnduju cojo cjuatacun nuju handasa xi cueyun, hane ngahan ne, suá nuju corona rë cjuahñu. <sup>11</sup> Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhuncun. Cuitjin chja: Yo me xi scaa rë cjue xcun ne, tsajin mé choho cuatju me tséhë cjuaveya xi majo.”

### *Cjua xi cjuahatsja yungun ngajan nandya Pérgamo*

<sup>12</sup> Quihndë nihindi cjua vi xi cuahatsja ángel rë yungun ngajan nandya Pérgamo. Cuitjin nihindi: “Cjua vihi ne, cjua rë cha xi tjin rë quicha yuju, xi vatë taha xcun cojo taha ngaxtun. Cuitjin chja cha: <sup>13</sup> Ha hvë cahndë jani hisca nechuntuhun, ta cahndë véhë ne, cahndë hñu xi vitexa Satanás. Peru cojo yëjë sa ne, ndaja mangutacún cojo ná. Handasa hya xi catsiquehen me Antipas, me xi catsinguixi cjuaquixi naha ngajan cahndë hñu xi vitexa Satanás ne, hisca hya ne, hacuiin cavitijayun ndiya rë xuta xi macjain rë me ngahan. <sup>14</sup> Peru hacuiin yëjë tsujun ndaja ta, tjin ná ngu jo xcusun condra nuju ta nijyuntacún tséhë ngu jo me ngajñi nuju xi tjengui me cjuachacun rë cha Balaam. Cha véhë catsingacun cha Balac chura rë hacutjin tsitsehen cha xuta nangui Israel nixtin hatsëë. Hane casahmi me jyë xi cajinë me yojo tséhë cjuatjo rë nina ndoyojo, hacuaha xi casahmi me cjuatsehen xi satë rë cjuachacun jan. <sup>15</sup> Hane hacuanitjin ngayun, ta ngajñi nuju siu me xi hacuaha tjengui rë cjuachacun jan, cjuachacun rë cha Nicolás. <sup>16</sup> ¡Nindeyun cjuatacun nuju! ta, sa tsajin ne, ha nduvá tjéngë nuju, hane sahme si cojo rë me xi cuacun vë cojo quicha rë cjua xi vetju ntsuva. <sup>17</sup> Yo ngayun xi tjin nuju cjuasua xi cuinuhyun cjua xi chja Hasen rë Nina cojo yungun jan ne, ndaja tetuhuncun. Cuitjin chja: Yo xi scaa rë cjue xcun ne, suá rë comida cjuarcun xi hmí rë maná xi jiyahma, hacuaha suá rë ngu ndoyojo lihndi tyava hiscan camahindu ngu ñihi xatsë, ngu ñihi xi tsajin yo vëë rë, ta suva me xi cjuahatsja rë ne, suva ni me vëë me.”

### *Cjua xi cjuahatsja yungun ngajan nandya Tiatira*

<sup>18</sup> Hacuaha nihndi cjua vihi xi cjuahatsja ángel rë yungun ngajan nandya Tiatira. Cuitjin fi cjua: “Vihi cjua rë Quihndi rë Nina Jain, me véhë ne, tuxcun me, sacuaha ndihi tsejen, hane ntsacu me sacuaha quicha sine xi catsicjé ndihi xutsë rë: <sup>19</sup> Ha machaya ná tséhë xa sacuaha cjuandaja xi nihñu, sacuaha cjuahmutacun nuju, cojo xi mangutacún, hvë xa

xi tinihñu cojo sa xi ndaja cjuecani nuju. Cjuandaja xi nihñu quihndé ne, quisun sa xi cuma ré xi canihñu ntsacu cavetsihin. <sup>20</sup> Peru cojo yějé sa ne, tjin ná vihi condra nuju ta, nijyuntacún tséhé na chjuun Jezabel vé, na xi chja suva na xi profeta má na. Na vèhé ne, cojo cjuachacun ré na ne, tsinguetsun na hacuaha tsitsehen na xuta ladu naha cojo sa xi sahmi me cjuatsehen ngajñi xicjin ni me, hacuaha siné me yojo ré chu xi cahme sacuaha ngu cjuatjo ré nina ndoyo. <sup>21</sup> Na vèhé ne, casuá ran cahndé xi tsindeya na cjuatacun ran, peru mijí choho cuma ran tséhé xcusun tsehen ré xi sahmi na cojo xicjin na. <sup>22</sup> Vèhé xi tsijaña ré na xcun ngu cahndé tséhé cjuahmu, hane me xi sahmi cjuatsehen cojo na ne, suá ré me ngu cjuañihi jyé, sa tsajin choho cuma ré me hane cuindeyaain cjuatacun ré me tséhé xcusun chocun ré na xi catsitsehen ré me xi casahmi me cjuatsehen jan. <sup>23</sup> Hane me xi má sacuaha quihndi tjé ré na ne, cjué tsiquéhen me, cojo sa xi cuatjin ne, cumachaya ré yějé sa xuta yungun naha xi ngahan ne, ndaja tsichúva cjuatacun cojo xahasen nuju, hane suá nuju jima ngu yun tucu saté nuju tséhé xcusun xi canihñu. <sup>24</sup> Peru yahnga ngayun xuta Tiatira xi hacuini cojo ngayun cachjuhunntsun cjuachacun jan ne, ngayun hyuun mé xi vijne cjua xi cahntsua nungun tséhé Satanás. Ngayun ne, ndastu mé sa cuichjá xi nihñu ta, <sup>25</sup> xi sahmi ngu jyé ne, xi cuangunndujun tuhunhñu mé xi tjin nuju tséhé Nina hisca hya xi nduvá ngahan. <sup>26</sup> Yo xi scaa ré xi cjue xcun, hacuaha sahmi chihin me cjuandaja naha hisca xi cuijnetaha ne, suá ré me ngahñu xi sahmi me gobiernu ré nanguicjin. <sup>27</sup> Hane me vèhé ne, cuitexa ré me xuta nanguicjin jan cojo ngahñu xi tjin ré me, sacuaha cojo ngu cuarta xi camá tséhé quicha, hane sacuaha cuma xuva ré ngu tiji xi nihndé camá ne, cuatjin cumá cojo xuta cjin jan. Sacuaha ngahan ne, caphántsa xa jan tséhé nahmi naha, cuanitjin suáxa ré me xi sahmi me gobiernu. <sup>28</sup> Hane suá ré me hasen ré niñú seti xi vetjucaa nguítajñu. <sup>29</sup> Yo ngayun xi tjin nuju cjuasua xi cuinuhyun cjua xi chja Hasen ré Nina cojo yungun jan ne, ndaja tetuhunrcun.”

### 3

#### *Cjua xi cjuahatsja yungun ngajan Sardis*

<sup>1</sup> Cjua vihi nihindi cojo sa xi cjuahatsja ángel tséhé yungun ngajan nandya Sardis. Cuitjin fi cjua: “Cjua vihi xi cachja me xi tsuvangui ré yatu hasen ré Nina cojo yatu niñú: Hvé xa nuju. Tjin cjua nuju xi quicun yun, peru quixiin ta hvé ta cahme yun. <sup>2</sup> ¡Catasca nuju! Mé tsujun xi siu quicun handasa ndiya cueya ne, tuhun ré ngahñu ta, xi má ré Nina naha ne, xa xi nihñu ne, hacuini tsejen sacuaha xi ha camá chihin xa jan. <sup>3</sup> Tetuhunrcun nguyéjé ni cjua xi ha cachjuhunntsun tséhé Nina, tanguunndujun cojo, hane nindeyun xcusun nuju. Cuatjin nihñu ta, sa xi cuascaain ré cjuatacun nuju ne, sehe cjué tjéngé nuju sacuaha cjue tjéngui ré xuta ngu cha chéjé, ta hyuun hora xi cuinduva tjéngé nuju. <sup>4</sup> Peru cojo yějé sa ne, tjin ngajñi nuju ngu jo xuta ngajan Sardis xi cjéé tsinguetsun me tsjian ré me cojo cjuatsehen. Me xi cuacun vé ne, cojo ná tsujyihya me; hane cojo ngahan ne, cuaja me tsjian tyava tyahi, tséhé xi cuatjin ndatjin vechu chuva ré xi casahmi me. <sup>5</sup> Me xi scaa ré cjue xcun ne, cojo me nicaja ré me tsjian tyava, sacuaha me xi cuacun vé. Hacuaha tsajin nixtin xi scujñu ñihi ré me tséhé libru xi yaha ñihi ré xuta xi sacú ré cjuahñu ta, hisca cueyanangé ñihi ré me xcun Nahmi naha cojo xcun ángel ré me. <sup>6</sup> Yo ngayun xi tjin nuju cjuasua xi cuinuhyun cjua xi chja Hasen ré Nina cojo yungun jan ne, ndaja tetuhunrcun.”

#### *Cjua xi cjuahatsja xuta ré yungun ngajan nandya Filadelfia*

<sup>7</sup> Cjua vihi nihndi cojo sa xi cjuahatsja ángel tséhé yungun ngajan nandya Filadelfia. Cuitjin fi cjua: “Cjua vihi ne, cjua ré me xi ndastu mé cjuatsehen tjin ré, hacuaha quixi me. Me vèhé ne, tacuntsja me llavi xi casaté ré nima David, me xi cavitexa. Hane cahndé xi vuxaha me jan ne, tsajin yo xi cuma cuechja. Hane sa xi vechja me ne, tsajin yo cuma scuxaha.” <sup>8</sup> Cuatjin fi cjua: “Hvé xa nuju. Casuá nuju cahndé xi tixaha tingotjo xi cumá nuju, hane tsajin yo cuma cuechja xi cumá nuju. Hacuaha hvé ta, chuva má ngahñu nuju, peru handasa cuatjin ne, cavetjun cjua naha hacuaha cjéé cjuahmu ñihi naha. <sup>9</sup> Tuhun cjuasua ta, chutsujun mé cumá ré xuta jan xi vihndé me tséhé Satanás. Xuta jan ne, chja me xi tjé ré Israel má me, peru hacuini xuta naha me ta, xuta ndacha me. Sahme xi xuta jan ne, cuinduva me cuiticjaxcun me ntsacun, hane scuéé me ta ngahan ne, meje ná ngayun. <sup>10</sup> Cavetjun cjuajeya xahasen nuju sacuaha xi ngahan catsingácun nuju. Ngatsé ré vèhé ne, ngahan ne, hacuaha cuetjo nuju cojo sa xi satiin nuju cjuacjintacun tséhé hora xi chjahachuva ré xuta. Hora vèhé ne, ha tacun xati xi nduva xcun jinguyé ni ngasunhndé, hane hya chjahachuva ré jinguyéjé ni me. <sup>11</sup> Ngutjen ni cjuéhé. Tanguunndujun cojo cjua xi ha camachaya nuju tséhé, cojo sa xi tsajin yo cjue cojo corona xi saté nuju. <sup>12</sup> Yo xi scaa ré cjue xcun tséhé cjuatsehen, ngahan ne, sahme xi cumá me sacuaha xihndé xi secun vasencja ré yungun xi vaniji hai ré yungun ré Nina. Hane quihndé cuetjuxiin me. Setaha ré me ñihi ré Nina naha cojo ñihi ré nandya ré Nina, Jerusalén xatsé. Nandya jan ne, sahmi

Nina xi nduvajne tsêhê ngahnga. Hacuaha hisca setaha rê me ñihi xatsê naha. <sup>13</sup>Yo ngayun xi tjin nuju cjuasua xi cuinuhyun cjuaxi chja Hasen rê Nina cojo yungun jan ne, ndaja tetuhuncun.”

*Cjua xi cjuahatsja yungun ngajan Laodicea*

<sup>14</sup>Cjua vihi nihndi cojo sa xi cjuahatsja ángel tsêhê yungun ngajan nandya Laodicea: “Cjua vihi ne, cjuaxi rê me xi cjuaquixindaja, cjuaxi chja me ne, quixi hacuaha cuatjin jain. Ngatsê rê me vê jan ne, cavetjuca yêjê xi casahmi Nina. Cuitjin fi cjuaxi jan: <sup>15</sup>Ndaja machaya ná hacutjin nihñu xa nuju. Hacuñin jemu ndaja peru hacuaha hacuñin jemu chojyihí, tu vasentjin siu. Xi má ná ne, hitsê sa ndaja sa xi hatuxa ndaja o sa xi hatuxa chojyihí. <sup>16</sup>Ngayun ne, ha maji sa tu ngu tsê vê ngayun, peru ngayun ne, jemu va xcusun nuju, vêhê xi cuaxêxin nuju sacuaaha xi cuêhê natya cojo ntsuva. <sup>17</sup>Vihi cjuaxi nújun: Ngayin ne, nchina ngayin. Jercu cavetjin tujún hane tsajin mé machaja niji. Cuatjin nújun. Peru machayin nuju tsêhê cjuaquixi ta, xi quixi ne, jemu chojyihí tsujun, cojo cjuatsehen nuju, yuma yun, rcá yun, hane hacuaha quixi ngayun. <sup>18</sup>Vinchajyé nuju xi chuhun tsahan. Tjin ná oro ndaja xi catsicjê ndihí xutsê rê, hane cojo vêhê cuma nchina jain yun. Tjin ná tsjian tyava xi cuma chujun cojo sa xi hacuñin tu yo ni scuêê cjuasava nuju xi quixi ngayun. Hacuaha tjin ná rqui xi cuincha tuxcun, hane cumatsejen jain nuju. <sup>19</sup>Tichjátaha nuju ta, hya xi tjin yo me xi ngahan meje ná me ne, chjátaha rê me hacuaha vicuya rê me. Tsêhê vêhê ne, catamachinitacun hane choho catama nuju, nindeyun xcusun nuju. <sup>20</sup>Nguehe tejña xi tichjátaha cojo nuju. Tu yo ni xi cuihndê xta naha ne, sehe sua cahndê ne, ngahan ne, cuisehen ngajan, hacuaha sinê ñihu cojo me, hane me vêhê ne, sinê me cojo ná ngahan. <sup>21</sup>Yo ngayun xi scaa nuju cuangun xcun tsêhê cjuatsehen, suá nuju cahndê xi cuinechun cojo ná cahndê hñu naha. Cuatjin cumá cojo nuju tangun ni sacuaaha xi ngahan ta, hacuaha cacaa ná cêjê xcun, hane tejña cojo Nahmi naha cahndê hñu rê me. <sup>22</sup>Yo ngayun xi tjin nuju cjuasua xi cuinuhyun cjuaxi chja Hasen rê Nina cojo yungun jan ne, ndaja tetuhuncun.”

## 4

*Cavêê Juan cahndê rcun ngajan ngahnga*

<sup>1</sup>Hya xi cavatju vihi ne, cahvê xi ngajan ngahnga ne, tsejen ngu tingotjo xi tixaha. Hane xta rê me xi cahndê xi cachja cojo ná titjun jan xi nuhya rê sacuaaha nuhya rê ngu tyjo, xta vêhê cachja cojo ná cuitjin:

—Ndoveniñi guehe sehe tsingácun ri xcusun xi sehe cumá.

<sup>2</sup>Hora vêhê ne, catsuva ná ngahñu rê Hasen rê Nina, ngajan cahvê xi ngajan ngahnga ne, tacun ngu cahndê rcun cojo ngu me xi tacun xcun. <sup>3</sup>Hane me xi tacun xcun jan ne, xcusun rê me ne, seti tsejen sacuaaha ndyojo seti xi hmí rê jaspe o cornalina. Hane ngu yejña sacuaaha ndyojo seti xi hmí rê esmeralda, vêhê vindee rê cahndê rcun jan. <sup>4</sup>Tahndee rê cahndê rcun jan ne, siu sa can ñuju cahndê rcun, hane xcun jan ne, siu can ñuju xuta changá. Me vêhê ne, yaja me tsjian tyava hacuaha hinchasun rcu me corona tsêhê oro. <sup>5</sup>Tsêhê cahndê rcun jan ne, vatê ndihichuhún hacuaha tsingá chuhun. Hacuaha xcun cahndê rcun jan ne, ti ndihí rê yatu lámpara xi hacuñi yatu Hasen rê Nina. <sup>6</sup>Hacuaha nangui xcun cahndê rcun jan ne, tsejen sacuaaha ngu ndachacun tsêhê vidriu xi hasen sacuaaha hasen ndyojo tsin. Hane tsêhê tahndee rê cahndê rcun jan ne, chuva ngu yuju rê, siu ñuju xcusun xi quicun. Hane xcusun jan ne, yaja tuxcun jingujyé yojo rê, sa taha xcun, sa taha ngaxtun. <sup>7</sup>Ngu xi quicun jan ne, xcusun rê ne, sacuaaha chu xa tsejen. Xi majo ne, sacuaaha ndyaja, hane xi má jyan ne, sacuaaha xcun xuta jyihí xcun. Xi má ñuju ne, sacuaaha ngu chu jya xi tivitjen chu, cuatjin tsejen. <sup>8</sup>Jima ngu xi quicun jan ne, tjin jyun tyjunga rê. Hane jingujyé ni tsêhê yaja tuxcun, taha xcun cojo taha ngaxtun. Hane xi quicun jan ne, sa nixtin, sa nixten, sejiin ta, chja cuitjin:

Tyjahi, tyjahi, tyjahi

camahani Nina xi jemu hñu cjuaxi.

Nina tacun me, cavejña me hatsêê, hacuaha cuejña cuaha me.

Cuitjin chja.

<sup>9</sup>Hane sahmi jyê hnga ñihi rê Nina hacuaha sua nacuechji rêhê hacuaha vaxêndaja rê Nina xi tacun xcun cahndê rcun jan, Nina xi tacun cuaha me yêjê nu, yêjê nixtin. Hane jimangu ndiya xi vaxêndaja rê Nina ne, hora hya ne, <sup>10</sup>can ñuju xuta changá xi siu jan, viticjaxcun me xcun me xi tacun cahndê rcun jan, hane faharcun me me xi tacun nu cjuñi nu nduva. Hacuaha xuta changá jan ne, candisun me corona rê me xcun cahndê rcun jan, sehe chja me cuitjin:

<sup>11</sup>Ngayun Nai niji, ngayun Nina niji,

vechu chuva rê xi cuma jyê cuma hnga yun hacuaha sacu nuju ngahñu cjuaxi.

Ngayun canihñu yêjê ni xcusun,

hane ngatsë rë cjuandaja nuju siu yějë ni hacuaha camá yějë ni.

## 5

### *Xtë xujun cojo yatu sellu*

<sup>1</sup> Sehe cahvë xi tsja ladu quixi me xi tacun xcun cahndë rcun jan, yaha me ngu xtë xujun xi camahindu xcun cojo ngaxtun, hacuaha xujun jan ne, tine rë yatu sellu. <sup>2</sup> Hane hya ne, cahvë ngu ángel xi jemu hñu cju, hane tisiquindë cojo yějë ni ngahñu rë cju vihi:

—¿Yo ngayun xi vechu chuva rë xi cuicheyun sellu rë sehe nixingun xtë xujun vihi?

<sup>3</sup> Hya xi camá ne, ndastu yo, sa xi siu ngahnga, sa xi siu nangui, o sa xi siu ngahma nangui, ndastu yo cavetjucacun xi tsixinga xtë rë xujun jan, o sa xi scutsejen mé xi chja. <sup>4</sup> Hane ngahan ne, cajlhnda nguñajacacun, tséhë xi casacuiin yo xi cuechu chuva rë xi tsixinga xtë rë xujun jan, sehe scutsejen mé xi chja. <sup>5</sup> Ngajan xi ngu xuta changá jan ne, cachja me cojo ná cuitjin:

—¿Xi cachjihndiin sa! Chutsijin ta, me xi hmí rë Chu Xa tséhë tjë rë cha Judá ne, me xi cavetjusehen tséhë David xi cavitexa hatsëë ne, me vëhë cacaa rë me quiji me xcun. Hane me vëhë cuma tsixinga me xtë rë xujun cojo yatu sellu rë.

### *Cristu, ta xuta matitjun má me, cafaha me xtë xujun*

<sup>6</sup> Xi cavutsejen, ngajan secun vasencja rë cahndë rcun jan cojo tahndee rë, ngajñi rë ñuju xi quicun jan cojo xuta changá jan, ngajan secunhñu ngu xihin sacuaha Chu Tsánga, xi tsejen sacuaha ngu chu xi cahme. Me xi sacuaha tsánga jan ne, tjin yatu ndyaja rë cojo yatu tuxcun xi hacui yatu hasen rë Nina xi visehen jingujyë ni ngasunhndë. <sup>7</sup> Hane me xi sacuaha tsánga jan ne, canduva me cafaha me xtë rë xujun tséhë tsja quixi me xi tacun xcun cahndë rcun jan.

### *Xuta changá ne, faharcun me Jesucristu*

<sup>8</sup> Hane hora xi cafahatsja me xtë rë xujun jan ne, catsiñuju xcusun xi quicun jan cojo can ñuju xuta changá jan ne, caticjaxcun me xcun Tsánga jan. Jimangu me ne, yaha me ngu arpa hacuaha jimangu me hinchangui tsja me tyucu ndixuhi tséhë oro xi quitsë rë cojo tyjungunsa. Hane tyjungunsa jan ne, hacui oración rë me xi nguñajacacun macjain rë me. <sup>9</sup> Hane me vëhë ne, tisë me ngu sun xatsë xi cuitjin fi cju rë:

Vechu chuva rë xi chjuhun xtë rë xujun vë, hane nuxuhun sellu rë; tséhë xi catsiquehen me yun,

hane cojo jni nuju xi cavanga ne, cachuhun xi cumá rë Nina xuta tséhë yějë ni tjë, yějë ni hne, yějë ni nandya, cojo yějë nación.

<sup>10</sup> Hacuaha ngayun ne, canihñu xi xuta jan ne, cumá me xuta xi vitexa me, hacuaha cumá me sacuaha nahmi xi cjuahancuenda rë Nina xi faharcun me, hane cuitexa me guehe xcun nangui.

### *Cjín ángel ne, faharcun rë Jesucristu*

<sup>11</sup> Sehe cavutsejen jemu cjín camahani ángel xi cavindee rë cahndë hñu hiscan siu xcusun xi quicun jan cojo xuta changá jan. Hane tjin xqui sacuaha tséhë té mil ndiya xi té mil. Hacuaha cahndë xta rë ángel cjín jan <sup>12</sup> cachja hñu cuitjin:

Me xi má Tsánga xi catsiquehen xuta me ne, vechu chuva rë xi cjuahatsja me ngahñu xi cuitexa me, cojo cjuanchina, cojo cjuahasen,

hacuaha hñu cumá cju rë me, tjin rë me cjuandaja rë xuta, cuma jyë hnga me hane yějë ni me ne, tsinchacuntihin rë me.

### *Yějë ngarca ni ne, faharcun rë Jesucristu*

<sup>13</sup> Sehe cahndë xi nguyějë ni xi siu ngahnga cojo nguyějë ni xi siu ngasunhndë cojo nguyějë ni xi siu nguihma nangui cojo ngajñi ndachacun, yějë ngarca xi cuacun vë ne, tichja cuitjin:

Cuitjin cumá tséhë me xi tacun cahndë rcun hacuaha cumá tséhë Tsánga jan:

¡Catama tséhë me xi tsinchacuntihin rë me, xi chjaharcun rë me, xi cuma jyë hnga me, xi tjin rë me ngahñu!

¡Cuatjin catama me tséhë me nu cjui nu nduva!

<sup>14</sup> Hane catsiñuju xcusun xi quicun jan ne, cachja cuitjin:

—¡Cuatjin jain!

Hane xuta changá jan ne, caticjaxcun me sehe cafaharcun rë me.

## 6

### *Sellu tjun*

<sup>1</sup> Cavutsejen ngahan hya xi Tsánga jan ne, cavuxaha me ngu sellu tsêhê yatu sellu jan. Hane tsêhê catsiñuju xcusun xi quicun jan ne, cahndê ngu xta xi nuhya rê sacuaaha xi faneya. Cuitjin cachja:

—¡Ndove!

<sup>2</sup> Hane cavutsejen xi cavetjutsejen ngu naxin tyava. Hane me xi quisun rê chu jan ne, yaha me ngu yanchijnu, sehe casacu rê me ngu corona hane cavetju me sacuaaha ngu cha xi cjue sahmi si xi tjin ngucacun cha xi scaa rê cha xi cjue cha xcun.

*Sellu xi majo*

<sup>3</sup> Hane hya xi cavuxaha Tsánga jan sellu xi majo ne, cahndê ta, xcusun xi majo xi quicun jan ne, cajindaya cuitjin:

—¡Ndove!

<sup>4</sup> Ngajan cavetjutsejen ngu nga naxin xi hani hñu xcusun ru. Hane me xi quisun rê chu vê ne, ngu me xi casatê xa rê xi cjuahaxin me cjuajeya xi tjin nangui, cojo sa xi xuta ne, tsiquehen xicjin me ngajñi rê me. Hane suva me vêhê ne, cafahatsja me ngu quicha jyê.

*Sellu xi majyan*

<sup>5</sup> Hya xi cavuxaha me sellu xi majyan ne, cahndê xcusun xi quicun xi majyan jan, hane cuitjin cachja:

—¡Ndove!

Hane cavutsejen xi cavetjutsejen ngu naxin jma. Hane me xi quisun rê chu vê ne, yahatsja me ngu nisu chuya. <sup>6</sup> Sehe cahndê sacuaaha ngu xta xi vetju tsêhê ngajñi rê catsiñuju xcusun xi quicun jan xi cachja cuitjin:

—Ngu ni kilu trigu sacu chjí rê mosu, o sa jyan kilu ni cebada sacu rê me; peru aceite cojo xan rê uva ne, cumachajjin.

*Sellu xi má ñuju*

<sup>7</sup> Hane xi cavuxaha me sellu xi má nuju ne, cahndê xcusun xi quicun xi má nuju jan, hane cuitjin cachja:

—¡Ndove!

<sup>8</sup> Hane cavutsejen xi cavetjutsejen ngu naxin xi jemu va jyihí. Hane me xi quisun rê chu jan ne, Cjuaveya hmí rê me, hane tjengui tiña rê me, me xi hmí rê Hades, cahndê hiscan xi má hasen rê nima castigu. Hane me vêhê jan ne, tjin rê me cahndê xi tsêhê ngu tsêhê ñuju rquí xuta ngasunhdê xi cuma tsiquehen me ngu rquí vê cojo espada o cojo jindya o cojo chíhin o sa xi cojo chu cjan rê xi tjin xcun nangui.

*Sellu xi má hñu*

<sup>9</sup> Hya xi catuxaha sellu xi má hñu ne, ngajan ngahma rê ngasunsun ne, cahvê hasen rê nima xi catsiquehen xuta ngatsê rê xi camacjain rê me cjua rê Nina cojo ngatsê rê cjuaquixi rê me xi casua me. <sup>10</sup> Me vêhê ne, cajindaya me cachja me cuitjin:

—Ngayun Nai rê yêjê ni, jemu tyahi yun, quixi cjua nuju. ¿Janihya nihñu cuendun jyê rê xuta xi siu me xcun nangui, hane nihñu ngojo jni niji? —Cuatjin cachja me.

<sup>11</sup> Ngajan xi cafahatsja me jimangu me ngu tsjian tyava, hane cafaha me cjua xi cuejñajyuu me ngu jo nixtin sa. Vindeya sa rê hisca hya xi cumachihin xqui rê xuta ladu rê me cojo me xi hacuaha tangun cueya sahmi xuta sacuaaha cavatju me suva me.

*Sellu xi má jyun*

<sup>12</sup> Hacuaha cavutsejen hya xi cavuxaha me sellu xi má jyun. Hya ne, jercu cjuachan cafani nangui. Tsuhi ne, camá jma. Jemu va jyihí camá, sacuaaha ngu tsjian jma. Hane sá xatsê ne, camá hani sacuaaha jni. <sup>13</sup> Hane niñú tsêhê ngahnga ne, cavixu xcun nangui sacuaaha vixu tu rê ya higo hya xi vanga tjo hñu. <sup>14</sup> Ngahnga ne, cafeya sacuaaha ngu xujun tê xi catsijeyu, hane hisca tjin ngu naxi o ngu nangui xi hinchá vasencja rê ndachacun ne, catjune rê cahndê rê. <sup>15</sup> Ngajan xi xuta xi vitexa me ngu nangui, cojo yahnga me xi cojo me vitexa me, cojo xuta nchina, cojo sindadu capitán, cojo xuta xi hñu cjua, cojo yêjê sa xuta, sa xuta xi caxteña o sa xuta xi ndaya tjin, nguyêjê ni me quiji cavangahma me cahntsua nguijo cojo ngajñi naxindya rê nguijña cha. <sup>16</sup> Sehe cafehyataha rê me nguijña cojo naxindya jan cuitjin:

—¡Catixusun niji cojo sa xi tinchunhmu niji! Cuatjin cuma cuinechinhmi tsêhê xcun me xi tacun cahndê rcun hane satiin niji cjuaxti rê Tsánga jan.

<sup>17</sup> Cuatjin cumá ta cavechu nixtin xi jercu choho cumá ngatsê rê cjuaxti rê me, hane ¿há tjin yo scaa rê cojo?

<sup>1</sup> Xi cavutsejen vihi ne, cahvë ñuju angel xi hinchacun quixi catsiñuju yuju rë ngasunhndë. Hane angel jan ne, casuaain cahndë xi cuanga catsiñuju tjo xi vanga ngasunhndë ta, hisca xi ngu tjo ne, cuangaain xcun nangui, o xcun ndachacun, o hisca rcu ngu ya. <sup>2</sup> Sehe cahvë ngu angel xi hacjahi. Hane camiji angel jan hiscan xi vetjucaa tsuhi, hacuaha yaha angel sellu rë Nina quicun. Hane cajindayahñu angel jan cojo catsiñuju vë ta tacuntsja angel vë xi choho sahmi cojo nangui cojo ndachacun. <sup>3</sup> Cuitjin cachja me cojo:

—Ndastu mé dañu nihñu cojo nangui, cojo ndachacun, cojo ya. Ndastu mé nihñu hisca xi cajnetaha cavetaha sellu xten xuta xi cavatsë Nina naja.

<sup>4</sup> Ngajan xi cahndë xi cachja me xqui rë me xi casetaha rë chuva cojo sellu jan: ngu cientu cojo yachan ñuju mil má me tséhë yëjë xuta tjë rë Israel. <sup>5</sup> Tséhë xuta tjë rë Judá ne, tejó mil má me xi yaha sellu; hacuaha tejó mil má me tséhë xuta tjë rë Rubén, tejó mil tséhë xuta tjë rë Gad. <sup>6</sup> Tejó mil má me tséhë xuta tjë rë Aser, tejó mil tséhë xuta tjë rë Neftalí, hacuaha tejó mil tséhë xuta tjë rë Manasés. <sup>7</sup> Tséhë xuta tjë rë Simeón ne, tejó mil má me xi yaha sellu; hacuaha tejó mil má me tséhë xuta tjë rë Leví, tejó mil tséhë xuta tjë rë Isacar. <sup>8</sup> Tséhë xuta tjë rë Zebulón ne, tejó mil má me xi yaha sellu; hacuaha tejó mil má me tséhë xuta tjë rë José, tejó mil tséhë xuta tjë rë Benjamín.

*Xutaxín xi hacuaha camacjain rë me*

<sup>9</sup> Xi cavatju xcusun vihi ne, cavutsejen, hane cahvë xutacjín. Hisca tsajin yo cuma cuexqui rë me. Canduva me tséhë ngajñi rë jimangu nación, jimangu tjë rë xuta, jimangu nandya cojo jimangu hne. Hane cafehe me hinchacun me xcun cahndë rcun cojo xcun Tsánga jan. Yaja me tsjian tyava hacuaha yahatsja me jne. <sup>10</sup> Hane jindaya me cojo ngu xta hñu, tichja me cuitjin:

Xi cavetjuntjen ne, camá ngatsë rë Nina naja

xi tacun me cahndë rcun

cojo ngatsë rë Tsánga jan.

Cuatjin cachja me. <sup>11</sup> Ngajan xi yëjë ni angel ne, hinchacun quixi tahndee rë cahndë rcun jan hacuaha cavindee rë xuta changá jan cojo catsiñuju xcusun xi quicun jan. Hane caticjxcun angel xcun cahndë rcun hane cakaharcun rë Nina, <sup>12</sup> tichja cuitjin:

¡Cuitjin jain!

Nina ne, yëjë ni tsinchacuntihin me. Jyë hnga me.

Tjin rë me cjuahasen. Taan nacuechji rë me.

Xuta ne, vaxëndaja me. Vechu chuva rë xi cjuahatsja me ngahñu xi cuitexa me. Hacuaha hñu cjuá rë me.

Cuanitjin cjue me yëjë nu yëjë nixtin.

¡Cuatjin jain!

<sup>13</sup> Hya xi camá ne, ngu xuta changá jan, cafinenguise me ngahan cuitjin:

—Me xi cuicun xi yaja tsjian tyava ne, ¿yo má me? hane ¿hisca jani canduva me?

<sup>14</sup> Ngajan xi cafayanguë cuitjin:

—Tatá, xcusun vëhë ne, ngayun hyun, hacuiin ngahan.

Sehe cachja me cojo ná cuitjin:

—Me vihi cacaa rë me cjuañihi cjuacjintacun jyë. Cavane me tsjian rë me, camá tyava cojo jni rë Tsánga. <sup>15</sup> Vëhë xi tjin rë me cahndë xcun cahndë rcun rë Nina, hane fahacuenda me nixtin nixten cahntsua yungun rë me. Hane Nina xi tacun xcun cahndë rcun ne, ngu tangun ni cuejñándaja me cojo xuta jan. <sup>16</sup> Hindë tsajin nu tsajin nixtin cuma vojo rë me. Cuma xindaain rë me, cuacaain rë me tsuhi; hacuaha tsijendaain rë me cojo hnde rë, <sup>17</sup> ta cahndë rë vëhë ne, Tsánga xi tacun cavasencja rë cahndë rcun ne, cuahacuenda rë me, hane cuincha ndiya rë me xcun nandá xi sua cjuahñu. Hane Nina ne, tsixiya me yëjë ndatuxcun xuta jan.

## 8

*Sellu xi má yatu*

<sup>1</sup> Hane xi cavuxaha me xi sacuaha Tsánga jan sellu xi má yatu ne, ngahnga ne, cavejña jyyu camahani sacuaha chuva rë vasen hora. <sup>2</sup> Cuatjin camá. Sehe cahvë xi yatu angel vë xi siucahndë xcun Nina ne, cakahatsja yatu tyjo. <sup>3</sup> Sehe canduva sa ngu angel xi yaha ngu tyucu ndixuhi tséhë oro, hane casecunquixi cojo tiña ngasuncun. Ngajan cakahatsja me cjín tyjungunsa cojo sa xi cuaca me xcun ngasuncun tséhë oro jan xi tacun xcun Nina. Hane hnde rë ne, camatangun cojo oración rë yëjë me xi tyjahi cjuatacun rë me cojo sa xi cuma chihin cjuá. <sup>4</sup> Hane nihndi rë tyjungunsa xi yahatsja angel jan ne, casecjan cojo oración rë me xi tyjahi cjuatacun rë me, hane camiji tangun hiscan tacun Nina. <sup>5</sup> Ngajan xi angel jan ne, caha tyucu ndixuhi jan, catsinguitsë rë cojo ndihi tséhë ngasuncun jan hane



catsingatjen rë xcun ngasunhdë. Hane hora vëhë cافaneyá cjuachan cavatë hacuaha cafani nangui.

*Yatu tyjo xi tsijane ángel*

<sup>6</sup> Hya xi camá ne, yatu ángel xi yaha yatu tyjo jan ne, caviyujucacun xi tsijane tyjo rë. <sup>7</sup> Ángel xi tjun jan ne, catsijane tyjo rë. Hane jercu cavaha tsi ndyoyo xcun nangui. Hacuaha cavixu ndihi xi tecjan cojo jni. Cojo vëhë ne, tsëhë yëjë ni ya xi tjín ne, tsëhë chuva jyan ne, ngu cati. Hisca cojo jingujyë nguijña xi xcuen ne, café cati.

<sup>8</sup> Sehe catsijane ángel xi majo jan tyjo rë. Hane hora vëhë ne, camatsejen sacuaha ngu nguijñacha jyë xi yaha rë ndihi xi cjanenguia ngajñi ndachacun. Hane tsëhë yëjë ndachacun ne, tsëhë chuva jyan cahndë, ngu ni cavuya jni. <sup>9</sup> Ngajan xi tsëhë yëjë chu xi híncha nandá jan, tsëhë chuva jyan chu ne, ngu chu cahme chu; hacuaha tsëhë chuva jyan barcu xi hínchasun ne, ngu café cati.

<sup>10</sup> Sehe catsijane ángel xi majyan jan tyjo rë. Hane hora vëhë ne, canenguia tsëhë ngahnga ngu niñú jyë xi jercu ndaja seti sacuaha seti ngu ndihi jyë. Hane niñú jan ne, casatë rë ndajyë cojo hiscan vetju nandá. Hane tsëhë yëjë nandan jan ne, ngu tsëhë chuva jyan cahndë casatë rë. <sup>11</sup> Niñú jan ne, yaha ñihi rë xca sa xi hmí rë Ajenjo, ta cavuya sa nandá hiscan cjanenguia niñú. Hane jemu cjín xuta cahme me xi cahvi me nandá sa jan.

<sup>12</sup> Sehe catsijane ángel xi ma ñuju tyjo rë, hane choho casahmi cojo tsuhi cojo sá ta jemu camachuva hasen rë. Hacuaha chuva rë jyan niñú ne, ngu ni café ngahñu rë cahvo. Ngajan xi tsëhë ngu cuaha nixtin o tsëhë ngu cuaha nixten ne, ngu tsëhë chuva jyan cahndë ne, camajñu hane casacuiin hasen rë.

<sup>13</sup> Hya xi camá ne, ngajan vasencja rë ngahnga tivitjen ngu chu jya. Hane cuitjin sahmi sen chu cajindaya chu cojo ngu xta hñu:

—Cojo cjuatsehen nuju, ngayun xuta xi nechun ngasunhdë ta, tsëhë xi vangui sa jyan sa ángel xi chaja sa tsijane tyjo rë.

## 9

<sup>1</sup> Hya xi camá ne, catsijane ángel xi má hñu jan tyjo xi yaha, hane cahvë ngu niñú xi cjanengui tsëhë ngahnga xcun nangui. Hane cafahatsja niñú jan llavi tsëhë ngojo rë nduchin. <sup>2</sup> Sehe cavuxaha nduchin ne, hane jemu camiji nihndi rë sacuaha nihndi rë ngu hornu jyë. Hisca tsuhi cojo jingujyë ni tjo ne, tsejen jñu ngatsë rë nihndi xi vetju tsëhë nduchin jan. <sup>3</sup> Hane tsëhë ngajñi rë nihndi jan ne, cavixu chu nchahva xcun nangui. Hane chu jan ne, tsavi cojo chu sacuaha tsavi cojo chu naya xi siu ngasunhdë. <sup>4</sup> Hane cafaha chu cjuá xi tsajin mé sahmi chu cojo nguijña o cojo xca o sa cojo ya ta, suva xi satë chu xuta xi siutaain xten me sellu rë Nina. <sup>5</sup> Casacuiin rë chu cahndë xi tsiquehen chu xuta jan ta, cuenda jemu cuiyujumu me cahntsua hñu sa. Hane cjuahmu xi cuiyuju me cojo ne, jineya sacuaha jineya hiscan cjuaha chu naya.

<sup>6</sup> Nixtin hya ne, xuta jan ne, tsimeje me cjuaveya, peru sacuiin cjuaveya xi cuma rë me. Xuta jan ne, cjuehyacacun me cjuaveya, peru sacuiin.

<sup>7</sup> Chu nchahva jan ne, tjín chjine chu sacuaha naxin xi tjín chjine chu xi cjue chu si. Hínchasun rcu chu ngu xcusun sacuaha ngu corona tsëhë oro, hane xcun chu ne, tsejen sacuaha xcusun rë xcun xuta. <sup>8</sup> Tsa rë chu ne, sacuaha tsarcu yachjin, hane nehñu chu ne, sacuaha nehñu xa cjan rë. <sup>9</sup> Tixtë cun ru cojo ngu xcusun sacuaha chinga quicha, hane xi nuhya rë xi fane tyjunga ru ne, hñu nuhya rë sacuaha cjín camahani carreta xi tijuvë naxin xi cuetsihin si. <sup>10</sup> Ndetsihin chu yaha quicha rë chu naya. Hane cojo quicha jan ne, tjín ru cahndë xi sua chu cjuañihi xuta xcun xi hñu sa jan. <sup>11</sup> Hane sacuaha rey rë chu ne, má ángel rë nduchin jan. Ángel jan ne, Abedón hmí rë sa xi hne hebreo o Apollyon sa xi hne griego. Catsijo cjuá vë ne, vijne Ngu xi Tsiqueya rë.

<sup>12</sup> Vëhë má cjuañihi xi tjún cuma. Jo sa má xi ha meje cuatju.

<sup>13</sup> Hya xi camá ne, catsijane ángel xi má jyun tyjo rë. Ngajan xi canuhya rë ngu xta xi cavetju tsëhë tjehen rë ngasunscun xi tacun xcun Nina, hiscan xi jyihi sacuaha ndyaja ru.

<sup>14</sup> Xta jan ne, cacha cojo ángel xi má jyun xi catsijane tyjo jan. Cuitjin cachja:

—Nismi catsiñuju ángel xi tjiñu tjehen rë ndajyë jyë xi hmí rë Eufrates.

<sup>15</sup> Hane camandaya catsiñuju ángel jan. Ángel jan ne, caviyujuya hisca xi cuechu nu, cuechu sa, hane cuechu nixtin xi cuma meje rë xi tsiquehen rë xuta. Chuva jyan chuva jyan xuta ne, ngu ngu me cueya me. <sup>16</sup> Hane xqui rë sindadu xi vitexa ángel jan ne, jo cientu millón má xi hínchasun naxin. Hane ngahan suva cahndë xqui rë.

<sup>17</sup> Naxin cojo cha xi hínchasun rë chu xi cahvë ngajñi nijña naha ne, cuitjin cun. Cha xi hínchasun rë chu ne, yaja cha chinga quicha xcusun hani rë ndihi, xcusun rë susë hñu hacuaha xcusun sine. Hane rcu chu naxin jan ne, sacuaha rcu chu xa cjan rë cun. Hane tsëhë hntsua chu ne, tivetju ndihi tivetju nihndi cojo azufre. <sup>18</sup> Hane ngatsë rë jyan cjuañihi

jan xi vetju tsêhê hntsua chu matsejen ne, ngatsê rê ndihi, cojo nihndi cojo azufre ne, ngu cahndê tsêhê chuva jyan cahndê xuta cahme me. <sup>19</sup> Jemu tsavi cojo hntsua chu, peru hacuaha tsavi cojo ndetsihin chu. Ndetsihin chu ne, sacuaha chu yê cun ta, tjin rcu. Hane rcu vêhê ne, má sahmi chu dañu cojo.

<sup>20</sup> Peru handasa cuatjin camá, xuta xi cacaa rê me ta cahmii me cojo cjuacjintacun vêhê ne, tsajin camacjincacun me tsêhê cjuatsehen xi casahmi me ta, cafaharcun cuaha me xitsehen cojo nina xi camá tsêhê oro, tsêhê plata, tsêhê quicha sine, tsêhê ndyojo, cojo tsêhê ya. Cafaharcun cuaha me nina jan xi maji vutsejen, maji hndê, maji tsujyihya. <sup>21</sup> Hacuaha tsajin camacjincacun me tsêhê xi catsiquehen xicjin me, o tsêhê xcusun xi sahmi me ngatsê rê xi ma rê me cjuá surqui, o tsêhê cjuatsehen xi sahmi ngajñi rê me sa chjuun cojo chjuun o sa xihin cojo xihin, o sa tsêhê cjuachêjê rê me. Catsindeyaain me xcusun rê me.

## 10

### *Ángel xi yaha xtê lihndi xujun*

<sup>1</sup> Hya xi camá ne, ngajan cahvê ngu ángel xi hñu cjuá, nduvajne tsêhê ngahnga tixtêcun rê yufi. Hacuaha ngu yejña cavindee rê rcu ángel jan. Xcun ne, seti sacuaha tsuhi; hane tyuhmi rê ne, tsejen sacuaha ngu ndihi hndê xi vitjen. <sup>2</sup> Hane yahatsja ngu xtê lihndi xujun xi cavixinga. Hacuaha cavisane ntsacu quixi xcun ndachacun hane xi scun ne, xcun nangui quixí. <sup>3</sup> Ángel jan ne, cajindaya cojo ngu xta hñu, hane nuhya rê sacuaha xi tsichan ngu chu xa. Hacuaha hora xi cajindaya ne, cachja xta rê yatu chuhun vatê. <sup>4</sup> Hora xi cachja yatu chuhun jan ne, cavéññacacun xi tsihindú cjuá jan peru casahmee ta, cahndê ngu xta tsêhê ngahnga xi cachja cojo ná cuitjin:

—Caveni nihindi cjuá rê yatu chuhun vê ta, cuiyujuhma cjuá vê.

<sup>5</sup> Hya xi camá ne, ángel xi cahvê xi secun xcun ndachacun cojo xcun nangui quixí jan ne, catsiquijin tsja quixi ngahnga. <sup>6</sup> Hane casua cjuaquixi rê hisca caveyanangui rê Nina xi tacun yêjê nu yêjê nixtin, me xi hacuaha catsicha rê ngahnga cojo yêjê ni xi tjin rê, cojo nangui cojo yêjê xi tjin rê, cojo ndachacun cojo yêjê xi tjin rê. Cuitjin cachja xi casua cjuaquixi rê:

—Vindeyaain sa rê ta, <sup>7</sup> ha ndiya jiya nixtin xi suacuenda ángel xi má yatu. Hya tsijane tyjo rê ne, hane cumachihin cjuá xi jiyahma rê Nina, cjuá xi casua me camachaya rê profeta xi sahmi xa rê me.

<sup>8</sup> Hya xi camá ne, ngajan cahndê nga xta xi cachja tsêhê ngahnga cojo ná cuitjin:

—Tihin chjehe xujun lihndi xi tjin tã jan tsêhê tsja ángel xi secun xcun ndachacun cojo xcun nangui quixí. —Cuatjin cachja xta cojo ná.

<sup>9</sup> Vêhê xi cêjêjtjengê ángel hane caféhya rê xi catisua ná xujun lihndi jan. Hane cachja cojo ná cuitjin:

—Juhun, chjehe xini cjuá rê cojo sa xi titehercui. Cjuá jan ne, sahmi sa rê cahntsue, peru ntsove ne, sahmi haxi rê.

<sup>10</sup> Sehe cafaha xujun lihndi jan tsêhê tsja ángel, hane cajínê. Hane ntsuva ne, camá haxi rê sacuaha xi cajínê tsjen, peru xi café cajínê ne, cahntsua canangui naha ne, camahmu.

<sup>11</sup> Sehe cavuya cachja nga cojo ná cuitjin:

—Tjin xi cuinoje ngu ndiya nga ngatsê rê Nina. Cuinoje tsêhê xutacjin, xuta xi hacjahi hacjahi nación rê me, xuta xi hacjahi hne chja me, hacuaha cojo xuta xi hñu cjuá me ngatsê rê xi vitexa me.

## 11

### *Jo testigu xi cahme ne, cavuya nga cjuahñu rê*

<sup>1</sup> Hya xi camá cajínê ne, casua ná ngu rquí ya naxu xi machjirêhê sacuaha ngu ya chuva. Sehe cachja ángel jan cojo ná cuitjin:

—Tihin chjehe chuva rê yungun xi matitjun rê Nina cojo tsêhê ngasunscun. Hacuaha texqui me xi faharcun ngajan. <sup>2</sup> Xi nichove yungun xi matitjun ne, hacuiin cojo cahndê xi má ndatsen rê nichove. Xi canichuviin vê. Cahndê vêhê ne, satêtsja xutaxin xi macjaain rê me Nina. Me xi cuacun vê ne, tsinguetsun rê vê, hacuaha tsinguetsun rê nandya rê Nina xcun xi yachan jo sá cojo xcusun tsehen xi cún me. <sup>3</sup> Xcun nixtin vêhê ne, tsingátju jo testigu naha, hane me xi cuacun vê ne, cuichja me xcusun xi sehe cumá. Ngu mil cojo jo cientu cojo jyanchan nixtin jan ne, cuichja me cjuá naha, hacuaha cuaja me tsjian rê cjuachoho.

<sup>4</sup> Jo me vêhê ne, hacui jo ya olivu xi tjin cjuá tsêhê, hacuaha hacui me xi jo candelero xi siu xcun Nina, me xi vitexa ngasunhndê. <sup>5</sup> Sa tjin ngu xuta xi meje sahmi me dañu me ne, cuetju ndihi tsêhê hntsua me hane tsicjêya rê xi chohovêê rê me. Chuva vêhê cueya tu yo ni xi meje xi choho sahmi cojo rê me. <sup>6</sup> Jo me vêhê ne, siutsja me ngahñu xi cuechja me ngahnga sehe cuaain tsi nixtin xi cuehya me. Hacuaha satê rê me ngahñu xi sahmi me xi

nandá ne cuya jni o xi cuanguihmu rë me nangui cojo yëjë xcusun cjuacjintacun. Cuatjin cumá tu cutjin cjin ndiya cuma meje sahmi me.

<sup>7</sup> Ndatjin, peru hya xi café casua me cjuaquixi rë me ne, ngu me sacuaaha ngu chu chojyihí xi mijí tséhë nduchin ne, sahmi chu si cojo rë me, hane scaa ru cjue chu xcun hane tsiquehen chu me. <sup>8</sup> Hane nima jan ne, hacuini xinchaniji ta cuiyuju ndiyatë rë ciudad jyë. Ciudad jyë jan ne, sa xi chjahanchuvan ne, cuma cuinújan xi hmí rë Sodoma cojo Egipto. Ngajan ni ne, cahme Nai naja xcun cru, hane ngajan cuiyuju nima. <sup>9</sup> Xcun xi jyan nixtin vasen ne, jemu cjuehe xuta. Cjuehe me tséhë yëjë ni nandya, tséhë yëjë ni tjë, tséhë yëjë ni hne cojo tséhë yëjë ni nación. Cjuehe me scutsejen me nima, hane tsingatiin me xi xinchaniji nima. <sup>10</sup> Hane xuta xi siu ngajan ne, jercu ndama rë me ngatsë rë cjuaveya jan. Hisca cuiyuju me suhi hane tsingatju me cuatjo ngajni xicjin me. Cuatjin sahmi me ta tjin rë me cjuasua xi café jo profeta jan xi jercu casua me cjuafihí.

<sup>11</sup> Peru xi café jyan nixtin vasen jan ne, xta xi sua Nina xi tséhë cjuahnu ne, cavisehen nga rë nima. Hane caxinchacun quixi me. Ngajan xi ngu chirxun jyë cavisehen rë xuta xi cavutsejen rë me. <sup>12</sup> Hya xi camá ne, me xi cavuya xta rë ne, cahndë me ngu xta hnu xi cachja tséhë ngahnga cuitjin:

—Nduvun nuju nguehe.

Ngajan xi quijiniji me ngahnga ngajni ngu yufí. Hane cavëë xuta xi chohovëë rë me ta quijiniji me. <sup>13</sup> Ha hora vëhë ni ne, jercu cjuachan cafani nangui hane tséhë chuva rë të rqui tséhë ciudad jan ne, cavixujne ngu. Hane ngatsë rë me vëhë ne, yatu mil xuta cahme. Ngajan xi xuta xi cavangui me ne, jercu catsacjun me camá. Sehe casahmi jyë casahmi hnga me Nina xi tacun ngahnga.

<sup>14</sup> Cojo vëhë cajnetaha cjuacjintacun xi majo. Peru ha cjuehe xi ma jyan.

*Xcusun xi camá hya xi cafane tyjo xi má yatu*

<sup>15</sup> Hya xi camá ne, catsijane ángel xi má yatu tyjo rë, sehe canuhya rë tséhë ngahnga xta hnu xi cachja cuitjin:

Jinguyë rë nandya xi vitexa xuta ngasunhdë xi matitjun ne, cavisehen gobiernu rë Nina naja cojo Cristu, me xi catsingatju me.

Hane me vëhë sahmi me gobiernu yëjë nu yëjë nixtin.

<sup>16</sup> Ngajan xi catsiyëjë can nuju xuta changá xi siu me xcun cahndë rcun rë me ngajan xcun Nina ne, caticjan xcun me, hane cafaharcun me Nina. <sup>17</sup> Hane cuitjin cachja me:

Tihin nacuehji nuju, Tatá Nina. Ngayun jercu hnu camahani ngayun.

Hacui ni yun hya, hacui ni yun quihndë, hane hacui ni yun yëjë nixtin.

Hindë ticujun ngahnu jyë nuju xi satë nuju

hane ha tivetsuhun nihnu gobiernu.

<sup>18</sup> Xuta ne, choho hvë me yun,

peru cavechu nixtin xi macjan nuju cojo cjuahngatacun rë me.

Cafehe hora xi nihnu cuendun tséhë nima.

Tuhun chji rë me xi casahmi xa nuju sacuaaha profeta,

sacuaaha xuta nuju, sacuaaha xutaxin xi faharcun me fihí nuju.

Tuhun rë yëjë ni me, sa yehe sa langa me.

Hane me xi tsicjya rë cojo xcusun rë ne, tuhun rë me xi cjueya me.

<sup>19</sup> Ngajan xi cachjahaxin rë tsjian rë tingotjo rë yungun rë Nina ngajan ngahnga, hane cahntsua yungun jan ne, camatsejen caxa ximinchacun xi yaha contratu xi casahmi Nina cojo xuta rë me. Cavatë ndihichuhún, cafaneya, catsinga chuhun, cafani nangui hacuaaha cavaha ngu tsi ndyojo xi jercu hnu camahani. Cuatjin camá.

## 12

*Scaanya yë xitsehen cojo quihndi xi catsingatju Nina*

<sup>1</sup> Hya xi camá ne, camatsejen cjuarcun xi sahmi sen ngajan ngahnga. Camatsejen ngu chjuun xi tixtëcun ran tsuhi. Hane sá ne, tacun ngahma rë ntsacu na. Hane ngu corona xi camá tséhë tejó niñu ne, vëhë quitaha xten na. <sup>2</sup> Hane chjuun jan ne, meje tsin quihndi ran. Jercu jindaya na ngatsë rë cjuahmu cojo cjuachoho tséhë hacutjin tivatju ran. <sup>3</sup> Hane camatsejen nga ngu sen ngajan ngahnga ta, camatsejen ngu yë xi jercu jyihí chu; hani xcusun ru. Chu jan ne, yatu má rcu chu, të má ndyaja ru. Hane jima ngu rcu chu hincha sun ngu corona. <sup>4</sup> Cojo ndetsihin chu ne cajavëjne chu ngu cahndë tséhë jyan cahndë rë niñú rë ngahnga, hane cacandi chu nangui. Hane yë jan ne, cafaña vasen chu xcun chjuun xi ha hindëya tsin quihndi ran cojo sa xi tsinguijne jingu chu quihndi rë na hora xi tsin. <sup>5</sup> Hya xi camá ne, na vëhë ne, catsin rë na ngu quihndi xihin. Hane quihndi xihin jan ne, yaha bastón xi cuitexa me cojo yëjë ni nación cojo ngahnu cjuaxi tjin rë me. Hane quihndi ran jan ne, cachjaha rë xcun Nina, ngajan xcun cahndë rcun rë me. <sup>6</sup> Hane chjuun jan ne,

cavanga na quiji na ngu xín. Ngu cahndé xi Nina tjin chjine rè me xi cumá ran. Hane ngajan sacu xi siné na xcun ngu mil cojo jo cientu cojo jyanchan nixtin.

<sup>7</sup> Hya xi camá ne, cavetsihin ngu si ngajan ngahnga. Miguel cojo yahnga ángel ladu rè me ne, casahmi me si cojo yé xitsehen jan hacuaha cojo ángel ladu rè xitsehen. <sup>8</sup> Hane cacaaín rè yé jan cojo ángel ru, hacuaha catsichaja chu cahndé ru ngajan ngahnga. <sup>9</sup> Vèhè xi caningatjen ru xcun ngasunhdé. Yé jan ne, jemu changá chu. Xitsehen xi matitjun o Satanás hmí ru. Chu ndacha chu, vindacha ru xuta ngasunhdé. Hane caningatjexin ru cojo ángel ru hiscan ngasunhdé.

<sup>10</sup> Hya xi camá ne, cahndé ngu xta xi jemu hñu cachja ngajan ngahnga cuitjin:

—Quihndé cavechu nixtin xi Nina cuaxétje me xuta, cumatsejen ngahñu rè me cojo gobiernu rè me. Hacuaha tsejen xi hñu cjua rè Cristu, me xi catsingatju me ta, cama catsingatjexin me chu xi vinchajyé xingueen. Nixtin nixten cavinchajyé rè me xcun Nina naja, peru hindé tsajin. <sup>11</sup> Hane xingueen jan ne, cacaa rè quiji me xcun ngatsé rè jni rè Tsánga jan cojo ngatsé rè cjuaquixi rè me xi casua me tséhé Nina ta, hacuín machuvacacun me xi cjue xcun me cojo Nina handasa cjueya me. <sup>12</sup> Hane ngatsé rè vèhè ne, ¡catama sua rè ngahnga cojo me xi siu xcun! Peru ¡ay tséhé nangui cojo ndachacun! ta, tséhé xi canduva tjengu rè xitsehen xi matitjun. Hacuaha jemu quitsé rè cjuaxti tséhé xi vèè xi nixtin rè ne, meje cuijnetaha. —Cuatjin cachja xta jan.

<sup>13</sup> Hya xi camachaya ru xi caningatjen ru nangui ne, cavetsihin cavanga cojo chu chjuun xi catsi ran quihndé xihin jan. <sup>14</sup> Peru chjuun jan ne, cafahatsja na jo tyjunga rè chu jya xi jercu jyíhi cojo sa xi cuma cuitjen na tséhé chu yé hiscan cahndé xi tjin chjine xi cuma ran ngajan ngu xín. Hane ngajan sacu xi siné na xcun ngu chan cojo jo chan cojo vasen chan, hane cuechiintaain chu yé na. <sup>15</sup> Ngajan xi chu yé jan ne, cavaxé chu tséhé hntsua chu nandá sacuaaha ngu ndajyé cojo sa xi cuechutaha rè chjuun jan ne, cjue tyjava na cojo ngahñu rè ndajyé. <sup>16</sup> Peru nangui ne, cavisecoo rè chjuun jan, hane caseya tsjuhun ne, cavingui rè ndajyé xi cavetju rè yé jan. <sup>17</sup> Vèhè xi yé jan ne, jercu camaxti ru cojo chjuun jan hane sehe quiji casahmi chu si cojo tjé rè na xi cavangui. Casahmi chu si cojo xuta ran xi vetjo cjua xi cavitexa Nina hacuaha sua me cjuaquixi rè Jesús.

## 13

### *Yé xitsehen ne, casua chu ngahñu xi cjuahatsja chu chojyíhi*

<sup>1</sup> Hya xi camá ne, cavejña chu yé jan tjeheh ndachacun, hane cahvé xi ngu chu chojyíhi ne, tivetju chu tséhé ndachacun. Tè má ndyaja ru hacuaha yatu má rcu chu. Hane tè corona seya xcun ndyaja ru. Hane jima ngu rcu chu ne, yaja ngu ñihi xi tsitjungui rè Nina. <sup>2</sup> Chu chojyíhi xi cahvé vè ne, sacuaaha ngu xa hindu jyé cuatjin jyíhi chu, peru ntsacu chu cojo tsja chu ne, sacuaaha ntsacu cojo tsja chu oso; hane hntsua chu ne, sacuaaha hntsua chu xa sine cjan rè. Hane yé jan ne, casua chu vè ngahñu ru cojo cahndé rcur rè chu, hacuaha casua xa rè chu. <sup>3</sup> Hane ngu rcu chu jan ne, casacuhmu rè hane tsejen xi tsajin rqui rè, ta cueya. Peru cojo yéjé sa ne, camandaja. Hane jinguyjé ni xuta ngasunhdé ne, jercu quijircun rè me xi camandaja. Hane cojo cjuasua tjengu me chu. <sup>4</sup> Hane xuta ne, caticjan xcun me cafaharcu me chu yé jan ta, tséhé xi casua yé cahndé xi vitexa chu. Hacuaha cafaharcun me chu chojyíhi jan. Cuitjin cachja me tséhé chu:

—Ndstu yo xi cuechu xi cumá sacuaaha chu vi. Ndstu yo cuma scaanya cojo chu. —Cuatjin cachja xuta tséhé chu.

<sup>5</sup> Chu jan ne, casetaha ngu hntsua chu xi jemu cojo cjuaxta chja chu hacuaha tsitjungui ru Nina. Hane casacu ru cahndé xi cuitexa chu xcun xi yachan jo sá. <sup>6</sup> Hane cavetsihin xi choho cachja chu tséhé Nina, canchatí chu tséhé ñihi rè cojo tséhé cahndé hiscan viyuju Nina, hane tséhé yéjé sa me xi siu me ngahnga. <sup>7</sup> Hane cafahaxa chu xi sahmi si chu cojo xuta xi tyjahi cjuatacun rè me cojo me xi ndaja cjuinduju me cojo Nina. Hane caa ru cjue chu xcun. Hacuaha cafaha xa chu xi cuitexa chu xuta rè yéjé ni tjé, yéjé nandya, yéjé hne cojo yéjé nangui. <sup>8</sup> Hane jinguyjé me xi viyuju me ngasunhdé ne, cafaharcun me chu. Yéjé ni me xi tsajin ñihi rè me xcun xujun rè Tsánga rè Nina xi hisca ntsacu cavetsihin ngasunhdé ne, cavejña xi cueya. Tsajin ñihi rè me jan ta, tsajin rè me ngahñu xatsé. Hane me vèhè cafaharcun me chu.

<sup>9</sup> Yo ngayun xi tjin nuju cjuasua xi cuinuhyun cjua vihi, ndaja tetuhunrcun. <sup>10</sup> Me xi saté rè xi cuma me presu, cuatjin cumá. Me xi saté rè me xi cueya me cojo quicha, cuetjucaa jain. Jinguyjé rè vèhè ne, mameje rè xi xuta xi macjain rè me Nina ne, cjuecani rè xi cumacjain sa rè me.

<sup>11</sup> Ngaxtun vèhè ne, cahvé nga ngu chu chojyíhi, hane tivetju chu tséhé nangui. Chu chojyíhi xi majo ne, tjin jo ndyaja ru sacuaaha tjin chu tsánga, peru chja chu sacuaaha ngu yé jyé. <sup>12</sup> Hane hacuaha cojo chu vèhè casaté rè chu ngahñu xi casaté rè chu xicjin cojo ñihi ru.

Hane casahmi chu vè xi yèjè ni xuta xi siu ngasunhndè ne, cjuaharcun me chu chojyihì xi tjun jan, chu xi handasa cueya chu xi casacuhmu rè ne, camandaja. <sup>13</sup> Hane cama casahmi chu vè cjuarcun yehe cojo seña. Casahmi chu xi cuixu ndihì tsèhè ngahnga, hane xuta ngasunhndè ne, cavutsejen me cjuarcun. <sup>14</sup> Cuatjin cavindacha chu vè xuta ngasunhndè cojo cjuarcun xi cama casahmi chu ngatsè rè chu xi tjun. Hane cavitexa chu xi xuta ne, cuaxètaha me ngu xcusun rè chu tjun jan xi casacuhmu rè cojo quicha peru cojo yèjè sa ne, quicun chu. Hane cuatjin casahmi me. <sup>15</sup> Hane chu xi majo jan ne, casacu ru cahndè xi sua chu xta rè xcusun jan cojo sa xi cuma cuichja xcusun jan, hacuaha cuma sahmi xcusun jan xi cueya tu cutjin cjin me xi tsingatiin xi cjuarcun xcusun jan. <sup>16</sup> Hane xcusun jan ne, casahmi ngujyè xi yèjè ni xuta ne, setaha ngu sellu tsja ladu quixi o sa xten me. Cuatjin casetaha rè xuta, sa quihndi, sa changá me, sa nchina, sa yuma me, sa xuta ndaya tjin o sa xi mosu hndixahan; yèjè ni me casetaha rè me. <sup>17</sup> Hane chuva vèhè ne, sacuiin cahndè xteña hacuaha sacuiin cahndè cuatsè sa xi casetaain rè me sellu jan cojo ñihi rè chu chojyihì jan o cojo xqui rè letra rè ñihi ru.

<sup>18</sup> Cjuatacun vihi ne, tjin mé vijne, peru meje rè xi cuacjantaha me cjuatacun rè me ta cuitjin fi cjuat: Catitsichuva me xqui rè chu jan ta, hatuxa xqui rè ngu xuta xihin. Hane xqui rè jan ne, jyan cientu cojo jyanchan jyun má.

## 14

*Ngu cientu cojo yachan ñuju mil me xi cavatsè Nina*

<sup>1</sup> Hya xi camá ne, cavutsejen nga, hane ngajan secun Tsánga jan, secun quixi xcun naxi xi hmí rè Sion. Hacuaha siu cojo me ngu cientu cojo yachan ñuju mil xuta xi casetaha xten me ñihi rè Tsánga jan cojo ñihi rè Nahmi rè me. <sup>2</sup> Hacuaha canuhya rè ngu xta tsèhè ngahnga xi nuhya rè sacuaaha fane jemu cjin nandan xi vanga o sacuaaha xi jemu hñu faneya. Hacuaha nuhya rè sacuaaha xi tsijane cha chjine arpa rè cha. <sup>3</sup> Hane xuta jan ne, tsíse me ngu sun xatsé xcun cahndè rcun rè Nina hacuaha xcun ñuju xcusun xi quicun cojo can ñuju xuta changá xi viyuju me ngajan. Hacuuiin yèjè me xi tjin rè me cahndè xi cuma rè me sun jan ta, suvá ngu cientu cojo yachan ñuju mil me xi cuacun jan xi cachaha rè me tsèhè ngasunhndè, me vèhè cuma rè me. <sup>4</sup> Me xi cuacun vè ne, catsinguetsiin me cjuatacun rè me cojo yachjin, ta caviyuju suva me. Me xi cuacun vè ne, tjengui me Tsánga tu jani xi cjui. Me xi cuacun vè ne, hacuaha me xi cachjahaxin rè tsèhè ngajñi rè yahnga xuta xi cuma me sacuaaha ngu cuatjo xi cumá rè Nina cojo Tsánga. <sup>5</sup> Me xi cuacun vè ne, hisca xi ngu cjuandesu cavetjiin tsèhè hntsua me; ta tsajin xi cún rè me.

*Jyan ángel xi cachja hacutjin cumá cojo xuta xi faharcun rè chu chojyihì*

<sup>6</sup> Sehe cahvè ngu ángel xi hacjahi xi vitjen vasencja rè ngahnga. Ángel vèhè ne, cjuecani rè cjuandajyihì rè Nina xi machuvaain ngahñu rè. Hane sua rè xuta ngasunhndè tsèhè yèjè ni nación, o tjé, o hne, o nandya xi cumachaya rè me cjuat jan. <sup>7</sup> Hane cachja cojo xta hñu cuitjin:

—Chjuhuncun rè Nina hacuaha nihñu jyè nihñu hnga me ta, tsèhè xi ha cavechu hora xi sahmicuenda me yèjè ni. Chjuhuncun me xi casahmi ngahnga cojo nangui cojo ndachacun cojo nanda yufa.

<sup>8</sup> Sehe tjengui rè me ngu ángel xi majo, hane cachja cuitjin:

—Camá cafè ngahñu cjuat rè gobiernu xi vitexa rè nandya Babilonia. Xuta rè nandya jan ne, catsitsehen yahnga xuta tsèhè xi sacuaaha catsichihì rè me cojo xan xi hacui cjuatsehen xi sahmi ngu xihin cojo chjuun xi hacuiin tsèhè.

<sup>9</sup> Sehe tjengui rè me ngu ángel xi majyan, hane cachja hñu cuitjin:

—Yo xi cjuaharcun rè chu chojyihì o sa xi cjuaharcun rè xcusun ru, hane setaha sellu ru xten o sa tsja me ne, <sup>10</sup> xuta jan ne, tjin rè me xi cuihngui me xan xi hacui cjuacjan rè Nina, hane tsajin mé xi tsingujne rè ngahñu rè cjuacjan jan. Xuta jan ne, cuatju me cjuahmu tsèhè ndihì tsèhè azufre xi seti, cuatjin cuatju me xcun ángel cojo Tsánga. <sup>11</sup> Hane nihndi rè ndihì rè cjuahmu rè me ne, cuiji yèjè nu yèjè nixtin. Sa nixtin sa nixten ne, sacuiin rè me cahndè cjuahajenda me tsèhè. Cuatjin cumá cojo me xi faharcun ru cojo xcusun ru. Cuatjin cumá cojo me xi siutaha rè sellu ru.

<sup>12</sup> Jinguyèjè rè xi vatju vèhè ne, mameje rè xi xuta xi macjain rè me Nina ne, cjuecani rè xi cuetjo me cjuat xi cavitexa Nina hacuaha cumacjain sa rè me.

<sup>13</sup> Hya xi camá ne, cahndè ngu xta tsèhè ngahnga xi cachja cojo ná cuitjin:

—Nihndi cjuat vihi: “Xuta xi ha cueya me quihndè cojo nixtin xi sehe nduva ne, jercu ndaja tsèhè me sa xi tjengui me ndiya rè Nina.”

Hasen rè Nina ne, chja tsèhè me cuitjin:

—Juun, cjuahajenda me tsèhè xi tsijenda rè me ta, tsèhè xi cumatsejen chjì rè xa xi casahmi me. —Cuatjin chja Hasen rè Nina.

*Ángel ne, fanga me xuta ngasunhndë xi satë rë me cjuacjan rë Nina*

<sup>14</sup> Hya xi camá ne, cavutsejen ngu yufí tyava, hane xcun yufí ne, tacun ngu xi tsejen sacuaaha quihndi rë xuta. Quisun rcu me ngu corona tsëhë oro hane yahatsja me quicha yuju ta cuatë me xitjë. <sup>15</sup> Ngajan xi cavetju nga ngu ángel tsëhë ndava Nina hane hñu cajindaya cojo ángel xi tacun xcun yufí jan. Cuitjin cachja:

—Chjuhun quicha nuju nangun ta, ha cavechu nixtin xi xtí ta, tsëhë xi camá quichji cosecha tsëhë ngasunhndë.

<sup>16</sup> Hya xi camá ne, me xi tacun xcun yufí jan ne, cavaja me nangui cojo quicha rë me, hane tjë rë ngasunhndë ne, camá cachaya rë.

<sup>17</sup> Hya xi camá ne, hacuaaha cavetju ngu ángel xi cavetju tsëhë ndava Nina xi tacun ngahnga ne, hacuaaha yaha ngu quicha yuju. <sup>18</sup> Hane cavetju ngu ángel xi majo. Ángel vë ne, tacuntsja rë ndihi. Hane ángel vë ne, hñu cajindaya cojo ángel xi yaha quicha yuju. Hane cuitjin cachja cojo:

—Chehe quicha yuju riji ne, tiche yëjë hne rë uva tsëhë xcun ngasunhndë ta tsëhë xi uva rë ne, jemu quichji.

<sup>19</sup> Hya xi camá ne, ángel jan ne, catsingatju quicha rë xcun nangui ne, cavatë rë uva xi hacui xuta tsehen. Hane cavincha rë cahndë hiscan xinune rë cojo sa xi cumatsyuhun ne cuetju nandá rë sacuaaha satë rë matsyuhun cjuacjan rë Nina. <sup>20</sup> Camatsyuhun hiscan xín hitsë tsëhë nandya, hane jemu cavetju jni hiscan camatsyuhun uva jan. Xi camiji jni ne, cavechutaha rë hiscan frenu rë chu naxin hacuaaha cavanga ngu chuva rë jyan cientu cojo can kilómetro.

## 15

*Yatu ángel xi siutsja cjuacjintacun*

<sup>1</sup> Hya xi camá ne, cahvë ngajan ngahnga ngu nga sen cjuarcun xi jemu fircun naja. Cahvë yatu ángel cojo yatu cjuacjintacun. Hane cojo cjuacjintacun jan ne, cuijnetaha cjuañihi xi cumá ta, sejuu cjuacjan rë Nina.

<sup>2</sup> Hacuaaha cahvë sacuaaha ngu ndachacun hasen sacuaaha hasen ndyojo tsin, hane tsejen sacuaaha tejcan cojo ndihi. Hane ngajan hinchacun xuta xi caca rë me quiji xcun tsëhë chu chojyihí cojo xcusun ru cojo xqui rë ñihi ru. Secun me cojo arpa xi cafahatsja me tsëhë Nina. <sup>3</sup> Me vëhë ne, së me sun xi tsëhë Moisés, me xi casahmi xa rë Nina hane hacuaaha tsëhë Tsánga. Cuitjin fi cjuar rë:

Jemu má nihñu xa, jemu fircun niji tsëhë.

Nai niji ngayun. Ngayun, tsajin mé xi maji nihñu.

Quixi nújun, hacuaaha chichihin ndiya nuju.

Ngayun vitexun jinguyëjë ni nación.

<sup>4</sup> ¿Yo xi tsacjuiin nuju, tatá? Tsajin yo.

Yëjë ni me sahmi jyë sahmi hnga me yun ta tsëhë xi ngu ni ngayun xi tyjahi cjuatacun nuju. Vëhë xi yëjë ni nación cuinduva cuiticja xcun nuju tsëhë xi cumatsejen ndaja xa cjuaquixi nuju.

<sup>5</sup> Hya xi camá xi cavatju vihi ne, cavutsejen nga ngahnga ne, hane tixaha hiscan cahndë rcun rë ndihya tsjian rë Nina hiscan hinchacuerdu xi camá cojo Nina. <sup>6</sup> Hane tsëhë ngajan ne, cavetju yatu ángel xi cuacun jan xi siutsja me xa rë yatu cjuacjintacun xi cumá. Ángel jan ne, yaja tsjian rë nachjun ndaja xi ndaja tyjahi. Hacuaaha tjihñucja ndanisin rë cojo cinturón tsëhë oro. <sup>7</sup> Ngajan xi ngu xi quicun jan xi ñuju má ne, casua rë yatu ángel xi cuacun jan ngu ngu tyucu rë oro xi ndaja teya. Hane tyucu jan ne, quitsë rë cojo cjuacjan rë Nina, Nina xi tacun cuaha me yëjë nu yëjë nixtin. <sup>8</sup> Hane ndihya tsjian rë Nina jan ne, catsë rë cojo nihndi xi nduva tsëhë cjuahasen rë Nina xi seti cojo ngahñu rë me. Cuatjin camá xi tsajin yo ma visehen ngajan hisca xi cuijnetaha nixtin rë cjuañihi xi yahatsja yatu ángel jan.

*Tyucu xi hinchacjuacjan rë Nina*

## 16

<sup>1</sup> Hya xi camá ne, cahndë ngu xta hñu xi vetju tsëhë ndava Nina hane cachja xta jan cojo yatu ángel jan cuitjin:

—Tangun titejnu tyucu jan cojo sa xi cjuacjan rë Nina ne, satë rë ngasunhndë.

<sup>2</sup> Cojo vëhë ne, quiji ángel xi tjun jan ne, cavitsingaxten rë tyucu rë xcun nangui. Hane yëjë xuta xi yaha me sellu rë chu hacuaaha faharcun me xcusun ru ne, casetaha rë me ngu xcusun chíhin vetju xi jemu cjan rë.

<sup>3</sup> Sehe ángel xi majo ne, cavitsingaxten tyucu rë xcun ndachacun. Hane ndachacun ne, cavuya jni sacuaaha jni rë ngu nima. Ngajan cafë cahme xi hinchac rë ndachacun.

<sup>4</sup> Sehe ángel xi majyan ne, cavitsingaxten tyucu rë cojo sa xi casatë rë nandan ndajyë cojo hiscan xi vetjun nandá. Hane nandan jan ne, hacuaha cavuya jni. <sup>5</sup> Ngajan xi cahndë xi cachja ángel xi tacuntsja nandan jan cuitjin:

—Quixi yun chuva vihi. Ngayun nechun cuaha, hacuaha cavinechun. <sup>6</sup> Quixi yun chuva vihi ta catsinguitsojo me jni rë xuta nuju cojo profeta xi chja cjua nuju. Hane canicuyun chuva rë ta hacuaha cavanga jni rë me.

<sup>7</sup> Hacuaha canuhya rë xi ngasuncun rë yungun ne, cafayangui cuitjin:

—Juun, cuatjin camameje rë. Tatá, Nina yun, hane tu mé ni ne, ma nuju. Jemu quixi cjua xi vitexun.

<sup>8</sup> Hya xi camá ne, ángel xi má ñuju ne, cavitsingaxten rë tyucu rë xcun tsuhi. Ngajan casacu rë ngahñu xi jemu cuaca rë xuta cojo ndavá rë. <sup>9</sup> Hane xuta ngasunhdë ne, cati me cojo ndavá hñu. Peru cahndë xi sahmi jyë sahmi hnga me Nina ne, canchati me tséhë ñihi rë Nina, me xi vitexa me xcun yëjë cjuacjintacun vihi.

<sup>10</sup> Hya xi camá ne, ángel xi má hñu ne, cavitsingaxten rë tyucu rë xcun cahndë rcu rë chu jan. Hane ngajan camá xi nacióñ xi sahmi chu gubiernu tséhë ne, jemu jñu camahani camá jinguyjé ni. Hane xuta ne, cajinëne me neje me tséhë xi jercu má rë me. <sup>11</sup> Hane nchati me tséhë Nina rë ngahnga ngatsë rë cjuahmu rë me cojo tséhë nindu xi vetju yojo rë me. Nchati me tséhë Nina cahndë rë xi choho camá rë me tséhë cjuatsehen rë me.

<sup>12</sup> Hya xi camá ne, ángel xi má jyun ne, cavitsingaxten rë tyucu rë xcun ndajyë jyë xi hmí rë Eufrates. Ngajan xi nandan jan ne, caxiya hane camandaja ndiya rë cojo sa xi ma vatjucja rey xi nduva ladu vetjucaa tsuhi.

<sup>13</sup> Sehe cahvé jyan hasen tsehen xi cun sacuaha licuen, cavetju tséhë hntsua chu yë jyë jan, tséhë hntsua chu tjun cojo tséhë hntsua chu ndacha. <sup>14</sup> Hane hasen jan ne, hacui hasen tsehen xi ma sahmi seña cjuarcun hacuaha hacui xi sahmi tangun rey, xuta matitjun rë jinguyjé ni ngasunhdë cojo sa xi xuta jan ne, sahmi si condra rë Nina xi ma sahmi me yëjë ni hya xi cuetjucaa nixtin rë Nina.

<sup>15</sup> Tetuhuncun cjua rë Nina xi chja cuitjin: “Tjin chjine yun ta, tu ñahñu ni nduvá sacuaha nduva ngu chëjë. Jercu ndaja tséhë yo xi tacun quicun, sacuaha ngu me xi tacun chjine tsjian rë me xi cuaja me cojo sa xi tsjin yo sacutsejentë cjuasava rë me.” Cuatjin chja cjua jan.

<sup>16</sup> Hane casahmi xi cama tangun rey jan ngajan ngu cahndë xi hne hebreo ne, hmí rë Armagedón.

<sup>17</sup> Hya xi camá ne, ángel xi má yatu ne, cavitejnu tséhë tyucu rë ngajñi tjo. Ngajan xi hiscan ndava Nina, hiscan cahndë rcun rë me, canuhya rë ngu xta hñu xi chja cuitjin:

—¡Ha camá cajnetaha!

<sup>18</sup> Ngajan xi sehe cavetsihin cavatë ndihi chuhun, cafaneya, catsinga chuhun, cojo xi jemu hñu cafani nangui. Hisca cjëë cjuani nangui cuatjin jinguyjé rë xi caviyuju xuta xcun ngasunhdë ta, jercu cjuachan camahani cafani nangui. <sup>19</sup> Hane ciudad jyë ne, jyan rquí caseya tsuhun. Hacuaha yahnga nandya rë ngasunhdë ne, cavixujne. Hane Nina ne, catsinguitsen me cjuatsehen rë nandya Babilonia jyë hane casahmi me xi hacuaha cuma rë nandya jan castigu tséhë cjuacjan rë Nina xi hincha tyucu. <sup>20</sup> Hacuaha nangui xi vetju vasencia ndachacun cojo naxi ne, hya cafëya. <sup>21</sup> Hane tséhë ngahnga ne, tsi ndyojo yehe cavixusun rë xuta jan. Hane chuva ngu tsi ndyojo vë ne, sacuaha yachan kilu hai. Hane xuta ne, canchati me choho cachja me tséhë Nina ngatsë rë cjuacjintacun tséhë tsi ndyojo jan ta, cjuacjintacun jan ne, jemu chircun camahani.

## 17

### *Hacutjin cjuë na xi viteña yojo rë*

<sup>1</sup> Hya xi camá ne, ngu tséhë yatu ángel jan xi yaha tyucu ne, canduva tjengui ná ne, cachja cuitjin:

—Ndove ne, tsingácun ri castigu rë na xi viteña yojo rë, na xi tacun na xcun jemu cjín nandá. <sup>2</sup> Cojo na vëhë ne, rey tséhë nangui ne, casahmi me cjuatsehen; hane xuta ngasunhdë ne, catsichihí rë me cojo xan xi hacui cjuatsehen ran. —Cuatjin cachja ángel cojo ná.

<sup>3</sup> Ngajan xi ángel ne, quijicojo ná ngajñi nguijña ngu cahndë xín. Hane ngajan cahvé ngu chjuun xi quisun na ngu chu chojyihí xi hani xi yatu rcu chu cojo tē ndyaja ru. Hane chu jan ne, yaha ñihi xi tsitjungui rë Nina. <sup>4</sup> Chjuun jan ne, yaja na tsjian chacun xi moradu cojo hani. Hacuaha tsjian vëhë hisca seti jyihí cojo oro cojo ndyojo ndacun hane cojo tu seti xi cavaqui rë. Hane yahatsja na ngu tyucu tséhë oro xi quitsë rë cojo xcusun tsehen cojo xi chocun rë cjuatsehen rë na. <sup>5</sup> Hane xten na ne, camahindu cjua vihi: “Ngu cjua xi meje rë cjuatacun: Babilonia, nangui xi matitjun. Nangui xi hacui na xi viteña yojo rë cojo

yahnga xuta xi sahmi me cjuatsehen ne, fayangui xuta xcusun rë na.” Cuatjin camahindu. <sup>6</sup>Hane camachaya ná ta na vëhë ne, chihi na ta cahvi na jni rë nima xi cahme me ngatsë rë xi macjain rë me Nina cojo jni rë nima xi casua cjuaquixi rë Jesús.

Hane hya xi cahvë na ne, ngahan ne, jercu quijircu camahani ná. <sup>7</sup>Ngajan xi cachja ángel cojo na:

—¿Mé má fircun ri? Ngahan ne, suacuenda ri cjuatacunhma tsëhë chjuun jan cojo tsëhë chu chojyihí xi quisun na, chu xi tjin yatu rcu chu cojo të ndyaja ru. <sup>8</sup>Chu chojyihí jan ne, quicun chu hatsëë, peru quihndë tsajin chu. Hane xi cuinduvaniji chu tsëhë nduchin ne, jiya ndiya chu xi cjuëya chu. Hane xuta xi viyuju me ngasunhndë ne, me xi casetaain fihi rë xcun xujun, xujun xi hisca ntsacu cavetsihin ngasunhndë, hincha fihi rë me xi satë rë me cjuahñu xatsë xi sua Nina ne, me vëhë cjuercun rë me. Cjuercun rë me hya xi scuëë me chu ta quicun chu hatsëë, tsajin chu quihndë, peru cuya cuejña nga chu.

<sup>9</sup>Mameje rë cjuatacun ta chja nuhya rë, peru yatu rcu chu ne, nuhya rë xi má yatu ndetjun hiscan quisun na o sa nandya hiscan vitexa na jan. Hacuaha nuhya rë xi má yatu me xi vitexa ngajan. <sup>10</sup>Hñu me vëhë ne, ha cajnetaha nixtin xi cavitexa me. Ngu nga me ne, tivitexa me. Hane ngu sa me jan ne, hya xi cuitexa me, sahmi ngu yë xi hacuini cjin nixtin scaa rë me. <sup>11</sup>Hane chu chojyihí xi quicun chu hatsëë, peru quihndë tsajin chu, cojo chu vëhë cuma jyin me xi cuitexa me ngajan. Chu jan ne, ma jyin, peru hacuini xin cuinduva chu ta, tsëhë ngajñi rë me xi yatu jan ne, ngajan cuinduva chu hane cjuui hiscan cjuëya cha.

<sup>12</sup>Hane të ndyaja ru xi cahye ne, hacui të xuta xi cjëë cjuahatsja me xa xi cuitexa me. Hane me vëhë ne, sacu rë me cahndë xi cuitexa me tangun cojo chu, peru ngu hora ni cjuecani rë nixtin rë me. <sup>13</sup>Hane me vëhë ne, cama sacuaaha ngu ni cjuatacun rë me. Hane sahmi tangun me ngahñu rë me cojo gobiernu rë me sehe sua me xi cjuahatsja chu chojyihí. <sup>14</sup>Hane hya xi sahmi me si cojo Tsánga jan, scaa rë xi cjue xcun Tsánga cojo xuta xicjin. Hane xuta xicjin Tsánga ne, hacui me xi cavuxijin Nina, me xi ndaja finduju xi tjengui rë ta, Tsánga jan ne, Nai rë yëjë ni nai má me. Hacuaha vitexa me xuta xi vitexa. —Cuatjin cachja ángel cojo ná tsëhë na vëhë.

<sup>15</sup>Cachja sa ángel cojo ná cuitjin:

—Sacuaaha nandá xi cahye hiscan xi tacun na xi viteña yojo rë na, nuhya rë xi má xuta tsëhë yëjë ni tjë, yëjë nandya, xuta cjin, xuta xi chja yëjë hne. <sup>16</sup>Hane me xi sacuaaha të ndyaja ru ne, cuya xi choho scuëë me na xi viteña yojo rë, tsismi me na, hacuaaha cuejña cuatjin na. Hane xi cavejña suva na ne, sehe sinë chu yojo ran sehe cuaca ran cojo ndihi. <sup>17</sup>Të me jan ne, cojo ngu ni cjuatacun meje sua me xa rë me cojo ngahñu cjuarë me xi cjuahatsja chu chojyihí jan. Xi cuatjin casahmi me ne, camá hacuatjin cavincha Nina xahasen rë me xi cumá hisca nixtin xi cuma chihin hacutjin cavejñacacun Nina xi cumá. <sup>18</sup>Hane sacuaaha chjuun xi cahye jan ne, nuhya rë xi má ciudad rcun xi satë rë xi cumatitjun tsëhë yëjë ni xuta xi vitexa xuta ngasunhndë.

## 18

### *Cjanengui nandya Babilonia*

<sup>1</sup>Hya xi cavatju vihi ne, cahvë nga ngu ángel xi nduvajne tsëhë ngahnga xi jemu tjin rë ngahñu cjuarë. Hane nangui ne, casahasen rë cojo hasen rë ngahñu jan. <sup>2</sup>Hane ángel jan ne, cojo ngu xta hñu cajindaya cuitjin:

—¡Cjanengui! ¡Cafë ngahñu rë Babilonia jyë! Quihndë suva machji rë tsëhë xitsehen. Ngajan tsujyihiya hasen tsehen, ngajan vangui yëjë chu nisë xi jinë chu ngu xcusun chocun, chu xi chohovëë xuta chu. <sup>3</sup>Cuatjin camá rë ta tsëhë xi xuta ngasunhndë ne, cavincha sca rë me cojo xan rë cjuatsehen ran. Cojo na vëhë ne, me xi vitexa me ne, casahmi me cjuatsehen. Hacuaniitjin tsëhë xuta xi sahmi me negocio ta, camanchina me ngatsë rë cjuatsehen ran. —Cuatjin cachja ángel.

<sup>4</sup>Sehe cahndë nga ngu xta tsëhë ngahnga xi cachja cuitjin:

—Ngayun xi xuta naha ne, tetjun tsëhë nandya vihi. Tangunxun cojo sa xi cuajin yun cuatjunxun jyë rë, hane satiin nuju cjuañihí xi satë rë xuta vëhë. <sup>5</sup>Jyë rë na xi hacui nandya vëhë ne, casexohnga rë hisca cavechu ngahnga. Hane Nina ne, cjuaha cuenda me tsëhë cjuatsehen ran. <sup>6</sup>Nicuyun tsëhë na chuva xi casahmi na. Jo cuatjin vechutaha castigu xi cumá ran. Tiseccun rë copa ran jo cuatjin sa sehe hitsë sa cumá cjan xi cuma rë copa xi cavincha na tsëhë xuta. <sup>7</sup>Ngojo rë cjuaxta rë na xi jercu sahmi na mé xi fehya cjuatacun tsehen rë na ne, ndaja tuhun ran cjuañihí cjuachoho. Cuatjin cumá ran ta, cuitjin catsingatahacacun na cachja na: “Tejña cahndë rcun ta matitjun ngahan. Hacuini cahan ngahan, satiin ná cjuachoho.” Cuatjin tsingatahacacun na. <sup>8</sup>Vëhë xi xcun ngu ni nixtin, cuechutaha ran yëjë ni, ta cuechutaha ran cjuachoho, cuechutaha ran jindyá. Hacuaha



tsicjēya ran ndihi. Cuatjín cumá ta, tsēhē xi Nina, me xi sahmi cuenda rē jyē ran ne, ma sahmi me yējē ni.

<sup>9</sup>Ngajan xi xuta xi rcun xi casahmi cjuatsehen ngajan hacuaha casua cjuasua xahasen rē ngajan ne, scuēē me nihndi rē, hane squihnda me hacuaha cuiuyuju va me. <sup>10</sup>Hane cjuercun rē me ngatsē rē chiracun xi tivatju ngajan, sehe squindaya me cuichja me cuitjín:

—¡Ay! Jercu choho cavatju ciudad ndajyihi, ciudad rcun. Tu ñahñu ni ne casatē rē yējē ni cjuacjintacun xi cuma castigu rē.

<sup>11</sup>Hacuaha xuta xi sahmi me negocio ne, squihnda me hacuaha choho cumá rē me tsēhē xi quihndē ne, tsajín yo cuatsē chaha xi viteña me, <sup>12</sup>chaha xi camá tsēhē oro, tsēhē quicha tyava, cojo ndoyojo ndacun, cojo tu seti, cojo tsjían ndacun sa lino sa seda, sa xcusun hani sa moradu. Chaha rē ya xi ndaja jne, chaha xi camá tsēhē nehñu elefante, o tsēhē ya xi hnga chjí rē o tsēhē quicha sine, quicha hinda o tsēhē ndoyojo seti. <sup>13</sup>Tsajín yo cuatsē rē chaha rē canela cojo yahnga xcusun xi sahmi xi ndaja chinē comida o sa tyjungunsa, sa balsamo xi hmí rē muro, sa vinu, sa aceite, sa ndyaja, sa chu tsánga, sa naxín o sa carreta, sa mosu cachaha rē xi hacui cjuahñu rē xuta. Tsajín yo cuatsē tsēhē me. <sup>14</sup>Cuitjín chja tsēhē nandya jan:

—Xcusun ndacun xi jercu cafehya xahasen rijí ne, quijixín tsjín. Yējē ni cjuanchina rijí xi ndajyihi ne, cafēya, hane tsajín nu tsajín nixtín cuya sacú ri.

<sup>15</sup>Ngajan xi me xi caviteña ngajan hane cojo vēhē cama nchina me ne, cjuercun rē me ngatsē rē chiracun xi tivatju ngajan, xinchacun me cjin tsēhē, hane squihnda me hacuaha choho cumá rē me. <sup>16</sup>Cuitjín cuichja me tsēhē:

—¡Jemu va jyíhi nandya! Camá ngu nandya jyē, jemu ndacun tsjían catsicaja rē xuta rē. Tsjían ndaja xcusun hani moradu. Tsjían xi cavaquí rē nachjun oro cojo ndoyojo ndacun cojo tu seti. <sup>17</sup>Peru xcun xi ngu hora ne, cafē cavetsunya cjuanchina vē.

Hane yējē me xi matitjun xi vitexa tsēhē barcu cojo xuta xi hincha me cahntsua, cojo cha xi sahmi xa xcun barcu o sa xuta xi sahmi negocio cojo, cumamijí sahmi tiña me tsēhē. <sup>18</sup>Squindayava me hya xi scuēē me nihndi rē xi seti hane cuichja me cuitjín:

—Hatuxa tsajín sa ngu ciudad xi cuanitjín ndajyihi sacuaaha camá ciudad jyē vi.

<sup>19</sup>Hane cuitejnu me scuan rcu me ta jemu choho má rē me hacuaha squihndava me cuichja me cuitjín:

—¡Cojo cjuatsehen rē xuta nandya vi! Ngatsē rē cjuanchina rē me ne, tu yo ni me xi tjin rē ngu barcu rē chaha ne, cama nchina me. Peru ngu ñahñu ne, cavetsunya.

<sup>20</sup>Catamasua nuju tsēhē na, ngahnga. Catamasua nuju ngayun xi tyjahí cjuatacun nuju, ngayun xi má apóstol cojo ngayun xi má profeta. Catamasua nuju ta hindē casahmi Nina castigu na, casahmi cuenda me tsēhē na chuva xi casahmi na cojo nuju.

<sup>21</sup>Ngajan xi ngu ángel xi jercu tjin rē ngahñu ne, cafaha me ngu ndoyojo jyē chuva rē natsi rē molinu, hane catsingatjeya rē ngajñi ndachacun. Sehe cachja cuitjín:

—Chuva ngahñu vihi, cuanitjín ngahñu xi cjuinengui cojo nandya jyē xi hmí rē Babilonia. Hane tsajín nixtín xi cuya cumá. <sup>22</sup>Tsajín nixtín xi cuinuhya rē xi tsjiane cha chjine arpa ngajan, o sa ngu sun, o sa fane chiruví o sa fane tyjo. Hisca ngu cha chjine tsēhē tu mé ni xcusun ne, cuyaain sahmi xa ngajan. Hacuaha cuyaain nuhya rē ndoyojo rē molinu xi sahmi scuan rē pan. <sup>23</sup>Ndihí rē ngu lámpara ne, cuyaain tsejen hasen rē ngajan. Tsajín nu tsajín nixtín xi ngajan cuma cjuavixan. Cuatjín cumá cojo ta, xuta xi casahmi me negocio ngajan ne, jemu hñu cjuá rē me cojo yējē ni xuta ngasunhndē. Hane cavincha sca me xuta ne, cavindacha me cojo xcusun rē me.

<sup>24</sup>Hacuaha ngajan cavanga jni rē profeta cojo tsēhē xuta xi tyjahí cjuatacun rē me xcun Nina cojo jni rē yējē ni xicjín me xi camá catsiquehen me nguehe ngasunhndē.

## 19

### *Xutacjín xi cuaxēndaja me Nina*

<sup>1</sup>Hya xi camá cavatju vihi ne, cahndē sacuaaha xta rē xutacjín ngajan ngahnga xi chja cuitjín:

¡Catama jyē, catama hnga Nina! Nina ne, vaxētje me xuta, tjin rē me hasen ndajyihi xi seti, hacuaha ma sahmi me yējē ni.

<sup>2</sup>Jemu quixi cjuá xi vitexa me ta, casahmi me xujun jyē rē na xi caviteña yojo rē, na xi hñu cjuá na.

Na vēhē ne, catsinguetsun na cjuatacun rē ngayējē ni cojo cjuatsehen rē na.

Hane Nina ne, casahmingojo me cojo rē na jni rē xuta xi sahmi xa rē me. Jni rē me xi casahmi na xi cavanga.

<sup>3</sup>Sehe cavuya cachja me cuitjín:

—¡Catama jyē, catama hnga Nina! ta, nihndi ran ne, miji nchunchujun ni, nu nu ni.

<sup>4</sup>Ngajan xi can ñuju xuta changá cojo catsiñuju xcusun xi quicun ne, caviticja xcun Nina xi cjuaharcun rë me xi tacun me cahndë rcun. Cuitjin cachja me:

—¡Cuatjin jain! ¡Nihñu jyë nihñu hnga Nina!

<sup>5</sup>Sehe cavetju tsëhë cahndë rcun ngu xta xi chja cuitjin:

Nihñu jyë nihñu hnga Nina, ngayun xi nihñu xa rë me.

Nihñu jyë hnga me sa quihndi sa changá yun.

<sup>6</sup>Hya xi camá ne, cahndë sacuaaha xi tsë xutacjín. Nuhya rë sacuaaha fane nandan xi jemu hñu vanga o sacuaaha faneya xi tsinga chuhun. Hane cjuá rë ne cuitjin chja:

¡Catamajyë catamahnga Nina naja ta, ha cavetsihin sahmi me gobiernu hane ma sahmi me yëjë ni!

<sup>7</sup>Catamasua naja. Tahan cjuasua xahasen naja. Nihña jyë hnga me tsëhë xi cavechu cjuavixan rë Tsánga.

Chjuun rë ne, ha catsindaja na yojo ran.

<sup>8</sup>Casacu rë na cahndë. Hane cuaja na tsjian ndaja xi seti, xi tyjahi.

Tsjian jan ne, hacui xcusun ndaja xi sahmi xuta xi tyjahi cjuatacun rë me xcun Nina.

Cuatjin cachja xutacjín jan.

*Sinësuhí me tsëhë cjuavixan rë Tsánga*

<sup>9</sup>Hya xi camá ne, cachja ángel cojo ná cuitjin:

—Nihndi cjuá vi: “Jercu ndaja tsëhë me xi camachaya rë xi nduva me sinësuhí me tsëhë cjuavixan rë Tsánga.”

Hane cachja sa ángel cuitjin:

—Cjuá xi cachjá ne, cjuaquixi jain rë Nina.

<sup>10</sup>Hane ngahan ne, caticjátaha ntsacu ángel xi cjuaharcun rë. Peru cachja cojo ná cuitjin: —¡Xicanihñiii! ta, tangun ni chjí naja, ta xa naha ne, tangun cojo xa xi nihñu cojo xingun xi sua cumachaya rë cjuaquixi rë Jesús ne, hacui xa xi vitexa Nina. Nina ne, me vëhë chjuhuncun me.

Hacuaha cjuaquixi rë Jesús ne, vëhë sacuaaha cacun rë cjuá xi cachja profeta.

*Me xi quisun rë naxin tyava*

<sup>11</sup>Sehe cahvë xi tixaha ngahnga, hane ngajan ne, cahvë ngu chu naxi tyava. Hane me xi quisun rë chu ne, chja tsëhë me ta, sahmi chihin me cjuá rë me hacuaaha quixi me. Jemu quixi cjuá me hya xi tsichuva me xuta cojo sa xi hya xi sahmi me si. <sup>12</sup>Tuxcun me ne, sacuaaha ndihi xi ña vitjen. Rcu me ne, jercu hinchasun corona. Hane camahindu ngu ñihi rë me xi tsajin yo vëë rë, peru suva me vëë me. <sup>13</sup>Yaja me ngu tsjian xi tjintë ni ne, xi caseyaquinda cojo jni. Hane sacuaaha ñihi rë me ne, Cjuá rë Nina hmí rë me. <sup>14</sup>Hane tjengui rë me sindadu cjín tsëhë ngahnga. Sindadu jan ne, cuaja me tsjian ndaja xi tyava, xi tyjahi. Hane hacuanitjin hinchasun me naxin tyava. <sup>15</sup>Hane suva me ne, tsëhë hntsua me ne, vetju ngu quicha yuju xi cuanguihmu rë xutacjín. Hane hacuiin yuma cumá rë me xuta ta, cuitexa rë me cojo yaxti rë quicha. Hane sune me cahndë hisca nune rë uva cojo sa xi cuaxë me xan rë cjuacjan rë Nina, me xi ma sahmi yëjë ni. <sup>16</sup>Hacuaha xcun tsjian rë me cojo tyjuhmi rë me ne, camahindu ñihi vi: “Me xi matitjun tsëhë ngayëjë ni xi matitjun. Me xi matitjun tsëhë ngayëjë ni xi vitexa.”

<sup>17</sup>Hane cahvë xi ngu ángel ne, secun xcun tsuhi. Hane jindayahñu tsëhë nisë xi jemu hnga vitjen chu. Cuitjin cachja cojo chu:

—Nduvun. Catamatangun yun tsëhë suhi jyë rë Nina. <sup>18</sup>Ngajan xinu yojo rë xuta xi camatitjun, cojo yojo rë capitán rë sindadu cojo yojo rë xuta xi hñu cjuá, cojo yojo rë chu naxin cojo yojo rë xuta xi caxinchasun rë chu. Xinu yojo rë xuta, sa ndaya tjin me o sa xi caxteña me, sa langa me, sa changá me, xinu yojo rë me. —Cuatjin cachja me cojo chu nisë jan.

<sup>19</sup>Hane cahvë chu chojyihí jan cojo xuta xi vitexa me cojo sindadu cjín rë, hane camatangun cojo sa xi sahmi si cojo me xi hinchasun chu naxin tyava jan. <sup>20</sup>Hane ngajñi si vëhë ne, cachjaha rë chu chojyihí jan camá presu chu. Hacuanitjin ne camá presu chu xi casahmi cjuarcun ngatsë rë chu chojyihí cojo sa xi cavindacha chu xuta sehe setaha sellu rë chu xten me hacuaaha faharcun me xcusun ru. Sehe cacandiya quicu me catsijo chu ngajñi ndachacun xi ti cojo azufre. <sup>21</sup>Hane xicjin chu xi cavangui ne, catsiquehen me cojo quicha xi vetju tsëhë hntsua me xi miji rë naxin. Sehe yëjë ni nisë ne, cajiñësua chu hisca xi cavechu rë xahasen ru cojo yojo rë xi cuicun vi.

## 20

*Ngu mil nu xi seyahñu xitsehen*

<sup>1</sup>Sehe cahvë ngu ángel xi nduvajne tsëhë ngahnga, hane yahatsja ángel vë llavi tsëhë nduchin hacuaaha yahatsja ngu cadena jyë. <sup>2</sup>Hane cafaha rë yë jyë jan. Chu vëhë ne, hisca

hatsëë tacun chu. Chu vëhë ne, hacui naain o sa Satanás. Hane xi cafaha rë chu ne, catsihñu rë chu cojo cadena xcun xi ngu mil nu. <sup>3</sup> Hacuaha catsingatjenya ru cahntua nduchin. Sehe casechjahñu tingotjo rë cojo llavi hane casetaha xcun ngu sellu. Cuatjin camá cojo sa xi sacuiin sa cahndë cuindacha ru xutacjin hisca xi cuijnetaha ngu mil nu. Hane xi cuatju vëhë ne, cumandaya nga chu ngu jo nixtin.

<sup>4</sup> Hya xi camá ne, cahvë cahndë rcun hane xcun silla jan ne, siu me xi casatë rë xa xi cuitexa me. Hacuaha cahvë hasen rë me xi catisun rë rcu ngatsë rë cjuaquixi rë me xi casua me tsëhë Jesús hacuaha ngatsë rë cju rë Nina. Me vëhë ne, cafarhuacuaain rë me chu chojyih cojo xcusun ru, hacuaha casetaain rë me sellu rë chu sa xten me o sa tsja me. Hane cahvë xi cavuya nga cjuahñu rë me sehe cojo Cristu casahmi me gobiernu xcun ngu mil nu. <sup>5</sup> (Yahnga nima ne, cuyaaain cjuahñu hisca xi cjuë mil nu jan.) Matsejen ta vëhë nixtin xi tjun cuya cjuahñu rë nima. <sup>6</sup> Jercu ndaja tsëhë me hacuaha tyahi cjuatacun rë me xi cojo me satë rë me xi tjun cuya me cjuahñu. Cjuaveya xi majo ne, satiin rë me ta, tsajin më ma sahmi cojo me. Cumá me sacuaaha nahmi xcun Nina cojo Cristu hane sahmi me gobiernu cojo me xcun ngu mil nu.

<sup>7</sup> Hane xi cuijnetaha mil nu jan ne, cumandaya nga Satanás tsëhë ndavaya hiscan caveya me. <sup>8</sup> Sehe cuya cuindacha xutacjin rë jingujyë ni ngasunhdë, cuindacha me xuta rë Gog cojo xuta rë Magog, cojo sa xi sahmitangun rë tsëhë si. Hane xqui rë me xi cumatangun me ne, cuechu sacuaaha tsumi tjeheh rë ndajyë. <sup>9</sup> Hane xi camatangun me condra jan ne, cjue me jingujyë ni xcun nangui. Hane ngajñi si ne, cuiyujuhndee rë me cahndë xi siu sindadu cjin rë Nina cojo nandya xi tsihmucacun me. Peru ndihi ne, cuijne tsëhë ngahnga hane cjue cueti xuta condra jan.

<sup>10</sup> Hane Naain xi cavindacha rë ne, ningatjenya rë ngajñi laguna tsëhë azufre xi seti. Hane ha cuanitjin ne catundiya chu chojyih jan cojo chu xi cavindacha. Hane ngajan ne, cuatju chu cjuañih nixtin nixten, nu cju, nu nduva.

#### *Camacuenda tsëhë nima xcun cahndë rcun tyava*

<sup>11</sup> Hya xi camá ne, cahvë nga cahndë rcun tyava xi matitjun cojo me xi tacun xcun. Hane ngatsë rë cavatjucun me, cafëya nangui cojo ngahnga, hane casacuiin cahndë xi cuma rë. <sup>12</sup> Hacuaha cahvë nima. Sa changá, sa quihndi, hinchacun yëjë ni nima xcun cahndë rcun jan. Hya xi camá ne, ngu jo libro ne catuxaha. Hacuaha catuxaha ngu libro xi hacjahi. Hane libro vëhë ne, libro rë cjuahñu. Sehe camacuenda tsëhë, sacuaaha xcusun xi casahmi nima, hacutjin xi camahindu xcun libro tjun. <sup>13</sup> Ndachacun ne, casua nima xi tjintsja. Cjuaveya cojo tsjun ne, hacuaha casua nima xi tjintsja. Hane jima ngu nima ne, camacuenda tsëhë hacutjin xcusun xi casahmi me. <sup>14</sup> Hya xi camá ne, tsajin sa cjuaveya, tsajin Hades, cahndë xi viyuju nima ta, catundiya ngajñi laguna xi seti cojo ndihi. Hane ndihi vëhë ne, hacui cjuaveya majo. <sup>15</sup> Ngajan xi nima xi casetaain ñihi rë me xcun libro tsëhë cjuahñu ne, cavixuya ngajñi laguna tsëhë ndihi jan.

## 21

#### *Ngahnga cojo ngasunhdë ne, camá xatsë*

<sup>1</sup> Xi cavatju vëhë ne, cahvë ngu ngahnga xatsë cojo ngu ngasunhdë xatsë ta, tsëhë xi ngahnga xi tjun cojo nangui xi tjun ne, cafëya. Hane sacuaaha ndachacun ne, tsajin. <sup>2</sup> Hane ngahan, Juan, cahvë nandya xi catsinchacun Nina xi hmí rë Jerusalén xatsë. Canduvajne tsëhë Nina ngajan ngahnga. Jemu ndaja tsejen nandya vë ta, tsejen sacuaaha ngu na xi cuixan xi canicaja rë na tsjian ndajyih tsëhë xi nduva cha xi cuixan cojo rë na. <sup>3</sup> Sehe cahndë ngu xta hñu xi cachja tsëhë cahndë rcun. Cuitjin cachja:

—Ha quihndë cjue cuiyuju tangun Nina cojo xuta. Hane xuta jan ne, cumá xuta rë me, hane suva me ne, cumá me Nina rë me. <sup>4</sup> Hane Nina ne, tsixiya me yëjë ndatuxcun me. Quihndë tsajin sa cjuaveya. Tsajin sa cjuachoho. Tsajin më má squihnda me. Tsajin cjuahmu. Cuatjin cumá ta, tsëhë xi xcusun changá ne, ha cavatju.

<sup>5</sup> Hane me xi tacun xcun cahndë rcun ne, cachja me cuitjin:

—¡Tisahme xatsë yëjë ni xcusun!

Hane cachja me cojo ná cuitjin:

—Nihindi cju vihi ta, hacui cjuaquixindaja hane macjain naja tsëhë.

<sup>6</sup> Hane cachja sa cojo ná cuitjin:

—Ha camachihin. Sacuaaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Me xi xinda rë xahasen rë me ne, tu cuatjo ni suá cuihi me tsëhë nandá xi sua cjuahñu xatsë. <sup>7</sup> Me xi scaa rë cjue xcun ne, sacu rë me cuatjo rë Nina. Hane cumá ngahan Nina rë me, hacuaha cumá me quihndi naha. <sup>8</sup> Peru yo xi tsacjun, yo xi macjaain rë, yo xi hngacacun, cha tsiquehen, me xi sahmi cjuatsehen ngajñi xihin o sa ngajñi chjuun, o xi sahmi surqui, o xi faharcun nina ndacha,

o xi chjaain me cjuaquixi ne, yějě ni me vėhė ne, sacu rė me cahndė ngajńi laguna tsėhė ndihi xi ti cojo azufre. Hane vėhė ne, hacui cjuaveya xi majo.

*Hacutjin jyihi ciudad xatsė xi hmı Jerusalem*

<sup>9</sup> Hane ngu ńgel tsėhė yatu jan xi yahatsja tyucu tė xi quitsė rė cojo yatu cjuacjintacun xi vijnetaha jan ne, canduvatjengui nń ne, cachja cojo nń cuitjin:

—Ndove ta, tsingńcun ri na xuta vixan, na xi camń chjuun rė Tsńnga.

<sup>10</sup> Hane ńgel jan ne, quijicojo nń ngajńi nijńa naha hiscan ngu ndetjun naxi hnga. Sehe catsingacun nń nandya xi catsinchacun Nina, nandya xi hmı rė Jerusalem ta tinduvajne tsėhė Nina ngajan ngahnga. <sup>11</sup> Hane ńa tsejen xi seti cojo hasen tsėhė ngahńu rė Nina, hisca sua hasen rė sacuaha ngu ndyojo seti xi yufa sacuaha ndyojo tsin. <sup>12</sup> Hane cavindee rė ngu xondyojo teya hacuaha hnga. Tejń mń tingotjo rė, hane jimangu tingotjo jan ne, ngajan siu ngu ńgel. Hacuaha ngajan camahindu ńihi rė tejń tje rė xuta nangui Israel. <sup>13</sup> Xondyojo jan ne, tjin jyan tingotjo jimangu ladu. Jyan mń ladu vetjucaa tsuhi. Jyan mń ladu ngatihin. Jyan mń ladu canangui. Hacuaha jyan mń ladu vetje tsuhi. <sup>14</sup> Xondyojo rė ne, tacun xcun tejń xihndė nańa. Hane xihndė nańa ne, yaha ńihi rė tejń apństol rė Tsńnga xi camahindu xcun.

<sup>15</sup> ńgel xi chja cojo nń ne, yaha ngu ya naxu tsėhė oro xi machjirėhė sacuaha ya chuva xi cjuahachuva rė nandya cojo xondyojo cojo tingotjo rė. <sup>16</sup> Nandya jan ne, cuadradu jyihi. Jimangu tjeheh rė ne, jo mil jo cientu kilńmetro mń xi nduju. Hane hacuanitjin ne mń xi hnga. <sup>17</sup> Hane catsichuva xondyojo rė. Vėhė tjin rė ngu cientu cojo yachan ńuju nda sacuaha chuva rė xuta ta vėhė casahmixa ńgel cojo.

<sup>18</sup> Sacuaha xondyojo rė ne, camń cojo ndyojo seti xi hmı rė jaspe, hane nandya ne, suva oro camń hane seti sacuaha ndyojo tsin. <sup>19</sup> Xihndė nańa rė xondyojo rė nandya ne, camń cojo ndyojo seti rė yějě ni xcusun xi sacuaha xcusun rė yeńa. Xihndė nańa rė xi tjun ne, camń tsėhė jaspe. Xi majo ne, tsėhė zafiro. Xi majyan ne, tsėhė ńgata, mń ńuju ne, tsėhė esmeralda, <sup>20</sup> mń hńu ne, tsėhė ńnice, mń jyun ne, tsėhė cornalina, mń yatu ne, tsėhė crisńlito, mń jyin ne, tsėhė berilo, mń ńaja ne, tsėhė topacio, mń tė ne tsėhė cirsopraso, mń tengu ne, tsėhė jacinto, hane mń tejń ne, tsėhė amatista. <sup>21</sup> Sacuaha tejń tingotjo jan ne, camń tsėhė tu seti xi hmı perla. Hane jimangu tingotjo camń tsėhė ngu perla. Hane ndiyatė rė nandya jan, tsėhė suva oro camń peru sacuaha ndyojo seti xi ńa hasen tsejen.

<sup>22</sup> Ngajan ciudad vėhė ne, cahveen ngu yungun. Mamijı rė ta tsėhė xi ngajan cuiyuju Nina, Nai naja xi ma sahmi me yějě ni, cojo Tsńnga xi hacui me sacuaha yungun. <sup>23</sup> Cuanitjin ne, mamijı rė tsuhi cojo sń xi sua hasen rė ta, tsėhė xi hasen rė ngahńu rė Nina ne, sua hasen rė ngajan, hane Tsńnga ne, mń ndihi rė. <sup>24</sup> Yějě xutacjin ne, tsujyihya me cojo ndihi vė xi cjue me cojo ngasunhndė rė me, hane xuta matitjun rė me ne, ngajan cjue canı me ngahńu rė xa xi vitexa me cojo xi cuaxėndaja me. <sup>25</sup> Ngajan hisca xi ngu nixtin ne, sechjaain tingotjo rė, tsėhė xi ngajan ne, tsajin nixtin cuma nguixun. <sup>26</sup> Hane xutacjin tsėhė ngasunhndė ne, cjue canı me ngahńu cjuu rė me cojo cjuanchina rė me. <sup>27</sup> Hatuxa tsajin cahndė xi cuma rė tu mė ni xi hacuiin tyahı xcun Nina. Tsajin yo xi sahmi cjuatsehen, tsajin yo xi cuichja ndesu. Suva ni me xi casetaha ńihi rė xcun libro rė Tsńnga, libro xi yaha ńihi rė me xi sacu rė cjuahńu xatsė ne, me vėhė sacu rė me cahndė.

## 22

<sup>1</sup> Sehe ńgel ne, catsingacun nń ndajyė xi hacui nandń xi sua cjuahńu. Nandń vėhė ne, nandń yufa xi hasen sacuaha ndyojo tsin. Hane nandń vėhė ne, vetju tsėhė cahndė rcun rė Nina cojo Tsńnga, <sup>2</sup> hane vanga taha ndiyatė cavasen nandya. Xingu xingu ladu tsėhė ndajyė ne, secun ya tsėhė cjuahńu. Ya vėhė ne, tejń ndiya xi ngu nu tjin chan tsėhė tu rė ta, chuva sń sua tu rė. Hane xca rė ya ne, machjirėhė xi tsirqui rė xutacjin jan. <sup>3</sup> Ngajan ne, tsajin mė xi chohovėė Nina tsėhė. Ngajan nandya vė tacun cahndė rcun xi tsėhė Nina cojo Tsńnga. Hane ngajan ne, me xi tacun xi xa rė me ne, cjuahacuenda rė me. <sup>4</sup> Scuėė me xcun Nina, hane ńihi rė Nina ne, setaha xten me. <sup>5</sup> Mamijı rė ndihi, sa ndihi rė lńmpara o sa tsėhė tsuhi ta, Nina Nai naja ne, sua rė me hasen rė me. Hacuaha gobiernu xi sahmi me ne, cjuecani rė yějě nu, yějě nixtin.

*Camatińa nixtin xi cuya Jesucristu*

<sup>6</sup> Hya xi camń ne, cachja ńgel jan cojo nń cuitjin:

—Cjuu vihi ne, cumacjain nuju tsėhė ta, quixi jain. Nina, Nai naja ne, catsingatju me ńgel rė me xi sua cumachaya rė hasen rė xuta xi chja cjuu rė me tsėhė xcusun xi xati cumń.

<sup>7</sup> Chja cjuu ta:

—Tuhuncuendun xi ngutjen cuinduvń. Jercu ndaja tsėhė xuta xi vetjondaja me sah-michihin me cjuu rė libro vihi xi chja tsėhė xcusun xi sehe cumń.

<sup>8</sup> Juan hmí ná. Cahndé, hacuaha cahvé xcusun vihi. Hane hya xi camá cahndé cahvé ne, caticjaxcun taha ntsacu ángel jan xi catsingacun ná xcusun vihi ta, cjuaharcun ángel jan.

<sup>9</sup> Peru cachja ángel cuitjin:

—¡Xicanihñiil ta, tangun ni chjí naja, ta xa naha ne, tangun cojo xa xi nihñu cojo xingun xi má profeta cojo yahnga xingun xi vetjo me cjuá rë libru vihi. Nina ne, me vëhé chjuhuncun me.

<sup>10</sup> Hacuaha cachja me cuitjin:

—Xicavisaniin sellu cjuá xi sehe cumachihin xi hinchá libru vihi, ta nixtin rë ne, ha meje cuechu. <sup>11</sup> Cueña xi xuta xi choho sahmi me ne, catjinduju xi choho sahmi me, hane xuta tsehen ne, catjinduju me cojo cjuatsehen rë me, hacuanitjin ni xuta xi quixi me ne, catjinduju me cojo ndiya rë cjuaquixi, hane xuta xi tyjahi cjuatacun rë me, catjinduju me cojo ndiya rë cjuatacun tyjahi.

<sup>12</sup> Chja me cuitjin:

—Tuhuncuendun xi ngutjen cýa. Hane xi cýa ne, nduva cojo chjí nuju. Suá rë jimangu me chuva rë hacutjin xi casahmi me. <sup>13</sup> Ngahan ne, sacuaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Tejña hisca ntsacu cavetsihin yëjë ni, hane tejña cuaha hya xi cjué. Matitjun, matjengui ngahan.

<sup>14</sup> Jemu ndaja tsëhé xuta xi catsityjahi me tsjian rë me cojo sa xi sacu rë me cahndé xi siné me tsëhé ya rë cjuahñu xatsë. Xi cuatjin ne, cuma cuisehen me taha tingotjo rë nandya jan. <sup>15</sup> Peru xuta tsehen cuiyuju me ndatsen cojo xuta xi sahmi cjuasurquí, o xi sahmi cjuatsehen ngajñi xihin o sa ngajñi chjuun, o xi tsiquehen, o xi faharcun nina ndyojo o me xi tsihmucacun cjuandacha. Yëjë ni me vëhé cuiyuju me ndatsen nandya.

<sup>16</sup> —Ngahan, Jesús ne, catsingátju ángel naha xi tsinguixi xcun ngayun xuta yungun cjuaquixi vihi. Ngahan ne, tjé rë David má ngahan. Quihndindaicjin rë David má ngahan. Niñú seti tsëhé nguitajñu má ngahan. —Cuatjin chja Jesús.

<sup>17</sup> Ngajan xi Hasen rë Nina cojo na xi cuixan cojo Tsánga ne, cjuayangui me cuitjin:

—Nduvun.

Hacuaha me xi cuihndé cjuá vëhé ne, cuichja me cuinitjin ni:

—Nduvun.

Sa xi xinda nuju ne, nduvun. Sa xi cjueyatacun ne, siuhun tu cuatjo ni nandá rë cjuahñu.

<sup>18</sup> Suá cumachaya nuju ngayun xi visiñuju cjuá rë xujun vihi xi sehe cumachihin ta, sa xi tjin yo xi cuesuntaha sa cjuá cojo cjuá xi camahindu nguehe, Nina ne, cuesuntaha me cjuañi xi camahindu xcun xujun vi. <sup>19</sup> Hacuanitjin ne, sa xi tjin yo xi cjuahataha rë cjuá vihi xi sehe cumachihin, Nina ne, cjuahaxin me cahndé xi cumá rë me xcun xujun rë cjuahñu cojo tsëhé nandya xi catsinchacun Nina cojo tsëhé xcusun ndaja xi camahindu xcun libru vihi.

<sup>20</sup> Hane me xi sua cjuaquixi xi cuicun vi ne, chja me cuitjin:

—Hatuxa nduva xati.

Cuatjin chja me. Cuatjin ndatjin. Nduvun, Tatá Jesús.

<sup>21</sup> Quihndé ne, catisaté nuju cjuandaja rë Nai naja, Jesucristu. Cuatjin jain cumá.